

## **Bible Portions in Bagheli**

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

*Language:*  
*Country:*  
*Publisher:*  
*Copyright:*  
*Last Updated:* 2023-10-20  
*ID:* cf540db8-8c78-49fe-817b-0e5359872ab8  
*ISO:* bfy  
*ISBN:*

मत्ती.....	4
मरकुस .....	33
लूका .....	51
यूहन्ना .....	81
खास चेलन.....	102
रोमियन .....	127
1 कुरिन्थियन .....	141
2 कुरिन्थियन .....	154
गलातियन .....	163
इफीसियन.....	168
फिलिप्पियन.....	173
कुलुस्सियन.....	177
1 थिस्सलुनीकियन .....	181
2 थिस्सलुनीकियन .....	184
1 तीमुथियुस .....	186
2 तीमुथियुस .....	190
तीतुस.....	193
फिलेमोन.....	195
इब्रानियन .....	197
याकूब .....	207
1 पतरस .....	211
2 पतरस .....	215
1 यूहन्ना.....	218
2 यूहन्ना.....	222
3 यूहन्ना.....	223
यहूदा .....	224
दरसनन के बातँय .....	226

# मत्ती

## इआ किताब के परिचय

मत्ती के लिखी खुसी के खबर माहीं इआ बताबा ग हय, कि केबल यीसु मसीहय, उआ मुक्ती देंइ बाले आहीं, जिनखे पड़दा होंइ के बारे माहीं भबिस्पबानी कीन गे रही हय। अउर पबित्र सास्त्र माहीं जउन वादा परमातिमा, हजारन बरिस पहिले अपने चुने मनइन से किहिन रहा हय। ओही उँइन मुक्ती देंइ बाले अरथात यीसु मसीह के व्दारा पूर किहिन हीं। अउर इआ खुसी के खबर केबल यहूदी लोगन भर के खातिर न होय, जिनखे बीच माहीं यीसु मसीह पड़दा भें तय, अउर पाले पोसे गें तय, बलकिन इआ खुसी के खबर संसार के सगले मनइन के खातिर आय।

मत्ती के लिखी खुसी के खबर बड़ी सावधानी पूर्वक लिखी गे ही। एखर सुरुआत यीसु मसीह के जनम के बारे माहीं जानकारी से होत ही, अउर ओखे बाद यीसु के बपतिस्मा, अउर परिच्छा के बारे माहीं बताबा ग हय, अउर ओखे बाद गलील प्रदेश माहीं प्रचार करब, सिच्छा देब, अउर बिमारन काहीं नीक करँइ के बारे माहीं बताबा ग हय। एखे बाद इआ खुसी के खबर माहीं, यीसु के गलील प्रदेश से लइके यरूसलेम सहर तक के यात्रा के बारे माहीं, अउर यीसु मसीह के जीवन के आखिरी दिनन के घटनन के बारे माहीं बताबा ग हय, इआ खुसी के खबर के अन्त माहीं, यीसु काहीं क्रूस माहीं चढ़ाए जाँइ, अउर मरेन म से दुसराय जिन्दा होंइ के बारे माहीं बताबा ग हय।

अपना पंचन से इआ बिनती हय, कि इआ खुसी के खबर काहीं बड़े ध्यान से पढ़ी, अउर एहिन के मुताबिक जीवन बिताई, त अपना पंचन काहीं परमातिमा से खुब आसीस मिली।

रूप-रेखा :

बंसाबली अउर यीसु मसीह के जनम  
यूहन्ना बपतिस्मा देंइ बाले के सेवा के काम  
यीसु के बपतिस्मा अउर परिच्छा  
गलील प्रदेश माहीं यीसु के सेवा के काम  
गलील प्रदेश से यरूसलेम सहर तक यीसु के यात्रा  
यरूसलेम सहर माहीं अन्तिम हप्ता  
प्रभू यीसु के मरेन म से जिन्दा होब अउर चलन काहीं देखाई देब

### यीसु मसीह के बंसाबली

(लूका 3:23-38)

1 अब्राहम अउर राजा दाऊद के सन्तान यीसु मसीह के बंसाबली इआमेर से हय, 2 अब्राहम से इसहाक पड़दा भें, अउर इसहाक से याकूब पड़दा भें, अउर याकूब से यहूदा अउर उनखर भाई लोग पड़दा भें। 3 अउर यहूदा अउर तामार से फिरिस, अउर जोरह पड़दा भें, अउर फिरिस से हिस्त्रोन पड़दा भें, अउर हिस्त्रोन से एराम पड़दा भें। 4 अउर एराम से अम्मीनादाब पड़दा भें, अउर अम्मीनादाब से नहसोन पड़दा भें, अउर नहसोन से सलमोन पड़दा भें। 5 अउर सलमोन अउर राहाब से बोअज पड़दा भें, अउर बोअज अउर रूत से ओबेद पड़दा भें; अउर ओबेद से यिसय पड़दा भें। 6 अउर यिसय से राजा दाऊद पड़दा भें, अउर राजा दाऊद उरिय्याह के मेहेरिआ काहीं राख लिहिन तय, ओहिन से सुलैमान पड़दा भें। 7 अउर सुलैमान से रहबाम पड़दा भें; अउर रहबाम से अबिय्याह पड़दा भें; अउर अबिय्याह से आसा पड़दा भें। 8 अउर आसा से यहोसाफात पड़दा भें अउर यहोसाफात से योराम पड़दा भें, अउर योराम से उज्जियाह पड़दा भें। 9 अउर उज्जियाह से योताम पड़दा भें, अउर योताम से आहाज पड़दा भें, अउर आहाज से हिजिकिय्याह पड़दा भें। 10 अउर हिजिकिय्याह से मनस्सिह पड़दा भें, अउर मनस्सिह से आमोन पड़दा भें, अउर आमोन से योसिय्याह पड़दा भें। 11 अउर इजराइल के मनइन काहीं बंदी बनाइके बेबीलोन देस माहीं लइ जाँइ के समय योसिय्याह से युकुन्याह अउर उनखर भाई पड़दा भें।

12 बन्दी बनाइके बेबीलोन माहीं पहुँचे के बाद युकुन्याह से सालतिएल पड़दा भें; अउर सालतिएल से जरुब्बाबिल पड़दा भें। 13 अउर जरुब्बाबिल से अबीहूद पड़दा भें, अउर अबीहूद से इलयाकीम पड़दा भें; अउर इलयाकीम से अजोर पड़दा भें। 14 अउर अजोर से सदोक पड़दा भें; अउर सदोक से अखीम पड़दा भें; अउर अखीम से इलीहूद पड़दा भें। 15 अउर इलीहूद से इलियाजार पड़दा भें; अउर इलियाजार से मत्तान पड़दा भें; अउर मत्तान से याकूब पड़दा भें। 16 अउर याकूब से यूसुफ पड़दा भें; जउन मरियम के मंसेरुआ आहीं, अउर मरियम से यीसु पड़दा भें, जउन मसीह कहाबत हैं। 17 इआमेर से अब्राहम से राजा दाऊद तक चउदा पीढ़ी भय, अउर राजा दाऊद से बेबीलोन माहीं बंदी बनाइके पहुँचाए जाँय तक चउदा पीढ़ी भय, अउर बंदी होइके बेबीलोन माहीं पहुँचाए जाँय के समय से मसीह तक चउदा पीढ़ी भय।

### यीसु मसीह के जनम

(लूका 1:26-38; 2:1-7)

18 यीसु मसीह के जनम इआमेर से भ, कि उनखे महतारी मरियम के सगाई यूसुफ के साथ होइगे रही हय, पय उनखे साथ काज होंइ से पहिलेन ऊँ पबित्र आत्मा के सक्ती से लइकहाई होइ गई तय। 19 अउर उनखर मंसेरुआ यूसुफ जउन खुब नीक मनई रहे हँय, ऊँ मरियम काहीं बदनाम नहीं करँइ चाहत रहे आहीं, एसे ऊँ मन माहीं इआ बिचार करत रहे हँय, कि

† यहूदी नेम काहीं निकहा से मानँइ बाले मनई रहे हँय

हम उनहीं चुप्पय से छोंड़ि देब।<sup>20</sup> अउर जब ऊँ एखे बारे माहीं सोचतय रहे हँय, तबहिन प्रभू के दूत उनहीं सपन माहीं देखाई दिहिन, अउर उनसे कहँइ लागें, “हे यूसुफ राजा दाऊद के सन्तान, तूँ अपने मेहेरिआ मरियम काहीं अपने इहाँ लइ जाँइ से डेरा न; काहेकि जउन उनखे पेटे माहीं बच्चा हय, उआ पबित्र आत्मा के सक्ती से भ हय।<sup>21</sup> अउर उनखे लड़िका पइदा होई, अउर तूँ उनखर नाम यीसु धराया; काहेकि ऊँ अपने लोगन काहीं उनखे पापन से मुक्ती देइहँय।”

<sup>22</sup> इआ सब एसे भ, कि जउन बचन प्रभू अपने सँदेस बतामँइ बाले के व्दारा कहिन रहा हय; उआ पूर होय।<sup>23</sup> कि “देखा एकठे कुमारी लड़कहाई होई, अउर ओखे लड़िका पइदा होई अउर ओखर नाम ‘इम्मानुएल’ धराबा जई, जेखर मतलब हय ‘परमातिमा † हमरे पंचन के साथ हें।”<sup>24</sup> जब यूसुफ के नींद खुली तब प्रभू के दूत के हुकुम के मुताबिक ऊँ मरियम से काज कइके उनहीं अपने घर लइ आएँ।<sup>25</sup> अउर जब तक उनखे लड़िका पइदा नहीं होइगा, तब तक यूसुफ उनखे साथ नहीं सोइन, अउर जब उनखे लड़िका पइदा भ, तब उनखर नाम यीसु धराइन।

### तरइअन के बारे माहीं जानँइ बालेन के यीसु काहीं देखँइ आउब

2 जब यीसु के जनम यहूदिया प्रदेस के बैतलहम गाँव माहीं भ, उआ समय राजा हेरोदेस राज करत रहे हँय, त देखा, यीसु के जनम के कुछ समय के बाद पूरुब दिसा से तरइअन के बारे माहीं जानँइ बाले कइअक जने यरूसलेम सहर माहीं आइके पूँछँइ लागें, कि<sup>2</sup> “यहूदी लोगन के राजा जिनखर अबहिनय जनम भ हय, ऊँ कहाँ हँ?” काहेकि उनखे जनम के बारे माहीं बतामँइ बाली तरइया काहीं हम पंचे पूरुब दिसा माहीं देखेन हय, एहिन से उनहीं प्रनाम करँइ आए हएन।<sup>3</sup> इआ सुनिके राजा हेरोदेस अउर उनखे साथ सगले यरूसलेम सहर के मनई घबराइगें।<sup>4</sup> तब राजा हेरोदेस यहूदी समाज के प्रधान याजकन अउर मूसा के बिधान सिखामँइ बालेन काहीं एकट्ठा कइके उनसे पूँछिन, कि “मसीह के जनम कहाँ होइ चाही?”<sup>5</sup> तब ऊँ पंचे उनसे कहिन, कि “यहूदिया प्रदेस के बैतलहम गाँव माहीं।” काहेकि परमातिमा के सँदेस बतामँइ बाले इआमेर से लिखिन हीं।<sup>6</sup> कि, “हे बैतलहम गाँव, जउन तूँ यहूदा प्रदेस माहीं हया, तूँ कउनव मेर से यहूदिया प्रदेस के अधिकारिन माहीं सगलेन से छोट नहिं आह्या; काहेकि तौहरे म से एकठे सासन करँइ बाला पइदा होई, जउन हमरे प्रजा इजराइल के रखबारी करी।”<sup>7</sup> तब राजा हेरोदेस चुप्पय से तरइअन के बारे माहीं जानँइ बालेन काहीं बोलाइके उनसे पूँछिन, कि “बताबा तरइया ठीक केतने समय देखाई दिहिस रहा हय।”<sup>8</sup> अउर ऊँ उनहीं पंचन काहीं इआ कहिके बैतलहम गाँव पठइन, कि “जाइके उआ लड़िका के बारे माहीं निकहा से पता लगाबा”, अउर जब उआ तौहई मिल जाय, त हमहीं खबर दिहा, जउने हमहूँ आइके उनहीं प्रनाम करी।

<sup>9</sup> तब तरइअन के बारे माहीं जानँइ बाले राजा के बात काहीं सुनिके उहाँ से चलेंगे, अउर देखा, जउने तरइया काहीं ऊँ पंचे पूरुब दिसा माहीं देखिन रहा हय, उआ उनखे आँगे-आँगे चलँइ लाग, अउर जहाँ उआ लड़िका रहा हय, उआ जघा के ऊपर पहुँचिके रुकिके।<sup>10</sup> उआ तरइया काहीं देखिके ऊँ पंचे खुब खुसी भें।<sup>11</sup> अउर ऊँ पंचे उआ घर के भीतर गें, अउर उआ लड़िका काहीं अपने महतारी मरियम के साथ देखिन, अउर गोड़न गिरिके उनहीं प्रनाम किहिन; अउर कीमती चीजन से भरे आपन-आपन थइला खोलिके उनहीं सोन, अउर लोभान, अउर गन्धरस के भेंट चढ़ाइन।<sup>12</sup> अउर तरइअन के बारे माहीं जानँइ बाले सपन माहीं परमातिमा से चेतउनी पाइन, कि “राजा हेरोदेस के लघे पुनि न जया”, एसे ऊँ पंचे दुसरे गइल से होइके अपने देस काहीं चलेगें।

### यीसु अउर उनखे महतारी-बाप के मिस देस काहीं जाब

<sup>13</sup> अउर जब तरइअन के बारे माहीं जानँइ बाले चलेगें, तब प्रभू के एकठे दूत यूसुफ काहीं सपन माहीं देखाई दइके कहिन, कि “उठा, इआ लड़िका अउर एखे महतारी काहीं घलाय लइके मिस देस माहीं भागि जा; अउर जब तक हम तौहसे न कही, तब तक तूँ उहँइ रह्या; काहेकि राजा हेरोदेस इआ लड़िका काहीं ढुँढबामँइ बाला हय, जउने एही मरबाय डारया।”<sup>14</sup> एसे यूसुफ रातयके उठिके लड़िका अउर ओखे महतारी काहीं लइके मिस देस काहीं चल दिहिन।<sup>15</sup> अउर जब तक राजा हेरोदेस मर नहीं ग, तब तक यूसुफ उहँइ रहें; एसे कि उआ बचन पूर होय, जउन प्रभू अपने सँदेस बतामँइ बाले के व्दारा कहिन रहा हय, कि “हम अपने लड़िका काहीं मिस देस से बोलायन।”

### राजा हेरोदेस व्दारा बच्चन के कतल करबाउब

<sup>16</sup> जब राजा हेरोदेस काहीं इआ पता चला, कि तरइअन के बारे माहीं जानँइ बाले हमहीं धोखा दिहिन हीं, तब उआ खुब गुस्साइगा। अउर अपने सिपाहिन काहीं पठइके, तरइअन के बारे माहीं जानँइ बालेन के बताए सही समय के मुताबिक, बैतलहम गाँव अउर ओखे लघे-लघे के गाँमन के सगले लड़िकन काहीं, जउन दुइ बरिस के अउर ओसे कम उमिर के रहे हँय, उनहीं मरबाय डारिस।<sup>17</sup> तब जउन बचन परमातिमा के सँदेस बतामँइ बाले यिर्मयाह के व्दारा कहा ग रहा हय, उआ पूर भ,<sup>18</sup> कि “रामाह गाँव माहीं बड़ा दुख के बोल सुनाई दिहिस, रोउब अउर बड़ा बिलाप करब, राहेल अपने लड़िकन के खातिर रोबत रही हँय, अउर चुप नहीं होइ चाहत रही, काहेकि ऊँ पंचे मरिगे रहे हँय।”

### यूसुफ के परिवार के मिस देस से लउटब

<sup>19</sup> राजा हेरोदेस के मरे के बाद, प्रभू के दूत मिस देस माहीं यूसुफ काहीं सपन माहीं देखाई दइके कहिन।<sup>20</sup> कि “उठा, लड़िका अउर ओखे महतारी काहीं लइके इजराइल देस माहीं चले जा; काहेकि जउन इआ लड़िका के प्रान लेंइ चाहत रहे हँय, ऊँ पंचे मरिगे हँय।”<sup>21</sup> तब यूसुफ उठिके, लड़िका अउर ओखे महतारी काहीं साथ माहीं लइके इजराइल देस माहीं आएँ।<sup>22</sup> पय इआ सुनिके, कि अरखिलाउस अपने बाप हेरोदेस के जघा माहीं यहूदिया प्रदेस माहीं राज कइ रहा हय, यूसुफ उहाँ जाँइ से डेराइगें; अउर सपन माहीं चेतउनी पाइके गलील प्रदेस माहीं चलेगें।<sup>23</sup> अउर नासरत नाम के गाँव माहीं जाइके बसिगें; जउने उआ बचन पूर होय, जउन परमातिमा के सँदेस बतामँइ बालेन के व्दारा कहा ग रहा हय, कि, “उआ नासरी कहाई।”

### यूहन्ना बपतिस्मा देँइ बाले

(मरकुस 1:1-8; लूका 3:1-18; यूहन्ना 1:6-8,15-34)

3 जब यीसु नासरत गाँव माहीं रहत रहे हँय, तबहिनय यूहन्ना बपतिस्मा देँइ बाले आइके, यहूदिया प्रदेस के सुनसान जघा माहीं इआ प्रचार करँइ लागें, कि<sup>2</sup> “पाप करब छोंड़िके परमातिमा के लघे आबा, काहेकि †स्वर्ग के राज लघेन आइगा हय।”<sup>3</sup> ई उँइन यूहन्ना आहीं जेखर चरचा परमातिमा के सँदेस बतामँइ बाले यसायाह के व्दारा कीनगे ही, कि † “सुनसान जघा माहीं एक जने के गोहरामँइ के बोल सुनात हय कि, †प्रभू के गइल तइआर करा, अउर उनखे खातिर सइकँय सऊँ करा।”<sup>4</sup> अउर यूहन्ना ऊँ के बार से बना ओन्हा पहिरे रहे हँय, अउर अपने करिहाँ माहीं चमड़ा के पट्टा बाँधे रहे हँय, अउर ऊँ चिडुन काहीं अउर जंगल के महिपर खात रहे हँय।

<sup>5</sup> जब ऊँ प्रचार करत रहे हँय, तब यरूसलेम सहर, अउर सगले यहूदिया प्रदेस के मनई, अउर यरदन नदी के लघे-लघे के सगले मनई उनखे लघे

† 1:23 यसा 7:14

†† परमातिमा हरबिन मनइन के ऊपर राज करिहँय † 3:3 यसा 40:3 †† प्रभू काहीं सोइकार करँय के खातिर खुद काहीं तइआर करा

आइके एकट्टा होइगें।<sup>6</sup> अउर अपने-अपने पापन काहीं सोइकार कइके यरदन नदी माहीं उनसे बपतिस्मा लिहिन।<sup>7</sup> जब यूहन्ना बपतिस्मा देइ बाले खुब फरीसी लोगन काहीं अउर सदूकी लोगन काहीं बपतिस्मा लेंड के खातिर अपने लघे आबत देखिन, त उनसे कहिन, कि “हे साँप के बच्चन कि नाई बुरे मनइव, तौहई को चेताय दिहिस, कि परमातिमा के आमँड बाले सजा से बचा?”<sup>8-9</sup> अउर तूँ पंचे अपने जीवन से इआ देखाय द्या, कि तूँ पंचे बास्तव माहीं पाप करब छोड़ दिहा हय, अउर परमातिमा के बातन काहीं मनते हया। तूँ पंचे अपने-अपने मन माहीं इआ न सोचा, कि हम अब्राहम के सन्तान आहने एसे परमातिमा हमहीं सजा न देइहँय; काहेकि हम तौहसे सही कहित हएन, कि परमातिमा ई पथरन से अब्राहम के खातिर बंस पइदा कइ सकत हें।<sup>10</sup> अउर अब परमातिमा के क्रोध रूपी कुल्हारा बिरबन के जर माहीं धरा हय, एसे जउन-जउन बिरबा निकहा फर न फरी, उआ काटिके आगी माहीं झोंक दीन जई।<sup>11</sup> तूँ पंचे अपने-अपने पापन से पश्चाताप किहे हया, इआ देखाँमँड के खातिर हम तौहई पंचन काहीं पानी से बपतिस्मा देइत हएन, पय जउन हमरे बाद आमँड बाले हें, ऊँ हमसे एतना महान हें; कि हम त उनखर पनहीं तक उठामँड के काबिल नहिँ आहने, ऊँ तौहई पबित्र आत्मा अउर आगी से बपतिस्मा देइहँय।<sup>12</sup> उनखर न्याय रूपी सूपा उनखे हाँथेन माहीं हय; अउर ऊँ संसार रूपी राहा काहीं निकहा से साफ करिहँय; अउर गोहूँ काहीं अपने बखारी माहीं रखिहँय; पय बूसा काहीं कबहूँ न बुझाँय बाली आगी माहीं डार देइहँय।

### यीसु के बपतिस्मा

<sup>13</sup> जब यूहन्ना बपतिस्मा देत रहे हँय, उहय समय यीसु गलील प्रदेश से यरदन नदी के किनारे यूहन्ना बपतिस्मा देइ बाले के लघे बपतिस्मा लेंड आएँ।<sup>14</sup> पय यूहन्ना बपतिस्मा देइ बाले इआ कहिके उनहीं रोकँड लागें कि, “हमहीं त अपना के हाँथे से बपतिस्मा लेंड के जरूरत ही, अउर अपना हमरे लघे आएन हय?”<sup>15</sup> तब यीसु उनहीं इआ जबाब दिहिन, कि “अब त अइसय होइ द्या, काहेकि हमहीं पंचन काहीं इहडमेर से सगली धारमिकता काहीं पूर करब उचित हय।” तब यूहन्ना बपतिस्मा देइ बाले उनखर बात मान लिहिन।<sup>16</sup> अउर यीसु बपतिस्मा लइके जइसय पानी से बहिरे निकरें, त देखा, उनखे खातिर अकास खुलिगा; अउर ऊँ परमातिमा के आत्मा काहीं परेबा के रूप म उतरत, अउर अपने ऊपर आबत देखिन।<sup>17</sup> अउर देखा, इआ अकासबानी भय, “ई हमार पियार लड़िका आहीं, जिनसे हम खुब प्रसन्न हएन।”

### सइतान से यीसु के परिच्छा

(मरकुस 1:12-13; लूका 4:1-13)

**4** यीसु के बपतिस्मा के बाद पबित्र आत्मा उनहीं सुनसान जघा माहीं लइगा, जउने सइतान से उनखर परिच्छा होय।<sup>2</sup> अउर यीसु, चालिस दिन अउर चालिस रात बिना खाए पिए रहे हँय, तब उनहीं भूख लाग।<sup>3</sup> तबहिन परिच्छा लेंड बाला सइतान उहाँ आबा अउर कहिस, “अगर तूँ परमातिमा के लड़िका आह्या, त ई पथरन से कहि द्या, कि रोटी बन जाँय।”<sup>4</sup> तब यीसु ओही जबाब दिहिन, “पबित्र सास्त्र माहीं लिखा हय: ‘मनई † केबल रोटिन भर से जिन्दा न रही, बलकिन परमातिमा के मुँहे से निकरँड बाले हरेक बचन से जिअत रही।’”<sup>5</sup> पुनि सइतान उनहीं पबित्र सहर यरूसलेम माहीं लइगा, अउर मन्दिर के गुम्मत माहीं ठाढ़ किहिस,<sup>6</sup> अउर उनसे कहिस, “अगर तूँ परमातिमा के लड़िका आह्या, त अपने-आप काहीं इहाँ से नीचे गिराय द्या, काहेकि पबित्र सास्त्र माहीं इआ लिखा हय: ‘परमातिमा † तौहरे खातिर अपने स्वरगदूतन काहीं हुकुम देइहँय, अउर ऊँ पंचे तौहई तुरन्तय लोक लेइहँय; कहेव अइसा न होय कि तौहरे

† हम उनखर नोकरव तक बनय के काबिल नहिँ आहने †† परमातिमा के इच्छा इआ ही कि तूँ हमहीं बपतिस्मा दया † 4:4 ब्यब 8:3 †† 4:6 भज 91:11-12

गोडेन माहीं पथरा से चोट लगि जाय।”<sup>7</sup> तब यीसु ओही जबाब दिहिन, कि “पबित्र सास्त्र माहीं इहव लिखा हय, कि: ‘तूँ अपने प्रभू † परमातिमा के परिच्छा न किहा।’”

<sup>8</sup> पुनि सइतान यीसु काहीं एकठे खुब ऊँच पहार माहीं लइगा, अउर संसार के सगला राज अउर ओखर बैभव देखाइके,<sup>9</sup> उनसे कहिस, “अगर तूँ हमरे गोड़न गिरिहा, त इआ सगला हम तोहई दइ देब।”<sup>10</sup> तब यीसु ओसे कहिन, “हे सइतान हमसे दूरी होइजा, काहेकि पबित्र सास्त्र माहीं लिखा †† हय, कि ‘तूँ अपने प्रभू परमातिमा के गोड़न गिरा, अउर केबल उनहिन के अराधना करा।’”<sup>11</sup> तब सइतान उनखे लघे से चला ग, अउर देखा, स्वरगदूत आइके यीसु के सेबा-सहाई करँड लागें।

### यीसु के प्रचार के सुरुआत

(मरकुस 1:14,15; लूका 4:14,15,31)

<sup>12</sup> जब यीसु सुनिन कि यूहन्ना बपतिस्मा देइ बाले पकड़बाय दीनगे हँय, तब ऊँ गलील प्रदेश माहीं चलेगें।<sup>13</sup> अउर नासरत गाँव काहीं छोड़िके, यीसु कफरनहूम सहर माहीं जाइके रहँड लागें, जउन झील के किनारे जबूलून अउर नपताली लोगन के इलाका माहीं हय।<sup>14</sup> जउने उआ बचन पूर होय, जउन परमातिमा के सँदेस बताँमँड बाले यसायाह कहिन रहा हय।

<sup>15</sup> कि

††† “जबूलून अउर नपताली लोगन के इलाका, झील के गइल से यरदन नदी के उआ पार गैरयहूदी लोगन के गलील प्रदेश।

<sup>16</sup> अउर जउन मनई अँधेआर † माहीं जीवन जिअत रहे हँय ऊँ पंचे महान जोति देखिन; अउर जउन मउत के † छाया माहीं रहत रहे हँय, उनखे ऊपर जोति चमकी।”

<sup>17</sup> उहय समय से यीसु इआ प्रचार करब सुरू कइ दिहिन, कि “पाप करब छोड़िके परमातिमा के लघे आबा, काहेकि स्वरग के राज लघेन आइगा हय।”

### यीसु के पहिल चेला लोग

(मरकुस 1:16-20; लूका 5:1-11; यूहन्ना 1:35-42)

<sup>18</sup> जब यीसु गलील प्रदेश के झील के किनारे-किनारे जात रहे हँय तब ऊँ दुइठे भाइन काहीं देखिन अरथात समौन जेखर नाम पतरस घलाय रहा हय, अउर उनखे भाई अन्द्रियास काहीं झील म जाल डारत देखिन; काहेकि ऊँ पंचे मछुआरा रहे हँय।<sup>19</sup> अउर यीसु उनसे कहिन, “हमरे पीछे चले आबा, त हम तौहई मनइन काहीं परमातिमा के लघे लइ आमँड बाला बनाउब।”<sup>20</sup> तब ऊँ पंचे तुरन्तय जालन क छोड़िके यीसु के पीछे चल दिहिन।

<sup>21</sup> अउर उहाँ से कुछ दूरी चले के बाद, यीसु जब्दी के लड़िका याकूब अउर ओखे भाई यूहन्ना काहीं, अपने बाप के साथ नाव माहीं चढ़े जालन काहीं सुधारत देखिन; तब उनहूँ काहीं घलाय बोलाइन।<sup>22</sup> अउर ऊँ पंचे तुरन्तय नाव अउर अपने बाप काहीं छोड़िके यीसु के पीछे चल दिहिन।

<sup>23</sup> अउर यीसु सगले गलील प्रदेश माहीं जाइ-जाइके उनखे सभाघरन माहीं उपदेस देत अउर स्वरगराज के खुसी के खबर के प्रचार करत, अउर उहाँ के मनइन के हरेकमेर के बिमारिन अउर कमजोरिन काहीं दूर करत रहिगें।

<sup>24</sup> अउर सगले सीरिया देस माहीं उनखर नाम मसहूर होइगा; एसे खुब मनई बिमारन काहीं जउन अनेकव प्रकार के बिमारिन से दुख माहीं परे रहे हँय, अउर जउनेन माहीं बुरी आत्मा रही हँय, अउर जिनहीं मिरगी आबत रही हय, अउर जिनहीं लोकबा मारे रहा हय, उन सगलेन काहीं यीसु के लघे लइ आएँ, तब यीसु उनहीं पंचन काहीं नीक कइ दिहिन।<sup>25</sup> अउर गलील प्रदेश से अउर दिकापुलिस †† से अउर यरूसलेम सहर से अउर यहूदिया प्रदेश से अउर यरदन नदी के दुसरे पार से बड़ी भारी भीड़ उनखे पीछे चल दिहिस।

†† 4:7 ब्यब 6:16 ††† 4:10 ब्यब 6:13 ††† 4:15 यसा 9:1-2 † 4:16 यसा 9:1-2 †† † जिनखर बिसुआस जिन्दा परमातिमा के ऊपर नहिँ रहा आय, ऊँ पंचे मउत के डेर माहीं रहत रहे हँय ††† दिकापुलिस गैरयहूदी लोगन के इलाका आय, जउन दसठे सहरन काहीं मिलाइके बना रहा हय।

### पहार के ऊपर से दीन यीसु के उपदेस

(लूका 6:20-23)

5 यीसु इआ भीड़ काहीं देखिके, पहार माहीं चढ़िगें; अउर जब ऊँ पहार माहीं चढ़िके बड़िठिगें, तब उनखर चेला लोग उनखे लघे आएँ।<sup>2</sup> तब यीसु उनहीं इआ उपदेस देई लागें, कि<sup>3</sup> “ऊँ पंचे धन्य हैं, जउन मन के दीन हैं, काहेकि स्वरग के राज उनहिन के खातिर आय।<sup>4</sup> ऊँ पंचे धन्य हैं, जउन सोक करत हैं, काहेकि उनहीं सान्ती मिली।<sup>5</sup> ऊँ पंचे धन्य हैं, जउन नम्र हैं, काहेकि ऊँ पंचे धरती के अधिकारी होइहँय।<sup>6</sup> ऊँ पंचे धन्य हैं, जउन परमातिमा के नजर माहीं निकहा हय, उहय करई के बड़ी इच्छा रखत हैं, काहेकि परमातिमा उनखे मन के इच्छा पूर करिहँय।<sup>7</sup> ऊँ पंचे धन्य हैं, जउन दुसरे के ऊपर दया करत हैं, काहेकि परमातिमा उनखे ऊपर दया करिहँय।<sup>8</sup> ऊँ पंचे धन्य हैं, जिनखर मन सुद्ध हैं, काहेकि ऊँ पंचे परमातिमा काहीं देखिहँय।<sup>9</sup> ऊँ पंचे धन्य हैं, जउन मेल-मिलाप कराबत हैं, काहेकि ऊँ पंचे परमातिमा के लड़िका कहइहँय।<sup>10</sup> ऊँ पंचे धन्य हैं, जउन परमातिमा के बचन काहीं मानई के कारन सताए जात हैं, काहेकि स्वरग के राज उनहिन के आय।<sup>11</sup> तूँ पंचे धन्य हया, जब मनई हमरे कारन तोंहार पंचन के बुराई करई, अउर सतामँइ अउर झूठ बोल बोलिके तोंहरे पंचन के बिरोध माहीं अनेकव प्रकार के बुरी बातें कहँइ,<sup>12</sup> तब तूँ पंचे खुब आनन्दित अउर मगन होया, काहेकि एखे खातिर तोंहई पंचन काहीं स्वरग माहीं बड़ा प्रतिफल मिली। काहेकि ऊँ पंचे परमातिमा के सँदेस बतामँइ बालेन काहीं घलाय, जउन तोंहसे पहिले रहे हँय, इहइमेर से सताइन रहा हया।”

### तूँ पंचे धरती के नोन अउर जोति आह्या

(मरकुस 9:50; लूका 14:34,35)

13 यीसु पुनि कहिन, कि “तूँ पंचे धरती के नोन आह्या, पय अगर ओखर सखरई खतम होइ जाय, त फेर उआ कउने चीज से सखार कीन जई? उआ पुनि कउनव काम के नहीं होय, केबल उआ बहिरेन फेंका जात हय, अउर मनइन के गोडेन से कचरा जात हय।

14 अउर तूँ पंचे संसार के जोति आह्या; अउर जउन सहर पहार माहीं बसा रहत हय उआ लुक नहीं सकय।<sup>15</sup> अउर मनई दिया जलाइके बरतन के नीचे नहीं धरँय, बलकिन ओही ऊँचे जघा माहीं धरत हैं, तबहिन ओसे घर के सगले मनइन काहीं उँजिआर मिलत हय।<sup>16</sup> उहयमेर से तोंहार पंचन के निकहे काम उँजिआर कि नाई मनइन के आँगे चमकँइ, जउने ऊँ पंचे तोंहरे निकहे कामन काहीं देखिके स्वरग माहीं रहँइ बाले तोंहरे पिता परमातिमा के बड़ाई करँय।”

### मूसा के बिधान के बारे माहीं सिच्छा

17 यीसु पुनि कहिन, “तूँ पंचे इआ न समझा कि हम मूसा के बिधान इआ कि परमातिमा के सँदेस बतामँइ बालेन के किताबन माहीं लिखी बातन काहीं मिटामँइ आएन हय, हम उनहीं मिटामँइ नहीं, बलकिन उन माहीं लिखी बातन काहीं पूर करँइ आएन हय।<sup>18</sup> काहेकि हम तोंहसे पंचन से सही कहित हएन, कि जब तक अकास अउर धरती टर न जइहँय, तब तक मूसा के बिधान के बातन से एकठे पाई अउर बिन्दी बिना पूर होए न रही।<sup>19</sup> एसे जे कोऊ, ई छोट से छोट हुकुमन म से एक्कवठे काहीं मानब छोड़ी, अउर इहइमेर से दुसरे मनइन काहीं घलाय न मानई के खातिर सिखाई, त उआ स्वरगराज माहीं सगलेन से छोट कहाई; पय जे कोऊ उनखर पालन करी, अउर दुसरे मनइन काहीं पालन करब सिखाई, उहय स्वरगराज माहीं महान कहाई।”<sup>20</sup> काहेकि हम तोंहसे सही कहित हएन, “अगर तोंहार पंचन के धारमिकता मूसा के बिधान सिखामँइ बालेन से अउर फरीसी लोगन से बढ़िके न होई, त तूँ पंचे स्वरगराज माहीं कबहूँ प्रबेस न कए पइहा।”

† परमातिमा उनखे जीबन माहीं राज करिहँय

### क्रोध अउर कतल के बारे माहीं

21 “तूँ पंचे सुन चुके हया, कि मूसा के बिधान माहीं हमरे पूरबजन से कहा ग रहा हय, कि ‘कतल न किहा’ अउर जे कोऊ कतल करी, उआ कचेहरी माहीं सजा के काबिल होई।<sup>22</sup> पय हम तोंहसे पंचन से इआ कहित हएन, कि जे कोऊ अपने भाई के ऊपर क्रोध करी, उआ कचेहरी माहीं सजा पामँइ के काबिल होई: अउर जे कोऊ अपने भाई काहीं निकम्मा कही उआ महासभा माहीं सजा के काबिल होई; अउर जे कोऊ अपने भाई काहीं, ‘हे मूरख’ कही उआ नरक के आगी माहीं डारे जाँइ के सजा पामँइ के काबिल होई।<sup>23</sup> एसे अगर तूँ आपन भेंट, बेदी माहीं चढ़ामँइ लइआए हया, अउर उहाँ तोंहई सुधि आय जाय, कि तोंहरे भाई के मन माहीं तोंहरे खातिर कुछ बिरोध हय,<sup>24</sup> त आपन भेंट उहँइ बेदी के लघे छोड़ि द्या, अउर पहिले जाइके अपने भाई से मेल-मिलाप कइल्या; ओखे बाद आइके आपन भेंट चढ़ाबा।<sup>25</sup> अउर जब तक तूँ अपने बिरोधी के साथ गइल माहीं हया, त ओसे हरबिन मेल-मिलाप कइल्या, कहँव अइसा न होय कि उआ बिरोधी तोंहई राजपाल काहीं सउँपि देय, अउर राजपाल तोंहई सिपाही काहीं सउँपि देय, अउर तूँ जेल माहीं डार दीन जा।<sup>26</sup> हम तोंहसे सही कहित हएन, कि जब तक तूँ पाई-पाई चुकाय न देहा, तब तक तूँ जेल से छूटे न पइहा।”

### ब्यभिचार के बारे माहीं

27 “तूँ पंचे सुन चुके हया, कि मूसा के बिधान माहीं कहा ग रहा हय, कि ‘ब्यभिचार न किहा’।<sup>28</sup> पय हम तोंहसे पंचन से इआ कहित हएन, कि ‘जे कोऊ कउनव मेहेरिआ के ऊपर बुरी नजर डारत हय, त उआ अपने मन माहीं ओसे ब्यभिचार कइ चुका हय।’<sup>29</sup> अगर तोंहार दहिनी आँखी तोंहसे पाप करामँइ के कारन बनत ही, त ओही निकारिके फेंकि द्या; काहेकि तोंहरे खातिर इआ भलय होई, कि तोंहरे देह म से एकठे अंग नास होइ जाय, अउर तोंहार सगली देह नरक माहीं डारी जाँय से बँचि जाय।<sup>30</sup> अउर अगर तोंहार दहिना हाँथ तोंहसे पाप कराबत हय, त ओही काटिके फेंकि द्या, काहेकि तोंहरे खातिर इआ भलय होई, कि तोंहरे देह के अंगन म से एकठे अंग नास होइ जाय, अउर तोंहार सगली देह नरक म डारे जाँइ से बँचि जाय।”

### छोड़-छुट्टी के बारे माहीं सिच्छा

(मत्ती 19:9; मरकुस 10:11,12; लूका 16:18)

31 मूसा के बिधान माहीं इहव कहा ग रहा हय, कि “जे कोऊ अपने मेहेरिआ के छोड़-छुट्टी करई चाहत हय, त उआ ओही छोड़ई के लिखा-पढ़ी देय।”<sup>32</sup> पय हम तोंहसे कहित हएन, कि जे कोऊ ब्यभिचार के अलाबा अउर दुसरे कारन से अपने मेहेरिआ के छोड़-छुट्टी करत हय, त उआ अपने मेहेरिआ से ब्यभिचार कराबत हय; अउर जे कोऊ उआ छोड़ी मेहेरिआ से काज करत हय, त उहव ओसे ब्यभिचार करत हय।

### कसम खाँइ के बारे माहीं यीसु के सिच्छा

33 “तूँ पंचे इहव सुन चुके हया, कि हमरे पंचन के पूरबजन से कहा ग रहा हय, कि ‘झूठ कसम न खया, बलकिन प्रभू के खातिर अपने कसम काहीं पूर किहा।’<sup>34</sup> पय हम तोंहसे कहित हएन, कि ‘कबहूँ कसम न खया; न त स्वरग के’, काहेकि उआ परमातिमा के सिंहासन आय,<sup>35</sup> अउर न धरतिन के, काहेकि उआ परमातिमा के गोडेन के चउकी आय; न यरूसलेम सहर के, काहेकि उआ महाराजा अरथात परमातिमा के सहर आय।<sup>36</sup> अउर न अपने मूँडेन के कसम खया, काहेकि तूँ एकठईअव बार काहीं न त उजर कइ सकते आह्या अउर न करिआ।<sup>37</sup> एसे तोंहार पंचन के बात हाँ के हाँ, अउर नहीं के नहीं रहय; काहेकि जउन कुछ एसे जादा होत हय, उआ बुराई से होत हय।”

**बदला न लेंड के बारे माहीं यीसु के सिच्छा**

(लूका 6:29,30)

38 यीसु पुनि कहिन, “तूँ पंचे सुन चुके हया, कि मूसा के बिधान माहीं कहा ग रहा हय, कि ‘आँखी के बदले माहीं आँखी, अउर दाँत के बदले माहीं दाँत’। 39 पय हम तोंहसे पंचन से इआ कहित हएन, कि जे कोऊ तोंहरे साथ बुरा बेउहार करत हैं, त उनसे बदला न लिहा; बलकिन जे कोऊ तोंहरे दहिने गाल माहीं थापड़ मारय, त ओखी कइती दुसरव गाल फेर दिहा। 40 अउर अगर कोऊ तोंहसे जबरई तोंहार कुरथा लेंड चाहय, त ओही अँगउछी घलाय लइ लेंड दिहा। 41 अउर अगर कोऊ तोंहई बेगार माहीं एक कोस लइ जाय, त ओखे साथ दुइ कोस चले जया। 42 अउर अगर कोऊ तोंहसे कुछू माँगय, त ओही द्या, अगर कोऊ तोंहसे उधार लेंड चाहय, त ओही नाहीं न किहा।”

**दुसमनन से प्रेम करँड के बारे माहीं सिच्छा**

(लूका 6:27,28,32-36)

43 “तूँ पंचे सुन चुके हया, कि कहा ग रहा हय, कि ‘अपने परोसी से अपने कि नाई प्रेम किहा, अउर अपने दुसमन से दुसमनी।’ 44 पय हम तोंहसे पंचन से इआ कहित हएन, कि ‘अपने दुसमनन से प्रेम करा, अउर अपने सतामँड बालेन के खातिर प्राथना करा।’ 45 अउर अगर तूँ पंचे इहइमेर करिहा, त स्वरग माहीं रहँड बाले अपने पिता परमातिमा के सन्तान ठहरिहा, काहेकि परमातिमा भले मनई अउर बुरे मनई दोनव के ऊपर सुरिज के घाम करत हैं, अउर धरमिन अउर अधरमिन दोनव के ऊपर पानी बरसाबत हैं। 46 काहेकि अगर तूँ पंचे अपने प्रेम करँड बालेन भर से प्रेम करिहा, त तोंहरे खातिर का फायदा होई? का चुंगी लेंड बाले घलाय इहइमेर नहीं करँड? 47 अउर अगर तूँ पंचे केबल अपने भाई-बन्धुअन काहीं भर नबस्कार करते हया, त कउन बड़ा काम करते हया? का इहइमेर गैरयहूदी लोग घलाय नहीं करँड? 48 एसे तूँ पंचे परिपूर्ण बना, जइसन स्वरग माहीं रहँड बाले तोंहार पिता परमातिमा परिपूर्ण हैं।”

**दान के बारे माहीं सिच्छा**

6 “सचेत रहा! तूँ पंचे धरम के काम मनइन काहीं देखाँड के खातिर न करा, नहीं त स्वरग माहीं रहँड बाले अपने पिता से कउनव प्रतिफल न पडहा।” 2 एसे जब तूँ पंचे दीन-दुखिअन काहीं दान करा, त ओखर बड़ाई अपने मुँहे से न करा, जइसन कपटी मनई सभन अउर गइलन माहीं करत हैं, जउने मनई उनखर बड़ाई करँड, हम तोंहसे सही कहित हएन, कि ऊँ पंचे आपन प्रतिफल पाय चुके हँय। 3 पय जब तूँ पंचे दीन-दुखिअन काहीं दान करा, त उआ दान के बारे माहीं कोऊ न जाने पाबय, इहाँ तक कि साथ माहीं रहँड बाले घलाय। 4 जउने तोंहार पंचन के दान गुप्त रहय; तब तोंहार पंचन के पिता परमातिमा जउन गुप्त रूप से देखत हैं, तोंहई पंचन काहीं प्रतिफल देइहँय।

**प्राथना के बारे माहीं सिच्छा**

(लूका 11:2-4)

5 “जब तूँ पंचे प्राथना करा, त कपटी मनइन कि नाई न करा, जिनहीं दुसरे मनइन काहीं देखाँड के खातिर, सभन माहीं अउर सइकन के मोड़न माहीं प्राथना करब नीक लागत हय; हम तोंहसे पंचन से सही कहित हएन, कि ऊँ पंचे आपन प्रतिफल पाय चुके हँय। 6 पय जब तूँ पंचे प्राथना करा त, अपने कोठरिआ माहीं, जा, अउर ओखर दुआरा बन्द कइके गुप्त रूप माहीं पिता परमातिमा से प्राथना करा; तब तोंहार पंचन के पिता परमातिमा जउन गुप्त रूप से देखत हैं, तोंहई पंचन काहीं एखर प्रतिफल देइहँय। 7 एसे जब तूँ पंचे प्राथना करा, त गैरयहूदी लोगन कि नाई, अइसय बेकार के बातन काहीं बेर-बेर न दोहराबत रहा, काहेकि ऊँ पंचे सोचत हैं, कि खुब देर तक प्राथना करे से, उनखर प्राथना परमातिमा व्दारा सुनी जई। 8 एसे तूँ पंचे

उनखी कि नाई न बना, काहेकि तोंहार पंचन के पिता परमातिमा तोंहरे मागँड से पहिलेन जानत हैं, कि तोंहई कउने-कउने चीजन के जरूरत ही।”

9 एसे तूँ पंचे जब प्राथना किहा, त इआमेर से किहा; “हे हमार पिता, अपना जउन स्वरग माहीं रहित हएन; अपना के नाम पबित्र माना जाय। 10 अपना के राज आबय; अपना के मरजी जइसन स्वरग माहीं पूर होत ही, उहयमेर धरती माहीं घलाय पूर होय। 11 हमरे पंचन के दिन भर के खाँय के खातिर खाना आज हमहीं देई। 12 अउर जइसन हम पंचे अपने गुनहगारन काहीं माफ किहेन हय, उहयमेर अपनव हमरे अपराधन काहीं माफ करी। 13 अउर हमहीं पंचन काहीं परिच्छा माहीं न डारी, बलकिन बुराई करँड बाले सइतान के हाँथ से बचाई; (काहेकि राज अउर पराक्रम अउर महिमा हमेसा अपनय के आय।” आमीन!)

14 एसे जब तूँ पंचे दुसरे मनइन के अपराधन काहीं माफ करिहा, त स्वरग माहीं रहँड बाले तोंहार पंचन के पिता घलाय तोंहई माफ करिहँय। 15 अउर अगर तूँ पंचे दुसरे मनइन के अपराध माफ न करिहा, त तोंहार पिता परमातिमा घलाय तोंहरे अपराध काहीं माफ न करिहँय।

**उपासे रहँड के बारे माहीं सिच्छा**

16 “जब तूँ पंचे उपासे रहा, त कपटी मनइन कि नाई तोंहरे मुँहे माहीं उदासी न छाई रहय, काहेकि कपटी मनई इआ देखाँड के खातिर आपन मुँह उदास कए रहत हैं, कि जउने सगले मनई इआ जानँय कि ऊँ पंचे उपासे हँय, हम तोंहसे पंचन से सही-सही कहित हएन, कि ऊँ पंचे आपन प्रतिफल पाय चुके हँय। 17 पय जब तूँ पंचे उपासे रहा, त अपने मुँडे माहीं तेल लगाबा अउर आपन मुँह धोबा, 18 जउने दूसर मनई न जानँड कि तूँ पंचे उपासे हया, बलकिन तोंहार पंचन के पिता परमातिमा जउन गुप्त रूप माहीं हैं, जानँड कि तूँ पंचे उपासे हया, तब तोंहार पंचन के पिता परमातिमा जउन गुप्त रूप माहीं तोंहरे कीन कामन काहीं देखत हैं, तोंहई एखर प्रतिफल देइहँय।”

**स्वरग के धन के बारे माहीं सिच्छा**

(लूका 12:33,34)

19 अपने खातिर धरती माहीं धन-सम्पत्ती एकट्ठा न करा; काहेकि ओही किरबा अउर काई नस्ट कइ देत हैं, अउर चोर घलाय सेंध कइके ओही चोराय लेत हैं। 20 बलकिन अपने खातिर स्वरग माहीं धन-सम्पत्ती एकट्ठा करा, जहाँ न त किरबय ओही नास कए पामँय अउर न त काइन लागय, अउर न चोर सेंध कइके चोराय पामँय। 21 काहेकि जहाँ तोंहार धन-सम्पत्ती हय, उहँय तोंहार मनव लगा रही।

**देह के जोति**

(लूका 11:34-36)

22 “देह के दिया आँखी आय : एसे अगर तोंहार आँखी निरमल रही, त तोंहार सगली देह घलाय उँजिआर पाई। 23 पय अगर तोंहार आँखी बुरी होई, त तोंहरे सगली देह माहीं अँधिआर रही; इआ कारन से जउन उँजिआर तोंहरे जीवन माहीं हय, अगर उआ अँधिआर होइ जाय, त उआ अँधिआर केतना भयानक न होई।”

**परमातिमा अउर धन के बारे माहीं सिच्छा**

(लूका 16:13; 12:22-31)

24 “कउनव सेबक दुइठे मालिकन के सेबा नहीं कइ सकय, काहेकि उआ एकठे से प्रेम अउर दुसरे से दुसमनी रखी, इआ कि एकठे से मिला रही, अउर दुसरे काहीं तुच्छ जानी; एसे तूँ पंचे परमातिमा अउर धन दोनव के सेबा नहीं कइ सकते आह्या। 25 एसे हम तोंहसे इआ कहित हएन, कि ‘अपने प्रान के खातिर इआ चिन्ता न किहा, कि हम पंचे का खाब, अउर का पिअब? अउर न अपने देहेन के खातिर चिन्ता किहा, कि हम का पहिरब? का प्रान खाना से, अउर देह ओन्हा से बढ़िके नहिँ आय? 26 अउर अकास



माहीं उड़ई बाले पंछिन काहीं देखा! ऊँ न त बोउतय आहीं, अउर न त कटतय आहीं, अउर न कुठुली पेउलन माहीं कुछू धरतय आहीं; तऊ स्वर्ग माहीं रहँड बाले तौहार पंचन के पिता उनहीं खबाबत हैं; त का तूँ पंचे पंछिन से जादा कीमती नहीं आह्या? 27 तौहरे पंचन म से अइसा को हय, जउन चिन्ता कइके अपने उमिर माहीं एक घरिव बढ़ाय सकत होय?

28 अउर तूँ पंचे ओन्हा के खातिर काहे चिन्ता करते हया? जंगल के फूलन काहीं ध्यान से देखा, कि ऊँ कइसन बाढ़त हैं, ऊँ न त मेहनत करँड, अउर न कातके ओन्हय बनामँड। 29 त हम तौहसे कहित हएन, कि राजा सुलैमान घलाय, जबकि ऊँ संसार माहीं सगलेन से धनी रहे हँय, तऊ उन फूलन म से एक्कवठे कि नाई निकहा ओन्हा नहीं पहिरे पाइन। 30 एसे जब परमातिमा मइदान के चारा काहीं, जउन आज हय, अउर काल्ह आगी माहीं झोंक दीन जई, उनहीं एतना सुन्दर ओन्हा पहिराबत हैं, त हे अल्प बिसुआसिव, ऊँ तौहई पंचन काहीं निकहा ओन्हा काहे न पहिरइहँय? 31 एसे तूँ पंचे चिन्ता कइके इआ न कहा, कि हम का खाब-पिअब, इआ कि का पहिरब? 32 काहेकि अबिसुआसी लोग ई सगली चीजन काहीं ढूँढई माहीं लगे रहत हैं, पय स्वर्ग माहीं रहँड बाले तौहार पिता परमातिमा इआ जानत हैं, कि तौहई पंचन काहीं ई सगली चीजन के जरूरत ही। 33 एसे पहिले तूँ पंचे परमातिमा के राज, अउर जउन उनखे नजर माहीं निकहा हय ओखर खोज करा, त ई सगली चीजँय तौहई मिल जइहँय। 34 एसे काल्ह के बारे माहीं चिन्ता न किहा, काहेकि काल्ह के दिन आपन चिन्ता खुदय कइ लेई; आज के खातिर आजय के दुख खुब हय।”

### दुसरे के ऊपर दोस न लगामँड के बारे माहीं सिच्छा

(लूका 6:37,38,41,42)

7 “कोहू के ऊपर दोस न लगाबा, जउने तौहरेव ऊपर दोस न लगाबा जाय। 2 काहेकि जइसन तूँ पंचे दुसरेन के ऊपर दोस लगउते हया, उहयमेर तौहरेव पंचन के ऊपर घलाय दोस लगाबा जई; अउर जउने नाप से तूँ पंचे दुसरेन काहीं नपते हया, उहय नाप से तौहरेव खातिर नापा जई। 3 तूँ अपने भाई के छोट गलती काहीं काहे देखते हया, जउन निन्च बुदी उजार कि नाई हय, अउर अपने बड़ी गलती काहीं नहीं देखते आह्या, जउन खम्भा कि नाई हय? 4 जब तौहई अपने आँखी के खम्भा नहीं देखाय, त तूँ अपने भाई से कइसा कहि सकते हया, कि आबा हम तौहरे आँखी के निन्च बुदी उजार निकार देई? 5 हे कपटी, पहिले अपने आँखी के खम्भा निकार ले, तबहिनय तँय अपने भाई के आँखी के निन्च बुदी उजार निकहा से देखिके निकारे पइहे।

6 ‘पबित्र चीज कुकुरन काहीं न द्या, अउर आपन मोती सुमरन के आँगे न डारा।’ कहँव अइसा न होय कि ऊँ उनहीं अपने गोडेन से रउँदि डारँय, अउर पलटिके तौहँ पंचन काहीं फारि डारँय।”

### मगिहा त पइहा

(लूका 11:9-13)

7 “तूँ पंचे मागत रइहा, त तौहई दीन जई; ढूँढत रइहा, त जरूर पइहा; खट-खटाबत रइहा, त तौहरे खातिर दुअरा खोल दीन जई।” 8 काहेकि जे कोऊ मागत रहत हय, त ओही जरूर मिलत हय; अउर जे कोऊ ढूँढत रहत हय, उआ जरूर पाबत हय; अउर जे कोऊ खट-खटाबत रहत हय, त ओखे खातिर दुअरा खोल दीन जई।

9 तौहरे पंचन म से अइसा कउन मनई हय, कि जब ओखर लड़िका रोटी माँगय, त उआ ओही पथरा देय। 10 इआ कि मछरी माँगय, त उआ ओही साँप देय? 11 एसे जब तूँ पंचे बुरे होइके, अपने लड़िकन काहीं नीक चीजँय देई जनते हया, त स्वर्ग माहीं रहँड बाले तौहार पिता परमातिमा, अपने मागँड बालेन काहीं निकही चीजँय काहे न देइहँय? 12 इआ कारन से जउन कुछू तूँ पंचे चहते हया, कि दूसर मनई तौहरे साथ बेउहार करँय, तुहँ पंचे

उनखे साथ उहयमेर बेउहार करा, काहेकि मूसा के बिधान अउर परमातिमा के सँदेस बतामँड बाले इहय सिच्छा देत हैं।

### साँकर अउर चाकल गइल के बारे माहीं सिच्छा

(लूका 13:24)

13 “साँकर दुअरा से परमातिमा के राज माहीं प्रबेस करा, काहेकि उआ दुअरा चाकल हय, अउर उआ गइल सरल ही, जउन बिनास कइती लइ जात ही, अउर खुब मनई अइसन हैं, जउन ओहिन से प्रबेस करत हैं। 14 पय अनन्त जीवन तक पहुँचइ के दुअरा साँकर हय, अउर ओखर गइलव कठिन ही; अउर अइसन खुब कम मनई हैं, जउन अनन्त जीवन पाबत हैं।”

### जइसन बिरबा उहयमेर ओखर फर

(लूका 6:43,44,46; 13:25-27)

15 “परमातिमा के झूँठ सँदेस बतामँड बालेन से सचेत रहा, काहेकि ऊँ पंचे गाड़र कि नाई भेस बनाइके तौहरे पंचन के लघे आबत हैं, पय ऊँ पंचे भीतर से डगर कि नाई खतरनाक होत हैं। 16 तूँ पंचे उनखे कामन के परिनाम से उनहीं पहिचान लेइहा, इआ बताबा, कि ‘का कउनव मनई जरबइलन से अंगूर, इआ कि उटकटार से अंजीर के फर टोर सकत हय? 17 इहइमेर से हरेक निकहे बिरबन माहीं निकहे फर लागत हैं, अउर खराब बिरबन माहीं खराब फर लागत हैं। 18 एसे निकहे बिरबा माहीं खराब फर नहीं लग सकय, अउर न खराब बिरबा माहीं निकहा फर लग सकय। 19 एसे जउने-जउने बिरबन माहीं निकहे फर नहीं लागँय, ऊँ सगले बिरबा काटिके आगी माहीं डार दीन जात हैं। 20 एसे हम तौहसे पुनि कहित हएन, कि इआमेर से तूँ पंचे उनखे कामन के परिनाम से उनहीं पहिचान लेइहा।

21 जेतने हमसे, हे प्रभू, हे प्रभू, कहत हैं, उनमा से हरेक जन स्वर्गराज माहीं न जाए पइहँय, बलकिन उहय स्वर्गराज माहीं जई, जउन स्वर्ग माहीं रहँड बाले हमरे पिता के मरजी के मुताबिक चलत हय। 22 उआ महान दिन काहीं खुब मनई हमसे पुँछिहँय, हे प्रभू, हे प्रभू, का हम अपना के नाम से परमातिमा के सँदेस नहीं सुनायन, अउर का हम अपना के नाम से बुरी आत्मन काहीं नहीं निकारेन, अउर अपना के नाम से खुब अचरज के कामन काहीं नहीं किहेन? 23 तब हम उनसे साफ-साफ कहि देब, हम तौहई पंचन काहीं नहीं जानी। हे कुकर्म करँड बाले मनइव, हमरे लघे से दूरी चले जा।

### घर बनामँड बाले दुइठे मनई: बुद्धिमान अउर मूरुख

(लूका 6:47-49)

24 एसे जे कोऊ हमरे ई बातन काहीं सुनिके, उनहिन के मुताबिक चलत हय, त उआ, उआ बुद्धिमान मनई कि नाई ठहरी, जउन आपन घर चट्टान माहीं बनाइस। 25 अउर जब बारिस भय अउर बाढ़ आई, अउर आँधी चली, अउर उआ घर से टकरानी, पय उआ नहीं गिरा, काहेकि ओखर नेव चट्टान माहीं डारी गे रही हय। 26 पय जे कोऊ हमरे ई बातन काहीं सुनत हय, अउर उनखे मुताबिक नहीं चलत त उआ, उआ मूरुख मनई कि नाई ठहरी, जउन आपन घर बारू माहीं बनाइस। 27 अउर जब बारिस भय अउर बाढ़ आई, अउर आँधी चली, अउर उआ घर से टकरानी, त उआ घर गिरिके पूरी तरह से नास होइगा।” 28 जब यीसु ई बातन काहीं कहि चुकें, तब भीड़ के सगले मनई उनखे उपदेस के बातन काहीं सुनिके चउआइगें। 29 काहेकि यीसु उनखे मूसा के बिधान सिखामँड बालेन कि नाई नहीं, बलकिन अधिकारी कि नाई उनहीं उपदेस देत रहे हँय।

### एकठे कोढ़ी काहीं नीक करब

(मरकुस 1:40-45; लूका 5:12-16)

8 यीसु जब पहार से नीचे उतरें, त एकठे बड़ी भारी भीड़ उनहीं पछिआय लिहिस। 2 तब उहाँ एकठे कोढ़ी यीसु के लघे आबा, अउर उनखे गोड़न गिरिके कहिस, कि “हे प्रभू, अगर अपना चाही त हमही सुद्ध

कइ सकित हएन।”<sup>3</sup> तब यीसु आपन हाँथ बढ़ाइके ओही छुड़न, अउर कहिन, “हम चाहित हएन, कि तूँ सुद्ध होइजा।” अउर तुरन्तय ओखर कोढ़ के बिमारी नीक होइगे।<sup>4</sup> तब यीसु ओसे कहिन, कि “देखा, कोहू से कुछू न बताया, पय जाइके अपने-आप काहीं याजक क देखाबा, अउर अपने सुद्ध होइ के बारे माहीं जउन चढ़ाबा चढ़ामँइ काहीं मूसा नबी ठहराइन हीं, उहय भेंट चढ़ाबा, जउने तौहरे समाज के लोगन के खातिर गबाही ठहरय।”

### एकठे सुबेदार के यीसु के ऊपर बिसुआस करब

(लूका 7:1-10)

<sup>5</sup> जब यीसु कफरनहूम सहर माहीं आएँ, तबहिनय एकठे सुबेदार उनखे लघे आइके उनसे बिनती किहिन।<sup>6</sup> कि “हे प्रभू, हमरे एकठे दास काहीं लोकबा मार दिहिस ही, अउर उआ बड़ा दुखी हमरे घरय माहीं परा हय।”<sup>7</sup> तब यीसु उआ सुबेदार से कहिन, कि “हम आइके ओही नीक करब।”<sup>8</sup> तब सुबेदार उनसे कहिन, कि “हे प्रभू हम एखे काबिल नहिं आहैन, कि अपना हमरे घर माहीं अई, पय अपना केबल अपने मुँहे से कहि देई, त हमारा दास नीक होइ जई।”<sup>9</sup> काहेकि हमहूँ पराधीन मनई आहैन, अउर सिपाही हमरे अधीन हैं; जब एकठे से कहित हएन, कि ‘जा’ तब उआ जात हय; अउर जब दुसरे से कहित हएन, कि ‘आव’ तब उआ आबत हय; अउर अपने दास से कहित हएन, कि ‘इआ कर’ त उआ उहय करत हय।”

<sup>10</sup> इआ बात सुनिके यीसु खुब अचरज मानिन, अउर जउन उनखे पीछे आबत रहे हँय उनसे कहिन; “हम तौहसे कहित हएन, कि हम इजराइल माहीं घलाय अइसन बिसुआस नहीं पाएन।<sup>11</sup> अउर हम इहव घलाय कहित हएन कि, खुब मनई पूरुब अउर पच्छिम से आइके अब्राहम अउर इसहाक अउर याकूब के साथ स्वरग के राज माहीं बइठि हँय।<sup>12</sup> पय बहुत से यहूदी लोग जिनखे खातिर परमातिमा के राज तइआर कीन ग रहा हय, बहिरे अँधिआर माहीं डार दीन जइहँय: उहाँ रोउब अउर दाँतन के पीसब होई।”<sup>13</sup> अउर यीसु उआ सुबेदार से कहिन, “जा, तौहार जइसन बिसुआस हय, उहयमेर तौहरे खातिर होय।” अउर उआ सुबेदार के दास उहय समय नीक होइगा।

### यीसु खुब बिमारन काहीं नीक किहिन

(मरकुस 1:29-34; लूका 4:38-41)

<sup>14</sup> यीसु जब पतरस के घर माहीं पहुँचे, त देखिन कि उनखे सास काहीं बोखार चढ़ी ही, अउर ऊँ बिस्तर माहीं परी हई।<sup>15</sup> जइसय यीसु उनखर हाँथ छुँइन, तबहिनय उनखर बोखार उतरि गे; अउर ऊँ उठिके उनखर सेबा-सहाई करँइ लागीं।<sup>16</sup> जब साँझ भय तब खुब मनई उनखे लघे खुब बिमारन काहीं लइ आएँ, जिन माहीं बुरी आत्मा रही हँय, यीसु ऊँ बुरी आत्मन काहीं अपने बचन से निकार दिहिन, अउर सगले बिमारन काहीं नीक कइ दिहिन।<sup>17</sup> जउने उआ बचन जउन परमातिमा के सँदेस बतामँइ बाले यसायाह के व्दारा कहा ग रहा हय, पूर होय, कि “ऊँ खुदय हमरे पंचन के निरबलतन काहीं लइ लिहिन, अउर हमरे बिमारिन काहीं उठाय लिहिन †।”

### यीसु के चेला बणँइ के कीमत

(लूका 9:57-62)

<sup>18</sup> जब यीसु अपने चारिव कइती बड़ी भीड़ देखिन, तब चलन काहीं झील के उआ पार जाँइ के हुकुम दिहिन।<sup>19</sup> तब एक जने मूसा के बिधान सिखामँइ बाला उनखे लघे आइके उनसे कहिस, “हे गुरू, जहाँ कहँव अपना जाब, त हमहूँ अपना के पीछे-पीछे चलब।”<sup>20</sup> तब यीसु ओसे कहिन, “लोखरी के रहँइ काहीं गुफा होत ही, अउर पंछिन के रहँइ के पाल होत हँ, पय मनई के लड़िका के कउनव घर नहिं आय, बलकिन मूडव तक धरँइ के जघा नहिं आय।”<sup>21</sup> तब एकठे चेला आइके उनसे कहिस, “हे प्रभू, पहिले हमहीं जाँइ देई, कि हम अपने बाप काहीं जउन खतम होइगें हँय, गाड़े

अई।”<sup>22</sup> तब यीसु ओसे कहिन, “तूँ हमरे पीछे चले आबा, अउर जउन मनई आत्मिक रूप से मरे हँय, उनहीं मुरदन काहीं गाँइइ द्या।”

### आँधी काहीं सान्त करब

(मरकुस 4:35-41; लूका 8:22-25)

<sup>23</sup> जब यीसु नाव माहीं चढ़ें, तब उनखर चेला लोग उनखे पीछे-पीछे चल दिहिन।<sup>24</sup> अउर तबहिनय झील माहीं खुब तेज आँधी चलँइ लाग, अउर पानी के तेज हिलकोरन से नाव माहीं पानी भरँइ लाग, पय यीसु नाव माहीं सोबत रहे हँय।<sup>25</sup> तब चेला लोग यीसु के लघे जाइके उनहीं जगाइन, अउर उनसे कहिन, “हे प्रभू, हमहीं बचाई, हम पंचे बूड़े जइत हएन।”<sup>26</sup> तब यीसु उनसे कहिन, “हे अल्प बिसुआसिव, काहे डेराते हया?” अउर यीसु उठिके आँधी अउर पानी काहीं डाँटिन, तब चारिव कइती सान्ती छाइगे।<sup>27</sup> तब ऊँ पंचे खुब अचरज मानिके कहँइ लागें, “ई कइसन मनई हँ, कि आँधी अउर पानी घलाय इनखर हुकुम मानत हँ।”

### बुरी आत्मन से परेसान मनइन काहीं नीक करब

(मरकुस 5:1-20; लूका 8:26-39)

<sup>28</sup> जब यीसु गदरेनी लोगन के देस माहीं पहुँचे, तबहिनय दुइठे मनई जउनेन माहीं बुरी आत्मा सकान रही हँय, कब्रन से निकरिके उनसे मिले, ऊँ पंचे एतना खतरनाक रहे हँय, कि उआ गइल से कोऊ नहीं निकर सकत रहा आय।<sup>29</sup> ऊँ पंचे चिल्लाइके कहिन; “हे परमातिमा के लड़िका, हमारा अपना से कउनव काम नहिं आय? का अपना समय से पहिलेन हमहीं दुख देँइ आए हएन?”<sup>30</sup> उनखे लघे से कुछ दूरी सुमरन के एकठे बड़ा भारी झुन्ड चरत रहा हय।<sup>31</sup> ऊँ बुरी आत्मा यीसु से चरउरी कइके कहिन, कि “अगर अपना हमहीं पंचन काहीं निकारँइ चाहित हएन, त सुमरन के उआ झुन्ड माहीं पठय देई।”<sup>32</sup> तब यीसु उनसे कहिन, “जा।” अउर ऊँ बुरी आत्मा उन मनइन से निकरिके सुमरन माहीं सकाय गई, अउर देखा, सुमरन के सगला झुन्ड पहार के उतारा से दउड़िके झील माहीं कूद परा, अउर सगले सुमर बूड़िके मरिगें।<sup>33</sup> अउर इआ देखिके सुमरन काहीं चरामँइ बाले भागिके, सहर माहीं जाइके मनइन काहीं, सगली बातँय बताइन, अउर जउने मनइन माहीं बुरी आत्मा सकान रही हँय, उनखर सगला हाल घलाय बताइन।<sup>34</sup> अउर सगले सहर के मनई, यीसु से मिलँइ के खातिर सहर से निकरिके आएँ, अउर यीसु काहीं देखिके उनसे बिनती किहिन, कि “अपना हमरे सरहदी से बहिरे चले जई।”

### लोकबा के मरीज काहीं नीक करब

(मरकुस 2:1-12; लूका 5:17-26)

**9** यीसु नाव माहीं चढ़िके झील के दुसरे पार अपने सहर माहीं आएँ।<sup>2</sup> अउर उहय समय कइयक जने मिलिके एकठे लोकबा के मरीज काहीं खटिया माहीं पराइके यीसु के लघे लइ आएँ। यीसु उनखे बिसुआस काहीं देखिके उआ लोकबा के मरीज से कहिन, “हे बेटबा, ढाढ़स बाँधा; तौहार पाप माफ होइगें।”<sup>3</sup> इआ सुनिके मूसा के बिधान सिखामँइ बाले सोचिन, कि “इआ त परमातिमा के बुराई करत हय।”<sup>4</sup> तब यीसु उनखे मन के बातन काहीं जानिके उनसे कहिन, “तूँ पंचे अपने-अपने मन माहीं बुरे बिचार काहे सोचते हया? <sup>5</sup> इआ बताबा जादा सरल का हय? इआ कहब कि ‘तौहार पाप माफ होइगें’ इआ कि ‘उठा, आपन खटिया उठाइके चला फिर।’”<sup>6</sup> पय जउने तूँ पंचे इआ जानिल्या, कि मनई के लड़िका काहीं धरती माहीं पाप माफ करँइ के अधिकार हय।” यीसु उआ लोकबा के मरीज से कहिन, “उठा आपन खटिया उठाबा, अउर अपने घर चले जा।”<sup>7</sup> तब उआ उठिके अपने घर चला ग।<sup>8</sup> सगले मनई इआ देखिके डेराइगें, अउर परमातिमा के बड़ाई करँइ लागें, जउन मनइन काहीं अइसन अधिकार दिहिन हीं।

**मत्ती काहीं बोलाबा जाब**  
(मरकुस 2:13-17; लूका 5:27-32)

9 यीसु उहाँ से आँगे जात समय मत्ती नाम के एकठे मनई काहीं चुंगी नाका माहीं बइठे देखिन, अउर उनसे कहिन, “हमरे पीछे चले आबा”, ऊँ उहाँ से उठिके यीसु के पीछे चल दिहिन। 10 अउर जब यीसु लेबी के घर माहीं खाना खाँइ बइठे, तब चुंगी लेंइ बाले खुब जने, अउर यहूदी लोग जिनहीं पापी कहत रहे हँय, ऊँ मनई यीसु अउर उनखे चलन के साथ खाँइ बइठिगें। 11 इआ देखिके फरीसी लोग, उनखे चलन से कहिन, “तोंहार गुरू, चुंगी लेंइ बालेन, अउर यहूदी लोग जिनहीं पापी कहत हें, उनखे साथ काहे खाना खात हें?” 12 यीसु इआ बात काहीं सुनिके उनसे कहिन, “बैद, नीक-सूख मनइन के खातिर नहीं, बलकिन बिमारन के खातिर जरूरी होत हें। 13 एसे तूँ पंचे जाइके एखर मतलब का होत हय, इआ जानिल्या: हम बलिदान नहीं, दया चाहित हएन। काहेकि जे कोऊ इआ सोचत हें, कि हम पापी नहीं आहैन उनहीं नहीं, बलकिन पापी लोगन काहीं बोलामँइ आएन हँय।”

**उपासे रहँइ के बारे माहीं प्रस्न**  
(मरकुस 2:18-22; लूका 5:33-39)

14 तब यूहन्ना के चेला लोग यीसु के लघे आइके पूँछँइ लागें, “का कारन हय, कि हम पंचे अउर फरीसी लोग एतना उपासे रहित हएन, पय अपना के चेला लोग बेलकुल उपासे नहीं रहँय?” 15 तब यीसु उनसे कहिन, “जब तक दुलहा उनखे साथ माहीं हय, त का बराती सोक कइ सकत हें? पय एक दिना उआ समय अई, जब दुलहा बरातिन से अलग कीन जई, उआ समय ऊँ पंचे उपासे रइहँय। 16 यीसु उनसे पुनि कहिन, नबा ओन्हा के ठेगरी पुरान ओन्हा माहीं कोऊ नहीं लगाबय, काहेकि नबा धोए से सकिलके पुरान ओन्हा काहीं खींचिके फारि डारत हय। अउर उआ जादा फाट जात हय। 17 काहेकि कउनव मनई नबा अंगूर के रस पुरान मसकन माहीं भरिके नहीं धरय, काहेकि अइसा करे से मसकँय फाट जाती हई, अउर सगला अंगूर के रस बहि जात हय, अउर मसकँय बरबाध होइ जाती हँय; एहिन से मनई नबा अंगूर के रस नई मसकन माहीं भरत हें, इआमेर से नबा अंगूर के रस अउर मसक दोनव बचे रहत हें।”

**मरी बिटिया अउर बिमार मेहेरिआ**  
(मरकुस 5:21-43; लूका 8:40-56)

18 यीसु जब उनसे ई बातँय कहतय रहे हँय, तबहिन एकठे यहूदी सभाघर के मुखिया आबा, अउर उनखे गोड़न गिरिके कहिस, “हमार बिटिया अबहिनय मरी हय, पय अपना हमरे साथय चलिके, आपन हाँथ ओखे ऊपर धइ देई, त उआ जिन्दा होइ जई।” 19 यीसु उठिके अपने चलन समेत उनखे पीछे-पीछे चल दिहिन।

20 अउर गइलय माहीं एकठे मेहेरिआ जउने काहीं बारा बरिस से खून बहँइ के बिमारी रही हय, पीछे से आइके यीसु के ओन्हा के छोर काहीं छुइ लिहिस। 21 काहेकि उआ अपने मन माहीं इआ कहत रही हय, कि “अगर हम यीसु के ओन्हा काहीं छुइ लेब त नीक होइ जाब।” 22 तब यीसु पीछे फिरिके ओही देखिन अउर कहिन, “बिटिया ढाढ़स बाँधा, तूँ हमरे ऊपर बिसुआस किहा हय, एसे नीक होइ गया हय।” अउर उआ मेहेरिआ उहय समय नीक होइगे 23 जब यीसु उआ यहूदी सभाघर के मुखिया के घर माहीं पहुँचे त दुख प्रगट करँइ के खातिर कुछ मनइन काहीं बसुरी बजाबत, अउर भीड़ के कुछ लोगन काहीं, रोबत-पीटत देखिन। 24 तब यीसु कहिन, “हटि जा, बिटिया मरी नहीं आय, उआ सोबत आय ही।” इआ सुनिके ऊँ पंचे उनखर हँसी उड़ाँइ लागें। 25 पय जब भीड़ उहाँ से निकार दीनगे, तब यीसु घर के भीतर जाइके, उआ बिटिया के हाँथ पकड़िन, अउर उआ उठिके ठाढ़ होइगे। 26 अउर इआ बात के चरचा उआ सगले देस माहीं फइलियो।

**दुइठे अँधरन काहीं नीक करब**

27 यीसु जब उहाँ से आँगे जात रहे हँय, तबहिनय गइल माहीं दुइठे अँधर मनई इआ चिल्लात उनहीं पछिआय लिहिन, “हे राजा दाऊद के सन्तान, हमरे ऊपर दया करी!” 28 जब यीसु एकठे घर माहीं पहुँचे, त ऊँ अँधर मनई उनखे लघे आएँ; तब यीसु उनसे कहिन, “का तोंहई पंचन काहीं हमरे ऊपर बिसुआस हय, कि हम तोंहई नीक कइ सकित हएन?” ऊँ पंचे कहिन, “हाँ, प्रभू।” 29 तब यीसु उनखे आँखिन काहीं छुइन अउर कहिन, “तोंहरे बिसुआस के मुताबिक तोंहरे खातिर होय।” 30 अउर उनखर आँखी उहय समय खुल गई, अउर यीसु उनहीं चेतउनी दइके कहिन; “सचेत रहा, कोऊ इआ बात काहीं न जाने पाबय।” 31 पय ऊँ पंचे उहाँ से निकरिके सगले देस माहीं यीसु के महिमा काहीं फइलाय दिहिन।

**एकठे गूँगा मनई काहीं नीक करब**

32 जब यीसु उआ घर से बहिरे जात रहे हँय, तबहिनय कुछ लोग एकठे गूँगा मनई काहीं उनखे लघे लइ आएँ, जउने माहीं बुरी आत्मा सकान रही हय। 33 अउर जब यीसु उआ मनई से बुरी आत्मा काहीं निकार दिहिन, त उआ गूँगा मनई बोलँइ लाग। इआ देखिके सगले भीड़ के मनई अचरज मानिके कहँइ लागें, “इजराइल देस माहीं अइसा कबहूँ नहीं भ।” 34 पय फरीसी लोग कहँइ लागें, “यीसु त बुरी आत्मन के मुखिया अरथात सइतान के मदत से, बुरी आत्मन काहीं मनइन से निकारत हें।”

**खुसी के खबर सुनँइ बाले त खुब हें, पय सुनामँइ बाले थोरिन हें**

35 यीसु सगले सहरन अउर गाँमन माहीं घूमत रहिगें, अउर उनखे सभाघरन माहीं उपदेस देत रहिगें, अउर परमातिमा के राज के खुसी के खबर के प्रचार करत अउर उहाँ के मनइन के हरेकमेर के बिमारिन अउर कमजोरिन काहीं दूर करत रहिगें। 36 जब यीसु भीड़ के मनइन काहीं देखिन, त उनहीं, उनखे ऊपर बड़ी दया आइगे, काहेकि ऊँ पंचे, ऊँ गइरन कि नाई ब्याकुल अउर भटके रहे हँय, जिनहीं कोऊ चरामँइ बाला नहीं होय, 37 तब यीसु अपने चलन से कहिन, “पके खेत त खुब हें, पय मजूर थोरिन हें। 38 एसे खेत के मालिक परमातिमा से बिनती करा, कि ऊँ आपन खेत काटँय के खातिर मजूर पठय देंय।”

**खुसी के खबर सुनामँइ के खातिर यीसु अपने बारा खास चलन काहीं पठइन**  
(मरकुस 3:13-19; लूका 6:12-16)

10 यीसु अपने बरहँव चलन काहीं अपने लघे बोलाइके, उनहीं बुरी आत्मन काहीं निकारँइ के अधिकार दिहिन, जउने ऊँ पंचे मनइन से उनहीं निकार सकँय, अउर हरेकमेर के बिमारिन काहीं, अउर मनइन के हरेकमेर के कमजोरिन काहीं दूर करँइ के घलाय अधिकार दिहिन। 2 अउर यीसु मसीह के चुने खास बरहँव चलन के नाम इआमेर से हँय: पहिल समौन जउन पतरस घलाय कहाबत हें, अउर उनखर भाई अन्द्रियास; जब्दी के लड़िका याकूब, अउर उनखर भाई यूहन्ना; 3 फिलिप्पुस अउर बरतुल्मय, थोमा, अउर चुंगी लेंइ बाले मत्ती, हलफई के लड़िका याकूब अउर तदय, 4 समौन जउन जेलोतेस कहाबत रहे हँय, अउर यहूदा इस्करियोती, जउन यीसु काहीं पकड़बाइस घलाय रहा हय।

**बरहँव खास चलन के सेवा के काम**  
(मरकुस 6:7-13; लूका 9:1-6; 10:4-12)

5 यीसु, ई बरहँव चलन काहीं इआ हुकुम दइके पठइन, कि “गैरयहूदी लोगन के इलाका माहीं न जया, अउर न सामरी लोगन के कउनव सहर माहीं प्रवेस किहा। 6 बलकिन इजराइल के घराना के हेरान गइरन के लघे बस जया। 7 अउर चलत-चलत प्रचार कइके कहा कि ‘स्वरग के राज नेरेन आइगा हय।’ 8 अउर बिमारन काहीं नीक किहा, मरेन काहीं जिआया,

कोढ़िन काहीं सुद्ध किहा, अउर बुरी आत्मन काहीं निकाल्या, इआ अधिकार तौहई सेंट-मेंत मिला हय, अउर सेंट-मेंत माहीं दिहा।<sup>9</sup> अउर अपने झोरा माहीं सोन-चाँदी, अउर तामे के सिक्का न लिहा।<sup>10</sup> अउर गइल के खातिर न झोरिया लिहा, न दुइठे कुरथा लिहा, न पनहीं लिहा, अउर न लाठिन लिहा, काहेकि मजूर काहीं ओखे भरन-पोसन के खातिर सगली जरूरत के चीजँय मिलती हँय।

<sup>11</sup> जब कउनव सहर इआ कि गाँव माहीं जया, त उहाँ पता लगाया, कि काबिल कउन मनई हय? जब तक उहाँ से न जया, त ओहिन के घर माहीं रह्या।<sup>12</sup> अउर ओखे घर माहीं जात समय ओही आसिरबाद दिहा।<sup>13</sup> अगर उआ घर के मनई काबिल होइहँय, त तौहार पंचन के आसिरबाद उनी मिल जई, पय अगर ऊँ पंचे आसिरबाद के काबिल न होइहँय, त तौहार पंचन के दीन आसिरबाद तौहरेन लघे लउटि अई।<sup>14</sup> अउर जे कोऊ तौहई सोइकार न करय, अउर तौहरे बातन काहीं न सुनय, त उआ घर इआ सहर से निकरत समय अपने गोड़न के धूधुर झार दिहा।<sup>15</sup> हम तौहसे सही कहित हएन, कि जब परमातिमा न्याय करिहँय, उआ दिन, उआ सहर के दुरदसा, सदोम अउर अमोरा सहर से जादा होई।”

### आमँइ बाला संकट

(मरकुस 13:9-13; लूका 21:17-22)

<sup>16</sup> “देखा, हम तौहई पंचन काहीं गइरन कि नाई डगरन के बीच माहीं पठइत हएन, एसे तूँ पंचे साँप कि नाई चतुर अउर परेबा कि नाई भोले-भाले बना।<sup>17</sup> पय मनइन से सचेत रह्या, काहेकि ऊँ पंचे तौहई पंचन काहीं लइ जाइके महासभन माहीं सउँपिहँय, अउर तौहई अपने पंचइतन माहीं लइ जाइके चाबुक मरिहँय।<sup>18</sup> अउर तौहई मनई सरकारी अधिकारिन अउर राजन के लघे लइ जइहँय, जउने तूँ पंचे उनखे आँगे, अउर गैरयहूदी लोगन के आँगे हमरे बारे माहीं गबाही द्या।<sup>19</sup> जब ऊँ पंचे, तौहई पकड़बइहँय, त इआ चिन्ता न किहा कि, हम पंचे कउनमेर से इआ कि का कहब, काहेकि जउन कुछू तौहई कहँइ क होई, उआ तौहई उहय समय बताय दीन जई।<sup>20</sup> काहेकि बोलँइ बाले तूँ पंचे न होइहा, बलकिन तौहरे पिता परमातिमा के आत्मा तौहरे अन्दर से बोली।”

<sup>21-22</sup> “अउर भाई, भाई काहीं अउर बाप लइका काहीं, मार डारँइ के खातिर सभन म सउँपिहँय, अउर लइका-बिटिया महतारी-बाप के बिरोधी होइके मरबाय डरिहँय। अउर हमरे बात काहीं मानँइ के कारन सगले मनई तौहसे दुसमनी रखिहँय; पय जे कोऊ अन्त तक धीरज धरे रही, उहय मुक्ती पाई।”<sup>23</sup> जब ऊँ पंचे तौहई पंचन काहीं एक सहर माहीं सतामँइ लागँय, त दुसरे सहर माहीं भाग जया। हम तौहसे सही कहित हएन, कि तूँ पंचे इजराइल देस के सगले सहरन माहीं न जाए पइहा, कि मनई के लइका दुबारा आय जई।

<sup>24</sup> कउनव चेला अपने गुरू से बड़ा नहीं होय; अउर न दास अपने मालिक से।<sup>25</sup> चेला के गुरू के बराबर अउर दास के मालिक के बराबर होब, इहय काफी हय; जब ऊँ पंचे घर के मालिक काहीं सइतान कहत हँ, त उनखे घर बालेन के साथ अउरव बुरा बरताव करिहँय।

### मनइन से नहीं परमातिमा से डेरा

(लूका 12:2-7)

<sup>26</sup> यीसु उनसे पुनि कहिन, कि “तूँ पंचे मनइन से न डेरा, जउन कुछू बिचार मनइन के मन माहीं हँ, परमातिमा उनी प्रगत करिहँय, अउर हमरे जीवन के सगली छिपी बातन काहीं परमातिमा जानत हँ।<sup>27</sup> जउन कुछू हम तौहसे आँधिआरे माहीं कहित हएन, ओही तूँ पंचे उँजिआरे माहीं बताया, अउर जउन कुछू तूँ पंचे अपने कानन माहीं धीरे-धीरे सुने हया, ओही घर के छतन से प्रचार किहा।<sup>28</sup> अउर जे तौहरे देह काहीं नास कइ सकत हँ, पय आत्मा काहीं नास नहीं कइ सकँय, उनसे न डेरा, बलकिन उनसे डेरा, जउन तौहरे देह अउर आत्मा दोनव काहीं नरक माहीं डारिके नास कइ सकत हँ।

<sup>29</sup> का एक पइसा माहीं दुइठे गउरइआ नहीं बिकती आहीं? तऊ तौहरे पंचन के पिता परमातिमा के मरजी के बिना, उनमा से एकठेरिव भुँइ माहीं नहीं गिर सकय।<sup>30</sup> तौहरे मूँडे के सगले बार घलाय गिने हँ।<sup>31</sup> एसे तूँ पंचे न डेरा; काहेकि पिता परमातिमा के नजर माहीं तूँ पंचे ऊँ गउरइअन से जादा कीमती हया।<sup>32</sup> जे कोऊ मनइन के आँगे इआ मान लेई, कि हम यीसु मसीह के चेला आहैन, ओही हमहूँ स्वर्ग माहीं रहँइ बाले पिता परमातिमा के आँगे इआ मान लेब, कि ई हमार चेला आहीं।<sup>33</sup> पय जे कोऊ मनइन के आँगे इआ कही, कि हम यीसु मसीह के चेला न होंहैन, त हमहूँ घलाय स्वर्ग माहीं रहँइ बाले अपने पिता परमातिमा के आँगे इआ कहि देब कि ई हमार चेला न होंहीं।”

<sup>34</sup> इआ न समझ लिहा, कि हम धरती माहीं मेल-मिलाप करामँइ आपन हय; हम मेल-मिलाप करामँइ नहीं, बलकिन फूट डारँय आपन हँय।<sup>35</sup> कि जउने हम बिसुआसी अउर अबिसुआसी माहीं फूट कराय देई अरथात लइका अउर बाप माहीं, महतारी अउर बिटिया माहीं, सास अउर पुतऊ माहीं।<sup>36</sup> काहेकि मनइन के बइरी ओखे घरय के मनई होइहँय।

<sup>37</sup> एसे जे कोऊ अपने महतारी-बाप काहीं हमसे जादा पियार मानत हय, उआ हमरे काबिल नहीं आय, अउर जउन अपने लइका बिटिया काहीं, हमसे जादा पियार मानत हय, उहव हमरे काबिल नहीं आय।<sup>38</sup> अउर जे कोऊ आपन कूस उठाइके हमरे पीछे न चली अरथात दुख-तकलीफ सहिके, हमरे बातन काहीं न मानी, उआ हमार चेला बनँइ के काबिल नहीं आय।<sup>39</sup> जे कोऊ अपने प्रान काहीं बचाबत हय, उआ ओही गमाई; पय जे कोऊ हमरे खातिर आपन प्रान तक देई काहीं तइआर रही, उआ ओही पुनि पाई।

### प्रतिफल

(मरकुस 9:41)

<sup>40</sup> अउर जे कोऊ तौहई पंचन काहीं सोइकार करत हय, उआ हमहीं सोइकार करत हय, अउर जे कोऊ हमहीं सोइकार करत हय, उआ हमहीं पठमँइ बाले परमातिमा काहीं सोइकार करत हय।<sup>41</sup> अउर जे कोऊ परमातिमा के सँदेस बतामँइ बाले काहीं, परमातिमा के सँदेस बतामँइ बाला जानिके सोइकार करत हय, उआ परमातिमा के सँदेस बतामँइ बाले के बदला पाई; अउर जे कोऊ धरमी काहीं धरमी जानिके सोइकार करत हय, उआ धरमी के बदला पाई।<sup>42</sup> जे कोऊ ई छोट से छोट मनइन काहीं हमार चेला जानिके एक गिलास ठंड पानी पिआई, त हम तौहसे सही कहित हएन, कि उआ मनई एखर प्रतिफल जरूर पाई।

**11** जब यीसु अपने बरहँव चलन काहीं हुकुम दइ चुके, त ऊँ उनखे सहरन माहीं उपदेस देई अउर प्रचार करँइ के खातिर उहाँ से चलेगें।

### यीसु अउर यूहन्ना बपतिस्मा देई बाले

<sup>2</sup> तब यूहन्ना बपतिस्मा देई बाले, जेल माहीं मसीह के कामन के चरचा सुनिके, अपने चलन काहीं, उनखे लघे इआ पूँछँइ के खातिर पठइन।<sup>3</sup> कि “का आमँइ बाले मसीह अपनय आहैन; कि हम पंचे दुसरे के इन्तजार करी?”<sup>4</sup> तब यीसु उनी जबाब दिहिन, कि जउन कुछू तूँ पंचे देखते सुनते हया, जाइके इआ सब यूहन्ना बपतिस्मा देई बाले से कहि दिहा,<sup>5</sup> कि “आँधर देखत हँ, लाँगइ चलँइ लागत हँ, कोढ़ी सुद्ध कीन जात हँ, बहिर सुनँय लागत हँ, मुरदा जिआए जात हँ; अउर कंगालन काहीं खुसी के खबर सुनाई जात ही।<sup>6</sup> पय धन्य हय उआ मनई, जउन हमरे ऊपर कीन बिसुआस से कबहूँ नहीं भटकय।”

<sup>7</sup> जब यूहन्ना बपतिस्मा देई बाले के चेला लोग उहाँ से चल दिहिन, तब यीसु यूहन्ना बपतिस्मा देई बाले के बारे माहीं, उहाँ बइठ मनइन से कहँइ लागे; “तूँ पंचे गाँव से दूरी सुनसान जघा माहीं का देखँइ गया तय? का हबा से हालत सरकन्डा काहीं? <sup>8</sup> पुनि तूँ पंचे का देखँइ गया तय? का कोमर ओन्हा पहिरे मनई काहीं? देखा, जे कोमर ओन्हा पहिरत हँ, ऊँ पंचे राजमहलन माहीं रहत हँ।<sup>9</sup> त पुनि काहे गया तय? का कउनव परमातिमा

के सँदेस बतामँइ बाले काहीं देखँय? हाँ, हम तौहसे कहित हएन, बलकिन परमातिमा के सँदेस बतामँइ बाले से बड़े काहीं।

10 ई उँइन आहीं, जिनखे बारे माहीं पबित्र सास्त्र माहीं लिखा हय, कि 'देखा, हम अपने दूत काहीं तौहसे पहिले पठइत हएन, जउन तौहरे खातिर मनइन काहीं तइआर करिहँय।'

11 हम तौहसे सही कहित हएन, कि जउन बरी-बिआही मेहेरिनन से पइदा भें हँय, उनमा से यूहन्ना बपतिस्मा देँइ बाले से बढ़िके, कोऊ नहिँ भ आय, पय जउन स्वर्ग राज माहीं छोट से छोट हँ, उँ यूहन्ना से बढ़िके हँय।"

12 यूहन्ना बपतिस्मा देँइ बाले के समय से लइके आज तक स्वर्ग के राज माहीं जाँइ के खातिर मनई खुब कोसिस कइ रहे हँय, पय जउने मनइन माहीं उत्साह हय, उँइन ओखे ऊपर अधिकार पाबत हँ। 13 यूहन्ना बपतिस्मा देँइ बाले तक परमातिमा के सगले सँदेस बतामँइ बाले अउर मूसा के बिधान घलाय इआ समय के बारे माहीं केबल भबिस्सबानी करत रहिगें। 14 अउर चाहा त तूँ पंचे इआ मान सकते हया, कि एलिय्याह नबी जउन आमँइ बाले रहे हँय, उँ ईन आहीं। 15 जेखर सुनँय के मन होय, उआ बड़े ध्यान से सुन लय।

16 हम इआ समय के मनइन के तुलना केसे करी, कि उँ केखे कि नाई हँ? उँ पंचे उँ लइकिन कि नाई हँ, जउन बजार माहीं बइठे एक दुसरे से गोहराइके कहत हँ: 17 "हम पंचे तौहरे खातिर बसुरी बजाएन, अउर तूँ पंचे नहीं नाच्या। अउर हम पंचे तौहरे खातिर सोक के गाना गाएन, अउर तूँ पंचे छाती पीटके नहीं रोया।" 18 काहेकि यूहन्ना बपतिस्मा देँइ बाले न खातय आएँ, अउर न पीतय आएँ, पय उँ पंचे कहत हँ कि "उनखे भीतर बुरी आत्मा ही।" 19 अउर मनई के लइका, खात-पिअत आबा हय, अउर उँ पंचे कहत हँ कि, "देखा, पेदू अउर पिआगी मनई काहीं, जउन चुंगी लेंइ बालेन, अउर पापी मनइन के साथी आय।" पय ग्यान अपने कामन से सच्चा ठहराबा ग हय।

### बिसुआस न करँइ बाले सहरन के मनइन काहीं धिक्कार (लूका 10:13-15)

20 तब यीसु उँ सहरन काहीं धिक्कारँय लागें, जउने माहीं उँ खुब सामर्थ के काम किहिन रहा हय; काहेकि उहाँ के रहँइ बाले मनई अपने-अपने मनन काहीं नहीं बदलिन रहा आय। 21 खुराजीन सहर, बैतसैदा सहर; तौहई धिक्कार हय; काहेकि जउन सामर्थ के काम तौहरे बीच माहीं कीन गें तय, अगर उँ सूर अउर सैदा प्रदेसन माहीं कीन जातें, त उहाँ के मनई टाट ओढ़िके अउर राख माहीं बइठिके, पहिलेन अपने पापन काहीं मानिके पाप करब छौँड़ि देतें। 22 पय जब परमातिमा न्याय करिहँय, उआ दिन तौहार दुरदसा सूर अउर सैदा प्रदेसन से जादा होई। 23 अउर हे कफरनहूम सहर के मनइव, तूँ पंचे जउन सोचते हया, कि हमहीं परमातिमा अकास तक उँच करिहँय? बेलकुल नहीं, परमातिमा तौहई पताल तक नीच करिहँय; जउन सामर्थ के काम तौहरे बीच माहीं कीन गे हँय, अगर उँ सदोम सहर माहीं कीन जातें, त उआ आज तक बना रहत। 24 पय हम तौहसे कहित हएन, कि जब परमातिमा न्याय करिहँय, उआ दिन तौहार दुरदसा सदोम सहर से जादा होई।

### बोझ से दबे मनइन के खातिर आराम (लूका 10:21,22)

25 उहय समय यीसु कहिन, "हे पिता परमातिमा स्वर्ग अउर धरती के प्रभू, हम अपना काहीं धन्यवाद देइत हएन, कि अपना ई बातन काहीं ग्यानिन अउर अपने काहीं समझदार मानँइ बालेन काहीं नहीं बताएन, बलकिन छोट लइकिन कि नाई अपना के बचन के ऊपर बिसुआस करँइ बालेन काहीं बतायन हय। 26 हाँ, हे पिता परमातिमा, काहेकि अपना काहीं इहय नीक लाग हय। 27 हमार पिता परमातिमा सब कुछ हमहीं सँउप दिहिन हीं; अउर कोऊ नहीं जानँय, कि लइका को आहीं, केबल पिता जानत हँ,

अउर पिता को आहीं इहव कोऊ नहीं जानँय, उनीं केबल लइका जानत हँ, अउर लइका जेही बतामँइ चाही उहय जानी।"

28 "हे थके-मादे अउर बोझ से दबे सगले मनइव, हमरे लघे आबा; हम तौहई पंचन काहीं अराम देब। 29 हमार जुँआ अपने ऊपर उठाय ल्या; अउर हमसे सिखा; काहेकि हम नम्र अउर मन माहीं दीन हएन: इआमेर से तूँ पंचे अपने-अपने मनन माहीं आराम पइहा। 30 काहेकि उआ जुँआ जउन हम तौहई पंचन काहीं दइ रहेन हय, खुब सरल हय। अउर उआ बोझ जउन हम तौहरे ऊपर डार रहेन हय, हलुक हय।"

### यीसु पबित्र दिन के घलाय प्रभू आहीं (मरकुस 2:23-28; लूका 6:1-5)

12 यीसु पबित्र दिन काहीं अपने चलन के साथ, खेतन के किनारे-किनारे जात रहे हँय, अउर उनखे चलन काहीं भूँख लगी रही हय, एसे उँ पंचे गोहूँ के बाली टोरि-टोरिके खाँइ लागें। 2 तब फरीसी लोग उनीं देखिके, यीसु से कहँइ लागें, "देखी, अपना के चेला लोग उआ काम काहे करत हँ, जउन मूसा के बिधान के मुताबिक पबित्र दिन काहीं करब उचित नहिँ आय।" 3 तब यीसु उनीं जबाब दिहिन, "काहे तूँ पंचे पबित्र सास्त्र माहीं इआ नहीं पढ़े आह्या, कि जब राजा दाऊद, अउर उनखर साथी भूँखे रहे हँय, त उँ का किहिन तय? 4 उँ परमातिमा के घर माहीं घुसिके, परमातिमा काहीं भेंट चढ़ाई रोटिन काहीं कइसन खाइन तय? जबकि उनीं अउर उनखे साथिन काहीं उँ रोटिन काहीं खाब मूसा के बिधान के खिलाफ रहा हय। काहेकि उँ भेंट के रोटिन काहीं केबल याजक लोग खाय सकत रहे हँय।" 5 अउर काहे तूँ पंचे मूसा के बिधान माहीं नहीं पढ्या, कि "याजक पबित्र दिन काहीं मन्दिर म पबित्र दिन के बिधी काहीं टोरे के बादव, निरदोस ठहरत हय।" 6 पय हम तौहसे पंचन से बताइत हएन, कि "इहाँ उँ हँ, जउन मन्दिर से बढ़िके हँ।" 7 अउर अगर तूँ पंचे इआ बात के मतलब जन त्या, कि "हम दया करँइ से प्रसन्न होइत हएन, बलिदान से नहीं।" त तूँ पंचे निरदोस काहीं दोसी न ठहरत त्या। 8 इआ जानिल्या, कि "मनई के लइका पबित्र दिन के घलाय प्रभू आहीं।"

### एकठे मनई के झुरान हाँथ काहीं नीक करब (मरकुस 3:1-6; लूका 6:6-11)

9 यीसु उहाँ से चलिके यहूदी लोगन के सभाघर माहीं गें। 10 उहाँ एकठे मनई रहा हय, जउने के एकठे हाँथ झुरान रहा हय। एसे उहाँ बइठ मनई यीसु के ऊपर दोस लगामँइ के खातिर उनसे पूँछिन, "का पबित्र दिन काहीं कउनव बिमार मनई काहीं नीक करब उचित हय?" 11 तब यीसु उनसे कहिन, "तौहरे पंचन म से अइसन को होई, कि जेखे एकठेरिन गाडर होय, अउर उआ पबित्र दिन काहीं गड्ढा माहीं गिर जाय, त का उआ ओही पकड़िके बहिरे न निकारी? 12 मनई के कीमत त गाडर से बढ़िके हय; एसे मूसा के बिधान के मुताबिक पबित्र दिन काहीं भलाई करब उचित हय।" 13 तब यीसु उआ मनई से कहिन, "आपन हाँथ बढ़ाबा।" अउर उआ आपन हाँथ बढ़ाइस तबहिनय ओखर हाँथ दुसरे हाँथ कि नाई निकहा होइगा। 14 तब फरीसी लोग सभाघर से बहिरे जाइके, यीसु के बिरोध माहीं साहुत करँइ लागें, कि यीसु काहीं कउनमेर से मार डारा जाय?

### परमातिमा के चुना सेबक

15 यीसु इआ बात काहीं जानिके उहाँ से चल दिहिन; तब खुब मनई उनीं पछिआय लिहिन, अउर यीसु सगले जनेन काहीं नीक किहिन। 16 अउर यीसु उनीं चेतउनी दइके कहिन, कि हमरे बारे माहीं न बताबा, कि "हम को आहैन।" 17 इआ बात यीसु एसे कहिन, कि जउन बचन परमातिमा के सँदेस बतामँइ बाले यसायाह के व्दारा कहा ग रहा हय, उआ पूर होय: 18 कि "देखा, हाँइ हमार सेबक आहीं, जिनहीं हम चुनेन हय; इनसे हम खुब प्रेम

करित हएन, अउर इनसे हमार मन खुस हय: हम आपन आत्मा इनखे ऊपर डारब; अउर ई गैरयहूदी लोगन काहीं परमातिमा के न्याय के खुसी के खबर सुनइहँय।

19 ई न त कोहू से लड़ाई-झगड़ा करिहँय, अउर न चन्डे से चिल्लाबय करिहँय; अउर न कोऊ बजारन माहीं इनखर बोलय सुनी।

20 ई कुचरे सरकन्डा काहीं न टोरिहँय; अउर धुँआ देत बाती काहीं न बुझइहँय, जब तक न्याय के जीत न होइ जाय, डँटे रइहँय।

21 अउर गैरयहूदी लोग उनखे नाम के ऊपर आसा रखिहँय।”

### यीसु अउर बालजबूल

(मरकुस 3:20-30; लूका 11:14-23)

22 जब यीसु ई बातन काहीं कहतय रहे हँय, तबहिनय कुछ लोग एकठे आँधर अउर गुँगा मनई काहीं जउने माहीं बुरी आत्मा सकान रही हय, उनखे लघे लइ आएँ; अउर यीसु ओही नीक कइ दिहिन, तब उआ मनई देखँइ अउर बोलँइ लाग। 23 इआ देखिके सगले मनई अचरज मानिके कहँइ लागें, “का ई राजा दाऊद के सन्तान होइ सकत हैं?” 24 पय फरीसी लोग इआ बात काहीं सुनिके कहँइ लागें, कि “यीसु त बुरी आत्मन के मुखिया अरथात सइतान के मदत से, बुरी आत्मन काहीं मनइन से निकारत हैं।” 25 पय यीसु उनखे मन के बात काहीं जानिके कहिन, कि “जउने राज के मनई आपस माहीं लड़ाई-झगड़ा करँइ लागत हैं, त उआ राज के नास होइ जात हय; अउर अगर कउनव सहर इआ कि घर माहीं फूट परि जात ही, त उआ बरबाध होइ जात हय। 26 त अगर सइतानय, सइतान काहीं निकारी, त उआ अपनय बिरोधी होइ जई; पुनि सइतान के राज कइसा बना रही? ओखर त नासय होइ जई। 27 अगर हम सइतान के मदत से बुरी आत्मन काहीं निकारित हएन, त तौहार सन्तान केखे मदत से बुरी आत्मन काहीं निकारत हैं? एसे उँइन तौहार फँडसला करिहँय। 28 पय अगर हम परमातिमा के आत्मा के मदत से, बुरी आत्मन काहीं निकारित हएन, त तूँ पंचे इआ जानिल्या, कि परमातिमा के राज तौहरे लघे पहुँचिगा हय। 29 सोचा कउनव मनई, कउनव बलमान मनई के घर माहीं घुसिके ओखर धन-सम्पत्ती कइसन लूट सकत हय, जब तक कि उआ मनई, उआ बलमान मनई काहीं बाँधे न देय, ओही बाँधे के बादय, उआ मनई ओखे घर काहीं लूट सकत हय। 30 जे हमार बात नहीं मानय, उआ हमरे बिरोध माहीं काम करत हय, उआ मनइन काहीं हमरे लघे नहीं ले आबय, बलकिन उनसे पाप कर बाइके हमसे दूर करत हय। 31 एसे हम तौहसे कहित हएन, कि मनइन के हरेकमेर के पाप अउर बुराई माफ कइ दीन जइहँय, पय जे कोऊ पबित्र आत्मा के बुराई करी ओखर इआ पाप कबहूँ माफ न कीन जई। 32 अउर जे कोऊ मनई के लड़िका के बिरोध माहीं कउनव बात कही, ओखर इआ अपराध माफ कइ दीन जई, पय जे कोऊ पबित्र आत्मा के बिरोध माहीं कुछ कही, त ओखर इआ अपराध न त इआ संसार माही माफ कीन जई, अउर न त स्वर्ग माहीं माफ कीन जई।”

### बिरबा अउर ओखर फर

(लूका 6:43-45)

33 “अगर बिरबा काहीं निकहा कहा त ओखे फरव काहीं निकहा कहा, इआ कि बिरबा काहीं खराब कहा, त ओखे फरव काहीं खराब कहा, काहेकि बिरबा अपने फरय से पहिचाना जात हय। 34 हे साँप के बच्चन कि नाई बुरे मनइव, तूँ पंचे बुरे होइके कइसन निकही बात कहि सकते हया? काहेकि जउन मन माहीं भरा हय, उहय मुँहे से निकरत हय। 35 निकहा मनई अपने मन के निकहे भन्डार से निकही बात निकारत हय; अउर बुरा मनई अपने मन के बुरे भन्डार से बुरी बात निकारत हय।” 36 अउर हम तौहसे पंचन से इहव कहित हएन, कि “जउन-जउन बुरी बातँय मनई कइहँय, उनहीं परमातिमा के न्याय करँइ के दिन हरेक निकम्मी बातन के लेखा देंइ

परी। 37 काहेकि तूँ पंचे अपनेन बातन के कारन निरदोस, अउर अपनेन बातन के कारन दोसी ठहराए जइहा।”

### यीसु से स्वर्ग के अदभुत चिन्हारी देखाँइ के माँग

(मरकुस 8:11,12; लूका 11:29-32)

38 इआ बात काहीं सुनिके मूसा के बिधान सिखामँइ बाले कुछ जने, अउर कुछ फरीसी लोग यीसु से कहिन, “हे गुरू, हम अपना से एकठे अदभुत चिन्हारी देखँइ चाहित हएन।” 39 इआ सुनिके यीसु उनहीं जबाब दिहिन, कि “इआ जुग के बुरे अउर ब्यभिचारी लोग अदभुत चिन्हारी ढूँढत हैं, पय योना नबी के जीवन माहीं जउन अदभुत काम परमातिमा किहिन तय, ओखे अलाबा अउर कउनव अदभुत चिन्हारी उनहीं न देखाई जई। 40 जइसन योना नबी तीन दिन अउर तीन रात तक मछरी के पेटे माहीं रहे हँय, उहयमेर मनई के लड़िका घलाय तीन दिना तक रातव-दिन धरती के भीतर रही। 41 नीनवे सहर के मनई, परमातिमा के न्याय करँइ के दिन, इआ समय के मनइन काहीं दोसी ठहरइहँय, काहेकि नीनवे सहर के मनई योना के प्रचार सुनिके, पाप करब छोड़ दिहिन तय, अउर देखा इहाँ ऊँ हैं, जउन योना से घलाय बड़े हँय। 42 इजराइल देस के दक्खिन दिसा के सीबा देस के रानी, परमातिमा के न्याय करँइ के दिन, इआ समय के मनइन के साथ ठाढ़ होइके, उनहीं दोसी ठहरइहँय, काहेकि ऊँ खुब दूरी से इजराइल के राजा सुलैमान के ग्यान के बातँय सुनँय के खातिर आई रही हँय, अउर देखा इहाँ ऊँ हैं, जउन राजा सुलैमान से घलाय बड़े हँय।”

### अधूरे सुधार से बिपत्ती के आउब

(लूका 11:24-26)

43 “जब बुरी आत्मा मनई से बहिरे निकर जात ही, तब अराम करँइ के खातिर झुरान जघा ढूँढत फिरत ही, अउर उआ बुरी आत्मा जब झुरान जघा नहीं पाबय। 44 त कहत ही, कि ‘हम अपने उहय घर माहीं लउटि जाब, जहाँ से निकरिके आएन तय।’ अउर उआ बुरी आत्मा लउटिके उआ घर काहीं खाली, झारा बटोरा, अउर सजा-सजाबा पाबत ही। 45 तब उआ जाइके, अपने से अउर बुरी सातठे आत्मन काहीं अपने साथ लइ आबत ही, अउर उआ मनई के भीतर सगली सकाइके रहँय लगती हँय, अउर उआ मनई के हालत पहिले से अउर जादा खराब होइ जात ही। इआ समय के बुरे मनइन के दसा घलाय इहइमेर होई।”

### यीसु के महतारी अउर भाई

(मरकुस 3:31-35; लूका 8:19-21)

46 जब यीसु भीड़ के मनइन से ई बातँय करतय रहे हँय, कि तबहिनय उनखर महतारी अउर भाई लोग बहिरे ठाढ़ भें, अउर ऊँ पंचे यीसु से बात करँइ चाहत रहे हँय। 47 तब कोऊ आइके यीसु से बताइस; कि देखी, अपना के महतारी अउर भाई लोग बहिरे ठाढ़ हैं, अउर अपना से बात करँइ चाहत हैं। 48 इआ सुनिके यीसु बोलाँइ बालेन से कहिन, “हमार महतारी अउर भाई को आहीं?” 49 अउर अपने चलन कइती अँगुरि आइके कहिन; “देखा हमार महतारी अउर भाई लोग ई पंचे आहीं। 50 काहेकि जे कोऊ स्वर्ग माहीं रहँइ बाले हमरे पिता परमातिमा के मरजी के मुताबिक चलत हय, उहय हमार भाई, बहिनी अउर महतारी आय।”

### बीज बोमँइ बाले किसान के उदाहरन

(मरकुस 4:1-9; लूका 8:4-8)

13 उहय दिन यीसु घर से बहिरे निकरें अउर जाइके झील के किनारे बइठिगें। 2 तब उनखे लघे अइसन बड़ी भीड़ एकट्ठा होइगे, कि यीसु काहीं झील म एकठे नाव म चढ़िके बइठँय परिगा, अउर सगली भीड़ भुँइन माहीं झील के किनारे ठाढ़ रहिगे। 3 अउर यीसु उदाहरन दइ-दइके उनहीं खुब बातँय सिखामँइ लागें, अउर कहिन, कि “देखा, एकठे बीज बोमँइ

बाला बीज बोमँड निकरा <sup>4</sup> अउर बोबत समय कुछ बीज गइल के किनारे गिरिगें, अउर पच्छी आइके उनहीं खाय लिहिन। <sup>5</sup> कुछ बीज पथरही भुँड माहीं गिरें, जहाँ उनहीं खुब माटी नहीं मिली, अउर गहिल माटी न मिले के कारन ऊँ हरबी जामि आएँ, <sup>6</sup> अउर जब सुरिज उआ, तब ओखे तेज घाम के कारन ऊँ जरिगें, अउर जर मजबूत न होइ के कारन झुराइगें। <sup>7</sup> कुछ बीज जरबइलन म गिरें, अउर जामि आएँ, पय ऊँ जरबइला बाढिके उनहीं दबाय लिहिन। <sup>8</sup> पय कुछ बीज निकही भुँड माहीं गिरें, अउर जामि आएँ अउर बाढिके खुब फरें; कउनव बिरबा सव गुना, कउनव साठ गुना, कउनव तीस गुना। <sup>9</sup> जेखर सुनँय के मन होय, उआ बड़े ध्यान से सुन लेय।”

### उदाहरन के उद्देश्य

(मरकुस 4:10-12; लूका 8:9,10)

<sup>10</sup> चेला लोग यीसु के लघे आइके पूछँइ लागें, कि “अपना भीड़ के मनइन से काहे उदाहरन माहीं बात करित हएन?” <sup>11</sup> तब यीसु उनहीं जबाब दिहिन, कि “परमातिमा के राज के जउने बातन काहीं दूसर लोग नहीं जानँय, ऊँ बातन काहीं परमातिमा तोहई समझाइन हीं, पय उनहीं नहीं।” <sup>12</sup> काहेकि “जे कोऊ परमातिमा के बचन काहीं अउर निकहा से जानँइ के कोसिस करत हय, परमातिमा ओही अउर आत्मिक ग्यान देत हैं, पय जे कोऊ परमातिमा के बचन काहीं जानँइ के कोसिस नहीं करय, त ओखे लघे जउन ग्यान रहत हय, उहव बिसरि जात हय।” <sup>13</sup> एसे हम उनसे उदाहरन माहीं बात करित हएन, काहेकि “ऊँ पंचे परमातिमा के महिमा काहीं देखत हैं”, पय देखे से जाने नहीं पामँय, अउर “अपने कानन से सुनत हैं, पय सुनेव से नहीं समझे पामँय।” <sup>14</sup> जउने उनखे बारे माहीं यसायाह नबी के व्दारा बताबा, परमातिमा के सँदेस पूर होय: कि “तूँ पंचे अपने कान से त सुनिहा, पय समझे न पइहा; अउर अपने आँखिन से देखिहा, पय तौहरे समझ माहीं न अई।

<sup>15</sup> काहेकि इनखर मन मोट होइगा हय, अउर इनहीं कम सुनँय लाग हय, अउर ई पंचे आपन आँखी मूँद लिहिन ही; कहँव अइसा न होय कि ई पंचे अपने आँखिन से देखँइ, अउर कान से सुनँय अउर मन से समझँय, अउर पाप करब छोड़ि देंय, अउर हम इनहीं नीक कइ देई।”

<sup>16</sup> पय धन्य हई तौहार पंचन के आँखी, जउन परमातिमा के महिमा काहीं देखती हई; अउर धन्य हैं, तौहार पंचन के कान जउन बचन सुनत हैं। <sup>17</sup> काहेकि हम तौहसे सही कहित हएन, कि बहुत से परमातिमा के सँदेस बतामँइ बाले, अउर धरमी लोग, इआ चाहत रहे हँय, कि जउन बातँय तूँ पंचे देखते हया, देखी, पय नहीं देखे पाइन, अउर जउन बातँय तूँ पंचे सुनते हया, सुनी, पय नहीं सुने पाइन।

### बीज बोमँइ बाले किसान के उदाहरन के मतलब

(मरकुस 4:13-20; लूका 8:11-15)

<sup>18</sup> “अब तूँ पंचे बीज बोमँइ बाले के उदाहरन के मतलब का आय, सुना। <sup>19</sup> जे कोऊ परमातिमा के राज के बचन काहीं सुनिके, नहीं समझे पाबय, त ओखे मन माहीं जउन कुछ बचन बोबा ग रहा हय, ओही उआ दुस्त सड़तान आइके बिसराय देत हय; ई उँइन मनई आहीं, जउन गइल के किनारे बोए बीज कि नाई होत हैं। <sup>20</sup> अउर उहयमेर कुछ लोग पथरही जमीन माहीं बोए बीज कि नाई होत हैं, जउन परमातिमा के बचन काहीं सुनिके तुरन्तय मारे उराव के अपनाय लेत हैं। <sup>21</sup> पय अपने जीवन माहीं परमातिमा के बचन काहीं गहराई से लागू नहीं करँइ, एसे कुछ दिनन तक मानत हैं, पय बाद माहीं जबहिन परमातिमा के बचन के कारन दुख अउर कस्ट मिलत हैं, त ऊँ पंचे हरबिन परमातिमा के बचन काहीं मानब छोड़ि देत हैं। <sup>22</sup> अउर जउन जरबइलन माहीं बोए बीज कि नाई हैं, ऊँ ई आहीं, जउन परमातिमा के बचन काहीं सुनिन, पय संसारिक चिन्ता, अउर धन के लालच माहीं फँसिके, परमातिमा के बचन काहीं दबाय देत हैं, अउर ऊँ पंचे बिना फर के बिरबा कि

नाई होइ जात हैं। <sup>23</sup> पय जउन निकही भुँड माहीं बोए बीज कि नाई होत हैं, ऊँ पंचे ई आहीं, जउन परमातिमा के बचन काहीं सुनिके पूरे बिसुआस के साथ अपनाबत हैं, अउर कोऊ तीस गुना, कोऊ साठ गुना, अउर कोऊ सव गुना फर लइ आबत हैं।”

### जंगली बीज के उदाहरन

<sup>24</sup> यीसु उनहीं पंचन काहीं एकठे अउर उदाहरन बताइन: कि “स्वर्ग के राज उआ मनई कि नाई हय, जउन अपने खेत माहीं निकहा बीज बोइस। <sup>25</sup> पय जब सगले मनई सोबत रहे हँय, तब ओखर बइरी आइके गोहूँ के बीच माहीं जंगली बीज बोइके चला ग। <sup>26</sup> जब गोहूँ जाम, अउर उनमा बाली निकरीं, तब खेत माहीं जंगली बीज के बिरबा घलाय देखँइ लागें। <sup>27</sup> तब खेत के मालिक के लघे, ओखर दास आइके कहँइ लागें, कि ‘हे मालिक, अपना त खेत माहीं निकहा बीज बोयन रहा हय, पय खेत माहीं जंगली बीज के बिरबा कहाँ से आइगें?’ <sup>28</sup> तब उआ मालिक उनसे कहिस, कि ‘इआ काम हमरे कउनव बइरी के आय।’ इआ सुनिके ओखर दास कहिन, कि ‘अगर अपना के मरजी होय त हम पंचे जाइके ऊँ जंगली बीज के बिरबन काहीं उँखाइ डारी।’ <sup>29</sup> तब उआ मालिक कहिस, ‘अइसा न करा, कहँव अइसा न होय, कि तूँ पंचे जंगली बीज के बिरबन काहीं उँखाइत माहीं, उनखे साथ गोहूँ के बिरबन काहीं घलाय उँखाइ ल्या।’ <sup>30</sup> कटाई तक दोनव काहीं एक साथ बाढँय घा, अउर जब कटाई के समय अई, तब हम काटँय बालेन से कहि देब: कि पहिले जंगली बीज के बिरबन काहीं काटिके उनहीं जलामँइ के खातिर बोझा बाँधि ल्या, अउर गोहूँ काहीं हमरे भन्डार घर माहीं एकट्टा करा।”

### राई के बीज के उदाहरन

(मरकुस 4:30-32; लूका 13:18,19)

<sup>31</sup> यीसु पुनि उनहीं पंचन काहीं एकठे अउर उदाहरन बताइन, कि “स्वर्ग के राज एकठे राई के दाना कि नाई हय, जउने काहीं लइके कउनव मनई अपने खेत माहीं बोय दिहिस। <sup>32</sup> उआ राई के दाना सगले बीजन से छोट त होत हय, पय जब उआ जामिके बाढ़ जात हय, त उआ सगले साग-सब्जिन से बड़ा होइ जात हय, अउर अइसन बिरबा होइ जात हय, कि अकास माहीं उँइँ बाले पच्छी आइके ओखे डेरइअन माहीं बसेर डारत हैं।”

### खमीर के उदाहरन

(लूका 13:20,21)

<sup>33</sup> यीसु उनहीं पंचन काहीं एकठे अउर उदाहरन बताइन; कि “स्वर्ग के राज खमीर कि नाई हय, जउने काहीं थोरी क लइके कउनव मेहेरिआ, तीन पसेरी पिसान माहीं मिलाय दिहिस, अउर उआ धीरे-धीरे सगले पिसान माहीं फइलिके ओही आमिल कइ दिहिस अउर बढ़ाय दिहिस।”

### उदाहरन के उपयोग के बारे माहीं यीसु के बताउब

(मरकुस 4:33,34)

<sup>34</sup> यीसु ई सगली बातन काहीं उदाहरन माहीं मनइन से बताइन, अउर बिना उदाहरन के कउनव बात उनसे नहीं बताबत रहे आहीं। <sup>35</sup> अइसन यीसु एसे करत रहे हँय, जउने परमातिमा के सँदेस बतामँइ बालेन के व्दारा जउन बचन कहा ग रहा हय, उआ पूर होय, कि

“हम हरेक बातन काहीं उदाहरन के व्दारा बताउब, अउर हम ऊँ बातन काहीं घलाय बताउब, जउन संसार के बनामँइ से पहिले गुप्त रही हँय।”

### जंगली बीज के उदाहरन के बखान

<sup>36</sup> ओखे बाद यीसु सगली भीड़ काहीं उहँइ छोड़िके, जहाँ रहत रहे हँय उआ घर माहीं आएँ, तब उनखर चेला लोग उनखे लघे आइके कहिन, “अपना खेत माहीं बोए जंगली बीज के उदाहरन के बारे माहीं हमहीं

समझाई।”<sup>37</sup> तब यीसु उनसे कहिन, कि “निकहा बीज काहीं बोमँड बाला मनई के लड़िका आय।<sup>38</sup> खेत संसार आय, अउर निकहा बीज परमातिमा के राज के सन्तान आहीं, अउर जंगली बीज दुस्त के सन्तान आहीं।<sup>39</sup> जउन बड़री आइके उनहीं बोइस ही, उआ सइतान आय; अउर कटाई करब संसार के अन्त आय: अउर काटँय बाले स्वरगदूत आहीं।<sup>40</sup> एसे जइसन जंगली बीज के बिरबन काहीं काटिके जलाबा जात हय, उहइमेर संसार के अन्त माहीं होई।<sup>41</sup> मनई के लड़िका अपने स्वरगदूतन काहीं पठइहँय, अउर ऊँ पंचे उनखे राज म से ऊँ सगलेन काहीं जउन दुसरे मनइन काहीं पाप करँइ के खातिर उकसाबत हें, अउर कुकर्मिन काहीं घलाय एकट्ठा करिहँय।<sup>42</sup> अउर उनहीं आगी के कुंड माहीं डरिहँय, उहाँ रोउब अउर दाँत पीसब भर रहि जई।<sup>43</sup> उआ समय परमातिमा के नजर माहीं निरदोस मनई, अपने पिता परमातिमा के राज माहीं, सुरिज कि नाई चमकिहँय; जेखर सुनँय के मन होय, उआ बड़े ध्यान से सुन लेय।”

### भूँइ माहीं गाड़े धन के उदाहरन

<sup>44</sup> यीसु उनसे एकठे अउर उदाहरन कहिन, कि “स्वरग के राज खेत माहीं गाड़े धन कि नाई हय, जउने काहीं कउनव मनई पाइस, अउर पुनि गाड़ दिहिस, अउर मारे खुसी के जाइके आपन सब कुछ बँचिके उआ खेत काहीं खरीद लिहिस।”

### अनमोल मोती के उदाहरन

<sup>45</sup> यीसु उनहीं एकठे अउर उदाहरन बताइन, कि “स्वरग के राज एकठे बड़पारी कि नाई हय, जउन निकहे मोती के खोज माहीं रहा हय।<sup>46</sup> जब ओही एकठे अनमोल मोती मिला, त उआ जाइके आपन सब कुछ बँच डारिस अउर उआ मोती काहीं खरीद लिहिस।”

### एकठे बड़े जाल के उदाहरन

<sup>47</sup> यीसु उनहीं एकठे अउर उदाहरन बताइन, कि “स्वरग के राज एकठे बड़े जाल कि नाई हय, जउन समुद्र माहीं डारा ग, अउर हरेकमेर के मछरिन काहीं समेटि लाबा।<sup>48</sup> अउर जब जाल भरिगा, तब मछरी पकड़ँइ बाले ओही किनारे माहीं खींचि लाएँ, अउर बइठिके निकही-निकही मछरिन काहीं त टोपरिन माहीं भर लिहिन, पय खराब-खराब मछरिन काहीं फेंकि दिहिन।<sup>49</sup> संसार के अन्त माहीं इहइमेर होई, स्वरगदूत आइके दुस्त मनइन काहीं धरमिन से अलग करिहँय।<sup>50</sup> अउर उनहीं आगी के कुंड माहीं डार देइहँय, उहाँ रोउब अउर दाँत पीसब भर रहि जई।”

### पुरान अउर नई सिच्छा के महत्व

<sup>51</sup> यीसु उनसे पुनि कहिन, कि “का तूँ पंचे इआ बात काहीं समझ गया? ऊँ पंचे कहिन, कि हँ।”<sup>52</sup> तब यीसु उनसे कहिन, कि “एसे हरेक यहूदी बिधान सिखामँड बाला, जउन स्वरगराज के चेला बना हय, उआ, घर के उआ मालिक कि नाई हय, जउन अपने भन्डार से नई अउर पुरान चीजँय निकारत हय।”

### नासरत गाँव माहीं यीसु के अपमान

(मरकुस 6:1-6; लूका 4:16-30)

<sup>53</sup> जब यीसु सगले उदाहरन बताय चुके, तब उहाँ से चलेगें।<sup>54</sup> अउर अपने गाँव नासरत माहीं आइके, उनखे सभाघर माहीं अइसन उपदेस देंइ लागें; कि ऊँ पंचे उनखे उपदेस काहीं सुनिके चउआइगें, अउर कहँइ लागें; कि “इनहीं इआ ग्यान कहाँ से मिलिगा, अउर अचरज के काम करँइ के सामर्थ कहाँ से मिली हय? <sup>55</sup> काहे ई बड़ई के लड़िका न होंहीं? अउर का इनखे महतारी के नाम मरियम, अउर इनखे भाइन के नाम याकूब, यूसुफ, समौन अउर यहूदा नहीं आय? <sup>56</sup> अउर का इनखर सगली बहिनी हमरे पंचन के बीच माहीं नहीं रहतीं? त पुनि इनहीं इआ सब कहाँ से मिलिगा?”<sup>57</sup> एसे

ऊँ पंचे यीसु के ऊपर बिसुआस नहीं किहिन, पय यीसु उनसे कहिन, कि “कउनव परमातिमा के सँदेस बतामँड बाले के, अपने गाँव अउर घर-परिवार काहीं छोड़िके अउर कहँव अपमान नहीं होय।”<sup>58</sup> अउर ऊँ पंचे यीसु के ऊपर बिसुआस नहीं किहिन, इआ कारन से यीसु उहाँ खुब अचरज के काम नहीं किहिन।

### यूहन्ना बपतिस्मा देंइ बाले के कतल

(मरकुस 6:14-29; लूका 9:7-9)

**14** हेरोदेस राजा अपने भाई फिलिप्पस के मेहेरिआ हेरोदियास के कारन, यूहन्ना बपतिस्मा देंइ बाले काहीं पकड़बाइके बँधबाइन, अउर ओखे बाद जेल माहीं डरबाय दिहिन तय।<sup>2</sup> काहेकि यूहन्ना बपतिस्मा देंइ बाले कइअक बेरकी उनसे कहिन तय, कि “अपने भाई के जिन्दय ओखे मेहेरिआ काहीं राखब तौहई उचित नहीं आय।”<sup>3</sup> इआ कारन से हेरोदेस राजा उनहीं मारि डारँय चाहत रहे हँय, पय मनइन से डेरात रहे हँय, काहेकि ऊँ पंचे यूहन्ना बपतिस्मा देंइ बाले काहीं परमातिमा के सँदेस बतामँड बाले मानत रहे हँय।<sup>4</sup> पय जब राजा हेरोदेस के जनम दिन आबा, तब हेरोदियास के बितिया सभा माहीं नाच देखाइके, हेरोदेस राजा काहीं खुसी कइ दिहिस।<sup>5</sup> एसे हेरोदेस राजा कसम खाइके बचन दिहिन, कि “तूँ जउन कुछू मगिहा, हम ओही तोहई जरूर देब।”<sup>6</sup> तब उआ बितिया अपने महतारी हेरोदियास के उकसाए से कहिस, कि “अपना हमहीं यूहन्ना बपतिस्मा देंइ बाले के मूँइ टठिआ माहीं धइके मगबाय देई।”<sup>7</sup> इआ सुनिके राजा हेरोदेस खुब दुखी भें, पय अपने कसम खाँय के कारन, अउर साथ माहीं बइठँय बाले के कारन, सेबकन काहीं हुकुम दिहिन कि, “यूहन्ना बपतिस्मा देंइ बाले के मूँइ कटबाइके, उआ बितिया काहीं दइ दीन जाय।”<sup>8</sup> तब ऊँ सिपाहिन काहीं जेल माहीं पठइके, यूहन्ना बपतिस्मा देंइ बाले के मूँइ कटबाय लिहिन।<sup>9</sup> अउर उनखर मूँइ टठिया माहीं धइके लइ आबा ग, अउर उआ बितिया काहीं दइ दीनगा; तब उआ बितिया ओही अपने महतारी के लघे लइगे।<sup>10</sup> इआ बात काहीं जानिके यूहन्ना बपतिस्मा देंइ बाले के चेला लोग, आइके उनखे लहास काहीं लइ जाइके गाड़ दिहिन, अउर जाइके इआ बात यीसु काहीं बताइन।

<sup>11</sup> जब चउथाई देस के राजा हेरोदेस, यीसु के बारे माहीं सुनिन।<sup>12</sup> तब अपने सेबकन से कहिन, “ई यूहन्ना बपतिस्मा देंइ बाले आहीं, जउन मरेन म से जिन्दा होइगे हँय, इहयकारन से ऊँ अचरज के काम कइके देखाबत हें।”

### यीसु पाँच हजार मनइन काहीं खाना खाबाइन

(मरकुस 6:30-44; लूका 9:10-17; यूहन्ना 6:1-14)

<sup>13</sup> जब यीसु इआ बात काहीं सुनिन, त नाव म चढ़िके सुनसान जघा माहीं एकान्त माहीं चलेगें; अउर इआ बात काहीं खुब मनई जानिगें, एसे ऊँ पंचे अपने-अपने सहरन से आइके, पइदलय यीसु के पीछे चल दिहिन।<sup>14</sup> अउर जब यीसु उहाँ से बहिरे निकरें, त खुब बड़ी भीड़ देखिन, तब यीसु काहीं उनखे ऊपर बड़ी दया आइगे, अउर उनखे साथ माहीं आए बिमारन काहीं नीक कइ दिहिन।<sup>15</sup> जब साँझ होइगे, त उनखर चेला लोग उनखे लघे आइके कहिन, कि “इआ सुनसान जघा ही, अउर साँझ होंइ लाग ही, एसे मनइन काहीं बिदा करी। जउने ऊँ पंचे आस-पास के मोहल्लन म जाइके अपने खातिर खाना खरीद लेंय।”<sup>16</sup> पय यीसु उनसे कहिन, कि “उनखर जाब जरूरी नहीं आय, तुहिन पंचे इनहीं खाँइका घा।”<sup>17</sup> तब चेला लोग यीसु से कहिन, “इहाँ हमरे लघे पाँचठे रोटी अउर दुइठे मछरिन काहीं छोड़िके, अउर कुछू नहीं आय।”<sup>18</sup> तब यीसु उनसे कहिन, कि “उनहीं इहाँ हमरे लघे लइ आबा।”<sup>19</sup> अउर भीड़ के मनइन से कहिन, कि “चारय माहीं बइठि जा।” अउर उन पाँचठे रोटी अउर दोनहूँ मछरिन काहीं लिहिन; अउर स्वरग कइती निहारिके धन्यवाद दिहिन, अउर रोटिन काहीं तोरि-तोरिके चलन काहीं दिहिन, अउर चेला लोग, सगले मनइन काहीं परस दिहिन।<sup>20</sup> अउर जब सगले जन खाइके संतुष्ट होइगें, तब चेला लोग खाए से बचे



रोटिन के टुकड़न काहीं बारा टोपरी भरिके उठाय लाएँ।<sup>21</sup> अउर खाँइ बड़ठ मनइन माहीं, मेहेरिआ अउर लड़िकन काहीं छोड़े, पाँच हजार के करीब मंसेरुआ रहे हँय।

### पानी माहीं यीसु के रेंगब

(मरकुस 6:45-52; यूहन्ना 6:15-21)

<sup>22</sup> ओखे बाद यीसु तुरन्तय अपने चलन काहीं नाव माहीं चढ़ई के खातिर मजबूर किहिन, कि ऊँ पंचे उनसे पहिले झील के दुसरे पार चले जाँय, जब तक ऊँ भीड़ के मनइन काहीं बिदा करँय।<sup>23</sup> अउर यीसु भीड़ के मनइन काहीं बिदा कइके, प्राथना करँइ के खातिर अकेलेन पहार माहीं चढ़िगें; अउर साँझिके ऊँ उहाँ अकेलेन रहे हँय।<sup>24</sup> अउर तब तक नाव झील के बीच माहीं पहुँचिगे रही हय, अउर सँउहेन से तेज हवा चलत रही हय, एसे नाव लहरन से डगमगात रही हय।<sup>25</sup> तबहिनय यीसु भिनसरहय करीब तीन से छय बजे के बीच, झील के पानी माहीं रेंगत उनखे लघे आएँ।<sup>26</sup> तब चेला लोग उनहीं झील के पानी माहीं रेंगत देखिके घबराइगें! अउर कहँइ लागें, “उआ भूत आया।” अउर डेरन के मारे चिल्लाय उठें।<sup>27</sup> तब यीसु तुरन्तय उनसे बात किहिन, अउर कहिन, “हिम्मत बाँधा; डेरा न; हम आहेन।”<sup>28</sup> तब पतरस उनहीं जबाब दिहिन, “हे प्रभू, अगर अपनय आहेन, त हमहीं अपने लघे पानी माहीं रेंगिके आमँइ के हुकुम देई।”<sup>29</sup> तब यीसु उनसे कहिन, “आबा” तब पतरस नाव से उतरिके यीसु के लघे जाँइ के खातिर, पानी माहीं रेंगँइ लागें।<sup>30</sup> पय तेज आँधी काहीं देखिके डेराइगें, अउर जब पानी माहीं बूड़ँइ लागें, तब चिल्लाइके कहिन, “हे प्रभू, हमहीं बचाई।”<sup>31</sup> तब यीसु तुरन्तय आपन हाँथ बढ़ाइके उनहीं पकड़ लिहिन, अउर उनसे कहिन, “हे अल्प बिसुआसी, तूँ काहे अपने मन माहीं संका किहा?”<sup>32</sup> जब ऊँ दोनव जने नाव माहीं चढ़िगें, तब आँधी बन्द होइगे।<sup>33</sup> इआ देखिके जेतने जने नाव माहीं चढ़े रहे हँय, सगले जने उनखे गोड़न गिरिके कहिन; “सचमुच अपना परमातिमा के लड़िका आहेन।”<sup>34</sup> अउर ऊँ पंचे झील के दुसरे पार गन्नेसरत प्रदेस माहीं पहुँचे।<sup>35</sup> अउर उहाँ के रहँइ बाले मनई उनहीं पहिचान लिहिन, अउर आस-पास के सगले गौमन माहीं खबर पठबाय दिहिन, कि यीसु इहँय हँ, एसे उहाँ के खुब मनई, बिमारन काहीं उनखे लघे लइ आएँ।<sup>36</sup> अउर यीसु से बिनती करँइ लागें, कि अपना बिमारन काहीं, अपने ओन्हा के छोरव काहीं छुइ लेंइ देई: अउर जेतने जने उनहीं छुइन, ऊँ सगले जन नीक होइगें।

### रीति-रिबाजन काहीं मानँइ के बारे माहीं प्रस्न

(मरकुस 7:1-13)

**15** तब यरूसलेम सहर से कुछ फरीसी लोग अउर मूसा के बिधान सिखामँइ बाले यीसु के लघे आइके पूँछँइ लागें,<sup>2</sup> कि “अपना के चेला लोग बाप-दादन के रीति-रिबाजन काहीं काहे नहीं मानँय, बिना हाँथ धोए खाना खात हँ?”<sup>3</sup> तब यीसु उनहीं जबाब दिहिन, कि “अपने रीति-रिबाजन काहीं मानँइ के कारन तुहँ पंचे परमातिमा के हुकुम के उलंघन काहे करते हया? काहेकि परमातिमा कहिन हीं, कि ‘अपने महतारी-बाप के मान-सम्मान किहा’, अउर ‘जे कोऊ अपने महतारी-बाप के अपमान करय, त ओही जरूर मारि डारा जाय।’<sup>4</sup> पय तूँ पंचे कहते हया, कि अगर कोऊ अपने महतारी-बाप से कहय, कि ‘जउन कुछ फायदा तोहई पंचन काहीं हमसे मिल सकत रहा हय, त ओही हम परमातिमा काहीं भेंट चढ़ाय दिहेन हय’,<sup>6</sup> त पुनि उआ अपने महतारी-बाप काहीं कुछ नहीं दइ सकय। इआमेर से तूँ पंचे, अपने रीति-रिबाजन काहीं मानँइ के कारन, परमातिमा के बचन काहीं इनकार कइ देते हया।<sup>7</sup> हे कपटिव, परमातिमा के सँदेस बतामँइ बाले यसायाह तोहरे बारे माहीं इआ भबिस्सबानी ठीकय किहिन हीं:

<sup>8</sup> ई पंचे मुँहे से त हमार मान-सम्मान करत हँ, पय अपने मन से हमार मान-सम्मान नहीं करँय।

<sup>9</sup> अउर ई पंचे बेकार माहीं हमार उपासना करत हँ, काहेकि मनइन के नेमन काहीं, परमातिमा के नेम आय, इआ कहिके सिखाबत हँ” †।”

### मनइन काहीं असुद्ध करँइ बाली बातँय

<sup>10</sup> तब यीसु मनइन काहीं अपने लघे बोलाइके कहिन, “सुना, अउर समझा: <sup>11</sup> जऊँ मनई के मुहें से पेटे के भीतर जात हय, उआ मनई काहीं असुद्ध नहीं करय, बलकिन जउन बातँय मनई के मुहें से (मन से) निकरती हई, केबल उँइन बातँय मनई काहीं परमातिमा के नजर माहीं असुद्ध करती हई।”<sup>12</sup> तब चेला लोग आइके यीसु से कहिन, “का अपना जानित हएन, कि अपना के इआ बचन काहीं सुनिके फरीसी लोग बड़ा नागा मानिन हीं?”<sup>13</sup> तब यीसु उनहीं इआ जबाब दिहिन, कि “हरेक बिरबा जउने काहीं स्वरग माहीं रहँइ बाले हमार पिता नहीं लगाइन आय, उआ उँखाड़ा जई।<sup>14</sup> उनहीं जाँइ धा; काहेकि ऊँ पंचे गइल बतामँइ बाले आँधर मनई कि नाई हँ, त इआ बताबा कि अगर एकठे आँधर मनई दुसरे आँधर मनई काहीं गइल बताई, त का ऊँ दोनव जने गड्ढा माहीं न गिर परिहँय?”

<sup>15</sup> इआ सुनिके पतरस यीसु से कहिन, “इआ उदाहरन हमहीं पंचन काहीं समझाय देई।”<sup>16</sup> तब यीसु कहिन, “का तूँ पंचे अबय तक नदान बने हया? <sup>17</sup> का तूँ पंचे इआ नहीं जनते आह्या, कि जउन कुछ मुहें से पेट माहीं जात हय, त उआ टट्टी से बहिरे निकर जात हय? <sup>18</sup> पय जउन कुछ मुहें से निकरत हय, उआ मन से निकरत हय, अउर उहय मनई काहीं परमातिमा के नजर माहीं असुद्ध करत हय। <sup>19</sup> काहेकि घिनहे बिचार करब, कतल करब, दुसरे के मेहेरिआ से नजायज सम्बन्ध रक्खब, ब्यभिचार करब, चोरी करब, लबरी गबाही देब, अउर दुसरे के बुराई करब, ई सगली बातँय करँइ के बिचार मनय से निकरत हय। <sup>20</sup> ईन सगली बातँय मनई काहीं असुद्ध करती हई, पय अपने रीति-रिबाज के मुताबिक बिना हाँथ धोए खाना खाए से, कउनव मनई परमातिमा के नजर माहीं असुद्ध नहीं होय।”

### गैरयहूदी मेहेरिआ के बिसुआस

(मरकुस 7:24-30)

<sup>21</sup> पुनि यीसु उहाँ से निकरिके, सूर अउर सैदा प्रदेसन कइती चलेगें।<sup>22</sup> अउर उआ प्रदेस से कनानी समाज के एकठे मेहेरिआ आई, अउर चिल्लाइके कहँइ लाग, “हे प्रभू! राजा दारूद के सन्तान, हमरे ऊपर दया करी! हमरे बिटिया काहीं बुरी आत्मा खुब सताय रही हय।”<sup>23</sup> पय यीसु ओही कुछ जबाब नहीं दिहिन। तब यीसु के चेला लोग उनखे लघे आइके उनसे बिनती किहिन, कि “ओही बिदा करी, काहेकि उआ हमरे पीछे चिल्लात आय रही हय।”<sup>24</sup> तब यीसु उनहीं जबाब दिहिन, “इजराइल के मनइन काहीं छोँडिके जउन भटकी गाड़र कि नाई हँ, हम अउर कोहू के लघे नहीं पठए गएन आय।”<sup>25</sup> पय उआ मेहेरिआ आई, अउर यीसु के गोड़न गिरिके कहँइ लाग, “हे प्रभू हमार मदत करी।”<sup>26</sup> तब यीसु ओही जबाब दिहिन, “लड़िकन † के रोटी लइके कुकुरन के आँगे डारब उचित नहिं आय।”<sup>27</sup> तब उआ मेहेरिआ कहिस, “इआ बात सही आय प्रभू, पय कुकुरव ऊँ चुरकुन काहीं खात हँ, जउन उनखे मालिकन के खात माहीं गिर जात हँ।”<sup>28</sup> इआ बात काहीं सुनिके यीसु उआ मेहेरिआ काहीं जबाब दिहिन, “हे बहिनी, तौंहार बिसुआस बड़ा हय। जइसन तूँ चहते हया, उहयमेर तौहरे खातिर होय।” अउर ओखर बिटिया ओतनिनदार नीक होइगे।

### कइयकठे बिमारन काहीं नीक करब

<sup>29</sup> पुनि यीसु उहाँ से चलिके गलील प्रदेस के झील के लघे गें, अउर पहार के ऊपर चढ़िके बइठिगें।<sup>30</sup> तब खुब मनई उनखे लघे आएँ। अउर ऊँ पंचे अपने साथ लँगइन, अँधरन, गूँगन, अपहिजन काहीं, अउर दुसरेव मेर के

† 15:9 यसा 29:13 † यहूदी लोगन के तुलना लड़िकन से कीन गे ही, अउर गैरयहूदी लोगन के तुलना कुकुरन से कीन गे ही।

बिमारन काहीं घलाय, यीसु के लघे लइ आएँ, अउर उनहीं उनखे गोड़ने माहीं गिराय दिहिन, अउर यीसु ऊँ बिमारन काहीं नीक कइ दिहिन।<sup>31</sup> जब मनई देखिन कि गूंगा मनई बोलैइ लागत हैं, अउर अपाहिज निकहे होइ जात हैं, लाँगइ चलैइ लागत हैं, अउर आँधर देखैइ लागत हैं, त ऊँ पंचे अचरज मानिके, इजराइल के परमातिमा के बड़ाई करैइ लागें।

### यीसु चार हजार मनइन काहीं खाना खबाइन

(मरकुस 8:1-10)

<sup>32</sup> यीसु अपने चलन काहीं अपने लघे बोलाइके कहिन, “हमहीं इआ भीड़ के मनइन के ऊपर बड़ी दया आबत ही, काहेकि ई पंचे तीन दिना से हमरे साथ हैं, अउर इनखे लघे खाँय के खातिर कुछ हइअव नहिं आय। अउर हम इनहीं भूखे बिदा नहीं करैइ चाही, कहँव अइसा न होय, कि ई पंचे बिहोस होइके गइलय माहीं परे रहि जाँय।”<sup>33</sup> तब चेला लोग यीसु से कहिन, “इआ सुनसान जघा माहीं हमहीं पंचन काहीं एतनी रोटी कहाँ से मिली, कि हम पंचे एतनी बड़ी भीड़ के मनइन काहीं खबाइके संतुस्त करी?”<sup>34</sup> तब यीसु चलन से पूँछिन, “तोंहरे लघे केतनी रोटी हई?” ऊँ पंचे कहिन, “सातठे रोटी, अउर कुछ छोट-छोट मछरी घलाय हई।”<sup>35</sup> तब यीसु सगले जनेन काहीं, भुँइ माहीं बइठँय के हुकुम दिहिन।<sup>36</sup> अउर यीसु ऊँ सातठे रोटी, अउर मछरिन काहीं हाँथे म लइके, परमातिमा काहीं धन्यवाद दइके टोरिन, अउर अपने चलन काहीं देत गें, अउर चेला लोग मनइन काहीं परसत गें।<sup>37</sup> इआमेर से सगले मनई खाइके संतुस्त होइगें। अउर ओखे बाद चेला लोग, बँचे टुकड़न से सात टोपरी भरिके उठाइन।<sup>38</sup> अउर खाना खाँइ बालेन म मेहेरिन अउर लड़िकन काहीं छोंड़िके, चार हजार मंसेरुआ रहे हँय।<sup>39</sup> ओखे बाद यीसु उआ भीड़ के मनइन काहीं बिदा कइके, नाव माहीं चढ़िके मगदन प्रदेश काहीं चलेगें।

### स्वर्ग के अदभुत चिन्हारी देखैइ के माँग करब

(मरकुस 8:11-13; लूका 12:54-56)

**16** फरीसी लोग, अउर सद्की लोग, यीसु के लघे आइके उनखर परिच्छा लेंइ के खातिर, उनसे कहिन, “हमहीं स्वर्ग के कउनव अदभुत चिन्हारी देखाइके, इआ साबित करा, कि परमातिमा तोंहई पठइन हीं।”<sup>2</sup> तब यीसु उनहीं जबाब दिहिन, “साँझिके तूँ पंचे कहते हया, कि ‘मोसम निकहा रही, काहेकि अकास लाल हय’,<sup>3</sup> अउर सकारे कहते हया, कि ‘आज आँधी अई, काहेकि अकास लाल अउर धूमिल हय।’ तूँ पंचे अकास के लच्छनन काहीं देखिके, ओखर भेद बताय सकते हया, पय समयन के चिन्हारिन के भेद काहे नहीं बताय सकते आह्या? <sup>4</sup> इआ जुग के बुरे, अउर ब्यभिचारी लोग, अदभुत चिन्हारी ढूँढत हैं, पय योना नबी के जीवन माहीं जउन अदभुत काम परमातिमा किहिन तय, ओखे अलाबा अउर कउनव अदभुत चिन्हारी उनहीं न देखाई जई।” अउर एखे बाद यीसु उनहीं छोंड़िके उहाँ से चलेगें।

### फरीसी लोगन अउर सद्की लोगन के गलत सिच्छा

(मरकुस 8:14-21)

<sup>5</sup> अउर चेला लोग झील के उआ पार पहुँचिगे, पय ऊँ पंचे रोटी लेंइ क बिसरिगें तय।<sup>6</sup> यीसु पुनि उनसे कहिन, “देखा, तूँ पंचे फरीसी लोगन अउर सद्की लोगन के खमीर से सतरक रह्या।”<sup>7</sup> इआ सुनिके चेला लोग आपस माहीं सोच-बिचार कइके कहँइ लागें, कि “हम पंचे रोटी नहीं लइआए आहैन, एसे यीसु अइसन कहत हैं।”<sup>8</sup> इआ जानिके यीसु उनसे कहिन, “हे अल्प बिसुआसिव, तूँ पंचे आपस माहीं काहे इआ सोच-बिचार करते हया, कि हमरे लघे रोटी नहिं आय? <sup>9</sup> का तूँ पंचे अबय तक नहीं समझे पाया? का तोहई पंचन काहीं ऊँ पाँच हजार मनइन के खातिर, पाँचठे रोटिन के सुध नहिं आय, अउर का तोहई पंचन काहीं इहव सुध नहिं आय, कि केतनी

† योना नबी के किताब माहीं अपना पंचे पढ़ सकित हएन।

टोपरी रोटी भरिके उठाय तय? <sup>10</sup> अउर का तोहई पंचन काहीं ऊँ चार हजार मनइन के खातिर, सातठे रोटिन के सुधि नहिं आय, अउर न इहय सुध आय, कि तूँ पंचे केतनी टोपरी रोटी उठाए रहे हया?”<sup>11</sup> “काहे तूँ पंचे अबहिनव तक नहीं समझे पाया, कि हम तोंहसे रोटी के बारे माहीं न होय कहने हय, पय इआ कि तूँ पंचे फरीसी लोगन, अउर सद्की लोगन के खमीर रूपी गलत सिच्छा से सतरक रह्या।”<sup>12</sup> तब उनखे समझ माहीं आबा, कि यीसु रोटी के खमीर से नहीं, पय फरीसी लोगन अउर सद्की लोगन के गलत सिच्छा से, सतरक रहँइ काहीं कहिन रहा हय।

### पतरस सोइकार किहिन कि यीसुअय मसीह आहीं

(मरकुस 8:27-30; लूका 9:18-21)

<sup>13</sup> जब यीसु कैसरिया प्रदेश के फिलिप्पी सहर माहीं आएँ, त अपने चलन से पूँछिन, कि “लोग, मनई के लड़िका काहीं का कहत हैं?”<sup>14</sup> तब ऊँ पंचे कहिन, कि “कुछ जने त यूहन्ना बपतिस्मा देंइ बाला, अउर कुछ जने त एलिय्याह नबी कहत हैं, अउर कुछ जने त यिर्मयाह नबी, अउर कुछ जने त इआ कहत हैं, कि परमातिमा के सँदेस बतारमँइ बालेन म से एक जने जि आबा हया।”<sup>15</sup> तब यीसु उनसे कहिन, “पय तूँ पंचे हमहीं का कहते हया, कि हम को आहैन?”<sup>16</sup> तब समौन जिनखर नाम पतरस घलाय रहा हय, यीसु से कहिन, “अपना जिन्दा परमातिमा के लड़िका मसीह आहैन।”<sup>17</sup> इआ सुनिके यीसु पतरस से कहिन, “हे समौन, योना के लड़िका, तूँ धन्य हया; काहेकि तोहई इआ बात कउनव मनई नहीं, बलकिन हमार पिता जउन स्वर्ग माहीं हैं, बताइन हीं।<sup>18</sup> अउर हमहूँ तोंहसे कहित हएन, कि तूँ पतरस † आह्या, अउर हम इआ पथरा के ऊपर आपन मसीही मन्डली बनाउब, अउर ओही कउनव बडरी इहाँ तक कि अधोलोक घलाय हराय न पाई।<sup>19</sup> हम तोहई स्वर्गराज के चाभिन काहीं देब, अउर जउने बात माहीं तूँ पंचे धरती माहीं हामी भरिहा, त उआ बात माहीं स्वर्ग माहीं रहँइ बाले परमातिमा घलाय हामी भरिहँय; अउर जउने बात माहीं तूँ धरती माहीं नाहीं करिहा, त उआ बात माहीं स्वर्ग माहीं रहँइ बाले परमातिमा घलाय नाहीं करिहँय।”<sup>20</sup> तब यीसु अपने चलन काहीं चेताइके कहिन, कि “इआ बात कोहू से न बताया, कि हम मसीह आहैन।”

### अपने मउत के बारे माहीं यीसु के भबिस्सबानी

(मरकुस 8:31-33; लूका 9:22-27)

<sup>21</sup> उआ समय से यीसु अपने चलन काहीं बतारमँइ लागें, कि “इआ जरूरी हय, कि हम यरूसलेम सहर काहीं जई, अउर यहूदी धारमिक अँगुअन अउर प्रधान याजकन, अउर मूसा के बिधान सिखामँइ बालेन के व्दारा खुब दुख उठाई, अउर मारि डारे जई, अउर तिसरे दिना जिन्दा होइ जई।”<sup>22</sup> इआ बात काहीं सुनिके पतरस यीसु काहीं अलग लइ जाइके डाँटँइ लाग, कि “हे प्रभू, परमातिमा अइसन कबहूँ न करँय! अउर अपना के साथ अइसन कबहूँ न होई।”<sup>23</sup> तब यीसु मुड़िके पतरस से कहिन, “हे सइतान हमरे आँगे से दूरी होइजा, तँय हमरे खातिर ठोकर के कारन आहे, काहेकि तँय परमातिमा के बातन माहीं नहीं, बलकिन मनइन के बातन माहीं मन लगउते हए।”<sup>24</sup> तब यीसु अपने चलन से कहिन, “जे कोऊ हमरे पीछे आमँइ चाहय, उआ अपने मन के मुताबिक जिअब छोंड़िके, हरेक दिन अपने सब दुख तकलीफन काहीं सहिके जऊँ क्रूस के बराबर हैं, हमरे पीछे चलया।<sup>25</sup> काहेकि जे कोऊ आपन प्रान बचामँइ चाही, उआ ओही गमाय देई; अउर जे कोऊ हमरे खातिर आपन प्रान तक देंइ काहीं तइआर रही, उआ ओही पुनि पाई।<sup>26</sup> अगर कउनव मनई सगले संसार के मालिक होइ जाय, अउर आपन प्रान गमाय देय, त ओही का फायदा होई? अउर मनई आपन प्रान बचामँइ के बदले माहीं का दइ सकत हय? <sup>27</sup> हम ई सगली बातन काहीं एसे कहित हएन, कि जब मनई के लड़िका, अपने पिता परमातिमा के महिमा माहीं, स्वर्गदूतन के साथ अइहँय, उआ समय, ‘ऊँ हरेक जन काहीं उनखे

†† पतरस अरथात पथरा

कामन के मुताबिक प्रतिफल देइहँय।<sup>28</sup> हम तौहसे सही कहित हएन, कि जउन इहाँ ठाढ़ हें, उनमा से कुछ जने अइसन हें, कि जब तक मनई के लड़िका काहीं, राज करई के खातिर आबत न देख लेइहँय, तब तक बेलकुल न मरिहँय।”

### यीसु के रूप बदलब

(मरकुस 9:2-13; लूका 9:28-36)

17 छय दिना के बाद यीसु, पतरस अउर याकूब अउर याकूब के भाई यूहन्ना काहीं, अपने साथ माहीं लिहिन, अउर उन्हीं एकठे ऊँच पहार माहीं एकान्त म लइगें।<sup>2</sup> अउर उहाँ उनखे अँगुअय यीसु के रूप बदलिगा, अउर उनखर मुँह सुरिज कि नाई चमकई लाग, अउर उनखर ओन्हा उँजिआर कि नाई उजर होइगा।<sup>3</sup> अउर तिनहूँ चेला मूसा नबी, अउर एलियाह नबी काहीं यीसु के साथ बातँय करत देखिन।<sup>4</sup> इआ देखिके पतरस यीसु से कहिन, कि “हे प्रभू, हमार पंचन के इहाँ रहब निकहा हय। अगर अपना के मरजी होय, त हम पंचे इहाँ तीनठे मइइआ बनाई, एकठे अपना के खातिर, एकठे मूसा नबी के खातिर, अउर एकठे एलियाह नबी के खातिर।”<sup>5</sup> पतरस जब इआ कहतय रहे हँय, तबहिनय एकठे उजर बदरी आइके उन्हीं पंचन काहीं लुकाय लिहिस, अउर उआ बदरी से इआ बोल सुनान: कि “ई हमार पियार लड़िका आहीं, इनसे हम खुब प्रसन्न हएन: तू पंचे इनखे बातन काहीं मान्या।”<sup>6</sup> इआ सुनिके चेला लोग एतना डेराइगें, कि भुँइ माहीं मुँहे के बल गिरिगें।<sup>7</sup> तब यीसु उनखे लघे आइके उन्हीं छुँइन, अउर कहिन, “उठा, डेरा ना।”<sup>8</sup> अउर जब ऊँ पंचे आपन आँखी खोलिन, त उन्हीं यीसु के अलाबा अउर कोऊ नहीं देखान।

<sup>9</sup> पहार से नीचे उतरत समय, यीसु उन्हीं हुकुम दिहिन, कि “जब तक मनई के लड़िका मरिके जिन्दा न होइ जाय, तब तक जऊँ कुछू तू पंचे देखे हया, उआ कोहू से न बताया।”<sup>10</sup> अउर ऊँ पंचे यीसु से पूँछिन, कि “मूसा के बिधान सिखामँइ बाले इआ काहे कहत हें, कि मसीह से पहिले एलियाह नबी जरूर अइहँय?”<sup>11</sup> तब यीसु उन्हीं पंचन काहीं जबाब दिहिन, कि “एलियाह नबी जरूर अइहँय, अउर मसीह काहीं सोइकार करई के खातिर, मनइन काहीं तइआर करिहँय।<sup>12</sup> पय हम तौहसे कहित हएन, कि एलियाह त आय चुके हँय, अउर कउनव मनई उन्हीं नहीं पहिचानिन; पय जइसन चाहिन उहयमेर उनखे साथ बरताव किहिन। इहइमेर से मनई के लड़िका घलाय उनखे व्दारा सताबा जई।”<sup>13</sup> तब उनखर चेला लोग इआ समझिगें, कि यीसु, यूहन्ना बपतिस्मा देइ बाले के बारे माहीं कहिन हीं।

### मिरगी से परेसान लड़िका काहीं यीसु नीक किहिन

<sup>14</sup> जब यीसु अपने तिनहूँ चलन के साथ भीड़ के मनइन के लघे पहुँचे, तबहिनय एकठे मनई यीसु के लघे आइके उनखे गोड़न गिरिके कहँइ लाग, <sup>15</sup> “हे प्रभू, हमरे लड़िका काहीं मिरगी आबत ही, ओखे ऊपर दया करी! काहेकि ओही बड़ा कस्त हय; उआ बेर-बेर आगी माहीं, अउर पानी माहीं गिर परत हय।<sup>16</sup> अउर हम ओही अपना के चलन के लघे लइ आएन तय, पय ऊँ पंचे ओही नहीं नीक कए पाइन।”<sup>17</sup> तब यीसु उन्हीं जबाब दिहिन, “हे परमातिमा के ऊपर बिसुआस न करई बाले हठी मनइव, हम कब तक तौहरे साथ रहब, अउर कब तक तौहार सहत रहब? उआ लड़िका काहीं हमरे लघे लइ आबा।”<sup>18</sup> तब यीसु, बुरी आत्मा काहीं डॉटिन, तबहिनय उआ बुरी आत्मा उआ लड़िका से बहिरे निकरिगे, अउर उआ लड़िका ओतनिनदार नीक होइगा।

<sup>19</sup> तब चेला लोग एकान्त माहीं यीसु के लघे आइके उनसे पूँछिन; “हम पंचे उआ लड़िका से बुरी आत्मा काहीं, काहे नहीं निकारे पाएन?”<sup>20</sup> तब यीसु उनसे कहिन, कि “अपने बिसुआस के कमी के कारन, तू पंचे ओही नहीं निकारे पाया। काहेकि हम तौहसे सही कहित हएन, कि अगर तौहार बिसुआस राई के दानव के बराबर होई, त तू पंचे इआ पहार से कहि देहा, कि ‘इहाँ से सरकिके उहाँ चला जा, त उआ चला जई’, अउर कउनव बात

तौहरे खातिर असम्भव न होई।”<sup>21</sup> (पय इआमेर के बुरी आत्मा बिना उपबास प्राथना के नहीं निकरय †।)

### अपने मउत के बारे माहीं यीसु के पुनि भबिस्सबानी

(मरकुस 9:30-32; लूका 9:43-45)

<sup>22</sup> जब यीसु अपने चलन के साथ गलील प्रदेश माहीं रहे हँय, तब उनसे कहिन, कि “मनई के लड़िका बिरोध करई बाले मनइन के हाँथ माहीं पकड़ाबा जई,<sup>23</sup> अउर ऊँ पंचे ओही मारि डरिहँय, अउर उआ तिसरे दिना जिन्दा होइ जई।” इआ बात काहीं सुनिके उनखर चेला लोग खुब दुखी होइगें।

### मन्दिर के कर देब

<sup>24</sup> जब ऊँ पंचे कफरनहूम सहर माहीं पहुँचे, तब मन्दिर के कर लेंइ बाले, पतरस के लघे आइके पूँछिन, कि “का तौहार पंचन के गुरू, मन्दिर के कर नहीं देंय?”<sup>25</sup> तब पतरस उन्हीं जबाब दिहिन, कि “हाँ, ऊँ देत हें।” जब पतरस घर माहीं आएँ, त यीसु पतरस के इआ बात पूँछँइ से पहिलेन उनसे कहिन, “हे समौन, तू का सोचते हया? धरती के राजा चुंगी, इआ कि कर केसे लेत हें? अपने संतानन †† से इआ कि दुसरे मनइन से?”<sup>26</sup> तब पतरस यीसु से कहिन, कि “दुसरे मनइन से।” तब यीसु पतरस से कहिन, कि “त सन्तान बचिगें।<sup>27</sup> तऊ, इआ कारन से कि हमरे व्दारा उन्हीं ठोकर न लागय, तू झील के किनारे जाइके बंसी डारा, अउर जउन मछरी पहिले फँसय, ओही लइ लिहा, अउर जब तू ओखर मुँह खोलिहा त तौहई एकठे सिक्का मिली, ओही लइके, हमरे अउर अपने कर के खातिर उन्हीं दइ दिहा।”

### स्वरगराज माहीं सगलेन से बड़ा को कहाई?

(मरकुस 9:33-37; लूका 9:46-48)

18 उहय समय चेला लोग यीसु के लघे आइके पूँछँइ लागें, कि “स्वरगराज माहीं सगलेन से बड़ा को कहाई?”<sup>2</sup> इआ बात काहीं सुनिके यीसु एकठे छोट क लड़िका काहीं अपने लघे बोलाइके, उनखे बीच माहीं ठाढ़ किहिन,<sup>3</sup> अउर कहिन, कि “हम तौहसे सही कहित हएन, कि अगर तू पंचे अपने सुभाव काहीं न बदलिहा, अउर छोट-छोट लड़िकन कि नाई भोले-भाले न बनिहा, त तू पंचे स्वरगराज माहीं कबहूँ न जाए पइहा।<sup>4</sup> अउर जे कोऊ खुद काहीं इआ लड़िका कि नाई छोट बनाई, उआ स्वरगराज माहीं सगलेन से बड़ा होई।<sup>5</sup> अउर जे कोऊ हमरे नाम से इआमेर के एकठे लड़िका काहीं सोइकार करत हय, त उआ हमहीं सोइकार करत हय।”

### पाप किहे के परिनाम के बारे माहीं यीसु के सिच्छा

(मरकुस 9:42-48; लूका 17:1,2)

<sup>6</sup> जे कोऊ हमरे ऊपर बिसुआस करई बालेन काहीं, चाह उआ छोट क लड़िकय होय, उनसे पाप कराबत हय, त उआ मनई के खातिर इआ ठीक कहाई, कि एकठे बड़ी काहीं चक्की के जेतबा ओखे गरे माहीं बाँधिके गहिल समुद्र माहीं बुड़ाय दीन जाय। काहेकि परमातिमा के सजा एहू से जादा मिली।<sup>7</sup> “काहेकि मनइन के जीवन म पाप माहीं गिरँय के मोका त जरूर अइहँय, पय जउन मनई दुसरे मनइन काहीं पाप माहीं गिराबत हें, त उन्हीं परमातिमा से खुब सजा मिली।

<sup>8</sup> अगर तौहार हाँथ, गोड़ तौहसे पाप करामँइ के कारन बनत हें, त उन्हीं काटिके फेंकि द्या। नहीं त तू दोनव हाँथ-गोड़ लए नरक के आगी माहीं डार दीन जइहा, जउन कबहूँ बुझातिन नहिँ आय। बिना हाँथ-गोड़ के स्वरगराज माहीं जाब एसे निकहा हय।<sup>9</sup> अउर अगर तौहार आँखी तौहसे पाप करामँइ

† इआ बचन कुछ बाइबल माहीं नहिँ आय। †† संतानन से- उआ समय माहीं राजा लोग अपने संतानन से कर नहीं लेत रहे आहीं, पय बाहरी मनइन से कर लेत रहे हँय।

के कारन बनत ही, त ओही निकारिके फेंकि द्या; नहीं त दुइठे आँखी लए नरक के आगी माहीं डार दीन जइहा। कनमा होइके अनन्त जीवन पाउब तौहरे खातिर एसे निकहा हय।”

### हेरान गाड़ के उदाहरन

(लूका 15:3-7)

10 यीसु उनसे पुनि कहिन, कि “देखा, तूँ पंचे ई छोट से छोट मनइन म से जे हमरे ऊपर बिसुआस करत हैं, कोहू काहीं तुच्छ न जान्या; काहेकि हम तौहसे सही कहित हएन, कि स्वरग माहीं उनखर दूत, स्वरग माहीं रहँइ बाले हमरे पिता के लघे हमेसा हाजिर रहत हैं। 11 (काहेकि मनई के लड़िका, भटके मनइन काहीं बचामँइ आबा हय।)

12 तूँ पंचे का समझते हया? अगर कउनव मनई के लघे सवठे गाड़ होंय, अउर उनमा से एकठे हेराइ जाय, त का उआ मनई निन्यान्नबे गड़रन काहीं उहँय, छोंड़िके, पहार माहीं जाइके, उआ हेरान गाड़र काहीं न ढूँढी? 13 अउर अगर अइसन होय कि, उआ हेरान गाड़र मिल जाय। त हम तौहसे सही-सही कहित हएन, कि उआ मिली गाड़र के खातिर, उआ मनई खुब उराव मनाई। बलकिन ऊँ निन्यान्नबे गड़रन के खातिर, एतना उराव न मनाई, जउन भटकी नहीं रही आहीं। 14 इहइमेर तौहार पंचन के पिता जउन स्वरग माहीं रहत हैं, उनखर मरजी इआ ही, कि हमरे ऊपर बिसुआस करँइ बालेन म से, साधारन से साधारन मनई घलाय अनन्त जीवन न गमाबय।”

### अपराधिन के साथ कइसा बरताव करँइ चाही?

15 “अउर अगर तौहार भाई तौहरे साथ कउनव बुरा बरताव करय, त ओखे लघे जा, अउर ओही अकेले माहीं समझाबा; अगर उआ तौहरे बात काहीं मानय, त तूँ अपने भाई काहीं भाई के रूप माहीं पाय लिहा हय। 16 पय अगर उआ तौहरे बात काहीं न मानय, त एक इआ कि दुइ जने काहीं अपने साथ माहीं अउर लइ जा, कि ‘जउने हरेक बात दुइ इआ कि तीन गबाहन के आँगे पक्की होइ जाय।’ 17 अउर अगर उआ उनहूँ पंचन के बात काहीं न मानय, त मसीही मन्डली से बताय द्या, पय अगर उआ मसीही मन्डली के बात काहीं घलाय न मानय, त तूँ ओही परमातिमा से न डेरँइ बाले, अउर चुंगी † लेंइ बाले बुरे मनइन कि नाई समझा। 18 हम तौहसे सही-सही कहित हएन, जउने बात माहीं तूँ पंचे धरती माहीं ‘हामी भरिहा’ त उआ बात माहीं स्वरग माहीं रहँइ बाले परमातिमा घलाय ‘हामी भरिहँय’; अउर जउने बात माहीं तूँ पंचे धरती माहीं ‘नाहीं करिहा’ त उआ बात माहीं स्वरग माहीं रहँइ बाले परमातिमा घलाय ‘नाहीं करिहँय’। 19 अउर हम तौहसे इहव कहित हएन, कि अगर तौहरे पंचन म से दुइ जने, इआ धरती माहीं कउनव बात के खातिर एक मन होइके मगिहँय, त उआ स्वरग माहीं रहँइ बाले हमरे पिता परमातिमा के तरफ से, उनहीं जरूर मिल जई। 20 काहेकि जहाँ दुइ इआ कि तीन जने हमरे नाम से एकट्ठा होत हैं, हम उहाँ उनखे बीच माहीं हाजिर रहित हएन।”

### दुसरे काहीं माफ करँइ के बारे माहीं यीसु के सिच्छा

21 तब पतरस यीसु के लघे आइके उनसे कहिन, कि “हे प्रभू, अगर हमार भाई बेर-बेर अपराध करत रहय, त हम ओही कय बेरकी माफ करी? का सात बेरकी तक?” 22 इआ बात काहीं सुनिके यीसु पतरस से कहिन, कि “हम तौहसे इआ नहीं कही कि सात बेरकी तक माफ करा, बलकिन सात बेरकी के सत्तर गुना तक माफ करा।”

### दया न करँइ बाले दास के उदाहरन

23 यीसु उनसे पुनि कहिन, कि “एसे स्वरग के राज ऊँ राजा कि नाई हय, जउन अपने सेबकन से हिंसाब-किताब लेंइ चाहिन। 24 अउर जब ऊँ

† यहूदी लोग चुंगी लेंइ बालेन काहीं पापी मानत रहे हँय, काहेकि ऊँ पंचे रोमी लोगन के खातिर चुंगी लेत रहे हँय।

हिंसाब-किताब लेंइ लागें, तब एक जने काहीं उनखे लघे लइ आबा ग, जउन बीस किलो चाँदी के करजदार रहा हय। 25 अउर करजा चुकामँइ के खातिर ओखे लघे कुछू नहीं रहा आय, त ओखर मालिक कहिन, कि ‘एही अउर एखे लड़िका-मेहेरिआ काहीं, अउर जउन कुछू एखर होय, उआ सगला बेंचिके हमार करजा पटाय दीन जाय।’ 26 इआ बात काहीं सुनिके उआ दास उनखे गोड़न गिरिके कहिस, हे मालिक, अपना धीरज धरी, हम अपना के सगला करजा पटाय देब। 27 तब उआ दास के मालिक ओखे ऊपर दया कइके ओही छोंड़ि दिहिन, अउर ओखर करजा घलाय माफ कइ दिहिन।”

28 “पय जब उआ दास बहिरे निकरा, त ओखर साथी दासन म से एक जने ओही मिला, जउन ओसे करजा माहीं कुछ पइसा लए रहा हय; त उआ ओही पकड़िके ओखर घोंघा दबाइके कहिस, कि ‘तँय जउन कुछू हमार करजा लए हए त ओही दइ दे।’ 29 तब ओखर साथी दास ओखे गोड़न गिरिके बिनती करँइ लाग, कि अपना धीरज धरी, हम अपना के सगला करजा पटाय देब। 30 पय उआ दास ओखे बात काहीं नहीं मानिस, बलकिन ओही लइ जाइके जेल माहीं बन्द कइ दिहिस; कि जब तक उआ सगला करजा न पटाय देय, तब तक जेलय माहीं बन्द रहय। 31 अउर इआ जउन भ रहा हय सगला देखिके, ओखर दूसर साथी दास लोग खुब दुखी भें, अउर जाइके अपने मालिक से सगला हाल बताय दिहिन। 32 तब ओखर मालिक, उआ पहिल दास काहीं बोलाइके ओसे कहिन, हे दुस्त दास, तँय जब हमसे बिनती किहे, त हम तोर उआ सगला करजा माफ कइ दिहेन। 33 एसे जइसन हम तोरे ऊपर दया किहेन तय, त का उहयमेर तोहू काहीं घलाय अपने साथ माहीं रहँइ बाले दास के ऊपर दया न करँइ चाही? 34 अउर ओखर मालिक खुब गुस्साइके, ओही सजा देँइ बालेन के हाँथ माहीं सँउँपे दिहिन, कि जब तक उआ सगला करजा पटाय न देय, तब तक उआ उनखे कब्जे माहीं रहय।” 35 इहइमेर अगर तौहरे पंचन म से हरेक जन, अपने भाई काहीं पूरी तरह से माफ न करी, त स्वरग माहीं रहँइ बाले हमार पिता परमातिमा, तौहसे उहयमेर बरताव करिहँय।

### छोंड़-छुट्टी के बारे माहीं यीसु के सिच्छा

(मरकुस 10:1-12)

19 यीसु ई बातँय कहे के बाद, गलील प्रदेश से चलेगें; अउर यरदन नदी के दुसरे पार यहूदिया प्रदेश माहीं गें। 2 अउर उनखे पीछे-पीछे बड़ी भीड़ चल दिहिस, अउर उनमा से जउन बिमार रहे हँय, यीसु उनहीं नीक कइ दिहिन।

3 तब फरीसी लोग, यीसु के परिच्छा लेंइ के खातिर, उनखे लघे आइके कहँइ लागें, कि “का कउनव कारन से अपने मेहेरिआ के छोंड़-छुट्टी करब उचित हय?” 4 तब यीसु उनहीं जबाब दिहिन, कि “का तूँ पंचे पबित्र सास्त्र माहीं नहीं पढ़े आह्या, कि जउन उनहीं बनाइन हीं, त ऊँ सुरुआतय से मेहेरिआ अउर मंसेरुआ के रूप माहीं बनाइन रहा हय? अउर कहिन तय, 5 कि ‘इआ कारन से मनई अपने महतारी-बाप से अलग होइके अपने मेहेरिआ के साथ रही, अउर ऊँ पंचे दोनव जने एकय तन होइहँय ††।’ 6 इआ कारन से अब ऊँ दोनव जन दुइ नहीं, बलकिन एकय तन आहीं। एसे जिनहीं परमातिमा जोड़िन हीं, उनहीं मनई अलग न करँइ।” 7 तब ऊँ पंचे यीसु से कहिन, “पय मूसा अपने बिधान माहीं इआ काहे लिखिन हीं, कि मनई अपने मेहेरिआ काहीं छोंड़-छुट्टी के कागज दइके, ओखर छोंड़-छुट्टी कइ सकत हय?” 8 तब यीसु उनसे कहिन, कि “मूसा तौहरे मन के कठोरता के कारन, तौहई अपने मेहेरिआ के छोंड़-छुट्टी करँइ के हुकुम दिहिन तय, पय सुरुआत से अइसन नहीं रहा आय।” 9 अउर हम तौहसे इहव कहित हएन, कि “जे कोऊ अपने मेहेरिआ काहीं ब्यभिचार के अलाबा अउर कउनव दुसरे कारन से छोंड़िके, दुसरे मेहेरिआ से काज करत हय, त उआ ओखे साथ ब्यभिचार करत हय; अउर जे कोऊ उआ छोंड़ी मेहेरिआ से काज करत हय, त उहव ब्यभिचार करत हय।”

10 इआ बात काहीं सुनिके चेला लोग यीसु से कहिन, कि अगर “कउनव मंसेरुआ के कउनव मेहेरिआ के साथ अइसन सम्बन्ध हय, त एसे निकहा इआ हय, कि काज न करय।” 11 तब यीसु अपने चलन से कहिन, कि “सब कोऊ इआ बचन काहीं सोइकार नहीं कइ सकैय, केबल उँइन पंचे सोइकार कइ सकत हैं, जिनहीं परमातिमा के व्दारा काज न करँइ के बरदान दीन ग हय। 12 काहेकि कुछ मनई अइसन हैं जउन महतारी के पेटेन से नपुंसक पइदा भँ हँय; अउर कुछ मनई अइसन हैं, जिनहीं मनइन नपुंसक बनाय दिहिन हीं, अउर कुछ मनई अइसन हैं, जे स्वरगराज के खातिर खुद काहीं नपुंसक बनाइन हीं। एसे जे कोऊ इआ बचन काहीं सोइकार कइ सकत हय, त उआ इआ बचन काहीं सोइकार कइ लेय।”

### यीसु छोट-छोट लड़िकन काहीं आसिरबाद दिहिन

(मरकुस 10:13-16; लूका 18:15-17)

13 तब खुब मनई अपने छोट-छोट लड़िकन काहीं यीसु के लघे लइ आमँइ लागें, कि यीसु उनखे ऊपर आपन हाँथ धइके आसिरबाद देंय, अउर उनखे खातिर प्राथना करँइ, पय चेला लोग उनहीं डाँटँइ लागें। 14 तब यीसु उनसे कहिन, कि “लड़िकन काहीं हमरे लघे आमँइ द्या, अउर उनहीं न बरजा: काहेकि जे कोऊ छोट लड़िकन कि नाई अपने काहीं नम्र बनइहँय, उँइन परमातिमा के स्वरगराज के भागीदार बनिहँय।” 15 अउर यीसु, उँ छोट-छोट लड़िकन के ऊपर आपन हाँथ धइके आसिरबाद दिहिन, अउर एखे बाद उहाँ से चलेगें।

### धनी मनई अउर अनन्त जीबन

(मरकुस 10:17-31; लूका 18:18-30)

16 एकठे मनई यीसु के लघे आबा, अउर उनसे कहिस, कि “हे गुरू, अपना हमहीं बताई कि हम अइसन कउन निकहा काम करी, कि जउने अनन्त जीबन पाई?” 17 तब यीसु उआ मनई से कहिन, “तूँ हमसे निकहा काम के बारे माहीं काहे पुँछते हया? काहेकि केबल एकय हैं, जउन निकहे हैं, पय अगर तूँ अनन्त जीबन पामँइ चहते हया, त हुकुमन काहीं माना करा।” 18 तब उआ मनई यीसु से कहिस, “कउने हुकुमन काहीं हम मानी?” तब यीसु ओसे कहिन, कि “कतल न करब, ब्यभिचार न करब, चोरी न करब, कोहू के बिरोध माहीं लबरी गबाही न देब, 19 अउर अपने महतारी-बाप के मान-सम्मान करब, अउर अपने परोसी से अपनेन कि नाई प्रेम रक्खब †।” 20 तब उआ नवजमान यीसु से कहिस, कि “हे गुरू, ई सगली बातन के त हम पालन करतय हएन, अउर अब अपना हमहीं इआ बताई, कि अबय हमरे जीबन माहीं कउने बात के कमी हय?” 21 तब यीसु उआ मनई से कहिन, कि “अगर तूँ सिद्ध बनँइ चहते हया, त जा, जऊँ कुछ तौहार धन-सम्पत्ती ही, ओही सब बैचिके गरीबन माहीं बाँटि द्या, अउर तौहई स्वरग माहीं एसे बढ़िके धन-सम्पत्त मिली, अउर आइके हमरे पीछे चला।” 22 यीसु के इआ बात काहीं सुनिके उआ मनई उदास होइके, उहाँ से चला ग, काहेकि उआ खुब धनी रहा हय। अउर इआ करँइ के ओखर इच्छा नहीं रही।

23 तब यीसु अपने चलन से कहिन, कि “हम तौहसे सही कहित हएन, कि धनी मनई के परमातिमा के राज म प्रबेस करब कठिन हय।” 24 अउर इहय बात हम तौहसे पुनि कहित हएन, कि “परमातिमा के राज माहीं धनी मनई के पहुँचब खुब कठिन हय, बलकिन सूजी के छँद से ऊँट के निकर जाब, एसे सरल हय।” 25 यीसु के इआ बात काहीं सुनिके चेला लोग, खुब अचरज मानिके, आपस माहीं कहँइ लागें, “त पुनि केही मुक्ती मिल सकत ही?” 26 यीसु अपने चलन कइती देखिके कहिन, “मनइन से त इआ नहीं होइ सकय, पय परमातिमा से होइ सकत हय; काहेकि परमातिमा सब कुछ कइ सकत हैं।” 27 तब पतरस यीसु से कहँइ लागें, “देखी हम पंचे त आपन सब कुछ छौँड़िके, अपना के पीछे चले आएन हय, त हमहीं पंचन काहीं का

मिली?” 28 तब यीसु उनसे कहिन, कि “हम तौहसे सही-सही कहित हएन, कि आमँइ बाले नए संसार माहीं जब सब कुछ परमातिमा नबा बनइहँय, तब मनई के लड़िका अपने महिमा के सिंहासन माहीं बइठिके राज करिहँय, अउर तूँ पंचे घलाय जउन हमार चेला बन गया हय, बरहँव सिंहासनन माहीं बइठिके, इजराइल के बरहँव गोत्रन के न्याय करिहा। 29 अउर जे कोऊ अपने घर-दुआरन, भाई-बहिनिन, महतारी-बाप, लड़िकन-बच्चन, अउर खेत-पातन काहीं हमरे नाम के खातिर छौँड़ि दिहिस ही, त ओही इनखे बदले माहीं सव गुना मिली; अउर उआ अनन्त जीबन के बारिसदार होई। 30 देखा, जे कोऊ इआ संसार माहीं खुद काहीं सगलेन से बड़ा मानत हैं, उँ पंचे स्वरग माहीं सगलेन से छोट माने जइहँय, अउर जे कोऊ इआ संसार माहीं खुद काहीं सगलेन से छोट मानत हैं, उँ पंचे स्वरग माहीं सगलेन से बड़े माने जइहँय।”

### बगिया के मजूरन के उदाहरन

20 यीसु उनसे पुनि एकठे उदाहरन बताइन, कि “स्वरग के राज एकठे जमींदार कि नाई हय, जउन सकारे निकरें, कि अपने अंगूर के बगिया माहीं काम करँइ के खातिर मजूरन काहीं लगामँइ। 2 अउर उँ मजूरन से उनखर एक रोज के मजूरी एकठे चाँदी के सिक्का तँय कइके, अपने अंगूर के बगिया माहीं काम करँइ के खातिर पठइन। 3 अउर ओखे बाद उँ पुनि सकारे नव बजे के करीब निकरें, अउर बजार माहीं दुसरे मनइन काहीं बेफालतू माहीं ठाढ़ देखिन। 4 अउर उनसे कहिन, कि ‘तूँ पंचे घलाय हमरे अंगूर के बगिया माहीं जाइके काम करा, अउर जउन कुछ उचित होई, उआ मजूरी हम तौहई पंचन काहीं देब।’ एसे उँ पंचे घलाय बगिया माहीं काम करँइ चलेगें। 5 ओखे बाद उँ जमींदार पुनि बारा बजे के करीब निकरें अउर कुछ मजूरन काहीं काम माहीं लगाइन। ओखे बाद पुनि तीन बजे के करीब निकरिके उहयमेर किहिन। 6 अउर ओखे बाद करीब पाँच बजे उँ पुनि निकरें अउर बजार माहीं अउरव मनइन काहीं इहाँ-उहाँ ठाढ़ पाइन, तब उनसे कहिन, कि ‘तूँ पंचे काहे दिन भर इहाँ बेफालतू माहीं ठाढ़ रहि गया?’ तब उँ पंचे उनसे कहिन, कि ‘हम पंचे एसे ठाढ़ रहि गएन, कि हमहीं पंचन काहीं कोऊ काम माहीं नहीं लगाइस।’ 7 तब उँ उनसे कहिन, कि ‘तूँ पंचे घलाय हमरे अंगूर के बगिया माहीं जाइके काम करा।’”

8 जब साँझ भय तब अंगूर के बगिया के मालिक अपने भन्डारी से कहिन, कि “सगले मजूरन काहीं बोलाइके उनखर मजूरी दइ द्या जउन काम माहीं आखिरी से लइके सुरू तक आएँ हँय। 9 एसे जब उँ मजूर आएँ, जउन पाँच बजे के करीब काम माहीं लगाए गे रहे हँय, त उनहीं दिन भर के पूर मजूरी मिली। 10 इआ कारन से जउन मजूर काम माहीं पहिले आए रहे हँय, उँ पंचे इआ सोचिन, कि हमहीं जादा मजूरी मिली; पय उनहूँ पंचन काहीं घलाय ओतनिन मजूरी मिली। 11 अउर जब उनहीं मजूरी मिल चुकी, त उँ पंचे बगिया के मालिक के ऊपर गुस्साइके बरबरौय लागें। अउर उनसे कहँइ लागें, 12 कि ‘ई पंचे जउन हमसे पीछे आएँ हँय, अउर एकय घन्टा काम किहिन हीं, तऊ अपना उनहीं, हमरेन बराबर मजूरी दिहेन हय। पय हम पंचे जउन तेज घाम माहीं दिन भर मेहनत किहेन हय, ओखर ध्यान अपना नहीं दिहेन?’ 13 तब मालिक उँ मजूरन म से एक जने काहीं जबाब दिहिन, कि ‘हे साथी, हम तौहरे साथ कउनव अन्याय नहीं किहेन आय; इआ बताबा का तूँ हमसे एक दिन के मजूरी एकठे चाँदी के सिक्का नहीं तँय किहा तय?’ 14 एसे जउन मजूरी तौहार होत ही, ओही लइके चले जा; हमार मरजी इहय ही, कि हम जेतनी मजूरी तौहई दिहेन हय ओतनिन मजूरी काम माहीं पीछे आमँइ बालेन काहीं घलाय देई। 15 का इआ उचित नहिँ आय, कि हम अपने धन-सम्पत्ती से जउन चाही उआ करी? का तूँ हमरे भले हौँइ के कारन हमसे जरते हया? 16 देखा, जे कोऊ इआ संसार माहीं खुद काहीं सगलेन से बड़ा मानत हैं, उँ पंचे स्वरग माहीं सगलेन से छोट माने जइहँय, अउर जे कोऊ इआ संसार माहीं खुद काहीं सगलेन से छोट मानत हैं, उँ पंचे स्वरग माहीं सगलेन से बड़े माने जइहँय।”

† 19:19 लैब्य 19:18

### अपने मउत के बारे माहीं यीसु के तिसराय भबिस्सबानी

(मरकुस 10:32-34; लूका 18:31-34)

17 जब यीसु अपने चलन के साथ यरूसलेम सहर काहीं जात रहे हँय, तब ऊँ बरहँय चलन काहीं एकान्त माहीं लडगें, अउर गइल माहीं उनसे कहँड लागें, 18 कि “देखा, हम पंचे यरूसलेम सहर माहीं जइत हएन; अउर मनई के लडिका प्रधान याजकन, अउर मूसा के बिधान सिखामँड बालेन के हाँथ माहीं पकड़ाबा जई, अउर ऊँ पंचे ओही मउत के सजा के काबिल ठहरइहँय। 19 अउर ओही गैरयहूदी लोगन के हाँथे माहीं सउँपिहँय, कि ऊँ पंचे ओखर मजाक उडामँड, अउर ओही चाबुक से मारँड, अउर ओही क्रूस माहीं चढ़ामँड। पय उआ तिसरे दिन जिन्दा होइ जई।”

### एकठे महतारी के अपने लडिकन के खातिर यीसु से बिनती करब

(मरकुस 10:35-45)

20 अउर एक दिन जब्दी के मेहेरिआ, अपने लडिकन के साथ यीसु के लघे आइके उनहीं प्रनाम किहिन, अउर उनसे कुछू मागँड लागीं। 21 तब यीसु उनसे कहिन, कि “तूँ का चहते हया?” तब ऊँ, यीसु से कहिन, “अपना हमहीं इआ बचन देई, कि जब अपना राजा बनिके राज करब, तब हमरे ई दोनव लडिकन म से एक जने अपना के दहिने कइती, अउर दूसर बाएँ कइती बइठया।” 22 इआ सुनिके यीसु उनसे कहिन, “तूँ पंचे नहीं जनते आह्या, कि हम पंचे का मागित हएन? जऊँ भारी कस्ट हम सहँड बाले हएन, का तूँ पंचे उआ कस्ट सहि सकते हया?” ऊँ पंचे उनसे कहिन, कि “हाँ, हम पंचे सहि सकित हएन।” 23 तब यीसु उनसे पुनि कहिन, “जऊँ कस्ट हम सहँड बाले हएन, ओही त तूँ पंचे सहि लेइहा, पय अपने दहिने अउर अपने बाएँ कोहू काहीं बइठाउब हमार काम न होय, पय उआ जघा जिनखे खातिर स्वरग माहीं रहँड बाले हमार पिता तइआर किहिन हीं, उआ जघा उनहिन काहीं मिली।” 24 इआ सुनिके, दसहँ चला ऊँ दोनव भाइन के ऊपर गुस्सा होइगें। 25 तब यीसु, चलन काहीं अपने लघे बोलाइके उनसे कहिन, “तूँ पंचे जनते हया, कि गैरयहूदी लोगन के राजा, मनइन के ऊपर आपन हुकुम चलाबत हें, अउर उनखर अधिकारी लोग, मनइन के ऊपर आपन अधिकार जताबत हें। 26 पय तौहरे बीच माहीं अइसा न होइ चाही, बलकिन जे कोऊ तौहरे म से बड़ा बनँड चाहत हय, त उआ तौहार सगलेन के सेबा करँड बाला बनय। 27 अउर जे कोऊ तौहरे म से मुखिया बनँड चाहत हय, त उआ पहिले तौहार पंचन के दास बनय; 28 जइसन कि मनई के लडिका एसे नहीं आबा, कि ओखर सेबा कीन जाय, बलकिन एसे आबा हय, कि खुदय दुसरेन के सेबा करय, अउर उआ खुब मनइन काहीं मुक्ती देइ के खातिर आपन प्रान देय।”

### दुइठे अँधरन काहीं नीक करब

(मरकुस 10:46-52; लूका 18:35-43)

29 जब यीसु अउर उनखर चेला लोग यरीहो सहर से निकरिके जात रहे हँय, तब एकठे खुब बड़ी भीड़ उनखे पीछे-पीछे चल दिहिस। 30 अउर दुइठे आँधर मनई जउन सड़क के किनारे बइठ रहे हँय। ऊँ इआ बात काहीं सुनिके कि यीसु जात हें, चिल्लाइके कहँड लागें, “हे प्रभू, राजा दाऊद के सन्तान हमरे ऊपर दया करी।” 31 तब कुछ जने उनहीं डाँटिन, कि चुप्यय रहा। पय ऊँ पंचे अउर जोर से चिल्लाइके कहिन, कि “हे प्रभू, राजा दाऊद के सन्तान हमरे ऊपर दया करी।” 32 तब यीसु ठाढ़ होइके उनहीं अपने लघे बोलाइके कहिन, कि “तूँ पंचे का चहते हया, कि हम तौहरे खातिर करी?” 33 तब ऊँ पंचे यीसु से कहिन, कि “हे प्रभू, हम पंचे इआ चाहित हएन, कि हमार पंचन के आँखी खुल जाँय अउर देखँड लागी।” 34 तब यीसु उनखे ऊपर दया कइके, उनखे आँखिन काहीं छुइन, अउर ऊँ पंचे तुरन्तय देखँड लागे; अउर यीसु के पीछे-पीछे चल दिहिन।

### यीसु राजा कि नाई यरूसलेम माहीं प्रबेस किहिन

(मरकुस 11:1-11; लूका 19:28-40)

21 जब यीसु अउर उनखर चेला लोग यरूसलेम सहर के लघे पहुँचे अउर जैतून पहार के ऊपर बैतफगे गाँव के लघे आएँ, तब ऊँ अपने दुइठे चलन काहीं इआ कहिके पठइन, 2 “सउहें बाले गाँव माहीं जा, अउर उहाँ पहुँचतय एकठे गदही अउर ओखे साथ माहीं ओखर बच्चा तौहई पंचन काहीं बाँधा मिली, उनहीं छोरिके हमरे लघे ले आबा। 3 अउर अगर तौहसे कोऊ कुछू कहय, त कहि दिहा कि ‘प्रभू काहीं इनखर जरूरत ही, त उआ तुरन्तय उनहीं पठय देई।’” 4 इआ एसे भ कि जउन बचन परमातिमा के सँदेस बतामँड बालेन के वदारा कहा ग रहा हय, उआ पूर होइ जाय: 5 कि “सिय्योन † के बिटिया से कहा, कि देखा, तौहार राजा तौहरे लघे आबत हें; ऊँ नम्र हें अउर गदहा के ऊपर बइठ हें; हाँ गदही के बच्चा के ऊपर ††।”

6 तब चेला लोग जाइके जइसन यीसु उनसे कहिन तय, उहयमेर किहिन। 7 अउर गदही अउर ओखे बच्चा काहीं ले आइके, उनखे ऊपर आपन ओन्हा डारिन, अउर यीसु ओखे ऊपर बइठिगें। 8 तब उनखर सम्मान करँड के खातिर, खुब मनई आपन-आपन ओन्हा गइल माहीं बिछाइन, अउर कुछ जने बिरबन से डेरइआ काटिके गइल माहीं बिछाय दिहिन। 9 अउर जउन भीड़ यीसु के आँगे-आँगे जात रही हय, अउर जउन पीछे-पीछे आबत रही हय, चिल्लाय-चिल्लाय के कहत रही हय, “राजा दाऊद के सन्तान के होसन्ना, धन्य हय उआ, जउन प्रभू के नाम से आबत हय, स्वरग माहीं होसन्ना †।” 10 अउर जब यीसु यरूसलेम सहर माहीं प्रबेस किहिन, तब सगले सहर माहीं हलचल मचिगे, अउर मनई कहँड लागें, कि “ई को आहीं?” 11 तब कुछ मनई उनहीं बताइन, कि “ई परमातिमा के सँदेस बतामँड बाले, गलील प्रदेस के नासरत गाँव के रहँड बाले यीसु आहीं।”

### मन्दिर से बइपारिन काहीं निकारा जाब

(मरकुस 11:15-19; लूका 19:45-48; यूहन्ना 2:13-22)

12 यीसु परमातिमा के मन्दिर माहीं जाइके, उन सगलेन काहीं, जउन मन्दिर माहीं बइपार करत रहे हँय बहिरे निकार दिहिन, अउर रुपिआ-पइसा के लेन-देन करँड बालेन के पिढ़बन, अउर परेबा बेंचँड बालेन के चउकिन काहीं उलटाय दिहिन; 13 अउर उनसे कहिन, कि “पबित्र सास्त्र माहीं इआ लिखा हय, कि ‘हमार घर प्राथना † के घर कहाई’, पय तूँ पंचे इआ मन्दिर काहीं ‘डँकुअन के † अड्डा’ बनउते हया।”

14 मन्दिर माहीं कुछ आँधर अउर लाँगड मनई यीसु के लघे आएँ, अउर ऊँ उनहीं नीक कइ दिहिन। 15 पय जब प्रधान याजक लोग, अउर मूसा के बिधान सिखामँड बाले, ई अचरज के कामन काहीं देखिन, जउनेन काहीं यीसु किहिन तय, अउर मन्दिर माहीं लडिकन काहीं जोर-जोर से स्तुति करत देखिन, कि “राजा दाऊद के सन्तान के होसन्ना।” त ऊँ पंचे खुब गुस्साइगें। 16 अउर यीसु से कहँड लागें, कि “का तूँ सुनते हया, कि ई पंचे का कहत हें?” तब यीसु उनसे कहिन, कि “हाँ, हम सुनित हएन, का तूँ पंचे पबित्र सास्त्र माहीं इआ कबहूँ नहीं पढ़े आह्या: कि ‘लडिकन-बच्चन से अउर दूध पिअँड बाले छोट बच्चन से घलाय तूँ आपन स्तुति कराया हय ††?’” 17 एखे बाद यीसु उनहीं छोड़िके यरूसलेम सहर से बैतनिय्याह गाँव माहीं चलेगें, अउर उहँय रात बिताइन।

### बिना फर के अंजीर के बिरबा

(मरकुस 11:12-14,20-24)

18 भिनसारे जब यीसु सहर काहीं लउटत रहे हँय, तब उनहीं भूँख लाग। 19 अउर सड़क के किनारे एकठे अंजीर के बिरबा देखिके, ओखे लघे गें। अउर उआ बिरबा माहीं पत्तन के अलाबा कुछू नहीं पाइन। तब ओसे कहिन,

† सिय्योन के बिटिया के मतलब हय यरूसलेम सहर के मनई। †† 21:5 जक 9:9

‡ 21:9 भज 118:25,26 †† 21:13 यसा 56:7 †† 21:13 यिर्म 7:11

‡‡ 21:16 भज 8:2

कि "आज से तोरे माहीं पुनि कबहूँ फर न लागय।" अउर उआ अंजीर के बिरबा तुरन्तय झुराइगा।<sup>20</sup> इआ देखिके चेला लोग खुब अचरज मानिके कहँइ लागें, कि "इआ अंजीर के बिरबा तुरन्तय कइसन झुराइगा?"<sup>21</sup> तब यीसु उनीं जबाब दिहिन, "हम तौहसे सही कहित हएन, अगर तूँ पंचे बिसुआस रक्खा, अउर संका न करा, त तूँ पंचे केबल इहय काम भर न करिहा, जउन इआ अंजीर के बिरबा के साथ कीन ग हय, बलकिन तूँ पंचे अगर इआ पहारव से कहि देहा, कि उँखड़िके समुंद्र माहीं जाइके बूड़ जा, त उआ बूड़ जई।<sup>22</sup> अउर जउन कुछू तूँ पंचे प्राथना माहीं बिसुआस से मगिहा, त उआ सब कुछ तौहई मिली।"

### यीसु के अधिकार के बारे माहीं पूँछब

(मरकुस 11:27-33; लूका 20:1-8)

<sup>23</sup> जब यीसु मन्दिर माहीं जाइके उपदेस देत रहे हँय, तब प्रधान याजक लोग, अउर यहूदी धारमिक अँगुआ लोग, उनखे लघे आइके उनसे पूँछिन, कि "तूँ ई कामन काहीं कउने अधिकार से करते हया? अउर तौहई इआ अधिकार को दिहिस ही?"<sup>24</sup> तब यीसु उनीं जबाब दिहिन, कि "हमहूँ तौहसे एकठे बात पूँछित हएन; अगर उआ हमहीं बतइहा, त हमहूँ तौहई बताउब, कि ई कामन काहीं हम कउने अधिकार से करित हएन।<sup>25</sup> बताबा, यूहन्ना काहीं बपतिस्मा दँड के अधिकार को दिहिस तय? परमातिमा दिहिन तय, इआ कि मनई?" तब उँ पूँछइ बाले आपस माहीं बतौँ लागें, कि अगर हम कहित हएन, कि "परमातिमा से मिला तय" त उँ कइहँय, कि "पुनि तूँ पंचे उनखर बिसुआस काहे नहीं किहा?"<sup>26</sup> अउर अगर हम पंचे कहित हएन, कि "मनइन से मिला तय" त उहाँ ठाढ़ सगले मनई मारि डरिहँय, एहिन से डेरातव रहे हँय, काहेकि सगले मनई जानत रहे हँय, कि यूहन्ना परमातिमा के सँदेस बतामँड बाले आहीं।<sup>27</sup> एसे उँ पंचे यीसु काहीं जबाब दिहिन, "हम पंचे नहिं जानी।" तब यीसु उनसे कहिन, "हमहूँ तौहई नहीं बताई, कि ई काम हम कउने अधिकार से करित हएन।"

### दुइठे लड़िकन के उदाहरन

<sup>28</sup> यीसु उदाहरन दइके उनीं एकठे कहानी सुनाइन, कि "एकठे गाँव माहीं एकठे मनई रहा हय, अउर ओखे दुइठे लड़िका रहे हँय; त उआ एक दिना बड़कबा लड़िका के लघे जाइके कहिस, कि 'बेटा, आज अंगूर के बगिया म जाइके काम करा।'<sup>29</sup> त उआ लड़िका अपने बाप काहीं जबाब दिहिस, कि 'हम न जाब' पय बाद माहीं पचिताइके ग।<sup>30</sup> एखे बाद उआ छोटकबा लड़िका के लघे जाइके इहइमेर कहिस, त उआ जबाब दिहिस, कि 'हओ, हम जइत हएन', पय नहीं ग।<sup>31</sup> बताबा, एखे बारे माहीं तूँ पंचे का सोचते हया? ई दोनव जनेन म से, कउन बाप के इच्छा पूर किहिस?" उँ पंचे कहिन, कि "बड़ा बाला लड़िका।" तब यीसु उनसे कहिन, कि "हम तौहसे सही-सही कहित हएन, कि चुंगी लेंड बाले अउर बेस्या लोग जिनसे तूँ पंचे नफरत करते हया, परमातिमा के राज माहीं तौहसे पहिले जइहँय।<sup>32</sup> इआ हम एसे कहित हएन, काहेकि यूहन्ना बपतिस्मा दँड बाले तोहई पंचन काहीं। परमातिमा के गइल बतामँड आएँ तय, पय तूँ पंचे उनखे बातन काहीं नहीं मान्या; पय चुंगी लेंड बाले अउर बेस्या लोग, उनखे बातन काहीं मानिन: अउर इआ देखे के बादव, तूँ पंचे अपने बुरे कामन काहीं छौँडिके, उनखे बातन काहीं नहीं मान्या।"

### दुस्ट किसानन के उदाहरन

(मरकुस 12:1-12; लूका 20:9-19)

<sup>33</sup> यीसु कहिन, कि एकठे अउर कहानी सुना, "एक जने जमीदार रहे हँय, उँ अंगूर के बगिया लगाइन अउर बगिया के चारिव कइती बारी रूँधिन, अउर ओमाहीं अंगूर के रस निकारँड के खातिर कुन्ड खोदिन, अउर एकठे ऊँच काहीं मइइचा बनाइन; अउर कुछ किसानन काहीं उआ बगिया के ठेका दइके परदेस चलेगें।<sup>34</sup> अउर जब अंगूर के फरँड के समय आबा, तब उँ

जमीदार अपने हिस्सा के फर लेंड के खातिर, अपने दासन काहीं किसानन के लघे पठइन।<sup>35</sup> पय किसान लोग उनखे दासन काहीं पकड़िके, कउनव काहीं मारिन-पीटिन, अउर कउनव काहीं मारि डारिन, अउर कउनव काहीं पथरय-पथरय मारिन।<sup>36</sup> ओखे बाद पुनि उँ जमींदार पहिले से अउर जादा दासन काहीं किसानन के लघे पठइन, त उँ पंचे उनहूँ के साथ उहयमेर बरताव किहिन।<sup>37</sup> तब अन्त माहीं उँ जमींदार अपने लड़िका काहीं किसानन के लघे इआ सोचिके पठइन, कि उँ हमरे लड़िका के मान-सम्मान करिहँय।<sup>38</sup> पय किसान लोग उनखे लड़िका काहीं देखिके आपस माहीं कहिन, कि 'इहय त बगिया के बारिसदार आय, चला, हम पंचे एही मारि डारी, जउने एखर अधिकार हमहीं पंचन काहीं मिल जाय।<sup>39</sup> एसे उँ पंचे ओही पकड़िन, अउर अंगूर के बगिया से बहिरे लइ जाइके मारि डारिन।<sup>40</sup> त बताबा, जब अंगूर के बगिया के मालिक अइहँय, त उँ किसानन के साथ का करिहँय?"<sup>41</sup> तब उँ पंचे यीसु से कहिन, कि "बगिया के मालिक उँ बुरे मनइन काहीं पूरी तरह से नास करिहँय; अउर अंगूर के बगिया के ठेका दुसरे किसानन काहीं दइ देइहँय, जउन समय-समय माहीं अंगूर के फर उनीं द्या करिहँय।"

<sup>42</sup> यीसु उनसे कहिन, कि "का तूँ पंचे पबित्र सास्त्र माहीं इआ नहीं पढ़े आह्या: कि

'जउने पथरा काहीं कारीगर लोग बेकार समझिन तय, उहय कोनमा के सबसे खास पथरा बनिगा? अउर इआ काम प्रभू किहिन हीं, जउन हमरे नजर माहीं अदभुत हय †।"

<sup>43</sup> एसे हम तौहसे पंचन से कहित हएन, कि "परमातिमा के राज तौहसे लइ लीन जई, अउर अइसन मनइन काहीं दइ दीन जई, जउन उनखे राज के मुताबिक बरताव करिहँय।<sup>44</sup> जे कोऊ इआ पथरा माहीं गिरी, उआ चकनाचूर † होइ जई; अउर जेखे ऊपर उआ पथरा गिरी, ओही पीस डारी।"<sup>45</sup> यीसु के ई उदाहरनन काहीं सुनिके, प्रधान याजक लोग अउर फरीसी लोग समझिगें, कि उँ हमरेन बारे माहीं आय कहत हैं।<sup>46</sup> एसे उँ पंचे यीसु काहीं पकड़इ चाहिन, पय मनइन काहीं डेराइगें, काहेकि उँ मनई यीसु काहीं परमातिमा के सँदेस बतामँड बाले मानत रहे हँय।

### बिआह-भोज के उदाहरन

(लूका 14:15-24)

**22** यीसु पुनि उदाहरन दइके उनसे कहँइ लागें,<sup>2</sup> "स्वर्ग के राज, उँ राजा कि नाई हय, जउन अपने लड़िका के काजे माहीं, खॉय-पिअँड के प्रबन्ध किहिन।<sup>3</sup> अउर उँ अपने दासन काहीं पठइन, कि जिनखर नेउता हय, उनीं खाना खॉय के खातिर बोलाय लाबा; पय उँ पंचे नहीं आएँ।<sup>4</sup> अउर पुनि उँ अपने दासन काहीं इआ कहिके पठइन, कि जिनखर नेउता हय, उनसे इआ कहा, कि 'देखा, हम खाना तइआर कइ चुके हएन, हमार बोकरा अउर पाले जानबर काटे जाइ चुके हँय, अउर पूरी तइआरी होइ चुकी हय; एसे तूँ पंचे खाना खॉय आबा।'<sup>5</sup> पय उँ पंचे उनखे बात के तिरस्कार कइके, अपने-अपने काम माहीं चल दिहिन, कोऊ अपने खेत माहीं, अउर कोऊ अपने बड़पार माहीं।<sup>6</sup> अउर जउन मनई बचे रहे हैं, उँ पंचे राजा के दासन काहीं पकड़िके उनखर अपमान किहिन, अउर मारि डारिन।<sup>7</sup> तब राजा आगबबूला होइगें। अउर अपने सिपाहिन काहीं पठइके, कतल करँड बाले मनइन काहीं मरबाय डारिन, अउर उनखे सहर काहीं, आगी लगबाइके नास कइ दिहिन।<sup>8</sup> अउर उँ अपने दासन से कहिन, कि 'बिआह-भोज त तइआर हय, पय जिनहीं हम नेउता दिहे रहेन हय, उँ पंचे काबिल नहीं ठहरेँ।'<sup>9</sup> एसे चउराहन माहीं जा, अउर जेतने मनई तोहई मिलेंय, उँ सगलेन काहीं बिआह-भोज माहीं बोलाय लाबा।<sup>10</sup> तब उँ दास सड़कन माहीं गें, अउर नीक-नागा जेतने मनई उनीं मिलें, उँ सगलेन काहीं लइ आएँ; अउर बिआह के घर महिमानन से भरिगा।"

† 21:42 भज 118:22-23 †† जे कोऊ हमहीं छौँडी ओही खुब सजा मिली।

11 “पय जब राजा महिमानन काहीं देखँइ भीतर गें, त ऊँ उहाँ एकठे मनई काहीं देखिन, जउन बिआह के ओन्हा नहीं पहिरे रहा आय। 12 त राजा ओसे पूँछिन, कि ‘हे साथी; तूँ काजे के ओन्हा पहिरे बिना इहाँ भीतर कइसन आय गया?’ अउर उआ मनई कुछ जबाब नहीं दिहिस। 13 तब राजा अपने दासन से कहिन, कि ‘एखर हाँथ-गोड़ बाँधके एही बहिरे आँधिआरे माहीं फेंकि द्या, जहाँ मनइन के रोउब अउर दाँत पीसब होत हय।’ 14 काहेकि बोलाए मनई त खुब हें, पय चुने मनई थोरिन काहीं हें।”

**महाराजा कैसर काहीं कर, देब**  
(मरकुस 12:13-17; लूका 20:20-26)

15 तब फरीसी लोग जाइके आपस माहीं इआ सलाह किहिन, कि यीसु के बातन माहीं कउनमेर से गलती पकड़ी। 16 तब ऊँ पंचे अपने चलन काहीं, राजा हेरोदेस के गुट बाले मनइन के साथ इआ कहिके, यीसु के लघे पठइन, कि “हे गुरू, हम पंचे जानित हएन, कि अपना सच्चे हएन, अउर परमातिमा के गइल सच्चाई से बताइत हएन, अउर कोहू के परबाह नहीं करी, काहेकि अपना मनइन के मुँह देखिके बातें नहीं करी। 17 एसे अपना हमहीं बताई, कि महाराजा कैसर काहीं कर देब उचित हय, कि नहीं?” 18 तब यीसु उनखे मन के दुस्तता काहीं जानिके उनसे कहिन, “हे कपटिव, हमहीं काहे अजमउते हया? 19 कर देंइ बाला सिक्का हमहीं देखाबा।” तब ऊँ पंचे उनखे लघे चाँदी के एकठे सिक्का लइ आएँ। 20 अउर यीसु उनसे पूँछिन, कि “इआ सिक्का माहीं केखर चित्र अउर नाम हय?” 21 तब ऊँ पंचे यीसु से कहिन, कि “महाराजा कैसर के।” तब यीसु उनसे कहिन, कि “जउन महाराजा कैसर के आय; उआ महाराजा कैसर काहीं द्या, अउर जउन परमातिमा के आय, उआ परमातिमा काहीं द्या।” 22 इआ बात काहीं सुनिके ऊँ पंचे खुब अचरज मानिन, अउर यीसु काहीं छोंडिके चलेगें।

**मरिके जिन्दा होइ अउर काजे के बारे माहीं प्रस्न**  
(मरकुस 12:27-28; लूका 20:27-40)

23 उहय दिना सदूकी दल के मनई जउन इआ मानत रहे हँय, कि मरे के बाद कोऊ दुसराय जिन्दा नहीं होय, ऊँ पंचे यीसु के लघे आइके उनसे पूँछिन, कि 24 “हे गुरू, मूसा बिधान माहीं कहिन रहा हय, कि अगर कउनव मंसेरुआ बिना लड़िका-बच्चा पइदा किहे मर जाय, त ओखर भाई ओखे मेहेरिआ से काज कइके अपने भाई के खातिर बंस पइदा करय। 25 अउर हमरे इहाँ सातठे भाई रहे हँय; त उनमा से पहिल भाई काज कइके मरिगा, अउर सन्तान न होइ के कारन, अपने मेहेरिआ काहीं अपने भाई के खातिर छोंडिगा। 26 अउर इहइमेर से दूसर अउर तीसर भाई घलाय किहिन, अउर सातँव जनेन के साथ इहइमेर भ। 27 अउर सातँव जनेन के मरे के बाद उआ मेहेरिअव मरिगे। 28 एसे जब ऊँ पंचे मरेन म से पुनि जिन्दा होइहँय, त उआ सातँव जनेन म से केखर मेहेरिआ कहाई? काहेकि उआ सगलेन के मेहेरिआ होइ चुकी तय।” 29 तब यीसु उनहीं जबाब दिहिन, कि “तूँ पंचे पबित्र सास्त्र, अउर परमातिमा के सक्ती काहीं नहीं जनते आह्या; इहय कारन से धोखे माहीं परे हया। 30 काहेकि मरेन म से पुनि जिन्दा होए के बाद कोहू के काज-बिआह न होई, बलकिन ऊँ पंचे स्वरग माहीं परमातिमा के दूतन कि नाई होइ जइहँय। 31 पय मरे के बाद दुबारा जिन्दा होइ के बारे माहीं, पबित्र सास्त्र माहीं का तूँ पंचे इआ बचन नहीं पढ़े आह्या, जउने माहीं परमातिमा कहिन तय, कि 32 ‘हम अब्राहम, इसहाक अउर याकूब के परमातिमा आहने?’ अउर ऊँ मरे † मनइन के नहीं, पय जिन्दा मनइन के परमातिमा आहीं।” 33 इआ सुनिके मनई उनखे उपदेस से चउआइगें।

**सगलेन से बड़ा हुकुम**

(मरकुस 12:28-34; लूका 10:25-28)

34 जब फरीसी लोग इआ सुनिन, कि यीसु अपने जबाब से सदूकी लोगन के मुँह बंद कइ दिहिन हीं, त ऊँ पंचे एकट्ठा भें। 35 अउर उनमा से मूसा के बिधान काहीं निकहा से जानँइ बाला, यीसु के परिच्छा लेंइ के खातिर, उनसे पूँछिस, 36 “हे गुरू, मूसा के बिधान माहीं सगलेन से बड़ा हुकुम कउन हय?” 37 तब यीसु उनसे कहिन, कि “तूँ अपने परमातिमा प्रभू से अपने पूरे मन से, अपने पूरी सक्ती से, अउर अपने पूरी बुद्धी से, प्रेम करा †। 38 सगलेन से बड़ा अउर मुख्य हुकुम त इहय आय। 39 अउर ओहिन कि नाई इआ दुसरव हुकुम हय, कि तूँ अपने परोसी से अपनेन कि नाई प्रेम करा। 40 ईन दोनव हुकुम, मूसा के बिधान अउर परमातिमा के सँदेस बतामँइ बालेन के लिखी बातन के अधार आहीं।”

**मसीह केखर लड़िका आहीं?**

(मरकुस 12:35-37; लूका 20:41-44)

41 जब फरीसी लोग एकट्ठा रहे हँय, तब यीसु उनसे पूँछिन, कि 42 “मसीह के बारे माहीं तूँ पंचे का सोचते हया? ऊँ केखर सन्तान आहीं?” ऊँ पंचे उनसे कहिन, कि “राजा दाऊद के।” 43 तब यीसु उनसे पूँछिन, “त फेर राजा दाऊद पबित्र आत्मा के अँगुआई से, उनहीं प्रभू कहिके, इआ काहे कहत हें, कि 44 प्रभू, हमरे ‡ प्रभू से कहिन, कि हमरे दहिने कइती बइठा, जब तक कि हम तोंहरे बइरिन काहीं तोंहरे अधीन न कइ देई †। 45 अउर जब राजा दाऊद उनहीं खुदय प्रभू कहत हें, त ऊँ उनखर सन्तान कइसन कहाए।” 46 इआ बात सुनिके ऊँ पंचे, उनहीं कुछ जबाब नहीं दए पाइन; अउर उआ दिना से कोहू के यीसु से कुछ पूँछँइ के हिम्मत नहीं परी।

**मूसा के बिधान सिखामँइ बालेन अउर फरीसी लोगन से सतरक रह्या**  
(मरकुस 12:38,39; लूका 11:43,46; 20:45,46)

23 एखे बाद यीसु भीड़ से अउर अपने चलन से कहिन, कि 2 “मूसा के बिधान सिखामँइ बाले अउर फरीसी लोग मूसा के बिधान बतामँइ बाले अधिकारी हें। 3 एसे जउन कुछ ऊँ पंचे तोंहसे कहँय, त उहय किहा अउर मान्या, पय उनखे कि नाई काम न किहा; काहेकि ऊँ पंचे कहत त हें, पय ओही करँय नहीं। 4 अउर ऊँ पंचे मनइन के ऊपर नेमन के अइसन बोझा लाद देत हें, जिनखर पालन करब कठिन हय; अउर ऊँ पंचे, खुद मनइन काहीं नेमन के पालन करँइ माहीं एक्कव मदत नहीं करँय। 5 अउर ऊँ पंचे अपने सगले कामन काहीं, मनइन क देखामँइ के खातिर करत हें: अउर ऊँ पंचे अपने तहबीजन †† अउर ओन्हन के झालरन काहीं, एसे बड़ी से बड़ी करत रहत हें, कि जउने मनई उनहीं धरमी समझँय। 6 अउर ऊँ पंचे नेउतन माहीं खास-खास जघन माहीं बइठत हें, अउर सभाघरन माहीं खास जघा पामँइ चाहत हें। 7 अउर चउराहन माहीं नबस्कार करबाउब, अउर मनइन माहीं गुरू कहाउब उनहीं नीक लागत हय। 8 पय तूँ पंचे खुद काहीं मनइन से गुरू न कहबाया, काहेकि तोंहार पंचन के एकइठे गुरू हें; अउर तूँ पंचे सगले जन भाई-बहिनी आह्या। 9 अउर तूँ पंचे धरती माहीं कोहू काहीं पिता न कहाया, काहेकि तोंहार पंचन के एकयठे पिता हें, जउन स्वरग माहीं रहत हें। 10 अउर कोहू से मालिक न कहबाया, काहेकि तोंहार पंचन के एकयठे मालिक हें, ऊँ मसीह आहीं। 11 अउर जे कोऊ तोंहरे बीच माहीं बड़ा बनय चाहय, उआ तोंहार पंचन के सेबक बनय। 12 काहेकि जे कोऊ खुद काहीं बड़ा बनाई, उआ परमातिमा के व्दारा छोट कीन जई: अउर जे कोऊ खुद काहीं छोट बनाई, त उआ परमातिमा के व्दारा बड़ा कीन जई।”

† 22:37 ब्यब 6:5 ‡ हमरे प्रभू मसीह काहीं दरसाबत हय। †† 22:44 भज 110:1 †† इआ बतामँइ के खातिर कि मसीह, राजा दाऊद से बड़े हँय, इआ लिखा ग हय। ††† ऊँ पंचे चमड़ा के तहबीज माहीं परमातिमा के बचन थइके, लिलारे, अउर हाँथेन माहीं बाँधत रहे हँय।

† अब्राहम, इसहाक, अउर याकूब कुछ समय पहिले मरिगे रहे हँय, पय ऊँ पंचे स्वरग माहीं अबहिनव जिन्दा हें, एसे परमातिमा कहिन हीं कि हम इनखर परमातिमा आहने।



### मूसा के बिधान सिखामँड बालेन अउर फरीसी लोगन के पाखण्ड के बुराई (मरकुस 12:40; लूका 11:39-42,44,52; 20:47)

13 यीसु उनसे कहिन, कि “हे ढोंगिव, मूसा के बिधान सिखामँड बाल्या, अउर फरीसी लोगव, तोहई पंचन काहीं परमातिमा से खुब सजा मिली। काहेकि तूँ पंचे मनइन काहीं गलत सिच्छा दइके, परमातिमा के राज माहीं आमँड से रोकते हया। तूँ पंचे न त खुदय परमातिमा के राज माहीं जाँड चहते आह्या, अउर न उनहूँ काहीं जाँड देते आह्या, जे कोऊ उनखे राज माहीं जाँड चाहत हें। 14 (हे ढोंगिव, मूसा के बिधान सिखामँड बाल्या, अउर फरीसी लोगव तोहई पंचन काहीं परमातिमा से खुब सजा मिली। काहेकि तूँ पंचे बिधबन के घरन काहीं लूट लेते हया, अउर मनइन के आँगे खुद काहीं धरमी देखामँड के खातिर खुब देर तक प्राथना करते हया †।)”

15 “हे ढोंगिव, मूसा के बिधान सिखामँड बाल्या, अउर फरीसी लोगव तोहई पंचन काहीं परमातिमा से खुब सजा मिली। काहेकि तूँ पंचे एक जनेव काहीं आपन चेला बनामँड के खातिर रातव-दिन एक कइ देते हया। अउर जब उआ तोंहार चेला बन जात हय, त ओही अपने से दुगुना अनन्तकाल के घोर सजा पामँड के काबिल बनाय देते हया।”

16 “हे आँधर अँगुअव, तोहई पंचन काहीं परमातिमा से खुब सजा मिली। काहेकि तूँ पंचे जउन कहते हया, कि अगर कोऊ मन्दिर के कसम खात हय, त उआ कसम काहीं मानब जरूरी नहिँ आय, पय अगर कोऊ मन्दिर माहीं धरी सोने के बनी चीजन के कसम खात हय, त ओही ओखर पालन करब जरूरी हय। 17 हे मूरखव, अउर आँधरव, बताबा को बड़ा हय; सोने के बनी चीज, इआ कि उआ मन्दिर जउने से ऊँ चीजँय पबित्र होती हई? 18 अउर तूँ पंचे इहव कहते हया, कि अगर कोऊ बेदी के कसम खात हय, अउर ओखर पालन नहिँ करय, त ओही कुछ न होई, पय अगर कोऊ बेदी के ऊपर जउन भेंट ही, ओखर कसम खात हय, त ओही ओखर पालन जरूर करँई परी। 19 हे आँधरव, बताबा को बड़ा हय; भेंट इआ कि बेदी? जउने से भेंट पबित्र होत ही? 20 एसे जे कोऊ बेदी के कसम खात हय, त उआ बेदी के, अउर ओखे ऊपर धरी चीजन के घलाय कसम खात हय। 21 अउर जे कोऊ मन्दिर के कसम खात हय, त उआ मन्दिर के, अउर ओमाहीं रहँई बालेन के घलाय कसम खात हय। 22 अउर जे कोऊ स्वर्ग के कसम खात हय, त उआ परमातिमा के सिंहासन के, अउर ओखे ऊपर बइठँय बाले के घलाय कसम खात हय।”

23 “हे ढोंगिव, मूसा के बिधान सिखामँड बाल्या, अउर फरीसी लोगव तोहई पंचन काहीं परमातिमा से खुब सजा मिली। काहेकि तूँ पंचे पोदीना, सउँफ अउर जीरा के दसमा हिस्सा त देते हया, पय तूँ पंचे मूसा के बिधान के खास बातन काहीं, जइसन कि न्याय करब, दया करब, अउर परमातिमा के ऊपर बिसुआस करब, छोंड दिहा हय; तोहई पंचन काहीं इआ जरूरी रहा हय, कि ई बातन काहीं घलाय करत रहत्या, अउर उनहूँ काहीं न छोंडत्या। 24 हे आँधर अँगुअव, तूँ पंचे अपने पानी से मच्छर काहीं त छनते हया, पय ऊँट † काहीं लील लेते हया †।”

25 “हे कपटिव, मूसा के बिधान सिखामँड बाल्या, अउर फरीसी लोगव तोहई पंचन काहीं परमातिमा से खुब सजा मिली। काहेकि तूँ पंचे खोरबन अउर टठिनन काहीं उपरय-ऊपर त मजते हया, पय उनखे भीतर छल-कपट अउर असंयम भरे हँय। 26 हे आँधर फरीसी लोगव, पहिले खोरबन अउर टठिनन काहीं भीतर से माजा, जउने ऊँ बहिरेव से घलाय साफ होइ जाँय।”

27 “हे कपटी मूसा के बिधान सिखामँड बाल्या, अउर फरीसी लोगव तोहई पंचन काहीं परमातिमा से खुब सजा मिली। तूँ पंचे चून पोती कब्रन कि नाई हया, जउन ऊपर से त खुब निकही देखाती हई, पय उनखे भीतर मरे मनइन के हाड़ा, अउर हरेक मेर के गंदगी भरी रहती हई। 28 इहडमेर तुहूँ पंचे, बहिरे

से त धरमी देखाई देते हया, पय भीतर कपट अउर अधरम से भरे हया, अउर परमातिमा के नेमन काहीं नहिँ मनते आह्या।”

### मूसा के बिधान सिखामँड बालेन अउर फरीसी लोगन काहीं मिलँड बाली सजा के बारे माहीं भबिस्सबानी (लूका 11:47-51)

29 “हे कपटिव, मूसा के बिधान सिखामँड बाल्या, अउर फरीसी लोगव, तोहई पंचन काहीं परमातिमा से खुब सजा मिली। काहेकि तूँ पंचे परमातिमा के सँदेस बतामँड बालेन के कब्रन काहीं सजउते हया, जिनहीं तोंहार पंचन के बाप-दादा मारि डारिन तय, अउर परमातिमा के नजर माहीं निरदोस मनइन के कब्रँय बनउते हया, 30 अउर तूँ पंचे कहते हया, कि ‘अगर हम पंचे अपने बाप-दादन के समय माहीं होइत, त परमातिमा के सँदेस बतामँड बालेन काहीं मारँय माहीं सामिल न होइत।’ 31 एसे तूँ पंचे अपने बिरोध माहीं, खुदय गबाही देते हया, कि तूँ पंचे परमातिमा के सँदेस बतामँड बालेन के कतलिन के सन्तान आह्या। 32 अउर तूँ पंचे अपने बाप-दादन के पाप के घड़ा निकहा से भर द्या। 33 हे साँप, अउर करिआ साँप कि नाई खतरनाक मनइव, तूँ पंचे नरक के सजा से कबहूँ न बचिहा। 34 एसे देखा, हम तोंहरे पंचन के लघे परमातिमा के सँदेस बतामँड बालेन, अउर ग्यानी मनइन काहीं अउर मूसा के बिधान सिखामँड बालेन काहीं पठइत हएन; अउर तूँ पंचे उनमा से कुछ जनेन काहीं मारि डरिहा, अउर कूस माहीं चढ़इहा, अउर कुछ जनेन काहीं अपने सभाघर माहीं चाबुक मरिहा, अउर एक सहर से दुसरे सहर माहीं भगइहा। 35 जउने परमातिमा के नजर माहीं निरदोस हाबिल से लइके बिरिक्याह के लड़िका जकरयाह तक, जेही तूँ पंचे मन्दिर अउर बेदी के बीच माहीं मारि डारे रहे हया, अउर जेतने परमातिमा के नजर माहीं निरदोस मनई रहे हँय, उनहीं तूँ पंचे इआ धरती माहीं मारि डारे हया, त ओखर सजा तोहई जरूर मिली। 36 अउर हम तोंहसे सही कहित हएन, कि ई सगली बातन के खातिर, इआ समय के मनइन काहीं सजा भोगँई परी।”

### यरूसलेम सहर के मनइन के खातिर यीसु के दुखी होब (लूका 13:34,35)

37 “हे यरूसलेम सहर के मनइव, हे यरूसलेम सहर के मनइव! तूँ पंचे परमातिमा के सँदेस बतामँड बालेन काहीं मारि डरते हया, अउर जेतने जने तोंहरे लघे पठए गे हें, उनहीं पथरा मरते हया। अउर हम कइअक बेरकी इआ चाहेन, कि जइसन मुरगी अपने बच्चन काहीं, अपने पखनन के नीचे एकट्ठा करत ही, उहयमेर हमहूँ तोंहरे लड़िकन काहीं एकट्ठा कइ लेई, पय तूँ पंचे इआ नहिँ चाह्या। 38 अउर देखा, अब तोंहार पंचन के मन्दिर पूरी तरह उजर जई। 39 काहेकि हम तोंहसे कहित हएन, कि अब से जब तक तूँ पंचे इआ न कइहा कि, कि ‘धन्य हें ऊँ, जउन प्रभू के नाम से आबत हें’ तब तक तूँ पंचे हमहीं पुनि कबहूँ न देखिहा †।”

### मन्दिर के नास होइ के बारे माहीं यीसु के भबिस्सबानी (मरकुस 13:1,2; लूका 21:5,6)

24 जब यीसु मन्दिर से निकरिके बहिरे जात रहे हँय, त उनखर चेला लोग मन्दिर के बनाबट काहीं देखामँड के खातिर उनखे लघे आपँ। 2 तब यीसु उनसे कहिन, कि “हम तोंहसे सही कहित हएन, कि जउन इआ मन्दिर के बनाबट तूँ पंचे देख रहे हया, एक्कव पथरा एक दुसरे के ऊपर न देखइहँय, ऊँ सगले गिराय दीन जइहँय।”

### संसार के अन्त होइ से पहिले आमँड बाले दुख अउर भयानक कस्ट (मरकुस 13:3-13; लूका 21:7-19)

3 जब यीसु जैतून नाम के पहार के ऊपर बइठ रहे हँय, त उनखर चेला लोग एकान्त माहीं उनखे लघे जाइके उनसे कहिन, कि “अपना हमहीं

† बचन 14 कुछ बाइबिलन माहीं नहिँ आय। †† यहूदी लोगन माहीं ऊँट के माँस खाब मना रहा हया। ‡ मूसा के बिधान के मुताबिक जउने कामन काहीं करब मना रहा हय, उनहीं ऊँ पंचे करत रहे हँय, अउर जउने बातन के कउनव महत्व नहिँ रहा आय, उनहीं करँई के खातिर जादा जोर देत रहे हँय।

बताई, कि ई बातें कब होइहैं? अपना के दुबारा आर्मैड के अउर इआ संसार के अन्त होइ के, का चिन्हारी होई?"<sup>4</sup> तब यीसु उनहीं जबाब दिहिन, "तूँ पंचे सतरक रह्या, कोऊ तौहई बिसुआस से भटकाए न पाबय, <sup>5</sup> काहेकि खुब मनई अइसन होइहैं जउन हमरे नाम से आइके कइहैं, कि 'हम मसीह आहैन' अउर खुब मनइन काहीं बिसुआस से भटकाय देइहैं।<sup>6</sup> अउर तूँ पंचे जब युद्ध होत देख्या, अउर युद्धन के चरचा सुन्या, त घबराय न जया, काहेकि ई सगली बातें जरूर होइहैं, पय उआ समय संसार के अन्त न होई।<sup>7</sup> काहेकि एक जाति के मनई, दुसरे जाति के मनइन के ऊपर चढ़ाई करिहैं, अउर एक देस, दुसरे देस के ऊपर चढ़ाई करी, अउर हरेक जघन माहीं अकाल परिहैं, अउर भूँडोल होइहैं।<sup>8</sup> अउर ई सगली बातें दुख-मुसीबतन के सुरुआत होइहैं।<sup>9</sup> तब उआ समय मनई कस्ट देंइ के खातिर तोहई पंचन काहीं पकड़बइहैं, अउर मारि डरिहैं, अउर हमरे ऊपर बिसुआस करई के कारन सगले जाति के मनई तौहसे दुसमनी रखिहैं।<sup>10</sup> अउर तब खुब मनई बिसुआस से भटक जइहैं, अउर एक दुसरे काहीं पकड़बइहैं, अउर एक दुसरे से दुसमनी रखिहैं।<sup>11</sup> अउर खुब जने परमातिमा के लबरी सँदेस बतामँड बाले तइआर होइहैं, अउर खुब जनेन काहीं बिसुआस से भटकइहैं।<sup>12</sup> अउर अधरम के बढ़ई के कारन, खुब जनेन के प्रेम ठन्ड होइ जई, <sup>13</sup> पय जे कोऊ अन्त तक धीरज धरे रही, उहय मुक्ती पाई।<sup>14</sup> अउर परमातिमा के राज के इआ खुसी के खबर सगले संसार माहीं सुनाई जई, कि जउने सगले जाति के मनइन के खातिर गबाही होय, अउर तब संसार के अन्त आय जई।"

#### महासंकट के सुरुआत

(मरकुस 13:14-23; लूका 21:20-24)

<sup>15</sup> "एसे जब तूँ पंचे उआ भयानक अउर बिनास करई बाली चीज काहीं, मन्दिर के पबित्र जघा माहीं ठाढ़ देख्या, जेखे के बारे माहीं दानिय्येल नबी बखान किहिन रहा हय †।" (अउर पढ़ई बाला समझ लेय, कि एखर मतलब का हय)<sup>16</sup> उआ समय जउन मनई यहूदिया प्रदेस माहीं होय, त ऊँ पंचे पहारन माहीं भाग जाँय।<sup>17</sup> अउर जे कोऊ छत के ऊपर होय, त उआ अपने घर माहीं समान लेंड के खातिर नीचे न उतरय; <sup>18</sup> अउर जे कोऊ खेत माहीं होय, त उआ आपन ओन्हा लेंड के खातिर, पीछे न लउटय।

<sup>19</sup> अउर ऊँ दिनन माहीं जउन मेहेरिआ लड़कहाई होइहैं, अउर जे कोऊ अपने लड़िकन काहीं दूध पिआबत होइहैं, त उनहीं पंचन काहीं खुब कस्ट होई।<sup>20</sup> एसे तूँ पंचे प्राथना करा, कि जाड़े के दिन माहीं, इआ कि पबित्र दिन काहीं, तौहई भागँय न परय।<sup>21</sup> काहेकि ऊँ दिनन माहीं एतना भारी संकट अई, कि जब से परमातिमा इआ संसार काहीं बनाइन हीं, तब से लइके आज तक अइसन संकट कबहूँ नहीं आबा, अउर न कबहूँ अउबय करी।<sup>22</sup> अउर अगर परमातिमा ऊँ दिनन काहीं कम न करते, त कउनव प्रानी न बचतें, पय अपने चुने मनइन के कारन परमातिमा ऊँ दिनन काहीं घटइहैं।<sup>23</sup> अउर उआ समय अगर कोऊ तौहसे कहय, कि "देखा, मसीह 'इहाँ हैं!' इआ कि 'उहाँ हैं', त उनखर बिसुआस बेलकुल न मान्या।"

<sup>24</sup> काहेकि लबरे मसीह, अउर परमातिमा के सँदेस बतामँड बाले लबरे मनई तइआर होइहैं, अउर ऊँ पंचे बड़े-बड़े चिन्ह अउर अचरज के काम देखइहैं, कि होइ सकय त चुने मनइन काहीं घलाय भटकाय देंय, <sup>25</sup> अउर देखा, हम पहिलेन से तौहई पंचन काहीं सब कुछ बताय दिहेन हय।<sup>26</sup> एसे अगर ऊँ पंचे तौहसे कहँय, कि "देखा, मसीह सुनसान जघा माहीं हैं, त तूँ पंचे उहाँ न जया; अउर अगर इआ कहँय कि घरन माहीं लुके हँय, त उनखर बिसुआस न मान्या।<sup>27</sup> काहेकि जइसन बिजुली पूरुब से निकरिके पच्छिम तक चमकत ही, उहयमेर मनई के लड़िका घलाय अइहैं।<sup>28</sup> काहेकि जहाँ चील्ह एकट्ठा होती हँय, त इआ जाने मिलत हय, कि उहाँ लहास ही।"

#### मनई के लड़िका के दुसराय आउब

(मरकुस 13:24-27; लूका 21:25-28)

<sup>29</sup> "ऊँ दिनन के दुख अउर कस्ट के बाद तुरन्तय सुरिज म एक्कव उँजिआर न रहि जई, अउर जौधइआ उँजिआर न देई, अउर तरइया अकास से नीचे गिर अइहैं, अउर अकास के सगली चीजँय हलाई जइहैं।<sup>30</sup> तब मनई के लड़िका के आर्मैड के चिन्हारी, अकास माहीं देखाई देई, अउर धरती माहीं रहँड बाले सगले कुलन के मनई बड़ा बिलाप करिहैं, अउर मनई के लड़िका काहीं अपार सक्ती अउर महिमा के साथ, अकास के बदरिन माहीं आबत देखिहैं।<sup>31</sup> अउर ऊँ तुरही के खुब तेज अबाज के साथ अपने स्वरगदूतन काहीं पठइहैं, अउर ऊँ पंचे अकास के एक छोर से दुसरे छोर तक, चारिव दिसन से उनखे चुने मनइन काहीं एकट्ठा करिहैं।"

#### अंजीर के बिरबा के उदाहरन

(मरकुस 13:28-31; लूका 21:29-33)

<sup>32</sup> अउर यीसु उनसे पुनि कहिन, कि "अंजीर के बिरबा से इआ सिच्छा ल्या, जब ओखर डेरइआ कोमर होइ जाती हई, अउर उनमा पत्ता निकरई लागत हैं, तब तूँ पंचे इआ जान लेते हया, कि गरमी के रित हरबिन आर्मैड बाली हय।<sup>33</sup> इहइमेर से जब तूँ पंचे ई सगली बातन काहीं होत देख्या, त इआ जान लिहा कि ऊँ अमइन बाले हैं, बलकिन आइन गे हँय।<sup>34</sup> हम तौहसे सही कहित हएन, कि जब तक ई सगली बातें पूर न होइ जइहैं, तब तक इआ समय के मनइन के अन्त न होई।<sup>35</sup> अकास अउर धरती टर जइहैं, पय हमार कही बातें कबहूँ न टरिहैं।"

#### यीसु मसीह आर्मैड बाले हँ एसे तइआर रहा

(मरकुस 13:32-37; लूका 17:26-30,34-36)

<sup>36</sup> "उआ दिन अउर उआ समय के बारे माहीं कोऊ नहीं जानँय, न स्वरग के दूत, अउर न लड़िका, ओखे बारे माहीं केबल पिता परमातिमा भर जानत हैं।<sup>37</sup> अउर जइसन नूह के समय माहीं भ रहा हय, उहयमेर मनई के लड़िका के आउब घलाय होई ††।<sup>38</sup> काहेकि जइसन इआ धरती माहीं जल-प्रलय के आर्मैड से पहिले, जब तक नूह जिहाज माहीं चढ़ नहीं गें, तब तक सगले मनई खात-पिअत रहे हँय, अउर ऊँ पंचे काज-बिआह करत रहे हँय, अउर बिटिअन काहीं काज-बिआह के खातिर सउँपत रहे हँय।<sup>39</sup> अरथात जब तक जल-प्रलय आइके सगले मनइन काहीं बहाय नहीं लइगा, तब तक ऊँ पंचे कुछू नहीं जाने पाइन तय; उहयमेर मनई के लड़िका के आउब घलाय होई।<sup>40</sup> उआ समय दुइ जने खेत माहीं होइहैं, उनमा से एक जने ऊपर उठाय लीन जई, अउर दूसर छोड़ दीन जई।<sup>41</sup> उहयमेर एक साथ जेतबा पीसत दुइठे मेहेरिन म से एकठे ऊपर उठाय लीन जई, अउर दूसर छोड़ि दीन जई।<sup>42</sup> एसे हर समय सतरक रहा, काहेकि तूँ पंचे नहीं जनते आह्या, कि तौहार प्रभू कउने दिन अइहैं।<sup>43</sup> पय तूँ पंचे इआ जानिल्या, कि अगर घर के मालिक जानत कि चोर केतनीदार अई, त उआ जागत रहत, अउर अपने घर माहीं चोरी न होइ देत।<sup>44</sup> एसे तूँ पंचे तइआर रहा, काहेकि जउने समय के बारे माहीं तूँ पंचे सोचेव न होइहा, कि मनई के लड़िका अई, उहय समय मनई के लड़िका आय जई।"

#### बिसुआस के काबिल दास अउर दुस्त दास के उदाहरन

(लूका 12:41-48)

<sup>45</sup> एसे "उआ बिसुआस के काबिल अउर बुद्धिमान दास को कहाबत हय, उहय जेखर मालिक ओही अपने नोकर-चाकरन के ऊपर मुखिया बनाबत हैं, कि उआ, समय माहीं सगलेन काहीं खौँय-पिअँड क देय।<sup>46</sup> धन्य हय, उआ दास, जेही ओखर मालिक आइके जउन कहिगे रहे हँय, उहयमेर करत पाँमँय।<sup>47</sup> हम तौहसे सही कहित हएन; ऊँ मालिक, ओही अपने सगले धन-

† 24:15 दानि 9:27

†† 24:37 उत्प 6:5-8,11-13

सम्पत्ती के मालिक बनाय देइहँय।<sup>48</sup> पय अगर उआ दुस्ट दास सोचँइ लागय, कि हमार मालिक देर से अइहँय,<sup>49</sup> अउर उनखे दुसरे दास-दासिन काहीं मारँइ पीटँय लागय, अउर पियक्कड़न के साथ खॉय-पिअँइ माहीं परि जाय।<sup>50</sup> तब ओखर मालिक अइसन दिन काहीं अइहँय, जब उआ दास सोचत होई, कि आज ऊँ न अइहँय।<sup>51</sup> अउर अइसन समय माहीं आय जइहँय, जउने काहीं उआ न जानत होई, अउर ऊँ मालिक आइके ओही खुब सजा देइहँय, अउर ओही कपटी मनइन के बीच माहीं डार देइहँय, जहाँ रोउब अउर दाँत पीसब भर होई।”

### दसठे कुमारिन के उदाहरन

25 यीसु एकठे उदाहरन बताइन, कि “स्वरग के राज ऊँ दसठे कुमारिन कि नाई होई, जउन आपन-आपन मसाल लइके दुलहा से मिलँइ के खातिर अपने घरन से निकरीं।<sup>2</sup> अउर ऊँ कुमारिन म से पाँच जने मूरुख रही हँय, अउर पाँच जने समझदार रही हँय।<sup>3</sup> अउर उनमा से जउन मूरुख रही हँय, ऊँ पंचे आपन-आपन मसालँय त लइ लिहिन, पय अपने साथ माहीं अलग से तेल नहीं लिहिन; <sup>4</sup> पय जउन समझदार रही हँय, ऊँ पंचे आपन-आपन मसालँय लिहिन, अउर अपने साथ कुप्पिन माहीं तेल घलाय भर लिहिन।<sup>5</sup> अउर जब दुलहा के आमँइ माहीं देरी होइगे, त ऊँ सगली जने अउँघॉय लागीं अउर सोय गईं।

<sup>6</sup> अउर जब आधी रात के धूम मची, कि ‘देखा, दुलहा आय रहे हँय! उनसे मिलँइ के खातिर चला।’<sup>7</sup> तब ऊँ सगली कुमारी उठिके, आपन-आपन मसालँय ठीक करँइ लागीं।<sup>8</sup> अउर जउन मूरुख रही हँय, ऊँ पंचे समझदारन से कहिन, कि ‘अपने तेल म से थोरी क तेल हमहूँ पंचन काहीं घलाय दइ द्या; काहेकि हमार पंचन के मसालँय बुझॉय बाली हई।’<sup>9</sup> पय जउन समझदार रही हँय उनहीं जबाब दिहिन, कि ‘हम न देब, काहेकि होइ सकत हय, कि इआ तेल हमरे अउर तौहरे खातिर घलाय न पूजय; एसे उचित त इआ हय, कि तूँ पंचे बँचँइ बालेन के लघे जाइके अपने खातिर तेल खरीद ल्या।’<sup>10</sup> अउर जब ऊँ पंचे तेल खरीदँय के खातिर जात रही हँय, तबहिनय दुलहा आइगें, अउर जउन कुमारी तइआर रही हँय, ऊँ पंचे सगली दुलहा के साथ बिआह-भोज माहीं चली गईं, तब दुआरा बंद कइ दीनगा।<sup>11</sup> एखे बाद ऊँ दुसरव कुमारी घलाय आइके कहँइ लागीं, कि ‘हे मालिक, हे मालिक, हमरे खातिर दुआरा खोल देई!’<sup>12</sup> पय मालिक उनहीं जबाब दिहिन, कि ‘हम तौहसे कहित हएन, कि हम तौहई पंचन काहीं नहीं जानी।’<sup>13</sup> एहिन से तूँ पंचे सतरक रहा, काहेकि तूँ पंचे उआ दिन अउर समय के बारे माहीं नहीं जानते आह्या, कि उआ समय कबय आय जई?”

### तीनठे दासन के उदाहरन

(लूका 19:11-27)

<sup>14</sup> “स्वरग के राज उआ मनई कि नाई होई, जउन प्रदेस जाँइ के समय, अपने दासन काहीं बोलाइके आपन धन-सम्पत्ती उनहीं सउँपि दिहिन।<sup>15</sup> अउर ऊँ एक जने काहीं पइसन से भरी पाँचठे थइली दिहिन, अउर दुसरे जने काहीं दुइठे थइली, अउर तिसरे जने काहीं एकठे थइली दिहिन, अउर हरेक जन काहीं उनखे सामर्थ के मुताबिक दिहिन, अउर तब ऊँ परदेस चलेगें।<sup>16</sup> अउर तब जेही पइसन से भरी पाँचठे थइली मिली रही हँय, त उआ हरबिन जाइके उनसे बइपार किहिस, अउर पाँच थइली पइसा अउर कमान।<sup>17</sup> अउर इहइमेर से जेही दुइठे थइली मिली रही हँय, त उहव घलाय दुइ थइली पइसा अउर कमान।<sup>18</sup> पय जउने काहीं एकठे थइली मिली रही हय, त उआ जाइके गड्डा खोदिस, अउर ओहिन माहीं अपने मालिक के पइसा गाड़ दिहिस।

<sup>19</sup> अउर खुब दिना बीते के बाद, ऊँ दासन के मालिक परदेस से आइके उनसे हिंसाब-किताब लेइ लागें।<sup>20</sup> अउर जेही पइसा से भरी पाँचठे थइली मिली रही हँय, त उआ पाँच थइली पइसा अउर लइआइके कहिस, कि ‘हे मालिक, अपना हमहीं पाँचठे थइली सउँपेन तय, त अपना देखी, हम पाँच

थइली पइसा अउर कमानेन हँय।’<sup>21</sup> तब उआ दास के मालिक ओसे कहिन, कि ‘साबास, तूँ बिसुआस के काबिल अउर निकहे दास हया, तूँ थोर काहीं धन माहीं बिसुआस के काबिल रहे हया; एसे हम तौहई खुब चीजन के अधिकारी बनाउब। अउर तूँ जाइके अपने मालिक के खुसी माहीं सामिल होइजा।’

<sup>22</sup> अउर जउने दास काहीं दुइठे थइली मिली रही हँय, त उहव आइके कहिस, ‘हे मालिक, अपना हमहीं दुइ थइली पइसा सउँपेन तय, त अपना देखी, हम दुइ थइली पइसा अउर कमानेन हय।’<sup>23</sup> तब मालिक, उआ दास से कहिन, कि ‘साबास, तूँ बिसुआस के काबिल अउर निकहे दास हया, तूँ थोरी क धन माहीं बिसुआस के काबिल रहे हया; एसे हम तौहई खुब चीजन के अधिकारी बनाउब। अउर तूँ अपने मालिक के खुसी माहीं सामिल होइजा।’

<sup>24</sup> अउर तब जेही पइसा से भरी एकठे थइली मिली रही हय, उआ अपने मालिक के लघे आइके कहिस, ‘हे मालिक, हम अपना काहीं जानत रहेन हँय, कि अपना खुब कठोर मनई हएन: अउर अपना जहाँ बीज नहीं बोई, उहाँ काटित हएन, अउर जहाँ नहीं छीटी, उहँव से बटोरित हएन।’<sup>25</sup> एसे हम डेराइ गएन तय, अउर जाइके पइसा से भरी अपना के थइली काहीं माटी माहीं गाड़ दिहेन तय। देखी, जउन अपना के पइसा रहे हँय, ऊँ ईन आहीं।’<sup>26</sup> पय मालिक उआ दास काहीं जबाब दिहिन, कि ‘हे दुस्ट अउर आलसी दास, जब तँय इआ जानत रहे हए, कि हम जहाँ बीज नहीं बोई उहाँ से काटित हएन, अउर जहाँ नहीं छीटी उहँव से बटोरित हएन; <sup>27</sup> त तोही इआ चाहँय क रहा हय, कि हमरे पइसा काहीं बइपारिन काहीं दइ देते, त हम आइके आपन धन उनसे ब्याज समेत लइ लेइत।’<sup>28</sup> तब ऊँ मालिक अपने दासन काहीं कहिन, कि पइसन से भरी उआ थइली ओसे लइ ल्या, अउर जेखे लघे दसठे थइली हई, ओही दइ द्या।<sup>29</sup> काहेकि जेही जउन दीन ग हय, अगर उआ ओही निकहा से उपयोग करत हय, त ओही अउर दीन जई, अउर ओखे लघे खुब होइ जई। पय जे कोऊ ओही जउन दीन ग हय, अगर ओखर निकहा से उपयोग नहीं करय त ओसे उहव लइ लीन जई, जउन ओही दीन ग रहा हय।<sup>30</sup> अउर इआ निकम्मा दास काहीं, बहिरे लइ जाइके आँधिआरे माहीं डार द्या, जहाँ रोउब अउर दाँत पीसब भर होई।”

### मनई के लइका सगले मनइन के न्याय करिहँय

<sup>31</sup> यीसु पुनि उनसे कहिन, कि “जब मनई के लइका अपने महिमा काहीं धारन कइके अइहँय, अउर सगले स्वरगदूत उनखे साथ अइहँय, त ऊँ अपने महिमामय सिंहासन माहीं बिराजमान होइहँय।<sup>32</sup> अउर सगले जातिअन के मनई उनखे आँगे एकट्ठा कीन जइहँय; अउर जइसन गइरिया, गइरन काहीं बोकरिन से अलग कइ देत हय, उहयमेर ऊँ उनहीं पंचन काहीं एक दुसरे से अलग करिहँय।<sup>33</sup> ऊँ गइरन काहीं अपने दहिने कइती, अउर बोकरिन काहीं अपने बाएँ कइती ठाढ़ करिहँय।<sup>34</sup> अउर तब ऊँ राजा अरथात मनई के लइका अपने दहिने कइती बालेन से कइहँय, कि ‘हे हमरे पिता परमातिमा के धन्य मनइव, तूँ पंचे आबा, अउर उआ राज के अधिकारी होइजा, जउन संसार के सुरुआतय से तौहरे खातिर तइआर कीन ग हय।’<sup>35</sup> काहेकि जब हम भूँखे रहेन हय, तब तूँ पंचे हमहीं खाना दिहा तय; अउर जब हम पिआसे रहेन हय, त तूँ पंचे हमहीं पानी पिआया तय; अउर जब हम परदेसी रहेन हय, त तूँ पंचे हमहीं अपने घर माहीं रोक्या तय; <sup>36</sup> अउर जब हमरे लघे ओन्हा नहीं रहे आँय, तब तूँ पंचे पहिरँय के खातिर हमहीं ओन्हा दिहा तय; अउर जब हम बिमार रहेन हय, तब तूँ पंचे हमार ख्याल किहा तय, अउर जब हम जेल माहीं रहेन हय, तब तूँ पंचे हमसे मिलँइ के खातिर उहाँ आया तय।”

<sup>37</sup> तब परमातिमा के नजर माहीं निरदोस मनई, उनहीं जबाब देइहँय, कि “हे प्रभू, हम पंचे कबय अपना काहीं ‘भूँखा देखेन तय, अउर खाना खबाइन तय?’ इआ कि ‘पिआसा देखेन तय, अउर अपना काहीं पानी पिआएन तय?’”<sup>38</sup> अउर हम पंचे कबय अपना काहीं ‘परदेसी देखेन तय, अउर अपने

घर माहीं रोकें तय?' इआ कि अपना काहीं 'बिना ओन्हा पहिरे देखेन तय, अउर ओन्हा पहिरायन तय?' 39 अउर हम पंचे कबय अपना काहीं 'बिमार इआ कि जेल माहीं बंद देखेन तय, अउर अपना से मिलेँ गएन तय?' 40 तब राजा उनहीं जबाब देइहँय, कि 'हम तौहसे सही कहित हएन, कि तू पंचे हमरे ई छोट से छोट भाई-बहिनिन म से अगर कोहू के साथ अइसन किहा हय, त उआ हमरेन साथ किहा हय'। 1"

41 अउर तब ऊँ राजा अपने बाएँ कइती बालेन से कइहँय, कि "हे सापित मनइव, तू पंचे हमरे आँगे से उआ नरक के आगी माहीं चले जा, जउन कबहूँ बुझातिन नहिँ आय, जउन सइतान अउर ओखर सेबा करँइ बाले दूतन के खातिर तइआर कीनगे ही। 42 काहेकि जब हम भूँखे रहेन हय, तब तू पंचे हमहीं खाना नहिँ दिहा, अउर जब हम पिआसे रहेन हय, तब तू पंचे हमहीं पानी नहिँ पिआया; 43 जब हम परदेसी बनिके रहेन हय; तब तू पंचे हमहीं अपने घरन माहीं नहिँ रोक्या; जब हम नंगे रहेन हय, तब तू पंचे हमहीं ओन्हा नहिँ पहिराया; अउर जब हम बिमार रहेन हय, अउर जेलव माहीं रहेन हय, तब तू पंचे हमहीं देखेँ नहिँ आया।

44 तब ऊँ पंचे इआ जबाब देइहँय, कि 'हे प्रभू, हम पंचे कबय अपना काहीं भूँखा, पिआसा, परदेसी, बिना ओन्हा पहिरे, बिमार, इआ कि जेल माहीं देखेन, अउर अपना के सेबा-सहाई नहिँ किहेन?' 45 अउर तब ऊँ उनहीं इआ जबाब देइहँय, कि 'हम तौहसे सही कहित हएन, कि तू पंचे हमरे ई छोट से छोट भाई-बहिनिन म से कोहू के साथ अइसन नहिँ किहा, त उआ हमरे साथ घलाय नहिँ किहा आय।' 46 अउर ई पंचे अनन्त काल तक सजा भोगिहँय, पय निरदोस मनई अनन्त जीवन पाइके स्वरगराज माहीं जइहँय।"

### यीसु के बिरोध माहीं सड़यन्त्र रचब

(मरकुस 14:1,2; लूका 22:1,2; यूहन्ना 11:45-53)

**26** जब यीसु ई सगली बातन काहीं बताय चुके, त पुनि अपने चलन से कहिन, कि 2 "तू पंचे इआ जनते हया, कि दुइ दिना के बाद फसह नाम के तेउहार आमेँइ बाला हय, अउर मनई के लड़िका क्रूस माहीं चढ़ामेँइ के खातिर पकड़ाबा जई।"

3 तब प्रधान याजक लोग अउर यहूदी धारमिक अँगुआ लोग काइफा नाम के महायाजक के अँगना माहीं एकट्ठा भेँ, 4 अउर आपस माहीं इआ बात-चीत करँइ लागेँ, कि हम पंचे यीसु काहीं धोखे से पकड़िके मारि डारी। 5 पय ऊँ पंचे इआ कहत रहे हँय, कि "तेउहार के समय माहीं नहिँ, कहेँव अइसा न होय, कि लोगन माहीं दंगा होइ जाय।"

### बैतनिय्याह गाँव माहीं यीसु के ऊपर अँतर डारब

(मरकुस 14:3-9; यूहन्ना 12:1-8)

6 जब यीसु बैतनिय्याह गाँव माहीं समौन कोढ़ी के घर माहीं रहे हँय, 7 तबहिनय एकठे मेहेरिआ संगमरमर के बरतन माहीं खुब महग अँतर लइके यीसु के लघे आई, अउर जब यीसु खाना खाँइ बइठ रहे हँय, तबहिनय उनखे मूँडे माहीं अँतर उड़ेल दिहिस। 8 इआ देखिके, यीसु के चेला लोग उआ मेहेरिआ काहीं रिसिहाँइ लागेँ, अउर कहिन, कि "इआ अँतर काहीं काहे सत्यानास कइ दिहा? 9 एही त खुब पइसन माहीं बेंचिके कंगालन काहीं बाँटा जाय सकत रहा हय।" 10 इआ बात काहीं जानिके यीसु अपने चलन से कहिन, कि "उआ मेहेरिआ काहीं काहे परेसान करते हया? उआ त हमरे साथ भलाइन किहिस ही। 11 काहेकि गरीब त तौहरे साथ हमेसा रइहँय, पय हम तौहरे साथ हमेसा न रहब। 12 उआ हमरे देँह माहीं जउन इआ अँतर उड़ेलिस ही, त हमरे गाड़े जाँइ के खातिर इआ काम किहिस ही। 13 हम तौहसे पंचन से सही कहित हएन, कि सगले संसार माहीं जहाँ कहेँव इआ खुसी के खबर के प्रचार कीन जई, त ओखे इआ काम के बखान घलाय ओखे यादगारी माहीं कीन जई।"

### यहूदा इस्करियोती के बिसुआस घात करब

(मरकुस 14:10,11; लूका 22:3-6)

14 तब यहूदा इस्करियोती, जउन बरहँव चलन म से रहा हय, उआ प्रधान याजकन के लघे जाइके कहिस, कि 15 "अगर हम यीसु काहीं अपना पंचन के हाँथे माहीं पकड़बाय देई, त अपना पंचे हमहीं का देब?" अउर ऊँ पंचे तीसठे चाँदी के सिक्का तउलिके ओही दइ दिहिन। 16 अउर यहूदा इस्करियोती उहय समय से यीसु काहीं पकड़ामेँइ के मोका हूँइ लाग।

### अपने चलन के साथ फसह के तेउहार माहीं यीसु के आखिरी बेरकी खाना खाब

(मरकुस 14:12-21; लूका 22:7-13,21-23; यूहन्ना 13:21-30)

17 बिना खमीर के रोटी खाँइ बाले तेउहार के पहिलय दिन, चेला लोग यीसु के लघे आइके पूँछेँइ लागेँ, कि "अपना कहाँ चाहित हएन, कि हम पंचे अपना के खातिर फसह के खाना के तइआरी करी?" 18 तब यीसु कहिन, कि "सहर माहीं एकठे मनई के लघे जाइके कहा, कि 'गुरू कहिन हीँ कि हमार समय लघे हय। अउर हम अपने चलन के साथ तौहरे इहाँ तेउहार मनाउब'।" 19 एसे चेला लोग यीसु के हुकुम काहीं मानिके, फसह के खाना तइआर किहिन।

20 जब साँझ भय, तब यीसु बरहँव चलन के साथ खाना खाँय के खातिर बइठे। 21 अउर जब ऊँ पंचे खाना खात रहे हँय, तब यीसु उनसे कहिन, कि "हम तौहसे सही कहित हएन, कि तौहरे पंचन म से एक जने हमहीं बिरोधी लोगन के हाँथ माहीं पकड़बाई।" 22 इआ बात काहीं सुनिके चेला लोग खुब उदास होइगेँ, अउर हरेक जन उनसे पूँछेँइ लागेँ, कि "हे प्रभू, अपना बताई, कि का उआ हम आहेन?" 23 तब यीसु जबाब दिहिन, कि "जे हमरे साथ एकय टठिया माहीं खात हय, उहय हमहीं पकड़बाई। 24 मनई के लड़िका त जाबय करी, जइसन कि पबित्र सास्त्र माहीं ओखे बारे माहीं लिखा हय; पय जउन मनई धोखा दइके मनई के लड़िका काहीं पकड़बामेँइ बाला हय, ओही परमातिमा से खुब सजा मिली: अउर अगर उआ मनई के जन्मय न होत, त ओखे खातिर इआ नीक होत।" 25 तब यीसु काहीं पकड़ बामेँइ बाला यहूदा इस्करियोती कहिस, कि "हे गुरू, का उआ हम आहेन?" तब यीसु ओसे कहिन, कि "हाँ, तू खुदय कहते हया।"

### प्रभू-भोज

(मरकुस 14:22-26; लूका 22:14-20; 1 कुरिन्थियन 11:23-25)

26 जब यीसु अउर उनखर चेला लोग खाना खात रहे हँय, तब यीसु रोटी लिहिन, अउर पिता परमातिमा से आसीस मागिके टोरिन, अउर चलन काहीं दइके कहिन, कि "ल्या, तू पंचे एही खा; इआ हमार देँह आय।" 27 अउर एखे बाद ऊँ अंगूर के रस से भरा खोरबा लइके, परमातिमा काहीं धन्यवाद दिहिन, अउर उनहीं खोरबा दइके कहिन, कि "तू पंचे सगले जन एमा से पिआ, 28 काहेकि इआ करार के हमार उआ खून आय, जउन खुब मनइन के पापन के माफी के खातिर बहाबा जई। 29 अउर हम तौहसे पंचन से कहित हएन, कि अंगूर के इआ रस उआ दिना तक हम कबहूँ न पिआब, जब तक अपने पिता परमातिमा के राज माहीं तौहरे साथ नबा अंगूर के रस न पी लेब।" 30 अउर पुनि ऊँ पंचे भजन गाइके जैतून पहार माहीं चलेगेँ।

### पतरस के इनकार के बारे माहीं यीसु के भबिस्सबानी

(मरकुस 14:27-31; लूका 22:31-34; यूहन्ना 13:36-38)

31 तब यीसु उनसे कहिन, कि "तू पंचे सगले जने आजय रात माहीं, हमरे ऊपर किहे बिसुआस से भटक जइहा, काहेकि पबित्र सास्त्र माहीं लिखा हय: कि 'हम गइरिया काहीं मार डारब, अउर झुन्ड के सगली गइरँय तितर-बितर होइ जइहँय'।" 32 पय हम मरेन म से जिन्दा होए के बाद, तौहसे

मिलेंड से पहिले गलील प्रदेश माहीं जाब।”<sup>33</sup> तब इआ बात काहीं सुनिके पतरस यीसु से कहिन, कि “अगर सगले जने अपना के ऊपर किहे बिसुआस से भटक जाँय त भटक जाँय, पय हम कबहूँ न भटकब।”<sup>34</sup> तब यीसु पतरस से कहिन, कि “हम तौहसे सही कहित हएन, कि आजय रात माहीं मुरगा के बोलेंड से पहिले तूँ तीन बेरकी इनकार करिहा, कि हम यीसु काहीं नहीं जानी।”<sup>35</sup> तब पतरस यीसु से कहिन, कि “अगर हमहीं अपना के साथ मरऊँ क परय, तऊ हम अपना काहीं कबहूँ न इनकार करब।” अउर इहइमेर सगले चेला घलाय कहिन।

### गतसमनी नाम के जघा माहीं यीसु के प्राथना करब

(मरकुस 14:32-42; लूका 22:39-46)

<sup>36</sup> तब यीसु अपने चलन के साथ गतसमनी नाम के जघा माहीं आएँ, अउर अपने चलन से कहँड लागें, कि “जब तक हम उहाँ जाइके प्राथना करब, तब तक तूँ पंचे इहँय बइठ रह्या।”<sup>37</sup> अउर यीसु, पतरस अउर जब्दी के दोनव लड़िकन काहीं अपने साथ माहीं लड़गें, अउर यीसु उदास अउर ब्याकुल होंड लागें।<sup>38</sup> तब यीसु उनसे कहिन, कि “हमार जिव खुब उदास हय, अउर लागत हय, कि हमार प्रान निकर जई। तूँ पंचे इहँय रुके रहा, अउर हमरे साथ जागत रहा।”<sup>39</sup> अउर पुनि यीसु थोरी क अउर आँगे जाइके अउर भुँड माहीं मुँह झुकाइके, इआ प्राथना किहिन, कि “हे हमार पिता, अगर होइ सकय त इआ बड़ा भारी कस्ट हमसे दूर होइ जाय, तऊ जइसन हम चाहित हएन, उआमेर न होय, पय जइसन अपना चाहित हएन, उहयमेर होय।”<sup>40</sup> अउर एखे बाद यीसु चलन के लघे आएँ, त उनहीं सोबत पाइन, तब ऊँ पतरस से कहिन, “का तूँ पंचे हमरे साथ एक घरिव, नहीं जाग सकते आह्या? <sup>41</sup> तूँ पंचे सतरक रहा, अउर प्राथना करत रहा, कि जउने परिच्छन माहीं न परा: आत्मा त वास्तव माहीं तइआर हय, पय देह निबल ही।”<sup>42</sup> अउर यीसु पुनि दुसराय जाइके इआ प्राथना किहिन, कि “हे हमार पिता, अगर इआ बड़ा भारी दुख के प्याला हमरे सहे बिना नहीं हटि सकय, त अपना के इच्छा पूर होय।”<sup>43</sup> अउर यीसु जाइके देखिन त चलन काहीं पुनि सोबत पाइन, काहेकि ऊँ पंचे गहरी नींद म रहे हँय।<sup>44</sup> अउर चलन काहीं छोंडिके यीसु पुनि चलेगें, अउर उहय बात पुनि कहिके तिसरइआ प्राथना किहिन।<sup>45</sup> तब यीसु अपने चलन के लघे आइके, उनसे कहिन, कि “तूँ पंचे अब सोबत रहा, अउर अराम करा, काहेकि मनई के लड़िका के पकड़बाए जाँड के समय लघे आइगा हय, अउर मनई के लड़िका, पापी मनइन के हाँथ माहीं पकड़ाबा जई।<sup>46</sup> उठा, चली! देखा, हमार पकड़ाँड बाला लघे आइगा हय।”

### यीसु काहीं धोखे से पकड़ा जाब

(मरकुस 14:43-50; लूका 22:47-53; यूहन्ना 18:3-12)

<sup>47</sup> जब यीसु इआ बात कहतय रहे हँय, तबहिनय यहूदा इस्करियोती आबा, जउन बरहँव चलन म से रहा हय, अउर ओखे साथ माहीं तलबार अउर लाठी लए प्रधान याजकन अउर यहूदी समाज के अँगुअन के तरफ से पठई खुब बड़ी भीड़ घलाय रही हय।<sup>48</sup> अउर यीसु काहीं पकड़बामँड बाला यहूदा इस्करियोती, उनहीं पंचन काहीं एकठे चिन्हारी बताइस तय, कि: जिनखर हम चूमा लेब, उँडन यीसु आहीं, अउर तूँ पंचे उनहीं पकड़ लिहा।<sup>49</sup> अउर उआ हरबिन यीसु के लघे आइके कहिस, “हे गुरू, नबस्कार!” अउर उनहीं खुब चूमिस।<sup>50</sup> तब यीसु ओसे कहिन, कि “हे साथी, जउने काम के खातिर तूँ आया हय, ओही कइल्या।” तब ऊँ पंचे यीसु के लघे जाइके उनहीं पकड़ लिहिन।<sup>51</sup> तब यीसु के साथिन म से एक जने, हाँथ बढाइके आपन तलबार निकार लिहिन, अउर महायाजक के दास के ऊपर चलाइके ओखर कान काट लिहिन।<sup>52</sup> तब यीसु उनसे कहिन, कि “आपन तलबार म्यान माहीं रख ल्या, काहेकि जे कोऊ तलबार चलाबत हैं, ऊँ सगले जन तलबार से मारे जइहँय।<sup>53</sup> अउर का तूँ इआ नहीं जनते आह्या, कि हम अपने पिता से बिनती कइ सकित हएन, अउर ऊँ स्वरगदूतन के बारा पलटन

से जादा सिपाहिन काहीं हमरे लघे अबहिनय पठय देइहँय? <sup>54</sup> पय पबित्र सास्त्र माहीं लिखी ऊँ बातँय, कि अइसनय होब जरूरी हय, कइसन पूर होइहँय?”<sup>55</sup> अउर उहय समय यीसु भीड़ के मनइन से कहिन, कि “का तूँ पंचे तलबारन अउर लाठिन काहीं लइके, डाँकू कि नाई हमहीं पकड़ई आया हय? हम त रोजय मन्दिर माहीं बइठिके उपदेस देत रहे हएन, तब तूँ पंचे हमहीं गिरफतार नहीं किहा। <sup>56</sup> पय इआ सब एसे भ हय, कि जउने परमातिमा के सँदेस बताँड बालेन के बचन पूर होंय।” तब चेला लोग यीसु काहीं छोंडिके भागिगें।

### महासभा माहीं यीसु काहीं लइ जाब

(मरकुस 14:53-65; लूका 22:54-55,63-71; यूहन्ना 18:13-14,19-24)

<sup>57</sup> जउन मनई यीसु काहीं पकड़िन रहा हय, ऊँ पंचे उनहीं काइफा नाम के महायाजक के लघे लड़गें, अउर उहाँ मूसा के बिधान सिखामँड बाले, अउर यहूदी धारमिक अँगुआ लोग घलाय एकट्टा रहे हँय।<sup>58</sup> अउर पतरस दूरिन-दूरी यीसु के पीछे-पीछे महायाजक के अँगने तक गें, अउर इआ देखँड के खातिर, कि यीसु के साथ का होई, भीतर जाइके पहरेदारन के साथ माहीं बइठिगें।<sup>59</sup> अउर प्रधान याजक अउर महासभा के सगले मनई यीसु काहीं मारि डारँड के उदेस्य से, उनखे खिलाफ लबरी गबाही देँड बालेन काहीं ढूँढत रहे हँय,<sup>60</sup> तब लबरी गबाही देँड के खातिर खुब जने आएँ, पय कउनव दोस ढूँढे नहीं पाइन। अउर आखिरी माहीं दुइ जने अउर आएँ,<sup>61</sup> अउर कहिन, कि “ई कहिन हीं, कि हम परमातिमा के मन्दिर काहीं गिराय सकित हएन, अउर ओही तीन दिन माहीं पुनि बनाय सकित हएन।”

<sup>62</sup> तब महायाजक ठाढ़ होइके यीसु से कहिन, कि “का इनखे जबाब माहीं तोहई कुछू नहीं कहँड क आय? ई पंचे तौहरे बिरोध माहीं का गबाही देत हैं?”<sup>63</sup> पय यीसु कुछू जबाब नहीं दिहिन। तब महायाजक उनसे कहिन, कि “हम तोहई जिन्दा परमातिमा के कसम खबाइत हएन, कि अगर तूँ परमातिमा के लड़िका मसीह आह्या, त हमहीं बताय द्या।”<sup>64</sup> तब यीसु उनसे कहिन, कि “तूँ त खुदय कहते हया, पय हम तोहई बताइत हएन, कि अब से तूँ मनई के लड़िका काहीं सर्वसक्तिमान परमातिमा के दहिने कइती बइठे, अउर अकास के बदरिन के ऊपर आबत देखिहा।”<sup>65</sup> इआ बात काहीं सुनिके महायाजक आपन ओन्हा फारिन अउर कहिन, कि “ई परमातिमा के बुराई किहिन हीं, अउर हमहीं पंचन काहीं अब अउर गबाहन के जरूरत नहीं आय, अउर देखा, तूँ पंचे अबहिनय इआ परमातिमा के बुराई काहीं सुने हया! <sup>66</sup> त इनखे बारे माहीं तौहार पंचन के का बिचार हय?” तब ऊँ पंचे जबाब दिहिन, कि “ई अपराधी हैं, अउर मारि डारँड के काबिल हैं।”<sup>67</sup> तब ऊँ पंचे यीसु के मुहें माहीं थूँकिन, अउर उनहीं घूँसा मारिन, अउर दूसर जने उनखे गाल माहीं थापड़ मारिके कहिन, कि <sup>68</sup> “हे मसीह, भबिस्यबानी कइके हमसे बताबा, कि तोहई को मारिस ही?”

### पतरस के व्दारा यीसु के इनकार

(मरकुस 14:66-72; लूका 22:56-62; यूहन्ना 18:15-18,25-27)

<sup>69</sup> जब पतरस अँगना माहीं बहिरे बइठ रहे हँय, तबहिनय एकठे दासी उनखे लघे आइके कहिस, कि “तुहूँ घलाय गलील प्रदेश माहीं रहँड बाले यीसु के साथ माहीं रहे हया।”<sup>70</sup> पय पतरस सबके आँगे इआ कहिके इनकार कइ दिहिन, कि “हम नहीं जानी कि तूँ का कहते हया।”<sup>71</sup> अउर जब पतरस बहिरे दुआरा माहीं गें, त दूसर दासी उनहीं देखिके, जउन मनई उहाँ रहे हँय उनसे कहिस, कि “इऊँ घलाय त यीसु नासरी के साथ माहीं रहे हैं।”<sup>72</sup> तब पतरस कसम खाइके पुनि इनकार कइ दिहिन, कि “हम उआ मनई काहीं नहीं जानी।”<sup>73</sup> अउर थोरी देर बाद ऊँ मनई, जउन उहाँ ठाढ़ रहे हँय, पतरस के लघे आइके उनसे कहिन, कि “तौहार बोली इआ साफ बताय रही हय, कि सचमुच तुहूँ घलाय उनमा से एक जन आह्या।”<sup>74</sup> तब पतरस खुद काहीं धिक्कारँय लागें अउर कसम खाँड लागें, कि “हम उआ मनई काहीं बेलकुल नहीं जानी।” अउर हरबिन मुरगा बोलिस।<sup>75</sup> तब

पतरस काहीं यीसु के कही बात याद आइगे: कि “मुरगा के बोलैइ से पहिले, तूँ तीन बेरकी हमहीं इनकार करिहा।” अउर पतरस बहिरे जाइके फूट-फूटिके रोमैइ लागे।

### राजपाल पिलातुस के आँगे यीसु

(मरकुस 15:1; लूका 23:1,2; यूहन्ना 18:28-32)

27 जब भिनसार भ, तब सगले प्रधान याजक लोग, अउर यहूदी धारमिक अँगुआ लोग, यीसु काहीं मारि डारैइ के खातिर खड़यन्त्र रचिन।<sup>2</sup> अउर ऊँ पंचे यीसु काहीं बाँधिन, अउर लइ जाइके राजपाल पिलातुस के हाँथे माहीं सउँपि दिहिन।

### यहूदा इस्करियोती के फाँसी लगाउब

(खास चेलन 1:18,19)

3 यीसु काहीं पकड़बामैइ बाला यहूदा इस्करियोती, जब इआ देखिस, कि यीसु काहीं अपराधी ठहराबा ग हय, त उआ खुब पचितान अउर ऊँ तीसठे चाँदी के सिक्कन काहीं, प्रधान याजकन अउर यहूदी धारमिक अँगुआन के लघे लइ जाइके लउटाय दिहिस।<sup>4</sup> अउर कहिस, कि “हम निरदोस मनई काहीं मार डारैइ के खातिर पकड़ाइके पाप किहेन हय।” तब ऊँ पंचे कहिन, कि “हमहीं एसे कउनव मतलब नहिं आय? तूँ खुदय जाना।”<sup>5</sup> तब उआ ऊँ सिक्कन काहीं मन्दिर माहीं फेंकिके चला ग, अउर जाइके फाँसी लगाय लिहिस।

6 प्रधान याजक लोग ऊँ सिक्कन काहीं लइके कहिन, कि “इनहीं भन्डार माहीं रक्खब उचित नहिं आय, काहेकि इआ खून के दाम आय।”<sup>7</sup> एसे ऊँ पंचे साहुत कइके, ऊँ सिक्कन से परदेसी मनइन के अंतिम संस्कार के खातिर, कुम्हार के खेत खरीद लिहिन।<sup>8</sup> इआ कारन से उआ खेत आज तक “खून के खेत” के नाम से जाना जात हय।<sup>9</sup> तब उआ बचन पूर होइगा, जउन परमातिमा के सँदेस बतामैइ बाले यिर्मयाह के व्दारा कहा ग रहा हय: कि “ऊँ पंचे चाँदी के ऊँ तीस सिक्कन काहीं अरथात जउन कीमत तँय कीन गे रही हय। जउने काहीं इजराइल के सन्तानन म से कुछ जने ठहराइन रहा हय, ओही लइ लिहिन,<sup>10</sup> अउर जइसन प्रभू हमहीं हुकुम दिहिन तय, उहयमेर ऊँ चाँदी के सिक्कन काहीं कुम्हार के खेत खरीदँय माहीं लगाय दिहेन।”<sup>11</sup>

### पिलातुस यीसु से प्रस्न पूँछिन

(मरकुस 15:2-5; लूका 23:3-5; यूहन्ना 18:33-38)

11 जब यीसु राजपाल पिलातुस के आँगे ठाढ़ रहे हँय, तब ऊँ यीसु से पूँछिन, “का तूँ यहूदी लोगन के राजा आह्या?” तब यीसु कहिन, “तूँ खुदय कहते हया।”<sup>12</sup> पय जब प्रधान याजक लोग, अउर यहूदी धारमिक अँगुआ लोग, यीसु के ऊपर दोस लगाबत रहे हँय, त यीसु कुछ जबाब नहीं दिहिन।<sup>13</sup> तब राजपाल पिलातुस उनसे कहिन, “का तूँ नहीं सुनते आह्या, कि ई पंचे तौहरे बिरोध माहीं केतनी गबाही दइ रहे हँ?”<sup>14</sup> पय यीसु, राजपाल काहीं एक्कवठे बात के जबाब नहीं दिहिन, एसे राजपाल खुब अचरज मानिन।

### यीसु काहीं मउत के सजा दँइ के हुकुम

(मरकुस 15:6-15; लूका 23:13-25; यूहन्ना 18:39—19:16)

15 फसह नाम के तेउहार के मोके माहीं राजपाल के इआ नेम रहा हय, कि एकठे कइदी काहीं, जेही भीड़ के मनई चाहत रहे हँय, ओही ऊँ छोड़ देत रहे हँय।<sup>16</sup> अउर उआ समय उनखे इहाँ बरअब्बा नाम के एकठे घोर अपराधी जेल माहीं बंद रहा हय।<sup>17</sup> त जब ऊँ पंचे एकट्ठा भँ, तब राजपाल उनसे कहिन, कि “तूँ पंचे केही चहते हया, कि हम तौहरे खातिर ओही छोड़ देई? बरअब्बा काहीं, इआ कि यीसु काहीं छोड़ देई, जउन मसीह कहाबत हँ?”<sup>18</sup> काहेकि राजपाल इआ जानत रहे हँय, कि ऊँ पंचे यीसु काहीं जलन के

कारन पकड़ाइन हँ।<sup>19</sup> अउर जब ऊँ न्याय आसन माहीं बइठ रहे हँय, त उनखर मेहेरिआ उनहीं इआ खबर भेजबाइन, कि “अपना ऊँ धरमी मनई के मामला माहीं, सामिल न होब, काहेकि आज हम सपन माहीं उनखे कारन, खुब दुख उठाएन हँय।”

20 पय प्रधान याजक लोग, अउर यहूदी धारमिक अँगुआ लोग, मनइन के कान भरिन, कि बरअब्बा काहीं छोड़ैइ के खातिर, अउर यीसु काहीं मार डारैइ के खातिर माँग करँय।<sup>21</sup> तब राजपाल उनसे पूँछिन, कि “ई दोनव जनेन म से, तूँ पंचे केही चहते हया, कि हम तौहरे खातिर ओही छोड़ देई?” तब ऊँ पंचे कहिन, कि “बरअब्बा काहीं छोड़ देई।”<sup>22</sup> तब राजपाल पिलातुस उनसे पूँछिन, कि “पुनि यीसु काहीं जउन मसीह कहाबत हँ, हम का करी?” तब सगले जन उनसे कहिन, कि “ओही क्रूस माहीं चढ़ाबा जाय।”<sup>23</sup> इआ सुनिके राजपाल कहिन, कि “काहे, ऊँ कउन अपराध किहिन हीं?” पय ऊँ पंचे अउर चंडे चिल्लाय-चिल्लाइके कहँइ लागे, कि “ओही क्रूस माहीं चढ़ाबा जाय।”<sup>24</sup> अउर जब पिलातुस इआ देखिन, कि कुछ नीक नहीं होइ रहा आय, बलकिन दंगा होइ बाला हय, त ऊँ पानी लइके भीड़ के मनइन के आँगे आपन हाँथ धोइन, अउर कहिन, कि “ई मनई के मउत माहीं हम सामिल नहिं आहैन, अउर हम निरदोस हएन, इआ तौहार पंचन के मामला आय त तुहिन पंचे जान्या।”<sup>25</sup> तब सगले जने जबाब दिहिन, कि “इनखे मउत के सजा के गुनहगार हम पंचे, अउर हमार पंचन के सन्तान होइहँय।”<sup>26</sup> इआ कारन से राजपाल बरअब्बा काहीं उनखे खातिर छोड़ दिहिन, अउर यीसु काहीं चाबुक से मरबाइके, उनहीं पंचन काहीं सउँप दिहिन, कि उनहीं क्रूस माहीं चढ़ाबा जाय।

### सिपाहिन के व्दारा यीसु के निरादर

(मरकुस 15:16-20; यूहन्ना 19:2,3)

27 तब राजपाल के सिपाही लोग, यीसु काहीं किला के भीतर लइ जाइके, अपने सगली पलटन काहीं, यीसु के चारिव कइती एकट्ठा किहिन,<sup>28</sup> अउर यीसु के ओन्हा उतारिके उनहीं बैगनी रंग के चमकीला ओन्हा पहिराइन।<sup>29</sup> अउर काँटन काहीं गुँथिके अउर मुकुट बनाइके यीसु के मूँडे माहीं धरिन, अउर उनखे दहिने हाँथे माहीं सरकन्डा के लाठी पकड़ाय दिहिन, अउर उनखे आँगे गोड़न गिरिके उनखर मजाक उड़ाइ लागे, अउर कहँइ लागे, कि “हे यहूदी लोगन के राजा, नबस्कार!”<sup>30</sup> अउर उनखे ऊपर थूँकिन; अउर उहय सरकन्डा के लाठी लइके, यीसु के मूँडे माहीं मारय लागे।<sup>31</sup> अउर जब ऊँ पंचे यीसु के मजाक उड़ाय चुके, त उआ चमकीला ओन्हा उतरबाय लिहिन, अउर पुनि उनहिन के ओन्हा उनहीं पहिराय दिहिन, अउर क्रूस माहीं चढ़ामैइ के खातिर, उनहीं लइके चल दिहिन।

### यीसु काहीं क्रूस म चढ़ाबा जाब

(मरकुस 15:21-32; लूका 23:26-43; यूहन्ना 19:17-27)

32 अउर बहिरे जात समय, उनहीं पंचन काहीं कुरेन सहर के समौन नाम के एकठे मनई मिला, तब ऊँ पंचे ओही बेगार माहीं पकड़िन, कि उआ यीसु के क्रूस उठाइके लइ चलय।<sup>33</sup> अउर जब ऊँ पंचे उआ जघा माहीं पहुँचिगे, जउन “गुलगुता” अरथात “खोपड़ी के जघा” कहाबत रही हय,<sup>34</sup> तब ऊँ पंचे, अंगूर के रस माहीं, करू चीज मिलाइके यीसु काहीं, पिअँइ के खातिर दिहिन, पय ऊँ ओही चीखिन, त पिअँइ से इनकार कइ दिहिन।<sup>35</sup> तब ऊँ पंचे यीसु काहीं क्रूस माहीं चढ़ाइन, अउर परची डारिके उनखे ओन्हन काहीं आपस माहीं बाँटि लिहिन।<sup>36</sup> अउर उहाँ बइठिके यीसु के पहरा दँइ लागे।<sup>37</sup> अउर उनखर अरोप-पत्र उनखे मूँडे के ऊपर लगाइन, कि “ई यहूदी लोगन के राजा यीसु आहीं।”<sup>38</sup> अउर तब उनखे साथ दुइठे डँकुअन काहीं, एकठे क यीसु के दहिने कइती, अउर दुसरे क बाएँ कइती क्रूस माहीं चढ़ाइन।<sup>39</sup> अउर आमँय-जाँय बाले मनई आपन मूँडे हलाय-हलाइके, यीसु के बुराई करत रहे हँय,<sup>40</sup> अउर इआ कहत रहे हँय, कि “हे मन्दिर काहीं गिरामँइ बाले, अउर तीन दिना माहीं बनामँइ बाले, खुद काहीं त बचाव! अउर अगर

तैय परमातिमा के लड़िका आहे, त क्रूस से नीचे उतरि आव।<sup>41</sup> अउर इहइमेर से प्रधान याजक लोग घलाय, मूसा के बिधान सिखामँड बालेन, अउर यहूदी धारमिक अँगुअन समेत, यीसु के मजाक उडाइके कहत रहे हँय,<sup>42</sup> “इआ दुसरे मनइन काहीं त बचाइस ही, पय खुद काहीं नहीं बचाय सकय। अउर इआ त ‘इजराइल देस के राजा’ आय। पय अब अगर इआ क्रूस से नीचे उतरि आबय, त हम पंचे एखे ऊपर बिसुआस करी।<sup>43</sup> अउर एखर भरोसा परमातिमा के ऊपर हय; अगर ऊँ एही चाहत हें, त एही बचाय लेंय, काहेकि इआ कहिस रहा हय, कि ‘हम परमातिमा के लड़िका आहेंन’।”<sup>44</sup> अउर इहइमेर डॉकू घलाय, जउन उनखे साथ क्रूस माहीं चढ़ाए गे रहे हँय, उनखर बुराई करत रहे हँय।

### यीसु के प्रान छोड़ब

(मरकुस 15:33-41; लूका 23:44-49; यूहन्ना 19:28-30)

<sup>45</sup> अउर दुपहर बारा बजे से लइके तीन बजे तक, सगले देस माहीं अँधिआर छाबा रहिगा।<sup>46</sup> अउर तीन बजे के करीब यीसु खुब चंडे चिल्लाइके कहिन, “एली, एली, लमा सबक्तनी?” अरथात जेखर मतलब हय, “हे हमार परमातिमा, हे हमार परमातिमा, अपना हमहीं काहे छोड़ दिहेन ?”<sup>47</sup> तब जउन मनई उहाँ ठाढ़ रहे हँय, इआ बात काहीं सुनिके उनमा से कुछ जने कहिन, कि “ऊँ त एलिय्याह नबी काहीं गोहराबत हें।”<sup>48</sup> तब उनमा से एक जने हरबिन दउड़िके आबा, अउर सोक्खा लइके सिरका माहीं बुड़ाइस, अउर सरकन्डा के लाठी माहीं धइके यीसु काहीं चुहकाइस।<sup>49</sup> पय कुछ जने कहिन, “अबय रहि जा, हम पंचे देखी, एलिय्याह नबी एही बचामँड आबत हें, कि नहीं।”<sup>50</sup> तब यीसु पुनि खुब चन्डे चिल्लाइके प्रान छोड़ दिहिन।<sup>51</sup> अउर उहय समय मन्दिर के परदा ऊपर से नीचे तक, फाटिके दुइ टुकड़ा होइगा: अउर धरती डोलिगे, अउर चट्टानें चटक गईं,<sup>52</sup> अउर खुब कब्रें खुल गईं, अउर जउन पबित्र मनई मरिगे रहे हँय, उनमा से खुब जने जिन्दा होइगें,<sup>53</sup> अउर कब्रन से बहिरे निकरि आएँ, अउर यीसु के जिन्दा होए के बाद, ऊँ पंचे पबित्र सहर माहीं गें, अउर खुब मनइन काहीं देखाई दिहिन।<sup>54</sup> तब सुबेदार, अउर जउन मनई उनखे साथ यीसु के पहरा देत रहे हँय, त ऊँ पंचे भुँडोल अउर जउन कुछ भ रहा हय, ओही देखिके खुब डेराइगें, अउर कहँइ लागें, कि “वास्तव माहीं यीसु परमातिमा के लड़िका आहीं!”<sup>55</sup> अउर उहाँ खुब मेहेरिआ रही हँय, जउन गलील प्रदेस से यीसु के सेवा करत, उनखे साथय आई रही हँय, ऊँ पंचे दूरिन से इआ सगला हाल देखत रही हँय।<sup>56</sup> अउर उन माहीं मगदल गाँव के मरियम, अउर याकूब अउर योसेस के महतारी मरियम, अउर जब्दी के लड़िकन के महतारी घलाय रही हँय।

### यीसु काहीं गाड़ा जाब

(मरकुस 15:42-47; लूका 23:50-56; यूहन्ना 19:38-42)

<sup>57</sup> जब साँझ भय, त अरमतिया गाँव के यूसुफ नाम के एकठे धनी मनई आएँ, जउन खुद यीसु के चेला रहे हँय।<sup>58</sup> ऊँ राजपाल पिलातुस के लघे जाइके, यीसु के लहास काहीं माँगिन, तब पिलातुस उन्हीं लहास दइ देइ के हुकुम दइ दिहिन।<sup>59</sup> अउर यूसुफ लहास लइके, उजर चद्रा माहीं लपेटिन,<sup>60</sup> अउर ऊँ यीसु के लहास काहीं अपने नई कब्र माहीं धरिन, जउने काहीं ऊँ चट्टान माहीं खोदबाइन रहा हय, अउर कब्र के दुअरा माहीं खुब बड़ा पथरा ढनगाइके बंद कइके चलेगें।<sup>61</sup> अउर मगदल गाँव के मरियम, अउर दूसर मरियम, उहाँ कब्र के बगल माहीं बइठ रही हँय।

### यीसु के कब्र माहीं पहरा देब

<sup>62</sup> जब सुक्रबार के दिन बीत ग, त दुसरे दिना, प्रधान याजक लोग अउर फरीसी लोग, पिलातुस के लघे एकट्ठा होइके उनसे कहिन, कि <sup>63</sup> “हे हजूर, हमहीं पंचन काहीं सुध ही, कि उआ छल करँइ बाला, जब उआ जिन्दा रहा

हय, त इआ कहिस रहा हय, कि ‘हम तीन दिना के बाद जिन्दा होइ जाब।’<sup>64</sup> एसे अपना इआ हुकुम देई, कि तीन दिना तक कब्र के रखबारी कीन जाय, कहँव अइसन न होय, कि ओखर चेला लोग आइके, ओही चोराय लइ जाँय, अउर मनइन से कहँइ लागँय, कि ‘उआ मरेन म से जिन्दा होइगा हय।’ त इआ दूसर धोखा पहिल धोखा से जादा बुरा होई।”<sup>65</sup> तब पिलातुस उनसे कहिन, कि “तोंहरे पंचन के लघे पहरा देइ बाले त हें। एसे जा, अपने समझ के मुताबिक रखबारी करा।”<sup>66</sup> तब ऊँ पंचे, उहाँ से चलेगें, अउर पथरा माहीं सील लगाय दिहिन, अउर पहरा देइ बालेन काहीं उहाँ बइठाइके कब्र काहीं, सुरच्छित कइ दिहिन।

### मरेन म से यीसु के जिन्दा होब

(मरकुस 16:1-10; लूका 24:1-12; यूहन्ना 20:1-10)

**28** पबित्र दिन के बाद हप्ता के पहिलय दिना अइतबार काहीं, उँजिआर होतय मगदल गाँव के मरियम, अउर दूसर मरियम कब्र काहीं देखँइ गईं।<sup>2</sup> तब उहाँ अचानक खुब तेज भुँडोल भ, काहेकि प्रभू के एकठे दूत स्वरग से उतरें, अउर कब्र के लघे आइके उआ पथरा काहीं हटाय दिहिन, अउर ओहिन के ऊपर बइठिगें।<sup>3</sup> अउर उनखर रूप बिजुली कि नाई रहा हय, अउर उनखर ओन्हा बरफ कि नाई उजर रहा हय।<sup>4</sup> अउर स्वरगदूत के डेरन के मारे कब्र माहीं पहरा देइ बाले सिपाही थर-थर काँपय लागें, अउर मरे कि नाई होइगें।<sup>5</sup> तब स्वरगदूत, ऊँ मेहेरिआन से कहिन, “डेरा न, काहेकि हम जानित हएन कि तूँ पंचे यीसु काहीं ढुँढते हया, जउन क्रूस माहीं चढ़ाए गे रहे हँय।<sup>6</sup> ऊँ इहाँ नहिं आहीं, पय ऊँ अपने कहे के मुताबिक जिन्दा होइगें हँय। अउर आबा, इआ जघा काहीं देखा, जहाँ प्रभू परे रहे हें,<sup>7</sup> अउर हरबिन जाइके उनखे चलन काहीं बताबा, कि ऊँ मरेन म से जिन्दा होइगें हँय, अउर ऊँ तोंहसे पंचन से पहिले गलील प्रदेस माहीं जइहँय, अउर तूँ पंचे उहँय उनखर दरसन पइहा! अउर देखा, जउन बात हम तोंहसे कहेंन हय, त ओही सुध रख्या।”

<sup>8</sup> तब ऊँ मेहेरिआ डेरन के मारे, अउर बड़ी खुसी के साथ कब्र से हरबिन लउटिके यीसु के चलन काहीं खबर बतामँड के खातिर दउड़त चल दिहिन।<sup>9</sup> तब यीसु उन्हीं मिलें अउर कहिन, कि “नबस्कार।” तब ऊँ पंचे यीसु के लघे आई, अउर उनखर गोड़ पकड़िके, उनखे गोड़न गिरीं।<sup>10</sup> तब यीसु उनसे कहिन, “डेरा न; तूँ पंचे जाइके हमरे भाइन से कहि द्या, कि ऊँ पंचे गलील प्रदेस माहीं चले जाँय, अउर उहँय हमहीं देखिहँय।”

### पहरेदारन के व्दारा खबर देब

<sup>11</sup> जब ऊँ पंचे खबर देइ जातय रही हँय, तबहिनय पहरेदारन म से कुछ जने, सहर माहीं जाइके प्रधान याजकन से सगला हाल बताइन।<sup>12</sup> तब ऊँ पंचे यहूदी समाज के धारमिक अँगुअन के लघे एकट्ठा होइके एकठे योजना बनाइन, अउर सिपाहिन काहीं खुब चाँदी दइके कहिन,<sup>13</sup> “तूँ पंचे इआ कह्या, कि रात माहीं जब हम पंचे सोबत रहेन हय, तब यीसु के चेला लोग आइके उन्हीं चोराय लइगे हँय।<sup>14</sup> अउर अगर इआ बात हाकिम के कान तक पहुँच जई, त हम पंचे उन्हीं मनाय लेब, अउर तोंहई पंचन काहीं खतरा माहीं परँइ से बचाय लेब।”<sup>15</sup> एसे ऊँ पहरा देइ बाले सिपाही, रुपिआ लइके जइसन सिखाए गे रहे हँय, उहयमेर किहिन; अउर इआ किस्सा आजव तक, यहूदी लोगन माहीं इहइमेर फइली हय।

<sup>16</sup> अउर यीसु के ग्यरहँव चेला गलील प्रदेस के उआ पहार माहीं गें, जउने पहार माहीं जाँइ के खातिर यीसु उन्हीं बताइन रहा हय।<sup>17</sup> अउर ऊँ पंचे यीसु के दरसन पाइके उनखे गोड़न गिरे, पय कुछ मनइन के मन माहीं संका रही हय, कि ई यीसु आहीं कि न होंहीं।<sup>18</sup> तब यीसु उनखे लघे आइके कहिन, “स्वरग अउर धरती के सगला अधिकार हमहिन काहीं दीनगा हय।<sup>19</sup> एसे तूँ पंचे इहाँ से जाइके, सगले जातिअन के मनइन काहीं चेला बनाबा, अउर उन्हीं पंचन काहीं पिता परमातिमा, अउर लड़िका यीसु, अउर पबित्र आत्मा के नाम से बपतिस्मा द्या।<sup>20</sup> अउर जउने बातन काहीं, हम तोंहई

पंचन काहीं मानँइ के हुकुम दिहेन हय, उँइन बातन काहीं मानँइ के खातिर उनहूँ पंचन काहीं सिखाबा: अउर इआ बात काहीं सुध रख्या, कि संसार के अन्त तक हमेसा हम तौहरे पंचन के साथ माहीं रहब।”



# मरकुस

## इआ किताब के परिचय

मरकुस के लिखी खुसी के खबर के सुरुआत इआमेर से हय, “परमातिमा के लड़िका यीसु मसीह के खुसी के खबर।” इआ खुसी के खबर म यीसु काहीं सगले कामन म अधिकार रक्खेई बाले, अउर सही काम करेई बाले, मनई कि नाई बताबा ग हय। यीसु के अधिकार उनखे सिच्छन माहीं, बुरी आत्मन क निकारैई माहीं, अउर मनइन के पाप माफ करेई माहीं देखाबा ग हय। इआ खुसी के खबर माहीं यीसु अपने काहीं “मनई के लड़िका” कहिन हीं। यीसु दुनिया माहीं एसे आएँ, कि मनइन काहीं पापन से छोड़ामेई के खातिर आपन जान देई।

मरकुस यीसु के बातन अउर सिच्छन काहीं नहीं, बलकिन उनखे कामन काहीं जादा जोर दिहिन हीं। एसे मरकुस यीसु के कामन के बखान सहज अउर सही ढंग से किहिन हीं। यूहन्ना बपतिस्मा देई बाले, अउर यीसु के बपतिस्मा, अउर यीसु के परिच्छा, के बारे माहीं थोरी काहीं बताए के बाद, लेखक हरबिन यीसु काहीं बिमारन काहीं नीक करब, अउर परमातिमा के सँदेस बताउब, अउर उनखे सेबा के कामन काहीं बतामँई लागत हैं। जेतना समय बीतत ग, ओतनइ यीसु के बात मानेई बाले उनहीं निकहा से जानत गें, पय यीसु के बिरोधी खुब जादा होइगें। अन्तिम पाठन माहीं यीसु के अन्तिम जीवन के घटना के बारे माहीं बताबा ग हय। जउने म खास हय, यीसु काहीं क्रूस माहीं चढ़ाउब, मारा जाब, गाड़ा जाब, अउर दुसराय जिन्दा होइके स्वरग जाब। अपना पंचे इआ खुसी के खबर काहीं जरूर पढ़ी। अउर यीसु मसीह के सिच्छन के बारे माहीं, अउर उनखे चमत्कारन के बारे माहीं, अउर मरेन म से पुनि जिन्दा होई के बारे माहीं, निकहा से जानी, अउर अपने मसीही जीवन काहीं आत्मिक रूप से मजबूत बनाई।

रूप-रेखा :

खुसी के खबर के सुरुआत-

गलील माहीं यीसु के सेबा के काम- 1:14;

गलील से यरूसलेम सहर तक के यात्रा-

यरूसलेम माहीं अन्तिम हप्ता- 11:1;

यीसु के दुबारा जिअब-

जिन्दा भए प्रभू यीसु के देखाई देब अउर स्वरग काहीं जाब-

## यूहन्ना बपतिस्मा देई बाले के प्रचार

1 परमातिमा के लड़िका यीसु मसीह के खुसी के खबर के सुरुआत।

2 जइसन परमातिमा के सँदेस बतामँई बाले यसायाह के किताब माहीं लिखा हय, कि

“देखा, हम अपने दूत काहीं तोंहसे पहिले पठइत हएन, जऊँ तोंहरे खातिर मनइन काहीं तइआर करिहँय।

3 सुनसान जघा माहीं एकठे मनई खुब चन्डे गोहराबत रहे हँय, कि अपने मन काहीं तइआर कइके गइल सीध बनाय ल्या, काहेकि प्रभू आमँई बाले हैं †।”

4 ऊँ गोहरामँई बाले यूहन्ना बपतिस्मा देई बाले आहीं, जऊँ सुनसान जघा माहीं बपतिस्मा देत रहे हँय, ऊँ ठाढ़ होइके कहँई लागें, पाप करब छोड़िके अपने मन काहीं बदला, अउर बपतिस्मा ल्या, जउने परमातिमा तोंहरे अपराधन काहीं माफ कइ देंय। 5 सगले यहूदिया प्रदेस के यहूदी, अउर यरूसलेम सहर के रहँई बाले सगले मनई अपने घरन से निकरिके यूहन्ना बपतिस्मा देई बाले के लघे गें, अउर अपने-अपने पापन काहीं सोइकार कइके यरदन नदी माहीं उनसे बपतिस्मा लिहिन।

6 यूहन्ना ऊँ के बार से बना ओन्हा पहिरत रहे हँय, अउर करिहाँ माहीं चमड़ा के पट्टा बाँधे रहत रहे हँय, अउर ऊँ चिड्डन काहीं अउर जंगल के महिपर खात रहे हँय। 7 अउर इआ कहिके प्रचार करत रहे हँय, कि “हमरे बाद जऊँ आमँई बाले हैं, ऊँ हमसे एतना महान हैं; कि हम निहुरिके उनखे

पनहिन के डोरव तक छोरेई के काबिल नहीं आहैन। 8 हम त तोहई पंचन काहीं पानी से बपतिस्मा दिहेन हय, पय ऊँ तोहई पबित्र आत्मा से बपतिस्मा देइहँय।”

## यीसु के बपतिस्मा अउर परिच्छा

(मत्ती 3:13; 4:11; लूका 3:21-22; 4:1-13)

9 एक दिना यीसु गलील प्रदेस के नासरत गाँव से आइके, यरदन नदी माहीं यूहन्ना बपतिस्मा देई बाले से बपतिस्मा लिहिन। 10 यीसु जइसय पानी से बहिरें निकरिके ऊपर आएँ, तबहिनय ऊँ अकास काहीं खुलत अउर पबित्र आत्मा काहीं अपने ऊपर परेबा के रूप म उतरत देखिन। 11 अउर इआ अकासबानी भय, “तूँ हमार पियार लड़िका आह्या, हम तोंहसे प्रसन्न हएन।”

12 तब पबित्र आत्मा हरबिन यीसु काहीं सुनसान जघा कइती पठइस। 13 अउर सुनसान जघा माहीं, सइतान उनखर चालिस दिना तक परिच्छा लिहिस; अउर उहाँ यीसु जंगल म रहँई बाले जानबरन के बीच माहीं रहे हँय, अउर स्वरगदूत उनखर सेबा करत रहे हँय।

## यीसु के सेबकाई के सुरुआत

(मत्ती 4:12-17; लूका 4:14-15)

14 जब हेरोदेस राजा यूहन्ना काहीं जेल माहीं डरबाय दिहिन तय, ओखे बाद यीसु गलील प्रदेस माहीं आइके, परमातिमा के राज के खुसी के खबर सुनामँई लागें। 15 अउर ऊँ कहिन, “सही समय आइगा हय, अउर हरबिन

† 1:3 यसा 40:3

परमातिमा राजा बनिके आमँड बाले हैं; पाप करब छोड़िके परमातिमा के लघे आबा, अउर खुसी के खबर के बिसुआस करा।”

### पहिल चलन काहीं बोलाबा जाब

(मत्ती 4:18-22; लूका 5:1-11)

16 एक दिना यीसु गलील प्रदेश के झील के किनारे-किनारे चलतय-चलत, समौन अउर उनखे भाई अन्द्रियास काहीं झील म जाल डारत देखिन; काहेकि ऊँ पंचे मछुआरा रहे हँय। 17 यीसु उनसे कहिन, “हमरे पीछे चले आबा, हम तौहई मनइन काहीं परमातिमा के लघे लइ आमँड बाला बनाउब।” 18 अउर ऊँ पंचे तुरन्तय जालन क छोड़िके यीसु के पीछे चल दिहिन।

19 उहाँ से कुछ दूरी चले के बाद, यीसु जब्दी के लड़िका याकूब अउर ओखे भाई यूहन्ना काहीं नाव म चढ़े जालन काहीं सुधारत देखिन। 20 यीसु उनहीं हरबिन बोलाइन; अउर ऊँ पंचे अपने बाप जब्दी काहीं मजूरन के साथ नाव माहीं छोड़िके यीसु के पीछे चल दिहिन।

### बुरी आत्मा से परेसान मनई काहीं नीक करब

(लूका 4:31-37)

21 यीसु अपने चलन के साथ कफरनहूम सहर माहीं गे, अउर ऊँ पबित्र दिन काहीं हरबिन यहूदी सभाघर माहीं जाइके उपदेस देंइ लागें। 22 अउर मनई उनखे उपदेस काहीं सुनिके चउआइगें; काहेकि यीसु उनहीं मूसा के बिधान सिखामँड बालेन कि नाई नहीं, बलकिन अधिकारी कि नाई उपदेस देत रहे हँय। 23 उहय समय उनखे सभाघर माहीं एकठे मनई बइठ रहा हय, जउने माहीं एकठे बुरी आत्मा रही हय। 24 उआ एक दरकिन चिल्लाइके कहँइ लाग, “हे नासरत गाँव के रहँइ बाले यीसु हमार अपना से कउनव काम नहि आय, का अपना हमहीं नास करँइ आएन हँय? हम अपना काहीं जानित हएन, कि अपना को आहने? अपना परमातिमा के पबित्र जन आहने।” 25 यीसु ओही डाँटिके कहिन, “चुप्पय रव्ह; अउर उआ मनई से बहिरे निकर जा।” 26 तबहिनय उआ बुरी आत्मा उआ मनई काहीं खुब अभुआइके, अउर खुब चंडे चिल्लाइके ओसे बहिरे निकरिगे। 27 इआ देखिके सगले जन चउआइगें, अउर आपस माहीं कहँइ लागें, “इआ का बात ही? इआ त कउनव नबा उपदेस आय! यीसु अधिकार के साथ बुरी आत्मन काहीं हुकुम देत हैं, अउर ऊँ उनखर हुकुम मनती हई।” 28 अउर यीसु के नाम हरबिन गलील प्रदेश के आस-पास के सगले गाँमन माहीं फइलिगा।

### खुब बिमारन काहीं नीक करब

(मत्ती 8:14-17; लूका 4:38-41)

29 यीसु हरबिन यहूदी सभाघर से निकरिके याकूब अउर यूहन्ना के साथ समौन अउर अन्द्रियास के घर माहीं गे। 30 समौन के सास काहीं बोखार चढ़ी रही हय, अउर घरबाले हरबिन यीसु से उनखे बारे माहीं बताइन। 31 तब यीसु समौन के सास के लघे जाइके उनखर हाँथ पकड़िके उठाइन; तबहिनय उनखर बोखार उतरि गे, अउर ऊँ उनखर सेबा-सहाई करँइ लागीं।

32 साँझ के समय जब सुरिज बूड़िगा, तब खुब जने सगले बिमारन काहीं, अउर उनहीं जउनेन माहीं बुरी आत्मा रही हँय, यीसु के लघे लइ आएँ। 33 अउर सहर के खुब मनई घर के सउहें एकट्टा होइगें। 34 यीसु खुब जनेन काहीं, जऊँ कइअक मेर के बिमारिन से परेसान रहे हँय, नीक कइ दिहिन, अउर खुब बुरी आत्मन काहीं निकारिन, अउर ऊँ, बुरी आत्मन काहीं बोलँइ नहीं देत रहे आहीं, काहेकि ऊँ यीसु काहीं जानत रही हँय।

### अकेले माहीं यीसु के प्राथना

(लूका 4:42-44)

35 भिनसरहय सुरिज निकरँइ से खुब पहिलेन, यीसु उठिके, घर से निकरिके सुनसान जघा माहीं गे, अउर उहँय प्राथना करँइ लागें। 36 सकारे

समौन अउर उनखर साथी उनहीं ढूँढ़इ गे। 37 जब यीसु उनहीं मिलिगें, तब ऊँ पंचे उनसे कहिन, “सगले जन अपना काहीं ढूँढ़त लाग हें।” 38 यीसु उनसे कहिन, “आबा हम पंचे अउर कहँव आस-पास के बस्तिन म चली, जउने हम उहँव प्रचार करी, काहेकि हम एहिन खातिर निकरेन हय।” 39 यीसु सगले गलील प्रदेश माहीं उनखे सभाघरन माहीं जाइ-जाइके खुसी के खबर के प्रचार करत, अउर बुरी आत्मन काहीं मनइन से निकारत रहिगें।

### कोढ़ के मरीज काहीं नीक करब

(मत्ती 8:1-4; लूका 5:12-16)

40 एकठे कोढ़ी यीसु के लघे आबा, अउर उनसे चरउरी बिनती किहिस, अउर उनखे गोइन गिरिके कहिस, “अगर अपना चाही त हमहीं सुद्ध कइ सकित हएन।” 41 यीसु काहीं उआ मनई के ऊपर बड़ी दया आइगे, अउर आपन हाँथ बढ़ाइके ओही छुइन अउर कहिन, “हम चाहित हएन, तूँ सुद्ध होइजा।” 42 अउर हरबिन ओखर कोढ़ के बिमारी नीक होइ लाग, अउर उआ सुद्ध होइगा। 43 तब यीसु ओही चेतउनी दइके तुरन्तय पठय दिहिन। 44 अउर ओसे कहिन, “देखा कोहू से कुछ न कह्या, पय जाइके अपने-आप काहीं याजक क देखाबा, अउर अपने सुद्ध होइ के बारे माहीं जउन चढ़ाबा चढ़ामँइ काहीं मूसा नबी ठहराइन हीं, उहय भँट चढ़ाबा, कि जउने तौहरे समाज के लोगन के खातिर गबाही ठहरय।” 45 पय उआ बहिरे जाइके अपने निकहा होइ के खुब प्रचार करँइ लाग, अउर सगले सहर म इआ खबर फइलाय दिहिस, इआ कारन से यीसु पुनि खुले आम सहर माहीं नहीं जाय सकें, पय सुनसान जघा माहीं रहत रहे हँय; अउर चारिव कइती से मनई उनखे लघे आबत रहिगें।

### लोकबा के मरीज काहीं नीक करब

(मत्ती 9:1-8; लूका 5:17-26)

2 कइअक दिना के बाद यीसु पुनि कफरनहूम सहर म आएँ, अउर कुछ जने जानिगें कि यीसु घरय माहीं हें। 2 उहाँ एतने मनई एकट्टा होइगें कि दुआरा के लघे घलाय जघा नहीं रहिगे; अउर यीसु उनहीं परमातिमा के बचन सुनामँइ लागें। 3 अउर कुछ जने एकठे लोकबा के मरीज काहीं, चार जने से खटिया समेत उठबाइके यीसु के लघे लइ आएँ। 4 पय जब ऊँ पंचे भीड़ के कारन यीसु के लघे नहीं पहुँच पाएँ, तब उआ घर के खपरइल काहीं उतिनँइ लागें, जउने सउहें यीसु भीतर रहे हँय, अउर जब ऊँ पंचे ठाठ समेत उतिन चुकें, तब उआ मरीज काहीं खटिया समेत नीचे झुलाय दिहिन। 5 यीसु, उनखे बिसुआस काहीं देखिके, उआ लोकबा के मरीज से कहिन, “हे बेटबा तौहार पाप माफ होइगें।” 6 तब मूसा के बिधान सिखामँड बाले कइएक जने जउन उहाँ बइठ रहे हँय, ऊँ पंचे अपने-अपने मन म सोचँइ लागें, 7 “इआ मनई काहे अइसा कहत हय? इआ त परमातिमा के बुराई करत हय! परमातिमा काहीं छोड़िके अउर को पाप माफ कइ सकत हय?” 8 यीसु हरबिन अपने आत्मा माहीं जान लिहिन, कि ऊँ पंचे अपने-अपने मन माहीं का सोचत हें, अउर उनसे कहिन, “तूँ पंचे अपने-अपने मन म इआ काहे सोचते हया? 9 सरल का हय? का लोकबा के मरीज से इआ कहब तौहार पाप माफ होइगें, इआ कि इआ कहब कि ‘उठा, आपन खटिया उठाइके चला फिरा’? 10 पय जउने तूँ पंचे इआ जानिल्या, कि मनई के लड़िका काहीं धरती माहीं पाप माफ करँइ के घलाय अधिकार हय।” यीसु उआ लोकबा के मरीज से कहिन, 11 “हम तौहसे कहित हएन, कि उठा, आपन खटिया उठाइके अपने घर चले जा।” 12 उआ उठा, अउर हरबिन खटिया उठाइके सगले मनइन के आँगे से निकरिके चला ग; इआ देखिके सगले जन अचरज मानिन, अउर परमातिमा के बड़ाई कइके कहँइ लागें, “हम पंचे अइसन कबहूँ नहीं देखेन।”

### लेबी काहीं बोलाउब (मत्ती 9:9-13; लूका 5:27-32)

13 यीसु घर से निकरके पुनि झील के किनारे गे, तबहिनय एकठे बड़ी भीड़ उनखे लघे आइगे, अउर यीसु उनहीं उपदेस देई लागे। 14 यीसु जात समय हलफई के लड़िका लेबी काहीं चुंगी नाका माहीं बइठे देखिन, अउर उनसे कहिन, “हमरे पीछे चले आबा।” अउर लेबी उठिके यीसु के पीछे चल दिहिन।

15 जब यीसु लेबी के घर माहीं खाना खाँइ बइठे, तब खुब चुंगी लेंइ बाले, अउर यहूदी लोग जिनहीं पापी कहत रहे हँय, ऊँ मनई, यीसु अउर उनखे चलन के साथ खाना खाँइ बइठे; काहेकि ऊँ खुब जने रहे हँय, अउर सगले जन यीसु के पीछे आइगे तय। 16 मूसा के बिधान सिखामँइ बाले, अउर फरीसी लोग इआ देखिके, कि यीसु, यहूदी लोग जिनहीं पापी कहत हँ, उनखे अउर चुंगी लेंइ बालेन के साथ खाना खात हँ, त उनखे चलन से कहँइ लागे, “यीसु चुंगी लेंइ बालेन अउर पापी मनइन के साथ काहे खात-पिअत हँ?” 17 यीसु इआ बात काहीं सुनिके उनसे कहिन, “नीक-सूख मनइन काहीं बैद के जरूरत नहीं परय, बलकिन बिमारन काहीं बैद के जरूरत परत ही: जे कोऊ इआ सोचत हँ, कि हम पापी नहीं आहैन उनहीं नहीं, बलकिन हम पापी लोगन काहीं बोलामँइ आएन हँय।”

### उपासे रहँइ के बारे माहीं पूँछब (मत्ती 9:14-17; लूका 5:33-39)

18 यहूदा के चेला लोग अउर फरीसी लोग उपासे रहत रहे हँय; एसे ऊँ पंचे आइके यीसु से इआ कहिन, “यहूदा के चेला लोग अउर फरीसी लोगन के चेला लोग काहे उपासे रहत हँ, पय अपना के चेला लोग उपासे नहीं रहँय?” 19 यीसु उनसे कहिन, “जब तक दुलहा बरातिन के साथ म रहत हय, त का कउनव बरतिहा उपासे रहि सकत हँ? नहीं, काहेकि जब तक दुलहा साथ माहीं हय, तब तक ऊँ पंचे उपासे नहीं रहि सकँय। 20 पय एक दिना उआ समय अई, जब दुलहा बरातिन से अलग कीन जई, उआ समय ऊँ पंचे उपासे रइहँय।

21 नबा ओन्हा के ठेगरी पुरान ओन्हा माहीं कोऊ नहीं लगाबय, काहेकि नबा धोए से सकिलके पुरान ओन्हा काहीं खींचिके फारि डारत हय। 22 अउर नबा अंगूर के रस काहीं पुरान मसकन माहीं भरिके कोऊ नहीं धरय, काहेकि नबा अंगूर के रस पुरान मसकन काहीं फारि डारी, अउर अंगूर के रस अउर मसकन दोनव खराब होइ जइहँय; एहिन से नबा अंगूर के रस नई मसकन माहीं भरा जात हय।”

### यीसु पबित्र दिन के घलाय मालिक आहीं (मत्ती 12:1-8; लूका 6:1-5)

23 अइसन भ, कि यीसु पबित्र दिन काहीं खेतन के किनारे-किनारे जात रहे हँय, अउर उनखर चेला लोग चलतय-चलत गोहूँ के बाली टोरँइ लागे। 24 तब फरीसी लोग यीसु से कहिन, “देखी; पबित्र दिन काहीं अपना के चेला लोग उआ काम काहे करत हँ, जउन मूसा के बिधान के मुताबिक उचित नहीं आय?” 25 यीसु उनसे कहिन, “का तूँ पंचे पबित्र सास्त्र माहीं इआ कबहूँ नहीं पढ़े आह्या, कि जब राजा दाऊद काहीं जरूरत परी, अउर जब ऊँ, अउर उनखर साथी भूँखे रहे हँय, तब ऊँ का किहिन तय? 26 राजा दाऊद कइसन अबियातार महायाजक के समय माहीं, परमातिमा के घर माहीं जाइके भेंट चढ़ाई रोटिन काहीं खाइन, अउर अपने साथिन काहीं घलाय खबाइन, जबकि ऊँ रोटिन काहीं खाय के अधिकार याजकन के अलाबा दुसरेन काहीं खाब मूसा के बिधान के खिलाफ रहा हय?” 27 तब यीसु, फरीसी लोगन से कहिन, “पबित्र दिन मनई के खातिर बनाबा ग हय, मनई पबित्र दिन के खातिर नहीं बनाबा ग। 28 इआ जानित्या, कि मनई के लड़िका पबित्र दिन के घलाय प्रभू आहीं।”

### झुरान हाँथ बाले मनई काहीं नीक करब (मत्ती 12:9-14; लूका 6:6-11)

3 यीसु पुनि यहूदी सभाघर माहीं गे; उहाँ एकठे मनई बइठ रहा हय, जउने के हाँथ झुरान रहा हय। 2 अउर कुछ जने यीसु के ऊपर दोस लगामँइ के खातिर मोका ताके रहे हँय, कि देखी यीसु पबित्र दिन काहीं उआ मनई काहीं नीक करत हँ, कि नहीं। 3 यीसु झुरान हाँथ बाले मनई से कहिन, “बीच म ठाढ़ होइजा।” 4 अउर यीसु उनसे कहिन, “मूसा के बिधान के मुताबिक का पबित्र दिन काहीं भलाई करब उचित हय, कि बुराई करब, कोहू के प्रान बचाउब उचित हय, कि मारि डारब?” पय ऊँ पंचे कुछू नहीं बोले। 5 यीसु उनखे मन के कठोरता के कारन उदास होइके, उनखे ऊपर गुस्साइके चारिव कइती देखिन, अउर झुरान हाँथ बाले मनई से कहिन, “आपन हाँथ बढ़ाबा।” उआ आपन हाँथ बढ़ाइस, त ओखर झुरान हाँथ निकहा होइगा। 6 तब फरीसी लोग सभाघर से बहिरे निकरके हरबिन हेरोदेस के पच्छ बाले मनइन से मिलिके, यीसु के बिरोध माहीं साहुत करँइ लागे, कि यीसु काहीं कउनमेर से मार डारा जाय।

### यीसु काहीं भीड़ के पछियाब

7 यीसु अपने चलन के साथ झील कइती चलेगे, अउर गलील प्रदेस से अउर यहूदिया प्रदेस से मनइन के एकठे बड़ी भीड़ उनहीं पछिआय लिहिस; 8 उआ भीड़ माहीं यहूदिया प्रदेस, अउर यरूसेलेम सहर, अउर इद्रूमिया प्रदेस, अउर यरदन नदी के दुसरे पार के, अउर सूर अउर सैदा प्रदेसन के आस-पास के गाँमन से खुब जने इआ सुनिके, कि यीसु कइसन अचरज के काम करत हँ, देखँइ के खातिर उनखे लघे आएँ। 9 तब यीसु अपने चलन से कहिन, “भीड़ खुब जादा ही, एसे एकठे छोट क नाव हमरे खातिर तइआर रक्खा, जउने ऊँ पंचे हमही दबाए न पामँइ।” 10 काहेकि यीसु खुब बिमारन काहीं नीक किहिन तय, एसे जेतने बिमार रहे हँय, यीसु काहीं छुअँइ के खातिर उनखे उपरय गिरे परत रहे हँय। 11 अउर जिनखे भीतर बुरी आत्मा रही हँय, जब ऊँ यीसु काहीं देखत रही हँय, त उनखे गोडेन म गिर परत रही हँय, अउर चिल्लाइके कहत रही हँय, कि तूँ परमातिमा के लड़िका आह्या; 12 अउर यीसु ऊँ बुरी आत्मन काहीं चेतउनी दइके कहिन, कि हमरे बारे माहीं न बताबा, कि हम को आहैन।

### बारा खास चलन काहीं बोलाउब (मत्ती 10:1-4; लूका 6:12-16)

13 यीसु पहार म चढ़िगे, अउर ऊँ जिनहीं चाहत रहे हँय, उनहीं अपने लघे बोलाइन; अउर ऊँ पंचे उनखे लघे गे। 14 तब यीसु बारा जनेन काहीं आपन खास चलन के रूप माहीं चुनिन, कि ऊँ पंचे उनखे साथ माहीं रहँय, अउर ऊँ उनहीं पठमँइ, कि जउने ऊँ पंचे परमातिमा के सँदेस के प्रचार करँय, 15 अउर उनहीं बुरी आत्मन काहीं मनइन से निकाइँ के अधिकार दिहिन। 16 अउर मसीह यीसु के द्वारा चुने खास बारा चलन के नाम इआमेर से हँय: समौन जिनखर नाम यीसु पतरस धराइन, 17 अउर जब्दी के लड़िका याकूब, अउर याकूब के भाई यहूदा जिनखर नाम यीसु बुअनरगिस धराइन, जेखर मतलब हय गरजन के लड़िका, 18 अउर अन्द्रियास, अउर फिलिप्पुस, अउर बरतुल्मय, अउर मत्ती, अउर थोमा, अउर हलफई के लड़िका याकूब, अउर तदय, अउर समौन कनानी, 19 अउर यहूदा इस्करियोती जउन यीसु काहीं पकड़बाइस घलाय रहा हय।

### यीसु अउर बुरी आत्मन के मुखिया (मत्ती 12:22-32; लूका 11:14-23; 12:10)

20 जब यीसु घर माहीं आएँ; तब अइसन भीड़ एकट्ठा होइगे, कि उनहीं पंचन काहीं खाँइ तक क मोका नहीं मिला। 21 जब उनखे परिवार बाले इआ

सुनिन, तब ऊँ पंचे यीसु काहीं पकड़िके लइ आमँइ के खातिर निकर परें; काहेकि ऊँ पंचे कहत रहे हँय, कि यीसु के दिमाक ठीक नहीं आय।

22 मूसा के बिधान सिखामँइ बाले घलाय जऊँ यरूसलेम सहर से आएँ तय, इआ कहत रहे हँय, कि “यीसु के भीतर सइतान हय” अउर “ऊँ बुरी आत्मन के मुखिया अरथात सइतान के मदत से बुरी आत्मन काहीं मनइन से निकारत हँ।”

23 एसे यीसु उनहीं अपने लघे बोलाइके उनसे उदाहरन दइके कहँइ लागें, “सइतान खुद कइसन सइतान काहीं निकार सकत हय?” 24 अगर कउनव राज के मनई आपस माहीं लड़ाई-झगड़ा करँइ लागँय, त उआ राज कइसन स्थिर रहि सकत हय? 25 अउर अगर कउनव घर माहीं फूट परि जात ही, त उआ घर बरबाध होइ जात हय। 26 एसे अगर सइतान खुद अपनय बिरोधी बनिके अपने बीच म फूट डारी, त उआ कइसन टिकी? ओखर त नासय होइ जई।

27 यीसु कहिन, हम तोहई पंचन काहीं अउर निकहा से समझाइत हएन, “कोऊ मनई कउनव बलमान मनई के घर माहीं घुसिके ओखर धन-सम्पत्ती लूट नहीं सकय, जब तक कि उआ मनई, उआ बलमान मनई काहीं बाँधि न देय, ओही बाँधे के बादय ओखे घर काहीं लूट सकत हय।”

28 यीसु पुनि कहिन, “हम तोंहसे सही कहित हएन, कि मनइन के द्वारा कीन सगले पाप अउर परमातिमा के बुराई, माफ कीन जई, 29 पय जे कोऊ पबित्र आत्मा के खिलाफ बुराई करी, ओही कबहूँ माफ न कीन जई: बलकिन उआ परमातिमा के नजर माहीं हमेसा के खातिर अपराधी ठहरी।” 30 यीसु अइसन एसे कहिन, काहेकि ऊँ पंचे इआ कहत रहे हँय, कि यीसु माहीं बुरी आत्मा हय।

### यीसु के महतारी अउर भाई

(मत्ती 12:46-50; लूका 8:19-21)

31 तब यीसु के महतारी अउर भाई लोग आएँ, अउर बहिरे ठाढ़ होइके कुछ जनेन काहीं पठइके यीसु काहीं बोलबाइन। 32 यीसु के लघे खुब भीड़ बइठ रही हय, अउर ऊँ बोलामँइ बाले यीसु से कहिन, “देखी, अपना के महतारी अउर भाई लोग अपना काहीं ढूँढँइ आएँ हँय, अउर ऊँ पंचे बहिरे ठाढ़ हँ।” 33 इआ सुनिके यीसु बोलामँइ बालेन से कहिन, “हमार महतारी अउर हमार भाई को आहीं, तूँ पंचे जनते हया?” 34 जउन मनई यीसु के आस-पास बइठ रहे हँय, यीसु उनखे कइती निहारिके कहिन, “देखा हमार महतारी अउर हमार भाई ई पंचे आहीं। 35 काहेकि जे कोऊ परमातिमा के मरजी के मुताबिक चलत हय, उहय हमार भाई, बहिनी अउर महतारी आय।”

### बीज बोमँइ बाले किसान के उदाहरन

(मत्ती 13:1-9; लूका 8:4-8)

4 यीसु एक दिना पुनि झील के किनारे परमातिमा के सँदेस सुनामँइ लागें: अउर उनखे लघे अइसन बड़ी भीड़ एकट्ठा होइगे, कि यीसु काहीं झील म एकठे नाव म चढ़िके बइठँय परिगा, अउर सगली भीड़ भुँइन माहीं झील के किनारे ठाढ़ रहिगे। 2 अउर यीसु उदाहरन दइ-दइके उनहीं खुब बातन काहीं सिखामँइ लागें, अउर अपने उपदेस माहीं उनसे कहिन। 3 “ध्यान से सुना! एकठे बीज बोमँइ बाला, बीज बोमँइ निकरा। 4 बोबत समय कुछ बीज गइल के किनारे गिरिगें, अउर पच्छी आइके उनहीं खाय लिहिन। 5 कुछ बीज पथरही भुँइ माहीं गिरें, जहाँ उनहीं खुब माटी नहीं मिली, अउर गहिल माटी न मिलँइ के कारन ऊँ हरबी जामि आएँ, 6 अउर जब सुरिज उआ, त तेज घाम के कारन ऊँ जरिगें, अउर जर मजबूत न होंइ के कारन झुराइगें। 7 कुछ बीज जरबइलन म गिरें, अउर जामि आएँ, पय ऊँ जरबइला बाढ़िके उनहीं दबाय लिहिन, एसे उन माहीं फर नहीं लग पाएँ। 8 पय कुछ बीज निकही भुँइ माहीं गिरें, अउर जामि आएँ अउर बाढ़िके खुब फरें; कउनव बिरबा तीस गुना, कउनव साठ गुना, कउनव सव गुना फर लइ

आएँ।” 9 अउर यीसु कहिन, “जेखर सुनँय के मन होय, उआ बड़े ध्यान से सुन लेय।”

### उदाहरन के उद्देश

(मत्ती 13:10-17; लूका 8:9-10)

10 जब सगली भीड़ चली गय, अउर यीसु अकेले बचे, तब उनखर साथी लोग ऊँ बरहँव चलन समेत यीसु से ई उदाहरनन के बारे माहीं पूँछँइ लागें। 11 यीसु उनसे कहिन, “परमातिमा के राज के जउने बातन काहीं दूसर लोग नहीं जानँय, ऊँ बातन काहीं परमातिमा तोहई समझाइन हीं, पय दुसरे लोगन से सगली बातँय उदाहरनन माहीं कही गई हँय, एसे कि जउने पबित्र सास्त्र माहीं लिखी यसायाह नबी के बात पूर होय।”

12 यसायाह अइसन लिखिन हीं, कि “ई पंचे परमातिमा के महिमा काहीं देखत हँ, पय देखे से जाने नहीं पामँय, अउर अपने कानन से सुनत हँ, पय सुनेव से नहीं समझे पामँय; पय अगर ई सगले जने परमातिमा के सँदेस के बिसुआस कइ लेतें, त उनखर पाप माफ कइ दीन जातें।”

### बीज बोमँइ बाले किसान के उदाहरन के मतलब

(मत्ती 13:18-23; लूका 8:11-15)

13 यीसु पुनि उनसे से कहिन, “काहे तूँ पंचे इआ उदाहरन काहीं नहीं समझे पाया? त पुनि अउर दुसरे उदाहरनन काहीं कइसा समझे पइहा? इआ उदाहरन के मतलब इआमेर से हय। 14 परमातिमा के बचन बतामँइ बाला बीज बोमँइ बाले कि नाई हय। 15 कुछ जने गइल के किनारे गिरे बीज कि नाई होत हँ, जब ऊँ परमातिमा के बचन काहीं सुनत हँ, त कुछ देर बाद सइतान आइके उनखे सुनी बात काहीं बिसराय देत हय। 16 उहयमेर कुछ लोग पथरही जमीन माहीं बोए बीज कि नाई होत हँ, जउन परमातिमा के सँदेस काहीं सुनिके, तुरन्तय मारे उराव के अपनाय लेत हँ। 17 पय अपने जीवन माहीं परमातिमा के बचन काहीं गहराई से लागू नहीं करँइ, एसे कुछ दिनन तक मानत हँ, पय बाद माहीं जबहिन परमातिमा के बचन के कारन दुख अउर कस्ट मिलत हँ, त ऊँ पंचे हरबिन परमातिमा के बचन काहीं मानब छोंड़ि देत हँ। 18 अउर जउन जरबइलन माहीं बोए बीज कि नाई हँ, ऊँ पंचे ई आहीं, जउन परमातिमा के बचन काहीं सुनिन, 19 पय घर-परिवार के चिन्ता, अउर धन के लालच, अउर इहइमेर के खुब चीजन काहीं पामँइ के लालच माहीं फँसिके, परमातिमा के बचन काहीं बिसराय देत हँ, अउर परमातिमा के आसीस नहीं पामँइ, अउर बिना फर के बिरबा कि नाई होइ जात हँ। 20 पय जउन निकही भुँइ माहीं बोए बीज कि नाई होत हँ, ऊँ पंचे ई आहीं, जउन परमातिमा के बचन काहीं सुनिके, पूरे बिसुआस के साथ अपनाबत हँ, अउर कोऊ तीस गुना, कोऊ साठ गुना, अउर कोऊ सव गुना फर लइ आबत हँ।”

### दिया के उदाहरन

(लूका 8:16-18)

21 यीसु उनसे कहिन, “कउनव मनई दिया जलाइके बरतन के नीचे, इआ कि खटिया के नीचे नहीं धरय, बलकिन ऊँच जघा माहीं धरत हय, कि जउने सगलेन काहीं उँजिआर मिलय। 22 काहेकि जउन कुछ बिचार मनइन के मन माहीं हँ, परमातिमा उनहीं प्रगट करिहँय, अउर हमरे जीवन के सगली छिपी बातन काहीं परमातिमा जानत हँ। 23 जेखर सुनँय के मन होय, उआ बड़े ध्यान से सुन लेय।”

24 यीसु पुनि उनसे कहिन, “बड़े ध्यान से हमरे बात काहीं सुना, जउने नाप से तूँ पंचे दुसरेन काहीं नपते हया, उहय नाप से तोंहरेव खातिर नापा जई। बलकिन तोंहई अउर जादा दीन जई। 25 जे कोऊ परमातिमा के बचन काहीं अउर निकहा से जानँइ के कोसिस करत हय, परमातिमा ओही अउर आत्मिक ग्यान देत हँ, पय जे कोऊ परमातिमा के बचन काहीं जानँइ के

कोसिस नहीं करय, त ओखे लघे जउन ग्यान रहत हय, उहव बिसरि जात हय।”

### जामँय बाले बीज के उदाहरन

26 यीसु पुनि उनसे कहिन, “परमातिमा के राज इआमेर से हय, जइसन कउनव मनई भूँइ माहीं बीज छींटय, 27 अउर घर माहीं जाइके रातके सोय जाय, अउर दिन माहीं सकारे जागय, अउर उआ बीज जामिके अइसन बाढ़ि आबय, कि उआ किसान खुदय न जाने पाबय, कि उआ कइसन बाढ़ि आबा। 28 धरती अपने-आप फसल तइआर करत ही, जइसन पहिले अँकुरब, अउर ओखे बाद बाली, अउर तब बाली माहीं दाना तइआर करत ही, 29 पय जब बाली माहीं दाना पकि जात हय, तब उआ किसान हरबिन हँसिया से काटँय के तइआरी करत हय, काहेकि उआ जान लेत हय कि फसल काटँय के काबिल होइगे ही।”

### राई के दाना के उदाहरन

(मत्ती 13:31-32,34; लूका 13:18-19)

30 यीसु पुनि कहिन, “परमातिमा के राज के उपमा कउने चीज से देई, अउर कउने उदाहरन से तोहई पंचन काहीं समझाई? 31 परमातिमा के राज राई के दाना कि नाई हय। जब भूँइ म बोबा जात हय, त सगले बीजन से छोट होत हय। 32 पय जब बोबा जात हय, तब जामिके सगली साग-सब्जिन के बिरबन से बड़ा होइ जात हय, अउर ओमा से एतनी बड़ी डेरइआ निकरती हँय, कि अकास माहीं उड़ई बाले पच्छी ओखे छाया माहीं बसेर डार सकत हँ।”

33 अउर यीसु उनहीं इआमेर के खुब उदाहरन दइ-दइके जेतना ऊँ पंचे समझ सकत रहे हँय, ओतनय परमातिमा के सँदेस बताबत रहे हँय, 34 अउर बिना उदाहरन के यीसु उनसे कउनव बात नहीं कहत रहे आहीं; पय एकान्त माहीं जाइके, ऊँ अपने खास चलन काहीं सगली बातन के मतलब बताबत रहे हँय।

### तेज आँधी काहीं रोकब

(मत्ती 8:23-27; लूका 8:22-25)

35 उहय दिन जब साँझ होइगे, तब यीसु अपने चलन से कहिन, “आबा, हम पंचे झील के उआ पार चली।” 36 अउर ऊँ चेला लोग भीड़ काहीं उहँइ छोड़िके, जइसन यीसु रहे हँय, उहयमेर उनहीं नाव माहीं लइके चल दिहिन; अउर उनखे साथ माहीं अउरव नाव रही हँय। 37 तबहिनय खुब तेज आँधी चलँइ लाग, अउर पानी के तेज हिलकोरा नाव माहीं एतना लागँइ लाग, कि नाव माहीं पानी भरँइ लाग। 38 पय यीसु नाव के पीछे के हिस्सा माहीं गद्दी म परे सोबत रहे हँय, तब ऊँ पंचे जाइके यीसु काहीं जगाइके उनसे कहिन, “हे गुरू, का अपना काहीं एक्कव चिन्ता नहिँ आय, कि हम सगले जन बूड़े जइत हएन?” 39 तब यीसु उठिके आँधी काहीं डाँटिन, अउर पानी काहीं कहिन, “सान्त रक्ह, रुकि जा!” अउर आँधी रुकिगें, अउर बड़ी सान्ती होइगे; 40 अउर यीसु उनसे कहिन, “तू पंचे काहे डेराते हया? काहे तौहई अबहिनव तक हमरे ऊपर बिसुआस नहिँ आय?” 41 ऊँ पंचे खुब डेराइगें, अउर आपस माहीं कहँइ लागें, “ई को आहीं, कि आँधी अउर पानी तक इनखर हुकुम मानत हँ?”

### बुरी आत्मा से परेसान मनई काहीं नीक करब

(मत्ती 8:28-34; लूका 8:26-39)

5 यीसु अउर उनखर चेला लोग गलील प्रदेश के झील के दुसरे पार गिरसेनी लोगन के देस माहीं पहुँचिगें, 2 जइसय यीसु नाव से उतरें, ओतनिनदार एकठे मनई जउने माहीं बुरी आत्मा सकान रही हय, कब्रन के जघा से चलिके यीसु के लघे आबा। 3 उआ मनई कब्रन के लघे रहत रहा हय, अउर कउनव मनई ओही सँकरिव माहीं बाँधिके नहीं रख सकत रहा

आय। 4 काहेकि सगले जन मिलिके कइअक बेरकी ओखे हाँथ माहीं बँडिया डारिन अउर गोड़े माहीं सँकरिन से बाँधिन तय, पय उआ सँकरिन काहीं टोर डारत रहा हय। अउर बँडियन के कइअक टुकड़ा कइ डारिस तय, ओही कउनव बलमान मनई काबू माहीं नहीं कए पाबत रहा आय। 5 उआ मनई लगीतार रातव-दिन कब्रन के जघा माहीं अउर पहारन माहीं खुब चिल्लात रहा हय, अउर खुद काहीं पथरन से मारिके घायल कइ लेत रहा हय।

6 उआ मनई यीसु काहीं दूरिन से देखिके दउड़त आबा, अउर उनखे लघे आइके गोड़न गिरा। 7 तब यीसु उआ बुरी आत्मा से कहिन, “हे बुरी आत्मा, इआ मनई से बहिरे निकर आव!” 8 अउर उआ खुब चंडे चिल्लाइके कहिस, “हे यीसु परमप्रधान परमातिमा के लइका, हमार अपना से कउनव काम नहिँ आय, अपना काहीं परमातिमा के कसम खबाइत हएन, अपना हमहीं दुख न देई।” 9 यीसु ओसे पूँछिन, “तौहार का नाम हय?” उआ यीसु से कहिस, “हमार नाम सेना हय, काहेकि हम पंचे खुब जने हएन।” 10 अउर बुरी आत्मा यीसु से खुब चरउरी किहिन, कि “हमहीं इआ देस से बहिरे न निकारी।”

11 ओहिनेठे पहार माहीं सुमरन के एकठे बड़ा भारी झुन्ड चरत रहा हय। 12 ऊँ बुरी आत्मा यीसु से चरउरी कइके कहिन, “हमहीं ऊँ सुमरन के ऊपर पठय देई, जउने हम पंचे उनखे भीतर सकाय जई।” 13 तब यीसु बुरी आत्मन काहीं हुकुम दइ दिहिन, अउर ऊँ बुरी आत्मा उआ मनई से निकरिके, ऊँ सुमरन के भीतर सकाय गई, अउर सुमरन के सगला झुन्ड, जऊँ दुइ हजार के करीबन रहा हय, पहार के उतारा से दउड़िके झील माहीं कूद परा, अउर सगले सुमर बूड़िके मरिगें।

14 सुमरन काहीं चरामँइ बाले सगले भागिके, सहर अउर लघे के गाँमन माहीं जाइके सगला हाल बताइन, अउर इआ जऊँ भ रहा हय, देखँइ के खातिर सहर अउर गाँमन के खुब जने आएँ। 15 अउर ऊँ पंचे यीसु के लघे आइके उआ मनई क जउने माहीं बुरी आत्मा रही हँय, अरथात सेना समान रही हँय, ओन्हा पहिरे नीक-सूख बइठे देखिके डेराइगें। 16 जउन मनई इआ घटना काहीं देखिन तय, ओखर जउने माहीं बुरी आत्मा रही हँय, अउर सुमरन के जऊँ भ तय, सगला हाल उँइ मनइन से जऊँ देखँइ आएँ तय बताइन। 17 तब ऊँ सगले देखइआ यीसु से बिनती कइके कहँइ लागें, कि अपना हमरे सरहद्दी से चले जई।

18 जब यीसु नाव माहीं चढ़ँइ लागें, त उआ मनई जउने म बुरी आत्मा रही हँय, यीसु से बिनती करँइ लाग, “हमहूँ काहीं अपने साथय रहँइ देई।” 19 पय यीसु ओही अपने साथ माहीं चलँइ के हुकुम नहीं दिहिन, बलकिन ओसे कहिन, “अपने घर जाइके अपने परिवार बालेन से बताबा, कि प्रभू परमातिमा तौहरे ऊपर बड़ी दया कइके केतना बड़ा काम किहिन हीं। 20 उआ मनई जाइके दिकापुलिस प्रदेश के दसँव सहरन माहीं प्रचार करँइ लाग, कि यीसु हमरे खातिर केतना बड़ा काम किहिन हीं; इआ बात काहीं सुनँय बाले सगले जने चउआय जात रहे हँय।

### याईर के मरी बिटिया काहीं जिआउब, अउर बिमार मेहेरिआ काहीं नीक करब

(मत्ती 9:18-26; लूका 8:40-56)

21 जब यीसु पुनि नाव माहीं चढ़िके झील के दुसरे पार गें, त एकठे बड़ी भारी भीड़ उनखे लघे एकट्ठा होइगे। अउर यीसु झील के किनारेन माहीं रहे हँय। 22 तब यहूदी सभाघर के मुखिनन म से एक जने आएँ, जिनखर नाम याईर रहा हय, ऊँ यीसु काहीं देखतय उनखे गोड़न गिरें, 23 अउर इआ कहिके यीसु से खुब चरउरी करँइ लागें, कि हमार छोट बिटिया खुब बिमार ही, बँचब बड़ा मुसकिल हय; अपना चलिके ओखे ऊपर आपन हाँथ धइ देई, जउने उआ निकही होइके जिअत रहय।” 24 तब यीसु उआ मुखिया के साथ चल दिहिन; अउर खुब भीड़ उनहीं पछिआय लिहिस, एतनी भीड़ होइगे, कि मनई यीसु के उपरय गिरे परत रहे हँय।

25 भीड़ माहीं एकठे मेहेरिआ रही हय, जउने काहीं बारा बरिस से खून बहँइ के बिमारी रही हय। 26 उआ मेहेरिआ खुब बैदन से आपन दबाई

करबाइस; इहाँ तक कि आपन सगली धन-सम्पत्ती खरचा कइ डारिस, पय निकही नहीं भय, बलकिन अउर बिमार होइगे तय, एसे उआ खुब दुखी रहत रही हय।<sup>27</sup> उआ यीसु के आमँड के खबर सुनिके, भीड़ म यीसु के पीछे से आई, अउर उनखे ओन्हा काहीं छुड़ लिहिस, <sup>28</sup> काहेकि उआ मेहेरिआ काहीं इआ बिसुआस रहा हय, कि “अगर हम यीसु के ओन्हव काहीं छुड़ लेब त नीक होइ जाब।”<sup>29</sup> अउर छूतय ओखर खून बहब बन्द होइगा, अउर उआ अपने देह माहीं जान लिहिस, कि हम उआ बिमारी से नीक होइ गएन हय।<sup>30</sup> यीसु हरबिन अपने आत्मा म जानिगें, कि हमरे देह से सत्ती निकरी हय, अउर पीछे फिरिके पूँछिन, “हमार ओन्हा को छुड़स ही?”<sup>31</sup> उनखर चेला लोग यीसु से कहिन, “अपना देखित हएन, कि सगली भीड़ अपना के उपरय गिरी परत ही, अउर अपना पूँछित हएन, कि हमहीं को छुड़स ही?”<sup>32</sup> पय यीसु ओही देखँड के खातिर जउन उनाहीं छुड़स रहा हय, चारिव कइती देखँड लागें।<sup>33</sup> तब उआ मेहेरिआ इआ जानिके, कि हमार कइसन भलाई भे ही, डेरात अउर काँपत-काँपत यीसु के लघे आई, अउर उनखे गोड़न गिरिके उनसे सब सही-सही बताइस, कि हम कउने कारन से अपना काहीं छुएन, अउर छूतय नीक होइ गएन।<sup>34</sup> यीसु उआ मेहेरिआ से कहिन, “बिटिआ, तौहार बिसुआस तोहई नीक किहिस ही, नीके कुसल अपने घर चले जा, अउर इआ बिमारी से बचे रहा।”

<sup>35</sup> जब यीसु इआ बात कहतय रहे हँय, तबहिनय सभाघर के मुखिया के घर से कुछ जने आइके कहिन, “तौहार बिटिया मरिगे ही, अब गुरू काहीं जाँड के तकलीफ काहे देते हया?”<sup>36</sup> जऊँ बात ऊँ पंचे कहत रहे हँय, ओही यीसु बहटिआइके, यहूदी सभाघर के मुखिया याईर से कहिन, “डेरा न, केबल बिसुआस करा।”<sup>37</sup> अउर यीसु पतरस अउर याकूब अउर याकूब के भाई यूहन्ना के अलाबा अउर कोहू काहीं अपने साथ नहीं लइगें।<sup>38</sup> यीसु यहूदी सभाघर के मुखिया के घर माहीं पहुँचिके, मनइन काहीं हल्ला मचाबत अउर मारे दुख के खुब रोबत-पीटत अउर चिल्लात देखिन।<sup>39</sup> तब यीसु घर के भीतर जाइके उनसे कहिन, “तूँ पंचे काहे हल्ला मचउते हया, अउर रोउते हया? बिटिया मरी नहिँ आय, उआ सोय रही हय।”<sup>40</sup> ऊँ पंचे यीसु के मजाक उड़ाँड लागें, पय यीसु सगलेन काहीं घर से बहिरे निकार दिहिन; केबल बिटिया के महतारी-बाप अउर अपने तिनहूँ चलन क साथ माहीं लइके भीतर गें, जहाँ उआ बिटिया परी रही हय।<sup>41</sup> अउर यीसु बिटिया के हाँथ पकड़िके ओसे कहिन, “तलीता कूमी!” जेखर मतलब हय “हे बिटिया हम तौहसे कहित हएन, उठा!”<sup>42</sup> अउर उआ बिटिया हरबिन उठिके चलँय-फिरँय लाग; काहेकि उआ बारा साल के रही हय। उआ बिटिया काहीं चलत-फिरत देखिके सगले जन चउआइगें।<sup>43</sup> पुनि यीसु उनाहीं पंचन काहीं चेताइके हुकुम दिहिन, इआ बात काहीं कोऊ जाने न पाबय, अउर कहिन, “इआ बिटिया काहीं कुछ खँड क द्या।”

### नासरत गाँव माहीं यीसु के अपमान

(मत्ती 13:53-58; लूका 4:16-30)

**6** याईर के घर से निकरिके यीसु अपने गाँव नासरत माहीं आएँ, अउर उनखर चेला लोग घलाय उनखे साथ माहीं गें।<sup>2</sup> पबित्र दिन काहीं यीसु सभाघर म जाइके परमातिमा के सँदेस सुनामँड लागें, तब खुब जने सुनिके चउआइगें, अउर आपस माहीं कहँड लागें, “इनाहीं ई ग्यान के बातँय कहाँ से मिली हँय? एतना कउन महान ग्यान आय जऊँ इनाहीं दीनगा हय? कइसन सामर्थ के काम इनखे हाँथन से होत हें? <sup>3</sup> का ई उहय बढई न होहीं, जऊँ मरियम के लड़िका? अउर याकूब, अउर योसेस, यहूदा अउर समौन के भाई आहीं? काहे इनखर बहिनी इहँय हमरे बीच माहीं नहीं रहतीं?” एसे ऊँ सगले गुस्साइके यीसु के ऊपर बिसुआस नहीं किहिन।<sup>4</sup> यीसु सभाघर के सगले जनेन से कहिन, “परमातिमा के सँदेस बतामँड बाले के, अपने गाँव अउर घर-परिवार काहीं छोंडिके अउर कहँव अपमान नहीं होय।”<sup>5</sup> यीसु उहाँ कउनव सामर्थ के काम नहीं किहिन, केबल कुछ बिमारन के ऊपर आपन हाँथ धइके उनाहीं नीक किहिन।

<sup>6</sup> अउर ऊँ पंचे यीसु के ऊपर बिसुआस नहीं किहिन, इआ कारन से यीसु बड़ा अचरज मानिन, अउर ऊँ अपने गाँव से निकरिके चारिव कइती के गाँमन माहीं जाइ-जाइके उपदेस देत रहिगें।

### बाराठे चलन काहीं पठउब

(मत्ती 10:5-15; लूका 9:1-6)

<sup>7</sup> यीसु बरहँव चलन काहीं अपने लघे बोलाइके, उनाहीं दुइ-दुइ कइके पठमँड लागें; अउर उनाहीं बुरी आत्मन काहीं निकारँड के अधिकार दिहिन।<sup>8</sup> अउर यीसु उनाहीं हुकुम दिहिन, कि “गइल के खातिर लाठी काहीं छोंडिके अउर कुछ न लिहा: न त रोटी, न झोरा, न बसनी माहीं पइसा, <sup>9</sup> पय पनहीं पहिर लिहा, अउर दुइ-दुइठे कुरथा न पहिन्या।”<sup>10</sup> अउर यीसु चलन से कहिन, “जहाँ-जहाँ तूँ पंचे कोहू के घर माँही जया, त जब तक उआ गाँव से बिदा न होया, तब तक उहय घर माहीं रहे अया।<sup>11</sup> जउने गाँव के मनई तौहई पंचन काहीं सोइकार न करँय, अउर परमातिमा के सँदेस न सुनँय, तब उहाँ से चलत समय उनखे अँगुअय, अपने गोड़न के धूधर झार दिहा, जउने परमातिमा के सँदेस माहीं बिसुआस न करँड के सजा के भागीदार उँइन होइहँय, इआ गबाही होई।”<sup>12</sup> तब ऊँ पंचे जाइके परमातिमा के सँदेस सुनामँड लागें, अउर मनइन से कहिन, “पाप करब छोंडिके अपने मन काहीं बदला।”<sup>13</sup> अउर ऊँ पंचे मनइन से खुब बुरी आत्मन काहीं निकारिन, अउर खुब बिमारन के ऊपर तेल लगाइके उनाहीं नीक किहिन।

### यूहन्ना बपतिस्मा देँड बाले के हत्या

(मत्ती 14:1-12; लूका 9:7-9)

<sup>14</sup> जब हेरोदेस राजा यीसु के कामन के चरचा सुनिन, काहेकि उनखे नाम के चरचा सगले राज माहीं फइलगे रही हय, तब हेरोदेस राजा कहिन, “यूहन्ना बपतिस्मा देँड बाले मरिके जि आए हँय, एहिन से यीसु के हाँथ से सामर्थ के काम होत हें।”<sup>15</sup> अउर कुछ जने कहँड लागें, “यीसु एलिय्याह आहीं, जउन मरिके जि आए हँय।” पय अउर कुछ जने कहँड लागें, “जऊँ पहिले परमातिमा के सँदेस बतामँड बाले रहे हँय, उनहिन म से एक जने जि आए हँय, काहेकि यीसु उनहिन कि नाई हें।”<sup>16</sup> हेरोदेस राजा सगलेन के बात सुनिके कहिन, “जउने यूहन्ना के हम मूँड कटबाय लिहेन तय, उँइन जि आए हँय।”<sup>17</sup> कुछ समय पहिले हेरोदेस राजा अपने भाई फिलिप्पुस के मेहेरिआ हेरोदियास के बात मानिके यूहन्ना काहीं पकड़िके जेल माहीं बंद करँड खातिर हुकुम दिहिन तय, काहेकि हेरोदेस राजा अपने भाई फिलिप्पुस के जिन्दय, ओखे मेहेरिआ हेरोदियास से काज कइके राख लिहिन तय।<sup>18</sup> काहेकि यूहन्ना हेरोदेस राजा से कइयक बेरी कहिन तय, कि “अपने भाई के जिन्दय ओखे मेहेरिआ काहीं राखब तोहई उचित नहिँ आय।”<sup>19</sup> इआ कारन से हेरोदियास यूहन्ना बपतिस्मा देँड बाले से दुसमनी रक्खत रही हय, अउर इआ चाहत रही हय, कि उनाहीं मरबाय डारी; पय अइसा कए नहीं पाबत रही,<sup>20</sup> काहेकि हेरोदेस राजा यूहन्ना काहीं धरमी, अउर पबित्र मनई जानिके, उनसे डेरात रहे हँय, अउर उनाहीं जिन्दा रक्खँड चाहत रहे हँय, अउर उनखे बातन काहीं सुनिके हेरोदेस राजा खुब डेरातव रहे हँय, पय बड़े खुसी से सुनत रहे हँय।

<sup>21</sup> पय हेरोदियास काहीं यूहन्ना से बदला लेँड क अच्छा मोका आइगा, जब हेरोदेस राजा अपने जनम दिन माहीं, सगले प्रधानन काहीं, अउर सेनापतिअन काहीं, अउर गलील प्रदेश के सगले बड़े मनइन काहीं बोलबाइके खॉय-पिअँड के प्रबन्ध किहिन।<sup>22</sup> तब हेरोदियास के बिटिया सभा के बीच माहीं भीतर आई, अउर नाचिके हेरोदेस राजा काहीं अउर उनखे साथ म बइठ सगले जनेन काहीं खुस कइ दिहिस। तब हेरोदेस राजा उआ बिटिया से कहिन, “तूँ जउन चाहा हमसे माँग ल्या, हम तोहई उआ जरूर देब।”<sup>23</sup> अउर सगलेन के आँगे हेरोदेस राजा कसम खाइन, “हम आपन आधा राज तक, जउन कुछ तूँ हमसे मगिहा, उआ हम तोहई दइ देब।”<sup>24</sup> उआ बिटिया बहिरे जाइके अपने महतारी हेरोदियास से पूँछिस, कि

“हम का मागी?” तब हेरोदियास कहिस, “यूहन्ना बपतिस्मा देंड बाले के मूँड कटबाइके माँग ल्या।” 25 उआ बिटिया तुरन्तय राजा हेरोदेस के लघे भीतर जाइके, उनसे बिनती कइके कहिस, “हम चाहित हएन, अपना अबहिनय यूहन्ना बपतिस्मा देंड बाले के मूँड कटबाइके, एकठे टठिया माहीं धइके हमहीं दइ देई।”

26 तब हेरोदेस राजा उआ बिटिया के बात सुनिके खुब दुखी भें, पय अपने कसम के कारन जउन सभा के आँगे खाइन तय, बिटिया के बात काहीं टार नहीं सकें। 27 अउर हेरोदेस राजा हरबिन अपने एकठे सिपाही काहीं बोलाइके हुकुम दिहिन, कि “यूहन्ना के मूँड काटिके लइ आबा।” 28 अउर तुरन्तय उआ सिपाही जेल म जाइके यूहन्ना के मूँड काटिके, एकठे टठिया माहीं धइके लइ आबा, अउर उआ बिटिया काहीं दइ दिहिस, अउर उआ बिटिया लइ जाइके, अपने महतारी हेरोदियास काहीं दइ दिहिस। 29 इआ खबर सुनिके यूहन्ना बपतिस्मा देंड बाले के चेला लोग उहाँ आएँ, अउर उनखे लहास काहीं लइ जाइके कब्र माहीं गाड़ दिहिन।

### चेलन के लउटब अउर एकान्त माहीं जाब

(मत्ती 14:13-14; लूका 9:10)

30 यीसु के खास चेला लोग यीसु के लघे आइके एकट्ठा भें, अउर जउन कुछुँ पंचे जाइके किहिन तय, अउर सिखाइन तय, पूरा हाल उनसे बताइन। 31 तब यीसु अपने चेलन से कहिन, “चला सबसे अलग होइके कउनव सुनसान जघा माहीं चली, जहाँ तूँ पंचे थोरी अराम कइल्या।” काहेकि यीसु के लघे मनई अउतय जात रहत रहे हँय, एसे उनहीं खाँड तक काहीं मोका नहीं मिलत रहा। 32 एसे यीसु अपने चेलन काहीं साथय लइके नाव म चढ़िके सुनसान जघा माहीं, भीड़ से अलग होइके चलेंगे।

### पाँच हजार मनइन काहीं खाना खबाउब

(मत्ती 14:15-21; लूका 9:11-17; यूहन्ना 6:1-14)

33 खुब जने उनहीं उआ सुनसान जघा माहीं जात देखिके पहिचान लिहिन, कि यीसु जात हें, अउर सगले गाँमन से निकरिके एकट्ठा होइके दउड़त उआ जघा माहीं यीसु के आमँड से पहिलेन पहुँचिगें। 34 जइसय यीसु नाव से उतरें, खुब बड़ी भीड़ देखिन, तब यीसु काहीं उनखे ऊपर बड़ी दया आइगे, काहेकि ऊँ पंचे, ऊँ गडरन कि नाई रहे हँय, जिनहीं कोऊ चरामँड बाला नहीं होय; अउर यीसु उनहीं परमातिमा के खुब बातन काहीं सिखामँड लागें।

35 जब साँझ होंड लाग, तब चेला लोग यीसु के लघे आइके कहँड लागें, “इआ सुनसान जघा ही, अउर साँझ होंड लाग ही। 36 इआ भीड़ के मनइन काहीं बिदा करी, जउने ऊँ पंचे चारिव कइती के गाँमन अउर मोहल्लन म जाइके, अपने खातिर खाना खरीद लेंय।” 37 यीसु अपने चेलन से कहिन, “तुहिन पंचे उनहीं खाँडका द्या।” तब चेला लोग यीसु से कहिन, “सगली भीड़ काहीं खबामँड के खातिर आठ महीना के मजूरी से रोटी खरीदँय परी, का हम पंचे आठ महीना के मजूरी से रोटी खरीदी, अउर इनहीं खबाई?” 38 यीसु उनसे कहिन, “जाइके देखा तोंहरे लघे केतनी रोटी हई?” ऊँ पंचे देखिके आएँ, अउर यीसु से बताइन, कि “पाँचठे रोटी अउर दुइठे मछरी हई।”

39 तब यीसु अपने चेलन काहीं हुकुम दिहिन, “सगले मनइन काहीं हरिअर चारा म पाँति-पाँति माहीं बइठाय द्या।” 40 तब सगले भीड़ के मनई सव-सव अउर पचास-पचास कइके पाँतिन माहीं बइठिगें। 41 तब यीसु ऊँ पाँचठे रोटी अउर दोनहूँ मछरिन काहीं लइके स्वरग कइती निहारिके धन्यबाद दिहिन, अउर रोटिन काहीं टोरि-टोरिके चेलन काहीं देत गें, कि ऊँ पंचे सगले मनइन काहीं परसँय, अउर ऊँ चेला सगले मनइन काहीं परस दिहिन, अउर यीसु ऊँ दोनहूँ मछरिन काहीं घलाय चेलन से परसबाइन। 42 जब सगली भीड़ के मनई खाइके संतुष्ट होइगें, 43 ओखे बादव चेला लोग खाए से बचे रोटिन के टुकड़न काहीं बारा टोपरी भरिके लइ आएँ, अउर कुछ टोपरी मछरिन से

भरी घलाय। 44 जउन भीड़ के मनई रोटी अउर मछरी खाइन तय, उनमा लड़िका-मेहेरिन काहीं छोंडे, पाँच हजार मंसेरुआ रहे हँय।

### पानी के ऊपर यीसु के रेंगब

(मत्ती 14:22-33; यूहन्ना 6:15-21)

45 तब यीसु हरबिन अपने चेलन काहीं नाव म चढ़ँड के खातिर मजबूर किहिन, कि ऊँ पंचे उनसे पहिले झील के दुसरे पार बैतसैदा गाँव माहीं चले जाँय, जब तक ऊँ भीड़ के मनइन काहीं बिदा करँय। 46 अउर यीसु भीड़ के मनइन काहीं बिदा कइके, एकठे पहार माहीं प्राथना करँड चलेगें। 47 जब साँझ होइगे तब चेलन के नाव झील के बीच माहीं रही हय, अउर यीसु अकेले भुँड म रहिगें तय। 48 जब यीसु देखिन कि चेला लोग नाव काहीं खेबत-खेबत खुब घबराइगें हँय, काहेकि तेज हवा उनखे बिपरीत चलत रही हय, तबहिनय यीसु भिनसरहय करीब तीन से छय बजे के बीच झील के पानी माहीं रेंगत उनखे लघे आएँ, अउर उनसे आँगे निकर जाँड चाहत रहे हँय। 49 पय चेला लोग यीसु काहीं झील के पानी माहीं रेंगत देखिके समझिन, उआ भूत आय, अउर डेरन के मारे चिल्लाय उठें, 50 काहेकि सगले जने यीसु काहीं अपनी कइती आबत देखिके खुब डेराइगें तय, पय यीसु तुरन्तय उनसे बात किहिन अउर कहिन, “हिम्मत बाँधा: हम आहेन; डेरा न!” 51 तब यीसु उनखे लघे आइके नाव माहीं चढ़िगें, अउर हवा बन्द होइगे; इआ सगला देखिके चेला लोग चउआन रहिगें। 52 ऊँ चेला लोग पाँचठे रोटी अउर दुइठे मछरी के बारे माहीं देखिव के नहीं समझे पाइन, कि यीसु माहीं केतनी सक्ती हय, काहेकि उनखर दिल कठोर होइगें तय।

### गन्नेसरत प्रदेस माहीं रोगिन काहीं नीक करब

(मत्ती 14:34-36)

53 ऊँ पंचे झील के दुसरे पार गन्नेसरत प्रदेस माहीं पहुँचे, अउर नाव घाट माहीं लगाइन। 54 जब यीसु अउर उनखर चेला लोग नाव से उतरें, तब उहाँ के मनई तुरन्तय यीसु काहीं पहिचान लिहिन। 55 अउर आस-पास के सगले गाँमन माहीं कुछ जने दउड़त गें, अउर बिमारन काहीं खटिया म पराइके जहाँ-जहाँ खबर पाइन कि यीसु हें, उहाँ लइ-लइके पहुँच जात रहे हँय। 56 यीसु जहाँ-जहाँ गाँमन अउर सहरन अउर मोहल्लन माहीं जात रहे हँय, तब खुब मनई बजारन तक माहीं बिमारन क खटिया समेत धइके, यीसु से चरउरी कइके कहँड लागत रहे हँय, कि अपना आपन ओन्हा के एकठे छोरव काहीं बिमारन क छुइ लेंड देई: अउर जेतने बिमार यीसु काहीं छुअत रहे हँय, ऊँ सगले नीक होइ जात रहे हँय।

### पूरबजन के बनाए नेमन के पालन

(मत्ती 15:1-9)

7 तब फरीसी लोग अउर मूसा के बिधान सिखामँड बाले कुछ जने, जउन यरूसलेम सहर से आए रहे हँय, यीसु के लघे एकट्ठा भें, 2 अउर ऊँ पंचे यीसु के कुछ चेलन काहीं असुद्ध हाँथन से अरथात यहूदी बिधान के मुताबिक बिना हाँथ धोए खाना खात देखिन। 3 काहेकि यहूदी लोग अउर खास करके फरीसी लोग, अपने पुरखन के बनाए रीति-रिबाजन के पालन करत हें, अउर जब तक यहूदी रीति के मुताबिक निकहा से हाँथ नहीं धोय लेंय, तब तक खाना नहीं खाँय; 4 अउर बजार से आइके, जब तक नहाय नहीं लेंय, तब तक खाना नहीं खाँय, एखे अलाबव अउरव खुब बातँय हई जिनहीं मानँड काहीं बताबा ग हय, जइसन खोरबन अउर लोटबन अउर तामे के बरतनन काहीं धोमँड माजँय चाही।

5 एसे फरीसी लोग अउर मूसा के बिधान सिखामँड बाले यीसु से पूँछिन, “अपना के चेला लोग बाप-दादन के रीति-रिबाजन काहीं काहे नहीं मानँय, बिना हाँथ धोए खाना खात हें?” 6 यीसु उनसे कहिन, “यसायाह नबी तोंहरे कपटिन के बारे माहीं बेलकुल ठीक भबिस्सबानी किहिन हीं, जइसा पबित्र सास्त्र माहीं लिखव हय:

‘ई पंचे मुँहे से त हमार मान-सम्मान करत हें, पय अपने मन से हमार मान-सम्मान नहीं करँय।

7 ई पंचे देखावटी हमार अराधना करत हें, काहेकि मनइन के बनाए नेमन काहीं पबित्र सास्त्र के नेम बताइके सिखावत हें †।

8 काहेकि तूँ पंचे परमातिमा के हुकुम काहीं छोड़िके मनइन के बनाए रीति-रिबाजन काहीं मनते हया।”

9 यीसु उनसे कहिन, “तूँ पंचे अपने रीति-रिबाजन काहीं मानँइ के खातिर, परमातिमा के हुकुम के कइसन पूरी तरह उलंघन कइ देते हया! 10 काहेकि मूसा नबी तौहसे कहिन हीं, कि ‘अपने महतारी-बाप के मान-सम्मान किहा’, अउर ‘जे कोऊ अपने महतारी-बाप के अपमान करय, त ओही जरूर मारि डारा जाय।’ 11 पय तूँ पंचे कहते हया, कि अगर कोऊ अपने महतारी-बाप से कहय, कि ‘जउन कुछ फायदा तोहई हमसे मिल सकत रहा हय, ओही हम परमातिमा काहीं भेंट चढ़ाय दिहेन हय’, 12 तूँ पंचे उआ मनई से इआमेर कह बाइके, ओही अपने महतारी-बाप के कुछ सेबा नहीं करँइ देते आह्या।

13 इआमेर से तूँ पंचे अपने रीति-रिबाजन काहीं मनते हया, अउर परमातिमा के बचन काहीं मानब छोड़ि देते हया, अउर एहिनतर के अउरव खुब काम करते हया।”

### मनई काहीं असुद्ध करँइ बाली बातँय

(मत्ती 15:10-20)

14 तब यीसु सगले मनइन काहीं अपने लघे बोलाइके कहिन, “तूँ पंचे हमरे बातन काहीं सुना, अउर समझा: 15 अइसन कउनव चीज नहीं आय, जऊँ मनई के मुहें से पेटे के भीतर जाइके, ओही असुद्ध कइ देय; पय जउन बातँय मनई के भीतर से निकरती हई, केबल उँइन ओही परमातिमा के नजर माहीं असुद्ध करती हई।” 16 (“जेखर सुनँय के मन होय, उआ बड़े ध्यान से सुन लेय।”) 17 जब यीसु भीड़ से निकरिके एकठे घर माहीं चलेगें, तब चेला लोग यीसु के लघे आइके इआ उदाहरन के मतलब पूँछँइ लागें। 18 तब यीसु चलन से कहिन, “का तुहें पंचे नदान हया? काहे तूँ पंचे इआ नहीं जन त्या, कि जउन चीज बहिरे से मनई के भीतर जात ही, उआ मनई काहीं असुद्ध नहीं कइ सकय? 19 काहेकि उआ चीज मनई के मन म नहीं, पेटे माहीं जात ही, अउर टट्टी से निकर जात ही।” इआ बात कहिके यीसु सगली खाँइ बाली चीजन काहीं सुद्ध ठहराइन। 20 पुनि यीसु कहिन, “जउन मनई के भीतर से अरथात मन से निकरत हय, उहय मनई काहीं परमातिमा के नजर माहीं असुद्ध करत हय। 21 काहेकि मनई के देह के भीतर से अरथात मन से, घिनहे-घिनहे बिचार, ब्यभिचार करब, चोरी करब, कतल करब, दुसरे के मेहेरिआ से नजायज सम्बन्ध रक्खब, 22 लालच करब, दुस्तता करब, छल करब, लुच्चई करब, बुरी नजर से देखब, दुसरे के बुराई करब, घमन्ड करब, अउर मुरखई के बातँय निकरती हई। 23 ई सगली बुरी बातँय मनई के भितरय से निकरती हई, अउर मनई काहीं परमातिमा के नजर माहीं असुद्ध करती हई।”

### यूनानी जात के मेहेरिआ के बिसुआस

(मत्ती 15:21-28)

24 पुनि यीसु उआ घर से उठिके सूर अउर सैदा प्रदेसन म आइके एकठे घर माहीं गें, अउर उँ चाहत रहे हँय, कि इहाँ के कउनव मनई न जाने पामँय। कि हम इहाँ हएन; पय कुछ जने जानिगें कि यीसु इआ घर माहीं हें। 25 अउर हरबिन एकठे मेहेरिआ जउने के छोट बिटिया माहीं बुरी आत्मा सकान रही हय, उआ यीसु के चरचा सुनिके उनखे लघे आई, अउर उनखे गोड़ेन माहीं गिर परी, 26 उआ मेहेरिआ यूनानी जात अउर सीरिया देस के फिनीकी प्रदेस के रही हय, उआ यीसु से बिनती कइके कहँइ लाग कि “अपना हमरे बिटिया से बुरी आत्मा काहीं निकार देई।” 27 यीसु ओखे बिसुआस काहीं देखँइ के खातिर कहिन, “पहिले लड़िकन काहीं पेट भर

खाय लेंइ ह्या, काहेकि लड़िकन के रोटी लइके कुकुरन † के आँगे डारब उचित नहीं आय।” 28 तब उआ मेहेरिआ यीसु से कहँइ लाग, “हे प्रभू जऊँ अपना कहेन बेलकुल सही हय; तऊ लड़िकन के खाए से मेज के नीचे जऊँ चुरकुन गिरत हें, ओही कुकुरव खाय लेथें।” 29 यीसु ओसे कहिन, “अपने बिसुआस के इआ बात के कारन तूँ अपने घरय चली जा, बुरी आत्मा तौहरे बिटिया से निकरिगे ही।” 30 उआ मेहेरिआ अपने घर माहीं पहुँचिके देखिस, कि बिटिया खटिया माहीं नीक-सूख परी हय, अउर बुरी आत्मा निकरिगे ही।

### बहिर गूँगा मनई काहीं नीक करब

31 पुनि यीसु सूर अउर सैदा देसन से निकरिके दिकापुलिस प्रदेस से होइके गलील प्रदेस के झील के लघे पहुँचिगें। 32 तब कुछ जने यीसु काहीं देखिन, अउर एकठे मनई काहीं जऊँ बहिर अउर गूँगा रहा हय, यीसु के लघे लइआइके बिनती किहिन, कि अपना आपन हाँथ ओखे ऊपर धइ देई, जउने उआ नीक होइ जाय। 33 तब यीसु उआ मनई काहीं भीड़ से अलग लइ जाइके, ओखे कान माहीं आपन अँगुरी डारिन, अउर थूँकिके ओखे जीभ क छुइन; 34 अउर स्वरग कइती निहारिके आँह भरिन, अउर उआ मनई से ओखे भाँसा माहीं कहिन, “इप्फत्तह!” अरथात “खुलिजा!” 35 तबहिनय उआ मनई काहीं सुनँय लाग, अउर ओखे जीभ के गौँठ खुलिगे, अउर उआ निकहा से बोलँइ लाग। 36 तब यीसु उँ मनइन काहीं चेताइके कहिन, कि इआ बात कोहू से न कहा; पय जेतनय उँ उनहीं चेताइन तय, ओतनय उँ पंचे अउर प्रचार करँइ लागें। 37 उँ पंचे अचरज मानिके कहँइ लागें, “यीसु जऊँ कुछ करत हें, सब निकहय करत हें; इहाँ तक कि यीसु बहिरन काहीं सुनँय के, अउर गूँगन काहीं बोलँइ के सक्ती देत हें।”

### चार हजार मनइन काहीं खबाउब

(मत्ती 15:32-39)

8 उन दिनन माहीं जब पुनि खुब भीड़ एकट्ठा होइगे, अउर उनखे लघे कुछ खाँइ क नहीं रहा, तब यीसु अपने चलन काहीं लघे बोलाइके उनसे कहिन, 2 “हमहीं इआ भीड़ के मनइन के ऊपर बड़ी दया आबत ही, काहेकि ई पंचे तीन दिना से हमरे साथ हें, अउर इनखे लघे खाँय के खातिर कुछ हइअव नहीं आय। 3 अगर हम इनहीं भूँखेन घर पठय देई, त ई पंचे बिहोस होइके गइलय माहीं परे रहि जइहँय, काहेकि इआ भीड़ म से कुछ मनई खुब दूरी से आए हँय।” 4 तब चेला लोग यीसु काहीं जबाब दिहिन, “इहाँ सुनसान जघा माहीं एतनी रोटी हम पंचे कहाँ से लइ अई, कि इआ सगली भीड़ के मनई खाइके संतुस्त होइ जाँय?” 5 तब यीसु अपने चलन से पूँछिन, “तौहरे लघे केतनी रोटी हई?” चेला लोग कहिन, कि “सातठे।”

6 तब यीसु सगले जनेन काहीं भूँइ माहीं बइठँय के हुकुम दिहिन, अउर यीसु उँ सातव रोटिन काहीं हाँथे म लइके, परमातिमा काहीं धन्यवाद दइके टोरिन, अउर अपने चलन काहीं देत गें, कि सगले जनेन काहीं परसँय, अउर उँ पंचे सगले मनइन के आँगे परस दिहिन। 7 अउर उनखे लघे कुछ छोट-छोट मछरिव रही हँय, यीसु उँ मछरिन काहीं लइके परमातिमा काहीं धन्यवाद दिहिन, अउर उनहूँ काहीं परसँय के खातिर चलन काहीं हुकुम दिहिन, कि सगले मनइन के आँगे परस देंय। 8 इआमेर से सगले मनई खाइके संतुस्त होइगें। अउर ओखे बाद चेला लोग, बँचे टुकड़न से सात टोपरी भरिके उठाइन। 9 अउर खाँइ बाले चार हजार के करीब रहे हँय; ओखे बाद यीसु भीड़ के सगले मनइन काहीं बिदा किहिन। 10 अउर यीसु तुरन्तय अपने चलन के साथ नाव माहीं चढ़िके, दलमनूता प्रदेस म चलेगें।

† यहूदिन के तुलना लड़िकन से कीन गे ही अउर दुसरे जात के मनइन के तुलना कुकुरन से कीन गे ही।



### फरीसी लोगन के यीसु काहीं जाँचब

(मत्ती 16:1-4)

11 पुनि फरीसी लोग आइके यीसु से बाद-बिबाद करँइ लागें, अउर यीसु के परिच्छा लेंइ के खातिर उनसे स्वरग के अदभुत चिन्हारी देखाँइ क कहँइ लागें। 12 यीसु अपने आत्मा माहीं खुब दुखी होइके कहिन, “इआ समय के मनई काहे बिसुआस नहीं करँय, अदभुत चिन्हारी देखँइ चाहत हें? हम तौहसे सही कहित हएन, कि इआ समय के मनइन काहीं कउनव अदभुत चिन्हारी न देखाई जई।” 13 अउर यीसु उनहीं छोड़िके पुनि नाव माहीं चढ़िके झील के दुसरे पार चलेगें।

### चेलन काहीं समझाउब

(मत्ती 16:5-12)

14 चलत समय चेला लोग रोटी लेंइ क बिसरिगें तय, अउर नाव माहीं उनखे लघे एकठेरिन रोटी रही हय। 15 यीसु अपने चेलन काहीं चेताइन, कि “देखा, फरीसी लोगन के खमीर अउर हेरोदेस राजा के खमीर से सतरक रह्या।” 16 इआ सुनिके चेला लोग आपस माहीं सोच-बिचार कइके कहँइ लागें, कि “हमरे लघे रोटी त नहिं आय।” 17 इआ जानिके यीसु उनसे कहिन, “तूँ पंचे आपस माहीं काहे इआ सोच-बिचार करते हया, कि हमरे लघे रोटी नहिं आय? का तूँ पंचे अबय तक नहीं जाने समझे पाया? का तौहार पंचन के मन एतना कठोर होइगा हय? 18 काहे तूँ पंचे अपने आँखिन से नहीं देख्या? अउर अपने कानन से नहीं सुन्या? काहे तोहई सुध नहिं आय? 19 कि जब हम पाँच हजार मनइन के खातिर पाँचठे रोटी टोरेन तय, त तूँ पंचे रोटी के टुकड़न से केतनी टोपरी भरिके उठाय तय?” तब चेला लोग उनसे कहिन, “बारा टोपरी।” 20 अउर “जब चार हजार मनइन काहीं खबामँइ के खातिर सातठे रोटी रही हँय, तब तूँ पंचे रोटी के टुकड़न से केतनी टोपरी भरिके उठाय तय?” चेला लोग कहिन, “सात टोपरी।” 21 यीसु अपने चेलन से कहिन, “काहे तूँ पंचे अबहिनव तक नहीं समझे पाया?”

### बैतसैदा गाँव माहीं एकठे आँधर मनई काहीं नीक करब

22 यीसु अपने चेलन के साथ बैतसैदा गाँव माहीं आएँ, तब कुछ जने एकठे आँधर मनई काहीं यीसु के लघे लइ आएँ अउर यीसु से चरउरी कइके कहिन, कि “अपना इआ आँधर मनई क छुड़ देई त नीक होइ जाय।” 23 यीसु उआ आँधर मनई के हाँथ पकड़िके गाँव से बहिरे लइगें, अउर ओखे आँखिन माहीं आपन थूँक लगाइके ओखे ऊपर आपन हाँथ धरिन अउर ओसे पूँछिन, “का तूँ कुछ देखते हया?” 24 उआ मनई चारिव कइती निहारिके कहिस, “हम मनइन काहीं देखित हएन, जउन हमहीं रंगत बिरबन कि नाई देखात हें।” 25 तब यीसु दुबारा ओखे आँखिन माहीं आपन हाँथ धरिन, अउर उआ आँधर मनई बड़े ध्यान से देखिस, काहेकि उआ नीक होइगा तय, अउर ओही सब कुछ साफ-साफ देखँइ लाग। 26 यीसु उआ आँधर मनई से इआ कहिके घर पठय दिहिन, “तूँ इआ गाँव के भीतर न जाया।”

### पतरस यीसु काहीं मसीह सोइकार किहिन

(मत्ती 16:13-20; लूका 9:18-21)

27 यीसु अपने चेलन के साथ कैसरिया प्रदेस के फिलिप्पी सहर के लघे के गाँव माहीं चलेगें। गइल म यीसु अपने चेलन से पूँछिन, “लोग हमहीं का कहत हें?” 28 तब चेला लोग कहिन, कि “कुछ मनई यूहन्ना बपतिस्मा देँइ बाला, त कुछ जने एलिय्याह नबी, त अउर कुछ जने इआ कहत हें, परमातिमा के सँदेस बताँइ बालेन म से एक जने जि आबा हय।” 29 इआ सुनिके यीसु अपने चेलन से पूँछिन, “पय तूँ पंचे हमहीं का कहते हया?” पतरस यीसु से कहिन, “अपना मसीह आहैन।” 30 तब यीसु अपने चेलन

काहीं चेताइके कहिन, कि “तूँ पंचे हमरे बारे माहीं, इआ बात कोहू से न बताया।”

### अपने मउत के बारे माहीं यीसु के भबिस्सबानी

(मत्ती 16:21-23; लूका 9:22)

31 तब यीसु अपने चेलन काहीं बताँइ लागें, कि “मनई के लड़िका के खातिर इआ जरूरी हय, कि उआ खुब दुख सही, अउर यहूदी धारमिक अँगुआ लोग अउर प्रधान याजक लोग अउर मूसा के बिधान सिखामँइ बाले, ओही अपने बनाए नेम के बिरोधी मानिके मारि डरिहँय, अउर उआ तिसरे दिन जिन्दा होइ जई।” 32 यीसु इआ बात काहीं अपने चेलन से बेलकुल साफ-साफ कहि दिहिन। इआ बात सुनिके पतरस यीसु काहीं अलग लइ जाइके डाँटँइ लाग। 33 पय यीसु पीछे मुड़िके अपने चेलन कइती देखिके, पतरस काहीं दपटिके कहिन, “हे सइतान, हमरे आँगे से दूरी होइजा; काहेकि तँय परमातिमा के बातन माहीं नहीं, बलकिन मनइन के बातन माहीं मन लगउते हए।”

### यीसु के पीछे चलँइ के मतलब

(मत्ती 16:24-28; लूका 9:23-27)

34 यीसु भीड़ के मनइन अउर अपने चेलन काहीं लघे बोलाइके कहिन, “जे कोऊ हमरे पीछे आमँइ चाहय, उआ अपने मन के मुताबिक जिअब छोड़िके, हरेक दिन अपने सब दुख तकलीफन काहीं सहिके जऊँ कूस के बराबर हें, हमरे पीछे चलय। 35 काहेकि जे कोऊ आपन प्रान बचामँइ चाही, उआ ओही गमाय देई, अउर जे कोऊ आपन प्रान हमरे खातिर अउर खुसी के खबर के खातिर गमाय देई, उआ ओही बचाए पाई। 36 अगर कउनव मनई सगले संसार के मालिक होइ जाय, अउर आपन प्रान गमाय देय, त ओही का फायदा होई? 37 अउर मनई आपन प्रान बचामँइ के बदले माहीं का दइ सकत हय? 38 जे कोऊ इआ ब्यभिचारी अउर पापी पीढ़ी के मनइन के आँगे, हमसे अउर हमरे बातन काहीं मानँइ से लजई, त मनई के लड़िका घलाय, जब उआ पबित्र दूतन के साथ अपने पिता परमातिमा के महिमा सहित अई, तब उहव ओही आपन मानँय से लजई।”

9 यीसु, चेलन से कहिन, “हम तौहसे सही कहित हएन, कि जऊँ इहाँ ठाढ़ हें, उनमा से कुछ जने अइसन हें, कि जब तक परमातिमा के राज काहीं पूरी सामर्थ समेत आबत न देख लेइहँय, तब तक ऊँ पंचे बेलकुल न मरिहँय।”

### यीसु के रूप बदलब

(मत्ती 17:1-13; लूका 9:28-36)

2 छय दिना के बाद यीसु, पतरस अउर याकूब अउर यूहन्ना काहीं अपने साथ माहीं लइके, एकान्त माहीं कउनव ऊँच पहार माहीं गें। अउर उनखे अँगुअय यीसु के रूप बदलिया। 3 अउर यीसु के ओन्हा अइसन चमकँइ लाग, अउर एतना उजर होइगा, कि सगली धरती माहीं कउनव धोबी घलाय उआमेर उजर नहीं कइ सकय। 4 अउर तिनहूँ चेलन काहीं मूसा नबी के साथ एलिय्याह देखाने, ऊँ दोनव जने यीसु के साथ बातँय करत रहे हँय। 5 इआ देखिके पतरस यीसु से कहिन, “हे गुरू, हमार पंचन के इहाँ रहब निकहा हय; एसे हम पंचे इहाँ तीनठे मइइआ बनाई; एकठे अपना के खातिर, एकठे मूसा नबी के खातिर, अउर एकठे एलिय्याह नबी के खातिर।” 6 काहेकि पतरस इआ नहीं जाने पाबत रहे आँय, कि हम उनसे का कही, एसे कि ऊँ पंचे खुब डेराइगें रहे हँय। 7 तबहिनय एकठे उजर बदरी आइके उनहीं पंचन काहीं लुकाय लिहिस, अउर उआ बदरी से इआ बोल सुनान: कि “ई हमार पियार लड़िका आहीं, तूँ पंचे इनखे बातन काहीं मान्या।” 8 तब ऊँ पंचे अचानक चारिव कइती निहारँइ लागें, अउर यीसु के अलाबा अउर कोहू काहीं अपने साथ नहीं देखिन।

9 पहार से नीचे उतरत समय, यीसु उनकी हुकुम दिहिन, कि जब तक मनई के लड़िका मरिक्के जिन्दा न होइ जाय, तब तक जऊँ कुछू तूँ पंचे देखे हया, उआ कोहू से न बताया। 10 तिनहूँ चेला इआ बात काहीं याद रक्खिन; अउर कोहू से नहीं कहिन, पय आपस माहीं सोच-बिचार करँइ लागें, कि “मरेन म से जि उठँइ के का मतलब होइ सकत हय?” 11 अउर ऊँ पंचे यीसु से पूँछिन, कि “मूसा के बिधान सिखामँइ बाले इआ काहे कहत हें, कि मसीह से पहिले एलिय्याह नबी जरूर अइहँय?” 12 तब यीसु उनकी पंचन काहीं जबाब दिहिन, कि “एलिय्याह नबी जरूर अइहँय, अउर मसीह काहीं सोइकार करँइ के खातिर, मनइन काहीं तइआर करिहँय, पय मनई के लड़िका के बारे माहीं, पबित्र सास्त्र म इआ काहे लिखा हय, कि उआ खुब दुख सही; अउर तुच्छ गिना जई? 13 पय हम तौहसे कहित हएन, कि वास्तव माहीं एलिय्याह त आय चुके हँय, अउर उनखे बारे माहीं पबित्र सास्त्र म लिखा हय, कि परमातिमा के सँदेस काहीं न मानँइ बाले लोग, जइसन चाहिन उनखे साथ उहइमेर बरताव किहिन।”

### बुरी आत्मा से परेसान लड़िका काहीं नीक करब

(मत्ती 17:14-21; लूका 9:37-43)

14 जब यीसु पहार से उतरिके चलन के लघे आएँ, त देखिन कि उनखे चारिव कइती बड़ी भीड़ लगी हय, अउर मूसा के बिधान सिखामँइ बाले उनसे बहँस कइ रहे हँय। 15 यीसु काहीं देखतय सगले जन चउआन रहिहें, कि यीसु कहाँ से आइगें, अउर उनखे कइती दउड़िके नबस्कार किहिन। 16 यीसु मूसा के बिधान सिखामँइ बालेन से पूँछिन, “तूँ पंचे हमरे चलन से काहे बिबाद करते हया?” 17 भीड़ म से एकठे मनई उनकी जबाब दिहिस, “हे गुरू, हम अपने लड़िका काहीं, जउने म गूँगी आत्मा सकान ही, अपना के लघे लइ आएन तय। 18 जहँइठे गूँगी आत्मा ओही पकड़त ही, ओहिनठे ओही पटक देत ही: अउर ओखे मुँहे म फेन भरि आबत हय, अउर खुब दाँत पीसत हय, अउर उआ झुरान जात हय, हम अपना के चलन से कहने कि उआ गूँगी आत्मा काहीं निकार देई, पय ऊँ पंचे नहीं निकारे पाइन।” 19 इआ बात सुनिके यीसु उनकी जबाब दइके कहिन, “हे परमातिमा के ऊपर बिसुआस न करँइ बाले हठी मनइव, हम कब तक तौहरे साथ रहब, अउर कब तक तौहार सहत रहब? उआ लड़िका काहीं हमरे लघे लइ आबा।” 20 तब ऊँ पंचे उआ लड़िका काहीं यीसु के लघे लइ आएँ। अउर जइसय उआ गूँगी आत्मा यीसु काहीं देखिस, तुरन्तय उआ लड़िका काहीं मुरेर के भुँइ म पटक दिहिस, अउर उआ मुँहे माहीं फेन बहाए लोटँय लाग। 21 यीसु उआ लड़िका के बाप से पूँछिन, “इआ लड़िका के इआ हालत कब से ही।” लड़िका के बाप कहिस, “बचपन से।” 22 अउर लड़िका के बाप यीसु से कहँइ लाग, “इआ गूँगी आत्मा लड़िका काहीं मारँइ के खातिर, कबहूँ आगी म, त कबहूँ पानी म पटक देत ही; पय अगर अपना कुछू कइ सकी त हमरे ऊपर तरस खाइके हमार मदत करी।” 23 इआ सुनिके यीसु उआ लड़िका के बाप से कहिन, “अगर अपना कुछू कइ सकी? इआ कउनव बात आय! जे कोऊ परमातिमा के ऊपर बिसुआस करत हय, ओखे खातिर सब कुछ होइ जात हय।” 24 लड़िका के बाप हरबिन गिड़गिड़ाइके यीसु से कहिस, “हे प्रभू, हम अपना के ऊपर बिसुआस करित हएन, हमरे ऊपर किरपा करी, कि हम पूरे मन से बिसुआस कइ सकी।” 25 जब यीसु देखिन कि खुब मनई दउड़-दउड़िके भीड़ लगाए लेथें, तब यीसु बुरी आत्मा काहीं इआ कहिके डाँटिन, “हे गूँगी-बहिरी आत्मा, हम तोही हुकुम देइत हएन, कि इआ लड़िका से निकर जा, अउर एखे भीतर पुनि कबहूँ न सकए।” 26 तबहिन उआ बुरी आत्मा चिल्लाइके, उआ लड़िका काहीं खुब मुरेरिके निकरिगे; अउर उआ लड़िका मरा कि नाई परा रहिगा। उहाँ ठाढ़ कुछ मनई कहँइ लागें, कि लागत हय लड़िका मरिगा। 27 पय यीसु उआ लड़िका के हाँथ पकड़िके उठाइन त उआ ठाढ़ होइगा। 28 जब यीसु उहाँ से लउटिके घर म आएँ, तब उनखर चेला लोग अकेले माहीं उनसे पूँछिन, “हम पंचे उआ बुरी आत्मा काहीं काहे नहीं निकारे पाएन?” 29 यीसु अपने चलन से कहिन,

“इआमेर के गूँगी आत्मा परमातिमा से प्राथना करँइ के अलाबा, अउर कउनव उपाय से नहीं निकारी जाय सकय।”

### अपने मउत के बारे माहीं यीसु के पुनि भबिससबानी

(मत्ती 17:22-23; लूका 9:43-45)

30 यीसु अपने चलन के साथ उआ घर से चल दिहिन, अउर गलील प्रदेश से होइके जात रहे हँय! यीसु इआ चाहत रहे हँय, कि कोऊ जाने न पामय कि ऊँ कहाँ जाथें। 31 काहेकि यीसु अपने चलन काहीं परमातिमा के सँदेस के बातन काहीं सिखाबत रहे हँय, अउर उनसे कहत रहे हँय, कि “मनई के लड़िका, बिरोध करँइ बाले मनइन के हाँथ माहीं पकड़ाबा जई, अउर ऊँ पंचे ओही मारि डरिहँय, अउर उआ मरिक्के तीन दिन बाद पुनि जिन्दा होइ जई।” 32 पय यीसु के इआ बात चलन के समझ माहीं नहीं आई, अउर ऊँ पंचे यीसु से पूँछँइ माहीं डेरात रहे हँय।

### सबसे बड़ा को हय?

(मत्ती 18:1-5; लूका 9:46-48)

33 पुनि यीसु अपने चलन के साथ कफरनहूम सहर म पहुँचिके; एकठे घर माहीं आइके अपने चलन से पूँछिन, “गइल म तूँ पंचे कउने बात माहीं बहँस करत रहे हया?” 34 ऊँ पंचे कुछू नहीं बोले, काहेकि गइल माहीं चेला लोग आपस माहीं इआ बहँस करत रहे हँय, कि हमरे पंचन म से सबसे बड़ा को हय? 35 तब यीसु बइठिके बरहँव चलन काहीं अपने लघे बोलाइन, अउर उनसे कहिन, “अगर कोऊ सगलेन से बड़ा होंइ चाहत हय, त उआ सगलेन से छोट अउर सगलेन के सेबा करँइ बाला बनय।” 36 अउर यीसु एकठे छोट क लड़िका काहीं लइके सगलेन के बीच माहीं ठाढ़ किहिन, अउर पुनि उआ लड़िका काहीं अपने पलथी माहीं बइठाइके उनसे कहिन, 37 “जे कोऊ हमरे नाम से इआमेर के लड़िकन म से कउनव एकठे काहीं सोइकार करत हय, त उआ हमहीं सोइकार करत हय, अउर जे कोऊ हमहीं सोइकार करत हय, उआ हमहिन भर क नहीं, बलकिन हमहीं पठमँइ बाले परमातिमा काहीं सोइकार करत हय।”

### जउन बिरोध माहीं नहीं आय उआ अपने कइती हय

(लूका 9:49-50)

38 तब यूहन्ना यीसु से कहिन, “हे गुरू, हम पंचे एकठे मनई काहीं अपना के नाम से बुरी आत्मन काहीं मनइन म से निकारत देखेन, त हम ओही बरजेन कि तूँ अइसा न करा, काहेकि उआ मनई हमरे पीछे नहीं आबत रहा आय।” 39 यीसु यूहन्ना से कहिन, “उआ मनई काहीं न बरजा; काहेकि अइसा कउनव मनई नहीं आय, जऊँ हमरे नाम से सामर्थ के काम करय, अउर हरबिन हमहीं बुरा कहि सकय, 40 काहेकि जे कोऊ हमरे बिरोध म नहीं आय, उआ हमरिन कइती हय। 41 जे कोऊ एक गिलास पानी तोहई इआ जानिके पिआई, कि तूँ पंचे मसीह के चेला आह्या, त हम तौहसे सही कहित हएन, कि उआ मनई ओखर प्रतिफल जरूर पाई।”

### जे कोऊ दुसरे से पाप कराबत हय

(मत्ती 18:6-9; लूका 17:1-2)

42 यीसु अपने चलन से कहिन, “जे कोऊ हमरे ऊपर बिसुआस करँइ बालेन काहीं, चाह उआ छोट क लड़िकय होय, कउनव से पाप कराबत हय, त उआ मनई के खातिर इआ ठीक कहाई, कि एकठे बड़ी काहीं चक्की के जेतबा ओखे गरे माहीं बाँधिके, समुद्र माहीं फेंक दीन जाय, काहेकि परमातिमा के सजा एहू से जादा मिली। 43 अगर तौहार हाँथ तौहसे पाप करामँइ के कारन बनत हय, त तूँ अपने हाँथ काहीं काटि डारा, बिना हाँथ के स्वरगराज माहीं जाब, दोनव हाँथन काहीं लए, नरक के आगी माहीं डारे जाँइ से निकहा हय, जउन कबहूँ बुझातिन नहीं आय। 44 (जहाँ उनखर किरबा कबहूँ नहीं मरँय, अउर न कबहूँ ओखर आगिन बुझाय।) 45 अगर

तोंहार गोड़ तोंहसे पाप करामँड के कारन बनत हय, त तूँ ओही काटि डारा, बिना गोड़ के स्वरगराज माहीं जाब, नरक के आगी माहीं डारे जाँड से निकहा हय, <sup>46</sup> (जहाँ उनखर किरबा कबहूँ नहीं मरँय, न कबहूँ ओखर आगिन बुझाय।) <sup>47</sup> अउर अगर तोंहार आँखी तोंहसे पाप करामँड के कारन बनत ही, त ओही निकारिके फेंकि द्या; नहीं त दुइठे आँखी लए नरक के आगी माहीं डार दीन जइहा। कनमा होइके परमातिमा के राज माहीं जाब तोंहरे खातिर एसे निकहा हय।" <sup>48</sup> (जहाँ उनखर किरबा कबहूँ नहीं मरँय, न कबहूँ ओखर आगिन बुझाय।) <sup>49</sup> काहेकि हरेक मनई आगी से नोन कि नाई सुद्ध कीन जई †। †<sup>50</sup> नोन त निकहा होत हय, पय अगर ओखर सखरई खतम होइ जाय, त दुबारा ओही कउनव चीज से सखार नहीं कीन जाय सकय। इहइमेर अपने भीतर नोन कि नाई गुन रक्खा, अउर एक दुसरे के साथ मिल-जुलिके रहा।

### छोड़-छुट्टी करँड के बारे माहीं यीसु के सिच्छा

(मत्ती 19:1-12; लूका 16:18)

**10** पुनि यीसु कफरनहूम सहर से निकरिके, यहूदिया प्रदेश के सरहद्दी माहीं यरदन नदी के दुसरे पार आइगें, तबहिनय यीसु के लघे पुनि भीड़ एकट्ठा होइगे, अउर यीसु अपने रीत के मुताबिक पुनि भीड़ के मनइन काहीं उपदेस देई लागें।

<sup>2</sup> तब फरीसी लोग यीसु के लघे आइके उनखर परिच्छा लेंड के खातिर उनसे पूँछिन, "का इआ उचित हय, कि मंसेरुआ अपने मेहेरिआ के छोड़-छुट्टी कइ देय?" <sup>3</sup> यीसु उनसे कहिन, "मूसा नबी तोंहसे का कहिन तय?" <sup>4</sup> ऊँ पंचे कहिन, "मूसा नबी कहिन तय, कि जे कोऊ अपने मेहेरिआ काहीं छोड़इ चाहय, त उआ छोड़-छुट्टी के कागज लिखिके देय, तबहिन ओही छोड़ि सकत हय।" <sup>5</sup> यीसु उनसे कहिन, "तोंहरे मन के कठोरता के कारन मूसा नबी तोंहरे खातिर इआ हुकुम लिखिन हीं। <sup>6</sup> पय संसार के सुरुआत माहीं परमातिमा मनई काहीं मंसेरुआ अउर मेहेरिआ के रूप माहीं बनाइन तय। <sup>7</sup> इआ कारन से मनई अपने महतारी-बाप से अलग होइके अपने मेहेरिआ के साथ माहीं रही, <sup>8</sup> अउर ऊँ दोनव एकय तन होइहँय; इआ कारन से अब ऊँ दुइ नहीं, बलकिन एकय तन आहीं। <sup>9</sup> एसे जिनहीं परमातिमा जोड़िन हीं, उनहीं मनई अलग न करँय।"

<sup>10</sup> यीसु उहाँ से जब एकठे घर म आइगें, तब चेला लोग मेहेरिआ काहीं छोड़इ के बारे म पुनि पूँछइ लागें। <sup>11</sup> यीसु अपने चलन से कहिन, "जे कोऊ अपने मेहेरिआ काहीं छोड़िके दुसरे मेहेरिआ से काज करत हय, त उआ अपने पहिल मेहेरिआ के बिरोध माहीं ब्यभिचार करत हय। <sup>12</sup> अउर अगर कउनव मेहेरिआ अपने मंसेरुआ काहीं छोड़िके दुसरे मंसेरुआ के साथ काज करत ही, त उहव ब्यभिचार करत ही।"

### छोट लड़िकन काहीं आसिरबाद

(मत्ती 19:13-15; लूका 18:15-17)

<sup>13</sup> पुनि खुब मनई अपने छोट-छोट लड़िकन काहीं यीसु के लघे लइ आमँड लागें, कि यीसु उनखे ऊपर आपन हाँथ धइके आसिरबाद देय, पय चेला लोग उनहीं डाँटँड लागें। <sup>14</sup> यीसु इआ देखिके, गुस्साइके अपने चलन से कहिन, "छोट लड़िकन काहीं हमरे लघे आमँड द्या, अउर उनहीं न बरजा, काहेकि जे कोऊ छोट लड़िकन कि नाई अपने काहीं नम्र बनइहँय, उँइन परमातिमा के राज के भागीदार बनिहँय। <sup>15</sup> हम तोंहसे सही कहित हएन, कि जे कोऊ परमातिमा के सँदेस के बात छोट क लड़िका कि नाई, न अपनाई, त उआ परमातिमा के राज माहीं कबहूँ न जाए पाई।" <sup>16</sup> अउर यीसु ऊँ छोट-छोट लड़िकन काहीं कनिआ लइ लिहिन, अउर उनखे ऊपर आपन हाँथ धइके आसिरबाद दिहिन।

### धनमान मनई अउर अनन्त जीवन

(मत्ती 19:16-30; लूका 18:18-30)

<sup>17</sup> यीसु जब उहाँ से निकरिके गइल माहीं जात रहे हँय, तब एकठे मनई यीसु के लघे दउड़त आबा, अउर उनखे आँगे गोड़न गिरिके पूँछइ लाग, "हे उत्तम गुरू, अनन्त जीवन पामँड के खातिर हम का करी?" <sup>18</sup> यीसु ओसे कहिन, "तूँ हमहीं उत्तम काहे कहते हया? कोऊ उत्तम नहीं आय, केबल एकठे परमातिमय भर उत्तम हँ, अउर उनखे अलाबा कोऊ नहीं आय। <sup>19</sup> तूँ परमातिमा के हुकुमन काहीं त जनते हया: कतल न करब, ब्यभिचार न करब, चोरी न करब, लबरी गबाही न देब, कोहू के साथ छल न करब, अउर अपने महतारी-बाप के मान-सम्मान करब।" <sup>20</sup> उआ मनई यीसु से कहिस, "हे गुरू, ई सगली बातन काहीं, त हम लड़िकन से मानत आपन हय।" <sup>21</sup> यीसु उआ मनई कइती निहारिके ओसे प्रेम किहिन, अउर ओसे कहिन, "तोंहरे जीवन माहीं एकठे बात के कमी हय, जा, जऊँ कुछ तोंहार धन-सम्पत्ती ही, ओही सब बेचिके गरीबन माहीं बाँटि द्या, अउर तोहई स्वरग माहीं एसे बढिके धन-सम्पत्ती मिली, अउर आइके हमरे पीछे चला।" <sup>22</sup> यीसु के इआ बात सुनिके उआ मनई के चेहरा माहीं उदासी छाइगे, अउर खुब दुखी होइके उहाँ से चला ग, काहेकि उआ खुब धनी रहा हय। अउर इआ करँड के ओखर इच्छा नहीं रही।

<sup>23</sup> यीसु अपने चारिव कइती निहारिके अपने चलन से कहिन, "धनी मनइन के परमातिमा के राज म प्रबेस करब केतना कठिन हय!" <sup>24</sup> चेला लोग यीसु के बात काहीं सुनिके चउआइगें। इआ देखिके यीसु पुनि चलन से कहिन, "हे लड़िकव, जउन मनई धन के ऊपर भरोसा रक्खत हँ, उनखर परमातिमा के राज म प्रबेस करब केतना कठिन हय! <sup>25</sup> परमातिमा के राज माहीं धनी मनई के पहुँचब खुब कठिन हय, बलकिन सूजी के छेंद से ऊँट के निकर जाब, एसे सरल हय!" <sup>26</sup> यीसु के इआ बात काहीं सुनिके चेला लोग खुब अचरज मानिके आपस माहीं कहँड लागें, "त पुनि केही मुक्ती मिल सकत ही?" <sup>27</sup> यीसु अपने चलन कइती देखिके कहिन, "मनइन से त इआ नहीं होइ सकय, पय परमातिमा से होइ सकत हय; काहेकि परमातिमा सब कुछ कइ सकत हँ।" <sup>28</sup> तब पतरस यीसु से कहँड लागें, "देखी, हम पंचे त आपन सब कुछ छोड़िके अपना के पीछे चले आएन हँय।" <sup>29</sup> तब यीसु कहिन, "हम तोंहसे सही कहित हएन, कि अइसा कोऊ नहीं आय, जउन हमरे अउर परमातिमा के खुसी के खबर के खातिर आपन घर, अउर भाई-बहिनिन, अउर महतारी-बाप, अउर लड़िकन-बच्चन, अउर खेतन काहीं छोड़ि दिहिस होय, <sup>30</sup> अउर अब इआ समय माहीं सव गुना न पाइस होय, अपने घरन, अउर भाइन अउर बहिनिन, अउर महतारिन, अउर लड़िकन-बच्चन, अउर खेतन काहीं, पय परमातिमा के खातिर सताव काहीं सहिके स्वरग माहीं अनन्त जीवन पाई, <sup>31</sup> देखा, जे कोऊ इआ संसार माहीं खुद काहीं सगलेन से बड़ा मानत हँ, ऊँ पंचे स्वरग माहीं सगलेन से छोट माने जइहँय, अउर जे कोऊ इआ संसार माहीं खुद काहीं सगलेन से छोट मानत हँ, ऊँ पंचे स्वरग माहीं सगलेन से बड़े माने जइहँय।"

### अपने मउत के बारे माहीं यीसु के तिसराय भबिस्सबानी

(मत्ती 20:17-19; लूका 18:31-34)

<sup>32</sup> यीसु अपने चलन के साथ यरूसलेम सहर जात रहे हँय, अउर उनखे पीछे अउरव मनई रहे हँय, अउर यीसु उन सगलेन के आँगे-आँगे जात रहे हँय। अउर चेला लोग चउआन रहे हँय, अउर जऊँ उनखे पीछे-पीछे आबत रहे हँय, ऊँ पंचे खुब डेरान रहे हँय। तब यीसु पुनि अपने बरहँव चलन काहीं अपने लघे अलग बोलाइके, ऊँ बातन काहीं बतामँड लागें, जउन यीसु के ऊपर आमँड बाली रही हँय। <sup>33</sup> "देखा, हम यरूसलेम सहर माहीं जइत हएन, अउर मनई के लड़िका प्रधान याजकन अउर मूसा के बिधान सिखामँड बालेन के हाँथ माहीं पकड़ाबा जई, अउर ऊँ पंचे ओही मउत के सजा के काबिल ठहरइहँय, अउर गैरयहूदी लोगन के हाँथ माहीं सउँपिहँय।

† जइसन यहूदी लोग बली माहीं नोन डारत रहे हँय, उहइमेर कस्टन के द्वारा परमातिमा हमहीं पंचन काहीं सुद्ध करत हँ। †† 9:49 लैब्य 2:13

34 अउर ऊँ पंचे ओखर मजाक उड़इहँय, ओखे ऊपर थुँकिहँय, ओही चाबुक से मरिहँय, अउर ओही मारि डरिहँय, अउर उआ तिसरे दिन जिन्दा होइ जई।”

### याकूब अउर यूहन्ना के यीसु से बिनती करब (मत्ती 20:20-28)

35 तब जब्दी के लड़िका याकूब अउर यूहन्ना यीसु के लघे आइके कहिन, “हे गुरु, हम पंचे चाहित हएन, कि जऊँ कुछ हम अपना से मागी, ओही अपना हमरे खातिर पूर करी।” 36 यीसु उनसे कहिन, “तूँ पंचे का चहते हया, कि हम तौहरे खातिर करी?” 37 ऊँ पंचे यीसु से कहिन, “अपना हमहीं इआ बचन देई, कि जब अपना परमातिमा के महिमा के साथ राज करब, त एक जने काहीं अपने दहिने कइती, अउर दुसरे काहीं बाएँ कइती बइठाउब।” 38 यीसु उनसे कहिन, “तूँ पंचे नहीं जनते आह्या, कि हम पंचे का मागित हएन? जऊँ भारी कस्ट हम सहँइ बाले हएन, का तूँ पंचे उआ कस्ट सहि सकते हया? अउर जउन खुब कस्ट सहिके हम मरँइ बाले हएन, का तूँ पंचे खुब कस्ट सहिके मर सकते हया?” 39 ऊँ दोनव जने यीसु से कहिन, “इआ सब हम पंचे कइ सकित हएन।” यीसु उनसे पुनि कहिन, “जऊँ कस्ट हम सहँइ बाले हएन, तूँ पंचे सहि लेइहा, अउर जउन खुब कस्ट सहिके हम मरँइ बाले हएन, अइसा खुब कस्ट सहिके तूँ पंचे मरँइ के खातिर तइआर हया। 40 पय उआ जघा जेखे खातिर परमातिमा तइआर किहिन हीं, ओही छोड़िके, अउर कोहू काहीं अपने दहिने, अउर अपने बाएँ बइठाउब हमरे बस म नहिं आय।”

41 इआ सुनिके दसहूँ चेला यूहन्ना अउर याकूब काहीं रिसिहँइ लागें। 42 तब यीसु चलन काहीं अपने लघे बोलाइके उनसे कहिन, “तूँ पंचे जनते हया, कि जऊँ गैरयहूदी लोगन माहीं अधिकारी होत हैं, उनखे ऊपर हुकुम चलाबत हैं, अउर उन अधिकारिन माहीं बड़े अउर छोट होत हैं, अउर जऊँ बड़े होत हैं, ऊँ छोटन के ऊपर अधिकार जताबत हैं। 43 पय तौहरे बीच माहीं अइसा न होइ चाही, बलकिन जे कोऊ तौहरे पंचन म से बड़ा बनँइ चाहत हय, त उआ तौहार सगलेन के सेबा करँइ बाला बनय। 44 अउर जे कोऊ तौहरे पंचन म से मुखिया बनँइ चाहत हय, त उआ पहिले तौहार पंचन के दास बनय; 45 काहेकि मनई के लड़िका एसे नहीं आबा, कि ओखर सेबा-सहाई कीन जाय, बलकिन एसे आबा हय, कि खुदय दुसरेन के सेबा-सहाई करय, अउर उआ खुब मनइन काहीं मुक्ती देई के खातिर आपन प्रान देय।”

### आँधर मनई काहीं नीक करब (मत्ती 20:29-34; लूका 18:35-43)

46 यीसु अपने चलन के साथ यरीहो सहर माहीं पहुँचे, अउर जब यीसु अउर उनखर चेला लोग अउर खुब बड़ी भीड़, यरीहो सहर से होइके चली जात रही हय, तब तिमाई के लड़िका बरतिमाई जऊँ आँधर रहा हय, उआ भीख माँगय के खातिर सड़क के किनारे बइठ रहा हय। 47 उआ इआ सुनिके कि नासरत गाँव के यीसु जात हैं, चिल्लाय-चिल्लाइके कहँइ लाग, “हे राजा दाऊद के सन्तान यीसु, हमरे ऊपर दया करी!” 48 खुब जने ओही डाँटिन, कि चुप्पय होइ जाय, पय उआ अउर चंडे चिल्लाँइ लाग, “हे राजा दाऊद के सन्तान यीसु, हमरे ऊपर दया करी!” 49 तब यीसु रुकिके कहिन, “उआ आँधर मनई काहीं बोलाबा।” तब कुछ जने उआ आँधर मनई के लघे जाइके ओसे कहिन, “साहस करा! उठा! यीसु तौहई बोलाबत हैं।” 50 उआ आँधर मनई आपन ओन्हा फेंकिके तुरन्तय उठा, अउर यीसु के लघे आबा। 51 तब यीसु ओसे कहिन, “तूँ का चहते हया, कि हम तौहरे खातिर करी?” उआ आँधर मनई यीसु से कहिस, “हे गुरु, हम इआ चाहित हएन, कि हम देखँइ लागी।” 52 यीसु उआ आँधर मनई से कहिन, “चले जा, तौहार बिसुआस तौहई नीक किहिस ही।” अउर उआ आँधर मनई हरबिन देखँइ लाग, अउर गइल माहीं यीसु के पीछे-पीछे चलँइ लाग।

### यीसु राजा कि नाई यरूसलेम माहीं प्रबेस किहिन (मत्ती 21:1-11; लूका 19:28-40; यूहन्ना 12:12-19)

11 जब यीसु अउर उनखर चेला लोग यरूसलेम सहर के लघे, जैतून पहार के ऊपर बैतफगे अउर बैतनिय्याह गाँव के लघे आएँ, तब ऊँ अपने चलन म से दुइ जनेन काहीं इआ कहिके पठइन, 2 “सउहँ बाले गाँव माहीं जा, अउर उहाँ पहुँचतय एकठे गदही के बच्चा, जउने म कबहूँ कोऊ नहीं चढ़िस, तौहई पंचन काहीं बाँधा मिली। ओही छोरिके ले आबा। 3 अगर तौहसे कोऊ पूँछय, ‘इआ का करते हया?’ त कहि दिहा, कि प्रभू काहीं एखर जरूरत ही, अउर उआ तुरन्तय ओही इहाँ पठय देई।” 4 दोनव चेला गाँव माहीं जाइके उआ गदही के बच्चा काहीं, घर के बहिरे दुआरा के लघे चउराहा माहीं बाँधा पाइन, अउर ओही छोड़ लागें। 5 तब जऊँ मनई उहाँ ठाढ़ रहे हँय, उनमा से कुछ जने कहँइ लागें, “इआ का करते हया, गदही के बच्चा काहीं काहे छोरते हया?” 6 तब चेला लोग, जइसन यीसु उनसे कहिन तय, उहयमेर उनसे कहि दिहिन; तब सगले मनई उनीं चले जाँइ दिहिन। 7 अउर ऊँ पंचे गदही के बच्चा काहीं यीसु के लघे लइ आएँ, अउर ओखे ऊपर आपन ओन्हा डारिन, अउर यीसु उआ गदही के बच्चा के ऊपर बइठिगें। 8 तब उनखर सम्मान करँइ के खातिर खुब मनई आपन-आपन ओन्हा गइल माहीं बिछाइन, अउर कुछ जने खेतन के बिरबन से डेरइआ काट-काटिके गइल माहीं बिछाय दिहिन। 9 जऊँ मनई यीसु के आँग-आँग जात रहे हँय, अउर जऊँ यीसु के पीछे-पीछे चलत रहे हँय, त ऊँ पंचे चिल्लाय-चिल्लाय कहत जात रहे हँय, “होसन्ना! † धन्य हय उआ जउन प्रभू के नाम से आबत हय। 10 हमरे कुल पिता राजा दाऊद के राज जउन आय रहा हय; धन्य हय! स्वरग माहीं होसन्ना।”

11 अउर यीसु यरूसलेम सहर माहीं पहुँचिके मन्दिर माहीं गें, अउर चारिव कइती सगली चीजन काहीं देखिके, अपने बरहँव चलन काहीं साथय लइके बैतनिय्याह गाँव माहीं चलेगें, काहेकि साँझ होइगे रही हय।

### अंजीर के बिरबा काहीं सराप देब (मत्ती 21:18-19)

12 दुसरे दिना जब यीसु अपने चलन के साथ बैतनिय्याह गाँव से निकरिके चल दिहिन, तब उनीं भूँख लाग। 13 अउर यीसु दूरिन से एकठे अंजीर के हरिअर बिरबा देखिके, ओखे लघे गें, कि साइद ओमाहीं कुछ फर पाय जाँय: पय उआ बिरबा माहीं पत्तन क छोड़िके कुछ नहीं पाइन; काहेकि ओखर फरँय के समय नहीं रहा आय। 14 इआ देखिके यीसु उआ बिरबा से कहिन, “अब से कोऊ तोर फर कबहूँ न खाय!” अउर उनखर चेला लोग सुनत रहे हँय।

### मन्दिर से बइपारिन काहीं भगाउब (मत्ती 21:12-17; लूका 19:45-48; यूहन्ना 2:13-22)

15 पुनि यीसु अपने चलन के साथ यरूसलेम सहर माहीं आएँ, अउर मन्दिर माहीं गें; अउर उहाँ जउन बइपार करत रहे हँय, उनीं बहिरे निकार दिहिन, अउर रुपिआ-पइसा के लेन-देन करँइ बालेन के पिढ़बन, अउर परेबा बेंचँइ बालेन के चउकिन काहीं उलटाय दिहिन, 16 अउर यीसु मन्दिर से होइके कोहू काहीं बरतन लइके आमँइ-जाँइ नहीं दिहिन। 17 अउर उपदेस दइके उनसे कहिन, “का पबित्र सास्त्र माहीं इआ नहीं लिखा आय, कि हमार घर सगली जातिअन के खातिर प्राथना के घर कहाई? पय तूँ पंचे इआ मन्दिर काहीं डँकुअन के अड्डा बनाय दिहा हय।” 18 यीसु के इआ बात क सुनिके प्रधान याजक लोग, अउर मूसा के बिधान सिखामँइ बाले, यीसु काहीं मारि डारँइ के मोका दूढ़ँय लागें; काहेकि ऊँ सगले जने यीसु से डेरातव रहे हँय, एसे कि खुब मनई यीसु के सिच्छा काहीं सुनिके चउआय

† होसाना मतलब हमही बचाया।

जात रहे हैं।<sup>19</sup> साँझ होतय यीसु अपने चलन के साथ सहर से बहिरे चलेंगे।

### झुरान अंजीर के बिरबा से सिच्छा

(मत्ती 21:20-22)

<sup>20</sup> जब यीसु पुनि दुसरे दिना सकारे, अपने चलन के साथ यरूसलेम सहर जात रहे हैं, तब ऊँ पंचे गइल माहीं, उआ अंजीर के बिरबा काहीं जर तक झुरान देखिन।<sup>21</sup> तब पतरस काहीं यीसु के कही उआ बात याद आइगे, अउर ऊँ यीसु से कहिन, “हे गुरू, देखी! इआ अंजीर के बिरबा जउने काहीं अपना सराप दिहेन तय, झुराइगा हय।”<sup>22</sup> तब यीसु पतरस से कहिन, कि “परमातिमा के ऊपर बिसुआस रक्खा।<sup>23</sup> हम तौहसे सही कहित हएन, कि जे कोऊ इआ पहार से कहय, कि ‘तूँ उखड़ि जा, अउर समुद्र माहीं जाइके बूड़ जा’, अउर अपने मन म संका न करय, बलकिन बिसुआस कइ लेय, कि हम जउन कहित हएन, उआ होइ जई, त ओखे खातिर उहय होई।<sup>24</sup> एसे हम तौहसे कहित हएन, कि जउन कुछूँ पंचे प्राथना कइके मागा, त बिसुआस कइल्या, कि तौहई मिलिगा, त उआ तौहरे खातिर होइ जई।<sup>25</sup> अउर जब केतनिव दार तूँ पंचे ठाढ़ होइके प्राथना करते हय, त अगर तौहरे मन म कोहू के बारे माहीं बिरोध होय, त ओही माफ कइ द्या! जउने तौहरे अपराध स्वरग म रहँइ बाले परमातिमा माफ कइ देंय।<sup>26</sup> (अगर तूँ पंचे माफ न करिहा त तौहार पिता जऊँ स्वरग माहीं रहत हैं, तौहरे अपराध माफ न करिहँय।)”

### यीसु के अधिकार के बारे माहीं पूँछब

(मत्ती 21:23-27; लूका 20:1-8)

<sup>27</sup> पुनि यीसु अपने चलन के साथ यरूसलेम सहर माहीं आएँ, अउर जब यीसु मन्दिर म जाइके घूमत रहे हैं, तबहिनय प्रधान याजक लोग अउर मूसा के बिधान सिखामँइ बाले, अउर यहूदी धारमिक अँगुआ लोग यीसु के लघे आइके पूँछिन,<sup>28</sup> “तूँ मन्दिर खाली करामँइ के काम कउने अधिकार से करते हय? अउर इआ अधिकार तौहई को दिहिस ही, कि तूँ इआ काम करा?”<sup>29</sup> यीसु उनसे कहिन, “हमहूँ तौहसे एकठे बात पूँछित हएन, अगर तूँ पंचे हमहीं बतइहा, त हमहूँ तौहसे बताउब कि ई काम हम कउने अधिकार से करित हएन।<sup>30</sup> यूहन्ना काहीं बपतिस्मा देंइ के अधिकार, परमातिमा से मिला तय, इआ मनई उनहीं दिहिन तय? हमहीं बताबा।”<sup>31</sup> तब ऊँ पूँछँइ बाले आपस माहीं बतौँइ लागें, कि अगर हम कहित हएन, कि “परमातिमा से मिला तय” त ऊँ कइहँय, कि “पुनि तूँ पंचे उनखर बिसुआस काहे नहीं किहा?”<sup>32</sup> अउर अगर हम पंचे कहित हएन, कि “मनइन से मिला तय” त उहाँ ठाढ़ सगले मनई मारि डरिहँय, एहिन से डेरातव रहे हैं, काहेकि सगले मनई जानत रहे हैं, कि इआ बात बेलकुल सही आय, यूहन्ना परमातिमा के सँदेस बतामँइ बाले रहे हैं।<sup>33</sup> एसे ऊँ पंचे यीसु काहीं जबाब दिहिन, “हम पंचे नहीं जानी” तब यीसु उनसे कहिन, “हमहूँ तौहई नहीं बताई, कि ई काम हम कउने अधिकार से करित हएन।”

### दुस्ट किसान के उदाहरन

(मत्ती 21:33-46; लूका 20:9-19)

**12** पुनि यीसु उनसे उदाहरन माहीं बातँय करँइ लागें, “कउनव मनई अंगूर के बगिया लगाइस अउर बगिया के चारिव कइती बारी रूँधिस, अउर अंगूर के रस निकारँइ के खातिर कुन्ड खोदिस, अउर एकठे ऊँच काहीं मड़इचा बनाइस; अउर कुछ किसानन काहीं उआ बगिया के ठेका दइके परदेस चला ग।<sup>2</sup> पुनि जब अंगूर के फरँइ के समय आबा, तब उआ मनई किसानन के लघे अपने एकठे दास काहीं पठइस, कि किसानन से अंगूर के बगिया से ओखे हिस्सा के अंगूर लइ आबय।<sup>3</sup> पय ऊँ पंचे उआ दास काहीं पकड़िके मारिन-पीटिन अउर छूँछय हाँथ लउटाय दिहिन।<sup>4</sup> पुनि उआ मनई एकठे अउर दास काहीं किसानन के लघे पठइस; पय ऊँ किसान

ओहू के मूँइ फोर डारिन, अउर ओखर अपमान किहिन।<sup>5</sup> पुनि उआ मनई एकठे अउर दास काहीं किसानन के लघे पठइस; पय ऊँ किसान ओही मारि डारिन। तब उआ मनई अउर खुब दासन काहीं पठइस, पय ऊँ किसान कुछ दासन काहीं मारिन-पीटिन, अउर कुछन काहीं मारि डारिन।<sup>6</sup> अउर ओखे लघे पठमँइ के खातिर अब केबल ओखर लड़िका बचा, जउने से उआ खुब प्रेम करत रहा हय: अन्तिम माहीं उआ अपने लड़िका क किसानन के लघे इआ सोचिके पठइस, कि ऊँ किसान हमरे लड़िका के मान-सम्मान करिहँय।<sup>7</sup> पय ऊँ किसान ओखे लड़िका काहीं आबत देखिके, आपस माहीं कहँइ लागें; इहय त इआ बगिया के बारिसदार आय; आबा हम पंचे एही मारि डारी, तब सगली बगिया माहीं हमार पंचन के अधिकार होइ जई।<sup>8</sup> अउर ऊँ पंचे उआ लड़िका काहीं पकड़िके मारि डारिन, अउर अंगूर के बगिया के बहिरे फेंकि दिहिन।”

<sup>9</sup> एसे उआ अंगूर के बगिया के मालिक आइके का करी, तूँ पंचे जनते हय? “उआ बगिया के मालिक आइके किसानन काहीं जान से मारि डारी, अउर अपने बगिया के ठेका दुसरे किसानन काहीं दइ देई।<sup>10</sup> काहे तूँ पंचे पबित्र सास्त्र माहीं लिखी, इआ बात काहीं नहीं पढ़े आह्या:

‘जउने पथरा काहीं राजा के कारीगर इआ कहिके छौँइ दिहिन तय, कि इआ कउनव काम के नहीं आय, उहय कोनमा के खास पथरा होइगा।

<sup>11</sup> इआ काम प्रभू किहिन हीं, अउर इआ हमरे नजर माहीं खुब अचरज के काम हय।”

<sup>12</sup> तब फरीसी लोग अउर मूसा के बिधान सिखामँइ बाले, यीसु काहीं पकड़िके लइ जाँइ चाहत रहे हैं, काहेकि ऊँ पंचे समझिगें तय, कि यीसु इआ उदाहरन हमरे खिलाफ कहिन हीं। पय ऊँ पंचे उहाँ ठाढ़ खुब मनइन से डेराने, अउर यीसु क मन्दिर माहीं छौँइके चलेंगे।

### राजा कैसर काहीं जमा देब

(मत्ती 22:15-22; लूका 20:20-26)

<sup>13</sup> तब फरीसी लोग, अउर मूसा के बिधान सिखामँइ बाले, यीसु काहीं कउनव बात माहीं फँसाइके पकड़ँइ के खातिर, कुछ फरीसी लोगन के अउर कुछ राजा हेरोदेस के गुट बाले मनइन काहीं यीसु के लघे पठइन।<sup>14</sup> तब ऊँ पंचे यीसु के लघे आइके उनसे कहिन, “हे गुरू, हम पंचे जानित हएन, कि अपना सच्चे हएन, अउर परमातिमा के गइल सच्चाई से बताइत हएन, अउर कोहू के परबाह नहीं करी, काहेकि अपना मनइन के मुँह देखिके बातँय नहीं करी। पय परमातिमा के सँदेस के बात सच्चाई से बताइत हएन। त अपना बताई, कि का हमही महाराजा कैसर काहीं कर देब उचित हय कि नहीं?<sup>15</sup> हम पंचे कर देई, कि न देई?” यीसु उनखे दिल के कपट क जानिके उनसे कहिन, “तूँ पंचे हमरे बात माहीं गलती पकड़ँइ आया हय? रोमी राज के एकठे सिक्का हमरे लघे लइ आबा, कि हम ओही देखी।”<sup>16</sup> ऊँ पंचे लइ आएँ, तब यीसु उनसे कहिन, “इआ सिक्का माहीं केखर चित्र अउर नाम हय?” ऊँ सगले जन कहिन, “महाराजा कैसर के।”<sup>17</sup> तब यीसु उनसे कहिन, “जऊँ महाराजा कैसर के आय, ओही महाराजा कैसर काहीं द्या, अउर जऊँ परमातिमा के आय, ओही परमातिमा काहीं द्या।” तब ऊँ पंचे यीसु के इआ बात क सुनिके खुब अचरज मानिन।

### दुसराय जिन्दा होए के बाद काज-बिआह

(मत्ती 22:23-33; लूका 20:27-40)

<sup>18</sup> पुनि सदूकी दल बाले लोग, जऊँ इआ कहत रहे हैं, कि मरे के बाद दुसराय जिअब होतय नहीं आय, यीसु के लघे आइके पूँछँइ लागें,<sup>19</sup> “हे गुरू, मूसा नबी हमरे पंचन के खातिर पबित्र सास्त्र माहीं लिखिन हीं, कि अगर कोहू के भाई बिना सन्तान पइदा किहे मर जाय, अउर ओखर मेहेरिआ जिन्दा रहि जाय, त ओखर भाई ओसे काज कइके अपने भाई के खातिर सन्तान पइदा करय।<sup>20</sup> एकठे घर म सात भाई रहे हैं। पहिल भाई काज कइके बिना सन्तान पइदा किहे मरिगा।<sup>21</sup> तब दूसर नम्बर के भाई उआ

मेहेरिआ से काज कइ लिहिस, अउर उहव बिना सन्तान पइदा किहे मरिगा, अउर इहइमेर से तिसरव भाई किहिस।<sup>22</sup> अउर इहइमेर से सातव भाई किहिन, अउर बिना सन्तान पइदा किहे मरिगें, अउर सगलेन के बाद उआ मेहेरिअव मरिगे।<sup>23</sup> त अपना बताई, जब ऊँ पंचे मरेन म से पुनि जिन्दा होइहँय, त उआ मेहेरिआ केखर मेहेरिआ कहाई? काहेकि उआ सातव जनेन के मेहेरिआ होइ चुकी तय।”

<sup>24</sup> यीसु उनसे कहिन, “तूँ पंचे पबित्र सास्त्र, अउर परमातिमा के सक्ती काहीं नहीं जनते आह्या; इहय कारन से धोखे माहीं परे हया।<sup>25</sup> काहेकि जब ऊँ पंचे मरेन म से पुनि जिन्दा होइ हँय, त उन माहीं काज-बिआह न होई, बलकिन स्वरग माहीं स्वरगदूतन कि नाई होइ जइहँय।<sup>26</sup> मरिगे दुसराय जिन्दा होइ के बारे माहीं का तूँ पंचे मूसा नबी के लिखी किताब माहीं, झाड़ी के किस्सा माहीं नहीं पढ़े आह्या, कि परमातिमा मूसा नबी से कहिन तय, ‘हम अब्राहम के परमातिमा, अउर इसहाक के परमातिमा, अउर याकूब के परमातिमा आहने?’<sup>27</sup> ऊँ मरे मनइन के नहीं, बलकिन जिन्दा मनइन के परमातिमा आहीं; एसे तूँ पंचे बड़ी भूल माहीं परे हया।”

### परमातिमा के सबसे बड़ा हुकुम

(मत्ती 22:34-40; लूका 10:25-28)

<sup>28</sup> मूसा के बिधान सिखामँइ बालेन म से एक जने आइके यीसु अउर सदूकी दल बालेन काहीं बाद-बिबाद करत देखिके, अउर इआ जानिके, कि यीसु उनहीं सही ढँग से जबाब दिहिन हीं, त यीसु से पूछँइ लाग, “सगलेन से खास हुकुम कउन हय?”<sup>29</sup> तब यीसु ओही जबाब दिहिन, “सगले हुकुमन माहीं खास हुकुम हय: ‘हे इजराइल सुन! प्रभू हमार पंचन के परमातिमा एकयठे प्रभू हें।<sup>30</sup> अउर तूँ प्रभू अपने परमातिमा से अपने पूरे मन से, अउर अपने पूरे प्रान से, अउर अपने पूरी बुद्धी से, अउर अपने पूरी सक्ती से प्रेम रख्या।’<sup>31</sup> अउर दूसर हुकुम इहव हय, ‘तूँ अपने परोसी से अपनेन कि नाई प्रेम रख्या’ ई दोनव से बड़ा अउर कउनव परमातिमा के हुकुम नहिं आय।”<sup>32</sup> तब यहूदी नेम सिखामँइ बाला यीसु से कहिस, “हे गुरू, बेलकुल ठीक! अपना सही कहेन हय, कि परमातिमा एकइठे हँय, अउर उनहीं छोंड़ि कउनव दूसर नहिं आय।<sup>33</sup> अउर परमातिमा से पूरे मन, अउर पूरी बुद्धी, अउर पूरे प्रान से, अउर पूरी सक्ती से प्रेम रक्खब, अउर परोसी से अपनेन कि नाई प्रेम रक्खब सगले होमबलिअन अउर बलिदानन से बढ़िके हय।”<sup>34</sup> जब यीसु देखिन कि उआ समझ के साथ जबाब दिहिस ही, तब ओसे कहिन, “तूँ परमातिमा के राज के लघेन हया।” अउर एखे बाद कोहू के यीसु से कुछ पूँछँइ के हिम्मत नहीं परी।

### मसीह केखर लड़िका आहीं?

(मत्ती 22:41-46; लूका 20:41-44)

<sup>35</sup> पुनि यीसु मन्दिर म उपदेस देत माहीं इआ कहिन, “मूसा के बिधान सिखामँइ बाले कइसा कहत हें, कि मसीह राजा दाऊद के सन्तान आहीं?”

<sup>36</sup> राजा दाऊद खुदय पबित्र आत्मा से भरिके कहिन हीं:

‘प्रभू हमरे प्रभू से कहिन, “हमरे दहिने बइठा, जब तक कि हम तोंहरे बइरिन काहीं तोंहरे गोड़े के नीचे न कइ देई।

<sup>37</sup> राजा दाऊद त खुदय उनहीं प्रभू कहत हें, त ऊँ उनखर सन्तान कइसन कहाएँ?” अउर भीड़ के मनई यीसु के बातन काहीं खुसी से सुनत रहे हँय।

### मूसा के बिधान सिखामँइ बालेन से बचिके रहब

(मत्ती 23:1-36; लूका 20:45-47)

<sup>38</sup> यीसु अपने उपदेस माहीं कहिन, “मूसा के बिधान सिखामँइ बालेन से सतरक रह्या, जिनहीं लम्बे-लम्बे कुरथा पहिरे घूमब, अउर बजारन म नबस्कार करबाउब,<sup>39</sup> अउर सभाघरन माहीं खास-खास आसन म बइठब, अउर जेउनारन माहीं खास-खास जघा म बइठब नीक लागत हय।<sup>40</sup> ऊँ पंचे

बिधबन के घरन क लूट लेथें, अउर खुद काहीं धरमी देखामँइ के खातिर खुब देर तक प्राथना करत हें। ई पंचे सगलेन से जादा सजा पइहँय।”

### गरीब बिधबा के दान

(लूका 21:1-4)

<sup>41</sup> यीसु मन्दिर म दान पेटी के आँगे बइठिके देखत रहे हँय, कि लोग मन्दिर के दान डारँइ बाली पेटी माहीं कउनमेर से पइसा डारत हें; अउर खुब धनी मनई आइके बहुत कुछ डारिके चलेगें।<sup>42</sup> एतने माहीं एकठे गरीब बिधबा आइके जऊँ ओखे लघे पइसा दुइ पइसा रहय, सगला, दान पेटी माहीं डार दिहिस।<sup>43</sup> तब यीसु अपने चलन काहीं लघे बोलाइके उनसे कहिन, “हम तोंहसे सही कहित हएन, कि मन्दिर के दान पेटी म दान डारँइ बालेन माहीं, इआ गरीब बिधबा सगलेन से जादा दान डारिस ही; <sup>44</sup> काहेकि सगले जन अपने धन के बढ़ती से कुछ लइके डारिन हीं, पय इआ गरीब बिधबा अपने गरीबी माहीं जऊँ कुछ ओखे लघे रहा, मतलब जऊँ ओखे खॉइ जिअँइ काहीं रहा हय, आपन सगला धन दान पेटी माहीं डार दिहिस ही।”

### मन्दिर के नास होइ के बारे माहीं यीसु के भविस्सबानी

(मत्ती 24:1-2; लूका 21:5-6)

**13** जब यीसु मन्दिर से निकरिके जाँइ लागें, तबहिनय उनखे चलन म से एक जने यीसु से कहिन, “हे गुरू, देखी, कइसन खुब बड़े-बड़े पथरा हें, अउर कइसन बड़े-बड़े घर बने हँय!”<sup>2</sup> यीसु उनसे कहिन, “का तूँ पंचे ई बड़े-बड़े घरन काहीं देखते हया: एककव पथरा एक दुसरे के ऊपर न देखइहँय, ऊँ सगले गिराय दीन जइहँय।”

### आमँइ बाले समय माहीं कस्ट अउर पीरा

(मत्ती 24:3-14; लूका 21:7-19)

<sup>3</sup> जब यीसु जैतून के पहार माहीं मन्दिर के आँगे बइठ रहे हँय, तबहिनय पतरस अउर याकूब अउर यूहन्ना अउर अन्दियास अलग जाइके यीसु से पूँछिन, <sup>4</sup> “हमहीं पंचन काहीं बताई कि ई बातँय कबय होइ हँय? अउर जब ई बातँय होइ हँय, उआ समय काहीं हम पंचे कइसन जाने पाउब, कउनव चिन्हारी बताई?”<sup>5</sup> तब यीसु उनसे कहँइ लागें, “सतरक रह्या, कोऊ तोंहई बिसुआस से भटकाए न पाबय।<sup>6</sup> खुब जने हमरे नाम से आइके कइहँय, ‘हम मसीह आहने!’ अउर खुब मनइन काहीं बिसुआस से भटकाय देइहँय।<sup>7</sup> अउर तूँ पंचे जब युद्ध होत देख्या, अउर युद्धन के चरचा सुन्या, त घबराय न जया, काहेकि ई सगली बातँय जरूर होइहँय, पय उआ समय संसार के अन्त न होई।<sup>8</sup> काहेकि एक जाति के मनई, दुसरे जाति के मनइन के ऊपर चढ़ाई करिहँय, अउर एक देस, दुसरे देस के ऊपर चढ़ाई करी, अउर हरेक जघन माहीं अकाल परिहँय, अउर भुँइडोल होइहँय। अउर ई सगली बातँय दुख-मुसीबतन के सुरुआत होइहँय।”

<sup>9</sup> पय तूँ पंचे अपने बारे म सचेत रह्या; काहेकि कुछ लोग तोंहई लइ जाइके महासभन माहीं सउँपिहँय, अउर सभाघरन म मरिहँय-पिटिहँय, अउर तूँ पंचे हमरे बात काहीं मनते हया, एखे कारन अधिकारिन अउर राजन के आँगे ठाढ़ कीन जइहा, उआ समय हमरे बारे माहीं उनहीं बतामँइ क निकहा मोका रही।<sup>10</sup> पय इआ जरूरी हय, कि पहिले परमातिमा के खुसी के खबर, सगली जातिअन के मनइन काहीं बताई जाय।<sup>11</sup> जब ऊँ पंचे तोंहई लइ जाइके उनखे आँगे ठाढ़ करँय, त पहिलेन से चिन्ता न किहा, कि हम कउनमेर से, इआ कि का कहब, पय जउन कुछ तोंहई उआ समय बताबा जाय, उहय कहा; काहेकि बोलँइ बाले तूँ पंचे न होइहा, बलकिन पबित्र आत्मा होई।<sup>12</sup> अउर भाई काहीं भाई, अउर बाप काहीं लड़िका, मार डारँइ के खातिर सभन म सउँपिहँय, अउर लड़िका-बिटिया महतारी-बाप के बिरोधी होइके मरबाय डरिहँय।<sup>13</sup> अउर हमरे बात काहीं मानँइ के कारन

सगले मनई तौहसे दुसमनी रखिहँय; पय जे कोऊ अन्त तक धीरज धरे रही, उहय मुक्ती पाई।

### सबसे भयानक संकट के समय

(मत्ती 24:15-28; लूका 21:20-24)

14 “एसे जब तूँ पंचे उआ भयानक अउर बिनास करई बाली चीज काहीं, जहाँ उचित नहिँ आय उहाँ ठाढ़ देख्या, (अउर पढ़ई बाला समझ लेय, कि एखर मतलब का हय) उआ समय जउन मनई यहूदिया प्रदेश माहीं होंय, त ऊँ पंचे पहारन माहीं भाग जाँय।<sup>15</sup> अउर जे कोऊ छत के ऊपर होय, उआ अपने घर से कुछ लेंड के खातिर नीचे न उतरय, न भितरय जाय;<sup>16</sup> अउर जऊँ मनई खेत माहीं होय, उआ आपन ओन्हा लेंड के खातिर पीछे न लउटय।<sup>17</sup> अउर ऊँ दिनन माहीं जउन मेहेरिआ लड़कहाई होइहँय, अउर जे कोऊ अपने लड़िकन काहीं दूध पिआबत होइहँय, त उनहीं पंचन काहीं खुब कस्ट होई।<sup>18</sup> अउर तूँ पंचे प्राथना करत रहा, कि इआ जाड़े के रित माहीं न होय।<sup>19</sup> काहेकि ऊँ दिन अइसन भारी दुख अउर कस्ट के होइहँय, कि जब से परमातिमा संसार काहीं बनाइन हीं, तब से लड़के अबय तक न कबहूँ भे आहीं, अउर न कबहूँ पुनि होइहँय।<sup>20</sup> अउर अगर प्रभू ऊँ दिनन काहीं कम न करते, त कउनव प्राणी न बाँचे पउतेँ, पय ऊँ मनइन के कारन जिनहीं परमातिमा चुनिन हीं, ऊँ दिनन काहीं घटाइन हीं।”<sup>21</sup> अउर उआ समय अगर कोऊ तौहसे कहय, कि “देखा, मसीह ‘इहाँ हें!’ इआ कि ‘उहाँ हें’, त उनखर बिसुआस बेलकुल न मान्या।”<sup>22</sup> काहेकि लबरे मसीह, अउर परमातिमा के सँदेस बतामँड बाले लबरे मनई तइआर होइहँय, अउर ऊँ पंचे बड़े-बड़े चिन्ह अउर अचरज के काम देखइहँय, कि होइ सकय त चुने मनइन काहीं घलाय भटकाय देंय,<sup>23</sup> पय तूँ पंचे सचेत रह्या; “देखा, हम तौहई पंचन काहीं सगली बातँय होंड से पहिलेन बताय दिहेन हय।”

### मनई के लड़िका के दुसराय आमँड के समय

(मत्ती 24:29-31; लूका 21:25-28)

24 “ऊँ दिनन माहीं उआ दुख अउर कस्ट के बाद सुरिज म एक्कव उँजिआर न रहि जई, अउर जौधइआ एक्कव उँजिआर न देई;<sup>25</sup> अउर अकास से तरइया गिरँय लगिहँय; अउर अकास के सगली चीजँय हलाई जइहँय।<sup>26</sup> तब लोग मनई के लड़िका काहीं बड़ी सामर्थ अउर महिमा के साथ बदरी म आबत देखिहँय।<sup>27</sup> उआ समय ऊँ अपने स्वरगदूतन काहीं पठइके, धरती के इआ छोर से लड़के अकास के उआ छोर तक, चारिव दिसन से, अपने चुने मनइन काहीं एकट्ठा करिहँय।”

### अंजीर के बिरबा के उदाहरन

(मत्ती 24:32-35; लूका 21:29-33)

28 अउर यीसु उनसे पुनि कहिन, कि “अंजीर के बिरबा से इआ सिच्छा ल्या, जब ओखर डेरइआ कोमर होइ जाती हई, अउर उनमा पत्ता निकरँड लागत हें, तब तूँ पंचे इआ जान लेते हया, कि गरमी के रित हरबिन आमँड बाली हय।<sup>29</sup> इहइमेर से जब तूँ पंचे ई सगली बातन काहीं होत देख्या, त इआ जान लिहा कि ऊँ अमइन बाले हें, बलकिन आइन गे हँय।<sup>30</sup> हम तौहसे सही कहित हएन, कि जब तक ई सगली बातँय न होइ जइहँय, तब तक इआ समय के मनइन के अन्त न होई।<sup>31</sup> धरती अउर अकास टर जइहँय, पय हमार कही बातँय कबहूँ न टरिहँय।”

### सतरक रहा

(मत्ती 24:36-44)

32 “उआ दिन अउर उआ समय के बारे माहीं कोऊ नहीं जानँय, न स्वरग के दूत, अउर न लड़िका, ओखे बारे माहीं केबल पिता परमातिमा भर जानत हें।<sup>33</sup> देखा, हमेसा सतरक रहा, अउर प्राथना करत रहा; काहेकि तूँ पंचे नहीं

जनते आह्या, कि उआ समय कबय आय जई? <sup>34</sup> मनई के लड़िका के आमँड के बारे माहीं एकठे उदाहरन हम तौहई बताइत हएन, एकठे मनई परदेस जाँड के पहिले, आपन सगला घर अपने सगले दासन काहीं देख-भाल करँड के खातिर बताइके: अउर हरेक दासन क काम बताइके, अउर चउकीदार काहीं जागत रहँड काहीं कहिके चला ग।<sup>35</sup> एसे हर समय सतरक रहा, काहेकि तूँ पंचे नहीं जनते आह्या, कि घर के मालिक कबय अई, साँझिके अई, इआ कि आधी रात अई, इआ कि मुरगा बोलँड के समय अई, इआ कि भिनसरहय अई।<sup>36</sup> अइसा न होय कि मालिक अचानक आइके तौहई सोबत पाबय।<sup>37</sup> अउर जउन बात हम तौहसे कहेन हय, उहय बात सबसे कहित हएन: सतरक रहा!”

### यीसु काहीं मारि डारँड के खातिर उपाय

(मत्ती 26:1-5; लूका 22:1-2; यूहन्ना 11:45-53)

14 दुइ दिना के बाद फसह अउर बिना खमीर के रोटी खाँड बाला तेउहार होंड बाला रहा हय। अउर प्रधान याजक लोग, अउर मूसा के बिधान सिखामँड बाले, इआ मोका के तलास माहीं रहे हँय, कि यीसु काहीं कइसन धोखे से पकड़िके मारि डारी; <sup>2</sup> पय ऊँ पंचे कहतव रहे हँय, कि “तेउहार के दिन अइसा करब ठीक नहिँ आय, कहँव अइसा न होय कि लोगन माहीं दंगा होइ जाय।”

### बैतनिय्याह गाँव माहीं यीसु के ऊपर अँतर डारब

(मत्ती 26:6-13; यूहन्ना 12:1-8)

<sup>3</sup> जब यीसु बैतनिय्याह गाँव माहीं समौन कोढ़ी के घर माहीं खाना खाँड बइठ रहे हँय, तबहिनय एकठे मेहेरिआ संगमरमर के बरतन माहीं, जटामाँसी के खुब महग सुद्ध अँतर लड़के आई; अउर बरतन के ढेक्कन खोलिके अँतर काहीं यीसु के मूँडे माहीं उडेल दिहिस। <sup>4</sup> पय जउन उहाँ खाँड बइठ रहे हँय, उनमा से कोऊ-कोऊ अपने मन म गुस्साइके कहँड लागें, “इआ अँतर काहीं काहे सत्यानास कइ दीनगा? <sup>5</sup> काहेकि इआ अँतर काहीं तीन सव चाँदी के सिक्कन † से जादा कीमत माहीं बँचिके, कंगालन काहीं बाँटा जाइ सकत रहा हय।” अउर ऊँ पंचे उआ मेहेरिआ काहीं डाँटँड लागें। <sup>6</sup> तब यीसु कहिन, “ओही छोंड घा, ओही काहे परेसान करते हया? उआ त हमरे साथ भलाइन किहिस ही। <sup>7</sup> कंगाल त तौहरे लघे हमेसा रइहँय, अउर जबहिन तूँ पंचे चइहा, तबहिन उनखे साथ भलाई कइ सकते हया; पय हम त तौहरे साथ हमेसा न रहब। <sup>8</sup> जऊँ कुछ उआ कइ सकत रही हय, उआ हमरे साथ किहिस; उआ हमरे मरे के बाद गाड़े जाँड के तयारी म, पहिलेन से हमरे देह माहीं अँतर लगाइस ही। <sup>9</sup> हम तौहसे सही कहित हएन, कि सगले संसार माहीं जहाँ कहँव इआ खुसी के खबर के प्रचार कीन जई, त ओखे इआ काम के चरचा घलाय ओखे यादगारी माहीं कीन जई।”

### यहूदा इस्करियोती के बिसुआस घात

(मत्ती 26:14-16; लूका 22:3-6)

<sup>10</sup> तब यहूदा इस्करियोती जऊँ बारा चलन म से रहा हय, उआ प्रधान याजकन के लघे जाइके कहिस, हम यीसु काहीं तौहरे हाँथ माहीं पकड़बाय देब। <sup>11</sup> ऊँ पंचे यहूदा इस्करियोती के इआ बात काहीं सुनिके खुसी होइगें, अउर यहूदा इस्करियोती काहीं इआ काम के बदले माहीं रुपिआ देँड के करार कइ लिहिन; अउर यहूदा इस्करियोती मोका ढूँँड लाग, कि यीसु काहीं कउनवमेर से उनखे हाँथ माहीं पकड़बाय देय।

### फसह के तेउहार माहीं चलन के साथ यीसु के आखिरी बिआरी

(मत्ती 26:17-25; लूका 22:7-14,21-23; यूहन्ना 13:21-30)

<sup>12</sup> बिना खमीर के रोटी खाँड बाले तेउहार के पहिलय दिन, जउने माहीं यहूदी लोग फसह के बलिदान करत रहे हँय, चेला लोग यीसु से पूँछिन,

† 13:14 दानि 9:27; 11:31

†† तीन सव दिनार, मतलब एकठे मनई के एक बरिस के मजूरी

“अपना कहाँ चाहित हएन, कि हम पंचे जाइके अपना के खातिर तेउहार के खाना तइआर करी?”<sup>13</sup> यीसु अपने चलन म से दुइ जनेन काहीं इआ कहिके पठइन, “सहर माहीं जा, एकठे मनई पानी से भरा गधरा लए तोहई मिली, ओखे पीछे चले जया; <sup>14</sup> अउर उआ जउने घर माहीं जाय, उआ घर के मालिक से कहा ‘गुरु कहिन हीं कि हमरे खातिर उआ घर कहाँ हय, जउने माहीं हम अपने चलन के साथ तेउहार के खाना खई?’ <sup>15</sup> उआ तोहई सजी-सजाई अउर तइआर कीन एकठे बड़ी काहीं अँटारी देखाय देई, उहँइ हमरे खातिर खाना तइआर किहा।” <sup>16</sup> दोनव चेला उहाँ से निकरिके सहर म गें, अउर जइसा यीसु उनसे कहिन तय, उहयमेर पाइन; अउर फसह के खाना तइआर किहिन।

<sup>17</sup> जब साँझ भय, तब यीसु बरहँव चलन के साथ उहाँ आएँ। <sup>18</sup> जब सगले जने खाना खात रहे हँय, तब यीसु कहिन, “हम तौहसे सही कहित हएन, कि तौहरेन बीच म से एक जने, जऊँ हमरे साथ माहीं खाना खात हय, हमहीं बिरोधी लोगन के हाँथ म पकड़बाई।” <sup>19</sup> इआ सुनिके चलन के ऊपर उदासी छाइगे, अउर सगले जने एक-एक कइके उनसे पूँछेँ लागें, “का उआ हम आहने?” <sup>20</sup> यीसु अपने चलन से कहिन, “उआ बरहँव म से एक जने आय, जऊँ हमरे साथ एकय टठिया माहीं खात हय। <sup>21</sup> मनई के लड़िका त जाबय करी, जइसन कि पबित्र सास्त्र माहीं ओखे बारे माहीं लिखा हय; पय जउन मनई धोखा दइके मनई के लड़िका काहीं पकड़ामँइ बाला हय, ओही परमातिमा से खुब सजा मिली: अउर अगर उआ मनई के जन्मय न होत, त ओखे खातिर इआ नीक होत।”

### प्रभु-भोज

(मत्ती 26:26-30; लूका 22:14-20; 1 कुरिन्थियन 11:23-25)

<sup>22</sup> जब यीसु अउर उनखर चेला लोग खात रहे हँय, तब यीसु एकठे रोटी लिहिन, अउर परमातिमा से आसीस मागिके टोरिन, अउर उनहीं दिहिन, अउर कहिन, “ल्या, इआ हमार देह आय।” <sup>23</sup> पुनि यीसु अंगूर के रस से भरा खोरबा लइके परमातिमा काहीं धन्यवाद दिहिन, अउर उनहीं दिहिन; अउर ऊँ सगले जने ओमा से पीन। <sup>24</sup> अउर यीसु उनसे कहिन, “इआ करार के हमार उआ खून आय, जऊँ खुब लोगन काहीं बचामँइ के खातिर बहाबा जई। <sup>25</sup> अउर हम तौहसे पंचन से सही कहित हएन, कि अंगूर के रस उआ दिना तक हम पुनि कबहूँ न पिअब, जब तक अपने पिता परमातिमा के राज माहीं, नबा अंगूर के रस न पी लेब।” <sup>26</sup> अउर पुनि ऊँ पंचे भजन गाइके जैतून के पहार माहीं चलेगें।

### पतरस के इनकार के बारे माहीं यीसु के भबिस्सबानी

(मत्ती 26:31-35; लूका 22:31-34; यूहन्ना 13:36-38)

<sup>27</sup> तब यीसु अपने चलन से कहिन, “तूँ पंचे सगले जन हमहीं छोंड़िके भाग जइहा, काहेकि पबित्र सास्त्र म लिखा हय, ‘हम चरबाहा काहीं मारब, अउर गाइर तितिर-बितिर होइ जइहँय।’ <sup>28</sup> पय हम मरेन म से जिन्दा होए के बाद, तौहसे मिलेँइ से पहिले गलील प्रदेस माहीं जाब।” <sup>29</sup> पतरस यीसु से कहिन, “अगर सगले जने बिसुआस से भटक जाँय त भटक जाँय, पय हम कबहूँ न भटकब।” <sup>30</sup> यीसु पतरस से कहिन, “हम तौहसे सही कहित हएन, कि आजय इहय रात माहीं मुरगा के दुइ बेर बोलँइ से पहिले, तूँ तीन बेरकी इनकार करिहा, कि हम यीसु काहीं नहीं जानी।” <sup>31</sup> पय पतरस अउर जोर दइके, उहय बात काहीं दुसराय कहिन, “अगर हमहीं अपना के साथय मरऊँ क परय, तऊँ हम अपना के इनकार न करब।” इहइमेर से अउर सगले चेला घलाय कहिन।

### गतसमनी नाम के जघा माहीं यीसु के प्राथना

(मत्ती 26:36-46; लूका 22:39-46)

<sup>32</sup> पुनि यीसु अपने चलन के साथ गतसमनी नाम के जघा माहीं गें, अउर ऊँ अपने चलन से कहिन, “जब तक हम प्राथना करब, त इहँय बइठ रह्या।”

<sup>33</sup> अउर यीसु पतरस अउर याकूब अउर यूहन्ना काहीं अपने साथ लइगें; अउर यीसु खुब उदास अउर ब्याकुल होइ लागें। <sup>34</sup> अउर उनसे कहिन, “हमार मन खुब उदास हय, लागत हय कि हम मर जाब: तूँ पंचे इहँय रुका, अउर जागत रहा।” <sup>35</sup> पुनि यीसु थोरी क अउर आँगे जाइके भूँइ माहीं मुँह झुकाइके प्राथना करँइ लागें, कि अगर होइ सकय, त इआ घरी हमरे ऊपर से टर जाय, <sup>36</sup> अउर कहिन, “हे अब्बा, हे पिता, अपना से सब कुछ होइ सकत हय; इआ भारी कस्ट काहीं हमसे दूर कइ देई: तऊँ जइसन हम चाहित हएन उआमेर नहीं, पय जइसन अपना चाहित हएन उहयमेर होय।” <sup>37</sup> यीसु पुनि चलन के लघे आएँ, अउर उनहीं सोबत पाइके पतरस से कहिन, “हे समौन, तूँ सोय रहे हया? काहे तूँ एक घरिव, नहीं जाग सकते आह्या? <sup>38</sup> तूँ पंचे सतरक रहा, अउर प्राथना करत रहा, कि जउने परिच्छन माहीं न परा। आत्मा त वास्तव माहीं तइआर हय, पय देह निबल ही।” <sup>39</sup> अउर यीसु पुनि जाइके उहयमेर प्राथना किहिन। <sup>40</sup> अउर यीसु आइके चलन काहीं पुनि सोबत पाइन, काहेकि ऊँ पंचे गहरी नींद म रहे हँय; अउर नहीं जानत रहे आँय, कि यीसु काहीं का जबाब देई। <sup>41</sup> पुनि यीसु तिसराय अपने चलन के लघे आइके, उनसे कहिन, कि “तूँ पंचे अब सोबत रहा, अउर अराम करा, देखा, मनई के लड़िका के पकड़बाए जाँइ के समय लघे आइगा हय, अउर मनई के लड़िका, पापी मनइन के हाँथ माहीं पकड़बा जई। <sup>42</sup> उठा, चली! देखा, हमार पकड़ामँइ बाला लघे आइगा हय।”

### यीसु काहीं धोखा दइके पकड़ारुब

(मत्ती 26:47-56; लूका 22:47-53; यूहन्ना 18:3-12)

<sup>43</sup> यीसु जब इआ कहतय रहे हँय, कि तबहिनय यहूदा इस्करियोती जऊँ बरहँव चलन म से रहा हय, अपने साथ प्रधान याजकन, अउर मूसा के बिधान सिखामँइ बाले लोगन, अउर यहूदी धारमिक अँगुअन के तरफ से एकठे बड़ी भीड़ लए तुरन्तय उहाँ पहुँचिगा, जऊँ तलबार अउर लाठी लए रहे हँय। <sup>44</sup> अउर यीसु काहीं पकड़ामँइ बाला यहूदा इस्करियोती, उनहीं पंचन काहीं एकठे चिन्हारी बताइस तय, कि: जिनखर हम चूमा लेब, उँइन यीसु आहीं, अउर तूँ पंचे उनहीं पकड़िके सावधानी से लइ जया। <sup>45</sup> अउर उआ हरबिन यीसु के लघे आइके कहिस, कि “हे रब्बी!” अउर उनहीं खुब चूमिस। <sup>46</sup> तब ऊँ पंचे यीसु काहीं पकड़ लिहिन। <sup>47</sup> तब यीसु के लघे जउन मनई ठाढ़ रहे हँय, उनमा से एक जने तलबार निकारिके महायाजक के दास के ऊपर चलाइके ओखर कान काट लिहिन, <sup>48</sup> यीसु भीड़ के मनइन से कहिन, “का तूँ पंचे डॉकू जानिके, हमहीं पकड़ँइ के खातिर तलबार अउर लाठी लइके आया हय? <sup>49</sup> हम त रोज मन्दिर माहीं तौहरे साथय म रहिके, परमातिमा के सँदेस सुनाबत रहे हएन, तब तूँ पंचे हमहीं गिरफतार नहीं किहा, पय इआमेर एसे भ, कि पबित्र सास्त्र माहीं लिखी बातँय पूर होय।” <sup>50</sup> यीसु काहीं पकड़तय चेला लोग उनहीं छोंड़िके भागिगें।

<sup>51</sup> एकठे नवजमान अपने नंगी देह माहीं चदरा भर ओढ़े यीसु के पीछे चला ग; पय जब कुछ जने ओहू काहीं पकड़िन। <sup>52</sup> त उआ चदरा छोंड़िके नंगय भागिगा।

### महासभा के आँगे यीसु

(मत्ती 26:57-68; लूका 22:54-55,63-71; यूहन्ना 18:13-14,19-24)

<sup>53</sup> ओखे बाद ऊँ पंचे यीसु काहीं महायाजक के लघे लइगें; अउर उहाँ सगले प्रधान याजक, अउर यहूदी धारमिक अँगुआ लोग, अउर मूसा के बिधान सिखामँइ बाले उनखे घर म एकट्टा भें। <sup>54</sup> अउर पतरस दूरिन-दूरी यीसु के पीछे-पीछे महायाजक के आँगे के भीतर तक गें, अउर सिपाहिन के साथ बइठिके आगी तापँय लागें। <sup>55</sup> प्रधान याजक लोग अउर सगली सभा के मनई यीसु काहीं मारि डारँइ के खातिर, उनखे खिलाफ गबाही ढूँढ़ँइ माहीं लगे रहे हँय। पय नहीं पाइन। <sup>56</sup> काहेकि खुब जने यीसु के खिलाफ गबाही देत रहे हँय, पय उनखर गबाही एकयमेर के नहीं रही। <sup>57</sup> तब कइयक जने ठाढ़ होइके, यीसु के खिलाफ इआ लबरी गबाही दिहिन, <sup>58</sup> कि “हम पंचे



यीसु काहीं इआ कहत सुनेन हय, कि 'हम मनइन के हाँथ के बनाए इआ मन्दिर काहीं गिराय देब, अउर तीन दिन माहीं दूसर बनाउब, जउन मनइन के हाँथ के बनाबा न होई।" 59 इहव बात माहीं उनखर गबाही एकयमेर के नहीं निकरी।

60 तब महायाजक बीच म ठाढ़ होइके यीसु से कहिन, "तूँ कउनव जबाब काहे नहीं देते आह्या? ई पंचे तोंहरे खिलाफ माहीं, का गबाही देत हें?" 61 पय यीसु चुप्पय रहें, अउर कुछ जबाब नहीं दिहिन। तब महायाजक उनसे पुनि पूँछिन, "का तूँ परमप्रधान परमातिमा के लड़िका मसीह आह्या?" 62 यीसु कहिन, "हम आहेन: अउर तूँ पंचे मनई के लड़िका काहीं सर्बसक्तिमान परमातिमा के दहिने कइती बइठे, अउर अकास के बदरिन के साथ आबत देखिहा।" 63 तब महायाजक आपन ओन्हा फारिन अउर कहिन, "अब हमहीं गबाही के कउनव जरूरत नहीं आय? 64 तूँ पंचे परमातिमा के इआ बुराई सुने हया, तोंहार पंचन के का राय ही?" ऊँ सगले जने कहिन, यीसु मारि डारँइ के काबिल हें। 65 तब कुछ जने यीसु के ऊपर थूँकइ लागें, अउर कुछ जने उनखर आँखी मूदिके उनहीं घूँसा मारिके कहँइ लागें, "भबिस्सबानी करा, तोंहई को मारिस ही!" अउर सिपाही लोग यीसु काहीं पकड़िके थापड़ मारिन।

#### पतरस के इनकार करब

(मत्ती 26:69-75; लूका 22:56-62; यूहन्ना 18:15-18,25-27)

66 जब पतरस नीचे अँगना माहीं बइठ रहे हँय, तब महायाजक के दासिन म से एकठे उहाँ आई। 67 अउर पतरस काहीं आगी तापत देखिके, एकटक निहारत रहिगे, अउर कहँइ लाग, "तुहँ नासरत गाँव के रहँइ बाले यीसु के साथय म रहे हया।" 68 पय पतरस इनकार कइके कहिन, "हम न जनतय आहेन अउर न समझतय आहेन, कि तूँ का कहते हया।" ओखे बाद पतरस बहिरे डेहरी म गें; अउर मुरगा बोल उठा। 69 उआ दासी पतरस काहीं देखिके उनसे जऊँ उनखे लघे ठाढ़ रहे हँय पुनि कहँइ लाग, "ई यीसु के लघे रहँइ बालेन म से एक जने आहीं।" 70 पय पतरस पुनि इनकार कइ दिहिन, कुछ देर बाद ऊँ पंचे जउन पतरस के लघे ठाढ़ रहे हँय, पुनि पतरस से कहिन, "निश्चित तूँ यीसु के साथी लोगन म से एक जन आह्या; काहेकि तूँ गलील प्रदेश के रहँइ बाले आह्या।" 71 तब पतरस खुद काहीं धिक्कारँय लागें, अउर कसम खाँइ लागें, हम सही कहित हएन, अगर झूँठ बोली त परमातिमा हमहीं दन्ड देंय, "हम उआ मनई काहीं जेखे बारे म तूँ पंचे कहते हया, नहीं जानी।" 72 अउर हरबिन मुरगा दुसराय बोलिस, तब पतरस काहीं उआ बात, जऊँ यीसु कहिन तय याद आइगे: "मुरगा के दुइ बेर बोलँइ से पहिले तूँ तीन बेरकी हमहीं इनकार करिहा।" अउर पतरस उआ बात काहीं सुधि कइके रोमँइ लागें।

#### राजपाल पिलातुस के आँगे यीसु

(मत्ती 27:1-2,11-14; लूका 23:1-5; यूहन्ना 18:28-38)

15 भिनसार होतय तुरन्तय प्रधान याजक लोग, यहूदी धारमिक अँगुआ लोग, अउर मूसा के बिधान सिखामँइ बाले, अउर महासभा के सगले मनई सलाह कइके यीसु काहीं बँधबाइन, अउर उनहीं लइ जाइके राजपाल पिलातुस के हाँथ म सउँप दिहिन। 2 राजपाल पिलातुस यीसु से पूँछिन, "का तूँ यहूदी लोगन के राजा आह्या?" तब यीसु उनहीं जबाब दिहिन, "तूँ खुदय कहते हया।" 3 अउर प्रधान याजक लोग यीसु के ऊपर खुब बातन के दोस लगाबत रहे हँय। 4 राजपाल पिलातुस यीसु से पुनि पूँछिन, "तूँ काहे कुछ जबाब नहीं देते आह्या, देखा, ई पंचे तोंहरे ऊपर केतनी बातन के दोस लगाबत हें?" 5 यीसु पुनि कुछ जबाब नहीं दिहिन; एसे राजपाल पिलातुस खुब अचरज मानिन।

#### यीसु काहीं मारि डारँइ के हुकुम

(मत्ती 27:15-26; लूका 23:13-25; यूहन्ना 18:39—19:16)

6 राजपाल पिलातुस उआ तेउहार माहीं एकठे कइदी काहीं, जेही उनखे राज के लोग चाहत रहे हँय, उनखे खातिर छोंड़ि देत रहे हँय। 7 बरअब्बा नाम के एकठे मनई भीड़ म दंगा फसाद करँइ बाले ऊँ मनइन के साथ जेल माहीं बंद रहा हय, जे कोऊ उआ दंगा माहीं कतल किहिन तय। 8 अउर भीड़ के कुछ जने ऊपर जाइके राजपाल पिलातुस से बिनती कइके कहिन, कि जइसन हरेक तेउहार माहीं, अपना हमरे पंचन के खातिर करत रहे हएन, उहयमेर करी। 9 राजपाल पिलातुस उनहीं जबाब दिहिन, "का तूँ पंचे चहते हया, कि हम तोंहरे खातिर यहूदी लोगन के राजा काहीं छोंड़ि देई?" 10 काहेकि राजपाल इआ जानत रहे हँय, कि प्रधान याजक लोग यीसु काहीं जलन के कारन पकड़ाइन हीं। 11 पय प्रधान याजक लोग भीड़ के मनइन के कान भरिन, कि कहा राजपाल पिलातुस बरअब्बा काहीं हमरे पंचन के खातिर छोंड़ि देंय। 12 इआ सुनिके राजपाल पिलातुस भीड़ के मनइन से पुनि पूँछिन, "तूँ पंचे जेही यहूदी लोगन के राजा कहते हया, ओही हम का करी?" 13 ऊँ पंचे पुनि चिल्लाने, "ओही क्रूस माहीं चढ़ाय द्या।" 14 राजपाल पिलातुस उनसे पुनि कहिन, "काहे, ऊँ कउन अपराध किहिन हीं?" पय ऊँ पंचे अउर चिल्लाँइ लागें, "ओही क्रूस म चढ़ाबा!" 15 तब राजपाल पिलातुस भीड़ के मनइन काहीं खुस करँइ के खातिर, बरअब्बा काहीं उनखे खातिर छोंड़ि दिहिन, अउर यीसु काहीं चाबुक से मरबाइके, उनहीं पंचन काहीं सउँप दिहिन, कि उनहीं क्रूस माहीं चढ़ाबा जाय।

#### सिपाहिन के वदारा यीसु के निरादर

(मत्ती 27:27-31; यूहन्ना 19:2-3)

16 सिपाही यीसु काहीं किला के भीतर अँगना म लइगें, जऊँ प्रीटोरियुम कहाबत रहा हय, अउर सगली पलटन काहीं बोलाय लाएँ। 17 तब सिपाही लोग यीसु काहीं बैगनी रंग के ओन्हा पहिराइन, अउर काँटन काहीं गुँथिके मुकुट बनाइके यीसु के मूँडे माहीं धरिन, 18 अउर इआ कहिके यीसु काहीं नबस्कार करँइ लागें, "हे यहूदी लोगन के राजा नबस्कार!" 19 सिपाही लोग यीसु के मूँडे माहीं सरकन्डा के लाठी मारत रहे हँय, अउर यीसु के ऊपर थूँकत रहे हँय, अउर गोड़न गिरिके यीसु काहीं नबस्कार करत रहिगें। 20 अउर जब ऊँ पंचे यीसु के मजाक उड़ाय चुकें, तब उनखर बैगनी रंग के ओन्हा उतरबाइके उनहिन के ओन्हा पहिराय दिहिन; अउर उनहीं क्रूस माहीं चढ़ामँइ के खातिर बहिरे लइगें।

#### यीसु काहीं क्रूस म चढ़ाउब

(मत्ती 27:32-44; लूका 23:26-43; यूहन्ना 19:17-27)

21 सिकन्दर अउर रूफुस के बाप समौन, जउन कुरेन सहर के रहँइ बाला आय, उआ गाँव कइती से चला आबत रहा हय, त ओहिनठे से निकरा; त ऊँ पंचे ओही बेगार माहीं पकड़िन, कि उआ यीसु के क्रूस उठाइके लइ चलय। 22 अउर ऊँ पंचे यीसु काहीं गुलगुता नाम के जघा माहीं लइ आएँ, जेखर मतलब हय "खोपड़ी के जघा"। 23 उहाँ यीसु काहीं पीरा कम करँइ बाली मुर दबाई अंगूर के रस माहीं मिलाइके देंइ लागें, पय यीसु नहीं लिहिन। 24 तब ऊँ पंचे यीसु काहीं क्रूस माहीं चढ़ाइन, अउर उनखे ओन्हन के खातिर परची डारिके, कि केही का मिली, आपस माहीं बाँटि लिहिन। 25 अउर सकारे नव बजे के करीब ऊँ पंचे यीसु काहीं क्रूस माहीं चढ़ाइन। 26 अउर उनखर अरोप-पत्र लिखिके उनखे ऊपर लगाय दीनगा, कि "यहूदी लोगन के राजा।" 27 अउर ऊँ पंचे यीसु के साथ दुइठे डँकुअन काहीं एकठे क यीसु के दहिने कइती, अउर दुसरे काहीं बाएँ कइती, क्रूस माहीं चढ़ाइन। 28 †(तब पबित्र सास्त्र के उआ बचन कि यीसु अपराधिन के साथ गिने गें, पूर भा।) 29 अउर उआ गइल से जाँइ बाले मूड़ हलाय-हलाइके, अउर इआ कहिके

† 15:28 यसा 53:12

यीसु के बुराई करत रहे हैं, कि "बाह! मन्दिर काहीं गिरामँड बाले, अउर तीन दिना माहीं बनामँड बाले, <sup>30</sup> कूस से उतरिके खुद काहीं बचाय ले।" <sup>31</sup> इहइमेर से प्रधान याजक लोग घलाय, मूसा के बिधान सिखामँड बालेन समेत, आपस माहीं मजाक उड़ाइके कहत रहे हैं, "इआ त दुसरेन काहीं बचाइस, पय खुद काहीं नहीं बचाय सकय, <sup>32</sup> इजराइल देस के राजा, मसीह, अब कूस से उतरि आबय, कि हम पंचे देखिके बिसुआस करी।" अउर जउन उनखे साथ कूस माहीं चढ़ाए गे रहे हैं, ऊँ पंचे घलाय उनखर बुराई करत रहे हैं।

### यीसु के प्रान छोड़ब

(मत्ती 27:45-56; लूका 23:44-49; यूहन्ना 19:28-30)

<sup>33</sup> अउर दुपहर बारा बजे से लइके, तीन बजे तक सगले देस माहीं अँधिआर छाबा रहिगा। <sup>34</sup> दिन के तीन बजे के करीब यीसु खुब चंडे चिल्लाइके कहिन, "इलोई, इलोई, लमा सबक्तनी?" जेखर मतलब हय "हे हमार परमातिमा, हे हमार परमातिमा अपना हमहीं काहे छोड़ि दिहेन?" <sup>35</sup> जउन मनई उनखे लघे ठाढ़ रहे हैं, उनमा से कुछ जने इआ सुनिके कहिन, "देखा, ई एलिय्याह नबी काहीं गोहराबत हैं।" <sup>36</sup> अउर एक जने दउड़िके सोक्खा क लइके सिरका माहीं बोरिस, अउर सरकन्डा के लाठी माहीं धइके यीसु काहीं चुहकाइस, अउर कहिस, "रुकि जा, हम पंचे देखी, एलिय्याह नबी एही कूस से उतारें के खातिर आबत हैं, कि नहीं।" <sup>37</sup> तब यीसु खुब चन्डे चिल्लाइके प्रान छोड़ दिहिन। <sup>38</sup> अउर मन्दिर के परदा ऊपर से नीचे तक, फाटिके दुइ टुकड़ा होइगा। <sup>39</sup> जऊँ सुबेदार यीसु के आँगे ठाढ़ रहा हय, जब उआ यीसु काहीं इआमेर चिल्लाइके प्रान छोड़त देखिस, त उआ कहिस, "वास्तव माहीं ई मनई, परमातिमा के लड़िका आहीं!" <sup>40</sup> कइयकठे मेहेरिआ घलाय दूरिन से देखत रही हैं: उनमा मगदल गाँव के मरियम, छोटै याकूब अउर योसेस के महतारी मरियम, अउर सलोमी रही हैं। <sup>41</sup> जब यीसु गलील प्रदेश म रहे हैं, तबहिनव ई मेहेरिआ यीसु के पीछे चलत रही हैं, अउर यीसु के सेबा-टहल करत रही हैं; अउर दुसरव खुब मेहेरिआ रही हैं, जउन यीसु के साथ यरूसलेम सहर माहीं आई तय।

### यीसु काहीं गाड़ा जाब

(मत्ती 27:57-61; लूका 23:50-56; यूहन्ना 19:38-42)

<sup>42</sup> जब साँझ भय, तब एसे कि तइआरी करँड के दिन रहा हय, जउन पबित्र दिन के एक दिना पहिले होत रहा हय, <sup>43</sup> अरमतिया गाँव के रहँड बाले यूसुफ आएँ, जउन महासभा के सम्मानित सदस्सव रहे हैं, अउर खुदव परमातिमा के राज आमँड के इन्तजार करत रहे हैं। ऊँ ढाढस कइके राजपाल पिलातुस के लघे जाइके यीसु के लहास माँगिन। <sup>44</sup> राजपाल पिलातुस अचरज मानिन, कि यीसु एतनी जल्दी मरिगें; अउर अपने सुबेदार काहीं बोलाइके पूँछिन, "का यीसु काहीं मरे कुछ देर होइगे?" <sup>45</sup> जब राजपाल पिलातुस अपने सुबेदार से सगला हाल जान लिहिन, तब यीसु के लहास यूसुफ काहीं देबाय दिहिन। <sup>46</sup> तब यूसुफ मखमल के एकठे चदरा मोल खरीदिन, अउर यीसु के लहास क कूस से उतारिके उआ चदरा माहीं लपेटिन, अउर एकठे कब्र म, जऊँ पथरा के चट्टान माहीं खोदी गे रही हय, ओहिन म धरिन, अउर कब्र के दुआरा माहीं एकठे खुब बड़ा पथरा ढनगाइके बंद कइ दिहिन। <sup>47</sup> अउर मगदल गाँव के मरियम, अउर योसेस के महतारी मरियम देखत रही हैं, कि यीसु काहीं कहाँ धरा ग हय।

### मरेन म से यीसु जिन्दा होइगें

(मत्ती 28:1-8; लूका 24:1-12; यूहन्ना 20:1-10)

**16** जब पबित्र दिन बीतिगा, तब मगदल गाँव के मरियम, अउर याकूब के महतारी मरियम, अउर सलोमी महकँड बाली चीजन काहीं खरीदिन, कि जाइके यीसु के देह माहीं मलँय। <sup>2</sup> हप्ता के पहिलय दिन बडे

सकारे, जब सुरिज निकरबय भ रहा हय, ऊँ पंचे कब्र के लघे आई। <sup>3</sup> अउर आपस माहीं बतात रही हैं, कि "हमरे खातिर कब्र के दुआरा से उआ पथरा को ढनगाई?" <sup>4</sup> जब ऊँ पंचे ध्यान से कबर कइती देखिन, त पथरा ढनगा रहा हय! जबकि उआ पथरा खुब बड़ा रहा हय। <sup>5</sup> अउर कब्र के भीतर जाइके ऊँ पंचे एकठे नवजमान काहीं उजर ओन्हा पहिरे, दहिने कइती बइठे देखिन, त चउआय गई। <sup>6</sup> उआ नवजमान उनसे कहिस, "चउ आ न, तूँ पंचे नासरत गाँव के रहँड बाले यीसु काहीं ढूँढते हया, जउन कूस माहीं चढ़ाए गे रहे हैं, ऊँ जिन्दा होइगे हैं, इहाँ नहीं आहीं; देखा, इहय उआ जघा आय, जहाँ ऊँ पंचे यीसु काहीं धरिन तय। <sup>7</sup> पय तूँ पंचे जा, अउर उनखे चलन से अउर पतरस से बताबा, कि यीसु तौहसे पहिले गलील प्रदेश माहीं जइहँय, जइसा ऊँ तौहसे कहिन तय, तूँ पंचे उहँय उनहीं देखिहा।" <sup>8</sup> अउर ऊँ सगली जने कब्र से निकरिके भाग गई; काहेकि कँप कँपी अउर घबराहत उनखे ऊपर छाइगे रही हय; अउर ऊँ पंचे कोहू से कुछ नहीं कहिन, काहेकि डेरात रही हैं।

### मगदल गाँव के मरियम काहीं यीसु देखाई दिहिन

(मत्ती 28:9-10; यूहन्ना 20:11-18)

<sup>9</sup> हप्ता के पहिल दिन भिनसार होतय, यीसु जिन्दा होइके, सबसे पहिले मगदल गाँव के मरियम काहीं, जउने से सातठे बुरी आत्मन काहीं निकारिन तय, देखाई दिहिन। <sup>10</sup> ऊँ जाइके यीसु के साथ म रहँड बालेन काहीं जऊँ खुब दुखी रहे हैं, अउर रोबत रहे हैं, यीसु के जिन्दा होय के खबर दिहिन। <sup>11</sup> पय ऊँ सगले जन इआ सुनिके कि यीसु जिन्दा हैं, अउर मगदल गाँव के मरियम उनहीं देखिन हीं, बिसुआस नहीं किहिन।

### दुइठे चलन काहीं यीसु देखाई दिहिन

(लूका 24:13-35)

<sup>12</sup> ओखे बाद यीसु दुसरे रूप माहीं, चलन म से दुइ जनेन काहीं, जब ऊँ पंचे गाँव कइती जात रहे हैं, देखाई दिहिन। <sup>13</sup> उनहूँ पंचे जाइके दुसरे चलन काहीं इआ खबर दिहिन, पय ऊँ पंचे उनहूँ के बिसुआस नहीं मानिन।

### ग्यरहँव चलन काहीं यीसु देखाई दिहिन

(मत्ती 28:16-20; लूका 24:36-49; यूहन्ना 20:19-23; खास चलन 1:6-8)

<sup>14</sup> बाद म यीसु ऊँ ग्यरहँव चलन काहीं घलाय, जब ऊँ पंचे खाँड बइठ रहे हैं, तबहिनय देखाई दिहिन, अउर उनखे बिसुआस न करँड, अउर दिल कठोर करँड के कारन उलाहना दिहिन, काहेकि जेतने जने यीसु काहीं जिन्दा होए के बाद देखिन रहा हय, ई पंचे, उनहूँ केर बिसुआस नहीं किहिन तय। <sup>15</sup> अउर यीसु अपने चलन से कहिन, "तूँ पंचे सगले संसार माहीं जाइके, सगले संसार के मनइन काहीं खुसी के खबर सुनाबा। <sup>16</sup> जे कोऊ बिसुआस करी, अउर बपतिस्मा लेई ओहिन काहीं मुक्ती मिली, पय जे कोऊ बिसुआस न करी, उआ दोसी ठहराबा जई। <sup>17</sup> बिसुआस करँड बालेन म इआ अदभुत चिन्हारी होई, कि ऊँ पंचे हमरे नाम से बुरी आत्मन काहीं निकरिहँय, अउर नई-नई भाँसा बोलि हँय, <sup>18</sup> साँपन काहीं उठाय लेइहँय, अउर अगर ऊँ पंचे जहर बाली चीजन काहीं खाय लेइहँय, तऊ उनहीं कुछ नुकसान न होई; ऊँ पंचे बिमारन के ऊपर हाँथ धइ देइहँय, त ऊँ नीक होइ जइहँय।"

### यीसु के स्वरग जाब

(लूका 24:50-53; खास चलन 1:9-11)

<sup>19</sup> प्रभू यीसु चलन से बात करे के बाद स्वरग माहीं ऊपर उठाय लीन गें, अउर जाइके परमातिमा के दहिने कइती बइठिगें। <sup>20</sup> अउर चेला लोग उहाँ से निकरिके हरेक जघन माहीं प्रचार किहिन, अउर प्रभू उनखे साथ माहीं काम करत रहिगें, अउर ऊँ चमत्कारन के कारन, जऊँ चलन के साथ-साथ होत रहे हैं, बचन काहीं मजबूत करत रहिगें। आमीन।

# लूका

## इआ किताब के परिचय

लूका के लिखी खुसी के खबर माहीं, यीसु काहीं परमातिमा के वादा के मुताबिक इजराइली लोगन काहीं मुक्ती देंइ बाले, अउर सगले मनइन काहीं घलाय मुक्ती देंइ बाले दोनव मेर से बखान कीन ग हय। लूका इहव लिखिन हीं, कि यीसु काहीं, “कंगालन क खुसी के खबर सुनामँइ के खातिर” प्रभू के आत्मा बोलाइस रहा हय। इहय कारन से इआ खुसी के खबर हरेक मेर के परेसानिन माहीं परे लोगन के खातिर चिन्तन से भरा परा हय। लूका के लिखी खुसी के खबर माहीं आनन्द के भाव के घलाय प्रधानता हय, खास करके सुरुआत के पाठन माहीं, जउने माहीं यीसु के आमँइ के घोसना कीन गे ही, अउर आखिर माहीं घलाय जहाँ यीसु के स्वरग जाँय के बखान हय। यीसु के स्वरग जाँइ के बाद मसीही बिसुआस के बढँइ के बखान, ईन लेखक “खास चलन के काम” नाम के किताब माहीं किहिन हीं।

कुछ बातँय केबल इहय खुसी के खबर माहीं पाई जाती हँय। उदाहरन के खातिर, यीसु के पइदा भए माहीं स्वरगदूतन के गीत गाउब, गड़रिअन के यीसु काहीं देखँइ जाब, यरूसलेम मन्दिर माहीं लड़िका यीसु, अउर दयालू सामरी, अउर उड़ाऊ लड़िका के उदाहरन आदि। सगले खुसी के खबर माहीं प्राथना, पबित्र आत्मा, यीसु के व्दारा लोगन के सेवा माहीं मेहेरिअन के सहयोग, अउर परमातिमा के व्दारा पापन के माफी के ऊपर खुब जादा जोर दीनगा हय। अपना पंचन से इआ बिनती हय, कि अपना पंचे इआ खुसी के खबर काहीं बड़े ध्यान से पढ़ी, अउर एहिन के मुताबिक जीवन बिताई, त अपना पंचन काहीं परमातिमा से खुब आसीस मिली।

रूप-रेखा :

परिचय

यूहन्ना बपतिस्मा देंइ बाले अउर यीसु के जनम अउर बचपन

यूहन्ना बपतिस्मा देंइ बाले के लोगन के सेवा

यीसु के बपतिस्मा अउर परिच्छा

गलील प्रदेश माहीं यीसु के व्दारा लोगन के सेवा

गलील प्रदेश से यरूसलेम सहर तक यात्रा

यरूसलेम सहर माहीं अन्तिम हप्ता

प्रभू के दुसराय जिन्दा होब, देखाई देब, अउर स्वरग काहीं जाब

## परिचय

1 आदरनीय थियुफिलुस, यीसु मसीह के बारे माहीं जउन घटना हमरे बीच माहीं घटी हँय, उनखर बखान खुब जने लिखँइ के कोसिस किहिन हीं।<sup>2</sup> उहय जानकारी हमहीं परमातिमा के ऊँ सेबकन के व्दारा मिली हय, जउन ई बातन काहीं होत अपने आँखिन से देखिन तय।<sup>3</sup> तब यीसु मसीह के बारे माहीं जउन घटना घटी हँय, सुरुआत से उनहीं निकहा से जाँचे-परखे के बाद हम इआ निरनय लिहेन हय, कि इनखे बारे माहीं बड़े ध्यान से अउर क्रम से तौहई लिखी।<sup>4</sup> जउने तूँ इआ समझ ल्या, कि जउने बातन के सिच्छा तोहई दीनगे ही; उहय कबहूँ न बदलँइ बाली अउर सत्य आय।

## यूहन्ना बपतिस्मा देंइ बाले के जनम के घोसना

<sup>5</sup> यहूदिया प्रदेश के राजा हेरोदेस के सासन करँइ के समय माहीं अबिय्याह के दल माहीं, जकरयाह नाम के एकठे याजक रहे हँय, अउर उनखर मेहेरिआ हारून के बंस के रही ही, जेखर नाम इलीसिबा रहा हय।<sup>6</sup> ऊँ दोनव परमातिमा के नजर माहीं धरमी रहे हँय, अउर प्रभू के सगले हुकुमन अउर नेमन काहीं बिना गलती किहे निकहा से मानत रहे हँय।<sup>7</sup> उनखे एकवठे लड़िका-बच्चा नहीं भें तय, काहेकि इलीसिबा के लड़िका-बच्चा नहीं होत रहे आँय, अउर ऊँ दोनव जन बुढाय गें तय।

<sup>8</sup> जब जकरयाह अपने दल के ओसरी माहीं, परमातिमा के मन्दिर माहीं याजक के काम करत रहे हँय,<sup>9</sup> तबहिनय याजकन के रीति के मुताबिक उनखे नाम चिट्ठी निकरी, कि ऊँ प्रभू के मन्दिर माहीं जाइके धूप जलामँइ।<sup>10</sup> धूप जलामँइ के समय लोगन के सगली मन्डली बहिरे प्राथना करत रही हय।<sup>11</sup> उहय समय प्रभू के एकठे स्वरगदूत धूप जलामँइ के बेदी के दहिने कइती जकरयाह काहीं ठाढ़ देखाने।<sup>12</sup> तब जकरयाह स्वरगदूत काहीं देखिके घबराइगें, अउर ऊँ खुब डेराइगें।<sup>13</sup> पय स्वरगदूत उनसे कहिन, “हे जकरयाह, डेरा न, काहेकि तौहार प्राथना सुन लीनगे ही; अउर तौहरे मेहेरिआ इलीसिबा से तौहरे खातिर एकठे लड़िका पइदा होई, अउर तूँ ओखर नाम यूहन्ना धराया।<sup>14</sup> तोहई आनन्द अउर खुसी मिली: अउर खुब जने ओखे जनम के कारन आनन्दित होइहँय,<sup>15</sup> काहेकि उआ प्रभू के नजर माहीं महान होई; अउर अंगूर के रस, अउर मदिरा कबहूँ न पी; अउर अपने महतारी के गरभय माहीं पबित्र आत्मा से भर जई;<sup>16</sup> अउर इजराइलिअन म से खुब मनइन काहीं जउन भटक गे रहे हँय, उनहीं प्रभू परमातिमा कइती लउटाय लई।<sup>17</sup> उआ एलिय्याह कि नाई आत्मा माहीं मजबूत बनिके, अउर सामर्थ के साथ प्रभू के आँगे-आँगे चली, कि महतारी-बाप अउर लड़िकन-बच्चन माहीं मेल-जोल कराय देय; अउर परमातिमा के हुकुम न मानँइ बालेन काहीं धरमिन कि नाई समझदार बनाय देय; अउर प्रभू के खातिर प्रभू के हुकुम मानँइ बाले लोग तइआर करय।”

18 इआ सुनिके जकरयाह स्वरगदूत से पूँछिन, “इआ हम कइसा जानब? काहेकि हम त बुढाय गएन हय; अउर हमार मेहेरिअव बुढाइगे ही।”

19 स्वरगदूत उनहीं जबाब दिहिन, “हम जिब्राईल आहेन, जउन परमातिमा के लघे हमेसा रहित गएन; अउर हम तौहसे बात करँइ, अउर इआ खुसी के खबर सुनामँइ के खातिर पठए गएन हँय। 20 देखा, जउने दिन तक ई बातँय पूर न होइ जइहँय, उआ दिन तक तूँ गूँगा रइहा, अउर बोले न पइहा, एसे कि तूँ हमरे बातन के बिसुआस नहीं किहा आय, जउन अपने समय माहीं पूर होइहँय।” 21 सगले जने जकरयाह के लउटँय के इन्तजार करत रहे हँय, अउर अचरज मानिन, कि उनहीं मन्दिर माहीं एतनी देर काहे लगिगे। 22 जब जकरयाह बहिरे आएँ, त उनसे कुछ बोल न सकें: तबहिनय ऊँ पंचे जानिगें, कि ऊँ मन्दिर माहीं कउनव दरसन पाइन हीं; अउर जकरयाह उनसे इसारा करत रहिगें, काहेकि ऊँ गूँगा होइगें तय। 23 जब उनखे सेबा करँइ के दिन पूर होइगें, तब जकरयाह अपने घर चलेगें।

24 कुछ दिनन के बाद उनखर मेहेरिआ इलीसिबा लड़कहाई भई; अउर पाँच महीना तक अपने काहीं इआ सोचिके लुकाए रहि गई, 25 कि “मनइन माहीं हमार अपमान दूर करँइ के खातिर, प्रभू ई दिनन माहीं किरपा कइके हमरे खातिर अइसा काम किहिन हीं।”

### यीसु के जनम के घोसना

26 छठएँ महीना माहीं परमातिमा अपने कइती से जिब्राईल स्वरगदूत काहीं, गलील प्रदेश के नासरत सहर माहीं, 27 एकठे कुमारी के लघे पठइन, जिनखर सगाई यूसुफ से होइगे रही हय, जउन राजा दाऊद के कुल के रहे हँय: उआ कुमारी के नाम मरियम रहा हय। 28 स्वरगदूत उनखे लघे भीतर आइके कहिन, “आनन्द अउर जय तौहार होय, जेखे ऊपर परमातिमा के किरपा भे ही! प्रभू तौहरे साथ हें।” 29 मरियम इआ बात से खुब घबराय गई, अउर सोचँइ लागीं, कि इआ कउनमेर के अभिबादन आय? 30 स्वरगदूत उनसे कहिन, “हे मरियम, डेरा न, काहेकि परमातिमा के किरपा तौहरे ऊपर भे ही। 31 देखा, तूँ लड़कहाई होइहा, अउर तौहरे एकठे लड़िका पइदा होई; तूँ ओखर नाम यीसु धराया। 32 उआ लड़िका महान होई, अउर परमप्रधान परमातिमा के बेटबा कहाई; अउर प्रभू परमातिमा ओखे पूरबज राजा दाऊद के राजगद्दी ओही देइहँय, 33 अउर उआ याकूब के घराना के ऊपर सब दिन राज करी; अउर ओखे राज के कबहूँ अन्त न होई।” 34 मरियम स्वरगदूत से कहिन, “इआ कइसन होई, हम त अबय कुमारी हएन, अउर कउनव मंसेरुआ काहीं नहीं जानी।” 35 स्वरगदूत मरियम काहीं जबाब दिहिन, “पबित्र आत्मा तौहरे ऊपर उतरी, अउर परमप्रधान परमातिमा के सामर्थ तौहरे ऊपर छाया करी; एसे उआ पबित्र जऊँ पइदा होई बाला हय, परमातिमा के लड़िका कहाई। 36 अउर सुना, तौहरे कुटुम्बिनी इलीसिबा के घलाय बुढाईदार लड़िका होई बाला हय, इआ ओखर, जऊँ बिना सन्तान के कहाबत रही हय, छठमँ महीना आय। 37 काहेकि परमातिमा के खातिर कुछ असम्भव नहिँ आय।” 38 मरियम कहिन, “देखा, हम त प्रभू के दासी आहेन, हमहीं तौहरे बचन के मुताबिक होय।” तब स्वरगदूत मरियम के लघे से चलेगें।

### मरियम के इलीसिबा से मिलँइ जाब

39 कुछ दिनन के बाद मरियम यहूदा प्रदेश के पहारी इलाका के एकठे सहर माहीं गई, 40 अउर जकरयाह के घर माहीं पहुँचिके इलीसिबा काहीं नबस्कार किहिन। 41 जइसय इलीसिबा मरियम के नबस्कार सुनिन, तइसय बच्चा उनखे पेटे माहीं कूद, अउर इलीसिबा पबित्र आत्मा से भर गई। 42 अउर उँइ खुब तेज से बोलिके कहिन, “तूँ सगली मेहेरिअन माहीं धन्य हया, अउर तौहरे पेटे के बच्चा धन्य हय। 43 अउर हमरे ऊपर एतनी बड़ी इआ किरपा कहाँ से होइगे, कि हमरे प्रभू के महतारी हमरे लघे आई हँय? 44 देखा, जइसय तौहरे नबस्कार के बोल हमरे कानन माहीं सुनान, तइसय बच्चा हमरे पेटे माहीं मारे खुसी के कूदँइ लाग। 45 धन्य हय, उआ मनई

जउन बिसुआस करत हय, कि जऊँ बातँय प्रभू के तरफ से ओसे कही गई हँय, ऊँ पूर होइहँय!”

### मरियम के स्तुति गान

46 तब मरियम कहिन, “हम पूरे मन से प्रभू के बड़ाई करित हएन। 47 अउर हमार आत्मा हमहीं मुक्ती देई बाले परमातिमा से आनन्दित भे ही, 48 काहेकि परमातिमा अपने दासी के दीनता माहीं किरपा किहिन हीं; एसे देखा, अब से लइके जुगन-जुगन तक सगले मनई हमहीं धन्य कइहँय, 49 काहेकि ऊँ सर्वसक्तिमान परमातिमा, हमरे खातिर बड़े-बड़े काम किहिन हीं। उनखर नाम पबित्र हय। 50 अउर परमातिमा के दया उनखे ऊपर, जऊँ उनखे बातन काहीं मानत हें, पीढ़ी से पीढ़ी तक होत रहत ही। 51 परमातिमा अपने सामर्थ से खुब बड़ा काम कइके, जऊँ अपने काहीं बड़ा मानत रहे हँय, उनहीं भगाय दिहिन। 52 परमातिमा बलमानन के राज करँइ के अधिकार छडाय लिहिन; अउर दीन-दुखिअन काहीं बड़ा किहिन हीं। 53 परमातिमा भूँखेन काहीं निकहे खाना से संतुस्त किहिन, अउर धनमानन काहीं झूँछय हाँथे लउटाय दिहिन। 54 परमातिमा अपने उआ दया काहीं सुधि कइके, अपने दास इजराइल काहीं बचाय लिहिन हीं। 55 जउन दया अब्राहम अउर उनखे कुल माहीं हमेसा रही, जइसन परमातिमा हमरे बाप-दादन से कहिन रहा हय।” 56 मरियम तीन महीना के करीब, इलीसिबा के साथ माहीं रहिके अपने घर लउटि आई।

### यूहन्ना बपतिस्मा देई बाले के जनम

57 तब इलीसिबा के बच्चा होई के समय पूर भ, अउर उनखे एकठे लड़िका भ। 58 उनखर परोसी अउर कुटुम्बी लोग इआ सुनिके, कि प्रभू उनखे ऊपर बड़ी दया किहिन हीं, उनखे साथ खुसी मनाइन, 59 अउर अइसन भ कि अठएँ दिन, उँइ लड़िका के खतना करँइ के खातिर आएँ, अउर ओखर नाम ओखे बाप के नाम के मुताबिक जकरयाह धरामँइ लागें। 60 इआ सुनिके लड़िका के महतारी जबाब दिहिन, “नहीं; ओखर नाम यूहन्ना धराबा जाय।” 61 ऊँ सगले जन कहँइ लागें, “तौहरे परिवार माहीं कोहू के इआ नाम नहिँ आय!” 62 तब ऊँ पंचे लड़िका के बाप से इसारा कइके पूँछिन, कि तूँ अपने लड़िका के का नाम धरामँइ चहते हया? 63 जकरयाह लिखँय के पट्टी मगबाइके लिख दिहिन, “ओखर नाम यूहन्ना हय”, अउर इआ देखिके सगले जन अचरज मानिगें। 64 ओतनिनदार जकरयाह के मुँह अउर जीभ खुल्लिगे; अउर ऊँ बोलँइ लागें, अउर परमातिमा काहीं धन्यबाद देई लागें। 65 जेतने जने उनखे आस-पास रहे हँय, ऊँ सगले जन डेराइगें; अउर उन सगली बातन के खबर सगले यहूदिया प्रदेश के पहारी इलाकन माहीं फइलिगे, 66 अउर सगले सुनँय बाले अपने-अपने मन माहीं सोच-बिचारिके कहिन, “इआ लड़िका कउनमेर के होई?” काहेकि प्रभू के सामर्थ उआ लड़िका के ऊपर रही हय।

### जकरयाह के स्तुति गान

67 लड़िका के बाप जकरयाह पबित्र आत्मा से भरिगें, अउर भबिस्य माहीं होई बाली परमातिमा के बातन काहीं बतामँइ लागें: 68 “प्रभू इजराइल के परमातिमा धन्य हें, काहेकि ऊँ अपने प्रजा के ऊपर किरपा किहिन हीं, अउर उनहीं मुक्ती दिहिन हीं। 69 अउर अपने सेबक राजा दाऊद के कुल से हमरे पंचन के खातिर एकठे सक्तिसाली मुक्ती देई बाला पइदा किहिन हीं।

70 (जइसन परमातिमा आपन सँदेस बतामँइ बाले पवित्र मनइन के व्दारा, जऊँ संसार के सुरुआतय से होत आए हँय, कहिन रहा हय।)

71 अरथात हमरे दुसमनन से, अउर हमरे सगले बइरिन के हाँथ से हमहीं पंचन काहीं छोड़ाइन हीं।

72 कि हमरे बाप-दादन के ऊपर दया कइके, अपने पबित्र करार काहीं सुध करँय।

73 अउर उआ कसम जउन परमातिमा हमरे पूरबज अब्राहम से खाइन तय।

74 कि ऊँ हमहीं इआ आसीस देइहँय, कि हम अपने दुसमनन के हाँथ से छूटि के।

75 परमातिमा के नजर माहीं पबित्रता, अउर धारमिकता से जीवन भर निधइक रहिके, उनखर गुन-गान करब।

76 अउर हे बालक, तूँ परमप्रधान परमातिमा के सँदेस बतामँइ बाले कहइहा, काहेकि तूँ प्रभू के आमँइ से पहिले उनखे खातिर मनइन काहीं तइआर करिहा।

77 अउर प्रभू के खातिर तइआर लोगन काहीं मुक्ती के ग्यान देइहा, जउन उन्हीं अपने-अपने पापन काहीं मान लिहे से मिली।

78 इआ हमरे पंचन के परमातिमा के उआ बड़ी दया से होई;

जउने कारन स्वरग से हमहीं बचामँइ के खातिर मुक्ती देई बाला पठइहँय।

79 कि जउन मनई पाप अउर मउत के बन्धन माहीं फँसे हें, उन्हीं छोड़ाइके मुक्ती के उँजिआर देई, अउर हमहीं पंचन काहीं नीक गली माहीं सीध चलामँइ।”

80 अउर ऊँ लड़िका बड़े होत गें, अउर आत्मिक रूप से मजबूत होत गें, अउर इजराइली लोगन के लघे आमँइ से पहिले ऊँ सुनसान जघा माहीं रहत रहे हँय।

### यीसु के जनम (मत्ती 1:18-25)

2 उँइन दिनन माहीं रोम देस के महाराजा अवगुस्तुस इआ हुकुम दिहिन, कि सगले रोम राज के मनइन के गिनती कीन जाय। 2 इआ पहिल गिनती उआ समय माहीं भे रही हय, जब क्विरिनियुस रोमी राज के सीरिया प्रदेस के राजपाल रहा हय। 3 सगले जन आपन नाम लिखामँय के खातिर अपने-अपने सहरन माहीं गें। 4 एसे कि यूसुफ राजा दाऊद के कुल के आहीं, गलील प्रदेस के नासरत गाँव से यहूदिया प्रदेस माहीं, राजा दाऊद के सहर बैतलहम माहीं गें, 5 कि अपने मंगेतर मरियम क साथ लइके जिनखे पेटे माहीं बच्चा रहा हय, नाम लिखामँय। 6 जब ऊँ पंचे उहँइ रहे हँय, तबहिनय मरियम के लड़िका पइदा होई के समय पूर होइगा। 7 अउर मरियम के पहिलउठा लड़िका पइदा भ, अउर लड़िका काहीं ओन्हा माहीं लपेटिके अबाह माहीं पराय दिहिन; काहेकि सराय माहीं उनखे खातिर एक्कव जघा नहीं रही।

### स्वरगदूतन के व्दारा चरबाहन काहीं सँदेस

8 अउर उहाँ खुब गइरिया रहे हँय, जउन रातके मइदान माहीं अपने गइरन के पहरा देत रहे हँय। 9 तबहिनय प्रभू के एकठे दूत उनखे लघे आइके ठाढ़ होइगा, अउर प्रभू के खुब तेज उँजिआर उनखे चारिव कइती चमकँइ लाग, अउर ऊँ सगले जने खुब डेराइगें। 10 तब स्वरगदूत उनसे कहिन, “डेरा न; काहेकि देखा, हम तौहई बड़े आनन्द के खुसी के खबर बताइत हएन, जउन सगले मनइन के खातिर होई, 11 काहेकि आज दाऊद के सहर माहीं तौहरे खातिर मुक्ती देई बाले जनम लिहिन हीं, अउर ईन मसीह प्रभू आहीं।

12 अउर तौहरे खातिर इआ चिन्हारी होई, कि तूँ पंचे एकठे लड़िका काहीं ओन्हा माहीं लपेटा अउर अबाह माहीं पराबा पइहा।” 13 तब अचानक उआ स्वरगदूत के साथ स्वरगदूतन के झुन्ड परमातिमा के स्तुति करत अउर इआ कहत देखाई दिहिन।

14 “स्वरग माहीं परमातिमा के महिमा, अउर धरती माहीं उँइ मनइन काहीं जउनेन से ऊँ प्रसन्न हें, सान्ती मिलय।”

15 जब स्वरगदूत उनखे लघे से स्वरग माहीं चलेगें, तब गइरिया आपस माहीं कहँइ लागें, “आबा हम पंचे बैतलहम माहीं जाइके इआ बात जऊँ भे ही, अउर प्रभू जउन बात स्वरगदूतन से हमहीं बताइन हीं, चला देखी।”

16 अउर ऊँ पंचे हरबिन जाइके मरियम अउर यूसुफ काहीं, अउर अबाह माहीं उआ लड़िका काहीं पराबा देखिन। 17 ऊँ गइरिया उन्हीं देखिके जउन बात लड़िका के बारे माहीं उनसे बताई गे तय, हरेक जघा बतामँइ लागें, 18 अउर गइरिअन के बातन काहीं सुनिके सगले सुनँइ बाले अचरज मानिन। 19 अउर मरियम ई सगली बातन काहीं अपने मन माहीं रखिके, इनखे बारे माहीं बिचार करत रहि गई। 20 अउर गइरिअन काहीं जइसन कहा ग तय, उहयमेर सब देख सुनिके ऊँ पंचे परमातिमा के बड़ाई अउर स्तुति करत लउटिगें।

### यीसु के नाम धराउब

21 जब लड़िका काहीं पइदा भए आठ दिन पूर होइगें, तब खतना करँइ के दिन आबा, तब लड़िका के नाम यीसु धराइन, जउन नाम स्वरगदूत लड़िका के पेट माहीं आमँइ से पहिले मरियम से बताइन रहा हय।

### मन्दिर म यीसु काहीं लइ जाब

22 अउर जब मूसा के बिधान के मुताबिक उनखे सुद्ध होई के दिन पूर होइगें, तब यूसुफ अउर मरियम लड़िका यीसु काहीं यरूसलेम मन्दिर माहीं लइगें, कि उन्हीं प्रभू के सामने लइ जाँय, 23 (जइसा प्रभू के बिधान माहीं लिखा हय, “सगले मनइन के पहिलउठा लड़िका प्रभू के खातिर समरपित कीन जाय।”) 24 अउर प्रभू के बिधान के बचन के मुताबिक, “पोंडकिन के जोड़ा, इआ कि परेबा के दुइठे बच्चा।” लइआइके बलिदान करँय।

### समौन के स्तुति गान

25 यरूसलेम सहर माहीं समौन नाम के एकठे मनई धरमी अउर भक्त रहे हँय; अउर इजराइली लोगन काहीं सान्ती देई बाले के इन्तजार करत रहे हँय, अउर पबित्र आत्मा उनखे साथ माहीं रहा हय। 26 अउर पबित्र आत्मा के द्वारा उन्हीं मालुम भ रहा हय, कि जब तक ऊँ प्रभू के पठए मसीह काहीं देख न लेइहँय, तब तक न मरिहँय। 27 समौन पबित्र आत्मा के बताए के मुताबिक मन्दिर माहीं आएँ; अउर जब यूसुफ अउर मरियम लड़िका यीसु काहीं भीतर लइ आएँ, कि उनखे खातिर मूसा के बिधान के रीति के मुताबिक करँइ, 28 तब समौन यीसु काहीं अपने कनिआ माहीं लइके परमातिमा के धन्यवाद कइके कहिन।

29 “हे स्वामी, अब अपना अपने दास काहीं अपने बचन के मुताबिक सान्ती के साथ मरँइ देई।

30 काहेकि हम अपने आँखिन से अपना के मुक्ती के योजना काहीं देख लिहेन हय।

31 जेही अपना सगले देसन के मनइन के खातिर तइआर किहेन हय।

32 अउर ऊँ सगली जातिअन के लोगन काहीं उँजिआर देई के खातिर जोति आहीं, कि अपना के चुने इजराइली लोगन के नाम के बड़ाई होय।”

33 यीसु के महतारी-बाप ऊँ बातन से जउन यीसु के बारे माहीं कही जात रही हँय, सुनिके चउआय जात रहे हँय। 34 तब समौन उन्हीं आसिरबाद दइके यीसु के महतारी मरियम से कहिन, “देखा, इआ लड़िका इजराइल माहीं खुब मनइन के नास होई, अउर खुब मनइन के आसीस पामँइ के खातिर चुना ग हय। अउर इआ लड़िका के इआ पहिचान होई, कि खुब जने उनखे बिरोध माहीं बात करिहँय, इआमेर से खुब जनेन के जउन हिरदँय के बिचार हें, उँइ निकरिके अइहँय। 35 अउर मरियम तौहई बहुत भारी दुख सहँइ क परी, जउन तलबार छेदरँइ के बराबर होई।”

### हन्नाह के गबाही

36 आसेर के कुल माहीं हन्नाह नाम के फनूएल के बिटिया, परमातिमा के सँदेस मनइन काहीं बतामँई बाली रही हँय। ऊँ खुब बुढान रही हँय, अउर ऊँ काज होए के बाद सात बरिस अपने मंसेरुआ के लघे रहि पाइन तय। 37 ऊँ चउरासी बरिस से बिधबा रही हँय: अउर रोज मन्दिर जात रही हँय, अउर उपास अउर प्राथना कइके रातव-दिन परमातिमा के भक्ती करत रही हँय। 38 जब मरियम अउर यूसुफ लड़िका यीसु के साथ मन्दिर माहीं रहे हँय, ओतनिनदार हन्नाह आइके प्रभू के धन्यवाद करँई लागीं, अउर उन सगलेन से जउन यरूसलेम काहीं छोड़ामँई बाले के इन्तजार करत रहे हँय, उनसे लड़िका यीसु के बारे माहीं बतामँई लागीं।

### नासरत गाँव काहीं लउटब

39 जब यूसुफ अउर मरियम प्रभू के बिधान के मुताबिक सगली जरूरी बातन काहीं पूर कइ चुके, तब ऊँ पंचे गलील प्रदेश माहीं अपने गाँव नासरत लउटि आएँ। 40 अउर लड़िका यीसु बाढ़त अउर बलमान होत गें, अउर बुद्धी से भरपूर होत गें; अउर परमातिमा के किरपा उनखे ऊपर रही हय।

### लड़िका यीसु मन्दिर माहीं

41 यीसु, के महतारी-बाप हरेक साल फसह के तेउहार माहीं यरूसलेम मन्दिर माहीं जात रहे हँय। 42 जब यीसु बारा बरिस के भें, तब उँ तेउहार के रीति के मुताबिक अपने महतारी-बाप के साथ यरूसलेम सहर माहीं गें। 43 जब तेउहार के दिन पूर होइ के बाद, यूसुफ अउर मरियम अपने घर काहीं लउटँय लागें, तब लड़िका यीसु यरूसलेम माहीं रहिगें, अउर इआ बात उनखर महतारी-बाप नहीं जाने पाइन। 44 ऊँ पंचे इआ समझिके, कि यीसु दुसरे के साथ चले गे होइहँय, एक दिन के दूरी चले के बाद लड़िका यीसु काहीं अपने परिवार बालेन, अउर जान-पहिचान बालेन माहीं ढूँढँई लागें। 45 पय जब यीसु नहीं मिलें, तब ऊँ पंचे उनहीं ढूँढत-ढूँढत यरूसलेम मन्दिर माहीं पुनि लउटि गें, 46 अउर तीन दिन के बाद ऊँ पंचे यीसु काहीं मन्दिर माहीं उपदेस देंइ बालेन के लघे बइठे, उनखर उपदेस सुनत अउर उनसे सबाल पूँछत पाइन। 47 जेतने जन यीसु के बातन काहीं सुनत रहे हँय, ऊँ सगले जन यीसु के ग्यान अउर उनखे जबाब से चउआय जात रहे हँय। 48 तब उनखर महतारी-बाप उनहीं देखिके चउआइगें, अउर उनखर महतारी उनसे कहिन, “हे बेटबा, तूँ हमरे साथ अइसा काहे किहा? देखा, तौहार बाप अउर हम तौहई ढूँढत-ढूँढत परेसान अउर दुखी रहेन हय?” 49 यीसु उनसे कहिन, “तूँ पंचे हमहीं काहे ढूँढत रहे हया? काहे तूँ नहीं जानत रहे आह्या, कि हमहीं अपने पिता परमातिमा के मन्दिर माहीं रहब जरूरी हय?” 50 पय जउन बात यीसु उनसे कहिन, ऊँ पंचे नहीं समझे पाइन। 51 तब यीसु उनखे साथ नासरत गाँव माहीं चले आएँ, अउर ऊँ अपने महतारी-बाप के साथ माहीं रहँई लागें; अउर उनखर महतारी ई सगली बातन काहीं अपने हिरदँय माहीं रक्खिन। 52 यीसु बुद्धी अउर डील-डउल माहीं अउर परमातिमा अउर मनई के किरपा माहीं बाढ़त गें।

### यूहन्ना बपतिस्मा देंइ बाले के सेबा

(मत्ती 3:1-12; मरकुस 1:1-8; यूहन्ना 1:19-28)

3 तिबिरियुस कैसर के रोम सम्राज माहीं राज करँई के पन्द्रहमे बरिस माहीं, जउने समय माहीं पुन्तियुस पिलातुस यहूदिया प्रदेश के राजपाल रहे हँय, अउर गलील प्रदेश माहीं हेरोदेस राजा, इत्रुइया अउर त्रखोनीतिस प्रदेश माहीं ओखर भाई फिलिप्पुस, अउर अबिलेने माहीं लिसानियास, चउथ भाग के राजा रहे हँय, 2 अउर जब हन्ना अउर कैफा महायाजक रहे हँय, उहय समय माहीं परमातिमा सुनसान जघा माहीं जकरयाह के लड़िका यूहन्ना से बात किहिन। 3 यूहन्ना यरदन नदी के आस-पास के सगले प्रदेशन माहीं जाइके, मनइन से इआ कहिके प्रचार करँई

लागें, कि अपने-अपने पापन के माफी प्रभू से पामँई के खातिर पाप करब छोड़िके, अपने मन काहीं बदला, अउर बपतिस्मा ल्या। 4 जइसन परमातिमा के सँदेस बतामँई बाले यसायाह के किताब माहीं लिखा हय:

“सुनसान जघा माहीं एक जने के गोहरामँई के बोल सुनात हय, कि अपने मन काहीं तइआर कइके गइल सऊँ बनाय ल्या, काहेकि ‘प्रभू आमँई बाले हें।

5 सगली घाटिन काहीं भर दीन जई, अउर सगले पहारन अउर टिकुरन काहीं बराबर कीन जई;

अउर जऊँ टेंढ़ हय ओही सऊँ, अउर जउन ऊँच नीच हय ओही समथर बनाबा जई।

6 अउर हरेक मनई परमातिमा के मुक्ती के काम काहीं देखिहँय।”

7 जउन भीड़ के भीड़ मनई यूहन्ना के लघे बपतिस्मा लेंइ के खातिर आबत रहे हँय, उनसे ऊँ कहत रहे हँय, “हे साँप के बच्चन कि नाई बुरे मनइव, तौहई को चेताय दिहिस, कि परमातिमा के आमँई बाले सजा से बचा?

8 अरथात तूँ पंचे अपने जीवन से इआ देखाय द्या, कि तूँ पंचे बास्तव माहीं पाप करब छोड़ दिहा हय, अउर परमातिमा के बातन काहीं मनते हया। तूँ अपने-अपने मन माहीं इआ न सोचा, कि हम अब्राहम के सन्तान आहैन एसे परमातिमा हमहीं सजा न देइहँय; काहेकि हम तौहसे सही कहित हएन, कि परमातिमा ई पथरन से अब्राहम के खातिर बंस पइदा कइ सकत हें। 9 अब

परमातिमा के क्रोध रूपी कुल्हारा बिरबन के जर माहीं धरा हय, एसे जउन-जउन बिरबा निकहा फर न फरी, उआ काटिके आगी माहीं झोक दीन जई।”

10 तब मनई यूहन्ना से पूँछँई लागें, “त हम पंचे का करी?” 11 यूहन्ना उनहीं जबाब दिहिन, “जेखे लघे दुइठे कुरथा होंय, त उआ जेखे लघे एक्कवठे कुरथा नहिँ आय ओही दइ देय, अउर जेखे लघे खौँड बाली चीज होंय, उहव अइसय करय।” 12 अउर चुंगी लेंइ बाले घलाय बपतिस्मा लेंइ आएँ, अउर यूहन्ना से पूँछिन, “हे गुरू, हम पंचे का करी?” 13 यूहन्ना उनसे कहिन, “जेतनी चुंगी लेंइ के खातिर तौहई बताबा ग हय, ओसे जादा न लिहा।”

14 अउर सिपाहिव यूहन्ना से पूँछिन, “हम पंचे का करी?” तब यूहन्ना उनसे कहिन, “जबरजस्ती कोहू से धन न लिहा, अउर न कउनव मनई के ऊपर झूँठ आरोप लगाया, बलकिन अपने तनखाह माहीं सन्तोस किहा।”

15 जब इजराइली लोग इआ आसा करत रहे हँय, कि हमहीं मुक्ती देंइ बाले आमँई बाले हें, तब सगले जन अपने-अपने मन माहीं यूहन्ना के बारे माहीं सोचत रहे हँय, कि कहँव ईन परमातिमा के पठए मुक्ती देंइ बाले मसीह त न होंहीं, 16 तब यूहन्ना ऊँ सगलेन से कहिन, “हम त तौहई पानी से बपतिस्मा देइत हएन, पय जउन आमँई बाले हें, ऊँ हमसे एतना महान हें; कि हम त उनखे पनहिन के डोरव तक छोड़ँई के काबिल नहिँ आहैन; ऊँ तौहई पबित्र आत्मा अउर आगी से बपतिस्मा देइहँय। 17 उनखर न्याय रूपी सूपा उनखे हाँथेन माहीं हय; अउर उँइ संसार रूपी राहा काहीं निकहा से साफ करिहँय; अउर गोहूँ काहीं अपने बखारी माहीं रक्खिहँय; पय बूसा काहीं कबहूँ न बुझाँय बाली आगी माहीं डार देइहँय।”

18 अरथात यूहन्ना खुब सिच्छा दइ-दइके सगले जनेन काहीं खुसी के खबर सुनाबत रहिगें। 19 पय जब यूहन्ना चउथाई देस के राजा हेरोदेस काहीं, अपने भाई फिलिप्पुस के मेहेरिआ हेरोदियास काहीं राख लिहे के बारे माहीं, अउर सगले कुकर्मन के बारे माहीं जउन ऊँ किहिन रहा हय, उलाहना दिहिन।

20 तब हेरोदेस ऊँ सगले कुकर्मन से बढिके, इआ कुकर्म किहिन, कि यूहन्ना काहीं जेल माहीं डरबाय दिहिन।

### यीसु के बपतिस्मा (मत्ती 3:13-17; मरकुस 1:9-11)

21 जब सगले जने बपतिस्मा लइ चुके, तब यीसु घलाय आइके यूहन्ना से बपतिस्मा लइके प्राथना करत रहे हँय, तबहिनय स्वरग खुलिगा, 22 अउर पबित्र आत्मा सारीरिक रूप से परेबा के रूप माहीं उनखे ऊपर उतरा, अउर इआ अकासबानी भय: “तूँ हमार पियार लड़िका आह्या, हम तौहसे प्रसन्न हएन।”

### यीसु के बंसाबली

(मत्ती 1:1-17)

23 जब यीसु सेबकाई सुरू किहिन, तब ऊँ तीस बरिस के करीब रहे हँय, अउर (जइसा माना जात हय) यीसु, यूसुफ के लड़िका आहीं; अउर यूसुफ, एली के, 24 अउर एली, मत्तात के, अउर मत्तात, लेबी के, अउर लेबी, मलकी के, अउर मलकी, यन्ना के, अउर यन्ना, यूसुफ के, 25 अउर यूसुफ, मत्तित्याह के, अउर मत्तित्याह, आमोस के, अउर आमोस, नहूम के, अउर नहूम, असल्याह के अउर असल्याह, नोगह के, 26 अउर नोगह, मात के, अउर मात, मत्तित्याह के, अउर मत्तित्याह, सिमी के, अउर सिमी, योसेख के, अउर योसेख, योदाह के, 27 अउर योदाह, यूहन्ना के अउर यूहन्ना, रेसा के अउर रेसा, जरुब्बाबिल के, अउर जरुब्बाबिल, सालतिएल के, अउर सालतिएल, नेरी के, 28 अउर नेरी, मलकी के, अउर मलकी, अद्दी के, अउर अद्दी, कोसाम के, अउर कोसाम, इलमोदाम के, अउर इलमोदाम, एर के, 29 अउर एर, एसू के, अउर एसू, इलाजार के, अउर इलाजार, योरीम के, अउर योरीम, मत्तात के, अउर मत्तात, लेबी के, 30 अउर लेबी, समौन के, अउर समौन, यहूदाह के, अउर यहूदाह, यूसुफ के, अउर यूसुफ, योनान के, अउर योनान, इलयाकीम के, 31 अउर इलयाकीम, मलेयाह के, अउर मलेयाह, मिन्नाह के अउर मिन्नाह, मत्तात के, अउर मत्तात, नातान के अउर नातान, दाऊद के, 32 अउर दाऊद, यिसय के, अउर यिसय, ओबेद के, अउर ओबेद, बोअज के, अउर बोअज, सलमोन के, अउर सलमोन, नहसोन के, 33 अउर नहसोन, अम्मीनादाब के, अउर अम्मीनादाब, अरनी के, अउर अरनी, हिस्नोन के, अउर हिस्नोन, फिरिस के, अउर फिरिस, यहूदाह के, 34 अउर यहूदाह, याकूब के अउर याकूब, इसहाक के, अउर इसहाक, अब्राहम के, अउर अब्राहम, तिरह के, अउर तिरह, नाहोर के, 35 अउर नाहोर, सरूग के, अउर सरूग, रऊ के, अउर रऊ, फिलिग के, अउर फिलिग, एबिर के, अउर एबिर, सिलह के 36 अउर सिलह, केनान के, अउर केनान, अरफच्छद के, अउर अरफच्छद, सेम के, अउर सेम, नूह के अउर नूह, लिमिक के, 37 अउर लिमिक, मथूसिलह के, अउर मथूसिलह, हनोक के, अउर हनोक, यिरिद के, अउर यिरिद, महललेल के, अउर महललेल, केनान के, 38 अउर केनान, एनोस के, अउर एनोस, सेत के, अउर सेत, आदम के, अउर आदम परमातिमा के लड़िका आहीं।

### यीसु के परिच्छा

(मत्ती 4:1-11; मरकुस 1:12,13)

4 पुनि यीसु पबित्र आत्मा से भरे, यरदन नदी से लउटें; अउर पबित्र आत्मा के सिखाए से सुनसान जघा माहीं फिरत रहिगें; 2 अउर सइतान चालिस दिन तक उनखर परिच्छा लेत रहिगा। उन दिनन माहीं यीसु कुछ नहीं खाइन पीन, अउर जब चालिस दिन पूर होइगें, तब उनहीं भूख लाग। 3 तब सइतान यीसु से कहिस, “अगर तू परमातिमा के लड़िका आह्या, त इआ पथरा से कहा, कि रोटी बन जाय।” 4 यीसु सइतान काहीं जबाब दिहिन, “पबित्र सास्त्र माहीं लिखा हय, ‘मनई केबल रोटिन भर से जिन्दा न रही।’” 5 तब सइतान यीसु काहीं खुब ऊँच जघा माहीं लइगा, अउर उनहीं छिन भरे माहीं संसार के सगले राज देखाइस, 6 अउर सइतान यीसु से कहिस, “हम ई सगले राज के अधिकार अउर उनखर धन-सम्पत्ती तोहई दइ देब, काहेकि ई सगलेन काहीं हमहीं सउँपा ग हय: अउर हम जेही चाही, ओही दइ सकित हएन। 7 एसे अगर तू हमरे गोड़न गिरिहा, त इआ सगला हम तोहई दइ देब।” 8 यीसु सइतान काहीं जबाब दिहिन, “पबित्र सास्त्र माहीं लिखा हय, ‘तू अपने प्रभू परमातिमा काहीं दन्डबत किहा; अउर केबल उनहिन के सेबा किहा।’” 9 तब सइतान यीसु काहीं यरूसलेम मन्दिर माहीं लइ जाइके मन्दिर के गुम्मत माहीं ठाढ़ किहिस, अउर उनसे कहिस, “अगर तू परमातिमा के लड़िका आह्या, त अपने-आप काहीं इहाँ से नीचे गिराय द्या। 10 काहेकि पबित्र सास्त्र माहीं इआ लिखा हय, ‘परमातिमा तौहरे

खातिर अपने स्वरगदूतन काहीं हुकुम देइहँय, कि ऊँ तौहार रच्छा करँय’, 11 अउर ‘ऊँ तोहई उपरय लोक लेइहँय, कहेँव अइसा न होय कि तौहरे गोड़न माहीं पथरा से चोट लगि जाय।’” 12 यीसु सइतान काहीं जबाब दिहिन, “पबित्र सास्त्र माहीं इहव लिखा हय, कि: ‘तू अपने प्रभू परमातिमा के परिच्छा न किहा।’” 13 जब सइतान सगली परिच्छा कइ चुका, तब कुछ समय के खातिर यीसु के लघे से चला ग।

### यीसु के सेबा के काम के सुरुआत

(मत्ती 4:12-17; मरकुस 1:14-15)

14 पुनि यीसु पबित्र आत्मा के सामर्थ से भरे गलील प्रदेश माहीं लउटि आएँ, अउर यीसु के खबर लघे-लघे के सगले सहरन माहीं फइलिये। 15 यीसु सभाघरन माहीं उपदेस देत रहिगें, अउर सगले सुनँय बाले उनखर बड़ाई करत रहे हँय।

### नासरत गाँव माहीं यीसु के निरादर

(मत्ती 13:53-58; मरकुस 6:1-6)

16 ओखे बाद यीसु नासरत गाँव माहीं आएँ, जहाँ उनखर पालन-पोसन भ रहा हय; अउर अपने रीति के मुताबिक, पबित्र दिन काहीं सभाघर माहीं जाइके पबित्र सास्त्र पढ़ई के खातिर ठाढ़ भें। 17 तब उनहीं परमातिमा के सँदेस बतामँई बाले यसायाह के लिखी किताब, यहूदी सभाघर के सेबक लइआइके दिहिस, अउर यीसु उआ किताब काहीं खोलिके, उआ जघा निकारिन जहाँ इआ लिखा रहा हय:

18 “प्रभू के आत्मा हमरे भीतर हय, एसे कि परमातिमा कंगालन काहीं खुसी के खबर सुनामँई के खातिर हमार अभिसेक किहिन हीं, अउर हमहीं एसे पठइन हीं, कि बंदिन काहीं छोड़ामँई के अउर अँधरन काहीं आँखी पामँई के खुसी के खबर के प्रचार करी, अउर दबे-कुचले लोगन काहीं बन्धन से छोड़ाई।

19 अउर प्रभू के अपने लोगन के ऊपर दया करँई बाले समय के प्रचार करी।”

20 तब यीसु इआ पढ़िके किताब बंद कइके सेबक के हाँथे माहीं दइ दिहिन, अउर बइठिगें; तब यहूदी सभाघर माहीं बइठ सगले मनइन के ध्यान उनखे कइती लगा रहा हय। 21 तब यीसु उनसे कहँई लागें, “आजय तौहरे सुनतय-सुनत पबित्र सास्त्र के इआ बचन पूर भ हय।”

22 उहाँ बइठ सगले मनई उनहीं सराहँई लागें, अउर यीसु के मुँह से जउन, किरपा के बातँय निकरत रही हँय, ऊँ बातन से सगले जन अचरज मानिन; अउर कहँई लागें, “काहे ई यूसुफ के लड़िका न होहीं?” 23 यीसु उनसे कहिन, “तू पंचे हमरे बारे माहीं इआ कहाबत जरूर कइहा, कि ‘हे बैद्य, अपने-आप काहीं नीक करा! जउन कुछ हम पंचे सुनेन हय, कि कफरनहूम माहीं जउन काम तू किहा हय, उहय काम इहाँ अपने गाँव माहीं घलाय करा।’” 24 अउर यीसु इहव कहिन, “हम तौहसे सही कहित हएन, कि कउनव परमातिमा के सँदेस बतामँई बाला, अपने गाँव माहीं मान-सम्मान नहीं पाबय। 25 हम तौहसे सही कहित हएन, कि एलिय्याह नबी के दिनन माहीं जब साढ़े तीन बरिस तक अकास से पानी नहीं बरसा, इहाँ तक कि सगले देस माहीं अकाल परा, तब इजराइल माहीं खुब बिधबा रही हँय। 26 पय एलिय्याह नबी उन बिधबन म से कोहू के लघे नहीं पठए गें, केबल सैदा प्रदेश के सारफत गाँव माहीं एकठे बिधबा के लघे पठए गें तय।

27 अउर परमातिमा के सँदेस बतामँई बाले एलीसा के समय माहीं इजराइल माहीं खुब कोढ़ी रहे हँय, पय सीरिया देस के रहँई बाले नामान काहीं छोड़िके उनमा से कउनव सुद्ध नहीं कीन गें।” 28 ई बातन काहीं सुनतय जेतने मनई यहूदी सभाघर माहीं रहे हँय, सगले आगबबूला होइगें। 29 अउर उठिके यीसु काहीं सहर से बहिरे निकारिके, जउने पहार माहीं उनखर सहर बसा रहा हय, ओहिन के ऊपर चोटी माहीं लइगें, कि यीसु काहीं उहाँ से नीचे गिराय देंय। 30 पय यीसु, उनखे बीच से निकरिके चलेगें।

**बुरी आत्मा से परेसान मनई काहीं नीक करब**

(मरकुस 1:21-28)

31 ओखे बाद यीसु गलील प्रदेश के कफरनहूम सहर माहीं आएँ, अउर पबित्र दिन काहीं लोगन काहीं उपदेस देत रहे हँय। 32 ऊँ सगले जन उनखे उपदेस काहीं सुनिके चउआइगें, काहेकि यीसु बचन काहीं अधिकार के साथ बताबत रहे हँय। 33 यहूदी सभाघर माहीं एकठे मनई बइठ रहा हय, जउने माहीं बुरी आत्मा रही हय। उआ खुब चंडे चिल्लाइके कहिस, 34 “हे नासरत गाँव के यीसु, हमार अपना से कउनव काम नहिँ आय। का अपना हमहीं नास करँइ आपन हँय? हम अपना काहीं जानित हएन, कि को आहैन? अपना परमातिमा के पबित्र जन आहैन!” 35 यीसु ओही डाँटिके कहिन, “चुप्य रह, अउर उआ मनई से बहिरे निकर जा!” तब बुरी आत्मा उआ मनई काहीं सगलेन के बीच माहीं पटकिके बिना चोंट पहुँचाए ओसे निकरिगे। 36 इआ सगला हाल देखिके सगले जन बड़ा अचरज मानिन, अउर ऊँ पंचे आपस माहीं कहँइ लागें, “इआ कइसन बचन हय? काहेकि यीसु अधिकार अउर सामर्थ के साथ बुरी आत्मन काहीं हुकुम देत हें, अउर ऊँ मनइन से निकर जाती हई।” 37 इआमेर से चारिव कइती हरेक जघा माहीं यीसु के चरचा होंइ लाग।

**पतरस के सास अउर खुब बिमारन काहीं नीक करब**

(मत्ती 8:14-17; मरकुस 1:29-34)

38 यीसु यहूदी सभाघर से उठिके समौन के घर माहीं गें। उहाँ समौन के सास काहीं बोखार चढ़ी रही हय, अउर घरबाले उनहीं नीक करँइ के खातिर यीसु से बिनती किहिन। 39 यीसु उनखे लघे ठाढ़ होइके बोखार काहीं डाँटिन, तबहिनय उनखर बोखार उतरि गे, अउर ऊँ तुरन्तय उठिके उनखर सेबा-सहाई करँइ लागीं।

40 सुरिज बूँइ के समय, जेखे-जेखे घर माहीं कइअक मेर के बिमारिन से मनई परे रहे हँय, ऊँ सगले जन उनहीं यीसु के लघे लइ आएँ, अउर यीसु सगलेन के ऊपर आपन हाँथ धइके नीक कइ दिहिन। 41 अउर बुरी आत्मा घलाय चिल्लात अउर इआ कहत, कि “तूँ परमातिमा के लइका आह्या”, खुब मनइन से निकर गई। पय यीसु उनहीं डाँटिके बोलँइ नहीं देत रहे आहीं, काहेकि ऊँ बुरी आत्मा जानत रही हँय, कि ई मसीह आहीं।

**यहूदी सभाघरन माहीं प्रचार करब**

(मरकुस 1:35-39)

42 जब सकार भ, तब यीसु उहाँ से निकरिके सुनसान जघा माहीं गें, अउर भीड़ के भीड़ मनई उनहीं ढूँढत-ढूँढत उनखे लघे पहुँचिगें, अउर उनहीं रोंकँइ लागें, कि अपना हमरे लघे से न जई। 43 पय यीसु उनसे कहिन, “हमहीं दुसरेव सहरन माहीं परमातिमा के राज के खुसी के खबर सुनाउब जरूरी हय, काहेकि हम एहिन खातिर पठए गएन हय।” 44 अउर यीसु गलील प्रदेश के सभाघरन माहीं जाइ-जाइके प्रचार करत रहिगें।

**पहिल चेलन के बोलाबा जाब**

(मत्ती 4:18-22; मरकुस 1:16-20)

5 जब भीड़ के मनई परमातिमा के बचन सुनँय के खातिर यीसु के उपरय गिरे परत रहे हँय, अउर ऊँ गनेसरत के झील के किनारे ठाढ़ रहे हँय, तब अइसन भ, 2 कि यीसु झील के किनारे दुइठे नाव लगी देखिन, अउर मछुआरा लोग उनसे उतरिके जाल धोबत रहे हँय। 3 उँइ नावन म से एकठे जउन समौन के रही हय, ओहिन माहीं यीसु चढ़िके, समौन से बिनती किहिन, कि नाव काहीं थोर क किनारे से हटाय लइ चला। तब यीसु नाव माहीं बइठिके सगले भीड़ के मनइन काहीं उपदेस देंइ लागें। 4 जब यीसु उपदेस दइ चुकें, तब समौन से कहिन, “नाव काहीं गहिल पानी माहीं लइ चला, अउर मछरी पकड़ँइ के खातिर आपन जाल डारा।” 5 समौन उनहीं

जबाब दिहिन, “हे मालिक, हम पंचे सगली रात मेहनत किहैन, पय एक्कवठे मछरी नहीं पाएन, तऊ अपना के कहे से हम जाल डारब।” 6 जब ऊँ पंचे जाल डारिन, तब खुब मछरी जाल माहीं आय गई, अउर उनखर जाल फाँटँय लाग। 7 इआ देखिके, ऊँ पंचे अपने साथिन काहीं जऊँ दुसरे नाव माहीं रहे हँय, इसारा किहिन, कि आइके हमार मदत करा, अउर ऊँ पंचे आइके दोनव नावन माहीं एतनी मछरी भर लिहिन, कि नाव बूँइ लागीं। 8 इआ देखिके समौन पतरस यीसु के गोड़न गिरिके कहिन, “हे प्रभू, अपना हमरे लघे से चले जई, काहेकि हम खुब पापी मनई हएन।” 9 काहेकि, एतनी मछरिन के पकड़ी जाँय के कारन, समौन अउर उनखे सगले साथिन काहीं बड़ा अचरज भ, 10 अउर उहइमेर जब्दी के लइका याकूब अउर यूहन्ना काहीं घलाय बड़ा अचरज भ, जउन समौन के साथ मछरी मारँइ माहीं भागीदार रहे हँय। तब यीसु समौन से कहिन, “डेरा न, अब से तूँ परमातिमा के खातिर मनइन काहीं तइआर कइके लइ आमँइ बाले बनिहा।” 11 अउर ऊँ पंचे नावन काहीं किनारे माहीं लइ आएँ, अउर सब कुछ उहँय छोड़िके, यीसु के पीछे चल दिहिन।

**कोढ़ी काहीं नीक करब**

(मत्ती 8:1-4; मरकुस 1:40-45)

12 जब यीसु एकठे सहर माहीं रहे हँय, त उहाँ कोढ़ रोग से भरा एकठे मनई आबा; अउर उआ यीसु काहीं देखतय, उनखे गोड़न गिरिके बिनती किहिस, “हे प्रभू, अगर अपना चाही त, हमही सुद्ध कइ सकित हएन।” 13 यीसु आपन हाँथ बढ़ाइके ओही छुइन अउर कहिन, “हम चाहित हएन, कि तूँ सुद्ध होइजा।” अउर तुरन्तय ओखर कोढ़ के बिमारी नीक होइगे। 14 तब यीसु ओही चेतउनी दइके कहिन, कि “देखा कोहू से कुछू न कहा, पय जाइके अपने-आप काहीं याजक क देखाबा, अउर अपने सुद्ध होंइ के बारे माहीं जउन चढ़ाबा चढ़ामँइ काहीं मूसा नबी ठहराइन हीं, उहय भेंट चढ़ाबा, कि जउने तोंहरे समाज के लोगन के खातिर गबाही ठहरय।” 15 पय यीसु के चरचा अउर फइलत गय, अउर भीड़ के भीड़ मनई उनखर उपदेस सुनँय, अउर अपने बिमारिन से नीक होंइ के खातिर एकट्ठा होइगें। 16 पय यीसु गाँव से दूरी सुनसान जघा माहीं जाइके प्राथना करा-करत रहे हँय।

**लोकबा के मरीज काहीं नीक करब**

(मत्ती 9:1-8; मरकुस 2:1-12)

17 एक दिन अइसन भ, कि यीसु उपदेस देत रहे हँय, अउर फरीसी अउर मूसा के बिधान सिखामँइ बाले उहाँ बइठ रहे हँय, जउन गलील अउर यहूदिया प्रदेश के खुब गाँमन से, अउर यरूसलेम सहर से आएँ तय। अउर बिमारन काहीं नीक करँइ के प्रभू के सामर्थ यीसु के साथ रही हय। 18 उहय समय कइअक जने एकठे लोकबा के मरीज काहीं खटिया माहीं पराइके लइ आएँ, अउर ऊँ पंचे उआ मरीज काहीं भीतर लइ जाइके यीसु के आँगे धरँइ के उपाय करँइ लागें। 19 अउर जब ऊँ पंचे भीड़ के कारन यीसु के लघे नहीं पहुँच पाएँ, तब ऊँ पंचे घर के छान्ही माहीं चढ़िके, खपरइल काहीं ठाठ समेत उतिनके, उआ रोगी काहीं खटिया समेत भीड़ के बीच माहीं यीसु के आँगे उतार दिहिन। 20 यीसु, उनखे बिसुआस काहीं देखिके, उआ लोकबा के मरीज से कहिन, “हे बेटबा, तोंहार पाप माफ होइगें।” 21 तब मूसा के बिधान सिखामँइ बाले, अउर फरीसी लोग गुस्साइके आपस माहीं बातचीत करँइ लागें, “इआ को आय, जउन परमातिमा के बुराई करत हय? परमातिमा काहीं छोड़िके, अउर को पाप माफ कइ सकत हय?” 22 यीसु उनखे मन के बात काहीं जानिके, उनसे कहिन, “तूँ पंचे अपने-अपने मनन माहीं का बाद-बिबाद करते हया? 23 सरल का हय? का लोकबा के मरीज से इआ कहब, ‘तोंहार पाप माफ होइगें’ इआ कि इआ कहब, कि ‘आपन खटिया उठाइके चला फिरा’? 24 पय जउने तूँ पंचे इआ जानित्या, कि मनई के लइका काहीं धरती माहीं पाप माफ करँइ के घलाय अधिकार हय।” यीसु उआ लोकबा के मरीज से कहिन, “हम तोंहसे कहित हएन, कि उठा,



आपन खटिया उठाइके अपने घर चले जा।" 25 उआ हरबिन सगलेन के अँगुअय उठा, अउर जउने खटिया माहीं परा रहा हय, ओही उठाइके परमातिमा के बड़ाई करत अपने घरय चला ग। 26 इआ सगला हाल देखिके, सगले जन अचरज मानिन, अउर परमातिमा के बड़ाई करई लागें, अउर मारे डेरन के कहई लागें, "आज हम पंचे अजीब बात देखेन हय!"

### लेबी काहीं बोलाबा जाब

(मत्ती 9:9-13; मरकुस 2:13-17)

27 एखे बाद यीसु घर से बहिरे चलेगें, अउर लेबी नाम के एकठे चुंगी लेंड बाले मनई काहीं चुंगी नाका माहीं बइठे देखिन, अउर उनसे कहिन, "हमरे पीछे चले आबा।" 28 तब लेबी उठिके सब कुछ उहई छोड़िके, यीसु के पीछे चल दिहिन।

29 अउर लेबी अपने घर माहीं यीसु के खातिर बड़ी जेउनार किहिन, जउने माहीं सगले चुंगी लेंड बाले, अउर खुब मनइन के भीड़ यीसु के साथ खाना खाँइ बइठिगें। 30 इआ सब देखिके, मूसा के बिधान सिखामँइ बाले, अउर फरीसी लोग, यीसु के चलन से इआ कहिके बरबराँय लागें, "तूँ पंचे चुंगी लेंड बालेन, अउर पापी लोगन के साथ काहे खाते-पीते हया?" 31 यीसु उनहीं जबाब दिहिन, "बैद, के जरूरत नीक-सूख मनइन के खातिर नहीं, बलकिन बिमारन के खातिर परत ही। 32 अउर जे कोऊ इआ सोचत हैं, कि हम पापी नहीं आहने उनहीं नहीं, बलकिन पापी लोगन काहीं पाप करब छोड़िके परमातिमा के गइल माहीं चलई के खातिर बोलामँइ आएन हँय।"

### उपासे रहई के बारे माहीं प्रस्न

(मत्ती 9:14-17; मरकुस 2:18-22)

33 ऊँ पंचे यीसु से कहिन, "यूहन्ना के चेला लोग अउर फरीसी लोगन के चेला लोग हमेसा उपासे रहिके, प्राथना करत हैं, पय अपना के चेला लोग काहे खात-पिअत हैं; उपासे नहीं रहँय।" 34 यीसु उनसे कहिन, "का तूँ पंचे बरातिन से, जब तक दुलहा उनखे साथ माहीं रहत हय, त उपास कराय सकते हया? नहीं। 35 पय ऊँ दिन अइहँय, जउने माहीं दुलहा बरातिन से अलग कीन जई, तब ऊँ पंचे उपासे रइहँय।"

36 यीसु अउर एकठे उदाहरन दइके कहिन, "कउनव मनई नबा ओन्हा म से फारिके पुरान ओन्हा माहीं पट्टी नहीं लगाबय, नहीं त नबा ओन्हव फाट जई अउर उआ पट्टी पुरान ओन्हा माहीं मेलव न खई। 37 अउर कउनव मनई नबा अंगूर के रस काहीं, पुरान मसकन माहीं भरिके नहीं धरय, काहेकि नबा अंगूर के रस पुरान मसकन काहीं फारिके बहि जई, अउर मसकँय घलाय बरबाध होइ जइहँय। 38 एसे नबा अंगूर के रस नई मसकन माहीं भरई चाही। 39 कउनव मनई पुरान अंगूर के रस पिके, नबा अंगूर के रस नहीं पिअँइ चाहय, काहेकि उआ कहत हय, कि पुरानय अंगूर के रस निकहा हय।"

### पबित्र दिन के प्रभू

(मत्ती 12:1-8; मरकुस 2:23-28)

6 यीसु पबित्र दिन काहीं खेतन के किनारे-किनारे जात रहे हँय, अउर उनखर चेला लोग गोहूँ के बाली टोरि-टोरिके अउर हाँथे से मीज-मीजिके खात जात रहे हँय। 2 तब फरीसी लोगन म से कुछ जने कहई लागें, "तूँ पंचे उआ काम काहे करते हया, जउन मूसा के बिधान के मुताबिक पबित्र दिन काहीं करब उचित नहीं आय?" 3 तब यीसु उनहीं जबाब दिहिन, "काहे तूँ पंचे पबित्र सास्त्र माहीं इआ नहीं पढ़े आह्या, कि जब राजा दाऊद अउर उनखर साथी भूँखे रहे हँय, त का किहिन तय? 4 राजा दाऊद कइसन परमातिमा के घर माहीं गें, अउर भेंट चढ़ाई रोटिन काहीं खाइन, अउर अपने साथिन काहीं घलाय खबाइन, जिनहीं खाँइका याजक लोगन काहीं छोड़िके अउर कोहू काहीं उचित नहीं रहा?" 5 अउर यीसु उनसे कहिन, कि "मनई के लड़िका पबित्र दिन के घलाय प्रभू आहीं।"

### झुरान हाँथ बाले मनई काहीं नीक करब

(मत्ती 12:9-12; मरकुस 3:1-6)

6 एक दिन अइसन भ, कि यीसु पबित्र दिन काहीं यहूदी सभाघर माहीं जाइके उपदेस देंइ लागें; अउर उहाँ एकठे मनई बइठ रहा हय, जेखर दहिना हाँथ झुरान रहा हय। 7 मूसा के बिधान सिखामँइ बाले अउर फरीसी लोग, यीसु के ऊपर दोस लगामँइ के खातिर मोका ताकेन रहँय, कि देखी यीसु पबित्र दिन काहीं ओही नीक करत हैं, कि नहीं। 8 पय यीसु उनखे मन के बात जानत रहे हँय; एसे ऊँ झुरान हाँथ बाले मनई से कहिन, "उठा, बीच माहीं ठाढ़ होइजा।" अउर उआ उठिके ठाढ़ होइगा। 9 यीसु उनसे कहिन, "हम तौहसे इआ पूँछित हएन, कि मूसा के बिधान के मुताबिक, पबित्र दिन काहीं का उचित हय, नीक करब, कि नागा करब; कोहू के प्रान बचाउब, कि नास करब?" 10 तब यीसु चारिव कइती यहूदी सभाघर माहीं बइठे मनइन कइती देखिके, उआ झुरान हाँथ बाले मनई से कहिन, "आपन हाँथ बढ़ाबा।" उआ उहयमेर किहिस, अउर ओखर हाँथ पुनि निकहा होइगा। 11 पय ऊँ पंचे, आगबबूला होइके आपस माहीं बहँस करई लागें, कि हम पंचे यीसु के साथ का करी?

### बाराठे खास चलन काहीं नियुक्त करब

(मत्ती 10:1-4; मरकुस 3:13-19)

12 ऊँ दिनन माहीं यीसु पहार माहीं प्राथना करई के खातिर गें, अउर परमातिमा से प्राथना करँय माहीं सगली रात बिताइन। 13 जब दिन भ तब यीसु अपने सगले चलन काहीं बोलाइन, अउर उनमा से बारा जनेन काहीं चुनि लिहिन, अउर उनहीं आपन खास चेला कहिन; 14 अउर उनखर नाम इआमेर से हँय: समौन जिनखर नाम यीसु पतरस धराइन, अउर उनखर भाई अन्द्रियास, अउर याकूब, अउर यूहन्ना, अउर फिलिप्पुस, अउर बरतुलमय, 15 अउर मत्ती, अउर थोमा, अउर हलफई के लड़िका याकूब, अउर समौन जउन जेलोतेस कहाबत रहा हय, 16 अउर याकूब के लड़िका यहूदा, अउर यहूदा इस्करियोती जउन यीसु काहीं धोका दइके, उनखे बिरोधिन के हाँथ म पकड़ामँइ बाला बना।

### सिच्छा देब अउर बिमारन काहीं नीक करब

(मत्ती 4:23-25)

17 तब यीसु उनखे साथ पहार से उतरिके समथर जघा माहीं ठाढ़ भें, अउर उनखे चलन के बड़ी भीड़, अउर सगले यहूदिया प्रदेस, अउर यरूसलेम सहर, अउर सूर अउर सैदा प्रदेस के समुंद्र के किनारे से खुब मनई, 18 जउन यीसु के उपदेस सुनँय के खातिर, अउर अपने बिमारिन से नीक होई के खातिर उनखे लघे आएँ तय, उहाँ रहे हँय। अउर असुद्ध आत्मन से परेसान मनई घलाय नीक कइ दीन जात रहे हँय। 19 भीड़ के सगले मनई यीसु काहीं छुअँय चाहत रहे हँय, काहेकि यीसु से सामर्थ निकरिके सगले बिमारन काहीं नीक करत रही हय।

### आसीस अउर दुख के बचन

(मत्ती 5:1-12)

20 तब यीसु अपने चलन कइती देखिके कहिन, "धन्य हया तूँ पंचे जउन दीन हया, काहेकि परमातिमा के राज तौहरय आय।"

21 "धन्य हया तूँ पंचे जउन अबे भूँखे हया, काहेकि संतुस्त कीन जइहा। धन्य हया तूँ पंचे जउन अबे रोउते हया, काहेकि हँसिहा।"

22 "धन्य हया तूँ पंचे जब मनई के लड़िका के कारन, संसार के मनई तौहसे दुसमनी रखिहँय, अउर तौहई अपने बीच से निकार देइहँय, अउर तौहार बुराई करिहँय, अउर तौहई बुरा जानिके तौहार नाम अपने बीच म से काटि देइहँय।"

23 उआ दिन तूँ पंचे आनन्दित होइके कूद्या, काहेकि देखा, तौहरे खातिर स्वरग माहीं बड़ा प्रतिफल मिली: उनखर बाप-दादा परमातिमा के सँदेस बतामँइ बालेन के साथव इहइमेर से करत रहे हँय।

24 “पय हाय तौहरे ऊपर जउन तूँ पंचे धनमान हया, काहेकि तूँ आपन सान्ती पाय चुके हया।”

25 “हाय तौहरे ऊपर जउन तूँ पंचे अबे संतुस्त हया, काहेकि तूँ भूखे होइहा। हाय तौहरे ऊपर जउन अबे हँसते हया, काहेकि सोक करिहा अउर रोइहा।”

26 “हाय तौहरे ऊपर जब संसार के मनई तौहई भला कहँय, काहेकि उनखर बाप-दादा, परमातिमा के लबरी सँदेस बतामँइ बालेन के साथव, अइसय करत रहे हँय।”

### दुसमनन से प्रेम करब

(मत्ती 5:38-48; 7:12)

27 पय हम, तौहसे सुनँय बालेन से कहित हएन, कि “अपने दुसमनन से प्रेम करा; जउन तौहसे दुसमनी करँय, उनखर भलाई करा। 28 जउन मनई तौहई सराप देंय, उनहीं आसिरबाद द्या; जउन तौहार अपमान करँय, उनखे खातिर प्राथना करा। 29 जउन तौहरे एकठे गाल माहीं थापड़ मारय, ओखी कइती दुसरव गाल फेर दिहा; अउर जे तौहार साल छड़ाय लेय, ओही कुरथव लइ लेंइ दिहा; 30 अगर कोऊ तौहसे कुछू माँगय, त ओही द्या, अउर जे कोऊ तौहार कउनव चीज छड़ाय लेय, ओसे न माग्या। 31 जइसन तूँ पंचे चहते हया, कि दूसर मनई तौहरे साथ बेउहार करँय, तुहूँ पंचे उनखे साथ उहयमेर बेउहार करा। 32 अगर तूँ पंचे अपने प्रेम करँइ बालेन भर से प्रेम करिहा, त तौहार कउन बड़ाई? काहेकि पापिव मनई अपने प्रेम करँइ बालेन से प्रेम करत हँ। 33 अउर अगर तूँ पंचे अपने भलाई करँइ बालेन के साथ भर भलाई करते हया, त तौहार कउन बड़ाई? काहेकि पापिव मनई इहइमेर करत हँ? 34 अउर अगर तूँ पंचे उनहिन काहीं उधार द्या, जिनसे पुनि पामँइ के आसा रखते हया, त तौहार कउन बड़ाई? काहेकि पापिव मनई पापी मनइन काहीं उधार देत हँ, कि पुनि ओतनँइ पामँइ। 35 पय तूँ पंचे अपने दुसमनन से प्रेम करा; अउर भलाई करा, अउर दुबारा न पामँइ के आसा रखिके, उधार द्या, तब तौहई स्वरग माहीं बड़ा प्रतिफल मिली, अउर तूँ परमप्रधान परमातिमा के सन्तान ठहरिहा, काहेकि परमातिमा उनहूँ के ऊपर जउन धन्यबाद नहीं करँइ, अउर बुरे मनइन के उपरव किरपा करत हँ। 36 जइसन तौहार पिता परमातिमा दयालू हँ, उहयमेर तुहूँ पंचे दयालू बना।”

### दोस न लगाबा

(मत्ती 7:1-4)

37 “कोहू के ऊपर दोस न लगाबा, त परमातिमव तौहरे ऊपर दोस न लगइहँय। कोहू काहीं दोसी न ठहराबा, त परमातिमव तौहई दोसी न ठहरइहँय। अउर तूँ पंचे दुसरेन के गलती माफ करिहा, त परमातिमव तौहार गलती माफ करिहँय।” 38 “तूँ पंचे अगर दुसरेन काहीं कुछू देइहा, त परमातिमा के द्वारा तौहऊँ काहीं दीन जई। उहय नाप माहीं हलाय-हलाइके अउर दबाय-दबाइके पूर भरिके दीन जई, काहेकि जउने नाप से तूँ पंचे दुसरेन काहीं नपते हया, उहय नाप से परमातिमव तौहरे खातिर नपिहँय।”

39 यीसु पुनि उनहीं एकठे अउर उदाहरन दइके कहिन, “का एकठे आँधर मनई, दुसरे आँधर मनई काहीं गइल बताय सकत हय? का ऊँ दोनव जने गइल माहीं न गिर परिहँय?” 40 कउनव चेला अपने गुरू से बड़ा नहीं होय, पय अगर चेला सिद्ध होइ जई, त अपने गुरू कि नाई होइ सकत हय।

41 तूँ अपने भाई के छोट गलती काहीं काहे देखते हया, जउन निन्च बुदी उजार कि नाई हय, अउर अपने बड़ी गलती काहीं नहीं देखते आह्या, जउन खम्भा कि नाई हय? 42 जब तौहई अपने आँखी के खम्भा नहीं देखाय, त तूँ अपने भाई से कइसा कहि सकते हया, हे भाई, रुकि जा, तौहरे आँखी के निन्च बुदी उजार निकार देई? हे कपटी, पहिले अपने आँखी के खम्भा

निकार, तब जऊँ निन्च बुदी उजार तोरे भाई के आँखी माहीं ही, ओही निकहा से देखिके निकारे पइहे।

### जइसन बिरबा ओइसन फर

(मत्ती 7:16-20; 12:33-35)

43 “कउनव निकहा बिरबा अइसा नहीं होय, कि ओमा खराब फर लागँय, अउर कउनव खराब बिरबा अइसा नहीं होय, कि ओमा निकहा फर लागँय। 44 हरेक बिरबा अपने फरय से पहिचाना जात हय; काहेकि मनई जरबइलन से अंजीर नहीं टोर सकँय, अउर न झरबेरी से अंगूर। 45 इहइमेर निकहा मनई अपने मन के निकहे भन्डार से, निकही बात निकारत हय; अउर बुरा मनई अपने मन के बुरे भन्डार से, बुरी बात निकारत हय; काहेकि जउन मन म भरा रहत हय, उहय ओखे मुँह से निकारत हय।”

### घर बनामँइ बाले दुइठे मनई

(मत्ती 7:24-27)

46 “जब तूँ पंचे हमार कहा नहीं मनते आह्या, त काहे हमहीं ‘हे प्रभू, हे प्रभू’, कहते हया? 47 जे कोऊ हमरे लघे आबत हय, अउर हमरे बातन काहीं सुनिके उनहिन के मुताबिक चलत हय, हम तोहई बताइत हएन, कि उआ केखी कि नाई होत हय, 48 उआ, उआ मनई कि नाई होत हय, जउन घर बनाबत माहीं नेव गहिल खोदिस, अउर जब बड़ी काहीं चट्टान मिलगे, ओहिन माहीं नेव भरिके घर बनाइस, अउर जब बाढ़ आई तब पानी के तेज धार उआ घर से टकरानी, पय नहीं गिराए पाइन; काहेकि उआ पक्का घर बना रहा हय। 49 पय जउन मनई हमरे बात काहीं सुनिके नहीं मानय उआ, उआ मनई कि नाई होत हय, जउन बिना नेव खोदे घर बनाइस, अउर जब बाढ़ आई, अउर पानी के तेज धार के उआ घर से टकरातय, उआ घर गिरिके, पूरी तरह से नास होइगा।”

### एकठे सुबेदार के बिसुआस

(मत्ती 8:5-13)

7 जब यीसु मनइन से आपन सगली बातँय कहि चुके, तब कफरनहूम सहर माहीं आएँ, 2 उहाँ कउनव सुबेदार के एकठे पियार दास रहा हय, त उआ खुब बिमार रहा हय, लागत रहा हय कि उआ मर जई। 3 सुबेदार यीसु के खबर सुनिके यहूदी लोगन के कइयकठे अँगुअन काहीं यीसु के लघे बिनती करँइ के खातिर पठइन, कि उँइ आइके हमरे दास काहीं नीक कइदेंय। 4 ऊँ पंचे यीसु के लघे गेँ, अउर उनसे खुब बिनती कइके कहँइ लागेँ, “सुबेदार इआ काबिल हँ, कि अपना उनखे खातिर इआ काम करी, 5 काहेकि ऊँ हमरे यहूदी जाति से प्रेम करत हँ, अउर उँइन हमरे सभाघर काहीं बनबाइन हीं।” 6 तब यीसु उनखे साथ चल दिहिन, पय जब ऊँ घर के लघे पहुँचिगेँ, तब सुबेदार अपने कइयकठे साथिन से कहबाय पठइन, “हे प्रभू, हमरे घर आमँइ के दुख न उठाई, काहेकि हम एखे काबिल नहीं आहने, कि अपना हमरे घर माहीं अई। 7 इहय कारन से, कि हम अपना के लघे आमँइ के काबिल नहीं आहने, इआ समझिके अपना के लघे नहीं आएन, पय उहँइ से बचन कहि देई, त हमार दास नीक होइ जई। 8 हमहूँ पराधीन मनई आहने, अउर सिपाही हमरे अधीन हँ; जब एकठे से कहित हएन, कि ‘जा’ तब उआ जात हय; अउर जब दुसरे से कहित हएन, कि ‘आव’ तब उआ आबत हय; अउर अपने कउनव दास से कहित हएन, कि ‘इआ कर’ त उआ उहय करत हय।” 9 इआ बात सुनिके यीसु खुब अचरज मानिन, अउर पीछे फिरिके उआ भीड़ के मनइन से जउन उनखे पीछे आबत रहे हँय कहिन, “हम तौहसे कहित हएन, कि हम इजराइल माहीं घलाय अइसन बिसुआस नहीं पाएन।” 10 अउर सुबेदार के पठए साथी घर लउटिके उआ सेबक काहीं नीक-सूख पाइन।

### बिधबा के लड़िका काहीं जिआउब

11 कुछ दिन के बाद यीसु नाईन नाम के एकठे सहर माहीं जात रहे हैं, उनखे साथ माहीं उनखर चेला लोग, अउर खुब झुन्ड के झुन्ड मनई जात रहे हैं।<sup>12</sup> जब यीसु सहर के प्रबेस द्वार के लघे पहुँचे, त खुब मनई एकठे लहास काहीं बहिरे लए जात रहे हैं; जउन अपने महतारी के एकलउता लड़िका रहा हय; अउर उआ मेहेरिआ बिधबा रही हय; अउर उआ सहर के खुब मनई उनखे साथ माहीं रहे हैं।<sup>13</sup> उआ बिधबा मेहेरिआ काहीं देखिके, प्रभू काहीं दया आइगे, अउर यीसु कहिन, “न रोबा”,<sup>14</sup> तब यीसु लघे जाइके अरथी काहीं छुड़न, अउर जउन अरथी उठाए रहे हैं, रुकिगें। तब यीसु कहिन, “हे नवजमान, हम तौहसे कहित हएन कि उठा!”<sup>15</sup> तब उआ मुरदा उठ बइठ, अउर बोलैँ लाग। अउर यीसु ओही ओखे महतारी काहीं सउँप दिहिन।<sup>16</sup> इआ देखिके सगले जन डेराइगें, अउर ऊँ पंचे परमातिमा के बड़ाई कइके कहँई लागें, “हमरे बीच माहीं परमातिमा के सँदेस बतामँई बाले एक जने खुब महान मनई आए हँय, अउर परमातिमा अपने लोगन के ऊपर किरपा किहिन हीं।”<sup>17</sup> अउर यीसु के बारे माहीं इआ बात सगले यहूदिया प्रदेस अउर लघे-लघे के प्रदेसन माहीं फइलिंगे।

### यूहन्ना बपतिस्मा देँइ बाले के पूँछब

(मत्ती 11:2-19)

18 यूहन्ना बपतिस्मा देँइ बाले काहीं उनखर चेला लोग ई सगली बातन के खबर बताइन।<sup>19</sup> तब यूहन्ना बपतिस्मा देँइ बाले अपने चलन म से दुइ जनेन काहीं बोलाइके, प्रभू के लघे इआ पूँछँइ के खातिर पठइन, कि “का आमँइ बाले मसीह अपनय आहैन, कि हम पंचे अउर दुसरे के इन्तजार करी?”<sup>20</sup> उँइ दोनव जने यीसु के लघे आइके कहिन, “यूहन्ना बपतिस्मा देँइ बाले हमहीं अपना के लघे इआ पूँछँइ के खातिर पठइन हीं, कि का आमँइ बाले मसीह अपनय आहैन, इआ कि हम पंचे दुसरे के इन्तजार करी?”<sup>21</sup> उहय समय यीसु खुब मनइन काहीं बिमारिन अउर दुखन, अउर बुरी आत्मन से छोड़ाइन, अउर खुब अँधरन काहीं नीक किहिन, अउर ऊँ देखँइ लागें;<sup>22</sup> अउर यीसु उनसे कहिन, “जउन कुछू तूँ पंचे देखे सुने हया, जाइके यूहन्ना बपतिस्मा देँइ बाले से कहि दिहा; कि अँधर देखत हैं; लाँगड चलँइ लागत हैं; कोढ़ी सुद्ध कीन जात हैं; बहिर सुनँय लागत हैं, मुरदा जिआए जात हैं। अउर कंगालन काहीं खुसी के खबर सुनाई जात ही।<sup>23</sup> पय धन्य हय उआ मनई, जउन हमरे ऊपर कीन बिसुआस से कबहूँ नहीं भटकया।”

<sup>24</sup> जब यूहन्ना बपतिस्मा देँइ बाले के चेला लोग उहाँ से चल दिहिन, तब यीसु यूहन्ना बपतिस्मा देँइ बाले के बारे माहीं, उहाँ बइठ मनइन से कहँइ लागें, “तूँ पंचे गाँव से दूरी सुनसान जघा माहीं का देखँइ गया तय? का हबा से हालत सरकन्डा काहीं? <sup>25</sup> पुनि तूँ पंचे का देखँइ गया तय? का कोमर ओन्हा पहिरे मनई काहीं? देखा, जउन कीमती ओन्हा पहिरे सुख-बिलास से रहत हैं, ऊँ राजमहलन माहीं रहत हैं। <sup>26</sup> त पुनि तूँ पंचे का देखँइ गया तय? का कउनव परमातिमा के सँदेस बतामँई बाले काहीं? हाँ, हम तौहसे कहित हएन, बलकिन परमातिमा के सँदेस बतामँई बाले से बड़े काहीं। <sup>27</sup> ई, उँइन आहीं, जिनखे बारे माहीं पबित्र सास्त्र माहीं लिखा हय:

‘देखा, हम अपने दूत काहीं तौहरे आँगे-आँगे पठइत हएन, जउन तौहरे खातिर मनइन काहीं तइआर करिहँय।’

<sup>28</sup> हम तौहसे कहित हएन, कि जउन बरी-बिआही मेहेरिआन से पइदा भें हँय, उनमा से यूहन्ना बपतिस्मा देँइ बाले से बढ़िके, कोऊ नहिं भ आय, पय जउन परमातिमा के राज माहीं छोट से छोट हैं, ऊँ यूहन्ना से बढ़िके हँय।”

<sup>29</sup> अउर यीसु के इआ बात काहीं सुनिके, सगले साधारन मनई अउर चुंगी लेंइ बाले घलाय, यूहन्ना से बपतिस्मा लइके परमातिमा काहीं सच्चा मान लिहिन।<sup>30</sup> पय फरीसी लोग अउर मूसा के बिधान सिखामँई बाले यूहन्ना से बपतिस्मा न लइके, परमातिमा के इच्छा काहीं अपने बारे माहीं टार दिहिन।

<sup>31</sup> “हम इआ समय के मनइन के तुलना कैसे करी, कि ऊँ केखे कि नाई हें? <sup>32</sup> ऊँ पंचे ऊँ लड़िकन कि नाई हें, जउन बजार माहीं बइठे एक दुसरे से गोहराइके कहत हें, ‘हम तौहरे खातिर बसुरी बजाएन, अउर तूँ पंचे नहीं नाच्या; अउर हम पंचे तौहरे खातिर सोक के गाना गाएन, अउर तूँ पंचे नहीं रोया!’ <sup>33</sup> काहेकि यूहन्ना बपतिस्मा देँइ बाले, न रोटी खात आएँ, अउर न अंगूर के रस पिअत आएँ, अउर तूँ पंचे कहते हया, ‘उनखे भीतर बुरी आत्मा हय’ <sup>34</sup> मनई के लड़िका, खात-पिअत आबा हय, अउर तूँ पंचे कहते हया, ‘देखा, पेटू अउर पिआगी मनई काहीं, चुंगी लेंइ बालेन अउर पापिन के साथी आय।’ <sup>35</sup> पय परमातिमा के ग्यान के मुताबिक चलँइ बाले इआ बात काहीं जाहिर करत हें, कि परमातिमा सच्चे हें।”

### फरीसी के घर माहीं पापिन मेहेरिआ काहीं माफ करब

<sup>36</sup> पुनि कउनव फरीसी यीसु से बिनती किहिस, कि ऊँ उनखे घर माहीं उनखे साथ बियारी करँय चलँय, तब यीसु फरीसी के घर माहीं जाइके खाना खाँय बइठें।<sup>37</sup> उआ सहर के एकठे पापिन मेहेरिआ, इआ जानिके, कि यीसु फरीसी के घर माहीं खाना खाँय बइठ हें, संगमरमर के बरतन माहीं अँतर लइके आई।<sup>38</sup> अउर यीसु के गोड़े के लघे पीछे ठाढ़ होइके, रोबत-रोबत उनखे गोड़न काहीं आँसू से भिजाइके, अपने मूँडे के बार से पोंछँइ लाग, अउर उनखे गोड़न काहीं बेर-बेर चूम के अँतर मलिस।<sup>39</sup> इआ देखिके, उआ फरीसी जउन यीसु काहीं बियारी करँय क बोलाइस रहा हय, अपने मन माहीं सोचँइ लाग, “अगर ई परमातिमा के सँदेस बतामँई बाले होतें त इआ जान जातें, कि इआ मेहेरिआ जऊँ उनहीं छुअत ही, त उआ को आय, अउर कइसन मेहेरिआ ही, काहेकि उआ त पापिन मेहेरिआ आय।”<sup>40</sup> यीसु उनखे बात काहीं जानिके जबाब दिहिन, “हे समौन, हमहीं तौहसे कुछू कहँइ क हय।” ऊँ कहिन, “हे गुरू, कही।”<sup>41</sup> “कउनव साहूकार के दुइठे रिनिहा रहे हँय, एकठे पाँच सव, अउर दूसर पचास दिनार के रिनिहा रहा हय।<sup>42</sup> जब उनखे लघे रिन पटामँइ के खातिर कुछू नहीं रहा, तब ऊँ साहूकार दोनव जनेन के रिन माफ कइ दिहिन। एसे उनमा से कउन उनसे जादा प्रेम करी?”<sup>43</sup> समौन जबाब दिहिन, “हमरे समझ माहीं, उआ जउने के जादा रिन माफ कीन ग हय।” तब यीसु उनसे कहिन, “तूँ ठीक जबाब दिहा हय।”<sup>44</sup> अउर उआ मेहेरिआ कइती फिरिके यीसु समौन से कहिन, “का तूँ इआ मेहेरिआ काहीं देखते हया? हम तौहरे घर माहीं आएन, अउर तूँ हमरे गोड़ धोमँइ के खातिर पानिव तक नहीं दिहा, पय इआ मेहेरिआ हमरे गोड़न काहीं अपने अँसुन से फुलाइके, अउर अपने मूँडे के बालन से पोंछिस ही।<sup>45</sup> तूँ अपने रीत के मुताबिक हमहीं चूमा नहीं दिहा, पय जब से हम आएन हय, तब से इआ मेहेरिआ हमरे गोड़न काहीं चूमब नहीं छोंडिस।<sup>46</sup> तूँ हमरे मूँडे माहीं तेल नहीं मल्या, पय इआ हमरे गोड़े माहीं अँतर मलिस ही।<sup>47</sup> एसे हम तौहसे कहित हएन, कि इआ मेहेरिआ के पाप जउन खुब रहे हँय, माफ होइगें, काहेकि इआ मेहेरिआ खुब प्रेम किहिस ही; पय जेखर थोरका पाप माफ होत हें, उआ थोरिन क प्रेम करत हय।”<sup>48</sup> अउर यीसु उआ मेहेरिआ से कहिन, “तौहार पाप माफ होइगें।”<sup>49</sup> तब जउन मनई उनखे साथ खाना खाँइ बइठ रहे हँय, ऊँ पंचे अपने-अपने मन माहीं सोचँइ लागें, “ई को आहीं, जउन पापन काहीं माफ करत हें?”<sup>50</sup> पय यीसु उआ मेहेरिआ से कहिन, “तौहार बिसुआस तोहँई बचाय लिहिस ही, नीके कुसल चले जा।”

### यीसु के सेबिकाएँ

**8** एखे बाद यीसु सहरन-सहरन अउर गाँमन-गाँमन प्रचार करत, अउर परमातिमा के राज के खुसी के खबर सुनाबत घूमँइ लागें, अउर ऊँ बरहूँ चेलव उनखे साथ माहीं रहे हँय, <sup>2</sup> अउर कुछू मेहेरिआव रही हँय, जउन बुरी आत्मन से छोंडाई अउर बिमारिन से नीक कीन गई तय, अउर ऊँ पंचे ई आहीं: मरियम जउन मगदलीनी कहाबत रही हँय, जउने म से सातठे बुरी आत्मा निकरीं तय, <sup>3</sup> अउर हेरोदेस राजा के भन्डारी खुजा के मेहेरिआ

योअन्ना, अउर सूसन्नाह, अउर खुब दुसरव मेहेरिआ रही हँय, ई अपने धन सम्पत्ति से यीसु के सेवा करत रही हँय।

### बीज बोमँड बाले किसान के उदाहरन

(मत्ती 13:1-9; मरकुस 4:1-9)

4 जब खुब भीड़ एकट्ठा होइगे, अउर हरेक सहर के मनई उनखे लघे चले आबत रहे हँय, तब यीसु एकठे उदाहरन दइके कहिन: 5 “एकठे बीज बोमँड बाला बीज बोमँड निकरा। अउर बोबत समय कुछ बीज गइल के किनारे गिरे, अउर कचरिगे, अउर अकास म उड़इ बाले पच्छी आइके उनहीं खाय लिहिन। 6 कुछ बीज पथरही भुँड माहीं गिरे, अउर हरबी जामि आएँ, जहाँ उनहीं गहिल माटी नहीं मिली, इआ कारन से झुराइगे। 7 कुछ बीज जरबइलन म गिरे, अउर जामि आएँ, पय ऊँ जरबइला साथय-साथ बाढ़िके उनहीं दबाय लिहिन। 8 कुछ बीज निकही भुँड माहीं गिरे, अउर जामिके, सव गुना फर लइ आएँ।” एतना कहिके यीसु खुब चंडे कहिन, “जेखर सुनँय के मन होय, उआ बड़े ध्यान से सुन लेय।”

### उदाहरन के उद्देश्य

(मत्ती 13:10-17; मरकुस 4:10-12)

9 अउर चेला लोग यीसु से पूँछिन, कि इआ उदाहरन के मतलब का हय? 10 यीसु उनसे कहिन, “परमातिमा के राज के जउने बातन काहीं दूसर लोग नहीं जानँय, ऊँ बातन काहीं परमातिमा तोहई समझाइन हीं, पय सगली बात दुसरे लोगन काहीं उदाहरन माहीं सुनाई जाती हँय, एसे कि ‘ऊँ पंचे परमातिमा के महिमा काहीं देखत हँ, पय देखेव से जाने नहीं पामँय, अउर अपने कानन से सुनत हँ, पय सुनेव से नहीं समझे पामँय।’”

### बीज बोमँड बाले उदाहरन के मतलब

(मत्ती 13:18-23; मरकुस 4:13-20)

11 “इआ उदाहरन के मतलब इआमेर हय: बीज परमातिमा के बचन आय। 12 गइल के किनारे गिरे बीज ऊँ आहीं, जउन परमातिमा के बचन काहीं सुनिन; पय कुछ देर बाद सइतान आइके उनखर सुनी बात काहीं बिसराय देत हय, कि कहँव अइसा न होय, कि ऊँ पंचे परमातिमा के बचन के बिसुआस कइलेंय अउर पाप से छुटकारा पाय जाँय। 13 कुछ जने पथरही जमीन माहीं बोए बीज कि नाई होत हँ, जउन परमातिमा के बचन काहीं सुनिके, मारे उराव के अपनाय लेत हँ। पय अपने जीवन माहीं परमातिमा के सँदेस काहीं गहराई से लागू नहीं करँड, एसे कुछ दिनन तक मानत हँ, पय बाद माहीं जबहिन परमातिमा के बचन के कारन दुख अउर कस्ट मिलत हँ, त हरबिन परमातिमा के बचन काहीं मानब छोड़ि देत हँ। 14 जउन बीज जरबइला माहीं गिरे, ऊँ ई आहीं, जउन परमातिमा के बचन काहीं सुनिन, अउर आँगे चलिके घर-परिवार के चिन्ता, अउर धन के लालच, अउर जीवन के सुख-बिलास माहीं फँसिके परमातिमा के बचन काहीं बिसराय देत हँ, अउर परमातिमा के आसीस नहीं पामँय। अउर बिना फर के बिरबा कि नाई होइ जात हँ। 15 पय जउन निकही भुँड म बोए बीज कि नाई होत हँ, ऊँ पंचे ई आहीं, जऊँ परमातिमा के बचन काहीं सुनिके, पूरे बिसुआस के साथ अपनाबत हँ, अउर अपने हिरदँय के भले भन्डार माहीं सम्हारे रहत हँ, अउर धीरज धइके फर लइ आबत हँ।”

### दिया के उदाहरन

(मरकुस 4:21-25)

16 “कउनव मनई दिया जलाइके बरतन के नीचे नहीं मूदय, अउर न खटिया के नीचे धरय, बलकिन ऊँचे जघा माहीं धरत हय, कि घर के भीतर आमँड बाले उँजिआर पामँय। 17 जउन कुछू बिचार मनइन के मन माहीं हँ, परमातिमा उनहीं प्रगट करिहँय, अउर हमरे जीवन के सगली छिपी बातन काहीं परमातिमा जानत हँ। 18 एखे बारे माहीं तूँ पंचे सतरक रहा, कि तूँ पंचे

कउनमेर सुनते हया? काहेकि जे कोऊ परमातिमा के बचन काहीं अउर निकहा से जानँड के कोसिस करत हय, परमातिमा ओही अउर आत्मिक ग्यान देत हँ, पय जे कोऊ परमातिमा के बचन काहीं जानँड के कोसिस नहीं करय, त ओखे लघे जउन ग्यान रहत हय, उहव बिसरि जात हय, जेही उआ आपन समझत हय।”

### यीसु के महतारी अउर भाई

(मत्ती 12:46-50; मरकुस 3:31-35)

19 तब यीसु के महतारी अउर भाई लोग उनखे लघे आएँ, पय खुब भीड़ होइ के कारन उनसे नहीं मिल पाएँ। 20 तब कुछ जने यीसु से कहिन, “देखी, अपना के महतारी अउर भाई लोग बहिरे ठाढ़ हँ, अउर अपना से मिलँड चाहत हँ।” 21 इआ सुनिके यीसु बोलामँड बालेन से कहिन, “देखा हमार महतारी अउर हमार भाई ई पंचे आहीं, जउन परमातिमा के बचन काहीं सुनत हँ, अउर मानत हँ।”

### तेज आँधी काहीं रोकब

(मत्ती 8:23-27; मरकुस 4:35-41)

22 एक दिन पुनि यीसु अउर उनखर चेला लोग नाव माहीं चढ़े, तब यीसु उनसे कहिन, “आबा झील के उआ पार चली।” तब ऊँ पंचे नाव काहीं छोर दिहिन। 23 पय जब नाव चलत रही हय, तब यीसु नाव माहीं सोइगे, तबहिनय खुब तेज आँधी चलँड लाग, अउर पानी के तेज हिलकोरा से नाव माहीं पानी भरँय लाग, अउर ऊँ पंचे बड़ी मुसीबत माहीं परिगे। 24 तब चेला लोग जाइके यीसु काहीं जगाइके उनसे कहिन, “हे स्वामी! हम पंचे बूड़े जइत हएन।” तब यीसु उठिके आँधी अउर पानी के लहरन काहीं डाँटिन, त ऊँ रुकि गई, अउर सान्ती होइगे। 25 तब यीसु चलन से कहिन, “काहे तौहई अबहिनव तक हमरे ऊपर बिसुआस नहिं आय?” पय ऊँ पंचे खुब डेराइगे तय, अउर खुब अचरज मानिके आपस माहीं कहँड लागे, “ई को आहीं, कि आँधी, पानी तक काहीं हुकुम देत हँ, अउर ऊँ घलाय उनखर कहा मानत हँ?”

### बुरी आत्मा से परेसान मनई काहीं नीक करब

(मत्ती 8:28-34; मरकुस 5:1-20)

26 एक दिन यीसु, अउर उनखर चेला लोग गिरासेनी लोगन के देस माहीं पहुँचिगे, जउन गलील प्रदेस के सउहें दुसरे पार रहा हय। 27 जइसय यीसु नाव से उतरें, ओतनिनदार उआ सहर के एकठे मनई उनहीं मिला, जउने माहीं बुरी आत्मा सकान रही हँय। उआ खुब दिनन से ओन्हा नहीं पहिरत रहा आय, अउर न घरय माहीं रहत रहा आय, बलकिन उआ कब्रन माहीं रहा करत रहा हय। 28 उआ यीसु काहीं देखिके चिल्लान, अउर उनखे गोड़न गिरिके खुब चन्डे कहिस, “हे यीसु परमप्रधान परमातिमा के लड़िका! हमार अपना से कउनव काम नहिं आय। हम अपना से चरउरी करित हएन, कि हमहीं दुख न देई।”

29 काहेकि यीसु, ऊँ बुरी आत्मन काहीं, उआ मनई से बहिरे निकर जाँड के हुकुम देत रहे हँय, ऊँ बुरी आत्मा उआ मनई काहीं बेर-बेर परेसान करत रही हँय। जब कि सगले जन मिलिके ओही कइअक बेरी बेँडियन, अउर सँकरिन से बाँधिन तय, पय उआ उनहीं टोर डारत रहा हय। अउर ऊँ बुरी आत्मा उआ मनई काहीं गाँव से दूरी सुनसान जघन माहीं भगाए फिरत रही हँय। 30 यीसु ओसे पूँछिन, “तौहार का नाम हय?” उआ यीसु से कहिस, “हमार नाम सेना हय।” काहेकि ओखे भीतर खुब बुरी आत्मा सकान रही हँय। 31 अउर ऊँ बुरी आत्मा यीसु से खुब चरउरी किहिन, कि हमहीं अथाह कुन्ड माहीं जाँड के हुकुम न देई। 32 ओहिनेठे पहार माहीं सुमरन के एकठे बड़ा भारी झुन्ड चरत रहा हय, ऊँ बुरी आत्मा यीसु से चरउरी कइके कहिन, कि हमहीं ऊँ सुमरन के ऊपर पठय देई, जउने हम पंचे उनखे भीतर सकाय जई, तब यीसु, ऊँ बुरी आत्मन काहीं हुकुम दइ दिहिन। 33 अउर ऊँ बुरी आत्मा

उआ मनई से निकरिके, ऊँ सुमरन के भीतर सकाय गई, अउर सुमरन के झुन्ड पहार के उतारा से दउड़िके झील माहीं कूद परा, अउर सगले सुमर बूड़िके मरिगें।

<sup>34</sup> अउर इआ जऊँ भ रहा हय, देखिके सुमरन काहीं चरामँड बाले सगले भागिके, सहर अउर लघे के गाँमन माहीं जाइके सगला हाल बताइन।  
<sup>35</sup> इआ जऊँ भ रहा हय, देखई के खातिर खुब जने आएँ। अउर यीसु के लघे आइके, उआ मनई काहीं जउने म से बुरी आत्मा निकरी रही हँय, ओन्हा पहिरे यीसु के गोड़े के लघे नीक-सूख बइठे देखिके डेराइगें; <sup>36</sup> जउन मनई इआ घटना काहीं देखिन तय, ऊँ मनइन से जऊँ देखई आएँ तय बताइन, कि जउने माहीं बुरी आत्मा रही हँय, उआ कउनमेर से निकहा भ हय। <sup>37</sup> तब उँ सगले जउन गिरसेनी प्रदेश के लघे-लघे के सहरन अउर गाँमन से देखइआ आएँ तय, यीसु से बिनती कइके कहँई लागें, कि अपना हमरे इहाँ से चले जई; काहेकि ऊँ पंचे खुब डेराइगें तय। तब यीसु नाव माहीं चढ़िके लउटिगें।  
<sup>38</sup> तबहिनय उआ मनई जउने म से बुरी आत्मा निकरी रही हँय, यीसु से बिनती करँई लाग, हमहूँ काहीं अपने साथय रहँई देई, पय यीसु ओही बिदा कइके कहिन, <sup>39</sup> "अपने घर जाइके अपने परिवार बालेन से बताबा, कि परमातिमा तौहरे ऊपर बड़ी दया कइके, केतना बड़ा काम किहिन हीं।" उआ मनई जाइके सगले सहर माहीं प्रचार करँई लाग, कि यीसु हमरे खातिर केतना बड़ा काम किहिन हीं।

### याईर के मरी बिटिया अउर एकठे बिमार मेहेरिआ

(मत्ती 9:18-26; मरकुस 5:21-43)

<sup>40</sup> जब यीसु नाव माहीं चढ़िके झील के दुसरे पार आइगें, तब खुब मनई उनसे आनन्द के साथ मिलें, काहेकि ऊँ पंचे यीसु के इन्तजार करत रहे हँय।

<sup>41</sup> एतनेन माहीं याईर नाम के एकठे मनई, जउन यहूदी सभाघर के मुखिया रहे हँय आएँ, अउर ऊँ यीसु के गोड़न गिरिके, उनसे बिनती करँई लागें, कि अपना हमरे घर चली, <sup>42</sup> काहेकि उनखे बारा बरिस के एकलउती बिटिया रही हय, अउर उआ खुब बिमार रही हय, लागत रहा हय कि मर जई। जब यीसु उनखे साथ जात रहे हँय, तब एतनी भीड़ रहय, कि लोग उनखे उपरय गिरे परत रहे हँय।

<sup>43</sup> भीड़ माहीं एकठे मेहेरिअव रही हय, जउने काहीं बारा बरिस से खून बहँई के बिमारी रही हय। उआ मेहेरिआ, खुब बैदन से आपन दबाई करबाइस रहा हय, इहाँ तक कि आपन सगली धन-सम्पत्ती खरचा कइ डारिस, पय कउनव बैदन से निकही नहीं भय, <sup>44</sup> उआ मेहेरिआ भीड़ माहीं पीछे से आइके यीसु के ओन्हा के छोर काहीं छुइस, अउर छूतय ओखर खून बहब बन्द होइगा। <sup>45</sup> तबहिनय यीसु कहिन, "हमहीं को छुइस ही?" जब सगले जन कहँई लागें, हम नहीं छुएन, तब पतरस अउर उनखर चेला लोग यीसु से कहिन, "हे मालिक, अपना काहीं त सगले भीड़ के मनई दबाए डारत हें, अउर अपना के उपरय गिरे परत हें।" <sup>46</sup> पय यीसु कहिन, "हमहीं कोऊ छुइस ही, काहेकि हम जान लिहेन हय, कि हमरे देह से सामर्थ निकरी हय।" <sup>47</sup> तब उआ मेहेरिआ इआ जानिके, कि हम लुक नहीं सकी, कँपतय-काँपत आई, अउर यीसु के गोड़न माहीं गिरिके, सगले मनइन के आँगे बताइस, कि हम कउने कारन से अपना काहीं छुएन, अउर छूतय नीक होइ गएन। <sup>48</sup> यीसु उआ मेहेरिआ से कहिन, "बिटिआ, तूँ हमरे ऊपर बिसुआस किहा हय, एसे नीक होइ गया हय, नीके कुसल अपने घर चले जा।"

<sup>49</sup> यीसु इआ बात कहतय रहे हँय, कि यहूदी सभाघर के मुखिया के घर से कउनव आइके कहिस, "तौहार बिटिया मरिगे ही, अब गुरु काहीं जाँइ के तकलीफ न द्या।" <sup>50</sup> यीसु इआ सुनिके यहूदी सभाघर के मुखिया याईर से कहिन, "डेरा न, केबल बिसुआस करा, त तौहार बिटिआ बच जई।" <sup>51</sup> यीसु याईर के घर माहीं आइके पतरस, यूहन्ना, याकूब अउर बिटिआ के महतारी-बाप काहीं छौड़िके, अउर कोहू काहीं अपने साथ भीतर नहीं आमँड दिहिन। <sup>52</sup> सगले घर के मनई उआ बिटिया के खातिर खुब रोबत-पीटत रहे हँय, तब यीसु उनसे कहिन, "रोबा न बिटिया मरी नहीं आय, उआ सोबत ही।" <sup>53</sup> ऊँ पंचे इआ जानिके कि बिटिया मरिगे ही, यीसु के मजाक उड़ाई लागें।

<sup>54</sup> पय यीसु उआ बिटिया के हाँथ पकड़िके चंडे से कहिन, "हे बिटिया उठ!"

<sup>55</sup> तब ओखर प्रान लउटि आएँ, अउर उआ हरबिन उठ बइठ। तब यीसु ओखे महतारी-बाप काहीं हुकुम दिहिन, कि बिटिया काहीं कुछे खाय-पिअँइ काहीं द्या। <sup>56</sup> उआ बिटिया के महतारी-बाप अचरज मानिन, पय यीसु उनहीं चेताइन, कि इआ जउन भ हय, कोहू से न बताया।

### बाराठे खास चलन काहीं पठउब

(मत्ती 10:5-15; मरकुस 6:7-13)

**9** एक दिन यीसु बरहँव चलन काहीं अपने लघे बोलाइके, उनहीं बुरी आत्मन काहीं निकारँइ के, अउर बिमारन काहीं नीक करँइ के सामर्थ अउर अधिकार दिहिन। <sup>2</sup> अउर उनहीं परमातिमा के राज के प्रचार करँइ, अउर बिमारन काहीं नीक करँइ के खातिर पठइन। <sup>3</sup> अउर यीसु उनसे कहिन, "गइल के खातिर कुछे न लिहा, न त लाठी, न त झोरिया, न त रोटी, न त पइसा, अउर न त दुइ-दुइठे कुरथा।" <sup>4</sup> अउर जेखे घर माहीं तूँ पंचे जया, त जब तक उहाँ से बिदा न होया, तब तक उहय घर माहीं रहे अया। <sup>5</sup> जउने गाँव के मनई तौहई पंचन काहीं सोइकार न करँय, अउर परमातिमा के सँदेस न सुनँय, त उआ गाँव से चलत समय उनखे अँगुअय, अपने गोड़ने के धूधुर झार दिहा, कि जउने परमातिमा के सँदेस माहीं बिसुआस न करँइ के सजा के भागीदार उँइन होइहँय, इआ गबाही होई।" <sup>6</sup> तब चेला लोग उहाँ से निकरिके हरेक गाँमन माहीं परमातिमा के खुसी के खबर सुनाबत, अउर हरेक जघन माहीं बिमार मनइन काहीं नीक करत फिरत रहिगें।

### हेरोदेस राजा के परेसानी

(मत्ती 14:1-12; मरकुस 6:14-29)

<sup>7</sup> एक दिन यहूदिया प्रदेश के चउथ हिस्सा के राजा हेरोदेस इआ सुनिके घबराइगें, कि यीसु के हाँथ से खुब सामर्थ के काम होत हें, काहेकि कइयक जने इआ कहत रहे हँय, कि यूहन्ना बपतिस्मा देई बाले मरिके जि आएँ हँय, <sup>8</sup> अउर कुछे जने कहिन, कि एलिय्याह देखाई दिहिन हीं। पय अउर कुछे जने कहँई लागें, जऊँ पहिले परमातिमा के सँदेस सुनामँड बाले रहे हँय, उनहिन म से कोऊ जि आएँ हँय। <sup>9</sup> पय हेरोदेस राजा कहिन, "यूहन्ना बपतिस्मा देई बाले के त, हम मूँइ कटबाय लिहेन तय, अब ई को आहीं जेखे बारे माहीं हम अइसन बात सुनित हएन?" अउर उँ यीसु काहीं देखँइ के इच्छा जाहिर किहिन।

### पाँच हजार मनइन काहीं खाना खबाउब

(मत्ती 14:13-21; मरकुस 6:30-44; यूहन्ना 6:1-14)

<sup>10</sup> पुनि कुछे दिन बाद सगले खास चेला लोग लउटिके, जउन कुछे ऊँ पंचे किहिन रहा हय, यीसु काहीं बताइन; तब यीसु उनहीं अलग कइके बैतसैदा नाम के एकठे सहर माहीं लइगें। <sup>11</sup> इआ बात काहीं भीड़ के खुब मनई जानिगें, अउर उनहीं पछिआय लिहिन, तब उनहीं देखिके यीसु बड़े आनन्द से उनसे मिलें, अउर उनहीं परमातिमा के राज के बात बतामँड लागें, अउर जउन बिमार मनई नीक होइ चाहत रहे हँय, उनहीं नीक कइ दिहिन।

<sup>12</sup> जब साँझ होइ लाग, तब चेला लोग यीसु के लघे आइके कहँई लागें, "इआ भीड़ के मनइन काहीं बिदा करी, जउने ऊँ पंचे चारिव कइती के गाँमन अउर मोहल्लन म जाइके, रहँय अउर खाय के प्रबन्ध करँय, काहेकि हम पंचे इहाँ सुनसान जघा माहीं हएन।" <sup>13</sup> यीसु अपने चलन से कहिन, "तुहिन पंचे उनहीं खाँइका द्या।" तब चेला लोग यीसु से कहिन, "हमरे पंचन के लघे पाँचठे रोटी अउर दुइठे मछरिन काहीं छौड़िके, अउर कुछे नहिं आय; पय अगर अपना कही, त हम पंचे जाइके ई सगले जनेन के खातिर खाना खरीद लई, तब इआ होइ सकत हय।" उआ भीड़ माहीं पाँच हजार के करीबन मंसेरुआ रहे हँय। <sup>14</sup> तब यीसु अपने चलन से कहिन, "उनहीं पचास-पचास कइके पाँतिन माहीं बइठाय द्या।" <sup>15</sup> अउर ऊँ चेला लोग उहयमेर किहिन, अउर सगलेन काहीं बइठाय दिहिन। <sup>16</sup> तब यीसु ऊँ पाँचठे

रोटी अउर दोनहूँ मछरिन काहीं लड़के स्वरग कइती निहारिके धन्यवाद दिहिन, अउर रोटिन काहीं टोरि-टोरिके चलन काहीं देत गें, कि ऊँ सगले मनइन काहीं परसँय। अउर ऊँ चेला लोग सगले मनइन काहीं परस दिहिन।<sup>17</sup> जब सगली भीड़ के मनई खाइके सन्तुस्ट होइगें, त सगलेन के खाए के बादव, चेला लोग रोटी अउर मछरी के बचे टुकड़न से बारा टोपरी भरिके लड़ आएँ।

### पतरस यीसु काहीं मसीह सोइकार किहिन

(मत्ती 16:13-20; मरकुस 8:27-30)

<sup>18</sup> जब यीसु एकान्त माहीं जाइके प्राथना करत रहे हँय, अउर उनखर चेला लोग साथय माहीं रहे हँय, तब यीसु उनसे पूँछिन, “लोग हमहीं का कहत हैं?”<sup>19</sup> चेला लोग कहिन, “कुछ मनई यूहन्ना बपतिस्मा देइ बाला, त कुछ जने एलिय्याह नबी, त अउर कुछ जने त इआ कहत हैं, कि परमातिमा के सँदेस बतामँइ बालेन म से एक जने पुरान मनई जि आबा हय।”<sup>20</sup> यीसु अपने चलन से पूँछिन, “पय तूँ पंचे हमहीं का कहते हया?” पतरस यीसु से कहिन, “अपना परमातिमा के पठए मसीह आहिन।”<sup>21</sup> तब यीसु अपने चलन काहीं चेताइके कहिन, कि तूँ पंचे इआ बात कोहू से न बताया।

### अपने मउत के बारे माहीं यीसु के भविस्सबानी

(मत्ती 16:21-23; मरकुस 8:31-33)

<sup>22</sup> तब यीसु अपने चलन काहीं बतामँइ लागें, कि “मनई के लड़िका के खातिर इआ जरूरी हय, कि उआ खुब दुख सही, अउर यहूदी समाज के धारमिक अँगुआ अउर प्रधान याजक लोग अउर मूसा के बिधान सिखामँइ बाले, ओही अपने बनाए नेम के बिरोधी मानिके मारि डरिहँय, अउर उआ तिसरे दिन जिन्दा होइ जई।”

### यीसु के पीछे चलँइ के मतलब

(मत्ती 16:24-28; मरकुस 8:34—9:1)

<sup>23</sup> यीसु भीड़ के मनइन अउर अपने चलन से कहिन, “जे कोऊ हमरे पीछे आमँइ चाहय, उआ अपने मन के मुताबिक जिअब छोड़िके, हरेक दिन अपने सब दुख तकलीफन काहीं सहिके जऊँ क्रूस के बराबर हँ, हमरे पीछे चलय।<sup>24</sup> काहेकि जे कोऊ आपन प्रान बचामँइ चाही, उआ ओही गमाय देई, पय जे कोऊ हमरे खातिर आपन प्रान तक देई काहीं तइआर रही, उहय ओही बचाए पाई।<sup>25</sup> अगर कउनव मनई सगले संसार के मालिक होइ जाय, अउर आपन प्रान गमाय देय, त ओही का फायदा होई।<sup>26</sup> जउन मनई हमसे अउर हमरे बातन काहीं मानँइ माहीं लजई, त इहइमेर जब मनई के लड़िका, अपने अउर अपने पिता के, अउर पबित्र स्वरगदूतन के महिमा समेत अई, त उहव ओही आपन मानँय से लजई।”<sup>27</sup> “हम तोहसे सही कहित हएन, कि जऊँ इहाँ ठाढ़ हँ, उनमा से कुछ जने अइसन हँ, कि जब तक परमातिमा के राज काहीं आबत न देख लेइहँय, तब तक ऊँ पंचे बेलकुल न मरिहँय।”

### यीसु के रूप बदलब

(मत्ती 17:1-8; मरकुस 9:2-8)

<sup>28</sup> ई बातन के करीबन आठ दिन के बाद यीसु, पतरस, यूहन्ना अउर याकूब काहीं साथ माहीं लड़के प्राथना करँइ के खातिर एकठे पहार माहीं गें।<sup>29</sup> जब ऊँ प्राथना करत रहे हँय, तबहिनय यीसु के रूप बदलिगा, अउर उनखर ओन्हा उजर होइके चमकँइ लाग, <sup>30</sup> अउर तिनहूँ चलन काहीं मूसा नबी के साथ एलिय्याह नबी देखाने, ऊँ दोनव जने यीसु के साथ बातँय करत रहे हँय।<sup>31</sup> ऊँ पंचे, परमातिमा के महिमा सहित देखाई दिहिन, अउर यीसु के मरँइ के बारे माहीं चरचा करत रहे हँय, जउन यरूसलेम सहर माहीं होइ बाली रही हय।<sup>32</sup> पतरस अउर उनखर साथी मारे नींद के अउँघात रहे हँय, अउर जब निकहा से जागे, तब यीसु के महिमा अउर उन दोनव जनेन काहीं जउन यीसु के लघे ठाढ़ रहे हँय, देखिन।<sup>33</sup> जब उँइ दोनव जने यीसु के लघे

से जाँइ लागें, तबहिनय पतरस यीसु से कहिन, “हे प्रभू, हमार पंचन के इहाँ रहब निकहा हय; एसे हम पंचे इहाँ तीनठे मइइआ बनाई; एकठे अपना के खातिर, एकठे मूसा नबी के खातिर, अउर एकठे एलिय्याह नबी के खातिर।” काहेकि पतरस डेरन के मारे इआ नहीं जाने पाबत रहे आँय, कि हम उनसे का कहि रहेन हँय।<sup>34</sup> जब पतरस इआ कहतय रहे हँय, तबहिनय एकठे बदरी आइके उनहीं लुकाय लिहिस, अउर जब उआ बदरी उनहीं लुकायँइ लाग, तब ऊँ पंचे खुब डेराइगें।<sup>35</sup> अउर उआ बदरी म से इआ बोल सुनान, “ई हमार लड़िका आहीं, अउर हमहिन इनहीं चुनेन हय, तूँ पंचे इनखे बातन काहीं मान्या।”<sup>36</sup> इआ बोल सुने के बाद यीसु अकेले रहिगें; अउर ऊँ तिनहूँ चेला चुप्पय रहिगें, अउर जउन कुछ ऊँ पंचे देखिन रहा हय, ओखर एक्कवठे बात, उन दिनन माहीं कोहू से नहीं बताइन।

### बुरी आत्मा से परेसान लड़िका काहीं नीक करब

(मत्ती 17:14-18; मरकुस 9:14-27)

<sup>37</sup> जब दुसरे दिन यीसु अउर उनखर तिनहूँ चेला पहार से उतरें, तबहिनय एकठे बड़ी भीड़ उनखे लघे आइगे।<sup>38</sup> अउर उआ भीड़ म से एकठे मनई चिल्लाइके कहिस, “हे गुरू, हम अपना से बिनती करित हएन, कि हमरे लड़िका के ऊपर किरपा करी; काहेकि उआ हमार एकलउता लड़िका आय।<sup>39</sup> अउर जइसय उआ बुरी आत्मा लड़िका काहीं पकड़त ही, उआ एक दरकिन चिल्लाय उठत हय; अउर उआ ओही अइसन मुरेत ही, कि ओखे मुँहे म फेन भर आबत हय; अउर लड़िका काहीं पटक-पटकिके बड़े मुसकिल से छोड़त ही।<sup>40</sup> हम अपना के चलन से बिनती किहेन, कि उआ बुरी आत्मा काहीं लड़िका से निकार द्या, पय ऊँ पंचे नहीं निकारे पाइन।”<sup>41</sup> तब यीसु उनहीं जबाब दिहिन, “हे परमातिमा के ऊपर बिसुआस न करँइ बाले हठी मनइव, हम कब तक तोंहरे साथ रहब, अउर कब तक तोंहार सहत रहब? अपने लड़िका काहीं हमरे लघे लइ आबा।”<sup>42</sup> जब उआ लड़िका यीसु के लघे अउतय रहा हय, तबहिनय उआ बुरी आत्मा ओही पटकिके मुरेर दिहिस, तब यीसु उआ बुरी आत्मा काहीं डाँटिन, अउर उआ बुरी आत्मा काहीं लड़िका से निकार दिहिन, अउर उआ लड़िका काहीं नीक कइके ओखे बाप काहीं सउँप दिहिन।<sup>43</sup> तब उहाँ ठाढ़ सगले मनई परमातिमा के महान सामर्थ काहीं देखिके, चउआन रहिगें। पय जब सगले जन ऊँ सगले कामन से जऊँ यीसु करत रहे हँय, चउआन रहे हँय। तब यीसु अपने चलन से कहिन।

### अपने मउत के बारे माहीं यीसु के दुसराय भविस्सबानी

(मत्ती 17:22,23; मरकुस 9:30-32)

<sup>44</sup> “तूँ पंचे ई बातन काहीं बड़े ध्यान से सुना, काहेकि मनई के लड़िका बिरोध करँइ बाले मनइन के हाँथे माहीं पकड़बा जाँय बाला हय।”<sup>45</sup> पय ई बातन काहीं यीसु के चेला लोग नहीं समझे पाइन, कि यीसु उनसे का कहिन हीं; इआ बात उनसे छिपी रहिगे, कि ऊँ ओही न जाने पामँय, अउर इआ बात काहीं ऊँ पंचे, यीसु से पूँछँइ माहीं डेरात रहे हँय।

### सबसे बड़ा को हय?

(मत्ती 18:1-5; मरकुस 9:33-37)

<sup>46</sup> पुनि गइल माहीं चेला लोग आपस माहीं इआ बहँस करँइ लागें, कि हमरे पंचन म से सबसे बड़ा को हय? <sup>47</sup> पय यीसु उनखे मन के बिचार काहीं जान लिहिन, अउर एकठे छोट क लड़िका काहीं लड़के अपने लघे ठाढ़ किहिन।<sup>48</sup> अउर अपने चलन से कहिन, “जे कोऊ हमरे नाम से इआमेर के लड़िकन म से कउनव एकठे काहीं सोइकार करत हय, उआ हमहीं सोइकार करत हय; अउर जे कोऊ हमहीं सोइकार करत हय, उआ हमहिन भर क नहीं, बलकिन हमहीं पठमँइ बाले परमातिमा काहीं सोइकार करत हय।” काहेकि जउन तोंहरे बीच माहीं सगलेन से छोट बनत हय, उहय सगलेन से बड़ा कहाई।

### जउन बिरोधी नहीं आय उआ अपने पच्छ म हय

(मरकुस 9:38-40)

49 तब यूहन्ना यीसु से कहिन, “हे गुरु, हम पंचे एकठे मनई काहीं अपना के नाम से बुरी आत्मन काहीं मनइन म से निकारत देखेन, त हम ओही बरजेन, कि तूँ अइसा न करा, काहेकि उआ मनई हमरे पंचन म से कोऊ न होय, जउन अपना के हुकुम मानत हैं।” 50 तब यीसु यूहन्ना से कहिन, “उआ मनई काहीं न बरजा; काहेकि जऊँ तौहरे बिरोध म नहीं आय, उआ तौहरिन कइती हय।”

### सामरी लोगन के व्दारा यीसु के बिरोध

51 जब यीसु के स्वरग जाँइ के समय नजदीक आइगा तय, तब ऊँ यरूसलेम सहर माहीं जाँइ के बिचार निश्चित किहिन। 52 यीसु अपने चलँइ से पहिले दुइठे दूतन काहीं पठइन, कि सामरिया प्रदेश के एकठे गाँव माहीं जाइके उनखे खातिर जघा तइआर करँय। 53 पय सामरिया प्रदेश के रहँइ बाले, यीसु काहीं अपने गाँव माहीं नहीं रुकँइ दिहिन, काहेकि यीसु यरूसलेम जात रहे हँय। 54 इआ देखिके, कि ऊँ पंचे, उहाँ नहीं रुकँइ देंय, उनखर चेला याकूब, अउर यूहन्ना कहिन, “हे प्रभू, अउर अपना के इच्छा होय, त हम पंचे परमातिमा से प्राथना करी, कि स्वरग से आगी गिरिके ई सगले गाँव बालेन काहीं भसम कइदेय।” 55 पय यीसु पीछे फिरिके अपने चलन काहीं डाँटिन, (अउर कहिन, “तूँ पंचे नहीं जनते आह्वा, कि तूँ कइसन आत्मा के हया। काहेकि मनई के लड़िका मनइन के प्रान लेंइ के खातिर नहीं आबा आय, बलकिन बचामँइ के खातिर आबा हय।”) 56 अउर यीसु सगले चलन के साथ दुसरे गाँव माहीं चलेगें।

### यीसु के चेला बनँइ के कीमत

(मत्ती 8:19-22)

57 जब यीसु अउर उनखर चेला लोग गइलय-गइल जात रहे हँय, तब कउनव मनई यीसु से कहिस, “जहाँ-जहाँ अपना जाब, त हमहूँ अपना के पीछे-पीछे चलब।” 58 तब यीसु ओसे कहिन, “लोखरी के रहँइ क गुफा होत ही, अउर पंछिन के रहँइ के पाल होत हैं, पय मनई के लड़िका के कउनव घर नहीं आय, बलकिन मूडव तक धरँइ के जघा नहीं आय।” 59 तबहिनय यीसु दुसरे मनई से कहिन, “हमार चेला बनिके हमरे साथ चला” उआ मनई कहिस, “हे प्रभू, पहिले हमहीं जाँइ देई, कि हम अपने बाप काहीं जउन खतम होइगें हँय, गाड़े अई।” 60 यीसु ओसे कहिन, “जउन मनई आत्मिक रूप से मरे हँय, उनहीं मरदन काहीं गाड़ँइ घा, पय तूँ जाइके परमातिमा के राज के सँदेस के प्रचार करा।” 61 इहइमेर एक जन अउर कहिस, “हे प्रभू, हम अपना के चेला बनिके साथय चलब; पय पहिले हमहीं जाँइ देई कि अपने घर बालेन से बिदा लए अई।” 62 यीसु ओहू से कहिन, “जे कोऊ परमातिमा के बचन के मुताबिक चलब सुरू कइके, संसार के बातन कइती ध्यान लगाबत हय, उआ ओखी कि नाई हय, जउन हर माहीं हाँथ धइके पीछे कइती निहारत हय, उआ परमातिमा के राज माहीं जाँइ के काबिल नहीं आय।”

### सत्तर चलन काहीं पठबा जाब

10 ई बातन के बाद प्रभू सत्तर मनइन काहीं अउर चुनिके नियुक्त किहिन, अउर यीसु जउने-जउने सहरन अउर जघन माहीं जाँइ बाले रहे हँय, उहाँ-उहाँ उनहीं दुइ-दुइ कइके अपने जाँइ से पहिले पठइन। 2 अउर यीसु अपने चलन से कहिन, “पके खेत त खुब हैं, पय मजूर थोरिन हैं। एसे खेत के मालिक परमातिमा से बिनती करा, कि ऊँ आपन खेत काटँय के खातिर मजूर पठय देंय।” 3 जा; देखा, हम तौहई पंचन काहीं गइरन कि नाई डगरन के बीच माहीं पठइत हएन। 4 एसे गइल के खातिर कुछ न लिहा, न त पइसा, न त झोरिया, न त पनहिन लिहा; अउर गइल माहीं कोहू से नबस्कार

न किहा। 5 जब कोहू के घर माहीं जया, त भीतर जाँइ से पहिले कह्या, “इआ घर माहीं रहँइ बालेन के कल्यान होय।” 6 अगर उआ घर माहीं कोऊ कल्यान के काबिल होई, त तौहार दीन कल्यान ओही मिल जई, अगर कल्यान के काबिल कोऊ न होई, त तौहरे लघे लउटि अई। 7 जउने घर माहीं जया, उहय घर माहीं रह्या, अउर जउन कुछ उआ घर के मनई खबामँय, उहय खया-पिया, काहेकि मजूर काहीं आपन मजूरी जरूर मिलँय चाही; खाँय के खातिर घर-घर न जया। 8 जउने सहरन अउर गाँमन माहीं जया, अउर उहाँ के मनई अपने घर माहीं स्वागत-सत्कार करँइ, त जउन कुछ तोहई खाँइ काहीं देंय उहय खया। 9 अउर उहाँ के बिमारन काहीं नीक कइके उनसे कह्या, “परमातिमा के राज तौहरे लघेन आइगा हय।” 10 पय जउने सहर इआ कि गाँव माहीं जया, अउर अगर उहाँ के मनई तौहई पंचन काहीं सोइकार न करँय, त उनखे बजारन माहीं जाइके कह्या, 11 “हम तौहरे सहर के धूधुर तक जउन हमरे गोड़न माहीं लगी ही, तौहरेन आँगे झारे देइत हएन; तऊ इआ जानिल्या, कि परमातिमा के राज तौहरे लघेन आइगा हय।” 12 हम तौहसे कहित हएन, कि जब परमातिमा न्याय करिहँय, उआ दिन, उआ सहर के दुरदसा, सदोम सहर से जादा होई।

### बिसुआस न करँइ बाले सहरन के मनइन काहीं धिक्कार

(मत्ती 11:20-24)

13 “खुराजीन सहर, बैतसैदा सहर; तौहई धिक्कार हय; काहेकि जउन सामर्थ के काम तौहरे बीच माहीं कीन गें तय, अगर ऊँ सूर अउर सैदा प्रदेशन माहीं कीन जातें, त उहाँ के मनई टाट ओढ़िके अउर राख माहीं बइठिके, पहिलेन अपने पापन काहीं मानिके, पाप करब छोंड़ि देतें। 14 पय जब परमातिमा न्याय करिहँय, उआ दिन तौहार दुरदसा, सूर अउर सैदा प्रदेशन से जादा होई। 15 अउर हे कफरनहूम सहर के मनइव, तूँ पंचे जउन सोचते हया, कि हमहीं परमातिमा अकास तक ऊँच करिहँय? बेलकुल नहीं, परमातिमा तौहई पताल तक नीच करिहँय।”

16 अउर यीसु पुनि चलन से कहिन, “जउन मनई तौहरे बात काहीं सुनिहँय, ऊँ हमरे बात के सुनँय के बराबर होइहँय; अउर जउन मनई तौहई तुच्छ मनि हँय; ऊँ पंचे हमहूँ काहीं तुच्छ मनि हँय; अउर जे हमहीं तुच्छ मानत हय, उआ हमहीं पठमँइ बाले परमातिमा काहीं तुच्छ मानत हय।”

### सत्तर चलन के लउटब

17 यीसु जउने सत्तर चलन काहीं पठइन तय, ऊँ पंचे आनन्द मनाबत लउटि आएँ, अउर कहँइ लागें, “हे प्रभू, अपना के नाम से बुरी आत्मा हमार कहा मनती हई।” 18 तब यीसु उनसे कहिन, “हम सइतान काहीं बिजुली कि नाई अकास से गिरत देखेन हय। 19 एहिन से देखा, हम तौहई साँप अउर बीछिन काहीं गोड़न से रउदँइ के अधिकार दिहेन हय, अउर तौहरे बइरी सइतान के सगली सामर्थ काहीं हरामँइ के अधिकार दिहेन हय; अउर कउनव चीज से तौहार कुछ हानि न होई। 20 तऊ तूँ पंचे एसे आनन्दित न होया, कि आत्मा तौहरे बस माहीं हई, बलकिन एसे आनन्दित होया, कि स्वरग माहीं तौहार नाम लिखे हँय।”

### यीसु के आनन्दित होब

(मत्ती 11:25-27—13:16,17)

21 उहय समय यीसु पबित्र आत्मा से भरिके खुब आनन्दित होइगें, अउर कहिन, “हे पिता परमातिमा स्वरग अउर धरती के प्रभू, हम अपना काहीं धन्यबाद देइत हएन, कि अपना ई बातन काहीं ग्यानिन अउर अपने काहीं समझदार मानँइ बालेन काहीं नहीं बताएन, बलकिन छोट लड़िकन कि नाई अपना के बचन के ऊपर बिसुआस करँइ बालेन काहीं बतायन हय। हाँ, हे पिता परमातिमा काहेकि अपना काहीं इहय नीक लाग हय। 22 हमार पिता परमातिमा सब कुछ हमहीं सँउप दिहिन हीं; अउर कोऊ नहीं जानँय कि लड़िका को आहीं, केबल पिता जानत हैं, अउर पिता को आहीं इहव कोऊ

नहीं जानँय, केबल लड़िका जानत हय, अउर लड़िका जेही बतामँई चाही उहय जानी।”

<sup>23</sup> यीसु एकान्त माहीं पहुँचिके चलन कइती फिरिके कहिन, “धन्य हँ, ऊँ पंचे, जउने बातन काहीं तूँ पंचे देखते हया, ऊँ पंचे देखत हँ। <sup>24</sup> काहेकि हम तौहसे कहित हएन, कि बहुत से परमातिमा के सँदेस बतामँई बाले अउर बहुत से राजा लोग, इआ चाहत रहे हँय, कि जउन बातँय तूँ पंचे देखते हया देखी, पय नहीं देखे पाइन, अउर जउन बातँय तूँ पंचे सुनते हया, सुनी, पय नहीं सुने पाइन।”

### सामरी जाति के एकठे दयालू मनई के उदाहरन

<sup>25</sup> एक दिन मूसा के बिधान सिखामँई बाला एक जने यीसु के लघे आबा, अउर इआ कहिके उनखर परिच्छा करँई लाग, “हे गुरू, अनन्त जीवन के बारिसदार होइ के खातिर हम का करी?” <sup>26</sup> यीसु ओसे कहिन, “मूसा नबी के बिधान माहीं का लिखा हय? तूँ ध्यान से नहीं पढ्या?” <sup>27</sup> उआ यीसु काहीं जबाब दिहिस, “पबित्र सास्त्र माहीं लिखा हय, तूँ अपने प्रभू परमातिमा से अपने पूरे मन से, अउर अपने पूरे प्रान से, अउर अपनी पूरी सक्ती से, अउर अपनी पूरी बुद्धी से प्रेम रखा; अउर अपने परोसी से अपने के नाई प्रेम करा।” <sup>28</sup> तब यीसु ओसे कहिन, “तूँ बेलकुल सही जबाब दिहा हय, इहइमेर तुहूँ करा तबहिनय अनन्त जीवन मिली।” <sup>29</sup> पय उआ यहूदी नेम सिखामँई बाला अपने काहीं धरमी देखाँई के खातिर, यीसु से पूँछिस, “त अपना बताई हमार परोसी को आय?” <sup>30</sup> तब यीसु ओही जबाब दिहिन, “एकठे मनई यरूसलेम सहर से यरीहो सहर काहीं जात रहा हय, तबहिनय गइल माहीं कुछ डॉकू आइके, ओखर सगला रुपिआ-पइसा लूटि लिहिन, इहाँ तक कि ओखर ओन्हा तक उतार लिहिन, अउर ओही मार पीटके अधमरा कइके उहँई छोड़िके चलेगें। <sup>31</sup> अउर संजोग से उहय गइल से एकठे याजक जात रहा हय, पय उआ, ओही देखिके कइतिआइके चला ग। <sup>32</sup> अउर इहइमेर से उहय गइल से एकठे लेबी मनई निकरा, अउर उहव ओही देखिके कइतिआइके चला ग। <sup>33</sup> पय उहय गली से एकठे सामरी जाति के मनई निकरा, अउर उआ मनई काहीं देखिके ओही दया आइगे। <sup>34</sup> अउर उआ, ओखे लघे जाइके तेल अउर अंगूर के रस लगाइके पट्टी बाँधिस, अउर अपने गदहा माहीं चढ़ाइके सराय माहीं लइ जाइके सेबा किहिस, <sup>35</sup> दुसरे दिन जब उआ सामरी मनई सराय से जाँई लाग, तब उआ सराय के मालिक काहीं दुइठे चाँदी के सिक्का निकारिके दिहिस, अउर कहिस, ‘इआ मनई के निकहा से सेबा किहा, अउर जउन तौहार खरचा लागी, उआ हम लउटिके तौहई दइ देब।’ <sup>36</sup> तब यीसु मूसा के बिधान सिखामँई बाले उआ मनई से पूँछिन, अब इआ बताबा कि तौहरे समझ माहीं, उआ मनई के जउन डँकुअन से लुटरिगा रहा हय, ई तीनव म से कउन परोसी कहाबा?” <sup>37</sup> उआ यीसु से कहिस, “उहय जउन ओखे ऊपर दया किहिस।” यीसु ओसे कहिन, “जा, तुहूँ अइसय करा।”

### मारथा अउर मरियम के घर माहीं यीसु

<sup>38</sup> जब यीसु अपने चलन समेत जात रहे हँय, तब एकठे गाँव माहीं पहुँचिगें, उहाँ मारथा नाम के एकठे मेहेरिआ उन्हीं अपने घर माहीं लइ जाइके रोकिस। <sup>39</sup> मारथा के मरियम नाम के एकठे बहिनी रही हय, उआ प्रभू के गोड़े के लघे बइठिके उनखर बचन सुनत रही हय। <sup>40</sup> पय मारथा सेबा करत-करत थकिगे, अउर यीसु के लघे आइके कहँई लाग। “हे प्रभू, का अपना काहीं हमरे ऊपर दया नहीं आबय, हमार बहिनी हमहीं काम करँई के खातिर अकेले छोड़ दिहिस ही? एसे ओही अपना कही, कि काम करँई माही हमार मदत करय।” <sup>41</sup> प्रभू मारथा काहीं जबाब दिहिन, “मारथा, हे मारथा; तूँ खुब बातन के खातिर चिन्ता करती अउर घबराती हया। <sup>42</sup> पय एकठे बात खुब जरूरी हय, अउर उआ उत्तम भाग काहीं मरियम चुनि लिहिन हीं, जउन उनसे कोऊ छड़ाय नहीं सकय।”

### यीसु चलन काहीं प्राथना करँई सिखाइन

(मती 6:9-13)

**11** यीसु एकठे जघा माहीं प्राथना करत रहे हँय। अउर जब ऊँ प्राथना कइ चुकें, तबहिनय उनखे चलन म से एक जने कहिन, “हे प्रभू, जइसन यहून्ना अपने चलन काहीं प्राथना करँई सिखाइन तय, उहयमेर अपनव हमहीं पंचन काहीं सिखाई।”

<sup>2</sup> तब यीसु उनसे कहिन, “जब तूँ पंचे प्राथना किहा, तब इआमेर से किहा, ‘हे पिता परमातिमा, अपना के नाम पबित्र माना जाय, अपना के राज आबय।

<sup>3</sup> हमरे पंचन के दिन भर के खॉय के खातिर खाना हमहीं रोज देबा करी।

<sup>4</sup> हमरे पापन काहीं माफ करी, काहेकि हमहूँ अपने सगले गुनहगारन के गलतिन काहीं माफ करित हएन, अउर हमहीं परिच्छा माहीं न डारी।”

### प्राथना करँई के बारे माहीं यीसु के सिच्छा

(मती 7:7-11)

<sup>5</sup> यीसु उनसे कहिन, “तौहरे बीच म से कोहू के एकठे साथी होय, त तूँ आधी रातके ओखे लघे जाइके कहा, ‘हे साथी; हमहीं तीनठे रोटी दइ द्या।’

<sup>6</sup> काहेकि एकठे हमार साथी हमरे लघे यात्रा से आए हँय, अउर उन्हीं खबामँई के खातिर हमरे लघे कुछ नहिं आय। <sup>7</sup> अउर उआ साथी भीतर से जबाब देय, ‘हमहीं दुख न द्या, अब त हम दुआर बन्द कइके अपने लड़िकन-बच्चन के साथय बिस्तर माहीं परे हएन, एसे हम उठिके तौहई कुछ नहीं दइ सकी?’ <sup>8</sup> यीसु कहिन, “हम तौहसे सही कहित हएन, कि अगर ओखर साथी होइ के कारन ओही उठिके न देय, तऊ ओखे बिना लजाने मागँई के कारन, उठिके ओही जेतनी जरूरत होई त ओही देई। <sup>9</sup> अउर हम तौहसे सही कहित हएन, कि तूँ पंचे मागत रइहा, त तौहई दीन जई; ढूँढत रइहा, त जरूर पइहा; खट-खटाबत रइहा, त तौहरे खातिर दुअरा खोल दीन जई।

<sup>10</sup> काहेकि जे कोऊ मागत रहत हय, त ओही जरूर मिलत हय; अउर जे कोऊ ढूँढत रहत हय, उआ जरूर पाबत हय; अउर जे कोऊ खट-खटाबत रहत हय, त ओखे खातिर दुअरा खोल दीन जई। <sup>11</sup> तौहरे म से अइसा केखर बाप होई, कि जब ओखर लड़िका रोटी माँगय, त ओही पथरा देय; इआ कि मछरी माँगय, त मछरी के बदले माहीं साँप देय? <sup>12</sup> इआ कि अन्डा माँगय त बीछी देय? <sup>13</sup> एसे जब तूँ पंचे बुरे होइके, अपने लड़िकन काहीं नीक चीजँय देइ जनते हया, त स्वरग माहीं रहँई बाले तौहार पिता परमातिमा, अपने मागँई बालेन काहीं पबित्र आत्मा जरूर देइहँय।”

### यीसु अउर बालजबूल

(मती 12:22-30; मरकुस 3:20-27)

<sup>14</sup> यीसु एक दिन गूँगी बुरी आत्मा काहीं एकठे मनई से निकारिन। जब बुरी आत्मा ओसे निकरिगे, तब उआ गूँगा बोलँई लाग; अउर उहाँ ठाढ़ सगले मनई खुब अचरज मानिन। <sup>15</sup> पय उनमा से कुछ मनई कहँई लागें, “यीसु त बालजबूल नाम के बुरी आत्मन के मुखिया अरथात सइतान के मदत से बुरी आत्मन काहीं मनइन से निकारत हँ।” <sup>16</sup> अउर कुछ जने यीसु के परिच्छा लेंई के खातिर कहिन, कि “तूँ अइसा कउनव अदभुत चिन्हारी देखाइके साबित करा, कि परमातिमा तौहई पठइन हीं।” <sup>17</sup> पय यीसु उनखे मन के बात जानिके कहिन, “जउने-जउने राज माहीं फूट होत ही, त उआ राज नास होइ जात हय; अउर अगर कउनव घर माहीं फूट परि जात ही, त उआ घर बरबाध होइ जात हय। <sup>18</sup> अउर अगर सइतान खुद अपनय बिरोधी बनिके, अपने बीच म फूट डारी, त ओखर राज कइसा बना रही, ओखर त नासय होइ जई। हम तौहसे एसे पूँछित हएन, कि तूँ पंचे कहते हया, कि हम सइतान के मदत से बुरी आत्मन काहीं निकारित हएन। <sup>19</sup> अगर हम सइतान के मदत से बुरी आत्मन काहीं निकारित हएन, त तौहार सन्तान केखे मदत से बुरी आत्मन काहीं निकारत हँ? एसे उँइन तौहार फँइसला करिहँय। <sup>20</sup> पय



अगर हम परमात्मा के सामर्थ से, बुरी आत्मन काहीं निकारित हएन, त तूँ पंचे इआ जानिल्या, कि परमात्मा के राज तौहरे लघे पहुँचिगा हय।<sup>21</sup> जब कउनव बलमान मनई, हरेक मेर के हँथिआर लए पूरी तरह से तइआर होइके अपने घर के देख-रेख करत हय, त ओखर धन-सम्पत बची रहत ही।<sup>22</sup> पय जब ओसे अउर बलमान मनई चढ़ाई कइके, उआ बलमान मनई काहीं हराय देत हय, त ओखर सगले हँथिआर छड़ाय लेत हय, जउने माहीं ओखर भरोसा रहत हय, अउर ओखर सगली धन-सम्पत लूटिके दुसरे काहीं बाँट देत हय।<sup>23</sup> जे हमार बात नहीं मानय, उआ हमरे बिरोध माहीं काम करत हय, उआ मनइन काहीं हमरे लघे नहीं ले आबय, बलकिन उनसे पाप कर बाइके हमसे दूर करत हय।”

### आधे सुधार से परेसानी

(मत्ती 12:43-45)

<sup>24</sup> यीसु उनसे पुनि कहिन, “जब बुरी आत्मा मनई से बहिरे निकर जात ही, तब अराम करई के खातिर, झुरान जघा ढूँढत फिरत ही, अउर उआ बुरी आत्मा जब झुरान जघा नहीं पाबय, त कहत ही, कि ‘हम अपने उहय घर माहीं लउटि जाब, जहाँ से निकरिके आएन तय।’<sup>25</sup> अउर बुरी आत्मा लउटिके उआ घर काहीं, झारा बटोरा अउर सजा-सजाबा पाबत ही।<sup>26</sup> तब उआ जाइके, अपने से अउर बुरी सातठे आत्मन काहीं, अपने साथ लइ आबत ही, अउर उआ मनई के भीतर सगली सकाइके रहँय लगती हँय, अउर उआ मनई के हालत पहिले से अउर जादा खराब होइ जात ही।”

<sup>27</sup> यीसु जब ई बातन काहीं कहतय रहे हँय, कि भीड़ म से एकठे मेहेरिआ खुब चन्डे कहिस, “धन्य हय उआ महतारी जेखे पेटे माहीं तूँ रहे हय, अउर उनखर दूध पिआ हय।”<sup>28</sup> तब यीसु कहिन, “ऊँ त धन्य हइअय हई, पय धन्य ऊँ पंचे हँ, जउन परमात्मा के बचन सुनत हँ, अउर सुनिके मानत हँ।”

### स्वरग के चिन्हारी देखाँइ के माँग

(मत्ती 12:38-42)

<sup>29</sup> अउर जब खुब भीड़ एकट्ठा होइ लाग, तब यीसु कहँइ लागे, “इआ समय के मनई बुरे हँय; ऊँ कहत हँ, कि तूँ परमात्मा के पठए आह्या, एखे खातिर कउनव चिन्हारी देखाबा; पय योना नबी के जीवन माहीं जउन अदभुत काम परमात्मा किहिन तय, ओखे अलाबा अउर कउनव चिन्हारी उनहीं न देखाई जई।<sup>30</sup> अउर जइसन योना नबी नीनवे सहर के मनइन काहीं मुक्ती पामँइ के खातिर अदभुत चिन्हारी ठहरें हँय, उहयमेर मनई के लड़िका इआ समय के लोगन के खातिर अदभुत चिन्हारी ठहरी।<sup>31</sup> इजराइल देस के दक्खिन दिसा के सीबा देस के रानी, परमात्मा के न्याय करँइ के दिन, इआ समय के मनइन के साथ ठाढ़ होइके, उनहीं दोसी ठहरइहँय, काहेकि ऊँ खुब दूरी से इजराइल के राजा सुलैमान के ग्यान के बातँय सुनँय के खातिर आई रही हँय, अउर देखा इहाँ, ऊँ हँ, जउन सुलैमान से घलाय बड़े हँय।<sup>32</sup> नीनवे सहर के मनई परमात्मा के न्याय करँइ के दिन, इआ समय के मनइन काहीं दोसी ठहरइहँय, काहेकि नीनवे सहर के मनई योना के प्रचार सुनिके, पाप करब छोड़ दिहिन तय, अउर देखा इहाँ, ऊँ हँ, जउन योना से घलाय बड़े हँय।

### देह के दिया

(मत्ती 5:15; 6:22,23)

<sup>33</sup> कउनव मनई दिया जलाइके भुँइहरा माहीं, इआ कि बरतन के नीचे नहीं धरय, बलकिन ऊँचे जघा माहीं धरत हय, कि भीतर आमँइ बालेन काहीं उँजिआर मिलय।<sup>34</sup> एहिनतर तौहरे देह के दिया आँखी आय, एसे अगर तौहार आँखी निरमल रही, त तौहार सगली देह घलाय उँजिआर पाई। अगर तौहार आँखी बुरी हय, त तौहार सगली देह आँधिआर कि नाई होइ जई।<sup>35</sup> एसे सतरक रह्या, कि जउन तौहार उँजिआर कि नाई निकहा जीवन हय, त कहँव पाप म फँसिके आँधिआर कि नाई खराब न होइ जाय।<sup>36</sup> एसे अगर

तौहार सगली देह उँजिआर कि नाई निकही होई, अउर ओखे कउनव हिस्सा माहीं पाप न होई, त सगली देह उँजिआर कि नाई होइ जई, जइसन उआ समय होइ जात हय, जब दिया के उँजिआर तौहई मिलत हय।”

### मूसा के बिधान सिखामँइ बालेन अउर फरीसी लोगन के बुराई

(मत्ती 23:1-36; मरकुस 12:38-40)

<sup>37</sup> जब यीसु बात करतय रहे हँय, तबहिनय कउनव फरीसी यीसु से बिनती किहिस, कि हमरे घर खाना खाँइ चली, तब यीसु उनखे घर माहीं जाइके खाना खाँइ बइठें।<sup>38</sup> तब उआ फरीसी काहीं इआ देखिके बड़ा अचरज भ, कि यीसु खाना खाँइ से पहिले हाँथ नहीं धोइन।<sup>39</sup> प्रभू उनखे मन के बात काहीं जानिके कहिन, “हे फरीसी लोगव, तूँ पंचे खोरबन अउर टठिअन काहीं उपरय-ऊपर मजते हया, पय तौहरे भीतर छल-कपट अउर बुराई भरी हय।<sup>40</sup> हे निरबुध्दिव, परमात्मा जउन देह के बहिरे के हिस्सा काहीं बनाइन ही, का उँइन देह के भीतर के हिस्सा काहीं नहीं बनाइन?<sup>41</sup> एसे जऊँ कुलू भीतर बाली चीज हई उनहीं दान कइ द्या, त देखा, सब कुलू तौहरे खातिर सुद्ध होइ जई।”

<sup>42</sup> यीसु पुनि इहव कहिन, “पय हे फरीसी लोगव तौहई परमात्मा से खुब सजा मिली! तूँ पंचे पोदीना अउर सुदाब के, अउर हरेकमेर के सब्जी-भाजिन के, दसमा भाग त देते हया। पय न्याय अउर परमात्मा के प्रेम काहीं नहीं मनते आह्या; तौहई चाहँय क रहा हय, कि सगलेन के दसमा भागव देत रहत्या। अउर न्याय अउर परमात्मा के हुकुमन काहीं मानब न छोड़त्या।<sup>43</sup> हे फरीसी लोगव, तौहई परमात्मा से खुब सजा मिली! तूँ पंचे सभाघरन माहीं खास-खास आसन माहीं बइठते हया, अउर मान-सम्मान पामँइ के खातिर चहते हया, कि मनई बजारन माहीं हमहीं नबस्कार करँय।<sup>44</sup> तौहई पंचन काहीं परमात्मा से खुब सजा मिली। काहेकि तूँ पंचे छिपी ऊँ कब्रन कि नाई हया, जेखे ऊपर मनई रेंगत हँ, पय जाने नहीं पामँय।”

<sup>45</sup> तब एकठे यहूदी नेम सिखामँइ बाला यीसु काहीं जबाब दिहिस, “हे गुरू, ई बातँय कहिके, अपना हमार पंचन के अपमान करित हएन।”<sup>46</sup> तब यीसु कहिन, “हे मूसा के बिधान सिखामँइ बाल्या, तौहई परमात्मा से खुब सजा मिली! तूँ पंचे नेमन के अइसन बोझ, जिनखर पालन करब कठिन हय, दुसरे मनइन के ऊपर जबरई लदते हया, पय तूँ ऊँ नेमन काहीं पालन करँइ के खातिर उनखर एकव मदत नहीं करते आह्या।<sup>47</sup> तौहई परमात्मा से खुब सजा मिली! तूँ पंचे परमात्मा के ऊँ सँदेस बतामँइ बालेन के कब्रँय बनउते हया, जिनहीं तौहरय बाप-दादा मार डारिन तय।<sup>48</sup> अउर तूँ पंचे खुदय गबाह हया, अउर अपने बाप-दादन के कामन माहीं साझीदार हया; काहेकि ऊँ पंचे उनहीं मारि डारिन तय, अउर तूँ पंचे उनखर कब्रँय बनउते हया।<sup>49</sup> एसे परमात्मा अपने बुद्धी से कहिन ही, कि हम अपने सँदेस बतामँइ बालेन अउर यीसु मसीह के खास चलन काहीं उनखे लघे पठउब, अउर ऊँ पंचे उनमा से कुछ जनेन काहीं मारि डारिहँय, अउर कुछ जनेन काहीं सतइहँय।<sup>50</sup> कि जउने जेतने परमात्मा के सँदेस बतामँइ बालेन के खून, संसार के सुरुआत से बहाबा ग हय, ऊँ सगलेन के हिंसाब, इआ समय के मनइन से लीन जाय: <sup>51</sup> हाबिल के हत्या से लइके जकरयाह के हत्या तक, जउन बेदी अउर मन्दिर के बीच माहीं मारि डारे गें तय। हम तौहसे सही कहित हएन, कि ई सगलेन के हिंसाब इहय समय के मनइन से लीन जई।<sup>52</sup> हे, यहूदी नेम सिखामँइ बाल्या तौहई पंचन काहीं परमात्मा से खुब सजा मिलँइ बाली हय। तूँ पंचे ग्यान के चाभी लइ त लिहा हय, पय खुदय ग्यान काहीं नहीं मान्या, अउर ग्यान के बात मानँइ बालेन काहीं मानँइ से रोकते हया।”

<sup>53</sup> जब यीसु उहाँ से निकरें, तब मूसा के बिधान सिखामँइ बाले अउर फरीसी बुरी तरह से यीसु के पीछे परिगें, अउर उनहीं परेसान करँइ लागे, कि ऊँ अउर खुब बातन के चरचा करँय, <sup>54</sup> जउने कउनव बातन माहीं गलती पाइके उनहीं पकड़ी, इआ मोका के ताक माही सगले लगे रहे हँय।

### पाखण्ड के बिरुद्ध चेतउनी

(मत्ती 10:26,27)

12 एतनेन माहीं जब हजारन मनइन के भीड़ लगीगे, अउर इहाँ तक कि ऊँ पंचे एक दुसरे के ऊपर गिरे परत रहे हँय, तब यीसु सबसे पहिले अपने चेला लोगन से कहँइ लागें, “फरीसी लोगन के कपटरूपी खमीर से सतरक रह्या।<sup>2</sup> जउन कुछू बिचार मनइन के मन माहीं हें, परमातिमा उनहीं प्रगट करिहँय, अउर हमरे जीवन के सगली छिपी बातन काहीं परमातिमा जानत हें।<sup>3</sup> एसे जउने बातन काहीं तूँ पंचे अँधिआरे माहीं कहे हया, ऊँ उँजिआरे माहीं सुनी जइहँय; अउर जउने बातन काहीं तूँ पंचे बंद कोठरिअन माहीं, एक दुसरे के कानन माहीं कहे हया, उनखर छत के ऊपर से प्रचार कीन जई।”

### कैसे डेरई?

(मत्ती 10:28-31)

4 यीसु पुनि कहिन, हम तौहसे जउन हमार साथी आह्या कहित हएन, कि जे कोऊ तौहरे देह काहीं नास कइ सकत हें, ओखे अलाबा अउर कुछू नहीं कइ सकँय, उनसे न डेरा।<sup>5</sup> हम तौहई समझाइत हएन, कि कैसे डेरई चाही, तौहई मार डारे के बाद, जिनहीं नरक माहीं डारँइ के हक्क हय, उनहिन से डेरा; हाँ, हम कहित हएन कि केबल उनहिन से डेरा।<sup>6</sup> हम तौहसे पूँछित हएन, कि का दुइ पइसा माहीं पाँचठे गउरइआ नहीं बिकती आहीं? तऊ परमातिमा उनमा से एकठेरिव काहीं नहीं बिसरामँय।<sup>7</sup> बलकिन तौहरे मूँडे के सगले बार घलाय गिने हें, एसे तूँ पंचे न डेरा, पिता परमातिमा के नजर माहीं तूँ पंचे ऊँ गउरइअन से जादा कीमती हया।

### यीसु काहीं सोइकार करब इआ कि ठोकराउब

(मत्ती 10:32,33; 12:32; 10:19,20)

8 यीसु कहिन, “हम तौहसे कहित हएन, कि जे कोऊ मनइन के आँगे इआ मान लेई, कि हम यीसु मसीह के चेला आहैन, त ओही मनई के लड़िकव परमातिमा के स्वरगदूतन के आँगे सोइकार कइ लेई, कि इआ हमार चेला आय।<sup>9</sup> पय जे कोऊ मनइन के आँगे इआ कही, कि हम यीसु मसीह के चेला न हौहैन, त हमहूँ घलाय स्वरग माहीं रहँइ बाले अपने पिता परमातिमा के स्वरगदूतन के आँगे, इआ कहि देब, कि ई हमार चेला न हौहीं।”

10 “जे कोऊ मनई के लड़िका के बिरोध माहीं कउनव बात कही, त ओखर उआ अपराध माफ कइ दीन जई, पय जउन मनई पबित्र आत्मा के बुराई करी, ओखर उआ अपराध कबहूँ माफ न कीन जई।”<sup>11</sup> यीसु पुनि कहिन, “जब मनई तौहई, महासभन माहीं, अउर सासन करँइ बालेन अउर अधिकारिन के आँगे लइ जाँय, त चिन्ता न किहा, कि हम उनहीं कउनमेर से, इआ कि का जबाब देब, इआ कि का कहब।<sup>12</sup> काहेकि पबित्र आत्मा ओतनिनदार तौहई सिखाय देई, कि उनसे का कहँय चाही।”

### एकठे धनी मूरुख के उदाहरन

13 तब उआ भीड़ म से एक जने यीसु से कहिस, “हे गुरू, हमरे भाई से कहि देई, कि हमरे बाप के धन-सम्पत्ती म से हमार हिस्सा बाँटके दइ देय।”<sup>14</sup> यीसु उआ मनई से कहिन, “इआमेर के बातन के न्याय करँइ अउर बाँटके के खातिर हमहीं तौहरे ऊपर को ठहराइसी?”<sup>15</sup> अउर यीसु अपने चलन से कहिन, “तूँ पंचे सतरक रहा, अउर हरेक मेर के लोभ से अपने काहीं बचाइके रखा; काहेकि कोहू के जीवन ओखे खुब धन-सम्पत्ती के कारन नहीं बचय।”<sup>16</sup> यीसु अपने चलन से एकठे उदाहरन कहिन: “कउनव धनी मनई के खेत माहीं फसल के खुब पइदाबार भय।<sup>17</sup> तब उआ धनी मनई अपने मन माहीं इआ सोचँइ लाग, ‘हम का करी? काहेकि हमरे लघे एतनी जघा नहिँ आय, कि सगली पइदाबार के अनाज रक्खी।’<sup>18</sup> अउर उआ

कहिस, ‘हम अइसा करब: कि अपने बखारिन काहीं टोरिके उनसे बड़ी बखारी बनाउब; अउर ओहिन माहीं आपन सगला अनाज अउर सम्पत्ति धरब।<sup>19</sup> अउर अपने प्रान से कहब, हे प्रान तोरे लघे कइअक बरिस के खाँय के खातिर, खुब सम्पत्ति धरी हय; अराम कर, खा, पि, अउर सुख से रव्ह।’<sup>20</sup> पय परमातिमा ओसे कहिन, ‘हे मूरुख! इहय रात माहीं तोर प्रान लइ लीन जई; त बताव जउन कुछू तँय जोरे हए, उआ केखर होई?’<sup>21</sup> अइसन उआ मनइव हय, जउन अपने खातिर धन-सम्पत्ति जोरत हय, पय परमातिमा के नजर माहीं धनी नहिँ आय।”

### परमातिमा के ऊपर बिसुआस रक्खा

(मत्ती 6:25-34)

22 पुनि यीसु अपने चलन से कहिन, “एसे हम तौहसे कहित हएन, कि अपने प्रान के चिन्ता न किहा, कि हम का खाब; न अपने देह के चिन्ता किहा, कि हम का पहिरब।<sup>23</sup> काहेकि प्रान खाना से जादा, अउर देह ओन्हन से जादा कीमती हय।<sup>24</sup> कउअन काहीं देखा; ऊँ न त बोउतय आहीं, अउर न त कटतय आहीं, अउर न उनखे राहय गल्ला होय, अउर न बखारिन रहय, तऊ परमातिमा उनहीं पालत हें। तौहार मोल त पँछिन से बढ़िके हय, तौहई काहे न खबइहँय? <sup>25</sup> तौहरे पंचन म से अइसा को हय, जउन चिन्ता कइके, अपने उमिर माहीं एक घरिव बढ़ाय सकत होय? <sup>26</sup> एसे अगर तूँ पंचे सबसे छोट काम नहीं कइ सकते आह्या, त खुब बातन के चिन्ता काहे करते हया।<sup>27</sup> जंगली फूलन के बिरबन काहीं ध्यान से देखा, कि ऊँ कइसन बाढ़त हें, ऊँ न त मेहनत करँय, अउर न कातके ओन्हय बनामँय, तऊ हम तौहसे कहित हएन, कि राजा सुलैमान घलाय, जबकि ऊँ संसार माहीं सगलेन से धनी रहे हँय, तऊ उन फूलन म से एक्कवठे कि नाई निकहा ओन्हा नहीं पहिरे पाइन।<sup>28</sup> एसे अगर परमातिमा मइदान के चारा काहीं, जउन आज हय, अउर काल्ह आगी माहीं झोंक दीन जई, उनहीं एतना सुन्दर ओन्हा पहिराबत हें, त हे अल्प बिसुआसिव, ऊँ तौहई पंचन काहीं निकहा ओन्हा काहे न पहिरइहँय? <sup>29</sup> अउर तूँ पंचे ई सगली चीजन काहीं ढूँँइ माहीं न रहा, कि हम का खाब-पिअब, अउर मन माहीं संका न किहा, कि परमातिमा तौहई न देइहँय।<sup>30</sup> काहेकि संसार के सगले जातिअन के मनई, ई सगली चीजन काहीं ढूँँइ माहीं लगे रहत हें: पय तौहार पिता परमातिमा इआ जानत हें, कि तौहई पंचन काहीं ई सगली चीजन के जरूरत ही।<sup>31</sup> पय तूँ पंचे परमातिमा के राज के बढ़ोत्तरी के काम माहीं लगे रहा, त तौहई ई जरूरत के सगली चीजँय मिल जइहँय।”

### स्वरग के धन

(मत्ती 6:19-22)

32 हे छोट झुन्ड, डेरा न; काहेकि तौहरे पिता परमातिमा काहीं इआ नीक लाग हय, कि तौहई राज देंय।<sup>33</sup> आपन धन-सम्पत्ती बेंच के दान कइ द्या; अउर अपने खातिर अइसन आत्मिक बटुआ बनाबा, जउन पुरान नहीं होय, बलकिन स्वरग माहीं अइसन आत्मिक धन एकट्ठा करा, जउन घटय नहीं, जेही चोर नहीं चोरामँय, अउर न किरबा खाँय।<sup>34</sup> काहेकि जहाँ तौहार धन-सम्पत्ती हय, उहँय तौहार मनव लगा रही।

### तइआर रहा

35 यीसु उनसे कहिन, “तूँ पंचे हमेसा तइआर रहा, अउर तौहार दिया जलत रहँय,<sup>36</sup> अउर तूँ पंचे, ऊँ मनइन कि नाई बना, जउन अपने मालिक के घर लउटँय के इन्तजार माहीं रहत हें, कि जब ऊँ बरात से लउटिके आमँय, अउर दुआरा के सँकरी खट खटामँय, त ऊँ हरबिन उनखे खातिर केमरा खोल देंय।<sup>37</sup> धन्य हें, ऊँ दास लोग जिनखर मालिक आइके उनहीं जागत पामँय; हम तौहसे सही कहित हएन, कि ऊँ मालिक, करिहाँ बाँधिके उनहीं खाना खाँइका बइठइहँय, अउर लघे आइके उनखर सेबा करिहँय।<sup>38</sup> अगर मालिक रातके दुसरे पहर, इआ कि तिसरे पहर माहीं, आइके उनहीं

जागत पामँय, त ऊँ दास धन्य हैं।<sup>39</sup> पय तूँ पंचे इआ जानिल्या, कि अगर घर के मालिक जानत, कि चोर केतनीदार अई, त उआ जागत रहत, अउर अपने घर माहीं चोरी न होइ देत।<sup>40</sup> एसे तुहूँ पंचे तइआर रहा, काहेकि जउने समय के बारे माहीं तूँ पंचे सोचेव न होइहा, कि मनई के लड़िका अई, उहय समय मनई के लड़िका आय जई।”

### बिसुआस के काबिल अउर अबिसुआसी दास (मत्ती 24:45-51)

<sup>41</sup> तब पतरस यीसु से कहिन, “हे प्रभू, इआ उदाहरन हमहिन भर से कहित हएन, इआ कि सगले जनेन से।”<sup>42</sup> तब प्रभू कहिन, “उआ बिसुआस के काबिल अउर बुद्धिमान सगले भन्डार के मालिक को कहाबत हय, उहय जेखर मालिक, ओही नोकर-चाकरन के ऊपर मुखिया बनामँय, कि उआ समय माहीं सगलेन काहीं खॉय बाली चीजन काहीं देय।<sup>43</sup> धन्य हय, उआ दास, जेही ओखर मालिक आइके जउन कहिगे रहे हँय, उहयमेर करत पामँय।<sup>44</sup> हम तौहसे सही कहित हएन; ऊँ मालिक, ओही अपने सगले धन-सम्पत्ती के मालिक बनाय देइहँय।<sup>45</sup> पय अगर उआ दास सोचँइ लागय, कि हमार मालिक देर से अइहँय, अउर उनखे दुसरे दास-दासिन काहीं मारँय-पीटँय लागय, अउर खॉय-पिअँइ माहीं परिजाय, अउर पियक्कड़ होइ लागय।<sup>46</sup> तब ओखर मालिक अइसन दिन अइहँय, कि जब उआ दास सोचत होई कि आज ऊँ न अइहँय, अउर अइसन समय माहीं आय जइहँय, जउने काहीं उआ न जानत होई, अउर ऊँ मालिक आइके ओही खुब सजा देइहँय, अउर ओखर गिनती अबिसुआसी लोगन माहीं करिहँय।<sup>47</sup> अउर उआ दास जउन अपने मालिक के इच्छा जानत रहा हय, पय उनखे आमँइ के समय तइआर नहीं रहा, अउर अपने मालिक के इच्छा के मुताबिक नहीं चला, उआ अपने मालिक से खुब मार खई।<sup>48</sup> पय जउन मनई बिना जाने मार खॉय के काबिल काम करत हय, उआ न जानँय के कारन थोरिन काहीं मार पाई। एसे जेही खुब काम दीनगा हय, ओसे खुब लेखा लीन जई; अउर जेही खुब जिम्मेबारी दीनगे ही, ओसे खुब लेखा लीन जई।”

### यीसु के दुबारा आमँइ के परिनाम (मत्ती 10:34-36)

<sup>49</sup> ओखे बाद यीसु पुनि कहिन, “हम धरती माहीं आगी लगामँइ आएन हँय; अउर इआ चाहित हएन, कि केबल इआ अबे सुलुगि जाय।<sup>50</sup> हमहीं त एकठे बपतिस्मा लेंइ क हय, अउर जब तक उआ पूर न होइ जाय, तब तक हम खुब कस्त माहीं रहब।<sup>51</sup> का तूँ पंचे इआ समझते हया, कि हम धरती माहीं मेल-मिलाप करामँइ आएन हय? हम तौहसे कहित हएन; कि नहीं, बलकिन अलग करामँइ आएन हय।<sup>52</sup> काहेकि अब से, एकठे घर माहीं पाँच जने, एक दुसरे से बिरोध करिहँय, तीन जने दुइ जने से, अउर दुइ जने तीन जने से।<sup>53</sup> बाप लड़िका से, अउर लड़िका बाप से बिरोध रक्खी; महतारी बिटिया से, अउर बिटिया महतारी से, अउर सास पुतऊ से, अउर पुतऊ सास से बिरोध रक्खी।”

### समय के पहिचान (मत्ती 16:2,3)

<sup>54</sup> यीसु भीड़ के मनइन से कहिन, “जब तूँ पंचे बदरी काहीं पच्छिम से उठत देखते हया, त हरबिन जान लेते हया, कि पानी बरसी, अउर अइसनय होत हय।<sup>55</sup> अउर जब दक्खिन दिसा से हबा चलत देखते हया, तब कहते हया, कि लूक चली, अउर अइसनय होत हय।<sup>56</sup> हे कपटिव, तूँ पंचे धरती अउर अकास के रूप-रंग माहीं भेद बताय सकते हया, पय इआ जुग के बारे माहीं, काहे भेद करँय नहीं जन त्या?”

### अपने मुहई से समझउता (मत्ती 5:25,26)

<sup>57</sup> तूँ पंचे अपने आपय काहे निरनय नहीं कइ लेते आह्या, कि उचित का हय? <sup>58</sup> जब तूँ अपने बिरोधी के साथ राजपाल के लघे जाते हया, त गडलय माहीं ओसे समझउता कइल्या, अइसा न होय, कि उआ बिरोधी तौहई राजपाल के लघे लइ जाय, अउर राजपाल तौहई सिपाही के हाँथ माहीं सउँपि देय, अउर सिपाही लइ जाइके जेल माहीं डार देय।<sup>59</sup> हम तौहसे कहित हएन, कि जब तक तूँ पाई-पाई चुकाय न देइहा, तब तक जेल से छूटे न पइहा।”

### मन काहीं बदला इआ नास होइजा

**13** उहय समय कुछ जने आइगें, अउर उन गलीली लोगन के बारे माहीं बात करँइ लागें, जिनहीं रोम देस के राजपाल पिलातुस यरूसलेम मन्दिर माहीं बलिदान चढ़ाबत माहीं मरबाय डारिन तय।<sup>2</sup> ई बातन काहीं सुनिके यीसु उनसे कहिन, “का तूँ पंचे इआ समझते हया, कि ई गलीली लोग सगले गलीली लोगन से जादा पापी रहे हँय, जउने से इआ बिपत्ती उनखे ऊपर परी? <sup>3</sup> हम तौहसे कहित हएन, कि नहीं; पय अगर तूँ पंचे पश्चाताप न करिहा, त तुहूँ पंचे सगले जने इहइमेर से नास होइ जइहा।<sup>4</sup> तूँ पंचे का समझते हया, कि ऊँ अठारा जने जिनखे ऊपर सीलोह के गुम्मत गिरिगा हय, अउर ऊँ पंचे दबिके मरिगे हँय; यरूसलेम सहर के रहँइ बाले सगले मनइन से जादा अपराधी रहे हँय? <sup>5</sup> हम तौहसे कहित हएन, कि नहीं; पय अगर तूँ पंचे पाप करब न छोड़िहा त तुहूँ सगले जने इहइमेर से नस्त होइ जइहा।”

### बिना फर के अंजीर के बिरबा के उदाहरन

<sup>6</sup> पुनि यीसु इहव उदाहरन कहिन, “कउनव मनई के अंगूर के बगिया माहीं एकठे अंजीर के बिरबा लगा रहा हय। उआ मनई अंजीर के बिरबा माहीं फर ढूँढँइ आबा, पय एक्कवठे फर नहीं पाइस।<sup>7</sup> तब उआ मनई बगिया के रखबारी करँइ बाले से कहिस, ‘देखा तीन बरिस से हम इआ अंजीर के बिरबा माहीं फर ढूँढँइ अइत हएन, पय एक्कव फर नहीं पाई। इआ बिरबा काहीं काटि डारा, इआ काहे भूँइ काहीं छिंदाए रहय?’<sup>8</sup> बगिया के देखभाल करँइ बाला उनसे कहिस, ‘हे मालिक, इआ बिरबा काहीं इआ बरिस अऊ रहँइ देई; कि हम एखे चारिव कइती खोदिके खाद डारी।<sup>9</sup> अगर आँगे साल फरी त ठीक हय, नहीं त काट डारब’।”

### पबित्र दिन काहीं कुबरी मेहेरिआ काहीं नीक करब

<sup>10</sup> एक दिन यीसु पबित्र दिन काहीं यहूदी सभाघर माहीं उपदेस देत रहे हँय।<sup>11</sup> उहाँ एकठे मेहेरिआ बइठ रही हय, जउने काहीं अठारा साल से एकठे कमजोर करँइ बाली बुरी आत्मा पकड़े रही हय, एसे उआ कुबरी होइगे रही हय, अउर कउनव मेर से सीध नहीं ठाढ़ होइ सकत रही आय।<sup>12</sup> यीसु ओही देखिके बोलाइन, अउर कहिन, “हे बहिनी, तूँ अपने कमजोरी से छूटि गया हय।”<sup>13</sup> तब यीसु ओखे ऊपर आपन हाँथ धरिन, अउर उआ तुरन्तय सीध होइगे, अउर परमातिमा के बड़ाई करँइ लाग।<sup>14</sup> यीसु उआ मेहेरिआ काहीं पबित्र दिन काहीं नीक किहिन तय, एसे यहूदी सभाघर के मुखिया गुस्साइके, उहाँ बइठ सगले मनइन से कहँइ लाग, “छय दिन हँ जउने माहीं काम करँइ चाही, अउर उँइन दिनन माहीं बिमारन काहीं नीक करामँइ लइ आबा करा; पय पबित्र दिन काहीं नहीं।”<sup>15</sup> ई बातन काहीं सुनिके प्रभू जबाब दिहिन, “हे कपटिव, का पबित्र दिन काहीं तौहरे पंचन म से हरेक जन अपने सार से बरधा, अउर गदहन काहीं छोरिके पानी पिआमँइ नहीं लइ जाते आह्या? <sup>16</sup> त का इआ उचित नहिँ आय, कि इआ मेहेरिआ जउन अब्राहम के कुल के बिटिआ आय, अउर जउने काहीं सइतान अठारा बरिस से अपने काबू माहीं कए रहा हय। पबित्र दिन काहीं इआ ओखे बन्धन

से छोड़ा जाय?" 17 जब यीसु ई बातें कहिन, तब उनखर सगले बिरोधी लज्जित होइगें, अउर सगली भीड़ के मनई ऊँ चमत्कारन के कामन काहीं देखिके, जउन यीसु किहिन तय, आनन्दित होइगें।

### राई के दाना के उदाहरन

(मत्ती 13:31,32; मरकुस 4:30-32)

18 यीसु पुनि कहिन, "परमातिमा के राज केखी कि नाई हय? अउर हम ओखर तुलना कउने चीज से करी? 19 परमातिमा के राज राई के दाना कि नाई हय: जउने काहीं कउनव मनई लइके अपने खेत माहीं बोइस, अउर उआ बाढिके बिरबा होइगा; अउर अकास माहीं उड़इ बाले पच्छी ओखे डेरइअन माहीं बसेर डारिन।"

### खमीर के उदाहरन

(मत्ती 13:33)

20 यीसु पुनि कहिन, "हम परमातिमा के राज के उपमा कउने चीज से देई? 21 परमातिमा के राज खमीर कि नाई हय, जउने काहीं थोरी क लइके कउनव मेहेरिआ, तीन पसेरी पिसान माहीं मिलाय दिहिस, अउर उआ धीरे-धीरे सगले पिसान माहीं फइलिके ओही आमिल कइ देत हय अउर बढ़ाय देत हय।"

### साँकर दुअरा

(मत्ती 7:13,14,21-23)

22 यीसु सहरन-सहरन अउर गाँमन-गाँमन होइके उपदेस देत यरूसलेम सहर कइ जात रहे हँय, 23 तबहिनय कउनव पूँछिस, "हे प्रभू, का मुक्ती पामँइ बाले थोरिन काहीं हें?" यीसु उनसे कहिन, 24 "साँकर दुअरा से परमातिमा के राज माहीं प्रबेस करँइ के कोसिस करा, काहेकि हम तौहसे सही कहित हएन, कि खुब मनई उआ दुअरा से प्रबेस करँइ के कोसिस करिहँय, पय कर न पइहँय। 25 जब कउनव घर के मालिक उठिके दुअरा बंद कइ चुका होय, अउर तूँ बहिरे ठाढ़ होइके दुअरा खट खटाइके कहँइ लागा, 'हे मालिक, हमरे खातिर दुअरा खोल देई', अउर ऊँ तौहई जबाब देई 'हम तौहई नहीं जानी, तूँ पंचे कहाँ के आह्या?' 26 तब तूँ पंचे कहँइ लगिहा, 'हम अपना के साथ माहीं खाएन-पिएन, अउर अपना हमरे बजारन माहीं उपदेस दिहेन हय।' 27 पय घर के मालिक कइहँय, 'हम तौहसे कहित हएन, कि हम तौहई नहीं जानी, कि कहाँ से आया हय। हे कुकर्मि, तूँ सगले जन हमसे दूरी होइजा।' 28 उहाँ रोउब अउर दाँत पीसब होई; जब तूँ पंचे अब्राहम अउर इसहाक अउर याकूब अउर सगले परमातिमा के सँदेस बतामँइ बालेन काहीं, परमातिमा के राज माहीं बइठे, अउर अपने काहीं बहिरे निकारे देखिहा; 29 अउर पूरुब अउर पच्छिम; उत्तर अउर दक्खिन से खुब मनई आइके, परमातिमा के राज के जेउनार माहीं सामिल होइ हँय। 30 अउर देखा, जे कोऊ इआ संसार माहीं खुद काहीं सगलेन से बड़ा मानत हें, ऊँ पंचे स्वरग माहीं सगलेन से छोट माने जइहँय, अउर जे कोऊ इआ संसार माहीं खुद काहीं सगलेन से छोट मानत हें, ऊँ पंचे स्वरग माहीं सगलेन से बड़े माने जइहँय।"

### राजा हेरोदेस के दुसमनी

31 ओतनिनदार फरीसी लोग आइके यीसु से कहिन, "इहाँ से निकरिके चले जई, काहेकि राजा हेरोदेस अपना काहीं मारि डारँइ चाहत हें।" 32 यीसु उनसे कहिन, "जाइके उआ लोखरी कि नाई हुसिआर मनई से कहि द्या, कि देख, हम आज अउर काल्ह बुरी आत्मन काहीं निकारब, अउर बिमारन काहीं नीक करब, अउर तिसरे दिन आपन काम पूर करब। 33 चाह कुछु होइ जाय, तऊ हमहीं आज अउर काल्ह अउर परसँव चलिके यरूसलेम पहुँचब जरूरी हय, काहेकि अइसन नहीं होइ सकय, कि कउनव परमातिमा के सँदेस बतामँइ बाला यरूसलेम सहर के बहिरे मारा जाय।"

### यरूसलेम के खातिर बिलाप

(मत्ती 23:37-39)

34 "हे यरूसलेम सहर के मनइव, हे यरूसलेम सहर के मनइव! तूँ पंचे परमातिमा के सँदेस बतामँइ बालेन काहीं मारि डरते हया, अउर जेतने जने तौहरे लघे पठए गे हें, उनहीं पथरा मरते हया। अउर हम कइअक बेरकी इआ चाहेन, कि जइसन मुरगी अपने बच्चन काहीं, अपने पखनन के नीचे एकट्ठा करत ही, उहयमेर हमहूँ, तौहरे लड़िकन काहीं एकट्ठा कइ लेई, पय तूँ पंचे इआ नहीं चाह्या। 35 अउर देखा, अब तौहार पंचन के मन्दिर पूरी तरह उजर जई। अउर हम तौहसे कहित हएन, कि जब तक तूँ पंचे इआ न कइहा, कि

'धन्य हें ऊँ, जउन प्रभू के नाम से आबत हें' तब तक तूँ पंचे हमहीं पुनि कबहूँ न देखिहा।"

### फरीसी के घर माहीं यीसु

14 तब यीसु पबित्र दिन काहीं फरीसी लोगन के मुखिन म से कउनव के घर माहीं खाना खाँइ गें; अउर उहाँ कुछ जने यीसु के गलती पकड़इ के ताक माहीं लगे रहे हँय। 2 उहाँ एकठे मनई रहा हय, जउने काहीं हाँथ-गोड़ फूलँइ के बिमारी रही हय। 3 तब यीसु, मूसा के बिधान सिखामँइ बालेन अउर फरीसी लोगन से पूँछिन, "का पबित्र दिन काहीं बिमारन काहीं नीक करब उचित हय कि नहीं?" 4 पय ऊँ पंचे कुछु नहीं बोले। तब यीसु उआ बिमार काहीं छुइके नीक कइ दिहिन, अउर ओही चले जाँय दिहिन। 5 अउर यीसु उनसे कहिन, "तौहरे पंचन म से अइसा को हय, जेखर गदहा, इआ कि बरथा कुँइआ माहीं गिर जाय, अउर उआ पबित्र दिन काहीं हरबिन कुँइआ से बहिरे न निकारय?" 6 ऊँ पंचे, यीसु के ई बातन के जबाब नहीं दए पाइन।

### नग्रता के साथ महिमानन के स्वागत

7 जब यीसु देखिन, कि नेउतहरी आइके कइसन खास-खास जघन काहीं चुनिके बइठ जात हें, तब ऊँ उनसे एकठे उदाहरन कहिन, 8 "जब कोऊ तौहई बिआह माहीं नेउता दइके बोलाबय, त खास जघा माहीं जाइके न बइठ्या, कहँव अइसा न होय, कि उआ मनई तौहऊँ से बड़े महिमानन काहीं नेउता दइके बोलाए होय, 9 अउर उआ मनई जउन तौहई अउर उनहीं दोनव जनेन काहीं नेउता दिहिस ही, आइके तौहसे कहय, कि 'इआ जघा माहीं इनहीं बइठँय देई', तब तौहई लजाइके सगलेन से पीछे के जघा माहीं बइठँय परय। 10 पय जब तौहई नेउते माहीं बोलाबा जाय त सगलेन से पीछे के जघा माहीं बइठा; कि जब ऊँ जे तौहई नेउता दिहिन हीं आइके तौहसे कहँय, 'हे साथी आँगे बढ़िके बइठा', तब तौहरे साथ माहीं बइठे मनइन के आँगे तौहार बड़ाई होई। 11 काहेकि जे कोऊ खुद काहीं बड़ा बनाई, उआ परमातिमा के व्दारा छोट कीन जई: अउर जे कोऊ खुद काहीं छोट बनाई, त उआ परमातिमा के व्दारा बड़ा कीन जई।"

12 तब यीसु अपने नेउता देई बाले से घलाय कहिन, "जब तूँ दिन माहीं चाह रात माहीं भोज करा त, अपने साथिन इआ कि भाई पट्टिदारन काहीं, इआ कि धनी परोसिन काहीं न बोलाया, काहेकि ऊँ तौहऊँ काहीं नेउता देइहँय, अउर तौहई बदला मिल जई। 13 पय जब तूँ भोज करा, त कंगालन काहीं, लूलन-लँगइन काहीं, अउर अँधरन काहीं बोलाबा। 14 तब तूँ धन्य कहइहा, काहेकि उनखे लघे तौहई बदला देई के खातिर कुछु न रही, पय धरमिन के दुबारा जिए के बाद, स्वरग माहीं तौहई एखर प्रतिफल जरूर मिली।"

**बड़ी जेउनार के उदाहरन**

(मत्ती 22:1-10)

15 यीसु के साथ खाना खाँइ बालेन म से एक जने ई बातन काहीं सुनिके उनसे कहिन, “धन्य हय उआ, जउन परमातिमा के राज माहीं खाना खई।”  
 16 यीसु ओसे कहिन, “कउनव मनई खुब बड़ी जेउनार किहिन, अउर खुब जनेन काहीं नेउता दइके बोलबाइन। 17 जब खाना तइआर होइगा, तब ऊँ अपने दास से नेउतहरिन काहीं कहबाय पठइन, कि आबा, अब खाना तइआर हय। 18 पय ऊँ सगले नेउतहरी उनसे आनाकानी करँइ लागें। उनमा से एक जने कहिस, ‘हम अबहिनय खेत खरीदेन हय, ओही देखब जरूरी हय; हम तौहसे बिनती करित हएन, कि हमहीं माफ कइ द्या।’ 19 दुसरव जन इहइमेर कहिन, ‘हम पाँच जोड़ी बरधा खरीदेन हँय, उनहिन काहीं दमँय जइत हएन; हम तौहसे बिनती करित हएन, कि हमहीं माफ कइ द्या।’  
 20 एक जने अउर कहिस, हम ‘अबहिनय काज किहेन हय, हम नहीं आय सकी।’ 21 उआ दास आइके अपने मालिक काहीं ई सगली बातँय बताइस। तब घर के मालिक गुस्साइके अपने दास से कहिन, सहर के बजारन अउर गलिन माहीं हरबी जाइके, कंगालन, लूलन-लँगइन अउर अँधरन काहीं इहाँ बोलाय लाबा। 22 दास आइके कहिस, ‘हे मालिक, जइसन अपना कहेन तय उहयमेर किहेन हय; अउर ओखे बादव घर माहीं जघा खाली हय।’ 23 ऊँ मालिक अपने दास से कहिन, सड़कन अउर बगिनन माहीं जाइके उहाँ से मनइन काहीं जबरई बोलाइके लइ आबा, जउने हमार घर भर जाय।  
 24 काहेकि हम तौहसे कहित हएन, कि ऊँ नेउतहरिन म से कउनव हमरे जेउनार माहीं खाना न खाँय पाई।”

**चेला बनँइ के कीमत**

(मत्ती 10:37,38)

25 जब खुब भीड़ यीसु के साथ जात रही हय, तब यीसु मुडिके उनसे कहिन, 26 “अगर कोऊ हमरे लघे आबय, अउर अपने महतारी-बाप, अउर लड़िका-मेहेरिआ, अउर भाई-बहिनिन काहीं, अउर अपने प्रान काहीं पियार मानत हय, त उआ हमार चेला नहीं बन सकय; 27 अउर जे कोऊ आपन क्रूस उठाइके हमरे पीछे न चली अरथात दुख-तकलीफ सहिके, हमरे बातन काहीं न मानी, उआ हमार चेला नहीं बन सकय।

28 तौहरे पंचन म से अइसन कउन हय, जउन बड़ा घर बनामँइ चाहत होय, अउर पहिले बड़ठिके खरचा न जोरय, कि सगला घर बनामँइ के हिम्मत हमरे हय कि नहीं? 29 कहँव अइसन न होय, कि नेव भर देय अउर घर न बनाए पाबय, तब सगले देखइआ, इआ कहिके ओखर हँसी उड़ाँइ लागँय, 30 इआ ‘मनई घर त बनामँइ लाग, पय बनए नहीं पाइस?’ 31 इआ कि कउन अइसन राजा हय, जउन दुसरे राजा से लड़ाई करँइ जात होय, अउर पहिले सोचय बिचारय न कि जउन बीस हजार सिपाहिन काहीं लए हमरे ऊपर चढ़ाई करँइ आबत हय, त का हम दस हजार सिपाहिन काहीं लइके, ओखर सामना कइ सकित हएन, कि नहीं? 32 नहीं त दस हजार सिपाहिन बाला राजा, दुसरे राजा से जब उआ दूरिन होई, तबहिनय उआ आपन दूत पठइके मेल-मिलाप करँइ के कोसिस करी। 33 इहइमेर से तौहरे पंचन म से, जे कोऊ आपन सब कुछ छोँइ न देई, उआ हमार चेला नहीं होइ सकय।”

**बिना स्वाद के नोन**

(मत्ती 5:13; मरकुस 9:50)

34 यीसु पुनि कहिन, “नोन त निकहा होत हय, पय अगर ओखर सखरई खतम होइ जाय, त फेर उआ कउने चीज से सखार कीन जई। 35 अउर उआ न भुँइ के, अउर न त खादय के काम आबय, ओही सगले मनई बहिरे फेंकि देत हैं। जेखर सुनँय के मन होय, उआ बड़े ध्यान से सुन लेय।”

**हेरान गाइर के उदाहरन**

(मत्ती 18:12-14)

15 यीसु के लघे सगले चुंगी लेंइ बाले अउर पापी मनई आबत रहे हँय, कि उनखे बचन काहीं सुनँय। 2 पय फरीसी अउर मूसा के बिधान सिखामँइ बाले, कुड़कुड़ाइके कहँइ लागें, “ई त पापी लोगन से मिलत हैं, अउर उनखे साथ खाना घलाय खात हैं।”

3 तब यीसु उनसे एकठे उदाहरन कहिन: 4 “मान ल्या, कि तौहरे पंचन म से, कोहू के लघे सवठे गाइर होंय, अउर उनमा से एकठे हेराइ जाय, त का उआ मनई निन्यान्त्रे गइरन काहीं जंगल माहीं छोँडिके, उआ हेरान गाइर काहीं, तब तक न ढूँढत रही, जब तक कि उआ मिल न जाय? 5 अउर जब उआ मिल जात ही, तब उआ मारे उराव के ओही अपने काँधा माहीं उठाय लेत हय; 6 अउर अपने घर माहीं आइके, अपने साथिन अउर परोसिन काहीं एकट्ठा कइके कहत हय, कि ‘हमरे साथ आनन्द करा, काहेकि हमार जऊँ गाइर हेराइगे तय, उआ मिलगे ही।’ 7 हम तौहसे कहित हएन, कि इहइमेर से जब कउनव मनई पाप करब छोँडिके परमातिमा के बचन माहीं चलत हय, तब ओखे बारे माहीं स्वर्ग माहीं इहइमेर आनन्द मनाबा जात हय, बलकिन निन्यान्त्रे धरमिन के बारे माहीं, एतना आनन्द नहीं मनाबा जाय, काहेकि उनहीं पुनि मन फिरामँइ के जरूरत नहीं आय।”

**हेरान सिक्का के उदाहरन**

8 यीसु इहव कहिन, “सोचा कउन अइसन मेहेरिआ हय, जउने के लघे दसठे चाँदी के सिक्का होंय। अउर उनमा से एकठे हेराइ जाय, त का उआ दिया जलाइके, सगले घर काहीं तब तक न बटोरत रही, अउर मन लगाइके ढूँढत न रही, जब तक कि उआ सिक्का मिल न जाय? 9 अउर जब उआ सिक्का मिल जात हय, तब उआ अपने सखिन अउर परोसिन काहीं एकट्ठा कइके कहत ही, कि ‘हमरे साथ आनन्द मनाबा, काहेकि हमार सिक्का जउन हेराइगा तय, उआ मिलिगा हय।’ 10 हम तौहसे कहित हएन; कि इहइमेर से जब एकठे मनई पाप करब छोँडिके परमातिमा के बचन माहीं चलत हय, तब ओखे बारे माहीं स्वर्ग माहीं परमातिमा के आँगे, स्वर्गदूतन माहीं आनन्द मनाबा जात हय।”

**बिगड़े लड़िका के उदाहरन**

11 पुनि यीसु कहिन, “एकठे मनई के दुइठे लड़िका रहे हँय। 12 उनमा से छोटकबा लड़िका अपने बाप से कहिस, ‘हे पिताजी, धन-सम्पत्ती म से जउन हमार हिस्सा होय, त बाँटिके हमहीं दइ देई।’ उनखर बाप आपन धन-सम्पत्ती बाँटिके दोनव जनेन काहीं दइ दिहिन। 13 कुछ दिना बाद छोटकबा लड़िका, आपन सगली धन-सम्पत्ती एकट्ठा किहिस अउर लइके खुब दूरी दुसरे देस माहीं चला ग, अउर उहाँ आपन सगली धन-सम्पत्ती कुकर्मन माहीं उड़ाय दिहिस। 14 जब ओखर सगली धन-सम्पत्ती खरचा होइगे, तब उआ देस माहीं भारी अकाल परा, अउर उआ कंगाल होइगा। 15 एसे उआ उहय देस माहीं रहँइ बाले एकठे मनई के लघे, काम माँगय ग, अउर उआ मनई ओही, अपने खेतन माहीं सुमर चरामँइ के खातिर लगाय लिहिस। 16 अउर उआ चाहत रहा हय, कि उन फलिअन से जउने काहीं सुमर खात रहे हँय, आपन पेट भरय; अउर ओही कोऊ कुछू खाँइ काहीं नहीं देत रहा। 17 जब ओही आपन गलती महसूस भय, तब कहँइ लाग, ‘हमरे बाप के घर माहीं मजूरन काहीं, उनखे जरूरत से जादा खाना मिलत हय; अउर हम इहाँ भूँखन मरित हएन।’ 18 तब उआ कहिस हम अब अपने बाप के लघे जाब, अउर उनसे कहब कि पिताजी, हम परमातिमा के बिरोध माहीं, अउर अपना के बिरोध माहीं पाप किहेन हय। 19 हम अब एखे लाइक नहिँ आहैन, कि अपना के लड़िका कहाई, पय हमहीं अपना एकठे मजूर कि नाई रख लेई।

20 तब उआ उठिके अपने बाप के लघे चल दिहिस, जब उआ घर के थोरिन दूर रहय, तबहिनय ओखर बाप देखिके तरस खाइन, अउर दउड़िके

ओही अपने गले लगाय लिहिन, अउर खुब चूमिन।<sup>21</sup> तब उआ लड़िका अपने बाप से कहिस, 'पिताजी, हम परमातिमा के बिरोध माहीं, अउर अपना के बिरोध माहीं पाप किहेन हय; अउर हम अब एखे काबिल नहिं आहेन, कि अपना के लड़िका कहाई।' <sup>22</sup> पय बाप अपने सेबकन से कहिन, 'हरबी निकहा से निकहा ओन्हा लइ आबा, अउर ओही पहिराबा, अउर ओखे हाँथे माहीं अँगूठी, अउर गोड़े माहीं पनहीं पहिराबा, <sup>23</sup> अउर खाँय-पिअँड के निकहा प्रबन्ध करा, जउने हम पंचे खई अउर आनन्द मनाई।' <sup>24</sup> काहेकि हमार इआ लड़िका पाप किहे के कारन मरे कि नाई होइगा तय, पय गलती काहीं सोइकार कइ लेंड के कारन जिन्दा कि नाई होइगा हय: जउन हेराइगा रहा हय, अब उआ मिलिगा हय, अउर ऊँ सगले जने आनन्द मनामँड लागें।

<sup>25</sup> पय उनखर जेठ लड़िका खेत माहीं रहा हय। अउर जब उआ आबत-आबत घर के लघे पहुँचा, तब ओही गामँड-बजामँड के बोल सुनान। <sup>26</sup> तब उआ अपने एकठे दास काहीं बोलाइके पूँछिस, 'घर माहीं इआ का होत हय?' <sup>27</sup> दास उनसे कहिस, 'अपना के भाई आए हँय, अउर अपना के पिताजी, खाँय-पिअँड के निकहा प्रबन्ध कराइन हीं, एसे कि ऊँ उनहीं नीक-सूख पाइन हीं।' <sup>28</sup> एतना सुनिके उआ खुब गुस्साइगा, अउर घर के भीतर नहीं जाँय चाहिस, पय ओखर बाप बहिरे आइके ओही मनामँड लागें। <sup>29</sup> उआ जेठ लड़िका अपने बाप काहीं जबाब दिहिस, 'देखी हम त एतने बरिस से अपना के सेबा करत आहेन, अउर कबहूँ अपना के हुकुम काहीं नहीं टारने, तऊ अपना हमरे खातिर एकठे बोकरी के बच्चव तक नहीं दिहेन, कि हम अपने साथिन के साथ आनन्द करित।' <sup>30</sup> पय जब अपना के इआ छोटकबा लड़िका, जउन अपना के धन सम्पत्ति बेस्यन माहीं उड़ाय दिहिस ही, तऊ जब उआ आबा, तब ओखे खातिर खाँय-पिअँड के निकहा प्रबन्ध कर बायन हय।' <sup>31</sup> तब उआ बाप अपने जेठ लड़िका काहीं समझाइस, 'बेटा, तू त हमेसा हमरे साथ हया; अउर जउन कुछ धन-सम्पत्ती हमरे लघे ही, उआ सगली तोंहारय आय।' <sup>32</sup> पय अब आनन्द मनामँड चाही, काहेकि जउन तोंहार इआ भाई पाप किहे के कारन मरे कि नाई होइगा तय, पय गलती काहीं सोइकार कइ लेंड के कारन जिन्दा कि नाई होइगा हय, जउन भटक ग रहा हय, अब उआ मिलिगा हय।"

### हुसिआर भन्दारी

**16** पुनि यीसु चेलन से कहिन, "कउनव धनमान के एकठे भन्दारी रहा हय, अउर कुछ मनई धनमान मनई से इआ चुगली किहिन, कि तोंहार इआ भन्दारी तोंहार सगली धन सम्पत उड़ाए डारत हय। <sup>2</sup> तब धनी मनई अपने भन्दारी काहीं बोलाइके कहिन, 'इआ का आय जउन हम तोंहरे बारे माहीं सुनित हएन? अपने भन्दार के काम के हमहीं लेखा-जोखा द्या, काहेकि अब हम तोंहई भन्दारी न बनाउबा।' <sup>3</sup> तब उआ भन्दारी सोचँड लाग, 'अब हम का करी? काहेकि अब हमार मालिक हमहीं भन्दार के काम से निकार देइहँय। माटी त हमार खोदी न होई; अउर भीखव मार्गँड माहीं हमहीं लाज लागी।' <sup>4</sup> अब हम जान गएन, कि हमहीं का करँड चाही, जउने जब हम भन्दारी के काम से निकारे जई, त मनई हमहीं अपने घरन माहीं रख लेंय।' <sup>5</sup> तब उआ भन्दारी अपने मालिक के करजा लेंड बालेन काहीं एक-एक कइके बोलाइस, अउर पहिल बाले से पूँछिस, 'तोंहरे ऊपर हमरे मालिक के केतना करजा हय?' <sup>6</sup> उआ कहिस, 'सव मन तेल', तब उआ भन्दारी ओसे कहिस, 'आपन बही-खाता निकारिके, अउर बइठिके हरबी पचास लिख दे।' <sup>7</sup> पुनि उआ भन्दारी दुसरे से पूँछिस, 'तोंहरे ऊपर हमरे मालिक के केतना करजा हय?' उआ कहिस, 'सव मन गोहूँ', तब उआ भन्दारी ओसे कहिस, 'आपन बही-खाता लइके अस्सी लिख दे।'

<sup>8</sup> यीसु कहिन, 'तब मालिक उआ अधरमी भन्दारी काहीं सराहिस, कि उआ बड़ी चलाँकी से काम किहिस ही।' काहेकि इआ संसार के मनई अपने समय के मनइन के साथ, रीति-रिबाजन अउर बेउहार करँड माहीं परमातिमा के बचन मानँड बाले मनइन से जादा हुसिआर हें। <sup>9</sup> अउर हम तोंहसे कहित

हएन, कि इआ बुरी दुनिया के धन-सम्पत्ती से अपने खातिर साथी बनाय ल्या, जउने जब तोंहार सगली धन-सम्पत्ती खतम होइ जाय, त ऊँ पंचे तोंहई अपने अनन्त घरन माहीं रख लेंय। <sup>10</sup> जे कोऊ थोरिव काम माहीं बिसुआस के काबिल हय, त उआ खुब कामन माहीं बिसुआस के काबिल रही, अउर जे थोरी-थोरी कामन माहीं अधरमी हय, त उआ खुब कामन माहीं अधरमी रही। <sup>11</sup> एसे जब तू पंचे इआ संसार के धन काहीं सम्हारँय माहीं, बिसुआस के काबिल नहीं आह्या, त परमातिमा के बचन रूपी सच्चा धन तोंहई को सउँपी? <sup>12</sup> अउर अगर तू पंचे दुसरे के धन माहीं बिसुआस के काबिल नहीं ठहर सके आह्या, त जउन तोंहार आय, ओही तोंहई को देई?"

<sup>13</sup> यीसु पुनि कहिन, "कउनव सेबक दुइठे मालिकन के सेबा नहीं कइ सकय: काहेकि उआ एकठे से दुसमनी अउर दुसरे से प्रेम रखी; इआ कि एकठे से मिला रही, अउर दुसरे काहीं तुच्छ जानी। एसे तू पंचे परमातिमा अउर धन, दोनव के सेबा नहीं कइ सकते आह्या।"

### यीसु के कुछ उपदेस

(मत्ती 11:12,13; 5:31,32; मरकुस 10:11,12)

<sup>14</sup> फरीसी लोग जउन लोभी रहे हँय, ई सगली बातन काहीं सुनिके यीसु के हँसी उड़ावँड लागें। <sup>15</sup> तब यीसु उनसे कहिन, "तू पंचे त मनइन के आँगे अपने-आप काहीं बड़ा धरमी ठहरउते हया, पय परमातिमा तोंहरे मन के बात काहीं जानत हें, काहेकि जउन चीज मनइन के निगाह माहीं महान ही, उआ परमातिमा के नजर माहीं तुच्छ ही।

<sup>16</sup> मूसा के बिधान अउर परमातिमा के सँदेस बतामँड बाले यूहन्ना बपतिस्मा देई बाले तक रहे हँय; उआ समय से परमातिमा के राज के खुसी के खबर सुनाई जाय रही हय, अउर जे कोऊ बिसुआस करत हें, ऊँ पंचे स्वरगराज माहीं सामर्थ के साथ प्रबेस करत हें। <sup>17</sup> अकास अउर धरती टर सकत हें, पय जउन बात मूसा के बिधान माहीं दीन गई हँय, उँड कबहूँ न टरिहँय।"

<sup>18</sup> यीसु इहव कहिन, "जउन मनई अपने पहिल मेहेरिआ काहीं छोंडिके दुसरे मेहेरिआ से काज करत हय, त उआ अपने पहिल मेहेरिआ के बिरोध माहीं ब्यभिचार करत हय। अउर जे कोऊ उआ छोंडी मेहेरिआ से काज करत हय, त उहव ब्यभिचार करत हय।"

### धनी मनई अउर गरीब लाजर

<sup>19</sup> पुनि यीसु कहिन, "एकठे धनी मनई रहा हय, जउन हमेसा कीमती अउर निकहे ओन्हा पहिरत रहा हय, अउर रोज सुख-बिलास अउर धूम-धाम के साथ रहत रहा हय। <sup>20</sup> अउर उहँड लाजर नाम के एकठे कंगाल मनई जउने के सगले देह माहीं घाव रहे हँय, ओखे दुआरा माहीं छोंड दीन जात रहा हय, <sup>21</sup> अउर उआ चाहत रहा हय, कि धनी मनई के टेबुल के जूँठन से आपन पेट भरय; इहाँ तक कि कुकुरव आइके ओखे घावन काहीं चाटत रहे हँय। <sup>22</sup> अउर अइसन भ कि उआ कंगाल लाजर मरिगा, अउर स्वरगदूत आइके ओही लइगें, अउर स्वरग माहीं अब्राहम के लघे अराम के जघा माहीं पहुँचाइन। अउर उआ धनी मनइव मरिगा, अउर गाड़ दीनगा, <sup>23</sup> अउर उआ अधोलोक माहीं पीरा माहीं परे, आँखी उठाइके दूरिन से अब्राहम के लघे लाजर काहीं बइठे देखिस। <sup>24</sup> तब उआ धनी मनई चिल्लाइके कहिस, 'हे पिता अब्राहम, हमरे ऊपर दया कइके लाजर काहीं हमरे लघे पठय देई, जउने उआ अपने अँगुरी काहीं पानी माहीं बोरिके हमरे जीभ काहीं ठंड कइदेय, काहेकि हम इआ ज्वाला माहीं छटपटाय रहेन हय।' <sup>25</sup> पय अब्राहम ओसे कहिन, 'हे बेटबा सुधि करा, कि तू अपने जिन्दगी माहीं सगली निकही चीजँय: पाय चुके हया, अउर उहइमेर लाजर बुरी चीजन काहीं पाय चुका हय, पय अब लाजर इहाँ सान्ती पाय रहा हय, अउर तू तइपते हया।' <sup>26</sup> अउर ई बातन के अलाबा, हमरे अउर तोंहरे बीच माहीं एकठे बड़ा भारी गड्डा हय, जउने इआ पार से उआ पार तोंहरे लघे कोऊ जाँड चाहय, त उआ न जाय सकय, अउर उआ पार से इआ पार हमरे लघे न आय सकय।' <sup>27</sup> उआ धनी

मनई कहिस, 'त हे पिता, हम अपना से चरउरी करित हएन, कि अपना लाजर काहीं हमरे बाप के घर पठय देई, <sup>28</sup> काहेकि हमरे पाँच भाई अउर हैं; लाजर उनखे लघे जाइके ई सगली बातन काहीं बतामँड, अइसन न होय, कि ऊँ सगले जन इआ पीरा के जघा माहीं आमँय।' <sup>29</sup> अब्राहम ओसे कहिन, 'उनखे लघे त मूसा नबी अउर परमातिमा के सँदेस बतामँड बालेन के लिखी किताबँय हई, ऊँ पंचे उनखर सुनँय।' <sup>30</sup> धनी मनई कहँई लाग, 'नहीं, हे पिता अब्राहम; पय अगर कउनव मरे के बाद जिन्दा होइके उनखे लघे जाय, त ऊँ पंचे पाप करब छोड़िके मन काहीं बदलिहँय, अउर परमातिमा के बचन काहीं मनि हँय।' <sup>31</sup> अब्राहम पिता ओसे कहिन, 'जब ऊँ पंचे मूसा नबी, अउर परमातिमा के सँदेस बतामँड बालेन के बातन काहीं नहीं सुनिन, त अगर कउनव मरे म से जिन्दा होइके उनखे लघे जई, तऊँ ऊँ पंचे ओखर बिसुआस न मनि हँय।'

### ठोकर के कारन बनई बालेन काहीं दन्द

(मत्ती 18:6,7,21,22; मरकुस 9:42)

**17** यीसु अपने चलन से कहिन, मनइन काहीं पाप म गिरामँड बाली चीज त रहतिन हई, पय जउन मनई दुसरे मनइन काहीं पाप माहीं गिराबत हैं, त उन्हीं परमातिमा से खुब सजा मिली। <sup>2</sup> जे कोऊ हमरे ऊपर बिसुआस करँई बालेन काहीं, चाह उआ छोट क लड़िकय होय, उनसे पाप कराबत हय, त उआ मनई के खातिर इआ ठीक कहाई, कि एकठे बड़ी काहीं चक्की के जेतबा ओखे गरे माहीं बाँधिके, समुद्र माहीं फेंक दीन जाय, काहेकि परमातिमा के सजा एहू से जादा मिली। <sup>3</sup> सतरक रहा; अगर तौहार भाई कउनव गलती करय, त ओही समझाबा, अउर अगर उआ अपने गलती काहीं सोइकार कइके पचिताय, त ओही माफ करा। <sup>4</sup> अगर तौहार भाई दिन भरे माहीं सात बेरकी तौहसे गलती करय, अउर सातव बेरकी तौहरे लघे आइके कहय, "हम पचितइत हएन" अउर माफी माँगय, त ओही माफ करा।

### बिसुआस

<sup>5</sup> तब सगले खास चेला प्रभू से कहिन, "परमातिमा के ऊपर हमरे बिसुआस काहीं बढ़ाई।" <sup>6</sup> प्रभू उनसे कहिन, "अगर परमातिमा के ऊपर राई के दानव के बराबर तौहार सच्चा बिसुआस होत, त तूँ पंचे इआ सहनूत के बिरबा से कह त्या, कि जर से उँखड़िके समुद्र माहीं लागि जा, त उआ तौहार बात मान लेत।"

### दास के करतब्य

<sup>7</sup> "मानि ल्या, कि तौहरे पंचन म से कोहू के लघे एकठे दास हय, जऊँ हर जोतत हय, इआ कि गाड़र चराबत हय, अउर जब उआ खेत से लउटिके आबय, त का ओखर स्वामी ओसे कही, कि 'हरबी आइके हमरे साथ खाना खायँ बइठ?' <sup>8</sup> अउर का उआ अपने सेबक से इआ न कही, कि 'हमरे खातिर खाना तइआर कर, अउर जब तक हम खाय-पी न लेई, तब तक करिहा बाँधिके हमार सेबा कर; ओखे बाद तहूँ खाय-पी लिहे?' <sup>9</sup> का उआ मालिक सेबक के एहसान मानी? काहेकि उआ उहय काम किहिस जउने काम काहीं करँई के हुकुम दीन ग रहा हय? नहीं। <sup>10</sup> इहइमेर से तहूँ पंचे जब उन सगले कामन काहीं कइ चुका, जउने कामन काहीं करँई के हुकुम तौहई दीनगा रहा हय, तब कहा, 'हम पंचे निकम्मे दास आहैन; जऊँ हमहीं करँई चाही त केबल हम पंचे उहय किहेन हँय।'

### कोढ़ के दसठे रोगिन काहीं निकहा करब

<sup>11</sup> अइसन भ, कि जब यीसु यरूसलेम सहर जाँइ के समय सामरिया प्रदेश, अउर गलील प्रदेश के बीच से होइके जात रहे हँय। <sup>12</sup> त कउनव गाँव माहीं घुसत समय उन्हीं दसठे कोढ़ी मिलें। <sup>13</sup> ऊँ पंचे दूरी ठाढ़ होइके खुब चन्डे से चिल्लाइके कहँई लागें, "हे यीसु, हे मालिक, हमरे ऊपर दया करी!"

<sup>14</sup> यीसु उन्हीं देखिके कहिन, "जा, अउर अपने काहीं याजकन काहीं देखाबा।" अउर जातय-जात ऊँ सगले सुद्ध होइगें। <sup>15</sup> तब उनमा से एकठे, इआ देखिके कि हम नीक होइ गएन हय, खुब चंडे से परमातिमा के बड़ाई करत लउटि आबा, <sup>16</sup> अउर उआ सामरिया प्रदेश के रहँई बाला मनई जउन नीक होइगा रहा हय, यीसु के गोड़न गिरिके धन्यवाद देंइ लाग; <sup>17</sup> तब यीसु ओसे कहिन, "का दसँव जने नहीं सुद्ध भें, त पुनि ऊँ नव जने कहाँ हैं?" <sup>18</sup> का इआ गैरयहूदी जाति के अलाबा अउर कउनव नहीं निकरा, जउन परमातिमा के बड़ाई करत?" <sup>19</sup> तब यीसु ओसे कहिन, "उठिके चले जा; तौहार हमरे ऊपर बिसुआस होइ के कारन तूँ निकहा होइ गया हय।"

### परमातिमा के राज के आउब

(मत्ती 24:23-28,37-41)

<sup>20</sup> एक बेरकी फरीसी लोग यीसु से पूँछिन, कि परमातिमा के राज कबय अई, तब यीसु उन्हीं जबाब दिहिन, "परमातिमा के राज जाहिर रूप माहीं नहीं आबय। <sup>21</sup> अउर मनई इआ न कइहँय कि, 'देखा, इहाँ हय, इआ उहाँ हय।' काहेकि देखा, परमातिमा के राज तौहरे बीच माहीं हय।" <sup>22</sup> पुनि यीसु अपने चलन से कहिन, "ऊँ दिन अइहँय, जउने माहीं तूँ मनई के लड़िका के दिनन म से एक दिन काहीं देखँइ चइहा, पय देखँइ काहीं न पइहा। <sup>23</sup> खुब मनई तौहसे कइहँय, 'देखा, मसीह उहाँ हैं! इआ देखा इहाँ हैं! पय तूँ पंचे उनखे बातन के बिसुआस मानिके, उनखे पीछे चले न जया। <sup>24</sup> काहेकि जइसन बिजुली अकास के एक छोर से चमकिके, दुसरे छोर तक चमकत ही, उहइमेर मनई के लड़िका, अपने दिन माहीं अई। <sup>25</sup> पय पहिले जरूरी हय, कि उआ खुब दुख उठाई, अउर इआ समय के मनई ओही तुच्छ जनिहँय। <sup>26</sup> जइसन नूह के दिनन माहीं भ रहा हय, उहयमेर मनई के लड़िका के आमँड के समय माहीं होई। <sup>27</sup> जउने दिन तक नूह जिहाज माहीं चढ़ नहीं गें, तब तक सगले मनई खात-पिअत रहे हँय, अउर ऊँ पंचे काज-बिआह करत रहे हँय, अउर उनखे जिहाज माहीं चढ़तय, जल-प्रलय आइके सब काहीं नास कइ दिहिस। <sup>28</sup> अउर इहइमेर लूत के दिनन माहीं भ रहा हय, सगले मनई खात-पिअत रहे हँय, एक दुसरे से लेन-देन करत रहे हँय, बिरबा लगाबत अउर घर बनाबत रहे हँय; <sup>29</sup> पय जउने दिन लूत परिवार समेत सदोम सहर से निकरें, उहय दिन आगी अउर गन्धक अकास से बरसें, अउर सगलेन काहीं जलाइके राख कइ दिहिन। <sup>30</sup> मनई के लड़िका के आमँड के दिन घलाय अइसय होई।

<sup>31</sup> यीसु पुनि कहिन, "उआ दिन जे कोऊ छत माहीं होय, अउर ओखर समान घर के भीतर होय, त उआ ओही लेंइ के खातिर नीचे न उतरय; अउर उहयमेर जे कोऊ खेत माहीं होय, उआ पीछे न लउटय। <sup>32</sup> लूत के मेहेरिआ काहीं सुध रक्खा! जइसन उआ परमातिमा के हुकुम नहीं मानिस अउर नोन के खम्भा बनिगे। <sup>33</sup> जे कोऊ आपन प्रान बचामँड चाही, उआ ओही गमाय देई, अउर जे कोऊ हमरे खातिर आपन प्रान तक देंइ काहीं तइआर रही, उआ ओही बचाए पाई। <sup>34</sup> यीसु कहिन, हम तौहसे कहित हएन, उआ दिन दुइठे मनई एकठे खटिया माहीं होइहँय; उनमा से एक जने उठाय लीन जई, अउर दूसर छोड़ दीन जई। <sup>35</sup> उहयमेर एक साथ जेतबा पीसत दुइठे मेहेरिन म से, एकठे ऊपर उठाय लीन जई, अउर दूसर छोड़ि दीन जई। <sup>36</sup> (दुइ जने खेत माहीं होइहँय, एक जने उठाय लीन जई, अउर दूसर छोड़ दीन जई।)" <sup>37</sup> एतना सुनिके चेला लोग यीसु से पूँछिन, "हे प्रभू इआ कबय होई?" यीसु उनसे कहिन, "जहाँ चील्ह एकट्ठा होती हँय, त इआ जाने मिलत हय, कि उहाँ लहास ही, उहइमेर ई चिन्हारिन काहीं देखिके, जान लिहा, कि मनई के लड़िका के दुसराय आमँड के दिन लघेन आइगा हय।"

### प्राथना करँई माहीं हिम्मत न हारँई चाही

**18** पुनि यीसु रोज प्राथना करँय, अउर हिम्मत न हारँई चाही, एखे बारे माहीं उन्हीं एकठे उदाहरन बताइन: <sup>2</sup> "कउनव सहर माहीं एकठे न्यायधीस रहत रहा हय, जउन न परमातिमा से डेरात रहा आय, अउर न

कउनव मनइन के परबाह करत रहा आय।<sup>3</sup> उहय सहर माहीं एकठे बिधबा रहत रही हय, जउन ओखे लघे आय-आइके कहत रही हय, 'हमार न्याय चुकाइके हमहीं मुद्दई से बचाबा।' <sup>4</sup> कुछ समय तक त उआ न्यायधीस न मानिस, पय अन्त माहीं अपने मन माहीं बिचार किहिस, हम न त परमातिमा काहीं डेरई, अउर न त मनइन के कउनव परबाह करी; <sup>5</sup> तऊ इआ बिधबा हमहीं परेसान करत रहत ही, एसे हम ओखर न्याय चुकाउब, कहँव अइसा न होय कि उआ हर बेरकी आइके हमहीं परेसान करय।"

<sup>6</sup> प्रभू कहिन, "सुना इआ अधरमी न्यायधीस का कहत हय? <sup>7</sup> त का परमातिमा अपने भक्तन के न्याय न चुकइहँय? हाँ, जउन दिन-रात उनीं पुकारत रहत हैं? का परमातिमा उनखे खातिर देरी करिहँय? नहीं। <sup>8</sup> हम तौहसे कहित हएन, परमातिमा हरबिन उनखर न्याय चुकइहँय। तऊ मनई के लड़िका जब अई, त का उआ धरती के मनइन माहीं बिसुआस पाई?"

### फरीसी अउर चुंगी लेंड बालेन के उदाहरन

<sup>9</sup> जउन अपने ऊपर इआ भरोसा रक्खत रहे हँय, कि हम धरमी हएन अउर दुसरे मनइन काहीं तुच्छ जानत रहे हँय, यीसु उनसे इआ उदाहरन कहिन: <sup>10</sup> "एक बेरकी दुइठे मनई मन्दिर माहीं प्राथना करँइ के खातिर गें; एकठे फरीसी, अउर दूसर चुंगी लेंड बाला रहा हय। <sup>11</sup> उआ फरीसी मनई ठाढ़ होइके अपने मन माहीं इआमेर प्राथना करँइ लाग, 'हे परमातिमा हम अपना के धन्यवाद करित हएन, कि हम दुसरे मनई कि नाई अन्धेर करँइ बाला, अन्यायी अउर ब्यभिचार करँइ बाला नहीं आहें, अउर इआ चुंगी लेंड बाले कि नाई घलाय नहीं आहें। <sup>12</sup> हम हप्ता माहीं दुइ बेरकी उपासे रहित हएन; अउर अपने सगले कमाई के दसमा भाग दान देइत हएन।'

<sup>13</sup> पय चुंगी लेंड बाला दूरिन ठाढ़ होइके, अपने काहीं पापी समझिके स्वरग कइती निहरऊँ नहीं चाहिस, पय खुब दुखी होइके कहिस, 'हे परमातिमा, हमरे जइसन पापी मनई के ऊपर दया कइके हमार पाप माफ करी!' <sup>14</sup> तब यीसु अपने चलन से कहिन, हम तौहसे कहित हएन, कि उआ फरीसी मनई नहीं, पय इआ चुंगी लेंड बाला परमातिमा के नजर माहीं धरमी ठहराबा जाइके अपने घरय ग; काहेकि जे कोऊ खुद काहीं बड़ा बनाई, उआ परमातिमा के व्दारा छोट कीन जई: अउर जे कोऊ खुद काहीं छोट बनाई, त उआ परमातिमा के व्दारा बड़ा कीन जई।"

### यीसु छोट-छोट लड़िकन काहीं आसिरबाद दिहिन

(मत्ती 19:13-15; मरकुस 10:13-16)

<sup>15</sup> पुनि खुब मनई अपने छोट-छोट लड़िकन काहीं यीसु के लघे लइ आमँइ लागें, कि यीसु उनखे ऊपर आपन हाँथ धइके आसिरबाद देंय; पय चेला लोग देखिके उनीं डौटँइ लागें। <sup>16</sup> यीसु छोट-छोट लड़िकन काहीं अपने लघे बोलाइके चलन से कहिन, "छोट-छोट लड़िकन काहीं हमरे लघे आमँइ द्या, अउर उनीं न बरजा: काहेकि जे कोऊ छोट-छोट लड़िकन कि नाई अपने काहीं नम्र बनइहँय, उँइन परमातिमा के स्वरगराज के भागीदार बनिहँय। <sup>17</sup> हम तौहसे सही कहित हएन, कि जे कोऊ परमातिमा के सँदेस के बात छोट क लड़िका कि नाई न अपनाई, त उआ परमातिमा के राज माहीं कबहूँ न जाए पाई।"

### अनन्त जीवन पामँइ के उपाय

(मत्ती 19:16-30; मरकुस 10:17-31)

<sup>18</sup> एक दिना कउनव मुखिया यीसु के लघे आइके उनसे पूँछिस, "हे उत्तम गुरू, अनन्त जीवन के हकदार होइ के खातिर हम का करी?" <sup>19</sup> यीसु ओसे कहिन, "तूँ हमहीं उत्तम काहे कहते हया? कोऊ उत्तम नहीं आय, केबल एकठे परमातिमय भर उत्तम हैं, अउर उनखे अलाबा कोऊ नहीं आय। <sup>20</sup> तूँ परमातिमा के हुकुमन काहीं त जनते हया: 'ब्यभिचार न करब, कतल न करब, अउर चोरी न करब, लबरी गबाही न देब, अउर अपने महतारी-बाप के मान-सम्मान करब।' <sup>21</sup> उआ कहिस, "हम त ई सगली बातन काहीं

लड़िकन से मानत आएन हय।" <sup>22</sup> इआ सुनिके यीसु ओसे कहिन, "तौहरे जीवन माहीं एकठे बात के कमी हय, जा, जऊँ कुछ तौहार धन-सम्पत्ती ही, ओही सब बँचिके गरीबन माहीं बाँटि द्या, अउर आइके हमरे पीछे चला, तब तौहई स्वरग माहीं एसे बढिके धन-सम्पत्ती मिली।" <sup>23</sup> इआ सुनिके उआ खुब उदास होइगा, काहेकि उआ खुब धनी रहा हय। अउर इआ करँइ के ओखर इच्छा नहीं रही। <sup>24</sup> तब यीसु ओसे कहिन, "धनी मनइन के परमातिमा के राज म प्रबेस करब केतना कठिन हय! <sup>25</sup> परमातिमा के राज माहीं धनी मनई के पहुँचब खुब कठिन हय, बलकिन सूजी के छेँद से ऊँट के निकर जाब, एसे सरल हय।" <sup>26</sup> तब सुनँय बाले कहिन, "त पुनि केही मुक्ती मिल सकत ही?" <sup>27</sup> यीसु कहिन, "जउन काम मनई से नहीं होइ सकय, उआ परमातिमा से होइ सकत हय, काहेकि परमातिमा सब कुछ कइ सकत हैं।" <sup>28</sup> तब पतरस यीसु से कहिन, "देखी, हम पंचे त आपन घर-दुआर छोड़िके अपना के पीछे चले आएन हय।" <sup>29</sup> यीसु उनसे कहिन, "हम तौहसे सही कहित हएन, कि जे कोऊ परमातिमा के राज के खातिर आपन घर-दुआर इआ मेहेरिआ, इआ भाई लोगन, इआ महतारी-बाप, इआ लड़िकन-बच्चन, काहीं छोड़ि दिहिस होय; <sup>30</sup> ओही इहय समय माहीं सब कुछ कइअक गुना मिली, अउर स्वरग माहीं अनन्त जीवन मिली।"

### अपने मउत के बारे माहीं यीसु के तीसर भबिस्सबानी

(मत्ती 20:17-19; मरकुस 10:32-34)

<sup>31</sup> पुनि यीसु अपने बरहँव चलन काहीं अपने साथ लइ जाइके उनसे कहिन, "देखा, हम यरूसलेम सहर काहीं जइत हएन, अउर जेतनी बातेंय मनई के लड़िका के बारे माहीं, परमातिमा के सँदेस बतामँइ बालेन के व्दारा लिखी गई हँय, ऊँ सगली पूर होइहँय। <sup>32</sup> काहेकि उआ गैरयहूदी लोगन के हाँथे माहीं सउँपा जई, अउर ऊँ पंचे ओखर मजाक उइइहँय; अउर ओखर अपमान करिहँय, अउर ओखे ऊपर थुँकिहँय, <sup>33</sup> अउर ओही चाबुक से मरिहँय, अउर ओही मारि डरिहँय; अउर उआ तिसरे दिन जिन्दा होइ जई।" <sup>34</sup> पय चेला लोग ई बातन म से कउनव बातन काहीं नहीं जाने पाइन, अउर ई बातेंय उनसे छिपी रहि गई, काहेकि जउन कुछू उनसे कहा ग तय, उआ उनखे समझ माहीं नहीं आबा।

### आँधर भिखारी काहीं नीक करब

(मत्ती 20:29-34; मरकुस 10:46-52)

<sup>35</sup> जब यीसु अपने चलन के साथ यरीहो गाँव माहीं पहुँचे, त उहाँ एकठे आँधर मनई भीख मागत सड़क के किनारे बइठ रहा हय। <sup>36</sup> उआ, भीड़ के चलँइ के आहत सुनिके पूँछइ लाग, "इआ का होइ रहा हय?" <sup>37</sup> भीड़ के मनई ओही बताइन, "नासरत गाँव के यीसु जाय रहे हँय।" <sup>38</sup> तब उआ आँधर मनई चिल्लाय-चिल्लाइके कहँइ लाग, "हे राजा दाऊद के सन्तान यीसु हमरे ऊपर दया करी!" <sup>39</sup> खुब जने जउन यीसु के आँगे-आँगे जात रहे हँय, ओही डौटिन, कि चुप्पय होइ जाय; पय उआ अउर चंडे चिल्लाँइ लाग, "हे राजा दाऊद के सन्तान यीसु, हमरे ऊपर दया करी!" <sup>40</sup> तब यीसु रुकिगें, अउर चलन काहीं हुकुम दिहिन, उआ आँधर मनई काहीं हमरे लघे लइ आबा, अउर जब उआ आँधर मनई लघे आइगा, तब यीसु ओसे पूँछिन, <sup>41</sup> "तूँ का चहते हया, कि हम तौहरे खातिर करी?" उआ आँधर मनई यीसु से कहिस, "हे प्रभू, हम इआ चाहित हएन, कि देखँइ लागी।" <sup>42</sup> यीसु उआ आँधर मनई से कहिन, "देखँइ लागी, तौहार बिसुआस तौहई नीक किहिस ही।" <sup>43</sup> अउर उआ आँधर मनई हरबिन देखँइ लाग, अउर परमातिमा के बड़ाई करत यीसु के पीछे-पीछे चलँइ लाग; अउर सगले मनई इआ सब देखिके परमातिमा के बड़ाई किहिन।

### जक्कई काहीं मुक्ती मिलब

**19** एक दिना यीसु यरीहो सहर होइके जात रहे हँय। <sup>2</sup> उहाँ जक्कई नाम के एकठे मनई रहा हय, जउन धनी अउर चुंगी लेंड बालेन के



मालिक रहा हय।<sup>3</sup> उआ यीसु काहीं देखँइ चाहत रहा हय, कि यीसु को आहीं? पय एतनी भीड़ रही हय, कि उआ देखे नहीं पाबत रहा, काहेकि उआ छोट डील के रहा हय।<sup>4</sup> तब यीसु काहीं देखँइ के खातिर उआ आँगे दउड़के एकठे ऊमर के बिरबा माहीं चढ़िगा, काहेकि यीसु उहय गली से होइके जाँइ बाले रहे हँय।<sup>5</sup> जब यीसु उआ जघा माहीं पहुँचे, त ऊपर कइती देखिके ओसे कहिन, “हे जक्कई हरबी उतरि आबा; काहेकि आज हमहीं तौहरे घर माहीं रहब जरूरी हय।”<sup>6</sup> उआ हरबिन उतरिके बड़े खुसी से यीसु काहीं अपने घरय लइगा।<sup>7</sup> इआ देखिके सगले मनई बरबराँय लागें, “ऊँ त पापी मनई के घर माहीं गे हँय।”

<sup>8</sup> जक्कई ठाढ़ होइके प्रभू से कहिस, “हे प्रभू, देखी, हम आपन आधी धन-सम्पत्ती कंगालन काहीं दए देइत हएन, अउर अगर हम कोहू से अन्याय कइके कुछ लइ लिहेन हय, त ओही चउगुना जादा लउटाए देइत हएन।”<sup>9</sup> तब यीसु ओसे कहिन, “आज इआ घर माहीं मुक्ती आई हय; काहेकि इआ मनई चुंगी लेंइ बाला आय, पय अपने कामन से इआ देखाय दिहिस ही, कि अब्राहम के बंस के लड़िका आय।<sup>10</sup> काहेकि मनई के लड़िका जे कोऊ पाप के कारन परमातिमा से दूर होइगे हें, उनहीं ढूँँइ अउर उनहीं मुक्ती देंइ आबा हय।”

### दसठे मोहरन के उदाहरन

(मत्ती 25:14-30)

<sup>11</sup> जब सगले जन ई बातन काहीं सुनत रहे हँय, तब यीसु एकठे उदाहरन बताइन, काहेकि ऊँ यरूसलेम सहर के लघे रहे हँय, एसे ऊँ सगले जन इआ समझत रहे हँय कि यीसु हरबी राजा बनिके अपने राज के सुरुआत करँइ बाले हें।<sup>12</sup> तब यीसु उनसे कहिन, “एकठे धनी मनई दूर देस जाँइ के तइआरी माहीं रहा हय, जउने उहाँ जाइके राज पद पाइके लउटि आबय।<sup>13</sup> उआ अपने दासन म से दस जनेन काहीं बोलाइके उनहीं दसठे सोने के मोहर दिहिस, अउर उनसे कहिस, ‘जब तक हम न लउटी त लेन-देन किहा।’<sup>14</sup> पय उआ सहर माहीं रहँइ बाले ओसे दुसमनी रक्खत रहे हँय, अउर ओखे जाँइ के बाद दूतन से सँदेस देबाइन कि, ‘हम पंचे नहीं चाही, कि तूँ हमरे ऊपर राज करा।’

<sup>15</sup> जब उआ धनी मनई राज पद पाइके अपने सहर माहीं लउटा, तब अइसन भ कि उआ अपने सेबकन काहीं जिनहीं सोने के मोहर दिहिस रहा हय, अपने लघे बोलाइस, जउने मालुम करय कि ऊँ पंचे लेन-देन कइके केतना कमान हें।<sup>16</sup> तब पहिल बाला आइके कहिस, ‘हे मालिक अपना के सोने के मोहरन म से दसठे मोहर अउर कमाने हएन।’<sup>17</sup> तब उआ ओसे कहिस, ‘हे धन्य, अउर उत्तम दास तूँ थोरे माहीं बिसुआस के काबिल ठहरे हया, एसे तूँ अब दसठे सहरन माहीं अधिकार रखा।’<sup>18</sup> दूसर दास आइके कहिस, ‘हे मालिक अपना के सोने के मोहर से पाँचठे मोहर अउर कमाने हएन।’<sup>19</sup> उआ धनी मनई ओहू से कहिस, ‘तुहूँ पाँचठे सहरन माहीं सासन करा।’<sup>20</sup> तीसर दास आइके कहिस, ‘हे मालिक, देखी, इआ अपना के उहय सोने के मोहर आय, जउने काहीं हम अँगउछी माहीं बाँधिके धर दिहेन तय।<sup>21</sup> काहेकि हम अपना से डेरात रहेन हय, कि अपना खुब कठोर मनई हएन: जउन अपना के न होय ओहू काहीं जबरई लइ लेइत हएन, अउर जहाँ अपना नहीं बोई, उहँव दुसरेव के जमीन के फसल जबरई काटि लेइत हएन।’<sup>22</sup> मालिक ओसे कहिस, ‘हे दुस्त दास, हम तोरेन मुँह के बात से तोही दोसी ठहराइत हएन। जब तोही मालुम रहा हय, कि हम कठोर मनई हएन, अउर हम जउन नहीं धरेन, ओहू काहीं उठाय लेइत हएन, अउर जऊँ हम नहीं बोयन, ओहू काहीं काटि लेइत हएन;’<sup>23</sup> त तँय हमार मोहर सोन-चाँदी के बड़पार करँइ बालेन के लघे काहे नहीं रख दिहे, कि हम आइके ओसे ब्याज समेत लइ लेइत?’<sup>24</sup> अउर जउन मनई लघे ठाढ़ रहे हँय, मालिक उनसे कहिस, ‘उआ सोने के मोहर ओसे लइके, जेखे लघे दसठे मोहर हई, ओही दइ द्या।’<sup>25</sup> ऊँ पंचे मालिक से कहिन, ‘हे मालिक, ओखे लघे त दसठे सोने के मोहरँय हई।’<sup>26</sup> तब मालिक उनसे कहिस, ‘हम तौहसे कहित हएन, कि जेही जउन दीन ग हय, अगर उआ ओही निकहा से

उपयोग करत हय, त ओही अउर दीन जई, अउर ओखे लघे खुब होइ जई। पय जे कोऊ ओही जउन दीन ग हय, अगर ओखर निकहा से उपयोग नहीं करय, त ओसे उहव लइ लीन जई, जउन ओही दीन ग रहा हय।<sup>27</sup> पय हमरे ऊँ बड़रिन काहीं जउन नहीं चाहत रहें, कि हम उनखे ऊपर राज करी, उनहीं लइ आइके हमरे आँगे मारि डारा।”

### यीसु राजा कि नाई यरूसलेम माहीं प्रबेस किहिन

(मत्ती 21:1-11; मरकुस 11:1-11; यूहन्ना 12:12-19)

<sup>28</sup> तब यीसु ई बातन काहीं कहिके चलन के आँगे-आँगे यरूसलेम सहर कइती चल दिहिन।<sup>29</sup> जब यीसु जैतून नाम के पहार के ऊपर बैतफगे अउर बैतनिय्याह गाँव के लघे पहुँचे, तब ऊँ अपने चलन म से दुइ जनेन काहीं इआ कहिके पठइन,<sup>30</sup> “उआ सउहें बाले गाँव माहीं जा; अउर उहाँ पहुँचतय एकठे गदही के बच्चा जउने माहीं कोऊ कबहूँ नहीं चढ़िस, तौहई पंचन काहीं बाँधा मिली, ओही छोरिके ले आबा।<sup>31</sup> अगर तौहसे कोऊ पूँछय, कि ओही काहे छोरते हया, त इआ कहि दिहा, कि प्रभू काहीं एखर जरूरत ही।”

<sup>32</sup> जउन चेला पठए गे रहे हँय, ऊँ पंचे जाइके जइसन यीसु उनसे कहिन तय, उहयमेर पाइन,<sup>33</sup> अउर जब ऊँ पंचे गदही के बच्चा काहीं छोरँइ लागें, तबहिनय ओखर मालिक आइगें, अउर उनसे पूँछँइ लागें, “उआ बच्चा काहीं काहे छोरते हया?”<sup>34</sup> तब चेला लोग कहिन, “प्रभू काहीं एखर जरूरत ही।”<sup>35</sup> तब गदही के बच्चा के मालिक उनहीं लइ जाँय दिहिन, अउर ऊँ पंचे उआ गदही के बच्चा काहीं यीसु के लघे लइ आएँ, अउर आपन ओन्हा उआ गदही के बच्चा के ऊपर डारिके, यीसु काहीं ओखे ऊपर बइठाय दिहिन।<sup>36</sup> जब यीसु जात रहे हँय, तब उनखर सम्मान करँइ के खातिर, कुछ जने आपन-आपन ओन्हा गली माहीं बिछाबत जात रहे हँय।

<sup>37</sup> जैतून पहार के लघे आइके जब यीसु अपने चलन के साथ पहार के उतारा माहीं पहुँचे, तब चलन के सगली मंडली ऊँ सगले सामर्थ के कामन काहीं सुध कइके जिनहीं ऊँ पंचे देखिन रहा हय, आनन्दित होइके खुब चंडे से परमातिमा के स्तुति करँइ लागें।

<sup>38</sup> “धन्य हय उआ राजा, जउन प्रभू के नाम से आबत हय! स्वरग माहीं सान्ती होय, अउर अकास मन्डल माहीं परमातिमा काहीं खुब मान-सम्मान मिलय।”

<sup>39</sup> तब भीड़ म से कुछ फरीसी लोग यीसु से कहँइ लागें, “हे गुरू, अपने चलन काहीं डाँटी।” काहेकि इनहीं इआमेर न कहँइ चाही।<sup>40</sup> तब यीसु उनहीं जबाब दिहिन, “हम तौहसे कहित हएन कि, अगर ऊँ पंचे चुपव रइहँय, त ई पथरव हमार स्तुति करँइ के खातिर चिल्लाय उठिहँय।”

### यरूसलेम सहर के खातिर बिलाप

<sup>41</sup> जब यीसु यरूसलेम सहर के लघे पहुँचे, तब सहर के मनइन काहीं देखिके रोइन<sup>42</sup> अउर कहिन, “केतना निकहा होत कि तूँ पंचे हौँ, तुहिन पंचे आजय, जउन बातँइ सान्ती के साथ जीवन बितामँइ के खातिर जरूरी हई, उनहीं सुन लेत्या, पय अब उँइ तौहसे लुकाय दीन गई हँय।<sup>43</sup> काहेकि, ‘हे यरूसलेम सहर के मनइव तौहरे ऊपर अइसन दिन अइहँय, कि तौहार दुसमन चारिव कइती से यरूसलेम सहर काहीं घेर लेइहँय, अउर चारिव कइती से तौहई दबइहँय अउर परेसान करिहँय;’<sup>44</sup> अउर तौहई अउर तौहरे लड़िकन-बच्चन काहीं जउन इहाँ हँय, नास कइ देइहँय, अउर तौहरे सहर के भीतर ऊँ पंचे एकठेरिव पथरा काहीं एक दुसरे के ऊपर न रहँय देइहँय; काहेकि जब परमातिमा तौहरे लघे आएँ तय, तब तूँ पंचे उआ घरी काहीं नहीं पहिचान्या।”

### मन्दिर से बड़पारिन काहीं भगाउब

(मत्ती 21:12-17; मरकुस 11:15-19; यूहन्ना 2:12-22)

45 तब यीसु मन्दिर माहीं जाइके, जउन उहाँ मन्दिर माहीं बलिदान चढ़ामँड के खातिर मबेसी अउर दूसर चीजन काहीं बँचत रहे हँय, उनहीं बहिरे निकारँड लागे, 46 अउर यीसु उनसे कहिन, “पबित्र सास्त्र माहीं लिखा हय, कि ‘हमार घर प्राथना करँड के घर होई’, पय तूँ पंचे ओही डँकुअन के अड्डा बनाय दिहा हय।”

47 यीसु रोज मन्दिर माहीं उपदेस देत रहे हँय, अउर प्रधान याजक लोग, अउर मूसा के बिधान सिखामँड बाले, अउर यहूदी लोगन के मुखिया, उनहीं मारि डारँड के खातिर मोका ढूँढत रहे हँय। 48 पय उँ पंचे कउनव उपाय नहीं निकारे पाइन, कि यीसु काहीं कउनमेर से मार डारी, काहेकि उहाँ सगले जने यीसु के बातन काहीं खुब चाहत से सुनत रहे हँय।

### यीसु के अधिकार के ऊपर प्रस्न

(मत्ती 21:23-27; मरकुस 11:27-33)

20 एक दिन अइसन भ, कि जब यीसु मन्दिर माहीं मनइन काहीं उपदेस देत रहे हँय, अउर परमातिमा के खुसी के खबर सुनाबत रहे हँय, तबहिनय प्रधान याजक लोग, अउर मूसा के बिधान सिखामँड बाले यहूदी धारमिक अँगुअन काहीं साथ माहीं लइके यीसु के लघे ठाढ़ भे; 2 अउर कहँड लागे, “हमहीं बताबा कि, ई कामन काहीं तूँ कउने अधिकार से करते हया, अउर उआ को आय, जउन तौहई इआ अधिकार दिहिस ही?” 3 यीसु उनहीं जबाब दिहिन, “हमहूँ तौहसे एकठे बात पूँछित हएन, हमहीं बताबा, 4 यूहन्ना काहीं बपतिस्मा देई के अधिकार परमातिमा से मिला तय, कि मनई उनहीं दिहिन तय? हमहीं बताबा।” 5 तब उँ पूँछँड बाले आपस माहीं बताँड लागे, कि “अगर हम पंचे कहित हएन कि, ‘परमातिमा से मिला तय’ त उँ कइहँय कि, ‘पुनि तूँ पंचे उनखर बिसुआस काहे नहीं किहा?’ 6 अउर अगर हम पंचे कहित हएन कि, ‘मनइन से मिला तय’ त उहाँ ठाढ़ सगले मनई हमहीं पंचन काहीं पथरा मार-मारके मारि डरिहँय, एहिन से डेरातव रहे हँय, काहेकि सगले मनई जानत रहे हँय, कि इआ बात बेलकुल सही आय, यूहन्ना परमातिमा के सँदेस बतामँड बाले रहे हँय।” 7 एसे उँ पंचे जबाब दिहिन, “हम पंचे नहीं जानी, कि उआ अधिकार उनहीं केखे तरफ से मिला तय।” 8 तब यीसु उनसे कहिन, “हमहूँ तौहई नहीं बताई, कि ई काम हम कउने अधिकार से करित हएन।”

### दुस्त किसान के उदाहरन

(मत्ती 21:33-46; मरकुस 12:1-12)

9 तब यीसु उहाँ ठाढ़ मनइन काहीं इआ उदाहरन बतामँड लागे, “कउनव मनई अंगूर के बगिया लगाइस, अउर कुछ किसानन काहीं उआ बगिया के ठेका दइके, खुब दिनन के खातिर परदेस चला ग। 10 अउर जब अंगूर के फरँड के समय आबा, तब उआ मनई किसानन के लघे अपने एकठे दास काहीं पठइस, कि उँ पंचे अंगूर के बगिया से ओखे हिस्सा के अंगूर देंय, पय उँ किसान, उआ दास काहीं मारिन-पीटिन अउर छूँछय हाँथ लउटाय दिहिन। 11 पुनि उआ मनई एकठे अउर दास काहीं किसानन के लघे पठइस; पय उँ किसान ओहू काहीं मारिन-पीटिन अउर अपमान कइके छूँछय हाँथ लउटाय दिहिन। 12 पुनि उआ मनई तिसरे दास काहीं किसानन के लघे पठइस, पय उँ किसान ओहू काहीं घायल कइके बगिया से निकार दिहिन। 13 तब अंगूर के बगिया के मालिक कहिस, ‘हम का करी?’ अब हम अपने पियार लड़िका काहीं पठउब, साइड उँ किसान ओखर मान-सम्मान करँय, अउर बगिया के कुछ फर देंय। 14 जब उँ किसान ओखे लड़िका काहीं आबत देखिन, त आपस माहीं कहँड लागे, ‘इहय त इआ बगिया के बारिसदार आय; आबा हम पंचे मिलिके एही मारि डारी’, जउने एखर अधिकार हमहीं पंचन काहीं मिल जाय। 15 अउर उँ पंचे उआ लड़िका काहीं

पकड़िके अंगूर के बगिया के बहिरे लइ जाइके मारि डारिन। एसे उआ अंगूर के बगिया के मालिक आइके का करी, तूँ पंचे जनते हया? 16 उआ बगिया के मालिक आइके किसानन काहीं जान से मारि डारी, अउर अपने बगिया के ठेका दुसरे किसानन काहीं दइ देई।” तब उहाँ ठाढ़ मनई कहँड लागे “अइसा कबहूँ न होय।” 17 यीसु उनखे कइती देखिके कहिन, “काहे तूँ सगले जन पबित्र सास्त्र माहीं लिखी, इआ बात के मतलब नहीं जनते आह्या?

‘जउने पथरा काहीं राजा के कारीगर इआ कहिके, छोंडि दिहिन तय, कि इआ कउनव काम के नहीं आय, उहय कोनमा के खास पथरा होइगा’।

18 जे कोऊ इआ पथरा माहीं गिरी, उआ चकनाचूर होइ जई, अउर जेखे ऊपर उआ पथरा गिरी, ओही पीस डारी।”

### यीसु के बातन माहीं गलती पकड़ँड के कोसिस

(मत्ती 22:15-22; मरकुस 12:13-17)

19 उहय समय मूसा के बिधान सिखामँड बाले, अउर प्रधान याजक लोग यीसु काहीं पकड़ँड चाहिन, काहेकि उँ पंचे समझिगे रहे हँय, कि यीसु इआ उदाहरन हमरेन खातिर कहिन हीं, पय उँ पंचे उहाँ ठाढ़ सगले मनइन से डेराइगे। 20 अउर उँ पंचे यीसु के ताक माहीं लगिगे, अउर भेद लेंड बालेन काहीं पठइन, कि उँ धरमिन कि नाई भेस बनाइके, यीसु के बातन माहीं गलती पकड़ँड, जउने उनहीं राजपाल के हाँथे माहीं अउर अधिकार माहीं सउँपि देंय। 21 उँ पंचे यीसु से पूँछिन, “हे गुरू, हम पंचे जानित हएन, कि अपना ठीक कहित हएन, अउर परमातिमा के गइल सच्चाई से बताइत हएन, अउर कोहू के साथ पच्छपात नहीं करी, काहेकि अपना मनइन के मुँह देखिके बातँय नहीं करी। 22 उँ पंचे यीसु से कहिन, अपना हमहीं बताई, कि महाराजा कैसर काहीं कर देब उचित हय, कि नहीं?” 23 यीसु उनखे चलाँकी काहीं जानिके उनसे कहिन, 24 “रोमी राज के एकठे सिक्का हमहीं देखाबा। अउर बताबा इआ सिक्का माहीं केखर चित्र अउर नाम हय?” उँ पंचे कहिन, “महाराजा कैसर के।” 25 तब यीसु उनसे कहिन, “जऊँ महाराजा कैसर के आय, ओही महाराजा कैसर काहीं द्या, अउर जउन परमातिमा के आय, ओही परमातिमा काहीं द्या।” 26 उँ पंचे मनइन के आँगे इआ बात माहीं कउनव गलती नहीं पकड़े पाइन, तब उँ सगले जने यीसु के जबाब सुनिके, खुब अचरज मानिन अउर चुपप्य रहिगे।

### दुसराय जिए के बाद काज-बिआह

(मत्ती 22:23-33; मरकुस 12:18-27)

27 पुनि सदूकी दल बाले लोग, जऊँ कहत रहे हँय, कि मरे के बाद दुबारा जिन्दा होब, होतय नहीं आय, उनमा से कुछ जने यीसु के लघे आइके उनसे पूँछँड लागे, 28 “हे गुरू, मूसा नबी हमरे खातिर पबित्र सास्त्र माहीं इआ लिखिन हीं, कि ‘अगर कोहू के भाई अपने मेहेरिआ के बिना सन्तान पइदा किहे मर जाय, अउर ओखर मेहेरिआ जिन्दा रहि जाय, त ओखर भाई ओसे काज कइके अपने भाई के खातिर बंस पइदा करय।’ 29 एकठे घर म सात भाई रहे हँय। पहिल भाई काज कइके बिना सन्तान पइदा किहे मरिगा। 30 तब दूसर नम्बर के भाई उआ मेहेरिआ से काज कइ लिहिस, अउर उहव बिना सन्तान पइदा किहे मरिगा। 31 अउर इहइमेर से तिसरव नम्बर के भाई किहिस। अउर इहइमेर से सातव भाई काज कइके बिना सन्तान पइदा किहे मरिगे। 32 अउर सगलेन के बाद उआ मेहेरिअव मरिगे। 33 त अपना बताई, जब उँ पंचे मरेन म से पुनि जिन्दा होइहँय, त उआ मेहेरिआ, केखर मेहेरिआ कहाई? काहेकि उआ सातँव जनेन के मेहेरिआ होइ चुकी तय।” 34 तब यीसु उनसे कहिन, “इआ समय के मनइन माहीं त काज-बिआह होत हय, 35 पय आमँड बाले नबा जुग माहीं जाँड के खातिर, अउर मरेन म से पुनि जिन्दा होइ के खातिर, जेतने जन परमातिमा के नजर माहीं काबिल ठहरिहँय, उन माहीं काज-बिआह न होई। 36 अउर उँ पंचे पुनि कबहूँ मरबन न करिहँय; काहेकि उँ पंचे स्वरगदूतन कि नाई होइ जइहँय, अउर मरेन म से पुनि जिन्दा होए से, परमातिमा के सन्तान घलाय बन जइहँय। 37 पय इआ बात

काहीं बतामँड के खातिर कि मनई मरि के दुसराय जिन्दा होइ जात हैं, मूसा नबी, झाड़ी के किस्सा माहीं जाहिर किहिन हीं, अउर प्रभू काहीं 'अब्राहम के परमातिमा, अउर इसहाक के परमातिमा, अउर याकूब के परमातिमा कहिन हीं।<sup>138</sup> ऊँ मरे मनइन के नहीं, बलकिन जिन्दा मनइन के परमातिमा आहीं: काहेकि परमातिमा के चुने सगले जन उनखे लघे जिन्दा हैं।"<sup>39</sup> तब इआ बात काहीं सुनिके, मूसा के बिधान सिखामँड बालेन म से कुछ जने कहिन, "हे गुरू, अपना ठीक कहेन हय।"<sup>40</sup> अउर पुनि दुबारा यीसु से कुछ पूँछँड के उनखर हिम्मत नहीं परी।

### मसीह के खर लड़िका आहीं?

(मत्ती 22:41-46; मरकुस 12:35-37)

41 यीसु पुनि उनसे पूँछिन, "मसीह काहीं राजा दाऊद के सन्तान काहे कहत है?

42 दाऊद खुदय भजन संहिता के किताब माहीं कहत हैं कि:

'प्रभू हमरे प्रभू से कहिन।<sup>43</sup> हमरे दहिने कइती बइठा, जब तक कि हम तौहरे दुसमनन काहीं तौहरे बस माहीं न कइ देई।'

44 राजा दाऊद त खुदय उन्हीं प्रभू कहत हैं, त मसीह उनखर सन्तानव आहीं, अउर प्रभुअव आहीं?"

### मूसा के बिधान सिखामँड बालेन से सतरक रहा

(मत्ती 23:1-36; मरकुस 12:38-40)

45 जब सगले जन सुनत रहे हँय, तब यीसु अपने चेलन से कहिन,  
46 "मूसा के बिधान सिखामँड बालेन से सतरक रहा, उन्हीं लम्बे-लम्बे कुरथा पहिरे घूमब नीक लागत हय, अउर बजारन माहीं नबस्कार करबाउब, अउर सभाघरन माहीं खास-खास जघा माहीं बइठब, अउर जेउनारन माहीं खास-खास जघा माहीं बइठब नीक लागत हय।<sup>47</sup> अउर ऊँ पंचे बिधबन के घरन काहीं लूट लेत हैं, अउर खुद काहीं धरमी देखामँड के खातिर, खुब देर तक प्राथना करत हैं। ई पंचे सगलेन से जादा सजा पइहँय।"

### कंगाल बिधबा के दान

(मरकुस 12:41-44)

21 यीसु ध्यान से देखिन, कि धनमान मनई दान पेटी माहीं आपन-आपन दान, डार रहे हँय।<sup>2</sup> तब ऊँ एकठे गरीब बिधबा काहीं घलाय दान पेटी माहीं दुइठे सिक्का दान डारत देखिन।<sup>3</sup> तब यीसु अपने सगले चेलन से कहिन, "हम तौहसे सही कहित हएन, कि मन्दिर के दान पेटी म दान डारँड बालेन माहीं, इआ गरीब बिधबा सगलेन से जादा दान डारिस ही।<sup>4</sup> काहेकि सगले जन अपने धन के बढ़ती से कुछ लइके डारिन हीं, पय इआ गरीब बिधबा अपने गरीबी माहीं, जऊँ कुछ ओखे लघे रहा, मतलब जऊँ ओखे खाँड जिअँड काहीं रहा हय, आपन सगला धन दान पेटी माहीं डार दिहिस ही।"

### मन्दिर के बिनास के भबिस्सबानी

(मत्ती 24:1,2; मरकुस 13:1,2)

<sup>5</sup> जब कइयक जने मन्दिर के बारे माहीं कहत रहे हँय, कि इआ मन्दिर केतने सुन्दर पथरन से, अउर भँट के चीजन से सजाबा ग हय, तब यीसु कहिन,<sup>6</sup> "इआ सुन्दर मन्दिर जउने काहीं तूँ पंचे देखते हया, एक दिन अइसन होई, कि एक्कव पथरा एक दुसरे के ऊपर न देखइहँय, ई सगले गिराय दीन जइहँय।"

### संकट अउर दुख

(मत्ती 24:3-14; मरकुस 13:3-13)

<sup>7</sup> ऊँ पंचे यीसु से पूँछिन, "हे गुरू, ई सगली बातँय कबय होइहँय? अउर जब ई बातँय होइ हँय, उआ समय काहीं हम पंचे कइसन जाने पाउब, कउनव चिन्हारी बताई?"<sup>8</sup> यीसु कहिन, "सतरक रहा, कि तौहई कोऊ बिसुआस से भटकाए न पाबय, काहेकि खुब जने हमरे नाम से आइके कइहँय, 'कि हम मसीह आहने' अउर इहव कइहँय, कि 'संसार के अन्त के समय लघे आइगा हय।' तूँ पंचे उनखे बातन के बिसुआस न किहा।<sup>9</sup> अउर तूँ पंचे जब युद्ध होत देख्या, अउर युद्धन के चरचा सुन्या, त घबराय न जया, काहेकि इनखर पहिले होब जरूरी हय, पय उआ समय संसार के अन्त न होई।"

<sup>10</sup> तब यीसु उनसे कहिन, "एक जाति के मनई, दुसरे जाति के मनइन के ऊपर चढ़ाई करिहँय, अउर एक देस, दुसरे देस के ऊपर चढ़ाई करी,<sup>11</sup> अउर बड़े-बड़े भुँइडोल होइहँय, अउर हरेक जघन माहीं अकाल परिहँय, अउर महामारी फइलिहँय, अउर अकास माहीं भयानक बातँय अउर बड़ी-बड़ी अदभुत चिन्हारी देखाई देइहँय।<sup>12</sup> पय ई सगली बातँय होइ से पहिले, ऊँ पंचे तौहई हमार चेला होइ के कारन पकड़िहँय, अउर मरिहँय, अउर सभाघरन माहीं सउँपिहँय, अउर जेल माहीं बँडबाय देइहँय, अउर राजा लोगन अउर अधिकारिन के लघे लइ जइहँय।<sup>13</sup> पय उआ समय हमरे बारे माहीं उन्हीं बतामँड क निकहा मोका रही।<sup>14</sup> एसे अपने-अपने मन माहीं ठान लिहा, कि हम पंचे पहिलेन से जबाब देंड के खातिर चिन्ता न करब।<sup>15</sup> काहेकि हम तौहई अइसन बोल अउर बुद्धी देब, कि तौहार सगले बिरोधी तौहार सामना न कए पइहँय, अउर तौहरे बातन काहीं लबरी न ठहराए पइहँय।<sup>16</sup> तौहार महतारी-बाप, अउर भाई, अउर परिवार के मनई, अउर साथी घलाय तौहई पकड़बइहँय; इहाँ तक कि तौहरे पंचन म से कुछ जनेन काहीं मरबाऊ डरिहँय।<sup>17</sup> अउर हमरे ऊपर बिसुआस करँड के कारन सगले मनई तौहसे दुसमनी रखिहँय।<sup>18</sup> पय तौहरे यूँडे के एक्कवठे बारव तक गिरँय न पाई।<sup>19</sup> अउर अपने सहनसीलता के कारन तूँ पंचे अपने प्रानन काहीं बचाए रइहा।"

### यरूसलेम सहर के नास होइ के बारे माहीं भबिस्सबानी

(मत्ती 24:15-21; मरकुस 13:14-19)

<sup>20</sup> यीसु पुनि कहिन, "जब यरूसलेम सहर काहीं सेना से घिरा देख्या, त इआ जान लिहा, कि ओखे बिनास होइ के समय आइगा हय।<sup>21</sup> तब उआ समय जे कोऊ यहूदिया प्रदेस माहीं होंय, त ऊँ पंचे पहारन माहीं भाग जाँय; अउर जे कोऊ यरूसलेम सहर के भीतर होंय, त ऊँ पंचे सहर से बाहर भाग जाँय; अउर जे कोऊ गाँमन माहीं होंय, ऊँ पंचे सहर के भीतर न जाँय।<sup>22</sup> काहेकि बदला लेंड के ऊँ दिनन माहीं अइसय होई, काहेकि पबित्र सास्त्र माहीं लिखी सगली बातँय पूर कीन जइहँय।<sup>23</sup> अउर ऊँ दिनन माहीं जउन मेहेरिआ लइकहाई होइहँय, अउर जे कोऊ अपने लड़िकन काहीं दूध पिआबत होइहँय, त उन्हीं पंचन काहीं खुब कस्ट होई। काहेकि यरूसलेम सहर के मनइन के ऊपर परमातिमा के भारी क्रोध होई।<sup>24</sup> ऊँ सगले जन तलबार से मारे जइहँय, अउर उनमा से जऊँ बच जइहँय त उन्हीं दुसरे देस के मनई बन्दी बनाइके लइ जइहँय, अउर जब तक गैरयहूदी लोगन के समय पूर न होइ जई, तब तक यरूसलेम सहर गैरयहूदी लोगन के व्दारा रउँदा जई।"

### मनई के लड़िका के दुसराय आउब

(मत्ती 24:29-31; मरकुस 13:24-27)

<sup>25</sup> यीसु इहव कहिन "सुरिज, जौंधइआ, अउर तरइअन माहीं अदभुत चिन्ह देखाई देइहँय; अउर धरती म रहँड बाले सगले जाति के मनइन काहीं कस्ट अउर मुसीबत होई, काहेकि समुद्र माहीं बाढ़ आमँड से, अउर ओखे

लहरन के अबाज से सगले मनई घबराय जइहँय।<sup>26</sup> मारे डेरन के, अउर संसार माहीं आमँइ बाली घटनन काहीं देखत-देखत मनइन के जिव म जिव न रहि जई, काहेकि अकास के सगली चीजँय हलाई जइहँय।<sup>27</sup> तब सगले जन मनई के लड़िका काहीं सामर्थ अउर बड़ी महिमा के साथ बदरिन माहीं आबत देखिहँय।<sup>28</sup> जब ई बातँय होइ लागँय, तब सऊँ ठाढ़ होइके मूँइ ऊपर काहीं उठाइके देखा; काहेकि तौहरे छुटकारा के समय लघे होई।”

### अंजीर के बिरबा के उदाहरन

(मत्ती 24:32-35; मरकुस 13:28-31)

<sup>29</sup> यीसु अपने चलन से एकठे उदाहरन कहिन: “अंजीर के बिरबा अउर दुसरे बिरबन काहीं देखा।<sup>30</sup> जइसय उनमा नबा पत्ता निकरँइ लागत हँ, तबहिनय तूँ पंचे अपनेन से जान लेते हया, कि गरमी के रित हरबिन आमँइ बाली हय।<sup>31</sup> इहइमेर से जब तूँ पंचे ई सगली बातन काहीं होत देखा, त जान लिहा, कि परमातिमा हमरे ऊपर राज करँइ के खातिर हरबिन आमँइ बाले हँ।<sup>32</sup> हम तौहसे सही कहित हएन, कि जब तक ई सगली बातँय पूर न होइ जइहँय, तब तक इआ समय के मनइन के अन्त बेलकुल न होई।<sup>33</sup> धरती अउर अकास टर जइहँय, पय हमार कही बातँय कबहूँ न टरिहँय।”

### सतरक रहा

(मत्ती 26:36-44; मरकुस 13:32-37)

<sup>34</sup> यीसु उनसे कहिन, “एसे तूँ पंचे सतरक रहा, अइसन न होय कि तौहार मन घमन्ड, अउर मतबार, अउर इआ जीवन के चिन्ता माहीं परिके सुस्त होइ जाय, अउर उआ दिन तौहरे ऊपर फन्दा कि नाई अचानक आय परय।<sup>35</sup> काहेकि परमातिमा के राजा बनिके आमँइ बाला दिन, सगले धरती माहीं रहँइ बालेन के ऊपर इहइमेर से अचानक अई।<sup>36</sup> एसे तूँ पंचे हर समय परमातिमा के बचन माहीं बने रहा, अउर प्राथना करत रहा, कि तूँ पंचे ई आमँइ बाली घटनन से बचि जा, बलकिन जब मनई के लड़िका दुबारा अइहँय, तब तूँ पंचे उनखे आँगे ठाढ़ होइ के काबिल बने रहा।”  
<sup>37</sup> यीसु दिन माहीं यहूदी मन्दिर माहीं जाइके उपदेस देत रहे हँय, अउर रात माहीं सगलेन से अलग जाइके जैतून नाम के पहार माहीं रहत रहे हँय;  
<sup>38</sup> अउर भिनसरहय यीसु मन्दिर माहीं आय जात रहे हँय, तब खुब मनई उनखे बातन काहीं सुनँय के खातिर मन्दिर के अँगना माहीं उनखे लघे आबत रहे हँय।

### यीसु के बिरोध माहीं सइयन्त्र

(मत्ती 26:1-5; मरकुस 14:1,2; यूहन्ना 11:45-53)

**22** बिना खमीर के रोटी खाँइ बाला तेउहार, जउन फसह कहाबत रहा हय, आमँइ बाला रहा हय; <sup>2</sup> अउर प्रधान याजक लोग अउर मूसा के बिधान सिखामँइ बाले, इआ बात के मोका माहीं रहे हँय, कि यीसु काहीं कउनवमेर से मारि डारी, पय ऊँ पंचे तेउहार माहीं आए मनइन से डेरात रहे हँय।

### यहूदा इस्करियोती के बिसुआस घात

(मत्ती 26:14-16; मरकुस 14:10,11)

<sup>3</sup> तब सइतान यहूदा इस्करियोती काहीं अपने काबू माहीं कइ लिहिस, जउन बारा चलन माहीं गिना जात रहा हय। <sup>4</sup> उआ जाइके प्रधान याजकन अउर पहरा देइ बाले सिपाहिन के मुखिन से बात किहिस, कि यीसु काहीं कउनमेर से उनखे हाँथ माहीं पकड़बाई। <sup>5</sup> ऊँ पंचे खुब खुसी भँ, अउर ओही रुपिआ देइ के करार कइ लिहिन। <sup>6</sup> यहूदा इस्करियोती राजी होइगा, अउर इआ मोका ढूँढ़इ लाग, कि जब भीड़ न होई, तब यीसु काहीं उनखे हाँथ माहीं पकड़बाय देय।

### चेलन के साथ फसह के अन्तिम भोज

(मत्ती 26:17-25; मरकुस 14:12-21; यूहन्ना 13:21-30)

<sup>7</sup> तब बिना खमीर के रोटी खाँय के तेउहार आबा, जउने माहीं बोकरी के बच्चा के बली चढ़ाउब जरूरी रहत रहा हय। <sup>8</sup> तब यीसु पतरस अउर यूहन्ना काहीं इआ कहिके पठइन: “तूँ पंचे जाइके हमरे खाँय के खातिर फसह के खाना तइआर किहा।” <sup>9</sup> ऊँ दोनव जने यीसु से पूँछिन, “अपना कहाँ चाहित हएन, कि हम पंचे जाइके खाना तइआर करी?” <sup>10</sup> यीसु उनसे कहिन, “देखा, जइसय सहर माहीं पहुँचिहा, त तौहई एकठे मनई मूँडे माहीं गधरा लए मिली; उआ जउने घर माहीं जाय; त तूँ पंचे ओखे पीछे-पीछे चले जया, <sup>11</sup> अउर उआ घर के मालिक से कह्या: ‘गुरू तौहसे पूँछिन हीं, कि उआ अँटरिया कहाँ हीं, जउने माहीं हम अपने चलन के साथ तेउहार के खाना खई?’ <sup>12</sup> उआ घर के मालिक तौहई एकठे सजी-सजाई बड़ी काहीं अँटारी देखाय देई; उहँइ खाना तइआर किहा। <sup>13</sup> अउर चेला लोग जाइके, जइसा यीसु कहिन तय, उहयमेर पाइन अउर फसह के खाना तइआर किहिन।

### प्रभू-भोज

(मत्ती 26:26-30; मरकुस 14:22-26; 1 कुरिन्थियन 11:23-25)

<sup>14</sup> जब खाना खाँइके के जूना होइगे, तब यीसु बरहँव खास चलन के साथ खाना खाँय बइठें। <sup>15</sup> अउर यीसु उनसे कहिन, ‘हमार बड़ी इच्छा रही हय, कि दुख सहँइ से पहिले, इआ फसह के तेउहार के खाना तौहरे साथ खई।’ <sup>16</sup> काहेकि हम तौहसे कहित हएन, कि जब तक परमातिमा के राज माहीं इआ फसह के तेउहार के उदेस्य पूर न होई, तब तक हम इआमेर खाना कबहूँ न खाब। <sup>17</sup> तब यीसु अंगूर के रस से भरा खोरबा लइके परमातिमा काहीं धन्यवाद दिहिन, अउर चलन से कहिन, ‘एही ल्या, अउर आपस माहीं बाँटिके पि ल्या।’ <sup>18</sup> काहेकि हम तौहसे कहित हएन, कि जब तक परमातिमा के राज दुसराय न आय जई, तब तक हम अंगूर के रस अब से कबहूँ न पिअब। <sup>19</sup> ओखे बाद यीसु एकठे रोटी लिहिन, अउर परमातिमा काहीं धन्यवाद दइके टोरिन, अउर चलन काहीं इआ कहिके दिहिन, ‘इआ हमार देह आय, जउन तौहरे खातिर दीन जात हीं: हमरे यादगारी माहीं इहइमेर करत रह्या।’ <sup>20</sup> इहइमेर से यीसु खाना खाए के बाद, अंगूर के रस से भरा खोरबा लइके, इआ कहिके चलन काहीं दिहिन, ‘इआ हमार खून आय जउन तौहरे खातिर बहाबा जात हय, इआ खून परमातिमा के नई करार के प्रतीक आय।’ <sup>21</sup> पय देखा, हमहीं बिरोधिन के हाँथ माहीं पकड़ामँइ बाला हमरे साथय माहीं खाना खाँइ बइठ हय। <sup>22</sup> काहेकि मनई के लड़िका त जइसा परमातिमा ओखे खातिर ठहराइन हीं, जातय हय, पय जउन मनई धोखा दइके मनई के लड़िका काहीं पकड़ामँइ बाला हय, ओही परमातिमा से खुब सजा मिली!” <sup>23</sup> तबहिनय चेला लोग आपस माहीं पूँछँइ लागें, कि हमरे बीच म से इआ काम को करँइ बाला हय?

### सबसे बड़ा को हय? एखे खातिर बिबाद

<sup>24</sup> चलन माहीं इआ बिबाद होइ लाग, कि हमरे पंचन म से सबसे बड़ा को हय? <sup>25</sup> यीसु उनसे कहिन, “गैरयहूदी जातिअन माहीं उनखर राजा उनखे ऊपर हुकुम चलाबत हँ; त जे उनखे ऊपर अधिकार जताबत हँ; ऊँ पंचे मनइन के उपकार करँइ बाले माने जात हँ। <sup>26</sup> पय तूँ पंचे इआमेर न होया; बलकिन जउन तौहरे बीच माहीं सगलेन से बड़ा हय, उआ सगलेन से छोट कि नाई बनय, अउर जउन मुखिया हय, उआ सगलेन के सेबा करँइ बाले कि नाई बनय। <sup>27</sup> काहेकि बड़ा को हय, उआ जउन खाँय बइठ हय, इआ कि जउन सेबा करत हय? का उआ नहीं जउन खाँय बइठ हय? पय हम तौहरे बीच माहीं सेबक कि नाई हएन।

<sup>28</sup> ऊँ पंचे तुहिन आह्या, जउन हमरे परिच्छन माहीं हमेसा हमरे साथ रहे हया; <sup>29</sup> एसे जइसन हमार पिता परमातिमा हमहीं राज करँइ के खातिर एकठे राज दिहिन हीं, उहयमेर हमहूँ तौहई राज चलामँइ के हक्क देब,

30 जउने तूँ पंचे हमरे राज माहीं हमरे साथ खा-पिआ, अउर सिंहासनन माहीं बइठिके इजराइल के बरहँव गोत्रन के न्याय करा।”

### पतरस के इनकार के बारे माहीं यीसु के भबिस्सबानी (मत्ती 26:31-35; मरकुस 14:27-31; यूहन्ना 13:36-38)

31 यीसु कहिन, “समौन हे समौन! देखा, सइतान परमातिमा से तौहई माँग लिहिरी, कि गोहूँ कि नाई फटकय मतलब जाँचय-परखय, 32 पय हम तौहरे खातिर परमातिमा से बिनती किहेन हय, कि तौहार बिसुआस कमजोर न होय, पय जब तूँ पुनि बिसुआस माहीं मजबूत होइहा, तब अपने भाइन काहीं स्थिर किहा।” 33 समौन यीसु से कहिन, “हे प्रभू हम अपना के साथ जेल माहीं जाँइ के खातिर, अउर मरऊँ खातिर तइआर हएन।” 34 यीसु उनसे कहिन, “हे पतरस हम तौहसे कहित हएन, कि आजय मुरगा के बोलँइ से पहिले, तूँ तीन बेरकी इनकार करिहा, कि हम यीसु काहीं नहीं जानी।”

### बटुआ, झोरिया, अउर तलबार

35 पुनि यीसु अपने चलन से कहिन, “जब हम तौहई बिना बटुआ, झोरिया अउर पनहीं के पठयन तय, त तौहई कउनव चीज के कमी भे रही हय का?” ऊँ चेला लोग कहिन, “कउनव चीज के कमी नहीं भे तय।” 36 पुनि यीसु चलन से कहिन, “पय अब जेखे लघे बटुआ होय त ओही लइ लेय, अउर उहयमेर झोरिया लइ लेय, अउर जेखे लघे तलबार न होय, त उआ आपन ओन्हा बेंचिके एकठे तलबार खरीद लेय, 37 काहेकि हम तौहसे कहित हएन कि, इआ जउन पबित्र सास्त्र माहीं लिखा हय, कि ‘उआ अपराधिन के साथ गिना जई’, उआ बात के हमरे ऊपर पूर होब जरूरी हय; काहेकि हमरे बारे माहीं पबित्र सास्त्र माहीं लिखी बात पूर होय बाली हई।” 38 ऊँ चेला लोग कहिन, “हे प्रभू, देखी इहाँ दुइठे तलबार हई।” यीसु उनसे कहिन, “बस होइगा।”

### जैतून पहार के ऊपर यीसु के प्राथना (मत्ती 26:36-46; मरकुस 14:32-42)

39 तब यीसु उहाँ से उठिके रोज कि नाई जैतून पहार माहीं चलेगें, तब उनखर चेला लोग घलाय उनखे पीछे-पीछे चलेगें। 40 यीसु उआ जघा माहीं पहुँचिके उनसे कहिन, “प्राथना करा, जउने तूँ पंचे परिच्छा माहीं न परा।” 41 अउर यीसु उनसे थोर काहीं आँगे जाइके, टिहुनी के बल बइठिके प्राथना करँइ लागें, 42 “हे पिता परमातिमा, अगर अपना चाही, त हमरे ऊपर आमँइ बाले इआ भारी कस्ट काहीं दूर कइ सकित हएन, तऊ हमार नहीं, पय अपना के इच्छा पूर होय।” 43 तब स्वरग से एकठे दूत यीसु काहीं देखान, जउन उनहीं सामर्थ देत रहा हय। 44 यीसु आमँइ बाले संकट से खुब ब्याकुल होइके, हिरदँय माहीं खुब दुखी होइके अउर जादा प्राथना करँइ लागें; अउर उनखे देह से पसीना, खून कि नाई अउर बड़े-बड़े बूँदन कि नाई भूँइ माहीं गिरत रहे हँय। 45 तबहिनय यीसु प्राथना कइके उठें, अउर अपने चलन के लघे गें, अउर उनहीं उदासी के मारे सोबत पाइन। 46 तब यीसु उनसे कहिन, “काहे सोउते हया? उठा, प्राथना करा, जउने तूँ पंचे परिच्छा माहीं न परा।”

### यीसु काहीं धोखे से पकड़ा जाब

(मत्ती 26:47-56; मरकुस 14:43-50; यूहन्ना 18:3-12)

47 जब यीसु ई बातन काहीं कहतय रहे हँय, तबहिनय एकठे भीड़ उनखे लघे आई, अउर ऊँ बारा चलन म से एकठे जेखर नाम यहूदा इस्करियोती रहा हय, भीड़ के आँगे-आँगे आबत रहा हय। उआ यीसु के लघे आबा, कि उनखर चूमा लेय। 48 यीसु ओसे कहिन, “हे यहूदा, का तूँ चूमा लइके मनई के लड़िका काहीं पकड़बउते हया?” 49 उनखर चेला लोग जब देखिन, कि का हौइ बाला हय, तब कहिन “हे प्रभू का हम पंचे तलबार चलाई?” 50 यीसु के कुछे बोलँइ से पहिलेन, चलन म से एक जने महायाजक के दास के ऊपर तलबार चलाईके, ओखर दहिना कान काटि लिहिन। 51 तब यीसु

कहिन, “बस अब कुछे न करा।” अउर ओखे कान काहीं छुइके नीक कइ दिहिन। 52 तब यीसु प्रधान याजकन अउर मन्दिर माहीं पहरा देइ बालेन के अधिकारिन अउर, यहूदी धारमिक अँगुअन से, जउन उनहीं पकड़ँइ आए रहे हँय, कहिन, “का तूँ पंचे हमहीं डाँकू जानिके तलबारन अउर लाठिन काहीं लइके पकड़ँइ आए हया? 53 जब हम मन्दिर माहीं रोज तौहरे साथ रहत रहेन हय, तब तूँ पंचे हमहीं गिरफतार नहीं किहा, पय अब तौहरे इच्छा के मुताबिक हमहीं पकड़ँइ के समय हय, काहेकि तूँ पंचे सब सइतान के काबू माहीं आय गया हय।”

### पतरस के इनकार करब

(मत्ती 26:57,58,69-75; मरकुस 14:53,54,66-72; यूहन्ना 18:12-18,25-27)

54 तब ऊँ पंचे यीसु काहीं पकड़िके चल दिहिन, अउर महायाजक के घर माहीं लइ आएँ। अउर पतरस दूरिन-दूरी यीसु के पीछे-पीछे जात रहे हँय। 55 अउर जब ऊँ पंचे अँगना माहीं आगी बारिके एकट्ठा बइठिगें, तब पतरस घलाय उनखे बीच माहीं बइठिगें। 56 तब एकठे दासी पतरस काहीं आगी के उँजिआरे माहीं बइठे देखिस, अउर ओखी कइती ध्यान से देखिके कहँइ लाग, “इहव घलाय यीसु के साथ रहा हय।” 57 पय पतरस इआ कहिके इनकार किहिन, “हे महिला, हम उनहीं नहीं जानी।” 58 थोरी देर बाद एक जने अउर पतरस काहीं देखिके कहिस, “तुहूँ घलाय उनहिन म से आह्या।” पतरस कहिन, “हे भाई हम उनमा से न होहेन।” 59 थोरी देर बाद एकठे अउर मनई जोर दइके कहँइ लाग, “निश्चित इहव घलाय यीसु के साथय रहा हय, काहेकि इहव गलील प्रदेश माहीं रहँइ बाला आय।” 60 पतरस कहिन, “हे भाई, हम नहीं जानी कि तूँ का कहते हया!” जब पतरस इआ बात कहतय रहे हँय, ओतनिनदार मुरगा बोलिस। 61 तब प्रभू मुड़िके पतरस कइती निहारिन, अउर पतरस काहीं प्रभू के कही बात याद आइगे, जउन ऊँ कहिन रहा हय: “आज मुरगा के बोलँइ से पहिले तूँ तीन बेरकी हमहीं इनकार करिहा।” 62 तब पतरस बहिरे निकरिके फूट-फूटिके रोमँइ लागें।

### यीसु के अपमान

(मत्ती 26:67,68; मरकुस 14:65)

63 जउन मनई यीसु काहीं पकड़े रहे हँय, ऊँ पंचे यीसु के हँसी उड़ाइके मारँइ लागें; 64 अउर उनखर आँखी मूदिके उनसे पूँछँइ लागें, “भबिस्सबानी कइके बताबा, कि तौहई को मारिस ही!” 65 अउर ऊँ पंचे उनखर खुब अपमान करत अउर अपमानजनक बातँय कहत रहे हँय।

### महासभा के आँगे यीसु

(मत्ती 26:59-66; मरकुस 14:55-64; यूहन्ना 18:19-24)

66 जब सकार भ, तब यहूदी धारमिक अँगुआ लोग, अउर प्रधान याजक लोग, अउर मूसा के बिधान सिखामँइ बाले एकट्ठा भें, अउर यीसु काहीं अपने महासभा माहीं लइ जाइके पूँछिन, 67 “अगर तूँ मसीह आह्या, त हमहीं बताय द्या!” यीसु उनसे कहिन, “अगर हम तौहसे कही, त तूँ पंचे बिसुआस न मनिहा; 68 अउर अगर हम मसीह के बारे माहीं पूँछी त तूँ पंचे बताए न पइहा। 69 पय अब से मनई के लड़िका सर्बसक्तिमान परमातिमा के दहिने कइती बइठ रही।” 70 ई बातन काहीं सुनिके सगले जन कहिन, “का तूँ परमातिमा के लड़िका आह्या?” यीसु उनसे कहिन, “तूँ पंचे खुदय कहते हया, काहेकि हम उहय आहेन।” 71 तब ऊँ पंचे कहिन, “अब हमहीं कउनव गबाही के जरूरत नहिँ आय, काहेकि हम पंचे खुदय ओखे मुँहे से सुन लिहेन हय; कि उआ अपने काहीं परमातिमा के लड़िका कहत हय।”

### राजपाल पिलातुस के आँगे यीसु

(मत्ती 27:1,2,11-14; मरकुस 15:1-5; यूहन्ना 18:28-38)

23 तब सभा के सगले जने यीसु काहीं राजपाल पिलातुस के लघे लइगें। 2 ऊँ पंचे इआ कहिके यीसु के ऊपर दोस लगामँइ लागें: “हम

पंचे एही खुब मनइन काहीं बहकाबत, अउर महाराजा कैसर काहीं कर देंइ से बरजत, अउर अपने काहीं मसीह अउर राजा कहत सुनेन हँय।”

<sup>3</sup> राजपाल पिलातुस यीसु से पूँछिन, “का तूँ यहूदी लोगन के राजा आह्या?” यीसु उन्हीं जबाब दिहिन, “तूँ खुदय कहते हया!” <sup>4</sup> तब राजपाल पिलातुस प्रधान याजकन अउर मनइन से कहिन, “हम इआ मनई माहीं कउनव दोस नहीं पाई।” <sup>5</sup> पय ऊँ पंचे अउर जोर दइके कहँइ लागें, “इआ सगले यहूदिया प्रदेस माहीं सब मनइन काहीं अपने उपदेसन से बहकाइस ही। इआ काम गलील प्रदेस से सुरू किहिस तय, अउर अब इहाँ तक आइगा हय।” <sup>6</sup> इआ बात सुनिके राजपाल पिलातुस पूँछिन, “का इआ मनई गलील प्रदेस के रहँइ बाला आय?” <sup>7</sup> अउर इआ जानिके कि यीसु, हेरोदेस राजा के राज के आहीं, उन्हीं हेरोदेस राजा के लघे पठय दिहिन, काहेकि उन दिनन माहीं हेरोदेस राजा घलाय यरूसलेम सहर माहीं रहे हँय।

### हेरोदेस राजा के आँगे यीसु

<sup>8</sup> हेरोदेस राजा यीसु काहीं देखिके खुब खुसी भें, काहेकि ऊँ यीसु काहीं खुब दिनन से देखँइ चाहत रहे हँय; अउर ऊँ सुनिन रहा हय, कि यीसु चमत्कार देखाबत हें, एसे ऊँ यीसु से कुछ चमत्कार देखँइ के आसा करत रहे हँय। <sup>9</sup> राजा हेरोदेस यीसु से अउर खुब बातें पूँछत रहिगें, पय यीसु उन्हीं कुछ जबाब नहीं दिहिन। <sup>10</sup> प्रधान याजक लोग, अउर मूसा के बिधान सिखामँइ बाले ठाढ़े-ठाढ़े तन मन से यीसु के ऊपर दोस लगाबत रहिगें। <sup>11</sup> तब हेरोदेस राजा अपने सिपाहिन के साथ यीसु के अपमान किहिन, अउर मजाक उड़ाइन, अउर चमकीला ओन्हा पहिरायके उन्हीं राजपाल पिलातुस के लघे लउटाय दिहिन। <sup>12</sup> उहय दिन से राजपाल पिलातुस, अउर हेरोदेस राजा एक दुसरे के साथी होइगें; काहेकि एखे पहिले ऊँ एक दुसरे के दुसमन रहे हँय।

### राजपाल पिलातुस यीसु काहीं मउत के सजा सुनाइन

(मत्ती 27:15-26; मरकुस 15:6-15; यूहन्ना 18:39—19:16)

<sup>13</sup> राजपाल पिलातुस प्रधान याजकन अउर सेना के मुखिन अउर सगले जनेन काहीं बोलाइके उनसे कहिन, <sup>14</sup> तूँ पंचे इआ मनई काहीं, लोगन काहीं बहकामँइ बाला बताइके, हमरे लघे लइ आया हय। अउर देखा, हम तौहरे आँगेन ओखर जाँच-परताल किहेन हय, पय जउने बातन के दोस तूँ पंचे ओखे ऊपर लगउते हया, ऊँ बातन के बारे माहीं हम कउनव दोस नहीं पाएन; <sup>15</sup> अउर न हेरोदेस राजा ओही कउनव सजा देंइ के काबिल दोस पाइन, एसे ऊँ हमरे लघे लउटाय दिहिन हीं: अउर देखा, उआ अइसन कउनव काम नहीं किहिस, कि ओही मउत के सजा दीन जाय। <sup>16</sup> एसे हम ओही चाबुक मरबाइके छोँड़े देइत हएन। <sup>17</sup> (यहूदी लोगन के नेम के मुताबिक, फसह के तेउहार के दिन एकठे कइदी काहीं छोँड़ दीन जात रहा हय, एसे राजपाल पिलातुस तेउहार के दिन एकठे कइदी काहीं छोँड़के खातिर मजबूर रहा हय।) <sup>18</sup> तब सगले जन एकसाथय चिल्लाय उठें, “एही मारि डारा, अउर हमरे खातिर बरअब्बा डाँकू काहीं छोँड़ि द्या!” <sup>19</sup> बरअब्बा कउनव दंगा माहीं सामिल होँइ के कारन जउन सहर माहीं भ रहा हय, अउर कतल करँइ के दोसी होँइ के कारन जेल माहीं बंद कीन ग रहा हय। <sup>20</sup> पय पिलातुस यीसु काहीं छोँड़ि देंइ के इच्छा से, मनइन काहीं दुसराय समझाइन, <sup>21</sup> पय ऊँ पंचे चिल्लाइके कहिन, “ओही क्रूस माहीं चढ़ाबा, क्रूस माहीं!” <sup>22</sup> राजपाल पिलातुस तिसराय उनसे कहिन, “काहे, ऊँ कउन अपराध किहिन हीं? हम मउत के सजा देंइ के काबिल उन माहीं कउनव गलती नहीं पाएन। एसे हम उन्हीं चाबुक मरबाइके छोँड़े देइत हएन।” <sup>23</sup> पय ऊँ पंचे खुब चिल्लाय-चिल्लाइके इआ दबाव डारिन, कि ओही क्रूस माहीं चढ़ाबा जाय, अउर उनखर चिल्लाब सफल भ, मतलब ऊँ पंचे जइसन कहत रहे हँय, उहयमेर भ। <sup>24</sup> अरथात राजपाल पिलातुस हुकुम दिहिन, कि उनखे बिनती के मुताबिक कीन जाय। <sup>25</sup> राजपाल पिलातुस उआ मनई काहीं जउन दंगा अउर कतल के आरोप के कारन जेल माहीं बंद रहा हय, अउर

जउने काहीं ऊँ पंचे मागत रहे हँय, छोँड़ दिहिन, अउर यीसु काहीं उनखे इच्छा के मुताबिक सउँप दिहिन।

### यीसु काहीं क्रूस माहीं चढ़ाबा जाब

(मत्ती 27:32-44; मरकुस 15:21-32; यूहन्ना 19:17-27)

<sup>26</sup> जब ऊँ पंचे यीसु काहीं लए जात रहे हँय, तब ऊँ पंचे, कुरेन सहर के रहँइ बाले समौन नाम के एकठे मनई काहीं, जउन गाँव कइत से चला आबत रहा हय, पकड़िके ओखे ऊपर क्रूस लाद दिहिन, कि ओही यीसु के पीछे-पीछे लइ चलय।

<sup>27</sup> अउर मनइन के खुब बड़ी भीड़ यीसु के पीछे-पीछे चल दिहिस, अउर भीड़ माहीं खुब मेहेरिआ घलाय रही हँय, जउन यीसु के खातिर खुब दुखी होइके छाती पीट-पीटिके रोबत रही हँय। <sup>28</sup> यीसु उनखे कइती मुड़िके कहिन, “हे यरूसलेम सहर के बिटिअव, हमरे खातिर न रोबा; बलकिन अपने अउर अपने लड़िकन-बच्चन के खातिर रोबा।” <sup>29</sup> काहेकि देखा, ऊँ दिन अइहँय, जउने माहीं मनई कइहँय, ‘धन्य हई ऊँ मेहेरिआ जिनखे लड़िका-बच्चा नहीं भें, अउर ऊँ जउन लड़िकन काहीं दूध नहीं पिआइन।’

<sup>30</sup> उआ समय माहीं ‘भयानक संकट से बचँइ के खातिर ऊँ पंचे पहारन से कइहँय, कि हमरे ऊपर गिरा, अउर टीलन से कइहँय, कि हमहीं मूँद ल्या।’

<sup>31</sup> काहेकि जब ऊँ पंचे हमरे साथ जउन हम हरिअर बिरबा कि नाई हएन अइसन करत हें, त उन्हीं जउन झुरान बिरबा कि नाई दोसी हँय, खुब सजा देइहँय?” <sup>32</sup> अउर ऊँ पंचे दुइठे अउर मनइन काहीं जउन कुकर्मी रहे हँय, यीसु के साथय मारँइ के खातिर लइके चल दिहिन। <sup>33</sup> जब ऊँ पंचे उआ जघा माहीं पहुँचे, जउने काहीं खोपड़ी कहत हें, तब ऊँ पंचे यीसु काहीं अउर ऊँ कुकर्मिन काहीं घलाय, एकठे क दहिने कइती, अउर दुसरे काहीं बाएँ कइती क्रूस माहीं चढ़ाइन। <sup>34</sup> तब यीसु कहिन, “हे पिता, इनहीं माफ करी, काहेकि ई पंचे नहीं जानँय, कि हम का कइ रहेन हँय।” अउर ऊँ पंचे परची डारिके उनखे ओन्हन काहीं बाँटि लिहिन।

<sup>35</sup> खुब मनई ठाढ़े-ठाढ़े देखत रहे हँय, अउर सभाघर के मुखिया लोग घलाय उनखर मजाक उड़ाइके कहत रहे हँय: “इआ दुसरेन काहीं बचाइस, अगर इआ परमातिमा के मसीह आय, अउर उनखर चुना आय, त खुद काहीं बचाय लेय।” <sup>36</sup> सिपाही घलाय लघे आइके अउर पिअँइ के खातिर सिरका दइके उनखर हँसी उड़ाइके, कहत रहे हँय, <sup>37</sup> “अगर तँय यहूदी लोगन के राजा आहे, त खुद काहीं बचाव!” <sup>38</sup> अउर उनखे ऊपर एकठे आरोप-पत्र घलाय लगा रहा हय, कि “ई यहूदी लोगन के राजा आहीं।”

### मन बदलँइ बाला कुकर्मी

<sup>39</sup> जउन कुकर्मी उहाँ क्रूस माहीं चढ़ाए गे रहे हँय, उनमा से एक जने उनखर बुराई कइके कहिस, “का तूँ मसीह न होह्या? त पुनि खुद काहीं अउर हमहीं बचाबा!” <sup>40</sup> तब दूसर बाला ओही डाँटिके कहिस, “का तँय परमातिमा से घलाय नहीं डेराते आहे? तहूँ त उहय सजा पउते हय, <sup>41</sup> हम पंचे त जउन गलत काम किहेन हय, ओहिन के मुताबिक सजा पाय रहेन हँय; काहेकि हम पंचे अपने गलत कामन के उचित फल पाय रहेन हँय; पय ई त कउनव गलत काम नहीं किहिन, तऊ सजा पाय रहे हँय।” <sup>42</sup> तब पहिल बाला कहिस, “हे यीसु, जब अपना राजा बनिके राज करब, तब हमार सुधि लेब।” <sup>43</sup> यीसु ओसे कहिन, “हम तौहसे सही कहित हएन, कि तूँ आजय हमरे साथ स्वरगराज माहीं होइहा।”

### यीसु के प्रान छोँड़ब

(मत्ती 27:45-56; मरकुस 15:33-41; यूहन्ना 19:28-30)

<sup>44</sup> अउर करीब दुपहर बारा बजे से लइके, तीन बजे तक सगले देस माहीं अँधिआर छाबा रहिगा, <sup>45</sup> अउर सुरिज के उँजिआर देब बंद होइगा, अउर मन्दिर के परदा बीच से फाटिगा, <sup>46</sup> अउर यीसु खुब चंडे से चिल्लाइके कहिन, “हे पिता, हम आपन आत्मा अपना के हाँथे माहीं देइत हएन।”

अउर एतना कहिके प्रान छोड़ दिहिन।<sup>47</sup> जउन कुछू इआ भा रहा हय, सुबेदार देखिके परमातिमा के बड़ाई करई लाग, अउर कहिस, “जरूर ई धरमी मनई रहे हँय।”<sup>48</sup> अउर भीड़ के सगले मनई जे इआ सगला हाल देखई के खातिर एकट्ठा भे रहे हँय, इआ घटना काहीं देखिके खुब दुखी होइके लउटिगें।<sup>49</sup> अउर यीसु के सगले जान-पहिचान बाले, अउर जउन मेहेरिआ गलील प्रदेश से उनखे साथ आई रही हँय, दूरी ठाढ़ होइके इआ सगला हाल देखत रही हँय।

### यीसु काहीं गाड़ा जाब

(मत्ती 27:57-61; मरकुस 15:42-47; यूहन्ना 19:38-42)

<sup>50</sup> उहाँ यूसुफ नाम के एकठे मनई रहे हँय, जउन महासभा के सदस्य रहे हँय, अउर ऊँ सज्जन अउर धरमी रहे हँय।<sup>51</sup> अउर ऊँ यहूदी लोगन के योजना, अउर यीसु काहीं क्रूस माहीं चढ़ामँड के काम से प्रसन्न नहीं रहे आँय। ऊँ यहूदी लोगन के गाँव अरमतिया के रहँड बाले, अउर परमातिमा के सुख सान्ति के राज आमँड के इन्तजार करत रहे हँय।<sup>52</sup> ऊँ राजपाल पिलातुस के लघे जाइके, यीसु के लहास माँगिन; <sup>53</sup> अउर जब राजपाल पिलातुस मंजूरी दइ दिहिन, तब ऊँ यीसु काहीं क्रूस से उतरबाइके मखमल के चढ़रा माहीं लपेट लिहिन, अउर एकठे कब्र माहीं धरिन, जउन चट्टान माहीं खोदी गे रही हय; अउर ओमा कबहूँ कउनव लहास नहीं धरी गे रही आय।<sup>54</sup> सुरिज बूडँड के बाद, पबित्र दिन सुरू होइ बाला रहा हय, एसे उआ तइआरी के दिन रहा हय।<sup>55</sup> ऊँ मेहेरिआ जउन गलील प्रदेश से आई रही हँय, पीछे-पीछे जाइके उआ कब्र काहीं देखिन, अउर इआ घलाय देखिन कि यीसु के लहास कउनमेर से रखी गे ही।<sup>56</sup> तब ऊँ पंचे लउटिके महकँड बाली चीज अउर अँतर बनाइके तइआर किहिन, अउर पबित्र दिन काहीं, ऊँ पंचे परमातिमा के हुकुम के मुताबिक अराम किहिन।

### मरेन म से यीसु के जिन्दा होब

(मत्ती 28:1-10; मरकुस 16:1-8; यूहन्ना 20:1-10)

**24** पय हप्ता के पहिलय दिन अइतबार काहीं भिनसरहय सगली मेहेरिआ महकँड बाली चीजन काहीं लइके जउनेन काहीं तइआर किहिन तय, कब्र माहीं आई।<sup>2</sup> ऊँ पंचे उआ पथरा काहीं कब्र के दुआरा से ढनगा पाइन, <sup>3</sup> पय ऊँ पंचे कब्र के भीतर जाइके यीसु के लहास नहीं पाइन। <sup>4</sup> जब ऊँ पंचे इआ बात काहीं देखिके घबरान जात रही हँय, तबहिनय देखिन, कि दुइठे मंसेरुआ खुब चमकत ओन्हा पहिरे उनखे लघे आइके ठाढ़ होइगें।<sup>5</sup> जब ऊँ पंचे मारे डेरन के नीचे काहीं मूड कए रहि गई, तब ऊँ दोनव जने उनसे कहिन, “तूँ पंचे जिन्दा काहीं, मरेन माहीं काहे ढुँढते हया? <sup>6</sup> ऊँ इहाँ नहिं आहीं, बलकिन जिन्दा होइगे हँय। सुधि करा, कि ऊँ जब गलील माहीं रहे हँय, त तौहसे का कहिन तय।<sup>7</sup> ऊँ इआ कहिन तय, कि ‘जरूरी हय, कि मनई के लड़िका पापिन के हाँथ माहीं पकड़ाबा जई, अउर क्रूस माहीं चढ़ाबा जई, अउर मरिके तिसरे दिन जिन्दा होइ जई’।”<sup>8</sup> तब उनहीं यीसु के कही बात सुधि आई, <sup>9</sup> अउर कब्र से लउटिके ऊँ पंचे, यीसु के ग्यरहँव चलन से, अउर उहाँ ठाढ़ सगले मनइन से सगली बातन काहीं बताइन।<sup>10</sup> जउन ई बातन काहीं खास चलन से बताइन रहा हय, ऊँ पंचे ई आहीं, मगदल गाँव के मरियम, अउर योअन्ना अउर याकूब के महतारी मरियम अउर उनखे साथ अउरव मेहेरिआ रही हँय।<sup>11</sup> पय उनखर बातँय उनहीं कहानी कि नाई लागीं, एसे ऊँ पंचे बिसुआस नहीं किहिन।<sup>12</sup> तब पतरस उठिके कब्र माहीं दउड़त गें, अउर कब्र के भीतर निहुरिके देखिन, त यीसु के ओन्हा भर देखाने, अउर जउन भ रहा हय, ओसे अचम्भित होइके जहाँ रहत रहे हँय, उहय घर माहीं लउटिगें।

### इम्माऊस के गइल माहीं चलन के साथ यीसु

(मरकुस 16:12,13)

<sup>13</sup> उहय दिन चलन म से दुइ जने इम्माऊस नाम के गाँव काहीं जात रहे हँय, जउन यरूसलेम सहर से करीबन 11 किलोमीटर के दूरी माहीं रहा हय।<sup>14</sup> जउन बातँय यरूसलेम सहर माहीं भे रही हँय, उनहिन के चरचा ऊँ पंचे आपस माहीं करत जात रहे हँय, <sup>15</sup> अउर जब ऊँ दोनव जने आपस माहीं बात करत अउर एक दुसरे से पूँछत जात रहे हँय, तबहिनय यीसु आइके उनखे साथय रेंगँड लागें।<sup>16</sup> पय परमातिमा उनखे आँखिन काहीं अइसन बंद कइ दिहिन तय, कि जउने ऊँ पंचे यीसु काहीं चीन्हे न पामँय।<sup>17</sup> तब यीसु उनसे पूँछिन, “ई कउन बातँय आहीं, जउन तूँ पंचे चलतय-चलत आपस माहीं करत जाते हया?” ऊँ पंचे एतना सुनिके अनमन ठाढ़ रहिगें।<sup>18</sup> तब यीसु के बात काहीं सुनिके, उनहिन म से एक जने जेखर नाम क्लियुपास रहा हय कहिस, “का तूँ यरूसलेम सहर माहीं अकेले परदेसी रहइआ हया, जउन नहीं जनते आह्या, कि ई दिनन माहीं यरूसलेम सहर माहीं का-का भ हय?”<sup>19</sup> यीसु उनसे पूँछिन, “कउन बातँय?” ऊँ दोनव जने उनसे कहिन, “नासरत गाँव माहीं रहँड बाले यीसु के बारे माहीं, जउन परमातिमा के निगाह माहीं, अउर लोगन के बीच माहीं काम करँड माहीं, अउर बचन माहीं सामरथी अउर परमातिमा के सँदेस बतामँड बाले रहे हँय।<sup>20</sup> उनहीं प्रधान याजक लोग अउर हमरे समाज के मुखिया पकड़बाइन, कि उनहीं मउत के सजा के हुकुम दीन जाय, जब राजपाल हुकुम दइ दिहिन, तब उनहीं लइ जाइके क्रूस माहीं चढ़बाय दिहिन।<sup>21</sup> पय हमहीं पंचन काहीं बड़ी आसा रही हय, कि यीसु सगले इजराइल के मनइन काहीं रोम सम्राज के गुलामी से मुक्ती देइहँय। इआ घटना काहीं भए आज तीसर दिन आय।<sup>22</sup> अउर हमरेन बीच म से कइअकठे मेहेरिआ हमहीं अचरज माहीं डार दिहिन हीं, जउन बड़े सकन्ने कब्र माहीं गई रही हँय; <sup>23</sup> जब ऊँ पंचे उनखर लहास नहीं पाइन, त इआ कहत आई कि हम पंचे स्वरगदूतन के दरसन पाएन हय, जउन कहिन हीं, कि ऊँ जिन्दा होइगे हें।<sup>24</sup> तब हमरे साथिन म से कइअक जने कब्र माहीं गें, अउर जइसन ऊँ मेहेरिआ कहिन तय, उहयमेर पाइन; पय उनखर लहास नहीं पाइन।”<sup>25</sup> तब यीसु उनसे कहिन, “हे निरबुध्दिव, अउर परमातिमा के सँदेस बतामँड बालेन के सगली बातन के बिसुआस न करँड बाले मन्द मति के मनइव! <sup>26</sup> का इआ जरूरी नहीं रहा, कि मसीह दुख उठाइके अपने महिमा माहीं प्रबेस करँय?”<sup>27</sup> तब यीसु मूसा से अउर सगले परमातिमा के सँदेस बतामँड बालेन से सुरू कइके पूरे पबित्र सास्त्र म से अपने बारे माहीं लिखी बातन के मतलब, उनहीं समझाय दिहिन।  
<sup>28</sup> बात करत-करत ऊँ पंचे गाँव के लघे पहुँचिगे, जहाँ ऊँ जात रहे हँय, अउर यीसु के बरताव से अइसन जान परा, कि ऊँ आँगे जाँड चाहत हें।<sup>29</sup> पय ऊँ पंचे इआ कहिके यीसु काहीं रोकिन, “अपना हमरे साथय रही, काहेकि साँझ होइ बाली हय, अउर सुरिज बूडँड बाला हय।” तब यीसु उनखे साथ रहँड के खातिर घर के भीतर गें।<sup>30</sup> जब यीसु उनखे साथ खाना खाँड बइठें, तबहिनय ऊँ रोटी लइके परमातिमा काहीं धन्यवाद दिहिन, अउर रोटी टोरिके उनहीं देंड लागें।<sup>31</sup> तब उनखर आँखी खुल गई; अउर ऊँ पंचे यीसु काहीं पहिचान लिहिन, तबहिनय यीसु उनखे आँखी से ओझल होइगें।<sup>32</sup> तब ऊँ पंचे आपस माहीं कहिन, “जब ऊँ गइल माहीं हमसे बात करत रहे हँय, अउर पबित्र सास्त्र के मतलब समझाबत रहे हँय, तब का हमरे हिरदँय माहीं उत्तेजना नहीं पइदा भय तय?”<sup>33</sup> तब ऊँ पंचे उहय समय उठिके यरूसलेम सहर लउटिगें, अउर उन ग्यरहँव चलन अउर उनखे साथिन काहीं एकट्ठा पाइन।<sup>34</sup> ऊँ सगले जन कहत रहे हँय, कि “प्रभू फुरिन जिन्दा होइगें हँय, अउर समौन काहीं देखाई दिहिन हीं।”<sup>35</sup> तब ऊँ पंचे गइल के सगली बात उनसे बताय दिहिन, अउर इहव घलाय बताइन, कि हम पंचे रोटी टोरत समय कइसन यीसु काहीं पहिचान लिहेन तय।

### सगले चेलन काहीं यीसु देखाई दिहिन

(मत्ती 28:16-20; मरकुस 16:14-18; यूहन्ना 20:19-23; खास चेलन 1:6-8)

<sup>36</sup> जब ऊँ पंचे ई बातँय कहतय रहे हँय, तबहिन यीसु उनखे बीच माहीं आइके ठाढ़ होइगें, अउर उनसे कहिन, "तोहई सान्ती मिलय।" <sup>37</sup> पय ऊँ सगले जने घबराइगें, अउर डेराऊ गें, अउर इआ सोचिन, कि हम पंचे कउनव भूत काहीं देख रहेन हँय। <sup>38</sup> यीसु उनसे कहिन, "काहे घबराते हया? अउर अपने मन माहीं संका काहे करते हया? <sup>39</sup> हमरे हाँथे अउर गोड़ेन काहीं देखा, कि हम उहय आहेन। हमहीं छुइके देखा, काहेकि भूत के हड्डी अउर माँस नहीं होय; जइसन हमरे देखते हया।"

<sup>40</sup> इआ कहिके यीसु उनहीं आपन हाँथ-गोड़ देखाइन। <sup>41</sup> जब मारे खुसी के कारन उनहीं बिसुआस न भ, अउर ऊँ पंचे अचरज मानत रहे हँय, तब यीसु उनसे पूँछिन, "का इहाँ तोंहरे लघे कुछे खाँइका हय?" <sup>42</sup> ऊँ पंचे यीसु काहीं भूँजी मछरी के टुकड़ा दिहिन। <sup>43</sup> यीसु उआ मछरी के टुकड़ा लइके उनखे आँगेन खाइन। <sup>44</sup> फेर यीसु उनसे कहिन, "ई हमार ऊँ बातँय आहीं, जउन हम तोंहरे साथ रहत समय तोंहसे कहेन तय, कि इआ जरूरी हय, कि जेतनी बातँय मूसा के बिधान माहीं अउर परमातिमा के सँदेस बतामँइ बालेन अउर भजन के किताबन माहीं हमरे बारे माहीं लिखी हई, ऊँ सगली पूर होंय।"

<sup>45</sup> तब यीसु पबित्र सास्त्र के बातन काहीं समझँइ के खातिर उनहीं समझ दिहिन, <sup>46</sup> अउर यीसु कहिन, "पबित्र सास्त्र माहीं लिखा हय, कि मसीह दुख उठइहँय, अउर मरिके तिसरे दिन जिन्दा होइ जइहँय, <sup>47</sup> अउर यरूसलेम सहर से लइके सगले जातिअन माहीं पाप से मन फिरामँइ के, अउर पापन से माफी पामँइ के प्रचार, उनहिन के नाम से कीन जई। <sup>48</sup> अउर तूँ पंचे ई सगली बातन के गबाह हया। <sup>49</sup> अउर देखा, जेखर वादा हमार पिता किहिन हीं, हम ओही तोंहरे ऊपर हरबिन पठउब, अउर जब तक तूँ पंचे स्वर्ग से परमातिमा के तरफ से सामर्थ न पाया, तब तक तूँ पंचे इहय सहर माहीं रुके रह्या।"

### यीसु के स्वर्ग जाब

(मरकुस 16:19,20; खास चेलन 1:9-11)

<sup>50</sup> तब यीसु उनहीं यरूसलेम सहर से बहिरे बैतनिय्याह गाँव तक लइगें, अउर आपन हाँथ उठाइके उनहीं आसिरबाद दिहिन; <sup>51</sup> अउर उनहीं आसिरबाद देत समय यीसु उनसे अलग होइगें, अउर स्वर्ग माहीं उठाय लीन गें। <sup>52</sup> तब ऊँ पंचे यीसु काहीं दन्डबत कइके बड़े आनन्द के साथ यरूसलेम सहर काहीं लउटिगें; <sup>53</sup> अउर ऊँ पंचे लगीतार मन्दिर माहीं जाइके परमातिमा के अराधना करा-करत रहे हँय।



# यूहन्ना

## इआ किताब के परिचय

यूहन्ना के लिखी खुसी के खबर माहीं यीसु काहीं परमातिमा के अनन्त बचन के रूप माहीं बताबा ग हय, जउन “मनई के रूप माहीं आइके हमरे पंचन के बीच माही निबास किहिन।” इआ किताब माहीं इआ स्पस्ट रूप से बताबा ग हय, कि इआ खुसी के खबर एसे लिखी गे ही, कि एही पढ़े बाले बिसुआस करे, कि परमातिमा जउने मुक्ती देई बाले काहीं पठमँइ के वादा किहिन तय, ऊँ यीसु आहीं। अरथात उँइन परमातिमा के लड़िका आहीं, अउर ऊँ पंचे यीसु के ऊपर बिसुआस किहे के व्दारा अनन्त जीवन पाय सकँय (यूह 20:31)।

भूमिका माहीं यीसु काहीं परमातिमा के अनन्त बचन के रूप माहीं लिखा ग हय। ओखे बाद खुसी के खबर के पहिल भाग माहीं सातठे चमत्कार के कामन के बखान कीन ग हय, ऊँ कामन से इआ प्रगट होत हय, कि परमातिमा जउने मुक्ती देई बाले काहीं पठमँइ के वादा किहिन तय, ऊँ यीसु आहीं, अरथात उँइन परमातिमा के लड़िका आहीं। दुसरे भाग माहीं यीसु के उपदेस के बारे माहीं बताबा ग हय। ऊँ उपदेसन माहीं इआ समझाबा ग हय, कि ई अचरज के कामन के मतलब का हय। इआ भाग माहीं इहव बताबा ग हय, कि कइसन कुछ मनई यीसु के ऊपर बिसुआस किहिन, अउर उनखर चेला बनिगें, जबकि कुछ मनई उनखर बिरोध किहिन अउर उनखे ऊपर बिसुआस करे से इनकार कइ दिहिन। 13 पाठ से लइके 17 पाठ तक यीसु के पकड़बाए जाँय बाली रात काहीं यीसु के अपने चलन के साथ घनिस्ट सहभागिता, अउर क्रूस माहीं चढ़ाए जाँइ से पहिले साँझिके चलन काहीं तइआर करे, अउर उनहीं उत्साहित करे बाले यीसु के बचनन के बिस्तार से बखान कीन ग हय। अन्तिम पाठन माहीं यीसु के पकड़बाए जाँय अउर यहूदी महासभा माहीं सँउपे जाँइ के, उनहीं क्रूस माहीं चढ़ाए जाँइ के, गाड़े जाँइ के, मरे के बाद जिन्दा होइ के, अउर मरेन म से जिन्दा होए के बाद चलन काहीं देखाई देई के बखान हय। यूहन्ना यीसु मसीह के व्दारा अनन्त जीवन के दान के ऊपर खुब जोर देत हैं। इआ एकठे अइसन दान आय, जउन अब सुरू होत हय अउर उनहीं मिलत हय, जे कोऊ यीसु काहीं गइल, सत्य, अउर जीवन के रूप माहीं सोइकार करत हैं। आत्मिक बातन काहीं बतामँइ के खातिर रोज जीवन माहीं जरूरत परे बाली साधारन चीजन काहीं प्रतीक के रूप माहीं उपयोग करब, यूहन्ना के मुख्य बिसेसता आय, जइसन- पानी, रोटी, जोति, चरबाहा अउर ओखे गइरन, अउर दाखलता अउर ओखर फर आदि। अउर इआ किताब माहीं यीसु काहीं “मनई के लड़िका” अउर “परमातिमा के लड़िका” के रूप माहीं बताबा ग हय। अउर जउने मन्दिर के बखान हय, ओमाहीं कउनव मूरत नहीं रहत रही आय। अपना पंचन से इआ बिनती हय, कि अपना पंचे इआ खुसी के खबर काहीं बड़े ध्यान से पढ़ी, अउर एहिन के मुताबिक जीवन बिताई, त अपना पंचन काहीं परमातिमा से खुब आसीस मिली।

रूप-रेखा :

भूमिका

यूहन्ना बपतिस्मा देई बाले अउर यीसु के पहिल चेला लोग

यीसु के जनसेबा

यरूसलेम सहर माहीं अन्त के कुछ दिन

मरेन म से प्रभू के जिन्दा होब अउर चलन काहीं देखाई देब

उपसंहार : गलील प्रदेश माहीं पुनि: देखाई देब

### बचन के मनई के रूप धारन करब

1 सुरुआत † माहीं बचन रहा हय, अउर बचन परमातिमा के साथ रहा हय, अउर बचनय परमातिमा रहा हय। 2 इहय बचन सुरुआत माहीं परमातिमा के साथ रहा हय। 3 बचनय के व्दारा सगली चीजें बनाई गई हँय, अउर जेतनी चीजें बनाई गई हँय, उनमा से अइसा कउनव चीज नहीं आय जउन ओखे बिना बनाई गे होय। 4 ओहिन माहीं जीवन रहा हय; अउर उहय जीवन संसार के मनइन के खातिर जोति रहा हय। 5 अउर जोति अँधिआर माहीं चमकत ही; पय अँधिआर ओही सोइकार नहीं किहिस।

6 परमातिमा के पठए एक जने मनई आएँ जिनखर नाम यूहन्ना बपतिस्मा देई बाला रहा हय। 7 ऊँ इआ गबाही देई के खातिर आएँ, कि जोति के बारे माहीं गबाही देंय, जउने संसार के सगले मनई उनखे गबाही काहीं सुनिके

जोति के ऊपर बिसुआस करँय। 8 ऊँ खुद उआ जोति नहीं रहें आहीं, पय उआ जोति के बारे माहीं गबाही देई के खातिर आए रहे हँय।

9 उआ सच्ची जोति जउन संसार के हरेक मनइन काहीं ग्यान रूपी उँजिआर देत ही, संसार माहीं आमँइ बाली रही हय। 10 उआ बचन संसारय माहीं रहा हय, अउर सगला संसार ओहिन के व्दारा बनाबा ग हय, पय संसार के मनई ओही नहीं पहिचानिन। 11 ऊँ अपने लोगन के लघे आएँ, अउर उनखर अपनय लोग उनहीं सोइकार नहीं किहिन। 12 पय जेतने जने उनहीं सोइकार किहिन, ऊँ उनहीं पंचन काहीं परमातिमा के सन्तान होइ के अधिकार दिहिन, अरथात उनहीं जेतने जन उनखे नाम के ऊपर बिसुआस करत हैं। 13 परमातिमा के सन्तान के रूप माहीं, ऊँ पंचे संसारिक रूप से, न त खून से पइदा भें, अउर न त मनइन के इच्छा से, अउर न महतारी-बाप के योजना से, बलकिन ऊँ पंचे परमातिमा से पइदा भे हँय।

14 अउर बचन मनई के रूप लइके संसार माहीं आएँ, अउर ऊँ किरपा अउर सच्चाई से भरपूर होइके, हमरे पंचन के बीच माहीं निबास किहिन,

अउर हम पंचे उनखे महिमा काहीं, पिता परमातिमा के एकलउते लड़िका कि नाई देखे हएन।<sup>15</sup> अउर यूहन्ना उनखे बारे माहीं गबाही दिहिन हीं, अउर खुब चन्डे कहिन हीं, कि “ई उँइन आहीं, जिनखे बारे माहीं हम बतायन हय, कि उँ जउन हमरे बाद आमँइ बाले हैं, हमसे खुब महान हैं, काहेकि उँ हमरे पड़दा होंय से पहिले रहे हँय।”<sup>16</sup> काहेकि उनखर किरपा हमरे ऊपर भरपूर ही, एहिन से हमहीं पंचन काहीं भरपूर आसिरबाद मिलत हय।<sup>17</sup> परमातिमा के बिधान मूसा नबी के व्दारा दीन ग हय; पय किरपा अउर सच्चाई यीसु मसीह के व्दारा पहुँची हय।<sup>18</sup> परमातिमा काहीं कबहूँ कोऊ नहीं देखिस, पय केबल परमातिमा के एकलउते लड़िका, जउन हमेसा उनहिन के साथ रहत हैं, उँइन उनखे बारे माहीं हमहीं पंचन काहीं बताइन हीं।

### यूहन्ना बपतिस्मा देँइ बाले के गबाही (मत्ती 3:1-12; मरकुस 1:1-8; लूका 3:1-18)

<sup>19</sup> जब यरूसलेम सहर के कुछ यहूदी समाज के धारमिक अँगुआ लोग इआ जानँइ के खातिर कि यूहन्ना बपतिस्मा देँइ बाले को आहीं, याजकन अउर मन्दिर माहीं सेबा करँइ बाले लेबी लोगन काहीं पठइन, तब उँ पंचे यूहन्ना बपतिस्मा देँइ बाले के लघे जाइके पूँछिन, कि तूँ को आह्या।<sup>20</sup> तब यूहन्ना बपतिस्मा देँइ बाले उनहीं सही जबाब दिहिन, अउर मान लिहिन, कि हम परमातिमा के पठए मसीह न होंहेन।<sup>21</sup> तब उँ पंचे पुनि उनसे पूँछिन, “त तूँ को आह्या? का तूँ एलिय्याह आह्या?” त उँ कहिन, कि “हम न होंहेन”, त उँ पंचे पुनि पूँछिन कि, “परमातिमा जउन अपने सँदेस बतामँइ बाले काहीं पठमँइ के वादा किहिन तय, का तूँ उहय आह्या?” तब उँ कहिन, कि “हम उहव न होंहेन।”<sup>22</sup> तब उँ पंचे पुनि उनसे पूँछिन, “आखिर तूँ को आह्या?” अपने बारे माहीं हमहीं बताबा, जउने हम पंचे अपने पठमँइ बालेन काहीं जबाब दइ सकी।<sup>23</sup> यूहन्ना बपतिस्मा देँइ बाले कहिन, “जइसन परमातिमा के सँदेस बतामँइ बाले यसायाह नबी कहिन हीं, कि ‘हम सुनसान जघा माहीं गोहरामँइ बाले के अबाज आहेन’ काहेकि प्रभू आमँइ बाले हैं, तूँ पंचे अपने मन काहीं सँऊँ गइल कि नाई तइआर करा।”

<sup>24</sup> जिनहीं फरीसी पठइन रहा हय।<sup>25</sup> उँ पंचे यूहन्ना बपतिस्मा देँइ बाले से पूँछिन, “तूँ न त मसीह आह्या, अउर न एलिय्याह आह्या, अउर न त उआ परमातिमा के सँदेसय बतामँइ बाले आह्या, त पुनि बपतिस्मा काहे देते हय?”<sup>26</sup> यूहन्ना बपतिस्मा देँइ बाले उनहीं जबाब दिहिन, कि “हम त पानी से बपतिस्मा देइत हएन; पय तोंहरे बीच माहीं एक जने ठाढ़ हैं, जिनहीं तूँ पंचे नहीं जनते आह्या, कि ई को आहीं।<sup>27</sup> ई उँइन आहीं, जउन हमरे बाद आमँइ बाले हैं, जिनखे पनहीं के डोरव तक छोरेँइ के काबिल हम नहीं आहेन।”<sup>28</sup> ई बातँय यरदन नदी के दुसरे पार बैतनिय्याह गाँव माहीं भई, जहाँ यूहन्ना बपतिस्मा देँइ बाले, बपतिस्मा देत रहे हँय।

### परमातिमा के मेम्ना

<sup>29</sup> दुसरे दिन यूहन्ना बपतिस्मा देँइ बाले, यीसु काहीं अपनी कइती आबत देखिके कहिन, “देखा, ई परमातिमा के मेम्ना आहीं, जउन संसार के मनइन के पाप उठाय लइ जइहँय।<sup>30</sup> ई उँइन आहीं, जिनखे बारे माहीं हम कहन रहा हय, कि एकठे मनई जउन हमरे बाद आमँइ बाले हैं, उँ हमसे खुब महान हैं, काहेकि उँ हमरे पड़दा होंइ से पहिले रहे हँय।<sup>31</sup> अउर हम खुदय उनहीं नहीं पहिचानत रहेन आय, पय हम पानी से बपतिस्मा एसे देत आए हएन, कि जउने इजराइल देस के सगले मनई इआ जान लेंय, कि उँ को आहीं।<sup>32</sup> अउर यूहन्ना इआ गबाही दिहिन, कि हम पबित्र आत्मा काहीं परेबा के रूप माहीं स्वरग से नीचे उतरत देखेन हय, अउर पबित्र आत्मा उनखे ऊपर आइके ठहरिगा।<sup>33</sup> अउर हम त उनहीं पहिचानत नहीं रहेन, पय जउन हमहीं पानी से बपतिस्मा देँइ काहीं पठइन हीं, उँइन हमसे कहिन, कि जेखे ऊपर तूँ पबित्र आत्मा काहीं उतरत अउर ठहरत देख्या; उँइन मनइन काहीं पबित्र आत्मा से बपतिस्मा देँइ बाले आहीं।<sup>34</sup> अउर हम देखेन हँय, अउर इआ गबाही देइत हएन, कि ईन परमातिमा के लड़िका आहीं।”

### यीसु के पहिल चेला लोग

<sup>35</sup> दुसरे दिन पुनि यूहन्ना अउर उनखे चलन म से दुइ जने ठाढ़ रहे हँय।<sup>36</sup> अउर यूहन्ना बपतिस्मा देँइ बाले यीसु काहीं लघे से जात देखिके कहिन, “देखा, ई परमातिमा के मेम्ना आहीं।”<sup>37</sup> जब उँ दोनव चेला उनहीं इआ कहत सुनिन, त उँ पंचे यीसु के पीछे चलेगें।<sup>38</sup> यीसु पीछे कइती मुड़िके, उनहीं अपने पीछे आबत देखिके उनसे कहिन, “तूँ पंचे केही ढुँढ़ते हय?” उँ पंचे उनसे कहिन, “हे गुरू अपना कहाँ रहित हएन?” यीसु उनसे कहिन, “चलिके खुदय देख ल्या।”<sup>39</sup> तब उँ पंचे आइके उनखे रहँइ के जघा देखिन, अउर उआ दिना उँ पंचे उनहिन के साथ रहिगें; काहेकि साँझिके करीब चार बजिगा रहा हय।

<sup>40</sup> यूहन्ना बपतिस्मा देँइ बाले के बात काहीं सुनिके, जउन यीसु के पीछे चलेगे रहे हँय, उँ दोनव म से एकठे त समौन पतरस के भाई अन्दियास रहे हँय।<sup>41</sup> उँ पहिले अपने सग भाई समौन से मिलिके उनसे कहिन, कि हमहीं ख्रिस्त अरथात मसीह मिलगे हँय।<sup>42</sup> उँ समौन काहीं यीसु के लघे लइ आएँ: त यीसु उनहीं देखिके कहिन, “तूँ यूहन्ना के लड़िका समौन आह्या, तूँ कैफा अरथात पतरस कहइहा।”

### फिलिप्पुस अउर नतनएल काहीं बोलाबा जाब

<sup>43</sup> दुसरे दिन यीसु गलील प्रदेस काहीं जाँइ के निश्चय किहिन; अउर फिलिप्पुस से मिलिके कहिन, “हमरे पीछे चले आबा।”<sup>44</sup> फिलिप्पुस त अन्दियास अउर पतरस के गाँव बैतसैदा के रहँइ बाला रहा हय।<sup>45</sup> ओखे बाद फिलिप्पुस जाइके नतनएल से मिलें, अउर उनसे कहिन, कि जेखर बखान मूसा नबी बिधान माहीं लिखिन हीं, अउर परमातिमा के सँदेस बतामँइ बाले घलाय अपने किताबन माहीं लिखिन हीं, उँ हमहीं मिलिगे हँय; उँ नासरत गाँव माहीं रहँइ बाले यूसुफ के लड़िका यीसु आहीं।<sup>46</sup> तब नतनएल फिलिप्पुस से कहिन, “का नासरत गाँव से घलाय कउनव निकही चीज पड़दा होइ सकत ही?” फिलिप्पुस उनसे कहिन, “चलिके खुदय देख ल्या।”<sup>47</sup> अउर यीसु नतनएल काहीं अपने कइती आबत देखिके, उनखे बारे माहीं कहिन, “देखा, ई आहीं, सच्चे इजराइली, इनखे जीवन माहीं कउनव कपट नहिं आय।”<sup>48</sup> नतनएल यीसु से पूँछिन, “अपना हमहीं कइसा जानित हएन?” तब यीसु उनहीं जबाब दिहिन, “फिलिप्पुस के तोहई बोलामँइ से पहिले, जब तूँ अंजीर के बिरबा के नीचे बइठ रहे हय, तब हम तोंहई देखेन तय।”<sup>49</sup> तब नतनएल जबाब दिहिन, “हे गुरू, अपना त परमातिमा के लड़िका अउर इजराइल के महाराजा आहेन।”<sup>50</sup> तब यीसु उनहीं जबाब दिहिन, कि हम तोंहसे जउन कहेन, कि हम तोंहई अंजीर के बिरबा के नीचे देखेन हय, त का तूँ एहिन से बिसुआस करते हय, तूँ एहू से बड़े-बड़े काम करत हमहीं देखिहा।<sup>51</sup> पुनि यीसु उनसे कहिन, कि “हम तोंहसे सही-सही कहित हएन, कि तूँ स्वरग काहीं खुला, अउर परमातिमा के स्वरगदूतन काहीं मनई के लड़िका † के लघे उतरत अउर ऊपर जात देखिहा।”

### काना गाँव माहीं यीसु के पहिल चमत्कार

**2** एखे बाद तिसरे दिन गलील प्रदेस के काना गाँव माहीं कोहू के काज होत रहा हय, अउर यीसु के महतारी घलाय उहाँ नेउते माही रही हँय।<sup>2</sup> यीसु अउर उनखे चलन काहीं घलाय उआ बिआह माहीं नेउता दीन ग रहा हय।<sup>3</sup> उहाँ जब अंगूर के रस चुकिगा, तब यीसु के महतारी यीसु से कहिन, कि उनखे लघे अंगूर के रस अब एक्कव नहिं आय।<sup>4</sup> तब यीसु उनसे कहिन, “हे अम्मा, † अपना हमहीं इआ काहे बताइत हएन? हमरे काम करँइ के समय अबे नहीं आबा आय।”<sup>5</sup> उनखर महतारी सेबा करँइ बालेन से कहिन, “यीसु जउन कुछ तोंहसे कहँय, उहय किहा।”<sup>6</sup> यहूदी धरम के नेम के मुताबिक हाँथ-मुँह धोमँइ, अउर कुछ चीजन काहीं धोइके सुद्ध करँइ के

† 1:51 उत्प 28:12 † यूनानी भाँसा माहीं “हे नारी” लिखा हय

खातिर, पानी भरँड बाले पथरा के छयठे मटका धरे रहे हँय, जउनेन माहीं 80 से 120 लीटर तक पानी समात रहा हय।<sup>7</sup> यीसु ऊँ सेबकन से कहिन, ई मटकन माहीं पानी भर द्या: तब सगले सेबक ऊँ मटकन माहीं फुल्ल-फुल्ल पानी भर दिहिन।<sup>8</sup> तब यीसु ऊँ सेबकन से कहिन, अब थोर काहीं निकारिके खाँय-पिअँड के प्रबन्ध करँड बाले मुखिया के लघे लइजा।<sup>9</sup> तब ऊँ पंचे लइगें, जब खाँय-पिअँड के प्रबन्ध करँड बाले मुखिया उआ पानी काहीं पीन, जउन अंगूर के रस बनिगा रहा हय, अउर ऊँ नहीं जानत रहें, कि इआ अंगूर के रस कहाँ से आबा हय, (पय जउन सेबक पानी निकारिन रहा हय, ऊँ पंचे जानत रहे हँय) तब खाँय-पिअँड के प्रबन्ध करँड बाले मुखिया, दुलहा काहीं बोलाइके, उनसे कहिन।<sup>10</sup> “हरेक मनई पहिले निकहा अंगूर के रस देत हय, अउर जब मनई पिके अघाय जात हें, तब उआ ओसे कम निकहा देत हय, पय तूँ अबय तक निकहा अंगूर के रस धरे हया।”<sup>11</sup> यीसु गलील प्रदेश के काना गाँव माहीं, इआ पहिल चमत्कार देखाइके, अपने महिमा काहीं देखाइन, इआ देखिके उनखर चेला लोग उनखे ऊपर बिसुआस किहिन।<sup>12</sup> एखे बाद यीसु, अपने महतारी, भाई अउर चेला लोगन के साथ कफरनहूम सहर माहीं गें, अउर उहाँ कुछ दिना रहें।

### मन्दिर से बड़पारिन काहीं निकारब

(मत्ती 21:12,13; मरकुस 11:15-17; लूका 19:45,46)

<sup>13</sup> यहूदी लोगन के फसह नाम के तेउहार लघेन रहा हय, एसे यीसु यरूसलेम सहर माहीं गें।<sup>14</sup> अउर यीसु मन्दिर माहीं बरधा, गाड़ अउर परेबा के बेंचँड बालेन काहीं, अउर रुपिआ-पइसा के लेन-देन करँड बालेन काहीं बड़ठे पाइन।<sup>15</sup> तब यीसु रस्सिन के चाबुक बनाइन, अउर सगले गड़रन अउर बरधन काहीं बहिरे भगाय दिहिन, अउर रुपिआ-पइसा के लेन-देन करँड बालेन के पइसा बिथराय दिहिन, अउर उनखे पिढबन काहीं उलटाय दिहिन।<sup>16</sup> अउर परेबा बिकनँय बालेन से कहिन, “इनहीं इहाँ से लइजा: हमरे पिता के घर काहीं बड़पार के घर न बनाबा।”<sup>17</sup> तब उनखे चलन काहीं सुधि आई, कि पबित्र सास्त्र माहीं लिखा हय, कि “अपना के घर † काहीं सुद्ध बनाए रहँड के हमार लगन, एक दिन हमार जान लइ लेई।”<sup>18</sup> इआ देखिके यहूदी धारमिक अँगुआ लोग यीसु से कहिन, तूँ जउन इआ काम करते हया, त हमहीं पंचन काहीं कउन अदभुत चिन्हारी देखउते हया? <sup>19</sup> यीसु उनहीं जबाब दिहिन; कि “इआ मन्दिर काहीं गिराय द्या, अउर हम एही तीन दिना के माहीं बनाय देब।”<sup>20</sup> इआ सुनिके यहूदी धारमिक अँगुआ लोग कहिन, “इआ मन्दिर काहीं बनामँड माहीं छियालिस बरिस लाग हें, अउर का तूँ, एही तीन दिना माहीं बनाय देइहा?”<sup>21</sup> पय यीसु त अपने देह के मन्दिर के बारे माहीं कहिन रहा हय।<sup>22</sup> एखे बाद जब यीसु मरे के बाद पुनि जिन्दा होइगें, तब उनखे चलन काहीं सुधि आई, कि ऊँ इआ कहिन रहा हय, अउर ऊँ पंचे उनखे बारे माहीं पबित्र सास्त्र माहीं लिखे बचन, अउर उआ बचन के जउन यीसु कहिन तय, बिसुआस किहिन।

### यीसु मनइन के मन काहीं जानत हें

<sup>23</sup> फसह के तेउहार के दिनन माहीं, जब यीसु यरूसलेम सहर माहीं रहे हँय, तब खुब मनई ऊँ अदभुत चिन्हारिन काहीं देखिके, जउन ऊँ देखाबत रहे हँय, उनखे ऊपर बिसुआस किहिन।<sup>24</sup> पय यीसु अपने-आप काहीं उनखे भरोसे माहीं नहीं छोड़िन, काहेकि ऊँ सगले मनइन काहीं जानत रहे हँय।<sup>25</sup> यीसु काहीं इआ बात के जरूरत नहीं रही आय, कि कोऊ आइके मनई के बारे माहीं उनहीं बताबय, काहेकि ऊँ खुदय जानत रहे हँय, कि मनइन के मन माहीं का हय?

### यीसु अउर नीकुदेमुस

**3** उहाँ फरीसी लोगन म से एकठे मनई रहे हँय, जिनखर नाम नीकुदेमुस रहा हय, ऊँ यहूदी समाज के मुखिया रहे हँय।<sup>2</sup> ऊँ रात

† कि ईन मसीह आहीं †† 2:17 भज 69:9

माहीं यीसु के लघे आइके उनसे कहिन, “हे गुरू, हम पंचे जानित हएन, कि अपना परमातिमा के तरफ से गुरू बनिके आपन हँय; काहेकि जउन चमत्कार अपना करित हएन, परमातिमा के मदत के बिना कोऊ नहीं कइ सकय।”<sup>3</sup> यीसु उनहीं जबाब दिहिन, “हम तौहसे सही-सही कहित हएन, अगर कउनव मनई नबा जनम न लेई, त उआ परमातिमा के राज काहीं नहीं देख सकय।”<sup>4</sup> तब नीकुदेमुस उनसे कहिन, “मनई जब बढाय जात हय, त उआ कइसन दुसराय जनम लइ सकत हय? का उआ अपने महतारी के पेटे माहीं जाइके दुसराय जनम लइ सकत हय?”<sup>5</sup> तब यीसु उनहीं जबाब दिहिन, “हम तौहसे सही-सही कहित हएन; कि जब तक कउनव मनई पानी अउर पबित्र आत्मा से जनम न लेई, त उआ परमातिमा के राज माहीं प्रबेस नहीं कइ सकय।<sup>6</sup> काहेकि जऊँ मनई से पइदा होत हय, ओखे मनई के सुभाव रहत हय; अउर जउन पबित्र आत्मा से पइदा होत हय, ओखे पबित्र आत्मा के सुभाव रहत हय।<sup>7</sup> चउ आ न, जउन हम तौहसे कहेन हय: कि ‘तौहई नबा जनम लेब जरूरी हय।’<sup>8</sup> हम तौहई समझाइत हएन, हबा जउनी कइती चाहत ही, ओहिन कइती चलत ही, अउर तूँ ओखर अबाज भर सुनते हया, पय इआ नहीं जाने पउते आह्या, कि उआ कहाँ से आबत ही, अउर कउनी कइती जात ही? जे कोऊ पबित्र आत्मा से पइदा होत हय, उआ इहइमेर होत हय। जइसा हबा के बारे माहीं नहीं जाने पउते आह्या, उहयमेर पबित्र आत्मा से जन्मे मनइव के बारे माहीं न जाने पइहा।”<sup>9</sup> तब नीकुदेमुस उनहीं जबाब दिहिन; कि “इआ कइसा होइ सकत हय?”<sup>10</sup> इआ बात सुनिके यीसु उनसे कहिन, “तूँ इजराइली लोगन के गुरू होइके, का ई बातन काहीं नहीं समझ त्या।<sup>11</sup> हम तौहसे सही-सही कहित हएन, कि हम जउन जानित हएन, उहय कहित हएन, अउर जउने काहीं हम देखेन हय, ओहिन काहीं बताइत हएन, अउर तूँ पंचे हमरे बातन के बिसुआस नहीं मनते आह्या।<sup>12</sup> जब हम तौहसे धरती माहीं होइ बाली बातन काहीं बताएन, अउर तूँ पंचे उनखे ऊपर बिसुआस नहीं करते आह्या, त अगर हम तौहसे स्वरग माहीं होइ बाली बातन काहीं बताई, त उनखे ऊपर कइसन बिसुआस करिहा? <sup>13</sup> काहेकि ऊपर स्वरग माहीं कोऊ नहीं ग आय, केबल ऊँ जउन स्वरग से उतरिके आए हँय, अरथात मनई के लइका †।<sup>14</sup> अउर जउनमेर से मूसा नबी सुनसान जघा माहीं पीतल के साँप † काहीं ऊँच खम्भा माहीं लटकाइन रहा हय, उहयमेर से इआ जरूरी हय, कि मनई के लइकव ऊँचे माहीं अरथात क्रूस माहीं लटकाबा जाय।<sup>15</sup> जउने जे कोऊ उनखे ऊपर बिसुआस करँय, ऊँ अनन्त जीवन पामँय।<sup>16</sup> काहेकि परमातिमा संसार के मनइन से एतना प्रेम किहिन, कि ऊँ अपने एकलउता लइका काहीं दइ दिहिन, कि जउने उनखे ऊपर जे कोऊ बिसुआस करँय, ऊँ नास न होय, पय अनन्त जीवन पामँय।<sup>17</sup> परमातिमा अपने लइका काहीं संसार माहीं एसे नहीं पठइन, कि ऊँ संसार के मनइन काहीं सजा देइ, बलकिन एसे पठइन हीं, कि संसार के मनई उनखे व्दारा मुक्ती पामँय।<sup>18</sup> जे कोऊ उनखे ऊपर बिसुआस करत हय, उआ दोसी न ठहराबा जई, पय जे कोऊ उनखे ऊपर बिसुआस न करी, उआ दोसी ठहर चुका हय, काहेकि उआ परमातिमा के एकलउता लइका के ऊपर बिसुआस नहीं किहिस आय।<sup>19</sup> अउर उनहीं सजा देइ के कारन इआ हय, कि परमातिमा के लइका जोति के रूप माहीं संसार माहीं आएँ हँय, अउर संसार के मनई पाप रूपी आँधिआर काहीं, जोति से जादा पियार जानिन, काहेकि उनखर काम बुरे रहे हँय।<sup>20</sup> काहेकि जे कोऊ बुरे काम करत हय, उआ जोति से दुसमनी रक्खत हय, अउर जोति के लघे नहीं आबय, कहँव अइसा न होय कि ओखे कामन के ऊपर दोस लगाबा जाय।<sup>21</sup> पय जे कोऊ सत्य माहीं चलत हय, उआ जोति के लघे आबत हय, जउने ओखर काम देखँय, कि ऊँ परमातिमा के तरफ से कीन गे हँय।”

‡ एचओबी माहीं लिखा हय मनई के लइका जउन स्वरग माहीं हय। †† 3:14 गिन 21:8,9

### यीसु के बारे माहीं यूहन्ना बपतिस्मा देइ बाले के गबाही

22 एखे बाद यीसु अपने चेलन के साथ यहूदिया प्रदेस माहीं यहूदी लोगन के लघे आएँ; अउर ऊँ उहाँ उनखे साथय माहीं रहिके बपतिस्मा देइ लागें।  
 23 अउर यूहन्ना घलाय सालेम गाँव के लघे एनोन नाम के जघा माहीं बपतिस्मा देत रहे हँय, अउर मनई आइके बपतिस्मा लेत रहे हँय, काहेकि उहाँ खुब पानी रहा हय।  
 24 उआ समय तक यूहन्ना बपतिस्मा देइ बाले काहीं जेल माहीं नहीं बंद कीन ग रहा आय।  
 25 उहाँ यूहन्ना के चेलन के कउनव यहूदी के साथ सुद्ध होंय के बिधी के बारे माहीं बाद-बिबाद होइगा।  
 26 अउर ऊँ पंचे यूहन्ना के लघे आइके उनसे कहिन, “हे गुरू, जउन मनई यरदन नदी के उआ पार अपना के साथ रहे हँय, अउर जेखे बारे माहीं अपना बताए रहेन हय, देखी ऊँ बपतिस्मा देत हँ, अउर खुब जने उनखे लघे आबत हँ।”  
 27 तब यूहन्ना उनहीं जबाब दिहिन कि, “कउनव मनई काहीं तब तक कुछू नहीं मिल सकय, जब तक ओही स्वरग से न दीन जाय।”  
 28 तूँ पंचे त खुदय हमार गबाह हया, कि हम कहेन तय कि, “हम मसीह न होहैन, बलकिन उनखे आँगे पठए गएन हय।”  
 29 दुलहा उहय आय जेही दुलहिन मिलत ही। पय दुलहा के साथी जउन दुलहा के बोल काहीं सुनत हय, त खुब खुस होत हय; उहयमेर तौहसे उनखे बारे माहीं सुनिके अब हमार इआ आनन्द पूर होइगा हय।  
 30 अब जरूरी हय, कि उनखर महानता बढ़य, अउर हमार घटय।  
 31 यूहन्ना बपतिस्मा देइ बाले पुनि कहिन, जे ऊपर से आबत हय, उआ महान हय, जउन धरती माहीं पइदा होत हय, उआ धरतिन के आय, एसे उआ धरतिन के बात करत हय: पय जउन स्वरग से आबत हय, उआ सगलेन से बढ़िके हय।  
 32 ऊँ जउन कुछू देखिन, अउर सुनिन हीं, ओहिन काहीं बताबत हँ; पय उनखे गबाही काहीं कोऊ सोइकार नहीं करय।  
 33 जे कोऊ उनखे गबाही काहीं सोइकार कइ लिहिस ही, उआ इआ बात के गबाही देत हय, कि परमातिमा सच्चे हँय।  
 34 काहेकि जेही परमातिमा पठइन हीं, उआ परमातिमा के बातन काहीं कहत हय: काहेकि परमातिमा ओही पबित्र आत्मा के अनन्त दान दिहिन हीं।  
 35 परमपिता अपने लड़िका से पियार करत हँ, अउर उनहिन के हाँथे माहीं सगली चीजन काहीं सँउप दिहिन हीं।  
 36 एसे जे कोऊ उनखे लड़िका के ऊपर बिसुआस करत हय, उहय अनन्त जीवन पाबत हय, पय उआ जउन परमातिमा के लड़िका के बात नहीं मानय, ओही उआ अनन्त जीवन न मिली, बलकिन एखे जघा माहीं ओखे ऊपर परमातिमा के क्रोध बना रही।

### सामरी जाति के मेहेरिआ से यीसु के बात

4 एखे बाद जब यीसु काहीं पता चला, कि फरीसी लोग सुनिन हीं, कि यीसु यूहन्ना बपतिस्मा देइ बाले से जादा चेला बनाबत हँ, अउर उनहीं बपतिस्मा देत हँ।  
 2 (जबकि यीसु खुद बपतिस्मा नहीं देत रहे आँय, बलकिन उनखर चेला बपतिस्मा देत रहे हँय।)  
 3 इआ सुनिके यीसु यहूदिया प्रदेस काहीं छोड़िके, पुनि गलील प्रदेस माहीं चलेगें।  
 4 अउर उनहीं सामरिया प्रदेस होइके जाब जरूरी रहा हय।  
 5 तब ऊँ सामरिया प्रदेस के सूखार नाम के सहर माहीं पहुँचे, जउन उआ भुँड के लघे रहा हय, जउने काहीं याकूब अपने लड़िका यूसुफ काहीं दिहिन रहा हय।  
 6 उहाँ याकूब के बनबाई कुँइआ घलाय रही हय। यीसु इआ यात्रा माहीं खुब थकिये रहे हँय, एसे ऊँ कुँआ के लघे बइठिगें।  
 7 उआ समय करीब दुपहर के बारा बजे रहे हँय।  
 8 एतनेन माहीं उहाँ एकठे सामरिया प्रदेस के सामरी जाति के मेहेरिआ पानी भरँय आई: तब यीसु ओसे कहिन, हमहीं पानी पिआबा।  
 9 उआ समय उनखर चेला लोग सहर माहीं खाना खरीदँय चलेगे रहे हँय।  
 10 उआ सामरी जाति के मेहेरिआ उनसे कहिस, अपना यहूदी जाति के होइके हमसे जउन सामरी जाति के मेहेरिआ आहैन, त पानी काहे मागित हएन? (काहेकि यहूदी लोग सामरी जाति के मनइन काहीं छोट जाति मानत रहे हँय, एसे उनसे कउनव मेर के सम्बन्ध नहीं रक्खत रहे आँय।)  
 11 यीसु ओही जबाब दिहिन, “अगर तूँ परमातिमा के बरदान काहीं जन त्या, अउर इहव जन त्या कि ऊँ को आहीं,

जउन तौहसे कहत हँ, कि हमहीं पानी पिआबा; त तूँ उनसे मग त्या, अउर ऊँ तौहई जीवन देइ बाला पानी देतें।”  
 11 उआ मेहेरिआ उनसे कहिस, “हे प्रभू, अपना के लघे त पानी भरँइ के खातिर कुछू हइअव नहीं आय, अउर कुँआ गहिल ही: त फेर उआ जीवन देइ बाला पानी अपना के लघे कहाँ से आबा? ”  
 12 का अपना हमरे पूरबज याकूब से बड़े हएन, जे हमहीं पंचन काहीं इआ कुँआ दिहिन हीं; अउर खुदय अपने लड़िकन-बच्चन समेत एखर पानी पीन, अउर अपने मबेसिन काहीं घलाय पिआइन रहा हय।”  
 13 यीसु ओही जबाब दिहिन, कि “जे कोऊ इआ कुँआ के पानी पी ओही पुनि पिआस लागी।  
 14 पय जे कोऊ उआ पानी पी, जउन हम ओही देब, उआ पुनि अनन्तकाल तक पियासा न होई: बलकिन जउन पानी हम ओही देब, ओखे जीवन माहीं एकठे झिन्ना बन जई, अउर अनन्त जीवन देइ के खातिर झिरिके बहतय रही।”  
 15 तब उआ मेहेरिआ कहिस, “हे प्रभू, उआ पानी हमहीं दइ देई, जउने हम पिआसी न होई, अउर न पानी भरँइ एतनी दूरी अई।”  
 16 यीसु ओसे कहिन, “जा, अपने मंसेरुआ काहीं इहाँ बोलाय लाबा।”  
 17 उआ मेहेरिआ उनहीं जबाब दिहिस, कि “हम बिना मंसेरुआ के हएन।”  
 18 यीसु ओसे कहिन, “तूँ ठीक कहते हया, कि हम बिना मंसेरुआ के हएन।  
 18 काहेकि तूँ पाँचठे मंसेरुआ कइ चुके हया, अउर जेखे लघे अबय तूँ रहते हया, उहव तौहार मंसेरुआ न होय; इआ तूँ बेलकुल सही बताया हय।”  
 19 इआ बात काहीं सुनिके उआ मेहेरिआ उनसे कहिस, “हे प्रभू, हमहीं त लागत हय, कि अपना परमातिमा के सँदेस बतामँइ बाले आहैन।  
 20 हमार पंचन के पूरबज इहय पहार माहीं अराधना करत रहे हँय: अउर अपना पंचे यहूदी जाति बाले कहित हएन, कि उआ जघा यरूसलेम सहर माहीं हय, जहाँ अराधना करँइ चाही।”  
 21 यीसु ओसे कहिन “हे बहिनी, हमरे बात के बिसुआस माना, उआ समय आमँइ बाला हय, कि तूँ पंचे न त इआ पहार माहीं पिता परमातिमा के अराधना करिहा, न यरूसलेम सहर माहीं।  
 22 तूँ पंचे जेही नहीं जनते आह्या, ओखर अराधना करते हया: अउर हम पंचे जेही जानित हएन ओखर अराधना करित हएन; काहेकि मनइन काहीं मुक्ती यहूदी लोगन म से मिली।  
 23 पय उआ समय आमँइ बाला हय, बलकिन अबहिनव हय, जउने माहीं सच्चे भक्त पिता परमातिमा के अराधना आत्मा अउर सच्चाई से करिहँय, काहेकि पिता परमातिमा अपने खातिर इहइमेर अराधना करँइ बालेन काहीं ढूँढत हँ।”

### परमातिमा आत्मा आहीं

24 परमातिमा आत्मा आहीं, एसे जरूरी हय, कि उनखर अराधना करँइ बाले आत्मा अउर सच्चाई से अराधना करँय।  
 25 उआ मेहेरिआ उनसे कहिस, “हम जानित हएन कि, ख्रिस्त जउन मसीह कहाबत हँ, आमँइ बाले हँ; ऊँ जब अइहँय, तब हमहीं पंचन काहीं सगली बातँय बताय देइहँय।”  
 26 यीसु ओसे कहिन, “हम जउन तौहसे बात कइ रहेन हँय, उहय आहैन।”

### चेलन के लउटब

27 एतनेन माहीं उनखर चेला लोग आइगें, अउर उनहीं इआ देखिके बड़ा अचरज भ, कि यीसु एकठे मेहेरिआ से बात कइ रहे हँय, तऊ इआ पूछँइ के कोहू के हिम्मत नहीं परी, कि अपना का चाहित हएन? इआ कि काहे के खातिर ओसे बात करित हएन।  
 28 तब उआ मेहेरिआ आपन गधरा उड़ँइ छोड़िके सहर माहीं चली गय, अउर मनइन से कइहँइ लाग।  
 29 “आबा, एकठे मनई काहीं देखा, ऊँ, जउन कुछू हम किहेन तय, ऊँ सगली बातँय हमहीं बताय दिहिन हीं: कइहँव ईन त मसीह न होहीं?”  
 30 एसे सहर के मनई, सहर से निकरिके यीसु के लघे आमँइ लागें।  
 31 एतने माहीं यीसु के चेला लोग उनसे बिनती करँइ लागें, “हे गुरू अपना कुछू खाय लेई।”  
 32 पय यीसु उनसे कहिन, “हमरे लघे खाँय के खातिर अइसन खाना हय, जेखे बारे माहीं तूँ पंचे नहीं जनते आह्या।”  
 33 तब चेला लोग आपस माहीं कइहँइ लागें, कोऊ उनखे खाँय के खातिर कुछू लइ आबा हय का? ”  
 34 यीसु उनसे कहिन, “हमार खाना इआ आय, कि हम अपने पठमँइ बाले के मरजी के मुताबिक

चली, अउर उनखर काम पूर करी।<sup>35</sup> का तूँ पंचे इआ नहीं कहते आह्या, कि कटाई होंय माहीं अबे चार महीना बाँकी हय? पय देखा, हम तोंहसे कहित हएन, बड़े ध्यान से खेतन कइती निहारा, कि ऊँ सगले कटाई करई के खातिर पकि चुके हँय।<sup>36</sup> अउर कटाई करई बाला मजूरी पाबत हय, अउर अनन्त जीवन के खातिर दाना एकट्टा करत हय; जउने बोमँइ बाला, अउर काटँय बाला दोनव जने मिलिके आनन्द करँय।<sup>37</sup> काहेकि एमाहीं इआ कहाबत ठीक बइठत ही; कि बोमँइ बाला अउर हय, अउर काटँय बाला अउर हय।<sup>38</sup> हम तोंहई पंचन काहीं खेत काटँय के खातिर पठयन हय, जउने माहीं तूँ पंचे मेहनत नहीं किहा: दूसर मेहनत किहिन: अउर उनखे मेहनत के फर तोंहई पंचन काहीं मिला हय।”<sup>39</sup> अउर उआ सहर के सामरी जाति के खुब मनई उआ मेहेरिआ के कहे से, जउन इआ बताइस रहा हय, कि ऊँ जउन कुछू हम किहेन तय, ऊँ सगली बातँय हमहीं बताय दिहिन हीं, अउर ऊँ पंचे बिसुआस किहिन।<sup>40</sup> अउर जब सामरी जाति के खुब मनई यीसु के लघे आइके, उनसे बिनती करई लागें, कि “अपना हमरे पंचन के इहाँ रही”: एसे यीसु उहाँ दुइ दिन तक रुके रहिगें।<sup>41</sup> अउर यीसु के बचन काहीं सुनिके, उनमा से खुब जने उनखे ऊपर बिसुआस किहिन।<sup>42</sup> अउर ऊँ पंचे उआ मेहेरिआ से कहिन, “अब हम पंचे तोंहरे बताएन भर से बिसुआस नहीं करी; काहेकि हम पंचे खुदय उनखर बचन सुने हएन, अउर जान गएन हय, कि वास्तव माहीं संसार के मनइन काहीं मुक्ती देंइ बाले ईन आहीं।”

### राजा के कर्मचारी के लड़िका काहीं यीसु नीक किहिन

<sup>43</sup> उहाँ दुइ दिन रहे के बाद यीसु अपने चलन के साथ गलील प्रदेश काहीं चल दिहिन।<sup>44</sup> (काहेकि यीसु खुदय गबाही दिहिन हीं, कि परमातिमा के सँदेस बतामँइ बाला, अपने गाँव माहीं मान-सम्मान नहीं पाबय।)<sup>45</sup> जब यीसु गलील प्रदेश माहीं पहुँचे, तब गलील प्रदेश माहीं रहँइ बाले मनई बड़े आनन्द के साथ उनसे मिलें; काहेकि जेतने चमत्कार के काम यीसु यरूसलेम सहर माहीं, तेउहार के समय माहीं किहिन रहा हय, ऊँ पंचे उन सगले कामन काहीं देखिन तय, काहेकि ऊँ पंचे घलाय तेउहार मनामँइ के खातिर यरूसलेम सहर माहीं गें तय।<sup>46</sup> यीसु ओखे बाद गलील प्रदेश के काना गाँव माहीं आएँ, जहाँ ऊँ पानी काहीं अंगूर के रस बनाइन रहा हय: उहाँ राजा के एकठे कर्मचारी रहा हय, जेखर लड़िका कफरनहूम सहर माहीं बिमार रहा हय।<sup>47</sup> जब ऊँ इआ सुनिन कि यीसु यहूदिया प्रदेश से गलील प्रदेश माहीं आइगें हँय, तब उनखे लघे गें, अउर उनसे बिनती कइके कहँइ लागें, कि अपना चलिके हमरे लड़िका काहीं नीक कइ देई: काहेकि उआ खुब बिमार रहा हय, लागत रहा हय कि मर जई।<sup>48</sup> यीसु उनसे कहिन, “जब तक तूँ पंचे चिन्हारी अउर अचरज के काम न देखिहा, तब तक कबहूँ बिसुआस न करिहा।”<sup>49</sup> तब राजा के ऊँ कर्मचारी उनसे कहिन, “हे प्रभू, अपना हमरे लड़िका के मरई से पहिले चली।”<sup>50</sup> यीसु उनसे कहिन, “जा तोंहार लड़िका जिअत रही” यीसु के कही बातन के बिसुआस मानिके, ऊँ राजा के कर्मचारी अपने घर काहीं चल दिहिन।<sup>51</sup> जब ऊँ घर काहीं लउटत रहे हँय, तब गइलय माहीं उनखर दास लोग मिलें, अउर उनहीं बताइन, कि अपना के लड़िका नीक होइगा हय।<sup>52</sup> तब ऊँ अपने दासन से पूँछिन, कि “बताबा उआ केतनीदार से नीक होइ लाग रहा हय?” ऊँ पंचे उनसे कहिन, “काल्ह दुपहर एक बजे उनखर बोखार उतरि गे रही हय।”<sup>53</sup> तब लड़िका के बाप जानि ग, कि उआ उहय समय माहीं नीक भ रहा हय, जेतनीदार यीसु उनसे कहिन रहा हय, कि “तोंहार लड़िका जिअत रही” तब ऊँ राजा के कर्मचारी अउर उनखे घर माहीं जेतने मनई रहे हँय, सगले जने यीसु के ऊपर बिसुआस किहिन।<sup>54</sup> इआ दूसर अचरज के काम आय जउने काहीं यीसु यहूदिया प्रदेश से आइके गलील प्रदेश माहीं किहिन रहा हय।

### अरतिस बरिस से बिमार मनई काहीं नीक करब

5 एखे बाद यहूदी लोगन के एकठे तेउहार आबा, अउर तेउहार मनामँइ के खातिर यीसु यरूसलेम सहर माहीं गें।<sup>2</sup> यरूसलेम सहर माहीं भेंड-

फाटक के लघे एकठे तलाव हय, जउन इब्रानी भाँसा माहीं बेतहसदा कहाबत हय, अउर ओखे किनारे पाँचठे बरामदा बने हँय।<sup>3</sup> ओमाहीं खुब बिमार, आँधर, लाँगइ, अउर लोकबा के मारे मनई (पानी के हालँइ के आसा माहीं) परे रहत रहे हँय।<sup>4</sup> काहेकि समय-समय माहीं परमातिमा के स्वरगदूत तलाव माहीं उतरिके, पानी हलाबत रहे हँय: पानी के हलतय जे कोऊ पहिले पानी माहीं घुस जात रहा हय, उआ नीक होइ जात रहा हय, चाह ओखे कउनव बिमारी रही होय।

<sup>5</sup> उहाँ परे बिमारन म से एकठे मनई अइसा रहा हय, जउन अरतिस बरिस से बिमार रहा हय।<sup>6</sup> यीसु उआ बिमार मनई काहीं परा देखिके, अउर इआ जानिके, कि उआ खुब दिना से इहय हालत माहीं परा हय, ओसे पूँछिन, “का तूँ नीक होइ चहते हया?”<sup>7</sup> उआ बिमार मनई उनहीं जबाब दिहिस, “हे प्रभू, हमरे लघे अइसा कउनव मनई नहिँ आय, कि जब पानी हलाबा जात हय, त हमहीं तलाव के पानी माहीं लइ जाय; पय पानी के लघे हमरे पहुँचत-पहुँचत दूसर कोऊ हमसे पहिले पानी माहीं हिल परत हय।”<sup>8</sup> तब यीसु ओसे कहिन, “उठा, आपन खटिया उठाबा, अउर चला फिरा।”<sup>9</sup> उआ बिमार मनई हरबिन नीक होइगा, अउर आपन खटिया उठाइके चलँय-फिरँय लाग।

<sup>10</sup> उआ दिन पबित्र दिन रहा हय, एसे यहूदी लोग ओसे जउन निकहा भ रहा हय, कहँइ लागें, “आज त पबित्र दिन आय, तोहई खटिया उठाइके न चलँय-फिरँय चाही, काहेकि इआ हमरे नेम के खिलाफ हय।”<sup>11</sup> उआ उनहीं जबाब दिहिस, “जे हमहीं नीक किहिन हीं, उँइन हमसे कहिन हीं, कि आपन खटिया उठाइके चला फिरा।”<sup>12</sup> पुनि ऊँ पंचे ओसे पूँछिन, “ऊँ कउन मनई आहीं जे तोंहसे कहिन हीं, कि आपन खटिया उठाइके चला फिरा?”<sup>13</sup> पय जउन मनई नीक होइगा तय, उआ नहीं जानत रहा आय, कि ऊँ को आहीं, जे हमहीं नीक किहिन हीं; काहेकि उआ जघा माहीं खुब भीड होइ के कारन यीसु उहाँ से चले गे रहे हँय।<sup>14</sup> एखे बाद यीसु उआ मनई काहीं मन्दिर माहीं देखिन, तब ओसे कहिन, “देखा, अब तूँ नीक होइ गया हय; पुनि दुबारा पाप न किहा, कहँव अइसा न होय, कि इआ बिमारिव से भारी कउनव बिपत्ती तोंहरे ऊपर आय परय।”<sup>15</sup> उआ मनई जाइके यहूदी लोगन से बताय दिहिस, कि जे हमहीं नीक किहिन हीं, ऊँ यीसु आहीं।

### लड़िका के व्दारा जीवन

<sup>16</sup> काहेकि यीसु इआमेर के काम पबित्र दिन काहीं करत रहे हँय, इआ कारन से यहूदी जाति के कुछ मनई उनहीं सतामँइ लागें।<sup>17</sup> तब यीसु उनसे कहिन, “हमार पिता परमातिमा कबहूँ काम करब बंद नहीं करँय, एसे हमहूँ लगीतार काम करित हएन।”<sup>18</sup> इआ कारन से यहूदी जाति के कुछ मनई, यीसु काहीं मार डारँइ के अउर जादा कोसिस करँइ लागें, काहेकि ऊँ पबित्र दिन के नेमय भर काहीं नहीं टोरत रहें, बलकिन परमातिमा काहीं आपन पिता कहिके, खुद काहीं परमातिमा के बराबर ठहराबत रहे हँय।<sup>19</sup> एसे यीसु उनसे कहिन, “हम तोंहसे सही-सही कहित हएन, लड़िका खुद अपने से कुछू नहीं कइ सकय, बलकिन उआ केबल उहय काम करत हय, जउन पिता काहीं करत देखत हय।<sup>20</sup> काहेकि पिता परमातिमा अपने लड़िका से प्रेम करत हें, अउर जउन-जउन काम ऊँ खुद करत हें, ऊँ सगले कामन काहीं लड़िका काहीं देखाबत हें; अउर ऊँ इनहूँ से बड़े-बड़े काम घलाय उनहीं देखइहँय, जउने तूँ पंचे अचरज माना।<sup>21</sup> काहेकि जइसन पिता परमातिमा मरे मनइन काहीं जिन्दा कइके जीवन देत हें, उहयमेर लड़िका घलाय जिनहीं चाहत हें, उनहीं जिआबत हें।<sup>22</sup> अउर पिता परमातिमा कोहू के न्याय नहीं करँय, काहेकि न्याय करँइ के सगला अधिकार लड़िका काहीं सउँप दिहिन हीं।<sup>23</sup> एसे, कि जइसन सगले मनई पिता परमातिमा के मान-सम्मान करत हें, उहयमेर लड़िका के घलाय मान-सम्मान करँय। जे कोऊ लड़िका के मान-सम्मान नहीं करय, उआ पिता परमातिमव के जे लड़िका काहीं पठइन हीं, मान-सम्मान नहीं करय।”<sup>24</sup> यीसु उनसे कहिन, “हम तोंहसे सही-सही कहित हएन, जे कोऊ हमरे बात काहीं सुनिके हमहीं

पठमँइ बाले के ऊपर बिसुआस करत हय, उहय अनन्त जीवन पाई, अउर ओखे ऊपर न्याय के दन्द न परी, बलकिन उआ मउत से पार होइके अनन्त जीवन पामँइ के हकदार बन चुका हय।<sup>25</sup> हम तौहसे से सही-सही कहित हएन, कि उआ समय आमँय बाला हय, बलकिन आय चुका हय, जउने माहीं मरे मनई, परमातिमा के लड़िका के अबाज काहीं सुनिहँय, अउर जे कोऊ सुनिहँय, ऊँ जिन्दा होइ जइहँय।<sup>26</sup> काहेकि जउनमेर से पिता परमातिमा अपने-आप माहीं जीवन देंइ के अधिकार रक्खत हें, उहयमेर से ऊँ लड़िका काहीं घलाय इआ अधिकार दिहिन, कि ऊँ अपने-आप माहीं जीवन देंइ के अधिकार रक्खँइ।<sup>27</sup> बलकिन उनहीं न्याय करँइ के घलाय अधिकार दिहिन हीं, एसे कि ऊँ मनई के लड़िका आहीं।<sup>28</sup> एसे अचरज न माना, काहेकि उआ समय आमँइ बाला हय, कि जेतने मनई कन्न माहीं गाड़े हें, उनखर अबाज सुनिके बाहर निकरि अइहँय।<sup>29</sup> जेतने जने भलाई किहिन हीं, ऊँ पंचे अनन्त जीवन पामँइ के खातिर, मरेन म से पुनि जिन्दा होइ जइहँय, अउर जेतने बुरे काम किहिन हीं, ऊँ पंचे दन्द पामँइ के खातिर, पुनि जिन्दा होइ जइहँय।<sup>30</sup> पुनि यीसु कहिन, हम अपने-आप से कुछ नहीं कइ सकी; जइसन पिता परमातिमा से सुनित हएन, उहयमेर न्याय करित हएन, अउर हमार न्याय सच्चा हय; काहेकि हम आपन मरजी नहीं, पय अपने पठमँइ बाले के मरजी पूर करँइ चाहित हएन।<sup>31</sup> अगर हम खुदय आपन गबाही देई; त हमार गबाही सही न मानी जई।<sup>32</sup> हमरे कइती से गबाही देंइ बाले एक जने अउर हें। अउर हम जानित हएन, कि ऊँ जउन हमार गबाही देत हें, उआ सच्ची हय।<sup>33</sup> तूँ पंचे यूहन्ना बपतिस्मा देंइ बाले के लघे कुछ लोगन काहीं पठइके पुँछबाया तय, अउर ऊँ हमरे बारे माहीं सच्ची गबाही दिहिन हीं।<sup>34</sup> पय हम अपने बारे माहीं मनई के गबाही नहीं चाही; तऊ यूहन्ना बपतिस्मा देंइ बाले के गबाही के बारे माहीं हम एसे कहित हएन, कि तौहई पंचन काहीं मुक्ती मिलय।<sup>35</sup> यूहन्ना जलत अउर चमकत दिया कि नाई रहे हँय, अउर उनखर बातँय उँजिआर कि नाई रही हँय। अउर तूँ पंचे कुछ समय के खातिर उनखे बातन के आनन्द लेंइ चाहत रहे हय।<sup>36</sup> पय हमार गबाही यूहन्ना बपतिस्मा देंइ बाले के गबाही से बड़ी हय: काहेकि पिता परमातिमा जउन काम पूर करँइ के खातिर हमहीं सँउपेन हीं, हम उँइन कामन काहीं कइ रहेन हय, अउर उँइन कामँय हमार गबाह हें, कि पिता परमातिमा हमहीं पठइन हीं।<sup>37</sup> अउर पिता परमातिमा जे हमहीं पठइन हीं, उँइन हमरे बारे माहीं गबाही दिहिन हीं: अउर तूँ पंचे न उनखर रू पय देखे आह्या, अउर न उनखर बोलय सुने आह्या।<sup>38</sup> अउर तूँ पंचे अपने जीवन माहीं पिता परमातिमा के बचन काहीं लागू नहीं करते आह्या, काहेकि जेही ऊँ पठइन हीं, ओहू के बिसुआस नहीं मनते आह्या।<sup>39</sup> तूँ पंचे पबित्र सास्त्र माहीं ढुँढते हया, काहेकि तूँ पंचे सोचते हया, कि ओहिन माहीं अनन्त जीवन मिलत हय, पय पबित्र सास्त्र हमरेन बारे माहीं गबाही देत हय।<sup>40</sup> तऊ तूँ पंचे अनन्त जीवन पामँइ के खातिर, हमरे लघे आमँइ नहीं चहते आह्या।<sup>41</sup> हम मनइन से मान-सम्मान नहीं चाही।<sup>42</sup> पय हम जानित हएन, कि तौहरे जीवन माहीं परमातिमा के प्रेम नहीं आय।<sup>43</sup> हम अपने पिता के नाम से इआ धरती माहीं आएन हँय, अउर तूँ पंचे हमहीं सोइकार नहीं करते आह्या; अगर कोऊ अपनेन नाम से आबत हय, त ओही सोइकार कइ लेइहा।<sup>44</sup> तूँ पंचे हमरे ऊपर बिसुआस कइसन कइ सकते हया, काहेकि तूँ पंचे त आपस माहीं एक दुसरे से मान-सम्मान चहते हया, अउर उआ मान-सम्मान पामँइ के कोसिस नहीं करते आह्या, जउन एकलउते परमातिमा के तरफ से मिलत हय।<sup>45</sup> इआ न सोचा, कि हम पिता परमातिमा के आँगे तौहरे ऊपर दोस लगाउब: काहेकि तौहरे ऊपर दोस लगामँइ बाले एक जने हें, अरथात मूसा नबी जिनखे ऊपर तूँ पंचे बिसुआस रखते हया।<sup>46</sup> काहेकि अगर तूँ पंचे मूसा नबी के ऊपर बिसुआस कर त्या, त हमरेव ऊपर बिसुआस कर त्या, एसे कि मूसा नबी हमरेन बारे माहीं लिखिन हीं।<sup>47</sup> पय अगर तूँ पंचे पबित्र सास्त्र माहीं लिखी उनखे बातन के बिसुआस नहीं करते आह्या, त हमरे कही बातन के कइसा बिसुआस करिहा?"

### पाँच हजार मनइन काहीं खाना खबाउब (मत्ती 14:13-21; मरकुस 6:30-44; लूका 9:10-17)

6 एखे बाद यीसु गलील प्रदेश के झील के दुसरे पार चलेगें, जउन तिबिरियास झील के नाम से घलाय जानी जात रही हय।<sup>2</sup> अउर उनखे पीछे-पीछे मनइन के खुब बड़ी भीड़ चल दिहिस, काहेकि जउन अचरज के काम बिमारन काहीं नीक कइके देखाबत रहे हँय, ऊँ पंचे उनहीं देखत रहे हँय।<sup>3</sup> तब यीसु पहार के ऊपर चढ़िके अपने चलन के साथ उहाँ बइठिगें।<sup>4</sup> अउर यहूदी लोगन के फसह नाम के तेउहार लघेन रहा हय।<sup>5</sup> जब यीसु बड़े ध्यान से देखिन, कि एकठे खुब बड़ी भीड़ हमरे लघे आय रही हय, तब फिलिप्पुस से कहिन, कि हम पंचे इनखे खाय के खातिर खाना कहाँ से खरीद लई? <sup>6</sup> पय यीसु इआ बात उनसे एसे कहिन कि देखी कि ऊँ का कहत हें; काहेकि यीसु त खुदय जानत रहे हँय कि हम का करब।<sup>7</sup> तब फिलिप्पुस उनहीं जबाब दिहिन, कि "अगर आठ महीना के मजूरी से खाना खरीदा जाय, तऊ सगली भीड़ के मनइन काहीं खबामँइ के खातिर थोरव-थोर न पूजी।"<sup>8</sup> तब उनखे चलन म से समौन पतरस के भाई अन्द्रियास यीसु से कहिन।<sup>9</sup> "इहाँ एकठे लड़िका हय जउने के लघे जबा के पाँचठे रोटी अउर दुइठे भूँजी मछरी हई, पय एतने मनइन के खातिर एतने माहीं का होई?"<sup>10</sup> तब यीसु चलन से कहिन, "सगले मनइन काहीं बइठाय ह्या।" उआ जघा माहीं खुब चारा रहा हय: त ओहिन माहीं सगले मनई बइठिगें, जऊँ पाँच हजार के करीब रहे हँय।<sup>11</sup> तब यीसु रोटी लिहिन, अउर परमातिमा काहीं धन्यवाद दइके चलन काहीं परसँय के खातिर दिहिन, अउर ऊँ पंचे सगले मनइन काहीं परस दिहिन: अउर उहयमेर मछरिन काहीं घलाय जेतना-जेतना ऊँ पंचे चाहत रहे हँय, परस दिहिन।<sup>12</sup> जब ऊँ पंचे खाइके संतुस्त होइगें, तब यीसु अपने चलन से कहिन, "जउन टुकड़ा बचिगे हँय उनहीं उठाय ल्या, जउने कुछ बेकार न जाय।"<sup>13</sup> तब चेला लोग जबा के पाँचठे रोटी अउर मछरिन के टुकड़न से जऊँ खॉइ बालेन से बचिगे तय, समेटिके बारा टोपरी भरिन।<sup>14</sup> यीसु के इआ अचरज के काम काहीं देखिके सगले मनई कइँइ लागें; कि ऊँ परमातिमा के सँदेस बतामँइ बाले जउन संसार माहीं आमँइ बाले रहे हँय, निश्चित ईन आहीं।<sup>15</sup> यीसु इआ जानिके कि ऊँ पंचे हमहीं राजा बनामँइ के खातिर आइके पकड़ँइ चाहत हें, एसे ऊँ पहार के ऊपर अकेलेन चलेगें।

### पानी के ऊपर यीसु के चलब (मत्ती 14:22-33; मरकुस 6:45-52)

16 जब साँझ होइगे, तब उनखर चेला लोग झील के किनारे गें।<sup>17</sup> अउर नाव माहीं चढ़िके झील के दुसरे पार कफरनहूम सहर काहीं जाँइ लागें: उआ समय आँधिआर होइगा रहा हय, अउर यीसु अबे तक उनखे लघे नहीं आएँ तय।<sup>18</sup> अउर आँधी के कारन झील माहीं लहर उठँय लागीं।<sup>19</sup> जब ऊँ पंचे नाव काहीं खेबत-खेबत पाँच-छय किलोमीटर के करीब निकरिगें, तब ऊँ पंचे यीसु काहीं झील के पानी के ऊपर रेंगत, अउर अपने नाव के लघे आबत देखिके डेराइगें।<sup>20</sup> पय यीसु उनसे कहिन, कि "हम आहेन; डेरा न।"<sup>21</sup> तब ऊँ पंचे उनहीं नाव माहीं चढ़ामँइ के खातिर राजी होइगें, अउर उआ नाव हरबिन उआ जघा माहीं पहुँचिगे, जहाँ ऊँ पंचे जाँइ चाहत रहे हँय।

### यीसु काहीं मनइन के ढूँढब

22 दुसरे दिना उआ भीड़ के मनई जउन झील के उआ पार रहिगें तय, इआ देखिन, कि इहाँ एकठे नाव काहीं छोंड़िके अउर कउनव छोट नाव नहीं आहीं, अउर यीसु अपने चलन के साथ नाव माहीं नहीं चढ़े रहे आँय, पय नाव माहीं केबल उनखर चलय भर गे रहे हँय।<sup>23</sup> (तऊ तिबिरियास सहर से कइएकठे छोट-छोट नाव उआ जघा माहीं आई, जहाँ प्रभु यीसु, परमातिमा के धन्यवाद किहे के बाद उनहीं रोटी, मछरी खबाइन तय।)<sup>24</sup> इआमेर से जब भीड़ के मनई देखिन, कि यीसु इहाँ नहीं आहीं अउर न उनखर चलय

आहीं, तब ऊँ पंचे छोट-छोट नावन माहीं चढ़िके यीसु काहीं ढूँढ़त-ढूँढ़त कफरनहूम सहर माहीं पहुँचिगें।<sup>25</sup> अउर ऊँ पंचे झील के उआ पार यीसु से मिलिके उनसे कहिन, हे गुरु, अपना इहाँ केतनीदार आएन हँय?

### यीसु जीवन के रोटी आहीं

<sup>26</sup> यीसु उनहीं जबाब दिहिन, कि “हम तोंहसे सही-सही कहित हएन, तूँ पंचे हमहीं एसे नहीं ढूँढ़ते आह्या, कि तूँ पंचे अचरज के काम देखे हया, पय एसे ढूँढ़ते हया, कि तूँ पंचे रोटी मछरी खाइके संतुस्त होइ गया तय।<sup>27</sup> नास होंइ बाले खाना के खातिर मेहनत न करा, पय अनन्त जीवन देंइ बाले उआ खाना के खातिर मेहनत करा, जउने काहीं मनई के लड़िका तोंहई देइहँय, काहेकि ओही देंइ के अधिकार पिता परमातिमा केबल उनहिन काहीं दिहिन हीं।”<sup>28</sup> तब ऊँ पंचे यीसु से कहिन, “जउने कामन काहीं परमातिमा चाहत हें, उनहीं करँइ के खातिर हम पंचे का करी?”<sup>29</sup> तब यीसु उनहीं जबाब दिहिन, “परमातिमा के काम इआ आय, कि तूँ पंचे जेही ऊँ पठइन हीं, उनखे ऊपर बिसुआस करा।”<sup>30</sup> तब ऊँ पंचे यीसु से कहिन, “अपना कउन अइसा अचरज के काम देखाइत हएन, कि हम पंचे बिसुआस करी, कि अपना काहीं परमातिमा पठइन हीं, अइसा कउनव काम देखाई, त हमहीं पंचन काहीं बिसुआस होय।”<sup>31</sup> ऊँ पंचे पुनि कहिन, “हमार पंचन के बाप-दादा जंगल माहीं मन्ना नाम के खाना खाइन तय; जइसन पबित्र सास्त्र माहीं लिखा हय, कि परमातिमा उनहीं खॉय के खातिर स्वर्ग से रोटी दिहिन।”<sup>32</sup> तब यीसु उनसे कहिन, “हम तोंहसे सही-सही कहित हएन, कि मूसा नबी तोंहई पंचन काहीं उआ रोटी स्वर्ग से नहीं दिहिन तय, पय हमार पिता तोंहई सच्ची रोटी स्वर्ग से देत हें।<sup>33</sup> काहेकि परमातिमा के दीन रोटी उहय आय, जउन स्वर्ग से उतरिके संसार के मनइन काहीं जीवन देत ही।”<sup>34</sup> तब ऊँ पंचे यीसु से कहिन, “हे प्रभू, इआ रोटी हमहीं हमेसा द्या करी।”

<sup>35</sup> तब यीसु उनसे कहिन, “जीवन देंइ बाली रोटी हमहिन आहैन: जे कोऊ हमरे लघे अई उआ कबहूँ भूँखा न होई, अउर जे कोऊ हमरे ऊपर बिसुआस करी, उआ कबहूँ पियासा न होई।<sup>36</sup> पय हम तोंहसे बताऊ दिहिन हँय, अउर तूँ पंचे हमहीं देखिव लिहा हय, तऊ बिसुआस नहीं करते आह्या।<sup>37</sup> अउर पिता परमातिमा जिनहीं चुनिके हमहीं दिहिन हीं, ऊँ सगले जन हमरे लघे अइहँय, अउर हम उनहीं कबहूँ न लउटाउब।<sup>38</sup> काहेकि हम स्वर्ग से अपने मरजी के मुताबिक काम करँइ नहीं आएन आय, बलकिन अपने पठमँइ बाले के मरजी पूर करँइ के खातिर आएन हँय।<sup>39</sup> अउर हमहीं पठमँइ बाले के मरजी इआ हय, कि जउन कुछूँ ऊँ हमहीं दिहिन हीं, उनमा से हम कुछूँ न गमाई, पय उनहीं आखिरी दिन माहीं पुनि जिआई।<sup>40</sup> काहेकि हमरे पिता के मरजी इआ हय, कि जे कोऊ लड़िका काहीं देखी, अउर उनखे ऊपर बिसुआस करी, उआ अनन्त जीवन पाई; अउर हम ओही आखिरी दिन पुनि जिआय देब।”

<sup>41</sup> इआ सुनिके यहूदी लोग यीसु काहीं बरबरॉय लागें, काहेकि ऊँ कहिन तय, कि जउन रोटी स्वर्ग से उतरी हय, उआ हम आहैन।<sup>42</sup> अउर ऊँ पंचे आपस माहीं कहँइ लागें; “काहे ई यूसुफ के लड़िका यीसु न होंहीं, जिनखे बाप-महतारी काहीं हम पंचे जानित हएन? त पुनि ई काहे कहत हें कि हम स्वर्ग से उतरेन हय।”<sup>43</sup> यीसु उनहीं जबाब दिहिन, कि “आपस माहीं काहे बरबराते हया।<sup>44</sup> कोऊ हमरे लघे नहीं आय सकय, जब तक हमहीं पठमँइ बाले पिता परमातिमा ओही हमरे कइती आमँइ के मन न देंइ, अउर जे कोऊ हमरे लघे अई, ओही हम आखिरी दिन पुनि जिन्दा कइ देब।<sup>45</sup> परमातिमा के सँदेस बतामँइ बालेन के किताबन माहीं लिखा हय, ‘ऊँ पंचे सगले जन परमातिमा के तरफ से सिखाए होइ हँय।’ जे कोऊ पिता परमातिमा से सुनिस अउर सिखिस ही, उआ हमरे लघे आबत हय।<sup>46</sup> काहेकि वास्तव माहीं पिता परमातिमा काहीं कोऊ नहीं देखिस, केबल उँइन पिता परमातिमा काहीं देखिन हीं, जेही ऊँ पठइन हीं।<sup>47</sup> हम सही-सही कहित हएन, कि जे कोऊ हमरे बात के बिसुआस करत हय, अनन्त जीवन उहय पाबत हय।<sup>48</sup> अनन्त जीवन देंइ बाली रोटी हमहिन आहैन।<sup>49</sup> तोंहार पंचन के बाप-

दादा सुनसान जघा माहीं ‘मन्ना’ नाम के खाना खाइन रहा हय, तऊ ऊँ पंचे मरिगें।<sup>50</sup> इआ उआ रोटी आय जउन स्वर्ग से उतरिके आई हय, अगर कउनव मनई ओमा से खई, त उआ न मरी।<sup>51</sup> अनन्त जीवन देंइ बाली जउन रोटी स्वर्ग से उतरिके आई हय, उआ हमहिन आहैन। अगर कोऊ इआ रोटी म से खई, त हमेसा जिअत रही, अउर जउन रोटी हम संसार के मनइन के अनन्त जीवन के खातिर देब, उआ हमार माँस आय।”

<sup>52</sup> इआ बात काहीं सुनिके यहूदी लोग, इआ कहिके आपस माहीं बहँस करँइ लागें, कि “इआ मनई कइसन हमहीं पंचन काहीं आपन माँस खॉय काहीं दइ सकत हय?”<sup>53</sup> तब यीसु उनसे कहिन, “हम तोंहसे सही-सही कहित हएन, कि जब तक मनई के लड़िका के माँस न खइहा, अउर ओखर खून न पीहा, तब तक अनन्त जीवन न पइहा।<sup>54</sup> जे कोऊ हमार माँस खात हय, अउर खून पिअत हय, अनन्त जीवन ओहिन काहीं मिली, अउर हम आखिरी दिन ओही पुनि जिआय देब।<sup>55</sup> काहेकि हमार माँस वास्तव माहीं खॉय के चीज आय, अउर हमार खून वास्तव माहीं पिअँइ के चीज आय।<sup>56</sup> जे हमार माँस खात हय अउर हमार खून पिअत हय, उआ हमरे ऊपर बिसुआस माहीं मजबूत बना रहत हय, अउर हम ओखे जीवन माहीं बने रहित हएन।<sup>57</sup> जइसन जिन्दा परमातिमा हमहीं पठइन हीं, अउर हम पिता परमातिमा के कारन जिन्दा हएन, उहयमेर उहव जे हमहीं खई, उआ हमरे कारन जिअत रही।<sup>58</sup> इहय उआ रोटी आय जउन स्वर्ग से उतरी हय, इआ उआमेर नहीं आय, जइसन हमार पंचन के बाप-दादा खाइन तय, अउर बाद माहीं मरिगें तय। जे कोऊ इआ रोटी म से खई, उआ हमेसा जिअत रही।”<sup>59</sup> ई बातन काहीं यीसु कफरनहूम सहर के एकठे यहूदी सभाघर माहीं उपदेस देत समय कहिन तय।

### अनन्त जीवन के बचन

<sup>60</sup> एसे यीसु के चलन म से खुब जने इआ सुनिके कहिन, इआ बात खुब कठोर अउर समझ से बाहर ही; एही को मान सकत हय? <sup>61</sup> यीसु अपने मन माहीं इआ बात जानिके, कि हमार चेला लोग आपस माहीं बरबरात हें, उनसे पूँछिन, “का इआ बात से तोंहई पंचन काहीं ठेस पहुँचत ही? <sup>62</sup> अउर अगर तूँ पंचे मनई के लड़िका काहीं, स्वर्ग माहीं जहाँ ऊँ पहिले रहे हँय, उहाँ ऊपर जात देखिहा त का होई? <sup>63</sup> परमातिमा के आत्मय हय, जउन अनन्त जीवन देत हय, देंह से कुछूँ फायदा नहीं आय: जउने बातन काहीं हम तोंहसे कहेन हँय, उँइन आत्मा आहीं, अउर जीवन घलाय आहीं।”<sup>64</sup> पय तोंहरे पंचन म से कइएक जने अइसन हें, जे हमरे बातन के ऊपर बिसुआस नहीं करँय: काहेकि यीसु त पहिलेन से जानत रहे हँय, कि जे हमरे बातन के बिसुआस नहीं करँय, ऊँ पंचे को आहीं? अउर इहव जानत रहे हँय, कि हमहीं को पकड़बाई।<sup>65</sup> यीसु पुनि उनसे कहिन, “एहिन से हम तोंहसे कहेन तय, कि जब तक कोहूँ काहीं पिता परमातिमा के तरफ से इआ बरदान न दीन जाय, तब तक उआ हमरे लघे नहीं आय सकय।”

### पतरस के बिसुआस

<sup>66</sup> इहय कारन से यीसु के चलन म से खुब जने वापिस लउटिगें, अउर पुनि उनखे साथ कबहूँ नहीं चलें।<sup>67</sup> तब यीसु ऊँ बरहँव चलन से कहिन, “का तुहूँ पंचे चले जाँइ चहते हया।”<sup>68</sup> तब समौन पतरस उनहीं जबाब दिहिन, कि “हे प्रभू हम पंचे केखे लघे जई? अनन्त जीवन देंइ बाली बातँय, त अपनय के लघे हई।”<sup>69</sup> अब हम पंचे इआ बिसुआस कइ लिहिन हय, अउर जानिव गएन हय, कि परमातिमा के पठए पबित्र जन अपनय आहैन।<sup>70</sup> यीसु उनहीं जबाब दिहिन, का “तोंहई बरहँव जनेन काहीं हमहिन नहीं चुने आहैन? तऊ तोंहरेन म से एक जने सइतान हय।”<sup>71</sup> इआ बात यीसु समौन इस्करियोती के लड़िका यहूदा के बारे माहीं कहिन तय, काहेकि उआ यीसु के खिलाफ होइके उनहीं धोखा देंइ बाला रहा हय, अउर उहव उन बरहँव चलन म से रहा हय।

### यीसु अउर उनखर भाई

7 एखे बाद यीसु गलील प्रदेश माहीं घूमत रहिगें, काहेकि यहूदी लोग यीसु काहीं मार डारै के कोसिस करत रहे हँय, एसे ऊँ यहूदिया प्रदेश माहीं नहीं घूमै चहात रहे।<sup>2</sup> अउर यहूदी लोगन के झोपड़िअन † नाम के तेउहार लघेन रहा हय।<sup>3</sup> एसे यीसु के सगले भाई उनसे कहिन, अपना काहीं इआ जघा छोड़िके यहूदिया प्रदेश माहीं चले जाँइ चाही, जउने अपना जउन काम करित हएन, उनहीं अपना के चेलव देखँइ।<sup>4</sup> काहेकि अइसा कोऊ मनई न होई, जउन मसहूर होँइ चाहय, अउर लुकिके काम करय: अगर अपना अचरज के काम करित हएन, त संसार के मनइन के आँगे खुद काहीं प्रगट करी।<sup>5</sup> काहेकि उनखर भाइव उनखे ऊपर बिसुआस नहीं करत रहे आहीं।<sup>6</sup> तब यीसु अपने भाइन से कहिन, “हमरे खातिर अबे ठीक समय नहीं आबा आय, पय तौहरे पंचन के खातिर हर समय ठीक हय।<sup>7</sup> संसार के मनई तौहसे दुसमनी नहीं कइ सकँय, पय हमसे दुसमनी करत हें, काहेकि हम उनखे बिरोध माहीं, इआ गबाही देइत हएन, कि उनखर काम बुरे हें।<sup>8</sup> तूँ पंचे तेउहार मनामँइ जा: हम अबे इआ तेउहार माहीं न जाब; काहेकि अबे तक हमरे खातिर उचित समय नहीं आबा आय।”<sup>9</sup> यीसु उनसे ई बातन काहीं कहिके गलील प्रदेश माहीं रहिगें।

### झोपड़िअन नाम के तेउहार माहीं यीसु

10 पय जब उनखर भाई तेउहार मनामँइ चलेगें, तब ऊँ घलाय तेउहार मनामँइ गें, पय लुके-लुके गें, कोऊ जाने नहीं पाइस।<sup>11</sup> तब उआ तेउहार माहीं यहूदी धारमिक अँगुआ लोग, यीसु काहीं इआ कहिके ढूँढ़ै लागें, कि ऊँ कहाँ हें? <sup>12</sup> अउर उहाँ आए सगले मनई आपस माहीं यीसु के बारे माहीं चुप्पय-चुप्पय बतात रहे हँय, कुछ जने कहँय, कि ऊँ निकहा मनई हें: अउर कुछ जने कहँय, कि नहीं, ऊँ मनइन काहीं गुमराह करत हें।<sup>13</sup> तऊ यहूदी धारमिक अँगुआ लोगन के डेरन के मारे, कोऊ उनखे बारे माहीं खुले आम नहीं बोलत रहे आहीं।

### तेउहार माहीं यीसु के उपदेस

14 अउर जब उआ तेउहार आधा बीतिगा तय, तब यीसु मन्दिर माहीं जाइके उपदेस देंइ लागें।<sup>15</sup> तब यहूदी धारमिक अँगुआ लोग अचरज मानिके कहँइ लागें, “इआ मनई हमरे पंचन के कउनव पाठसाला माहीं कबहूँ नहीं ग, फेरव एही एतना ग्यान कहाँ से मिलिगा?”<sup>16</sup> तब यीसु उनहीं जबाब दिहिन, कि “जउन उपदेस हम देइत हएन, उआ हमार न होय, इआ पिता परमातिमा के आय, जे हमहीं पठइन हीं।<sup>17</sup> अगर कोऊ परमातिमा के मरजी के मुताबिक चलँइ चाहय, त उआ इआ उपदेस के बारे माहीं जान जई, कि उआ परमातिमा के तरफ से आय, कि हम अपने कइती से देइत हएन।<sup>18</sup> जे कोऊ अपने तरफ से कुछ कहत हय, उआ अपनय बड़ाई चहात हय; पय जे अपने पठमँइ बाले के बड़ाई चहात हय, उआ सच्चा हय, अउर ओखे जीवन माहीं अधरम नहिं आय।<sup>19</sup> काहेकि मूसा नबी तौहई परमातिमा के बिधान दिहिन हीं? तऊ तौहरे पंचन म से कोऊ मूसा के बिधान के मुताबिक नहीं चलय, तूँ पंचे काहे हमहीं मारि डारँय चहते हय?”<sup>20</sup> तब ऊँ पंचे जबाब दिहिन; कि “तौहरे भीतर बुरी आत्मा हय; कोऊ तौहई नहीं मारि डारँय चाहय?”<sup>21</sup> यीसु उनहीं जबाब दिहिन, कि “हम पबित्र दिन काहीं एकयठे चमत्कार किहेन, अउर तूँ पंचे सगले जन अचरज मनते हया।”<sup>22</sup> इहय कारन से मूसा तौहई खतना करँइ के हुकुम दिहिन हीं, (इआ नेम मूसा के न होय, बलकिन इआ तौहरे बाप-दादन से चला आय रहा हय) अउर तूँ पंचे पबित्र दिन काहीं मनइन के खतना करते हया।<sup>23</sup> पबित्र दिन काहीं एसे खतना कीन जात हय, कि कहँव मूसा के बिधान के नेम टूट न जाय। त तूँ पंचे हमरे ऊपर क्रोध काहे करते हया, एसे कि जउन हम पबित्र

दिन काहीं एकठे मनई काहीं, पूरी तरह से नीक कइ दिहेन हय।<sup>24</sup> कोहू के न्याय करँइ माहीं मुँह देखी न करा, बलकिन ठीक-ठीक न्याय करा।

### का यीसुअय मसीह आहीं

<sup>25</sup> तब यरूसलेम सहर के रहँइ बाले खुब जने कहँइ लागें; का ई उँइन मनई न होंहीं, जिनहीं मारि डारँय के कोसिस कीन जाय रही हय।<sup>26</sup> पय देखा, ऊँ त सगले मनइन के बीच माहीं बोलि रहे हँय, अउर ऊँ पंचे उनहीं कुछ नहीं कहँय। का अइसन त न होय, कि यहूदी धारमिक अँगुआ लोग जानिगें हँय, कि वास्तव माहीं ईन मसीह आहीं।<sup>27</sup> पय ई मसीह नहीं होइ सकँय, काहेकि इनहीं त हम पंचे जानित हएन, कि ई कहाँ से आए हँय, पय जब मसीह अइहँय, त कोऊ न जाने पाई, कि ऊँ कहाँ से आए हँय।<sup>28</sup> जब यीसु मन्दिर माहीं उपदेस देत रहे हँय, तब चन्डे से कहिन, “तूँ पंचे हमहीं जनते हया, अउर इहव जनते हया, कि हम कहाँ से आएन हय। पय हम अपने-आप नहीं आएन, जे हमहीं पठइन हीं, ऊँ सच्चे हँय, उनहीं तूँ पंचे नहीं जनते आह्या।<sup>29</sup> हम उनहीं जानित हएन; काहेकि हम उनहिन के तरफ से आएन हँय, उँइन हमहीं पठइन हीं।”<sup>30</sup> एसे ऊँ पंचे यीसु काहीं पकड़ँइ चहात रहे हँय, तऊ कोऊ उनहीं नहीं पकड़ सकें, काहेकि अबे उनखे पकड़े जाँइ, अउर मारे जाँइ के समय नहीं आबा रहा आय।<sup>31</sup> पय भीड़ के मनइन म से खुब जने यीसु के ऊपर बिसुआस किहिन, अउर कहँइ लागें, कि “जब मसीह अइहँय त का इनहूँ से जादा अचरज के काम देखइहँय, जउन ई देखाइन हीं?”

### यीसु काहीं पकड़ँइ के कोसिस

<sup>32</sup> फरीसी लोग उहाँ मनइन काहीं यीसु के बारे माहीं चुप्पय-चुप्पय बात करत सुनिन; तब प्रधान याजक लोग, अउर फरीसी लोग, मन्दिर के सिपाहिन काहीं यीसु काहीं पकड़ँइ के खातिर पठइन।<sup>33</sup> एखे बाद यीसु कहिन, “हम थोरी देर तक अउर तौहरे साथ हएन; फेर हम अपने पठमँइ बाले के लघे चले जाब।<sup>34</sup> तूँ पंचे हमहीं ढूँढ़िहा, पय न पइहा, अउर जहाँ हम रहब, उहाँ तूँ पंचे नहीं आय सकते आह्या।”<sup>35</sup> इआ सुनिके यहूदी धारमिक अँगुआ लोग आपस माहीं कहँइ लागें, “ई कहाँ जइहँय, कि हम पंचे इनहीं न पाउब: का ई उनखे लघे जइहँय, जउन हमरे समाज के मनई यूनानी भाँसा बोलँइ बालेन के लघे तितर-बितर होइके रहत हें, अउर ई यूनानी भाँसा बोलँइ बालेन काहीं घलाय उपदेस देइहँय?”<sup>36</sup> इआ का बात आय जउन यीसु कहिन हीं, कि तूँ पंचे हमहीं ढूँढ़िहा, पय न पइहा, अउर जहाँ हम रहब, उहाँ तूँ पंचे नहीं आय सकते आह्या?”

### जीवन देंइ बाले पानी के नदी

<sup>37</sup> पुनि तेउहार के अन्तिम दिना, जउन मुख्य दिन आय, यीसु ठाढ़ भें अउर चन्डे से कहिन, “अगर कोऊ पियासा होय, त हमरे लघे आइके पियय।<sup>38</sup> जे हमरे ऊपर बिसुआस करी, जइसन पबित्र सास्त्र माहीं लिखा हय ‘ओखे हिरदँय म से जीवन देंइ बाली पानी के नदिया बहँइ लघिहँय।’”<sup>39</sup> यीसु इआ बात पबित्र आत्मा के बारे माहीं कहिन रहा हय, जउने काहीं उनखे ऊपर बिसुआस करँइ बाले पामँइ बाले रहे हँय; काहेकि पबित्र आत्मा अबे तक नहीं उतरा रहा आय; काहेकि यीसु अबय तक अपने महिमा माहीं नहीं पहुँचे तय।

<sup>40</sup> तब भीड़ के मनइन म से कुछ जने ई बातन काहीं सुनिके कहिन, “वास्तव माहीं जउन परमातिमा के सँदेस बतामँइ बाले आमँइ बाले रहे हँय, ईन आहीं।”<sup>41</sup> अउर कुछ जने इहव कहिन, कि “ई मसीह आहीं”, पय कुछ जने कहिन “ई न होंहीं, का मसीह गलील प्रदेश अइहँय?”<sup>42</sup> काहेकि पबित्र सास्त्र माहीं इआ लिखा हय, कि “मसीह राजा दाऊद के बंस से, अउर बैतलहम गाँव माहीं पइदा होइके अइहँय, जहाँ राजा दाऊद रहत रहे हँय।”<sup>43</sup> इआ कारन से भीड़ के मनइन माहीं फूट परिगे।<sup>44</sup> उनमा से कइएक जने यीसु काहीं पकड़ँइ चहात रहे हँय, पय कोऊ नहीं पकड़ सकें।

† जउने माहीं यहूदी लोग आठ दिना तक झोपड़ी बनाइके रहत रहे हँय।



### यहूदी समाज के अँगुन के अबिसुआस

45 तब मन्दिर के सिपाही प्रधान याजकन अउर फरीसी लोगन के लघे आएँ, अउर ऊँ पंचे, उनसे पूँछिन, “तूँ पंचे यीसु काहीं काहे नहीं पकड़ लाया?” 46 तब सिपाही जबाब दिहिन, कि “आज तक कउनव मनई अइसन बातँय नहीं बोलिस, जइसन ऊँ बोलत रहे हँय।” 47 तब फरीसी लोग कहिन, “हमहीं त लागत हय, ऊँ तौहऊँ पंचन काहीं भरमाय दिहिन हीं। 48 का यहूदी धारमिक अँगुआ लोग, अउर फरीसी लोगन म से कोऊ यीसु के ऊपर बिसुआस किहिन हीं?” 49 पय ई पंचे जिनहीं मूसा के बिधान के नेमन के ग्यान नहिँ आय, एसे इनहीं परमातिमा सराप देइहँय। 50 नीकुदेमुस (जउन पहिले यीसु के लघे आए रहे हँय, जउन उन फरीसी लोगन म से रहे हँय) उनसे कहिन, 51 “हमहीं पंचन काहीं मूसा के द्वारा दीन बिधान, कउनव मनई काहीं जब तक ओखर पहिले सुनिके जान न लेय, कि उआ का किहिस ही; ओही दोसी नहीं ठहराबय।” 52 ऊँ पंचे उनहीं जबाब दिहिन, “का तुहूँ गलील प्रदेस के आह्या, पबित्र सास्त्र काहीं पढ़िके देखा, कि गलील प्रदेस से कउनव परमातिमा के सँदेस बतामँइ बाला, कबहूँ पइदा न होई।” 53 एखे बाद ऊँ पंचे सगले जन उहाँ से अपने-अपने घर चलेगें।

### ब्यभिचार करँइ बाली मेहेरिआ काहीं माफी

8 जब सगले मनई अपने-अपने घर चलेगें, तब यीसु जैतून नाम के पहार माहीं चलेगें। 2 अउर यीसु बड़े सकारे पुनि मन्दिर माहीं आएँ, तब सगले मनई उनखे लघे आइगें; अउर यीसु बइठिके उनहीं उपदेस देंइ लागें। 3 उहय समय मूसा के बिधान सिखामँइ बाले अउर फरीसी लोग एकठे मेहेरिआ काहीं, यीसु के लघे लइ आएँ, जउन ब्यभिचार करत पकड़ी गे रही हय, ओही बीच माहीं ठाढ़ कइके यीसु से कहिन। 4 “हे गुरू, इआ मेहेरिआ ब्यभिचार करत पकड़ी गे ही। 5 बिधान माहीं, मूसा नबी हमहीं इआ हुकुम दिहिन हीं, कि अइसन मेहेरिआन काहीं पथरा मारँइ चाही: पय अपना इआ मेहेरिआ के बारे माहीं का कहित हएन?” 6 ऊँ पंचे यीसु काहीं फसामँइ के खातिर इआ बात कहिन तय, जउने उनखे ऊपर दोस लगामँइ के खातिर कउनव बात पामँय, पय यीसु नीचे काहीं मँइ कए भुँइ माहीं अँगुरी से लिखँइ लागें। 7 काहेकि जब ऊँ पंचे यीसु से पूँछतय रहिगें, तब यीसु सीध ठाढ़ होइके, उनसे कहिन, “तौहरे पंचन म से जे कोऊ कबहूँ पाप न किहिस होय, उहय पहिले इआ मेहेरिआ काहीं पथरा मारय।” 8 अउर पुनि यीसु नीचे काहीं मँइ कए भुँइ माहीं अँगुरी से लिखँय लागें। 9 पय ऊँ पंचे इआ बात काहीं सुनिके, बड़े से लइके छोट तक एक-एक कइके सगले जन चलेगें, अउर उहाँ यीसु अकेले बचे, अउर उआ मेहेरिआ उहँय बीच माहीं ठाढ़ रहिगे। 10 तब यीसु सीध ठाढ़ होइके उआ मेहेरिआ से कहिन, “हे बहिनी, ऊँ पंचे सगले जन कहाँ चलेगें? का कोऊ तौहई सजा देंइ के हुकुम नहीं दिहिन?” 11 उआ मेहेरिआ कहिस, “हे प्रभू, कोऊ नहीं”: तब यीसु कहिन, “हमहूँ तौहरे ऊपर सजा के हुकुम नहीं देई; जा, चले जा, अउर पुनि पाप न किहा।”

### यीसु संसार के जोति आहीं

12 तब यीसु पुनि मनइन से कहिन, “संसार के जोति हमहिन आहेन; जे हमरे पीछे चली उआ अँधिआर माहीं न चली, पय जीवन देंइ बाली जोति पाई।” 13 इआ सुनिके फरीसी लोग उनसे कहिन; “अपना आपन गबाही खुदय देइत हएन; अपना के गबाही ठीक नहिँ आय।” 14 यीसु उनहीं जबाब दिहिन; “अगर हम आपन गबाही खुदय देइत हएन, तऊ हमार गबाही ठीक ही, काहेकि हम जानित हएन, कि हम कहाँ से आएन हय, अउर कहाँ जाब? पय तूँ पंचे नहीं जनते आह्या, कि हम कहाँ से आएन हय, अउर कहाँ जाब। 15 तूँ पंचे त मनइन के बनाए नेम के मुताबिक न्याय करते हया; पय हम कोहू के न्याय नहीं करी। 16 अउर अगर हम न्याय करबव करी, तऊ हमार न्याय सच्चा होई; काहेकि हम अकेले नहीं, बलकिन हम हएन, अउर हमरे साथ

पिता परमातिमा हैं, जे हमहीं पठइन हीं। 17 अउर मूसा नबी व्दारा दीन तौहरे बिधान माहीं घलाय लिखा हय, कि दुइ जनेन के गबाही † मिलिके ठीक होत ही। 18 एक त हम खुदय आपन गबाही देइत हएन, अउर दूसर पिता परमातिमा हमरे बारे माहीं गबाही देत हैं, जे हमहीं पठइन हीं।” 19 तब ऊँ पंचे यीसु से कहिन, “तौहार पिता कहाँ हैं?” यीसु उनहीं जबाब दिहिन, कि “न त तूँ पंचे हमहिन काहीं जनते आह्या, अउर न हमरे पिता काहीं, अगर तूँ पंचे हमहीं जन त्या, त हमरे पिता काहीं घलाय जन त्या।” 20 ई बातन काहीं यीसु मन्दिर माहीं उपदेस देत समय भन्दार घर माहीं कहिन तय, अउर कोऊ उनहीं पकड़ नहीं सकें; काहेकि पकड़े जाँइ, अउर मारे जाँइ के उनखर समय अबे नहीं आबा रहा आय।

### अपने बारे माहीं यीसु के बताउब

21 यीसु पुनि उनसे कहिन, कि “हम जइत हएन, अउर तूँ पंचे हमहीं ढुँढ़िहा, अउर अपने पापन के माफी पाए बिना मरिहा: जहाँ हम जइत हएन, उहाँ तूँ पंचे नहीं आय सकते आह्या।” 22 इआ सुनिके यहूदी धारमिक अँगुआ लोग कहिन, “का ऊँ अपने-आप काहीं खतम कइ लेइहँय, एसे इआमेर कहत हैं; कि जहाँ हम जइत हएन, उहाँ तूँ पंचे नहीं आय सकते आह्या।” 23 तब यीसु उनसे कहिन, “तूँ पंचे इआ धरती के आह्या, अउर हम स्वरग के आहेन, तूँ पंचे इआ संसार के आह्या, हम इआ संसार के न होहेन। 24 एसे हम तौहसे इआ कहेन हय, कि तूँ पंचे अपने पापन के माफी पाए बिना मरिहा; काहेकि अगर तूँ पंचे बिसुआस न करिहा, कि हम उहय आहेन, त अपने पापन के माफी पाए बिना मरिहा।” 25 तब ऊँ पंचे यीसु से कहिन, “अपना को आहेन?” यीसु उनसे कहिन, “हम †† उहय आहेन जउन सुरुआतय से तौहसे कहत आएन हँय। 26 तौहरे बारे माहीं हमहीं बहुत कुछ कहँय क हय, अउर निरनय करँइ क हय, पय हमहीं पठमँइ बाले सच्चे हँय; अउर जउन कुछ हम उनसे सुनेन हय, उहय संसार के मनइन से कहित हएन।” 27 ऊँ पंचे इआ नहीं समझे पाइन, कि हमसे यीसु पिता परमातिमा के बारे माहीं कहत हैं। 28 तब यीसु उनसे कहिन, “जब तूँ पंचे मनई के लड़िका काहीं क्रूस के खम्भा माहीं चढ़इहा, तब जान जइहा, कि हम उहय आहेन, अउर हम अपने-आप से कुछ नहीं करी, पय जइसन हमार पिता परमातिमा हमहीं सिखाइन हीं, उहयमेर ई बातन काहीं कहित हएन। 29 अउर जे हमहीं पठइन हीं, ऊँ हमरे साथ हैं; ऊँ हमहीं अकेले नहीं छोड़िन; काहेकि हम हमेसा उहय काम करित हएन; जउने काम से ऊँ प्रसन्न होत हैं।” 30 यीसु जब ई बातन काहीं कहतय रहे हँय, कि तबहिन खुब जने उनखे ऊपर बिसुआस किहिन।

### सत्य तोहई पंचन काहीं अजाद करी

31 तब यीसु ऊँ यहूदी लोगन म से जउन उनखे ऊपर बिसुआस किहिन तय, उनसे कहिन, “अगर तूँ पंचे हमरे बचन के पालन करत रइहा, त वास्तव माहीं हमार चेला ठहरिहा। 32 अउर तूँ पंचे सत्य काहीं जानिहा, अउर उहय सत्य तोहई अजाद करी।” 33 ऊँ पंचे यीसु काहीं जबाब दिहिन; कि “हम पंचे त अब्राहम के बंस के आहेन, अउर कबहूँ कोहू के दास नहीं भएन; पुनि अपना काहे कहित हएन, कि तूँ पंचे अजाद होइ जइहा?” 34 तब यीसु उनहीं जबाब दिहिन; “हम तौहसे सही-सही कहित हएन; कि जे कोऊ पाप करत हय, उआ पाप के दास आय। 35 अउर दास हमेसा घर माहीं नहीं रहय; पय लड़िका हमेसा घर माहीं रहत हय। 36 एसे अगर लड़िका तोहई अजाद करी, त वास्तव माहीं, तूँ पंचे अजाद होइ जइहा। 37 हम जानित हएन, कि तूँ पंचे अब्राहम के बंस के आह्या; तऊ हमरे बचन काहीं हिरदँय से नहीं अपनउते आह्या, एहिने से तूँ पंचे हमहीं मारि डारँय चहते हया। 38 हम उहय कहित हएन, जउन अपने पिता के इहाँ देखेन हँय; अउर तूँ पंचे उहय करते हया, जउन अपने पिता से सुने हया।” 39 जब ऊँ पंचे यीसु काहीं जबाब दिहिन, “कि हमार पंचन के कुल पिता त अब्राहम आहीं”: तब यीसु उनहीं

जबाब दिहिन; “अगर तूँ पंचे अब्राहम के सन्तान होत्या, त अब्राहम कि नाई काम कर त्या।<sup>40</sup> जउन सत्य बचन हम परमातिमा से सुनेन हय, उहय तौहसे बतायन हय, पय तूँ पंचे हमहीं मारि डारैँ चहते हया। अइसन त अब्राहम कबहूँ नहीं किहिन तय।<sup>41</sup> तूँ पंचे अपने पिता कि नाई काम करते हया”। तब ऊँ पंचे यीसु से कहिन, “हम पंचे ब्यभिचार से नहीं पड़दा भएन; हमार पंचन के एकयठे पिता हैं, अउर ऊँ आहीं परमातिमा।”<sup>42</sup> इआ सुनिके यीसु उनसे कहिन, “अगर वास्तव माहीं परमातिमा तौहार पिता होतें, त तूँ पंचे हमसे प्रेम रख त्या; काहेकि हम परमातिमय से निकरिके आएन हँय; हम अपने से नहीं आएन, बलकिन उँइन हमहीं पठइन हीं।<sup>43</sup> हम जउन कहित हएन, उआ बात काहीं तूँ पंचे काहे नहीं समझे पउते आह्या? एखर कारन इआ हय, कि तूँ पंचे हमरे बातन काहीं सुनते नहिं आह्या।<sup>44</sup> काहेकि तूँ पंचे अपने पिता सइतान के सन्तान आह्या। अउर तूँ पंचे अपने पिता के मरजी काहीं पूर करैँ चहते हया। उआ त संसार के सुरुआतय से कतली आय, अउर उआ सत्य के पच्छ कबहूँ नहीं लिहिस। काहेकि ओखे जीवन माहीं सत्य हइअय नहिं आय: अउर झूँठ बोलब ओखर सुभाबय आय; काहेकि उआ हमेसा झूँठ बोलैँ बाला आय, बलकिन झूँठ बोलैँ के सुरुआतय करैँ बाला आय।<sup>45</sup> तूँ पंचे हमरे बात के बिसुआस एसे नहीं मनते आह्या, काहेकि हम सही बोलित हएन।<sup>46</sup> अउर तौहरे पंचन म से को हमहीं पापी ठहराय सकत हय? अगर नहीं, त पुनि जब हम सही बात कहित हएन, त हमरे बात के बिसुआस काहे नहीं मनते आह्या? <sup>47</sup> जे परमातिमा के जन होत हय, उआ परमातिमा के बातन काहीं सुनिके मानत हय; अउर तूँ पंचे परमातिमा के बचन काहीं एसे नहीं सुनते आह्या, काहेकि तूँ पंचे परमातिमा के जन न होह्या।”

### यीसु अउर अब्राहम

<sup>48</sup> इआ सुनिके यहूदी लोग यीसु से कहिन; “एहिन से हम पंचे तौहई ठीकय आय कहित हएन, कि तूँ सामरी आह्या, अउर तौहरे भीतर बुरी आत्मा हय।” <sup>49</sup> तब यीसु उनहीं जबाब दिहिन, कि “हमरे भीतर बुरी आत्मा नहिं आय; बलकिन हम त अपने पिता के आदर करित हएन, अउर तूँ पंचे हमार निरादर करते हया।<sup>50</sup> हम आपन बड़ाई नहीं चाही, पय हँ, एक जने अइसा हँ, जे आपन बड़ाई चाहत हँ, अउर उँइन न्याय करत हँ।<sup>51</sup> हम तौहसे सही-सही कहित हएन, अगर कउनव मनई हमरे बचन के मुताबिक चली, त उआ अनन्तकाल तक न मरी।” <sup>52</sup> तब यहूदी लोग यीसु से कहिन, “अब हम पंचे जान लिहेन हँय, कि तौहरे भीतर बुरी आत्मा हय: अब्राहम मरिगें अउर परमातिमा के सँदेस बतामँइ बाले घलाय मरिगें, अउर तूँ कहते हया, कि अगर कोऊ हमरे बचन के मुताबिक चली, त उआ अनन्तकाल तक न मरी।<sup>53</sup> हमार पंचन के कुल पिता अब्राहम त मरिगें, का तूँ उनसे बड़े हया? अउर परमातिमा के सँदेस बतामँइ बाले घलाय मरिगें, तूँ खुद काहीं का ठहरामँइ चहते हया।” <sup>54</sup> तब यीसु उनहीं जबाब दिहिन; “अगर हम खुदय आपन बड़ाई करी, त हमार बड़ाई कुछू न होय, पय हमार बड़ाई करैँ बाले हमार पिता परमातिमा हँ, जिनहीं तूँ पंचे कहते हया, कि ऊँ हमार परमातिमा आहीं।<sup>55</sup> तूँ पंचे उनहीं नहीं जनते आह्या, पय हम उनहीं जानित हएन; अउर अगर हम कही, कि हम उनहीं नहीं जानी, त हम तौहरे कि नाई लबरी बोलैँ बाले ठहरब; काहेकि हम उनहीं जानित हएन, अउर उनखे बचन के मुताबिक चलित हएन।<sup>56</sup> तौहार पंचन के पूरबज अब्राहम, धरती माहीं हमरे आमँइ के दिन देखैँ के आसा माहीं खुब आनन्दित रहे हँय; अउर ऊँ देखिन, अउर आनन्दित भें।” <sup>57</sup> यहूदी लोग यीसु से कहिन, “अबे तूँ पचासव बरिस के नहीं भया; तऊ तूँ कहते हया, कि हम अब्राहम काहीं देखेन हँय?” <sup>58</sup> तब यीसु उनसे कहिन, “हम तौहसे सही-सही कहित हएन; अब्राहम के पड़दा होइ से पहिलेव हम रहेन हँय।” <sup>59</sup> तब ऊँ पंचे यीसु काहीं मारैँ के खातिर पथरा उठाइन, पय यीसु लुकिके मन्दिर से निकरिके चलेंगे।

### जनम से आँधर मनई काहीं नीक करब

**9** जब यीसु जात रहे हँय, तब ऊँ गइल माहीं एकठे मनई काहीं देखिन, जउन जनम से आँधर रहा हय।<sup>2</sup> तब उनखर चेला लोग उनसे पूछैँ लागें, “हे गुरु, को पाप किहिस रहा हय, कि इआ मनई आँधर पड़दा भ हय, इआ खुदय पाप किहिस तय, कि एखर बाप-महतारी?”<sup>3</sup> यीसु जबाब दिहिन, “न त इआ मनई पाप किहिस, अउर न एखर बाप-महतारी: बलकिन इआ एसे आँधर पड़दा भ, कि एही नीक कइके परमातिमा के सक्ती देखाई जाय सकय।<sup>4</sup> जे हमहीं पठइन हीं, उनखे कामन काहीं निश्चित रूप से हमहीं दिनय दिन माहीं कइ लेंइ चाही, काहेकि जब रात होइ जात ही, त कोऊ काम नहीं कइ सकय।<sup>5</sup> जब तक हम संसार माहीं हएन, तब तक हम संसार के जोति आहैन।”<sup>6</sup> इआ कहिके ऊँ भूँइ माहीं थूँकिन, अउर ओसे माटी सानिन, अउर उआ आँधर के आँखी माहीं लगाइके,<sup>7</sup> ओसे कहिन, “जा, सीलोह के कुन्ड माहीं धोय लिहा।” (सीलोह के मतलब हय पठउब) अउर उआ जाइके आँखी धोइस, अउर उआ देखत लउटि आबा।<sup>8</sup> तब ओखर परोसी अउर जेतने ओही भीख मागत देखिन तय, कहँइ लागें; “का इआ उहय मनई न होय, जउन बइठे भीख मागा करत रहा हय?”<sup>9</sup> कुछ जने कहिन, “इआ उहय आय” अउर कुछ जने कहिन, “नहीं, उआ न होय, बलकिन ओहिन कि नाई लागत आय हय।” इआ सुनिके उआ मनई कहिस, “हम उहय आहैन।”<sup>10</sup> तब ऊँ पंचे ओसे पूछैँ लागें, “तौहार आँखी कइसन नीक भई हँय?”<sup>11</sup> उआ मनई उनहीं जबाब दिहिस, कि “यीसु नाम के एकठे मनई माटी सानिन, अउर हमरे आँखी माहीं लगाइके हमसे कहिन, जाइके सीलोह के कुन्ड माहीं धोय ल्या, तब हम जाइके आँखी धोयन त हमहीं देखाई लाग।”<sup>12</sup> ऊँ पंचे ओसे पूँछिन; “ऊँ कहाँ हँ?” उआ कहिस; “हम नहीं जानी।”

### फरीसी लोगन के व्दारा आँधर मनई के नीक होइ के बारे माहीं जाँच-परताल

<sup>13</sup> तब ऊँ पंचे उआ मनई काहीं जउन पहिले आँधर रहा हय, फरीसी लोगन के लघे लइगें।<sup>14</sup> जउने दिना यीसु माटी सानिके उआ मनई के आँखी माहीं लगाइके नीक किहिन तय, उआ दिना पबित्र दिन रहा हय।<sup>15</sup> तब फरीसी लोग घलाय ओसे पूँछिन; बताबा तौहार आँखी कइसनके नीक भई हँय? तब उआ मनई उनसे कहिस; “ऊँ हमरे आँखी माहीं माटी लगाइन, फेर हम धोय लिहेन, अउर अब देखित हएन।”<sup>16</sup> इआ सुनिके कुछ फरीसी कहँइ लागें; “जउन मनई एही नीक किहिन हीं, ऊँ परमातिमा कइती से न होंहीं, काहेकि ऊँ पबित्र दिन काहीं नहीं मानैँय।” तब कुछ जने कहँइ लागें, पापी मनई कइसन अचरज के काम देखाय सकत हय? एसे ऊँ पंचन माहीं फूट परिगे।<sup>17</sup> ऊँ पंचे पुनि जउन पहिले आँधर रहा हय, उआ मनई से पूँछिन, “ऊँ मनई जउन तौहार आँखी नीक किहिन हीं, उनखे बारे माहीं तूँ का कहते हया?” उआ कहिस, “ऊँ परमातिमा के सँदेस बतामँइ बाले आहीं।”

<sup>18</sup> पय यहूदी धारमिक अँगुअन काहीं बिसुआस नहीं भ, कि इआ पहिले आँधर रहा हय, अउर अब देखत हय, जब तक ऊँ पंचे जउने के आँखी नीक होइ गई तय, ओखे बाप-महतारी काहीं बोलबाइके,<sup>19</sup> उनसे इआ पूँछ न लिहिन, “कि का इआ तौहारय लडिका आय, जउने काहीं तूँ पंचे कहते हया, कि इआ आँधर पड़दा भ रहा हय? त पुनि इआ अब कइसन देखैँ लाग?”<sup>20</sup> ओखर बाप-महतारी जबाब दिहिन; “हम त इआ जानित हएन, कि इआ हमारय लडिका आय, अउर आँधर पड़दा भ रहा हय।<sup>21</sup> पय हम पंचे इआ नहीं जानित आय, कि अब एही कइसन देखैँ लाग, अउर न इहय जानी, कि को एखर आँखी नीक किहिस ही; उआ खुदय बतामँइ लाइक हय; ओहिन से पूँछ लेई; त उआ खुदय अपने बारे माहीं बताय देई।”<sup>22</sup> इआमेर ओखर बाप-महतारी एसे कहिन, काहेकि ऊँ पंचे यहूदी धारमिक अँगुअन से डेरात रहे हँय; काहेकि सगले यहूदी धारमिक अँगुआ लोग साहुत बाँध लिहिन तय, कि अगर कोऊ कही, कि ऊँ मसीह आहीं, त ओही सभाघर से

निकार दीन जई।<sup>23</sup> इहय कारन से ओखर बाप-महतारी कहिन तय, कि उआ खुदय बतामँड लाइक हय; ओहिन से पूँछ लेई।

<sup>24</sup> तब ऊँ पंचे उआ मनई से जउन पहिले आँधर रहा हय, दुसराय बोलाइके कहिन, “परमातिमा के स्तुति करा; हम पंचे त जानित हएन, कि ऊँ मनई पापी हें।”<sup>25</sup> उआ जबाब दिहिस: “हम नहिं जानी, कि ऊँ पापी हें, कि नहिं: हम त केबल एतना जानित हएन, कि हम आँधर रहेन हय, अउर अब देखित हएन।”<sup>26</sup> ऊँ पंचे पुनि ओसे कहिन, कि “ऊँ तौहरे साथ का किहिन हीं? कि तौहार आँखी नीक होइ गई?”<sup>27</sup> उआ उनसे कहिस; “हम तौहसे त पहिलेन कहि चुकेन हँय, पय तूँ पंचे हमार बिसुआस नहीं मनते आह्या; अब दुसराय काहे उहय बात काहीं सुनँय चहते हया? का तुहूँ पंचे घलाय उनखर चेला बनई चहते हया।”<sup>28</sup> तब ऊँ पंचे ओही भला-बुरा कहिके बोलिन, “तहिन उनखर चेला आहे; हम पंचे त मूसा नबी के चेला आहैन।<sup>29</sup> हम पंचे त जानित हएन, कि परमातिमा मूसा नबी से बातँय किहिन तय; पय इआ मनई काहीं नहीं जानी कि कहाँ के आय।”<sup>30</sup> उआ उनहीं जबाब दिहिस, “इआ त अचरज के बात आय, कि तूँ पंचे उनहीं नहीं जनते आह्या, कि ऊँ कहा के आहीं, तऊँ ऊँ हमरे आँखिन काहीं नीक कइ दिहिन हीं।<sup>31</sup> हम पंचे त एतना जानित हएन, कि परमातिमा पापिन के नहीं सुनँय, पय अगर कोऊ परमातिमा के भक्त होय, अउर उनखे मरजी के मुताबिक चलत होय, त परमातिमा ओखर सुनत हें।<sup>32</sup> संसार के सुरुआत से इआ कबहूँ नहीं सुनान, कि कोऊ जनम से आँधर मनई के आँखी नीक किहिस होय।<sup>33</sup> अगर ऊँ मनई परमातिमा के तरफ से न आए होतें, त कुछ नहिं कइ सकत रहे आँय।”<sup>34</sup> ऊँ पंचे ओही जबाब दिहिन, कि “तँय त जनमँय से पापी आहे, तँय हमहीं का सिखउते हए? अउर यहूदी धारमिक अँगुआ लोग ओही सभाघर से बहिरे निकार दिहिन।”

### आत्मिक अंधापन

<sup>35</sup> जब यीसु सुनिन कि ऊँ पंचे ओही यहूदी सभाघर से बहिरे निकार दिहिन हीं; अउर जब ओसे भेंट भय, तब यीसु कहिन, कि “का तूँ परमातिमा के लड़िका के ऊपर बिसुआस करते हया?”<sup>36</sup> उआ उनसे कहिस, “हे प्रभू, बताई ऊँ को आहीं, कि हम उनखे ऊपर बिसुआस करी?”<sup>37</sup> यीसु ओसे कहिन, “तूँ उनहीं देख चुके हया; अउर ऊँ, उँइन आहीं जिनसे तूँ अबे बात कइ रहे हया।”<sup>38</sup> उआ कहिस, “हे प्रभू, हम बिसुआस करित हएन: अउर उआ उनखे गोड़न गिरा।”<sup>39</sup> तब यीसु कहिन, “हम इआ संसार माहीं न्याय करँइ आए हएन, जउने जे नहीं देखँइ, ऊँ देखँइ लागँय, अउर जे देखत हें, ऊँ आँधर होइ जाँय।”<sup>40</sup> जउन फरीसी उनखे साथ माहीं रहे हँय, ऊँ पंचे यीसु के बात काहीं सुनिके उनसे कहिन, “का हमहूँ पंचे आँधर हएन?”<sup>41</sup> तब यीसु उनसे कहिन, “अगर तूँ पंचे आँधर होत्या, त पापी न ठहर त्या, पय अब कहते हया, कि हम पंचे देखित हएन, एसे तूँ पंचे परमातिमा के आँगे पापी ठहरिहा।”

### यीसु निकहा चरबाहा आहीं

**10** पुनि यीसु उनसे कहिन, “हम तौहसे सही-सही कहित हएन, कि जे कोऊ दुअरा से गाड़ के सार माहीं नहीं जाय, बलकिन कउनव दुसरी कइती से चढ़िके घुसत हय, त उआ चोर अउर डाँकू आय।<sup>2</sup> पय जउन दुअरा से गाड़ के सार माहीं जात हय, उहय गड़न के चरबाहा आय।<sup>3</sup> अउर ओखे खातिर गाड़ के सार माहीं पहरा देंइ बाला चउकीदार, दुअरा खोल देत हय, अउर गाड़ ओखे बात काहीं मनती हई, अउर उआ अपने गड़न काहीं ‘नाम लइ-लइके बोलाबत हय, अउर बहिरे लइ जात हय।<sup>4</sup> अउर जब उआ अपने गड़न काहीं सार से बहिरे निकार चुकत हय, तब उआ आँगे-आँगे चलत हय, अउर गाड़ ओखे पीछे-पीछे चलती हई; काहेकि ऊँ सगली ओखे बोल काहीं पहिचनती हई।<sup>5</sup> पय गाड़ कउनव अनजान मनई के पीछे कबहूँ न जइहँय, बलकिन ओसे दूरिन भगिहँय, काहेकि गाड़ अनजान मनई के बोल काहीं नहीं पहिचनती।”<sup>6</sup> यीसु उनहीं

इआ उदाहरन बताइन, पय ऊँ पंचे नहीं समझे पाइन, कि ई कउन बात आहीं, जउन ऊँ हमसे कहत हें।

<sup>7</sup> तब यीसु उनसे पुनि कहिन, “हम तौहसे सही-सही कहित हएन, कि गड़न के दुअरा हमहिन आहैन।<sup>8</sup> जेतने हमसे पहिले आएँ; ऊँ सगले चोर अउर डाँकू आहीं, एसे गाड़ उनखर बात नहीं सुनिन।<sup>9</sup> दुअरा हमहिन आहैन: अगर कोऊ हमरे व्दारा भीतर जई, त उआ मुक्ती पाई, अउर भीतर-बाहरअई जई अउर चारा पाई।<sup>10</sup> चोर कउनव दुसरे काम से नहीं आबय, उआ केबल चोरी करँइ, अउर कतल करँइ, अउर नास करँइ आबत हय, पय हम एसे आएन हँय, कि ऊँ पंचे भरपूर जीवन पामँइ।

<sup>11</sup> निकहा चरबाहा हमहिन आहैन; निकहा चरबाहा अपने गड़न के खातिर आपन प्रान दइ देत हय।<sup>12</sup> मजूर जउन न त चरबाहय आय, अउर न गड़न के मालिकय आय, उआ डगर काहीं आबत देखिके, गड़न काहीं छोड़िके भाग जात हय, अउर डगर उनखे ऊपर हमला कइके, उनहीं तितर-बितर कइ देत हय।<sup>13</sup> उआ एसे भाग जात हय, काहेकि उआ मजूर आय, अउर ओही गड़न के चिन्ता नहीं रहय।<sup>14</sup> निकहा चरबाहा हमहिन आहैन; अउर हम अपने गड़न काहीं जानित हएन, अउर हमार सगली गाड़ हमहीं जनती हई।

<sup>15</sup> जउनमेर पिता हमहीं जानत हें, उहयमेर हमहूँ पिता काहीं जानित हएन। अउर हम अपने गड़न के खातिर आपन प्रान देइत हएन।<sup>16</sup> अउर हमार अउरव गाड़ हई, जउन अबय तक गाड़ के इआ सार माहीं नहिं आहीं; हमहीं उनहूँ काहीं लइ आउब जरूरी हय, अउर ऊँ सगली हमार बात मनि हँय; तब एकयठे झुन्ड, अउर एकयठे चरबाहा होई।<sup>17</sup> परमपिता एसे हमसे प्रेम करत हें, कि हम आपन प्रान देइत हएन, कि जउने पुनि जिन्दा होइ जई।<sup>18</sup> कोऊ ओही हमसे छड़ाबय नहीं, बलकिन हम ओही अपने मरजी से देइत हएन: काहेकि हमहीं ओही देंइ के अधिकार हय, अउर ओही लेऊँ के अधिकार हय: इआ हुकुम हमहीं हमरे पिता से मिला हय।”

<sup>19</sup> ई बातन के कारन यहूदी समाज के मनइन माहीं पुनि फूट परिगे।<sup>20</sup> उनमा से खुब जने कहँइ लागें, कि “यीसु के भीतर बुरी आत्मा हय, अउर ऊँ पागल होइगे हँय; उनखर बात काहे मनते हया?”<sup>21</sup> अउर कुछ जने कहिन, “ई बातँय कउनव अइसा मनई के नहीं होइ सकँय, जेखे भीतर बुरी आत्मा होय, काहेकि बुरी आत्मा कउनव आँधर मनई के आँखी नहीं नीक कइ सकय।”

### हमार पिता अउर हम एकय आहैन

<sup>22</sup> यरूसलेम सहर माहीं जाड़े के रित माहीं, स्थापन नाम के तेउहार आबा।<sup>23</sup> अउर यीसु मन्दिर माहीं सुलैमान के बरामदा माहीं टहलत रहे हँय।<sup>24</sup> तब यहूदी समाज के खुब मनई आइके उनहीं घेर लिहिन, अउर पूँछिन, कि “अपना हमरे मन काहीं कब तक दुबिधा माहीं डारे रहब? अगर अपना मसीह आहैन, त हमहीं साफ-साफ बताय देई।”<sup>25</sup> तब यीसु जबाब दिहिन, कि “हम त तौहई पंचन काहीं पहिलेन बताय चुकेन हय, अउर तूँ पंचे हमरे बात के बिसुआसय नहीं मनते आह्या, जउन काम हम अपने पिता के नाम से करित हएन, उँइन काम हमार गबाह हें।<sup>26</sup> पय तूँ पंचे एसे हमरे बात के बिसुआस नहीं मनते आह्या, काहेकि हमरे गड़न म से न होह्या।<sup>27</sup> हमार सगली गाड़ हमार बात मनती हँय, अउर हम उनहीं सगलेन काहीं जानित हएन, अउर ऊँ सगली हमरे पीछे-पीछे चलती हँय।<sup>28</sup> अउर हम उनहीं अनन्त जीवन देइत हएन, अउर ऊँ सगली कबहूँ नास न होइ हँय, अउर न कोऊ उनहीं हमसे छड़ाएन पाई।<sup>29</sup> ऊँ सगलिन काहीं हमहीं देंइ बाले हमार पिता सगलेन से बड़े हें, अउर कोऊ उनहीं पिता के हाँथे से छड़ाय नहीं सकय।<sup>30</sup> हम अउर पिता एकय आहैन।”

<sup>31</sup> यहूदी समाज के मनई यीसु काहीं पथरा मारँइ के खातिर, पथरा उठाय लिहिन।<sup>32</sup> तब यीसु उनसे कहिन, कि “हम तौहई अपने पिता के तरफ से कइयकठे निकहे काम देखायन हय, उनमा से कउने काम के खातिर, तूँ पंचे हमहीं पथरा मारँइ चहते हया?”<sup>33</sup> तब यहूदी समाज के मनई उनहीं जबाब

दिहिन, “निकहे काम के खातिर हम पंचे तौहई पथरा न होय मारित हएन, बलकिन एसे कि जउन तूँ परमातिमा के बुराई करते हया, अउर तूँ मनई होइके अपने-आप काहीं परमातिमा बनउते हया।”<sup>34</sup> यीसु उन्हीं जबाब दिहिन, “का तौहरे पबित्र सास्त्र माहीं नहीं लिखा आय, कि ‘हम कहेन हय, कि तूँ पंचे परमातिमा † आह्या?’<sup>35</sup> अगर ऊँ उन्हीं परमातिमा कहिन हीं, जिनखे लघे परमातिमा के बचन पहुँचा हय, (पबित्र सास्त्र माहीं लिखी बात सत्य हई)<sup>36</sup> त जेही पिता पबित्र ठहराइके संसार माहीं पठइन हीं, तूँ पंचे उनसे कहते हया, कि तूँ परमातिमा के बुराई करते हया, एसे कि जउन हम कहेन, कि ‘हम परमातिमा के लड़िका आहैन।’<sup>37</sup> अगर हम अपने पिता के काम नहीं करी, त हमार बिसुआस न माना।<sup>38</sup> पय अगर हम करित हएन, त चाह हमार बिसुआस नहिं करा, पय ऊँ कामन के त बिसुआस करा, जउने तूँ पंचे जान जा, अउर समझा कि पिता हमरे भीतर हें, अउर हम पिता माहीं हएन।”<sup>39</sup> तब ऊँ पंचे यीसु काहीं पकड़ई के कोसिस किहिन, पय उन्हीं नहीं पकड़े पाइन, अउर ऊँ उहाँ से निकरिगें।<sup>40</sup> एखे बाद यीसु उहाँ से यरदन नदी के दुसरे पार उआ जघा माहीं चलेगें, जहाँ यूहन्ना बपतिस्मा देई बाले बपतिस्मा देत रहे हँय, अउर उहँइ रहँइ लागें।<sup>41</sup> अउर खुब जने उनखे लघे आबत रहे हँय, अउर आपस माहीं बतात रहे हँय, कि यूहन्ना बपतिस्मा देई बाले, त कउनव चमत्कार नहीं देखाइन, पय जउन कुछ यूहन्ना बपतिस्मा देई बाले इनखे बारे माहीं कहिन रहा हय, उआ सगला बेलकुल सही निकरा।<sup>42</sup> अउर उहाँ खुब जने यीसु के ऊपर बिसुआस किहिन।

### लाजर के मउत

**11** बैतनिय्याह नाम के गाँव माहीं लाजर नाम के एकठे मनई बिमार रहे हँय, उनखे साथ माहीं उनखर दुइठे बहिनी, मरियम अउर मारथा रहत रही हँय।<sup>2</sup> ई उँइन मरियम आहीं, जउन प्रभू के ऊपर अँतर डारिके उनखे गोडेन काहीं अपने बालन से पौँछिन रहा हय, इनहिन के भाई लाजर बिमार रहे हँय।<sup>3</sup> एसे उनखर बहिनी यीसु के लघे सँदेस कहबाय पठइन, कि “हे प्रभू, देखी, जेसे अपना प्रेम करित हएन ऊँ बिमार हें।”<sup>4</sup> यीसु सँदेस सुनिके कहिन, “इआ बिमारी मउत के न होय, बलकिन परमातिमा के बड़ाई होंय के खातिर आय, जउने एखे व्दारा परमातिमा के लड़िका के बड़ाई होय।”<sup>5</sup> काहेकि यीसु मारथा, मरियम अउर उनखे भाई लाजर से प्रेम करत रहे हँय।<sup>6</sup> एसे जब ऊँ सुनिन, कि लाजर बिमार हें, त जउने जघा माहीं रहे हँय, उहाँ दुइ दिना अउर रुकिगें।<sup>7</sup> एखे बाद यीसु अपने चलन से कहिन, “आबा हम पंचे पुनि यहूदिया प्रदेश माहीं चली।”<sup>8</sup> तब चेला लोग यीसु से कहिन, “हे गुरु, कुछ दिना पहिलेन यहूदी लोग अपना काहीं पथरा मारँइ चाहत रहे हँय, तऊ अपना उहाँ जाँय चाहित हएन।”<sup>9</sup> यीसु उन्हीं जबाब दिहिन, “काहे दिन माहीं बारा घन्टा नहीं होंय? अगर कोऊ दिन माहीं चलय, त ठोकर नहीं खाय, काहेकि उआ इआ संसार के उँजिआर काहीं देखत हय।<sup>10</sup> पय अगर कोऊ रात माहीं चलय, त ठोकर खात हय, काहेकि ओमा उँजिआर नहीं होय।”<sup>11</sup> ई सगली बातन काहीं कहे के बाद, यीसु अपने चलन से कहिन, कि “हमार साथी लाजर सोइगे हँय, पय हम उन्हीं जगामँय जइत हएन।”<sup>12</sup> तब चेला उनसे कहिन, “हे प्रभू, अगर ऊँ सोइगे हँय, त बच जइहँय।”<sup>13</sup> यीसु त लाजर के मउत के बारे माहीं कहिन तय, पय चेला समझिन, कि ऊँ नींद माहीं सोय जाँइ के बारे माहीं कहिन हीं।<sup>14</sup> तब यीसु चलन से साफ-साफ बताय दिहिन, कि लाजर मरिगे हें।<sup>15</sup> अउर हम तौहरे कारन आनन्दित हएन, कि हम उहाँ नहीं रहेन आय, जउने तूँ पंचे हमरे ऊपर बिसुआस करा, पय अब आबा, हम पंचे उनखे लघे चली।<sup>16</sup> तब थोमा जउन दिदुमुस के नाम से घलाय जाने जात रहे हँय, अपने साथ माहीं रहँइ बाले दुसरे चलन से कहिन, “आबा, हमहूँ पंचे उनखे साथ मरँइ के खातिर चली।”

### मरेन म से जि उँइ बाले अउर जीबन देई बाले यीसु आहीं

<sup>17</sup> यीसु काहीं उहाँ आइके पता चला, कि लाजर काहीं कब्र माहीं धरे चार दिन होइ चुके हँय।<sup>18</sup> बैतनिय्याह गाँव यरूसलेम सहर से करीब तीन किलोमीटर के दूरी माहीं रहा हय।<sup>19</sup> अउर खुब यहूदी लोग मारथा अउर मरियम के लघे उनखे भाई के बारे माहीं सान्ति देई के खातिर आए रहे हँय।<sup>20</sup> एसे मारथा यीसु के आमँइ के खबर सुनिके, उनखे लघे मिलँइ के खातिर गई, पय मरियम घरय माहीं बइठ रहि गई।<sup>21</sup> अउर मारथा यीसु से कहिन, “हे प्रभू, अगर अपना इहाँ होइत, त हमार भाई कबहूँ न मरत।”<sup>22</sup> अउर अबहिनव हम जानित हएन, कि अपना जउन कुछ परमातिमा से मागब, त ऊँ अपना काहीं देइहँय।”<sup>23</sup> यीसु उनसे कहिन, “तौहार भाई जिन्दा होइ जई।”<sup>24</sup> तब मारथा उनसे कहिन, “हम जानित हएन, कि अन्तिम न्याय के दिन जब जउन मनई मरिगे हँय पुनि जिन्दा होइ हँय, उहय समय उहव जिन्दा होइ जई।”<sup>25</sup> यीसु उनसे कहिन, “जउन मनई मरिगे हँय, उन्हीं पुनि जिन्दा करँइ बाले, अउर जीबन देई बाले हमहिन आहैन, जे कोऊ हमरे ऊपर बिसुआस करत हय, अगर उआ मरिव जाय, तऊ जिन्दा होइ जई।”<sup>26</sup> अउर जे कोऊ जिन्दा हय, अउर हमरे ऊपर बिसुआस करत हय, त उआ अनन्तकाल तक न मरी, का तूँ इआ बात के ऊपर बिसुआस करते हया?”<sup>27</sup> तब मारथा उनसे कहिन, “हौं हे प्रभू, हम बिसुआस कइ चुके हएन, कि परमातिमा के लड़िका मसीह जउन संसार माहीं आमँइ बाले रहे हँय, ऊँ अपनय आहैन।”

### यीसु रोइन

<sup>28</sup> इआ कहिके ऊँ चली गई, अउर अपने बहिनी मरियम काहीं चुप्पय से बोलाइके कहिन, “गुरु इहँय हें, अउर तोहई बोलाबत हें।”<sup>29</sup> जब मरियम इआ सुनिन, त ऊँ हरबिन उठिके उनसे मिलँइ चल दिहिन।<sup>30</sup> (यीसु अबे गाँव माहीं नहीं पहुँचे रहे आँय, बलकिन उहय जघा माहीं रुके रहे हँय, जहाँ मारथा यीसु से मिली रही हँय।)<sup>31</sup> तब जउन यहूदी लोग उनखे साथ उनखे घर माहीं रहे हँय, अउर उन्हीं सान्ति देत रहे हँय, इआ देखिके, कि मरियम हरबिन उठिके बहिरे चली गई हँय, त इआ समझिन कि ऊँ कब्र माहीं रोमँइ के खातिर जाती हई, एसे उनखे पीछे-पीछे चल दिहिन।<sup>32</sup> जब मरियम उहाँ पहुँची जहाँ यीसु रहे हँय, तब उन्हीं देखतय उनखे गोड़े माहीं गिरिके कहिन, “हे प्रभू, अगर अपना इहाँ होइत त हमार भाई कबहूँ न मरत।”<sup>33</sup> जब यीसु उन्हीं अउर यहूदी लोगन काहीं जउन मरियम के साथ आए रहे हँय, रोबत देखिन, त आत्मा माहीं खुब उदास भें, अउर दुखी होइके कहिन, “तूँ पंचे लाजर के लहास काहीं कहाँ धरे हया?”<sup>34</sup> ऊँ पंचे उनसे कहिन, “हे प्रभू, अपना खुदय चलिके देख लेई।”<sup>35</sup> तब यीसु रोमँइ लागें।<sup>36</sup> तब यहूदी लोग कहँइ लागें, “देखा, ऊँ लाजर से केतना प्रेम करत रहे हँय।”<sup>37</sup> पय उनमा से कुछ जने कहिन, “का ई जे आँधर के आँखी काहीं नीक किहिन तय, एतनव नहीं कइ सकें कि लाजर न मरत?”

### लाजर काहीं जिन्दा करब

<sup>38</sup> तब यीसु मन माहीं पुनि खुब उदास होइके कब्र के लघे गें, उआ एकठे गुफा रही हय, अउर एकठे पथरा दुअरा माहीं धरा रहा हय।<sup>39</sup> तब यीसु कहिन, “पथरा काहीं हटाबा”: तब उआ मरे मनई के बहिनी मारथा उनसे कहँइ लाग, “हे प्रभू, उनखर देह त अब गंधाय लाग होई, काहेकि उन्हीं मरे चार दिन होइगे हँय।”<sup>40</sup> तब यीसु उनसे कहिन, “का हम तौहसे नहीं कहेन तय, कि अगर तूँ बिसुआस करिहा, त परमातिमा के महिमा काहीं देखिहा।”<sup>41</sup> एसे ऊँ पंचे उआ पथरा काहीं हटाइन, तब यीसु ऊपर कइती निहारिके कहिन, कि “हे पिता, हम अपना के धन्यवाद करित हएन, कि अपना हमार सुन लिहेन हय।”<sup>42</sup> अउर हम जानित हएन, कि अपना हमार हमेसा सुनित हएन, पय जउन भीड़ के मनई हमरे आस-पास ठाढ़ हें, इनखे कारन हम इआ कहेन हय, जउने ई पंचे बिसुआस करँइ, कि अपनय हमहीं पठएन

हैं।<sup>43</sup> इआ कहिके, यीसु चन्डे से गोहराइन, कि “हे लाजर, बहिरे निकरि आबा।”<sup>44</sup> तबहिनय उआ जउन मरिगा रहा हय, हाँथे गोड़े माहीं कफन बाँधेन बाँधे निकरि आबा, अउर ओखे मुँहे माहीं घलाय कफन लपटा रहा हय, तब यीसु उनसे कहिन, “उनखर कफन छोरिके जाँइ द्या।”

**यीसु के बिरोध माहीं खडयन्त्र रचब**  
(मत्ती 26:1-5; मरकुस 14:1,2; लूका 22:1,2)

<sup>45</sup> तब जउन यहूदी लोग मरियम के साथ आए रहे हैं, यीसु के इआ काम काहीं देखिके, उनमा से खुब जने यीसु के ऊपर बिसुआस किहिन।<sup>46</sup> पय उनमा से कुछ जने फरीसी लोगन के लघे जाइके, यीसु जउन काम किहिन रहा हय, ओखर खबर उनसे बताइन।<sup>47</sup> इआ सुनिके प्रधान याजक लोग, अउर फरीसी लोग महासभा के सदस्सन काहीं एकट्टा कइके कहिन, “हमहीं पंचन काहीं का करँइ चाही? इआ मनई त खुब चमत्कार के काम देखाबत हय।<sup>48</sup> अगर हम पंचे ओही अइसय छोंड़ि देब, त हरेक मनई ओखे ऊपर बिसुआस करँइ लगिहँ, अउर रोमी लोग आइके हमरे मन्दिर अउर देस माहीं कब्जा कइ लेइहँ।”<sup>49</sup> तब उनमा से काइफा नाम के एकठे मनई, जउन उआ बरिस के महायाजक रहे हैं, उनसे कहिन, “तू पंचे कुछू नहीं जनते आह्या।<sup>50</sup> अउर न इहय सोचते आह्या, कि तौहरे खातिर इआ भलय होई, कि हमरे समाज के मनइन के खातिर एकठे मनई मरय, इआ नहीं, कि हमरे समाज के सगले मनई नास होंय।<sup>51</sup> इआ बात ऊँ अपने तरफ से नहीं कहिन तय, बलकिन उआ बरिस के महायाजक होई के कारन भबिस्यबानी किहिन, कि “यीसु यहूदी जाति के खातिर मरिहँय।”<sup>52</sup> अउर केबल यहूदी लोगन भर खातिर नहीं, बलकिन एखे खातिर घलाय कि परमातिमा के सन्तानन काहीं, जउन संसार माहीं तितर-बितर रहत हैं उनहीं एक कइ देंय।<sup>53</sup> अउर ऊँ पंचे उहय दिना से यीसु काहीं मारि डारँइ के खातिर योजना बनामँइ लागें।<sup>54</sup> एसे यीसु उहय समय से यहूदी लोगन के बीच माहीं खुले आम नहीं गें; बलकिन यरूसलेम सहर से निकरिके सुनसान जघा के लघेन इफ्राईम नाम के सहर माहीं चलेगें; अउर अपने चलन के साथ उहँय रहँइ लागें।<sup>55</sup> अउर यहूदी लोगन के फसह नाम के तेउहार अमइन बाला रहा हय, एसे खुब मनई अपने-अपने गाँमन से यरूसलेम सहर माहीं गें, जउने फसह तेउहार से पहिले अपने-आप काहीं पबित्र कइ लेंय।<sup>56</sup> अउर ऊँ पंचे यीसु काहीं ढूँढत रहे हैं। एसे मन्दिर माहीं ठाढ़ होइके आपस माहीं कहँइ लागें, “तू पंचे का समझते हया?”<sup>57</sup> का यीसु तेउहार माहीं न अइहँय? अउर प्रधान याजक लोग अउर फरीसी लोग घलाय, इआ हुकुम दए रहे हैं, कि “अगर कोऊ इआ जानत होय, कि यीसु कहाँ हैं त बताबय, कि जउने उनहीं पकड़ लेंय।”

**यीसु के गोड़ेन माहीं अँतर डारब**  
(मत्ती 26:6-13; मरकुस 14:3-9)

**12** पुनि यीसु फसह नाम के तेउहार से छय दिना पहिले, बैतनिय्याह गाँव माहीं आएँ, जहाँ लाजर रहत रहे हैं: जिनहीं यीसु मरे म से जिआइन तय।<sup>2</sup> उहाँ ऊँ पंचे यीसु के खातिर खाना तइआर किहिन, अउर मारथा उनहीं खाना परसत रही हैं, अउर यीसु के साथ जेतने खाँइ बइठ रहे हैं उन माहीं लाजर घलाय रहे हैं।<sup>3</sup> तब मरियम, जटामाँसी से तइआर कीन आधा लीटर के करीब खुब महग सुध अँतर, यीसु के गोड़ेन माहीं डारिन, अउर अपने मूँडे के बार से उनखर गोड़ पोंछिन, अउर अँतर के महक से सगला घर महकँइ लाग।<sup>4</sup> पय उनखे चलन म से यहूदा इस्करियोती नाम के एकठे चेला, जउन यीसु काहीं पकड़ामँइ बाला रहा हय, उआ कहँइ लाग।<sup>5</sup> इआ अँतर तीन सव चाँदी के सिक्कन माहीं बँचिके, कंगालन काहीं काहे नहीं दइ दीनगा?<sup>6</sup> उआ, इआ बात एसे नहीं कहिस रहा, कि ओही कंगालन के फिकर रही हय, बलकिन उआ एसे कहिस तय, काहेकि उआ चोर रहा हय, अउर ओखे लघे उनखे पइसा बाली थइली रहत रही हय, अउर ओमाहीं जउन पइसा डारा जात रहा हय, उआ निकार लेत रहा हय।<sup>7</sup> तब यीसु

कहिन, “रहँय द्या, उनहीं परेसान न करा, ऊँ हमरे गाड़े जाँइ के तइआरी माहीं इआ सब किहिन हीं।<sup>8</sup> काहेकि कंगाल त तौहरे लघे हमेसा रइहँय, पय हम हमेसा तौहरे लघे न रहब।”

**लाजर काहीं मारि डारँय के योजना**

<sup>9</sup> यहूदी जाति के साधारन मनई जानिगें, कि यीसु बैतनिय्याह गाँव माहीं हैं, एसे ऊँ पंचे केबल यीसु भर के कारन नहीं, बलकिन एसे आएँ कि लाजर काहीं घलाय देखँइ, जिनहीं यीसु मरे म से जिआइन रहा हय।<sup>10</sup> एसे प्रधान याजक लोग लाजर काहीं घलाय मार डारँइ के योजना बनाइन।<sup>11</sup> काहेकि लाजर के कारन खुब यहूदी लोग, अपने धारमिक अँगुनन काहीं छोड़िके यीसु के लघे चलेगें, अउर उनखे ऊपर बिसुआस करँइ लागें।

**यीसु राजा कि नाई यरूसलेम माहीं प्रबेस किहिन**  
(मत्ती 21:1-11; मरकुस 11:1-11; लूका 19:28-40)

<sup>12</sup> दुसरे दिन खुब मनई जउन तेउहार माहीं आए रहे हैं, इआ सुनिके कि, यीसु यरूसलेम सहर माहीं आय रहे हैं।<sup>13</sup> एसे ऊँ पंचे खजूर के डेरइआ लइके यीसु से मिलँइ के खातिर चल दिहिन, अउर खुब चन्डे चिल्लाइके कहँइ लागें, “होसन्ना, धन्य हय इजराइल के राजा, जउन प्रभू के नाम से आबत हय।”<sup>14</sup> जब गइल माहीं यीसु काहीं एकठे गदहा के बच्चा मिला, तब यीसु ओखे ऊपर बइठिके चल दिहिन।<sup>15</sup> जइसन पबित्र सास्त्र माहीं लिखा हय,

“हे सियोन के बिटिअव, डेरा न, देखा, तौहार राजा गदहा के बच्चा के ऊपर बइठिके चले आय रहे हैं।”

<sup>16</sup> यीसु के चेला लोग पहिले ई बातन काहीं नहीं समझे पाइन तय; पय जब यीसु के महिमा काहीं देखिन, तब उनहीं सुधि आई, कि “ई बातें यीसु के बारे माहीं पबित्र सास्त्र माहीं लिखी रही हैं”; अउर खुब मनई उनसे इआमेर के बरताव किहिन रहा हय।<sup>17</sup> तब सगले भीड़ के मनई जउन उआ समय माहीं, उनखे साथ माहीं रहे हैं, इआ गबाही दिहिन, कि “यीसु लाजर काहीं कन्न से गोहराइके, मरे म से जिन्दा किहिन तय।”<sup>18</sup> इहय कारन से खुब मनई यीसु से मिलँइ के खातिर आएँ रहे हैं, काहेकि ऊँ पंचे सुनिन तय, कि “यीसु इआ अचरज के काम देखाइन हीं।”<sup>19</sup> तब फरीसी लोग आपस माहीं कहिन, “सोचा तू पंचे कुछू नहीं कए पउते आह्या, देखा, खुब मनई उनखर चेला बन रहे हैं।”

**यूनानी जाति के मनइन के यीसु काहीं ढूँढब**

<sup>20</sup> जउन मनई उआ तेउहार माहीं भजन करँइ आए रहे हैं, उनमा से कुछ यूनानी जाति के मनई रहे हैं।<sup>21</sup> ऊँ पंचे गलील प्रदेश के बैतसैदा गाँव के रहँइ बाले फिलिप्पुस के लघे आइके, उनसे बिनती किहिन, कि “साहब, हम पंचे यीसु से मिलँइ चाहित हएन।”<sup>22</sup> अउर फिलिप्पुस आइके अन्द्रियास से कहिन; तब अन्द्रियास अउर फिलिप्पुस दोनव जने यीसु से कहिन।<sup>23</sup> इआ सुनिके यीसु उनसे कहिन, “मनई के लइका के महिमा होइ के समय आइगा हय।<sup>24</sup> हम तौहसे सही-सही कहित हएन, कि जब तक गोहूँ के दाना भुँइ माहीं गिरिके, मर नहीं जाय, तब तक उआ अकेले रहत हय, पय जब मर जात हय, तब अनगिनत दानन काहीं पइदा करत हय।<sup>25</sup> जे कोऊ अपने प्रान काहीं पियार जानत हय, उआ ओही गमाय देई; अउर जे कोऊ इआ संसार माहीं अपने प्रान काहीं पियार नहीं जानत; उआ अनन्त जीवन के खातिर ओखर रच्छा करत रही।<sup>26</sup> अगर कोऊ हमार सेवा करय, त हमरे पीछे-पीछे चलय; अउर जहाँ हम रहब, उहँय हमार सेवा करँइ बाला घलाय रही; अगर कोऊ हमार सेवा करी, त पिता ओखर आदर करिहँय।

**कूस के मउत के इसारा**

<sup>27</sup> अब हमार जिव ब्याकुल होइ रहा हय। एसे अब हम का कही? हे पिता, हमहीं इआ दुख के घरी से बचाई? पय इहय दुख के घरी के खातिर त हम

आएन हँय।<sup>28</sup> हे पिता, अपने महिमा काहीं देखाई, कि अपना केतना महान हएन: तबहिनय अकास से इआ बोल सुनान, कि 'हम उनखर महिमा किहेन हय, अउर फेरव करब'।"<sup>29</sup> तब जउन मनई उहाँ ठाढ़ सुनत रहे हँय, ऊँ पंचे कहिन, "बदरी गरजी हय", अउर कुछ जने कहिन, "कउनव स्वरगदूत उनसे बात किहिन हीं।"<sup>30</sup> इआ सुनिके यीसु कहिन, "इआ अबाज हमरे खातिर नहीं, बलकिन तौहरे पंचन के खातिर आई हय।<sup>31</sup> अब इआ संसार के मनइन के न्याय के समय आइगा हय, अब इआ संसार माहीं सासन करई बाले सइतान काहीं, परमातिमा हराय देइहँय।<sup>32</sup> अउर हम अगर धरती से ऊपर क्रूस माहीं चढ़ाए जाब, त सगले मनइन काहीं अपने लघे खींच लेब।"<sup>33</sup> यीसु इआ बतामँड के खातिर अइसा कहिन तय, कि ऊँ कइसन मउत मरिहँय।<sup>34</sup> इआ सुनिके खुब मनई उनसे कहिन, कि "हम पंचे पबित्र सास्त्र के इआ बात सुनेन हय, कि मसीह हमेसा रइहँय, त पुनि अपना काहे कहित हएन, कि मनई के लड़िका काहीं ऊपर क्रूस माहीं चढ़ाबा जाब जरूरी हय? इआ मनई के लड़िका को आय?"<sup>35</sup> तब यीसु उनसे कहिन, "जोति अब थोरी देर तक तौहरे बीच माहीं रही, जब तक जोति तौहरे साथ ही, तब तक चले चला; अइसा न होय कि औंधिआर आइके तौहई पंचन काहीं आय घेरय; जे कोऊ औंधिआर माहीं चलत हय, उआ नहीं जानय कि कउने कइती जात हय।<sup>36</sup> जब तक जोति तौहरे साथ ही, जोति के ऊपर बिसुआस करा, कि जउने तूँ पंचे जोति के सन्तान बना।" ई बातन काहीं कहिके यीसु उहाँ से चलेगें, अउर ऊँ पंचे उनहीं नहीं देखे पाइन।

### यहूदी लोगन के अबिसुआस माहीं बने रहब

<sup>37</sup> अउर यीसु उनखे आँगे एतने चमत्कार देखाइन, तऊ ऊँ पंचे उनखे ऊपर बिसुआस नहीं किहिन।<sup>38</sup> जउने परमातिमा के सँदेस बतामँड बाले यसायाह के बचन पूर होय, जउन ऊँ कहिन रहा हय, कि

"हे प्रभू, हमरे सँदेस के को बिसुआस मानिस ही? अउर प्रभू के सक्ती काहीं को देखिस ही?"

<sup>39</sup> इआ कारन से ऊँ पंचे बिसुआस नहीं कइ सकें, काहेकि यसायाह इहव कहिन हीं।<sup>40</sup> कि

"परमातिमा उनखे आँखिन काहीं आँधर कइ दिहिन हीं, अउर उनखे मन काहीं कठोर कइ दिहिन हीं; कहँव अइसा न होय, कि ऊँ पंचे आँखिन से देखँय अउर मन से समझँय, अउर हमरे कइती फिरँय, अउर हम उनहीं चंगा करी।"

<sup>41</sup> यसायाह ई बातन काहीं एसे कहिन हीं, कि ऊँ यीसु के महिमा काहीं देखिन तय; अउर ऊँ उनखे बारे माहीं बातँय घलाय किहिन तय।<sup>42</sup> तऊ यहूदी धारमिक अँगुअन म से घलाय खुब जने यीसु के ऊपर बिसुआस किहिन, पय फरीसी लोगन के कारन खुले आम नहीं मानत रहे आँय, कहँव अइसा न होय, कि ऊँ पंचे सभाघर से निकारे जाँय।<sup>43</sup> काहेकि उनहीं मनइन के व्दारा दीन जाँय बाला सम्मान, परमातिमा के व्दारा दीन जाँय बाले सम्मान से जादा पियार लागत रहा हय।

### यीसु के बचन न्याय के खातिर अधार

<sup>44</sup> एखे बाद यीसु खुब चन्डे कहिन, "जे कोऊ हमरे ऊपर बिसुआस करत हय, उआ हमरे ऊपर नहीं, बलकिन हमहीं पठमँड बाले के ऊपर बिसुआस करत हय।<sup>45</sup> अउर जे कोऊ हमहीं देखत हय, उआ हमहीं पठमँड बाले काहीं देखत हय।<sup>46</sup> इआ संसार माहीं हम जोति बनिके आएन हँय, जउने जे कोऊ हमरे ऊपर बिसुआस करय, त उआ औंधिआर माहीं न रहय।<sup>47</sup> अगर कोऊ हमरे बातन काहीं सुनिके न मानी, त हम ओही दोसी नहीं ठहराई, काहेकि हम संसार के मनइन काहीं दोसी ठहरामँड के खातिर नहीं, बलकिन संसार के मनइन काहीं मुक्ती देंड के खातिर आएन हँय।<sup>48</sup> जे कोऊ हमहीं तुच्छ जानत हय, अउर हमरे बातन काहीं सोइकार नहीं करय, त ओही दोसी ठहरामँड बाला एकयठे हय: अरथात जउन बचन हम कहेन हय, उहय ओही अन्तिम दिन माहीं दोसी ठहराई।<sup>49</sup> काहेकि हम जउन बातँय कहेन हँय, ऊँ

अपने तरफ से नहीं, बलकिन पिता जे हमहीं पठइन हीं, उँइन इआ हुकुम दिहिन हीं, कि हम का-का कही? अउर का-का बोली? <sup>50</sup> अउर हम जानित हएन, कि उनखर हुकुमय अनन्त जीबन आय, एसे हम उहय बोलित हएन, जइसा पिता हमसे कहिन हीं।"

### यीसु अपने चलन के गोड़ धोइन

**13** फसह नाम के तेउहार से पहिलेन जब यीसु जान लिहिन, कि इआ संसार काहीं छोंडिके, पिता के लघे जाँड के हमार समय आइगा हय, त ऊँ अपने प्रेम करई बालेन से जउन संसार माहीं रहे हँय, उनसे जइसन प्रेम करत रहे हँय, आखिरी समय तक उहयमेर प्रेम करत रहिगें।<sup>2</sup> जब यीसु अउर उनखर चेला लोग साँझिके खाना खाँड बइठ रहे हँय, उआ समय तक सइतान समौन इस्करियोती के लड़िका, यहूदा इस्करियोती के मन माहीं इआ बिचार डार चुका तय, कि उआ यीसु काहीं धोखे से पकड़ाबय।<sup>3</sup> यीसु इआ जानिके, कि पिता परमातिमा सगली चीजन के ऊपर हमहीं अधिकार दइ दिहिन हीं, अउर हम परमातिमा के लघे से आएन हँय, अउर उनहिन के लघे जइत हएन।<sup>4</sup> एसे ऊँ खाना खाँड से उठिके, अपने ऊपर बाले ओन्हा उतार दिहिन, अउर अँगउछी लइके अपने करिहा माहीं बाँधिन।<sup>5</sup> अउर बरतन माहीं पानी लइके, चलन के गोड़ धोमँड लागें, अउर उआ अँगउछी से जउन करिहाँ माहीं बाँधे रहे हँय, ओहिन से पोछँड लागें।<sup>6</sup> जब यीसु समौन अरथात पतरस के लघे आएँ: तब पतरस उनसे कहिन, "हे प्रभू, अपना हमार गोड़ काहे धोइत हएन?"<sup>7</sup> तब यीसु उनसे कहिन, "जउन हम करित हएन, तूँ अबे नहीं जनते आह्या, पय एखे बाद जनिहा।"<sup>8</sup> पतरस उनसे कहिन, "अपना काहीं हम आपन गोड़ कबहँ न धोमँड देब": इआ सुनिके यीसु उनसे कहिन, "अगर हम तौहई न धोउब, त हमरे साथ तौहार कउनव सम्बन्ध न रही।"<sup>9</sup> तब समौन पतरस उनसे कहिन, "हे प्रभू, अपना हमार गोड़य भर नहीं, बलकिन मूँड-हाँथ घलाय धोय देई।"<sup>10</sup> तब यीसु उनसे कहिन, "जे नहाय चुका हय, ओही गोड़े के अलाबा अउर कुछ धोमँड के जरूरत नहिं आय; काहेकि उआ बेलकुल सुद्ध हय: अउर तूँ पंचे सुद्ध हया; पय सबके सब नहीं।"<sup>11</sup> यीसु अपने पकड़ामँड बाले काहीं जानत रहे हँय, एहिन से ऊँ कहिन, कि "तूँ पंचे सबके सब सुद्ध नहिं आह्या।"

<sup>12</sup> जब यीसु उनखर गोड़ धोय चुके, तब आपन ओन्हा पहिरिके पुनि बइठिगें, अउर उनसे कहँड लागें, "जउन हम तौहरे साथ किहेन हय, का तूँ पंचे ओही समझ गया हय? <sup>13</sup> तूँ पंचे हमहीं गुरू, अउर प्रभू कहते हया, त ठीकय कहते हया, काहेकि हम उहय आहेन।<sup>14</sup> अगर हम गुरू अउर प्रभू होइके, तौहार पंचन के गोड़ धोए हएन; त तौहऊँ पंचन काहीं एक दुसरे के गोड़ धोमँड चाही।<sup>15</sup> काहेकि हम तौहई नमूना देखाय दिहेन हय, कि जइसा हम तौहरे साथ किहेन हय, तुहँ पंचे घलाय उहयमेर किहा करा।<sup>16</sup> हम तौहसे सही-सही कहित हएन, कि दास अपने मालिक से बड़ा नहीं होय; अउर न पठबा, अपने पठमँड बाले से।<sup>17</sup> तूँ पंचे त ई बातन काहीं जनते हया, अउर अगर तूँ पंचे इनहिन माहीं चला, त धन्य हया।

### बिसुआस घात के बारे माहीं बताउब

(मत्ती 26:20-25; मरकुस 14:17-21; लूका 22:21-23)

<sup>18</sup> हम तौहरे सगलेन के बारे माहीं नहीं कही: जिनहीं हम चुनि लिहेन हय, उनहीं हम जानित हएन: पय इआ एसे भ, कि जउने पबित्र सास्त्र के लिखा इआ बचन पूर होय, कि 'जउन हमार रोटी खाइस, उहय हमरे ऊपर लात उठाइस।'<sup>19</sup> अब हम ओखे पूर होय से पहिलेन तौहई जताए देइत हएन, कि जब उआ पूर होइ जाय, त तूँ पंचे बिसुआस करा, कि हम उहय आहेन।<sup>20</sup> हम तौहसे सही-सही कहित हएन, जे कोऊ हमरे पठए मनइन काहीं सोइकार करत हय, उआ हमहीं सोइकार करत हय, अउर जे कोऊ हमहीं सोइकार करत हय, उआ हमहीं पठमँड बाले काहीं सोइकार करत हय।"

<sup>21</sup> ई बातन काहीं कहे के बाद, यीसु आत्मा माहीं ब्याकुल होइगें, अउर इआ बताइन, कि "हम तौहसे सही-सही कहित हएन, कि तौहरे पंचन म से

एक जने हमहीं बिरोधी लोगन के हाँथ म पकड़बाई।”<sup>22</sup> चेला लोग चिन्ता माहीं परिगें, अउर एक दुसरे कइती निहारँइ लागें, काहेकि ऊँ पंचे नहीं जाने पाइन तय, कि यीसु केखे बारे माहीं कहत हैं।<sup>23</sup> सगले चलन म से एकठे अइसा चेला रहा हय, जउने से यीसु जादा प्रेम करत रहे हँय, उआ उनखे छाती कइती झुका बइठ रहा हय।<sup>24</sup> तब समौन पतरस उहय चेला कइती इसारा कइके कहिन, कि “यीसु से पूँछा, ऊँ केखे बारे माहीं आय कहत हैं?”<sup>25</sup> तब ऊँ उहयमेर यीसु के छाती कइती झुके-झुके उनसे पूँछिन, “हे प्रभू, उआ को आय?” तब यीसु उनसे कहिन, “जेही हम इआ रोटी के टुकड़ा खोरबा माहीं बोरिके देब, उहय आय।”<sup>26</sup> अउर यीसु रोटी के टुकड़ा खोरबा माहीं बोरिके समौन के लड़िका यहूदा इस्करियोती काहीं दिहिन।<sup>27</sup> अउर रोटी के टुकड़ा लेतय सइतान ओही अपने काबू माहीं कइ लिहिस: तब यीसु ओसे कहिन, “जउन तौहई करँइ काहीं हय, उआ हरबी करा।”<sup>28</sup> पय जेतने उहाँ बइठ रहे हँय, उनमा से कोऊ नहीं जाने पाइन, कि यीसु इआ बात ओसे काहे के खातिर कहिन हीं।<sup>29</sup> काहेकि यहूदा के लघे पइसा बाली थइली रहत रही हय, एसे कुछ जने समझिन, कि यीसु ओसे इआ आय कहत हैं, कि जउन कुछ तेउहार के खातिर चाही, उआ खरीद लेय, इआ कि कंगालन काहीं कुछ पइसा दइ देय।<sup>30</sup> एसे यहूदा इस्करियोती रोटी के टुकड़ा लिहिस, अउर हरबिन बहिरे चला ग, उआ समय रात रही हय।

### नबा हुकुम

<sup>31</sup> यहूदा इस्करियोती के चले जाँय के बाद, यीसु कहिन, “अब मनई के लड़िका के महिमा भय ही, अउर उनखे व्दारा परमातिमा के महिमा भय ही।<sup>32</sup> अगर उनखे व्दारा परमातिमा के महिमा भय ही, त परमातिमा अपने व्दारा उनखर महिमा करिहँय, बलकिन हरबिन करिहँय।<sup>33</sup> हे लड़िकव, अब हम थोरिन देर तक तौहरे लघे रहब: एखे बाद तूँ पंचे हमहीं ढुँढिहा, अउर जइसन हम यहूदी लोगन से कहेन तय, कि जहाँ हम जइत हएन, उहाँ तूँ पंचे नहीं आय सकते आह्या, उहयमेर अब हम तौहऊँ पंचन से कहित हएन।<sup>34</sup> हम तौहई एकठे नबा हुकुम देइत हएन, कि ‘एक दुसरे से प्रेम करा: जइसन हम तौहसे प्रेम किहेन हय, उहयमेर तूहूँ पंचे एक दुसरे से प्रेम करा।’<sup>35</sup> अगर आपस माहीं प्रेम करिहा, त एहिन से सगले मनई जनिहँय, कि तूँ पंचे हमार चेला आह्या।”

### पतरस के इनकार के बारे माहीं यीसु के भबिसबानी

(मत्ती 26:31-35; मरकुस 14:27-31; लूका 22:31-34)

<sup>36</sup> समौन पतरस उनसे कहिन, “हे प्रभू, अपना कहाँ जइत हएन?” तब यीसु उनहीं जबाब दिहिन, कि “जहाँ हम जइत हएन, उहाँ तूँ अबे हमरे पीछे नहीं आय सकते आह्या! पय हमरे जाँय के बाद तूहूँ हमरे पीछे अइहा।”<sup>37</sup> तब पतरस यीसु से कहिन, “हे प्रभू, अबे हम अपना के पीछे काहे नहीं आय सकी? हम त अपना के खातिर जानव देइ काहीं तइआर हएन।”<sup>38</sup> यीसु उनहीं जबाब दिहिन, “का तूँ हमरे खातिर आपन प्रान देइहा? हम तौहसे सही-सही कहित हएन, कि मुरगा के बोलँइ से पहिले तूँ तीन बेरकी इनकार करिहा, कि हम यीसु काहीं नहीं जानी।”

### यीसु परमातिमा के लघे पहुँचय के गइल आहीं

**14** यीसु अपने चलन से कहिन, “तौहार मन ब्याकुल न होय, तूँ पंचे परमातिमा के ऊपर बिसुआस करते हया, हमरेव ऊपर बिसुआस करा।<sup>2</sup> हमरे पिता के घर माहीं रहँइ के खुब जघा ही, अगर न होत, त हम तौहसे बताय देइत, काहेकि हम तौहरे पंचन के खातिर जघा तइआर करँइ जइत हएन।<sup>3</sup> अउर अगर हम जाइके तौहरे खातिर जघा तइआर करब, त पुनि आइके तौहई पंचन काहीं अपने इहाँ लइ जाब, कि जहाँ हम रही उहँय तूहूँ पंचे रहा।<sup>4</sup> अउर जहाँ हम जइत हएन, तूँ पंचे उहाँ के गइल जनते हया।”<sup>5</sup> इआ सुनिके थोमा उनसे कहिन, “हे प्रभू, जब हम पंचे इआ नहीं जानी, कि अपना कहाँ जइत हएन? त गइल कइसन जाने पाउब?”<sup>6</sup> तब

यीसु उनसे कहिन, “गइल, सत्य अउर जीवन हमहिन आहेन; हमरे ऊपर बिसुआस किहे बिना, कोऊ पिता के लघे नहीं पहुँच सकय।<sup>7</sup> अगर तूँ पंचे हमहीं जान लिहे होत्या, त हमरे पिता काहीं घलाय जन त्या, अउर अब तूँ पंचे उनहीं जनतेव हया, अउर उनहीं देखिव लिहा हय।”

<sup>8</sup> इआ सुनिके फिलिप्पुस उनसे कहिन, “हे प्रभू, अपना हमहीं पंचन काहीं पिता के देखाय देई: इहय हमरे पंचन के खातिर काफी हय।”<sup>9</sup> तब यीसु उनसे कहिन, “हे फिलिप्पुस, हम एतने दिना से तौहरे पंचन के साथ हएन, अउर का तूँ हमहीं नहीं जनते आह्या? जे कोऊ हमहीं देखिस ही, उआ पिता काहीं देखिस ही, पुनि तूँ काहे कहते हया, कि हमहीं पिता काहीं देखाबा।<sup>10</sup> का तूँ बिसुआस नहीं मनते आह्या, कि हम पिता माहीं हएन, अउर पिता हमरे भीतर हैं? ई बातँय जउन हम तौहसे कहित हएन, अपने तरफ से नहीं कही, पय पिता हमरे भीतर रहिके आपन काम करत हैं।<sup>11</sup> हमरय बिसुआस माना, कि हम पिता माहीं हएन; अउर पिता हमरे भीतर हैं; नहीं त हम जेतने कामन काहीं किहेन हँय, उनहिन के कारन हमार बिसुआस माना।<sup>12</sup> हम तौहसे पंचन से सही-सही कहित हएन, कि जे हमरे ऊपर बिसुआस करत हय, ई काम जउन हम करित हएन, उहव करी, बलकिन इनहूँ से बड़े काम करी, काहेकि हम पिता के लघे जइत हएन।<sup>13</sup> अउर तूँ पंचे जउन कुछ हमरे नाम से मगिहा, उहय हम करब, कि जउने लड़िका के व्दारा पिता के बड़ई होय।<sup>14</sup> अगर तूँ पंचे हमसे हमरे नाम से कुछ मगिहा, त हम ओही पूर करब।”

### पबित्र आत्मा देइ के वादा

<sup>15</sup> अउर यीसु पुनि कहिन, “अगर तूँ पंचे हमसे प्रेम करते हया, त हमरे हुकुमन काहीं मनिहा।<sup>16</sup> अउर हम पिता से बिनती करब, अउर ऊँ तौहई पंचन काहीं एकठे सहायक देइहँय, कि ऊँ सहायक हमेसा तौहरे पंचन के साथ रहँय।<sup>17</sup> अरथात सत्य के आत्मा, जिनहीं संसार के मनई सोइकार नहीं कइ सकँय, काहेकि ऊँ पंचे न उनहीं देखिन आहीं, अउर न जनतय आहीं: पय तूँ पंचे उनहीं जनते हया, काहेकि ऊँ सहायक तौहरे साथ रहत हैं, अउर ऊँ हमेसा तौहरे जीवन माहीं रइहँय।

<sup>18</sup> हम तौहई पंचन काहीं अनाथ न छोड़ब, हम तौहरे लघे दुबारा अउब।<sup>19</sup> अउर कुछ देर बाद संसार के मनई हमहीं न देखिहँय, पय तूँ पंचे हमहीं देखिहा, एसे कि हम जिन्दा हएन, अउर तूहूँ पंचे घलाय जिन्दा रइहा।<sup>20</sup> उआ दिना तूँ पंचे जनिहा, कि हम अपने पिता माहीं हएन, अउर तूँ पंचे हम माहीं हया, अउर हम तौहरे पंचन माहीं हएन।<sup>21</sup> उआ मनई जउन हमरे हुकुमन काहीं जानत हय, अउर उनखर पालन करत हय, उहय हमसे प्रेम करत हय, अउर जे कोऊ हमसे प्रेम करत हय, ओसे हमार पिता प्रेम करत हैं, अउर हमहूँ ओसे प्रेम करब, अउर अपने-आप काहीं ओखे ऊपर प्रगट करब।”<sup>22</sup> इआ सुनिके ऊँ यहूदा जउन यहूदा इस्करियोती न हौहीं उनसे कहिन, “हे प्रभू, अइसा का भ, कि अपना अपने-आप काहीं हमरे पंचन के ऊपर प्रगट करँइ चाहित हएन, अउर संसार के मनइन के ऊपर नहीं?”

<sup>23</sup> तब यीसु उनहीं जबाब दिहिन, “अगर कोऊ हमसे प्रेम करी, त उआ हमरे बचन के पालन करी, अउर हमार पिता ओसे प्रेम करिहँय, अउर हम ओखे लघे अउब, अउर ओखे साथ हमेसा रहब।<sup>24</sup> जे हमसे प्रेम नहीं करय, त उआ हमरे बचन काहीं नहीं मानय, पय जउन बचन तूँ पंचे सुनते हया, उआ हमार न होय, बलकिन हमहीं पठमँइ बाले पिता के आय।<sup>25</sup> ई बातन काहीं हम उआ समय कहेन तय, जब तौहरे साथ माहीं रहेन हय।<sup>26</sup> पय ऊँ सहायक अरथात पबित्र आत्मा, जिनहीं पिता हमरे नाम से पठइहँय, ऊँ तौहई पंचन काहीं सगली बातन काहीं सिखइ हँय, अउर जउन कुछ हम तौहसे कहेन हय, उआ सगला ऊँ तौहई सुध देबइहँय।<sup>27</sup> हम तौहई पंचन काहीं सान्ति दए जइत हएन, अउर आपन सान्ति तौहई पंचन काहीं देइत हएन; जइसन संसार के सगले मनई देत हैं, हम तौहई उआमेर से नहीं देइत आहेन: तूँ पंचे अपने मन माहीं न घबरा अउर न डेरा।<sup>28</sup> तूँ पंचे हमहीं इआ कहत सुने हया, कि हम जइत हएन, अउर तौहरे लघे पुनि अउब: अगर तूँ

पंचे हमसे प्रेम कर त्या, त हमरे इआ बात से आनन्दित होत्या, कि हम पिता के लघे जइत हएन, काहेकि पिता हमसे बड़े हैं।<sup>29</sup> अउर हम अब ई बातन के होंय से पहिलेन तौहई पंचन काहीं बताय दिहेन हँय, कि जब ई बातँय पूर होइ जाँय, त तूँ पंचे बिसुआस करा।<sup>30</sup> अउर अब हम तौहसे जादा समय तक बात न करब, काहेकि इआ संसार माहीं सासन करँइ बाला सइतान आमँइ बाला हय, अउर ओखर हमरे ऊपर कउनव अधिकार नहीं आय।<sup>31</sup> पय इआ एसे होइ रहा हय, कि संसार के सगले मनई जान लेंय, कि हम पिता से प्रेम करित हएन, अउर जउनमेर पिता हमहीं हुकुम दिहेन हीं, हम उहयमेर करित हएन: उठा, इहाँ से हम पंचे चली।”

### यीसु सच्ची दाखलता आहीं

**15** यीसु कहिन, “सच्ची दाखलता हमहिन आहेन; अउर हमार पिता किसान आहीं।<sup>2</sup> हमरे हरेक उन डेरइअन काहीं, जउने माहीं फर नहीं लागँय, ऊँ काटि डारत हैं, अउर हरेक उन डेरइअन काहीं जउन फरती हई, ऊँ छाँटत हैं, जउने उनमा अउर जादा फर लागँय।<sup>3</sup> तूँ पंचे त उआ बचन के कारन जउन हम तौहसे कहेन तय, ओखे ऊपर बिसुआस किहे के कारन सुद्ध हया।<sup>4</sup> तूँ पंचे हमसे जुड़े रहा, अउर हम तौहसे : जउनमेर डेरइआ अगर दाखलता माहीं जुड़ी न रहय, त अपने-आप से नहीं फर सकय, उहयमेर तुहूँ पंचे घलाय अगर हमसे जुड़े न रहहा, त फर नहीं सकते आह्या।<sup>5</sup> हम दाखलता आहेन: तूँ पंचे डेरइआ आह्या; जे कोऊ हमसे जुड़ा रहत हय, अउर हम ओसे, त ओमाहीं खुब फर लागत हैं, काहेकि तूँ पंचे हमसे अलग होइके कुछ नहीं कइ सकते आह्या।<sup>6</sup> अगर कोऊ हमसे जुड़ा न रही, त उआ टूट डेरइआ कि नाई फेंक दीन जात हय, अउर झुराय जात हय, अउर मनई उनहीं समेटिके आगी माहीं डार देत हैं, अउर उँइ जरि जाती हई।<sup>7</sup> अगर तूँ पंचे हमसे जुड़े रहा, अउर हमार बातँय तौहरे जीवन माहीं बनी रहँय, त जउन कुछ तूँ पंचे चहते हया त मागा, उआ तौहई पंचन काहीं मिल जई।<sup>8</sup> हमरे पिता परमातिमा के बड़ाई एहिन माहीं होत ही, कि तूँ पंचे खुब फर लइ आबा, तबहिनय तूँ पंचे हमार सच्चे चेला कहइहा।<sup>9</sup> जइसन पिता परमातिमा हमसे प्रेम किहेन हीं, उहयमेर हमहूँ तौहसे प्रेम किहेन हय, हमरे प्रेम माहीं बने रहा।<sup>10</sup> अगर तूँ पंचे हमरे हुकुमन काहीं पालन करिहा, त हमरे प्रेम माहीं बने रहहा: जइसा कि हम अपने पिता परमातिमा के हुकुमन काहीं पालन किहेन हय, अउर उनखे प्रेम माहीं बने रहित हएन।<sup>11</sup> हम ई बातँय तौहसे एसे कहेन हय, कि हमार आनन्द तौहरे जीवन माहीं बना रहय, अउर तौहार पंचन के आनन्द पूर होइ जाय।

<sup>12</sup> हमार हुकुम इआ हय, कि जउनमेर हम तौहसे प्रेम किहेन हय, उहयमेर तुहूँ पंचे आपस माहीं एक दुसरे से प्रेम करा।<sup>13</sup> अगर कोऊ अपने साथिन के खातिर आपन प्रान देय, त ओसे बढ़िके कोहू के प्रेम नहीं आय।<sup>14</sup> जउन हुकुम हम तौहई पंचन काहीं देइत हएन, अगर उनखर पालन करा, त तूँ पंचे हमार साथी आह्या।<sup>15</sup> आज से हम तौहई दास न कहब, काहेकि दास नहीं जानय कि, ओखर मालिक का करत हय: पय हम तौहई साथी कहित हएन, काहेकि जउने बातन काहीं हम अपने पिता परमातिमा से सुनेन हय, ऊँ सगली बातँय तौहई पंचन काहीं बताय दिहेन हय।<sup>16</sup> तूँ पंचे हमहीं नहीं चुने आह्या, बलकिन हम तौहई पंचन काहीं चुने हएन, अउर नियुक्त किहे हएन, जउने तूँ पंचे जाइके फर लइ आबा; अउर तौहार फर बना रहय, कि तूँ पंचे जउन कुछ हमरे नाम से पिता परमातिमा से मागा, त ऊँ तौहई पंचन काहीं देंय।<sup>17</sup> ई बातन के हुकुम हम तौहई एसे देइत हएन, कि तूँ पंचे एक दुसरे से प्रेम करा।

### संसार के इरखा

<sup>18</sup> अगर संसार के मनई तौहसे दुसमनी करत हैं, त तूँ पंचे इआ जानिल्या, कि ऊँ पंचे पहिले हमहूँ से दुसमनी किहेन हीं।<sup>19</sup> अगर तूँ पंचे संसार के मनइन कि नाई होत्या, त संसार के मनई अपने कि नाई मनइन से प्रेम करत हैं, पय तूँ पंचे संसार के मनइन कि नाई नहीं आह्या, काहेकि हम तौहई

संसार के मनइन म से चुनि लिहेन हँय, एहिन से संसार के मनई तौहसे दुसमनी करत हैं।<sup>20</sup> जउन बात हम तौहसे कहेन तय, त ओही सुधि कए रह्या: कि दास अपने मालिक से बड़ा नहीं होय, अगर ऊँ पंचे हमहीं सताइन हीं, त तौहऊँ पंचन काहीं सतइहँय; अगर ऊँ पंचे हमार बात मानिन हीं, त तौहरव बात मनि हँय।<sup>21</sup> पय इआ सब कुछ ऊँ पंचे हमार चेला होंइ के कारन तौहरे साथ करिहँय, काहेकि ऊँ पंचे हमहीं पठमँइ बाले काहीं नहीं जानँय।<sup>22</sup> अगर हम न अइत, अउर उनसे बातँय न करित, त ऊँ पंचे पापी न ठहरतें, पय अब अपने पाप के खातिर उनखे लघे कउनव बहाना नहीं आय।<sup>23</sup> जे हमसे दुसमनी रक्खत हय, उआ हमरे पिता परमातिमा से दुसमनी रक्खत हय।<sup>24</sup> अगर हम उनखे बीच माहीं ऊँ चमत्कार के काम न करित, जउन हमरे अलाबा कबहूँ कोऊ नहीं किहिस, त ऊँ पंचे पापी न ठहरतें, पय अब ऊँ पंचे हमरे चमत्कार के काम काहीं देख चुके हँय, अउर ऊँ पंचे हमसे अउर हमरे पिता परमातिमा, दोनव जनेन से दुसमनी करत हैं।<sup>25</sup> अउर इआ एसे भ, कि उआ बचन पूर होय, जउन उनखे पबित्र सास्त्र माहीं लिखा हय, कि ‘ऊँ पंचे बेकार माहीं हमसे दुसमनी किहेन !’<sup>26</sup> पय जब उआ सहायक अई, जउने काहीं हम तौहरे पंचन के लघे पठउब, अरथात सत्य के आत्मा जउन पिता परमातिमा के तरफ से आबत हय, उहय हमार गबाही देई।<sup>27</sup> अउर तुहूँ पंचे घलाय हमार गबाह हया, काहेकि तूँ पंचे हमरे सेबा के सुरुआतय से हमरे साथ रहे हया।”

**16** यीसु पुनि कहिन, “ई बातन काहीं हम तौहसे एसे कहेन हय, कि तूँ पंचे बिसुआस से भटक न जा।<sup>2</sup> काहेकि ऊँ पंचे, तौहई अपने सभाघरन से बहिरे निकार देइहँय, अउर उआ समय आय रहा हय, कि जे कोऊ तौहई पंचन काहीं मारि डारी, उआ इआ समझी, कि हम परमातिमा के सेबा करित हएन।<sup>3</sup> ऊँ पंचे अइसन एसे करिहँय, कि ऊँ पंचे न त पिता परमातिमा काहीं जानत आहीं, अउर न हमहिन काहीं जानत आहीं।<sup>4</sup> पय हम तौहसे ई बातन काहीं एसे कहेन हय, कि जब उनखर होंय के समय आबय, तब तौहई सुध रहय, कि हम उनखे बारे माहीं तौहसे पहिलेन बताय दिहेन तय, अउर हम सुरुआत माहीं तौहसे, ई बातन काहीं नहीं बतायन तय, काहेकि हम तौहरे साथ माहीं रहे हएन।<sup>5</sup> अब हम अपने पठमँइ बाले के लघे जइत हएन, अउर तौहरे पंचन म से कोऊ हमसे नहीं पूँछय, कि अपना कहाँ जइत हएन? काहेकि हम तौहई ई बातन काहीं बताय दिहेन हँय, एसे तूँ पंचे खुब दुखी होइ गया हय।

### पबित्र आत्मा के काम

<sup>7</sup> तऊ हम तौहसे सही कहित हएन, कि हमार जाब तौहरे खातिर निकहा हय, काहेकि अगर हम न जाब, त उआ सहायक तौहरे लघे न अई, पय अगर हम जाब, त ओही तौहरे पंचन के लघे पठय देब।<sup>8</sup> अउर उआ आइके पाप अउर धारमिकता अउर न्याय के बारे माहीं बताई, अउर संसार के मनई कउनव जबाब न दए पइहँय।<sup>9</sup> पाप † के बारे माहीं उआ उनहीं समझाई, काहेकि ऊँ पंचे हमरे ऊपर बिसुआस नहीं करँय।<sup>10</sup> अउर धारमिकता के बारे माहीं हम समझाउब, काहेकि हम पिता परमातिमा के लघे जइत हएन, अउर तूँ पंचे हमहीं पुनि न देखिहा।<sup>11</sup> अउर परमातिमा मनई के न्याय कइसा करिहँय, एहू के बारे माहीं घलाय हम समझाउब, काहेकि परमातिमा संसार माहीं सासन करँइ बाले सइतान ‡ के घलाय न्याय कइ चुके हँय।

<sup>12</sup> हमहीं तौहसे खुब बातन काहीं बतामँइ क हय, पय अबे तूँ पंचे उनहीं समझे न पइहा।<sup>13</sup> पय जब सत्य के आत्मा अई, त तौहई सत्य के गइल बताई, काहेकि उआ अपने तरफ से कुछ न कही, पय जउन कुछ सुनी, उहय बताई, अउर आमँइ बाली बातन काहीं तौहई पंचन काहीं बताई।<sup>14</sup> उआ हमार बड़ाई करी, काहेकि उआ हमरे बातन म से लइके तौहई पंचन काहीं बताई।<sup>15</sup> काहेकि जउन कुछ पिता परमातिमा के हय, उआ सगला



हमार आय; एसे हम कहेन हय, कि उआ सहायक हमरे बातन म से लइके तोहई पंचन काहीं बताई।”

### दुख-सुख माहीं बदल जई

16 एखे बाद यीसु उनसे पुनि कहिन, “थोरी देर माहीं तूँ पंचे हमहीं न देखिहा, अउर थोरी देर माहीं पुनि हमहीं देखिहा।” 17 तब उनखे चलन म से कुछ जने आपस माहीं कहँइ लागें, “इआ का आय, जउन यीसु हमसे कहत हें, थोरी देर माहीं तूँ पंचे हमहीं न देखिहा, अउर थोरी देर माहीं पुनि हमहीं देखिहा? एसे कि हम पिता परमातिमा के लघे जइत हएन?” 18 अउर ऊँ पंचे पुनि कहँइ लागें, “इआ ‘थोरी देर बाद का आय?’ जेखे बारे माहीं यीसु बताय रहे हँय, अउर हम पंचे नहीं समझे पाई, कि ऊँ का आय कहत हें।” 19 यीसु इआ जानिके, कि ऊँ पंचे हमसे कुछ पूछँइ चाहत हें, एसे उनसे कहिन, “का तूँ पंचे आपस माहीं इआ बात के बारे माहीं पूँछते हया, कि ‘थोरी देर माहीं तूँ पंचे हमहीं न देखिहा, अउर थोरी देर माहीं पुनि हमहीं देखिहा’। 20 हम तौहसे सही-सही कहित हएन, कि ‘तूँ पंचे रोइहा अउर बिलाप करिहा’, पय संसार के सगले मनई आनन्द मनइहँय, तूँ पंचे सोक करिहा, पय तौहार पंचन के सोक आनन्द माहीं बदल जई। 21 जइसन कउनव मेहेरिआ के जब बच्चा पइदा होंय लागत हय, त ओखे खुब पीरा होत ही, काहेकि ओखे पीरा के समय आय पहुँचा हय, पय जब उआ बच्चा पइदा कइ चुकत ही, त इआ खुसी के मारे कि संसार माहीं एकठे मनई पइदा भ हय, उआ पीरा काहीं पुनि सुधि नहीं करय। 22 अउर तौहऊँ पंचन काहीं अबे त उहयमेर सोक हय, पय जब हम तौहसे पुनि मिलब, त तूँ पंचे खुब आनन्दित होइहा; अउर तौहरे आनन्द काहीं कोऊ छड़ाय नहीं सकय। 23 उआ दिना तूँ पंचे हमसे कुछ न पूँछिहा, हम तौहसे सही-सही कहित हएन, ‘अगर तूँ पंचे पिता परमातिमा से जउन कुछ हमरे नाम से मगिहा, त ऊँ तौहई पंचन काहीं जरूर देइहँय।’ 24 काहेकि तूँ पंचे अबे तक हमरे नाम से कुछ नहीं मागे आहा; मगिहा त जरूर पइहा, जउने तौहार आनन्द पूर होइ जाय।

### संसार के ऊपर जीत

25 हम ई बातन काहीं उदाहरन दइके तौहसे बतायन हय, पय उआ समय आय रहा हय, कि हम तौहसे उदाहरन दइके पुनि न कहब, बलकिन पिता परमातिमा के बारे माहीं खुलिके बताउब। 26 उआ दिना तूँ पंचे हमरे नाम से मगिहा, अउर हम तौहसे इआ न कहब, कि हम तौहरे खातिर पिता परमातिमा से बिनती करब। 27 काहेकि पिता परमातिमा त खुदय तौहसे प्रेम करत हें, एसे कि तूँ पंचे हमसे प्रेम करते हया, अउर इहव बिसुआस करते हया, कि हम पिता परमातिमा के तरफ से आएन हँय। 28 हम पिता परमातिमा से निकरिके संसार माहीं आएन हँय, पुनि संसार काहीं छोड़िके पिता परमातिमा के लघे जइत हएन।”

29 उनखर चेला लोग कहिन, “देखी, अब त अपना खुलिके कहित हएन, अउर कउनव उदाहरन दइके नहीं कही। 30 अब हम पंचे जान लिहेन हय, कि अपना सगली बातन काहीं जानित हएन, अउर अपना काहीं एखर जरूरत नहीं आय, कि कोऊ अपना से पूँछय, एसे हम पंचे बिसुआस करित हएन, कि अपना परमातिमा से निकरिके आएन हँय।” 31 इआ सुनिके यीसु उनसे कहिन, “का तौहई पंचन काहीं अबय बिसुआस भ हय?” 32 देखा, उआ समय आबत हय बलकिन आइन ग हय, कि तूँ पंचे सगले जने तितर-बितर होइके आपन-आपन गइल पकड़ लेइहा, अउर हमहीं अकेले छोड़ि देइहा, तऊ हम अकेले न रहब, काहेकि पिता परमातिमा हमरे साथ हें। 33 ई बातन काहीं तौहसे हम एसे कहेन हय, कि हमरे व्दारा तौहई सान्ती मिलय; संसार माहीं तौहई दुख मिलत हय, पय ढाढ़स बाँधा, हम संसार काहीं जीत लिहेन हय।”

### महायाजक के रूप माहीं यीसु के प्राथना खुद के खातिर

17 यीसु ई बातन काहीं कहे के बाद, अकास कइती निहारिके कहिन, “हे पिता परमातिमा अपना के चुना समय आइगा हय, अब अपना मनइन काहीं देखाय देई, कि अपना के लड़िका केतना महान हय, जउने हमहूँ मनइन काहीं देखाय देई, कि अपना केतना महान हएन। 2 काहेकि अपना उनहीं सगले जाति के मनइन के ऊपर अधिकार दिहेन हँय, कि जिनहीं अपना उनहीं चुनिके दिहेन हँय, ऊँ सगलेन काहीं अनन्त जीवन देंय। 3 अउर अनन्त जीवन इआ आय, कि ऊँ पंचे अपना काहीं जउन एकलउते परमातिमा आहेन, अउर यीसु मसीह काहीं जिनहीं अपना पठयन हँय, जानँय। 4 जउन काम अपना हमहीं करँइ के खातिर दिहेन रहा हय, उनहीं पूर कइके, हम धरती के ऊपर मनइन काहीं देखाय दिहेन हय, कि अपना केतना महान हएन। 5 अउर अब, हे पिता परमातिमा, संसार के रचना होंइ से पहिले, जब हम अपना के साथ रहेन हय, तब हमहीं केतना सम्मान मिलत रहा हय, अब जब हम अपना के साथ रहब उहय सम्मान हमहीं पुनि देई।

### अपने चलन के खातिर प्राथना

6 संसार के मनइन म से जउने मनइन काहीं अपना हमहीं दिहेन हय, हम उनहीं अपना के बारे माहीं बताय दिहेन हय: ऊँ पंचे अपना के साथ रहे हँय, पय अपना उनहीं हमहीं दिहेन हय, अउर ऊँ पंचे अपना के बचन काहीं अपनाय लिहिन हीं। 7 अब ऊँ पंचे जानिगें हँय, कि जउन कुछ अपना हमहीं दिहेन हय, उआ सगला अपनय के तरफ से आय। 8 काहेकि जउन सँदेस अपना हमहीं दिहेन तय, हम उनहीं उआ सँदेस बताय दिहेन हय, अउर ऊँ पंचे अपना के सँदेस के बातन काहीं अपनाय लिहिन हीं, अउर इआ सच्चाई जान लिहिन हीं, कि हम अपना के तरफ से आएन हय, अउर इआ बिसुआस मान लिहिन हीं, कि अपनय हमहीं पठयन हय। 9 इआ समय हम केबल उनखे खातिर प्राथना करित हएन, संसार के मनइन के खातिर नहीं, पय केबल उनहिन के खातिर प्राथना करित हएन, जिनहीं अपना हमहीं दिहेन हय, काहेकि ऊँ पंचे अपनय के आहीं। 10 अउर उआ सगला जउन हमार आय, उआ सगला अपनय के आय; अउर जउन अपना के आय, उआ सगला हमार आय, अउर हम उनहिन के व्दारा मान-सम्मान पाइत हएन। 11 हम अउर जादा समय तक संसार माहीं न रहब, पय ई पंचे संसार माहीं रइहँय, अउर हम अब अपना के लघे आय रहेन हय; हे पिता परमातिमा, जउन अपना पबित्र हएन, उआ नाम के सक्ती से उनखर रच्छा करी, जिनहीं अपना हमहीं दिहेन हय, अउर जइसन हम अउर अपना एक हएन, उहयमेर ऊँ पंचे एक होइ सकँय। 12 जब हम उनखे साथ माहीं रहेन हय, त हम अपना के नाम के सक्ती से, जउन अपना हमहीं दिहेन हय, उनखर रच्छा किहेन हय, अउर उनमा से कोऊ नास नहीं भें, सिबाय ओखे जउने काहीं नास होंइ के खातिर ठहराबा ग रहा हय, इआ एसे भ कि जउने पबित्र सास्त्र माहीं लिखी बात पूर होय। 13 पय अब हम अपना के लघे अइत हएन, अउर ई बातन काहीं हम संसार माहीं रहत समय कहि रहेन हय, कि ऊँ पंचे अपने हिरदँय माहीं हमार पूर आनन्द पाय सकँय। 14 हम अपना के बचन काहीं उनहीं बताय दिहेन हय, अउर ऊँ पंचे अपना के बचन काहीं अपनाय लिहिन हीं, एसे संसार के मनई उनसे दुसमनी करत हें, काहेकि जइसन हम इआ संसार के न होंहेन, उहयमेर ऊँ पंचे इआ संसार के न होंहीं। 15 हम अपना से इआ प्राथना नहीं करी, कि अपना उनहीं संसार से उठाय लेई, पय इआ, कि अपना दुस्ट सइतान से उनखर रच्छा करी। 16 जइसन हम इआ संसार के न होंहेन, उहयमेर ऊँ पंचे इआ संसार के न होंहीं। 17 अपना के बचन सत्य हय; एसे सत्य के व्दारा अपना उनहीं सेबा के खातिर तइआर करी। 18 जइसन अपना हमहीं संसार माहीं पठयन हय, उहयमेर हमहूँ उनहीं संसार माहीं पठइत हएन। 19 अउर हम अपने-आप काहीं अपना के सेबा माहीं समरपित

करित हएन, जउने ऊँ पंचे, सत्य के व्दारा अपने-आप काहीं अपना के सेवा माहीं समरपित करँय।

### सगले बिसुआसी लोगन के खातिर प्राथना

20 हम केबल इनहिन भर के खातिर प्राथना नहीं करी, बलकिन उनहूँ के खातिर घलाय करित हएन, जे इनखे बचन काहीं सुनिके, हमरे ऊपर बिसुआस करिहँय, जउने ऊँ पंचे सगले जन एक होंय। 21 हे पिता परमातिमा, जइसन अपना हमरे साथ हएन, अउर हम अपना के साथ हएन, उहयमेर ऊँ पंचे घलाय हमरे साथ होंय, एसे कि जउने संसार के सगले मनई बिसुआस करँय, कि अपनय हमहीं पठयन हय। 22 अउर उआ महिमा जउन अपना हमहीं दिहेन हय, उहयमेर से हम उनहूँ पंचन काहीं महिमा दिहेन हय, कि जइसन हम अपना एक हएन, उहयमेर ऊँ पंचे एक होंय। 23 हम उनमा अउर अपना हमरे साथ एक होइके रही, कि ऊँ पंचे पूरी तरह से एक होइ जाँय, जउने संसार के सगले मनई जानँय, कि अपनय हमहीं पठयन हय, अपना जइसन हमसे प्रेम करित हएन, उहयमेर उनहूँ से प्रेम करित हएन। 24 हे पिता परमातिमा, हम चाहित हएन, कि जिनहीं अपना हमहीं दिहेन हय, जहाँ हम रहब, उहाँ ऊँ पंचे हमरे साथ रहँय, कि जउने ऊँ पंचे हमरे उआ महिमा काहीं देखँय, जउन अपना हमहीं दिहेन हय, काहेकि अपना संसार काहीं बनामँइ से पहिले हमसे प्रेम किहेन हय। 25 हे पिता परमातिमा, अपना धरमी हएन, संसार के मनई अपना काहीं नहीं जानँय, पय हम अपना काहीं जानित हएन, अउर हमार चेला लोग जानिगें हँय, कि अपनय हमहीं पठएन हय। 26 अउर हम अपना के बारे माहीं इनहीं पंचन काहीं बतायन हय, अउर बताबत रहब, कि जउन प्रेम अपना काहीं हमसे रहा हय, उहय प्रेम उन माहीं रहय, अउर हम उन माहीं रही।”

### यीसु काहीं पकड़ाबा जाब

(मत्ती 26:47-56; मरकुस 14:43-50; लूका 22:47-53)

18 यीसु ई बातँय कहिके अपने चलन के साथ किद्रोन नाम के नाला के दुसरे पार गें, उहाँ एकठे बगिया रही हय, जउने माहीं यीसु अउर उनखर चेला लोग चलेगें। 2 अउर उनहीं पकड़बामँइ बाला यहूदा घलाय उआ जघा काहीं जानत रहा हय, काहेकि यीसु अपने चलन के साथ उहाँ जा करत रहे हँय। 3 एसे यहूदा इस्करियोती रोमी सिपाहिन के एकठे दल, अउर प्रधान याजकन के पठए मनइन, अउर मन्दिर के पहरेदारन के साथ जलत मसालँय, अउर दियन अउर हँथिआरन काहीं लए उहाँ पहुँचा। 4 तब यीसु ऊँ सगली बातन काहीं जानिके, जउन उनखे ऊपर आमँइ बाली रही हँय, बहिरे निकरें, अउर उनसे कहँइ लागें, “तूँ पंचे केही ढुँढते हय?” 5 ऊँ पंचे उनहीं जबाब दिहिन, “नासरत गाँव के यीसु काहीं।” तब यीसु उनसे कहिन, “हमहिँन आहेन” अउर उनहीं पकड़बामँइ बाला यहूदा घलाय उनखे साथय ठाढ़ रहा हय। 6 जब यीसु इआ कहिन कि, “हमहिँन आहेन” तबहिनय ऊँ पंचे पीछे पछिलके भुँइ माहीं गिर परें। 7 तब यीसु पुनि उनसे पूँछिन, “तूँ पंचे केही ढुँढते हय।” ऊँ पंचे कहिन, “नासरत गाँव के यीसु काहीं।” 8 तब यीसु उनहीं जबाब दिहिन, “हम त तौहसे कहि चुकेन हँय, कि ‘हमहिँन आहेन’, अगर हमहीं ढुँढते हय, त इनहीं जाँय हय।” 9 इआ एसे भ, कि उआ बचन पूर होय, जउन यीसु कहिन तय, कि “जिनहीं अपना हमहीं दिहेन हँय, उनमा से हम एककव जनेन काहीं नहीं गमाँयन।” 10 समौन पतरस के लघे जउन तलबार रही हय, ओही निकारिके महायाजक के दास के ऊपर चलाइके, ओखर दहिना कान काट दिहिन, उआ सेबक के नाम मलखुस रहा हय। 11 तब यीसु पतरस से कहिन, “आपन तलबार म्यान माहीं रक्खा! जउन दुख-मुसीबत उठामँइ के खातिर परमपिता हमहीं पठइन हीं, का हम ओही न सही?”

### हन्ना के आँगे यीसु

12 तब रोमी सिपाही लोग, अउर उनखर सुबेदार, अउर यहूदी लोगन के मन्दिर माहीं पहरा देँइ बाले, यीसु काहीं पकड़िके बाँध लिहिन। 13 अउर उनहीं बाँधिके सबसे पहिले उआ बरिस के महायाजक काइफा के ससुर हन्ना के लघे लइगें। 14 ई उँइन काइफा आहीं, जउन यहूदी धारमिक अँगुअन काहीं सलाह दिहिन रहा हय, कि “हमरे समाज के मनइन के खातिर एकठे मनई के मरब निकहा हय।”

### पतरस के इनकार

(मत्ती 26:69-70; मरकुस 14:66-68; लूका 22:55-57)

15 समौन पतरस अउर एकठे दूसर चेला घलाय, यीसु के पीछे-पीछे चल दिहिन: ई चेला महायाजक के जान-पहिचान के रहे हँय, अउर ऊँ यीसु के साथय महायाजक के अँगना माहीं चलेगें। 16 पय पतरस दुआरा के लघे ठाढ़ होइगें, कुछ देर बाद महायाजक के जान-पहिचान बाले चेला बहिरे आएँ, अउर पहरेदारिन से कहिके पतरस काहीं भीतर अँगना माहीं लइ आएँ। 17 उआ दासी जउन पहरेदारिन रही हय, पतरस से कहिस, “का तुहूँ यीसु के चलन म से आह्या?” पतरस कहिन, “हम उनखर चेला न होहेन।” 18 काहेकि जाइ खुब रहा हय, एसे दास अउर मन्दिर माहीं पहरा देँइ बाले आगी जलाइके उहाँ ठाढ़ होइके तापत रहे हँय, अउर पतरस घलाय उनखे साथय ठाढ़े आगी तापत रहे हँय।

### महायाजक के व्दारा यीसु से पूँछ-ताँछ

(मत्ती 26:59-66; मरकुस 14:55-64; लूका 22:66-71)

19 तब महायाजक, यीसु से उनखे चलन के बारे माहीं, अउर उनखे उपदेस के बारे माहीं पूँछिन। 20 यीसु उनहीं जबाब दिहिन, कि “हम हमेसा मनइन के बीच माहीं हरेक मनइन से खुलिके बात किहेन हँय, अउर हमेसा हम सभाघरन माहीं अउर मन्दिर माहीं जहाँ सगले यहूदी लोग एकठ्ठा होत हैं, उपदेस दिहेन हय। अउर हम कबहूँ छिपाइके कउनव बात नहीं कहेन आय। 21 फेरव तूँ हमसे इआ ‘बात काहे पूँछते हय?’ हमरे बात काहीं सुनँय बालेन से पूँछा, कि ‘हम उनसे का कहेन हय?’ देखा, ऊँ पंचे जानत हैं; कि हम उनसे का-का कहेन हय?” 22 जब यीसु इआ बात कहिन, तब मन्दिर के पहरा देँइ बालेन म से एक जने, जउन उनखे लघे ठाढ़ रहा हय, यीसु काहीं थापड़ मारिके कहिस, “का तूँ महायाजक काहीं इआमेर से जबाब देते हय।” 23 यीसु ओही जबाब दिहिन, “अगर हम बुरा कहेन हय, त उआ बुराई के बारे माहीं बताबा; पय अगर हम नीक कहेन हय, त हमहीं काहे मरते हय?” 24 हन्ना यीसु काहीं बाँधेन बाँधे काइफा महायाजक के लघे पठय दिहिन।

### पतरस के पुनि इनकार करब

(मत्ती 26:71-75; मरकुस 14:69-72; लूका 22:58-62)

25 जब समौन पतरस ठाढ़े आगी तापत रहे हँय, तब आगी तापँय बाले पूँछिन, “का तुहूँ यीसु के चलन म से आह्या?” पतरस पुनि इनकार कइके उनसे कहिन, “हम न होहेन।” 26 महायाजक के दासन म से जेखर पतरस कान काट डारिन तय, उहाँ ओखे परिवार के एक जने रहा हय, त उआ पतरस से कहिस, “का हम तौहई यीसु के साथय बगिया माहीं नहीं देखेन तय?” 27 पतरस एक बेरकी पुनि इनकार कइ दिहिन, अउर हरबिन मुरगा बोलिस।

### पिलातुस के आँगे यीसु

(मत्ती 27:1-2, 11-14; मरकुस 15:1-5; लूका 23:1-5)

28 अउर ऊँ पंचे यीसु काहीं काइफा महायाजक के लघे से राजपाल के किला माहीं लइगें, उआ समय भिनसार रहा हय, पय ऊँ पंचे किला के भीतर

नहीं गें, जउने अपबित्र न होंय, पय फसह तेउहार के खाना खाय सकँय।  
 29 तब राजपाल पिलातुस उनखे लघे बहिरे निकरि आएँ, अउर कहिन, “तूँ पंचे इआ मनई के ऊपर कउने बात के आरोप लगउते हया?” 30 ऊँ पंचे उनीं जबाब दिहिन, कि “अगर ई अपराधी न होतें, त हम पंचे इनीं अपना के हाँथे माहीं न सउँपित।” 31 राजपाल पिलातुस उनसे कहिन, “तुहिन पंचे इनीं लइ जाइके, अपने बिधान के नेम के मुताबिक न्याय करा।” तब यहूदी समाज के मनई उनसे कहिन, “हमहीं पंचन काहीं कोहू काहीं मउत के सजा देई के अधिकार नहीं आय।” 32 इआ एसे भ, कि यीसु के कही उआ बात पूर होय, जउने काहीं ऊँ इआ बतामँड के खातिर कहिन तय, कि हमार मउत † कइसन होई।

33 तब राजपाल पिलातुस पुनि किला के भीतर गें, अउर यीसु काहीं बोलाइके उनसे पूँछिन, “का तूँ यहूदी लोगन के राजा आह्या?” 34 तब यीसु जबाब दिहिन, “का तूँ इआ बात अपने कइती से कहते हया, इआ कि हमरे बारे माहीं दूसर कोऊ तौहई बताइन हीं?” 35 तब राजपाल पिलातुस उनीं जबाब दिहिन, “का हमहूँ यहूदी आहैन? तौहरेन जाति बाले अउर प्रधान याजक लोग, तौहई हमरे हाँथ माहीं सँउपिन हीं, ‘तूँ बताबा का किहा हय?’” 36 यीसु उनीं जबाब दिहिन, कि “हमार राज इआ संसार के न होय, अगर हमार राज इआ संसार के होत, त हमार सगले सेबक लइतें, अउर हम यहूदी लोगन के हाँथ माहीं न सँउपे जइत: पय अब हमार राज इहाँ के न होय।” 37 तब पिलातुस उनसे कहिन, “का तूँ राजा आह्या?” तब यीसु उनीं जबाब दिहिन, कि “तुहिन हमहीं कहते हया, कि ‘हम राजा आहैन’; हम एसे जनम लिहिन हँय, अउर इआ संसार माहीं एसे आएन हँय, कि सत्य के बारे माहीं गबाही देई, अउर हरेक उआ मनई जउन सत्य के पच्छ माहीं हय, उआ हमरे बचन काहीं सुनत हय।” 38 तब पिलातुस उनसे कहिन, “सत्य का आय?” अउर इआ कहिके ऊँ पुनि यहूदी लोगन के लघे चलेगें, अउर उनसे कहिन, “हम त उनखे ऊपर कउनव दोस नहीं पाई।”

39 पय तौहार पंचन के इआ रीत ही, कि हम फसह नाम के तेउहार माहीं तौहरे खातिर एकठे कइदी काहीं छोड़ देई, त का तूँ पंचे चहते हया, कि हम तौहरे खातिर यहूदी लोगन के राजा काहीं छोड़ि देई? 40 तब ऊँ पंचे पुनि चिल्लाइके कहिन, “इनीं नहीं, बलकिन हमरे खातिर बरअब्बा काहीं छोड़ि देई;” अउर बरअब्बा डाँकू रहा हय।

### मउत के सजा के हुकुम

(मत्ती 27:15-31; मरकुस 15:6-20; लूका 23:13-25)

19 इआ सुनिके राजपाल पिलातुस यीसु काहीं चाबुक मरबाइन।  
 2 अउर सिपाही लोग काँटन काहीं गुँथिके मुकुट बनाइके, यीसु के मूँडे माहीं धरिन, अउर उनीं बैगनी रंग के ओन्हा पहिराइन। 3 अउर उनखे लघे आय-आइके कहँइ लागें, “हे यहूदी लोगन के राजा नबस्कार!” अउर थापड़ मारँइ लागें। 4 तब राजपाल पिलातुस बहिरे निकरिके उनसे कहिन, “देखा, हम उनीं पुनि तौहरे लघे बहिरे लए अइत हएन; जउने तूँ पंचे जानिल्या, कि हम उनखे ऊपर कउनव दोस नहीं पाएन।” 5 तब यीसु काँटन के मुकुट अउर बैगनी रंग के ओन्हा पहिरे बहिरे निकरें, अउर राजपाल पिलातुस कहिन, “देखा, ईन आहीं ऊँ मनई।” 6 जब प्रधान याजक लोग, अउर मन्दिर माहीं पहरा देई बाले सिपाही उनीं देखिन, त चिल्लाइके कहँइ लागें, कि “ओही क्रूस माहीं चढ़ाबा, क्रूस माहीं”: तब राजपाल पिलातुस उनसे कहिन, “तुहिन पंचे उनीं लइ जाइके क्रूस माहीं चढ़ाबा; काहेकि हम उनखे ऊपर कउनव दोस नहीं पाई।” 7 तब यहूदी लोग उनीं जबाब दिहिन, कि “हमरेव पंचन के बिधान हय, अउर उआ बिधान के मुताबिक ऊँ मारि डारँइ के काबिल हें, काहेकि ऊँ अपने-आप काहीं परमातिमा के लइका बनाबत हें।” 8 जब राजपाल पिलातुस इआ बात काहीं सुनिन, त अउर जादा डेराइगें। 9 अउर पुनि किला के भीतर गें, अउर यीसु से कहिन, “तूँ कहाँ से आया हय?” पय यीसु उनीं कउनव जबाब नहीं दिहिन। 10 तब

† 18:32 लूका 18:32,33

पुनि पिलातुस उनसे कहिन, “तूँ हमसे काहे नहीं बोलते आह्या?” काहे तूँ नहीं जनते आह्या, कि “हमहीं तौहई छोड़ि देई के अधिकार हय, अउर तौहई क्रूस माहीं चढ़ामँड के घलाय अधिकार हय।” 11 तब यीसु उनीं जबाब दिहिन, कि “अगर तौहई परमपिता के तरफ से अधिकार न दीन जात, त तौहार हमरे ऊपर कुछ अधिकार न होत; एसे जे हमहीं तौहरे हाँथ माहीं पकड़ाइस ही, ओखर पाप जादा हय।”

12 इआ सुनिके राजपाल पिलातुस यीसु काहीं छोड़ि देई के उपाय ढूँँइ लागें, पय यहूदी लोग चिल्लाय-चिल्लाइके कहिन, “अगर तूँ उनीं छोड़ि देहा, त तूँ राजा कैसर के साथी न कहइहा; अउर जे कोऊ अपने-आप काहीं राजा बनाबत हय, उआ राजा कैसर के बिरोधी आय।” 13 ई बातन काहीं सुनिके पिलातुस यीसु काहीं बहिरे, उआ जघा माहीं लइगें, जउन “पथरा के चबूतरा” कहाबत रहा हय, जउने काहीं इब्रानी भाँसा माहीं गब्बता कहत रहे हँय, अउर उहाँ राजपाल पिलातुस न्याय के सिंहासन माहीं बइठिगें।

14 (काहेकि उआ दिना फसह नाम के तेउहार के तइआरी करँइ बाला दिन रहा हय, अउर दुपहर के करीब बारा बजे रहे हँय।) तब ऊँ यहूदी लोगन से कहिन, “देखा, ईन आहीं तौहार राजा!” 15 पय ऊँ पंचे चिल्लाने कि “लइ जा! लइ जा! ओही क्रूस माहीं चढ़ाबा।” तब राजपाल पिलातुस उनसे कहिन, “का हम तौहरे राजा काहीं क्रूस माहीं चढ़ाई?” तब प्रधान याजक लोग उनीं जबाब दिहिन, कि “राजा कैसर काहीं छोड़िके, हमार कोऊ दूसर राजा न होय।” 16 तब पिलातुस यीसु काहीं उनखे हाँथ माहीं सँउप दिहिन, जउने ऊँ क्रूस माहीं चढ़ाए जाँय।

### क्रूस माहीं चढ़ाबा जाब

(मत्ती 27:32-44; मरकुस 15:21-32; लूका 23:26-43)

17 तब ऊँ पंचे यीसु काहीं लइगें, अउर यीसु आपन क्रूस उठाए यरूसलेम सहर से बहिरे उआ जघा तक गें, जउन “खोपड़ी के जघा” कहाबत रही हय, अउर ओही इब्रानी भाँसा माहीं “गुलगुता” कहत रहे हँय। 18 उहाँ ऊँ पंचे यीसु के साथ दुइठे अउर मनइन काहीं, क्रूस माहीं चढ़ाइन, एकठे काहीं दहिने कइती, अउर दुसरे काहीं बाएँ कइती, अउर बीच म यीसु काहीं।

19 अउर राजपाल पिलातुस एकठे आरोप-पत्र लिखिके, क्रूस माहीं लगाय दिहिन, अउर ओमाहीं इआ लिखा रहा हय, “यीसु नासरी यहूदी लोगन के राजा।” 20 उआ दोस पत्र काहीं खुब यहूदी लोग पढ़िन, काहेकि जहाँ यीसु क्रूस माहीं चढ़ाए गे रहे हँय, उआ जघा सहर के लघेन रही हय, अउर उआ पत्र इब्रानी, लतीनी अउर यूनानी भाँसा माहीं लिखा रहा हय। 21 तब यहूदी लोगन के प्रधान याजक लोग, राजपाल पिलातुस से कहिन, “उआ पत्र माहीं यहूदी लोगन के राजा न लिखा।” पय इआ लिखा “जउन यीसु कहिन हीं, कि हम यहूदी लोगन के राजा आहैन।” 22 तब पिलातुस उनीं जबाब दिहिन, “जउन हम लिख दिहेन, त लिख दिहेन, ओही बदल नहीं सकी।”

23 जब सिपाही यीसु काहीं क्रूस माहीं चढ़ाय चुके, तब यीसु के जेतने ओन्हा रहे हँय, उनीं लइके चार हिस्सन माहीं बाँट दिहिन, हरेक सिपाही के खातिर एक हिस्सा, अउर ऊँ उनखे कुरथा काहीं घलाय लिहिन, पय कुरथा बिना सिए ऊपर से नीचे तक बिना रहा हय: एसे ऊँ पंचे आपस माहीं कहिन, “हम पंचे एही न फारी, बलकिन इआ केही मिली, एखे खातिर परची डारी।” 24 इआ एसे भ, कि जउने पबित्र सास्त्र माहीं लिखी बात पूर होय, कि

“ऊँ पंचे हमरे ओन्हन काहीं आपस माहीं बाँट लिहिन, अउर हमरे ओन्हा के खातिर परची † डारिन।”

अउर सगले सिपाही अइसनय किहिन।

25 पय यीसु के क्रूस के लघे उनखर महतारी, अउर उनखे महतारी के बहिनी मरियम, जउन क्लोपास के मेहेरिआ आहीं, अउर मगदल गाँव के मरियम ठाढ़ रही हँय। 26 तब यीसु अपने महतारी अउर उआ चेला काहीं जेसे ऊँ जादा प्रेम करत रहे हँय, लघे ठाढ़ देखिके, अपने महतारी से कहिन;

†† 19:24 भज 22:18

“हे अम्मा, देखा, ई तोंहार लड़िका आहीं।” 27 पुनि यीसु अपने ऊँ चेला से कहिन, “ई तोंहार महतारी आहीं”, अउर उहय समय ऊँ चेला उनखर देख-भाल करई के खातिर उनहीं अपने घरय लड़गें।

### यीसु के मउत

(मत्ती 27:45-56; मरकुस 15:33-41; लूका 23:44-49)

28 एखे बाद यीसु इआ जानिके कि अब सब कुछ पूर होइ चुका हय; एसे कि पबित्र सास्त्र माहीं लिखी बात पूर होय, कहिन, “हम पिआसे हएन।” 29 उहाँ सिरका से भरा एकठे बरतन धरा रहा हय, एसे ऊँ पंचे एकठे सोवखा काहीं, सिरका माहीं बुड़ाइके, जूफा नाम के बिरबा के लकड़ी माहीं धड़के, उनखे मुँहे माहीं लगाइन। 30 जब यीसु उआ सिरका पीन, तब कहिन, “पूर होइगा।” अउर ऊँ आपन मूँड़ नीचे काहीं झुकाइके, प्रान छोंड़ दिहिन।

### भाला से छेदा जाब

31 अउर एसे कि उआ फसह नाम के तेउहार के तड़आरी के दिन रहा हय, पबित्र दिन काहीं उनखर लहासँय क्रूस माहीं न लटकी रहँय, काहेकि पबित्र दिन खुब महत्वपूर्ण रहा हय। एखे खातिर यहूदी लोग पिलातुस से बिनती किहिन, कि ऊँ हुकुम देंय, कि उनखर टागँय, टोर दीन जाँय, अउर उनखे लहासन काहीं उहाँ से हटाय दीन जाय। 32 तब कुछ सिपाही आइके पहिल मनई के टागँय टोरिन, एखे बाद दुसरे मनई के टोरिन, जउन यीसु के साथ क्रूस माहीं चढ़ाए गे रहे हँय। 33 पय जब ऊँ सिपाही यीसु के लघे आइके देखिन, कि ऊँ मर चुके हँय, त उनखर टागँय नहीं टोरिन। 34 पय उन सिपाहिन म से एक जने भाला से उनखे पँजरे माहीं छेदिस, त हरबिन उनखे खून अउर पानी निकरा। 35 जउन मनई इआ देखिस रहा हय, उहय इआ गबाही दिहिस ही, अउर ओखर गबाही सच्ची हय; अउर उआ जानत हय, कि हम इआ बेलकुल सही कहित हएन, जउने तुहँ पंचे बिसुआस करा। 36 ई बातँय एसे भई, कि पबित्र सास्त्र माहीं लिखी बात पूर होय, कि “उनखर कउनव हड्डी न टोरी जई।” 37 पबित्र सास्त्र म एकठे अउर जघा माहीं इआ लिखा हय, कि “जिनहीं ऊँ पंचे भाला से छेदिन हीं, ऊँ पंचे उनहिन काहीं देखेहँय †।”

### यीसु काहीं गाड़ा जाब

(मत्ती 27:57-61; मरकुस 15:42-47; लूका 23:50-56)

38 एखे बाद अरमतिया गाँव के रहँइ बाले यूसुफ, जउन यीसु के ऊपर बिसुआस करत रहे हँय, (पय यहूदी धारमिक अँगुअन के डेरन के मारे इआ बात काहीं बताबत नहीं रहें, कि ऊँ यीसु के ऊपर बिसुआस करत हें) ऊँ पिलातुस से बिनती किहिन, कि “हम यीसु के लहास काहीं लइ जाँइ चाहित हएन”, तब पिलातुस उनखे बिनती काहीं सुनिके, कहिन “लइ जा”, अउर ऊँ आइके उनखे लहास काहीं लड़गें। 39 अउर नीकुदेमुस घलाय जउन पहिले यीसु के लघे रात माहीं गे रहे हँय, गन्धरस अउर एलबा नाम के महकँइ बाली दोनव चीजन काहीं मिलाइके, तीस किलो के करीब लइ आएँ। 40 तब ऊँ पंचे यीसु के लहास काहीं लइके यहूदी लोगन के गाड़ँइ के बिधी के मुताबिक, यीसु के लहास माहीं महकँइ बाली चीजन काहीं कफन के साथ लपेटिन। 41 उआ जघा माहीं जहाँ यीसु क्रूस माहीं चढ़ाए गे रहे हँय, उहाँ एकठे बगइचा रहा हय, अउर उहय बगइचा माहीं, एकठे नई कब्र रही हय, जउने माहीं अबे तक कोहू काहीं नहीं धरा ग तय। 42 एसे यहूदी लोगन के पबित्र दिन के तड़आरी करई के दिन होंइ के कारन, ऊँ पंचे यीसु के लहास काहीं उहय कब्र माहीं धरिन, काहेकि उआ कब्र लघे रही हय।

### यीसु के कब्र खाली

(मत्ती 28:1-10; मरकुस 16:1-8; लूका 24:1-12)

20 हप्ता के पहिलय दिन अइतबार काहीं, मगदल गाँव के मरियम, भिनसरहय जब अँधिआर रहा हय, कब्र के लघे आई, अउर पथरा काहीं कब्र से ढनगा देखिन। 2 तब ऊँ दउड़त आइके समौन पतरस अउर ऊँ दुसरे चेला के लघे, जेसे यीसु जादा प्रेम रक्खत रहे हँय कहिन, “ऊँ पंचे यीसु के लहास काहीं कब्र से निकारिके लड़गे हँय; हम पंचे नहीं जानी, कि उनहीं कहाँ धरिन हीं।” 3 तब पतरस अउर ऊँ दूसर चेला उहाँ से निकारिके कब्र कइती चल दिहिन। 4 अउर दोनव जने एक साथय दउड़त रहे हँय, पय दुसरकबा चेला पतरस से आँगे बढ़िके, कब्र माहीं पहिले पहुँचिगा। 5 अउर उआ निहुरिके नीचे देखिस, कि उहाँ कफन के ओन्हा परे हँय, पय उआ भीतर नहीं ग। 6 तब समौन पतरस उनखे पीछे-पीछे पहुँचे, अउर कब्र के भीतर गें, अउर कफन के ओन्हा परे देखिन। 7 अउर उआ अँगउछा जउन उनखे मुँड़े माहीं बाँधा रहा हय, ओन्हन के साथ नहीं, पय अलग से एकठे जघा माहीं गुरमेटा धरा देखिन। 8 तब दूसर चेला घलाय जउन कब्र माहीं पहिले पहुँच ग रहा हय, उआ भीतर ग, अउर देखिके बिसुआस किहिस। 9 ऊँ पंचे अबय तक पबित्र सास्त्र माहीं लिखे, इआ बचन काहीं नहीं समझे पाइन तय, कि “ऊँ मरेन म से जरूर जिन्दा होइ जइहँय।” 10 तब ऊँ दोनव चेला अपने घर लउटिगें।

### मगदल गाँव के मरियम काहीं यीसु देखाई दिहिन

(मत्ती 28:9,10; मरकुस 16:9-11)

11 पय मरियम रोबत कब्र के लघे बहिरे ठाढ़ रही हँय, अउर रोउतय-रोबत कब्र के भीतर कइती निहुरिके देखिन, 12 त दुइठे स्वरगदूतन काहीं चमचमात उजर ओन्हा पहिरे, जहाँ यीसु के लहास धरी रही हय, उहाँ एकठे काहीं मुँड़े कइती, अउर दुसरे काहीं गोड़े कइती बइठ देखिन। 13 तब ऊँ पंचे मरियम से कहिन, “हे बहिनी, तूँ काहे रोउते हया?” तब मरियम उनसे कहिन, “ऊँ पंचे हमरे प्रभू काहीं उठाय लड़गे हँय, अउर हम नहीं जानित आहेन, कि उनहीं कहाँ धरिन हीं।” 14 इआ बात कहिके मरियम पीछे कइती मुँड़िके देखिन, तब यीसु काहीं उहाँ ठाढ़ देखिन, अउर इआ नहीं जाने पाइन, कि ऊँ यीसु आहीं। 15 तब यीसु उनसे कहिन, “हे बहिनी, तूँ काहे रोउते हया? केही ढुँढते हया?” ऊँ उनहीं माली समाझिके उनसे कहिन, “हे महाराज, अगर अपना उनहीं उठाय लइ गएन हय, त हमहीं बताय देई, कि उनहीं कहाँ धरे हएन, त हम उनहीं लइ जाब।” 16 तब यीसु उनसे कहिन, “मरियम!” तब ऊँ पीछे मुड़िके, उनसे इब्रानी भाँसा माहीं कहिन, “रब्बूनी” जेखर मतलब हय “हे गुरू।” 17 तब यीसु उनसे कहिन, “अबे हमहीं न छुआ, काहेकि हम अबय तक अपने पिता परमातिमा के लघे ऊपर नहीं गएन आय, बलकिन हमरे भाइन के लघे जाइके उनसे कहि दिहा, कि हम अपने पिता अउर तोंहरे पिता, अउर अपने परमातिमा अउर तोंहरे परमातिमा के लघे ऊपर जइत हएन।” 18 तब मगदल गाँव के मरियम जाइके चलन से बताइन, कि “हम प्रभू काहीं देखे हएन, अउर ऊँ, हमहीं ई बातन काहीं बताइन हीं।”

### चेलन काहीं यीसु देखाई दिहिन

(मत्ती 28:16-20; मरकुस 16:14-18; लूका 24:36-49)

19 उहय दिना हप्ता के पहिल दिन अइतबार रहा हय, साँझिके चेला लोग यहूदी धारमिक अँगुअन के डेरन के मारे केमरा बंद कइके एकट्ठा बइठ रहे हँय, तब यीसु आएँ, अउर उनखे बीच माहीं ठाढ़ होइके कहिन, “तोंहई पंचन काहीं सान्ती मिलय।” 20 अउर इआ कहे के बाद यीसु आपन हाँथ अउर पाँजर उनहीं देखाइन: तब चेला लोग, प्रभू काहीं देखिके आनन्दित भें। 21 अउर यीसु पुनि उनसे कहिन, “तोंहई पंचन काहीं सान्ती मिलय।” जइसन पिता परमातिमा हमहीं पठइन हीं, उहयमेर हमहूँ तोंहई पठइत हएन।” 22 इआ कहे के बाद यीसु उनखे ऊपर फूँकिन अउर उनसे कहिन,

† 19:37 दरसनन 1:7

“पवित्र आत्मा ल्या’।<sup>23</sup> जउने मनइन के पापन काहीं तूँ पंचे माफ करिहा, उनखर पाप माफ कीन जइहँय, अउर जिनखे पापन काहीं तूँ पंचे माफ न करिहा, उनखर पाप माफ न कीन जइहँय।”

### थोमा काहीं यीसु देखाई दिहिन

<sup>24</sup> पय बरहँव चेलन म से एक जने, जिनखर नाम थोमा रहा हय, जउन दिदुमुस के नाम से घलाय जाने जात रहे हँय, जब यीसु चेलन के लघे आएँ तय, तब ऊँ नहीं रहे आँय।<sup>25</sup> जब चेला लोग उनसे कहँइ लागें, कि “हम पंचे प्रभू काहीं देखे हएन”: तब थोमा उनसे कहिन, “जब तक हम उनखे हाँथेन माहीं खीलन के छेदन काहीं न देख लेब, अउर उनमा आपन अँगुरी न डार लेब, अउर पाँजर माहीं आपन हाँथ न डार लेब, तब तक हम बिसुआस न मानब।”<sup>26</sup> आठ दिना के बाद यीसु के चेला लोग, पुनि घर के भीतर रहे हँय, अउर थोमा घलाय उनखे साथ माहीं रहे हँय, अउर दुअरा के केमरा बंद रहे हँय, तब यीसु आएँ, अउर बीच माहीं ठाढ़ होइके कहिन, “तौहई पंचन काहीं सान्ति मिलय।”<sup>27</sup> अउर यीसु थोमा से कहिन, “आपन अँगुरी हमरे हाँथे के छेदन माहीं डारा, अउर आपन हाँथ हमरे पाँजर माहीं डारा, अउर संका करब छोड़िके, बिसुआसी बना।”<sup>28</sup> इआ सुनिके थोमा उनहीं जबाब दिहिन, “हे हमार प्रभू, हे हमार परमातिमा!”<sup>29</sup> तब यीसु उनसे कहिन, “तूँ त हमहीं देखिके हमरे ऊपर बिसुआस किहा हय, पय धन्य हें, ऊँ पंचे जउन हमहीं बिना देखे बिसुआस करत हें।”

### इआ किताब के उद्देश

<sup>30</sup> अउर यीसु अपने चेलन के आँगे अउरव खुब चमत्कार देखाइन तय, जउन इआ किताब माहीं नहीं लिखे गे आँय।<sup>31</sup> पय ई चमत्कार एसे लिखे गे हँय, कि तूँ पंचे बिसुआस करा, कि यीसुअय परमातिमा के लड़िका मसीह आहीं: अउर यीसु के ऊपर बिसुआस कइके, उनखे नाम से अनन्त जीवन पाबा।

### तिबिरियास झील के किनारे चेलन काहीं यीसु देखाई दिहिन

**21** एखे बाद यीसु तिबिरियास नाम के झील के किनारे अपने-आप काहीं चेलन के आँगे प्रगट किहिन, अउर इआमेर से प्रगट किहिन।

<sup>2</sup> जब समौन पतरस अउर थोमा जउन दिदुमुस नाम से घलाय जाने जात रहे हँय, अउर गलील प्रदेस के काना गाँव के नतनएल अउर जब्दी के लड़िका, अउर उनखे चेलन म से दुइ जने अउर एकट्ठा रहे हँय।<sup>3</sup> समौन पतरस उनसे कहिन, “हम मछरी पकड़इ जइत हएन”: तब ऊँ पंचे उनसे कहिन, “हमहूँ पंचे तौहरे साथ चलब”: तब ऊँ पंचे उहाँ से निकरिके नाव माहीं चढ़िके गे, पय उआ रात माहीं एक्कवठे मछरी नहीं पकड़े पाइन।

<sup>4</sup> भिनसार होतय यीसु झील के किनारे आइके ठाढ़ भें; तऊ चेला लोग नहीं जाने पाइन, कि ऊँ यीसु आहीं।<sup>5</sup> तब यीसु उनसे कहिन, “हे लड़िकव, का तौहरे लघे कुछ खाय क हय?” ऊँ पंचे जबाब दिहिन, “कुछू नहिं आय।”<sup>6</sup> तब यीसु उनसे कहिन, “नाव के दहिने कइती जाल डारा, त मछरी पइहा”, तब ऊँ पंचे दहिने कइती जाल डारिन, अउर एतनी मछरी जाल माहीं आय गई, कि ऊँ पंचे जाल काहीं खींच नहीं पाबत रहे आँय।<sup>7</sup> एसे ऊँ चेला जिनसे यीसु जादा प्रेम करत रहे हँय, पतरस से कहिन, “ई त प्रभू आहीं।” तब समौन पतरस इआ सुनिके, कि ऊँ प्रभू आहीं, करिहा माहीं अँगुअली काहीं बाँध लिहिन, काहेकि ऊँ निपरदा रहे हँय, अउर झील माहीं कूद परें।<sup>8</sup> पय अउर चेला लोग नाव माहीं चढ़े मछरिन से भरी जाल काहीं खींचत-खींचत आएँ, काहेकि ऊँ पंचे किनारे से जादा दूरी नहीं, बलकिन दुइ सव हाँथ के करीब रहे हँय।

<sup>9</sup> जब ऊँ पंचे किनारे माहीं नाव से उतरें, त कोइला के आगी जलत देखिन, अउर ओहिन माहीं कुछ मछरी, अउर रोटी पकड़ के खातिर धरी

देखिन।<sup>10</sup> तब यीसु उनसे कहिन, “जउन मछरी तूँ पंचे अबे पकड़े हया, उनमा से कुछ लइ आबा।”<sup>11</sup> तब समौन पतरस नाव माहीं चढ़िके एक सव तिरपन बड़ी-बड़ी मछरिन से भरा जाल, किनारे माहीं खींच लाएँ, अउर एतनी मछरी जाल माहीं रही, हई तऊ जाल नहीं फाट।<sup>12</sup> तब यीसु उनसे कहिन, “आबा खाना खा” अउर उन चेलन म से कोहू के हिम्मत नहीं परी कि उनसे पूँछय, कि “अपना को आहैन?” काहेकि ऊँ पंचे जानिगें तय, कि “ऊँ प्रभुअय आहीं।”<sup>13</sup> तब यीसु उनखे लघे आएँ, अउर रोटी लइके उनहीं दिहिन, अउर उहयमेर मछरिव दिहिन।<sup>14</sup> इआ तिसरइआ आय, जब यीसु मरेन म से जिन्दा होए के बाद, चेलन काहीं देखाई दिहिन।

### यीसु अउर पतरस

<sup>15</sup> जब ऊँ पंचे खाना खाय चुके, तब यीसु समौन पतरस से कहिन, “हे समौन, यूहन्ना के लड़िका, का तूँ इनसे जादा हमसे प्रेम करते हया?” तब समौन उनसे कहिन, “हाँ प्रभू, अपना त जनतय हएन, कि हम अपना से प्रेम करित हएन”: इआ सुनिके यीसु उनसे कहिन, “हमरे मेम्न काहीं चराबा।”<sup>16</sup> तब यीसु समौन पतरस से दुसराय कहिन, “हे समौन, यूहन्ना के लड़िका, का तूँ हमसे प्रेम करते हया?” तब समौन उनसे कहिन, “हाँ प्रभू, अपना त जनतय हएन, कि हम अपना से प्रेम करित हएन”: इआ सुनिके यीसु उनसे कहिन, “हमरे गड़रन के रखबारी करा।”<sup>17</sup> तब यीसु समौन पतरस से तिसराय कहिन, “हे समौन, यूहन्ना के लड़िका, का तूँ हमसे प्रेम करते हया?” तब पतरस उदास होइगें, कि यीसु तिसराय अइसन कहिन हीं; कि “का तूँ हमसे प्रेम करते हया?” तब समौन उनसे कहिन, “हे प्रभू, अपना त सबय जानित हएन, अउर इहव जानित हएन, कि हम अपना से प्रेम करित हएन”, इआ सुनिके यीसु उनसे कहिन, “हमरे गड़रन काहीं चराबा।”<sup>18</sup> यीसु पुनि उनसे कहिन, “हम तौहसे सही-सही कहित हएन, जब तूँ जमान रहे हया, त अपने से तइआर होइके जहाँ चाहत रहे हया, उहाँ चले जात रहे हया; पय जब तूँ बुढ़ाय जइहा, त अपने हाँथ काहीं फइलइहा, अउर दूसर तौहई तइआर कइके, जहाँ तूँ न जाँय चइहा, उहाँ तौहई लइ जई।”<sup>19</sup> यीसु ई बातन से बताय दिहिन, कि पतरस कइसन मउत से परमातिमा के बड़ाई करिहँय; अउर इआ कहे के बाद समौन से कहिन, “हमरे पीछे चलत रहा।”

### यीसु अउर उनखर पियार चेला

<sup>20</sup> (तब पतरस मुड़िके उआ चेला काहीं पीछे आबत देखिके, जउने से यीसु जादा प्रेम करत रहे हँय, अउर जउन खाना खात माहीं यीसु के छाती कइती झुकिके पूँछिन रहा हय, कि “हे प्रभू अपना काहीं पकड़ामँइ बाला को आय?”)<sup>21</sup> उनहीं देखिके पतरस यीसु से पूँछिन, “हे प्रभू, इनखर का हाल होई?”<sup>22</sup> तब यीसु उनसे कहिन, “अगर हम चाही, कि ऊँ हमरे आमँइ तक इहाँ रुके रहँय, त तौहई एसे का लेन-देन हय? तूँ हमरे पीछे चलत रहा।”<sup>23</sup> एसे भाइन माहीं इआ बात फइलगे, कि “ऊँ चेला न मरिहँय;” तऊ यीसु उनसे इआ नहीं कहिन तय, कि “ऊँ न मरिहँय, पय इआ, कि अगर हम चाही, कि ऊँ हमरे आमँइ तक रुके रहँय, त तौहई एसे का लेन-देन हय?”

### उपसंहार

<sup>24</sup> ई उँडन चेला आहीं, जउन ई बातन के गबाही देत हें, अउर जउन ई बातन काहीं लिखिन हीं, अउर हम पंचे जानित हएन, कि उनखर गबाही सच्ची हय।<sup>25</sup> अउरव खुब काम हें, जउन यीसु किहिन रहा हय; अगर ऊँ सगले एक-एक कइके लिखे जातें, त हम समझित हएन, कि जउन किताबँय लिखी जातीं, ऊँ संसार माहीं न समातीं।

# खास चेलन

## इआ किताब के परिचय

यीसु मसीह के खास चेलन के कामन के बखान लूका के लिखी खुसी के खबर से आँगे के बखान आय। एखर खास उद्देश्य इआ बताउब हय, कि यीसु के पहिल अनुयायी पबित्र आत्मा के अँगुआई माहीं, यीसु के बारे माहीं खुसी के खबर काहीं “यरूसलेम सहर अउर सगले यहूदिया प्रदेस अउर सामरिया प्रदेस माहीं, अउर धरती के छोर तक (खा.चे.काम 1:8) कइसन फइलाइन”। इआ मसीही अन्दोलन के बिबरन आय जउन यहूदी लोगन के बीच माहीं सुरू भ तय, अउर फइलिके सगले संसार के मनइन के बिसुआस बनिगा। लिखँइ बाला इआ बात के घलाय ध्यान रक्खत हय, कि ओखे पढ़ँइ बालेन काहीं इआ निश्चित होइ जाय, कि मसीही लोग रोमी सम्राज के खातिर बिद्रोही राजनयतिक सक्ती नहीं रहे आहीं, अउर मसीही बिसुआस यहूदी धरम काहीं पूर करँइ बाला रहा हय।

यीसु मसीह के खास चेलन के काम के किताब काहीं तीन भागन माहीं बाँटा जाय सकत हय, जउन लगीतार बाढ़त छेत्र काहीं बताबत हय, जउने माहीं यीसु मसीह के खुसी के खबर के प्रचार कीन ग हय, अउर मसीही मन्डलिन के स्थापना कीन गे ही, 1. यीसु के स्वरग जाए के बाद यरूसलेम सहर माहीं मसीही अन्दोलन के सुरुआत; 2. पलस्तीन प्रदेस के अलग-अलग हिस्सन माहीं एखर प्रसार; 3. अउर भूमध्य सागर के देसन माहीं रोम देस तक एखर प्रसार।

यीसु मसीह के खास चेलन के काम के खास बिसेसता ही, पबित्र आत्मा के क्रियाशीलता। उआ पिन्तेकुस्त के दिन यरूसलेम सहर माहीं एकट्ठा भे बिसुआसी लोगन के ऊपर बड़ी सामर्थ के साथ उतरत हय, अउर इआ किताब माहीं बखान कीन गे घटनन के दउरान मसीही मन्डली अउर ओखे अँगुआन के मार्ग दरसन करत हय, अउर उनहीं सामर्थ देत हय। यीसु मसीह के खास चेलन के काम माहीं दीनगे कइएकठे उपदेसन माहीं सुरुआत माहीं मसीही खबर के सार प्रस्तुत कीन ग हय, अउर एमा बखान कीन गे घटनन से बिसुआसी लोगन के जीवन माहीं अउर मसीही मन्डली के सहभागिता माहीं इआ सँदेस के सामर्थ काहीं प्रगट करत हय।

रूप-रेखा :

गबाही के खातिर तइआरी

क- यीसु के आखिरी हुकुम अउर वादा

ख- यहूदा के बारिसदार

यरूसलेम सहर माहीं गबाही

यहूदिया प्रदेस अउर सामरिया प्रदेस माहीं गबाही

पवलुस के सेबा के काम

क- पहिल प्रचार-यात्रा

ख- यरूसलेम सहर माहीं सम्मेलन

ग- दूसर प्रचार-यात्रा

घ- तीसर प्रचार-यात्रा

च- यरूसलेम सहर, कैसरिया अउर रोम देस माहीं बन्दी पवलुस

## पबित्र आत्मा मिलँइ के वादा

1 हे थियुफिलुस, हम अपने पहिल किताब माहीं, ऊँ सगले कामन के बारे माहीं लिखेन हय, जिनहीं यीसु सुरुआत से करत अउर सिखाबत रहिगें।<sup>2</sup> उआ दिन तक, जब तक ऊँ अपने चुने खास चेलन काहीं पबित्र आत्मा के द्वारा हुकुम दइके, ऊपर स्वरग माहीं उठाय नहीं लीन गें।<sup>3</sup> अउर अपने मउत के बाद ऊँ बहुतन काहीं पक्के सबूत देखाइके, अपने-आप काहीं चेला लोगन के आँगे जिन्दा देखाइन, अउर चालिस दिन तक ऊँ उनहीं देखाई देत रहिगें, अउर परमात्मा के राज के बारे माहीं बताबत रहिगें।<sup>4</sup> अउर उनसे मिलिके उनहीं हुकुम दिहिन, कि “यरूसलेम सहर काहीं न छोँड्या, बलकिन पिता के उआ वादा के पूर होंय के इन्तजार करत रह्या, जउने के चरचा तूँ पंचे हमसे सुन चुके हया।<sup>5</sup> काहेकि यूहन्ना त तौहई पानी

से बपतिस्मा दिहिन हीं, पय अब कुछ दिनन के बाद, तूँ पंचे पबित्र आत्मा से बपतिस्मा पइहा।”

## यीसु के स्वरग जाब

<sup>6</sup> एसे जब चेला लोग एकट्ठा भें, तब यीसु से पूँछिन, कि “हे प्रभू, का अपना अबहिनय इहय समय इजराइल राज के स्थापना कइ देब?”<sup>7</sup> यीसु उनसे कहिन, “ऊँ समयन, इआ तिथिअन काहीं जानब तौहार काम न होय, जिनहीं परमपिता खुद अपने अधिकार माहीं रक्खिन हीं।<sup>8</sup> पय जब पबित्र आत्मा तौहरे ऊपर अई, तब तूँ पंचे सामर्थ पइहा; अउर यरूसलेम सहर अउर यहूदिया अउर सामरिया प्रदेसन माहीं, अउर धरती के छोर तक हमार गबाह होइहा।”<sup>9</sup> इआ कहे के बाद उनखे देखतय-देखत, यीसु ऊपर स्वरग माहीं उठाय लीन गें; अउर बदरी उनहीं चेलन के आँखी से ओझल कइ दिहिस।<sup>10</sup> अउर उनखे ऊपर जात समय चेला लोग अकास कइती देखत रहे

हैं, त देखा, दुइठे मनई उजर ओन्हा पहिरे उनखे लघे आइके ठाढ़ होइगें।  
 11 अउर कहँइ लागें, “हे गलील प्रदेश के रहँइ बाले मनइव, तूँ पंचे काहे ठाढ़े टकटकी लगाए स्वरग कइती देखते हया? ईन यीसु, जउन तौहरे लघे से स्वरग माहीं उठाय लीन गे हँय, जउनमेर से तूँ पंचे उनीं स्वरग काहीं जात देखे हया, उहयमेर से ऊँ पुनि अइहँय।”

### मत्तियाह काहीं यहूदा के पद मिलब

12 तब ऊँ पंचे जैतून नाम के पहार से, जउन यरूसलेम सहर से एक किलोमीटर दूर रहा हय, यरूसलेम सहर लउटि आएँ। 13 अउर उहाँ पहुँचिके ऊँ पंचे ऊपर के उआ अँटरिया माहीं गें, जहाँ ऊँ पंचे रहत रहे हँय। उनमा से ई आहीं, पतरस, यूहन्ना, याकूब, अन्द्रियास, फिलिप्पुस, थोमा, बरतुलमय, अउर मत्ती, हलफई के लड़िका याकूब, उत्साही समौन अउर याकूब के लड़िका यहूदा। 14 अउर इनखे साथ कुछ मेहेरिआ, अउर यीसु के महतारी मरियम, अउर यीसु के भाइव रहे हँय। ई सगले जन एक चित्त होइके प्राथना माहीं लगे रहत रहे हँय।

15 अउर उँइन दिनन माहीं पतरस बिसुआसी भाइन के बीच माहीं ठाढ़ होइके, जउन एक सव बीस जन के करीब रहे हँय, कहँइ लागें। 16 “हे भाई-बहिनिव, इआ जरूरी रहा हय, कि पबित्र सास्त्र माहीं लिखी उआ बात पूर होय, जउने काहीं पबित्र आत्मा राजा दाऊद के मुँहे से यहूदा के बारे माहीं, जउन यीसु के पकड़बामँइ बालेन के अँगुआ रहा हय, पहिलेन से कहिन रहा हय। 17 काहेकि उआ हमरे पंचन माहीं गिना ग, अउर इआ सेबकाई माहीं भागीदार भ।” 18 (उआ अधरम के कमाई से एकठे खेत मोल लिहिस; अउर मूँडे के बल गिरा, अउर ओखर पेट फाटिगा †, अउर ओखर सगली आँती निकर परीं। 19 अउर इआ बात काहीं यरूसलेम सहर माहीं रहँइ बाले सगले मनई जानिगें, इहाँ तक कि उआ खेत के नाम उनखे भाँसा माहीं “हकलदमा” मतलब “खून के खेत” परिगा।) 20 काहेकि भजन संहिता माहीं इआ लिखा हय, कि

“ओखर घर उजरि जाय, अउर ओमाहीं कोऊ न बसय, अउर ओखर पद कोऊ दूसर लइ लेय †।”

21 एसे जेतने दिन तक प्रभू यीसु हमरे बीच माहीं रहे हँय, अरथात यूहन्ना के बपतिस्मा से लइके, हमरे बीच म से उनखे उठाय लीन जाँय तक, जउन मनई हमेसा हमरे पंचन के साथ रहे हँय। 22 इआ उचित हय, कि उनमा से एक जने काहीं चुना जाय, जउन हमरे पंचन के साथ उनखे जिन्दा होंय के गबाह होइ जाय। 23 तब ऊँ पंचे दुइ जने काहीं ठाढ़ किहिन, एकठे यूसुफ काहीं, जउने काहीं बरसबा कहा जात रहा हय, (अउर इआ यूसुतुस नाम से घलाय जाना जात रहा हय।) अउर दूसर मत्तियाह काहीं। 24 अउर सगले जने इआ कहिके प्राथना किहिन; कि “हे प्रभू, अपना सगलेन के मन काहीं जानित हएन, इआ प्रगत करी, कि ई दोनव म से अपना केही चुने हएन। 25 कि उआ, इआ सेबकाई अउर यीसु मसीह के खास चेला होंइ के पद लेय, जउने जघा काहीं यहूदा छोंडिके चला ग हय।” 26 तब ऊँ पंचे उनखे बारे माहीं परची डारिन, अउर परची मत्तियाह के नाम माहीं निकरी, इआमेर से मत्तियाह, यीसु मसीह के गेरहँव खास चेलन के दल माहीं सामिल कइ लीन गें।

### पबित्र आत्मा के उतरब

2 जब पिन्तेकुस्त † तेउहार के दिन आबा, त ऊँ पंचे सगले जन एक जघा माहीं एकट्ठा रहे हँय। 2 अउर एकाएक अकास से बड़ी आँधी कि नाई सनसनाहट के बोल सुनान, अउर ओसे सगला घर जहाँ ऊँ पंचे बइठ रहे हँय, गूँजिगा। 3 अउर उनीं आगी कि नाई जीभँय फटत देखाई दिहिन; अउर उनमा से हरेक जन के ऊपर आइके ठहर गई। 4 अउर ऊँ पंचे सगले

जन पबित्र आत्मा से भरिगें, अउर आत्मा जउनमेर उनीं बोलँइ के सामर्थ दिहिन, ऊँ पंचे अनजान भाँसा माहीं बोलँइ लागें।

5 अउर अकास के नीचे के सगले देसन से आए यहूदी भक्त, यरूसलेम सहर माहीं रहत रहे हँय। 6 जब उआ बोल सुनान त उहाँ भीड़ लगीगे, अउर सगले मनई घबराइगें, काहेकि हरेक जन काहीं इहय सुनाई देत रहा हय, कि ई पंचे हमरेन भाँसा माहीं बोलि रहे हँय। 7 अउर ऊँ पंचे सगले जन चउआइके अउर अचरज मानिके कहँइ लागें; देखा, “ई पंचे जउन बोलि रहे हँय, का ई सगले जन गलील प्रदेश के रहँइ बाले न होंहीं? 8 त पुनि काहे हम पंचे हरेक जन अपने-अपने जनम भूमि के भाँसा सुनित हएन? 9 हम पंचे जउन पारथी, अउर मेदी, अउर एलामी लोग, अउर मेसोपोटामिया, अउर यहूदिया, अउर कप्पदूकिया, अउर पुन्तुस, अउर आसिया। 10 अउर फ्रुगिया, अउर पंपूलिया, अउर मिस्र, अउर लीबिया देस, जउन कुरेने सहर के लघे हय, ई सगले देसन के रहँइ बाले, अउर रोम देस से आए मनई, का यहूदी, का यहूदी धरम धारन करँइ बाले, क्रेती अउर अरबी घलाय हें।” 11 पय अपने-अपने भाँसा माहीं उनसे परमातिमा के बड़े-बड़े कामन के चरचा सुनित हएन। 12 अउर ऊँ सगले सुनँइ बाले चउआइगें, अउर घबराइके एक दुसरे से कहँइ लागें, कि “इआ का होइ रहा हय?” 13 पय कुछ जने यीसु मसीह के खास चेलन के हँसी उड़ाइके कहिन, “ई सगले जन कुछ जादा नबा अंगूर के रस पी लिहिन हीं।”

### पतरस के भाँसन

14 तब पतरस उन गेरहँव के साथ ठाढ़ भें, अउर खुब चंडे से कहँइ लागें, “हे यहूदी लोगव, अउर यरूसलेम सहर के सगले रहँइ बाले मनइव! एखर मतलब हमहीं बतामँइ द्या, हमरे बातन काहीं बड़े ध्यान से सुना। 15 ई पंचे नसा माहीं नहिं आहीं, जइसा कि तूँ पंचे समझते हया, काहेकि अबे त सकार के नव बजा हय, काहेकि एतनीदार कोऊ नसा नहीं करय। 16 बलकिन इआ उआ बात आय, जउने के बारे माहीं परमातिमा के सँदेस बतामँइ बाले योएल नबी कहिन रहा हय;

17 ‘परमातिमा कहिन हीं, कि अन्त के दिनन माहीं अइसा होई, कि हम आपन आत्मा सगले मनइन के ऊपर उड़ेलब, अउर तौहार लड़िका-बिटिया भबिस्सबानी करिहँय, अउर तौहार नवजमान दरसन देखिहँय, अउर तौहार बुद्धान मनई सपन देखिहँय।

18 बलकिन हम अपने सेबकन अउर सेबिकन के ऊपर घलाय आपन आत्मा उड़ेलब, अउर ऊँ पंचे भबिस्सबानी करिहँय।

19 अउर हम ऊपर अकास माहीं अचरज के काम, अउर नीचे धरती माहीं चमत्कार देखाउब, अरथात खून, आगी अउर धुँआ के बदरी।

20 प्रभू के महान अउर तेजोमय दिन के आमँइ से पहिले, सुरिज माहीं आँधिआर, अउर जाँधइआ खून कि नाई होइ जई।’

21 अउर जे कोऊ प्रभू के नाम लेई, उहय मुक्ती पाई।

22 हे इजराइल देस के रहँइ बाले मनइव, ई बातन काहीं सुना, कि यीसु नासरी एकठे मनई रहे हँय, जिनखर परमातिमा के तरफ से होंइ के सबूत, उन सामर्थ के कामन, अउर अचरज के कामन, अउर चमत्कारन से प्रगत हय, जउन परमातिमा तौहरे बीच माहीं, यीसु द्वारा कइके देखाइन हीं, जिनहीं तूँ पंचे खुदय जनते हया। 23 उनहिन काहीं, जब ऊँ परमातिमा के ठहराई योजना, अउर निश्चित पूर्व ग्यान के मुताबिक, तौहरे हबाले कइ दीनगें, त तूँ पंचे अधरमी मनइन के मदत से उनीं क्रूस माहीं चढ़बाइके मारि डारे हया। 24 पय उनहिन काहीं परमातिमा मउत के बन्धन से छोड़ाइके, पुनि जिआय दिहिन, काहेकि उनखे खातिर इआ सम्भव नहीं रहा, कि मउत उनीं अपने काबू माहीं रख सकय। 25 काहेकि राजा दाऊद उनखे बारे माहीं कहिन हीं, कि

‘हम प्रभू काहीं हमेसा † अपने आँगे देखत रहेन हँय, काहेकि ऊँ हमरे दहिनी कइती हें, जउने हम गिरे न पाई।’

† 1:18 मत्ती 27:5 †† 1:20 भज 69:25 † पिन्तेकुस्त नाम के तेउहार फसह नाम के तेउहार के बाद पचासमें दिन मनाबा जात रहा हय।

‡ 2:25 भज 16:8-11

26 ऐसे हमार हिरदय आनन्दित हय, अउर हमार जीभ मगन भे ही; बलकिन हमार देह आसा माहीं जिअत रही।

27 काहेकि अपना हमरे प्रान काहीं अधोलोक माहीं न छोड़ब; अउर न अपने पबित्र जन काहीं सड़इन देब।

28 अपना हमहीं जीवन के गइल बतायन हय; अपना हमहीं अपने दरसन के द्वारा आनन्द से भर देब।

29 हे हमार भाई-बहिनिव, हम ऊँ कुलपति राजा दाऊद के बारे माहीं, तौहसे हिम्मत के साथ कहि सकित हएन, कि ऊँ मरिगें अउर गाड़ दीनगें, अउर उनखर कब्र आज तक हमरे इहाँ मवजूद ही। 30 काहेकि ऊँ परमातिमा के सँदेस बतामँड बाले रहे हँय, अउर जानत रहे हँय, कि परमातिमा कसम खाइके उनहीं बचन दिहिन हीं, कि उनखे बंस म से एक जने काहीं उनखे राजगद्दी माहीं बइठाउब। 31 ऐसे आँगे होंड बाली बातन काहीं, ऊँ पहिलेन से देखिके, मसीह के जिन्दा होंड के बारे माहीं भबिस्सबानी किहिन, कि 'न त उनखर प्रान अधोलोक माहीं छोड़ा ग, अउर न उनखर देह सड़य पाई'। 32 ईन यीसु काहीं परमातिमा पुनि जिन्दा कइ दिहिन, जेखर हम पंचे सगले जने गबाह हएन। 33 इआमेर से परमातिमा के दहिने हाँथ से सगलेन से ऊँच पद पाइके, अउर पिता से उआ पबित्र आत्मा पाइके जेखर वादा कीन ग रहा हय, अउर ऊँ उहय पबित्र आत्मा उड़ल दिहिन, जेही अब तूँ पंचे देखते अउर सुनते हया। 34 काहेकि राजा दाऊद त स्वर्ग माहीं नहीं चढ़ें, पय ऊँ खुदय कहत हैं, कि

'प्रभू हमरे प्रभू' से कहिन; 'हमरे दहिने कइती बइठा,

35 जब तक कि हम तौहरे बइरिन काहीं तौहरे गोड़े के नीचे रक्खँड बाली चउकी कि नाई न कइ देई।'

36 ऐसे इजराइल के सगला घराना निश्चित जान लेय, कि परमातिमा उँडन यीसु काहीं, जिनहीं तूँ पंचे क्रूस माहीं चढ़ाया तय, प्रभू अउर मसीह दोनव ठहराइन हीं।"

37 तब सगले सुनय बाले ब्याकुल होइगें, अउर ऊँ पंचे पतरस अउर सगले खास चेलन से पूँछँड लागें, "हे भाइव, हम पंचे का करी?" 38 तब पतरस उनसे कहिन, "अपने-अपने मन काहीं बदला, अउर तौहरे पंचन म से हरेक जन, अपने-अपने पापन के माफी के खातिर, यीसु मसीह के नाम से बपतिस्मा ल्या; त तूँ पंचे पबित्र आत्मा के दान पइहा। 39 काहेकि इआ वादा तौहरे, अउर तौहरे सन्तानन, अउर ऊँ सगले दूरी-दूरी के लोगन के खातिर घलाय हय, जिनहीं हमार पंचन के प्रभू परमातिमा अपने लघे बोलइहँय।"

40 ऊँ अउर खुब बातन से घलाय गबाही दइ-दइके समझाइन, कि अपने आप काहीं ई कुटिल मनइन से बचाइके रक्खा। 41 ऐसे जेतने जने उनखे बचन काहीं अपनाइन, ऊँ पंचे सगले जन बपतिस्मा लिहिन; अउर उहय दिन तीन हजार मनइन के करीब, यीसु मसीह के खास चेलन के दल माहीं सामिल होइगें। 42 अउर ऊँ पंचे यीसु मसीह के खास चेलन से सिच्छा पामँड, अउर संगति रक्खँड माहीं, अउर रोटी टोरँड माहीं, अउर प्राथना करँड माहीं अपने-आप काहीं समरपित कइ दिहिन। 43 अउर सगले लोगन के ऊपर भय छाइगा, काहेकि यीसु मसीह के खास चेलन के द्वारा, खुब अचरज के काम अउर अदभुत चिन्ह प्रगट होत रहे हँय। 44 अउर ऊँ पंचे सगले बिसुआस करँड बाले एकट्ठा रहत रहे हँय, अउर उनखर सगली चीजँय साझे माहीं रहत रही हँय। 45 अउर ऊँ पंचे आपन-आपन धन-सम्पत, अउर समान बेंच-बेंचके जेखर जइसन जरूरत होत रही हय, बाँट देत रहे हँय। 46 अउर ऊँ पंचे हरेक दिन एक मन होइके मन्दिर माहीं एकट्ठा होत रहे हँय, अउर घर-घर रोटी टोरत, सच्चे मन से आनन्द के साथ खाना खात रहे हँय। 47 अउर परमातिमा के अराधना करत रहे हँय, अउर सगले जन उनसे खुसी रहे हँय, अउर जउन मनई मुक्ती पाबत रहे हँय, उनहीं प्रभू हरेक दिन उनखे दल माहीं मिलाय देत रहे हँय।

### लाँगड भिखारी के नीक होब

3 पतरस अउर यूहन्ना, दुपहर के बाद तीन बजे प्राथना के समय मन्दिर माहीं जात रहे हँय। 2 तबहिनय कुछ जने एकठे जनम से लाँगड मनई काहीं लए आबत रहे हँय, ओही रोज मन्दिर के उआ दुआरा माहीं जउन सुन्दर कहाबत रहा हय, बइठाय देत रहे हँय, कि उआ मन्दिर माहीं जाँड बालेन से भीख माँगय। 3 जब उआ लाँगड मनई पतरस अउर यूहन्ना काहीं, मन्दिर माहीं जात देखिस, त उनसे भीख माँगिस। 4 तब पतरस यूहन्ना के साथ ओखी कइती ध्यान से देखिके कहिन, "हमरे कइती देखा।" 5 ऐसे उआ उनसे कुछ पामँड के आसा से उनखे कइती देखँड लाग।

6 तब पतरस कहिन, "सोन-चाँदी त हमरे लघे नहीं आय; पय जउन हमरे लघे हय, उआ तौहई देइत हएन, यीसु मसीह नासरी के नाम से चलँड लाग।" 7 अउर पतरस ओखर दहिना हाँथ पकड़िके ओही उठाइन, अउर तुरन्तय ओखे गोड़े अउर जाँघन माही ताकत आइगा। 8 अउर उआ कूदिके ठाढ़ होइगा, अउर रेंगँड लाग; अउर रेंगत, कूदत परमातिमा के स्तुति करत उनखे साथ मन्दिर माहीं ग। 9 सगले मनई ओही रेंगत अउर परमातिमा के स्तुति करत देखिके, 10 ओही पहिचान लिहिन, कि इआ उहय आय, जउन मन्दिर के उआ दुआरा माहीं जउन "सुन्दर" कहाबत रहा हय, बइठिके भीख मागत रहा हय; अउर उआ घटना से जउन ओखे साथ भे रही हय; ऊँ पंचे खुब अचरज मानिके चउआन रहे हँय।

### मन्दिर माहीं पतरस के उपदेस

11 जब उआ पतरस अउर यूहन्ना काहीं पकड़े रहा हय, त सगले मनई खुब अचरज मानत, उआ ओसरिआ माहीं, जउन सुलैमान के कहाबत रही हय, उनखे लघे दउड़ि आएँ। 12 इआ देखिके पतरस ऊँ सगले मनइन से कहिन, "हे इजराइलिव, तूँ पंचे इआ मनई काहीं देखिके काहे अचरज मनते हया, अउर हमरे कइती काहे इआमेर से देखते हया, कि मानो हमहिन पंचे अपने सामर्थ इआ भक्ती से एही रेंगँड के लाइक बनाय दिहेन हँय। 13 अब्राहम, इसहाक अउर याकूब के परमातिमा, हमरे बाप-दादन के परमातिमा, अपने सेबक यीसु के महिमा किहिन हीं, जिनहीं तूँ पंचे पकड़बाय दिहा तय, अउर जब राजपाल पिलातुस उनहीं छोड़ँड के बिचार किहिन, तब तूँ पंचे उनखे आँगे उनखर तिरस्कार किहा। 14 तूँ पंचे ऊँ पबित्र अउर धरमी के तिरस्कार किहा तय, अउर बिनती किहा तय, कि 'एकठे कतली काहीं तौहरे खातिर छोड़ दीन जाय।' 15 अउर तूँ पंचे जीवन के रचइता काहीं मारि डारे रहे हया, जिनहीं परमातिमा मरेन म से पुनि जिन्दा कइ दिहिन; अउर इआ बात के हम पंचे गबाह हएन। 16 अउर उनहिन के नाम से, उआ बिसुआस से जउन उनखे नाम माहीं हय, इआ मनई काहीं जेही तूँ पंचे देखते हया, अउर जनतेव हया, सामर्थ मिली हय; अउर निश्चित उहय बिसुआस, जउन उनखे द्वारा हय, एही तौहरे सगलेन के आँगे बेलकुल नीक-सूख कइ दिहिस ही।

17 अउर अब हे भाई-बहिनिव, हम जानित हएन, कि इआ काम तूँ पंचे अग्यानता के कारन किहा तय, अउर उहयमेर तौहार मुखिव घलाय किहिन तय। 18 पय जउने बातन काहीं परमातिमा अपने सँदेस बतामँड बालेन के मुँहे से पहिलेन बताइन रहा हय, कि उनखर मसीह दुख उठइहँय; उनहीं ऊँ इआमेर से पूर किहिन। 19 ऐसे तूँ पंचे आपन मन फिराबा, अउर परमातिमा के तरफ लउटि आबा, जउने तौहार पंचन के पाप धोबरि जाँय, अउर तौहई सान्ती अउर आनन्द मिलय। 20 अउर परमातिमा ऊँ यीसु काहीं पठमँड, जउन तौहरे खातिर पहिलेन से मसीह ठहराए गे हँय। 21 जरूरी हय, कि मसीह स्वर्ग माहीं उआ समय तक रहँय, जब तक कि परमातिमा सगली बातन के सुधार न कइ लेंय, जेखर चरचा परमातिमा अपने सँदेस बतामँड बालेन के मुँहे से किहिन हीं, जउन संसार के सुरुआत से होत आए हँय। 22 जइसन परमातिमा के सँदेस बतामँड बाले मूसा कहिन रहा हय, 'प्रभू परमातिमा तौहरे पंचन के खातिर, तौहरे भाइन म से एकठे हमरे कि नाई आपन सँदेस बतामँड बाला तइआर करिहँय, ऊँ जउन कुछ तौहसे कहँय



उनखर सुन्या।<sup>23</sup> पय जउन मनई उआ परमातिमा के सँदेस बतामँड बाले के बातन काहीं न सुनिहँय, उनहीं मनइन म से नास कइ दीन जई।<sup>24</sup> अउर समूल से लइके उनखे बाद बालेन तक, जेतने परमातिमा के सँदेस बतामँड बाले बात किहिन हीं, ऊँ सगले जन ईन दिनन के सँदेस दिहिन हीं।<sup>25</sup> तूँ पंचे परमातिमा के सँदेस बतामँड बालेन के सन्तान, अउर उआ करार के भागीदार हया, जउने काहीं परमातिमा तौहरे बाप-दादन से किहिन हीं, जब ऊँ अब्राहम से कहिन, कि 'तौहरे बंस के द्वारा धरती के सगले घराना आसीस पड़हँय'।<sup>26</sup> परमातिमा जब अपने सेबक काहीं पुनि जिन्दा किहिन, त सबसे पहिले तौहरे लघे पठइन, कि तौहरे पंचन म से हरेक जन काहीं, बुरे रास्तन से हटाइके आसिरबाद देंय।"

### महासभा के आँगे पतरस अउर यूहन्ना

4 जब पतरस अउर यूहन्ना मनइन से बात करत रहे हँय, तबहिनय याजक अउर मन्दिर के सिपाहिन के मुखिया, अउर सदूकी लोग उनखे लघे आएँ।<sup>2</sup> काहेकि ऊँ पंचे खुब गुस्सान रहे हँय, एसे कि पतरस अउर यूहन्ना, सगले मनइन काहीं उपदेस देत रहे हँय, कि यीसु मसीह मर के जिन्दा होइगे हँय, उहइमेर जेतने मनई मरिगे हँय, ऊँ सगले यीसु मसीह के द्वारा पुनि मरेन म से जिन्दा होइ हँय, इआ कहिके प्रचार करत रहे हँय।<sup>3</sup> अउर ऊँ पंचे उनहीं पकड़िके दुसरे दिन तक जेल माहीं रक्खिन, काहेकि साँझ होइगे रही हय।<sup>4</sup> पय बचन के सुनँय बालेन म से खुब जने बिसुआस किहिन, अउर उनखर गिनती पाँच हजार के करीब होइगे रही हय।

<sup>5</sup> दुसरे दिन यहूदी लोगन के राजा, अउर धारमिक अँगुआ लोग, अउर मूसा के बिधान सिखामँड बाले यरूसलेम सहर माहीं एकट्ठा भें।<sup>6</sup> अउर महायाजक हन्ना, अउर कैफा, अउर यूहन्ना, अउर सिकन्दर, अउर जेतने महायाजक के घराना के रहे हँय, सगले यरूसलेम सहर माहीं एकट्ठा भें।<sup>7</sup> अउर पतरस अउर यूहन्ना काहीं बीच म ठाढ़ कइके पूछँइ लागें, कि तूँ पंचे इआ काम कउने सामर्थ से, अउर कउने नाम से किहा हय? <sup>8</sup> तब पतरस पबित्र आत्मा से भरिके उनसे कहँइ लागें, <sup>9</sup> हे यहूदी समाज के मुखिव, अउर धारमिक अँगुआव, इआ लॉगइ मनई के साथ जउन भलाई कीन गे ही, अगर आज हमसे पंचन से ओखे बारे माहीं पूँछ-ताँछ कीन जात ही, कि उआ कइसन निकहा होइगा। <sup>10</sup> त तूँ पंचे सगले जन अउर सगले इजराइली मनई जान लेंय, कि जिनहीं तूँ पंचे कूस माहीं चढ़ाया तय, अउर परमातिमा उनहीं मरेन म से जिन्दा कइ दिहिन, इआ लॉगइ मनई यीसु मसीह नासरी के नाम से, तौहरे आँगे नीक-सूख ठाढ़ हय। <sup>11</sup> ई यीसु उहय पथरा † आहीं जेही तूँ पंचे राजा के कारीगर लोग तुच्छ ठहराया तय, उहय कोनमा के खास पथरा बनिगा। <sup>12</sup> अउर "यीसु के अलाबा कउनव दुसरे के द्वारा मुक्ती नहीं मिल सकय; काहेकि स्वरग के नीचे मनइन माहीं, अउर कउनव दूसर नाम नहीं दीनगा, जेखे द्वारा हम पंचे मुक्ती पाय सकी।"

<sup>13</sup> जब ऊँ पंचे पतरस अउर यूहन्ना के साहस देखिन, अउर इआ जानिन, कि ई पंचे अनपढ़ अउर साधारन मनई आहीं, त अचरज मानिन; अउर पुनि उनहीं पहिचान लिहिन, कि "ई पंचे त यीसु के साथ रहे हँय।" <sup>14</sup> अउर उआ मनई काहीं जउन निकहा भ रहा हय, उनखे साथ ठाढ़ देखिके, ऊँ पंचे उनखे बिरोध माहीं कुछ नहीं कहि सकें। <sup>15</sup> पय उनहीं सभा के बहिरे जाँइ के हुकुम दइके, ऊँ पंचे आपस माहीं बिचार करँइ लागें, <sup>16</sup> कि "हम पंचे ई मनइन के साथ का करी? काहेकि यरूसलेम सहर के रहँइ बालेन के ऊपर प्रगट हय, कि इनखे द्वारा एकठे मसहूर चमत्कार देखाबा ग हय; अउर हम पंचे ओखर इनकार नहीं कइ सकी। <sup>17</sup> पय एसे कि इआ बात मनइन माहीं अउर जादा न फइल जाय, हम पंचे उनहीं डेरबाई धमकाई, कि ऊँ पंचे इआ नाम से पुनि कउनव मनई से बात न करँय।" <sup>18</sup> तब उनहीं बोलाइन अउर चेतउनी दइके इआ कहिन, कि "यीसु के नाम से कुछ न बोल्या अउर न सिखाया।" <sup>19</sup> पय पतरस अउर यूहन्ना उनहीं जबाब दिहिन, कि "तुहिन पंचे न्याय करा, कि का इआ परमातिमा के लघे भला हय, कि हम पंचे

परमातिमा के बात से बढ़िके, तौहार पंचन के बात मानी।<sup>20</sup> काहेकि इआ त हमसे होइन नहीं सकय, कि जउन हम पंचे देखेन अउर सुनेन हय, उआ न कही।" <sup>21</sup> तब ऊँ पंचे उनहीं अउर डेरबाय धमकायके छोड़ दिहिन, काहेकि खुब मनइन के कारन उनहीं सजा देइ के मोका नहीं मिला, एसे कि जउन घटना भे रही हय, ओखे कारन सगले मनई परमातिमा के बड़ाई करत रहे हँय। <sup>22</sup> काहेकि उआ मनई जउने काहीं अदभुत रीति से नीक कीन ग रहा हय, उआ चालिस साल से जादा उमिर के रहा हय।

### बिसुआसी लोगन के प्राथना

<sup>23</sup> ऊँ पंचे उहाँ से छूटि के अपने साथिन के लघे आएँ, अउर जउन कुछ प्रधान याजक लोग, अउर यहूदी समाज के धारमिक अँगुआ लोग, उनसे कहिन रहा हय, उनहीं सुनाइन। <sup>24</sup> इआ सुनिके ऊँ पंचे एक चित्त होइके, खुब चंडे परमातिमा से कहिन, "हे स्वामी, अपना उहय आहने जउन स्वरग अउर धरती अउर समुद्र अउर जउन कुछ उनमा हय बनायन हय।

<sup>25</sup> अपना पबित्र आत्मा के द्वारा, अपने सेबक हमरे पंचन के पूरबज राजा दाऊद के मुँहे से कहनेन तय, कि

'ई जातिअन † के मनई न जाने काहे आपन अहंकार देखाइन? अउर देस-देस के मनई काहे बेमतलब के बातेंय सोचिन?'

<sup>26</sup> प्रभू अउर उनखे मसीह के बिरोध माहीं धरती के राजा ठाढ़ भें, अउर हाकिम एक साथ एकट्ठा होइगें।

<sup>27</sup> काहेकि बेलकुल सही अपना के सेबक यीसु के बिरोध माहीं, जिनखर अपना अभिसेक किहने हँय, हेरोदेस राजा, अउर पुन्युस पिलातुस घलाय, गैरयहूदी अउर इजराइलिन के साथ इआ सहर माहीं एकट्ठा भें। <sup>28</sup> कि जउन कुछ पहिलेन से अपना के सामर्थ, अउर मरजी से ठहराबा ग रहा हय, उहय करँय। <sup>29</sup> अब, हे प्रभू, उनखे धमकिन काहीं देखी; अउर अपने सेबकन काहीं इआ बरदान देई, कि अपना के बचन बड़े साहस से सुनामँय। <sup>30</sup> अउर चंगा करँइ के खातिर अपना आपन हाँथ बढ़ाई; कि चिन्ह अउर अचरज के काम, अपना के पबित्र सेबक यीसु के नाम से कीन जाँय।"

<sup>31</sup> जब ऊँ पंचे प्राथना कइ चुके, त उआ जघा जहाँ ऊँ पंचे एकट्ठा रहे हँय, डोलिगे, अउर ऊँ पंचे सगले जन पबित्र आत्मा से भरिगें, अउर परमातिमा के बचन साहस के साथ सुनाबत रहिगें।

### बिसुआसी लोगन के समूहिक जीवन

<sup>32</sup> बिसुआस करँइ बालेन के मंडली एक चित्त, अउर एक मन के रही हय, इहाँ तक कि कउनव अपने धन-सम्पत काहीं, आपन नहीं कहत रहा आय, पय सगला साझे के रहा हय। <sup>33</sup> अउर खास चेला लोग बड़े सामर्थ से प्रभू यीसु के जिन्दा होइ के गबाही देत रहिगें, अउर उन सगलेन के ऊपर असीम किरपा रही हय। <sup>34</sup> अउर उनमा से कोऊ निरधन नहीं रहा, काहेकि जेखे लघे जमीन इआ कि घर रहे हँय, ऊँ पंचे उनहीं बेंच-बेंचके, बिकी चीजन के दाम लइ आबत रहे हँय, अउर ओही खास चेलन काहीं दइ देत रहे हँय। <sup>35</sup> अउर जइसन जेही जरूरत होत रही हय, खास चेला लोग ओहिन के मुताबिक, हरेक जन काहीं बाँटि देत रहे हँय।

<sup>36</sup> अउर साइप्रस टापू माहीं पड़दा भे, यूसुफ नाम के एक जने लेबी रहे हँय, जउने के नाम खास चेला लोग बरनबास अरथात (सान्ति के लड़िका) रक्खिन रहा हय। <sup>37</sup> उनखर कुछ जमीन रही हय, जउने काहीं ऊँ बेंचिन, अउर कीमत के सगला पइसा-रुपिआ लइआइके खास चेलन काहीं दइ दिहिन।

### हनन्याह अउर सफीरा

5 हनन्याह नाम के एकठे मनई, अउर ओखर मेहेरिआ सफीरा मिलिके आपन कुछ जमीन बेंचिन।<sup>2</sup> अउर जउन दाम मिला ओमा से कुछ अपने लघे रख लिहिन, इआ बात काहीं उनखर मेहेरिआव जानत रही हय,

† 4:11 भज 118:22

†† 4:25 भज 2:1-3

अउर कुछ हिस्सा लइआइके यीसु के खास चेलन काहीं दइ दिहिन।<sup>3</sup> इआ जानिके पतरस उनसे कहिन, “हे हनन्याह! सइतान काहीं अपने मन माहीं इआ बात काहे डार्य दिहा, कि तू पबित्र आत्मा से झूठ बोला, अउर जमीन बेंचे से जउन दाम मिला हय, ओमा से कुछ हिस्सा बचाइके अपने लघे रख लिहा हय? <sup>4</sup> ओही बेंचें से पहिले का उआ तौहार नहीं रही? अउर जब तू ओही बेंच दिहा, त का उआ दाम तौहरेन हाँथ माहीं नहीं रहा? तू इआ बात अपने मन माहीं काहे सोचे हया? तू मनइन से नहीं, पय परमातिमा से झूठ बोले हया।”<sup>5</sup> ई बातँ सुनतय हनन्याह गिर परा, अउर प्रान छोड़ दिहिस; इआ बात काहीं जेतने जने सुनिन सगले खुब डेराइगें।<sup>6</sup> पुनि जमान मनई उठिके अरथी बनाइन, अउर उनहीं बहिरे लइ जाइके गाड़ दिहिन।<sup>7</sup> करीब तीन घन्टा बाद उनखर मेहेरिआ, जउन कुछ भ रहा हय, नहीं जानत रही, उहव भीतर आई।<sup>8</sup> तब पतरस ओसे कहिन; “हमहीं बताबा का तू पंचे उआ खेत एतनेन माहीं बेंचे रहे हया?” उआ कहिस, “हाँ, एतनेन माहीं।”<sup>9</sup> तब पतरस ओसे कहिन, “इआ का बात ही, कि तू पंचे दोनव जने प्रभू के आत्मा के परिच्छा के खातिर साहुत किहा हय? देखा, तौहरे मंसेरुआ काहीं गाड़इ बाले दुअरय माहीं ठाढ़ हैं, अउर तौहरे काहीं बहिरे लइ जइहँय।”<sup>10</sup> तबहिनय उआ हरबिन उनखे गोड़े माहीं गिर परी, अउर प्रान छोड़ दिहिस, अउर कुछ जमान भीतर आइके ओही मरा पाइन, अउर बहिरे लइ जाइके ओखे मंसेरुआ के लघे गाड़ दिहिन।<sup>11</sup> अउर सगली मसीही मन्डली के मनइन के ऊपर, अउर ई बातन के सगले सुनँय बालेन के ऊपर भारी भय छाइगा।

#### चमत्कार अउर अचरज के काम

<sup>12</sup> यीसु के खास चेलन के हाँथे से खुब चमत्कार अउर अचरज के काम, मनइन के बीच माहीं देखाए जात रहे हँय, (अउर ऊँ पंचे सगले जन एक चित्त होइके सुलैमान के ओसरिआ माहीं एकट्ठा होत रहे हँय।<sup>13</sup> पय उनखे अलाबा अउर कोहू के हिम्मत नहीं परत रही, कि उनखे साथ मिल जाँय; तऊ खुब मनई उनखर बड़ाई करत रहे हँय।<sup>14</sup> अउर बिसुआस करँइ बाले खुब मेहेरिआ अउर मंसेरुआ प्रभू के मसीही मन्डली माहीं अउर जादा आइके मिलत रहिगें।)<sup>15</sup> इहाँ तक कि मनई बिमारन काहीं सड़कन माहीं लइआइ-लइआइके, खटिया अउर खटोलबन माहीं पराय देत रहे हँय, कि जब पतरस आमँय, त उनखर परछाँव भर उनमा से कोहू के ऊपर परि जाय।<sup>16</sup> अउर यरूसलेम सहर के आस-पास के सहरन से घलाय खुब मनई, बिमारन अउर बुरी आत्मन के सताव से परेसान मनइन काहीं, लइआइ-लइआइके एकट्ठा होत रहे हँय, अउर सगले नीक कइ दीन जात रहे हँय।

#### यीसु के खास चेलन काहीं जेल माहीं डारा जाब

<sup>17</sup> तब महायाजक अउर उनखर सगले साथी जउन सदूकी पंथ के रहे हँय, जलन से भरिगें।<sup>18</sup> अउर यीसु के खास चेलन काहीं पकड़िके जेल माहीं बन्द कइ दिहिन।<sup>19</sup> पय रात माहीं प्रभू के एकठे स्वरगदूत, जेल के दुअरा खोलिके उनहीं बहिरे लइआइके कहिन।<sup>20</sup> कि “जा, मन्दिर माहीं ठाढ़ होइके, इआ नबा जीवन के सगली बातन काहीं मनइन काहीं सुनाबा।”<sup>21</sup> ऊँ पंचे इआ सुनिके भिनसार होतय, मन्दिर माहीं जाइके उपदेस देंइ लागें, पय महायाजक अउर उनखर साथी आइके महासभा के सगले मनइन काहीं, अउर इजराइलिन के सगले धारमिक अँगुअन काहीं, एकट्ठा किहिन, अउर जेल माहीं कहबाय पठइन, कि उनहीं लइ आमँय।<sup>22</sup> पय सिपाही उहाँ पहुँचिके, उनहीं पंचन काहीं जेल माहीं नहीं पाइन, अउर लउटिके सँदेस दिहिन।<sup>23</sup> कि “हम पंचे जेल काहीं बड़े सावधानी से बन्द कीन, अउर पहरेदारन काहीं बहिरे दुअरा माहीं ठाढ़ पाएन; पय जब खोलेन त भीतर कोऊ नहीं मिला।”<sup>24</sup> जब मन्दिर के मुखिया अउर महायाजक इआ बात काहीं सुनिन, त उनखे बारे माहीं भारी चिन्ता माहीं परिगें, कि “उनहीं का भ?”<sup>25</sup> एतने माहीं कोऊ आइके उनहीं बताइस, कि “देखा, जिनहीं तू पंचे

जेल माहीं बन्द किहा तय, ऊँ पंचे मन्दिर माहीं ठाढ़े मनइन काहीं उपदेस दइ रहे हँय।”<sup>26</sup> तब मन्दिर के मुखिया अधिकारिन के साथ उहाँ जाइके, “उनहीं लइ आऊँ, पय जबरई नहीं, काहेकि ऊँ पंचे मनइन से डेरात रहे हँय, कि हमरे पंचन के ऊपर पथरहाव न करँय।”

<sup>27</sup> ऊँ पंचे उनहीं पुनि लइआइके महासभा के आँगे ठाढ़ कइ दिहिन, अउर महायाजक उनसे पूछिन।<sup>28</sup> “का हम पंचे तौहई चेतउनी दइके हुकुम नहीं दिहेन तय, कि तू पंचे इआ नाम से उपदेस न दिहा? तऊ देखा, तू पंचे सगले यरूसलेम सहर काहीं, अपने उपदेस से भर दिहा हय, अउर उआ मनई के हत्या के दोस हमरे पंचन के ऊपर लगाउँइ चहते हया।”<sup>29</sup> तब पतरस अउर दूसर खास चेला लोग जबाब दिहिन, कि “मनइन के हुकुम से बढ़िके परमातिमा के हुकुम के पालन करब, हमार पंचन के करतब्य आय।<sup>30</sup> हमरे पंचन के बाप-दादन के परमातिमा, यीसु काहीं जिआइन, जिनहीं तू पंचे कूस माहीं लटकाइके मारि डारे रहे हया।<sup>31</sup> उनहिन काहीं परमातिमा, प्रभू अउर मुक्ती देंइ बाला ठहराइके, अपने दहिने हाँथ से सगलेन से ऊँ कइ दिहिन हीं, कि ऊँ इजराइली लोगन काहीं मन फिराउँइ के सक्ती, अउर पापन के माफी देंइ।<sup>32</sup> अउर हम पंचे ई बातन के गबाह हएन, अउर पबित्र आत्मा घलाय गबाह हय, जउने पबित्र आत्मा काहीं परमातिमा उनहीं दिहिन हीं, जे उनखे हुकुम काहीं मानत हैं।”

<sup>33</sup> इआ सुनिके ऊँ पंचे आगबबूला होइगें, अउर उनहीं मार डारँइ चाहिन।<sup>34</sup> पय गमलीएल नाम के एकठे फरीसी, जउन पबित्र सास्त्र के सिच्छा देंइ बाले, अउर सगले मनइन माहीं सम्मानित रहे हँय, अदालत माहीं ठाढ़ होइके, यीसु मसीह के खास चेलन काहीं थोड़ी देर के खातिर बहिरे कइ देंइ के हुकुम दिहिन।<sup>35</sup> तब ऊँ कहिन, “हे इजराइलिव, जउन कुछ ई मनइन से करँय चहते हया, सोच समझिके किहा।<sup>36</sup> काहेकि ई दिनन से पहिले थियूदास इआ दाबा किहिस, कि हमहूँ कुछ आहने; अउर करीब चार सव मनई ओखे पीछे होइ लिहिन, पय उआ मारा ग; अउर जेतने मनई ओही मानत रहे हँय, सगले तितिर-बितिर होइगें, अउर मर मिटिगें।<sup>37</sup> ओखे बाद नाम लिखाई के दिनन माहीं, यहूदा गलीली उठा, अउर कुछ जनेन काहीं अपने पच्छ माहीं कइ लिहिस, उहव नास होइगा, अउर जेतने मनई ओही मानत रहे हँय, सगले तितिर-बितिर होइगें।<sup>38</sup> एसे अब हम तौहसे कहित हएन, कि ई मनइन से दूरी रहा, अउर उनसे कउनव मतलब न रक्खा; काहेकि अगर इआ धरम इआ, कि काम मनइन के तरफ से होई, तब त मिट जई।<sup>39</sup> पय अगर परमातिमा के तरफ से होई, त तू पंचे उनहीं कबहूँ मिटाए न पडहा; कहँव अइसा न होय, कि तू पंचे परमातिमा से घलाय लईबाले ठहरा।”

<sup>40</sup> तब ऊँ पंचे ओखर बात मान लिहिन; अउर यीसु के खास चेलन काहीं बोलबाइके पिटबाइन; अउर इआ हुकुम दइके छोड़ दिहिन, कि “यीसु के नाम से पुनि बातँय न किहा।”<sup>41</sup> ऊँ पंचे इआ बात से आनन्दित होइके महासभा के आँगे से चलेगें, कि हम पंचे उनखे नाम के खातिर निरादर होइ के काबिल त ठहरेन।<sup>42</sup> अउर रोज मन्दिर माहीं अउर घर-घर माहीं उपदेस करँइ से, अउर इआ बात के खुसी के खबर सुनाउँइ से, कि यीसुअय मसीह आहीं, नहीं रुकें।

#### सातठे सेबकन काहीं चुना जाब

**6** ऊँ दिनन माहीं जब चेलन के संख्या जादा बढ़य लाग, तब यूनानी भाँसा बोलँइ बाले, इब्रानी भाँसा बोलँइ बालेन के ऊपर कुड़कुड़ाय लागें, कि रोज के जरूरत के चीजन काहीं बाँटत माहीं, हमरे बिधबन के ऊपर ध्यान नहीं दीन जाय।<sup>2</sup> तब ऊँ बरहँव खास चेला लोग, चेलन के मंडली काहीं अपने लघे बोलाइके कहिन, “हमरे पंचन के खातिर इआ ठीक नहिं आय, कि हम पंचे परमातिमा के बचन के सेबा काहीं छोड़िके, खबामँइ पिआमँइ के सेबा माहीं रही।<sup>3</sup> एसे हे भाइव, अपने बीच म से सातठे नीक मनइन काहीं चुनि ल्या, जउन पबित्र आत्मा से भरपूर अउर बुद्धिमान होंय, कि जउने उनहीं हम पंचे इआ काम करँइ के जिम्मेबारी सउँपे देंई।<sup>4</sup> अउर

हम पंचे त प्राथना करई माहीं, अउर बचन सुनामँड के सेबा माहीं लगे रहब।”<sup>5</sup> अउर इआ बात चेलन के मंडली काहीं नीक लाग, अउर ऊँ पंचे स्तिफनुस नाम के एकठे मनई काहीं जउन बिसुआस के काबिल अउर पबित्र आत्मा से भरपूर रहे हँय, अउर फिलिप्पुस, अउर प्रुखरूस, अउर नीकानोर, अउर तीमोन, अउर परमिनास, अउर अन्ताकिया प्रदेस के रहँड बाले नीकुलाउस काहीं जउन यहूदी मत काहीं अपनाय लिहिन तय, चुनि लिहिन।<sup>6</sup> अउर इनहीं यीसु के खास चेलन के आँगे ठाढ़ किहिन, तब ऊँ पंचे प्राथना कइके उनखे ऊपर आपन हाँथ धरिन।

<sup>7</sup> अउर इआमेर से परमातिमा के बचन फइलत ग, अउर यरूसलेम सहर माहीं चेलन के संख्या खुब बढ़त गय; अउर याजकन के एकठे बड़ा समूह घलाय, यीसु मसीह के ऊपर बिसुआस करई लाग।

### स्तिफनुस काहीं गिरफतार करब

<sup>8</sup> स्तिफनुस किरपा अउर सामर्थ से भरपूर होइके, मनइन के बीच माहीं बड़े-बड़े अचरज के काम, अउर चमत्कार देखाबत रहे हँय।<sup>9</sup> तब उआ यहूदी सभाघर म से जउन लिबरतीनों के कहाबत रही हय, उहाँ कुरेनी सहर अउर सिकन्दरिया सहर, अउर किलिकिया प्रदेस, अउर आसिया प्रदेस से आए कइअक जने ठाढ़ होइके, स्तिफनुस से बाद-बिबाद करई लागें।<sup>10</sup> पय उआ ग्यान अउर पबित्र आत्मा के, जउने के सामर्थ से ऊँ बातँय करत रहे हँय, ऊँ पंचे उनखे आँगे ठहर नहीं पाएँ।<sup>11</sup> तब ऊँ पंचे कइअक जनेन काहीं उकसाइन, जउन कहँड लागें, “हम पंचे इनहीं परमातिमा के सँदेस बतामँड बाले मूसा, अउर परमातिमा के बिरोध माहीं बुराई के बातँय कहत सुने हएन।”<sup>12</sup> इआमेर से ऊँ पंचे खुब मनइन काहीं, अउर यहूदी समाज के धारमिक अँगुअन, अउर मूसा के बिधान सिखामँड बालेन काहीं भड़काइके बोलाय लाएँ, अउर स्तिफनुस काहीं पकड़िके महासभा माहीं लइगें।<sup>13</sup> अउर झूँठ गबाहन काहीं ठाढ़ किहिन, जउन कहँड लागें, कि “इआ मनई इआ पबित्र जघा, अउर मूसा के बिधान के बिरोध माहीं बोलब नहीं छोड़य।<sup>14</sup> काहेकि हम पंचे एही इआ कहत सुने हएन, कि नासरत गाँव माहीं रहँड बाले यीसु, इआ जघा काहीं नास कइ देइहँय, अउर उन रीति-रिबाजन काहीं बदल डरिहँय, जउन मूसा नबी हमहीं पंचन काहीं दिहिन हीं।”<sup>15</sup> तब सगले जने जउन महासभा माहीं बइठ रहे हँय, स्तिफनुस कइती बड़े ध्यान से देखिन, त “उनखर मुँह स्वरगदूत कि नाई देखान।”

### स्तिफनुस के भाँसन

<sup>7</sup> तब महायाजक कहिन, “का ई बातँय सही आहीं?”<sup>2</sup> स्तिफनुस कहिन, “हे भाइव अउर बुजुर्गव सुना, हमार पंचन के पूरबज अब्राहम हारान प्रदेस माहीं बसँड से पहिले, जब मेसोपोटामिया प्रदेस माहीं रहे हँय; तब तेजोमय परमातिमा उनहीं दरसन दिहिन।<sup>3</sup> अउर उनसे कहिन, कि तूँ अपने देस अउर अपने कुटुम्ब परिवार से निकरके, उआ देस माहीं चले जा, जउने काहीं हम तौहई देखाउब।<sup>4</sup> तब ऊँ कसदिअन के देस से निकरके, हारान प्रदेस माहीं जाइके बसिगें; अउर उनखे बाप के मउत के बाद, परमातिमा उनहीं उहाँ से इआ देस माहीं लइआइके बसाइन, जउने माहीं अब तूँ पंचे बसे हया।<sup>5</sup> परमातिमा बारिसदारी माहीं गोड़ धरऊँ भर के जघा उहाँ उनहीं नहीं दिहिन, पय वादा किहिन, कि हम इआ देस तौहई अउर तौहरे बाद तौहरे बंस काहीं देब; पय उआ समय माहीं उनखे एक्कव लड़िका-बच्चा नहीं रहे आँय।<sup>6</sup> अउर परमातिमा उनसे इआमेर कहिन; कि ‘तौहरे बंस के लोग, पराए देस माहीं परदेसी होइके रइहँय, अउर उहाँ के मनई उनहीं आपन दास बनइहँय, अउर चार सव बरिस तक उनहीं दुख देइहँय।’<sup>7</sup> पुनि परमातिमा कहिन, ‘जउने जाति के ऊँ पंचे दास होइहँय, उआ जाति के मनइन काहीं हम सजा देब; अउर एखे बाद ऊँ पंचे उहाँ से निकरके, इआ जघा माहीं आइके हमार सेबा करिहँय।’<sup>8</sup> अउर परमातिमा अब्राहम से खतना करामँड के करार किहिन; अउर उहय दसा माहीं उनसे

इसहाक पइदा भें; अउर अठएँ दिन उनखर खतना कीन ग; अउर इसहाक से याकूब, अउर याकूब से बारा कुलपति पइदा भें।

<sup>9</sup> अउर ऊँ कुलपति लोग यूसुफ से डाह करत रहे हँय, एसे ऊँ पंचे यूसुफ काहीं मिस्र देस जाँड बालेन काहीं बेंच दिहिन; पय परमातिमा यूसुफ के साथ रहे हँय।<sup>10</sup> अउर परमातिमा उनहीं सगली बिपत्तिन से बचाइके, मिस्र के राजा फिरौन के आँगे किरपा अउर अकिल दिहिन, अउर राजा फिरौन उनहीं मिस्र देस, अउर अपने सगले घर-बार के अधिकारी बनाय दिहिन।<sup>11</sup> तब सगले मिस्र, अउर कनान देस माहीं अकाल परा; जेसे भारी बिपत्ती आई, अउर हमरे पंचन के बाप-दादन काहीं अनाज नहीं मिलत रहा आय।<sup>12</sup> पय याकूब इआ सुनिके, कि मिस्र देस माहीं अनाज हय, हमरे बाप-दादन काहीं पहिल बेरी पठइन।<sup>13</sup> अउर दुसराय यूसुफ अपने भाइन काहीं आपन परिचय बताइन, तबहिन राजा फिरौन काहीं यूसुफ के परिवार के बारे माहीं जानकारी भय।<sup>14</sup> तब यूसुफ अपने बाप याकूब अउर अपने सगले कुटुम्ब परिवार काहीं, जउन पचहत्तर मनई रहे हँय, बोलबाइन।<sup>15</sup> तब याकूब मिस्र देस माहीं गे; अउर उहाँ ऊँ अउर हमार बाप-दादा मरिगें।<sup>16</sup> अउर उनखर लोथँय उहाँ से सेकेम प्रदेस माहीं पहुँचाई गई, अउर उहाँ उनहीं कब्र माहीं दफनाबा ग। जउने काहीं अब्राहम, हमोर के लड़िकन से कुछ दाम दइके खरीदिन रहा हय।

<sup>17</sup> पय जब उआ वादा के पूर होइ के समय लघे आबा, जउने काहीं परमातिमा अब्राहम से किहिन रहा हय, तब तक उनखर संख्या मिस्र देस माहीं बढ़िके खुब होइगे रही हय।<sup>18</sup> पय जब मिस्र देस माहीं दूसर राजा भ, जउन यूसुफ काहीं नहीं जानत रहा आय।<sup>19</sup> उआ राजा हमरे जाति बालेन से चलाँकी कइके, हमरे बाप-दादन के साथ एतना कठोर बेउहार किहिस, कि उनहीं अपने लड़िकन काहीं फेंक देइ परा, कि ऊँ पंचे जिन्दा न रहँय।<sup>20</sup> उहय समय मूसा पइदा भें, जउन परमातिमा के नजर माहीं खुब सुन्दर रहे हँय; अउर ऊँ तीन महीना तक अपने बाप के घर माहीं पाले गें।<sup>21</sup> पय जब फेंक दीनगें, तब राजा फिरौन के बिटिया उनहीं उठाय लिहिन, अउर आपन लड़िका मानिके पालिन-पोसिन।<sup>22</sup> अउर मूसा काहीं मिस्रिअन के सगली बिद्या पढ़ाई गे, अउर ऊँ बातन अउर कामन माहीं सामरथी रहे हँय।

<sup>23</sup> जब ऊँ चालिस बरिस के भें, तब उनखे मन माहीं इआ बिचार आबा, कि हम अपने इजराइली भाइन से मिली।<sup>24</sup> अउर ऊँ एकठे मनई के ऊपर अन्याय होत देखिके, ओही बचाइन, अउर मिस्री जाति के मनई काहीं मारिके, सताए मनई के बदला लिहिन।<sup>25</sup> ऊँ सोचिन, कि हमार भाई-बन्धु समझिहँय, कि परमातिमा हमरे द्वारा उनहीं गुलामी से मुक्त करिहँय, पय ऊँ पंचे नहीं समझिन।<sup>26</sup> दुसरे दिन जब ऊँ पंचे आपस माहीं लड़त रहे हँय, तब मूसा उहाँ आइगें; अउर इआ कहिके, उनहीं मेल करामँड के खातिर समझाइन, कि ‘हे भाइव, तूँ पंचे त भाई-भाई आह्या, एक दुसरे के ऊपर अन्याय काहे करते हया?’<sup>27</sup> पय जउन अपने परोसी के ऊपर अन्याय करत रहा हय, उआ उनहीं इआ कहिके हटाय दिहिस, कि ‘तौहई को हमरे ऊपर सासन करई बाला, अउर न्यायी ठहराइस ही?’<sup>28</sup> का ‘काल्ह जउनमेर से मिस्री मनई काहीं मारि डारे हया, हमहूँ काहीं मारि डारँड चहते हया?’<sup>29</sup> इआ बात काहीं सुनिके, मूसा उहाँ से भागिगें; अउर मिद्यान देस माहीं परदेसी होइके रहँड लागें, अउर उहाँ उनखे दुइठे लड़िका पइदा भें।

<sup>30</sup> जब उहाँ रहत उनहीं पूर चालिस बरिस बीतिगें, तब एकठे स्वरगदूत सीनै नाम के पहार के जंगल माहीं, जलत जरबइला के लपट माहीं उनहीं दरसन दिहिन।<sup>31</sup> मूसा उआ दरसन काहीं देखिके अचरज मानिन, अउर जब देखँड के खातिर लघे गें, तब प्रभू के इआ बोल सुनान।<sup>32</sup> कि ‘हम तौहरे बाप-दादन, अब्राहम, इसहाक अउर याकूब के परमातिमा आहेन’, तब मूसा काँपय लागें, इहाँ तक कि उनखर देखँड के हिम्मत नहीं परी।<sup>33</sup> तब प्रभू उनसे कहिन; ‘अपने गोड़े के पनहीं उतार ल्या, काहेकि जउने जघा माहीं तूँ ठाढ़ हया, उआ पबित्र भुँड आय।<sup>34</sup> हम सही-सही अपने लोगन के दुरदसा काहीं देखेन हय, जउन मिस्र देस माहीं हें; अउर उनखर कराहब अउर रोउब हम सुनेन हय; एहिन से हम उनहीं छोड़ामँड के खातिर उतरेन हय। अब आबा हम तौहई मिस्र देस माहीं पठउब।’

35 जउने मूसा काहीं, ऊँ पंचे इआ कहिके नकारिन रहा हय, कि तौहई को हमरे ऊपर सासन करई बाला अउर न्यायी ठहराइस ही, उनहिन काहीं परमातिमा सासन करई बाला, अउर छोड़ामँइ बाला ठहराइके, उआ स्वरगदूत के द्वारा, जउन उनीं जलत जरबइला माहीं दरसन दिहिन रहा हय, पठइन। 36 उँइन मूसा उनीं मिस्र देस के धरती, अउर लाल समुद्र अउर सुनसान जघा माहीं, चालिस साल तक अचरज के काम करत, अउर चमत्कार देखाबत, बहिरे निकार लाएँ। 37 ई उँइन मूसा आहीं, जउन इजराइलिन से कहिन रहा हय, कि 'परमातिमा तौहरे भाइन म से तौहरे पंचन के खातिर, एकठे हमरे कि नाई आपन सँदेस बतामँइ बाला तइआर करिहँय।' 38 ई उँइन आहीं, जउन सुनसान जघा माहीं मसीही मन्डली के बीच माहीं उआ स्वरगदूत के साथ सीने पहार माहीं बातँइ किहिन, अउर हमरे पंचन के बाप-दादन के साथ रहे हँय, उनहिन काहीं जीवन देई बाले परमातिमा के बचन मिलें, कि हमरे पंचन के लघे तक पहुँचामँइ। 39 पय हमार पंचन के बाप-दादा, उनखे बातन काहीं नहीं मानँइ चाहिन; बलकिन उनखे बात काहीं न मानिके, अपने मन काहीं मिस्र देस कइती लगाइन। 40 अउर हारून से कहिन, 'हमरे खातिर अइसन देउता बनाबा, जउन हमरे पंचन के आँगे-आँगे चलय; काहेकि ऊँ मूसा जउन हमहीं मिस्र देस से निकारिके लइ आएँ हँय', हम पंचे नहीं जानी, कि उनखे साथ का भ हय? 41 उँइन दिनन माहीं ऊँ पंचे एकठे बछबा के मूरत बनाइके, उहय मूरत के आँगे बली चढ़ाइन; अउर अपने हाँथे के कामन से मगन होइ लागें।

42 तब परमातिमा उनसे गुस्साइके उनीं छोड़ दिहिन, कि ऊँ पंचे अकास के ग्रह नछत्रन काहीं पूजँय; जइसन परमातिमा के सँदेस बतामँइ बालेन के किताब माहीं लिखा हय; कि

'हे इजराइल के घराना, का तूँ पंचे सुनसान जघा माहीं चालिस बरिस तक, पसुअन के बली अउर अन्नबली हमहिन काहीं चढ़ाबत रहे हय?'

43 अउर तूँ पंचे मोलेक † के तम्बू, अउर रिफान देउता के तरइया काहीं लए फिरत रहे हय; अरथात ऊँ मूरतिन काहीं जिनहीं तूँ पंचे दन्डबत करई के खातिर बनाए रहे हय, एसे हम तौहई बेबीलोन प्रदेस के बाहर लइ जाइके बसाउब।'

44 गबाह के तम्बू सुनसान जघा माहीं हमरे पंचन के बाप-दादन के बीच माहीं रहा हय, इआ तम्बू उहय नमूना के मुताबिक बनाबा ग रहा हय, जइसन अकार परमातिमा मूसा काहीं बताइन रहा हय, अउर मूसा से कहिन तय, 'जउन अकार तूँ देखे हय, ओहिन के मुताबिक एही बनाया।' 45 उहय तम्बू काहीं हमार पंचन के बाप-दादा उहय समय से पाइके, यहोसू के अँगुआई माहीं इहाँ लइ आएँ; जउने समय ऊँ पंचे ऊँ गैरयहूदी लोगन से इआ धरती काहीं लइ लिहिन रहा हय, जिनहीं परमातिमा हमरे पंचन के बाप-दादन के आँगे से, इहाँ से निकार दिहिन रहा हय; अउर उआ तम्बू राजा दाऊद के समय तक रहा हय। 46 राजा दाऊद के ऊपर परमातिमा किरपा किहिन, तब ऊँ बिनती किहिन, कि 'हम याकूब के परमातिमा के रहँइ के खातिर जघा बनाय सकी'। 47 पय उनखर लड़िका सुलैमान परमातिमा के खातिर घर बनबाइन। 48 पय परमप्रधान परमातिमा हाँथ के बनाए घरन माहीं नहीं रहँय, जइसन परमातिमा के सँदेस बतामँइ बाले कहिन हीं, 49 कि 'प्रभू कहत हैं, कि स्वरग हमार सिंहासन, अउर धरती हमरे गोड़े के नीचे के चउकी आय, हमरे खातिर तूँ पंचे कउनमेर के घर बनइहा? अउर हमरे अराम करई के कउन जघा होई?'

50 का ई सगली चीजँय हमरेन हाँथ के बनाई न होहीं?'

51 हे हठी, अउर हमरे बातन के ऊपर ध्यान न देई बाले बिना खतना के मनइव! तूँ पंचे हमेसा पबित्र आत्मा के बिरोध करते हय, जइसन तौहार पंचन के बाप-दादा करत रहे हँय, उहयमेर तुहँ पंचे घलाय करते हय। 52 जेतने परमातिमा के सँदेस बतामँइ बाले रहे हँय, सगलेन काहीं तौहार पंचन के बाप-दादा सताइन हीं, अउर ऊँ पंचे त उनहूँ काहीं घलाय मार डारिन रहा हय, जउन पहिलेन से ऊँ धरमी के आमँइ के बारे माहीं घोसना

किहिन रहा हय, जिनहीं अब तूँ पंचे धोखा दइके पकड़बाया, अउर मरबाय डारे हय। 53 तूँ पंचे स्वरगदूतन के द्वारा ठहराबा बिधान त पाया, पय उनखर पालन नहीं किहा।'

### स्तिफनुस के ऊपर पथरहाव

54 ई बातन काहीं सुनिके, ऊँ पंचे आगबबूला होइगें, अउर उनखे ऊपर दाँत पीसँय लागें। 55 पय स्तिफनुस पबित्र आत्मा से भरिके स्वरग कइती निहारिन, तब परमातिमा के महिमा काहीं देखिन, अउर यीसु काहीं घलाय परमातिमा के दहिने कइती ठाढ़ देखिके कहिन, 56 "देखा, हम देख रहेन हय, कि स्वरग खुला हय, अउर मनई के लड़िका परमातिमा के दहिने कइती ठाढ़ हें।" 57 तब ऊँ पंचे खुब चिल्लाइके कान बन्द कइ लिहिन, अउर एक चित होइके उनखे ऊपर झपट परें। 58 ऊँ पंचे स्तिफनुस काहीं खसेलत सहर से बहिरे लइ जाइके, उनखे ऊपर पथरा मारँइ लागें, अउर देखँइ बाले गबाह आपन ओन्हा, साऊल नाम के एकठे नवजमान के लघे उतारिके धइ दिहिन तय। 59 अउर ऊँ पंचे स्तिफनुस के ऊपर पथरा मरतय रहिगें, अउर ऊँ इआ कहिके प्राथना करत रहिगें, कि "हे प्रभू यीसु, हमरे आत्मा काहीं सोइकार करी।" 60 फेर घुटुआ के बल गिरिके खुब चन्डे से कहिन, "हे प्रभू, इआ पाप इनखे ऊपर न लगाई", अउर एतना कहिके प्रान छोड़ दिहिन, अउर साऊल उनखे कतल होइ माहीं सहमत रहे हँय।

### मसीही मन्डली के ऊपर अत्याचार

8 उहय दिना यरूसलेम के मसीही मन्डली के ऊपर बड़ा अत्याचार सुरू होइगा, अउर यीसु के खास चेलन के अलाबा, सगले जन यहूदिया प्रदेस अउर सामरिया प्रदेस माहीं तितिर-बितिर होइगें। 2 (भक्त जन मिलिके स्तिफनुस काहीं कन्न माहीं धरिन, अउर उनखे खातिर बड़ा बिलाप किहिन।) 3 साऊल मसीही मन्डली काहीं नास करई माहीं लगा रहा हय; अउर घरन-घरन माहीं घुसिके मंसेरुअन अउर मेहेरिअन काहीं, खसेल-खसेलके जेल माहीं डारत रहा हय। 4 जउन तितिर-बितिर होइगे रहे हँय, ऊँ पंचे जहाँ-जहाँ जात रहे हँय, उहाँ-उहाँ खुसी के खबर सुनाबत रहे हँय।

### सामरिया प्रदेस माहीं फिलिप्पुस के प्रचार

5 अउर फिलिप्पुस सामरिया सहर माहीं जाइके उहाँ के मनइन के बीच माहीं मसीह के प्रचार करई लागें। 6 अउर जउने बातन काहीं फिलिप्पुस कहिन, उनीं उहाँ के मनई सुनिके अउर जउन चमत्कार ऊँ देखाबत रहे हँय, उनीं देखिके, ऊँ पंचे एक चित होइके बड़े ध्यान से सुनिन। 7 काहेकि खुब मनइन म से, जिन माहीं बुरी आत्मा सकान रही हँय, खुब चन्डे से चिल्लात उनमा से निकर गई, अउर लोकबा के मारे खुब मनई अउर खुब लाँगइ मनई घलाय नीक होइगें तय। 8 अउर उआ सहर माहीं बड़ा आनन्द छाबा रहा हय।

### जादूगर समौन

9 एखे पहिले उआ सहर माहीं समौन नाम के एकठे मनई रहा हय, जउन जादू-टोना कइके सामरिया सहर के मनइन काहीं अचरज माहीं डार देत रहा हय, अउर अपने-आप काहीं बड़ा महान मनई बताबत रहा हय। 10 अउर सगले मनई छोट से लइके बड़े तक, ओखे बातन के ऊपर ध्यान देत रहे हँय, अउर कहत रहे हँय, कि "ई मनई परमातिमा के उआ सकी आहीं जउन महान कहाबत ही।" 11 उआ खुब दिनन से उनीं अपने जादू-टोना के कामन से अचम्भित कइ राखिस तय, एहिन से ऊँ पंचे ओही खुब मानत रहे हँय। 12 पय जब फिलिप्पुस, परमातिमा के राज अउर मसीह यीसु के नाम के खुसी के खबर उनीं सुनाइन, तब ऊँ पंचे उन बातन के ऊपर बिसुआस किहिन, अउर का मंसेरुआ का मेहेरिआ सगले जन बपतिस्मा लेंइ लागें।

13 तब समौन खुदय उनखे ऊपर बिसुआस किहिस, अउर बपतिस्मा लइके

† 7:43 आमो 5:25-27

फिलिप्पुस के साथ रहँइ लाग, अउर उनखे द्वारा चमत्कार अउर बड़े-बड़े सामर्थ के काम होत देखिके, चउआय जात रहा हय।

### पतरस अउर यूहन्ना के जादूगर समौन से बातचीत

14 जब यीसु के खास चेला लोग जउन यरूसलेम सहर माहीं रहे हँय, सुनिन, कि सामरिया प्रदेश के कुछ मनई परमातिमा के बचन काहीं सोइकार कइ लिहिन हीं, त ऊँ पंचे पतरस अउर यूहन्ना काहीं उनखे लघे पठइन। 15 अउर ऊँ पंचे उहाँ जाइके उनखे खातिर प्राथना किहिन, कि उनहीं पंचन काहीं पबित्र आत्मा मिलय। 16 काहेकि पबित्र आत्मा अबे तक उनमा से कोहू के ऊपर नहीं उतरा रहा आय, ऊँ पंचे त केबल प्रभू यीसु के नाम माहीं बपतिस्मा लिहिन रहा हय। 17 तब पतरस अउर यूहन्ना उन सगलेन के ऊपर हाँथ धरिन, अउर ऊँ पंचे पबित्र आत्मा पाइन। 18 जब समौन देखिस, कि यीसु के खास चेलन के हाँथ धरे से पबित्र आत्मा दीन जात हय, तब उनखे लघे पइसा लइआइके कहिस, 19 कि “इआ अधिकार हमहूँ काहीं देई, कि हम जेखे ऊपर हाँथ धरी, त उआ पबित्र आत्मा पाबय।” 20 तब पतरस ओसे कहिन; “तोर पइसा तोरे साथय नास होय, काहेकि तँय परमातिमा के दान काहीं, पइसा से मोल लेंइ के बिचार किहे हई। 21 इआ बात माहीं न तोर कउनव हिस्सा आय, अउर न कउनव साझेदारी आय; काहेकि तोर मन परमातिमा के आँगे ठीक नहिं आय। 22 एसे तँय अपने इआ बुराई से मन फिराइके प्रभू से प्राथना कर, होइ सकत हय तोरे मन माहीं जउन बिचार हय, उआ बिचार के खातिर परमातिमा तोही माफ कइ देंय। 23 काहेकि हम देख रहेन हय, कि तँय पित्त कि नाई करुआहट से भरे हए, अउर अधरम के बन्धन माहीं परे हए।” 24 तब जादूगर समौन उनहीं जबाब दिहिस, कि “अपना पंचे हमरे खातिर प्रभू से प्राथना करी, कि जउन बात अपना पंचे कहे हएन, उनमा से कउनव हमरे ऊपर न आय परय।”

25 ओखे बाद खास चेला लोग आपन गबाही दइके, अउर प्रभू के बचन सुनाइके, यरूसलेम सहर काहीं लउटिगें, अउर सामरिया प्रदेश के खुब गामन माहीं खुसी के खबर सुनाबत गें।

### फिलिप्पुस अउर कूस देस के अधिकारी

26 प्रभू के एकठे स्वरगदूत फिलिप्पुस से कहिन; इहाँ से उठिके दक्खिन कइती उआ गइल माहीं जा, जउन यरूसलेम सहर से गाजा सहर काहीं जात हीं, अउर उआ गइल सुनसान जघा म से जात हीं। 27 फिलिप्पुस उहाँ से उठिके चल दिहिन, अउर देखिन, कि कूस देस के एकठे मनई आय रहे हँय, जउन खोजा अउर कूस देस के रानी कन्दाके के मन्त्री अउर खजान्ची रहे हँय, अउर ऊँ भजन करँइ के खातिर यरूसलेम सहर आए रहे हँय। 28 अउर ऊँ अपने रथ माहीं बइठ रहे हँय, अउर परमातिमा के सँदेस बतामँइ बाले यसायाह के किताब पढ़त लउटे जात रहे हँय। 29 तब पबित्र आत्मा फिलिप्पुस से कहिन, लघे जाइके इआ रथ के साथ होइ ल्या। 30 तब फिलिप्पुस उहाँ कइती दउड़िके उनहीं परमातिमा के सँदेस बतामँइ बाले यसायाह के किताब पढ़त सुनिन, तब उनसे पूँछिन, कि “तूँ जउन पढ़ रहे हया, का ओही समझतेव हया?” 31 तब ऊँ फिलिप्पुस से कहिन, “जब तक कोऊ न समझाबय, तब तक हम कइसा समझे पाउब?” अउर ऊँ फिलिप्पुस से बिनती किहिन, कि “अपना रथ माहीं चढ़िके हमरे लघे बइठ जई।”

32 पबित्र सास्त्राँके जउन पाठ ऊँ पढ़त रहे हँय, ओमा इआ लिखा रहा हय; कि

“ऊँ गाड़ कि नाई बध होइ के खातिर पहुँचाए गें, अउर जइसन मेम्ना अपने बार काटँय बाले के आँगे चुपचाप रहत हय, उहयमेर ऊँ घलाय आपन मुँह नहीं खोलिन।

33 उनखे दीनता के दसा माहीं उनखर न्याय नहीं होइ पाबा, अउर उनखे समय के मनइन के बखान को करी? काहेकि धरती से उनखर प्रान उठाबा जात हय।”

34 इआ सुनिके खोजा फिलिप्पुस से पूँछिन; “हम अपना से बिनती करित हएन, अपना इआ बताई कि परमातिमा के सँदेस बतामँइ बाले, इआ बात केखे बारे माहीं कहत हँ, अपने बारे माहीं, इआ कि कउनव दुसरे के बारे माहीं।” 35 तब फिलिप्पुस बताउब सुरू किहिन, अउर इहय सास्त्र से सुरू कइके, उनहीं यीसु के खुसी के खबर सुनाइन। 36 गइल माहीं चलत-चलत ऊँ पंचे जहाँ पानी रहा हय, उआ जघा माहीं पहुँचिगें, तब खोजा उनसे कहिन, “देखी, इहाँ पानी हय, अब हमहीं बपतिस्मा लेंइ माहीं कउनव अरचन नहिं आय।” 37 तब फिलिप्पुस उनसे कहिन, “अगर तूँ अपने पूरे मन से बिसुआस करते हया, त बपतिस्मा लइ सकते हया।” तब ऊँ जबाब दिहिन, “हम बिसुआस करित हएन, कि यीसु मसीह परमातिमा के लड़िका आहीं।” 38 तब ऊँ रथ काहीं ठाढ़ करँइ के हुकुम दिहिन, अउर फिलिप्पुस अउर खोजा दोनव जने पानी माहीं हिलिगें, अउर फिलिप्पुस उनहीं बपतिस्मा दिहिन। 39 जब ऊँ पंचे पानी से निकरिके बहिरे आएँ, तब प्रभू के आत्मा फिलिप्पुस काहीं उठाइके लइगा, एसे खोजा पुनि उनहीं देखँइ काहीं नहीं पाइन, अउर खोजा आनन्द मनाबत अपने गइल माहीं चलेगें। 40 अउर फिलिप्पुस अपने-आप काहीं असदोद सहर माहीं पाइन, अउर जब तक कैसरिया सहर माहीं नहीं पहुँचे, तब तक ऊँ सहरन-सहरन खुसी के खबर सुनाबत गें।

### साऊल के हिरदँय माहीं बदलाव

9 साऊल जउन अबे तक प्रभू के चेलन काहीं धमकी देंइ, अउर कतल करँइ के धुन माहीं रहे हँय, महायाजक के लघे गें। 2 अउर उनसे दमिस्क सहर के सभाघरन के नाम से इआ उद्देस्य से चिट्ठी माँगिन, कि चाह मंसेरुआ होय, चाह मेहेरिआ, जिनहीं ऊँ यीसु मसीह के ऊपर बिसुआस करत पामँय, उन सगलेन काहीं बाँधिके यरूसलेम सहर माहीं लइ आमँय। 3 पय जब ऊँ चलत-चलत दमिस्क सहर के लघे पहुँचे, तब अचानक अकास से उनखे चारिव कइती जोति चमकी। 4 अउर ऊँ भुँइ माहीं गिर परें, अउर इआ बोल सुनिन, कि “हे साऊल, हे साऊल, तूँ हमहीं काहे सतउते हया?” 5 ऊँ पूँछिन; “हे प्रभू, अपना को आहेन?” तब ऊँ कहिन; “हम यीसु आहेन; जेही तूँ सतउते हया। 6 पय अब उठिके सहर माहीं जा, अउर जउन कुछू करँइ काहीं हय, उआ तौहसे बताबा जई।” 7 जउन मनई उनखे साथ माहीं रहे हँय, ऊँ चुप्पय रहिगें; काहेकि ऊँ पंचे बोल त सुनत रहे हँय, पय कोऊ उनहीं देखात नहीं रहा आय। 8 तब साऊल भुँइ से उठें, पय जब आँखी खोलिन त उनहीं कुछू देखात नहीं रहा आय, अउर उनखर साथी उनखर हाँथ पकड़िके दमिस्क सहर माहीं लइगें। 9 अउर ऊँ तीन दिना तक नहीं देख सकें, अउर न कुछू खाबय पिअब भें।

10 दमिस्क सहर माहीं हनन्याह नाम के एकठे चेला रहे हँय, उनसे प्रभू दरसन माहीं कहिन, “हे हनन्याह!” ऊँ कहिन; “हाँ प्रभू!” 11 तब प्रभू उनसे कहिन, “उठिके उआ गली माहीं जा, जउन सीध गली कहाबत हीं, अउर यहूदा के घर माहीं तरसुस सहर के रहँइ बाले साऊल नाम के एकठे मनई काहीं पूँछ लिहा; काहेकि देखा, ऊँ प्राथना कइ रहे हँय।” 12 अउर ऊँ दरसन माहीं देखिन हीं, कि हनन्याह नाम के एकठे मनई घर माहीं आइके उनखे ऊपर हाँथ धरिन, जउने ऊँ पुनि देख सकँय। 13 तब हनन्याह उनहीं जबाब दिहिन, कि “हे प्रभू, हम इआ मनई के बारे माहीं खुब जनेन से सुने हएन, कि ई यरूसलेम सहर माहीं अपना के पबित्र मनइन के साथ बड़ी-बड़ी बुराई किहिन हीं। 14 अउर इहाँ घलाय इनहीं प्रधान याजकन के तरफ से अधिकार मिला हय, कि जे-जे अपना के नाम लेत हँ, उन सगलेन काहीं बन्दी बनाय लेंय।” 15 पय प्रभू उनसे कहिन, कि “तूँ चले जा; काहेकि हम साऊल काहीं चुनि लिहेन हँय, कि ऊँ गैरयहूदी लोगन के आँगे अउर राजन के आँगे, अउर इजराइलिन के आँगे हमरे नाम के प्रचार करँय। 16 अउर हम उनहीं

बताउब, कि हमरे नाम के खातिर उन्हीं कइसा-कइसा दुख उठामँइ परी।”  
17 तब हनन्याह उठिके उआ घर माहीं गें, अउर उनखे ऊपर आपन हाँथ धड़के कहिन, “हे भाई साऊल, प्रभू यीसु जउन उआ गइल माहीं जउने से तू आए हया, तौहई देखाई दिहिन रहा हय, उँइन हमहीं पठइन हीं, कि तू पुनि देखँइ लागा, अउर पबित्र आत्मा से भर जा।” 18 अउर हरबिन उनखे आँखी से छिलका कि नाई कुछ गिरा, अउर उँ देखँइ लागें, अउर उठिके बपतिस्मा लिहिन; ओखे बाद खाना खाइन तब उनखे दँह माहीं बल आबा।

### दमिस्क सहर माहीं साऊल के द्वारा प्रचार

19 उँ कइअक दिना तक उन चेलन के साथय रहिगें, जउन दमिस्क सहर माहीं रहे हँय। 20 अउर उँ हरबिन यहूदी सभाघरन माहीं जाइके प्रचार करँइ लागें, कि “यीसु परमातिमा के लड़िका आहीं।” 21 अउर सगले सुनँय बाले चउआइके कहँइ लागें; का ई उहय मनई न होंहीं, जउन यरूसलेम सहर माहीं यीसु के नाम लेत रहे हँय, उन्हीं नास करत रहे हँय, अउर इहाँ घलाय एहिन से आएँ तय, कि उन्हीं जउन यीसु के नाम लेत हें बाँधिके महायाजकन के आँगे लइ जाँय? 22 पय साऊल अउर सामरथी होत गें, अउर इआ बात के सबूत दइ-दइके कि यीसुअय मसीह आहीं, दमिस्क सहर के यहूदी लोगन के मुँह बन्द कइ देत रहे हँय।

23 खुब दिन बीत जाँइ के बाद, यहूदी लोग उन्हीं मारि डारँय के योजना बनाइन। 24 पय उनखर योजना साऊल काहीं मालुम होइगे, कि “उँ हमहीं मारि डारँइ के खातिर रात-दिना फाटकन के लघे पहरा देत रहत हें।” 25 पय रात माहीं उनखर चेला लोग उन्हीं टोपरा माहीं बइठाइके, सहर के चारिव कइती जउन भीती रही हय, ओसे झुलाइके नीचे उतार दिहिन।

### यरूसलेम सहर माहीं साऊल के पहुँचब

26 अउर उँ यरूसलेम सहर माहीं पहुँचिके चेलन के साथ मिल जाँइ के कोसिस किहिन, पय सगले जने उनसे डेरात रहे हँय, काहेकि उन्हीं इआ बिसुआस नहीं होत रहा आय, कि इऊँ चेला आहीं। 27 पय बरनबास उन्हीं अपने साथ यीसु के खास चेलन के लघे लइ जाइके, उनसे बताइन, कि “ई कउनमेर से गइल माहीं प्रभू काहीं देखिन, अउर प्रभू इनसे बात किहिन; अउर फेर ई दमिस्क सहर माहीं, कउनमेर से बड़े साहस के साथ यीसु के नाम के प्रचार किहिन।” 28 तब से साऊल उनखे साथ यरूसलेम सहर माहीं आमँइ-जाँइ लागें। 29 अउर निधड़क होइके प्रभू के नाम के प्रचार करत रहे हँय; अउर यूनानी भाँसा बोलँइ बाले यहूदी लोगन के साथ, बातचीत अउर बाद-बिबाद करत रहे हँय; पय उँ पंचे उन्हीं मार डारँइ के कोसिस करँइ लागें। 30 इआ जानिके बिसुआसी भाई उन्हीं कैसरिया सहर माहीं लइ आएँ, अउर उहाँ से उन्हीं तरसुस सहर माहीं पठय दिहिन।

31 इआमेर से सगले यहूदिया प्रदेस, अउर गलील प्रदेस, अउर सामरिया प्रदेस माहीं, मसीही मन्डलिन के सगले मनइन काहीं सान्ति मिली, अउर उनखर उन्नति होत चली गय; अउर मसीही मन्डली प्रभू के भय, अउर पबित्र आत्मा के सान्ति माहीं, चलत अउर बढ़त जात रही हँय।

### लुद्दा सहर अउर याफा सहर माहीं पतरस

32 अउर अइसन भ, कि पतरस हरेक जघन माहीं घूमत, उन पबित्र मनइन के लघे घलाय पहुँचे, जउन लुद्दा सहर माहीं रहत रहे हँय। 33 उहाँ उन्हीं एनियास नाम के लोकबा के मारा एकठे मनई मिला, जउन आठ बरिस से खटिया माहीं परा रहा हय। 34 तब पतरस उनसे कहिन, “हे एनियास! यीसु मसीह तौहई नीक करत हें; उठा, आपन बिछउना उठाबा।”; तब उआ तुरन्तय उठिके ठाढ़ होइगा। 35 अउर लुद्दा सहर अउर सारोन प्रदेस के सगले रहँइ बाले उनखे इआ काम काहीं देखिके, प्रभू के ऊपर बिसुआस किहिन।

36 अउर याफा सहर माहीं एकठे तबीता नाम के बिसुआसिन रहत रही हय, जउन दोरकास नाम से घलाय जानी जात रही हय, उआ खुब निकहे-निकहे काम करत रही हय, अउर गरीबन काहीं दान देत रही हय। 37 उँइन

दिनन माहीं उआ बिमार होइके मरिगे; अउर उँ पंचे ओही नहबाइके अँटरिया माहीं धरबाय दिहिन। 38 अउर एसे कि लुद्दा सहर, याफा सहर के लघेन रहा हय, चेला लोग इआ सुनिके, कि पतरस उहाँ हें, त दुइठे मनइन काहीं पठइन, कि उनसे बिनती करँय, कि उँ हमरे पंचन के लघे खुब जल्दी आय जाँय। 39 तब पतरस ठाढ़ होइके उनखे साथ चल दिहिन, अउर जब उँ उहाँ पहुँचे, तब उँ पंचे उन्हीं अँटरिया माहीं लइगें; सगली बिधबा मेहेरिआ रोबत उनखे लघे आइके ठाढ़ होइ गई, अउर जउन कुरथा अउर ओन्हा, दोरकास उनखे साथ माहीं रहत समय बनाइन तय, उन्हीं देखाँइ लागीं। 40 तब पतरस सगलेन काहीं अँटरिया से बहिरे निकार दिहिन, अउर घुटुआ के बल बइठिके प्राथना किहिन; अउर लहास कइती निहारिके कहिन; “हे तबीता उठ”: तब उँ आपन आँखी खोल दिहिन; अउर पतरस काहीं देखिके उठ बइठी। 41 तब पतरस आपन हाँथ पकड़ाइके उन्हीं उठाइन, अउर पबित्र लोगन अउर बिधबन काहीं बोलाइके जिअत देखाय दिहिन। 42 इआ बात सगले याफा सहर माहीं फइलिके, अउर उहाँ के खुब मनई प्रभू के ऊपर बिसुआस किहिन। 43 अउर पतरस याफा सहर माहीं, समौन नाम के कउनव चमड़ा के धन्धा करँइ बाले के इहाँ, खुब दिनन तक रहिगें।

### पतरस काहीं कुरनेलियुस के बोलबाउब

10 कैसरिया सहर माहीं कुरनेलियुस नाम के एकठे मनई रहे हँय, जउन इतालियानी नाम के पलटन के सुबेदार रहे हँय। 2 उँ भक्त रहे हँय, अउर अपने सगले घराना समेत परमातिमा के भय मानत रहे हँय, अउर यहूदी लोगन काहीं खुब दान देत रहे हँय, अउर हमेसा परमातिमा से प्राथना करत रहे हँय। 3 उँ दिन के तीन बजे के करीब दरसन माहीं साफ-साफ देखिन, कि परमातिमा के एकठे स्वरगदूत हमरे लघे भीतर आइके कहत हें; कि “हे कुरनेलियुस।” 4 उँ उन्हीं ध्यान से देखिन; अउर डेराइके कहिन; “हे प्रभू का हुकुम हय?” स्वरगदूत उनसे कहिन, “तौहार प्राथना अउर दान यादगारी के खातिर परमातिमा के लघे पहुँचिके हँय। 5 अउर अब याफा सहर माहीं कुछ मनइन काहीं पठइके, समौन जउन पतरस काहबत हें उन्हीं बोलबाय ल्या। 6 उँ चमड़ा के धन्धा करँइ बाले समौन के इहाँ मेहमान हें, जिनखर घर समुद्र के किनारे हय।” 7 जब उँ स्वरगदूत उनसे बात कइके चलेंगे, तब उँ दुइठे सेबकन काहीं अउर जउन उनखे लघे हाजिर रहा करत रहे हँय, उनमा से एकठे भक्त सिपाही काहीं बोलाइन। 8 अउर उन्हीं सगली बात बताइके याफा सहर माहीं पठइन।

### पतरस के दरसन देखब

9 दुसरे दिना जब उँ पंचे चलत-चलत सहर के लघे पहुँचिके, तब दुपहर के करीब पतरस प्राथना करँइ के खातिर छत माहीं चढ़ें। 10 तब उन्हीं भूँख लाग, अउर कुछ खॉइ चाहत रहे हँय; पय जब उँ पंचे खाना तइआर करत रहे हँय, तब उँ बेसुध होइगें। 11 अउर दरसन माहीं देखिन कि, “अकास खुलिगा; अउर एकठे बड़े चदरा कि नाई कउनव चीज नीचे उतरी रही हय, ओही चारिव कोने से पकड़िके धरती माहीं उतारा जाय रहा हय। 12 जउन माहीं धरती के हरेक मेर के चार गोड़े बाले, अउर रेगँइ बाले जीव-जन्तु, अउर अकास के पंछी रहे हँय।” 13 अउर उन्हीं अइसन बोल सुनान, “हे पतरस उठा, मारिके खा।” 14 पय पतरस कहिन, “नहीं प्रभू, कदापि नहीं; काहेकि हम कबहूँ कउनव अपबित्र, इआ कि असुद्ध चीज नहीं खायन आय।” 15 पुनि दुसराय उन्हीं इआ बोल सुनान, कि “जउन कुछ परमातिमा सुद्ध ठहराइन हीं, ओही तू असुद्ध न कहा।” 16 तीन बेरकी इहइमेर भ; तब हरबिन उआ चीज अकास माहीं ऊपर उठाय लीनगे।

17 पतरस जउन दरसन देखिन रहा हय, ओखे बारे माहीं बड़ी दुबिधा माहीं परे रहे हँय, कि “एखर मतलब का होई”, तबहिनय देखा, उँ मनई जिनहीं कुरनेलियुस पठइन रहा हय, समौन के घर के पता लगाइके दुआरा माहीं आइके ठाढ़ होइगें। 18 अउर गोहराइके पूछँइ लागें, “का समौन जउन पतरस काहबत हें, इहँय मेहमान बनिके रुके हँय?” 19 पतरस जउन उआ दरसन के

बारे माहीं सोचतय रहे हँय, कि पबित्र आत्मा उनसे कहिन, “देखा तीनठे मनई तौहई ढूँढ रहे हँय।<sup>20</sup> एसे तूँ उतरिके नीचे जा, अउर निसोच होइके उनखे पीछे-पीछे चले जा, काहेकि हमहिन उनहीं पठएन हँय।”<sup>21</sup> तब पतरस छत से नीचे उतरिके ऊँ मनइन से कहिन; “देखा, जिनहीं तूँ पंचे ढूँढ रहे हया, उआ हमहिन आहैन; तौहरे पंचन के आमँड के का कारन हय?”<sup>22</sup> तब ऊँ पंचे कहिन, “कुरनेलियुस सुबेदार जउन धरमी मनई हँ, अउर परमातिमा के भय मानँड बाले, अउर यहूदी जाति माहीं उनखर खुब सम्मान हय, ऊँ स्वरगदूत से इआ हुकुम पाइन ही, कि अपना काहीं अपने घर माहीं बोलाइके अपना से बचन सुनँय।”

### कुरनेलियुस के घर माहीं पतरस

<sup>23</sup> तब पतरस उनहीं भीतर बोलाइके उनखर स्वागत-सतकार किहिन, अउर दुसरे दिना उनखे साथ गँ; अउर याफा सहर के बिसुआसी भाइन म से कइअक जने उनखे साथ गँ।<sup>24</sup> दुसरे दिना उँड पंचे कैसरिया सहर माहीं पहुँचे, अउर कुरनेलियुस अपने रिस्तेदारन अउर पियार साथिन काहीं एकट्ठा कइके उनखर इन्तजार कए रहे हँय।<sup>25</sup> जब पतरस भीतर आबत रहे हँय, तब कुरनेलियुस उनसे भेंट किहिन, अउर उनखर गोड़ पकड़िके नबस्कार किहिन।<sup>26</sup> पय पतरस उनहीं उठाइके कहिन, “ठाढ़ होइजा, हमहूँ त मनइन आहैन।”<sup>27</sup> अउर उनसे बात करत भीतर गँ, अउर खुब मनइन काहीं एकट्ठा देखिके।<sup>28</sup> पतरस उनसे कहिन, “तूँ पंचे जनते हया, कि गैरयहूदी लोगन के संगति करब, इआ उनखे इहाँ जाब यहूदी लोगन के खातिर अधरम हय, पय परमातिमा हमहीं बताइन ही, कि हम कउनव मनई काहीं अपबित्र इआ कि असुद्ध न कही।<sup>29</sup> एसे जब हमहीं बोलबाबा ग; त हम बिना कुछ कहे चले आएन हय, पय अब हम तौहसे पूँछित हएन, कि हमहीं कउने काम के खातिर बोलबाया हय?”

<sup>30</sup> तब कुरनेलियुस कहिन; कि “चार दिना पहिले इहय समय हम अपने घर माहीं तीन बजे प्राथना करत रहेन हँय; कि अचानक एकठे मनई चमकत ओन्हा पहिरे, हमरे आँगे आइके ठाढ़ होइगँ।<sup>31</sup> अउर कहँड लागे, कि ‘हे कुरनेलियुस, तौहार प्राथना सुन लीनगे ही, अउर तौहार दान परमातिमा के आँगे याद कीन गे हँय।<sup>32</sup> एसे कोहू काहीं याफा सहर माहीं पठइके, समौन काहीं जउन पतरस कहाबत हँ बोलबाबा; ऊँ समुद्र के किनारे समौन जउन चमड़ा के धन्धा करत हँ, उनखे घर माहीं मेहमान हँ।’<sup>33</sup> तब हम हरबिन अपना के लघे कुछ मनइन काहीं पठयन, अउर अपना निकहा किहेन हय, जउन आय गएन हय, अब हम पंचे सगले जन इहाँ परमातिमा के आँगे हएन, जउने जउन कुछ परमातिमा अपना से कहिन ही, ओही सुनी।”

### पतरस के उपदेस

<sup>34</sup> तब पतरस कहिन, “अब हम समझ गएन हय, कि परमातिमा कोहू के साथ भेदभाव नहीं करँय,<sup>35</sup> बलकिन हरेक जाति माहीं जउन उनसे डेरात हँ, अउर धरम के काम करत हँ, परमातिमा उनहीं सोइकार करत हँ।<sup>36</sup> जउन बचन परमातिमा इजराइलिन के लघे पठइन, जबकि ऊँ यीसु मसीह के द्वारा (जउन सगले मनइन के प्रभू आहीं) सान्ति के खुसी के खबर सुनाइन।<sup>37</sup> उआ बात काहीं तूँ पंचे जनते हया, जउन यहूदा बपतिस्मा देँड बाले के बपतिस्मा के प्रचार के बाद, गलील प्रदेश से सुरू होइके सगले यहूदिया प्रदेश माहीं फइल्लिगे ही।<sup>38</sup> अउर परमातिमा कउनमेर से नासरत सहर माहीं, रहँड बाले यीसु काहीं पबित्र आत्मा अउर सामर्थ से अभिसेक किहिन तय, अउर ऊँ भलाई के काम करत, अउर सगलेन काहीं जउन सइतान के सताए रहे हँय, उनहीं नीक करत चारिव कइती घूमत फिरत रहिगँ; काहेकि परमातिमा उनखे साथ रहे हँय।<sup>39</sup> अउर हम उन सगले कामन के गबाह हएन, जउन यीसु यहूदिया प्रदेश अउर यरूसलेम सहर माहीं किहिन तय, अउर उनहिन काहीं ऊँ पंचे लकड़ी के कूस माहीं लटकाइके मारि डारिन।<sup>40</sup> पय परमातिमा उनहीं तिसरे दिना जिन्दा कइ दिहिन, अउर उनहीं देखाय घलाय दिहिन।<sup>41</sup> पय सगले मनइन काहीं नहीं, बलकिन उन गबाहन काहीं,

जिनहीं परमातिमा पहिलेन से चुनि लिहिन तय, अरथात हमहीं पंचन काहीं, जउन उनखे मरेन म से जिन्दा होए के बाद उनखे साथ खाएन-पिएन।<sup>42</sup> अउर ऊँ हमहीं हुकुम दिहिन ही, कि सगले मनइन माहीं प्रचार करी, अउर गबाही देई, कि ई उँडन आहीं; जिनहीं परमातिमा जिअत अउर मरे मनइन के न्याय करँड के खातिर ठहराइन हीं।<sup>43</sup> सगले परमातिमा के सँदेस बतामँड बाले उनखे बारे माहीं गबाही दिहिन हीं, कि जे कोऊ उनखे ऊपर बिसुआस करी, ओही उनखे नाम के द्वारा पापन के माफी मिली।”

### गैरयहूदी लोगन के ऊपर पबित्र आत्मा के उतरब

<sup>44</sup> पतरस ई बातँय कहतय रहे हँय, तबहिनय पबित्र आत्मा बचन के सगले सुनइअन के ऊपर उतरि आबा।<sup>45</sup> अउर जेतने खतना किहे बिसुआसी पतरस के साथ आए रहे हँय, ऊँ पंचे सगले जन चउआइगँ, कि “गैरयहूदी लोगन के ऊपर घलाय पबित्र आत्मा के दान उडेला ग हय।”<sup>46</sup> काहेकि ऊँ पंचे उनहीं अनेकव प्रकार के भाँसा बोलत, अउर परमातिमा के बड़ाई करत सुनिन।<sup>47</sup> इआ सगला हाल देखिके, पतरस कहिन; “का कोऊ पानी काहीं रोकि सकत हय, कि ई पंचे बपतिस्मा न पाँय, जउन ई पंचे हमरे पंचन कि नाई पबित्र आत्मा पाइन हीं?”<sup>48</sup> अउर ऊँ हुकुम दिहिन कि उनहीं यीसु मसीह के नाम से बपतिस्मा दीन जाय, तब ऊँ पंचे पतरस से बिनती किहिन, कि कुछ दिना अपना हमरे पंचन के साथय रही।

### अपने काम के बारे माहीं पतरस के साफ-साफ बताउब

**11** अउर यीसु के खास चेला लोग, अउर बिसुआसी भाई-बहिनी जउन यहूदिया प्रदेश माहीं रहे हँय सुनिन, कि “गैरयहूदी लोग घलाय परमातिमा के बचन काहीं अपनाय लिहिन हीं।”<sup>2</sup> अउर पतरस जब यरूसलेम सहर माहीं आएँ, तब जिनखर खतना होइगा रहा हय, ऊँ पंचे उनसे बाद-बिबाद करँड लागे।<sup>3</sup> कि “जिनखर खतना नहीं भ आय, तूँ उनखे इहाँ जाइके उनखे साथ खाए हया।”<sup>4</sup> तब पतरस सुरू से एक तरफ से सगली बातँय उनसे बताइन,<sup>5</sup> कि “हम याफा सहर माहीं प्राथना करत रहे हएन, अउर बेसुध होइके एकठे दरसन देखेन, कि एकठे बड़े चदरा कि नाई कउनव चीज चारिव कोने से लटकत अकास से नीचे उतरिके हमरे लघे आई।<sup>6</sup> अउर जब हम ओही बड़े ध्यान से देखेन, त ओमाहीं जंगल म रहँड बाले जानबर अउर रेगँड बाले जीव-जन्तु अउर अकास के पंछी देखाने।<sup>7</sup> अउर इआ बोलव सुनेन, ‘हे पतरस उठा, मारा अउर खा।’<sup>8</sup> तब हम कहेन, ‘नहीं प्रभू, नहीं, काहेकि हम कउनव अपबित्र इआ कि असुद्ध चीज कबहूँ नहीं खायन।’<sup>9</sup> एखे जबाब माहीं अकास से दुसराय बोल सुनान, कि ‘जउन कुछ परमातिमा सुद्ध ठहराइन हीं, ओही तूँ असुद्ध न कहा।’<sup>10</sup> तीन बेर इहइमेर भ; एखे बाद सब कुछ पुनि अकास माहीं खींच लीनगा।<sup>11</sup> अउर देखा, हरबिन जहाँ हम रुके रहेन हय, उआ घर माहीं तीनठे मनई, जउन कैसरिया सहर से हमरे लघे पठए गे रहे हँय, आइके ठाढ़ होइगँ।<sup>12</sup> तब पबित्र आत्मा हमहीं उनखे साथ बिना डेराने जाँड के खातिर कहिन, अउर ई छयठे बिसुआसी भाई घलाय हमरे साथ चल दिहिन; अउर हम पंचे उआ मनई के घर माहीं गएन।<sup>13</sup> अउर ऊँ बताइन कि, ‘हम एकठे स्वरगदूत काहीं अपने घर माहीं ठाढ़ देखेन, जउन हमसे कहिन, कि याफा सहर माहीं मनई पठइके समौन काहीं जउन पतरस कहाबत हँ, बोलबाय ल्या।<sup>14</sup> ऊँ तौहसे अइसन बात बतइहँय, जिनखे द्वारा तूँ, अउर तौहार सगला घराना मुक्ती पाई।’<sup>15</sup> जब हम बात करब सुरू किहेन, तब पबित्र आत्मा उनखे ऊपर उहयमेर उतरा, जउनमेर से सुरुआत माहीं हमरे पंचन के ऊपर उतरा रहा हय।<sup>16</sup> तब हमहीं प्रभू के कही उआ बात सुधि आइगे; जउन ऊँ कहिन तय, कि ‘यहून्ना त पानी से बपतिस्मा देत रहे हँय, पय तूँ पंचे पबित्र आत्मा से बपतिस्मा पइहा।’<sup>17</sup> इआमेर से अगर परमातिमा उनहूँ पंचन काहीं उहय दान दिहिन हीं, जउन हमहीं पंचन काहीं प्रभू यीसु मसीह के ऊपर बिसुआस किहे से मिला रहा हय; त परमातिमा काहीं रँकँड बाले हम को होइत हएन?”<sup>18</sup> इआ सुनिके, ऊँ पंचे चुप्पय होइगँ, अउर परमातिमा के बड़ाई

कइके कहँई लागें, अब त परमातिमा, गैरयहूदी लोगन काहीं घलाय अनन्त जीवन पामँई के खातिर, मन फिरामँई के दान दिहिन हीं।

### अन्ताकिया सहर माहीं खुसी के खबर के आउब

19 जउन मनई उआ दुख के मारे जउन स्तिफनुस के कारन परा रहा हय, तितिर-बितिर होइगे रहे हँय, ऊँ पंचे घूमत फिरत फीनीके सहर, अउर साइप्रस टापू अउर ओखे बाद अन्ताकिया सहर माहीं पहुँचे; पय यहूदी लोगन काहीं छोंड़िके अउर कोहू काहीं बचन नहीं सुनाबत रहे आँय। 20 पय ऊँ बिसुआसिन म से कुछ जने, कुप्रस सहर के अउर कुरेन सहर के रहँई बाले रहे हँय, जउन अन्ताकिया सहर माहीं आइके यूनानी जाति के मनइन काहीं घलाय, प्रभू यीसु के खुसी के खबर काहीं सुनामँई लागें। 21 अउर प्रभू के सामर्थ उनखे साथ रही हय, अउर खुब जने खुसी के खबर के ऊपर बिसुआस कइके प्रभू कइती मुड़ि आएँ। 22 जब उनखर चरचा यरूसलेम सहर के मसीही मन्डली के मनइन काहीं सुनँय काहीं मिली, तब ऊँ पंचे बरनबास काहीं अन्ताकिया सहर माहीं पठइन। 23 अउर बरनबास उहाँ पहुँचिके, परमातिमा के किरपा काहीं देखिके आनन्दित भें; अउर सगले बिसुआसी मनइन काहीं उपदेस दिहिन, कि “पूरे मन से प्रभू के ऊपर बिसुआस करा।” 24 काहेकि ऊँ नीक मनई रहे हँय; अउर पबित्र आत्मा से भरे रहे हँय, अउर उनखे उपदेस काहीं सुनिके, खुब मनई प्रभू के ऊपर बिसुआस कइके उनखे साथ आइके मिलिगें। 25 ओखे बाद बरनबास साऊल काहीं ढूँढ़इ के खातिर तरसुस सहर माहीं चलेगें। 26 अउर जब उनसे मिलें तब उनहीं अन्ताकिया सहर माहीं लइ आएँ, अउर अइसन भ कि ऊँ पंचे एक बरिस तक मसीही मन्डली के मनइन से मिलत-जुलत, अउर खुब मनइन काहीं उपदेस देत रहिगें, अउर अन्ताकिया सहर माहीं सगलेन से पहिले यीसु के चेला लोग मसीही कहाए।

27 उहय समय यरूसलेम सहर से कुछ परमातिमा के सँदेस बतामँई बाले घलाय, अन्ताकिया सहर माहीं आए रहे हँय। 28 उनमा से अगबुस नाम के एक जने ठाढ़ होइके, पबित्र आत्मा के प्रेरना से इआ बताइन, कि सगले संसार माहीं बड़ा अकाल परी, अउर उआ अकाल राजा क्लौदियुस के समय माहीं परा। 29 तब चेला लोग इआ निरनय किहिन कि, हरेक जने अपने छमता के मुताबिक, यहूदिया प्रदेस माहीं रहँई बाले बिसुआसी भाई-बहिनिन के सेबा के खातिर कुछ धन पठमँई। 30 अउर ऊँ पंचे इहइमेर किहिन; बरनबास अउर साऊल के हाँथे यहूदिया इलाका के मन्डली के अँगुअन के लघे कुछ धन पठय दिहिन।

### जेल से पतरस के छुटकारा

12 उहय समय राजा हेरोदेस, मसीही मन्डली के कुछ मनइन काहीं सताउब सुरू कइ दिहिन। 2 ऊँ यूहन्ना के भाई याकूब काहीं तलबार से मरबाय डारिन। 3 अउर जब ऊँ देखिन, कि यहूदी जाति के सगले मनई एसे आनन्दित होथें, तब ऊँ पतरस काहीं घलाय पकड़ लिहिन, उआ समय बिना खमीर के रोटी खाँई बाला तेउहार चलत रहा हय। 4 अउर ऊँ पतरस काहीं पकड़िके जेल माहीं बन्द कराय दिहिन, अउर चउकीदारी करँई के खातिर, चार-चार सिपाहिन के चार परत पहरा लगाय दिहिन, इआ बिचार से कि फसह नाम के तेउहार के बाद, उनहीं मनइन के आँगे हाजिर करब। 5 एसे जेल माहीं पतरस के पहरेदारी होत रही हय; पय मसीही मन्डली के सगले मनई लव लगाइके परमातिमा से प्राथना करत रहे हँय।

6 अउर जब राजा हेरोदेस पतरस काहीं सगले मनइन के आँगे हाजिर करँई के तइआरी माहीं रहे हँय, त उहय रात माहीं पतरस दुइठे सँकरिन माहीं बाँधे, दुइठे सिपाहिन के बीच माहीं सोबत रहे हँय, अउर दुआरा माहीं पहरेदार जेल के रखबारी करत रहे हँय। 7 त देखा, प्रभू के एकठे दूत जेल माहीं आइके ठाढ़ भें, अउर उआ कोठरिआ माहीं जोति चमकी, अउर ऊँ पतरस के पसुरी माहीं हाँथ मारिके उनहीं जगाइन, अउर कहिन; “उठा, जल्दी करा, अउर उनखे हाँथे से सँकरी खुलिके गिर गई।” 8 तब स्वरगदूत

पुनि उनसे कहिन, “तइआर होइजा, अउर आपन पनहीं पहिर ल्या।” अउर पतरस उहयमेर किहिन, तब ऊँ पुनि कहिन; “आपन ऊपर के ओन्हा पहिरिके हमरे पीछे चले आबा।” 9 पतरस जेल से निकरिके उनखे पीछे-पीछे चल दिहिन; पय इआ नहीं जानत रहे आँय, कि जउन कुछ स्वरगदूत कइ रहे हँय, उआ सही-सही आय, बलकिन इआ समझत रहे हँय, कि हम दरसन देख रहेन हय। 10 तब ऊँ पंचे पहिल अउर दूसर पहरा से निकरिके लोहे के उआ फाटक के लघे पहुँचे, जउन सहर कइती रहा हय; उआ उनखे खातिर अपने आपय खुलिगा, अउर ऊँ पंचे निकरिके एकय गली होइके गें, तब अचानक स्वरगदूत उनहीं छोंड़िके चलेगें। 11 तब पतरस के झक्का खुलिगा, अउर सचेत होइके कहँई लागें; अब हम सच्चाई जान गएन हँय, कि प्रभू आपन दूत पठइके हमहीं, राजा हेरोदेस के हाँथे से छोड़ाय लिहिन हीं, अउर यहूदी लोगन के सगली आसा काहीं टोर दिहिन हीं।

12 अउर इआ सोचिके, पतरस उआ यूहन्ना के महतारी मरियम के घर माहीं आएँ, जउन मरकुस कहाबत रहे हँय; उहाँ खुब जने एकट्ठा होइके प्राथना करत रहे हँय। 13 जब पतरस केमरा के सँकरी खट खटाइन; तब रूदे नाम के एकठे दासी देखँई के खातिर आई। 14 अउर पतरस के बोल पहिचानिके, मारे खुसी के केमरा नहीं खोलिन; बलकिन दउड़िके भीतर गई, अउर सगले जनेन काहीं बताइन, कि पतरस दुआरा माहीं टाढ़ हें। 15 तब ऊँ पंचे उनहीं कहिन, “तू पागल होइ गया हय का?” पय ऊँ बिसुआस के साथ कहिन, कि “उँइन आहीं।” तब ऊँ पंचे कहिन, “उनखर स्वरगदूत होइहँय।” 16 पय पतरस सँकरी खट-खटउतय रहिगें, तब ऊँ पंचे केमरा खोलिन, अउर पतरस काहीं देखिके चउआइगें। 17 तब पतरस हाँथे से इसारा कइके कहिन, कि “चुप्पय रहा”; अउर भीतर जाइके उनहीं बताइन, कि प्रभू कउनमेर से हमहीं जेल से निकार लाएँ हँय, अउर ऊँ पुनि कहिन, कि याकूब अउर सगले भाई-बहिनिन से इआ बताय दिहा; अउर ओखे बाद उहाँ से निकरिके दुसरे जघा माहीं चलेगें।

18 अउर बड़े सकारे सिपाहिन माहीं बड़ी हलचल होइ लाग, कि पतरस के का भ होई। 19 जब राजा हेरोदेस पतरस काहीं ढूँढ़इ आएँ, अउर उनहीं नहीं पाइन; तब पहरा देंइ बालेन के जाँच करे के बाद हुकुम दिहिन, कि “उनहीं मारि डारा जाय”; अउर ऊँ यहूदिया प्रदेस काहीं छोंड़िके कैसरिया सहर माहीं जाइके रहँई लागें।

### राजा हेरोदेस के मउत

20 अउर ऊँ सूर अउर सैदा प्रदेस के मनइन से खुसी नहीं रहत रहे आँय; एसे ऊँ पंचे एक चित्त होइके, उनखे लघे आएँ अउर बलास्तुस काहीं, जउन राजा के एकठे कर्मचारी रहा हय, ओही मनाइके मेल-मिलाप करँई चाहिन, काहेकि राजा के प्रदेस से, उनखे प्रदेस के मनइन के पालन-पोसन होत रहा हय। 21 अउर राजा के द्वारा ठहराए दिन काहीं राजा हेरोदेस राजा के ओन्हा पहिरिके राजगद्दी माहीं बइठें; अउर उनहीं उपदेस देंइ लागें। 22 अउर सगले मनई चिल्लाय उठें, कि “इआ त मनई के नहीं परमातिमा के बचन आय।” 23 उहय समय प्रभू के एकठे दूत हरबिन राजा हेरोदेस काहीं बिमार कइ दिहिन, काहेकि ऊँ परमातिमा के बड़ाई नहीं किहिन तय, अउर उनखे देंह माहीं किरबा परिगें, अउर ऊँ मरिगें।

24 पय परमातिमा के बचन बढ़त अउर फइलत चला ग। 25 जब बरनबास अउर साऊल आपन सेबा पूर कइ चुके, त यूहन्ना काहीं जउन मरकुस कहाबत रहे हँय, साथ माहीं लइके यरूसलेम सहर से लउटें।

### बरनबास अउर साऊल के पठबा जाब

13 अन्ताकिया सहर के मसीही मन्डली माहीं, कुछ परमातिमा के सँदेस बतामँई बाले, अउर कुछ उपदेस देंइ बाले रहे हँय; अरथात बरनबास अउर समौन जउन नीगर कहाबत रहे हँय; अउर लूकियुस कुरेन सहर के रहँई बाले, अउर चउथाई भाग के राजा हेरोदेस के गोद लीन भाई मनाहेम अउर साऊल। 2 जब ऊँ पंचे उपबास कइके प्रभू के अराधना करत



रहे हैं, तब पबित्र आत्मा उनसे कहिन; “हमरे खातिर बरनबास अउर साऊल काहीं उआ काम के खातिर अलग करा, जउने खातिर हम उन्हीं बोलायन हय।”<sup>3</sup> तब ऊँ पंचे उपबास अउर प्राथना कइके, उनखे ऊपर आपन हाँथ धइके बिदा किहिन।

### पवलुस के पहिल प्रचार-यात्रा

<sup>4</sup> तब ऊँ पंचे पबित्र आत्मा के पठए से, सिलूकिया सहर माहीं गें; अउर उहाँ से जल जिहाज माहीं चढ़िके, साइप्रस टापू काहीं चल दिहिन।<sup>5</sup> अउर सलमीस सहर माहीं पहुँचिके, परमातिमा के बचन यहूदी लोगन के सभाघरन माहीं सुनाइन; अउर यहूना उनखर सेबा करँइ बाले रहे हैं।<sup>6</sup> अउर उआ सगले टापू माहीं घूमत, पाफुस सहर तक पहुँचिगें, उहाँ उन्हीं बार-यीसु नाम के एकठे यहूदी जाति के टोना मारँइ बाला, अउर परमातिमा के झूठ सँदेस बतामँइ बाला मिला।<sup>7</sup> उआ राजपाल सिरगियुस पवलुस के साथ माहीं रहत रहा हय, ऊँ खुब बुद्धिमान मनई रहे हैं, अउर ऊँ बरनबास अउर साऊल काहीं अपने लघे बोलाइके, परमातिमा के बचन सुनँय चाहत रहे हैं।<sup>8</sup> पय बार-यीसु जउने के दूसर नाम इलीमास घलाय रहा हय, बरनबास अउर साऊल के बिरोध कइके, राजपाल काहीं बिसुआस करँइ से रोकँइ चाहिस।<sup>9</sup> तब साऊल जिनखर नाम पवलुस घलाय हय, पबित्र आत्मा से भरिके ओखे कइती एकटक निहारिके कहिन, <sup>10</sup> “हे सगले कपट अउर सगले चतुराई से भरे सइतान के सन्तान, हरेक सच्चाई के बडरी, का तँय प्रभू के सीध गइलन काहीं टँड करब न छोड़िहे? <sup>11</sup> पय अब देख, प्रभू के हाँथ तोरे ऊपर आय परा हय; अउर तँय कुछ समय तक आँधर रइहे अउर सुरिज काहीं न देखे पइहे।” तबहिनय ओखे आँखी माहीं धुँधलापन अउर अँधेआर छाय ग, अउर उआ एँकई-ओँकई टटोहँय लाग, जउने कोऊ ओखर हाँथ पकड़िके लइ चलया।<sup>12</sup> तब जउन कुछू भ रहा हय, राजपाल ओही देखिके, अउर प्रभू के उपदेस से अचम्भित होइके, प्रभू के ऊपर बिसुआस किहिन।

### पिसिदिया प्रदेस के अन्ताकिया सहर माहीं पवलुस

<sup>13</sup> तब पवलुस अउर उनखर साथी पाफुस सहर से जिहाज काहीं छोरिके, पंफूलिया प्रदेस के पिरगा सहर माहीं आएँ; अउर यहूना उन्हीं उहाँ छोड़िके यरूसलेम सहर माहीं लउटिगें।<sup>14</sup> अउर ऊँ पंचे पिरगा सहर से आँगे बढ़िके, पिसिदिया प्रदेस के अन्ताकिया सहर माहीं पहुँचे; अउर पबित्र दिन काहीं यहूदी सभाघर माहीं जाइके बइठिगें।<sup>15</sup> अउर मूसा के बिधान अउर परमातिमा के सँदेस बतामँइ बालेन के किताबन काहीं पढ़े के बाद, सभा के कुछ अधिकारी उनखे लघे कहबाय पठइन, कि “हे भाइव, अगर सगले मनइन काहीं उपदेस देइ के खातिर, तौहरे मन माहीं कउनव बात होय, त बताबा।”<sup>16</sup> तब पवलुस ठाढ़ होइके, अउर हाँथ से इसारा कइके कहिन; “हे इजराइलिव, अउर परमातिमा के भय मानँइ बाले मनइव, सुना।<sup>17</sup> ई इजराइली मनइन के परमातिमा हमरे बाप-दादन काहीं चुनि लिहिन, जब ऊँ पंचे मिस देस माहीं परदेसी होइके रहत रहे हैं, तब उनखर उन्नति किहिन; अउर आपन बलबन्त हाँथ बढ़ाइके उन्हीं उहाँ से निकार लाएँ।<sup>18</sup> अउर परमातिमा चालिस बरिस तक सुनसान जघा माहीं, उनखे गलतिन काहीं सहत रहिगें।<sup>19</sup> अउर कनान देस माहीं रहँइ बाली सातव जाति के मनइन काहीं नास कइके, उनखर देस करीब साढ़े चार सव बरिस माहीं इनखे अधिकार माहीं कइ दिहिन।<sup>20</sup> एखे बाद परमातिमा समूएल नबी तक, उनखे बीच माहीं न्याय करँइ बाले ठहराइन।<sup>21</sup> एखे बादव ऊँ पंचे एकठे राजा मॉगिन: तब परमातिमा चालिस बरिस के खातिर, बिन्यामीन के कुल म से, एकठे मनई अरथात कीस के लड़िका साऊल काहीं उनखे ऊपर राजा बनाइन।<sup>22</sup> एखे बाद परमातिमा साऊल काहीं हटाइके दाऊद काहीं उनखर राजा बनाइन; जिनखे बारे माहीं परमातिमा गबाही दिहिन हीं, कि ‘यिसय के लड़िका दाऊद, हमरे मन के मुताबिक मिलगे हैं, उँइन हमरे सगली इच्छन काहीं पूर करिहँय।’<sup>23</sup> उनहिन के बंस म से परमातिमा अपने वादा के

मुताबिक, इजराइल माहीं मुक्ती देइ बाले के रूप माहीं, यीसु काहीं पठइन।<sup>24</sup> जिनखे आमँइ से पहिले यहूना बपतिस्मा देइ बाले इजराइलिन काहीं, अपने मन काहीं बदलँइ के खातिर बपतिस्मा के प्रचार किहिन।<sup>25</sup> अउर जब यहूना आपन काम पूर करँइ बाले रहे हैं, तब ऊँ कहिन, ‘तूँ पंचे हमहीं का समझते हय? हम ऊँ मनई न होहें! बलकिन देखा हमरे बाद एक जने आमँइ बाले हैं, जिनखे गोडेन के पनहीं के डोरव तक हम छोड़ँइ के काबिल नहिं आहिन।’<sup>26</sup> हे भाई-बहिनिव, तूँ पंचे जउन अब्राहम के सन्तान आह्या; अउर तूँ पंचे जउन परमातिमा से डेराते हय, तौहरे लघे इआ मुक्ती के सँदेस पठबा ग हय।<sup>27</sup> काहेकि यरूसलेम सहर के रहँइ बाले, अउर उनखर मुखिया लोग उन्हीं नहिं पहिचानिन, अउर न परमातिमा के सँदेस बतामँइ बालेन के बातन काहीं समझिन; जउन हरेक पबित्र दिन काहीं पढ़ी जाती हैं, एसे उन्हीं दोसी ठहराइके उन बातन काहीं पूर किहिन।<sup>28</sup> ऊँ पंचे उन्हीं मारि डारँइ के काबिल कउनव दोस उनखे ऊपर नहिं पाइन, तऊ राजपाल पिलातुस से बिनती किहिन, कि ‘उन्हीं मारि डारा जाय।’<sup>29</sup> अउर जब ऊँ पंचे उनखे बारे माहीं पबित्र सास्त्र माहीं लिखी सगली बातन काहीं पूर किहिन, तब उन्हीं क्रूस से नीचे उतारिके कब्र माहीं धरिन।<sup>30</sup> पय परमातिमा उन्हीं मरेन म से जिआय दिहिन।<sup>31</sup> अउर यीसु अपने चेलन काहीं, जउन उनखे साथ गलील प्रदेस से यरूसलेम सहर माहीं आए रहे हैं, खुब दिनन तक देखाई देत रहिगें; अउर ऊँ पंचे अबहिनव गबाही देइ के खातिर मनइन के आँगे मवजूद हैं।<sup>32</sup> अउर हम तौहई पंचन काहीं उआ करार के बारे माहीं, जउन हमरे पंचन के बाप-दादन से कीन गे रही हय, इआ खुसी के खबर सुनाइत हएन।

<sup>33</sup> कि परमातिमा यीसु काहीं जिआइके, उहय करार हमरे पंचन के सन्तानन के खातिर किहिन हीं, जइसन दुसरे भजन † माहीं घलाय लिखा हय, कि

‘तूँ हमार लड़िका आह्या; आजय हम तौहई पड़दा किहेन हय।’

<sup>34</sup> अउर उनखे इआ रीत से मरेन म से जिआमँइ के बारे माहीं घलाय, कि ऊँ कबहूँ न सड़िहँय, ऊँ अइसन कहिन हीं; कि

हम दाऊद के ऊपर के पबित्र अउर अटल किरपा तौहरे ऊपर करब।

<sup>35</sup> एसे ऊँ एकठे अउर भजन † माहीं घलाय कहिन हीं; कि

‘तूँ अपने पबित्र जन काहीं सड़ँय न देहा।’

<sup>36</sup> काहेकि दाऊद त परमातिमा के इच्छा के मुताबिक, अपने समय माहीं सेबा पूर कइके मरिगें; अउर अपने बाप-दादन माहीं जाइ मिलें; अउर सड़ घलाय गें।<sup>37</sup> पय जिनहीं परमातिमा जिआइन, ‘ऊँ सड़ँय नहिं पाएँ।’<sup>38</sup> एसे हे भाई-बहिनिव, तूँ पंचे जानिल्या, कि यीसु के द्वारा पापन के माफी के खबर तौहई पंचन काहीं सुनाई जात ही।<sup>39</sup> अउर जउने बातन से तूँ पंचे मूसा के बिधान के द्वारा, निरदोस नहिं ठहर सकत रहे आह्या, उँइन सगली बातन से, हरेक मनई उनखे ऊपर बिसुआस किहे के कारन निरदोस ठहरत हैं।<sup>40</sup> एसे चउकस रहा, अइसन न होय, कि परमातिमा के सँदेस बतामँइ बालेन के किताब माहीं, जउन लिखा हय, तौहरेव पंचन के ऊपर आय परय।

<sup>41</sup> हे बुराई करँइ बाले मनइव, देखा, अउर अचरज माना, अउर मिट जा; काहेकि हम तौहरे दिनन माहीं एकठे काम करब; अइसन काम, कि अगर कोऊ तौहसे ओखर चरचा करय, त तूँ पंचे कबहूँ बिसुआस न करिहा।”

<sup>42</sup> पवलुस अउर बरनबास जब उहाँ से जात रहे हैं, तब कुछ मनई उनसे बिनती करँइ लागें, कि आमँइ बाले अँगले पबित्र दिन काहीं ई बातँय पुनि सुनाई जाँय।<sup>43</sup> अउर जब सभा खतम होइगे, तब यहूदी लोग अउर यहूदी मत माहीं आए भक्तन म से, खुब जने पवलुस अउर बरनबास के पीछे-पीछे चल दिहिन; अउर ऊँ पंचे उनसे बात कइके समझाइन कि, परमातिमा के किरपा माहीं बने रहा।

### गैरयहूदी लोगन के बीच माहीं पवलुस के प्रचार के सुरुआत

44 अँगले पबित्र दिन काहीं, सहर के सगले मनई परमातिमा के बचन सुनय के खातिर एकट्ठा होइगें। 45 पय यहूदी लोग भीड़ काहीं देखिके डाह से भरिगें, अउर पवलुस के बुराई कइके उनखे बातन के बिरोध माहीं बोलैइ लागें। 46 तब पवलुस अउर बरनबास निडर होइके कहिन, “जरूरी रहा हय, कि परमातिमा के बचन पहिले तौहई पंचन काहीं सुनाबा जात, पय जब तू पंचे ओही सुनय नहीं चहते आह्या, अउर अपने-आप काहीं अनन्त जीवन के काबिल नहीं ठहरउते आह्या, त देखा, हम गैरयहूदी लोगन के लघे जइत हएन। 47 काहेकि प्रभू हमहीं इआ हुकुम दिहिन हीं; कि

‘हम तोहई गैरयहूदी लोगन के खातिर जोति ठहराएन हँय’; जउने तू धरती के छोर तक मुक्ती के कारन बना।”

48 इआ सुनिके गैरयहूदी लोग आनन्दित भें, अउर परमातिमा के बचन के बड़ाई करैइ लागें, अउर जेतने अनन्त जीवन पामँइ के खातिर ठहराए गे रहे हँय, ऊँ पंचे प्रभू के ऊपर बिसुआस किहिन। 49 तब प्रभू के बचन उआ सगले देस माहीं फइल्यँ लाग। 50 पय जउने मेहेरिअन के समाज माहीं आदर रहा हय अउर भक्त रही हँय, उनहीं अउर सहर के नेतन काहीं यहूदी लोग उकसाइन, अउर पवलुस अउर बरनबास के ऊपर बड़ा उपदरव कर बाइके, उनहीं अपने सीमा से बहिरे निकार दिहिन। 51 तब पवलुस अउर बरनबास, उनखे अँगुअय अपने गोडेन के धूधुर झारिके, इकुनियुम सहर माहीं चलेगें। 52 अउर चेला लोग आनन्द से अउर पबित्र आत्मा से भरपूर होत रहिगें।

### इकुनियुम सहर माहीं पवलुस अउर बरनबास

14 इकुनियुम सहर माहीं अइसन भ, कि पवलुस अउर बरनबास यहूदी लोगन के सभाघर माहीं एक साथ गें, अउर अइसन बातँय किहिन, कि यहूदी लोगन अउर यूनानी जाति के मनइन म से खुब जने बिसुआस किहिन। 2 पय बिसुआस न करैइ बाले कुछ यहूदी लोग, गैरयहूदी लोगन काहीं बिसुआसी भाइन के बिरोध माहीं उकसाइन, अउर उनखे बीच माहीं बिरोध कराय दिहिन। 3 अउर पवलुस अउर बरनबास खुब दिनन तक उहाँ रहें, अउर प्रभू के बारे माहीं बड़े साहस के साथ बात करत रहे हँय, अउर उहाँ प्रभू उनखे हाँथन से चमत्कार, अउर अचरज के काम कर बाइके, अपने किरपा के बचन के गबाही देत रहे हँय। 4 पय सहर के मनइन माहीं फूट परिगे रही हय; एसे कुछ मनई यहूदी लोगन कइती, अउर कुछ यीसु के खास चेलन कइती होइगें। 5 पय जब गैरयहूदी अउर यहूदी लोग उनखर अनादर कइके, उनहीं पथरा मारैइ के खातिर अपने मुखिन समेत उनखे ऊपर दउड़ि परें। 6 तब ऊँ पंचे इआ बात काहीं जानिगें, अउर लुकाउनिया प्रदेस के लुस्त्रा अउर दिरबे सहरन माहीं, अउर आस-पास के प्रदेसन माहीं भागिगें। 7 अउर उहाँ खुसी के खबर सुनामँइ लागें।

### लुस्त्रा अउर दिरबे सहरन माहीं पवलुस अउर बरनबास

8 लुस्त्रा सहर माहीं एकठे मनई बइठ रहा हय, जउन अपने गोडेन से अपंग रहा हय, उआ जन्मय से लॉगड़ रहा हय, अउर कबहूँ गोडेन से नहीं चला रहा आय। 9 उआ पवलुस काहीं बात करत सुनत रहा हय, अउर पवलुस ओही बड़े ध्यान से देखत रहे हँय, कि ओखे मन माहीं नीक होइ जाँइ के बिसुआस हय। 10 अउर ऊँ चन्डे से कहिन, कि “तू अपने गोड़ के बले सकँ ठाढ़ होइजा।” तबहिनय उआ कूदिके चलँय-फिरँय लाग। 11 जेतने मनई उहाँ रहे हँय, पवलुस के इआ काम काहीं देखिके लुकाउनिया भाँसा माहीं चन्डे से कहिन; “देउता मनइन के रूप माहीं हमरे पंचन के लघे उतरि आए हँय।” 12 अउर ऊँ पंचे बरनबास काहीं ज्यूस, अउर पवलुस काहीं हिरमेस कहँइ लागें, काहेकि पवलुस बात करैइ माहीं मुख्ख रहे हँय। 13 अउर ज्यूस के उआ मन्दिर के पुजारी, जउन उनखे सहर के सामने रहा हय, बरथा अउर फूलन के हार फाटक के लघे लइआइके, मनइन के साथ बलिदान करँइ चाहत रहा हय। 14 पय जब बरनबास अउर यीसु के खास चेला पवलुस

सुनिन, त गुस्साइके आपन ओन्हा फारिन, अउर भीड़ के मनइन के बीच माहीं गें, अउर गोहराइके कहँइ लागें; 15 “हे मनइव तू पंचे इआ का करते हया? हमहूँ पंचे त तौहरिन कि नाई दुख-सुख भोगी मनई आहैन, अउर तोहई खुसी के खबर सुनाइत हएन, कि तू पंचे ई बेकार के चीजन से अलग होइके, जिन्दा परमातिमा के ऊपर बिसुआस करा, जउन स्वर्ग अउर धरती अउर समुंद्र अउर जउन कुछ उनमा हय बनाइन हीं। 16 अउर ऊँ बीते समयन माहीं, सगले जाति के मनइन काहीं अपने-अपने गइल माहीं चलँइ दिहिन। 17 तऊ ऊँ अपने-आप काहीं बिना गबाह नहीं छौंड़िन, काहेकि ऊँ तौहरे साथ भलाई करत रहिगें, उँइन अकास से पानी बरसाबत हें, अउर रित के मुताबिक फसल देत हें, उँइन तौहई खँइ काहीं देत हें, अउर तौहरे पंचन के मन काहीं आनन्द से भर देत हें।” 18 एतना कहे के बादव, ऊँ पंचे बड़े मुसकिल से उनहीं पंचन काहीं रौंकिन, कि उनखे खातिर बली न चढ़ामँय।

19 पय कुछ यहूदी लोग, अन्ताकिया सहर अउर इकुनियुम सहर से आइके, खुब मनइन काहीं अपने पच्छ माहीं कइ लिहिन, अउर पवलुस के ऊपर पथरहाव किहिन, अउर उनहीं मरा समझिके सहर से बहिरे खसेलत लइगें। 20 पय जब चेला उनखे चारिव कइती ठाढ़ होइगें, तब पवलुस उठिके सहर माहीं चलेगें, अउर दुसरे दिना बरनबास के साथ दिरबे सहर माहीं चलेगें।

### सीरिया प्रदेस के अन्ताकिया सहर माहीं लउटब

21 अउर ऊँ पंचे उआ सहर के मनइन काहीं बचन सुनाइके, अउर खुब चेला बनाइके, लुस्त्रा सहर अउर इकुनियुम सहर अउर अन्ताकिया सहर माहीं लउटि आएँ। 22 अउर चेलन के मन काहीं स्थिर करत रहिगें, अउर उपदेस देत रहे हँय, कि हमहीं पंचन काहीं खुब कस्ट सहिके परमातिमा के राज माहीं प्रबेस करँइ परी। 23 अउर ऊँ पंचे हरेक मसीही मन्डली माहीं उनखे खातिर अँगुआ चुनिन, अउर उपबास समेत प्राथना कइके, उनहीं प्रभू काहीं सँउपि दिहिन, जिनखे ऊपर ऊँ पंचे बिसुआस किहिन रहा हय।

24 अउर ओखे बाद ऊँ पंचे पिसिदिया प्रदेस से होत, पंफूलिया प्रदेस माहीं पहुँचिगें; 25 अउर पिरगा सहर माहीं बचन सुनाइके, अतलिया सहर माहीं आइगें। 26 अउर उहाँ से जल जिहाज से अन्ताकिया सहर माहीं आइगें, जहाँ से ऊँ पंचे उआ काम के खातिर परमातिमा के किरपा माहीं सँउपे गे रहे हँय, जउने काहीं ऊँ पंचे पूर किहिन रहा हय। 27 उहाँ पहुँचिके ऊँ पंचे मसीही मन्डली के मनइन काहीं एकट्ठा किहिन, अउर बताइन, कि परमातिमा हमरे साथ होइके कइसन बड़े-बड़े काम किहिन हीं, अउर गैरयहूदी लोगन के खातिर बिसुआस करँइ के दुआरा खोल दिहिन हीं। 28 अउर ऊँ पंचे चेलन के साथ खुब दिना तक रहें।

### यरूसलेम सहर माहीं एकठे सभा

15 ओखे बाद कुछ मनई यहूदिया प्रदेस से आइके, बिसुआसी भाई-बहिनिन काहीं सिखामँइ लागें, कि “अगर मूसा के नेम के मुताबिक तौहार पंचन के खतना नहीं भ आय, त तू पंचे मुक्ती नहीं पाय सकते आह्या।” 2 तब पवलुस अउर बरनबास के उनसे खुब बाद-बिबाद अउर झगड़ा भ, तब सभा माहीं इआ निश्चित कीन ग, कि पवलुस अउर बरनबास अउर हमरे पंचन म से कुछ जने, इआ बात के बारे माहीं यरूसलेम सहर माहीं, यीसु के खास चेलन अउर मुखिन के लघे जाँय। 3 एसे मसीही मन्डली के कुछ मनई उनहीं कुछ दूरी तक पहुँचाइन; अउर ऊँ पंचे फीनीके सहर अउर सामरिया प्रदेस से होत, गैरयहूदी लोगन काहीं मन बदलँइ के खातिर खुसी के खबर सुनाबत गें, अउर सगले भाइन काहीं खुब आनन्दित किहिन। 4 जब ऊँ पंचे यरूसलेम सहर माहीं पहुँचे, तब मसीही मन्डली के मनई, अउर यीसु के खास चेला लोग, अउर मुखिया लोग, उनसे आनन्द के साथ मिलें, अउर ऊँ पंचे बताइन, कि “परमातिमा उनखे साथ माहीं रहिके कइसन-कइसन अचरज के काम किहिन रहा हय।” 5 पय फरीसी लोगन के दल म से जे कोऊ बिसुआस किहिन तय, उनमा से कुछ जने ठाढ़ भें, अउर

कहिन, “उनहीं खतना करामँय, अउर मूसा के बिधान काहीं मानँइ के हुकुम देंइ चाही।”

6 तब यीसु के खास चेला लोग, अउर मुखिया इआ बात के बारे माहीं बिचार करँइ के खातिर एकट्ठा भें। 7 तब पतरस खुब बाद-बिबाद होए के बाद ठाढ़ भें, अउर उनसे कहिन, “हे बिसुआसी भाइव, तूँ पंचे त जनतेन हया, कि खुब दिना होइगें परमातिमा तौहरेन म से हमहीं चुनिन हीं, कि हमरे मुँहे के द्वारा गैरयहूदी लोग, खुसी के खबर सुनिके बिसुआस करँय। 8 अउर मन काहीं जाँचय-परखँय बाले परमातिमा, उनहूँ काहीं घलाय हमरिन कि नाई पबित्र आत्मा दइके उनखर गबाही दिहिन हीं। 9 अउर बिसुआस के द्वारा उनखे मन काहीं सुद्ध कइके, हमरे पंचन माहीं अउर उनमा कुछू भेद नहीं रक्खिन। 10 त अब तूँ पंचे काहे परमातिमा के परिच्छा लेते हया, कि चेलन के मुँडे माहीं अइसन बोझा लदते हया? जउने बोझा काहीं न हमार पंचन के बाप दादय उठाए पाइन तय, अउर न हमहिन पंचे उठाय सकित आहैन? 11 हाँ, हमार पंचन के इआ बिसुआस हय, कि जउन रीत से प्रभू यीसु के किरपा से हम पंचे मुक्ती पाएन हय; उहयमेर से ऊँ पंचे घलाय मुक्ती पइहँय।”

12 तब सगले सभा के मनई चुप्पय होइके, बरनबास अउर पवलुस के बातन काहीं सुनँय लागें, कि परमातिमा उनखे द्वारा गैरयहूदी लोगन के बीच माहीं, कइसन-कइसन चमत्कार अउर अचरज के काम देखाइन हीं। 13 जब ऊँ पंचे चुप्पय होइगें, तब याकूब कहँइ लागें, कि “हे भाइव, हमरे बात काहीं सुना। 14 समौन बताइन कि, परमातिमा पहिलय पहिल गैरयहूदी लोगन के ऊपर कउनमेर से किरपा किहिन हीं, कि उनमा से अपने नाम के खातिर सगलेन काहीं एक बनाय लेंय। 15 अउर एसे परमातिमा के सँदेस बतामँइ बालेन के बातँय घलाय मिलती हई, जइसन पबित्र सास्त्र माहीं लिखा हय।

16 ‘एखे बाद हम पुनि आइके राजा दाऊद के उआ घर काहीं जउन गिरिगा हय, ओही बनाउब, अउर उनखे खन्डहरन काहीं पुनि बनाउब, अउर ओही ठाढ़ करब।

17 एसे कि बचे मनई, अरथात सगले गैरयहूदी लोग जउन अब हमरे नाम के कहाबत हें, प्रभू काहीं हूँइय।

18 इआ बात काहीं उँइन प्रभू कहत हें जउन संसार † के उत्पन्न होतय से ई बातन के खबर देत आए हँय।

19 एसे हमार बिचार इआ हय, कि गैरयहूदी लोगन म से जउन मनई परमातिमा के ऊपर बिसुआस करत हें, हम पंचे उनहीं दुख न देई।

20 बलकिन उनहीं लिखिके पठई, कि ऊँ पंचे मूरतिन माहीं चढ़ाबा खाना न लेंय, अउर ब्यभिचार से बचँय, अउर नेटई काटिके मारे गे पसुअन के माँस अउर उनखे खून काहीं न खॉय। 21 काहेकि पुरान समय से सहरन-सहरन माहीं मूसा के बिधान के प्रचार करँइ बाले होत चले आएँ हँय, अउर मूसा के उआ बिधान हरेक पबित्र दिन काहीं यहूदी सभाघर माहीं पढ़ा जात हय।

### गैरयहूदी बिसुआसी लोगन काहीं चिट्ठी

22 तब सगले मसीही मन्डली के मनइन, अउर यीसु के खास चेलन, अउर धारमिक अँगुअन काहीं इआ नीक लाग, कि अपने बीच म से कुछ मनइन काहीं चुनिके, उनहीं बरनबास अउर पवलुस के साथ अन्ताकिया सहर माहीं पठमँइ, एसे ऊँ पंचे यहूदा काहीं जउन बरसब्बा कहाबत रहे हँय, अउर सीलास काहीं जउन बिसुआसी भाइन माहीं मुखिया रहे हँय चुनिन। 23 अउर ऊँ पंचे इआ चिट्ठी लिखिके उनखे हाँथे पठइन, कि “अन्ताकिया अउर सीरिया अउर किलिकिया के रहँइ बाले गैरयहूदी भाइन काहीं, यीसु के खास चेलन अउर धारमिक अँगुअन के नबस्कार! 24 हम पंचे सुनेन हय, कि हमरेन बीच म से कुछ जने उहाँ जाइके, तौहई पंचन काहीं अपने बातन से घबराय दिहिन हीं; अउर तौहरे मनन काहीं दुखी कइ दिहिन हीं, पय हम पंचे उनहीं इआ हुकुम नहीं दिहेन तय। 25 एसे हम पंचे एक मन होइके इआ सोच-बिचार किहेन, कि चुने मनइन काहीं अपने पियार भाई बरनबास अउर

पवलुस के साथ तौहरे पंचन के लघे पठई। 26 ई पंचे अइसन मनई आहीं, जउन हमरे पंचन के प्रभू यीसु मसीह के नाम के खातिर, अपने प्रान के बाजी लगाय दिहिन रहा हय। 27 अउर हम पंचे यहूदा अउर सीलास काहीं एहिन से पठयन हँय, जउने ऊँ अपने मुँहे से घलाय ई सगली बातन काहीं बतामँय। 28 अउर पबित्र आत्मा काहीं अउर हमहीं पंचन काहीं इहय जान परा, कि ई जरूरी बातन काहीं छोंइ; तौहरे ऊपर अउर कुछू बोझ न डारी; 29 कि तूँ पंचे मूरतिन माहीं चढ़ाए खाना से, अउर नेटई काटिके मारे गे पसुअन के माँस काहीं खॉय से, अउर ब्यभिचार से बचे रहा, त तौहार पंचन के भला होई।” अउर तूँ पंचे नीके कुसल रहा।

30 ओखे बाद ऊँ पंचे उनसे बिदा लइके अन्ताकिया सहर माहीं पहुँचे, अउर एकठे सभा लगबाइके उनहीं उआ चिट्ठी दइ दिहिन। 31 अउर ऊँ पंचे उआ चिट्ठी के बात काहीं पढ़िके खुब खुसी भें। 32 अउर यहूदा अउर सीलास जउन परमातिमा के सँदेस बतामँइ बाले रहे हँय, अउर खुब बातन से बिसुआसी भाइन काहीं उपदेस दइके, उनखे बिसुआस काहीं मजबूत किहिन। 33 ऊँ पंचे कुछ दिना रहे के बाद, उहाँ के भाई-बहिनिन से सान्ति के साथ बिदा लिहिन, कि अपने पठमँइ बालेन के लघे जाँय। 34 (पय सीलास काहीं उहाँ रहब नीक लाग।) 35 अउर पवलुस अउर बरनबास अन्ताकिया सहर माहीं रहिगें। अउर खुब मनइन काहीं प्रभू के बचन के उपदेस देत, अउर खुसी के खबर सुनाबत रहिगें।

### पवलुस के दूसर प्रचार-यात्रा माहीं पवलुस अउर बरनबास माहीं मतभेद

36 कुछ दिना बाद पवलुस, बरनबास से कहिन; कि “जउने-जउने सहरन माहीं, हम पंचे प्रभू के बचन सुनायन रहा हय, आबा, पुनि उन सहरन माहीं चलिके, अपने बिसुआसी भाई-बहिनिन काहीं देखी, कि ऊँ पंचे कइसन हें।” 37 तब बरनबास यहूदा काहीं जउन मरकुस कहाबत रहे हँय, अपने साथ लइ जाँइ के बिचार किहिन। 38 (पय पवलुस मरकुस † काहीं जउन पंफूलिया प्रदेस माहीं उनसे अलग होइगें तय, अउर काम माहीं उनखे साथ नहीं गें तय, अपने साथ लइ जाब उचित नहीं समझिन।) 39 एसे उन दोनव जनेन के बीच माहीं अइसन बिरोध पइदा होइगा, कि ऊँ पंचे एक दुसरे से अलग होइगें। अउर बरनबास मरकुस काहीं लइके जल जिहाज से साइप्रस टापू माहीं चलेगें। 40 पय पवलुस सीलास काहीं चुनि लिहिन, अउर बिसुआसी भाई लोग उनहीं परमातिमा के किरपा माहीं सँपे दिहिन, अउर ऊँ पंचे उहाँ से चलेगें। 41 अउर मसीही मन्डलिन काहीं बिसुआस माहीं मजबूत करत, सीरिया प्रदेस अउर किलिकिया प्रदेस से होत आँगे निकरिगें।

### तीमुथियुस काहीं पवलुस साथ म लिहिन

16 ओखे बाद पवलुस दिरबे अउर लुस्त्रा सहरन माहीं घलाय गें, अउर उहाँ तीमुथियुस नाम के एकठे चेला रहे हँय, जिनखर महतारी यहूदी जाति के बिसुआसी रही हँय, पय उनखर बाप यूनानी जाति के रहे हँय। 2 ऊँ लुस्त्रा सहर अउर इकुनियुम सहर के रहँइ बाले, बिसुआसी भाई-बहिनिन माहीं सम्मानित मनई रहे हँय। 3 अउर पवलुस के इच्छा रही हय, कि ऊँ हमरे साथय चलय; पय जउन यहूदी लोग ऊँ जघन माहीं रहत रहे हँय, उनखे कारन पवलुस उनहीं लइ जाइके उनखर खतना किहिन; काहेकि ऊँ पंचे सगले जन इआ जानत रहे हँय, कि उनखर बाप यूनानी जाति के आहीं। 4 अउर सहरन से यात्रा करत समय उहाँ के मनइन काहीं ऊँ पंचे उन बिधिअन काहीं, जउन यरूसलेम सहर के यीसु के खास चेला लोग, अउर धारमिक अँगुआ लोग ठहराइन रहा हय, उनहीं मानँइ के खातिर बताबत जात रहे हँय। 5 इआमेर से मसीही मन्डलिन के मनई बिसुआस माहीं मजबूत होत गें, अउर मसीही मन्डली गिनती माहीं हरेक दिन बढ़त गई।

## त्रोआस सहर माहीं पवलुस के दरसन देखब

6 अउर ऊँ पंचे फ्रूगिया अउर गलातिया प्रदेसन से होइके निकरें, अउर पबित्र आत्मा उनहीं आसिया प्रदेस माहीं बचन सुनामँड से बरजिन। 7 अउर ऊँ पंचे मूसिया प्रदेस के लघे पहुँचिके, बिथुनिया प्रदेस माहीं जाँइ चाहत रहे हँय; पय यीसु के आत्मा उनहीं उहाँ नहीं जाँइ दिहिस। 8 एसे ऊँ पंचे मूसिया प्रदेस से होइके त्रोआस सहर माहीं आइगें। 9 अउर पवलुस रात माहीं एकठे दरसन देखिन, कि मकिदुनिया प्रदेस के एकठे मनई ठाढ़ हय, अउर उनसे बिनती कइके कहत हय, कि, “दुसरे पार उतरिके मकिदुनिया प्रदेस माहीं आइके हमार पंचन के मदत करी।” 10 इआ दरसन देखे के बाद हम पंचे हरबिन मकिदुनिया प्रदेस जाँइ चाहत रहेन हय, इआ जानिके कि, परमातिमा हमहीं पंचन काहीं, उनहीं खुसी के खबर सुनामँड के खातिर बोलाइन हीं।

## फिलिप्पी सहर माहीं लुदिया के बिसुआस

11 एसे त्रोआस सहर से जल जिहाज छोरिके, हम पंचे सीधे सुमात्राके टापू अउर दुसरे दिना नियापुलिस सहर माहीं पहुँचेन। 12 अउर उहाँ से हम पंचे फिलिप्पी सहर माहीं पहुँचेन, जउन मकिदुनिया प्रदेस के मुख्य सहर आय, अउर उहाँ रोमी लोग बसे हँय; अउर हम पंचे उआ सहर माहीं कुछ दिना तक रहेन। 13 अउर पबित्र दिन काहीं हम पंचे सहर के फाटक के बहिरे, नदी के किनारे इआ समझिके गएन, कि उहाँ प्राथना करँइ के जघा होई; अउर उहाँ बइठिके उन मेहेरिन से जउन उहाँ एकट्ठा भई रही हँय, बातँय करँइ लागेन। 14 तब लुदिया नाम के थुआतीरा सहर के बैगनी ओन्हा बेचँय बाली एकठे भक्त मेहेरिआ, सुनत रही हय, तब प्रभू ओखे मन काहीं खोलिन, जउने उआ पवलुस के बातन काहीं बड़े ध्यान से सुनय। 15 जब उआ अपने सगले परिवार समेत बपतिस्मा लिहिस, तब हमसे बिनती किहिस, कि “अगर अपना हमहीं प्रभू के ऊपर बिसुआस करँइ बाली मानित हएन, त चलिके हमरे घर माहीं रही;” अउर उआ हमहीं मनाइके अपने घर लइगे।

## पवलुस अउर सीलास जेल माहीं

16 पुनि अइसन भ, कि जब हम पंचे प्राथना करँइ बाली जघा माहीं जात रहेन हय, तब हमहीं पंचन काहीं एकठे दासी मिली, जउने माहीं भबिस्य के बात बतामँड बाली आत्मा रही हय; अउर भबिस्य के बातँय बतामँड के कारन, अपने मालिकन के खातिर खुब धन कमाय लाबत रही हय। 17 उआ पवलुस के अउर हमरे पीछे आइके चिल्लायँ लाग, “ई मनई परमप्रधान परमातिमा के दास आहीं, जउन हमहीं पंचन काहीं मुक्ती के गइल के कथा सुनाबत हँ।” 18 उआ खुब दिना तक इहइमेर करत रहिगे, तब पवलुस दुखी भँ, अउर पीछे मुड़िके उआ आत्मा से कहिन, “हम तोही यीसु मसीह के नाम से इआ हुकुम देइत हएन, कि ओखे भीतर से निकरि जा” अउर उआ आत्मा उहय समय ओखे भीतर से निकरिगे।

19 जब ओखर मालिक देखिन, कि “हमरे पंचन के कमाई के साधन खतम होइगा हय”, त पवलुस अउर सीलास काहीं पकड़िके चउराहा माहीं प्रधानन के लघे लइगें। 20 अउर उनहीं सजा देँइ बाले हाकिमन के लघे लइ जाइके कहिन; “ई पंचे जउन यहूदी जाति के आहीं, सहर माहीं बड़ी गड़बड़ी फइलाय रहे हँय। 21 अउर अइसन रीति-रिबाजन काहीं बताबत हँ, जिनहीं सोइकार करब अउर मानब हमहीं पंचन काहीं, जउन रोमी लोग आहेन ठीक नहिँ आय।” 22 तब भीड़ के मनई उनखे बिरोध माहीं एकट्ठा होइके चढ़ि आएँ, अउर हाकिम लोग उनखर ओन्हा फारिके उतार डारिन, अउर उनहीं बँत मारँइ के हुकुम दिहिन। 23 अउर खुब बँत मरबाइके उनहीं जेल माहीं डरबाय दिहिन; अउर दरोगा काहीं हुकुम दिहिन, कि “उनखर रखबारी करँय।” 24 अउर उआ दरोगा अइसन हुकुम पाइके उनहीं भीतर बाली कोठरिआ माहीं रक्खिन, अउर उनखे गोड़न काहीं कठबा माहीं कस दिहिन।

## पवलुस अउर सीलास के जेल से छूटब

25 आधी रात के करीब पवलुस अउर सीलास, प्राथना करत परमातिमा के भजन गाबत रहे हँय, अउर दूसर कइदी उनखर भजन सुनत रहे हँय। 26 कि एतनेन माहीं अचानक बड़ा भुँइडोल भ, इहाँ तक कि जेल के नेव घलाय डोलि गई, अउर हरबिन जेल के सगले दुअरा खुलिगें; अउर सगले कइदिन के हँथकड़ी खुल गई। 27 अउर दरोगा जाग उठें, अउर जेल के दुअरा खुला देखिके इआ जानिस, कि सगले कइदी भागिगें हँय, एसे उआ तलबार निकारिके अपने-आप काहीं मारि डारँइ चाहिन। 28 तबहिनय पवलुस खुब चन्डे गोहराइके कहिन; “अपने-आप काहीं नुकसान न पहुँचाबा, काहेकि हम पंचे सगले जन इहँय हएन।” 29 तब दरोगा दिया मगबाइके हरबिन भीतर गें, अउर काँपत-काँपत पवलुस अउर सीलास के गोड़न गिरें। 30 अउर उनहीं बहिरे लइआइके कहिन, “हे सज्जन मनइव, मुक्ती पामँड के खातिर हम का करी?” 31 तब ऊँ पंचे उनसे कहिन, “प्रभू यीसु मसीह के ऊपर बिसुआस करा, त तूँ अउर तौंहरा सगला परिवार मुक्ती पाई।” 32 अउर ऊँ पंचे दरोगा, अउर उनखे सगले घर के मनइन काहीं प्रभू के बचन सुनाइन। 33 अउर रातयके उहय समय दरोगा लइ जाइके उनखे घावन काहीं धोइन, अउर अपने सगले परिवार समेत हरबिन बपतिस्मा लिहिन। 34 अउर ऊँ पवलुस अउर सीलास काहीं अपने घर लइ जाइके, उनहीं खाना खबाइन, अउर अपने सगले परिवार समेत परमातिमा के ऊपर बिसुआस कइके बड़ा आनन्द मनाइन।

35 जब सकार भ, तब हाकिम लोग सिपाहिन से इआ कहबाय पठइन, कि ऊँ मनइन काहीं छोड़ि द्या। 36 तब दरोगा इआ सँदेस पवलुस काहीं बताइन, कि “हाकिम अपना पंचन काहीं छोड़ि देँइ के हुकुम दिहिन हीं, एसे अब अपना पंचे इहाँ से निकरिके सान्ति के साथ चले जई।” 37 पय पवलुस उनसे कहिन, “ऊँ पंचे हमहीं जउन रोमी नागरिक आहेन, दोसी ठहराए बिना, मनइन के आँगे मारिन अउर जेल माहीं डरबाय दिहिन, अउर अब चुप्पय से हमहीं भगाय देँइ चाहत हँ? अइसन न होई, ऊँ पंचे खुदय आइके हमहीं पंचन काहीं बहिरे लइ जाँय।” 38 तब सिपाही जाइके इआ बात हाकिमन काहीं बताइन, अउर ऊँ पंचे इआ सुनिके कि पवलुस अउर सीलास रोमी नागरिक आहीं, डेराइगें। 39 अउर आइके उनसे माफी माँगिन, अउर बहिरे लइ जाइके बिनती करत रहिगें, कि अपना पंचे सहर से चले जई। 40 तब पवलुस अउर सीलास जेल से निकरिके लुदिया के घर चलेगें, अउर भाई-बहिनिन से मिलिके उनहीं सान्ति दिहिन, अउर उहाँ से चलेगें।

## थिस्सलुनीके सहर माहीं पवलुस अउर सीलास

17 ओखे बाद पवलुस अउर सीलास, अम्फिपुलिस सहर अउर अपुल्लोनिया सहर होइके थिस्सलुनीके सहर माहीं आएँ, जहाँ यहूदी लोगन के सभाघर रहा हय। 2 तब पवलुस अपने रीति के मुताबिक उनखे लघे गें, अउर तीन पबित्र दिनन काहीं, पबित्र सास्त्र से उनखे साथ बातचीत किहिन। 3 अउर बचनन के मतलब, पबित्र सास्त्र से ढूँढ़-ढूँढ़िके समझाबत रहे हँय, कि “मसीह काहीं दुख उठाउब, अउर मरेन म से जि उठब जरूरी रहा हय; अउर ईन यीसु जिनखर हम तौंहई पंचन काहीं कथा सुनाइत हएन, मसीह आहीं।” 4 उनमा से कुछ जने, अउर भक्त यूनानी जाति म से खुब जने अउर जउने मेहेरिन के समाज माहीं आदर रहा हय, ऊँ पंचे उनखे बात के बिसुआस किहिन, अउर पवलुस अउर सीलास के साथ मिल गई। 5 पय यहूदी लोग इरसा से भरिके, बजारन माहीं रहँइ बाले गुंडन काहीं अपने साथ एकट्ठा कइके, अउर भीड़ लगाइके सहर माहीं हुल्लड़ मचामँड लागें, अउर यासोन नाम के मनई के घर माहीं चढ़ाई कइके, पवलुस अउर सीलास काहीं भीड़ के मनइन के लघे लइ आमँड चाहत रहे हँय। 6 अउर ऊँ पंचे पवलुस अउर सीलास काहीं उहाँ न पाइके, “इआ चिल्लात यासोन अउर कुछ बिसुआसी भाइन काहीं सहर के हाकिमन के लघे खसेलके लइ आएँ, अउर कहँइ लागें, कि ई पंचे सगली दुनिया माहीं उथल-पुथल मचामँड

बाले इहँव आइगे हँय।<sup>7</sup> अउर यासोन उनहीं अपने घर माहीं ठहराए रहा हय, अउर 'ई पंचे सगले जन इआ कहत हें, कि यीसु राजा आहीं', अउर राजा कैसर के हुकुमन के बिरोध करत हें।"<sup>8</sup> ऊँ पंचे मनइन काहीं अउर सहर के हाकिमन काहीं इआ बात सुनाइके घबराय दिहिन।<sup>9</sup> अउर इआमेर से ऊँ पंचे यासोन अउर बाँकी सगले मनइन काहीं, जमानत के मुचलका लइके छोंड दिहिन।

### बिरिया सहर माहीं पवलुस अउर सीलास

<sup>10</sup> बिसुआसी भाई लोग तुरन्तय रातय रात पवलुस अउर सीलास काहीं बिरिया सहर माहीं पठय दिहिन, अउर ऊँ पंचे उहाँ पहुँचिके यहूदी लोगन के सभाघर माहीं गें।<sup>11</sup> पय उहाँ के सगले मनई थिस्सलुनीके सहर के मनइन से निकहे रहे हँय, अउर ऊँ पंचे पूरे मन से पवलुस के बताए बचन काहीं सुनिके अपनाइन, अउर हरेक दिन पबित्र सास्त्र माहीं ढूँढत रहे हँय, कि ई बातँय इहइमेर लिखी हई कि नहीं।<sup>12</sup> इआमेर से उनमा से खुब जने, अउर जउने यूनानी मेहेरिन के समाज माहीं आदर रहा हय, ऊँ पंचे, अउर मंसेरुअन म से खुब जने बिसुआस किहिन।<sup>13</sup> पय जब थिस्सलुनीके सहर के यहूदी लोग जानिगें, कि पवलुस बिरिया सहर माहीं घलाय परमातिमा के बचन सुनाबत हें, त उहाँ घलाय आइके मनइन काहीं उकसाइके हुल्लड़ मचामँड लागें।<sup>14</sup> तब उहाँ के भाई-बहिनी पवलुस काहीं, उहाँ से बिदा कइ दिहिन, कि समुद्र के किनारे-किनारे चले जाँय; पय सीलास अउर तीमुथियुस उहँय रहिगें।<sup>15</sup> पवलुस काहीं पहुँचामँड बाले उनहीं एथेंस सहर तक पहुँचाइन, अउर सीलास अउर तीमुथियुस के खातिर इआ हुकुम दइके चलेगें, कि उनखे लघे खुब हरबी आमँड।

### एथेंस सहर माहीं पवलुस

<sup>16</sup> जब पवलुस एथेंस सहर माहीं उनखे आमँड के इन्तजार कए रहे हँय, त सहर काहीं मूरतिन से भरा देखिके, उनखर जिव जरा जात रहा हय।<sup>17</sup> एसे पवलुस उहाँ के यहूदी सभाघर माहीं जाइके, यहूदी लोगन अउर भक्तन से अउर चउराहा माहीं जेतने मनई मिलत रहे हँय, उनसे हरेक दिन चरचा करत रहे हँय।<sup>18</sup> तब इपिकूरी अउर इसतोईकी पंडितन म से कुछ जने, पवलुस से "पबित्र सास्त्र के कुछ बचनन से पूँछ-ताँछ करँड लागें", अउर कुछ मनई कहँड लागें, कि "इआ बकबास करँड बाला मनई का कहँड चाहत हय?" पय अउर दूसर मनई कहँड लागें, "ऊँ दुसरे देउतन के प्रचार करँड बाले लागत हें", काहेकि ऊँ यीसु के अउर उनखे मरेन म से जि उठँय के खुसी के खबर के प्रचार करत रहे हँय।<sup>19</sup> तब ऊँ पंचे पवलुस काहीं पकड़िके अरियुपगुस के सभा माहीं अपने साथ लइगें, अउर पूँछिन, "हमहीं पंचन काहीं बताबा, कि जउन इआ नबा मत मनइन काहीं सुनउते हया, उआ का आय? <sup>20</sup> काहेकि तूँ अनोखी बातन काहीं हमहीं पंचन काहीं सुनउते हया, एसे हम पंचे जानँड चाहित हएन, कि इनखर का मतलब हय?"<sup>21</sup> (एसे कि सगले एथेंस सहर के अउर परदेसी जउन उहाँ रहत रहे हँय, नई-नई बात कहँय अउर सुनँय के अलाबा, अउर कउनव काम माहीं समय नहीं बिताबत रहे आँय।)

### अरियुपगुस के सभा माहीं पवलुस के भाँसन

<sup>22</sup> तब पवलुस अरियुपगुस के सभा के बीच माहीं ठाढ़ होइके कहिन; "हे एथेंस सहर के रहँड बाले मनइव, हम देखित हएन, कि तूँ पंचे हरेक बात माहीं देउतन काहीं खुब मानँड बाले हया।<sup>23</sup> काहेकि जब हम सहर माहीं घूमत रहेन हय, उआ समय तौहरे पूँजय बाली चीजन काहीं देखत रहेन हँय, त एकठे अइसन बेदी घलाय पाएन, जउने माहीं लिखा रहा हय, कि 'अनजान परमातिमा के खातिर बेदी।' एसे जिनहीं तूँ पंचे बिना देखे पुजते हया, हम तौहई पंचन काहीं उनहिन के खबर सुनाइत हएन।<sup>24</sup> जउन परमातिमा धरती, अउर धरती के सगली चीजन काहीं बनाइन हीं, ऊँ स्वरग अउर धरती के मालिक होइके, हाँथ के बनाए मन्दिर माहीं नहीं रहँय।

<sup>25</sup> उनहीं कउनव चीज के कमी नहीं आय, एसे ऊँ मनइन के हाँथ से सेवा नहीं करामँय, काहेकि ऊँ त खुदय सब काहीं जीवन अउर साँस अउर सब कुछ देत हें।<sup>26</sup> परमातिमा एकयठे मनई से मनइन के सगली जातिअन काहीं सगली धरती माहीं रहँड के खातिर बनाइन हीं; अउर उँडन मनइन के रहँड के खातिर समय निश्चित कइ दिहिन हीं।<sup>27</sup> कि ऊँ पंचे परमातिमा काहीं ढूँढँय, होइ सकत हय, कि ऊँ पंचे ढूँढिके पाय जाँय, तऊँ ऊँ हमरे पंचन म से कोहू से दूरी नहीं आहीं! <sup>28</sup> काहेकि हम पंचे उनहिन माहीं जिन्दा रहित हएन, अउर चलित फिरित, अउर मजबूत रहित हएन; जइसन तौहार पंचन के कुछ कबी घलाय कहिन हीं, कि 'हमहूँ पंचे उनहिन के बंस आहेन।'<sup>29</sup> काहेकि हम पंचे परमातिमा के सन्तान आहेन, एसे हमहीं इआ कबहूँ न सोचँड चाही, कि परमातिमा सोने, इआ रूपे, इआ पथरा कि नाई हें, जउन मनई के कारीगरी अउर कल्पना से गढ़े गे होय।<sup>30</sup> एसे परमातिमा हमरे पंचन के अग्यानता के समय माहीं आनाकानी कइके, अब हर जघन के सगले मनइन काहीं, अपने मन काहीं बदलँड के हुकुम देत हें।<sup>31</sup> काहेकि परमातिमा एकठे दिन निश्चित किहिन हीं, जउने माहीं ऊँ, उआ मनई के द्वारा धरम से संसार के मनइन के न्याय करिहँय, जिनहीं ऊँ ठहराइन हीं, अउर उनहीं मरेन म से जिन्दा कइके, ई सगली बातन काहीं निश्चित कइ दिहिन हीं।"

<sup>32</sup> मरेन म से जिन्दा होइ के बातन काहीं सुनिके, खुब मनई उनखर हँसी उडामँड लागें, अउर कुछ जने कहँड लागें, ई बातन काहीं पुनि कबहूँ हम पंचे तौहसे सुनब।<sup>33</sup> इआ बात काहीं सुनिके, पवलुस उनखे बीच म से निकरिके चलेगें।<sup>34</sup> पय कइअक जने उनखे बात के बिसुआस किहिन, अउर उनखे साथ मिलिगें, जउने माहीं दियुनुसियुस नाम के एकठे मनई रहे हँय, जउन अरियुपगुस के सभा के सदस्य रहे हँय, अउर दमरिस नाम के एकठे मेहेरिआ रही हँय, अउर उनखे साथ अउरव कुछ मनई रहे हँय।

### कुरिन्थुस सहर माहीं पवलुस

**18** एखे बाद पवलुस एथेंस सहर काहीं छोड़िके, कुरिन्थुस सहर माहीं आएँ।<sup>2</sup> अउर उहाँ अक्विला नाम के एकठे यहूदी मनई मिलें, जिनखर जनम पुन्तुस सहर माहीं भ रहा हय; ऊँ अपने मेहेरिआ प्रिस्किल्ला के साथ इटली सहर माहीं उहय समय अउबय भे रहे हँय, काहेकि राजा क्लौदियुस सगले यहूदी लोगन काहीं, रोम देस से निकर जाँड के हुकुम दिहिन रहा हय, एहिन से ऊँ पंचे उहाँ गे रहे हँय।<sup>3</sup> अउर पवलुस अउर उनखर काम धन्धा एकय रहा हय, एसे पवलुस उनहिन के लघे ठहरें, अउर ऊँ पंचे मिलिके काम करँड लागें, अउर ऊँ पंचे तम्बू बनामँड के काम करत रहे हँय।<sup>4</sup> अउर पवलुस हरेक पबित्र दिन काहीं, यहूदी सभाघर माहीं जाइके चरचा कइके, यहूदी लोगन काहीं, अउर यूनानी जाति के मनइन काहीं घलाय समझाबत रहे हँय।

<sup>5</sup> जब सीलास अउर तीमुथियुस मकिदुनिया प्रदेस से आएँ, त पवलुस बचन सुनामँड के धुन माहीं लगे रहे हँय, अउर यहूदी लोगन काहीं गबाही देत रहे हँय, कि "यीसुअय मसीह आहीं।"<sup>6</sup> पय जब ऊँ पंचे उनखर बिरोध अउर बुराई करँड लागें, त पवलुस आपन ओन्हा फारिके उनसे कहिन; "जउन तूँ पंचे इआ कइ रहे हया, ओखर सजा तुहिन पंचे पड़हा, हम निरदोस हएन, अब से हम गैरयहूदी लोगन के लघे जाब।"<sup>7</sup> अउर पवलुस उहाँ से चल दिहिन, अउर ऊँ तीतुस युस्तुस नाम के एकठे परमातिमा के भक्त के घर माहीं पहुँचे, अउर उनखर घर यहूदी लोगन के सभाघर के लघेन रहा हय।<sup>8</sup> तब सभाघर के मुखिया क्रिस्पुस अपने सगले परिवार समेत प्रभू के ऊपर बिसुआस किहिन; अउर कुरिन्थ सहर माहीं रहँड बाले खुब मनई सुनिके बिसुआस किहिन, अउर बपतिस्मा लिहिन।<sup>9</sup> अउर प्रभू रात माहीं पवलुस से दरसन माहीं कहिन, "डेरा न, बलकिन कहे जा, अउर चुप्पय न रहा।<sup>10</sup> काहेकि हम तौहरे साथ हएन, अउर कोऊ तौहरे ऊपर चढ़ाई कइके तौहई नुकसान न पहुँचाई; काहेकि इआ सहर माहीं हमार खुब भक्त हें।"<sup>11</sup> एसे पवलुस उहाँ उनखे बीच माहीं परमातिमा के बचन सिखाबत डेढ़ बरिस तक रहिगें।

12 जब गल्लियो अखाया प्रदेस के राजपाल रहे हँय, उहय समय यहूदी लोग साहुत बाँधिके, पवलुस के ऊपर चढ़ाई किहिन, अउर उन्हीं पकड़िके न्याय सभा के सिंहासन के लघे लड़ जाइके कहँइ लागें, 13 "ई, मनइन काहीं इआ समझाबत हें, कि परमातिमा के अराधना अइसन करँय, जउन मूसा के बिधान के बिपरीत हय।" 14 जब पवलुस बोलँइ बाले रहे हँय, तब राजपाल गल्लियो यहूदी लोगन से कहिन; "हे यहूदी जाति के मनइव, अगर इआ कुछ अन्याय इआ कि दुस्तता के बात होत, त इआ उचित होत, कि हम तौहरे बात काहीं सुनित। 15 पय अगर इआ बाद-बिबाद सबदन, अउर नामन, अउर तौहरे इहाँ के बिधान के बारे माहीं हय, त तुहिन पंचे जाना; काहेकि हम ई बातन के न्यायी नहीं बनँइ चाहीं।" 16 अउर राजपाल उन्हीं न्याय के सिंहासन के सामने से निकरबाय दिहिन। 17 तब सगले मनई यहूदी सभाघर के मुखिया, सोस्थिनेस काहीं पकड़िके न्याय सिंहासन के आँगे मारिन, पय राजपाल गल्लियो, ई बातन के कुछ चिन्ता नहीं किहिन।

### अन्ताकिया सहर माहीं पवलुस के लउटब

18 पवलुस खुब दिना तक उहाँ रहिगें, ओखे बाद भाई-बहिनिन से बिदा लइके, किखिया सहर माहीं आपन मूँड मुड़ाइन, काहेकि ऊँ मन्नत मानिन रहा हय, अउर ओखे बाद जल जिहाज माहीं चढ़िके सीरिया प्रदेस काहीं चल दिहिन, अउर उनखे साथ प्रिस्किल्ला अउर अक्विला घलाय रहे हँय। 19 अउर पवलुस इफिसुस सहर माहीं पहुँचिके, प्रिस्किल्ला अउर अक्विला काहीं उहँइ छोंडि दिहिन, अउर खुद यहूदी सभाघर माहीं जाइके, यहूदी लोगन से चरचा करँइ लागें। 20 अउर जब उहाँ के मनई उनसे बिनती किहिन, कि कुछ दिना अउर अपना हमरे पंचन के साथ माहीं रही, तब पवलुस उनखर बात नहीं मानिन। 21 अउर पवलुस उनसे इआ कहिके बिदा लिहिन, कि "अगर परमातिमा चहिहँय, त पुनि हम तौहरे पंचन के लघे अउबा।" तब इफिसुस सहर से जिहाज खोलिके चल दिहिन, 22 अउर कैसरिया सहर माहीं उतरिके, यरूसलेम सहर माहीं गें, अउर मसीही मन्डली के मनइन से मिलिके अन्ताकिया सहर माहीं आइगें।

### पवलुस के तीसर प्रचार-यात्रा

23 अउर उहाँ कुछ दिना रहे के बाद पवलुस उहाँ से चलेगें, अउर एक तरफ से गलातिया अउर फ्रुगिया प्रदेसन माहीं, सगले चेलन काहीं बिसुआस माहीं मजबूत करत आँगे बढ़िगें।

### इफिसुस सहर माहीं अपुल्लोस

24 अउर उहँय अपुल्लोस नाम के एकठे यहूदी रहे हँय, जउन सिकन्दरिया सहर माहीं पइदा भे रहे हँय, ऊँ निकहे भाँसन देँइ बाले रहे हँय, अउर पबित्र सास्त्र के उन्हीं बड़ा ग्यान रहा हय, ऊँ इफिसुस सहर माहीं आए रहे हँय। 25 ऊँ प्रभू के सही गइल माहीं चलँइ के सिच्छा पाइन रहा हय, अउर पूरा मन लगाइके यीसु के बारे माहीं सही-सही बचन सुनाबत, अउर सिखाबत रहे हँय, पय ऊँ केबल यूहन्ना बपतिस्मा देँइ बालेन के बातन काहीं भर जानत रहे हँय। 26 ऊँ यहूदी सभाघर माहीं निडर होइके बोलँइ लागें, अउर प्रिस्किल्ला अउर अक्विला उनखे बातन काहीं सुनिके उन्हीं अपने घर लइगें, अउर परमातिमा के बातन काहीं अउर निकहा से उन्हीं बताइन। 27 अउर अपुल्लोस जब अखाया सहर माहीं जाँइ के निश्चित किहिन। एसे उहाँ के भाई-बहिनी उनखर ढाढस बाँधाइके चेलन काहीं लिखिन, कि "ऊँ पंचे उनसे निकहा से मिलँय", अउर ऊँ उहाँ पहुँचिके उनखर बड़ी मदत किहिन, जउन परमातिमा के किरपा से यीसु के ऊपर बिसुआस किहिन रहा हय। 28 काहेकि ऊँ पबित्र सास्त्र से सबूत दइ-दइके, कि "यीसुअय मसीह आहीं"; बड़े साहस के साथ यहूदी लोगन काहीं, सगलेन के अँगुअय पबित्र सास्त्र के बचन से उन्हीं चुप करत रहिगें।

### इफिसुस सहर माहीं पवलुस

19 अउर जब अपुल्लोस कुरिन्थुस सहर माहीं रहे हँय, तब पवलुस ऊपर के सगले प्रदेसन से होत, इफिसुस सहर माहीं आएँ, अउर उहाँ कइयकठे चेला मिलें, 2 त उनसे कहिन; "का तूँ पंचे बिसुआस करत समय पबित्र आत्मा पाया तय?" तब ऊँ पंचे उनसे कहिन, "हम पंचे त पबित्र आत्मा के चरचव तक नहीं सुने आहैन।" 3 तब पवलुस उनसे कहिन; "त पुनि तूँ पंचे केखर बपतिस्मा लिहे हया?" ऊँ पंचे कहिन, "यूहन्ना बपतिस्मा देँइ बाले के बपतिस्मा लिहेन हय।" 4 तब पवलुस कहिन; "यूहन्ना बपतिस्मा देँइ बाले इआ कहिके मन काहीं बदलँइ के बपतिस्मा दिहिन रहा हय, कि जउन हमरे बाद आमँइ बाले हें, उनखे ऊपर अरथात यीसु के ऊपर बिसुआस किहा।" 5 इआ सुनिके ऊँ पंचे प्रभू यीसु के नाम से बपतिस्मा लिहिन। 6 अउर जब पवलुस उनखे ऊपर आपन हाँथ धरिन, त उनखे ऊपर पबित्र आत्मा उतरा, अउर ऊँ पंचे अलग-अलग भाँसा बोलँइ लागें, अउर भबिस्यबानी करँइ लागें। 7 कुल मिलाइके ऊँ पंचे बारा जने के करीब रहे हँय।

8 अउर पवलुस यहूदी सभाघर माहीं जाइ-जाइके, तीन महीना तक निडर होइके बोलत रहिगें, अउर परमातिमा के राज के बारे माहीं, यहूदी लोगन के साथ चरचा कइके समझाबत रहिगें। 9 पय जब कुछ जने बड़े हठी रहे हँय, अउर उनखे बातन काहीं नहीं मानिन, बलकिन सगले मनइन के अँगुअय इआ पंथ काहीं भला-बुरा कहँइ लागें, तब पवलुस उन्हीं छोंडिके चेलन काहीं अलग कइ लिहिन, अउर हरेक दिन तुरन्नुस के पाठसाला माहीं तर्क-वितर्क करत रहे हँय। 10 दुइ बरिस तक इहय होत रहिगा, इहाँ तक कि आसिया प्रदेस के रहँइ बाले का यहूदी लोग, का यूनानी जाति के मनई सगले जन प्रभू के बचन काहीं सुन लिहिन।

### स्कीवा के सातठे लड़िका

11 अउर परमातिमा पवलुस के हाँथेन से सामर्थ के अदभुत काम देखाबत रहे हँय। 12 इहाँ तक कि कुछ मनई उरमाल अउर अँगुअन काहीं पवलुस के देह माहीं छुआयके, बिमारन काहीं ओढ़ाबत रहे हँय, अउर उनखर बिमारी दूर होइ जात रही हय; अउर बुरी आत्मा घलाय उनमा से निकर जा करत रही हँय। 13 पय कुछ यहूदी लोग जउन झारत-फूँकत घूमत रहे हँय, इआ करँइ लागें, कि जिन माहीं बुरी आत्मा होंय, त उनखे ऊपर प्रभू यीसु के नाम से इआ कहिके फूँकय लागें, कि जउने यीसु के प्रचार पवलुस करत हें, हम तौहई उनहिन के कसम देइत हएन। 14 स्कीवा नाम के एकठे यहूदी जाति के महायाजक के सातठे लड़िका रहे हँय, जउन इहइमेर करत रहे हँय। 15 पय बुरी आत्मा जबाब दिहिस, कि "हम यीसु काहीं जानित हएन, अउर पवलुस काहीं घलाय पहिचानित हएन; पय तूँ पंचे को आह्या?" 16 अउर उआ मनई जउने माहीं बुरी आत्मा रही हय; उनखे ऊपर झपटिके, उन्हीं अपने काबू माहीं कइके, उनखे ऊपर अइसन उपदरव किहिस, कि ऊँ पंचे नंगे अउर चोटिल होइके, उआ घर से निकरिके भागिगें। 17 अउर इआ बात काहीं इफिसुस सहर के रहँइ बाले यहूदी लोग, अउर यूनानी जाति के मनई घलाय जानिगें, अउर उन सगलेन के ऊपर भय छाइगा; अउर प्रभू यीसु के नाम के बड़ाई भय। 18 अउर जेतने जन बिसुआस किहिन रहा हय, उनमा से खुब जने आइके अपने-अपने बुरे कामन काहीं सबके आँगे सोइकार कइ लिहिन। 19 अउर जादू करँइ बालेन म से खुब जने अपने-अपने पोथी-पत्रिन काहीं, एकट्ठा कइके सबके अँगुअय जराय दिहिन; अउर जब उनखर कीमत जोड़ी गे, त पचास हजार चाँदी के सिक्कन के बराबर निकरी। 20 इआमेर से प्रभू के बचन सामर्थ के साथ फइलत ग, अउर मजबूत होत ग।

21 जब ई बातें होइ चुकीं, त पवलुस अपने मन माहीं ठान लिहिन, कि मकिदुनिया प्रदेस अउर अखाया प्रदेस से होइके, यरूसलेम सहर माहीं जाब, अउर कहिन, कि उहाँ जाए के बाद हमहीं रोम देस काहीं घलाय देखब जरूरी हय। 22 एसे अपने सेबकन म से तीमुथियुस अउर इरास्तुस काहीं,

मकिदुनिया प्रदेस माहीं पठइके, खुद आसिया प्रदेस माहीं कुछ दिना रहिगें।

### इफिसुस सहर माहीं उपद्वरव

23 उआ समय इआ पंथ के बारे माहीं बड़ा हुल्लड़ भ। 24 काहेकि देमेत्रियुस नाम के एकठे सोनार अरतिमिस देबी के चाँदी के मन्दिर बनबाइके, कारीगरन काहीं खुब काम देबाबा करत रहा हय। 25 उआ उनहिन पंचन काहीं अउर इआ काम से जुड़े दुसरे कारीगरन काहीं, एकट्ठा किहिस अउर कहिस, “हे कारीगरव, का तूँ पंचे जनते हया, कि इआ काम माहीं हमहीं पंचन काहीं केतना धन मिलत हय। 26 अउर तूँ पंचे देखते अउर सुनते हया, कि केबल इफिसुस सहर भर माहीं नहीं, बलकिन सगले आसिया प्रदेस माहीं, पवलुस इआ कहि-कहिके खुब मनइन काहीं समझाइन अउर भरमाइन हीं, कि ‘जउन हाँथे के कारीगरी हई, ऊँ परमातिमा न होंहीं।’

27 अउर अब केबल इआ बातय भर के डेर न होय ही, कि हमार पंचन के इआ रोजिगार के बदनामी होई; बलकिन इआ, कि महान देबी अरतिमिस के मन्दिर तुच्छ समझा जई, अउर उनखर मान-सम्मान घट जई, जिनहीं सगले आसिया प्रदेस के मनई, अउर संसार के मनई पूजत हैं।”

28 ऊँ पंचे इआ बात काहीं सुनिके, खुब चन्डे चिल्लाइके कहँड लागे, “इफिसुस सहर के रहँड बाले मनइन के अरतिमिस देबी महान हई!”

29 अउर सगले सहर माहीं खुब हलचल मचिगा, अउर कुछ जने पवलुस के साथ यात्रा माहीं रहँड बाले, गयुस अउर अरिस्तरखुस काहीं जउन मकिदुनिया प्रदेस के रहँड बाले रहे हँय, पकड़ लिहिन, अउर एक चित्त होइके महासभा घर माहीं दउड़त लड़गें। 30 पय जब पवलुस उनखे लघे भीतर जाँय लागे, तब चेला लोग उनहीं नहीं जाँय दिहिन। 31 आसिया प्रदेस के हाकिमन म से घलाय जउन पवलुस के साथी रहे हँय, उनखे लघे कहबाय पठइन, अउर बिनती किहिन, कि ऊँ महासभा घर माहीं जाँइ के खतरा मोल न लेंय। 32 काहेकि उआ सभा माहीं बड़ी गड़बड़ी मची रही हय, कोऊ कुछ चिल्लात रहे हँय, अउर कोऊ कुछ; अउर कुछ जने त इआ जनतय नहीं रहें, कि हम पंचे इहाँ काहे के खातिर एकट्ठा भएन हँय। 33 तब ऊँ पंचे सिकन्दर नाम के एकठे यहूदी मनई काहीं जेही, ऊँ पंचे चुनिन रहा हय, भीड़ के मनइन म से ओही आँगे किहिन, अउर सिकन्दर अपने हाँथे से इसारा कइके, सगले मनइन के आँगे जबाब देंइ चाहत रहा हय। 34 पय जब ऊँ पंचे इआ जानिगें, कि उआ यहूदी आय, तब सगले मनई एकय अबाज माहीं करीब दुइ घन्टा तक चिल्लात रहिगें, कि इफिसुस सहर के रहँड बाले मनइन के अरतिमिस देबी महान हई। 35 तब सहर के मन्त्री सगले मनइन काहीं सान्त कइके कहिन; “हे इफिसुस सहर के रहँड बाले मनइव, को नहीं जानँय, कि इफिसुस सहर, महान देबी अरतिमिस के मन्दिर, अउर ज्यूस के तरफ से गिरी मूरत के सेबइक आय। 36 काहेकि ई बातन से इनकार नहीं कीन जाय सकय, त उचित हय, कि तूँ पंचे चुप्पय रहा; अउर बिना सोचे-बिचारे कुछ न करा। 37 काहेकि तूँ पंचे जउने मनइन काहीं लइ आए हया, ऊँ पंचे न त मन्दिर काहीं लुटइन बाले आहीं, अउर न हमरे पंचन के देबी के हँसी उड़ाँइ बाले आहीं। 38 अगर देमेत्रियुस अउर उनखे साथी कारीगरन के कोहू से बिबाद होय, त कचेहरी खुली हय, अउर हाकिम घलाय हैं; ऊँ पंचे एक दुसरे के ऊपर मुकदमा चलाय सकत हैं। 39 पय तूँ पंचे अगर अउर कउनव बात के बारे माहीं, कुछ पूँछय चहते हया, त निअत सभा माहीं फँडसला कीन जई। 40 काहेकि आज के बलबा के कारन हमरे ऊपर दोस लगाए जाँइ के डेर हय, एसे कि इआ सभा लगाँइ के कउनव कारन नहिँ आय, एसे हम इआ भीड़ के एकट्ठा होय के कउनव जबाब न दइ सकब।” 41 अउर इआ कहिके ऊँ सभा के मनइन काहीं बिदा किहिन।

मकिदुनिया प्रदेस, यूनान प्रदेस अउर त्रोआस सहर माहीं पवलुस

20 जब हुल्लड़ कम होइगा, तब पवलुस चेलन काहीं बोलाइके समझाइन, अउर उनसे बिदा लइके मकिदुनिया प्रदेस कइती चल दिहिन। 2 अउर उआ सगले प्रदेस म से होइके उहाँ रहँड बाले चेलन के

उत्साह काहीं बढ़ाइके, ऊँ यूनान प्रदेस माहीं आइगें। 3 अउर उहाँ तीन महीना रहे के बाद, जल जिहाज से सीरिया प्रदेस कइती जाँइ बाले रहे हँय, तब यहूदी लोग उनखे घात माहीं लगिगें, एसे ऊँ इआ निश्चय किहिन, कि हम मकिदुनिया प्रदेस होइके लउटि जाब। 4 तब बिरिया सहर के पुरूस के लड़िका सोपत्रुस अउर थिस्लोनी सहर के रहँड बालेन म से अरिस्तरखुस अउर सिकुन्दुस अउर दिरबे के गयुस, अउर तीमुथियुस अउर आसिया प्रदेस के तुखिकुस अउर त्रुफिमस आसिया प्रदेस तक पवलुस के साथ माहीं आएँ। 5 अउर ऊँ पंचे आँगे जाइके त्रोआस सहर माहीं हमार पंचन के इन्तजार करत रहिगें। 6 अउर हम पंचे बिना खमीर के रोटी खाँइ बाले तेउहार के दिनन के बाद, फिलिप्पी सहर से जल जिहाज माहीं चढ़िके. पाँच दिन माहीं त्रोआस सहर माहीं उनखे लघे पहुँचैन, अउर सात दिना तक उहँय रहेन।

### त्रोआस सहर माहीं यूतुखुस काहीं जिआउब

7 हप्ता के पहिलय दिना जब हम पंचे रोटी टोरँड के खातिर एकट्ठा भएन, त पवलुस जउन दुसरे दिना चले जाँय बाले रहे हँय, उनसे बात करँड लागे, अउर आधी रात तक बात करत रहिगें। 8 जउने अँटरिया माहीं हम पंचे एकट्ठा रहेन हँय, ओमाहीं खुब दिया बरत रहे हँय। 9 अउर यूतुखुस नाम के एकठे नवजमान झँकिया माहीं बइठ रहा हय, अउर उआ मारे नींद के गिरत रहा हय, अउर जब पवलुस खुब देर तक बात करत रहिगें, त उआ मारे नींद के तिसरे अँटरिया से नीचे गिर परा, अउर जब ओही उठाइन त उआ मरिगा रहा हय। 10 पय पवलुस अँटरिया से नीचे उतरिके ओसे लपिटिगें, अउर ओही अपने गले लगाइके कहिन; “सब कोऊ घबरा न; काहेकि ओखर प्राण नहीं निकरा आय।” 11 अउर ऊपर अँटरिया माहीं जाइके रोटी टोरिन, अउर खाइके खुब देर तक उनसे बातँय करत रहिगें, अउर भिनसार होइगा, तब पवलुस उहाँ से चलेगें। 12 अउर सगले जन उआ लड़िका काहीं जिन्दा लइ आएँ, अउर उनहीं बड़ी सान्ति मिली।

### त्रोआस सहर से मितुलेने सहर तक के पवलुस के यात्रा

13 हम पंचे पहिलेन से जल जिहाज माहीं चढ़िके, अस्सुस सहर तक इआ बिचार से आँगे गएन, कि उहाँ से हम पंचे पवलुस काहीं जिहाज माहीं चढ़ाय लेई, काहेकि पवलुस उहँय से जिहाज माहीं चढ़ँइ के खातिर कहिन रहा हय, एसे कि ऊँ उहाँ तक खुदय पड़दल जाँइ बाले रहे हँय। 14 जब ऊँ हमहीं पंचन काहीं अस्सुस माहीं मिलें, त हम पंचे उनहीं जिहाज माहीं चढ़ाइके मितुलेने सहर माहीं आएन। 15 अउर उहाँ से जिहाज काहीं छोरिके हम पंचे दुसरे दिना खियुस टापू के सउहें पहुँचैन, अउर तिसरे दिना सामुस टापू माहीं पहुँचैन, अउर ओखे दुसरे दिना मिलेतुस सहर माहीं पहुँच गएन। 16 काहेकि पवलुस इफिसुस के लघे से होइके जाँइ के निश्चित किहिन रहा हय, कि कहँव अइसा न होय, कि उनहीं आसिया प्रदेस माहीं देर होइ जाय; काहेकि ऊँ हरबिरी माहीं रहे हँय, कि अगर होइ सकय त ऊँ पिन्तेकुस्त के दिन यरूसलेम सहर माहीं रहँय।

### इफिसुस के धारमिक अँगुन काहीं उपदेस

17 अउर ऊँ मिलेतुस सहर से इफिसुस सहर माहीं सँदेस पठबाइके, मसीही मन्डली के अँगुन काहीं बोलबाइन। 18 जब ऊँ पंचे उनखे लघे आएँ, तब उनसे कहिन, “का अपना पंचे जानित हएन, कि पहिलय दिना से जब हम आसिया प्रदेस माहीं पहुँचैन त, हम हर समय अपना पंचेन के साथ कउनमेर से रहेन हय। 19 मतलब बड़ी दीनता से, अउर आँसू बहाय-बहाइके, अउर उन परिच्छन माहीं जउन यहूदी लोगन के खड़यन्त्र के कारन हमरे ऊपर आय परी रही हँय; हम प्रभू के सेबा करत रहि गएन। 20 अउर जउन-जउन बातँय अपना पंचन के फायदा के रही हँय, उनहीं बताँइ माहीं अउर घर-घर जाइके मनइन काहीं सिखामँइ माहीं कबहूँ अरचन नहीं मानेन। 21 हम यहूदी लोगन अउर यूनानी लोगन के आँगे इआ गबाही देत रहि गएन, कि परमातिमा कइती अपने मन काहीं लगाबा, अउर हमरे पंचन के प्रभू

यीसु मसीह के ऊपर बिसुआस करा।<sup>22</sup> अउर अब देखी, हम पबित्र आत्मा के अधीन होइके, यरूसलेम सहर माहीं जइत हएन, अउर नहीं जानी, कि उहाँ हमरे ऊपर का-का बीती? <sup>23</sup> केबल इआ कि पबित्र आत्मा हरेक सहरन माहीं गबाही दइ-दइके हमसे कहत हय, कि बन्धन अउर दुख तौहरे खातिर तइआर हय। <sup>24</sup> पय हम अपने प्रान काहीं कुछ नहीं समझी, कि ओही पियाय जानी, बलकिन इआ, कि हम अपने दउड़ अउर उआ सेबकाई काहीं पूर करी, जउन हम परमातिमा के किरपा के खुसी के खबर के गबाही दें के खातिर प्रभू यीसु से पाएन हय। <sup>25</sup> अउर अब देखी, हम जानित हएन कि, अपना पंचन म से कोऊ, जिनखे बीच माहीं हम परमातिमा के राज के प्रचार करत फिरेन हय, हमार मुँह पुनि कबहूँ न देखे पाउब। <sup>26</sup> एसे हम अजुअय अपना पंचन से गबाही दइके कहित हएन, कि हम अपना पंचन म से कोहू के खून के दोसी नहीं आहैन। <sup>27</sup> काहेकि परमातिमा के पूरी इच्छा काहीं हम अपना पंचन काहीं पूरी तरह से बतामँइ माहीं कबहूँ नहीं हिचकिचानेन। <sup>28</sup> एसे अपना पंचे आपन अउर अपने पूरे झुन्ड के रखबारी करी; जउने खातिर पबित्र आत्मा अपना पंचन काहीं अँगुआ ठहराइन हीं; कि अपना पंचे परमातिमा के मसीही मन्डली के रखबारी करी, जेही ऊँ अपने खून से मोल लिहिन हीं। <sup>29</sup> हम जानित हएन, कि हमरे बाद खतरनाक डगर अपना पंचन के बीच माहीं अइहँय, जउन इआ झुन्ड काहीं न छोड़ि हँय। <sup>30</sup> इहाँ तक कि अपना पंचन के बीचय म से अइसन मनई तइआर होइहँय, जउन चेलन काहीं अपने पीछे खीच लेंड के खातिर, बातन काहीं टोर-मरोरिके कइहँय। <sup>31</sup> एसे जागत रहा; अउर सुध करा; कि हम तीन बरिस तक रात-दिना आँसू बहाय-बहाइके, हरेक जन काहीं चेतउनी देब नहीं छोड़ें। <sup>32</sup> अउर अब हम अपना पंचन काहीं परमातिमा काहीं, अउर उनखे किरपा के बचन काहीं सँउपे देइत हएन; जउन अपना पंचन के उन्नति कइ सकत हैं, अउर सगले पबित्र कीन मनइन के साथ अपना पंचन काहीं बारिसदार बनाय सकत हैं। <sup>33</sup> हम कोहू के चाँदी, सोने के इआ कि ओन्हा के लालच नहीं किहेन। <sup>34</sup> अपना पंचे खुदय जानित हएन, कि हम अपने ईन हाँथन से, आपन अउर अपने साथिन के जरूरतन काहीं पूरी किहेन हय। <sup>35</sup> अउर हम अपना पंचन काहीं सब कुछ कइके देखायन हय, कि कउनमेर से मेहनत कइके कमजोर मनइन के मदत करँइ चाही, अउर हमहीं पंचन काहीं प्रभू यीसु के कहे उआ बचन काहीं हमेसा सुध रक्खँइ चाही, जउने काहीं ऊँ खुदय कहिन तय, कि 'लेंड से देब भला होत हय'।"

<sup>36</sup> इआ कहिके पवलुस घुटुआ के बल बइठिके उन सगलेन के साथय प्राथना किहिन। <sup>37</sup> तब ऊँ पंचे खुब रोइन अउर पवलुस के गले मिलिके उनहीं चूमँइ लागें। <sup>38</sup> काहेकि ऊँ पंचे इआ बात से दुखी रहे हँय, जउन पवलुस उनसे कहिन तय, कि "अपना पंचे हमार मुँह पुनि कबहूँ न देखे पाउब"; अउर ऊँ पंचे उनहीं जिहाज के लघे तक पहुँचाइन।

#### यरूसलेम सहर काहीं पवलुस के जाब

**21** जब हम पंचे उनसे अलग होइके जिहाज छोरेन, त सीधे गइल से कोस टापू माहीं आएन, अउर दुसरे दिना रूदुस सहर माहीं आएन, अउर उहाँ से पतरा नाम के जघा माहीं पहुँचेन। <sup>2</sup> अउर उहाँ से फीनीके सहर काहीं जाँइ बाला एकठे जिहाज मिला, तब हम पंचे ओमाहीं चढिके, ओही छोर दिहेन। <sup>3</sup> जब साइप्रस टापू देखान, जउने काहीं हम पंचे बाएँ हाँथ कइती छोड़ें, अउर सीरिया देस कइती चलिके सूर सहर माहीं उतरेन; काहेकि उहाँ जिहाज के समान उतारँय क रहा हय। <sup>4</sup> अउर उहाँ के चलन काहीं पाइके हम पंचे उहाँ सात दिना तक रहेन, तब ऊँ पंचे पबित्र आत्मा के प्रेरना से पवलुस से कहिन, कि यरूसलेम सहर माहीं न जया। <sup>5</sup> जब उहाँ रहँइ के दिन पूर होइगें, तब हम पंचे उहाँ से चल दिहेन; अउर उहाँ के सगले मनई लड़िका मेहेरिन समेत हमहीं सहर के बहिरे तक पहुँचाइन, अउर हम पंचे सगले जन समुद्र के किनारे घुटुअन के बल बइठिके प्राथना किहेन। <sup>6</sup> ओखे बाद एक दुसरे से बिदा होइके, हम पंचे त जिहाज माहीं चढि गएन, अउर ऊँ पंचे अपने-अपने घरय चलेगें।

<sup>7</sup> जब हम पंचे सूर सहर से जिहाज माहीं यात्रा पूर कइके, पतुलिमयिस सहर माहीं पहुँचेन, त उहाँ के बिसुआसी भाइन से मुलाखात कइके, हम पंचे उनखे साथ एक दिना रहेन। <sup>8</sup> अउर दुसरे दिना हम पंचे उहाँ से चलिके कैसरिया सहर माहीं आएन, अउर फिलिप्पुस के घर माहीं जाइके उनखे इहाँ रहेन, जउन खुसी के खबर के प्रचार करँइ बाले सातठे सेबकन म से रहे हँय। <sup>9</sup> उनखे चारठे कुमारी बिटिया रही हँय; जउन भबिस्यबानी करत रही हँय। <sup>10</sup> जब हम पंचे उहाँ खुब दिना रहि चुकेन, तब परमातिमा के सँदेस बतामँइ बाले अगबुस नाम के एक जने यहूदिया प्रदेस से आएँ। <sup>11</sup> अउर ऊँ हमरे लघे आइके पवलुस के अँगउछा लिहिन, अउर आपन हाँथ-गोड़ बाँधिके कहिन; पबित्र आत्मा इआ कहत हय, कि जउने मनई के इआ अँगउछा आय, उनहीं यरूसलेम सहर माहीं यहूदी लोग इहइमेर से बाँधिहँय, अउर गैरयहूदी लोगन के हाँथ माहीं सँउपि देइहँय। <sup>12</sup> जब हम पंचे ई बातन काहीं सुनेन, तब हम पंचे अउर उहाँ के मनई पवलुस से बिनती किहिन, कि ऊँ यरूसलेम सहर माहीं न जाँय। <sup>13</sup> पय पवलुस जबाब दिहिन, कि तूँ पंचे का करते हया, रोइ-रोइके हमरे मन काहीं कमजोर करते हया, हम त प्रभू यीसु के नाम के खातिर यरूसलेम सहर म न केबल बाँधे जाँइन भर काहीं नहीं, बलकिन मरऊँ के खातिर तइआर हएन। <sup>14</sup> जब ऊँ कोहू के बात नहीं मानिन, तब हम पंचे इआ कहिके चुप्पय होइ गएन, कि "प्रभू के इच्छा पूर होय।"

<sup>15</sup> अउर कुछ दिन के बाद हम पंचे तइआरी कइके यरूसलेम सहर काहीं चल दिहेन। <sup>16</sup> अउर कैसरिया सहर के घलाय खुब चेला हमरे पंचन के साथ चल दिहिन, अउर हमहीं मनासोन नाम के साइप्रस सहर के रहँइ बाले, एकठे पुरान चेला के घर माहीं लइ आएँ, कि हम पंचे उनखे इहाँ रुकी।

#### पवलुस के याकूब से भेंट

<sup>17</sup> जब हम पंचे यरूसलेम सहर माहीं पहुँचेन, तब उहाँ के बिसुआसी भाई बड़े आनन्द के साथ हमसे मिलें। <sup>18</sup> अउर दुसरे दिना पवलुस हमहीं पंचन काहीं लइके याकूब के लघे गें, जहाँ मसीही मन्डली के सगले अँगुआ एकट्ठा रहे हँय। <sup>19</sup> तब पवलुस उनहीं नबस्कार कइके, जउन-जउन काम परमातिमा उनखे सेबकाई के द्वारा, गैरयहूदी लोगन के बीच माहीं किहिन रहा हय, एक-एक कइके सब बताइन। <sup>20</sup> अउर ऊँ पंचे इआ सुनिके परमातिमा के महिमा किहिन, अउर ओखे बाद पवलुस से कहिन, "हे भाई, तूँ देखते हया, कि यहूदी लोगन म से कइअक हजार मनई प्रभू के ऊपर बिसुआस किहिन हीं; अउर सगले जने मूसा के बिधान काहीं मानँइ के खातिर धुन लगाए हें। <sup>21</sup> अउर उनहीं तौहरे बारे माहीं इआ बताबा ग हय, कि तूँ गैरयहूदी लोगन के बीच माहीं रहँइ बाले यहूदी लोगन काहीं, मूसा नबी के सिच्छा काहीं न मानँइ काहीं सिखउते हया, अउर कहते हया, कि न अपने लड़िकन-बच्चन के खतना कराया, अउर न उनखे बताई रीत के मुताबिक चला। <sup>22</sup> त बताबा का कीन जाय? काहेकि ऊँ पंचे जरूर सुनिहँय कि तूँ इहाँ आए हया। <sup>23</sup> एसे जउन हम पंचे तौहसे कहित हएन, उहयमेर करा, हमरे इहाँ चारठे मनई हें, ऊँ पंचे कउनव मन्नत मानिन हीं। <sup>24</sup> एसे उनहीं लइ जाइके उनखे साथ अपने-आप काहीं सुद्ध करा; अउर उनहीं खरचा के खातिर पइसा द्या, जउने ऊँ पंचे मूँइ मुड़ामँय, तब सगले जन जान लेइहँय, कि जउन बातँय उनहीं तौहरे बारे माहीं सिखाई गई हँय, उनमा कउनव सच्चाई नहीं आय, बलकिन तूँ खुदय मूसा के बिधान काहीं मानिके ओखे मुताबिक चलते हया। <sup>25</sup> पय गैरयहूदी लोगन के बारे माहीं जउन प्रभू के ऊपर बिसुआस किहिन हीं, हम पंचे इआ निरनय कइके उनहीं चिट्ठी लिखिके पठयन हय, कि ऊँ पंचे मूरतिन के आँगे बली कीन माँस खाँय से, अउर खून से, नेटई काटे पसुअन के माँस खाँय से, अउर ब्यभिचार से बचे रहँय।" <sup>26</sup> तब पवलुस ऊँ मनइन के साथ जाइके खुद काहीं सुद्ध किहिन, अउर दुसरे दिना उनखे साथ मन्दिर माहीं गें, अउर सुद्ध होइ के दिन, अरथात उनमा से हरेक के खातिर चढ़ाबा चढ़ाए जाँय के दिन पूर होइ के बारे माहीं, उनहीं पंचन काहीं बताय दिहिन।



### मन्दिर माहीं पवलुस के पकड़ा जाब

27 जब ऊँ सात दिना पूरय होइ बाले रहे हँय, तब आसिया प्रदेस के यहूदी जाति के कुछ मनई, पवलुस काहीं मन्दिर माहीं देखिके, उहाँ के सगले मनइन काहीं उकसाइन, अउर इआमेर से चिल्लाय-चिल्लाइके पवलुस काहीं पकड़ लिहिन। 28 कि, “हे इजराइल के रहँइ बाले मनइव मदत करा; इआ उहय मनई आय, जउन सगले मनइन काहीं, मूसा के बिधान के अउर इआ जघा के बिरोध माहीं, हर जघा सिखाबत हय, इहाँ तक कि यूनानी जाति के मनइन काहीं, मन्दिर माहीं लइआइके इआ पबित्र जघा काहीं अपबित्र कइ दिहिस ही।” 29 ऊँ पंचे त एसे पहिले इफिसुस सहर के रहँइ बाले त्रुफिमस काहीं, उनखे साथ सहर माहीं देखिन रहा हय, अउर इआ समझत रहे हँय, कि पवलुस उनहीं मन्दिर माहीं लइ आएँ हँय। 30 तब सगले सहर माहीं हलचल मचिगा, अउर उहाँ के सगले मनई दउड़िके एकट्ठा होइगें, अउर पवलुस काहीं पकड़िके मन्दिर के बहिरे खसेलि लाएँ, अउर हरबिन मन्दिर के दुअरा बंद कइ दीनगें। 31 जब ऊँ पंचे उनहीं मारि डारँय चाहत रहे हँय, तब सिपाहिन के मुखिया के लघे इआ खबर पहुँची, कि सगले यरूसलेम सहर माहीं हलचल मचा हय। 32 तब ऊँ हरबिन सिपाहिन अउर सुबेदारन काहीं लइके, उनखे लघे दउड़तय पहुँचिगें; अउर ऊँ पंचे सिपाहिन के मुखिया काहीं, अउर सिपाहिन काहीं देखिके, पवलुस काहीं मारब पीटब बंद कइ दिहिन। 33 तब सिपाहिन के मुखिया उनखे लघे आइके उनहीं पकड़ लिहिन; अउर दुइठे जंजीरन से बाँधय के हुकुम दइके पूँछँइ लागें, “ई को आहीं, अउर ई का किहिन ही?” 34 पय भीड़ के मनइन म से कुछ जने कुछ, त कुछ जने कुछ चिल्लात रहे हँय, अउर जब हुल्लाड के मारे असलिअत नहीं जाने पाइन, त उनहीं छावनी माहीं लइ जाँइ के हुकुम दिहिन। 35 पवलुस जब सिद्धिया के लघे पहुँचे, त अइसन भ कि भीड़ के सगले मनई उनहीं दबाए डारत रहे हँय, एसे सिपाही लोग उनहीं उठाइके भीतर लइगें। 36 काहेकि सगली भीड़ के मनई इआ चिल्लात उनखे पीछे परे रहे हँय, कि “ओही मार डारा।”

37 जब ऊँ पंचे पवलुस काहीं छावनी माहीं लइ जाँइ बाले रहे हँय, तब पवलुस सिपाहिन के मुखिया से कहिन; “का हम अपना से कुछ कहि सकित हएन?” तब सिपाहिन के मुखिया उनसे कहिन, “का तूँ यूनानी भाँसा जनते हया? 38 का तूँ मिस्र देस के उआ मनई न होह्या, जउन एखे पहिले बलबा कइके चार हजार कटार लए मनइन काहीं सुनसान जघा माहीं लइ गया तय?” 39 तब पवलुस कहिन, “हम त किलिकिया प्रदेस के मसहूर सहर तरसुस के रहँइ बाले यहूदी आहैन, अउर हम अपना से बिनती करित हएन, कि हमहीं ई मनइन से बात करँय देई।” 40 जब ऊँ बात करँइ के हुकुम दइ दिहिन, तब पवलुस सिद्धिया माहीं ठाढ़ होइके अपने हाँथ से लोगन काहीं इसारा किहिन; जब ऊँ पंचे सगले जन चुप्पय होइगें, तब ऊँ इब्रानी भाँसा माहीं बोलँइ लागें।

### भीड़ के मनइन के आँगे पवलुस के भाँसन

22 “हे भाई-बहिनिव, अउर बाप के समान बुजुर्गव हमार जबाब सुना, जउन अब हम तौहरे आँगे कहित हएन।” 2 ऊँ पंचे इआ सुनिके कि ऊँ हमसे इब्रानी भाँसा माहीं बोलत हें, अउरव चुप्पय होइगें। तब ऊँ कहिन, 3 “हम त यहूदी आहैन, जउन किलिकिया प्रदेस के तरसुस सहर माहीं पइदा भएन; पय इहय सहर माहीं गमलीएल के लघे बइठिके पढ़ाई किहैन हँय, अउर हमहीं बाप-दादन के बिधान काहीं सही रीति से सिखाबा ग; अउर परमातिमा के खातिर अइसन धुन लगाए रहेन हय, जइसन तूँ पंचे सगले जन आज लगाए हया। 4 अउर हम मेहेरिआ-मंसेरुआ दोनव काहीं बाँधे बाँधिके, अउर जेल माहीं डार डारिके, यीसु मसीह के ऊपर बिसुआस करँइ बालेन काहीं इहाँ तक सतायन, कि उनहीं मरबाय घलाय डारेन तय। 5 इआ बात के खातिर महायाजक अउर यहूदी समाज के धारमिक अँगुआ लोग गबाह हें; कि हम उनसे भाई-बहिनिन के नाम पर चिट्ठी लइके दमिस्क

सहर काहीं चले जात रहे हएन, कि उहाँ जेतने होय उनहूँ काहीं सजा देबामँइ के खातिर, बाँधिके यरूसलेम सहर माहीं ले आई।

### अपने हिरदँय के बदलँइ के बखान

(खास चेलन 9:1-19; 26:12-18)

6 जब हम चलत-चलत दमिस्क सहर के लघे पहुँचेन, त अइसन भ, कि दुपहर के करीब एकाएक एकठे बड़ी जोति अकास से हमरे चारिव कइती चमकी। 7 अउर हम भुँइ माहीं गिर परेन, अउर इआ बोल सुनान, कि ‘हे साऊल, हे साऊल, तूँ हमहीं काहे सतउते हया?’ हम जबाब दिहेन, ‘हे प्रभू, अपना को आहैन?’ 8 ऊँ हमसे कहिन; ‘हम नासरत गाँव के यीसु आहैन, जेही तूँ सतउते हया?’ 9 अउर हमार साथी लोग जोति त देखिन, पय जउन हमसे बात करत रहे हँय, उनखर बोल नहीं सुनिन। 10 तब हम कहेन; ‘हे प्रभू हम का करी?’ तब प्रभू हमसे कहिन, ‘उठिके दमिस्क सहर माहीं जा, अउर जउन कुछ तौहई करँइ के खातिर ठहराबा ग हय, उहाँ तौहसे सब बताय दीन जई।’ 11 जब उआ जोति के तेज के मारे हमहीं कुछ देखाई नहीं दिहिस, तब हम अपने साथिन के हाँथ पकड़े-पकड़े दमिस्क सहर माहीं आएन।

12 अउर हनन्याह नाम के मनई जउन मूसा के बिधान के मुताबिक भक्त, अउर जिनखर उहाँ के रहँइ बाले सगले यहूदी लोगन माहीं बड़ा नाम रहा हय, हमरे लघे आएँ। 13 अउर ठाढ़ होइके हमसे कहिन; ‘हे भाई साऊल पुनि देखँइ लाग’ उहय समय हमार आँखी खुल गई अउर हम उनहीं देखेन। 14 तब ऊँ कहिन; ‘हमरे बाप-दादन के परमातिमा तौहई एसे चुनिन हीं, कि तूँ उनखे मरजी काहीं जाना, अउर ऊँ धरमी काहीं देखा, अउर उनखे मुँह से बातँय सुना। 15 काहेकि, तूँ उनखे तरफ से सगले मनइन के आँगे उन बातन के गबाह होइहा, जउनेन काहीं तूँ देखे अउर सुने हया। 16 अब काहे देरी करते हया? उठा, बपतिस्मा ल्या, अउर उनखर नाम लइके अपने पापन काहीं धोय डारा।’

### गैरयहूदी लोगन के बीच माहीं प्रचार करँइ के आहवान

17 जब हम पुनि यरूसलेम सहर माहीं आइके मन्दिर माहीं प्राथना करत रहे हएन, त बेसुध होइ गएन। 18 अउर उनहीं देखेन, कि ऊँ हमसे कहत हें; ‘हरबी करा यरूसलेम सहर से तुरन्तय निकर जा, काहेकि ऊँ पंचे हमरे बारे माहीं तौहरे गबाही काहीं न मनि हँय।’ 19 हम कहेन, ‘हे प्रभू, ऊँ पंचे त खुदय जानत हें, कि हम अपना के ऊपर बिसुआस करँइ बालेन काहीं जेल माहीं डारत रहेन हँय, अउर हरेक जघन के यहूदी सभाघर माहीं पिटबाबत रहेन हँय। 20 अउर जब अपना के गबाही देँइ बाले स्तिफनुस के खून बहाबा जात रहा हय, तब हमहूँ घलाय उहाँ ठाढ़ रहेन हँय, अउर इआ काम माहीं सहमत रहेन हँय, अउर उनखर कतल करँइ बालेन के ओन्हन के रखबारी करत रहेन हँय।’ 21 अउर ऊँ हमसे कहिन, चले जा, ‘काहेकि हम तौहई गैरयहूदी लोगन के लघे दूरी-दूरी तक पठउब।’

22 ऊँ पंचे उनखर एतनी बात तक त सुनत रहिगें; ओखे बाद ऊँ पंचे खुब चन्डे चिल्लाने, कि “अइसन मनई काहीं मारि डारा; एखर जिन्दा रहब ठीक नहीं आय।” 23 जब ऊँ पंचे चिल्लात रहे हँय, अउर आपन ओन्हा उतारिके फेंकत रहे हँय, अउर अकास माहीं धूधुर उड़ाबत रहे हँय; 24 तब सिपाहिन के मुखिया कहिन; “उनहीं छावनी माहीं लइ जा; अउर चाबुक मारिके जाँच करा, कि हम जानी कि खुब मनई कउने कारन से उनखे बिरोध माहीं चिल्लाय रहे हँय।” 25 पय जब ऊँ पंचे उनहीं चाबुक मारँइ के खातिर बाँधत रहे हँय, तब पवलुस सुबेदार से जउन उनखे लघे ठाढ़ रहे हँय कहिन, “का इआ उचित हय, कि तूँ पंचे एकठे रोमी नागरिक काहीं, उहव बिना दोसी ठहराए चाबुक मारा?” 26 सुबेदार इआ सुनिके सिपाहिन के मुखिया के लघे जाइके कहिन; “अपना इआ का करित हएन? इआ मनई त रोमी नागरिक आय।” 27 तब सिपाहिन के मुखिया उनखे लघे आइके कहिन; “हमहीं बताबा, का तूँ रोमी नागरिक आह्या? ऊँ कहिन, ‘हाँ।’ 28 एतना सुनिके सिपाहिन के मुखिया कहिन; कि ‘हम रोमी नागरिक होइ के पद, खुब

रुपिआ दइके पाएन हय।' तब पवलुस कहिन, 'हम त पडदाइसी रोमी नागरिक आहैन।' 29 तब जउन मनई उनखर जाँच करई बाले रहे हँय, ऊँ पंचे तुरन्तय उनखे लघे से हटिगें; अउर सिपाहिन के मुखिया घलाय इआ जानिके कि 'ई रोमी नागरिक आहीं, अउर हम इनहीं बँध बायन हय', डेराइगें।"

### महासभा के आँगे पवलुस

30 दुसरे दिना ऊँ सही-सही जानई के इच्छा से, कि यहूदी लोग उनखे ऊपर काहे दोस लगाबत हें, उनखर बन्धन खोलबाय दिहिन; अउर प्रधान याजकन अउर महासभा के सगले सदस्सन काहीं एकट्ठा होंइ के हुकुम दिहिन, अउर पवलुस काहीं नीचे लइ जाइके उनखे आँगे ठाढ़ कइ दिहिन।

23 पवलुस महासभा के मनइन कइती टकटकी लगाए देखिन, अउर कहिन, "हे भाइव, हम आज तक परमातिमा के खातिर बेलकुल सच्चे बिबेक से जीवन बितायन हय।" 2 तब हनन्याह जउन प्रधान याजक रहे हँय, उनहीं जउन उनखे लघे ठाढ़ रहे हँय, उनखे मुँहे माहीं थापइ मारई काहीं हुकुम दिहिन। 3 तब पवलुस उनसे कहिन, "हे चून से पोती भीती के समान मनई, तौहरे ऊपर परमातिमा के मार परी, तूँ मूसा के बिधान के मुताबिक हमार न्याय करई के खातिर बइठ हया, त पुनि काहे मूसा के बिधान के खिलाफ हमहीं मारई के हुकुम देते हया?" 4 जउन उनखे लघे ठाढ़ रहे हँय, ऊँ पंचे कहिन, "तूँ परमातिमा के महायाजक काहीं भला-बुरा काहे कहते हया?" 5 पवलुस कहिन, "हे भाइव, हम नहीं जानत रहे आहैन, कि ई महायाजक आहीं; काहेकि पबित्र सास्त्र माहीं लिखा हय, कि अपने लोगन के प्रधान काहीं बुरा न कहा।"

6 तब पवलुस इआ जानिके, कि एकठे दल सदूकी लोगन के अउर दूसर दल फरीसी लोगन के आय, सभा माहीं खुब चन्डे कहिन, "हे भाइव, हम फरीसी आहैन काहेकि हम फरीसी लोगन के बंस माहीं पइदा भएन हँय, अउर मरे मनइन के आसा अउर मरेन म से जिन्दा होंइ के बारे माहीं, हमरे ऊपर मुकदमा चलाबा जाय रहा हया।" 7 जब पवलुस इआ बात कहिन, "त फरीसी लोगन अउर सदूकी लोगन माहीं झगड़ा होंइ लाग; अउर सभा माहीं फूट परिगे।" 8 काहेकि सदूकी दल बाले त इआ कहत हें, कि "न त मरे मनई दुबारा जिन्दा होंय, अउर न स्वरगदूत आहीं, अउर न आत्मा आय"; पय फरीसी दोनव माहीं बिसुआस करत हें। 9 तब बड़ा हल्ला मचिगा, अउर मूसा के बिधान सिखामँइ बाले कुछ जने जउन फरीसी लोगन के दल के रहे हँय, ठाढ़ होइके इआमेर कहिके झगड़ा करई लागें, कि "हम पंचे इआ मनई माहीं कउनव बुराई नहीं पाई; अउर अगर कउनव आत्मा, इआ कि स्वरगदूत उनसे बात किहिन हीं, त एसे का भ?" 10 जब खुब झगड़ा होइगा, तब सिपाहिन के मुखिया इआ डेर से, कि ऊँ पंचे पवलुस के टुकड़ा-टुकड़ा न कइ डारँय, सिपाहिन काहीं हुकुम दिहिन, कि "नीचे उतरिके पवलुस काहीं उनखे बीच म से जबरई निकारा, अउर छावनी माहीं लइ जा।"

11 उहय रात माहीं प्रभू, पवलुस के लघे आइके ठाढ़ भें अउर कहिन; "हे पवलुस, ढाढ़स बाँधा; काहेकि जइसन तूँ यरूसलेम सहर माहीं हमार गबाही दिहा हय, उहयमेर तौहई रोम देस माहीं घलाय गबाही देंइ क हय।"

### पवलुस के कतल के खड़यन्त्र

12 जब दिन भ, तब कुछ यहूदी लोग खड़यन्त्र रचिन, अउर कसम खाइन, कि "जब तक हम पंचे पवलुस काहीं मारि न डारी, तब तक हम पंचे अगर कुछ खई-पी त हमहीं धिक्कार हय।" 13 जेतने जने कसम खाइन रहा हय, ऊँ पंचे चालिस जने से जादा रहे हँय। 14 ऊँ पंचे प्रधान याजकन अउर यहूदी समाज के धारमिक अँगुन के लघे आइके कहिन, "हम पंचे इआ ठान लिहैन हय; कि जब तक पवलुस काहीं मारि न डारब, तब तक अगर कुछ खई, त हमहीं धिक्कार हय। 15 एसे अब महासभा के सदस्सन समेत सिपाहिन के मुखिया काहीं समझाबा, कि पवलुस काहीं ऊँ पंचे अपना पंचन के लघे लइ आमँइ, जउने उनहीं लागय, कि अपना पंचे उनखे बारे माहीं अउर ठीक से जाँच करई चाहित हएन, अउर हम पंचे उनखे इहाँ पहुँचय से

पहिलेन उनहीं मार डारँइ के खातिर तइआर रहब।" 16 अउर पवलुस के भइने जानिन, कि ऊँ पंचे पवलुस काहीं मारि डारँइ के घात माहीं हें, त ऊँ छावनी माहीं जाइके पवलुस काहीं इआ सँदेस बताय दिहिन। 17 तब पवलुस सुबेदारन म से एक जने काहीं, अपने लघे बोलाइके कहिन; "इआ नवजमान काहीं सिपाहिन के मुखिया के लघे लइ जा, इआ उनसे कुछ कहँय चाहत हय।" 18 एसे ऊँ सुबेदार उनहीं सिपाहिन के मुखिया के लघे लइ जाइके कहिन; "पवलुस नाम के बंदी हमहीं बोलाइके बिनती किहिन हीं, कि इआ नवजमान सिपाहिन के मुखिया से कुछ बात करँय चाहत हय; ओही उनखे लघे लइ जा।" 19 तब सिपाहिन के मुखिया उआ नवजमान के हाँथ पकड़िके, अउर अलग लइ जाइके पूँछिन; "तूँ हमसे का कहँइ चहते हया?" 20 तब ऊँ कहँइ लागें; "कुछ यहूदी लोग खड़यन्त्र रचिन हीं, कि अपना से बिनती करँय, कि पवलुस काहीं काल्ह महासभा म लइ आबा जाय, काहेकि ऊँ पंचे अउर ठीक से पवलुस के जाँच करई चाहत हें। 21 पय अपना उनखर बात न मानब, काहेकि उनमा से चालिस से जादा मनई उनखर कतल करई के घात माहीं हें, जउन इआ ठान लिहिन हीं, कि जब तक हम पंचे पवलुस काहीं मारि न डारब, तब तक कुछ खई-पी त हमहीं धिक्कार हय; अउर अबहिनय ऊँ तइआर हें अउर अपना के अनुमति के इन्तजार कइ रहे हँय।" 22 तब सिपाहिन के मुखिया उआ नवजमान काहीं इआ हुकुम दइके बिदा किहिन, कि "कोऊ से न बताया, कि तूँ हमसे ई बातन काहीं बताया हय।"

### पवलुस काहीं फेलिक्स के लघे पठबा जाब

23 अउर ऊँ दुइठे सुबेदारन काहीं बोलाइके कहिन; "दुइ सव सिपाही, सत्तर घोड़ सवार सिपाही, अउर दुइ सव भाला चलामँइ बालेन काहीं, एक पहर रात बीते कैसरिया सहर काहीं जाँइ के खातिर तइआर रक्खा। 24 अउर पवलुस के सबारी के खातिर घोड़न काहीं तइआर रक्खा, कि जउने उनहीं हाकिम फेलिक्स के लघे कुसल से पहुँचाय देई।" 25 अउर ऊँ इआमेर से चिट्ठी घलाय लिखिन।

26 "महामहिम हाकिम फेलिक्स काहीं क्लौडियुस लूसियास के नबस्कार। 27 इआ मनई काहीं यहूदी जाति के कुछ मनई पकड़िके मार डारँय चाहत रहे हँय, पय जब हम इआ जानेन कि ई रोमी नागरिक आहीं, तब हम सिपाहिन काहीं लइके इनहीं छोड़ाय लिहैन। 28 अउर हम जानई चाहत रहेन हँय, कि ऊँ पंचे इनखे ऊपर कउने कारन से दोस लगाबत हें, एसे इनहीं उनखे महासभा माहीं लइ गएन। 29 तब हम इआ जान लिहैन, कि ऊँ पंचे अपने बिधान के बिबादन के बारे माहीं, इनखे ऊपर दोस लगाबत हें, पय मारि डारे जाँय, इआ कि जेल माहीं डारे जाँय के काबिल इन माहीं कउनव दोस नहीं पाबा ग। 30 अउर जब हमहीं बताबा ग, कि ऊँ पंचे इनहीं मार डारँय माहीं लगे हँय, तब हम हरबिन इनहीं अपना के लघे पठयबाय दिहैन; अउर मुद्इन काहीं घलाय, इआ हुकुम दिहैन, कि अपना के आँगे इनखे ऊपर दोस सिद्ध करँय।"

31 एसे जइसन सिपाहिन काहीं हुकुम दीन ग रहा हय, उहयमेर पवलुस काहीं अपने साथ माहीं लइके, रातव रात अन्तिपत्रिस सहर माहीं पहुँचाय दिहिन। 32 अउर दुसरे दिन घोड़ सवारन काहीं पवलुस के साथ जाँइ के खातिर छोंड़िके, सगले सिपाही खुद छावनी माहीं लउटे आएँ। 33 अउर ऊँ पंचे कैसरिया सहर माहीं पहुँचिके, हाकिम काहीं चिट्ठी दिहिन; अउर पवलुस काहीं घलाय उनखे आँगे ठाढ़ किहिन। 34 अउर ऊँ हाकिम उआ चिट्ठी काहीं पढ़िके उनसे पूँछिन, "ई कउने प्रदेस के आहीं?" अउर जब जान लिहिन कि ई किलिकिया प्रदेस के आहीं; 35 तब पवलुस से कहिन; "जब तौहरे ऊपर दोस लगामँइ बाले मुद्ई घलाय आय जइहँय, तब हम तौहार मुकदमा सुरू करब।" अउर उनहीं राजा हेरोदेस के किला माहीं, पहरेदारी माहीं रक्खई के हुकुम दिहिन।

### हाकिम फेलिक्स के आँगे पवलुस

24 पाँच दिना बाद, महायाजक हनन्याह, यहूदी समाज के कुछ धार्मिक अँगुअन काहीं, अउर तिरतुल्लुस नाम के वकील काहीं साथ माहीं लइके, कैसरिया सहर माहीं आएँ, कि ऊँ पंचे हाकिम के आँगे पवलुस के ऊपर दोस सिद्ध करँय।<sup>2</sup> जब हाकिम फेलिक्स के आँगे पवलुस काहीं बोलबाबा ग, त तिरतुल्लुस उनखे ऊपर दोस लगाइके कहँई लागे, “हे महामहिम हाकिम फेलिक्स, अपना के द्वारा हमहीं पंचन काहीं बड़ी कुसलता मिलत ही; अउर अपना के प्रबन्ध से, इआ जाति के मनइन से खुब बुराई सुधरत जाती हई।<sup>3</sup> ई बातन काहीं हम पंचे हरेक जघा, अउर हरेकमेर से धन्यवाद के साथ मानित हएन।<sup>4</sup> पय एसे कि हम पंचे अपना काहीं अउर कस्ट नहीं देंइ चाहित आहैन, हम अपना से बिनती करित हएन कि, किरपा कइके हमरे कुछ बातन काहीं सुन लेई।<sup>5</sup> काहेकि हम पंचे इआ मनई काहीं उपदरव मचामँइ बाला, अउर अपना के राज के सगले यहूदी लोगन माहीं बलबा करँइ बाला, अउर इनहीं नासरत प्रदेस माहीं रहँइ बालेन के पंथ के मुखिया पाएन हय।<sup>6</sup> ई मन्दिर काहीं असुद्ध करँइ चाहिन, तबहिनय हम पंचे इनहीं पकड़ लिहैन, (अउर हम पंचे अपने बिधान के मुताबिक इनहीं सजा देंइ चाहत रहे हएन;<sup>7</sup> पय सिपाहिन के मुखिया लूसियास इनहीं हमरे हाँथन से जबरई छोड़ाय लिहिन,<sup>8</sup> अउर मुद्दई काहीं अपना के आँगे आमँइ के हुकुम दिहिन।) ई सगली बातन काहीं जउनेन के बारे माहीं हम पंचे इनखे ऊपर दोस लगाइत हएन, अपना खुदय इनखर जाँच कइके जान लेब।”<sup>9</sup> अउर यहूदी लोग घलाय, उनखर साथ दइके कहिन, ई जउने बातन काहीं बताइन हीं बेलकुल इहइमेर आहीं।

### पवलुस के जबाब

<sup>10</sup> जब हाकिम पवलुस काहीं बोलँइ के इसारा किहिन, तब ऊँ जबाब दिहिन, “हम इआ जानिके, कि अपना खुब बरिसन से इआ जाति के मनइन के न्याय करत आहैन, हम आनन्द से अपना काहीं जबाब देइत हएन।<sup>11</sup> अपना खुदय जानित हएन, कि जब से हम यरूसलेम सहर माहीं अराधना करँइ काहीं आएन हय, हमहीं आए बारा दिन से ऊपर नहीं भे।<sup>12</sup> ई पंचे न हमहीं मन्दिर माहीं, न यहूदी सभाघरन माहीं, अउर न सहर माहीं, कोहू से बिबादय करत, न भीड़य लगाबत पाइन।<sup>13</sup> अउर न त ई पंचे, ई बातन काहीं, जिनखर ई पंचे हमरे ऊपर दोस लगाबत हें, उनखर अपना के आँगे सही सबूत दइ सकँय।<sup>14</sup> पय हम अपना के आँगे इआ माने लेइत हएन, कि जउने पंथ काहीं ई पंचे कुपन्थ कहत हें, ओहिन के रीत से हम अपने बाप-दादन के परमातिमा के अराधना करित हएन; अउर जउन बातँय मूसा के बिधान, अउर परमातिमा के सँदेस बतामँइ बालेन के किताबन माहीं लिखी हई, उन सगलेन के हम बिसुआस करित हएन।<sup>15</sup> अउर परमातिमा से आसा रक्खित हएन, जउने माहीं ई पंचे घलाय खुदय आसा रक्खत हें, कि धरमी अउर अधरमी दोनव जनेन के जिन्दा होब, होई।<sup>16</sup> एसे हम खुदय इआ कोसिस करित हएन, कि परमातिमा के तरफ से, अउर मनइन के तरफ से, हमार बिबेक हमेसा निरदोस रहय।<sup>17</sup> खुब बरिसन के बाद हम अपने समाज के मनइन काहीं दान पहुँचामँइ, अउर भेंट चढ़ामँइ आए रहेन हँय।<sup>18</sup> त ई पंचे हमहीं मन्दिर माहीं, सुद्ध अबस्था माहीं, बिना भीड़ के साथ अउर बिना दंगा किहे, भेंट चढ़ाबत पाइन, हाँ, उहाँ आसिया सहर के रहँइ बाले कुछ यहूदी लोग रहे हँय, उनहीं इआ उचित रहा हय;<sup>19</sup> कि अगर हमरे बिरोध माहीं उनखे लघे कउनव बात होत, त आसिया म अपना के आँगे आइके हमरे ऊपर दोस जरूर लगउतें।<sup>20</sup> इआ, कि ई पंचे खुदय बतामँइ, कि जब हम महासभा के आँगे ठाढ़ रहेन हय, तब ई पंचे हमरे ऊपर कउन अपराध पाइन रहा हय? <sup>21</sup> केबल एकठे इआ बात काहीं छोड़िके, कि जउन हम इनखे बीच माहीं ठाढ़ होइके गोहराइके कहेन रहा हय, कि मरेन म से जिन्दा होई के बारे माहीं, आज अपना के आँगे हमार मुकदमा चल रहा हय।”<sup>22</sup> अउर हाकिम फेलिक्स जउन इआ पंथ के बारे माहीं ठीक-ठीक

जानत रहे हँय, उनहीं इआ कहिके टार दिहिन, कि जब सिपाहिन के मुखिया लूसियास अइहँय, तब तोंहरे बात के निरनय करब।<sup>23</sup> अउर सुबेदार काहीं हुकुम दिहिन, कि “पवलुस काहीं कुछ छूट दइके रखबारी किहा, अउर उनखे साथिन म से कोहू काहीं उनखर सेबा करँइ से मना न किहा।”

### हाकिम फेलिक्स अउर द्रुसिल्ला के आँगे पवलुस

<sup>24</sup> कुछ दिना के बाद हाकिम फेलिक्स अपने मेहेरिआ द्रुसिल्ला काहीं, जउन यहूदी जाति के रही हँय, अपने साथ माहीं लइके आएँ; अउर पवलुस काहीं बोलबाइके उआ बिसुआस के बारे माहीं, जउन मसीह यीसु के ऊपर हय, उनसे सुनिन।<sup>25</sup> अउर जब ऊँ धरम अउर संयम अउर आमँइ बाले न्याय के चरचा करत रहे हँय, तब हाकिम फेलिक्स भयभीत होइके जबाब दिहिन, कि “अबे त जा, पय मोका पाइके हम तोंहई पुनि बोलाउब।”<sup>26</sup> उनहीं पवलुस से कुछ घूस घलाय मिलँइ के आसा रही हय; एसे अउरव ऊँ पवलुस काहीं बोलबाय-बोलबाइके उनसे बात करा-करत रहे हँय।<sup>27</sup> पय जब दुइ बरिस बीतिगें, तब पुरकियुस फेस्तुस हाकिम फेलिक्स के जघा माहीं हाकिम बनिके आइगें, अउर हाकिम फेलिक्स यहूदी लोगन काहीं खुसी करँइ के मनसा से, पवलुस काहीं जेल माहीं छोड़ि गे रहे हँय।

### पवलुस महाराजा के दोहाई दिहिन

25 एखे बाद हाकिम फेस्तुस उआ प्रदेस माहीं पहुँचिके तीन दिना के बाद, कैसरिया प्रदेस से यरूसलेम सहर माहीं गे।<sup>2</sup> तब प्रधान याजक लोग, अउर यहूदी जाति के कुछ मुखिया लोग, उनखे आँगे पवलुस के ऊपर लगाए दोसन काहीं बताइन।<sup>3</sup> अउर उनसे बिनती कइके पवलुस के बिरोध माहीं इआ हुकुम चाहत रहे हँय, कि पवलुस काहीं यरूसलेम सहर माहीं बोलबाबा जाय, काहेकि ऊँ पंचे पवलुस काहीं गइलय माहीं मार डारँइ के घात माहीं लगे रहे हँय।<sup>4</sup> तब हाकिम फेस्तुस उनहीं जबाब दिहिन, कि “पवलुस कैसरिया सहर माहीं पहरेदारी माहीं हें, अउर हम खुदय उहाँ हरबिन जाब।”<sup>5</sup> अउर पुनि कहिन, “तोंहरे पंचन म से जेतने मुखिया होंय, त हमरे साथ चलँय, अउर अगर उआ मनई कुछ अनुचित काम किहिस होय त, ओखे ऊपर दोस लगामँय।”

<sup>6</sup> अउर उनखे बीच माहीं आठ दस दिना रहे के बाद, ऊँ कैसरिया सहर माहीं लउटिगें, अउर दुसरे दिना न्याय आसन माहीं बडिठिके हुकुम दिहिन, कि पवलुस काहीं हाजिर कीन जाय।<sup>7</sup> जब ऊँ पेस कीन गे, तब जउन यहूदी लोग यरूसलेम सहर से आएँ तय, ऊँ पंचे पवलुस काहीं घेरिके ठाढ़ होइके, उनखे ऊपर खुब बड़े-बड़े आरोप लगाइन, जिनखर ऊँ पंचे सबूत नहीं दए पाइन।<sup>8</sup> पय पवलुस उनहीं जबाब दिहिन, कि “हम न त यहूदी लोगन के बिधान के अउर न मन्दिर के, अउर न राजा कैसर के बिरोध माहीं कुछ अपराध किहेन आय।”<sup>9</sup> तब हाकिम फेस्तुस यहूदी लोगन काहीं खुसी करँइ के इच्छा से पवलुस काहीं जबाब दिहिन, “का तू चहते हया, कि यरूसलेम सहर माहीं जई; अउर उहाँ हमरे आँगे तोंहरे इआ मुकदमा के फँइसला कीन जाय?”<sup>10</sup> तब पवलुस कहिन; “हम महाराजा कैसर के न्याय आसन के आँगे ठाढ़ हएन, हमरे मुकदमा के इहँय फँइसला होई चाही; जइसन कि अपना निकहा से जानित हएन, कि हम यहूदी लोगन के कुछ अपराध नहीं किहेन।<sup>11</sup> अगर हम अपराधी हएन, अउर मार डारँइ के काबिल कउनव काम किहेन हय; त हम मरँइ से नहीं डेरई; पय जउने बातन के हमरे ऊपर ई पंचे दोस लगाबत हें, अगर उनमा से कउनव बात सही न ठहरय, त कोऊ हमहीं इनखे हाँथ माहीं नहीं सउँप सकय, हम महाराजा कैसर के दोहाई देइत हएन।”<sup>12</sup> तब हाकिम मन्त्रिन के सभा माहीं सलाह लिहे के बाद जबाब दिहिन, “तू महाराजा कैसर के दोहाई दिहा हय, एसे तू महाराजा कैसर के लघे जइहा।”

### राजा अग्रिप्पा के आँगे पवलुस

13 कुछ दिना बीते के बाद राजा अग्रिप्पा, अउर बिरनीके कैसरिया प्रदेश माहीं आइके हाकिम फेस्तुस से भेंट किहिन। 14 अउर उनखे उहाँ कुछ दिना रहे के बाद, फेस्तुस पवलुस के बारे माहीं राजा काहीं बताइन; कि “एकठे मनई हय, जउने काहीं हाकिम फेलिक्स जेल माहीं छोड़ गे हँय।” 15 जब हम यरूसलेम सहर माहीं रहेन हय, त प्रधान याजक लोग, अउर यहूदी समाज के धारमिक आँगुआ लोग, उनखे ऊपर दोस लगाइन; अउर चाहत रहे हँय, कि उनहीं सजा देई के हुकुम दीन जाय। 16 पय हम उनहीं जबाब दिहेन कि, रोम देस माहीं रहँइ बालेन माहीं इआ रिबाज नहिं आय, कि कउनव मनई काहीं सजा देई के खातिर सउँप दीन जाय, जब तक कि जउने मनई के ऊपर दोस लगाबा ग होय, ओही अपने ऊपर दोस लगामँइ बालेन के आमने-सामने ठाढ़ होइके, लगाए दोस के जबाब देई काहीं मोका न मिलय। 17 एसे जब ऊँ पंचे इहाँ एकट्ठा भे रहे हँय, तब हम बेलकुल देर नहीं किहेन, बलकिन दुसरेन दिना न्याय आसन माहीं बड़ठिके, उआ मनई काहीं लड आमँइ के हुकुम दिहेन। 18 जब ओखे ऊपर दोस लगामँइ बाले ठाढ़ भें, तब ऊँ पंचे अइसन कउनव बुरी बातन के दोस नहीं लगाइन, जइसन हम समझत रहे हएन। 19 पय ऊँ पंचे अपने धरम के, अउर यीसु नाम के कउनव मनई के बारे माहीं जउन मरिगे रहे हँय, अउर पवलुस उनहीं जिन्दा बताबत रहे हँय, इहय बिबाद करत रहे हँय। 20 अउर हम उलझन माहीं रहे हएन, कि ई बातन के पता कइसन लगई? एसे हम उनसे पूँछेन, “का तूँ यरूसलेम सहर जइहा, कि उहँय ई बातन के फँइसला होय?” 21 पय जब पवलुस दोहाई दिहिन, कि “हमरे मुकदमा के फँइसला महाराजाधिराज के इहाँ होय।” तब हम हुकुम दिहेन, कि जब तक उनहीं महाराजा कैसर के लघे न पठउब, तब तक उनखर रखबारी कीन जाय। 22 तब राजा अग्रिप्पा हाकिम फेस्तुस से कहिन, “हमहूँ उआ मनई के बातन काहीं सुनँय चाहित हएन”, तब ऊँ कहिन, “अपना काल्हय सुन लेब।”

23 ओखे बाद दुसरे दिना, जब राजा अग्रिप्पा अउर बिरनीके बड़ी धूम-धाम से आइके सिपाहिन के मुखिन, अउर सहर के बड़े मनइन के साथ दरबार माहीं पहुँचे, तब हाकिम फेस्तुस हुकुम दिहिन, कि “पवलुस काहीं लड आबा जाय।” 24 ओखे बाद हाकिम फेस्तुस कहिन; “हे महाराजा अग्रिप्पा, अउर हे सगले मनइव, जउन इहाँ हमरे साथ हया, तूँ पंचे इआ मनई काहीं देखते हया, जिनखे बारे माहीं सगले यहूदी लोग यरूसलेम सहर माहीं, अउर इहाँ घलाय चिल्लाय-चिल्लाइके हमसे बिनती किहिन, कि इनखर जिन्दा रहब उचित नहिं आय।” 25 पय जब हम जान लिहेन, कि “ई अइसन कुछू काम नहीं किहिन, कि मार डारे जाँय; अउर जब ऊँ खुदय महाराजाधिराज के दोहाई दिहिन, त हम इनहीं पठमँइ के निरनय लिहेन। 26 पय हम इनखे बारे माहीं कउनव ठीक बात नहीं पाएन, कि अपने मालिक काहीं लिखी, एहिन से हम तौहरे आँगे अउर खास करके हे महाराजा अग्रिप्पा, अपना के आँगे लड आएन हँय, कि जाँच किहे के बाद हमहीं कुछू लिखँइ काहीं मिलय। 27 काहेकि कइदी काहीं पठउब, अउर जउन दोस ओखे ऊपर लगाए गे हँय, उनहीं न बताउब, हमहीं बेकार जान परत हय।”

### राजा अग्रिप्पा के आँगे पवलुस अपने बातन काहीं बताइन

26 राजा अग्रिप्पा पवलुस से कहिन; “तौहई अपने बारे माहीं बोलँइ के छूट ही।” तब पवलुस आपन हाँथ उठाइके जबाब देई लागे। 2 “हे राजा अग्रिप्पा, जेतनी बातन के दोस यहूदी लोग हमरे ऊपर लगाबत हँ, आज अपना के आँगे उनखर जबाब देई माहीं हम अपने-आप काहीं धन्य मानित हएन। 3 खास करके एसे कि अपना यहूदी लोगन के बेउहारन, अउर बिबादन काहीं जानित हएन, एसे हम बिनती करित हएन, कि अपना बड़े धीरज के साथ हमरे बातन काहीं सुनी।

4 जइसन हमार चाल-चलन सुरुआतय से, अपने जाति के मनइन के बीच माहीं, अउर यरूसलेम सहर माहीं रहा हय, इआ सगले यहूदी लोग जानत

हँ। 5 ऊँ पंचे हमहीं खुब समय से पहिचानत आहीं, अगर ऊँ पंचे इआ चाहँय, त इआ बात के गबाही दइ सकत हँ, कि हम अपने धरम के सगलेन से जादा खर पंथ के मुताबिक, एक फरीसी के रूप माहीं जीबन बितायन हय।

6 अउर अब उआ वादा के आसा के कारन, जउन परमातिमा हमरे पंचन के बाप-दादन से किहिन रहा हय, हमरे ऊपर ओहिन के मुकदमा चल रहा हय।

7 उहय वादा के पूर होंइ के आसा लगाए, हमार पंचन के बरहँव कुलन के मनई अपने पूरे मन से रातव-दिन परमातिमा के सेवा करत आएँ हँय। हे राजा इहय आसा के बारे माहीं यहूदी लोग हमरे ऊपर दोस लगाबत हँ।

8 जबकि परमातिमा मरेन काहीं जिआबत हँ, त अपना के इहाँ इआ बात काहीं बिसुआस के काबिल काहे नहीं समझा जाय? 9 हमहूँ पहिले सोचेन तय, कि नासरत सहर के रहँइ बाले यीसु के नाम के बिरोध माहीं, हमसे जेतना होइ सकय ओतना काम करँइ चाही। 10 अउर हम यरूसलेम सहर माहीं अइसनय किहेन; अउर प्रधान याजकन से अधिकार पाइके, परमातिमा के खुब भक्तन काहीं जेल माहीं डरबाय दिहेन, अउर जब ऊँ पंचे मारि डारे जात रहे हँय, तब हमहूँ उनखे बिरोध माहीं सहमत रहत रहे हएन। 11 अउर हरेक यहूदी सभाघरन माहीं, हम उनहीं सजा देबाय-देबाइके यीसु के बुराई कराबत रहे हएन, अउर क्रोध के मारे इहाँ तक पागल होइ गएन तय, कि दुसरे प्रदेश के सहरन माहीं घलाय जाइके, उनहीं परेसान करत रहे हएन।

### अपने हिरदँय के बदलाव के बखान

12 इहय धुन माहीं जब हम प्रधान याजकन से अधिकार पत्र लइके, दमिस्क काहीं चले जात रहे हएन। 13 तब हे राजा, गडल माहीं दुपहर के समय हम अकास से सुरिज के उँजिआर से घलाय बढिके, एकठे जोति अपने अउर अपने साथ माहीं चलँइ बाले साथिन के चारिव कइती चमकत देखेन। 14 अउर जब हम पंचे सगले जन भुँइ माहीं गिर परेन, तब हम इब्रानी भाँसा माहीं इआ बोल सुनेन, जउन हमसे कहत रहे हँय, कि ‘हे साऊल, हे साऊल, तूँ हमहीं काहे सतउते हया? हमरे बिरोध माहीं काम करे से तौहई बड़ा नुकसान होई।’ 15 तब हम कहेन, ‘हे प्रभू अपना को आहेन?’ तब प्रभू कहिन, ‘हम यीसु आहेन, जेही तूँ सतउते हया।’ 16 पय तूँ अब उठा, अपने गोडेन के बल ठाढ़ होइजा; काहेकि हम तौहई एसे दरसन दिहेन हय, कि तौहई उन बातन के गबाह अउर सेबक ठहराई, जउन तूँ देखे हया, अउर उनखर घलाय जिनखे खातिर हम तौहई दरसन देब। 17 अउर हम तौहई तौहरे जाति के मनइन से, अउर गैरयहूदी लोगन से बचाबत रहब, जिनखे लघे अब हम तौहई एसे पठइत हएन। 18 कि तूँ उनखर आँखी खोला, जउने ऊँ पंचे आँधिआर से जोति कइती, अउर सइतान के अधिकार से परमातिमा कइती फिरँय; एसे उनहीं पापन से माफी मिली, अउर उन मनइन के बीच माहीं जघा पइहँय, जउन हमरे ऊपर बिसुआस किहे के कारन पबित्र कीन गे हँय।’

### अपने कामन के बखान

19 एसे हे राजा अग्रिप्पा, हम स्वरग के उआ दरसन के बात काहीं नहीं टारेन। 20 बलकिन पहिले दमिस्क सहर के, ओखे बाद यरूसलेम सहर के रहँइ बालेन काहीं, ओखे बाद सगले यहूदिया प्रदेश माहीं, अउर गैरयहूदी लोगन काहीं समझाबत रहि गएन, कि अपने मन काहीं बदला, अउर परमातिमा कइती फिरिके अइसन काम करा, कि जउने मनई जानँइ कि तौहार पंचन के जीबन बास्तव माहीं बदलिगा हय। 21 ई बातन के कारन यहूदी लोग हमहीं मन्दिर माहीं पकड़िके मारि डारँइ के कोसिस करँइ लागे। 22 पय परमातिमा के सहायता से हम आज तक जिन्दा हएन, अउर छोट-बड़े सगलेन के आँगे गबाही देइत हएन, अउर उन बातन काहीं छोँइके कुछू नहीं कही, जउन परमातिमा के सँदेस बतामँइ बाले अउर मूसा घलाय कहिन, कि ऊँ पूर होंइ बाली हई। 23 कि मसीह काहीं दुख उठामँइ परी, अउर उँइन सगलेन से पहिले मरेन म से जि उठिके, हमरे जाति के मनइन माहीं अउर गैरयहूदी लोगन के बीच माहीं, जोति के प्रचार करिहँय।”

24 जब ऊँ इआमेर से जबाब देत रहे हँय, तब हाकिम फेस्तुस खुब चन्डे कहिन; “हे पवलुस, तू पागल होइ गया हय, खुब बिद्या तौहई पागल कइ दिहिस ही।” 25 पय पवलुस कहिन; “हे महामहिम हाकिम फेस्तुस, हम पागल नहिं आहैन, बलकिन सच्चाई अउर बुद्धी के बातँय कहित हएन। 26 राजा घलाय जिनखे आँगे हम निडर होइके बोलि रहेन हय, ई बातन काहीं जानत हँ, अउर हमहीं बिसुआस हय, कि ई बातन म से कउनव उनसे छिपी नहिं आय, काहेकि इआ घटना कउनव कोने माहीं नहिं भे आय। 27 हे राजा अग्रिप्या, का अपना परमातिमा के सँदेस बतामँइ बालेन के बिसुआस करित हएन? हौं, हम जानित हएन, कि अपना बिसुआस करित हएन।” 28 तब राजा अग्रिप्या पवलुस से कहिन, “तू थोरिन काहीं समझाए से, हमहीं मसीही बनामँइ चहते हया?” 29 तब पवलुस कहिन, “परमातिमा से हमार प्राथना इआ हय, कि का थोर माहीं, का बहुत माहीं, केबल अपनय भर नहिं, बलकिन जेतने जने आज हमरे बातन काहीं सुनत हँ, ई बन्धनन से अजाद होइके, ऊँ पंचे हमरे कि नाई होइ जाँय।” 30 तब राजा अउर हाकिम अउर बिरनीके अउर उनखे साथ बड़ठँय बाले उठिके ठाढ़ होइगें। 31 अउर अलग जाइके आपस माहीं कहँइ लागें, “इआ मनई अइसा त कुछू नहिं करय, जउन मउत के सजा अउर जेल माहीं बन्द करँइ के काबिल होय।” 32 तब राजा अग्रिप्या हाकिम फेस्तुस से कहिन, “अगर इआ मनई महाराजा कैसर के दोहाई न देत, त छूटि सकत रहा हय।”

### पवलुस के रोम देस के यात्रा क्रेते टापू तक

27 जब इआ निश्चित होइगा, कि हम जल जिहाज से इटली देस माहीं जई, तब ऊँ पंचे पवलुस अउर उनखे साथ कुछ अउर कइदिन काहीं घलाय, महाराजा अवगुस्तुस के सेना के एकठे सुबेदार काहीं सउँप दिहिन, जेखर नाम यूलियुस रहा हय। 2 अउर अद्रमुत्तियुम नाम के एकठे जघा से हम पंचे एकठे जिहाज माहीं चढ़ गएन, जउन आसिया प्रदेस के किनारे के जघन से जाँइ बाला रहा हय, हम पंचे सगले जन चढ़िके जिहाज काहीं छोर दिहेन, अउर मकिदुनिया प्रदेस के थिस्सलुनीके सहर के रहँइ बाला, एकठे मनई हमरे पंचन के साथय रहा हय, जेखर नाम अरिस्तरखुस रहा हय। 3 दुसरे दिना हम पंचे सैदा सहर माहीं लंगर डारेन, अउर यूलियुस पवलुस के ऊपर किरपा कइके, उनहीं अपने साथिन के लघे चले जाँइ दिहिन, कि उनखर स्वागत-सत्कार कीन जाय। 4 ओखे बाद उहाँ से जिहाज काहीं छोर दिहेन, पय हबा उलटा होंय के कारन, हम पंचे साइप्रस टापू के आइ माहीं होइके चल दिहेन। 5 अउर किलिकिया अउर पंफूलिया प्रदेसन के लघे के समुद्र से होइके, लूसिया प्रदेस के मूरा सहर माहीं हम पंचे उतरेन। 6 उहाँ सुबेदार काहीं सिकन्दरिया सहर के एकठे जिहाज मिला, जउन इटली जाँइ बाला रहा हय, अउर ऊँ हमहीं पंचन काहीं ओहिन माहीं चढ़ाय दिहिन। 7 अउर जब हम पंचे खुब दिनन तक धीरे-धीरे चलत, बड़े मुस्किल से कनिदुस सहर के आँगे पहुँचेन, त हबा जिहाज काहीं आँगे बढ़इन नहिं देत रही आय, एसे हम पंचे सलमोने सहर के आँगे से होइके क्रेते टापू के आइ माहीं चलेन। 8 अउर ओखे किनारे-किनारे बड़े मुस्किल से चलिके “सुभ लंगरबारी” नाम के जघा माहीं पहुँचेन, उहाँ से लसया सहर लघेन रहा हय। 9 जब खुब दिना बीतिगें, अउर पानी के यात्रा माहीं खतरा एसे होत रहा हय, कि उपबास के दिन अब बीत चुके रहे हँय, तब पवलुस उनहीं पंचन काहीं इआ कहिके समझाइन। 10 कि “हे सज्जनव, हमहीं अइसा जान परत हय, कि इआ यात्रा माहीं बिपत्ती अउर खुब हानि न केबल माल अउर जिहाज के, बलकिन हमरे पंचन के प्रानन के घलाय होंय बाली हय।” 11 पय सुबेदार पवलुस के बातन से कप्तान अउर जिहाज के मालिक के बातन काहीं बढ़िके मानिन। 12 उआ बन्दरगाह जाइ काटँय के खातिर निकहा नहिं रहा आय, एसे खुब जनेन के इआ बिचार रहा हय, कि उहाँ से जिहाज काहीं छोरिके अगर कउनव मेर से होइ सकय, त फीनिक्स सहर माहीं पहुँचिके जाइ काटँय, उआ क्रेते टापू के एकठे बन्दरगाह आय, जउन दक्खिन-पच्छिम अउर उत्तर-पच्छिम कइती खुला रहा हय।

### समुद्र माहीं तुफान

13 जब दक्खिन कइत से कुछ कुछ हबा चलँय लाग, त इआ समझिके कि हमार पंचन के उद्देस पूर होइगा, तब लंगर काहीं उठाइके किनारे-किनारे क्रेते टापू के लघे से जाँइ लागेन। 14 पय थोरिन देर माहीं उहाँ भुँइ से एकठे बड़ी आँधी उठी, जउन “यूरकुलीन” कहाबत रही हय। 15 जब आँधी जिहाज से टकरान, तब उआ तेज हबा के आँगे ठहर नहिं सका, एसे हम पंचे ओही बहँइ दिहेन, अउर इहडमेर से हम पंचे बहत चले गएन। 16 तब कउदा नाम के एकठे छोट काहीं टापू के आइ माहीं, बहत हम पंचे बड़े मुस्किल से जिहाज काहीं काबू माहीं कइ सकेन। 17 तब मल्लाह लोग जिहाज काहीं पेंदी से उठाइके, अउर बड़ी कोसिस कइके जिहाज काहीं रस्सन से लपेटिके बाँध दिहिन, कि कहँव सुरतिस नाम के जघा के उथल पानी के बारू माहीं फँसि न जाय, इआ डेर से ऊँ पंचे पाल काहीं उतार दिहिन, अउर जिहाज काहीं बहँय दिहिन। 18 अउर जब हम पंचे आँधी से खुब हिलकोरा अउर धक्का खायन, त दुसरे दिना ऊँ पंचे जिहाज के समान फेंकई लागें। 19 अउर तिसरे दिन, ऊँ पंचे अपने हाँथेन से जिहाज के समान फेंक दिहिन। 20 अउर जब खुब दिना तक सुरिज अउर तरइया नहिं देखाने, अउर खुब तेज आँधी चलत रहिगे, त अन्त माहीं हमरे पंचन के बचँइ के कउनव आसा नहिं रहिगे।

21 जब ऊँ पंचे खुब दिनन तक भूँखे रहि चुके, तब पवलुस उनखे बीच माहीं ठाढ़ होइके कहिन, “हे भाइव, अगर तू पंचे हमरे बात काहीं मानिके, क्रेते टापू से जिहाज काहीं न छोर त्या, त इआ बिपत्ती अउर हानि न उठउत्या। 22 पय अब हम तौहई पंचन काहीं समझाइत हएन, कि ढाढ़स बाँधा; काहेकि तौहरे पंचन म से कोहू के प्रान के हानि न होई, केबल जिहाज के भर होई। 23 काहेकि परमातिमा जिनखर हम सेबक आहैन, अउर जिनखर हम सेवा करित हएन, उनखर स्वरगदूत आज रात माहीं हमरे लघे आइके कहिन, 24 ‘हे पवलुस, न डेरा, तौहई महाराजा कैसर के आँगे ठाढ़ होब जरूरी हय, अउर देखा, परमातिमा सगलेन काहीं जउन तौहरे साथ माहीं यात्रा करत हँ, तौहई सउँप दिहिन हीं।’ 25 एसे हे सज्जनव, ढाढ़स बाँधा; काहेकि हम परमातिमा के बिसुआस मानित हएन, कि जइसन हमसे बताबा ग हय, ठीक उहयमेर होई। 26 पय हम पंचे कउनव टापू के उथल पानी माहीं जरूर जाय फँसब।”

### जिहाज के टूटब

27 जब चउदहमी रात भय, अउर हम पंचे आद्रिया नाम के समुद्र माहीं भटकत फिरत रहेन हँय, तब आधी रात के करीब मल्लाह अंदाज लगाइन, कि हम पंचे कउनव देस के लघे पहुँच रहेन हँय। 28 अउर थाह लिहिन त ऊँ पंचे उहाँ पानी काहीं बीस पोरसा पाइन, अउर थोर काहीं आँगे बढ़िके पुनि थाह लिहिन, त पन्द्रा पोरसा पाइन। 29 तब पथरही जघन से टकराय जाँइ के डेर से, ऊँ पंचे जिहाज के पीछे कइती चारठे लंगर डारिन, अउर भिनसार होंइ के इच्छा करत रहिगें। 30 पय जब मल्लाह जिहाज से भागँय चाहत रहे हँय, अउर गलही से लंगर डारँइ के बहाना कइके रक्छा नावन काहीं समुद्र माहीं उतार दिहिन। 31 तब पवलुस सुबेदार अउर सिपाहिन से कहिन; अगर ऊँ पंचे जिहाज माहीं न रइहँय, त तुहँ पंचे न बचे पइहा। 32 तब कुछ सिपाही रस्सी काटिके रक्छा नावन काहीं समुद्र माहीं गिराय दिहिन।

33 जब भिनसार होंइ बाला रहा हय, तब पवलुस इआ कहिके, सब काहीं खाना खाँइ काहीं समझाइन, कि आज से चउदा दिन होइगें, अउर तू पंचे पहुँचँय के आसा कए भूँखे रहि गया, अउर कुछू नहिं खया। 34 एसे हम तौहई समझाइत हएन, कि कुछू खाय ल्या, जउने तू पंचे जिअत रहा; काहेकि तौहरे पंचन म से कोहू के मूँडे के एकठे बारव तक न गिरी। 35 अउर एतना कहिके, ऊँ रोटी लइके सगलेन के आँगे परमातिमा के धन्यवाद किहिन; अउर तोरिके खाँइ लागें। 36 इआ देखिके, ऊँ पंचे सगले जन ढाढ़स बाँधिके खाना खाँइ लागें। 37 अउर हम पंचे सगले जन मिलिके जिहाज माहीं, दुइ सव छिहत्तर जने रहेन हँय। 38 जब ऊँ पंचे खाना खाइके संतुस्ट

होइंगे, तब गोहूँ काहीं समुद्र माहीं फेंकिके जिहाज काहीं हलुक करँइ लागें।

<sup>39</sup> जब सकार भ, तब ऊँ पंचे नहीं जाने पाइन, कि उआ कउन देस आय, पय एकठे खाड़ी देखिन जेखर समथर किनारा रहा हय, अउर आपस माहीं बिचार किहिन, कि अगर होइ सकय, त एहिन माहीं जिहाज काहीं टिकाई।  
<sup>40</sup> तब ऊँ पंचे लंगरन काहीं छोर दिहिन, अउर उहय समय पतबारन के बन्धन छोर दिहिन, अउर हबा के आँगे-आँगे के पाल चढ़ाइके किनारे कइती चल दिहिन।<sup>41</sup> अउर उनखर जिहाज बारू माहीं टकराइगा, अउर जिहाज के आँगे के हिस्सा ओमाहीं फँसिके जाम होइगा, पय तेज लहरन के कारन जिहाज के पीछे के हिस्सा टूटँइ लाग <sup>42</sup> तब सिपाहिन के इआ बिचार आबा कि, कइदिन काहीं मारि डारी; अइसन न होय, कि कउनव पइरके भाग जाय।<sup>43</sup> पय सुबेदार पवलुस काहीं बचामँइ के इच्छा से उनहीं इआ बिचार से रोकिन, अउर इआ कहिन, कि “जे पइर सकत हय, त पहिले कूदिके किनारे माहीं चला जाय।<sup>44</sup> अउर बाँकी जे बचँइ त पटरन के ऊपर, अउर कोऊ जिहाज के अउर दुसरे चीजन के सहारे से निकर जाँय”, अउर इआमेर से सगले जन बचिके भुँइ माहीं निकरिगें।

### माल्टा नाम के टापू माहीं पवलुस

**28** जब हम पंचे बचिके निकर गएन, तब जाने पाएन, कि इआ टापू के नाम माल्टा हय।<sup>2</sup> अउर उहाँ के रहँइ बाले हमरे पंचन के ऊपर बड़ी किरपा किहिन; काहेकि लगीतार बारिस के कारन, अउर जाड़े के कारन; ऊँ पंचे आगी बारिके हमहीं पंचन काहीं अपने इहाँ ठहराइन।<sup>3</sup> जब पवलुस झुरान लकड़िन के एकठे बोझा आगी माहीं धरिन, त एकठे साँप आगी के आँच से निकरा, अउर उनखे हाँथ माहीं लपिटिगा।<sup>4</sup> जब उहाँ के रहँइ बाले साँप काहीं पवलुस के हाँथे माहीं लपिटे देखिन, त आपस माहीं कहँइ लागें; “सही माहीं इआ मनई कतली हय, काहेकि इआ समुद्र से त बचिगा, तऊ न्याय एही जिन्दा नहीं रहँइ दिहिस।”<sup>5</sup> पय पवलुस साँप काहीं आगी माहीं झिटिक दिहिन, अउर उनहीं कउनव हानि नहीं भय।<sup>6</sup> पय ऊँ पंचे इआ इन्तजार माहीं रहे हँय, कि ऊँ फूल जइहँय, इआ कि अचानक गिरिके मर जइहँय, पय जब ऊँ पंचे खुब देर तक देखत रहिगें, अउर देखिन, कि उनहीं कुछ नहीं भ, त आपन बिचार बदलिके कहँइ लागें, “ई त कउनव देउता आहीं।”

<sup>7</sup> अउर उआ जघा के लघेन उआ टापू के मुखिया पुबलियुस के भुँइ रही हय, ऊँ हमहीं पंचन काहीं अपने घर माहीं लइ जाइके, तीन दिना तक अपने साथी कि नाई स्वागत-सत्कार किहिन।<sup>8</sup> अउर पुबलियुस के बाप बोखार अउर खून बाली पेंचिस से परेसान परे रहे हँय, एसे पवलुस उनखे लघे घर माहीं जाइके प्राथना किहिन, अउर उनखे ऊपर आपन हाँथ धइके उनहीं नीक कइ दिहिन।<sup>9</sup> इआ कारन से उआ टापू के खुब बिमार उनखे लघे आएँ, अउर नीक होइके गें।<sup>10</sup> अउर ऊँ पंचे हमार पंचन के खुब आदर सत्कार किहिन, अउर जब हम पंचे उहाँ से चलँइ लागेन, तब जउन कुछ हमहीं पंचन काहीं जरूरत रही हय, उन सगली चीजन काहीं ऊँ पंचे जिहाज माहीं धरबाय दिहिन।

### माल्टा दीप से रोम देस कइती जाब

<sup>11</sup> अउर तीन महीना के बाद, हम पंचे सिकन्दरिया सहर के एकठे जिहाज माहीं चढ़िके चल दिहेन, जउन उआ टापू माहीं जाड़े के कारन रुका रहा हय; जेखर चिन्हारी दियुसकूरी रही हय।<sup>12</sup> सुरकूसा सहर माहीं हम पंचे लंगर डारिके तीन दिना तक रहे आएन।<sup>13</sup> ओखे बाद उहाँ से जिहाज माहीं चढ़िके, हम पंचे रेगियुम सहर माहीं पहुँचेन: अउर दुसरे दिना पुतियुली सहर माहीं आएन।<sup>14</sup> उहाँ हमहीं पंचन काहीं बिसुआसी भाई मिलें, अउर उनखे कहे से हम पंचे उनखे इहाँ सात दिना तक रुके रहेन; अउर इआमेर से उहाँ

से रोम देस काहीं चल दिहेन।<sup>15</sup> जब उहाँ के बिसुआसी भाइन काहीं हमरे चले जाँय के खबर मिली, त ऊँ पंचे अप्पियुस सहर के बजार अउर तीन सराय सहर तक, हम लोगन से मिलँइ के खातिर आएँ, अउर जब पवलुस उनहीं देखिन, त परमातिमा काहीं धन्यवाद दइके खुब उत्साहित भें।<sup>16</sup> अउर जब हम पंचे रोम देस माहीं पहुँचेन, त पवलुस काहीं एकठे सिपाही के साथ जउन उनखर रखबारी करत रहा हय, अकेले रहँइ के हुकुम मिला।

### रोम देस माहीं पवलुस

<sup>17</sup> तीन दिना के बाद, पवलुस यहूदी जाति के मुख्य मनइन काहीं बोलबाइन, अउर जब ऊँ पंचे एकट्ठा भें, तब उनसे कहिन, “हे भाइव हम अपने जाति बालेन, इआ कि बाप-दादन के रीति-रिवाजन के खिलाफ कुछ काम नहीं किहेन, तऊ बन्दी बनाइके यरूसलेम सहर से रोम देस के रहँइ बालेन के हाँथे सँउपे गएन।<sup>18</sup> ऊँ पंचे हमहीं जाँचे-परखे के बाद, छोड़ देंइ चाहिन, काहेकि हमरे ऊपर मउत के सजा के काबिल कउनव दोस नहीं पाइन।<sup>19</sup> पय जब यहूदी लोग, एखे बिरोध माहीं बोलँइ लागें, त हमहीं महाराजा कैसर के दोहाई देंइ परिगा, एसे नहीं कि हमहीं अपने जाति के मनइन के ऊपर दोस लगामँइ काहीं रहा हय।<sup>20</sup> बलकिन एसे हम अपना पंचन काहीं बोलायन हय, कि अपना पंचन से मिली अउर बातचीत करी; काहेकि इजराइल के मनई जउने मसीहा के आमँइ के आसा कए रहे हँय, उहय मसीह के कारन हम इआ जंजीर माहीं बँधे हुएन।<sup>21</sup> तब ऊँ पंचे उनसे कहिन; हम पंचे तौहरे बारे माहीं यहूदिया प्रदेश से न त कउनव चिट्ठी पाएन, अउर न त बिसुआसी भाइन म से, कोऊ आइके तौहरे बारे माहीं बताइन, अउर न त कुछ गलतय कहिन।<sup>22</sup> पय तौहार बिचार का हय? उहय हम पंचे तौहसे सुनँय चाहित हुएन, काहेकि हम पंचे जानित हुएन, कि हरेक जघा इआ मत के बिरोध माहीं खुब मनई बातँय करत हें।”

<sup>23</sup> ओखे बाद ऊँ पंचे उनखे खातिर एकठे दिन ठहराइन, अउर खुब मनई उनखे इहाँ एकट्ठा भें, अउर ऊँ परमातिमा के राज के गबाही देत, अउर मूसा के बिधान अउर परमातिमा के सँदेस बतामँइ बालेन के किताबन से, यीसु के बारे माहीं समझाबत भिनसार से लइके, साँझ तक बखान करत रहिगें।<sup>24</sup> तब कुछ जने उनखे कही बातन काहीं मान लिहिन, अउर कुछ जने उनखे बातन के बिसुआस नहीं मानिन।<sup>25</sup> जब ऊँ पंचे आपस माहीं एक मत नहीं भें, तब पवलुस के एकठे इआ बात कहे के कारन, ऊँ पंचे उहाँ से चलेगें, कि “पबित्र आत्मा परमातिमा के सँदेस बतामँइ बाले यसायाह के द्वारा तौहरे बाप-दादन से निकहा कहिन तय, कि जाइके ई मनइन से कहा।

<sup>26</sup> ‘कि सुनत त रइहा, पय समझे न पइहा’, अउर ‘देखत त रइहा, पय जाने न पइहा।’

<sup>27</sup> काहेकि ई मनइन के मन मोट, अउर उनखर कान बहिर होइगे हँय, अउर ऊँ पंचे अपने आँखिन काहीं मूँद लिहिन हीं, अइसा न होय, कि ऊँ पंचे कबहूँ आँखिन से देखँय, अउर कानन से सुनँय, अउर मन से समझँय, अउर हमरे कइती फिरँय, अउर हम उनहीं पंचन काहीं चंगा करी।

<sup>28</sup> एसे तूँ पंचे जाना, कि परमातिमा के इआ मुक्ती के कथा, गैरयहूदी लोगन के लघे पठई गे ही, अउर ऊँ पंचे सुनिहँय।”<sup>29</sup> जब ऊँ इआ बात कहिन, त यहूदी लोग आपस माहीं खुब बिबाद करँइ लागें, अउर उहाँ से चलेगें।

<sup>30</sup> अउर उहाँ पवलुस दुइ बरिस तक अपने किराया के घर माहीं रहें।

<sup>31</sup> अउर जे उनखे लघे आबत रहे हँय, उन सगलेन से ऊँ मिलत रहे हँय, अउर बिना रोक-टोक के खुब निडर होइके, परमातिमा के राज के प्रचार करत रहे हँय, अउर प्रभू यीसु मसीह के बातन काहीं सिखाबत रहे हँय।

# रोमियन

## इआ चिट्ठी के परिचय

रोम देस माहीं रहँइ बाले मसीही लोगन के नाम लिखी यीसु मसीह के खास चेला पवलुस के चिट्ठी के इआ उद्देश्य रहा हय, कि रोम देस माहीं जउन मसीही मन्डली रही हय, उहाँ जाँइ के खातिर गइल तइआर करब, जेखर योजना पवलुस बनाइन रहा हय। उनखर इआ योजना रही हय, कि कुछ समय तक उँ उहाँ के मसीही लोगन के बीच माहीं रहिके काम करँय, अउर उनखे मदत से स्पेन देस तक जाँय। अउर मसीही बिसुआस के आपन ग्यान अउर मसीही लोगन के जीबनन माहीं जउन बेउहारिक रूप से जरूरी हई, उँ बातन काहीं समझामँइ के खातिर पवलुस इआ चिट्ठी काहीं लिखिन हीं। इआ चिट्ठी माहीं हमहीं पंचन काहीं पवलुस के सँदेस के सगलेन से खास बखान मिलत हय।

रोम देस के मसीही मन्डली के मसीही लोगन काहीं नबस्कार करँय, अउर उनखे खातिर अपने प्राथनन के बारे माहीं बताए के बाद, पवलुस इआ चिट्ठी के खास बात बताबत हें जउन इआ आय: कि “यीसु मसीह के ऊपर बिसुआस किहे के कारन हम पंचे परमातिमा के नजर माहीं निरदोस बन जइत हएन (रोमि 1:17)”।

पवलुस आँगे खास बातन के बारे माहीं बिस्तार से समझाबत हें। सगले मनई, यहूदी अउर गैरयहूदी दोनव, काहीं परमातिमा के साथ मेल-मिलाप करँइ के जरूरत ही, काहेकि सगले जन एक समान पाप के काबू माहीं हें। यीसु मसीह के ऊपर बिसुआस करँइ के द्वारा मनइन के परमातिमा के साथ मेल-मिलाप होत हय। पुनि पवलुस मसीह के साथ नबा जीबन के बखान करत हें, जउन परमातिमा के साथ इआ नए सम्बन्ध के नतीजा होत हय। बिसुआसी के परमातिमा के साथ मेल-मिलाप होत हय। अउर यीसु मसीह के ऊपर बिसुआस किहे से पाप के सजा से मुक्ती मिलत ही, अउर परमातिमा से टूट सम्बन्ध पुनि जुड़ जात हय। पाठ 5-8 माहीं पवलुस बिसुआसी के जीबन माहीं परमातिमा के बिधान के उद्देश्य, अउर परमातिमा के आत्मा के सामर्थ के ऊपर घलाय बिचार करत हें। पुनि यीसु मसीह के खास चेला पवलुस इआ प्रस्न से परेसान होत हें, कि सगले मनइन के खातिर परमातिमा के योजना माहीं यहूदी अउर गैरयहूदी दोनव कइसन सही रूप माहीं सामिल होइहँय। उँ इआ निरनय माहीं पहुँचत हें, कि यहूदी लोगन के द्वारा यीसु काहीं सोइकार न करब घलाय, परमातिमा के उआ योजना के एकठे हिस्सा आय। जउन सगले मनइन काहीं यीसु मसीह के ऊपर बिसुआस किहे के कारन, परमातिमा के किरपा के सीमा माहीं लइ आमँइ के खातिर बनाई गे ही। अउर उनखर इआ बिसुआस हय, कि यहूदी लोग हमेसा यीसु काहीं इनकार करत, न रइहँय। अन्तिम माहीं पवलुस इआ लिखत हें, कि मसीही जीबन कइसन जिअँइ चाही, खास करके दुसरे मनइन के साथ प्रेम के सम्बन्ध रखिके। उँ ई बिसयन काहीं परमातिमा के सेवा, राज अउर एक दुसरे के बारे माहीं मसीही लोगन के करतब्य, अउर सोच-बिचार के प्रस्नन के रूप माहीं लेत हें। उँ इआ चिट्ठी के अन्त निजी सँदेसन अउर परमातिमा के स्तुति के साथ करत हें।

रूप-रेखा :

इआ चिट्ठी के परिचय अउर खास बिसय  
मनइन काहीं मुक्ती के जरूरत  
मुक्ती के खातिर परमातिमा के गइल  
मसीह के द्वारा नबा जीबन  
इजराइली लोगन के खातिर परमातिमा के योजना  
मसीही चाल-चलन  
उपसंहार अउर निजी नबस्कार

### पवलुस के अभिबादन

1 हम पवलुस जउन यीसु मसीह के दास आहैन, इआ चिट्ठी काहीं लिख रहेन हय, अउर परमातिमा हमहीं यीसु मसीह के खास चेला होंइ के खातिर बोलाइन हीं, कि जउने हम उनखे खुसी के खबर के प्रचार करी काहेकि परमातिमा हमहीं इहय काम के खातिर नियुक्त किहिन हीं। 2 अउर इआ खुसी के खबर के बारे माहीं परमातिमा पहिलेन से अपने सँदेस बतामँइ बालेन के द्वारा पबित्र सास्त्र माहीं, 3 अपने लड़िका अउर हमरे पंचन के प्रभू यीसु मसीह के बारे माहीं वादा किहिन रहा हय; जउन मनई के रूप माहीं त राजा दाऊद के कुल से पइदा भें। 4 अउर पबित्रता के आत्मा के द्वारा मरेन म से जिआए जाँइ के कारन, उँ सामर्थ के साथ परमातिमा के लड़िका ठहरे हँय, ईन यीसु मसीह हमार पंचन के प्रभू आहीं। 5 अउर इनहिन के द्वारा

हमहीं किरपा अउर यीसु के खास चेला होंइ के अधिकार मिला हय; कि जउने उनखे नाम के ऊपर गैरयहूदी लोग बिसुआस कइके उनखे बातन काहीं मानँय। 6 उनहिन म से तुहँ पंचे घलाय यीसु मसीह के जन होंय के खातिर चुने गया हय।

7 अउर इआ चिट्ठी तोंहई पंचन काहीं मिलय, जउन रोम देस माहीं परमातिमा के पियार हय, अउर परमातिमा के पबित्र जन होंइ के खातिर चुने गया हय, हमरे पंचन के पिता परमातिमा अउर प्रभू यीसु मसीह के तरफ से तोंहई पंचन काहीं किरपा अउर सान्ती मिलत रहय।

### रोम देस के मसीही लोगन से मिलँइ के पवलुस के इच्छा

8 सबसे पहिले हम तोंहरे सगले जनेन के खातिर यीसु मसीह के द्वारा अपने परमातिमा काहीं धन्यवाद देइत हएन, काहेकि तोंहरे बिसुआस के

चरचा हरेक जघन माहीं होइ रही हय।<sup>9</sup> अउर परमातिमा के सेबा हम अपने पूरे मन से उनखे लड़िका के खुसी के खबर काहीं सुनामँइ के बारे माहीं करित हएन, अउर उँइन हमार गबाह हें; कि हम तौहई पंचन काहीं लगीतार याद करत रहित हएन।<sup>10</sup> अउर हम हमेसा अपने प्राथनन माहीं बिनती करत रहित हएन, कि परमातिमा के मरजी से तौहरे लघे आमँइ के हमार यात्रा कउनव मेर से सफल होय।<sup>11</sup> काहेकि तौहसे मिलँइ के हमार बड़ी लालसा ही, कि हम तौहई कउनव आत्मिक आसीस देई, जउने तूँ पंचे बिसुआस माहीं मजबूत होइजा।<sup>12</sup> अरथात इआ, कि जब हम तौहरे बीच माहीं होब, त एक दुसरे के बिसुआस से हम पंचे आपस माहीं उत्साहित होब।<sup>13</sup> अउर हे भाई-बहिनिव, हम इआ चाहित हएन, कि तूँ पंचे इआ जानिल्या, कि हम तौहरे लघे कइअक बेरकी आमँइ चाहन हय, कि जइसन हमहीं आत्मिक फर दुसरे गैरयहूदी लोगन माहीं मिला हय, उहयमेर तौहरेव पंचन माहीं पाय सकी, पय अबय तक एक न एक बाधा अउतय रहिगे।<sup>14</sup> हम जउन मनई बिकास माहीं आँगे हँय, अउर जउन मनई बिकास माहीं पीछे हँय, दोनव के अउर बुद्धिमानन अउर निरबुद्धियन के घलाय रिनिहा हएन।<sup>15</sup> एहिन से हम तौहई पंचन काहीं घलाय जेतने रोम देस माहीं रहते हया, खुसी के खबर सुनामँइ के खातिर उत्साहित हएन।

### खुसी के खबर के सामर्थ

<sup>16</sup> काहेकि हम खुसी के खबर से नहीं लजई, एसे कि उआ हरेक बिसुआस करँइ बालेन के खातिर, पहिले त यहूदी लोगन के खातिर, ओखे बाद गैरयहूदी लोगन काहीं मुक्ती पामँइ के खातिर परमातिमा के सामर्थ आय।<sup>17</sup> काहेकि खुसी के खबर माहीं इआ बताबा ग हय, कि परमातिमा मनई काहीं अपने नजर माहीं निरदोस कइसा बनाबत हें, इआ सुरुआत से अन्त तक बिसुआस माहीं टिका हय; जइसन पबित्र सास्त्र माहीं घलाय लिखा हय, कि “परमातिमा के नजर माहीं निरदोस मनई बिसुआस के कारन जिअत रही।”

### मनइन के पाप

<sup>18</sup> उन सगलेन काहीं जउन सत्य काहीं अधरम से दबाइके रक्खत हें, अउर बुरे कामन काहीं करत हें, अउर हरेकमेर के बुराई करत हें, स्वरग माहीं रहँइ बाले परमातिमा सजा देइहँय।<sup>19</sup> अउर इआमेर एसे होइ रहा हय, काहेकि परमातिमा के बारे माहीं उँ पंचे निकहा से जानत हें, काहेकि परमातिमा अपने बारे माहीं खुदय उनहीं पंचन काहीं बताइन हीं।<sup>20</sup> जब से संसार के रचना भे ही, परमातिमा के न देखाई देँइ बाली बिसेसता अरथात अनन्त सक्ती, अउर परमातिमा के दिब्य गुन साफ-साफ देखाई देत हें, काहेकि उँ चीजन से उँ पूरी तरह से जाने जाय सकत हें, जउने काहीं परमातिमा रचिन हीं। एसे अब मनइन के लघे कउनव बहाना नहीं आय।<sup>21</sup> जबकि उँ पंचे परमातिमा काहीं जानत रहे हँय, तऊ उँ पंचे परमातिमा के रूप माहीं, उनहीं मान-सम्मान अउर धन्यवाद नहीं दिहिन, बलकिन बेफालतू के सोच-बिचार करँइ लागें, एसे उनखर निरबुद्धी मन कठोर होइके बुरे सोच-बिचारन से भरिगा।<sup>22</sup> उँ पंचे अपने-आप काहीं बड़ा बुद्धिमान समझत हें, पय मूरुख बनिगें।<sup>23</sup> अउर कबहूँ न नास होंइ बाले परमातिमा के महिमा काहीं, नास होंइ बाले मनइन, अउर पंछिन, अउर पसुअन, अउर रेंगँइ बाले जीव-जन्तुअन कि नाई मूरत बनाइके, उनहीं मूरतिन माहीं बदल डारिन।

<sup>24</sup> एसे परमातिमा उनहीं पंचन काहीं उनखे मन के बुरी इच्छन के मुताबिक असुद्ध होंइ के खातिर छोँइ दिहिन, कि उँ पंचे ब्यभिचार माहीं परिके आपस माहीं अपने देहन के अपमान करँय।<sup>25</sup> काहेकि उँ पंचे परमातिमा के सच्चाई के ऊपर बिसुआस करँइ से इनकार कइके, लबरी माहीं बिसुआस करँइ लागें, अउर उनखे बनाई चीजन के अराधना अउर सेबा करँइ लागें, पय उनखर नहीं किहिन, जउन संसार काहीं बनामँइ बाले परमातिमा आहीं, अउर जउन हमेसा धन्य हें। आमीन!

<sup>26</sup> एसे परमातिमा उनहीं सरमिन्दा करँइ बाली नीच अभिलासन के काबू माहीं कइ दिहिन; इहाँ तक कि उनखर मेहेरिअव आपन सोभाबिक सम्बन्ध बनाउब छोँइके, ओखे बिरुद्ध असोभाबिक सम्बन्ध बनामँइ लागीं।

<sup>27</sup> इहइमेर मंसेरुअव घलाय, अपने मेहेरिअन से सम्बन्ध बनाउब छोँइके आपस माहीं कामातुर होइके रहँइ लागें, अउर मंसेरुअव-मंसेरुआ एक दुसरे से नजायज सम्बन्ध बनाइके अपने बुरे काम के ठीक सजा पाइन।

<sup>28</sup> काहेकि उँ पंचे परमातिमा काहीं पहिचानँय से इनकार कइ दिहिन, एसे परमातिमव उनहीं पंचन काहीं उनखे बुरे मन के मुताबिक छोँइ दिहिन; कि जउने उँ पंचे अनुचित काम करँय।<sup>29</sup> एसे उँ पंचे हरेकमेर के अधरम करँइ बाले, अउर दुस्तता करँइ बाले, अउर लालच करँइ बाले बनिगें, अउर इरसा से भरिगें; अउर डाह करँइ बाले, अउर कतल करँइ बाले, अउर झगड़ा करँइ बाले, अउर छल-कपट करँइ बाले बनिगें अउर इरसा से भरिगें, अउर चुगली करँइ बाले,<sup>30</sup> अउर दुसरे के बदनामी करँइ बाले, अउर परमातिमा से नफरत करँइ बाले, अउर दुसरे के मान-सम्मान न करँइ बाले, अउर घमन्डी, अउर आपन बड़ाई करँइ बाले, बुरी-बुरी बातन काहीं बनाइके बोलेँइ बाले, अउर महतारी-बाप के कहा-बतान न मानँइ बाले,<sup>31</sup> बुद्धिहीन, अउर बिसुआस घात करँइ बाले, प्रेम न करँइ बाले अउर निरदयी होइगे हँय।<sup>32</sup> उँ पंचे परमातिमा के न्यायपूर्ण नेम काहीं निकहा से जानत हें, कि इआमेर के कामन काहीं करँइ बाले मउत के सजा के काबिल हें, तऊ उँ पंचे इआमेर के कामन काहीं करत हें, अउर इहइमेर के कामन काहीं करँइ बालेन से खुसी घलाय होथें।

### परमातिमा के निस्पच्छ न्याय

**2** हे न्याय करँइ बाले मनई तूँ चाह कोऊ होइहा, तौहरे लघे कउनव बहाना नहीं आय, काहेकि जउने बातन के खातिर दुसरे काहीं दोसी ठहरउते हया, अउर खुदय उहय काम तूँ करते हया, त अपने-आप काहीं घलाय दोसी ठहरउते हया।<sup>2</sup> अउर हम पंचे इआ जानित हएन, कि जउन मनई अइसन काम करत हें, उनहीं पंचन काहीं परमातिमा के तरफ से सत्य के मुताबिक सजा मिलत ही।<sup>3</sup> अउर हे साथी, तूँ त केबल मनई आह्या, अउर तूँ जउन इआमेर के काम करँइ बालेन काहीं दोसी ठहरउते हया, त का तूँ सोचते हया, कि हम परमातिमा से मिलय बाले सजा से बँचि जाब? <sup>4</sup> का तूँ परमातिमा के असीमित दया अउर सहनशीलता अउर धीरज काहीं तुच्छ जनते हया? तौहई इआ जानँइ चाही, कि परमातिमा के दया तौहई पस्चाताप करब सिखाबत ही।<sup>5</sup> पय तूँ अपने हठी अउर कबहूँ न पचिताय बाले मन के कारन, परमातिमा के क्रोधपूर्ण सजा काहीं अपने खातिर उआ दिन के खातिर एकट्ठा कइ रहे हया, जब परमातिमा सच्चा न्याय करिहँय।<sup>6</sup> “परमातिमा हरेक जन काहीं उनखे कामन के मुताबिक बदला देइहँय।”<sup>7</sup> जउन मनई धीरज के साथ लगीतार निकहा काम करत, परमातिमा के तरफ से बड़ाई अउर मान-सम्मान पामँइ अउर परमातिमा के साथ हमेसा रहँइ खातिर खोज माहीं लगे रहत हें, उनहीं परमातिमा अनन्त जीवन देइहँय।<sup>8</sup> पय जउन मनई स्वार्थी हें, अउर सत्य के बिरोध करत अधरम माहीं चलत हें, उनहीं परमातिमा से कठोर सजा मिली।<sup>9</sup> अउर हरेक मनइन के ऊपर दुख-मुसीबत अइहँय जउन बुरा काम करत हें, पहिले यहूदी लोगन के ऊपर ओखे बाद गैरयहूदी लोगन के ऊपर।<sup>10</sup> अउर जे कोऊ भलाई करत हें, उनहीं बड़ाई, मान-सम्मान अउर सान्ती मिली, पहिले यहूदी लोगन काहीं, ओखे बाद गैरयहूदी लोगन काहीं।<sup>11</sup> काहेकि परमातिमा कोहू के साथ पच्छपात नहीं करँय।

<sup>12</sup> एसे कि जेतने मनई बिना परमातिमा के बिधान पाए पाप किहिन हीं, उँ पंचे बिना बिधान के नासव होइहँय, पय जेतने मनई बिधान काहीं पाइके पाप किहिन हीं, उनखर न्याय परमातिमा, बिधान के मुताबिक करिहँय।

<sup>13</sup> (काहेकि जेतने मनई बिधान के बातन काहीं सुनत भर हें, अउर मानँइ नहीं, उँ परमातिमा के नजर माहीं निरदोस न ठहरिहँय, बलकिन जे कोऊ



बिधान के बातन काहीं सुनिके, उनखे मुताबिक चलत हें, उँइन परमातिमा के नजर माहीं निरदोस ठहराए जइहँय।<sup>14</sup> एसे कि गैरयहूदी लोगन के लघे मूसा के द्वारा दीन बिधान नहिँ आय, तऊ अपने सुभाबय से मूसा के बिधान के बातन कि नाई चलत हें, त भले उनखे लघे मूसा के द्वारा दीन बिधान नहिँ आय, तऊ ऊँ पंचे अपने खातिर खुदय बिधान हें।<sup>15</sup> ऊँ पंचे बिधान के बातन काहीं अपने हिरदँय माहीं रक्खे, अपने कामन से देखाबत हें, अउर उनखर मन घलाय एखर गबाही देत हय, अउर उनखर सोच-बिचार उनहीं बताबत हय, कि इआ काम सही हय कि गलत।<sup>16</sup> इआ सब उआ दिना प्रगट कीन जई, जब परमातिमा, हमरे सुनाए खुसी के खबर के मुताबिक, यीसु मसीह के द्वारा मनइन के गुप्त बिचारन के न्याय करिहँय।

### यहूदी लोग अउर मूसा के बिधान

<sup>17</sup> पय अगर तूँ अपने-आप काहीं यहूदी कहते हया, अउर मूसा के बिधान माहीं तोंहार बिसुआस हय, अउर अपने अउर परमातिमा के सम्बन्ध के बारे माहीं तोंहई घमन्ड हय।<sup>18</sup> अउर तूँ परमातिमा के मरजी काहीं जनते हया, अउर निकही-निकही बातन काहीं अपनउते हया, काहेकि इआ सब मूसा के बिधान से तोंहई सिखाबा ग हय,<sup>19</sup> अउर अगर तूँ अपने-आप काहीं जउन मनई परमातिमा काहीं नहिँ जानँय, उनखर अँगुआ मनते हया, अउर जउन मनई परमातिमा काहीं न जानिके अँधिआर माहीं भटक रहे हँय, उनखे खातिर तूँ उँजिआर देँड बाला समझते हया।<sup>20</sup> अउर निरबुद्धियन काहीं सिखामँड बाला, अउर जउन मनई परमातिमा के बातन माहीं बच्चन कि नाई अनजान हें, उनहीं उपदेस देँड बाला मनते हया, अउर इआ समझते हया कि ग्यान, अउर सत्य के नमूना, जउन मूसा के बिधान माहीं हय, हमहिन काहीं मिला हय।<sup>21</sup> त तूँ जउने बातन काहीं दुसरेन काहीं सिखउते हया, त उनहीं खुद काहे नहिँ सिखते आहा? तूँ जउन दुसरेन काहीं चोरी न करँड के उपदेस देते हया, त खुद चोरी काहे करते हया? <sup>22</sup> तूँ जउन दुसरेन काहीं बरजते हया, कि “ब्यभिचार न करा।” अउर खुदय ब्यभिचार काहे करते हया? अउर तूँ जउन मूरतिन से नफरत त करते हया, पय खुदय मन्दिर के धन काहीं, काहे लुटते हया? <sup>23</sup> तूँ जउन घमन्ड करते हया, कि मूसा के बिधान हमरे लघे हय, त मूसा के बिधान के बातन के उलंघन कइके, परमातिमा के अपमान काहे करते हया? <sup>24</sup> “काहेकि तोंहरे पंचन के कारन गैरयहूदी लोगन के बीच माहीं परमातिमा के नाम के बुराई होत ही ?” जइसन पबित्र सास्त्र माहीं लिखा घलाय हय।

<sup>25</sup> अउर खतना कराए से फायदा त हय, पय जब तूँ मूसा के बिधान के बातन के मुताबिक चला, पय अगर तूँ मूसा के बिधान के बातन के उलंघन करिहा, त तोंहार खतना करबाउब, बिना खतना कराए कि नाई ठहरी।<sup>26</sup> अगर कउनव मनई के खतना न भ होय, अउर उआ मूसा के बिधान के बातन काहीं मानत होय, त ओखर भले खतना न भ होय, तऊ खतना कराए के बराबर माना जई।<sup>27</sup> अउर जउने मनई के देँह के खतना नहिँ भ आय, अउर उआ बिधान के बातन काहीं निकहा से मानत हय, त उआ मनई तोंहई जउन बिधान काहीं लए हया, अउर खतनव कराए हया, पय बिधान के बातन के उलंघन करते हया, त दोसी ठहराई।<sup>28</sup> जउन मनई देखाबा करत हय, कि हम यहूदी आहैन, उआ वास्तव माहीं यहूदी न होय, अउर देँह के खतना करबाउब, वास्तव माहीं खतना न होय।<sup>29</sup> पय यहूदी उहय कहाई, जउन भीतर से अरथात मन माहीं यहूदी हय, अउर सच्चा खतना उआ आय, जउन पबित्र आत्मा के द्वारा मन के होत हय, उआ नहिँ कि जउन मूसा के बिधान माहीं लिखे के मुताबिक हय, इआमेर करँड बाले मनई के बड़ाई, मनइन के तरफ से नहिँ, बलकिन परमातिमा के तरफ से होत ही।

### परमातिमा के बफादारी

**3** एसे यहूदी होए से का फायदा हय, इआ खतना कराए से का फायदा हय? <sup>2</sup> अगर देखा जाय त यहूदी होँड के फायदा त हय, काहेकि

† 2:24 यसा 52:5

सबसे पहिले त इआ हय, कि उनहीं पंचन काहीं परमातिमा के बचन सँउपा ग।<sup>3</sup> पय अगर उनमा से कुछ जने बिसुआस घात करँड बाले निकरिगें, त का भा? उनखे बिसुआस घात †† करँड के कारन परमातिमा के सच्चाई का झूठ होइ सकत ही? <sup>4</sup> बेलकुल नहिँ, बलकिन सगले मनई झूठ ठहरिहँय, अउर परमातिमा सच्चे ठहरिहँय, जइसन पबित्र सास्त्र माहीं लिखव हय, “जउने तूँ अपने हरेक बातन माहीं धरमी ठहरा, अउर न्याय करत समय तूँ बिजय पाबा।”

<sup>5</sup> एसे अगर हमार पंचन के अधारमिकता परमातिमा के धारमिकता सिद्ध करत ही, त हम पंचे का कही? का इआ कि परमातिमा जउन हमहीं पंचन काहीं सजा देत हें, त का ऊँ अन्याय करत हें? (इआ त हम एकठे साधारन मनई कि नाई कहित हएन।) <sup>6</sup> बेलकुल नहिँ, नहिँ त परमातिमा संसार के मनइन के न्याय कइसन करिहँय? <sup>7</sup> पय तूँ पंचे कहि सकते हया, “जब हमरे लबरी बोलँड के कारन परमातिमा के सच्चाई अउर जादा प्रगट होत ही, अउर एसे उनखर बड़ाइन होत ही, त पुनि हम काहे पापी कि नाई सजा पामँड के काबिल ठहराए जइत हएन? <sup>8</sup> त पुनि हम पंचे काहे न कही, कि ‘आबा! हम पंचे बुरे काम करी जउने भलाई प्रगट होय’।” जइसन कि हमरे पंचन के बारे माहीं बुराई कइके कुछ मनई आरोप लगाबत हें, कि हम पंचे अइसन कहित हएन, अइसन बोलँड बाले मनई दोसी ठहराए जाँड के काबिल हें, काहेकि उँड सगले दोसी हें।

### कउनव मनई परमातिमा के नजर माहीं निरदोस नहिँ आहीं

<sup>9</sup> त पुनि हम पंचे का कही? का हम यहूदी लोग गैरयहूदी लोगन से कउनव मेर से निकहे हएन? नहिँ, बेलकुल नहिँ, काहेकि हम पंचे इआ साबित कइ चुकेन हय, कि चाह यहूदी होय, चाह गैरयहूदी सगले जन पाप के कब्जे माहीं हें।<sup>10</sup> जइसन पबित्र सास्त्र माहीं लिखा हय; कि

“परमातिमा के नजर माहीं कोऊ निरदोस नहिँ आय, एक जनेव नहिँ आय।

<sup>11</sup> अउर न कोऊ समझदारय आय, अउर न कोऊ परमातिमा काहीं ढूँढ़िन बाला आय,

<sup>12</sup> सगले मनई परमातिमा के बताए गइल से भटकिये हँय, अउर सगले मनई परमातिमा के नजर माहीं निकम्मा बनिगें हँय, कोऊ भलाई करँड बाला नहिँ आय, एक जनेव नहिँ आय †।”

<sup>13</sup> उनखे मुँहे से हमेसा बुराइन निकरत ही, जइसन खुली कन्न से दुर्गन्ध आबत ही, उनखे मुँह से हमेसा छल के बात निकरत ही, अउर उनखे मुँहे से साँप के बिस कि नाई खतरनाक बातँय निकरती हई।

<sup>14</sup> अउर उनखे मुँहे से हमेसा सराप अउर करुअई के बातँय निकरती हई।

<sup>15</sup> अउर ऊँ पंचे हमेसा कतल करँड के खातिर तइआर रहत हें।

<sup>16</sup> ऊँ पंचे जहाँ जात हें नास करत हें, अउर दुख देत हें।

<sup>17</sup> ऊँ पंचे सान्ती के गइल के बारे माहीं जनतय नहिँ आहीं।

<sup>18</sup> उनखे जीवन माहीं परमातिमा के डेर हइअय नहिँ आय।

<sup>19</sup> अउर हम पंचे इआ जानित हएन, कि जउन कुछू मूसा के बिधान माहीं कहा ग हय, उआ उनखे खातिर आय जउन मूसा के बिधान काहीं मानत हें, कि जउने हरेक जनेन के मुँह बंद कीन जाय, अउर सगले संसार के मनई परमातिमा से सजा पामँड के काबिल ठहरँय।<sup>20</sup> काहेकि मूसा के बिधान के पालन किहे से कउनव मनई परमातिमा के नजर माहीं निरदोस न ठहरी, एसे कि मूसा के बिधान के द्वारा केबल पाप के पहिचान होत ही।

### बिसुआस के द्वारा परमातिमा के नजर माहीं निरदोस ठहराबा जाब

<sup>21</sup> पय अब सगले मनइन काहीं इआ बताबा ग हय, कि परमातिमा बिना मूसा के बिधान के उनहीं कइसन अपने नजर माहीं निरदोस बनाबत हें, जेखे बारे माहीं मूसा के बिधान माहीं लिखा हय, अउर परमातिमा के सँदेस बतामँड बाले घलाय गबाही दिहिन हीं।<sup>22</sup> जउन मनई यीसु मसीह के ऊपर

†† यहूदी लोगन म से कुछ जने मूसा के जउन बिधान उनहीं परमातिमा से मिला रहा हय, ओही न मानिके परमातिमा के नजर माहीं बिसुआस घात किहिन। ‡ 3:12 भज 14:1-3

बिसुआस करत हैं, उन्हीं परमातिमा अपने नजर माहीं निरदोस बनाबत हैं, एमाहीं कुछू भेदभाव नहीं आय, इआ मुक्ती उन सगलेन के खातिर आय, जउन यीसु मसीह के ऊपर बिसुआस करत हैं।<sup>23</sup> काहेकि संसार के सगले मनई पाप किहिन हीं, अउर परमातिमा के महिमा से बंचित हैं।<sup>24</sup> पय परमातिमा के किरपा से जउन मुक्ती यीसु मसीह के ऊपर बिसुआस किहे से मिलत ही, ओखे द्वारा हम पंचे सेंट-मेंत माहीं, परमातिमा के नजर माहीं निरदोस ठहराए जइत हएन।<sup>25</sup> परमातिमा यीसु मसीह काहीं, उनखे ऊपर बिसुआस किहे के द्वारा पापन से मुक्ती देबामँड के खातिर मनइन काहीं दिहिन हीं। परमातिमा इआ काम यीसु मसीह के बलिदान के रूप माहीं किहिन हीं। अइसा इआ देबामँड के खातिर किहिन हीं कि परमातिमा सहनसील हैं, काहेकि ऊँ पहिले मनइन काहीं उनखे पापन के सजा दिहे बिना छोंड़ि दिहिन तय।<sup>26</sup> अउर परमातिमा के न्याय के इआ काम आजव के समय के खातिर घलाय हय, जउने ऊँ खुदय न्यायी कहाँमँय, काहेकि अबहिनव जे कोऊ यीसु के ऊपर बिसुआस करत हैं, उनहूँ पंचन काहीं ऊँ निरदोस ठहराबत हैं।<sup>27</sup> त हम पंचे घमन्ड कइसा कइ सकित हएन? काहेकि घमन्ड करँड के हमरे पंचन के जीबन माहीं कउनव जघय नहीं आय? काहेकि हम पंचे कउनव मूसा के बिधान के पालन किहे से नहीं, अउर न कउनव कामन के कारन, बलकिन बिसुआस के कारन परमातिमा के नजर माहीं निरदोस ठहरने हँय।<sup>28</sup> एसे हम पंचे इआ कहि सकित हएन, कि कउनव मनई मूसा के बिधान के पालन किहे से नहीं, बलकिन बिसुआसय के द्वारा परमातिमा के नजर माहीं निरदोस बन सकत हय।<sup>29</sup> त बताबा का परमातिमा यहूदी लोगन के भर आहीं? काहे गैरयहूदी लोगन के परमातिमा न होंहीं? हौं हम सही कहित हएन, कि गैरयहूदी लोगन के घलाय परमातिमा आहीं।<sup>30</sup> काहेकि सगले मनइन के एकयठे परमातिमा हैं, जउन खतना करामँड बाले मनइन काहीं बिसुआस से अउर खतना न करामँड बाले मनइन काहीं घलाय उहय बिसुआस के द्वारा परमातिमा अपने नजर माहीं निरदोस ठहरइहँय।<sup>31</sup> त का हम पंचे बिसुआस के द्वारा मूसा के बिधान काहीं बेकार ठहराइत हएन? नहीं, बेलकुल नहीं; बलकिन मूसा के बिधान काहीं अउर मजबूत बनाइत हएन।

#### अब्राहम के बिसुआस के बखान

4 एसे अब हम पंचे अपने पूरबज अब्राहम के बारे माहीं का कही?  
<sup>2</sup> काहेकि अगर अब्राहम अपने कामन के कारन परमातिमा के नजर माहीं निरदोस ठहरतें, त इआ उनखे खातिर घमन्ड करँड के बात होत, पय परमातिमा के आँगे ऊँ वास्तव माहीं घमन्ड नहीं कइ सकँय।<sup>3</sup> पबित्र सास्त्र माहीं घलाय लिखा हय, कि “अब्राहम परमातिमा के ऊपर बिसुआस किहिन रहा हय, एहिन से ऊँ परमातिमा के नजर माहीं निरदोस ठहराए गे रहे हँय।”  
<sup>4</sup> काहेकि काम करँड बाले मनई काहीं मजूरी देब दान न होय, बलकिन उआ त ओखर हक्क आय।<sup>5</sup> पय जउन मनई काम नहीं करय, बलकिन पापिन काहीं निरदोस बनामँड बाले परमातिमा के ऊपर बिसुआस करत हय, त ओखर उआ बिसुआसय ओखे खातिर परमातिमा के नजर माहीं निरदोस होंड के कारन बन जात हय।<sup>6</sup> जउने मनई काहीं परमातिमा बिना काम किहे निरदोस ठहराबत हैं, उआ मनई काहीं राजा दाऊद घलाय धन्य कहत हैं।  
<sup>7</sup> अउर ऊँ कहत हैं, कि  
 ऊँ मनई धन्य हैं, जिनखर अधरम माफ होइगे हँय, अउर जिनखर पाप मूँदे गे हँय।  
<sup>8</sup> अउर जउने मनई काहीं प्रभू कबहूँ पापी नहीं ठहरामँड उआ मनई धन्य हय।  
<sup>9</sup> त का इआ धन्य कहब केबल उनहिन के खातिर भर आय, जिनखर खतना होइ चुका हय, इआ कि उनहूँ के खातिर आय जिनखर खतना नहीं भ आय। (हौं इआ उनहूँ के खातिर आय जिनखर खतना नहीं भ आय) काहेकि हम पंचे इआ कहित हएन, कि “अब्राहम बिसुआसय के द्वारा परमातिमा के नजर माहीं निरदोस ठहराए गें।”<sup>10</sup> त इआ कबय भ? जब

उनखर खतना होइ चुका रहा हय, तब इआ कि जब उनखर खतना नहीं भ रहा आय तब, नहीं उनखर खतना होए के बाद नहीं, बलकिन खतना होंड के पहिले भ रहा हय।<sup>11</sup> अब्राहम बिना खतना कराए बिसुआस के द्वारा परमातिमा के नजर माहीं निरदोस ठहराए गें। अउर उनखे देह माहीं एकठे निसानी † के रूप माहीं खतना के चिन्ह लगाबा ग, इआमेर से अब्राहम ऊँ सगलेन के घलाय पिता बनिगें, जउन बिना खतना कराए परमातिमा के ऊपर बिसुआस करत हैं, जउने ऊँ पंचे घलाय बिसुआस के द्वारा परमातिमा के नजर माहीं निरदोस ठहराए जाँय।<sup>12</sup> अउर ऊँ उनहूँ पंचन के घलाय कुल पिता आहीं, जिनखर खतना भ हय, जउन केबल खतना भर नहीं कराए आहीं, बलकिन हमरे पंचन के कुल पिता अब्राहम के बिसुआस के जउने काहीं, ऊँ बिना खतना कराए किहिन रहा हय, अनुसरन करत हैं।

#### बिसुआस के द्वारा परमातिमा के वादा के मिलब

<sup>13</sup> अउर अब्राहम, इआ कि उनखे बंसन काहीं इआ वादा, कि ऊँ पंचे संसार के बारिसदार होइहँय, मूसा के बिधान के पालन किहे से नहीं मिला रहा आय, बलकिन उआ बिसुआस के द्वारा परमातिमा के नजर माहीं निरदोस होंड से मिला रहा हय।<sup>14</sup> अगर जे कोऊ मूसा के बिधान काहीं पालन करत हैं, उँइन पंचे भर संसार के बारिसदार आहीं, त बिसुआस के कउनव मतलब न रहत, अउर वादा घलाय बेकार ठहरत।<sup>15</sup> जब मनई मूसा के बिधान के पालन नहीं करँड, त परमातिमा क्रोधित होइके उन्हीं सजा देत हैं, पय जहाँ मूसा के बिधान हइअय नहीं आय, त उहाँ मूसा के बिधान के उलंघन होबय न करी।

<sup>16</sup> एसे इआ साबित होत हय, कि मनई परमातिमा के वादा केबल बिसुआस से पाबत हैं, अउर इआ उनखे किरपा से सेंट-मेंत माहीं मिलत हय। इआमेर से परमातिमा के वादा अब्राहम के सगले सन्तानन के खातिर निश्चित हय, न केबल उनखे खातिर जउन मूसा के बिधान के पालन करत हैं, बलकिन उनहूँ पंचन के खातिर घलाय आय, जउन अब्राहम कि नाई बिसुआस रक्खत हैं। अउर ईन अब्राहम हमार पंचन के कुल पिता आहीं।<sup>17</sup> जइसन पबित्र सास्त्र माहीं लिखा हय, कि “हम तौहई खुब जातिअन के आत्मिक पिता ठहराएन हय”, अउर परमातिमा के नजर माहीं अब्राहम हमार पंचन के कुल पिता आहीं, अउर जउने परमातिमा के ऊपर अब्राहम के बिसुआस हय, ऊँ मरेन मनइन काहीं जिआबत हैं, जउन बातेंय हइअय नहीं आहीं, उनहूँ के नाम अइसन लेत हैं, कि मानो ऊँ अबहिनव हई।<sup>18</sup> अउर अब्राहम खुब निरासा माहीं घलाय, आसा कए परमातिमा के ऊपर बिसुआस किहिन, अउर जउन बचन ऊँ कहिन तय, कि “तौहार बंस अइसन होई कि तूँ खुब जातिअन के आत्मिक पिता कहइहा।”<sup>19</sup> अउर अब्राहम जउन सव बरिस के होइगें तय, अउर अपने देह के निबल अबस्था माही घलाय, अउर अपने मेहेरिआ सारा जउन लड़िका-बच्चा पइदा नहीं कइ सकत रही आँय, उनहूँ के हाल जाने के बादव आपन बिसुआस कमजोर नहीं किहिन।<sup>20</sup> अउर अपने बिसुआस माहीं बने रहिगें, अउर परमातिमा के दीन वादा के ऊपर संका नहीं किहिन, बलकिन बिसुआस माहीं अऊ मजबूत होइके परमातिमा के बड़ाई किहिन।<sup>21</sup> अउर उन्हीं पूर भरोसा रहा हय, कि परमातिमा जउन वादा किहिन हीं, ऊँ ओही पूर करँड के खातिर पूरी तरह से समरथी हैं।<sup>22</sup> एसे अब्राहम इआ बिसुआस के कारन परमातिमा के नजर माहीं निरदोस ठहराए गें।<sup>23</sup> अउर पबित्र सास्त्र माहीं लिखा इआ बचन, कि “बिसुआस के द्वारा ऊँ परमातिमा के नजर माहीं निरदोस ठहराए गें”, न केबल उनहिन के खातिर आय,<sup>24</sup> बलकिन हमरे पंचन के खातिर घलाय आय, जउन परमातिमा के नजर माहीं निरदोस ठहराए जइत हएन, अरथात हमरे पंचन के खातिर जउन उनखे ऊपर बिसुआस करित हएन, उँइन हमरे पंचन के प्रभू यीसु काहीं मरेन म से जिआइन रहा हय।<sup>25</sup> उँइन यीसु हमरे पंचन के अपराधन के खातिर मार डारँड के खातिर पकड़बाए गें, अउर

† 4:11 उत्प 17:11

हमहीं पंचन काहीं परमातिमा के नजर माहीं निरदोस बनामँइ के खातिर मरेन म से पुनि जिआए गें।

### परमातिमा से मेल-मिलाप

5 काहेकि हम पंचे, बिसुआस किहे के कारन परमातिमा के खातिर उनखे नजर माहीं निरदोस होइ गएन हँय, एसे हमरे पंचन के प्रभू यीसु मसीह के द्वारा हमार पंचन के परमातिमा से मेल-मिलाप होइगा हय।<sup>2</sup> अउर उँइन यीसु मसीह के द्वारा बिसुआस के कारन उआ किरपा माही हम पंचे बने हएन, अउर उनखे लघे तक हमार पंचन के पहुँच होइगे ही, अउर परमातिमा के जउन महिमा हमहीं पंचन काहीं मिलँइ के पूर आसा ही, ओमाहीं आनन्द मनाइत हएन।<sup>3</sup> केबल एतनय भर नहीं, बलकिन हमहीं पंचन काहीं दुख-मुसीबत माहीं घलाय आनन्द मनामँइ चाही, इआ जानिके कि दुख-मुसीबत से धीरज पइदा होत हय।<sup>4</sup> अउर धीरज धरे से निकहा चरित्र पइदा होत हय, अउर निकहा चरित्र से आसा पइदा होत ही।<sup>5</sup> अउर उआ आसा हमहीं पंचन काहीं निरास नहीं होंय देय, काहेकि जउन पबित्र आत्मा हमहीं पंचन काहीं दीन ग हय, उहय पबित्र आत्मा के द्वारा परमातिमा के प्रेम हमरे पंचन के हिरदँय माहीं बहुतायत से डारा ग हय।<sup>6</sup> काहेकि जब हम पंचे मुक्ती पामँइ माहीं असमर्थ रहने हय, अउर परमातिमा के हुकुमन काहीं नहीं मानत रहे आहने, तऊ हमरे पंचन के खातिर मसीह उचित समय म खुद काहीं बलिदान किहिन।<sup>7</sup> अउर परमातिमा के बिधान काहीं निकहा से पालन करँइ बाले मनई के खातिर कोऊ मरय, इआ त बड़ा मुसकिल हय, पय होइ सकत हय, कि कोऊ भले मनई के खातिर मरऊँ काहीं तइआर होइ जाय।<sup>8</sup> पय परमातिमा हमरे पंचन के ऊपर अपने प्रेम के भलाई इआमेर से देखाइन, कि जब हम पंचे पापी रहने हय, तऊ हमरे पंचन के खातिर मसीह आपन जान दइ दिहिन।<sup>9</sup> एसे अब हम पंचे उनखे खून के कारन परमातिमा के नजर माहीं निरदोस होइ गएन हँय, त यीसु मसीह के द्वारा परमातिमा के क्रोधपूर्ण सजा से जरूर बचाए जाब।<sup>10</sup> काहेकि जब हम पंचे परमातिमा के बिरोध माही काम कइके उनखर बइरी रहने हय, तब उनखर लड़िका यीसु मसीह अपने मउत के द्वारा अपने पिता परमातिमा के साथ हमार पंचन के मेल-मिलाप कराय दिहिन हीं, पुनि जब हमार पंचन के मेल-मिलाप होइगा हय, त उनखे जीवन के द्वारा हम पंचे जरूर मुक्ती पाउब।<sup>11</sup> अउर केबल एतनय भर नहीं, बलकिन जउन हमार पंचन के प्रभू यीसु मसीह के द्वारा परमातिमा से मेल-मिलाप होइगा हय, एखे बारे माहीं हम पंचे आनन्द घलाय मनाइत हएन।

### आदम के द्वारा मउत अउर मसीह के द्वारा अनन्त जीवन

12 एसे जइसन एकठे मनई अरथात आदम के द्वारा संसार माही पाप आइगा, अउर पाप के कारन मउत आइगे, अउर इआमेर से मउत सगले मनइन माहीं फइलगे, काहेकि सगले मनई पाप किहिन हीं।<sup>13</sup> काहेकि संसार माहीं मूसा के बिधान के आमँइ से पहिले, सगले संसार माहीं पाप रहा हय, पय जहाँ मूसा के बिधान नहीं रहय, त उहाँ कोहू के पाप नहीं गिना जाय।<sup>14</sup> पय आदम से लइके मूसा नबी के समय तक, मउत ऊँ मनइन के ऊपर घलाय राज करत रहिगे, जउन आदम कि नाई परमातिमा के हुकुम उलंघन करँइ के पाप नहीं किहिन रहा आय, अउर आदम त आमँइ बाले मुक्तीदाता के प्रतीक रहे हँय।

15 पय जइसन अपराध के दसा ही, उआमेर किरपा के बरदान के नहिं आय, काहेकि जब एकठे मनई के अपराध के कारन, खुब मनइन के मउत होइगे, त परमातिमा के किरपा अउर उनखर जउन दान हय, एकठे मनई के अरथात यीसु मसीह के किरपा के द्वारा सगले मनइन काहीं बहुतायत से मिला हय।<sup>16</sup> अउर जइसन एकठे मनई के पाप किहे के परिनाम भ, उआमेर दान के दसा नहिं आय, काहेकि एकयठे मनई के कारन सजा देइ के हुकुम के फँइसला भ, पय खुब अपराधन के कारन अइसन बरदान पइदा भ, कि मनई परमातिमा के नजर माहीं निरदोस ठहरँय।<sup>17</sup> काहेकि जब एकठे

मनई के अपराध के कारन मउत राज किहिस, त जउन मनई किरपा अउर परमातिमा के नजर माहीं निरदोस होइ के बरदान बहुतायत से पाबत हें, ऊँ पंचे एकयठे मनई अरथात यीसु मसीह के द्वारा जरूर अनन्त जीवन माहीं राज करिहँय।

18 एसे जइसन एकठे अपराध के कारन सगले मनइन काहीं दोसी ठहराबा ग, उहयमेर यीसु मसीह परमातिमा के हुकुम मानिके, हमरे पंचन के खातिर बलिदान भें, अउर ओहिन के द्वारा सगले मनई अनन्त जीवन पामँइ के खातिर, परमातिमा के नजर माहीं निरदोस ठहराए जात हें।<sup>19</sup> जइसन एकठे मनई के हुकुम न मानँइ के कारन खुब मनई पापी ठहरें, उहयमेर एकठे मनई के हुकुम मानँइ के कारन खुब मनई परमातिमा के नजर माहीं निरदोस ठहरिहँय।<sup>20</sup> पय मूसा के बिधान बीच माहीं आइगा, कि खुब अपराध होंय, पय जहाँ पाप खुब भ, उहाँ परमातिमा के किरपा ओहू से घलाय जादा भय।<sup>21</sup> अउर जइसन मउत के द्वारा पाप मनइन के ऊपर राज किहिस, ठीक उहयमेर परमातिमा के किरपा घलाय, हमरे पंचन के प्रभू यीसु मसीह के द्वारा अनन्त जीवन के खातिर, मनइन काहीं परमातिमा के नजर माहीं निरदोस ठहराबत राज करय।

### पाप के खातिर मरब अउर मसीह के खातिर जिअब

6 त पुनि हम पंचे का कही? का हम पंचे अपने जीवन के द्वारा हमेसा पाप करतय रही, कि जउने परमातिमा के किरपा हमरे पंचन के ऊपर खुब होय? 2 नहीं, बेलकुल नहीं, काहेकि जब हम पंचे पाप के सम्बन्ध से पूरी तरह से मुक्त होइ गएन हय, त हम पंचे पाप कइ-कइके कइसन जीवन जि सकित हएन।<sup>3</sup> का तूँ पंचे इआ नहीं जनते आह्या, कि हम पंचे जेतने जन मसीह यीसु के बपतिस्मा लिहेन हय, त उनखे मउत के बपतिस्मा लिहेन हय।<sup>4</sup> एसे उनखे मउत के बपतिस्मा लिहे के कारन, हमहूँ पंचे घलाय उनखे साथ गाड़े गएन हय, कि जइसन पिता परमातिमा, अपने महिमामय सक्ती के द्वारा मसीह काहीं मरेन म से जिआइन रहा हय, उहयमेर हमरव पंचन के चाल-चलन नबा जीवन के मुताबिक होय।

5 काहेकि जइसन यीसु मसीह, मनइन काहीं पाप के सजा से बचामँइ के खातिर मरिगें तय, उहयमेर हमहूँ पंचे पाप के खातिर मर गएन हय, अरथात पाप के सम्बन्ध से पूरी तरह से मुक्त होइ गएन हय, त जइसन यीसु मसीह मरेन म से जिन्दा होइगें तय, उहयमेर हमहूँ पंचे जरूर जिन्दा होइ जाब।<sup>6</sup> अउर हम पंचे इआ जानित हएन, कि हमार पंचन के पुरान पापी सुभाव यीसु मसीह के साथ कूस माहीं चढ़ाय दीन ग हय, कि जउने हमार पंचन के पाप के इआ देह नास होइ जाय, अउर आँगे हम पंचे पाप के दासता माहीं न रही।<sup>7</sup> काहेकि जे कोऊ मरिगा, उआ पाप के बन्धन से मुक्त होइगा।<sup>8</sup> एसे अगर हम पंचे मसीह के साथ मरि गए हएन, त हमार पंचन के इआ बिसुआस हय, कि हम पंचे उनखे साथ जिन्दव रहब।<sup>9</sup> काहेकि हम पंचे इआ जानित हएन, कि मसीह मरेन म से जिन्दा होए के बाद कबहूँ न मरिहँय, अरथात ऊँ अमर हें; अउर उनखे ऊपर कबहूँ मउत के बस न चली।<sup>10</sup> काहेकि जउन मउत ऊँ मरे हँय, ऊँ हमेसा के खातिर पाप के हिंसाब चुकामँइ के खातिर एक बेरकिन मरे हँय, पय जउन जीवन ऊँ जि रहे हँय, उआ जीवन परमातिमा के खातिर आय।<sup>11</sup> एसे तूहूँ पंचे घलाय, पाप करँइ के खातिर अपने-आप काहीं मरे कि नाई समझा, पय यीसु मसीह माहीं परमातिमा के खातिर जिन्दा समझा।

12 अउर तूँ पंचे अपने नासवान देह माहीं पाप काहीं सासन न करँइ द्या, जउने तूँ पंचे पाप के बुरी इच्छन काहीं पूर न कए पाबा।<sup>13</sup> अउर अपने देह के अंगन काहीं, अधरम के सेवा के खातिर अरथात बुरे कामन काहीं करँइ के खातिर पाप काहीं न सउँपा, बलकिन अपने-आप काहीं मरेन म से जिन्दा होइ जाँइ बाला समझिके परमातिमा काहीं सउँपि द्या, अउर अपने देह के अंगन काहीं धारमिकता के कामन काहीं करँइ के साधन के रूप माहीं परमातिमा काहीं सउँपि द्या।<sup>14</sup> जउने तोहरे पंचन के जीवन माहीं पाप

सासन न करय, काहेकि तूँ पंचे मूसा के बिधान के सहारे जीवन नहीं जीते आह्या, बलकिन परमातिमा के किरपा के सहारे जीते हया।

### धारमिकता के दास

15 त एसे क भ? का हम पंचे एसे पाप करत रही, कि हम पंचे मूसा के बिधान के अधीन नहीं आहेन, बलकिन किरपा के अधीनता माहीं जीवन बिताइत हएन? नहीं, बेलकुल नहीं, हम पंचे पाप न करी! 16 अउर का तूँ पंचे इआ नहीं जनते आह्या, कि जेखर हुकुम मानँइ के खातिर तूँ पंचे अपने-आप काहीं दास कि नाई सउँपि देते हया, त ओहिन के दास होइ जाते हया; त पुनि तूँ पंचे चाह पाप के दास बना, जउन तोहई पंचन काहीं मारि डारी, अउर चाह परमातिमा के हुकुमन के दास बना, जउन परमातिमा के नजर माहीं अच्छे काम हैं उनहीं करँइ कइती लइ जात हैं। 17 पय हम परमातिमा के धन्यबाद करित हएन, कि तूँ पंचे जउन पहिले बुरे कामन काहीं करँइ के कारन पाप के दास बने रहे हया, त अब तूँ पंचे अपने पूरे मन से उआ उपदेस काहीं मानँइ बाले बन गया हय, जउन तौहई पंचन काहीं सँउपा ग रहा हय। 18 अउर अब तूँ पंचे पाप के चंगुल से मुक्ती पाइके, परमातिमा के नजर माहीं जउन निकहे काम हैं, उनखर दास बन गया हय। 19 अउर हम तौहरे पंचन के देह के निबल दसा होइ के कारन, मनइन के रीति के मुताबिक कहित हएन, कि जइसन तूँ पंचे अपने देह के अंगन काहीं, कुकर्म करँइ के खातिर, अउर असुद्धता अउर कुकर्म के दास होइ के खातिर घलाय सउँपि दिहा तय, उहयमेर अब अपने अंगन काहीं पबित्र होइ के खातिर, परमातिमा के नजर माहीं जउन निकहे काम हैं, उनखर दास के रूप माही सउँपि द्या। 20 अउर जब तूँ पंचे पाप के दास अरथात पाप माहीं जीवन बिताबत रहे हया, तब परमातिमा के नजर माहीं जउन निकहे काम हैं, उनखे तरफ से तूँ पंचे अजाद रहे हया। 21 मसीह के ऊपर बिसुआस करँइ से पहिले जउने कामन से तूँ पंचे आनन्दित होत रहे हया, अब तूँ पंचे उँइन कामन से सरमिन्दा होते हया, काहेकि ऊँ कामन के अन्त त मउत हय। 22 पय अब तूँ पंचे पाप के बन्धन से अजाद होइके, परमातिमा के दास बन गया हय, अउर अपने जीवन माहीं पबित्रता के फर पइदा कइ रहे हया, जेखर परिनाम हय अनन्त जीवन। 23 अउर जे कोऊ पाप करत हय, त ओखे बदले माहीं ओही अनन्तकाल के मउत मिली, पय परमातिमा के बरदान इआ हय, कि जे कोऊ हमरे पंचन के प्रभू मसीह यीसु के ऊपर बिसुआस करी, त ओही अनन्त जीवन मिली।

### बिबाहित जीवन के उदाहरन

7 हे बिसुआसी भाई-बहिनिव, का तूँ पंचे इआ नहीं जनते आह्या, कि हम मूसा के बिधान काहीं जानँइ बालेन से कहित हएन, कि जब तक कउनव मनई जिअत रहत हय, तब तक ओखे ऊपर मूसा के बिधान के अधिकार रहत हय? 2 उदाहरन के खातिर जब कउनव मेहेरिआ के काज होइ जात हय, त ओखे बाद उआ अपने मंसेरुआ के साथ मूसा के बिधान के मुताबिक तब तक बन्धन माहीं रहत ही, जब तक उआ जिअत हय, पय जब ओखर मंसेरुआ मर जात हय, त उआ काजे के नेमन के बन्धन से मुक्त होइ जात ही। 3 पय अगर उआ अपने मंसेरुआ के जिन्दय दुसरे मंसेरुआ के रहि जाय, त उआ दुसरे मंसेरुआ से ब्यभिचार करँइ बाली कहाई, पय अगर ओखर मंसेरुआ मर जात हय, त उआ काजे के नेमन के बन्धन से मुक्त होइ जात ही, इहाँ तक कि अगर उआ कउनव दुसरे मंसेरुआ के रहि जात ही, तऊ उआ दुसरे मंसेरुआ के साथ ब्यभिचार करँइ बाली न कहाई। 4 एसे हे हमार भाई-बहिनिव, इहइमेर मसीह के देह के द्वारा मूसा के बिधान काहीं पालन करँइ से तूँ पंचे घलाय मुक्त होइ चुके हया, जउने अब तूँ पंचे दुसरे से सम्बन्ध जोड़ सका, अरथात उनसे जउन मरेन म से जि उठे हँय, जउने हम पंचे परमातिमा के खातिर फर देंइ बाला जीवन जी सकी। 5 काहेकि जब हम पंचे, मन के बुरी इच्छन के मुताबिक जिअत रहे हएन, त पाप करँइ के बुरी इच्छा, जउन मूसा के बिधान के कारन आई रही हँय, जिनखर अन्त

मउत हय, ऊँ हमरे पंचन के देह के अंगन काहीं अपने काबू माहीं कए रही हँय। 6 पय अब हमहीं पंचन काहीं मूसा के बिधान के बन्धन से छुटकारा मिल ग हय, काहेकि जउने मूसा के बिधान के अधीनता माहीं हमही पंचन काहीं बंदी बनाबा ग रहा हय, हम पंचे ओखे सम्बन्ध से पूरी तरह से मुक्त होइ चुके हएन। जउने अब हम पंचे मूसा के लिखे पुरान बिधान से नहीं, बलकिन पबित्र आत्मा के नए बिधान के मुताबिक अपने परमातिमा के सेबा करी।

### मूसा के बिधान के द्वारा पाप के पहिचान

7 त पुनि हम पंचे का कही? का मूसा के बिधान पाप आय? नहीं, बेलकुल नहीं! अगर मूसा के बिधान न होत, त हम पाप काहीं न जाने पाइत, अगर मूसा के बिधान न बताबत कि लालच न करा, त हम लालच काहीं न जानित। 8 पय पाप मोका पउतय हुकुम के द्वारा, हमरे जीवन माहीं हरेकमेर के लालच पइदा कइ दिहिस, काहेकि अगर मूसा के बिधान न होत त पाप मरे कि नाई होत। 9 एक समय हम बिना मूसा के बिधान के जिअत रहे हएन, पय जब मूसा के बिधान के हुकुम आइगा, त पाप जि आबा, अउर हम मर गएन। 10 अउर उहय मूसा के बिधान के हुकुम जउन अनन्त जीवन देंइ के खातिर रहा हय, हमरे खातिर मउत लइ आबा। 11 काहेकि पाप काहीं मोका मिलिगा, अउर उआ उहय मूसा के बिधान के हुकुम के द्वारा हमहीं बहकाय दिहिस, अउर उहय हुकुम के द्वारा हमहीं मारिव डारिस। 12 इआमेर से मूसा के बिधान पबित्र हय, अउर उआ हुकुम घलाय पबित्र, सही, अउर परमातिमा के नजर माहीं निकहा हय। 13 त पुनि का एखर मतलब इआ हय, कि उआ जउन निकहा हय, उहय हमरे मउत के कारन बनिगा? नहीं, बेलकुल नहीं, बलकिन पाप उआ निकहे के द्वारा हमरे खातिर मउत के कारन एसे बना, कि पाप काहीं पहिचाना जाय सकय, अउर मूसा के बिधान के हुकुम के द्वारा ओखे भयानक पापमय दसा काहीं देखाबा जाय सकय।

### मनई के मन अउर आत्मा के लड़ाई

14 काहेकि हम पंचे त जनतय हएन, कि मूसा के बिधान त आत्मिक हय, पय हम त हाड़ा अउर माँस के बने मनई आहेन, जउन बुरे कामन काहीं कइके पाप के हाँथ माहीं बिके हएन। 15 अउर हम नहीं जानी कि हम का करित हएन, काहेकि हम जउन काम करँइ चाहित हएन, उआ काम नहीं करी, बलकिन हमहीं उहय काम करँइ परत हय, जउने काम से हम नफरत करित हएन। 16 अउर अगर हम उहय काम करित हएन, जउन काम हम नहीं करँइ चाही, त हम माने लेइत हएन, कि मूसा के बिधान निकहा हय। 17 पय वास्तव माहीं उआ हम न होहें, जउन इआ सगला काम कइ रहा हय, बलकिन इआ सगला काम करँइ बाला हमरे भीतर बइठ पाप आय। 18 काहेकि, हम इआ जानित हएन, कि हमरे भीतर अरथात हमरे देह माहीं कउनव निकही चीज निबास नहीं करय, एसे कि हम निकहा काम करँइ त चाहित हएन, पय करे नहीं पाई। 19 काहेकि जउन निकहा काम हम करँइ चाहित हएन, उआ काम हम नहीं करी, बलकिन हम जउन काम नहीं करँइ चाही, उहय बुरा काम हम करा करित हएन। 20 अउर अगर हम उहय काम करित हएन, जउने काहीं नहीं करँइ चाही, त इआ सगला काम करँइ बाले हम न होहें, बलकिन हमरे भीतर बइठ पाप आय। 21 एसे हम अपने देह माहीं इआ बिधान पाइत हएन, कि हम जब निकहा काम करँइ चाहित हएन, त हमसे बुरा काम होइ जात हय। 22 काहेकि हम त परमातिमा के बिधान से अपने पूरे मन से खुसी रहित हएन। 23 पय हम अपने अंगन माहीं, दूसर मेर के बिधान काहीं काम करत देखित हएन, जउन हमरे सोच-बिचार करँइ बाली बुद्धी से लड़ाई करत हय, अउर हमहीं पाप के बन्धन माहीं डारत हय, अउर इहय बिधान अबहिनव हमरे अंगन माहीं काम करत हय। 24 हमार किस्मत केतनी खराब ही! हमहीं इआ नास होइ बाली देह से को मुक्ती देई? 25 अउर हम परमातिमा के धन्यबाद करित हएन, जउन हमरे पंचन के प्रभू यीसु मसीह के द्वारा हमरे भीतर बसे पाप के बन्धन से मुक्त किहिन हीं। एसे

हम अपने मन से त परमातिमा के बिधान के पालन करित हएन, पय अपने सरिर से पाप के बिधान के पालन करित हएन।

### पबित्र आत्मा के द्वारा नबा जीबन

8 एसे अब जेतने जन मसीह यीसु के ऊपर बिसुआस करत हें, उनहीं कउनव सजा न मिली।<sup>1</sup> 2 काहेकि पबित्र आत्मा के बिधान जउन यीसु मसीह माहीं जीबन देत हय, हमहीं पाप के बिधान से जउन मउत के तरफ लइ जात हय, ओसे अजाद कइ दिहिस ही।<sup>3</sup> काहेकि जउन काम मूसा नबी के उआ बिधान, जउन मन के बुरी इच्छा के कारन निबल बनाय दीन ग रहा हय, नहीं कए पाइस, ओही परमातिमा अपने लड़िका काहीं हमरे पंचन कि नाई देह माहीं पठइके, जउने से हम पंचे पाप करित हएन, इआमेर से परमातिमा मनई के देह माहीं पाप काहीं सजा दिहिन हीं 4 एसे कि हम पंचे जउन मन के बुरी इच्छन के मुताबिक नहीं, बलकिन पबित्र आत्मा के बताए मुताबिक चलित हएन, हमरे द्वारा मूसा के बिधान के नेम पूर कीन जाय।<sup>5</sup> काहेकि मन के बुरी इच्छन के मुताबिक चलँइ बाले मनई, मन के बातन माहीं आपन मन लगाबत हें; पय ऊँ मनई जउन पबित्र आत्मा के बताए मुताबिक चलत हें, पबित्र आत्मा के बातन माहीं आपन मन लगाबत हें।<sup>6</sup> अउर मन के बुरी इच्छन माहीं मन लगाउब त मउत † आय, पय पबित्र आत्मा के बताए बातन माहीं मन लगाए से अनन्त जीबन अउर सान्ती मिलत ही।<sup>7</sup> काहेकि जउन मनई मन के बुरी इच्छन माहीं मन लगाबत हय, उआ परमातिमा से दुसमनी रक्खत हय, काहेकि उआ मनई न त परमातिमा के बिधान के अधीन आय, अउर न होइन सकय।<sup>8</sup> अउर ऊँ पंचे जउन मन के बुरी इच्छन के मुताबिक जिअत हें, परमातिमा काहीं खुसी नहीं कइ सकँय।<sup>9</sup> पय परमातिमा के आत्मा तौहरे जीबन माहीं निबास करत हय, एसे तूँ पंचे मन के बुरी इच्छा के मुताबिक जीबन नहीं जीते आह्वा, अगर कोहू के जीबन माही मसीह के आत्मा के निबास नहिं आय, त उआ मसीह के जन न कहाई।<sup>10</sup> अउर अगर मसीह तौहरे जीबन माहीं हें, त तौहार देह पाप किहे के कारन मरी हय; पय परमातिमा तौहई पंचन काहीं अपने नजर माहीं निरदोस ठहराइन हीं, एसे तौहार पंचन के आत्मा जिन्दा हय।<sup>11</sup> अउर परमातिमा जउने आत्मा से यीसु काहीं मरेन म से जिआइन रहा हय, उहय आत्मा तौहरे भीतर निबास करत हय, अउर परमातिमा जउने आत्मा से यीसु काहीं मरेन म से जिआइन रहा हय, उहय आत्मा से तौहरे पंचन के नास होइ बाली देह काहीं जिअइहँय।

12 एसे हे भाई-बहिनिव, हम पंचे पापी सुभाव के करजदार नहिं आहैन, कि मन के बुरी इच्छन के मुताबिक जीबन बिताई।<sup>13</sup> काहेकि तूँ पंचे, अगर मन के बुरी इच्छन के मुताबिक जीबन बिताइहा, त आत्मिक रूप से मर जइहा, पय अगर परमातिमा के आत्मा के बताए मुताबिक अपने मन के बुरी इच्छन काहीं छोंड़ि देइहा, त आत्मिक रूप से जिअत रइहा।<sup>14</sup> एसे कि जेतने जन परमातिमा के आत्मा के बताए मुताबिक चलत हें, केबल उँइन परमातिमा के सन्तान कहइहँय।<sup>15</sup> काहेकि जउने आत्मा काहीं तूँ पंचे पाया हय, उआ तौहई दास बनामँइ के खातिर न होय मिला हय, कि तूँ पंचे पुनि डेरा, बलकिन उआ आत्मा तौहई पंचन काहीं परमातिमा के गोद लीन सन्तान बनामँइ के खातिर मिला हय, एहिन से हम पंचे परमातिमा काहीं हे अब्बा, हे पिता कहँइ लागित हएन।<sup>16</sup> अउर उआ पबित्र आत्मा खुदय हमरे आत्मा के साथ गबाही देत हय, कि हम पंचे परमातिमा के सन्तान आहैन।<sup>17</sup> अउर अगर हम पंचे परमातिमा के सन्तान आहैन, त उनखर बारिसदार घलाय आहैन, बलकिन परमातिमा के बारिसदार अउर मसीह के संगी बारिसदार घलाय आहैन, अउर अगर हम पंचे उनखे साथ दुख उठाइत हएन, त उनखे साथ महिमा माहीं भागीदार घलाय बनब।

### भबिस्य माहीं मिलँइ बाली महिमा

18 काहेकि हमरे बिचार से इआ समय के हमार पंचन के दुख-मुसीबत, भबिस्य माहीं हमहीं पंचन काहीं मिलँइ बाली महिमा के आँगे कुछू न होंहीं।<sup>19</sup> काहेकि इआ सगला संसार बड़ी आसा लगाए, उआ समय के इन्तजार कइ रहा हय, जब परमातिमा के सन्तानन काहीं प्रगट कीन जई।<sup>20</sup> काहेकि सगला संसार अपने मरजी से नहीं, बलकिन आधीन करँइ बाले परमातिमा के तरफ से सराप के अधीन इआ आसा से कीन ग हय,<sup>21</sup> कि इआ सगला संसार घलाय खुदय बिनास के बन्धन से छुटकारा पाइके, परमातिमा के सन्तानन के महिमा समेत अजादी के आनन्द लेय।<sup>22</sup> काहेकि हम पंचे इआ जानित हएन, कि आज तक सगला संसार जइसन लड़िका पइदा होत समय मेहेरिआ के पीरा होत ही, उहयमेर कराहत अउर पीरा माहीं परे तइप रहा हय।<sup>23</sup> अउर केबल इआ संसारय भर नहीं, बलकिन हमहूँ पंचे घलाय जिनहीं पबित्र आत्मा के पहिल फर मिला हय, खुदय हम पंचे अपने भीतर कराहित हएन, काहेकि हम पंचे परमातिमा के गोद लीन सन्तान होंइ के अरथात अपने पूरे देह के मुक्ती पामँइ के इन्तजार करित हएन।<sup>24</sup> इहय आसा के द्वारा हमहीं पंचन काहीं मुक्ती मिली हय; पय जउने चीज के आसा कीन जात ही, जब उआ देखँइ काहीं मिल जात ही, त उआ आसा पूर होइ जात ही, काहेकि जउने चीज काहीं कोऊ देख लेत हय, त उआ ओखर आसा नहीं करय।<sup>25</sup> पय अगर हम पंचे जउने चीज काहीं नहीं देखी, ओखर आसा करित हएन, त ओखर धीरज के साथ इन्तजार घलाय करित हएन।

26 इहइमेर से पबित्र आत्मा घलाय जब हम पंचे निबल होइत हएन, त हमार पंचन के मदत करत हय, काहेकि हम पंचे नहीं जानी, कि प्राथना कउनमेर से करँइ चाही; पय पबित्र आत्मा खुदय अइसन आँह भर भरिके हमरे खातिर प्राथना करत हय, जेखर बखान नहीं कीन जाय सकय।<sup>27</sup> अउर सगले मनइन के मन के बातन काहीं जाँच करँइ बाले परमातिमा इआ जानत हें, कि पबित्र आत्मा के इच्छा का ही? काहेकि उआ उनखे पबित्र भक्तन के खातिर परमातिमा के मरजी के मुताबिक उनसे बिनती करत हय।

28 अउर हम पंचे इआ जानित हएन, कि जेतने मनई परमातिमा से प्रेम करत हें, अउर परमातिमा के मरजी के मुताबिक बोलाए गे हँय, त परमातिमा उनखे जीबन माहीं जउन कुछू करत हें, त उनखे भलाइन के खातिर करत हें।<sup>29</sup> अउर जिनहीं परमातिमा पहिलेन से चुनिन रहा हय, उनहीं पहिलेन से अपने लड़िका कि नाई ठहराइन हीं, जउने ऊँ सगलेन भाई-बहिनिन माहीं, बड़े भाई कहामँय।<sup>30</sup> अउर जिनहीं परमातिमा पहिलेन से चुनिन रहा हय, उनहीं अपने लघे बोलाइन घलाय, अउर जिनहीं अपने लघे बोलाइन हीं, उनहीं अपने नजर माहीं निरदोस घलाय ठहराइन हीं, अउर जिनहीं अपने नजर माहीं निरदोस ठहराइन हीं, उनहीं आपन महिमा घलाय दिहिन हीं।

### परमातिमा के प्रेम

31 एसे हम पंचे ई बातन के बारे माहीं का कहि सकित हएन? अगर परमातिमा हमरे पच्छ माहीं हें, त हमार पंचन के बिरोध करँइ बाला को होइ सकत हय? अरथात कोऊ नहीं होइ सकय।<sup>32</sup> जब हमहीं पंचन काहीं मुक्ती देँइ के खातिर परमातिमा अपने एकलउते लड़िका काहीं बलिदान होंइ के खातिर दइ दिहिन हीं, त इआ सब दिहे के बाद, ऊँ अपने लड़िका के साथ हमहीं सब कुछू काहे न देइहँय? अरथात जरूर देइहँय।<sup>33</sup> अउर परमातिमा के चुने मनइन के ऊपर दोस कोऊ नहीं लगाय सकय, केबल परमातिमय लगाय सकत हें, काहेकि परमातिमा, ऊँ आहीं जउन उनहीं अपने नजर माहीं निरदोस ठहराइन हीं।<sup>34</sup> पुनि अइसन कोऊ नहिं आय, जउन परमातिमा के चुने मनइन काहीं दोसी ठहराई? केबल यीसु मसीह हें, जउन बलिदान होइगें तय, अउर मरेन म से जि घलाय उठे हँय, अउर परमातिमा के दहिने कइती बइठ हें, अउर हमरे पंचन के खातिर परमातिमा से बिनती घलाय करत हें।

† (काहेकि ऊँ पंचे अब मन के बुरी इच्छा के मुताबिक नहीं चल्य, बलकिन पबित्र आत्मा के बताए मुताबिक चलत हें।) †† आत्मिक मउत अरथात परमातिमा से हमेसा के खातिर अलगाव।

35 अउर हमहीं पंचन काहीं मसीह के प्रेम से कोऊ अलग नहीं कइ सकय, चाह उआ दुख-मुसीबत होय, चाह हमरे ऊपर अत्याचार होय, चाह अकाल होय, चाह पहिनैय के खातिर ओन्हव न होय, चाह उआ जोखिम होय, अउर चाह उआ तलबारय काहे न होय? 36 जइसन पबित्र सास्त्र माहीं लिखा हय, कि

“हम पंचे दिन भर कतल हौइ के खातिर सँउपे जइत हएन; अरथात हम पंचे बली हौइ बाली गइरन कि नाई समझे जइत हएन।”

37 पय ई सगली बातन माहीं हम पंचे मसीह के द्वारा जउन हमसे प्रेम करत हैं, सानदार जीत पाय रहेन हँय। 38-39 काहेकि हम पंचे इआ निकहा से जान लिहेन हय, कि परमातिमा के प्रेम से हमहीं पंचन काहीं कोऊ अलग नहीं कइ सकय, जउन हमरे प्रभू मसीह यीसु के ऊपर बिसुआस किहे से हमहीं पंचन काहीं मिला हय। एसे, चाह हम पंचे जिअत रही, चाह मर जई, अउर एखे अलाबव हमहीं पंचन काहीं उनखे प्रेम से कोऊ अलग नहीं कइ सकय। चाह ऊँ स्वरगदूत हौय, चाह ऊँ सासन करँइ बाले प्रधान हौय, अउर चाह इआ समय के कउनव चीजँय हौय, चाह भबिस्य के कउनव चीजँय हौय, चाह उआ कउनव आत्मिक सक्ती होय, अउर चाह इआ धरती के ऊपर के कउनव चीज होय, चाह धरती के नीचे के कउनव चीज होय, अउर चाह परमातिमा के बनाई कउनव चीज काहे न होय।

### परमातिमा अउर उनखर चुने मनई

9 हम मसीह के ऊपर बिसुआस करित हएन, एसे हम झूठ नहीं बोली, पय हम सही कहित हएन, कि हमरे मन के सोच-बिचार पबित्र आत्मा के अँगुआई से इआ गबाही देत हय, 2 कि हमहीं बड़ा दुख लागत हय, अउर हमार मन हमेसा दुखी रहत हय। 3 काहेकि हम इहाँ तक चाहित हएन, कि हमरे यहूदी जाति के भाई-बहिनी, जउन परमातिमा से दूरी होइगे हँय, अगर हम उनखे खातिर मसीह के सराप काहीं अपने ऊपर लइके मसीह से भले दूरी होइ जइत, पय ऊँ पंचे बच जातें। 4 एसे कि ऊँ पंचे इजराइल के बंस के आहीं; अउर परमातिमा के गोद लीन सन्तान हौइ के हक्क उनहिन काहीं मिला हय। अउर ऊँ पंचे परमातिमा के सामर्थ के कामन काहीं देखि चुके हँय, अउर उनहिन के साथ परमातिमा करार घलाय किहिन तय, अउर मूसा नबी के द्वारा अपने बिधान काहीं दिहिन रहा हय, अउर उनहिन काहीं मन्दिर माहीं अराधना करँइ के खातिर कहिन तय। अउर उनहिन से वादा घलाय किहिन तय, 5 अउर पुरखव † उनहिन के बंस के आहीं, अउर मसीह घलाय मनई के रूप लइके उनहिन के कुल माहीं पइदा भें, जउन सगले मनइन के परमातिमा आहीं, अउर उँइन मसीह जुग-जुग तक धन्य कहइहँय। आमीन! 6 पय अइसा नहिँ आय कि परमातिमा आपन बचन पूर नहीं किहिन, काहेकि जेतने इजराइल के बंस के हैं, उनमा से सगले जने परमातिमा के चुने न हौहीं। 7 अउर जेतने अब्राहम के बंस माहीं पइदा भें हँय, उनमा से सगले अब्राहम के सच्चे सन्तान न कहइहँय, काहेकि पबित्र सास्त्र माहीं लिखा हय, कि “इसहाक † से जेतने पइदा होइहँय, उँइन तौहार सच्ची सन्तान कहइहँय।” 8 अरथात इआ कि संसारिक रूप से पइदा हौइ बाले लड़िका- बच्चा परमातिमा के सन्तान न कहइहँय, बलकिन परमातिमा के वादा के मुताबिक पइदा भें सन्तानय अब्राहम के बंस माने जइहँय। 9 काहेकि अब्राहम से परमातिमा अइसन वादा किहिन रहा हय, कि “अँगले साल † हम इहय समय माहीं जब दुसराय अउब, तब तौहरे मेहेरिआ सारा के एकठे लड़िका पइदा होइ चुका होई।” 10 अउर ऊँ लड़िका हमार पंचन के पुरखा इसहाक आहीं, अउर जब ऊँ रिबका से काज किहिन, अउर रिबका उनसे लइकहाई भई, अउर उनखे पेटे माहीं जोड़ीमा लड़िका रहे हँय। 11 अउर ऊँ लड़िकन के पइदा हौइ से पहिलेन, अउर उनखे कुछ नीक-नागा करँइ से पहिलेन, परमातिमा कहिन, कि “बड़कबा † लड़िका छोटकबा लड़िका के दास होई।” 12 अउर परमातिमा इआ बतामँइ के खातिर रिबका

† पुरखव अरथात अब्राहम, इसहाक अउर याकूब उनहिन के बंस के आहीं †† 9:7 उत्प 21:12 † 9:9 उत्प 18:10, 14 †† 9:11 उत्प 25:23

से कहिन कि, ऊँ कोहू काहीं ओखे निकहे कामन के कारन नहीं चुनँय, बलकिन अपने मरजी के मुताबिक ओही चुनत हँ। 13 जइसन पबित्र सास्त्र माहीं घलाय लिखा हय, कि “परमातिमा कहिन, हम एसाव से जादा याकूब से प्रेम † किहेन हय।” 14 एसे हम पंचे का कही? का परमातिमा अन्याय करत हँ? नहीं, बेलकुल नहीं! 15 काहेकि परमातिमा मूसा नबी से कहिन हीं, कि

“हम जेखे †† ऊपर दया करँइ चाहब, त ओखे ऊपर दया करब, अउर जेखे ऊपर किरपा करँइ चाहब, त ओहिन के ऊपर किरपा करब।”

16 एसे कोहू के इच्छा के मुताबिक नहीं, अउर न कोहू के जादा कोसिस किहे के कारन, परमातिमा ओही चुनँय, बलकिन ऊँ केही चुनत हँ, इआ दया करँइ बाले परमातिमा के हाँथे माहीं हय। 17 काहेकि जइसन पबित्र सास्त्र माहीं लिखा हय, “परमातिमा †† मिस्र देस के राजा फिरौन से कहिन रहा हय, कि ‘हम तोहई एसे राजा बनायन हय, कि तौहरे ऊपर हम अपने सामर्थ के कामन काहीं देखाई, जउने ऊँ कामन के द्वारा हमरे महिमा के प्रचार धरती माहीं रहँइ बाले सगले मनइन के बीच माहीं होय। 18 एसे परमातिमा जउने मनई के ऊपर दया करँइ चाहत हँ, त ओखे ऊपर दया करते हँ; अउर जेखे मन काहीं कठोर करँइ चाहत हँ, त ओखे मन काहीं कठोर कइ देत हँ।

### परमातिमा के क्रोध अउर उनखर दया

19 एसे तौहरे पंचन म से कोऊ हमसे इआ कहि सकत हय, कि अगर परमातिमा सब कुछ अपने मरजी से करत हँ, त पुनि ऊँ काहे हमरे पंचन के ऊपर दोस लगाबत हँ? काहेकि परमातिमा के मरजी के कोऊ बिरोध नहीं कइ सकय। 20 अउर हे भाई, तूँ को आह्या? तूँ त केबल मनई आह्या, जउन परमातिमा काहीं उल्टहाव देते हया? त इआ बताबा, कि का कउनव बनी चीज अपने बनामँइ बाले से कहि सकत ही, कि तूँ हमही अइसा काहे बनए हया? 21 का कुम्हार काहीं इआ हक्क नहीं रहय, कि उआ माटी के लौदन से कुछ बरतन खास कामन के खातिर बनबय, जिनखर मनई आदर करत हँ, अउर कुछ बरतनन काहीं साधारन कामन के खातिर बनबय जिनखर मनई आदर नहीं करँय। 22 त एमा कउन अचरज के बात ही, अगर परमातिमा आपन सक्ती देखाँय के खातिर कुछ मनइन काहीं बनाइन, कि जउने उनखे ऊपर आपन क्रोध देखाँय, जउन नास होइन के खातिर तइआर कीन गे रहे हँय, तऊ उनखर बड़े धीरज से सहत रहिगें। 23 अउर जउने मनइन के ऊपर परमातिमा दया करत हँ, उनहीं इआ देखाँय के खातिर, कि ऊँ केतना महान हँ, उनखर सहत रहिगें, अउर ऊँ मनइन काहीं अपने बड़े सम्मान माहीं भागीदार बनामँइ के खातिर पहिलेन से तइआर किहिन हीं। 24 अरथात हमरे पंचन के ऊपर, जिनहीं परमातिमा केबल यहूदी लोगन भर से नहीं, बलकिन गैरयहूदी लोगन म से घलाय चुनिन हीं। 25 अउर जइसन कि होसे नबी के लिखी किताब माहीं लिखा हय §, कि

“जउन मनई पहिले हमार प्रजा नहीं रहे आहीं, उनहीं हम आपन प्रजा बनाउब, अउर जउन मनई पहिले हमहीं पियार नहीं रहे आहीं, ऊँ अब हमहीं पियार होइगें हँय।”

26 अउर ओमाहीं इहव घलाय लिखा हय §†,

“अउर अइसन होई, कि जउने जघा माहीं हम उनसे कहेन तय, कि तूँ पंचे हमार प्रजा न होह्या, उहय जघा माहीं ऊँ पंचे जिन्दा परमातिमा के सन्तान कहइहँय।”

27 अउर यसायाह नबी अपने लिखी किताब माहीं इजराइल के सन्तानन के बारे माहीं चिल्लाइके कहत हँ, कि “चाह इजराइल §†† के सन्तानन के गिनती समुद्र के बारू के बराबर होय, तऊ उनमा से थोरिन काहीं मनई बचे पइहँय।

28 काहेकि प्रभू अपने न्याय काहीं धरती के ऊपर पूरी तरह से अउर हरबिन पूर करिहँय।”

†† 9:13 मला 1:2, 3 ††† 9:15 निरग 33:19 ††† 9:17 निरग 3:16 § 9:25 होसे 2:3 §† 9:26 होसे 1:10 §†† 9:27 यसा 10:22, 23

<sup>29</sup> अउर जइसन यसायाह नबी भबिस्यबानी किहिन तय, कि “अगर सर्बसक्तिमान प्रभू, हमरे पंचन के खातिर बंस न छोड़ते, त हम पंचे सदोम † अउर अमोरा कि नाई पूरी तरह से नास होइ जइत।”

### इजराइली लोगन के अबिसुआस

<sup>30</sup> हमरे पंचन के कहँइ क मतलब इआ आय, कि गैरयहूदी लोग परमातिमा के नजर माहीं निरदोस बनँइ के खोज माहीं नहीं रहे आहीं, तऊ परमातिमा के नजर माहीं निरदोस बनिगें, काहेकि प्रभू यीसु मसीह के ऊपर किहे बिसुआसय के कारन ऊँ पंचे परमातिमा के नजर माहीं निरदोस बनिगें हँय। <sup>31</sup> पय इजराइल देस के मनई, खुद काहीं परमातिमा के नजर माहीं निरदोस बनामँइ के खातिर, मूसा नबी के बिधान के पालन करत रहे हँय, तऊ ऊँ पंचे निरदोस नहीं बन पाएँ। <sup>32</sup> काहे नहीं बन पाएँ? एसे कि ऊँ पंचे मसीह के ऊपर बिसुआस नहीं किहिन, बलकिन मूसा के बिधान के पालन कइके धरमी बनँइ के कोसिस करत रहे हँय, अउर मसीह जउन चट्टान कि नाई हँ, ऊँ पंचे उनखे ऊपर बिसुआस न कइके ठोकर खाइन। <sup>33</sup> जइसन पबित्र सास्त्र माहीं लिखा हय; “परमातिमा कहिन हीं, कि

‘देखा हम सिय्योन माहीं ठेस लागँइ के एकठे पथरा, अउर ठोकर खाँय के चट्टान धरित हएन; अउर जे कोऊ ओखे ऊपर बिसुआस करी, उआ कबहूँ लज्जित न होई।’<sup>1</sup>

**10** हे भाई-बहिनिव, हमार बड़ी इच्छा हय, कि यहूदी जाति के सगले मनई मुक्ती पामँय, एसे हम उनखे खातिर परमातिमा से प्राथना करित हएन। <sup>2</sup> काहेकि हम उनखे बारे माहीं गबाही दइ सकित हएन, कि उनमा परमातिमा के खातिर खुब उत्साह हय, पय इआ उत्साह बिबेक के साथ नहीं आय। <sup>3</sup> अउर परमातिमा मनइन काहीं अपने नजर माहीं, कइसन निरदोस बनाबत हे, ऊँ पंचे नहीं जानत रहे आँय, एसे कि ऊँ पंचे अपने कामन से निरदोस बनँइ के कोसिस करत रहे हँय, इआ कारन से ऊँ पंचे परमातिमा के नजर माहीं निरदोस नहीं बन पाएँ। <sup>4</sup> अउर जब से मसीह आइगें, तब से परमातिमा के नजर माहीं निरदोस बनँइ के खातिर, मनइन काहीं मूसा के बिधान के पालन करँइ के जरूरत नहीं रहिगे, काहेकि उनखे ऊपर बिसुआस कइके हरेक मनई परमातिमा के नजर माहीं निरदोस बन सकत हय।

### सगले मनइन के खातिर मुक्ती

<sup>5</sup> काहेकि मूसा नबी घलाय अपने किताब माहीं लिखिन हीं, कि “जउन मनई बिधान के बातन काहीं पालन कइके, परमातिमा के नजर माहीं निरदोस बनँइ चाहत हय, त अगर उआ बिधान के सगली बातन काहीं पूरी तरह से पालन करी, त उआ इनहिन के कारन जिअत रही।” <sup>6</sup> पय जे कोऊ बिसुआस कइके परमातिमा के नजर माहीं निरदोस बनँय चाहत हय, ओखे बारे माहीं पबित्र सास्त्र माहीं लिखा हय, कि “तूँ अपने मन माहीं इआ न सोचा, कि हमरे पंचन के खातिर यीसु मसीह काहीं धरती माहीं उतारिके लइ आमँइ के खातिर, ऊपर स्वरग माहीं को जई?” <sup>7</sup> अउर इहव न सोचा कि “मरेन म से जिआइके यीसु मसीह काहीं ऊपर लइ आमँइ के खातिर धरती के नीचे को जई?” <sup>8</sup> अउर पबित्र सास्त्र माहीं लिखा हय, कि “परमातिमा के बचन तोंहरे लघेन हय, बलकिन उआ तोंहरे मुँहेन माहीं हय, अउर हिरदँय माहीं घलाय हय।” इआ उहय बिसुआस करँइ बाला बचन आय, जउने के हम पंचे प्रचार करित हएन, <sup>9</sup> कि अगर तूँ अपने मुँहे से यीसु काहीं प्रभू जानिके सोइकार करिहा, अउर अपने पूरे मन से बिसुआस करिहा, कि परमातिमा उनहीं मरेन म से जिआइन हीं, त तूँ जरूर मुक्ती पइहा।

<sup>10</sup> काहेकि परमातिमा के नजर माहीं निरदोस बनँइ के खातिर, पूरे मन से बिसुआस कीन जात हय, अउर मुक्ती पामँइ के खातिर अपने मुँहे से सोइकार कीन जात हय। <sup>11</sup> काहेकि पबित्र सास्त्र माहीं इआ लिखा हय, कि “जे कोऊ यीसु मसीह के ऊपर बिसुआस करी, उआ कबहूँ लज्जित न होई

†।” <sup>12</sup> काहेकि यहूदी लोगन माहीं, अउर गैरयहूदी लोगन माहीं कउनव भेदभाव नहीं आय, एसे कि सगले मनइन के प्रभू एकय आहीं, अउर उनखर दया उन सगलेन के खातिर जेतने उनखर नाम लेत हँ, उनहीं बड़ी उदारता से असीसित करत ही। <sup>13</sup> “काहेकि जे कोऊ प्रभू के नाम लेई, उआ जरूर मुक्ती पाई †।” <sup>14</sup> पय जउने परमातिमा के ऊपर ऊँ पंचे बिसुआस नहीं करँय, त उनखर नाम ऊँ पंचे कइसन लइ सकत हँ? अउर जउने परमातिमा के बारे माहीं ऊँ पंचे सुनबय नहीं भें, त उनखे ऊपर ऊँ पंचे कइसन बिसुआस कइ सकत हँ? अउर अगर प्रचार करँइ बाले खुसी के खबर के प्रचार न करँय, त मनई कइसन सुन सकत हँ? <sup>15</sup> अउर अगर प्रचार करँइ बाले पठए न जाँय, त ऊँ पंचे कइसन प्रचार कइ सकत हँ? जइसन पबित्र सास्त्र माहीं घलाय लिखा हय, कि “जउन खुसी † के खबर सुनाबत हँ, उनखर मनइन के बीच माहीं आउब बड़ी खुसी के बात होत ही।” <sup>16</sup> पय इजराइली लोगन म से सगले मनई उआ खुसी के खबर काहीं सोइकार नहीं किहिन, जइसन यसायाह नबी अपने किताब माहीं घलाय लिखिन हीं, कि “हे प्रभू, हमरे सुनाए खुसी के खबर के को बिसुआस किहिस ही †?” <sup>17</sup> एसे कि बचन सुने से बिसुआस पइदा होत हय, अउर जब कोऊ जाइके मसीह के बारे माहीं प्रचार करत हय, तब मनइन काहीं सुनँय काहीं मिलत हय। <sup>18</sup> पय हम पूँछित हएन कि, का इजराइल के सन्तान हमरे बताए खुसी के खबर काहीं नहीं सुनिन? वास्तव माहीं ऊँ पंचे सुनिन त हय, काहेकि पबित्र सास्त्र माहीं लिखा हय, कि

“परमातिमा के बचन के प्रचार करँइ बाले सगले धरती माहीं प्रचार किहिन हीं, अउर जउन बचन ऊँ पंचे सुनाइन हीं, उआ सगले संसार माहीं पहुँचिगा हय †।”

<sup>19</sup> पुनि हम पूँछित हएन, कि का इजराइल के सन्तान बचन काहीं नहीं समझत रहे आहीं? वास्तव माहीं ऊँ पंचे समझत त रहे हँय, काहेकि मूसा नबी के लिखी किताब माहीं परमातिमा कहिन हीं, कि

“जउन हमार प्रजा † न होंहीं, उनहीं हम अइसन आसीस देब, कि इआ देखिके तोंहई पंचन काहीं जलन पइदा होई, अउर जउन मनई हमरे बारे माहीं कुछ नहीं जानत रहें, उआ मूढ़ जाति के द्वारा तोंहई पंचन काहीं गुस्सा देबाउब।”

<sup>20</sup> पुनि यसायाह नबी बड़े साहस के साथ अपने लिखी किताब माहीं परमातिमा के बात काहीं कहत हँ, कि

“जे कोऊ † हमहीं नहीं ढूँढत रहे आहीं, ऊँ पंचे हमहीं पाइगे हँय; अउर जे कोऊ हमहीं पूँछितव तक नहीं रहे आहीं, उनखे ऊपर हम प्रगट होइ गएन।”

<sup>21</sup> पय परमातिमा इजराइल के सन्तानन के बारे माहीं इआ कहत हँ, कि “हम हमेसा आपन हाँथ हुकुम न मानँइ बाली, अउर बाद-बिबाद करँइ बाली, प्रजा कइती उनहीं अपनामँइ के खातिर फइलाए रहि गएन।”

### इजराइली लोगन के ऊपर परमातिमा के दया

**11** त इआ बताबा, कि का परमातिमा अपने प्रजा इजराइली लोगन काहीं छोड़ि दिहिन हीं? नहीं, बेलकुल नहीं, हमहूँ त इजराइली जाति के अब्राहम के बंस अउर बिन्यामीन के कुल के आहैन। <sup>2</sup> अउर परमातिमा अपने उआ प्रजा इजराइली लोगन काहीं जिनहीं पहिलेन से चुनिन रहा हय, उनहीं अबहिनव नहीं छोड़िन आहीं, का तूँ पंचे नहीं जनते आह्या? कि पबित्र सास्त्र माहीं एलिय्याह नबी के बारे माहीं लिखा हय; कि एलिय्याह इजराइली लोगन के बिरोध माहीं परमातिमा से बिनती करत हँ, <sup>3</sup> कि “हे प्रभू, ऊँ पंचे अपना के सँदेस बतामँइ बालेन काहीं मारि डारिन हीं, अउर अपना के बेदिअन काहीं फोरिके नास कइ दिहिन हीं; अउर अपना के सँदेस बतामँइ बालेन म से केबल हमहिन भर बचेन हय, अउर ऊँ पंचे हमहूँ काहीं मारि डारँइ के कोसिस माहीं लगे हँय। †” <sup>4</sup> पय परमातिमा उनहीं का जबाब दिहिन? कि “हम अपने खातिर सात हजार मनइन काहीं बचाए

† 10:11 यसा 28:16 † 10:13 योए 2:32 † 10:15 यसा 52:7 † 10:16 यसा 53:1 † 10:18 भज 19:4 † 10:19 ब्यब 32:21 † 10:20 यसा 65:1 † 11:3 1 राजा 10:10-14

हएन, जउन न बाल देउता के आँगे गोड़न गिरें, अउर न ओखर पूजय किहिन आय।”<sup>5</sup> ठीक इहइमेर से इआ समय माहीं घलाय, परमातिमा के किरपा से चुने कुछ मनई बाँकी हँय।<sup>6</sup> अउर अगर इआ चुना जाब, परमातिमा के किरपा से भ हय, त इआ चुना जाब उनखे कामन से नहीं भ आय, अउर अगर इआ उनखे कामन से होत, त परमातिमा के किरपा बेकार ठहरत।<sup>7</sup> त एखर परिनाम का भ? इआ भ, कि इजराइली लोग परमातिमा के किरपा पामँइ के कोसिस माहीं लगे रहे हँय, पय उनहीं नहीं मिली, बलकिन जउन मनई परमातिमा के चुने रहे हँय, उनहीं उनखर किरपा मिलिगे, अउर उनखे अलाबा दुसरे मनइन काहीं परमातिमा कठोर बनाय दिहिन।<sup>8</sup> जइसन पबित्र सास्त्र माहीं लिखा हय, कि

“परमातिमा † उनहीं पंचन काहीं आजव के दिन तक भारी नींद माहीं डारे हें, अउर अइसन आँखी दिहिन हीं, कि ‘ऊँ पंचे परमातिमा के किरपा काहीं देखत हें, पय देखे से जाने नहीं पामँय’, अउर अइसन ‘कान दिहिन हीं, कि ऊँ पंचे अपने कान माहीं सुनत हें, पय सुनेव से नहीं समझे पामँय’।”

<sup>9</sup> अउर राजा दाऊद घलाय कहत हें; कि “ऊँ पंचे † जउन खाँय-पिअँइ माहीं परे हँय, उआ उनखे खातिर जाल अउर फन्दा बन जाय, अउर ठोकर खाँइके अउर सजा पामँइ के कारन बन जाय।

<sup>10</sup> अउर उनखे आँखिन माहीं आँधेआर छाया जाय, जउने देखे न पामँय, अउर अपना उनखे ऊपर बिपत्ती डारे रही, जउने उनखर पिठाँह झुकी रहँय।”

<sup>11</sup> एसे हम पूँछित हएन, कि का ऊँ पंचे एसे ठोकर खाइन, कि गिरिके नास होइ जाँय? नहीं, बलकुल नहीं, बलकिन उनखे अपराध किहे के कारन गैरयहूदी लोगन काहीं मुक्ती मिली हय, जउने यहूदी लोगन काहीं जलन पइदा होय।<sup>12</sup> एसे अगर उनखे अपराध कइके भटक जाँइ के कारन सगले संसार के मनइन काहीं जउन गैरयहूदी हें, आसिरबाद अउर फायदा मिला हय, त अगर ऊँ पंचे अपने अपराध काहीं सोइकार कइके, परमातिमा से मुक्ती पाइके आसिरबाद से भरपूर होइ जइहँय, त केतना फायदा न होई।

### गैरयहूदी लोगन काहीं मुक्ती मिलब

<sup>13</sup> हम तौहसे पंचन से ई बातन काहीं कहित हएन, जउन गैरयहूदी आह्या, काहेकि परमातिमा हमहीं तौहरे बीच माहीं यीसु मसीह के खास चेला के रूप माहीं पठइन हीं, अउर हम अपने खुसी के खबर सुनामँइ के सेबा काहीं खुब खास मानित हएन।<sup>14</sup> इआ आसा से कि हम अपने यहूदी लोगन माहीं घलाय जलन पइदा कराय सकी, अउर उनमा से कुछ जनेन काहीं मुक्ती देबाय सकी।<sup>15</sup> काहेकि अगर परमातिमा के द्वारा उनहीं छोड़ दीन जाब, संसार के गैरयहूदी लोगन के खातिर, परमातिमा के साथ उनखर मेल-मिलाप होइगा, त पुनि उनखर परमातिमा द्वारा सोइकार कइ लीन जाब, का मरेन म से जि उठँय के बराबर न होई? जरूर होई।<sup>16</sup> अगर हमरे पंचन के भेट के कुछ हिस्सा पबित्र हय, त का उआ सगलय पबित्र न होई? हाँ, जरूर होई, काहेकि अगर बिरबा के जर पबित्र ही, त ओखर सगली डेरइआ घलाय पबित्र होइहँय।

<sup>17</sup> हम इआ बात काहीं इआ उदाहरन से समझाइत हएन, अगर निकहे जैतून के बिरबा † से कुछ डेरइआ टोरिके फेंक दीन गई हँय, अउर तौहई पंचन काहीं जउन जंगली जैतून के बिरबा के डेरइआ आह्या, कलम बनाइके उनखे जघा माहीं उआ निकहे जैतून के बिरबा माहीं जोड़ दीन ग हय, जउने उआ बिरबा के जर से दुसरे डेरइअन कि नाई तौहऊँ काहीं ताकत मिलय।<sup>18</sup> त तौहई पंचन काहीं, उन डेरइअन के आँगे जउन टोरिके फेंकि दीन गई हँय, घमन्ड न करँइ चाही, अउर अगर तूँ पंचे घमन्ड करते हया, त इआ सुधि रक्खा, कि तूँ जर के पालन-पोसन नहीं कइ रहे आह्या, बलकिन उआ जरय तौहार पंचन के पालन-पोसन करत ही।<sup>19</sup> अउर अब तूँ पंचे इआ कइहा, कि ऊँ डेरइआ एसे टोरी गई, कि जउने हम पंचे कलम बनाइके उनखे जघा माहीं

† 11:8 यसा 29:10; ब्यब 29:4 †† 11:9 भज 69:22,23 † निकहा जैतून के बिरबा के जर अब्राहम आहीं अउर ओखर डेरइआ उनखर बंस आहीं, अउर जंगली जैतून के बिरबा के डेरइआ गैरयहूदी लोग आहीं

जोड़े जई।<sup>20</sup> इआ बात सही आय, कि ऊँ पंचे मसीह के ऊपर बिसुआस नहीं किहिन, एसे उआ बिरबा से टोरिके फेंक दीनगें, पय तूँ पंचे मसीह के ऊपर बिसुआस किहे के कारन उआ बिरबा माहीं जुड़े हया एसे घमन्ड न किहा, बलकिन परमातिमा के भय मानत रहा।<sup>21</sup> काहेकि जब परमातिमा उआ बिरबा के असली डेरइअन काहीं टोरिके फेंक दिहिन हीं, त अगर तूँ पंचे बिसुआस माहीं न बने रइहा, त टोरिके फेंक दीन जइहा।<sup>22</sup> एसे तूँ पंचे परमातिमा के दया अउर कठोरता के ऊपर ध्यान रक्खा! इआ कठोरता उनखे खातिर आय जउन बिसुआस से भटकिगें हँय, पय परमातिमा के दया तौहरे पंचन के खातिर आय, पय अगर तूँ पंचे मसीह के ऊपर किहे बिसुआस माहीं बने न रइहा, त तूँ पंचे उआ बिरबा से काटिके फेंक दीन जइहा।<sup>23</sup> अउर अगर ऊँ पंचे मसीह के ऊपर बिसुआस कइ लेइहँय, त ऊँ कलम बनाइके उआ बिरबा माहीं जोड़ दीन जइहँय, काहेकि परमातिमा उनहीं पुनि जोड़ सकत हें।<sup>24</sup> काहेकि तूँ पंचे, जंगली जैतून के बिरबा के डेरइआ आह्या, जउन सुभाबय से जंगली हय, ओमा से काटे गया हय, अउर निकहे जैतून के बिरबा माहीं ओखे सुभाव के बिरुद्ध तूँ पंचे कलम बनाइके ओमा जोड़े गया हय, त का उआ निकहे जैतून के बिरबा के जउन असली डेरइआ आहीं, अपनेन बिरबा माहीं न जोड़ी जइहँय? अरथात जरूर जोड़ी जइहँय।

### इजराइली लोगन काहीं मुक्ती मिलब

<sup>25</sup> हे भाई-बहिनिव, कहँव अइसा न होय, कि तूँ पंचे अपने-आप काहीं बुद्धिमान समझ ल्या, एसे हम चाहित हएन, कि तूँ पंचे इआ भेद काहीं जानिल्या, कि परमातिमा के राज माहीं गैरयहूदी लोग जब तक पूरी तरह से प्रबेस न कइ लेइहँय, तब तक इजराइली लोगन म से कुछ जने अइसय कठोर बने रइहँय।<sup>26</sup> अउर इआमेर से सगले इजराइली लोगन काहीं परमातिमा मुक्ती देइहँय; जइसन पबित्र सास्त्र माहीं घलाय लिखा हय; कि “मुक्ती देइ बाले सिध्दोन से अइहँय; अउर ऊँ याकूब के सन्तानन से सगले बुरे कामन काहीं दूर करिहँय।”<sup>27</sup> अउर उनखे साथ हमार इहय करार होई, कि हम उनखे जीवन से उनखे पापन काहीं दूर कइ देब।<sup>28</sup> अउर खुसी के खबर के ऊपर बिसुआस न किहे के कारन ऊँ पंचे परमातिमा के बइरी बनिगे हँय, एसे तौहई पंचन काहीं फायदा मिला हय, पय अगर ऊँ पंचे परमातिमा के द्वारा पहिलेन से चुनि लीनगे हँय, त परमातिमा द्वारा उनखे बाप-दादन काहीं दीन बचन के कारन ऊँ पंचे घलाय पियार होइहँय।<sup>29</sup> काहेकि परमातिमा जेही चुनि लेत हें, ओही कबहूँ नहीं छोड़य, अउर जउन बरदान देत हें, ओही पूरा करँइ से कबहूँ पीछे नहीं हटँय।<sup>30</sup> काहेकि जइसन पहिले तूँ पंचे, परमातिमा के हुकुम काहीं नहीं मानत रहे आह्या, पय उनखे द्वारा परमातिमा के हुकुम काहीं न मानँइ के कारन, अब तौहरे ऊपर दया भे ही।<sup>31</sup> उहयमेर अब ऊँ पंचे परमातिमा के हुकुम नहीं मानँय, काहेकि परमातिमा के जउन दया तौहरे ऊपर भे ही, इहइमेर उनहूँ पंचन के ऊपर घलाय एक दिन दया होई।<sup>32</sup> काहेकि परमातिमा सगले मनइन काहीं उनखे हुकुम काहीं न मानँइ के कारन पाप के बन्धन माहीं डार दिहिन हीं, कि जउने एक दिन सगले मनइन के ऊपर दया करँय।<sup>33</sup> बाह! परमातिमा केतने अदभुत हें, उनखर ग्यान अउर बुद्धी अउर दया रूपी धन अपरम्पार हय! उनखे निरनय अउर उपायन काहीं समझ पाउब असम्भव हय।<sup>34</sup> अउर प्रभू के बुद्धी काहीं कोऊ नहीं जान सकय, अउर न उनहीं कोऊ सलाह देंइ बाला होइ सकय।

<sup>35</sup> अउर न परमातिमा † काहीं कोऊ कुछ देबय भ आय, कि परमातिमा ओही ओखर बदला देंय।

<sup>36</sup> काहेकि सब कुछ उनहिन के बनबा आय, अउर उनहिन के द्वारा सब स्थिर हय, अउर सब कुछ उनहिन के आय, उनखर बड़ाई जुग-जुग होत रहय। आमीन!



### परमातिमा के सेबा के खातिर आपन जीवन अरपन करा

12 हे भाई-बहिनिय, परमातिमा तौहरे ऊपर जउन दया किहिन हीं, ओही सुधि देबाइके तौहसे पंचन से बिनती करित हएन, कि अपने-अपने जीवन काहीं जिन्दा, अउर पबित्र, अउर परमातिमा काहीं प्रसन्न करँइ बाले बलिदान के रूप माहीं समरपित कइ द्या, तौहार पंचन के परमातिमा के सेबा करँइ के सही तरीका इहय आय।<sup>2</sup> अउर तूँ पंचे इआ संसार के बुरे मनइन कि नाई न बना; काहेकि परमातिमा तौहरे मन काहीं नबा कइ दिहिन हीं, एसे तौहार पंचन के चाल-चलन बदलत जाँइ चाही, जउने तूँ पंचे अपने अनुभव से इआ जान लेबा करा, कि परमातिमा तौहरे जीवन से का चाहत हें, अउर उनहीं का नीक लागत हय, अउर उनखर पूरी इच्छा का ही।<sup>3</sup> काहेकि परमातिमा के किरपा से जउन अधिकार हमहीं मिला हय, ओहिन के मुताबिक हम तौहसे पंचन से अरथात हरेक जन से कहित हएन, कि जइसन अपने-आप काहीं समझँइ चाही, ओसे बढ़िके अपने-आप काहीं न समझा। जइसन परमातिमा तौहरे पंचन के छमता के मुताबिक, जेतना बिसुआस दिहिन हीं, ओहिन के मुताबिक अपने-आप काहीं सही तरीके से समझा।<sup>4</sup> काहेकि जइसन हमरे पंचन के देह माहीं कइयकठे अंग हें, अउर उनखर काम एकमेरय नहिँ आय।<sup>5</sup> उहयमेर हमहूँ पंचे, जउन खुब जने हएन, मसीह के ऊपर बिसुआस किहे के कारन एकठे देह कि नाई हएन, जइसन ओखर अंग एक दुसरे से जुड़े रहत हें, उहयमेर हमहूँ पंचे आपस माहीं एक दुसरे से जुड़े हएन।<sup>6</sup> काहेकि परमातिमा अपने किरपा के मुताबिक जउन हमहीं पंचन काहीं अलग-अलग बरदान दिहिन हीं, त जेही परमातिमा के सँदेस बतामँइ के बरदान मिला होय, त उआ ओखे लघे जेतना बिसुआस हय, ओहिन के मुताबिक परमातिमा के सँदेस बताबय।<sup>7</sup> अगर जेही सेबा करँइ के बरदान मिला होय, त उआ सेबा करँइ माहीं लगा रहय, अगर जेही सिखामँइ के बरदान मिला होय, त उआ सिखामँइ माहीं लगा रहय।<sup>8</sup> अउर जेही उत्साहित करँइ के बरदान मिला होय, त उआ उत्साहित करँइ माहीं लगा रहय; अउर जेही दान देँइ के बरदान मिला होय, त उआ उदारता से दान देँइ माहीं लगा रहय, अउर जेही अँगुआई करँइ के बरदान मिला होय, त उआ लगन के साथ अँगुआई करय, अउर जेही दया करँइ के बरदान मिला होय, त उआ बड़े खुसी के साथ दया करय।

<sup>9</sup> अउर तूँ पंचे एक दुसरे से निस्कपट प्रेम करा; अउर बुरे कामन से नफरत करा, अउर भलाई करँइ माहीं लगे रहा।<sup>10</sup> अउर आपस माहीं भाईचारा बनाइके, एक दुसरे से प्रेम करा; अउर आपस माहीं एक दुसरे काहीं अपने से बढ़िके माना।<sup>11</sup> अउर अपने काम माहीं कबहूँ आलसी न बना; बलकिन आत्मिक उत्साह के साथ प्रभू के सेबा माहीं लगे रहा।<sup>12</sup> अउर अपने आसा माहीं आनन्दित रहा; दुख-मुसीबत माहीं धीरज रक्खा; अउर हमेसा प्राथना करँइ माहीं लगे रहा।<sup>13</sup> अउर परमातिमा के पबित्र मनइन काहीं जउन जरूरत होय, त उनखर मदत करा; अउर महिमानन के स्वागत-सतकार करँइ माहीं लगे रहा।<sup>14</sup> अउर अपने सतामँइ बालेन काहीं आसिरबाद द्या; उनहीं सराप न द्या, बलकिन उनखे खातिर परमातिमा से प्राथना करा, कि परमातिमा उनहीं आसिरबाद देँय।<sup>15</sup> अउर जे आनन्द मनाबत हें, त तूँ पंचे उनखे साथ आनन्द मनाबा; अउर जे दुखी होंय, त उनखे साथ तूँ पंचे दुख मनाबा।<sup>16</sup> अउर आपस माहीं मिल जुलिके रहा; घमन्ड न करा; बलकिन दीन मनइन के साथ संगति करा; अउर अपने-आप काहीं जादा बुद्धिमान न समझा।<sup>17</sup> जे तौहरे साथ बुराई करँय, त तूँ पंचे उनखे साथ बुराई न किहा, बलकिन भलाइन किहा; जउन बातँय सगले मनइन के भलाई के खातिर होंय, उनहिन काहीं करँइ के कोसिस करा।<sup>18</sup> अउर जहाँ तक तौहसे होइ सकय, त सगले मनइन के साथ मेल-मिलाप करँइ के पूरी कोसिस किहा।<sup>19</sup> हे पियार भाई-बहिनिय, अगर कोऊ तौहसे कुछ बुराई किहिस होय, त ओखर बदला तूँ पंचे खुद न लिहा, बलकिन परमातिमा काहीं ओखर बदला लेँइ के मोका दिहा, काहेकि जइसन पबित्र सास्त्र माहीं लिखा हय, कि “प्रभू कहिन हीं, कि बदला लेब हमार काम आय, अउर ओखर बदला हमहिन लेब

†।”<sup>20</sup> पय अगर तौहार पंचन के बड़ी भूखा होय, त ओही खाना खबाया; अउर अगर पियासा होय त ओही पानी पिआया; काहेकि तूँ पंचे ओखे साथ अइसा करिहा, त उआ तौहसे खुब लज्जित होइ जई †।<sup>21</sup> अउर अगर कोऊ तौहसे कुछ बुराई किहिस होय, त तूँ पंचे ओखे साथ बुराई न किहा, बलकिन ओखे साथ भलाइन किहा, इआमेर से तूँ पंचे भलाई के काम कइके बुराई के ऊपर बिजय पइहा।

### अधिकारिन के हुकुमन काहीं मानब

13 हरेक मनइन काहीं सरकारी अधिकारिन के बातन काहीं मानँइ चाही; काहेकि परमातिमय उनहीं पंचन काहीं सासन करँइ के अधिकार दिहिन हीं, अउर जेतने अधिकार उनहीं पंचन काहीं मिले हँय, ऊँ सगले परमातिमय के द्वारा दीनगे हँय।<sup>2</sup> एसे जे कोऊ अधिकारिन के बातन के बिरोध करत हें, ऊँ पंचे परमातिमा के हुकुम के बिरोध करत हें, अउर जेतने परमातिमा के हुकुम के बिरोध करत हें, ऊँ पंचे परमातिमा के तरफ से जरूर सजा पइहँय।<sup>3</sup> काहेकि जेतने जने निकहे काम करत हें, उनहीं पंचन काहीं अधिकारिन से डेरॉइ के जरूरत नहिँ परय, पय जेतने जने बुरे काम करत हें, उँइन पंचे उनसे डेरात हें, एसे अगर तूँ पंचे चहते हया, कि हम अधिकारिन से न डेरई, त निकहे काम करा, अउर जब निकहे काम करिहा, त उनखे तरफ से तौहार पंचन के बड़ाई होई; काहेकि तौहरे पंचन के भलाइन के खातिर, परमातिमा उनहीं पंचन काहीं सेबक के रूप माहीं चुनिन हीं, पय अगर तूँ पंचे बुरे काम करते हया, त उनसे डेरा; काहेकि सजा देँइ के अधिकार परमातिमा उनहिन के हाँथे माहीं दिहिन हीं, कि जउने परमातिमा के क्रोध के मुताबिक बुरे काम करँइ बालेन काहीं ऊँ पंचे सजा देँय।<sup>5</sup> एसे अधिकारिन के बातन काहीं मानब, केबल परमातिमा के क्रोध के डेरय भर से जरूरी नहिँ आय, बलकिन तौहार पंचन के सोच-बिचार घलाय गबाही देत हय, कि इआ बात सही आय।<sup>6</sup> एसे तूँ पंचे अधिकारिन काहीं जमा घलाय देते हया, काहेकि ऊँ पंचे परमातिमा के द्वारा सेबा करँइ के खातिर नियुक्त कीन गँ हँय, जउन अपने करतब्य काहीं पूरा करँइ माहीं हमेसा लगे रहत हें।<sup>7</sup> एसे हरेक जन के हक्क चुकाबा करा, जइसन जेही कर देँइ चाही ओही कर द्या, अउर जेही चुंगी नाका माहीं पइसा देँइ चाही, ओही पइसा द्या; अउर जेसे डेरॉइ चाही त ओसे डेरा; अउर जेखर मान-सम्मान करँइ चाही, त ओखर मान-सम्मान करा।

### एक दुसरे से प्रेम करत रहब

<sup>8</sup> अउर तूँ पंचे आपस माहीं एक दुसरे से प्रेम करँइ के अलाबा, अउर कउनव बात माहीं कोहू के रिनिहा न रहा; काहेकि जे कोऊ दुसरे से प्रेम रक्खत हय, उहय मूसा के बिधान काहीं पूर करत हय।<sup>9</sup> हम इआ बात एसे कहि रहेन हय, कि तूँ पंचे ब्यभिचार न किहा; दुसरे के कतल न किहा, अउर चोरी न किहा; अउर न कउनव मेर के लालच किहा; अउर इनखे अलाबव अगर कउनव हुकुम हें, त ऊँ सगलेन के निचोड़ इआ बात माहीं आय जात हय, कि “तूँ अपने परोसी से अपनेन कि नाई प्रेम रक्खा।”<sup>10</sup> काहेकि जे कोऊ अपने परोसी से प्रेम रक्खत हय, त उआ ओखर बुराई नहीं करय, एसे दुसरे से प्रेम करब मूसा के बिधान काहीं पूर करँइ कि नाई हय।<sup>11</sup> अउर तूँ पंचे कउनमेर के समय माहीं जि रहे हया, ओही पहिचान ल्या, अउर इआ जानिल्या, कि तौहरे पंचन के खातिर, अपने नींद से जाग उठँय के समय आइगा हय, काहेकि जब हम पंचे बिसुआस किहेन तय, ओखे मुताबिक परमातिमा के द्वारा आखिरी मुक्ती पामँइ के समय नरे आइगा हय।<sup>12</sup> अउर रात बीतिन चुकी हय, अउर दिन निकरइन बाला हय; एसे हम पंचे अँधिआर के बुरे कामन काहीं छोड़िके, जइसन एकठे सिपाही हँथिआर बाँधे तइआर रहत हय, उहयमेर हमहूँ पंचे उँजिआर के हँथिआर बाँधे लेई।<sup>13</sup> अउर जइसन सगले मनई दिन के उँजिआर माहीं रहत हें, उहयमेर हमहूँ पंचन काहीं रहँइ चाही, अउर हमार पंचन के चाल-चलन निकहा होँइ चाही, इआ

नहीं कि भोग-बिलास माहीं परि जई, अउर दारू पिके धुत्त रही, अउर ब्यभिचार करी, अउर लुच्ची माहीं परिके लड़ाई-झगड़ा करी, अउर कोहू से डाह करी।<sup>14</sup> बलकिन हम पंचे प्रभू यीसु मसीह के सगले सुभाव काहीं अपनाय लेई, अउर अपने मन के बुरी इच्छन काहीं पूर करई के कोसिस न करी।

### अपने बिसुआसी भाई-बहिनिन के ऊपर दोस न लगाबा

**14** अउर हे बिसुआसी भाई-बहिनिन, जउन मनई बिसुआस माहीं कमजोर हैं, उनहूँ काहीं अपने मंडली माहीं सामिल कइल्या, पय उनखे मतभेदन के बातन माहीं बाद-बिबाद करई के खातिर नहीं।<sup>2</sup> काहेकि जउन मनई बिसुआस माहीं मजबूत हय, त उआ कहत हय कि हमहीं सब कुछ खाब उचित हय, पय जउन मनई बिसुआस माहीं कमजोर हय, त उआ केबल साकाहारी खाना खात हय।<sup>3</sup> अउर उआ मनई जउन हरेकमेर के खाना खात हय, त ओही, उआ मनई काहीं तुच्छ न समझई चाही, जउन कुछ चीजन काहीं नहीं खाय। उहयमेर उहव मनई जउन कुछ चीजन काहीं नहीं खाय, उआ मनई काहीं जउन सगली चीजन काहीं खात हय, बुरा न कहई चाही; काहेकि परमातिमा दोनव जनेन काहीं अपनाइन हीं।<sup>4</sup> तूँ कउनव दुसरे के घर के दास के ऊपर दोस लगाई बाले को होते हया? उआ सही काम करत हय, कि गलत काम करत हय, इआ बात के निरनय करब ओखे मालिक के काम आय, अउर उआ सहिन काम करई बाला बनाय दीन जई, काहेकि प्रभू ओही सही काम करई बाला बनाय सकत हैं।<sup>5</sup> अउर कउनव मनई एक दिन काहीं दुसरे दिन से बढ़िके मानत हय, अउर कउनव मनई सगले दिनन काहीं एक समान मानत हय, त हरेक जन काहीं अपने मन माहीं संका न करई चाही, बलकिन इआ निश्चित कइ लेंय चाही, कि हम पंचे जउन मानित हएन उआ ठीक हय।<sup>6</sup> अउर जे कोऊ एक दिन काहीं दुसरे दिन से बढ़िके मानत हय, त उआ ओही प्रभू काहीं सम्मान देई के खातिर मानत हय। अउर जे कोऊ सब चीजन काहीं खात हय, उहव प्रभू काहीं सम्मान देई के खातिर खात हय, काहेकि उआ जउन कुछ खात हय, ओखे खातिर परमातिमा के धन्यवाद करत हय। अउर जे कोऊ कुछ चीजन काहीं नहीं खाय, उहव प्रभू काहीं सम्मान देई के खातिर नहीं खाय, अउर उहव परमातिमा के धन्यवाद करत हय।<sup>7</sup> काहेकि हमरे पंचन म से कोऊ न त अपने खातिर जिअय, अउर न अपने खातिर मरतय आय।<sup>8</sup> अउर अगर हम पंचे जिन्दा हएन, त प्रभू काहीं सम्मान देई के खातिर जिन्दा हएन; अउर अगर हम पंचे मरित हएन, त प्रभू काहीं सम्मान देई के खातिर मरित हएन; एसे हम पंचे चाह जिन्दा रही, चाह मर जई, तऊ हम पंचे प्रभुअय के आहैन।<sup>9</sup> काहेकि मसीह एहिन खातिर मरे, अउर मरेन म से जि उठें, कि जउने, जउन मनई मरिगे हँय, अउर जउन जिन्दा हैं, ऊँ दोनव के प्रभू कहाँमँड।<sup>10</sup> पय तूँ पंचे जउन केबल साकाहारी खाना खाते हया, त जउन भाई-बहिनी सब कुछ खात हैं, उनखे ऊपर दोस काहे लगउते हया? अउर तूँ पंचे जउन सब कुछ खाते हया, त जउन भाई-बहिनी केबल साकाहारी खाना खात हैं, उनखे ऊपर दोस काहे लगउते हया? काहेकि हमहीं पंचन काहीं अपने हरेक बातन के हिंसाब देई के खातिर, परमातिमा के न्याय के सिंहासन के आँगे ठाढ़ होंड परी।<sup>11</sup> काहेकि पबित्र सास्त्र माहीं घलाय इआ लिखा हय, कि “प्रभू कहत हैं, कि हम अपने जीवन के कसम खाइके कहित हएन, कि हरेक मनइन काहीं हमरे आँगे गोडन गिरँय क परी, अउर हरेक मनइन काहीं इआ सोइकार करई परी, कि हमहिन परमातिमा आहैन।”

<sup>12</sup> एसे हमरे पंचन म से हरेक जन काहीं, अपने-अपने कामन के हिंसाब परमातिमा काहीं देई परी।

### अपने बिसुआसी भाई-बहिनिन काहीं पाप माहीं गिरामँड के कारन न बना

<sup>13</sup> एसे हम पंचे आपस माहीं एक दुसरे के ऊपर दोस लगाउब छोंडि देई, अउर इआ ठान लेई, कि अपने बिसुआसी भाई-बहिनिन के गइल माहीं कउनव अरचन ठाढ़ न करब, अउर न ओही पाप करई के खातिर

उकसउबय करब।<sup>14</sup> अउर हम प्रभू यीसु के ऊपर बिसुआस करित हएन, अउर इआ निकहा से जानित हएन, कि कउनव खाँड बाली चीज अपने-आप से असुद्ध नहीं होय, पय जे कोऊ कउनव खाँड बाली चीज काहीं असुद्ध मानत हय, त उआ केबल ओहिन के खातिर भर असुद्ध होत ही।<sup>15</sup> अउर अगर तोंहरे बिसुआसी भाई-बहिनिन काहीं तोंहरे खाना के कारन ठेस पहुँचत ही, त तूँ उनसे प्रेम नहीं करते आह्या, एसे तूँ अपने खाना के द्वारा उनखे बिसुआस से गिरँय के कारन न बना। काहेकि मसीह उनहूँ के खातिर आपन प्रान दिहिन हीं।<sup>16</sup> एसे जउन तोंहरे खातिर निकहा हय, ओखर बुराई न होंड पाबय।<sup>17</sup> काहेकि परमातिमा के राज, खाँय-पिअँड से सम्बन्धित नहीं आय, पय अगर हम पंचे परमातिमा के नजर माहीं निरदोस जीवन जी, अउर सगले मनइन से मेल-मिलाप से रही, अउर पबित्र आत्मा से मिलई बाले आनन्द माहीं जीवन बिताई, त परमातिमा हमरे पंचन के जीवन माहीं राज करिहँय।<sup>18</sup> जे कोऊ अइसा जीवन जि के, मसीह के सेबा करत हय, त ओसे परमातिमा खुसी रहत हैं, अउर सगले मनई ओखर मान-सम्मान करत हैं।<sup>19</sup> एसे हम पंचे ऊँ बातन काहीं करई माहीं लगे रही, जिनसे सगले मनइन के मेल-मिलाप होत हय, अउर एक दुसरे के आत्मिक उन्नति होंड माहीं मदत मिलत ही।<sup>20</sup> अउर तूँ पंचे अपने खाँय-पिअँड के कारन, परमातिमा के काम काहीं न बिगाड़ा, काहेकि सगली खाँय-पिअँड बाली चीजँय सुद्ध त हई, पय उआ मनई के खातिर सगली चीजन काहीं खाब ठीक नहीं आय, जउन दुसरे भाई-बहिनिन काहीं पाप के गइल माहीं लड जाती हँय।<sup>21</sup> अउर अगर तोंहरे पंचन के माँस खाए से, अउर अंगूर के रस पिए से, अउर कुछ अइसन काम करे से, दुसरे भाई के आत्मिक जीवन नास होइ रहा हय, त तोंहई पंचन काहीं अइसन कामन काहीं करब उचित नहीं आय।<sup>22</sup> ई बातन के बारे माहीं तोंहार पंचन के जउन बिसुआस होय, त ओही अपने अउर परमातिमा के बीच माहीं रक्खा; उआ मनई धन्य हय, जउने बात काहीं अपने नजर माहीं ठीक समझत हय, उहय करत हय, अउर ऊँ बातन माहीं अपने-आप काहीं दोसी नहीं पाबय।<sup>23</sup> पय जे कोऊ कउनव चीज काहीं अपने मन माहीं संका कइके खात हय, त उआ परमातिमा के नजर माहीं दोसी ठहराबा जाय चुका हय, काहेकि उआ पूरा बिसुआस कइके नहीं खाय, अउर जउन कुछ बिना बिसुआस से कीन जात हय, उआ पापय आय।

### दुसरेन के आत्मिक उन्नति करा

**15** एसे हमहीं पंचन काहीं, जउन बिसुआस माहीं मजबूत हएन, इआ चाही, कि जउन हमार पंचन के बिसुआसी भाई-बहिनी बिसुआस माहीं कमजोर हैं, त उनखे कमजोरिन काहीं सही; इआ नहीं, कि अपने-आप काहीं खुसी करई भर माहीं लगे रही।<sup>2</sup> अउर हमरे पंचन म से हरेक जनेन काहीं इआ चाही, कि अपने परोसी के भलाई करई के इच्छा से उनहीं प्रसन्न करय, कि जउने उनखर आत्मिक उन्नति होय।<sup>3</sup> काहेकि मसीह घलाय अपने-आप काहीं प्रसन्न नहीं किहिन, पय जइसन पबित्र सास्त्र माहीं लिखा हय, “हे पिता अपना के बारे माहीं जउन बुरी बातँय सगले मनई कहत हैं, ऊँ सगली बातँय हमरे ऊपर आय गई हँय।”<sup>4</sup> अउर पबित्र सास्त्र माहीं जेतनी बातँय पहिले से लिखी गई हँय, ऊँ सगली हमहीं पंचन काहीं सिच्छा देई के खातिर लिखी गई हँय, कि हम पंचे धीरज अउर पबित्र सास्त्र के उत्साहित करई के द्वारा आसा रक्खी।<sup>5</sup> हम इआ प्राथना करित हएन, कि धीरज अउर सान्ति देई बाले परमातिमा, तोंहई पंचन काहीं इआ बरदान देई, कि तूँ पंचे मसीह यीसु के बताई बातन के मुताबिक आपस माहीं एक दुसरे से मिल जुलिके रहा।<sup>6</sup> जउने तूँ पंचे एक मन होइके, एक अबाज माहीं हमरे प्रभू यीसु मसीह के पिता परमातिमा के बड़ाई करा।

### खुसी के खबर सगले मनइन के खातिर आय

<sup>7</sup> एसे जइसन मसीह परमातिमा के बड़ाई करई के खातिर, तोंहई पंचन काहीं अपनाइन हीं, उहयमेर तुहूँ पंचे घलाय एक दुसरे काहीं अपनाबा।

8 अउर हम तौहई पंचन काहीं बताइत हएन, कि जउने वादन काहीं परमातिमा तौहरे बाप-दादन से किहिन रहा हय, उनहीं पूर करई के खातिर, अउर परमातिमा के सच्चाई के सबूत देई के खातिर, मसीह यहूदी लोगन के सेबक बने। 9 अउर गैरयहूदी लोग घलाय, परमातिमा के दया के कारन उनखर बड़ाई करैय, जइसन पबित्र सास्त्र माहीं घलाय लिखा हय, कि “हम गैरयहूदी लोगन के बीच माहीं अपना के धन्यवाद करब, अउर अपना के नाम के भजन गाउब †।”

10 अउर पबित्र सास्त्र माहीं इहव लिखा हय, कि “हे गैरयहूदी लोगव, उनखे प्रजा अरथात यहूदी लोगन के साथ मिलिके आनन्द करा †।”

11 अउर पबित्र सास्त्र माहीं इहव लिखा हय, कि “हे गैरयहूदी लोगव, प्रभू के स्तुति करा; अउर हरेक देस के सगले मनइव; प्रभू के बड़ाई करा।”

12 अउर पबित्र सास्त्र माहीं यसायाह नबी के किताब माहीं लिखा हय, कि “यिसय के बंस माहीं एक जन पइदा होई, अउर गैरयहूदी लोगन के ऊपर सासन करई के खातिर अई, अउर गैरयहूदी लोग उनखे ऊपर आसा रखिहँय।”

13 हम प्राथना करित हएन, कि परमातिमा जउन तौहई पंचन काहीं आसा देत हैं, अउर तूँ पंचे उनखे ऊपर बिसुआस करते हया, एसे ऊँ तौहई पंचन काहीं आनन्द अउर सान्ती से भर देय, कि जउन आसा तूँ पंचे उनखे ऊपर रक्खे हया, उआ पबित्र आत्मा के सक्ती से अउर बाढ़त जाय।

14 हे हमार भाई-बहिनिव, हम खुदय तौहरे बारे माहीं निकहा से जानित हएन, कि तूँ पंचे भलाई करई माहीं आँगे हया, अउर परमातिमा तौहई पंचन काहीं भरपूर ग्यान दिहिन हीं, एसे तूँ पंचे एक दुसरे काहीं सिच्छा दइ सकते हया। 15 तऊ हम तौहई पंचन काहीं, इआ चिट्ठी माहीं पुनि सुधि देबामँड के खातिर, कुछ बातन के बारे माहीं कहँव-कहँव बड़ा साहस कइके लिखेन हय। अउर हम ई बातन काहीं उआ किरपा के कारन लिखेन हय, जउन परमातिमा हमहीं दिहिन हीं। 16 अउर उआ किरपा इआ आय, कि हम गैरयहूदी लोगन के खातिर, मसीह यीसु के सेबक बनिके, परमातिमा के खुसी के खबर सुनामँड के खातिर, एकठे याजक के रूप माहीं काम करी; जउने गैरयहूदी लोग, पबित्र आत्मा से पूरी तरह से पबित्र बनिके, एकठे भेंट के रूप माहीं परमातिमा के द्वारा सोइकार कीन जाँय। 17 एसे हम मसीह यीसु के द्वारा परमातिमा के सेबा माहीं उनखे ऊपर घमण्ड कइ सकित हएन।

18 काहेकि ऊँ बातन काहीं छोंडिके, हमहीं अउर दुसरे बात के बारे माहीं कहँड के साहस नहिं आय, जउन मसीह गैरयहूदी लोगन काहीं, परमातिमा के अधीनता माहीं लइ आमँड के खातिर, बचन सुनामँड के काम, 19 अउर पबित्र आत्मा के सक्ती से चमत्कारन, अउर अचरज के कामन काहीं देखामँड के काम हमरेन द्वारा किहिन हीं, इहाँ तक कि हमहिन यरूसलेम सहर से लइके, चारिव कइती इल्लुरिकुम प्रदेस तक मसीह के खुसी के खबर के पूर-पूर प्रचार किहिन हय। 20 पय हमरे मन के इच्छा इआ ही, कि हम उहाँ खुसी के खबर सुनाई, जहाँ कउनव मनई मसीह के नाम तक नहीं जानैय, कहँव अइसा न होय, कि जहाँ दूसर मनई खुसी के खबर सुनाय चुके हँय, जउन एकठे घर के नेव कि नाई हय, हम उहाँ खुसी के खबर सुनाई, जउन दुसरे के नेव माहीं घर बनामँड के समान हय। 21 पय जइसन पबित्र सास्त्र माहीं लिखा हय, उहयमेर होय, “जिनहीं उनखे बारे माहीं नहीं बताबा ग, उँइन पंचे उनहीं देखिहँय, अउर जे कोऊ बचन नहीं सुनिन आय, उँइन पंचे समझिहँय।” 22 अउर जहाँ-जहाँ खुसी के खबर नहीं सुनाई गे रही आय, उहाँ-उहाँ जाइके खुसी के खबर सुनामँड माहीं लगे रहेन हय, इआ कारन से हम तौहरे पंचन के लघे नहीं आय पाएन।

## रोम देस माहीं जाँड के पवलुस के योजना

23 पय अब ई प्रदेसन के हरेक जघन माहीं, हम खुसी के खबर सुनामँड के काम पूर कइ चुकेन हय, अउर हमार कइअक बरिस से तौहसे पंचन से मिलई के बड़ी इच्छा रही हय। 24 एसे जब हम स्पेन देस काहीं जाब, त तौहसे मिलिके जाब, काहेकि हम इआ आसा करित हएन, कि उआ यात्रा माहीं हम तौहसे मिलब, अउर कुछ दिन संगति करब, तब हमार इच्छा पूर होइ जई, अउर तूँ पंचे उहाँ से आँगे के यात्रा माहीं हमार मदत किहा। 25 पय अबे हम यरूसलेम सहर के बिसुआसी मनइन के मदत करई के खातिर उहाँ जइत हएन। 26 काहेकि मकिदुनिया प्रदेस अउर अखाया प्रदेस के बिसुआसी भाई-बहिनिन काहीं इआ निकहा लाग, कि यरूसलेम सहर के गरीब बिसुआसी भाई-बहिनिन के खातिर चंदा एकट्ठा कइके देय। 27 अउर इआ करई के खातिर उनहीं निकहा त लाग, पय ऊँ पंचे उनखर रिनिहा घलाय हैं, काहेकि ई पंचे गैरयहूदी लोग, यरूसलेम सहर के यहूदी जाति के बिसुआसी भाई-बहिनिन से आत्मिक बातन के आसीस अरथात खुसी के खबर पाइन हीं, त इनहूँ पंचन काहीं उचित होत हय, कि उनखे सारीरिक जरूरतन के खातिर, उनहीं पंचन काहीं दान दइके उनखर सेबा करैय। 28 एसे हम उनखर इआ काम पूर कइके अरथात यरूसलेम सहर के भाई-बहिनिन के हाँथे माहीं, इआ चंदा सउँपिके, तौहसे पंचन से मिलत स्पेन देस काहीं चले जाब। 29 अउर हम जानित हएन, कि जब हम तौहरे पंचन के लघे अउब, त हमही पंचन काहीं मसीह के भरपूर आसीस मिली।

30 अउर हे भाई-बहिनिव, हम पंचे यीसु मसीह के ऊपर बिसुआस करित हएन, अउर उँइन हमार पंचन के प्रभू आहीं, उनखर अउर पबित्र आत्मा के प्रेम जउन तौहई पंचन काहीं मिलत हय, उनखर सुध देबाइके, तौहसे पंचन से बिनती करित हएन, कि हमरे साथ मिलिके हमरे खातिर परमातिमा से सच्चे मन से प्राथना करई माहीं लगे रहा। 31 कि जउने यहूदिया प्रदेस के ऊँ मनइन से, जउन परमातिमा के ऊपर बिसुआस नहीं करैय, उनखे हाँथ से परमातिमा हमहीं बचामँड, अउर यरूसलेम सहर के बिसुआसी भाई-बहिनिन के खातिर, जउन दान हम लए जइत हएन, ओही ऊँ पंचे बड़े आनन्द के साथ सोइकार करैय। 32 अउर हम परमातिमा के इच्छा के मुताबिक आनन्द के साथ तौहरे पंचन के लघे अई, अउर हम पंचे आपस माहीं एक दुसरे काहीं हिम्मत दइ सकी। 33 अउर हम प्राथना करित हएन, कि सान्ती देई बाले परमातिमा तौहरे पंचन के साथ रहँय। आमीन।

## पवलुस के अभिबादन

16 हम तौहसे पंचन से किखिया सहर के मसीही मन्डली माहीं सेबा करई बाली फीबा बहिनी के खातिर बिनती करित हएन, 2 काहेकि ऊँ प्रभू के ऊपर बिसुआस करई बाली बहिनी आहीं, एसे उनहीं प्रभू के दासी समझिके तूँ पंचे सोइकार करा; अउर अगर उनहीं कउनव चीज के तौहसे पंचन से जरूरत परय, त उनखर मदत करा; काहेकि ऊँ खुब मनइन के मदत किहिन हीं, इहाँ तक कि हमार घलाय मदत किहिन रहा हय।

3 अउर मसीह यीसु के सेबा माहीं हमरे साथ काम करई बाली प्रिस्का अउर उनखे मंसेरुआ अक्विला काहीं घलाय हमार नबस्कार कहि दिहा। 4 ऊँ पंचे हमहीं बचामँड के खातिर आपन प्रान घलाय देई के खातिर तइआर रहे हँय, हम उनखर धन्यवाद करित हएन, अउर केबल हमहिन भर नहीं, बलकिन गैरयहूदी लोगन के सगली मसीही मन्डली घलाय उनखर धन्यवाद करती हँय। 5 अउर उनखे घर माहीं जउन मसीही मन्डली लागत ही, ओमा एकट्ठा होइ बाले सगले भाई-बहिनिन काहीं नबस्कार कहि दिहा, अउर हमरे पियार साथी इपयनितुस काहीं, जउन आसिया प्रदेस के पहिल मसीह बिसुआसी आहीं, उनहूँ काहीं घलाय हमार नबस्कार कहि दिहा। 6 अउर मरियम बहिनी काहीं, जउन तौहरे पंचन के खातिर खुब मेहनत करती हई, उनहीं हमार नबस्कार कहि दिहा। 7 अउर अन्दुनीकुस अउर यूनियास काहीं जउन हमरे यहूदी जाति के बिसुआसी भाई आहीं, अउर हमरे साथ जेल

माहीं घलाय गे रहे हँय, अउर यीसु मसीह के खास चलन माहीं ऊँ पंचे मसहूर रहे हँय, अउर हमसे पहिले मसीह के ऊपर बिसुआस किहिन रहा हय, उनहूँ काहीं हमार नबस्कार कहि दिहा।<sup>8</sup> अउर भाई अम्पलियातुस काहीं, जउन प्रभू के ऊपर बिसुआस करत हें, एसे हम उनसे प्रेम करित हएन, उनहूँ से हमार नबस्कार कहि दिहा।<sup>9</sup> अउर भाई उरबानुस काहीं, जउन हमरे साथ मसीह के सेबा किहिन हीं, उनहूँ काहीं हमार नबस्कार कहि दिहा, अउर हमरे पियार साथी इस्तखुस काहीं हमार नबस्कार कहि दिहा।<sup>10</sup> अउर भाई अपिल्लेस काहीं जउन मसीह के सेबा माहीं खरे निकरे हँय, हमार नबस्कार कहि दिहा, अउर अरिस्तुबुलुस के घर माहीं रहँइ बाले बिसुआसी लोगन काहीं हमार नबस्कार कहि दिहा।<sup>11</sup> अउर हमरे यहूदी जाति के भाई हेरोदियोन काहीं नबस्कार कहि दिहा, अउर भाई नरकियुस के घर माहीं जेतने जन प्रभू के ऊपर बिसुआस करत हें, उनहीं हमार नबस्कार कहि दिहा।<sup>12</sup> अउर बहिनी त्रूफेना अउर त्रूफोस काहीं, जउन प्रभू के सेबा माहीं मेहनत करती हई, हमार नबस्कार कहि दिहा, अउर पियार बहिनी पिरसिस काहीं घलाय जउन प्रभू के सेबा माहीं खुब मेहनत करती हई, उनहूँ काहीं हमार नबस्कार कहि दिहा।<sup>13</sup> अउर भाई रूफुस काहीं, जिनहीं प्रभू के सेबा के खातिर चुना ग हय, अउर उनखे महतारी काहीं जउन हमरे खातिर महतारी कि नाई हई, उनहीं दोनव जनेन काहीं हमार नबस्कार कहि दिहा।<sup>14</sup> अउर असुन्क्रितुस अउर फिलगोन अउर हिरमेस, अउर पत्रुबास, अउर हिर्मास अउर उनखे साथ माहीं रहँइ बाले सगले भाइन काहीं नबस्कार कहि दिहा।<sup>15</sup> अउर भाई फिलुलुगुस, अउर बहिनी यूलिया अउर नेर्युस अउर उनखे बहिनी काहीं, अउर भाई उलुम्पास अउर उनखे साथ माहीं रहँइ बाले सगले बिसुआसी भाइन काहीं हमार नबस्कार कहि दिहा।<sup>16</sup> अउर तूँ पंचे आपस माहीं बड़े प्रेम के साथ नबस्कार किहा, तौहई पंचन काहीं मसीह के सगली मन्डलिन के तरफ से नबस्कार।

#### पवलुस के आखिरी सलाह

<sup>17</sup> हे हमार भाई-बहिनिव, हम तौहसे बिनती करित हएन, कि तूँ पंचे मसीह के जउन सिच्छा पाया हय, ओखे बिरोध माहीं सिच्छा दइके, जउन मनई फूट डारत हें, अउर बिसुआसी भाई-बहिनिन काहीं बिसुआस से

भटकाय देत हें, उनहीं पहिचान ल्या करा, अउर उनसे दूरी रहा करा।

<sup>18</sup> काहेकि इआमेर के मनई हमरे पंचन के प्रभू यीसु मसीह के सेबा नहीं करँय, बलकिन अपने कमाई के खातिर सेबा करत हें; अउर मीठ-मीठ बातँय कइके भोले-भाले मनइन काहीं बिसुआस से भटकाय देत हें।<sup>19</sup> पय सगले बिसुआसी भाई-बहिनिन काहीं मालुम हय, कि तूँ पंचे प्रभू के हुकुमन काहीं मनते हया, एसे हम तौहरे पंचन के बारे माहीं खुब आनन्दित हएन, पय हमार इच्छा इआ हय, कि परमातिमा के नजर माहीं, जउने कामन काहीं तूँ पंचे निकहा समझते हया, उनहीं करँइ माहीं लगे रहा, अउर बुरे कामन से तूँ पंचे दूरी रहा।<sup>20</sup> अउर सान्ती देंइ बाले परमातिमा सइतान काहीं तौहरे गोडेन से हरबिन कुचरबाय देइहँय। अउर हम प्राथना करित हएन, कि हमरे पंचन के प्रभू यीसु मसीह के किरपा, तौहरे पंचन के ऊपर होत रहय।

<sup>21</sup> अउर तीमुथियुस जउन हमरे साथ सेबा करत हें, अउर हमरे यहूदी जाति के साथी लोग लूकियुस अउर यासोन अउर सोसिपत्रुस के तरफ से तौहई पंचन काहीं नबस्कार पहुँचय।<sup>22</sup> अउर हम तिरतियुस जउन पवलुस के साथ इआ चिट्टी काहीं लिख रहेन हय, हमहूँ प्रभू के नाम से तौहई पंचन काहीं नबस्कार कहित हएन।<sup>23</sup> भाई गयुस के तरफ से जउन हमार अउर मसीही मन्डली के सगले बिसुआसी भाई-बहिनिन के स्वागत-सत्कार करत हें, तौहई पंचन काहीं नबस्कार पहुँचय। अउर भाई इरास्तुस जउन सहर के भन्डारी हें, अउर भाई क्वारतुस के तौहई पंचन काहीं नबस्कार।<sup>24</sup> अउर हम प्राथना करित हएन, कि हमरे पंचन के प्रभू यीसु मसीह के किरपा तौहरे पंचन के ऊपर होत रहय। आमीन।

<sup>25</sup> अउर परमातिमा के बड़ाई होय, हम यीसु मसीह के बारे माहीं जउने खुसी के खबर काहीं तौहई पंचन काहीं बतायन हय, ओहिन के मुताबिक तौहई पंचन काहीं उँइन बिसुआस माहीं मजबूत कइ सकत हें, अउर परमातिमा के इआ रहस्यपूर्ण सत्य जुगन-जुगन से छिपा रहा हय।<sup>26</sup> पय अब ओही हमेसा रहँइ बाले परमातिमा के हुकुम से उनखे सँदेस बतामँइ बालेन के लिखी किताबन के द्वारा, सगले जातिअन के मनइन काहीं बताबा ग हय, कि जउने उनखे ऊपर बिसुआस कइके, ऊँ पंचे उनखर हुकुम मानँइ बाले होइ जाँय।<sup>27</sup> उँइन एकलउते बुद्धिमान परमातिमा के बड़ाई, यीसु मसीह के कीन कामन के द्वारा, जुग-जुग होत रहय। आमीन।

# 1 कुरिन्थियन

## इआ चिट्ठी के परिचय

पवलुस कुरिन्थुस सहर माहीं मसीही मन्डली स्थापित किहिन तय। ओमाहीं मसीही जीवन, अउर बिसुआस से सम्बन्धित खुब परेसानी पइदा होइ गई तय। ऊँ परेसानिन काहीं दूर करँइ के खातिर इआ पहिल चिट्ठी, कुरिन्थुस सहर के मसीही लोगन के खातिर यीसु मसीह के खास चेला पवलुस के द्वारा लिखी गे रही हय। उआ समय कुरिन्थुस सहर यूनान देस के अन्तररास्तीय सहर रहा हय। जउन रोमी सम्राज माहीं, अखाया प्रदेस के राजधानी रहा हय। उआ अपने बड़पार, सम्पन्नता, बयभवसाली संस्कृति अउर अनेकव धरमन के खातिर मसहूर रहा हय। पय उआ अपने खुब अनैतिकता के खातिर बदनाम रहा हय। पवलुस के खातिर खास चिन्ता के बात रही हय, मसीही मन्डली के बाँटबारा, अनैतिक काम, सारीरिक सम्बन्ध, अउर काज-बिआह के बारे माहीं, अउर सोच-बिचार से सम्बन्धित सबाल, मसीही मन्डली के रख रखाव के बारे माहीं, पबित्र आत्मा के दान के बारे माहीं, अउर मरेन म से पुनि जिन्दा होइ के बारे माहीं। पय पवलुस पबित्र आत्मा के अँगुआई से इआ बताबत हैं, कि खुसी के खबर के द्वारा, ई सबालन के हल कइसन होइ सकत हय। पाठ 13 माहीं पवलुस इआ बताबत हैं, कि परमातिमा के लोगन काहीं मिले बरदानन म से सबसे उत्तम बरदान प्रेम आय। हम अपना पंचन से इआ बिनती करित हएन, कि इआ चिट्ठी काहीं अपना पंचे जरूर पढ़ी, अउर अपने मसीही जीवन काहीं आत्मिक रूप से मजबूत बनाई।

रूप-रेखा :

भूमिका

मसीही मन्डली माहीं गुटबन्दी

नयतिकता अउर परिवारिक जीवन

मसीही, अउर मूरतिन के पुजारी

मसीही मन्डली के लोगन के जीवन अउर अराधना

यीसु मसीह अउर बिसुआसी लोगन के मरेन म से पुनि जिन्दा होब

यहूदिया प्रदेस के मसीही लोगन के खातिर दान

निजी बिसय अउर उपसंहार

## पवलुस के अभिबादन

1 हम पवलुस इआ चिट्ठी काहीं लिख रहेन हय, अउर परमातिमा हमहीं अपने इच्छा के मुताबिक यीसु मसीह के खास चेला होइ के खातिर नियुक्त किहिन हीं, इआ चिट्ठी हमरे तरफ से अउर भाई सोस्थिनेस के तरफ से, 2 परमातिमा के लोगन के उआ मन्डली काहीं मिलय, जउन कुरिन्थुस सहर माहीं ही, अरथात जे कोऊ मसीह यीसु माहीं जुड़ई के द्वारा पबित्र कीन गे हैं, अउर उनखर भक्त होइ के खातिर अलग कीन गे हैं; अउर ऊँ सगले बिसुआसी भाई-बहिनिन काहीं घलाय मिलय, जउन हमरे पंचन के अउर अपने प्रभू यीसु मसीह के नाम से हरेक जघा माहीं अराधना करत हैं। 3 हमरे पंचन के पिता परमातिमा अउर प्रभू यीसु मसीह के तरफ से तोहई पंचन काहीं किरपा अउर सान्ती मिलत रहय।

## यीसु मसीह के द्वारा आत्मिक असीसँय

4 हम तोंहरे बारे माहीं, अपने परमातिमा काहीं हमेसा धन्यवाद देइत हएन, काहेकि उनखर इआ किरपा मसीह यीसु के द्वारा तोंहरे ऊपर कीन गे ही, 5 अउर यीसु मसीह माहीं जुड़े रहँइ के कारन परमातिमा तोंहरे आत्मिक जीवन माहीं खुब मदत किहिन हीं, खास करके आपन बचन बतामँइ के खातिर हरेकमेर के सक्ती दिहिन हीं, अउर उनखे बातन काहीं समझँइ के खातिर हरेकमेर के ग्यान दिहिन हीं। 6 अउर मसीह के बारे माहीं जउन गबाही, हम तोहई पंचन काहीं बताए रहेन हय, उआ तोंहरे बीच माहीं सच्ची साबित भे ही। 7 अउर हमरे पंचन के प्रभू यीसु मसीह के दुसराय आमँइ के

गइल देखत रहँइ बाले, तोहई पंचन काहीं कउनव आत्मिक बरदान के कमी न होई, 8 अउर ऊँ तोहई आखिरी समय तक बिसुआस माहीं मजबूत रखिहँय, कि जउने तूँ पंचे, हमरे पंचन के प्रभू यीसु मसीह के द्वारा न्याय करँइ के दिन माहीं बेकसूर निकरा। 9 परमातिमा बिसुआस के काबिल हैं, अउर ऊँ तोहई पंचन काहीं अपने लड़िका अरथात हमरे पंचन के प्रभू यीसु मसीह के संगति माहीं बोलाइन हीं।

## मसीही मन्डली माहीं फूट परब

10 हे भाई-बहिनिव, हम अपने प्रभू यीसु मसीह के नाम से तोंहसे इआ बिनती करित हएन, कि तूँ पंचे सगले जने एकय बात कहा, अउर तोंहरे बीच माहीं फूट न परय, पय एक चित्त होइके अउर एकयमेर के उद्देश्य रखिके आपस माहीं मिले रहा। 11 काहेकि हे हमार भाई-बहिनिव, खलोए बहिनी के घर के मनई तोंहरे बारे माहीं हमहीं बताइन हीं, कि तूँ पंचे आपस माहीं लड़ाई-झगड़ा करते हया। 12 हमरे कहँइ के मतलब इआ आय, कि तोंहरे पंचन म से कोऊ त इआ कहत हय, कि "हम पवलुस के चेला आहैन", त कोऊ कहत हय, "हम अपुल्लोस के चेला आहैन", अउर कोऊ कहत हय, "हम पतरस के चेला आहैन", त कोऊ इआ कहत हय, कि "हम मसीह के चेला आहैन।" 13 त तूँ पंचे इआ बताबा, मसीह त अलग-अलग झुंडन माहीं नहीं बँटे आहीं? पवलुस त तोंहरे पंचन के खातिर क्रूस माहीं नहीं चढ़ाए गे आहीं? इआ कि तूँ पंचे पवलुस के नाम से बपतिस्मा त नहीं लिहा आय? 14 हम परमातिमा काहीं धन्यवाद देइत हएन, कि भाई क्रिस्पुस अउर भाई

† बिसुआस के काबिल † अरथात कैफा

गयुस के अलाबा, तोंहरे पंचन म से अउर कोहू काहीं हम बपतिस्मा नहीं दिहेन आय।<sup>15</sup> कि जउने कोऊ इआ न कहय, कि तोहई पंचन काहीं पवलुस के नाम से बपतिस्मा मिला हय।<sup>16</sup> अउर हाँ, हम भाई स्तिफनुस के घर के मनइन काहीं घलाय बपतिस्मा दिहेन हँय; इनखे अलाबा त हमहीं सुध नहीं आय, कि हम अउर कोहू काहीं बपतिस्मा दिहेन हय।<sup>17</sup> काहेकि मसीह हमहीं बपतिस्मा देई के खातिर नहीं, बलकिन आपन खुसी के खबर सुनामँड के खातिर पठइन हीं, अउर अगर हम मनइन के ग्यान के मुताबिक चतुराई से, उआ खुसी के खबर सुनाउब, त कहँव अइसा न होय, कि मसीह के क्रूस माहीं बलिदान होई के खुसी के खबर बेकार होइ जाय।

### क्रूस के सँदेस

<sup>18</sup> काहेकि मसीह के क्रूस माहीं बलिदान होई के खुसी के खबर, नास होई बाले मनइन के नजर माहीं मूर्खता आय, पय हमरे पंचन के खातिर जे कोऊ मुक्ती पाय रहेन हँय, उआ परमातिमा के सक्ती आय।<sup>19</sup> काहेकि पबित्र सास्त्र माहीं लिखा हय, कि

“जे कोऊ खुद काहीं ग्यानी मानत हँ, त उनखे ग्यान काहीं हम नास करब, अउर जे कोऊ खुद काहीं हुसिआर मानत हँ, त उनखे हुसिआरी काहीं हम तुच्छ कइ देब †।”

<sup>20</sup> त कहाँ हय ग्यानी? कहाँ हय मूसा के बिधान सिखामँड बाला? कहाँ हय इआ संसार के बिबादी? का परमातिमा इआ संसार के ग्यान काहीं मूर्खता नहीं ठहराइन? <sup>21</sup> अउर परमातिमा के ग्यान के मुताबिक जइसन ऊँ चाहत रहे हँय, जब मनई अपने ग्यान से उनहीं नहीं पहिचानिन, त परमातिमा काहीं इआ निकहा लाग, कि मसीह के क्रूस माहीं बलिदान होई के खुसी के खबर के प्रचार के द्वारा, जउने काहीं मनई मूर्खता समझत हँ, उहय खुसी के खबर के द्वारा बिसुआस करँइ बाले मनइन काहीं मुक्ती देय।<sup>22</sup> अउर यहूदी लोग त अचरज के काम देखँइ चाहत हँ, अउर यूनानी लोग ग्यान के खोज माहीं हँ।<sup>23</sup> पय हम पंचे त क्रूस माहीं चढ़ाए मसीह के प्रचार करित हएन, अउर यहूदी लोग इआ बिसुआस नहीं करँय, कि मसीह मनइन के पापन के माफी के खातिर क्रूस माहीं मरे हँ, एसे ऊँ पंचे इआ खुसी के खबर काहीं सुनिके क्रोधित होइ जात हँ, अउर गैरयहूदी लोग, इआ बात काहीं मूर्खता समझत हँ, कि मसीह मनइन के पापन के माफी के खातिर क्रूस माहीं मरे हँ।<sup>24</sup> पय जिनहीं परमातिमा चुनिन हीं, चाह ऊँ यहूदी लोग होय, चाह गैरयहूदी लोग, ऊँ सगलेन काहीं मुक्ती पामँड के खातिर मसीह, परमातिमा के सक्ती अउर ग्यान आहीं।<sup>25</sup> अउर कुछ मनई इआ कहत हँ, कि परमातिमा इआ काम कइके मुरखई के काम किहिन हीं, पय परमातिमा जउन कुछ किहिन हीं, उआ मनइन के कामन से जादा बुद्धिमानी के काम हय; अउर कुछ मनई कहत हँ, कि परमातिमा के निबलता, मनइन के सक्ती से खुब बढ़िके ही।

<sup>26</sup> हे भाई-बहिनिव परमातिमा तोहई कउने दसा माहीं चुनिन हीं, एखे बारे माहीं सोचा, ऊँ न त संसारिक रूप से खुब ग्यानी मनइन काहीं, अउर न खुब सक्तिसाली मनइन काहीं, अउर न खुब धनी परिवार के मनइन काहीं बोलाइन आय।<sup>27</sup> बलकिन संसार के लोगन के द्वारा मूरुख समझे जाँइ बाले मनइन काहीं, परमातिमा चुनि लिहिन हीं, कि जउने खुद काहीं ग्यानी समझँइ बाले मनइन काहीं, उनखे द्वारा लज्जित करँय, अउर परमातिमा संसार के लोगन के द्वारा निबल समझे जाँइ बाले मनइन काहीं चुनि लिहिन हीं, जउने खुद काहीं बलमान समझँय बाले मनइन काहीं लज्जित करँय।<sup>28</sup> अउर परमातिमा संसार से उनहिन काहीं जउन नीच समझे जात रहे हँय, अउर जिनसे मनई नफरत करत रहे हँय, अउर जिनखर कउनव महत्व नहीं रहा आय, चुनि लिहिन हीं, जउने उनहीं पंचन काहीं बेकार साबित करँय, जे कोऊ खुद काहीं खास समझत हँ <sup>29</sup> जउने परमातिमा के आँगे कउनव मनई घमन्ड न कए पाबय।<sup>30</sup> अउर उनहिन के द्वारा तूँ पंचे मसीह यीसु माहीं बने हया, जउन परमातिमा के तरफ से हमरे पंचन के खातिर ग्यान ठहरे हँय,

अउर उनहिन के द्वारा हम पंचे परमातिमा के नजर माहीं निरदोस साबित भएन हँय, पबित्र बनाए गएन हँय, अउर हरेक बुराइन से छुटकारा घलाय पाए हएन।<sup>31</sup> कि जउने उहयमेर होय जइसन पबित्र सास्त्र माहीं लिखा हय, कि “अगर कोऊ घमन्ड करँइ चाहय, त उआ प्रभू के काम के ऊपर घमन्ड करय।”

### क्रूस माहीं चढ़ाए गें मसीह के बारे माहीं सँदेस

**2** हे भाई-बहिनिव, जब हम तोंहरे लघे आए रहेन हँय, त परमातिमा के छिपी योजना काहीं बढ़ाय-चढ़ाइके अउर अपने चतुराई से तोहई नहीं बतायन।<sup>2</sup> काहेकि हम अपने मन माहीं इआ ठान लिहेन तय, कि तोंहरे पंचन के बीच माहीं रहत समय, हम यीसु मसीह, अउर क्रूस माहीं भे उनखर मउत के अलाबा अउर कउनव बात न करब।<sup>3</sup> अउर हम निबल बनिके, डर-भय के साथ अउर खुब काँपत-काँपत तोंहरे पंचन के साथ माहीं रहेन हँय।<sup>4</sup> अउर हमरे बात, अउर प्रचार माहीं मनइन के बुद्धी के मुताबिक लोभामँय बाली बातँय नहीं रही आहीं, बलकिन उनमा पबित्र आत्मा, अउर ओखे सक्ती के सबूत रहा हय।<sup>5</sup> एसे कि जउने तोंहार पंचन के बिसुआस मनइन के ग्यान के ऊपर निरभर न रहय, बलकिन परमातिमा के सक्ती के ऊपर निरभर रहय।

### परमातिमा के ग्यान

<sup>6</sup> त जे कोऊ समझदार हँ, उनहिन काहीं हम पंचे बुद्धी के बातँय सिखाइत हएन, अउर इआ बुद्धी इआ संसार के मनइन के बुद्धी न होय, अउर न त इआ संसार के नास होई बाले अधिकारिन के ग्यान आय।<sup>7</sup> पय परमातिमा के जउन योजना, हमसे पंचन से पहिले छिपी रही ही, अउर हमरे पंचन के महिमा के खातिर परमातिमा सनातन काल से निश्चित किहिन रहा हय, उहय ग्यान काहीं हम पंचे सुनाइत हएन <sup>8</sup> अउर उआ योजना काहीं, इआ संसार के अधिकारिन म से कोऊ नहीं जाने पाइन, काहेकि अगर ऊँ पंचे जनतँ, त महिमावान प्रभू काहीं क्रूस माहीं न चढ़उतँ।<sup>9</sup> पय पबित्र सास्त्र माहीं जइसन लिखा हय, कि

“जउने बातन काहीं कोहू कबहूँ नहीं देखिस, न सुनिस, अउर न अपने मनय माहीं सोचिस, उँइन बातन काहीं, परमातिमा अपने प्रेम करँइ बालेन के खातिर तइआर किहिन हीं।”

<sup>10</sup> पय परमातिमा अपने आत्मा के द्वारा, उँइन बातन काहीं हमरे पंचन के खातिर प्रगट किहिन हीं, काहेकि परमातिमा के आत्मा सगली बातन भर काहीं नहीं, बलकिन परमातिमा के छिपी बातन काहीं घलाय जानत हय।<sup>11</sup> अउर मनइन म से कोऊ एक दुसरे के मन के बातन काहीं नहीं जानय, पय केबल मनइन के भीतर रहँइ बाली आत्मा भर जानत ही, उहयमेर परमातिमा के बातन काहीं कोऊ नहीं जानय, केबल परमातिमा के आत्मय भर जानत हय।<sup>12</sup> अउर जइसन संसार के मनइन के सोच-बिचार हय, त उआमेर के सोच-बिचार बाली आत्मा हम पंचे नहीं पाए आहैन, बलकिन परमातिमा के आत्मा पाएन हँय, कि जउने ऊँ बातन काहीं समझी, जउने बातन काहीं परमातिमा हमहीं पंचन काहीं सँत-मेंत माहीं दिहिन हीं।<sup>13</sup> अउर उनहीं हम मनइन के ग्यान के द्वारा सिखाई बातन माहीं नहीं, बलकिन पबित्र आत्मा के द्वारा सिखाई आत्मिक बातन काहीं, आत्मिक सबदन के उपयोग कइके सुनाइत हएन।<sup>14</sup> अउर परमातिमा जउने सच्चाई काहीं प्रगट किहिन हीं, संसारिक मनई ओही सोइकार नहीं करय, काहेकि ऊँ ओखे खातिर निछला मुरखई के बातँय आहीं, अउर उआ उनहीं जानिव नहीं सकय, काहेकि ऊँ बातन काहीं केबल पबित्र आत्मय के द्वारा जाना जाय सकत हय।<sup>15</sup> अउर पबित्र आत्मा के मुताबिक चलय बाला मनई, सगली बातन के जाँच-परताल करत हय, पय ओखे बातन के जाँच-परताल कोऊ नहीं कए पाबय।<sup>16</sup> काहेकि पबित्र सास्त्र माहीं इआ लिखा हय, कि “प्रभू के मन काहीं को जानिस ही? कि उनहीं सलाह दइ सकय?” पय हमरे पंचन के भीतर मसीह के मन हय।

### मसीही मन्डली माहीं गुटबन्दी

3 हे भाई-बहिनिव, हम तोंहसे उआमेर बात नहीं कए पाएन, जइसन पबित्र आत्मा के मुताबिक चलय बाले मनइन से कीन जात ही, पय हमहीं उआमेर से बात करई क परा, जइसन संसारिक मनइन से अरथात उनसे कीन जात ही, जउन मसीह के बारे माहीं छोट बच्चन कि नाई अनजान होत हैं।<sup>2</sup> अउर जइसन छोट बच्चन काहीं दूध पिआबा जात हय, काहेकि ऊँ अनाज नहीं पचाय सकँय, उहयमेर हमहूँ तोहई पंचन काहीं सरल बातन काहीं सिखायन हय, काहेकि तूँ पंचे कठिन आत्मिक बातन काहीं, नहीं समझ सकत रहे आह्या; अउर सचमुच अबहिनव तक तोंहार पंचन के हालत उहयमेर ही।<sup>3</sup> काहेकि तूँ पंचे अबय तक अपने मन के बुरी इच्छन के मुताबिक जिअँई बाले मनइन कि नाई हया। अउर जब तूँ पंचे आपस माहीं डाह अउर लड़ाई-झगड़ा करते हया, त बताबा, का तूँ पंचे अबय तक अपने मन के बुरी इच्छन के मुताबिक जिअँई बाले मनइन कि नाई नहीं आह्या? अउर का तोंहार पंचन के चाल-चलन उनहिन कि नाई नहीं आय? <sup>4</sup> काहेकि जब तोंहरे पंचन म से कोऊ इआ कहत हय, कि “हम पवलुस के चेला आहैन” अउर कोऊ इआ कहत हय, कि “हम अपुल्लोस के चेला आहैन” त का तूँ पंचे अबिसुआसी मनइन कि नाई बरताव नहीं करते आह्या?

<sup>5</sup> पय अपुल्लोस अउर पवलुस के कउनव खास महत्व नहीं आय, हम पंचे त केबल सेबक आहैन जिनखे द्वारा तूँ पंचे यीसु मसीह के ऊपर बिसुआस किहे हया। हम पंचे त उहय काम किहेन हँय, जउने काम काहीं प्रभू हमरे पंचन म से हरेक जन काहीं सउँपिन हीं।<sup>6</sup> हम बीज बोएन, अपुल्लोस सींचिन अउर परमातिमा ओही बढ़ाइन।<sup>7</sup> एसे न त बोमँई बाले के कउनव महत्व आय, अउर न सींचँई बाले के, पय सगला महत्व परमातिमय के हय, काहेकि बढ़ामँय बाले उँइन आहीं।<sup>8</sup> बोमँई बाला अउर सींचँई बाला दोनव जने एक समान हैं; पय हरेक मनई अपने-अपने मेहनत के मुताबिक आपन मजूरी पाई।<sup>9</sup> काहेकि हम पंचे परमातिमा के साथ काम करई माहीं साझीदार हएन; अउर तूँ पंचे परमातिमा के खेत अउर उनखे घर कि नाई हया।

<sup>10</sup> अउर परमातिमा के जउन किरपा हमहीं मिली हय, ओहिन के द्वारा हम बुद्धिमान कारीगर कि नाई खुसी के खबर के नेव डारेन हय, अउर दूसर कोऊ बचन सिखामँई के द्वारा उआ नेव के ऊपर रद्दा रक्खँई के काम करत हय, पय हरेक मनई सतरक रहय, कि उआ कइसन रद्दा रक्खत हय।

<sup>11</sup> काहेकि जउन नेव डारी गे ही, उआ नेव खुद यीसु मसीह आहीं, अउर ओखे अलाबा अउर दूसर मेर के नेव कोऊ नहीं डार सकय।<sup>12</sup> पय अगर कोऊ इआ नेव के ऊपर, 'सोन-चाँदी के इआ कि खुब कीमती पथरन के इआ कि कठबा के इआ कि 'चार-उजार अउर बूसी के रद्दा रक्खी,<sup>13</sup> त जब यीसु मसीह दुबारा अइहँय, उआ दिना हरेक जन के काम सगले जनेन के आँग प्रगट होइ जई; अउर जब ऊँ अइहँय त उनखर तेज आगी के लपट कि नाई होई, अउर उहय आगी के द्वारा हरेक जन के काम जाँचा-परखा जई, कि उआ कइसन हय।<sup>14</sup> अउर जेखर काम उआ नेव माहीं टिका रही, त उआ मनई जरूर मजूरी पाई।<sup>15</sup> अउर अगर कोहू के काम उआ आगी माहीं जर जई, त उआ मनई नुकसान उठाई; पय उआ खुद उआमेर से बँचे जई, जइसन कोऊ आगी के बीच से जाइके जरत-जरत बँचे जात हय।

<sup>16</sup> अउर का तूँ पंचे इआ नहीं जनते आह्या, कि तूँ सगले जने परमातिमा के मन्दिर आह्या; अउर परमातिमा के आत्मा तोंहरे भीतर निबास करत हय।<sup>17</sup> अउर अगर कोऊ परमातिमा के मन्दिर काहीं नास करी, त परमातिमा ओहू काहीं नास कइ देइहँय; काहेकि परमातिमा के मन्दिर पबित्र हय, अउर उआ मन्दिर तूँ पंचे खुद आह्या।

† सोन-चाँदी अउर खुब कीमती पथरा आगी से न जरँय बाली चीजँय आहीं, अउर ई परमातिमा के बारे माहीं सही सिच्छा के इसारा करती हई †† कठबा, चारा-उजार अउर बूसी आगी माहीं जरँय बाली चीजँय आहीं, अउर ई परमातिमा के बारे माहीं गलत सिच्छा के इसारा करती हई

<sup>18</sup> अउर कउनव मनई खुद काहीं धोखा न देय, अगर तोंहरे पंचन म से कउनव मनई खुद काहीं इआ संसार के ग्यानी समझत हय, त उआ मूरुख बनय, कि जउने ग्यानी बन जाय।<sup>19</sup> काहेकि इआ संसार के ग्यान परमातिमा के नजर माहीं मूरुखता हय, जइसन कि पबित्र सास्त्र माहीं इआ लिखा हय, कि “परमातिमा ग्यानी मनइन काहीं उनहिन के हुसिआरी माहीं फँसाय देत हैं।”<sup>20</sup> अउर इहव लिखा हय, कि “खुद काहीं ग्यानी समझँय बाले मनइन के बिचारन काहीं, प्रभू जानत हैं, कि ऊँ बेकार हैं।”<sup>21</sup> एसे नास होंइ बाले मनइन के ऊपर कोऊ घमन्ड न करय, काहेकि सब कुछ तोंहारय पंचन के आय,<sup>22</sup> चाह पवलुस होय, चाह अपुल्लोस होय, चाह पतरस होय, चाह संसार के सगली चीजँय होय, चाह तूँ पंचे जिन्दा रहा, चाह मरिजा, चाह इआ समय के बातँय होय, अउर चाह भबिस्य के बातँय होय, सब कुछ तोंहरे पंचन के भलाइन के खातिर आय।<sup>23</sup> अउर तूँ पंचे मसीह के आह्या, अउर मसीह परमातिमा के आहीं।

### मसीह के सेबक

4 परमातिमा के जउन बातँय मनइन से छिपी रही हँय, उँइन बातन के भन्डारी, अउर मसीह के सेबक हम पंचे आहैन, इआ बात मनइन काहीं समझँय चाही।<sup>2</sup> पय जेही भन्डारी के काम सउँपा जात हय, त ओमाहीं इआ बात देखी जात ही, कि उआ इमानदार होय।<sup>3</sup> हमहीं एखर एक्कव चिन्ता नहीं आय, कि तूँ पंचे हमार न्याय करा, इआ कि मनइन के कउनव अदालत। अउर वास्तव माहीं हम खुदव आपन न्याय नहीं करी।<sup>4</sup> काहेकि हमार मन हमहीं कउनव बात माहीं दोसी नहीं ठहराबय, तऊ हम एसे निरदोस नहीं ठहरी, काहेकि हमार जाँच-परताल करई बाले केबल प्रभू आहीं।<sup>5</sup> एसे जब तक प्रभू न आमँय, त समय से पहिले कउनव बात के न्याय न किहा, काहेकि जब प्रभू अइहँय त आँधिआर माहीं छिपी बातन काहीं उँजिआर माहीं देखइहँय, अउर मनइन के मन के उद्देसन काहीं घलाय प्रगट करिहँय। तब परमातिमा के तरफ से हरेक जन के उचित बड़ाई होई।

<sup>6</sup> हे भाई-बहिनिव, हम ई बातन माहीं खुद के, अउर अपुल्लोस के उदाहरन दइके, तोंहसे जउन चरचा किहेन हय, त उआ उदाहरन के रूप माहीं आय किहेन हँय, कि जउने तूँ पंचे हमसे पंचन से सिखिके, पबित्र सास्त्र माहीं लिखी बातन से जादा आँग न बढ़ा, अउर एक जने के पच्छ लइके, अउर दुसरे मनई के बिरोध कइके, अहंकार से फूल न जा।<sup>7</sup> अउर को कहत हय, कि तूँ पंचे दुसरे मनई से बढ़िके हया? अउर तोंहरे लघे अइसन कउन चीज ही, जउने काहीं तूँ पंचे परमातिमा से नहीं पाए आह्या? अउर अगर सब कुछ, तोहई परमातिमय से मिला हय, त पुनि तूँ अइसन घमन्ड काहे करते हया, कि हम पंचे खुदय पाएन हँय?

<sup>8</sup> अउर तूँ पंचे इआ सोचते हया, कि हमहीं कउनव चीज के कमी नहीं आय, अउर हम पंचे धनी होइ गएन हँय, बाह भाई बाह! तूँ पंचे त बिना हमरेन राजा बन गया हय। पय इआ केतनी निकही बात होत, जब तूँ पंचे सचमुच राजा बन जात्या, कि जउने हमहूँ पंचे घलाय तोंहरे साथ राज करित।<sup>9</sup> हमहीं त अइसन लागत हय, कि हमहीं पंचन काहीं जउन यीसु मसीह के खास चेला आहैन, परमातिमा ऊँ मनइन कि नाई आखिरी जघा माहीं रक्खिन हीं, जिनहीं मउत के सजा पामँई के हुकुम होइ जात ही; काहेकि हम पंचे संसार के मनइन, अउर स्वरागदूतन के नजर माहीं, तमासा बन गएन हँय।<sup>10</sup> हम पंचे मसीह के बारे माहीं प्रचार करित हएन, एसे मनई हमहीं पंचन काहीं निरबुद्धी मानत हैं, पय हाँ, भाइव, तूँ पंचे त इआ घमन्ड करते हया, कि हम पंचे मसीह के बारे माहीं खुब जानित हएन, हमहीं पंचन काहीं मनई कमजोर मानत हैं, पय तूँ पंचे खुद काहीं सक्तिसाली मनते हया, मनई तोंहार पंचन के मान-सम्मान करत हैं, अउर हम पंचे अपमान सहित हएन।<sup>11</sup> अउर हम पंचे अबय तक भूँख-पिआस सहित हएन, फटे-पुरान ओन्हा पहिरित हएन, मार सहित हएन, अउर इहाँ-उहाँ मारे-मारे फिरित हएन।<sup>12</sup> अउर हम पंचे खुद मेहनत कइके काम करित हएन, मनई हमार पंचन के बुराई करत हैं, पय हम पंचे उनहीं आसिरबाद देइत हएन; ऊँ पंचे

हमहीं सताबत हैं, अउर हम पंचे सहित हएन।<sup>13</sup> ऊँ पंचे हमहीं पंचन काहीं बदनाम करत हैं, अउर हम पंचे उनसे प्रेम से बातँय करित हएन। अउर हम पंचे आजव तक संसार के कूरा-कचड़ा कि नाई माने जइत हएन।

### पवलस के चेतउनी

<sup>14</sup> ई बातन काहीं हम तोहई पंचन काहीं सरमिन्दा करँइ के खातिर न होय लिखित हएन, पय अपने पियार लड़िका कि नाई जानिके, ई बातन के द्वारा तोहई समझाइत हएन।<sup>15</sup> काहेकि अगर तोहई, मसीह के बारे माहीं सिखामँइ बाले चाह हज्जारन मनई घलाय होतें, तऊ तोंहार पंचन के आत्मिक पिता खुब जने नहिं आहीं; पय मसीह यीसु के बारे माहीं खुसी के खबर सुनामँइ के कारन, हम तोंहार पंचन के आत्मिक पिता कहाएन।<sup>16</sup> एसे हम तोंहसे इआ बिनती करित हएन, कि तोंहार चाल-चलन हमरे कि नाई होय।<sup>17</sup> एसे हम तीमुथियुस काहीं, तोंहरे लघे पठएन हँय, जउन प्रभू माहीं बिसुआस करँइ के कारन, हमार पियार अउर बिसुआस के काबिल लड़िका आहीं। अउर हम हरेक जघा माहीं, अउर हरेक मसीही मन्डली माहीं मसीह के बारे माहीं जउन उपदेस देइत हएन, ऊँ उनखे बारे माहीं तोहई पंचन काहीं सुध देबइहँय।<sup>18</sup> पय तोंहरे पंचन म से कुछ जने घमन्ड से अइसन फूलिगे हँय, कि जइसन हम तोंहरे लघे कबहूँ अउबय न करब।<sup>19</sup> पय अगर प्रभू के मरजी होई, त हम तोंहरे लघे हरबिन अउब, अउर जउन घमन्ड से फूले हैं, त उनखे बातन भर काहीं नहिं, पय उनखे सक्तिव काहीं देख लेब।<sup>20</sup> काहेकि परमातिमा के राज माहीं रहँइ के खातिर केबल बातँय भर करब जरूरी नहिं आय, पय परमातिमा के सक्ती हमरे पंचन के जीवन माहीं काम करँइ चाही।<sup>21</sup> अउर तूँ पंचे इआ बताबा, कि का चहते हया? का हम तोहई डॉटँइ के खातिर डंडा लइके तोंहरे लघे अई, इआ कि प्रेम अउर नम्र सुभाव के साथ अई?

### मसीही मन्डली माहीं अनुचित काम

**5** हम पंचे इहाँ तक सुने हएन, कि तोंहरे बीच माहीं ब्यभिचार होत हय, अउर अइसन ब्यभिचार होत हय, कि उआमेर से अबिसुआसी लोगन के बीच माहीं घलाय नहिं होय, काहेकि कोऊ-कोऊ अइसन हैं, कि ऊँ अपने मइभा महतारी के साथ ब्यभिचार करत हैं,<sup>2</sup> बाह भाई बाह, एखे बादव तूँ पंचे घमन्ड से फूले हया, पय का एखे बारे माहीं तोहई पंचन काहीं पचिताँय क न चाही? अउर जे कोऊ अइसन अनुचित काम करत हय, त ओही अपने बीच से बहिरे न निकार देंइ चाही?<sup>3</sup> जबकि हम सारीरिक रूप से त तोंहरे साथ नहिं आहने, तऊ आत्मिक रूप से तोंहरे लघे हाजिर हएन, अउर मानि ल्या, कि हम उहाँ हाजिर रहिके, जे कोऊ अइसन काम किहिन हीं, उनखे बारे माहीं आपन निरनय सुनाय चुकेन हय।<sup>4</sup> जब तूँ पंचे, अउर आत्मिक रूप से हमहूँ घलाय, प्रभू यीसु के सक्ती के साथ एकट्ठा होब, त अइसन मनई काहीं प्रभू यीसु के नाम से<sup>5</sup> ओखे पापी सुभाव काहीं नास करँइ के खातिर 'सइतान काहीं सउँप दीन जाय, कि जउने प्रभू यीसु मसीह के दुसराय आमँय के दिन ओखर आत्मा नास होई से बँचि जाय।

<sup>6</sup> अउर तूँ पंचे, जउन घमन्ड से फूले हया, त इआ उचित न होय; का तूँ पंचे इआ नहिं जनते आह्या, कि पिसान माहीं थोरी क खमीर मिलाए से, सगला माड़ा पिसान खमीर कि नाई आमिल होइ जात हय।<sup>7</sup> त तूँ पंचे पुरान खमीर, अरथात उआ बुरे मनई काहीं निकारिके खुद काहीं पबित्र करा, कि जउने माड़े नबा पिसान कि नाई बन जा; अउर तूँ पंचे फसह नाम के तेउहार माहीं खाई जाँय बाली, बिना खमीर मिललाई रोटी कि नाई हया। काहेकि हमहीं पंचन काहीं पबित्र करँइ के खातिर मसीह, फसह के मेम्ना के रूप माहीं बलिदान होइगे हँय।<sup>8</sup> एसे आबा, हम पंचे आपन फसह के तेउहार, बुराई अउर दुस्तता से भरे पुरान खमीर के रोटी से न मनाई, बलकिन सिधाई अउर सच्चाई से भरी, बिना खमीर के रोटी से मनाई।

† अरथात ओही मसीही मन्डली से बहिरे निकार दीन जाय

<sup>9</sup> हम अपने चिट्ठी माहीं, तोहई पंचन काहीं लिखेन हँय, कि ब्यभिचार करँइ बालेन के संगति न किहा।<sup>10</sup> अउर हम इआ न होय लिखेन हँय, कि तूँ पंचे इआ संसार के ब्यभिचार करँइ बालेन, इआ कि लालच करँइ बालेन, इआ कि दुसरेन के साथ अत्याचार करँइ बालेन, इआ कि मूरतिन के पूजा करँइ बालेन, के बेलकुल संगति न किहा; काहेकि इआ हालत माहीं त तोहई पंचन काहीं इआ संसार से निकर जाँइ क परी।<sup>11</sup> पय हमरे कहँय के मतलब इआ आय, कि अगर कोऊ खुद काहीं बिसुआसी भाई कहिके, ब्यभिचार करँइ बाला, इआ कि लालच करँइ बाला, इआ कि मूरतिन के पूजा करँइ बाला, इआ कि गारी देंइ बाला, इआ कि दारू पिअँइ बाला, इआ कि दुसरे के साथ अत्याचार करँइ बाला होय, त ओखर संगति न किहा; बलकिन अइसन मनई के साथ माहीं बइठिके खानव तक न खया।<sup>12</sup> अउर जे कोऊ मसीही मन्डली के बहिरे के आहीं, अरथात अबिसुआसी आहीं, त उनखर न्याय करँइ के हमार कउनव मतलब नहिं आय, पय तोहई पंचन काहीं उनखर न्याय करँइ क चाही, जउन मसीही मन्डली के भीतर के अरथात बिसुआसी आहीं<sup>13</sup> पय मसीही मन्डली के बहिरे बाले मनइन के न्याय परमातिमा करिहँय, एसे तूँ पंचे उआ कुकमी काहीं अपने बीच म से निकारि द्या †।

### आपस के बिबादन के निपटारा

**6** अउर का तोंहरे पंचन म से कोहू के अइसन हिम्मत ही, कि जब तोंहार पंचन के आपस माहीं लड़ाई-झगड़ा होय, त फँइसला करामँय के खातिर पबित्र मनइन अरथात बिसुआसी मनइन के लघे न जाइके, अबिसुआसी लोगन के लघे जाय।<sup>2</sup> का तूँ पंचे इआ नहिं जनते आह्या, कि बिसुआसी लोग संसार के मनइन के न्याय करिहँय? अउर जब तोहई पंचन काहीं संसार के मनइन के न्याय करँय क हय, त तूँ पंचे छोट-छोट झगड़न के निपटारा करँइ के काबिल नहिं आह्या का?<sup>3</sup> अउर का तूँ पंचे इआ नहिं जनते आह्या, कि हम पंचे स्वरगदूतन के घलाय न्याय करब? त अगर अइसन हय, त का संसारिक बातन के निपटारा न करी।<sup>4</sup> अउर अगर तोहई पंचन काहीं संसारिक बातन के निपटारा करँय क होय, त का निपटारा करामँइ के खातिर उनहिन काहीं बोलइहा, जिनखर मसीही मन्डली माहीं कउनव कीमतय नहिं आय।<sup>5</sup> हम तोहई पंचन काहीं लज्जित करँइ के खातिर इआ बात कहित हएन, कि का वास्तव माहीं तोंहरे बीच माहीं एक्कव जने बुद्धिमान नहिं आहीं, कि जउन अपने बिसुआसी भाई-बहिनिन के झगड़न के निपटारा कइ सकँय?<sup>6</sup> अउर तोंहरे पंचन म से बिसुआसी भाई-बहिनी लोग आपस माहीं मुकदमा करत हैं, अउर उहव अबिसुआसी मनइन के आँगे।

<sup>7</sup> पय वास्तव माहीं तोंहरे जीवन माहीं सबसे बड़ा दोस त इआ हय, कि तूँ पंचे आपस माहीं लड़ाई-झगड़ा कइके मुकदमा लइते हया। अन्याय काहे नहिं सहि लेते आह्या? अउर खुद के नुकसान काहे नहिं सहि लेते आह्या?<sup>8</sup> पय तूँ पंचे खुदय अन्याय करते हया, अउर नुकसान पहुँचते हया, उहव अपने मसीही भाई-बहिनिन के साथ।<sup>9</sup> अउर का तूँ पंचे इआ नहिं जनते आह्या, कि अन्याय करँइ बाले मनई परमातिमा के राज के बारिसदार न होइहँय? तूँ पंचे धोखा न खया, काहेकि ब्यभिचार करँइ बाले, मूरतिन के पूजा करँइ बाले, अपने मेहेरिआ के अलाबा दुसरे मेहेरिआन के साथ सारीरिक सम्बन्ध बनामँइ बाले, लुच्वई करँइ बाले, मंसेरुअय-मंसेरुआ आपस माहीं सारीरिक सम्बन्ध बनामँइ बाले,<sup>10</sup> चोरी करँइ बाले, लालची, दारू पिअँइ बाले, गारी देंइ बाले, अउर दुसरेन के साथ अत्याचार करँइ बाले, परमातिमा के राज के बारिसदार न होइहँय।<sup>11</sup> अउर तोंहरे पंचन म से कुछ जने इहडमेर के पाप करँइ बाले रहे हँय, पय अब उन पापन से तोंहई पंचन काहीं धोय दीन ग हय, अउर पबित्र कइ दीन ग हय, अउर तोंहई पंचन काहीं परमातिमा के सेवा के खातिर सँउप दीन ग हय, अउर प्रभू यीसु

†† 5:13 ब्यब 13:5; 17:7



मसीह के नाम अउर हमरे पंचन के परमातिमा के आत्मा के द्वारा, परमातिमा के नजर माहीं निरदोस साबित कइ दीन ग हय।

### पाप से दूर रहा अउर अपने देह के द्वारा परमातिमा के महिमा करा

12 तूँ पंचे कहते हया, कि हमहीं पंचन काहीं सब कुछ करँइ के अनुमति हय, पय सगली बातन से तौहई फायदा न होई; अउर हाँ, हमहीं पंचन काहीं सब कुछ करँइ के अनुमति त हय, पय हम कउनव चीज के गुलाम न बनब।  
13 अउर तूँ पंचे इआ कहते हया, कि “खाना पेट के खातिर आय, अउर पेट खाना के खातिर आय” पय परमातिमा खाना अउर पेट दोनव काहीं नास कइ देइहँय। अउर हमार पंचन के देह ब्यभिचार करँइ के खातिर नहीं, प्रभू के महिमा के खातिर बनाई गे ही, अउर प्रभू हमरे देह के भलाई के खातिर हँ।  
14 अउर परमातिमा अपने सक्ती से जइसन प्रभू काहीं, मरे के बाद जिन्दा कइ दिहिन हीं, उहयमेर हमहूँ पंचन काहीं घलाय मरे म से जिन्दा कइ देइहँय।  
15 अउर का तूँ पंचे इआ नहीं जनते आह्या, कि तौहार पंचन के देह मसीह के देह के अंग आहीं? त का हम पंचे मसीह के अंग लइके बेस्या के अंग बनाई? बेलकुल नहीं।  
16 का तूँ पंचे नहीं जनते आह्या, कि जे कोऊ बेस्यन से सारीरिक सम्बन्ध बनाबत हय, त उआ ओखे साथ एकय देह होइ जात हय? काहेकि पबित्र सास्त्र माहीं लिखा हय, कि “ऊँ दोनव जने एकय देह होइ जइहँय।”  
17 अउर जे कोऊ प्रभू के साथ जुड़ा रहत हय, त उआ उनखे साथ मिलिके एकय आत्मा होइ जात हय।  
18 पय तूँ पंचे ब्यभिचार करँइ से बचे रहा। काहेकि एखे अलाबा जेतने अउर पाप मनई करत हय, त देह के बहिरे करत हय, पय ब्यभिचार करँइ बाला मनई अपने देह के बिरोध माहीं पाप करत हय।  
19 का तूँ पंचे इआ नहीं जनते आह्या, कि तौहार पंचन के देह पबित्र आत्मा के मन्दिर आय, अउर उआ तौहरे देह माहीं निबास करत हय, अउर उआ तोहई पंचन काहीं परमातिमा के तरफ से मिला हय; अउर खुद के जीवन माहीं तौहार पंचन के कउनव हक्क नहिँ आय।  
20 काहेकि परमातिमा दाम चुकाइके तोहई पंचन काहीं खरीद लिहिन हीं, एसे तूँ पंचे अपने देह के द्वारा परमातिमा के बड़ाई करा।

### काजे के बारे माहीं सलाह

7 अउर अपने चिठी माहीं तूँ पंचे जउन लिखे रहे हया, कि का कउनव मनई काहीं मेहेरिआ से सारीरिक सम्बन्ध बनामँइ चाही, कि नहीं? त ऊँ बातन के बारे माहीं हमार कहब इआ हय, कि 2 तौहरे बीच माहीं ब्यभिचार न होय, इआ कारन से हरेक मंसेरुआ के एकठे मेहेरिआ होय, अउर हरेक मेहेरिआ के एकठे मंसेरुआ होय।  
3 मंसेरुआ अपने मेहेरिआ के हक्क पूर करय, अउर मेहेरिआ अपने मंसेरुआ के हक्क पूर करय।  
4 काहेकि अपने देह माहीं मेहेरिआ के हक्क नहिँ आय, पय ओखे मंसेरुआ के हक्क हय; उहयमेर अपने देह माहीं मंसेरुआ के घलाय हक्क नहिँ आय, पय ओखे मेहेरिआ के हक्क हय।  
5 अउर तूँ पंचे एक दुसरे से अलग न रहा; पय एक दुसरे के सलाह-मसबिरा से कुछ समय के खातिर अलग रहि सकते हया, कि जउने प्राथना करँइ के खातिर तौहई पंचन काहीं जादा मोका मिलय, अउर पुनि एकय साथ माहीं रहा; एसे कि कहेँव अलग रहँइ के समय माहीं सइतान तोहई पंचन काहीं पाप माहीं न गिराय देय।  
6 पय हम जउन इआ बात कहित हएन, त हुकुम न होय दइ रहेन हय, बलकिन सलाह दइ रहेन हय।  
7 अउर हम इआ चाहित हएन, कि सगले मनई हमरे कि नाई बिना काज किहे रहँय; पय हरेक मनई काहीं परमातिमा के तरफ से अलग-अलग खास बरदान मिले हँय; कोहू काहीं काज कइके अउर कोहू काहीं बिना काज किहे जीवन बितामँइ के बरदान मिला हय।

8 जिनखर काज नहीं भ आय, अउर जउन बिधबा हई, त उनखे बारे माहीं हम इआ कहित हएन, कि उनाहीं पंचन काहीं हमरे कि नाई बिना काज किहे रहब निकहा हय।  
9 पय अगर ऊँ पंचे अपने देह के इच्छन काहीं अपने काबू माहीं नहीं कइ सकँय, त ऊँ पंचे काज कइ लेंय, काहेकि सारीरिक सम्बन्ध

बनामँइ के बड़ी इच्छा रखिके जिए से, उनाहीं पंचन काहीं काज कइ लेब नीक हय।

10 †अउर जिनखर काज होइगा हय, त उनाहीं हम नहीं, बलकिन प्रभू हुकुम देत हँ, कि मेहेरिआ अपने मंसेरुआ काहीं न छोड़य; 11 पय अगर छोड़ि देय, त दूसर काज न करय; बलकिन अपने मंसेरुआ से दुबारा मेल-मिलाप कइ लेय, अउर मंसेरुआ अपने मेहेरिआ काहीं न छोड़य।

12 अउर दुसरे मनइन से प्रभू नहीं, बलकिन हमहिन कहित हएन, कि अगर कउनव बिसुआसी भाई के मेहेरिआ, प्रभू यीसु मसीह के ऊपर बिसुआस न करत होय, पय ओखे साथ माहीं रहँइ के खातिर राजी होय, त उआ ओही न छोड़य।  
13 उहयमेर जउने मेहेरिआ के मंसेरुआ अगर बिसुआस न करत होय, पय ओखे साथ माहीं रहँइ के खातिर राजी होय; त उआ अपने मंसेरुआ काहीं न छोड़य।  
14 काहेकि अबिसुआसी मंसेरुआ अपने मेहेरिआ के कारन पबित्र ठहरत हय, अउर इहइमेर अबिसुआसी मेहेरिआ अपने मंसेरुआ के कारन पबित्र ठहरत ही, नहीं त तौहार पंचन के लड़िका-बच्चा असुद्ध होतें, पय अब त ऊँ पंचे पबित्र हँ।  
15 एखे बादव अगर जउन मंसेरुआ बिसुआस नहीं करय, उआ अगर अपने बिसुआसी मेहेरिआ काहीं छोड़इ चाहत हय, त छोड़इ घा, काहेकि इआ हालत माहीं कउनव भाई इआ कि बहिनी कउनव मेर के बन्धन माहीं नहिँ आहीं, पय परमातिमा हमहीं पंचन काहीं मिल-जुलिके रहँइ के खातिर बोलाइन हीं।  
16 अउर हे मेहेरिआ, का तूँ पंचे इआ नहीं जनते आह्या, कि होइ सकत हय तूँ पंचे अपने-अपने मंसेरुआ के मुक्ती पामँइ के कारन बन जा? अउर हे मंसेरुआ, का तुहूँ पंचे इआ नहीं जनते आह्या, कि होइ सकत हय तुहूँ पंचे अपने-अपने मेहेरिआ के मुक्ती पामँइ के कारन बन जा?

### परमातिमा के द्वारा बोलाए जाँइ के मुताबिक जीवन बिताबा

17 अउर प्रभू जेही जइसन जीवन दिहिन हीं, अउर परमातिमा जेही जउने परिस्थित से चुनि लिहिन हीं, त ऊँ पंचे उहय परिस्थित माहीं रहिके जीवन बितामँइ; अउर हम सगली मसीही मन्डलिन के खातिर इहय हुकुम देइत हएन।  
18 अउर अगर परमातिमा कोहू काहीं उआ हालत से बोलाइन हीं, जब ओखर खतना होइगा रहा हय, त उआ बिना खतना बाला न बनय, अउर जे कोऊ बिना खतना के बोलाबा ग हय, त उआ खतना न करबाबय।  
19 काहेकि न त खतना करामँइ बालेन के कउनव महत्व आय, अउर न त बिना खतना बालेन के; पय परमातिमा के हुकुमन के पालन करब सगलेन से खास बात आय।  
20 अउर हरेक मनई काहीं जउने परिस्थित माहीं बोलाबा ग रहा हय, उआ उहय परिस्थित माहीं रहय।  
21 अउर अगर तोहई †दास के परिस्थित माहीं बोलाबा ग होय, त फिकिर न किहा; पय अगर स्वतंत्र होइ सकते हया, त मोके के फायदा उठाबा।  
22 काहेकि जे कोऊ दास के परिस्थित माहीं प्रभू माहीं बोलाबा ग हय, त उआ प्रभू के द्वारा स्वतंत्र कीन आय; उहयमेर जउने काहीं स्वतंत्र परिस्थित से बोलाबा ग हय, त उआ मसीह के दास आय।  
23 अउर परमातिमा दाम चुकाइके, तौहई पंचन काहीं खरीद लिहिन हीं, एसे तूँ पंचे मनइन के †दास न बना।  
24 अउर हे भाई-बहिनिव, हरेक मनई जउने परिस्थित माहीं बोलाबा ग होय, उआ, उहय परिस्थित माहीं रहिके परमातिमा के महिमा करय।

### काज करँइ के बारे माहीं सिच्छा

25 अउर जिनखर काज नहीं भ आय, उनखे बारे माहीं हमहीं प्रभू से कउनव हुकुम नहीं मिला आय, पय प्रभू के जउन किरपा हमहीं मिली हय, ओहिन के द्वारा बिसुआस के काबिल होइ के कारन, हम इआ सलाह देइत हएन।  
26 अउर इआ समय जउन दुख-मुसीबत मनइन काहीं सहेँय क परत हय, त इनखे कारन हमरे समझ से त इआ निकहा हय, कि कउनव मनई जउने परिस्थित माहीं हय, उआ उहय परिस्थित माहीं रहय।  
27 अउर अगर

† 7:10मत्ती 5:32; 19:9; मर 10:11,12; लूका 16:18 †† गुलामी के हालत माहीं ‡ अरथात गुलाम

तोंहरे मेहेरिआ हय, त ओही छोंडूँ के कोसिस न किहा; अउर अगर तोंहरे मेहेरिआ नहिं आय, त मेहेरिआ ढूँडूँ के कोसिस न किहा।<sup>28</sup> पय अगर तूँ पंचे काजव कइ लेते हया, त उआ पाप न होय; अउर अगर कउनव कुमारी बिटिया आपन काज करत ही, त उआ कउनव पाप न होय; पय अइसन मनइन काहीं दुख-मुसीबत सहँय क परी, पय हम उनहीं इनसे बचामँड चाहित हएन।<sup>29</sup> अउर हे भाई-बहिनिव, हम इआ कहित हएन, कि समय बेलकुल कम कीन ग हय, एसे हम इआ चाहित हएन, कि जिनखे मेहेरिआ होय, त ऊँ पंचे अइसन रहँय, कि जइसन उनखे मेहेरिआ नहिं आय;<sup>30</sup> अउर दुख-मुसीबत सहँड बाले अइसन रहँय, कि जइसन उनहीं कउनव दुख-मुसीबत हइअय नहिं आय; अउर खुसी मनामँड बाले अइसन रहँय, कि जइसन ऊँ पंचे कबहूँ खुसी मनउबय नहीं भें; अउर कउनव चीजन काहीं खरीदँय बाले अइसन रहँय, कि जइसन उनखे लघे कुछ हइअय नहिं आय।<sup>31</sup> अउर इआ संसार के चीजन काहीं उपयोग करँड बाले अइसन रहँय, कि जइसन उनखे जीवन माहीं ई चीजन के कउनव महत्व हइअय नहिं आय, काहेकि इआ संसार अउर एखर सगली चीजँय नास होइ बाली आहीं।

<sup>32</sup> एसे हम इआ चाहित हएन, कि तूँ पंचे संसारिक बातन माहीं जादा मन न लगाबा, काहेकि जउन मनई काज नहीं करत आय, उआ प्रभू के बातन के बारे माहीं सोचत रहत हय, कि हम प्रभू काहीं कइसन खुस रक्खी।<sup>33</sup> पय जउन मनई काज कइ लेत हय, त उआ संसारिक बातन के बारे माहीं फिकिर करत रहत हय, कि हम अपने मेहेरिआ काहीं कइसन खुस रक्खी।<sup>34</sup> अउर जउन मेहेरिआ आपन काज कइ लेत ही, अउर जउन आपन काज नहीं करय, ऊँ दोनव माहीं फरक हय। काहेकि जउन आपन काज नहीं करय, त उआ प्रभू के बातन के बारे माहीं फिकिर करत रहत ही, कि हम अपने देह अउर आत्मा दोनव माहीं कइसन पबित्र रही, पय जउन आपन काज करत ही, त उआ संसारिक बातन के बारे माहीं फिकिर करत रहत ही, कि हम अपने मंसेरुआ काहीं कइसन खुस रक्खी।<sup>35</sup> अउर इआ बात हम तोंहरे भलाइन के खातिर कहित हएन, पय तोहई पंचन काहीं फसामँड के खातिर न होय कहित हएन, एसे तोहई जइसन उचित लागय उहयमेर करा, अउर तूँ पंचे एक मन होइके प्रभू के सेबा माहीं लगे रहा।

<sup>36</sup> अउर अगर कोहू के लघे जबान बिटिया होय, अउर ओखर उमिर जादा होइगे होय, अउर ओखर काज करब जरूरी होय, त अगर ओखे बाप काहीं अइसन लागत होय, कि हम ओखर काज न कइके अपने बिटिया के साथ उचित नहीं कइ रहेंन आय, त ओखर काज कइ देय; अउर एमाहीं कउनव पाप नहिं आय।<sup>37</sup> पय जे कोऊ मन के खुब पक्का हय, अउर जेखे ऊपर कोहू के दबाव नहिं आय, अउर अगर उआ अपने मन माहीं बेलकुल ठान लिहिस ही, कि अपने कुमारी बिटिआ के काज न करब, त उआ निकहा करत हय।<sup>38</sup> एसे जे कोऊ अपने कुमारी बिटिया के काज कइ देत हय, त निकहा करत हय, अउर जे कोऊ काज नहीं करय, त उआ अउरव निकहा करत हय।

<sup>39</sup> जब तक कउनव मेहेरिआ के मंसेरुआ जिन्दा रहत हय, तब तक उआ काज के बन्धन माहीं ओसे बँधी रहत ही; पय अगर ओखर मंसेरुआ मरि जाय, त उआ जेसे चाहय ओसे काज कइ सकत ही, पय केबल बिसुआसी के साथ।<sup>40</sup> पय जउने हालत माहीं उआ ही, अगर बिना काज किहे उहय हालत माहीं रहय, त हमरे बिचार से उआ अउर धन्य कहाई; अउर हम इआ जानित हएन, कि परमातिमा के आत्मा हमरे भीतर हय।

### मूरतिन माहीं चढ़ाबा जाँड बाला खाना

**8** अउर मूरतिन के ऊपर चढ़ाई जाँय बाली चीजन के बारे माहीं, अब हम पंचे इआ मानित हएन, कि एखे बारे माहीं हमहीं पंचन काहीं ग्यान हय। अउर ग्यान घमन्ड उत्पन्न करत हय, पय प्रेम से मसीही मन्डली के उन्नति होत ही।<sup>2</sup> पय अगर कोऊ इआ मानत हय, कि हम सब कुछ जानित हएन, त जइसन ओही जानँड क चाही, उआमेर से उआ अबय तक नहीं

जानय।<sup>3</sup> पय अगर कोऊ परमातिमा से प्रेम रक्खत हय, त परमातिमा ओही चीन्हत हें।

<sup>4</sup> एसे मूरतिन के ऊपर चढ़ाई जाँय बाली चीजन काहीं, खाय के बारे माहीं हम पंचे जानित हएन, कि मूरत इआ संसार माहीं बास्तबिक परमातिमा न होय, काहेकि एकठे परमातिमा के अलाबा कउनव दूसर परमातिमा नहिं आँय।<sup>5</sup> जबकि अकास अउर धरती माहीं खुब परमातिमा माने जात हें, जइसन कि वास्तव माहीं कुछ मनई खुब परमातिमा अउर खुब प्रभुअन के अराधना करत हें;<sup>6</sup> तऊ हमरे पंचन के खातिर एकयठे परमातिमा हें, जउन संसार के सगली चीजन काहीं बनाइन हीं, अउर हम पंचे उनहिन के महिमा के खातिर जिन्दा हएन, अउर हमरे पंचन के एकयठे प्रभू हें, अरथात यीसु मसीह जिनखे द्वारा सगली चीजँय बनाई गई हँय, अउर हमहूँ पंचे घलाय उनहिन के द्वारा जीवन पाएन हँय।

<sup>7</sup> पय सगले बिसुआसी भाई-बहिनिन काहीं इआ बात के ग्यान नहिं आय, अउर कुछ जने त अबय तक मूरतिन काहीं परमातिमा समझिके, अउर उनखे ऊपर चढ़ाई जाँड बाली चीजन काहीं पबित्र मानिके उनहीं खात हें, अउर नीक-नागा के बारे माहीं सोचँड के उनखर सक्ती कमजोर होइके, असुद्ध होइ जात ही।<sup>8</sup> पय खाना हमहीं पंचन काहीं परमातिमा के लघे नहीं पहुँचाबय, चाह हम पंचे खई, त ओसे हमहीं कउनव फायदा न होई, अउर चाह न खई, त हमहीं पंचन काहीं कुछ नुकसान न होई।<sup>9</sup> पय तूँ पंचे सतरक रह्या, कहँव अइसन न होय, कि तोंहार पंचन के इआ अजादी, बिसुआस माहीं कमजोर मनइन काहीं पाप माहीं गिरामँड के कारन बन जाय।<sup>10</sup> काहेकि अगर बिसुआस माहीं कमजोर कउनव मनई, तोंहई मूरत बाले मन्दिर माहीं खाना खात देखी, जबकि तोहई एखे बारे माहीं ग्यान हय, त ओहू के मन माहीं घलाय मूरत के ऊपर चढ़ाई चीजन काहीं खाय के हिम्मत होइ जई।<sup>11</sup> इआमेर से तोंहरे ग्यान के कारन बिसुआस माहीं कमजोर उआ भाई, इआ कि बहिनी, नास होइ जई, जेखे खातिर मसीह आपन जान दिहिन हीं।<sup>12</sup> अउर इआमेर से तूँ पंचे बिसुआसी भाई-बहिनिन के बिरोध माहीं अपराध कइके, अउर उनखे कमजोर सोच-बिचार काहीं चोट पहुँचाइके, मसीह के बिरोध माहीं अपराध करते हया।<sup>13</sup> इआ कारन से अगर हमार खाना दुसरे बिसुआसी भाई-बहिनिन काहीं पाप माहीं गिरामँड के कारन बनत हय, त हम कबहूँ माँस न खाब, कहँव अइसन न होय, कि हम उनहीं पाप माहीं गिरामँड के कारन बन जई।

### यीसु मसीह के खास चेला के अधिकार अउर जबाबदारी

**9** अउर हमहूँ दुसरे मनइन कि नाई अजाद हएन, अउर हमहूँ यीसु मसीह के खास चेला आहेंन, अउर हम यीसु काहीं जउन हमार प्रभू आहीं, देखे हएन, अउर खुसी के खबर सुनामँड के द्वारा प्रभू यीसु मसीह के बिसुआस माहीं, हमहिन तोहई पंचन काहीं लडि आएन हय।<sup>2</sup> अउर चाह अगर हम दुसरे मनइन के खातिर, यीसु मसीह केर खास चेला नहिंव आहेंन, तऊ तोंहरे पंचन के खातिर, हम यीसु मसीह के खास चेला आहेंन; काहेकि प्रभू के खास चेला होइ के बारे माहीं तूँ पंचे हमार सबूत आह्या।

<sup>3</sup> अउर जे कोऊ हमरे ऊपर आरोप लगाबत हें, त उनखे खातिर हमार जबाब इआ हय, कि<sup>4</sup> का तोंहसे, हमहीं पंचन काहीं, खॉड-पिअँड के खातिर मदत लेंड के अधिकार नहिं आय? <sup>5</sup> अउर का हमार पंचन के इआ अधिकार नहिं आय, कि कउनव मसीही बहिनी के साथ आपन काज करी, अउर उनहीं अपने साथ माहीं लडिके इहाँ-उहाँ जई, जइसन कि यीसु मसीह के दूसर खास चेला लोग, अउर प्रभू यीसु के भाई लोग, अउर पतरस घलाय करत हें।<sup>6</sup> अउर का केबल हमहीं अउर बरनबासय भर काहीं आपन जीबिका चलामँड के खातिर, काम करँड केर अधिकार हय? <sup>7</sup> अउर कउन अइसन मनई हय, जउन अपनेन कमाई से खाइके सेना माहीं सिपाही के काम करत हय? अउर कउन अइसन किसान हय, जउन अंगूर के बगिया

† यूनानी भाँसा माहीं पतरस काहीं कैफा कहत हें

लगाइके ओखर फर नहीं खाय? अउर कउन अइसन मनई हय, जउन बोकरिन अउर गइरन काहीं पाल-पोसिके उनखर दूध नहीं पियअय?

8 अउर का हम ई बातन काहीं केबल मनई के सोच-बिचार के मुताबिक कहित हएन, अउर का इहय बात मूसा के बिधान घलाय नहीं बताबय? 9 काहेकि मूसा के बिधान माहीं इआ लिखा हय, कि "फसल के गहाई करत माहीं बरधा के मुसका न लगाया।" अउर का परमातिमा केबल बरधन भर के फिकिर करत हैं? नहीं। 10 अउर खास करके का इआ बात हमरे पंचन के खातिर न होय कहिन ही? हौं इआ बात हमरे पंचन के खातिर आय कहिन ही, काहेकि खेत जोतैय बाला, कउनव आसा रखिके जोतत हय, अउर फसल के गहाई करई बाला, कुछ अनाज पामँइ के आसा से गहाई करत हय। 11 एसे जब हम पंचे, तौहरे भलाई के खातिर आत्मिक बीज बोयन हँय, त अगर हम पंचे तौहसे संसारिक चीजन के फसल काटैय चाही, त का इआ कउनव अचरज के बात आय? 12 अउर जब दुसरे सेबकन के, तौहसे पंचन से संसारिक चीजन काहीं लेंइ के अधिकार हय, त का हमार पंचन के अउर जादा तौहरे ऊपर अधिकार नहीं आय? हय। पय हम पंचे इआ अधिकार के उपयोग नहीं किहे आहैन; पय हम पंचे सगले दुख-मुसीबत काहीं सहित हएन, कि जउने हमरे द्वारा मसीह के खुसी के खबर माहीं कउनव बाधा न आबय। 13 अउर का तूँ पंचे इआ नहीं जनते आह्या, कि जे कोऊ मन्दिर माहीं सेबा करत हैं, त ऊँ पंचे मन्दिरय से आपन खाना पाबत हैं; अउर जे कोऊ बेदी के सेबा करत हैं, त उनखर हीसा बेदी माहीं चढ़ाई जाँय बाली चीजन माहीं होत हय? 14 इआमेर से प्रभू इआ हुकुम दिहिन ही, कि जे कोऊ खुसी के खबर के प्रचार करत हैं, त उनखे खाँइ-पिअँइ के प्रबन्ध खुसी के खबर सुनैय बालेन काहीं करई क चाही।

15 पय हम ई अधिकारन म से एकठईअव के उपयोग कबहूँ नहीं किहेन, अउर ई बातन काहीं हम एसे न होय लिखेन हँय, कि तौहसे पंचन से खाँइ-पिअँइ के खातिर हमहीं कुछ मिलय, अउर अगर हम कोहू से कउनव चीज लेइत हएन, त हमार मर जाब नीक हय। पय कोहू से कउनव चीजन काहीं लिहे बिना, खुसी के खबर के प्रचार करब हमरे खातिर बड़ाई के बात आय; अउर हम इआ नहीं चाही, कि कोऊ हमरे बड़ाई काहीं हमसे छड़ाय लेय। 16 अउर अगर हम खुसी के खबर के प्रचार करित हएन, त एमाहीं हमरे बड़ाई के कउनव बात नहीं आय, काहेकि प्रभू एखर जबाबदारी हमहीं सँउपिन ही, एसे हमार इआ करतब्य आय, कि हम खुसी के खबर के प्रचार करी, अउर अगर न करी, त हमरे जीवन के खातिर धिक्कार हय! 17 काहेकि अगर हम अपने मरजी से इआ काम करित हएन, त इनाम पामँइ के हकदार हएन, पय अगर अपने मरजी से नहीं करी, तऊ खुसी के खबर के प्रचार करई के जबाबदारी हमहीं सँउपी गे ही। 18 त पुनि हमार इनाम का आय? हमार इनाम इआ आय, कि खुसी के खबर सुनामँइ माहीं हम मसीह के प्रचार सेंट-मेंत माहीं करी, अउर खुसी के खबर सुनामँइ के कारन जउन कुछ पामँइ के हमार अधिकार हय, त ओखर पूर-पूर उपयोग न करी।

19 जबकि हम स्वतंत्र हएन, एखे बादव हम खुद काहीं सगले मनइन के दास बनाय दिहेन हँय, कि जउने जादा से जादा मनइन काहीं प्रभू यीसु मसीह के लघे खींच लई। 20 हम यहूदी लोगन के खातिर यहूदी लोगन कि नाई बन गएन, कि जउने यहूदी लोगन काहीं प्रभू यीसु मसीह के लघे खींच लई, अउर मूसा के बिधान के अधीनता माहीं हम नहीं आहैन, तऊ जे कोऊ मूसा के बिधान के अधीनता माहीं रहिके, ओहिन के मुताबिक चलत हैं, त उनखे खातिर हमहूँ मूसा के बिधान के अधीनता माहीं होइ गएन, कि जउने मूसा के बिधान के अधीनता माहीं चलँइ बालेन काहीं, प्रभू यीसु मसीह के लघे खींच लई। 21 अउर गैरयहूदी लोगन काहीं जिनखे लघे मूसा के बिधान नहीं आय, उनहीं प्रभू यीसु के लघे लइ आमँइ केर खातिर हम उनहिन कि नाई बन गएन, हम मूसा के बिधान के बिरोधी नहीं आहैन, बलकिन हम मसीह के सिच्छा के अधीनता माहीं हएन। 22 अउर हम निबल मनइन के खातिर निबल बन गएन, कि जउने निबल मनइन काहीं प्रभू यीसु मसीह के

† खाँइ-पिअँइ बाली चीजन काहीं लेई

लघे खींच लई, अउर हम हरेक मनइन के खातिर उनहिन कि नाई बन गएन, कि जउने कउनव मेर से कइअक जनेन काहीं मुक्ती देबाय देई। 23 अउर हम इआ सब कुछ खुसी के खबर काहीं फइलामँइ के खातिर करित हएन, कि जउने अउर दुसरे मनइन के साथ आसिरबाद पामँइ माहीं हिंसदार होइ जई।

### मसीही जीवन के दउड़-धूप

24 अउर का तूँ पंचे इआ नहीं जनते आह्या, कि दउड़ के प्रतियोगिता माहीं हरेक जन दउड़त हैं, पय इनाम त एकय जन पाबत हय; त तुहूँ पंचे अइसन दउड़ा कि जउने जीत जा। 25 अउर कुस्ती लइँइबाले हरेक पहिलमान, अपने देह काहीं तइआर करई के खातिर, हरेकमेर के कसरत करत हैं; अउर ऊँ पंचे त नास हौंइ बाले मुकुट काहीं पामँइ के खातिर इआ सगली मेहनत करत हैं, पय हम पंचे त उआ मुकुट काहीं पामँइ के खातिर मेहनत करित हएन, जउन कबहूँ नहीं नास होय। 26 अउर इहइमेर हमहूँ उआ मनई कि नाई दउड़ित हएन, जउने के आँगे लच्छ हय, पय हम हबा माहीं मुक्का नहीं मारी। 27 पय हम अपने देह के बुरी इच्छन से लडिके, उनहीं अपने कब्जे माहीं एसे लइ अइत हएन, कि कहँव अइसन न होय, कि दुसरे मनइन के खातिर प्रचार करी, अउर हम खुद कउनव बुरा काम कइके निकम्मा ठहर जई।

### इजराइली लोगन के इतिहास से चेतउनी

10 हे भाई-बहिनिव, हम इआ चाहित हएन, कि तूँ पंचे इआ बात जानिल्या, कि हमार पंचन के बाप-दादा बदरी के नीचे सुरच्छित रहत रहे हैं, अउर ऊँ सगले जने लाल समुंद्र के बीचय-बीच चलिके पार होइगें; †2 अउर इआमेर से ऊँ पंचे सगले जने बदरी अउर समुंद्र के बपतिस्मा लइके मूसा नबी के सहभागी बनिगें। 3 अउर सगले जने एकयमेर के आत्मिक खाना खाइन; †4 अउर सगले जने एकयमेर के आत्मिक पानी पीन, काहेकि ऊँ पंचे उआ आत्मिक चट्टान से पानी पिअत रहे हैं, जउन उनखे साथय-साथ चलत रही हय, अउर उआ चट्टान खुदय मसीह रहे हँय। 5 पय उनमा से खूब जनेन से परमातिमा खुस नहीं रहे आहीं, एसे परमातिमा उनहीं जंगल माहीं मार डारिन। †

6 अउर ई बातँय हमरे पंचन के खातिर उदाहरन साबित भई हँय, कि जइसन ऊँ पंचे लालच किहिन रहा हय, त हम पंचे उनखी कि नाई बुरी चीजन के लालच न करी; †7 अउर तूँ पंचे मूरतिन के पूजा करई बाले न बना, जइसन उनमा से कइअक जने मूरतिन के पूजा करई बाले बनिगे रहे हँय, जइसन कि पबित्र सास्त्र माहीं लिखा हय, कि "ऊँ पंचे खाँइ-पिअँइ के खातिर बइठें, अउर उराव मनामँइ के खातिर उठें।" †8 अउर हम पंचे ब्यभिचार न करी; जइसन कि उनमा से कइअक जने किहिन रहा हय, अउर एकय दिन माहीं तेइस हजार मनई मरिगे रहे हँय। †9 अउर न हम पंचे प्रभू के परिच्छा करी, जइसन कि उनमा से कइअक जने किहिन रहा हय, अउर साँपन के चाबँय के द्वारा मरिगे रहे हँय। †10 अउर तूँ पंचे कुड़कुड़ाबव न करा, जइसन कि उनमा से कइअक जने कुड़कुड़ाव रहे हँय, अउर नास करई बाले स्वरगदूत के द्वारा नास कइ दीनगे रहे हँय। †11 पय ई सगली बातँय जउन उनखे ऊपर बीती रही हँय; त ऊँ उदाहरन के रूप माहीं रही हँय, अउर ऊँ बातँय हमरे पंचन के चेतउनी के खातिर लिखी गई हँय, जउन इआ जुग के आखिरी समय माहीं रहित हएन। 12 एसे जे कोऊ इआ समझत हय, कि हम बिसुआस माहीं मजबूत हएन, त उआ चउकस रहय, कि कहँव उआ बिसुआस से भटक न जाय। 13 अउर तूँ पंचे कउनव अइसन परिच्छा माहीं नहीं परे आह्या, जउन कि मनई के सँइइ के सक्ती से जादा होत ही, काहेकि परमातिमा सच्चे हैं, अउर ऊँ तोहई पंचन काहीं सँइइ के सक्ती से जादा परिच्छा माहीं न परय देइहँय, पय अगर परिच्छा माहीं परिव जाते

†† 10:1 निरग 13:21; 14:22-29 † 10:3 निरग 16:35 †† 10:5 गिन 14:29,30 †† 10:6 गिन 11:4 ††† 10:7 निरग 32:6 ††† 10:8 गिन 25:1-18 † 10:9 गिन 21:5,6 †† 10:10 गिन 16:41-49

हया, त ओसे निकरँड के घलाय उपाय करिहँय, जउने तूँ पंचे ओही सहि सका।

### मूरतिन के पूजा करँड से बँचे रहा

14 इआ कारन से हे हमार पियार बिसुआसी भाई-बहिनिव, तूँ पंचे मूरतिन के पूजा करँड से बँचे रहा 15 हम तोहई पंचन काहीं समझदार जानिके इआ कहित हएन, कि जउन बातँय हम तोहसे कहित हएन, त उनहीं जाँचा-परखा, कि ऊँ सही हई कि नहीं। 16 अउर प्रभू-भोज माहीं भागीदार होंड के समय अंगूर के जउने रस काहीं, हम पंचे परमातिमा काहीं धन्यबाद दइके पीत हएन, त मसीह के बलिदान के द्वारा जउन असीसँय हमहीं पंचन काहीं मिली हँय, उनमा हम पंचे भागीदार बन जइत हएन, उहयमेर जब हम पंचे रोटी टोरिके खइत हएन, त मसीह के द्वारा अपने देह माहीं दुख सहँड के द्वारा जउन असीसँय हमहीं मिली हँय, उन माहीं घलाय हम पंचे भागीदार बन जइत हएन। 17 अउर हम पंचे एकयठे रोटी काहीं टोरिके खइत हएन, एसे कइअक जने होंड के बादव, एकय देह बन जइत हएन। 18 अउर इजराइली लोगन काहीं देखा, कि जउन कुछ बेदी माहीं बलिदान कीन जात हय, ओही ऊँ पंचे खात हँ, अउर ओमाहीं भागीदार बन जात हँ। 19 त पुनि हम इआ कहित हएन, कि न त मूरत के ऊपर चढ़ाई जाँय बाली चीज के कउनव महत्व आय, अउर न त मूरत के कउनव महत्व आय। 20 अउर गैरयहूदी लोग जउन बलिदान करत हँ, त ऊँ पंचे परमातिमा के खातिर न होय करत हँ, बलकिन बुरी आत्मन के खातिर करत हँ, त हम इआ चाहित हएन, कि तूँ पंचे बुरी आत्मन के भागीदार न बना। 21 अउर तूँ पंचे प्रभू-भोज माहीं, प्रभू के मउत काहीं सुध करँड केर खातिर अंगूर के रस पीते हया, अउर रोटी खाते हया, त पुनि तूँ पंचे बुरी आत्मन के खातिर चढ़ाए जाँड बाले खाना काहीं, कइसा खाय सकते हया? तूँ पंचे प्रभू-भोज, अउर बुरी आत्मन के भोज, दोनव माहीं भाग नहीं लइ सकते आह्या। 22 का हम पंचे अइसन कइके प्रभू काहीं क्रोधित करित हएन? का हम पंचे प्रभू से सक्तिसाली हएन?

### सगले कामन के द्वारा परमातिमा के बड़ाई करा

23 सगली चीजँय उचित त हई, पय सगली चीजँय लाभदायक नहीं आहीं, अउर सगली चीजँय उचित त हई, पय सगली चीजन से आत्मिक उन्नति नहीं होय। 24 अउर हरेक मनई काहीं खुद के भलाई के बारे माहीं भर नहीं, बलकिन दुसरे मनइन के भलाई के बारे माहीं घलाय सोचँड क चाही। 25 अउर बजार माहीं जउन मौस बिकत हय, त ओही बिना संकोच के खाय सकते हया, पय ग्यान होंड के कारन अपने मन माहीं इआ संका न करा, कि कहँव इआ मूरतिन के चढ़ाबा त न होय। 26 काहेकि पबित्र सास्त्र माहीं इआ लिखा हय, कि “इआ धरती, अउर जउन कुछ एमाहीं हय, इआ सगला प्रभू के आय।” 27 अउर अगर कउनव अबिसुआसी मनई तोंहार पंचन के नेउता करय, त अगर तूँ पंचे उहाँ जाँड चहते हया, त जा, अउर जउन कुछ तोंहरे आँगे परसा जाय, त ओही खा; पय मन के सोच-बिचार के कारन बिना संकोच किहे खाय ल्या, अउर कउनव प्रस्न न पूँछा। 28 पय अगर तोहई पंचन काहीं कोरु बताय देय, कि “इआ त मूरत के ऊपर चढ़ाबा खाना आय।” त उआ मनई के बताए के कारन अउर ओखे मन के सोच-बिचार के कारन ओही न खया। 29 अउर तोंहार पंचन के सोच-बिचार इआ हय, कि हम पंचे सब कुछ खाय सकित हएन, पय हम तोंहरे सोच-बिचार के बारे माहीं न होय कहित हएन, पय दुसरे मनई के सोच-बिचार के बारे माहीं आय कहेन हँय, कि दूसर मनई अपने सोच-बिचार के द्वारा हमहीं पंचन काहीं दोसी न ठहराए पाबय, कि जउने चीज काहीं हम खइत हएन, त एही खाब उचित नहीं आय। 30 अउर जउन कुछ हम पंचे खइत हएन, त परमातिमा काहीं धन्यबाद दइके खइत हएन, एसे जउने खाना काहीं हम परमातिमा काहीं धन्यबाद दइके खइत हएन, त ओही खाँय के कारन हमरे ऊपर दोस काहे लगाबा जात हय।

31 एसे चाह तूँ पंचे खा-पिआ, अउर चाह जउन कुछ करा, पय ऊँ सगलेन के द्वारा परमातिमा के बड़ाई होंड क चाही। 32 अउर तूँ पंचे न त यहूदी लोगन के खातिर, न त गैरयहूदी लोगन के खातिर, अउर न परमातिमा के मन्डली के बिसुआसी लोगन के खातिर, बिसुआस से भटकामँड के कारन बना। 33 अउर जइसन हमहूँ घलाय, सगली बातन माहीं हरेक मनइन काहीं खुस करँड के कोसिस करित हएन, अउर हम खुद के फायदय भर के इच्छा नहीं करी, बलकिन दुसरे मनइन के फायदा के खातिर घलाय कोसिस करित हएन, कि जउने ऊँ सगले जनेन काहीं घलाय मुक्ती मिलय।

11 अउर जइसन मसीह कि नाई हमार चाल-चलन हय, उहयमेर तोंहार पंचन के चाल-चलन घलाय, हमरे कि नाई होंड क चाही।

### अराधना के समय मेहेरिअन काहीं मूड ओढ़ब

2 पय हम तोहई पंचन काहीं सराहित हएन, काहेकि तूँ पंचे हरेक बातन माहीं हमार सुध हमेसा करत रहते हया; अउर जउन-जउन सिच्छा हम तोहई दिहेन हँय, उनखर पालन हमेसा करत रहते हया। 3 पय हम चाहित हएन, कि तूँ पंचे इआ जानिल्या, कि हरेक मंसेरुआ के मुखिया मसीह आहीं, अउर मेहेरिआ के मुखिया मंसेरुआ आय, अउर मसीह के मुखिया परमातिमा आहीं। 4 अउर जउन मंसेरुआ मूड ओढ़के प्राथना करत हय, इआ कि भबिस्यबानी करत हय, त उआ अपने मुखिया अरथात मसीह के अपमान करत हय। 5 उहयमेर से अगर जउन मेहेरिआ आपन मूड उँघारिके प्राथना करत ही, इआ कि भबिस्यबानी करत ही, त उआ अपने मुखिया अरथात अपने मंसेरुआ के अपमान करत ही, अउर उआ, उआ मेहेरिआ कि नाई हय, जउन आपन मूड घोटाय लिहिस ही। 6 अगर कउनव मेहेरिआ मूड नहीं ओढ़य, त उआ आपन मूडव घोटबाय लेय; पय अगर मेहेरिआ के खातिर बार कटबाउब, इआ कि मूड घोटबाउब सरम के बात आय, त उआ आपन मूड ओढ़य। 7 अउर मंसेरुआ काहीं आपन मूड ओढ़ब उचित नहीं आय, काहेकि परमातिमा ओही अपने स्वरूप माहीं बनाइन हीं, अउर ओखे द्वारा परमातिमा के बड़ाई होत ही; पय मेहेरिआ काहीं आपन मूड ओढ़य क चाही, काहेकि ओखे द्वारा ओखे मंसेरुआ के बड़ाई होत ही। 8 काहेकि मंसेरुआ, मेहेरिआ से नहीं बनाबा ग आय, पय मेहेरिआ-मंसेरुआ से बनाई गे ही। 9 अउर मंसेरुआ मेहेरिआ के खातिर नहीं बनाबा ग आय, पय मेहेरिआ-मंसेरुआ के खातिर बनाई गे ही। 10 काहेकि स्वरगदूत घलाय हमहीं पंचन काहीं देखत हँ; इआ कारन से मेहेरिअन काहीं मूड ओढ़ँड क चाही, अउर मूड ओढ़ँड के द्वारा मेहेरिआ इआ साबित करती हई, कि ऊँ पंचे अपने-अपने मंसेरुआ के अधीन हई। 11 पय प्रभू के नजर माहीं, मंसेरुआ के बिना न त मेहेरिअय के कउनव महत्व आय, अउर न त मेहेरिआ के बिना मंसेरुअय के कउनव महत्व आय। अरथात प्रभू के नजर माहीं दोनव एक समान हँ। 12 काहेकि जइसन पहिल मेहेरिआ-मंसेरुआ से बनाई गे ही, उहयमेर हरेक मंसेरुआ मेहेरिआ से पइदा होत हँ, पय ई सगलेन काहीं परमातिमय बनाइन हीं। 13 अउर तूँ पंचे खुदय सोचा, कि का मेहेरिअन काहीं, बिना मूड ओढ़े परमातिमा से प्राथना करब सोभा देत हय? 14 अउर तूँ पंचे त जनतेन हया, कि अगर कउनव मंसेरुआ बड़े-बड़े बार राखत हय, त ओखे खातिर इआ सरम के बात आय। 15 पय अगर मेहेरिआ बड़े-बड़े बार राखत ही, त ओखे खातिर इआ सोभा के बात आय, काहेकि परमातिमा मूड ओढ़ँड के खातिर ओही बार दिहिन हीं। 16 पय अगर कउनव मनई एखे बारे माहीं बाद-बिबाद करँड चाहय, त उआ, इआ जान लेय, कि परमातिमा के मसीही मन्डलिन माहीं, न त हमरे पंचन के इहाँ, अउर न दुसरे जघन माहीं, एखे अलाबा कउनव दूसर तरीका नहीं आय।

### प्रभू-भोज के बारे माहीं सिच्छा

(मत्ती 26:26-29; मरकुस 14:22-25; लुका 22:14-20)

17 अउर जउन हुकुम हम तोहई पंचन काहीं देई बाले हएन, त ओखे बारे माहीं हम तोहई नहीं सराही, काहेकि तूँ पंचे जब एकट्ठा होते हया, त तौहार पंचन के कउनव भलाई नहीं होय, बलकिन नुकसानय होत हया। 18 अउर पहिल बात त हम इआ सुनेन हँय, कि जब तूँ पंचे मसीही मन्डली माहीं एकट्ठा होते हया, त तौहरे पंचन के बीच माहीं गुटबन्दी रहत ही, अउर एखे बारे माहीं हम थोरी-थोरी बिसुआस घलाय करित हएन, कि इआ सही आय। 19 अउर तौहरे बीच माहीं जरूर गुटबन्दी होई, कि जउने इआ बात जाने मिल जाय, कि कउन बिसुआसी सच्चे हें, अउर कउन नहिँ आँय। 20 अउर जउनमेर से तूँ पंचे प्रभू-भोज खाँय के खातिर एकट्ठा होते हया, ओही प्रभू-भोज नहीं कहा जाय सकय। 21 अउर प्रभू-भोज खाँय-पिअँइ के समय, तौहरे पंचन म से कुछ जने दुसरे मनइन काहीं बिना बाँटिन, सगलेन से पहिले आपन खाना खाय-पी लेत हें, इआमेर से कुछ जने त भूँखेन रहि जात हें, अउर कुछ जने खाय-पी के मतबार होइ जात हें। 22 त इआ बताबा, कि खाँइ-पिअँइ के खातिर का तौहरे पंचन के लघे घर नहिँ आय? अउर तूँ पंचे केबल खुद के हित के बारे माहीं भर चिन्ता कइके, का परमातिमा के मन्डली काहीं तुच्छ नहीं मनते आह्या? अउर जउने गरीब बिसुआसी भाई-बहिनिन के लघे कुछ नहीं रहय, त का तूँ पंचे उनहीं लज्जित नहीं करते आह्या? त एखे बारे माहीं हम का कही? का तौहार पंचन के बड़ाई करी? नहीं, हम एखे बारे माहीं तौहार बड़ाई कबहूँ न करब।

23 काहेकि जउन सिच्छा हमहीं प्रभू से मिली हय, त ओही हम तौहँऊँ पंचन काहीं घलाय बताइत हएन, कि प्रभू यीसु काहीं जउने रात पकड़ाबा ग रहा हय, उहय रात ऊँ एकठे रोटी लिहिन, 24 अउर परमातिमा काहीं धन्यवाद दइके ओही टोरिन, अउर चलन काहीं इआ कहिके दिहिन, “इआ हमार देह आय, जउन तौहरे खातिर दीन जात ही, हमरे यादगारी माहीं इहइमेर करत रह्या।” 25 इहइमेर से यीसु बिआरी के बाद, अंगूर के रस से भरा खोरबा लिहिन, अउर कहिन, “इआ अंगूर के रस, हमार खून आय, जउन तौहरे खातिर बहाबा जात हय, इआ खून परमातिमा के नई करार के प्रतीक आय। अउर जब कबहूँ प्रभू-भोज के समय तूँ पंचे अंगूर के रस पिआ, त हमरे यादगारी के खातिर इहइमेर किहा।” 26 अउर हम पवलुस इआ कहित हएन, कि जब-जब तूँ पंचे इआ रोटी खाते हया, अउर अंगूर के रस पीते हया, त जब तक प्रभू दुबारा नहीं आर्मँय, तब तक उनखे मउत के प्रचार करत रहते हया। 27 एसे जे कोऊ अनुचित रूप से प्रभू-भोज के रोटी खात हय, अउर अंगूर के रस पिअत हय, त उआ प्रभू के देह अउर खून के बिरोध माहीं अपराध करत हय। 28 एसे हरेक मनई अपने-आप काहीं खुदय निकहा से जाँच-परख लेय, अउर एखे बाद इआ रोटी काहीं खाय, अउर इआ अंगूर के रस पिअय। 29 काहेकि जे कोऊ खाँइ-पिअँइ के समय, प्रभू के देह के महत्व नहीं रक्खय, त उआ खाँइ-पिअँइ के द्वारा खुद काहीं दन्ड पामँइ के लाइक बनाबत हय। 30 इहय कारन से तौहरे पंचन म से खुब जने निबल अउर रोगी हें, अउर खुब जने त मरिव घलाय गे हें। 31 पय अगर हम पंचे खुदय आपन जाँच-परताल निकहा से कइ लेइत, त परमातिमा से दन्ड न पाइत। 32 पय प्रभू हमहीं पंचन काहीं डाँड-फटकारके सुधारत हें, कि जउने हम पंचे संसार के अबिसुआसी मनइन कि नाई सजा न पाई। 33 एसे हे भाई-बहिनिव, जब तूँ पंचे प्रभू-भोज खाँय के खातिर एकट्ठा होते हया, त एक दुसरे के इन्तजार कइके खा करा। 34 पय अगर सचमुच कोहू काहीं खुब भूँख लगी होय, त ओही अपने घरय माहीं खाय लेंइ चाही, कि जउने तौहार पंचन के एकट्ठा होब, परमातिमा से सजा पामँइ के कारन न बनय, अउर जब हम तौहरे पंचन के लघे अउब, त दुसरे बातन काहीं समझाय देब।

### पबित्र आत्मा के द्वारा मिलँइ बाले बरदान

12 हे भाई-बहिनिव, हमार इच्छा इआ ही, कि पबित्र आत्मा के द्वारा मिलँइ बाले बरदानन के बारे माहीं, तूँ पंचे निकहा से जानिल्या।

2 अउर इआ बात तूँ पंचे जनतेन हया, कि तूँ पंचे जब यीसु मसीह के ऊपर बिसुआस नहीं करत रहे आह्या, त जइसन सगले मनई गुँगी मूरतिन के पूजा-पाठ करत रहे हें; उहयमेर तूहूँ पंचे घलाय करत रहे हया। 3 एसे हम तोहई पंचन काहीं इआ चेतउनी देइत हएन, कि जे कोऊ पबित्र आत्मा के अँगुआई से बोलत हय, त उआ यीसु काहीं इआ नहीं कहय, कि ऊँ सापित हें, उहयमेर पबित्र आत्मा के अँगुआई बिना, कउनव मनई इआ नहीं कहि सकय, कि यीसु मसीह प्रभू आहीं।

4 अउर पबित्र आत्मा के द्वारा हरेक मनई काहीं दूसर-दूसर मेर के बरदान मिलत हें; पय ऊँ सगले बरदानन काहीं देई बाला पबित्र आत्मा एकयठे हय। 5 अउर हम पंचे दूसर-दूसर मेर के सेबा त करित हएन, पय ऊँ सगलेन के द्वारा एकय प्रभू के सेबा करित हएन, अरथात यीसु मसीह के। 6 अउर सेबा के काम त कइअक मेर के हें, पय परमातिमा एकयठे हें, जउन मनइन काहीं दूसर-दूसर मेर के काम करँइ के सक्ती देत हें। 7 पय एकयठे पबित्र आत्मा के द्वारा हरेक मनइन काहीं दूसर-दूसर मेर के बरदान दीन जात हें, कि जउने सगले मनइन के भलाई होय। 8 काहेकि उहय आत्मा के द्वारा कोहू काहीं ग्यान से बाँतय करँय के बरदान मिलत हय, अउर कोहू काहीं उहय आत्मा के द्वारा समझँय के बुद्धी मिलत ही। 9 अउर कोहू काहीं उहय आत्मा के द्वारा, बिसुआस माहीं मजबूत होइ के बरदान दीन जात हय, अउर कोहू काहीं उहय आत्मा के द्वारा, बिमारन काहीं नीक करँइ के बरदान दीन जात हय। 10 अउर कोहू काहीं अचरज के काम करँइ के सक्ती, अउर कोहू काहीं परमातिमा के सँदेस बतामँइ के बरदान, अउर कोहू काहीं प्रचार करँइ बाले के सँदेस काहीं समझँइ के बरदान दीन जात हय, कि उआ परमातिमा के आत्मा के तरफ से आय, कि कउनव दूसर आत्मा के तरफ से; अउर कोहू काहीं कइअक मेर के भाँसा बोलँइ के बरदान दीन जात हय, अउर कोहू काहीं भाँसन के मतलब बतामँइ के बरदान, उहय आत्मा के द्वारा दीन जात हय। 11 पय ई सगले बरदानन काहीं उहय एकयठे पबित्र आत्मा देत हय, अउर जेही जउन बरदान देब उचित हय, त उआ अपने मरजी के मुताबिक सगलेन काहीं बाँटि देत हय।

### देह के उदाहरन

12 अउर जइसन हमरे पंचन म से हरेक मनई के एकयठे देह हय, पय ओमाहीं कइयकठे अंग हें, अउर देह माहीं कइयकठे अंग होइ के बादव, ऊँ सगलेन काहीं मिलाइके एकयठे देह बनत ही, उहयमेर मसीह घलाय हें। 13 काहेकि हम बिसुआसिनन म से चाह उआ यहूदी होय, चाह उआ गैरयहूदी होय, चाह उआ दास होय, अउर चाह स्वतंत्र होय, हम पंचे सगले जने एकयठे आत्मा के द्वारा अउर एकय देह होइ के खातिर बपतिस्मा लिहिन हँय; अउर हमहीं सगलेन काहीं एकयठे आत्मा दीन ग हय। 14 अउर देखा, एकठे देह माहीं केबल एकयठे अंग नहीं होय, बलकिन खुब अंग होत हें। 15 त मानि ल्या, कि अगर गोइ इआ कहय, कि “हम हाँथ न होहें, एसे हम देह के हिस्सा न होहें”, त का उआ इआ कारन से देह के हिस्सा न होय? 16 अउर अगर कान कहय, कि “हम आँखी न होहें, एसे देह के हिस्सा न होहें।” त का उआ इआ कारन से देह के हिस्सा न होय? 17 पय अगर हमार पंचन के सगली देह आँखिन होत, त हम पंचे कइसन सुनित? उहयमेर अगर हमार पंचन के सगली देह कानय होत, त हम पंचे कइसन सूँघित? 18 पय सचमुच परमातिमा अपने मरजी के मुताबिक, हरेक अंगन काहीं हमरे पंचन के देह माहीं जोड़िके रक्खिन हीं। 19 अउर अगर सगले अंग एकय मेर के होतें, त का देह होत? नहीं। 20 अउर देह माहीं अंग त खुब होत हें, पय देह एकयठे होत ही। 21 अउर आँखी हाँथ से इआ नहीं कहि सकय, कि “हमहीं तोर जरूरतय नहिँ आय”, अउर न मूड़ गोड़न से कहि सकय, कि “हमहीं

तोहार जरूरत नहीं आय।”<sup>22</sup> बलकिन हमरे देह के जउन अंग, दुसरे अंगन से कमजोर समझे जात हैं, ऊँ जादा जरूरी होत हैं; <sup>23</sup> अउर देह के जउने अंगन काहीं हम पंचे जादा आदर के काबिल नहीं समझी, अरथात जिनहीं देखाँई माहीं लाज लागत ही, उनहिन के आदर हम पंचे जादा करित हएन, अरथात उनहीं ओन्हन से मूदिके रक्खित हएन। <sup>24</sup> पय जउने अंगन काहीं दुसरे मनइन काहीं देखाँई माहीं कउनव परेसानी नहीं होय, उनहीं हम पंचे ओन्हन से मूदिके नहीं रक्खी; पय परमातिमा हमरे पंचन के देह काहीं अइसन बनाइन हीं, कि जउने अंगन के कउनव महत्व नहीं रहा आय, उनहीं अउर जादा आदर मिलय। <sup>25</sup> जउने देह माहीं फूट न परय, पय अंग एक दुसरे के बराबर चिन्ता कर्य। <sup>26</sup> एसे अगर देह के एकठे अंग दुख पाबत हय, त सगले अंग ओखे साथ दुखी होत हैं; अउर अगर एकठे अंग के बड़ाई होत ही, त ओखे साथ मिलिके सगले अंग खुसी मनाबत हैं।

<sup>27</sup> अउर इहइमेर से तुहूँ पंचे घलाय सगले बिसुआसी भाई-बहिनी मिलिके मसीह के देह आह्या, अउर उनखे देह के अंग आह्या। <sup>28</sup> अउर परमातिमा मसीही मन्डली माहीं कइअक जनेन काहीं नियुक्त किहिन हीं, पहिल यीसु मसीह के खास चेला लोगन काहीं, दूसर परमातिमा के सँदेस बताँई बालेन काहीं, तीसर सिच्छा देई बालेन काहीं, अउर एखे बाद अचरज के काम करँई बालेन काहीं, अउर बिमारन काहीं नीक करँई बालेन काहीं, अउर दुसरे मनइन के मदत करँई बालेन काहीं, अउर अँगुआई करँई बालेन काहीं, अउर हरेक मेर के भाँसा बोलँई बालेन काहीं, घलाय नियुक्त किहिन हीं। <sup>29</sup> एसे सगले जने यीसु मसीह के खास चेला नहीं होय, अउर सगले जने परमातिमा के सँदेस बताँई बाले नहीं होय, अउर सगले जने परमातिमा के बचन सिखामँई बाले नहीं होय, अउर न त सगले जने अचरज के काम करँई बाले होत आहीं। <sup>30</sup> उहयमेर सगले जनेन काहीं, बिमारन काहीं नीक करँई के बरदान नहीं मिलत आय, अउर सगले जनेन काहीं, हरेकमेर के भाँसा बोलँई के बरदान नहीं मिलत आय, अउर न त सगले जनेन काहीं हरेक भाँसा के मतलब बताँई के बरदान मिलत आय। <sup>31</sup> एसे तूँ पंचे पबित्र आत्मा के द्वारा, मिलँई बाले बड़े से बड़े बरदानन काहीं पामँय के धुन माहीं लगे रहा, पय अब हम तोहई सगलेन से खास बरदान के बारे माहीं बताइत हएन।

### प्रेम सगले बरदानन से बढ़िके हय

**13** मानि ल्या, कि अगर हमहीं इआ बरदान मिल जाय, कि हम मनइन के अउर स्वरगदूतन के सगली भाँसन काहीं बोल सकी, पय दुसरेन से प्रेम न रक्खी त हमहीं का फायदा होई? काहेकि हमार बोलब पीतल के खुब बड़ी घन्टी अउर झाँझ के बोल कि नाई होई। <sup>2</sup> अउर अगर हम परमातिमा केर सँदेस बताय सकी, अउर परमातिमा के छिपी सगली योजनन काहीं, अउर हरेक मेर के ग्यान काहीं समझी, अउर हमहीं इहाँ तक बिसुआस होय, कि अगर हम प्राथना करब, त पहार सरकि जई, पय अगर दुसरेन से प्रेम नहीं रक्खी, त हमार कउनव महत्व नहीं आय। <sup>3</sup> अउर अगर हम आपन सगली धन-सम्पत्त गरीबन काहीं दान कइ देई, इआ कि अपने देह काहीं दुसरे के भलाई के खातिर बलिदान कइ देई, अउर प्रेम न रक्खी, त हमहीं कउनव फायदा न होई। <sup>4</sup> अउर प्रेम करँई बाला मनई, अपने जीवन माहीं धीरज रक्खत हय, दुसरे के ऊपर किरपा करत हय; अउर दुसरे के ऊपर जलन नहीं रक्खय; अउर उआ खुद के बड़ाई नहीं करय; अउर उआ घमन्डिव नहीं होय, <sup>5</sup> अउर उआ दुसरे के साथ अनुचित बेउहार नहीं करय, उआ केबल अपनय भर भलाई नहीं चाहय, अउर उआ हरबिन क्रोधित नहीं होय, अउर जे कोऊ ओखे साथ बुरा बेउहार करत हैं, त उनसे उआ बदला नहीं लेय। <sup>6</sup> अउर उआ बुरे कामन से कबहूँ खुस नहीं होय, पय सच्चाई से खुस होत हय। <sup>7</sup> अउर उआ अपने जीवन माहीं सगली बातन काहीं सहि लेत हय, हरेक बातन माहीं परमातिमा के ऊपर बिसुआस रक्खत हय, अउर हरेक बातन माहीं परमातिमा के ऊपर आसा रक्खत हय, अउर उआ हमेसा सगली बातन माहीं धीरज रक्खत हय।

<sup>8</sup> अउर परमातिमा के सँदेस बताउब, दूसर-दूसर भाँसा बोलब, अउर हमार पंचन के खास ग्यान घलाय एक दिन खतम होइ जई, पय प्रेम करब कबहूँ न खतम होई। <sup>9</sup> काहेकि समझँई के जउन ग्यान, अउर परमातिमा के सँदेस बताँई के जउन बरदान हमहीं पंचन काहीं मिले हँय, ऊँ अधूरे हँ। <sup>10</sup> अउर जब ऊँ अइहँय जउन परिपूर्ण हँ, त हमार पंचन के अधूरापन मिट जई। <sup>11</sup> अउर एखे बारे माहीं हम एकठे उदाहरन बताइत हएन, “जब हम छोट बुदे लड़िका रहेन हँय, त छोट बुदे लड़िकन कि नाई बोलत रहेन हँय, अउर हम उनहिन कि नाई सोचत रहेन हँय, अउर हमार समझ उनहिन कि नाई रही हय, पय जब हम बड़े होइ गएन हँय, त छोट बुदे लड़िकन कि नाई बेउहार करब छोड़ दिहेन हँय।” <sup>12</sup> अउर जइसन हमहीं पंचन काहीं अइना माहीं धुँधुरुक देखात हय, इहइमेर से अबय हम पंचे परमातिमा काहीं साफ-साफ नहीं देखि सकी, पय एक दिना हम उनहीं आमने-सामने देखब, अउर अबय हमहीं उनखे बारे माहीं थोरिन क जानकारी ही, पय जब ऊँ अइहँय, त उनखे बारे माहीं हम निकहा से जान लेब, जइसन कि ऊँ हमरे बारे माहीं निकहा से जानत हँ। <sup>13</sup> एसे अब हमहीं पंचन काहीं परमातिमा के ऊपर हमेसा बिसुआस रक्खँई चाही, अउर उनखे ऊपर आसा रक्खँई चाही, अउर एक दुसरे से प्रेम रक्खँई चाही, काहेकि ई तीनव कबहूँ न नास होइहँय, पय इन माहीं सगलेन से बड़ा प्रेम हय।

### दूसर-दूसर भाँसा बोलब अउर परमातिमा के सँदेस बताउब

**14** अउर सगले मनइन से प्रेम करत आपन जीवन बिताबा, अउर पबित्र आत्मा के द्वारा मिलँई बाले बरदानन काहीं पामँई के धुन माहीं लगे रहा, बिसेस रूप से परमातिमा के सँदेस बताँई के बरदान काहीं पामँई के धुन माहीं लगे रहा। <sup>2</sup> काहेकि जब कउनव मनई अनजान भाँसा माहीं बात करत हय, त उआ मनइन से नहीं, बलकिन परमातिमा से बातँय करत हय। जउन उआ बोलत हय, ओही दूसर मनई नहीं समझे पामँय, काहेकि उआ भेद के बातन काहीं पबित्र आत्मा के अँगुआई से बोलत हय। <sup>3</sup> पय जे कोऊ परमातिमा के सँदेस बताबत हय, त एसे मनइन के बिसुआस मजबूत होत हय, अउर उनखर साहस बाढ़त हय, अउर उनहीं सान्ती मिलत ही। <sup>4</sup> अउर जे कोऊ अनजान भाँसा माहीं बात करत हय, त उआ केबल अपनेन भर काहीं आत्मिक रूप से मजबूत बनाबत हय; पय जे कोऊ परमातिमा के सँदेस बताबत हय, त उआ मसीही मन्डली के सगले मनइन काहीं आत्मिक रूप से मजबूत बनाबत हय। <sup>5</sup> अउर हम त चाहित हएन, कि तूँ सगले जने अनजान भाँसन माहीं बात करा, पय हम एहू से जादा इआ चाहित हएन, कि तूँ पंचे परमातिमा के सँदेस बताबा, काहेकि अनजान भाँसा बोलँई बाला, अगर मसीही मन्डली के मनइन काहीं, आत्मिक रूप से मजबूत करँई के खातिर ओखर मतलब न समझाबय, त परमातिमा के सँदेस बताँई बाला, मसीही मन्डली के मनइन काहीं आत्मिक रूप से मजबूत करँई माहीं ओसे जादा मदतगार हय।

<sup>6</sup> एसे हे भाई-बहिनिव, अगर हम तौहरे लघे आइके अइसन भाँसा माहीं बात करी, जउने काहीं तूँ पंचे नहीं समझते आह्या, अउर दरसन के द्वारा जउन बातँय परमातिमा हमहीं बताइन हीं, उनहीं न बताई, अउर जउन ग्यान हमहीं मिला हय, ओही न बताई, परमातिमा के सँदेस न बताई, अउर सिच्छा न देई, त तोहई पंचन काहीं का फायदा होई? <sup>7</sup> इहइमेर से अगर बसुरी अउर सारंगी के स्वर माहीं कउनव अन्तर न रही, त मनई कइसन पहिचनिहँय, कि बसुरी बाजत ही, कि सारंगी? <sup>8</sup> अउर अगर बिगुल बाजँय के अबाज निकहा से सुनाई न देई, त युद्ध करँई के खातिर को तइआर होई? <sup>9</sup> इहइमेर से अगर तुहूँ पंचे घलाय, अगर जीभ से साफ-साफ न बोलिहा, त जउन कुछ बोला जात हय, त उआ कइसन समझे मिली? त तौहार बोलब बेकार होइ जई। <sup>10</sup> अउर इआ संसार माहीं कइअक मेर के भाँसा हई, अउर हरेक भाँसन के कुछ न कुछ मतलब होत हय। <sup>11</sup> एसे अगर हम कउनव भाँसा के मतलब नहीं जानी, त हम बोलँई बाले के खातिर परदेसी ठहरब, अउर बोलँई बाला हमरे खातिर परदेसी ठहरी। <sup>12</sup> एसे जब तुहूँ पंचे घलाय, पबित्र आत्मा के

द्वारा मिलें बाले बरदानन काहीं, पामें के धुन माहीं लगे रहते हया, त जादा से जादा अइसन बरदानन काहीं पामें के कोसिस करा, जउने से मसीही मन्डली आत्मिक रूप से मजबूत होय।

<sup>13</sup> एसे जे कोऊ अनजान भाँसा माहीं बात करत हय, त उआ प्राथना करय, जउने ओखर मतलब घलाय बताय सकय। <sup>14</sup> एसे अगर हम अनजान भाँसा माहीं प्राथना करित हएन, त पबित्र आत्मा के अँगुआई से हमार आत्मा प्राथना करत ही, पय जउन हम कहित हएन, त ओही नहीं समझी। <sup>15</sup> एसे हमहीं का करैं चाही? हम अपने आत्मा से प्राथना करब अउर अपने बुद्धी से घलाय प्राथना करब, अउर हम अपने आत्मा से गाना गाउब, अउर अपने बुद्धी से घलाय गाना गाउब। <sup>16</sup> अउर अगर कउनव मनई पबित्र आत्मा के अँगुआई से अनजान भाँसा माहीं धन्यवाद, इआ कि प्राथना करी, त जे कोऊ उआ भाँसा काहीं नहीं समझैय, त ओखे साथ कइसन आमीन करिहँय? काहेकि जउन धन्यवाद, इआ कि प्राथना उआ किहिस ही, ऊँ पंचे ओही नहीं समझैय। <sup>17</sup> अउर तूँ त निकहा से धन्यवाद करते हया, पय एसे दुसरे मनइन काहीं कउनव फायदा न होई। <sup>18</sup> अउर हम परमातिमा काहीं धन्यवाद देइत हएन, कि हम तौहरे पंचन म से सगलेन से जादा अनजान भाँसन माहीं बोलित हएन। <sup>19</sup> पय मसीही मन्डली माहीं अनजान भाँसा माहीं दस हजार बात बोलैं से, हमहीं इआ जादा नीक जान परत हय, कि दुसरेन काहीं सिखामैं के खातिर, जउने भाँसा काहीं ऊँ पंचे समझत हें, हम पाँचयठे बात कही। <sup>20</sup> अउर हे भाई-बहिनिव, जइसन छोट बुदे लड़िकन के सोच-बिचार रहत हय, उआमेर तौहार पंचन के सोच-बिचार न होई चाही; बुराई के खातिर छोट लड़िकन कि नाई अनजान बना, पय तौहार सोच-बिचार सयानन कि नाई होय। <sup>21</sup> अउर पबित्र सास्त्र माहीं इआ लिखा हय, कि प्रभू कहत हें, कि "अनजान भाँसा बोलैं बाले मनइन के द्वारा हम ई लोगन से बातँ करब, तऊ ऊँ पंचे हमरे बातन काहीं न सुनिहँय।" <sup>22</sup> त एसे हमहीं इआ मालुम होत हय, कि अनजान भाँसन काहीं बोलैं के बरदानन बिसुआसिन केर खातिर न होय, बलकिन अबिसुआसी लोगन के खातिर चिन्हारी आय, अउर परमातिमा के सँदेस बतामैं के बरदानन अबिसुआसी लोगन केर खातिर नहीं, बलकिन बिसुआसी लोगन केर खातिर चिन्हारी आय। <sup>23</sup> पुनि अगर मसीही मन्डली के सगले जने एक जघा माहीं एकट्टा होय, अउर हरेक जन अनजान भाँसा माहीं बोलैं लागैय, त ऊँ पंचे, जउन ई बातन के बारे माहीं नहीं जानैय, अउर अबिसुआसी लोग उहाँ आइके देखिहँय, त का कइहँय? का ऊँ पंचे इआ न कइहँय, कि ई पंचे पागल होइगे हँय। <sup>24</sup> पय अगर सगले जने परमातिमा के सँदेस बतामैं लागैय, अउर अगर उहाँ कउनव अबिसुआसी मनई, इआ कि जउन ई बातन के बारे माहीं नहीं जानय, भीतर आय जाय, त सगले जने ओही परख के जान लेइहँय, अउर ओही दोसी ठहराय देइहँय। <sup>25</sup> अउर ओखे मन के छिपी बातँ प्रगट होइ जइहँय, तब उआ गोइन गिरिके परमातिमा काहीं प्रनाम करी, अउर इआ बिसुआस कइ लेई, कि वास्तव माहीं तौहरे बीच माहीं परमातिमा हें।

### अराधना माहीं अनुसासन

<sup>26</sup> हे भाई-बहिनिव, जब तूँ पंचे अराधना के खातिर एकट्टा होते हया, त कोऊ स्तुति गान करत हय, कोऊ उपदेस देत हय, कोऊ अनजान भाँसा माहीं बात करत हय, कोऊ परमातिमा के उआ बचन काहीं प्रगट करत हय, जउन ओही दरसन माहीं मिला हय, अउर कोऊ त अनजान भाँसा के मतलब समझाबत हय, त हमार सलाह इआ ही, कि तूँ पंचे चाह कुछू करा, पय इनखे द्वारा मसीही मन्डली के सगले मनइन के आत्मिक बढ़ोत्तरी होई चाही। <sup>27</sup> अउर तोहई पंचन काहीं अगर अनजान भाँसा माहीं बात करैय क होय, त दुइ जने, इआ कि जादा से जादा तीन जने, ओसरी-पहरा बोलैय, अउर एक जने ओखर मतलब समझाबय। <sup>28</sup> पय अगर मतलब समझामैं बाला न होय, त अनजान भाँसा बोलैं बाला चुप्पय मसीही मन्डली माहीं रहय, अउर अपने मनय-मन परमातिमा से बात करय। <sup>29</sup> अउर परमातिमा

के सँदेस बतामैं बालेन म से दुइ, इआ कि तीन जने परमातिमा के सँदेस बतामैं, अउर उनखे अलाबा दूसर लोग उनखे बातन काहीं सुनैय, अउर ऊँ बातन काहीं जाँचय-परखैय। <sup>30</sup> पय अगर कउनव मनई जब परमातिमा के सँदेस बताय रहा होय, त जउन दूसर मनई उहाँ बइठ हय, अगर ओही परमातिमा कउनव बात प्रगट किहिन ही, त ओही बोलैं चाही, अउर पहिल बाले काहीं चुप्पय होइ जाँच चाही। <sup>31</sup> अउर इआमेर से तूँ पंचे, सगले जने ओसरी-पहरा परमातिमा के सँदेस बताय सकते हया, कि जउने सगले जनेन काहीं सिच्छा अउर प्रोत्साहन मिलय। <sup>32</sup> अउर इआ बात काहीं सुध रक्खा, कि परमातिमा के सँदेस बतामैं बालेन के आत्मा, परमातिमा के सँदेस बतामैं बालेन के काबू माहीं रहत ही। <sup>33</sup> काहेकि परमातिमा गड़बड़ी डारैं बाले नहीं, पय सान्ती दें बाले परमातिमा आहीं, अउर जइसन कि परमातिमा के पबित्र मनइन के सगली मसीही मन्डलिन माहीं होत हय।

<sup>34</sup> अउर सगली मेहेरिआ, मसीही मन्डली के सभा माहीं चुप्पय रहैय, काहेकि उनहीं बात करैं के अनुमति नहीं आय, बलकिन अधीन रहैं के अनुमति ही, अउर जइसन कि मूसा नबी के बिधान माहीं घलाय लिखा हय। <sup>35</sup> अउर अगर ऊँ पंचे कुछू सिखैय चहती हँय, त घर माहीं अपने-अपने मंसेरुआ से सिखैय, काहेकि मसीही मन्डली माहीं बात करब, मेहेरिन काहीं सोभा नहीं देय।

<sup>36</sup> हे कुरिन्थुस सहर के बिसुआसी मनइव, हम तौहसे इआ पूँछित हएन, कि का परमातिमा के बचन तौहरेन पंचन से सुरू भ हय? अउर का उआ केबल तौहरेन लघे तक पहुँचा हय? <sup>37</sup> अउर अगर कउनव इआ सोचत हय, कि हम परमातिमा के सँदेस बतामैं बाले आहें, इआ कि आत्मिक जन आहें, त ओही इआ जान लेंड क चाही, कि जउन कुछू हम लिख रहेन हँय, उआ प्रभू के हुकुम आय। <sup>38</sup> त अगर कउनव मनई जउन कुछू हम लिखेन हँय, ओही नहीं मानय, त ओहू के बात न मानी जाय। <sup>39</sup> एसे हे भाई-बहिनिव, परमातिमा के सँदेस बतामैं के कोसिस माहीं लगे रहा, अउर अनजान भाँसा बोलैं से कोहू काहीं न रोंका; <sup>40</sup> पय ई सगली बातँ, सभ्यता से, अउर नेम के मुताबिक कीन जाँय।

### मरेन म से जि उठैं के बारे माहीं

**15** हे भाई-बहिनिव, हम तोहई पंचन काहीं जउन खुसी के खबर पहिले सुनाए रहेन हँय, अउर जउने काहीं तूँ पंचे सोइकार घलाय किहा तय, अउर जउने के मुताबिक अबय तक चलतेव हया, त उहय खुसी के खबर हम पुनि सुनाइत हएन। <sup>2</sup> ओहिन के द्वारा तोहई पंचन काहीं मुक्ती घलाय मिलत ही, उहय खुसी के खबर जउन हम तोहई पंचन काहीं सुनायन तय, अगर ओहिन माहीं तूँ पंचे स्थिर रहते हया, नहीं त तौहार बिसुआस करब बेकार होइ जई।

<sup>3</sup> इआ कारन से हम सगलेन से पहिले इआ खास बात, तोहई पंचन काहीं बताय दिहेन हय, जउन हमहीं बताई गे रही हय, कि पबित्र सास्त्र माहीं लिखे बचन के मुताबिक, मसीह हमरे पंचन के पापन के माफी के खातिर मरिगे, <sup>4</sup> अउर उनहीं गाइ दीन ग, अउर पबित्र सास्त्र माहीं लिखे बचन के मुताबिक, ऊँ तिसरे दिना जिन्दा होइगे हँय। <sup>5</sup> अउर ऊँ पतरस काहीं देखाई दिहिन, ओखे बाद अउर दुसरे खास चलन काहीं घलाय देखाई दिहिन। <sup>6</sup> पुनि ओखे बाद पाँच सव से जादा बिसुआसी भाई-बहिनिन काहीं एक साथय देखाई दिहिन, जिनमा से कुछू जने अबय तक जिन्दा हें, पय कुछू जने मरिगे हँय। <sup>7</sup> ओखे बाद ऊँ याकूब काहीं देखाई दिहिन, ओखे बाद अउर सगले खास चलन काहीं घलाय देखाई दिहिन। <sup>8</sup> अउर सगलेन के बाद हमहूँ काहीं घलाय देखाई दिहिन, जउन कि समय से पहिले पइदा होई बाले सतमासा लड़िका कि नाई हएन, काहेकि हम सही समय माहीं खास चेला नहीं बन पाएन। <sup>9</sup> अउर हम यीसु मसीह के खास चलन म से सगलेन से छोट हएन, बलकिन यीसु मसीह के खास चेला कहामैं के काबिल तक नहीं आहें, काहेकि पहिले हम परमातिमा के मन्डली काहीं सताबत रहेन हँय। <sup>10</sup> पय हम अब जउन कुछू हएन, त परमातिमा के किरपा से हएन, अउर उनखर

जउन किरपा हमरे ऊपर भे ही, उआ बेकार नहीं गय; काहेकि हम ऊँ सगले खास चेलन से जादा मेहनत किहेन हय, अउर सचमुच उआ मेहनत हम खुद न होय किहेन हय, पय हमरे ऊपर किरपा कइके ओही परमातिमा किहिन हीं।<sup>11</sup> एसे चाह हम होई, अउर चाह दूसर यीसु मसीह के खास चेला होंय, हम पंचे सगले जने एकय मेर के खुसी के खबर के प्रचार करित हएन, अउर एहिन के ऊपर तूँ पंचे बिसुआस घलाय किहा तय।

### मरेन म से पुनि जिन्दा होब

<sup>12</sup> एसे जब मसीह के बारे माहीं इआ प्रचार कीन जात हय, कि मरे के बाद ऊँ जिन्दा होइगें हँय, त तौहरे पंचन म से कुछ जने इआ काहे कहत हें, कि मरे मनई जिन्दा होतय नहिं आहीं? <sup>13</sup> अउर अगर मरे मनई जिन्दा होतय नहिं आहीं, त पुनि मसीह घलाय मरे के बाद जिन्दा नहीं भे आहीं। <sup>14</sup> अउर अगर मसीह नहीं जि उठे आहीं, त हमार पंचन के प्रचार करब बेकार हय, अउर तौहार पंचन के बिसुआसव करब बेकार हय। <sup>15</sup> अउर अगर अइसन हय, त हमहूँ पंचे घलाय परमातिमा के बारे माहीं झूठ गबाही देइ बाले साबित होइ गएन, काहेकि हम पंचे परमातिमा के बारे माहीं इआ गबाही दिहेन हँय, कि ऊँ मसीह काहीं मरेन म से जिन्दा कइ दिहिन हीं, पय उनखे कहे के मुताबिक अगर मरे मनई जिन्दा नहीं कीन जाँय, त पुनि परमातिमा मसीह काहीं घलाय जिन्दा नहीं किहिन। <sup>16</sup> अउर हम पुनि कहित हएन, कि अगर मरे मनई जिन्दा होतय नहिं आहीं, त पुनि मसीह घलाय मरेन म से जिन्दा नहीं भे आहीं; <sup>17</sup> अउर अगर मसीह जिन्दा नहीं भे आहीं, त तौहार पंचन के बिसुआसव करब बेकार हय, अउर तूँ पंचे अबय तक पाप के बन्धन माहीं हया। <sup>18</sup> अउर हाँ, त पुनि ऊँ पंचे घलाय नास होइगें, जउन मसीह के ऊपर बिसुआस करत मरिगे हँय। <sup>19</sup> अउर अगर हम पंचे मसीह से असीस पामँइ के आसा, केबल इहय संसारिक जीवन भर माहीं रक्खित हएन, त हमार पंचन के किस्मत सगले मनइन से जादा खराब ही।

<sup>20</sup> पय मसीह वास्तव माहीं मरे के बाद जिन्दा होइगे हें, अउर मरेन म से जिन्दा होइ बालेन माहीं, ऊँ पहिल फल आहीं; अउर ऊँ इआ साबित कइ दिहिन हीं, कि जउन बिसुआसी लोग मरत हें, ऊँ पंचे घलाय जिन्दा कीन जइहँय। <sup>21</sup> काहेकि जब पहिल मनई आदम पाप किहिस, एसे संसार माहीं मउत आइगे, उहयमेर से दूसर मनई मसीह के द्वारा मरेन म से दुबारा जिन्दा होब सुरू भ। <sup>22</sup> अउर जइसन आदम के द्वारा पाप करँइ के कारन, सगले मनई मरत हें, उहयमेर जे कोऊ मसीह के ऊपर बिसुआस करत हें, ऊँ पंचे घलाय जिन्दा कीन जइहँय। <sup>23</sup> पय हरेक जन के खातिर समय निश्चित कीन ग हय, सगलेन से पहिले मसीह काहीं पहिल फल के रूप माहीं जिन्दा कीन ग हय, अउर जब मसीह दुबारा अइहँय, त जे कोऊ उनखे ऊपर बिसुआस करत हें, ऊँ पंचे घलाय एक साथय जिन्दा कीन जइहँय। <sup>24</sup> अउर एखे बाद इआ संसार के अन्त आय जई, तब इआ संसार माहीं सासन करँइ बाले सगले अधिकारिन काहीं, अउर बुरी सक्तिन काहीं यीसु मसीह नास कइ देइहँय, अउर अपने राज काहीं पिता परमातिमा के हाँथ माहीं सँउपे देइहँय। <sup>25</sup> काहेकि जब तक ऊँ अपने सगले दुसमनन काहीं हराय न देइहँय, तब तक उनहीं राज करब जरूरी हय। <sup>26</sup> अउर सगलेन से आखिरी दुसमन, मउत काहीं घलाय नास कीन जई। <sup>27</sup> काहेकि बचन माहीं लिखा हय, कि “परमातिमा सब कुछ मसीह के अधीन कइ दिहिन हीं”, त एखर मतलब इआ हय, कि सब कुछ मसीह के अधीन कइ दीनगा हय; अउर जबकि परमातिमा सब कुछ उनखे अधीन कइ दिहिन हीं, त केबल उँन भर उनखे अधीन नहिं आहीं। <sup>28</sup> अउर जब परमातिमा सब कुछ अपने लड़िका यीसु मसीह के काबू माहीं कइ दिहिन हीं, त लड़िकव खुद, परमातिमा के काबू माहीं होइ जइहँय, कि जउने केबल परमातिमय सगलेन के ऊपर सासन करँइ बाले ठहरँय।

<sup>29</sup> अउर परमातिमा मरेन म से मनइन काहीं जरूर जिन्दा करिहँय, त अगर तूँ पंचे इआ बात माहीं बिसुआस नहीं करते आह्या, त तौहरे पंचन म

से जे कोऊ मरे मनइन के खातिर बपतिस्मा लेत हें; त कउने आसा से लेत हें? <sup>30</sup> अउर हमहूँ पंचे घलाय काहे हरेक समय अपने जीवन काहीं खतरा माहीं डारित हएन? <sup>31</sup> हे भाई-बहिनिव, हम अपने प्रभू यीसु मसीह माहीं तौहरे खातिर जउन घमन्ड करित हएन, ओहिन के कसम खाइके कहित हएन, कि हम रोज मउत के खतरा के सामना करित हएन। <sup>32</sup> अउर इफिसुस सहर के मनई हमार खुब बिरोध किहिन, अउर ऊँ पंचे जंगली जानबरन कि नाई हमरे साथ लड़ाई किहिन, पय अगर मुरदा जिन्दा न कीन जइहँय, त हमार लड़ाई, केबल इआ संसारय के रहि जई; अउर एसे हमहीं कउनव फायदा न मिली? अउर अगर अइसन हय, त आबा हम पंचे खई-पी अउर मउज करी, काहेकि काल्ह त मरिन जाँइ क हय। <sup>33</sup> अउर जे कोऊ अइसन कहत हें, त उनखे बातन माहीं परिके, धोखा न खया, काहेकि “बुरी संगति निकहे चरित्र काहीं बिगाड़ देत ही।” <sup>34</sup> एसे तूँ पंचे होस माहीं आय जा, अउर निकहा जीवन जिआ, पाप करब बंद कइ द्या; अउर तौहरे पंचन म से कुछ जने अइसन हें, कि ऊँ पंचे परमातिमा के सच्ची सिच्छन काहीं नहीं जानँय; अउर इआ बात हम तोहई पंचन काहीं सरमिन्दा करँइ के खातिर कहित हएन।

### बिसुआसी लोगन काहीं कबहूँ न नास होइ बाली देह मिली

<sup>35</sup> पय कुछ जने इआ पूँछ सकत हें, कि “मरे मनई कइसन जिन्दा कइ दीन जात हें, अउर ऊँ पंचे कउनमेर के देह पाबत हें?” <sup>36</sup> अउर जे कोऊ इआ कहत हें, त उनसे हम इआ कहित हएन, हे मूरखव, तूँ पंचे धरती माहीं जउन बीज बोउते हया, त जब तक उआ सड़ नहीं जाय, तब तक नबा बिरबा नहीं तइआर होय। <sup>37</sup> अउर जउन तूँ बोउते हया, त उआ देह न होय जउन तइआर होत ही, पय उआ निछला दाना आय, चाह उआ गोहूँ के दाना होय, अउर चाह अउर दुसरे अनाज के। <sup>38</sup> पय परमातिमा अपने मरजी के मुताबिक ओही देह देत हें; अउर हरेक बीज के खास देह होत ही। <sup>39</sup> अउर सगलेन के देह एकयमेर के नहीं होय, मनइन के देह दूसर मेर के होत ही, अउर पसुअन के दूसर मेर के होत ही, अउर पंछिन के देह दूसर मेर के होत ही; अउर मछरिन के देह दूसर मेर के होत ही। <sup>40</sup> उहयमेर अकास माहीं रहँइ बाले सुरिज, जौधइआ अउर तरइअन के अकार धरती माहीं रहँइ बालेन के देहन से अलग हय; पय अकास माहीं रहँइ बालेन के तेज, दूसर मेर के हय, अउर इआ संसार माहीं रहँइ बालेन के तेज, दूसर मेर के हय। <sup>41</sup> अउर अकास माहीं रहँइ बालेन के तेज घलाय, एक दुसरे से अलग हय, जइसन कि सुरिज के तेज दूसर मेर के हय, जौधइआ के तेज दूसर मेर के हय, अउर तरइअन के तेज दूसर मेर के हय, (काहेकि एकठे तरइया के तेज से दुसरे तरइया के तेज माहीं अन्तर हय।)

<sup>42</sup> अउर इहइमेर से मरे मनई घलाय जिन्दा कीन जइहँय, जइसन कउनव बीज काहीं जब धरती माहीं बोबा जात हय, त उआ सड़िके नास होइ जात हय, उहयमेर जब कउनव मनई मर जात हय, त ओखे संसारिक देह काहीं गाड़ दीन जात हय, अउर उआ नास होइ जात ही, पय जउन देह जिन्दा होइ के समय दुबारा मिलत ही, त उआ अमर रहत ही। <sup>43</sup> अउर जब इआ संसारिक देह काहीं धरती माहीं गाड़ा जात हय, त उआ निबलता के साथ गाड़ी जात ही, अउर ओमाहीं कउनव सक्ती नहीं रहय, पय जउन देह जिन्दा होइ के समय दुबारा मिलत ही, उआ सक्ती के साथ जिन्दा होइ जात ही, अउर तेजीमय होत ही। <sup>44</sup> अउर जउने देह काहीं गाड़ा जात हय, उआ संसारिक देह आय, पय जउन देह जिन्दा होइ के समय दुबारा मिलत ही, उआ आत्मिक देह आय; काहेकि अगर संसारिक देह होत ही, त आत्मिक देह घलाय होत ही। <sup>45</sup> अउर पबित्र सास्त्र माहीं घलाय लिखा हय, कि “पहिल मनई, अरथात आदम जिन्दा प्राणी बना” अउर आखिरी आदम, अरथात मसीह जीवन देइ बाले आत्मा बनिगें। <sup>46</sup> अउर जउन देह हमहीं पंचन काहीं पहिले दीन गे ही, उआ संसारिक आय, पय जउन देह हमहीं बाद माहीं दीन जई, उआ आत्मिक होई। <sup>47</sup> अउर पहिल मनई अरथात



आदम काहीं माटी से बनाबा ग रहा हय; पय दूसर मनई अरथात यीसु मसीह स्वरग से आए हैं।<sup>48</sup> अउर जइसन पहिल मनई माटी से बनाबा ग तय, उहयमेर संसार के सगले मनई घलाय माटी से बने हँय; अउर जइसन दुसरे मनई के देह स्वरग के हय, उहयमेर हमार पंचन के देह घलाय स्वरग के होइ जई।<sup>49</sup> अउर आदम काहीं जइसन माटी से बनाबा ग रहा हय, उहयमेर हमार पंचन के रूप घलाय उनहिन कि नाई हय, पय दूसर मनई स्वरग के आहीं, एसे हमार पंचन के रूप घलाय उनहिन कि नाई होई।

<sup>50</sup> हे हमार भाई-बहिनिव, हम तोहई इआ बताइत हएन, कि हम पंचे खून अउर माँस से बने इआ देह के साथ, परमातिमा के राज के हकदार नहीं बन सकी, काहेकि नास होइ बाली इआ संसारिक देह, कबहूँ न नास होइ बाले स्वरग के हकदार नहीं होइ सकय।<sup>51</sup> सुना, हम तोहई पंचन काहीं भेद के बात बताइत हएन, कि हम पंचे सगले जने मरब न, पय हमार पंचन के रूप बदल जई।<sup>52</sup> अउर जब आखिरी तुरही बजाई जई, तब एक पल माहीं मरे मनई, कबहूँ न नास होइ बाली देह काहीं पाइके जिन्दा होइ जइहँय; अउर जे कोऊ उआ समय जिन्दा रइहँय, त उनखर रूप बदल जई।<sup>53</sup> काहेकि हम पंचे इआ नासवान देह काहीं लइके स्वरग माहीं नहीं जाय सकी, एसे उहाँ जाँय के खातिर मरई बाली इआ देह काहीं, अमर रहई बाली देह माहीं बदला जाब जरूरी हय।<sup>54</sup> अउर जब इआ नास होइ बाली देह, कबहूँ न नास होइ बाली देह माहीं बदल जई, अउर मरनहार देह अमरता काहीं पहिर लेई, त पबित्र सास्त्र माहीं जउन लिखा हय, उआ पूर होइ जई: कि

“मउत काहीं नास कइ दीन ग हय, अउर जीत मिलिगे ही।” †

<sup>55</sup> “हे मउत, तोर जीतब कहाँ चला ग? अउर तोर डंक घलाय कहाँ चला ग?”

<sup>56</sup> अउर मूसा के बिधान से हमहीं पंचन काहीं इआ जाने मिलत हय, कि हम पंचे पाप करित हएन, अउर पाप के कारन मउत काहीं सक्ती मिलत ही, एसे हम पंचे मरित हएन।<sup>57</sup> पय हम पंचे परमातिमा काहीं धन्यबाद देइत हएन, कि ऊँ हमरे प्रभू यीसु मसीह के द्वारा, हमहीं पंचन काहीं पाप अउर मउत से जीत देबाबत हैं <sup>58</sup> एसे हे हमार पियार भाई-बहिनिव, तूँ पंचे बिसुआस माहीं मजबूत होइके, प्रभू माहीं अटल रहा, अउर प्रभू के काम करई के खातिर, खुद काहीं पूरी तरह से समरपित कइ द्या, काहेकि तूँ पंचे इआ जनते हया, कि प्रभू के खातिर जउन मेहनत तूँ पंचे करते हया, उआ बेकार न होई।

### बिसुआसी लोगन के खातिर दान एकट्ठा करब

**16** अउर यरूसलेम सहर के बिसुआसी लोगन के खातिर, दान एकट्ठा करई के बारे माहीं, जइसन हुकुम हम गलातिया प्रदेस के मसीही मन्डलिन काहीं दिहेन हँय; उहयमेर तुहूँ पंचे घलाय करा।<sup>2</sup> अउर हप्ता के पहिल दिन, तौहरे पंचन म से हरेक जन अपने-अपने कमाई के मुताबिक, अपने लघे कुछ पइसा बचाइके रक्खा करय, कि जउने जब हम तौहरे लघे अई, तब दान एकट्ठा न करई परय।<sup>3</sup> अउर जब हम उहाँ अउब, त जिनहीं पठमई के तौहार पंचन के इच्छा होई, हम उनहीं चिट्ठी दइके पठय देब, कि जउने ऊँ पंचे तौहार दान, यरूसलेम सहर माहीं पहुँचाय देंय।<sup>4</sup> अउर अगर तौहई पंचन काहीं इआ लागत हय, कि हमरव जाब उहाँ उचित हय, त हमहूँ उनखे साथ जाब।

### यात्रा करई के पवलुस के योजना

<sup>5</sup> अउर हम मकिदुनिया प्रदेस जाँइ के योजना बनाए हएन, एसे हम मकिदुनिया प्रदेस से होइके तौहरे पंचन के लघे अउब।<sup>6</sup> अउर होइ सकत

† 15:54 यसा 25:8

हय, कि हम तौहरेन लघे रुक जई, अउर जाड़े के रित उहँय काटी, अउर एखे बाद जहाँ हमहीं जाँइ क होई, त तूँ पंचे हमरे यात्रा माहीं मदत किहा।<sup>7</sup> अउर अब तौहसे केबल मुलाखात कइके चले जाँइ के हमार इच्छा नहीं आय; पय हम इआ आसा करित हएन, कि अगर प्रभू के मरजी होई, त कुछ समय तक हम तौहरे पंचन के लघे रहब।<sup>8</sup> पय पिन्तेकुस्त † के तेउहार तक हम इफिसुस सहर माहीं रहब।<sup>9</sup> जबकि बिरोध करई बाले मनई उहाँ खुब हैं, तऊ सेबा करई के खातिर उहाँ खुब मोका हय। †

<sup>10</sup> अउर जब तीमुथियुस आय जाँय, त उनखे साथ अइसन बेउहार किहा, कि जउने ऊँ तौहरे पंचन के लघे निडर होइके रहँय; काहेकि ऊँ हमरी कि नाई प्रभू के सेवा करत हैं।<sup>11</sup> एसे तौहरे पंचन म से कोऊ उनहीं तुच्छ न जान्या, बलकिन उनखे यात्रा माहीं तूँ पंचे उनखर पूर मदत किहा, कि जउने ऊँ कुसल पूर्वक हमरे लघे आय जाँय, काहेकि हम उनखर इन्तजार कइ रहेन हँय, कि ऊँ दुसरे भाइन के साथ हमरे लघे आय जाँय।<sup>12</sup> अउर भाई अपुल्लोस से हम खुब बिनती किहेन, कि ऊँ दुसरे बिसुआसी भाइन के साथ माहीं तौहरे पंचन के लघे जाँय; पय इआ समय जाँइ के उनखर बेलकुल इच्छा नहीं रही आय, पय बाद माहीं जब उनहीं मोका मिली, त ऊँ जरूर आय जइहँय।

### पवलुस के आखिरी हुकुम अउर नबस्कार

<sup>13</sup> हे भाई-बहिनिव, तूँ पंचे सतरक रहा, बिसुआस माहीं अटल रहा, साहसी बना, अउर प्रभू माहीं बलवन्त बना।<sup>14</sup> अउर तूँ पंचे जउन कुछ करते हया, त ओही प्रेम से करा।<sup>15</sup> हे भाई-बहिनिव, तूँ पंचे स्तिफनास के घर के मनइन काहीं त जनतेन हया, कि ऊँ पंचे अखाया प्रदेस के पहिल बिसुआसी आहीं, अउर ऊँ पंचे पबित्र लोगन के सेवा † करई के खातिर हमेसा तइआर रहत हैं।<sup>16</sup> एसे हम तौहसे इआ बिनती करित हएन, कि तूँ पंचे अइसन लोगन के अधीनता माहीं रहा, अउर जे कोऊ उनखे साथ कठोर मेहनत करत हैं, उनहूँ पंचन के अधीनता माहीं घलाय रहा।<sup>17</sup> अउर तौहरे पंचन के तरफ से, भाई स्तिफनास, भाई फूरतूनातुस अउर भाई अखइकुस हमसे मिलँय आएँ, त हम खुब खुस भएन; काहेकि तूँ पंचे हमरे साथ न होइ के कारन, हमार जउन मदत नहि कइ पाया, त ओही ऊँ पंचे पूर कइ दिहिन हीं।<sup>18</sup> अउर ऊँ पंचे हमरेव मन काहीं खुस किहिन हीं, अउर तौहरेव पंचन के मन काहीं घलाय खुस किहिन हीं; एसे अइसन लोगन के सम्मान करा।

<sup>19</sup> आसिया प्रदेस के मसीही मन्डली के बिसुआसी लोग तौहई पंचन काहीं, प्रभू के नाम माहीं नबस्कार करत हैं; अक्विला अउर प्रिस्किल्ला अउर उनखे घर माहीं एकट्ठा होइ बाली मसीही मन्डली के बिसुआसी लोग घलाय, तौहई पंचन काहीं पूर मन से नबस्कार करत हैं।<sup>20</sup> अउर सगले बिसुआसी भाई-बहिनी घलाय, तौहई पंचन काहीं नबस्कार करत हैं, अउर तुहूँ पंचे घलाय एक दुसरे काहीं पबित्र मन से, अउर प्रेम के साथ नबस्कार करा।

<sup>21</sup> अउर हम पवलुस खुद अपने हाँथे से तौहई पंचन काहीं नबस्कार लिखित हएन।<sup>22</sup> अउर अगर कउनव मनई, प्रभू से प्रेम नहीं रक्खय, त प्रभू ओही सराप देइहँय। हे हमार पंचन के प्रभू, अपना हरबी अई।<sup>23</sup> प्रभू यीसु मसीह के किरपा तौहरे पंचन के ऊपर हमेसा बनी रहय।<sup>24</sup> मसीह यीसु के संगति माहीं रहई बाले, सगले जनन के साथ हमार प्रेम बना रहय। आमीन।

† 16:8 लैव्य 25:15-21; ब्यब 16:9-11 † 16:9 खा.चे.काम 19:8-10

‡ 16:15 1 कुरि 1:16 ‡ 16:19 खा.चे.काम 18:2

## 2 कुरिन्थियन

### इआ चिट्ठी के परिचय

कुरिन्थुस सहर माहीं रहँइ बाले मसीही लोगन के नाम लिखी पवलुस के दूसर चिट्ठी, उआ समय लिखी गे रही हय, जब पवलुस काहीं कुरिन्थुस सहर के कुछ बिसुआसी लोग गलत समझत रहे हँय, मसीही मन्डली के कुछ मनई पवलुस के ऊपर खुले आम कइयकठे गम्भीर आरोप लगाइन तय। पय पवलुस इआ चिट्ठी माहीं उनसे मेल-मिलाप करँइ के आपन बड़ी इच्छा प्रगट करत हँ, अउर इआ चिट्ठी माहीं पवलुस कुरिन्थुस सहर के बिसुआसी लोगन के खातिर अपने गहरी भावना काहीं प्रगट करत हँ, अउर जब उनसे मेल-मिलाप होइ जात हय, त अपने बड़े आनन्द काहीं घलाय प्रगट करत हँ। इआ चिट्ठी के पहिल भाग माहीं पवलुस कुरिन्थुस सहर के मसीही मन्डली के साथ अपने सम्बन्ध के बारे माहीं बिचार करत हँ, अउर उनहीं समझाबत हँ, कि हम काहे मसीही मन्डली से कठोर बेउहार किहेन हय, अउर एखे बाद अपने आनन्द काहीं घलाय प्रगट करत हँ, कि हमरे कठोरता के परिनाम, पस्चाताप अउर मेल-मिलाप भ हय, अउर एखे बाद ऊँ मसीही मन्डली से, यहूदिया प्रदेस के गरीब बिसुआसी लोगन के खातिर उदारता से दान देँइ के निबेदन करत हँ। अउर चिट्ठी के अन्त माहीं पवलुस कुरिन्थुस सहर के कुछ लोगन के बिरुद्ध बात कहत हँ, जउन अपने-आप काहीं यीसु मसीह के खास चेला बताबत रहे हँय, जबकि रहे नहिं आहीं, अउर पवलुस के ऊपर आरोप लगाबत रहे हँय, कि पवलुस यीसु मसीह के खास चेला न हौहीं। अपना पंचे आपस माहीं मिल जुलिके रही, अउर दुसरे भाई-बहिनिन के मदत करी, अउर परमातिमा अपने साथ मनइन के मेल-मिलाप करँइ के जउन सेबा हमहीं पंचन काहीं सँउपिन हीं, ओही पूर करी।

रूप-रेखा :

इआ चिट्ठी के परिचय

पवलुस अउर कुरिन्थुस सहर के मसीही मन्डली

यहूदिया प्रदेस के मसीही लोगन के खातिर दान

पवलुस खुद काहीं यीसु मसीह के खास चेला हौँइ के अधिकार के समर्थन करत हँ

उपसंहार

### पवलुस के अभिवादन

1 हम पवलुस इआ चिट्ठी काहीं लिख रहेन हय, जउन परमातिमा के मरजी से यीसु मसीह के खास चेला आहेन, अउर इआ चिट्ठी हमरे अउर हमरे बिसुआसी भाई तीमुथियुस के तरफ से परमातिमा के मसीही मन्डली काहीं मिलय, जउन कुरिन्थुस सहर माहीं ही, अउर अखाया प्रदेस के सगले पबित्र भाई-बहिनिन काहीं घलाय मिलय। 2 अउर हमरे पंचन के पिता परमातिमा अउर प्रभू यीसु मसीह के तरफ से तौहँइ पंचन काहीं किरपा अउर सान्ती मिलत रहय।

### परमातिमा काहीं पवलुस के धन्यवाद

3 हम पंचे अपने प्रभू यीसु मसीह के पिता परमातिमा काहीं धन्यवाद देइत हएन, जउन दया करँइ बाले पिता अउर हरेकमेर के सान्ती देँइ बाले परमातिमा आहीं। 4 अउर उँइन हमरे पंचन के हरेक बिपत्तिन माहीं सान्ती देत हँ, जउने हमहूँ पंचे उआ सान्ती के कारन, जउन परमातिमा हमहीं पंचन काहीं देत हँ, उनहीं घलाय सान्ती दइ सकी, जउन कउनव मेर के बिपत्तिन माहीं परे हौंय। 5 काहेकि हम पंचे जइसन मसीह के दुखन माहीं जेतनय जादा भागीदार बनत जइत हएन, ओतनय जादा हम पंचे सान्ती माहीं घलाय मसीह के द्वारा भागीदार बनित हएन। 6 अगर हम पंचे खुब कस्ट पाइत हएन, त इआ तौहरे पंचन के मुक्ती अउर सान्ती के खातिर आय, अउर अगर सान्ती पाइत हएन, त इहव तौहरे सान्ती के खातिर आय; इहय सान्ती के असर से तुहूँ पंचे घलाय, धीरज के साथ उन दुखन काहीं सहि लेते हया, जिनहीं हमहूँ पंचे घलाय सहित हएन। 7 अउर तौहरे पंचन के बारे माहीं,

हमहीं पंचन काहीं पूर आसा ही, काहेकि हम पंचे जानित हएन, कि जइसन तूँ पंचे हमरे दुखन माहीं भागीदार हया, उहयमेर सान्ती के घलाय भागीदार हया। 8 हे भाई-बहिनिव, हम पंचे इआ चाहित हएन, कि तूँ पंचे हमरे पंचन के दुखन के बारे माहीं जाना, जउन आसिया प्रदेस माहीं हमरे पंचन के ऊपर परा रहा हय, हम पंचे अइसन बड़ी भारी बिपत्ती माहीं परि गएन तय, जउन हमरे पंचन के सहँय से बाहर रही हय, इहाँ तक कि हम पंचे जिन्दा रहँइ के आसा घलाय छौँड़ि दिहेन तय। 9 बलकिन हम पंचे अपने-अपने मनन माहीं इआ समझ लिहेन तय, कि हमहीं पंचन काहीं मउत के सजा मिल चुकी हय। जउने हम पंचे अपने ऊपर भरोसा न करी, बलकिन परमातिमा के ऊपर पूरा भरोसा करी, जउन मरेन काहीं घलाय जिआबत हँ। 10 उँइन हमहीं पंचन काहीं उआ बड़े भारी मउत के संकट से बचाइन हीं, अउर बचउतय रइहँय, अउर हमार पंचन के उनहिन के ऊपर पूर आसा ही, कि उँइन हमहीं पंचन काहीं भबिस्य माहीं घलाय बचाबत रइहँय। 11 अउर तुहूँ पंचे घलाय मिलिके हमरे पंचन के खातिर प्राथना कइके, हमार पंचन के मदत कइ रहे हया, काहेकि हमहीं पंचन काहीं जउन बरदान खुब मनइन के प्राथना के द्वारा मिला हय, ओहिन के कारन खुब मनई हमरे पंचन के तरफ से परमातिमा के धन्यवाद करिहँय।

### पवलुस के यात्रा के योजना माहीं बदलाव

12 हमहीं पंचन काहीं इआ बात के घमन्ड हय, कि हम इआ बात सच्चे मन से कहि सकित हएन, कि हम पंचे इआ संसार के मनइन के साथ, अउर खास करके तौहरे पंचन के साथ, परमातिमा के किरपा के मुताबिक बेउहार किहेन हय। हम पंचे उआ बेउहार सरलता अउर सच्चाई के साथ किहेन हँय,

जउन परमातिमा से मिलत हय, अउर उआ संसार के बुद्धी से नहीं मिलत।<sup>13</sup> हम पंचे अइसन कउनव बात नहीं लिखे आहैन, कि जउने काहीं तूँ पंचे समझे न पाबा, बलकिन हम उहय लिखे हएन, जउने काहीं तूँ पंचे पढ़ते अउर मनते घलाय हया, अउर हमहीं पंचन काहीं इआ आसा ही, कि तूँ पंचे ओही पूरी तरह से मतव रइहा।<sup>14</sup> जइसन तौहरे पंचन म से कुछ जने मानिव लिहिन ही, कि हम पंचे तौहरे घमन्ड करँड के कारन हएन; उहयमेर प्रभू यीसु के न्याय करँड के दिन, तुहूँ पंचे घलाय हमरे पंचन के खातिर घमन्ड के कारन ठहरिहा।<sup>15</sup> अउर इहय भरोसा से हम चाहत रहेन हय, कि पहिले तौहरे पंचन के लघे अई; जउने तौहई दुसराय आसिरबाद के फायदा मिल सकय।<sup>16</sup> अउर हम सोचित हएन, कि तौहसे मिलिके मकिदुनिया प्रदेस काहीं जई, अउर पुनि मकिदुनिया से तौहरे लघे अई, त फेर तूँ पंचे यहूदिया प्रदेस जाँड के खातिर हमार प्रबन्ध करा।<sup>17</sup> हम जब इआ योजना बनाएन तय, तब हमहीं कउनव संका नहीं रही आय, काहेकि जब हम योजना बनाएन तय, त उआ संसारिक मनइन कि नाई नहीं बनाएन तय। जउन “हाँ” त बोलत हैं, पय सही माहीं ओखर मतलब “न” होत हय।<sup>18</sup> काहेकि परमातिमा बिसुआस के काबिल हैं, अउर ऊँ एखर गबाही देइहँय, कि तौहरे पंचन के खातिर हमार पंचन के जउन बात ही, ओमाहीं एक साथ “हाँ” अउर “न” दोनव नहीं होय।<sup>19</sup> काहेकि परमातिमा के लड़िका यीसु मसीह जिनखर हमरे पंचन के द्वारा, अरथात हमरे अउर सिलवानुस अउर तीमुथियुस के द्वारा तौहरे पंचन के बीच माहीं प्रचार कीन ग हय; ओमाहीं “हाँ” अउर “न” दोनव नहीं रहा आय; बलकिन ओमा केबल “हाँ” भर रहा हय।<sup>20</sup> काहेकि परमातिमा जेतने वादा किहिन हीं, ऊँ सगले यीसु माहीं, सगले मनइन के खातिर “हाँ” बन जात हैं, एसे हम पंचे यीसु मसीह के द्वारा “आमीन” घलाय कहित हएन, कि जउने हमरे पंचन के द्वारा परमातिमा के बड़ाई होय।<sup>21</sup> अउर जउन हमहीं पंचन काहीं तौहरे साथ मसीह माहीं मजबूत करत हैं, अउर जउन हमार पंचन के अभिसेक किहिन हीं, उँइन परमातिमा आहीं।<sup>22</sup> अउर उँइन हमरे पंचन के ऊपर आपन छाप लगाय दिहिन हीं, अउर बयाना माहीं पबित्र आत्मा काहीं हमरे पंचन के भीतर डार दिहिन हीं।<sup>23</sup> हम परमातिमा काहीं गबाह मानिके, अउर अपने जीवन के कसम खाइके कहित हएन, कि हम अबय तक कुरिन्थुस सहर माहीं एसे नहीं आएन, कि हम तौहई पंचन काहीं दुख नहीं देइ चाहत रहेन आय।<sup>24</sup> तौहरे पंचन के बिसुआस के बारे माहीं, हम तौहरे ऊपर आपन अधिकार नहीं जतामँड चाहित आहैन; बलकिन हम तौहरे आनन्द माहीं सामिल हएन, काहेकि तूँ पंचे बिसुआस माहीं मजबूत बने रहते हया।

2 हम अपने मन माहीं इहय ठान लिहैन तय, कि पुनि तौहरे पंचन के लघे, तौहई दुख देइ न अउब।<sup>2</sup> काहेकि अगर हम तौहइन पंचन काहीं दुखी करब, त हमहीं आनन्द को देई? काहेकि हमहीं आनन्द देइ बाले त तुहिन पंचे आह्या।<sup>3</sup> अउर हम इहय बात तौहई एसे लिखेन हय, कि कहँव अइसा न होय, कि जब हम तौहरे पंचन के लघे अई, त जिनसे हमहीं आनन्द मिलँड चाही, त हम उनहिन के कारन दुखी होई; काहेकि हमहीं तौहरे सगले जनेन के ऊपर इआ बात के भरोसा हय, कि जउन आनन्द हमार हय, उआ तौहरव पंचन के घलाय आनन्द हय।<sup>4</sup> काहेकि हम तौहई पंचन काहीं बड़े दुखी मन से अउर बड़े कस्ट के साथ आँसू बहाय-बहाइके इआ लिखेन हय; पय तोहई पंचन काहीं दुखी करँड के खातिर नहीं, बलकिन एसे लिखेन हय, कि जउने तूँ पंचे हमरे प्रेम काहीं जानिल्या, कि हम तौहसे केतना प्रेम करित हएन।

### अपराधी काहीं माफ करब

5 पय अगर कोऊ हमहीं दुखी किहिस ही, त उआ केबल हमहिन भर काहीं नहीं, बलकिन थोरी-बहुत तौहई सगलेन काहीं घलाय दुखी किहिस ही।<sup>6</sup> अइसन मनई के खातिर इआ सजा काफी हय, जउन तौहरे पंचन म से कुछ जने ओही दिहिन हीं।<sup>7</sup> एसे नीक त इआ हय, कि ओखर अपराध माफ करा, अउर ओही उत्साहित करा, कहँव अइसन न होय कि उआ मनई बड़े

भारी दुख माहीं बूड जाय।<sup>8</sup> इआ कारन हम तौहसे इआ बिनती करित हएन, कि ओसे अब पहिले से जादा प्रेम करा।<sup>9</sup> काहेकि हम तौहई पंचन काहीं अजमामँड के उद्देश्य से इआ लिखेन तय, अउर हम इआ जानँड चाहत रहेन हय, कि तूँ पंचे हमरे सगली बातन काहीं मानँड के खातिर तइआर हया, कि नहीं? <sup>10</sup> अउर अगर तूँ पंचे कोहू काहीं कउनव बात के खातिर माफ करते हया, त ओही हमहूँ माफ करित हएन, अउर जउन कुछ हम माफ किहेन हय, त उआ तौहरे पंचन के कारन मसीह काहीं हाजिर जानिके किहेन हय।<sup>11</sup> कि जउने हम पंचे सइतान के चंगुल माहीं न फँसे पाई, काहेकि हम पंचे ओखे चाल काहीं निकहा से जानित हएन।

### त्रोआस सहर माहीं पवलुस के ब्याकुल होब

12 जब हम मसीह के खुसी के खबर सुनामँड के खातिर त्रोआस सहर माहीं आएन, त उहाँ खुसी के खबर सुनामँड के खातिर प्रभू निकहा मोका दिहिन तय।<sup>13</sup> तऊ हमार मन ब्याकुल रहा हय, काहेकि हम उहाँ अपने मसीही भाई तीतुस काहीं नहीं पाएन तय; एसे हम उनसे बिदा लइके मकिदुनिया प्रदेस काहीं चल दिहेन।

### मसीह माहीं बिजय-अभियान

14 पय परमातिमा के धन्यवाद होय, जउन मसीह के द्वारा अपने बिजय-अभियान माहीं हमहीं पंचन काहीं हमेसा गइल देखाबत हैं। अउर हमरे पंचन के द्वारा अपने ग्यान के महक हरेक जघन माहीं फइलाबत हैं।<sup>15</sup> काहेकि हम पंचे परमातिमा के नजर माहीं, मुक्ती पामँड बालेन, अउर नास होंड बालेन दोनव के खातिर मसीह के महक आहैन।<sup>16</sup> पय उनखे खातिर जउन नास होंड बाले हैं, इआ मउत के अइसन बदबू आय, जउन मउत कइती लड जात ही। पय उनखे खातिर जउन मुक्ती के गइल माहीं बढ़त जात हैं, इआ जीवन के अइसन महक आय जउन अनन्त जीवन कइती लड जात ही, अउर ई कामन के काबिल को हय? <sup>17</sup> काहेकि हम पंचे ऊँ खुब मनइन कि नाई नहीं आहैन, जउन खुद के फायदा के खातिर परमातिमा के बचन माहीं मिलाबत कइके प्रचार करत हैं, बलकिन हम पंचे अपने सच्चे मन से, परमातिमा के तरफ से, अउर परमातिमा काहीं हाजिर जानिके, मसीह के प्रचार करित हएन।

### नई करार के सेबक

3 एसे का तौहई पंचन काहीं अइसन लागत हय, कि हम पंचे पुनि आपन बड़ाई खुद करँड लागेन हय? का हमहीं पंचन काहीं दुसरे मनइन कि नाई इआ जरूरी हय, कि हम पंचे तौहई सिपारिस के चिट्ठी देखाई, इआ कि तौहसे मागी? <sup>2</sup> हमार पंचन के चिट्ठी त तुहिन पंचे आह्या, जउन हमरे पंचन के हिरदँय माहीं लिखी हय, अउर ओही सगले मनई जनतिव हैं, अउर पढ़तिव हैं।<sup>3</sup> अउर तुहूँ पंचे घलाय त इहइमेर देखउते हया, कि तूँ पंचे मसीह के चिट्ठी आह्या। जउने काहीं हम पंचे सेबकन कि नाई लिखेन हय; जउन स्याही से नहीं, बलकिन जिन्दा परमातिमा के आत्मा से, पथरा के पटिया माहीं नहीं, बलकिन हिरदँय रूपी पटिया माही लिखी हय।<sup>4</sup> अउर हम पंचे मसीह के द्वारा परमातिमा के ऊपर इहइमेर भरोसा रक्खित हएन।<sup>5</sup> अइसन नहिं आय, कि हम पंचे एतने काबिल हएन, कि सोचँड लागी, कि हम पंचे खुद कुछ काम कइ सकित हएन। बलकिन हमहीं पंचन काहीं काबिल बनामँड बाले परमातिमा आहीं।<sup>6</sup> उँइन हमहीं पंचन काहीं नई करार के सेबक बनँड के काबिल बनाइन हीं। मूसा के बिधान के सेबक नहीं, बलकिन पबित्र आत्मा के सेबक बनाइन हीं, काहेकि मूसा के बिधान मउत के सजा सुनाबत हय, पय पबित्र आत्मा जीवन देत हय।

7 अगर मउत के सजा देँड बाली उआ करार, जेखर अच्छर पथरा माहीं खोदिके लिखे गे रहे हँय, एतना तेजोमय रही हय, कि मूसा के मुँहे के तेज चमक के कारन, जउन कमव होत जात रहा हय। इजराइली लोग ओखे मुँहे कइती निहारे नहीं पाबत रहे आँय।<sup>8</sup> त आत्मा के करार, ओहू से बढ़िके तेज

चमकँड बाली काहे न होई? अरथात जरूर होई।<sup>9</sup> काहेकि जब दोसी ठहरामँड बाली करार, तेज चमकँड बाली रही हय, त परमातिमा के नजर माहीं निरदोस ठहरामँड बाली करार, ओहू से बढ़िके तेज चमकँड बाली काहे न होई? <sup>10</sup> अउर अगर तेज चमकँड बाली नई करार, के तुलना चमकँड बाली पुरान करार से कीन जाय, त चमकँड बाली पुरान करार के चमक ओखे आँगे कुछ न होय। <sup>11</sup> काहेकि पुरान करार के चमक जउन घटत जात रही हय, तऊ एतना चमकत रही हय। त उआ करार जउन हमेसा रहँड बाली हय, ओसे बढ़िके चमकँड बाली काहे न होई?

<sup>12</sup> इहय आसा के कारन हम पंचे निडर होइके बोलित हएन। <sup>13</sup> हम पंचे मूसा नबी कि नाई नहिं आहैन, जउन अपने मुँहे माहीं परदा डारे रहे हँय, कि जउने इजराइली लोग घटँय बाली उआ चमक के अन्त काहीं न देखे पामँय। <sup>14</sup> पय उनखर बुद्धी कमजोर होइगे रही हय, काहेकि आजव तक पुरान नेम पढ़त समय, उनखे हिरदँय माहीं उहय परदा परा रहत हय। पय मसीह के ऊपर बिसुआस किहे के कारन उआ परदा हटि जात हय। <sup>15</sup> अउर आजव जब-जब मूसा के लिखी किताब पढ़ी जात ही, त उनखे मन माहीं उआ परदा परा रहत हय। <sup>16</sup> पय जब कबहूँ ऊँ पंचे प्रभू के ऊपर बिसुआस करिहँय, त उआ परदा परमातिमा के द्वारा हटाय दीन जई। <sup>17</sup> काहेकि प्रभू त आत्मा आहीं: अउर जहाँ- जहाँ प्रभू के आत्मा रहत हय, उहाँ जरूर छुटकारा मिलत हय। <sup>18</sup> पय हमरे पंचन के चेहरा माहीं परदा नहिं आय, प्रभू के महिमा के चमक हमरे पंचन के चेहरा के द्वारा दुसरेन काहीं देखाई देत ही। जइसन अइना माहीं, त प्रभू के द्वारा जउन आत्मा आहीं, हम पंचे उनखे तेज चमकँड बाले रूप कि नाई थोरी-थोरी कइके बदलत जइत हएन।

#### माटी के बरतनन माहीं धरा खजाना

**4** परमातिमा हमरे पंचन के ऊपर दया कइके, इआ सेबा के काम सँपिन हीं, एसे हम पंचे हिम्मत नहीं हारी। <sup>2</sup> पय हम पंचे लज्जित करँड बाले, अउर गुप्त कामन काहीं छोंडि दिहेन हय, अउर अपने चतुराई से नहीं चली, अउर न त परमातिमा के बचन माहीं मिलबटय करित आहैन, बलकिन परमातिमा के नजर माहीं, सत्य काहीं सरल रूप से बताइके, हरेक मनइन के सोच-बिचार माहीं आपन भलाई बइठाइत हएन। <sup>3</sup> जउने खुसी के खबर के हम पंचे प्रचार करित हएन, ओमाहीं अगर कउनव परदा परा हय, त इआ केबल उनहिन के खातिर परा हय, जेतने बिनास होइ के गइल माहीं चल रहे हँय। <sup>4</sup> इआ संसार के मालिक सइतान, ई अबिसुआसी मनइन के बुद्धी काहीं भ्रष्ट कइ दिहिस ही, कि जउने ऊँ पंचे परमातिमा के साछात रूप, मसीह के महिमामय खुसी के खबर के उँजिआर काहीं न देखे पामँय। <sup>5</sup> हम पंचे आपन प्रचार नहीं करी, बलकिन यीसु मसीह के प्रचार करित हएन, कि उँइन प्रभू आहीं, अउर हम पंचे अपने बारे माहीं त इहय कहित हएन, कि हम पंचे यीसु मसीह के कारन तौहार पंचन के सेबक आहैन। <sup>6</sup> एसे कि उँइन परमातिमा आहीं, जउन कहिन रहा हय, कि “अँधिआर म से उँजिआर होइ जाय।” अउर उँइन इआ उँजिआर काहीं हमरे पंचन के हिरदँय माहीं चमकाइन हीं, कि जउने हम पंचे यीसु मसीह के सुभाव माहीं, परमातिमा के महिमा के ग्यान के उँजिआर काहीं देख सकी।

<sup>7</sup> काहेकि परमातिमा अपने असीमित सामर्थ काहीं, हमरे पंचन के देह के अंदर रक्खिन हीं, जउन टूटँड बाले माटी के बरतनन कि नाई हई, कि जउने इआ साबित होइ जाय, कि इआ सामर्थ हमार पंचन के न होय, बलकिन परमातिमय के आय। <sup>8</sup> हम पंचे चारिव कइती से दुख-मुसीबत त सहित हएन, पय संकट माहीं नहीं परी, कबहूँ-कबहूँ घबराय त जइत हएन, पय निरास नहीं होई। <sup>9</sup> मनइन के द्वारा सताए त जइत हएन; पय परमातिमा के द्वारा छोंडे नहीं जई; अउर गिराए त जइत हएन, पय नास नहीं होई। <sup>10</sup> हम पंचे अपने देह माहीं दुख-मुसीबत काहीं सहिके, यीसु के मउत माहीं भागीदार बन जइत हएन; कि जउने यीसु के जीवन हमरे पंचन के देहन से साफ- साफ देखाई देय। <sup>11</sup> काहेकि हम पंचे हमेसा यीसु के कारन जिन्दय,

मउत के हबाले कीन जइत हएन, कि जउने यीसु के जीवन हमरे पंचन के मरनहार देह से देखाई देय। <sup>12</sup> इआमेर से हम पंचे मउत के सामना करत रहित हएन, पय तौहई पंचन काहीं अनन्त जीवन मिलत हय।

<sup>13</sup> पबित्र सास्त्र माहीं लिखा हय, कि “हम बिसुआस † किहेन रहा हय, एहिन से हम बोलित हएन।” हमरेव पंचन के भीतर उहय बिसुआस के आत्मा हय। अउर हमहूँ पंचे घलाय बिसुआस करित हएन, एहिन से हमहूँ पंचे घलाय बोलित हएन। <sup>14</sup> काहेकि हम पंचे जानित हएन, कि जउन परमातिमा, प्रभू यीसु काहीं मरेन म से जिआइन हीं, उँइन हमहूँ पंचन काहीं घलाय उहयमेर जिअइहँय, जइसन यीसु काहीं जिआइन रहा हय। अउर ऊँ अपने आँगे हमहूँ पंचन काहीं घलाय, तौहरे पंचन के साथय ठाढ़ करिहँय। <sup>15</sup> अउर सब कुछ तौहरे पंचन के भलाइन के खातिर आय। जइसन-जइसन परमातिमा के किरपा जादा मनइन के ऊपर होत जात ही, त परमातिमा काहीं धन्यवाद देइ बाले घलाय बढ़त जात हैं। इआमेर से परमातिमा के महिमा बढ़त जात ही। <sup>16</sup> एहिन से हम पंचे हिम्मत नहीं हारी; जबकि हमार पंचन के देह कमजोर होत जात ही, तऊ हमार पंचन के अन्तर आत्मा हरेक दिन नई होत जात ही। <sup>17</sup> काहेकि हमार पंचन के पल भर के छोट-छोट दुख, हमहीं पंचन काहीं हमेसा के खातिर अनन्त महिमा देबाबत हैं। <sup>18</sup> अउर हम पंचे देखाई देइ बाली चीजन माहीं मन नहीं लगाई, बलकिन जउन चीजँय नहीं देखाई देती आहीं, उनहिन माहीं मन लगाइत हएन, काहेकि देखाई देइ बाली चीजँय थोरिन दिन के होती हई, पय जउन चीजँय नहीं देखाई देती, ऊँ हमेसा बनी रहती हई।

#### स्वर्ग माहीं मिलँड बाला हमार पंचन के घर

**5** काहेकि हम पंचे जानित हएन, कि हमार पंचन के तम्बू, अरथात इआ देह जउने माहीं हम पंचे इआ धरती माहीं रहित हएन, गिराय दीन जई। त हमहीं पंचन काहीं परमातिमा के द्वारा, स्वर्ग माहीं एकठे अइसन घर दीन जई, जउन हमेसा बना रही। काहेकि उआ मनइन के हाँथे से बनाबा न होई। <sup>2</sup> अउर इआ देह माहीं, हम पंचे कराहत रहित हएन। अउर बड़ी लालसा करित हएन, कि स्वर्ग माहीं मिलँड बाले अपने घरन माहीं चले जई। <sup>3</sup> हमहीं पंचन काहीं इआ पूर बिसुआस हय, कि उआ घर काहीं हम पंचे पाउब, अउर पुनि कबहूँ बेघर न रहब। <sup>4</sup> अउर हम पंचे इआ तम्बू माहीं रहत समय, बोझ से दबे कराहत रहित हएन। एखर कारन इआ हय, कि हम पंचे इआ पुरान तम्बू काहीं छोड़ँड नहीं चाही, बलकिन एहिन के साथय स्वर्ग माहीं मिलँड बाले उआ घर, अरथात नई देह काहीं पामँड चाहित हएन। जउने नास होइ बाली इआ देह काहीं अनन्त जीवन मिल जाय। <sup>5</sup> अउर परमातिमय, हमहीं पंचन काहीं एहिन के खातिर तइआर किहिन हीं, अउर उँइन बयाना के रूप माहीं आपन पबित्र आत्मा घलाय दिहिन हीं।

<sup>6</sup> एसे हम पंचे हमेसा ढाढ़स बाँधे रहित हएन, अउर इआ जानित हएन, कि जब तक हम पंचे इआ देह माहीं रहि रहेन हय, तब तक प्रभू से दूर हएन। <sup>7</sup> काहेकि हम पंचे संसारिक बातन काहीं देखिके नहीं, बलकिन बिसुआस के सहारे चलित हएन। <sup>8</sup> हमहीं पंचन काहीं इआ पूर बिसुआस हय। एहिन से हम पंचे इआ देह काहीं छोंडिके, प्रभू के लघे रहब जादा निकहा समझित हएन। <sup>9</sup> इआ कारन से हम पंचे इहय चाहित हएन, कि चाह इआ देह माहीं रही, चाह न रही, पय प्रभू काहीं निकहा लागत रही। <sup>10</sup> अउर हम पंचे इआ देह के द्वारा † जेतने निकहे अउर बुरे काम किहेन हय, उनखर बदला पामँड के खातिर, एक दिना मसीह के न्याय सिंहासन के आँगे जरूर हाजिर होइ परी।

#### परमातिमा से मेल-मिलाप करामँड के सेबा

<sup>11</sup> एसे हम पंचे परमातिमा के भय मानिके लोगन काहीं समझाइत हएन। परमातिमा हमरे पंचन के बारे माहीं सब कुछ जानत हैं। अउर हम पंचे इहय आसा करित हएन, कि तूहूँ पंचे घलाय हमरे पंचन के बारे माहीं जनते

होइहा।<sup>12</sup> हम पंचे तौहरे पंचन के सामने पुनि आपन कउनव बड़ाई नहीं कइ रहे आहैन। बलकिन तौहई पंचन काहीं एकठे मोका दइ रहेन हय, कि हमरे पंचन के बारे माहीं, घमन्ड कइ सका, अउर उनीं जबाब दइ सका जउन अपने हिरदय के बातन माहीं नहीं, बलकिन देखावटी बातन के ऊपर घमन्ड करत हैं।<sup>13</sup> अगर हम पंचे पागल कि नाई लागित हएन, त परमातिमा के खातिर; अउर अगर होस-हबास माहीं हएन, त तौहरे पंचन के फायदा के खातिर हएन।<sup>14</sup> काहेकि मसीह के प्रेम, हमहीं पंचन काहीं मजबूर कइ देत हय; एसे हम पंचे इआ समझित हएन, कि जब एक जने अरथात यीसु मसीह सगले मनइन के खातिर मरे हँय, त हमहूँ पंचे घलाय पुरान जीबन के खातिर मर गएन हँय।<sup>15</sup> अउर यीसु मसीह इहय कारन से सगले मनइन के खातिर मरे हँय, कि जउने जेतने मनई जिअत हैं, ऊँ पंचे अब से अपने खातिर न जिअँड, बलकिन यीसु मसीह के खातिर जिअँड, जउन मरिके पुनि जिन्दा होइगे हँय।

<sup>16</sup> एसे अब से हम पंचे कउनव मनई काहीं संसारिक नजर से न देखब, काहेकि एक समय हमहूँ पंचे मसीह काहीं संसारिक नजर से देखत रहे हएन। तऊ अब से हम पंचे मसीह काहीं संसारिक नजर से न देखब।<sup>17</sup> एसे अगर कउनव मनई यीसु मसीह के ऊपर बिसुआस कइ लेत हय, त उआ नई रचना बन जात हय। अउर ओखे जीबन से पुरान बातँय चली जाती हई, अउर ओखर नबा जीबन सुरू होइ जात हय।<sup>18</sup> अउर ई सगली बातँय परमातिमा के तरफ से आहीं, अउर उँइन यीसु मसीह के द्वारा हमार पंचन के मेल-मिलाप अपने साथ कइ लिहिन हीं। अउर उँइन हमहीं पंचन काहीं इआ सेबा के काम सउँपिन हीं, कि हम पंचे दुसरे मनइन के मेल-मिलाप उनखे साथ कर बाई।<sup>19</sup> अरथात परमातिमा मसीह के द्वारा संसार के मनइन के मेल-मिलाप अपने साथ कइ लिहिन हीं। अउर मनइन के अपराधन के दोस उनखे ऊपर नहीं लगाइन। बलकिन मनइन के साथ, आपन मेल-मिलाप करामँड के सँदेस, सुनामँड के सेबकाई हमहीं पंचन काहीं सउँपि दिहिन हीं।

<sup>20</sup> एसे हम पंचे मसीह के राजदूत आहैन, अउर इआ समझ ल्या, कि परमातिमा हमरे पंचन के द्वारा, तौहई पंचन काहीं समझाय रहे हँय। अउर हम पंचे, मसीह के तरफ से तौहसे बिनती करित हएन, कि तूँ पंचे परमातिमा के साथ मेल-मिलाप कइल्य।<sup>21</sup> यीसु मसीह, जिन्खे जीबन माहीं कउनव पाप नहीं रहा आय, उनहिन के ऊपर परमातिमा, हमरे पंचन के सगले पापन के बोझ लाद दिहिन, कि जउने हम पंचे यीसु मसीह के द्वारा परमातिमा के नजर माहीं निरदोस ठहरी।

**6** अउर परमातिमा के काम हम पंचे मिल जुलिके करित हएन, एसे हम पंचे, तौहसे इआ बिनती करित हएन, कि परमातिमा के जउन किरपा तौहरे पंचन के ऊपर भे ही, ओही बेकार न जाँइ द्या।<sup>2</sup> काहेकि पबित्र सास्त्र माहीं लिखा हय। कि परमातिमा कहिन हीं,

“हम सही समय माहीं तौहरे बिनती काहीं सुन लिहेन हय, अउर हम मुक्ती के दिन तौहार मदत किहेन हय †।”

एसे देखा, तौहरे पंचन के खातिर इहय सही समय हय, अउर मुक्ती पामँड के दिनव हय।<sup>3</sup> काहेकि हम पंचे हरेक बातन माहीं, इआ ध्यान रक्खित हएन, कि कोहू काहीं हमरे पंचन के ऊपर दोस लगामँड के मोका न मिलय। जउने हमरे पंचन के सेबा माहीं कउनव कलंक न लागय।<sup>4</sup> बलकिन हम पंचे परमातिमा के सेबक के रूप माहीं, खुद काहीं निकहा साबित करित हएन, बडे धीरज के साथ दुख-मुसीबत माहीं, गरीबी माहीं, संकटन माहीं,<sup>5</sup> मार सहँइ माहीं, जेल जाँइ माहीं, दंगन माहीं, मेहनत करँइ माहीं, जागत रहँइ माहीं, भूँखे रहँइ माहीं,<sup>6</sup> पबित्र रहँइ माहीं, ग्यान माहीं, धीरज धरँइ माहीं, दुसरे के ऊपर किरपा करँइ माहीं, पबित्र आत्मा माहीं, सच्चे प्रेम माहीं,<sup>7</sup> सत्य के बचन माहीं, परमातिमा के सक्ती माहीं; धारमिकता के अउजार माहीं जउन दहिने बाएँ हाँथ माहीं रहत हैं।<sup>8</sup> मान-सम्मान पामँड माहीं, अपमान सहँइ माहीं, अउर निकहा नाम पामँड माहीं, अउर बदनामी सहँइ माहीं, हरेक बातन माहीं खुद काहीं सच्चा साबित करित हएन। जबकि हम

पंचे भरमामँड बालेन कि नाई देखइत त हएन, तऊ हम पंचे सच्चे हएन।

<sup>9</sup> मनई हमहीं पंचन काहीं खास नहीं समझँय; तऊ हम पंचे मसहूर हएन; अउर हम पंचे मरँइ बाले मनइन कि नाई हएन; तऊ जिन्दा हएन। अउर हम पंचे मार खाँइ बालेन कि नाई समझे त जइत हएन, पय जान से मारे नहीं जई।<sup>10</sup> अउर हमहीं पंचन काहीं सोक करँइ बालेन कि नाई माना जात हय, पय हम पंचे हमेसा आनन्दित रहित हएन, अउर हम पंचे कंगालन कि नाई देखइत हएन, पय खुब मनइन काहीं आत्मिक रूप से धनी बनाय देइत हएन। अउर मनई समझत हैं, कि हमरे पंचन के लघे कुछू नहिं आय, तऊ हमरे पंचन के लघे सब कुछू रहत हय।

<sup>11</sup> हे कुरिन्थुस सहर माहीं रहँइ बाले भाई-बहिनिव, हम पंचे तौहसे खुलिके सगली बातन काहीं बतायन हय। अउर तौहरे खातिर अपने हिरदय माहीं कउनव कपट नहीं रक्खेन आय।<sup>12</sup> अउर हमार पंचन के प्रेम तौहरे खातिर कम नहीं भ आय। पय तूँ पंचे हमसे पंचन से प्रेम करब कम कइ दिहा हय।<sup>13</sup> पय तौहई पंचन काहीं अपने लड़िकन कि नाई समझिके कहि रहेन हय, कि तूहूँ पंचे हमसे पंचन से दिल खोलिके प्रेम करा।

### हम पंचे परमातिमा के मन्दिर आहैन

<sup>14</sup> अबिसुआसी मनइन के साथ मेल न खाँइ बाले जुआँ माहीं न जोतरा, परमातिमा के नजर माहीं निकहे काम करँइ बालेन, अउर बुरे काम करँइ बालेन के का कबहूँ मेल-जोल होइ सकत हय? इआ कि उँजिआर अउर अँधिआर के का कबहूँ मेल-जोल होइ सकत हय? <sup>15</sup> इहइमेर मसीह के तालमेल का सइतान के साथ होइ सकत हय? इआ कि बिसुआसी मनई के तालमेल का अबिसुआसी मनई के साथ होइ सकत हय? <sup>16</sup> अउर मूरतिन के साथ परमातिमा के मन्दिर के कउनव सम्बन्ध होइ सकत हय का? काहेकि हम पंचे त जिन्दा परमातिमा के मन्दिर आहैन; जइसन कि परमातिमा घलाय कहिन हीं, कि

“हम उन माहीं निबास करब; अउर उनखे बीच माहीं चला फिरा करब; अउर हम उनखर परमातिमा होब, अउर ऊँ पंचे हमार निज प्रजा होइहँय †।”<sup>17</sup> एसे परमातिमा कहत हैं, कि

“उनखे पंचन के बीच से निकर जा, अउर उनसे अलग रहा; अउर असुद्ध चीजन काहीं न छुआ, तबहिन हम तौहई पंचन काहीं सोइकार करब †।

<sup>18</sup> अउर हम तौहार पंचन के बाप होब, अउर तूँ पंचे हमार लड़िका-बिटिया होइहा। इआ सर्वसक्तिमान परमातिमा के बचन आय †।”

**7** एसे हे हमार पियार भाई-बहिनिव, जब परमातिमा हमसे पंचन से एतने कीमती वादा किहिन हीं, त आबा हम पंचे अपने देह अउर आत्मा के सगली गंदगी काहीं दूर कइके, अपने-आप काहीं सुद्ध करी। अउर परमातिमा के भय मानत पूरी तरह से पबित्र बनी।

### पवलुस के आनन्द

<sup>2</sup> काहेकि हम पंचे कोहू के कुछू नहीं बिगाडेन आय, अउर न कोहू के साथ अन्याय किहेन आय, अउर न कोहू के साथ छलय किहेन आय, एसे तूँ पंचे अपने पूरे हिरदय से हमसे पंचन से प्रेम करा।<sup>3</sup> अउर हम तौहई पंचन काहीं दोसी ठहरामँड के खातिर इआ नहिं कहि रहेन आय: काहेकि हम पहिलेन तौहई पंचन काहीं इआ बताय चुके हएन, कि तूँ पंचे हमरे हिरदय माहीं अइसन बसि गया हय, कि हम तौहरे साथ मरँइ जिअँड के खातिर घलाय तइआर हएन।<sup>4</sup> अउर हम तौहसे पूरे बिसुआस के साथ कहि रहेन हय, कि हमहीं तौहरे पंचन के ऊपर बड़ा घमन्ड हय; अउर हमहीं तौहरे कारन बड़ी सान्ती मिली हय; हम हरेकमेर के दुख-मुसीबतन काहीं सहत रहित हएन, तऊ हम खुब आनन्दित रहित हएन।

<sup>5</sup> अउर जब हम पंचे मकिदुनिया प्रदेश माहीं आएन, त उहँव हमहीं पंचन काहीं अराम नहीं मिला, काहेकि हमरे पंचन के ऊपर चारिव कइती से दुख-मुसीबत आमँड लाग रहे हँय; अउर उहाँ लड़ाई-झगड़ा सुरू रहे हँय, अउर

† 6:2 यसा 49:8

†† 6:16 लैब्य 26:11,12 † 6:17 यसा 52:11 †† 6:18 2 समू 7:8,14

हमारे पंचन के मन माहीं डेरव समान रहा हय।<sup>6</sup> पय दीन-दुखिअन काहीं ढाढ़स देई बाले परमातिमा, तीतुस काहीं हमरे पंचन के लघे पहुँचाइके, हमरव पंचन के ढाढ़स बढ़ाइन हीं।<sup>7</sup> अउर हमार पंचन के, केबल तीतुस के आमँड भर से ढाढ़स नहीं बँधा आय, बलकिन हमार पंचन के एसे अउर अधिक ढाढ़स बँधा हय, कि तूँ पंचे उनहीं केतना उत्साहित किहा तय। तीतुस हमहीं पंचन काहीं इआ बताइन, कि तूँ पंचे दुखी हया, अउर हमसे पंचन से मिलेई के खातिर केतना ब्याकुल हया, अउर तौहई पंचन काहीं हमार पंचन के केतनी चिन्ता ही, इआ बात काहीं सुनिके हम पंचे अउर जादा खुसी भएन।<sup>8</sup> जबकि हम तौहई पंचन काहीं अपने पहिल चिट्ठी से दुख त पहुँचाएन रहा हय। पहिले त हम खुब पचितानेन रहा हय, पय अब इआ बात से हमहीं कउनव पचिताबा नहिं आय, काहेकि तौहई पंचन काहीं उआ चिट्ठी से दुख त भ रहा हय, पय उआ थोरिन देर के खातिर रहा हय।<sup>9</sup> अउर अब हम खुब खुसी हएन, एसे नहीं, कि तौहई पंचन काहीं दुख भ रहा हय, बलकिन एसे कि तूँ पंचे उआ दुख के कारन अपने गलतिन काहीं मानिके पश्चाताप किहा हय। काहेकि तौहई पंचन काहीं उआ दुख परमातिमा के मरजिन से मिला रहा हय, जउने हमरे पंचन के कारन तौहई पंचन काहीं कउनव मेर नुकसान न होय।<sup>10</sup> काहेकि परमातिमा जउन दुख देत हैं, ओसे मनइन काहीं अपने गलतिन काहीं मानिके, पश्चाताप करँइ के प्रेरना मिलत ही, अउर उआ दुख से पुनि पचिताय नहीं परय। काहेकि ओसे मुक्ती मिलत ही, पय संसारिक दुख से केबल आत्मिक मउत मिलत ही।<sup>11</sup> एसे देखा, जउन दुख तौहई पंचन काहीं परमातिमा के तरफ से मिला हय, ओसे तौहरे जीवन माहीं केतना बदलाव आइगा हय, अउर तूँ पंचे अपने-आप काहीं निरदोस साबित करँइ के खातिर इच्छुक होइ गया हय, अउर जउन कुछु भ रहा हय, ओखे कारन खुब दुखी हया, अउर परमातिमा के भय मानिके, भक्ती करँइ के धुन माहीं लगे रहते हया। अउर हमसे मिलेई के इच्छा करत रहते हया। अउर पाप करँइ बालेन काहीं सजा देई के बिचार करँइ लागे हया, इआमेर से तूँ पंचे हरेकमेर से इआ साबित कइ दिहा हय, कि तूँ पंचे निरदोस हया।<sup>12</sup> अउर हम तौहरे खातिर जउन चिट्ठी लिखेन तय, त उआ अन्याय करँइ बाले के कारन नहीं, न ओखे कारन लिखेन तय, जेखे ऊपर अन्याय भ रहा हय। बलकिन एसे लिखेन तय, कि जउन उत्साह तौहई पंचन काहीं हमरे पंचन के खातिर हय, उआ परमातिमा के आँगे तौहई पंचन काहीं मालुम होइ जाय।<sup>13</sup> एसे हमहीं पंचन काहीं ढाढ़स मिला हय। अउर हमरे पंचन के इआ ढाढ़स के साथ, जउन तूँ पंचे तीतुस काहीं खुसी दिहा हय, ओखे कारन हमार पंचन के खुसी अउर बढ़िगे ही, काहेकि तौहरे पंचन के कारन तीतुस के हिरदँय खुसी से भरिगा तय।<sup>14</sup> काहेकि तीतुस के आँगे हम तौहरे पंचन के बारे माहीं, जउन घमन्ड देखायन तय, त हमहीं लज्जित नहीं होंय परा, बलकिन जइसन हम तौहसे पंचन से सही-सही बात बतायन तय, उहयमेर हमार पंचन के घमन्ड देखाउब, तीतुस के आँगे सही निकरा हय।<sup>15</sup> अउर तीतुस जब इआ सुध करत हैं, कि तूँ पंचे कइसन उनखे बातन काहीं मानत रहे हया, अउर मारे डेरन के काँपत-काँपत, तूँ पंचे कइसन उनहीं सोइकार किहा तय, त तीतुस के प्रेम तौहरे पंचन के खातिर अउरव बाढ़त जात हय।<sup>16</sup> एसे हम खुब खुसी हएन, काहेकि हमहीं हरेक बातन माहीं, तौहरे ऊपर पूर भरोसा हय।

### उदारता से दान देब

**8** अब हे भाई-बहिनिव, हम पंचे तौहई परमातिमा के उआ महान किरपा के बारे माहीं बताइत हएन, जउन मकिदुनिया प्रदेस के मसीही मन्डलिन माहीं भे रही हय।<sup>2</sup> हम इआ बात काहीं एसे बताइत हएन, कि जब उनखे जीवन माहीं दुख-मुसीबत के कारन बड़ी परिच्छा आई तय। तऊ ऊँ पंचे खुसी रहे हँय, अउर उनखे ऊपर भारी गरीबी आय गे रही हय। तऊ उनखर दान देई के उदारता कम नहीं भय, बलकिन बढ़िनगे रही हय।<sup>3</sup> काहेकि हम उनखे बारे माहीं इआ गबाही देइत हएन, कि ऊँ पंचे अपने सामर्थ से जादा, पूरे मन से हमहीं पंचन काहीं दान दिहिन रहा हय,<sup>4</sup> अउर

इआ दान के द्वारा, पबित्र मनइन के सेबा माहीं सामिल होइ के सबभाग्य उनहीं पंचन काहीं मिलय, एखे खातिर हमसे पंचन से कइअक बेरकी बिनती करत रहिगें।<sup>5</sup> अउर हम पंचे उनसे जइसन आसा करत रहेन हय, उहयमेर नहीं बलकिन ओसे बढ़िके ऊँ पंचे पहिले खुद काहीं प्रभू के खातिर समरपित किहिन, ओखे बाद परमातिमा के मरजी से हमरेव पंचन के खातिर घलाय खुद काहीं समरपित कइ दिहिन।<sup>6</sup> एसे हम पंचे तीतुस काहीं सलाह दिहेन, कि जइसन तूँ पहिले दान एकट्ठा करँइ के सुरुआत किहा तय, उहयमेर तौहरे बीच माहीं जाइके दान एकट्ठा करँइ के काम काहीं पूर करँय।<sup>7</sup> एसे जइसन तूँ पंचे हरेक बातन माहीं, अरथात बिसुआस माहीं, बात करँइ माहीं, ग्यान माहीं, अउर हरेकमेर के उपकार करँइ माहीं, अउर हमसे पंचन से प्रेम करँइ माहीं, बढ़त जाते हया। उहयमेर दान करँइ के काम माहीं घलाय बढ़त जा।

<sup>8</sup> अउर हम इआ बात काहीं, तौहई पंचन काहीं हुकुम के रूप माहीं नहीं कहि रहेन आय। बलकिन दुसरे मनइन के उत्साह के बारे माहीं कहिके, अउर तौहरे पंचन के प्रेम काहीं जाँचैय-परखँइ के खातिर कहि रहेन हय।<sup>9</sup> अउर तूँ पंचे हमरे पंचन के प्रभू यीसु मसीह के किरपा काहीं जनतेन हया, कि ऊँ केतना धनी रहे हँय, तऊ ऊँ तौहरे पंचन के खातिर एसे कंगाल बनिगें, कि जउने तूँ पंचे उनखे कंगाल होइ से धनी बन जा।<sup>10</sup> अउर एखे बारे माहीं हम तौहई पंचन काहीं आपन सलाह देइत हएन, जउन तौहरे खातिर निकही हय; तूँ पंचे पिछले साल जउन दान देई के काम सुरू किहा तय, अउर ओखर योजना तूँ पंचे खुदय बनाया तय, अब ओही पूर करइन माहीं तौहार पंचन के कल्यान होई।<sup>11</sup> एसे अब दान देई के इआ काम काहीं पूर करा; जइसन पहिले तूँ पंचे दान देई के खुब इच्छा करत रहे हया, उहयमेर अपने-अपने पूँजी के मुताबिक दान दइके ओही पूर करा।<sup>12</sup> काहेकि अगर कउनव मनई जउन ओखे लघे होय, ओमा से पूरे मन से दान देत हय, त उआ दान काहीं परमातिमा सोइकार करत हैं, इआ नहीं कि जउन ओखे लघे नहिं होय।<sup>13</sup> अउर हम इआ नहीं कही, कि तूँ पंचे आपन सगला धन दान कइ द्या, कि ओसे त दुसरे मनइन काहीं राहत मिलय, अउर तौहई पंचन काहीं दुख मिलय, बलकिन बराबरी होइ जाय।<sup>14</sup> बलकिन हम एसे इआ बात काहीं कहित हएन, कि इआ समय तौहारे पंचन के धन के बढ़ोत्तरी उनखे कमी-घटी माहीं काम आबय, जउने भबिस्य माहीं उनखे धन के बढ़ोत्तरी तौहरे पंचन के कमी-घटी माहीं काम आबय, कि जउने बराबरी होइ जाय।<sup>15</sup> अउर जइसन पबित्र सास्त्र माहीं लिखा हय, कि “जे कोऊ खुब बटोरिस रहा हय, ओखे लघे कुछु अधिकहा नहीं रहा; अउर जे कोऊ थोरिन काहीं बटोरिस रहा हय, ओहू के लघे कुछु कम नहीं रहा।”<sup>†</sup>

### तीतुस अउर उनखे साथ माहीं काम करँइ बाले साथी

<sup>16</sup> हम परमातिमा काहीं धन्यवाद देइत हएन, कि तौहार पंचन के मदत करँइ के खातिर, ऊँ तीतुस के मन माहीं उहयमेर के उत्साह भर दिहिन हीं, जइसन हमरे मन माहीं हय।<sup>17</sup> काहेकि तीतुस हमरे बात काहीं खुसी से मान लिहिन हीं, बलकिन बड़े उत्साह के साथ अपने मरजिन से तौहरे पंचन के लघे गे हँय।<sup>18</sup> अउर हम पंचे तीतुस के साथ, ऊँ भाई काहीं घलाय पठयन हँय, जिनखर नाम खुसी के खबर सुनामँड के बारे माहीं सगली मसीही मन्डलिन माहीं मसहूर हय।<sup>19</sup> अउर केबल एतनय भर नहीं, बलकिन मसीही मन्डली के द्वारा उनहीं नियुक्त घलाय कीन ग हय, कि इआ दान काहीं एकट्ठा करँइ के काम के खातिर, हमरे पंचन के साथ माहीं जाँय। अउर हम पंचे इआ सेबा के काम एसे करित हएन, कि जउने प्रभू के बड़ाई होय। अउर हमार पंचन के इआ परोपकार के काम करँइ के केतनी इच्छा ही, इआ बात मनइन काहीं मालुम होइ जाय।<sup>20</sup> अउर हम पंचे इआ बात से सतरक रहित हएन, कि जउन हम पंचे इआ दान एकट्ठा करँइ के काम करित हएन, त हमरे पंचन के ऊपर कोऊ दोस न लगाए पाबय।<sup>21</sup> काहेकि हमहीं पंचन काहीं इआ बात के हमेसा चिन्ता रहत ही, कि हम पंचे उहय काम करी,

जउन प्रभू के नजर भर माहीं निकहा नहीं, बलकिन जउन मनइन के नजर माहीं घलाय निकहा होत हय।<sup>22</sup> अउर हम पंचे तीतुस के साथ अपने ऊँ भाई काहीं घलाय पठए हएन, जिनहीं हम पंचे बेर-बेर जाँचेन परखेन हय, त उनहीं खुब बातन माहीं उत्साही पाएन हय; अउर उनहीं अब तौहरे पंचन के ऊपर बड़ा भरोसा हय, इहय कारन से उनखर उत्साह अउर जादा बढ़िगा हय।<sup>23</sup> अउर अगर कोऊ तीतुस के बारे माहीं पूँछय, त ऊँ हमार साथी आहीं। अउर तौहरे पंचन के खातिर, ऊँ हमरे पंचन के साथ माहीं सेबा के काम करँइ बाले आहीं, अउर अगर ऊँ भाइन के बारे माहीं कोऊ पूँछय, त ऊँ मसीही मन्डली के तरफ से पठए, अउर मसीह काहीं आदर देँइ बाले आहीं।<sup>24</sup> एसे तूँ पंचे उनसे खुब प्रेम किहा, अउर तौहरे पंचन के बारे माहीं, हम पंचे एतना घमन्ड काहे करित हएन, ओही सही साबित कइके देखाबा। जउने सगली मसीही मन्डली ओही देख सकँय।

### मसीही भाई-बहिनिन के खातिर मदत

9 अब उआ दान देँइ के बारे माहीं जउन पबित्र मनइन काहीं दीन जात हय, हमहीं ओखे बारे माहीं तौहई पंचन काहीं लिखब जरूरी नहीं आया।<sup>2</sup> काहेकि तूँ पंचे मदत करँइ के खातिर हमेसा उत्साहित रहते हया। इहय कारन से हम तौहरे बारे माहीं, मकिदुनिया प्रदेश माहीं रहँइ बाले, बिसुआसी भाई-बहिनिन के आँगे घमन्ड के साथ बताइत हएन, कि अखाया प्रदेश के रहँइ बाले बिसुआसी भाई-बहिनी, एक साल से दान देँइ के खातिर तइआर हें। अउर तौहरे पंचन के इआ उत्साह काहीं देखिके, खुब बिसुआसी भाई-बहिनिन काहीं दान देँइ के प्रेरना मिली हय।<sup>3</sup> पय हम कुछ भाइन काहीं तौहरे लघे एसे पठएन हय, कि हम जउन घमन्ड तौहरे बारे माहीं देखायन हय, उआ दान देँइ के बारे माहीं बेकार न ठहरय, बलकिन हम जइसन तौहरे बारे माहीं कहेन हय, उहयमेर तूँ पंचे दान देँइ के खातिर तइआर रहा।<sup>4</sup> कहँव अइसा न होय, कि मकिदुनिया प्रदेश के कुछ मनई हमरे साथ आइके इआ देखँय, कि तूँ पंचे दान देँइ के खातिर तइआर नहीं आह्या, त हमहूँ काहीं अउर तौहऊँ पंचन काहीं घलाय लज्जित होँइ परी, जबकि एखे बारे माहीं हम पंचे तौहरे ऊपर बड़ा भरोसा रक्खित हएन।<sup>5</sup> एसे हम भाइन से इआ कहब उचित समझेन, कि ऊँ पंचे हमसे पंचन से पहिलेन तौहरे लघे जाँय, अउर जउन दान देँइ के खातिर तूँ पंचे अपने मन से कहे रहे हया, ओही पहिलेन से उदारता के साथ एकट्ठा कइके तइआर रक्खा। अउर इआ काम तूँ पंचे अपने पूरे मन से किहा, कउनव दबाव से नहीं।

### दान देँइ के तरीका

<sup>6</sup> इआ बात काहीं सुध रक्खा, कि जउन किसान थोरका बीज बोई, उआ थोरिन फसल काटी; अउर जउन किसान जादा बीज बोई, उआ जादा फसल काटी।<sup>7</sup> एसे हरेक जन जइसन अपने मन माहीं ठान लेत हय, उहयमेर उआ बिना कुड़-कुड़ाए, बिना दबाव के दान करय, काहेकि परमातिमा खुसी से दान करँइ बाले मनई से प्रेम करत हे।<sup>8</sup> अउर परमातिमा तौहई पंचन काहीं हरेकमेर के उत्तम बरदान जरूरत से जादा दइ सकत हें, जउने तौहरे लघे हरेक समय जरूरत के सगली चीजँय रहँय, अउर हरेक निकहे कामन के खातिर तौहरे पंचन के लघे देँइ के खातिर सब कुछ भरपूर रहय।<sup>9</sup> जइसन पबित्र सास्त्र माहीं घलाय लिखा हय, कि

“ऊँ उदारता से कंगालन काहीं दान दिहिन, अउर उनखर धरम हमेसा बना रही †।”

<sup>10</sup> अउर परमातिमय बोमँइ बाले काहीं बीज, अउर खॉय के खातिर खाना देत हें, उँइन तौहई पंचन काहीं बीज देइहँय, अउर पइदाबार काहीं बढ़इहँय। अउर तौहरे उदारता के निकही फसल पइदा करिहँय।<sup>11</sup> इआमेर से तूँ पंचे परमातिमा के द्वारा हरेकमेर से भरपूर कीन जइहा, जउने हरेक मोका माहीं उदारता से दान दइ सका, अउर जब तौहरे दान काहीं, जिनहीं एखर जरूरत ही उनखे लघे तक पहुँचाउब, त ऊँ पंचे परमातिमा काहीं धन्यबाद देइहँय।

† 9:9 भज 112:9

<sup>12</sup> काहेकि दान के इआ पबित्र सेबा से, केबल पबित्र मनइन के जरूरतय भर पूर नहीं होय, बलकिन खुब मनई परमातिमा काहीं धन्यबाद घलाय देत हें।<sup>13</sup> अउर इआ सेबा के काम के परिनाम इआ होई, कि मनई परमातिमा के बड़ाई करिहँय। एसे कि सगले बिसुआसी भाई-बहिनिन के खातिर, तौहार पंचन के दान देँइ के उदारता इआ साबित करी, कि तूँ पंचे मसीह के खुसी के खबर काहीं सोइकार कइके ओखे आधीन रहते हया, अउर सगले बिसुआसी भाई-बहिनिन काहीं, उदारता से दान देते हया।<sup>14</sup> अउर ऊँ पंचे तौहसे प्रेम करत हें, अउर तौहरे खातिर प्राथना करत रहत हें, काहेकि तौहरे पंचन के ऊपर परमातिमा के बड़ी किरपा हय।<sup>15</sup> परमातिमा काहीं उनखे उआ दान के खातिर जउन बखान से बाहर हय, हम पंचे धन्यबाद देइत हएन।

### पवलुस के अधिकार

10 हम पवलुस यीसु मसीह कि नाई नम्र अउर दीन होइके तौहसे पंचन से बिनती करित हएन, जबकि हमरे पीठ पीछे कुछ मनई कहत हें, कि हम डरपोक हएन। पय हम इआ लिखी चिट्ठी माहीं खुब निडर देखइत हएन।<sup>2</sup> अउर हम तौहसे इआ बिनती करित हएन, कि जब हम तौहरे साथ माहीं रहब। त तूँ पंचे अइसन कउनव काम न किहा, कि हमहीं निडर होइके कठोरता देखाँइ परय। काहेकि कुछ मनई कहत हें, कि हम पंचे संसारिक जीवन जीत हएन, त हम उनखे साथ कठोर बरताव करँइ के निरनय कइ लिहेन हय।<sup>3</sup> काहेकि हमहूँ पंचे इआ संसारय माहीं रहित हएन, पय संसारिक जीवन जिअँइ बाले मनइन कि नाई लड़ित नहीं आहेन।<sup>4</sup> काहेकि हम पंचे जउने हँथिआरन से युद्ध लड़ित हएन, ऊँ इआ संसार के न होंहीं, बलकिन उन माहीं किलन काहीं तहस-नहस कइ देँइ के खातिर परमातिमा के सक्ती भरी हय।<sup>5</sup> एसे हम पंचे परमातिमा के ग्यान के बिरोध माहीं उठँय बाले हरेक सोच-बिचारन, अउर हरेक ऊँची बातन के बिरोध करित हएन, अउर हरेक उआ बिचार काहीं जउन मनइन काहीं परमातिमा के ग्यान काहीं पामँइ से रोकत हें, उनहीं बंदी बनाइके मनइन काहीं मसीह के हुकुमन काहीं मानँइ बाला बनाय देइत हएन।<sup>6</sup> अउर जब तूँ पंचे पूरी तरह से हुकुम मानँइ के खातिर तइआर हया, त जउन हुकुम नहीं मानँइ, उनहीं हम पंचे सजा देँइ के खातिर तइआर रहित हएन।

<sup>7</sup> अउर तूँ पंचे उँइन बातन काहीं देखते हया, जउन तौहई पंचन काहीं देखाती हई, अगर कोऊ अपने ऊपर इआ भरोसा करत हय, कि हम मसीह के भक्त आहेन, त उआ इहव जान लेय, कि जइसन उआ मसीह के भक्त आय, उहयमेर हमहूँ पंचे मसीह के भक्त आहेन।<sup>8</sup> काहेकि अगर हम उआ अधिकार के बारे माहीं अउर जादा घमन्ड देखाई, जउने काहीं प्रभू हमहीं दिहिन हीं। त उआ तौहई पंचन काहीं आत्मिक रूप से मजबूत बनामँइ के खातिर आय, बिगाँइके के खातिर न होय, एसे हम उआ अधिकार से लज्जित न होब।<sup>9</sup> तूँ पंचे इआ न समझा, कि हम अपने चिट्ठिन के द्वारा तौहई पंचन काहीं डेरबामँइ चाहित हएन।<sup>10</sup> काहेकि कुछ मनई कहत हें, कि “पवलुस के लिखी चिट्ठी त खुब गम्भीर अउर प्रभावसाली हई; पय जब ऊँ मनइन के आँगे आबत हें, त ऊँ देँह से निबल देखात हें, अउर बोलऊँ माहीं हुसिआर नहीं आहीं।”<sup>11</sup> एसे ऊँ पंचे जउन इआमेर कहत हें, इआ जान लेय, कि जउन बातँय हम दूर रहिके, अपने चिट्ठिन माहीं लिखेन हय, त जब हम तौहरे पंचन के लघे अउब, त उहयमेर हमार पंचन के काम घलाय होइहँय।<sup>12</sup> काहेकि हमार पंचन के इआ हिम्मत नहीं परय, कि हम पंचे अपने-आप काहीं उनखे कि नाई मानी, अउर आपन तुलना उनसे करी। जउन अपने-आप काहीं खुब खास मानत हें, पय जब ऊँ पंचे आपस माहीं एक दुसरे से तुलना करत हें, कि को खास हय, को खास नहीं आय, त ऊँ पंचे इआ देखाबत हें, कि ऊँ केतना मूरुख हें।

<sup>13</sup> हम पंचे सीमा से बाहर बेलकुल घमन्ड न करब, पय उहय सीमा तक घमन्ड करब, जहाँ तक परमातिमा हमरे पंचन के खातिर निश्चित किहिन हीं। अउर इआ सीमा के भितरय तुहूँ पंचे घलाय अउते हया, अउर ओहिन के

मुताबिक घमन्ड घलाय करब।<sup>14</sup> काहेकि हम पंचे अपने सीमा के उलंघन नहीं करैइ चाही, जइसन कि हम पंचे तौहरे लघे न पहुँच पाइत त होइ जात। पय हम पंचे मसीह के खुसी के खबर लइके तौहरे लघे पहुँच चुकेन हय।<sup>15</sup> अउर हम पंचे अपने उचित सीमा से बहिरे जाइके, दुसरे मनइन के कीन काम माहीं घमन्ड नहीं करी, काहेकि हमहीं पंचन काहीं आसा ही, कि तौहार पंचन के बिसुआस जइसय-जइसय बढ़त जई, ओइसय-ओइसय तौहरे पंचन के कारन, हमरे पंचन के कामन के सीमा अउर बढ़त जई।<sup>16</sup> अउर हम पंचे इआ चाहित हएन, कि तौहरे इलाका से आँगे बढ़िके, दुसरे इलाकन माहीं खुसी के खबर सुनाई, पय इआ नहीं चाही, कि दुसरे मनइन के कीन कामन के ऊपर घमन्ड करी।<sup>17</sup> अउर जइसन पबित्र सास्त्र माहीं घलाय लिखा हय, कि “अगर कोऊ घमन्ड करैइ चाहय, त उआ प्रभू के काम के ऊपर घमन्ड करय।”<sup>18</sup> काहेकि जउन मनई आपन बड़ाई खुदय करत हय, उआ नहीं, बलकिन जेखर बड़ाई प्रभू करत हैं, उहय परमातिमा के द्वारा सोइकार कीन जात हय।

### पवलस अउर लबरे उपदेसक

**11** अगर तू पंचे हमार थोर-बहुत मुखई बरदास कइ लेत्या, त केतना निकहा होत; पय अब हम इआ कहित हएन, कि तू पंचे ओही बरदास कइल्या।<sup>2</sup> काहेकि हम तौहरे खातिर, परमातिमा कि नाई चिन्ता करित हएन, एसे कि हम तौहार पंचन के सगाई एकयठे मनई से अरथात मसीह यीसु से कराय दिहेन हय, कि जउने हम तौहई पंचन काहीं पबित्र कुमारी कन्या कि नाई उनहिन काहीं सउँपि देई।<sup>3</sup> पय हम डेरातव रहित हएन, कि जइसन साँप अपने चतुराई से हब्बा काहीं बहकाय दिहिस रहा हय, उहयमेर तौहरे पंचन के मन माहीं उआ निरमल भक्ती, अउर पबित्रता जउन मसीह के खातिर होइ चाही, कहँव ओसे भटकाय न दीन जा।<sup>4</sup> काहेकि अगर कोऊ तौहरे लघे आइके, कउनव दुसरे यीसु के बारे माहीं प्रचार करत हय, जेखर प्रचार हम पंचे नहीं किहेन तय। इआ कि अउर कउनव दूसर आत्मा तौहई पंचन काहीं मिलय, जउन पहिले नहीं मिला रहा आय। इआ कि अउर कउनव दूसर खुसी के खबर सुनाबय, जउने काहीं तू पंचे पहिले नहीं माने रहे आह्या, त तू पंचे ओही सोइकार कइ लेते हय।<sup>5</sup> अउर हम इआ समझित हएन, कि हमहूँ कउनव बात माहीं बड़े से बड़े यीसु के खास चलन से कम नहीं आहने।<sup>6</sup> अगर हम बोलैइ माहीं कमजोर हएन, तऊ ग्यान माहीं कमजोर नहीं आहने, अउर हम इआ ग्यान काहीं हरेक बातन माहीं, अउर हरेकमेर से तौहई पंचन काहीं बतायन हय।<sup>7</sup> तौहई पंचन काहीं ऊँचा उठामँई के खातिर अपने-आप काहीं नीच बनायन, अउर सँत-मेंत माहीं तौहई पंचन काहीं खुसी के खबर सुनाइके, का कउनव गलती किहेन हय?<sup>8</sup> अउर हम दुसरे मसीही मन्डलिन काहीं लूटेन हय, अरथात सेबा के बदले माहीं चंदा लिहेन, जउने तौहरे बीच माहीं सेबा के काम कइ सकी।<sup>9</sup> अउर जब हम तौहरे साथ माहीं रहेन हय, तबहूँ हमहीं पइसा के जरूरत रही हय, पय हम कोहू से नहीं माँगन, कि जउने ओखे ऊपर हमार बोझ न परय, काहेकि जउन भाई लोग मकिदुनिया प्रदेस से आए रहे हँय, उँइन पंचे हमरे जरूरत काहीं पूर कइ दिहिन तय। अउर हम हरेक बात माहीं तौहरे पंचन के ऊपर बोझ नहीं बनेन आय, अउर न कबहूँ बनबय करब।<sup>10</sup> अगर मसीह के सच्चाई हमरे अंदर हय। त अखाया प्रदेस माहीं हमहीं इआ घमन्ड करैइ से कोऊ रोक नहीं सकय।<sup>11</sup> हम तौहसे पंचन से चंदा नहीं लिहेन तय, त तू पंचे इआ न समझा, कि हम तौहसे प्रेम नहीं करी। बलकिन परमातिमा जानत हैं, कि हम तौहसे केतना प्रेम करित हएन।<sup>12</sup> पय हम जउन करित हएन, उहय करत रहब; जउने हम हरेक ऊँ मोकन काहीं खतम कइ सकी, जउन ऊँ पंचे अपने घमन्ड के बातन माहीं, हमरे पंचन कि नाई होइ के दाबा करत हैं।<sup>13</sup> इआमेर के मनई लबरे उपदेसक अउर छल से काम करैइ बाले आहीं, जउन मसीह के खास चेला होइ के ढोंग करत हैं।<sup>14</sup> अउर इआ कउनव अचरज के बात न होय, काहेकि

सइतान घलाय उँजिआर माहीं रहँइ बाले स्वरगदूत कि नाई आपन रूप बनाय लेत हय।<sup>15</sup> एसे सइतान के सेबक घलाय अगर मसीह के सेबक कि नाई रूप बनाय लेत हैं, त इआ कउनव बड़ी बात न होय। पय अन्त माहीं ऊँ पंचे अपने-अपने कामन के मुताबिक प्रतिफल जरूर पइहँय।

### अपने दुखन के बारे माहीं पवलस के बखान

<sup>16</sup> हम पुनि तौहसे पंचन से कहित हएन, कि कोऊ हमहीं मूरुख न समझय; अगर तू पंचे हमहीं मूरुख समझते हया, त मूरुखय समझिके हमरे बातन काहीं मानि ल्या, जउने हमहूँ थोर काहीं घमन्ड कइ सकी।<sup>17</sup> अउर हम जउन इआ बात घमन्ड के साथ कहि रहेन हय, त इआ प्रभू के हुकुम के मुताबिक न होय, बलकिन हम इआ एक मूरुख कि नाई कहि रहेन हय।<sup>18</sup> काहेकि खुब मनई अपने संसारिक जीवन के ऊपर घमन्ड करत हैं, त हमहूँ घमन्ड करब।<sup>19</sup> पय तू पंचे बड़े समझदार होइके, मूरुखन के बातन काहीं बड़े खुसी से सहि लेते हया।<sup>20</sup> अउर जब कउनव मनई, तौहई पंचन काहीं आपन गुलाम बनाइके, तौहार धन-सम्पत लूट लेत हय। अउर अपने जाल माहीं फँसाइके, खुद काहीं तौहसे बड़ा बनाबत हय। अउर तौहरे मुँहे माहीं थापड़ घलाय मारत हय, तऊ तू पंचे सहि लेते हया।<sup>21</sup> अउर इआ बात हम बड़े सरम के साथ कहि रहेन हय, मानि ल्या, कि हम खुब कमजोर रहेन हय। पय अगर कोऊ कउनव बात माहीं घमन्ड करैइ के हिम्मत करत हय, त हमहूँ घलाय हिम्मत कइ सकित हएन। (अउर इआ बात हम मूरुख कि नाई कहित हएन।)

<sup>22</sup> अगर ऊँ पंचे अपने-आप काहीं इब्रानी समझत हैं, त हमहूँ इब्रानी आहने। अउर अगर ऊँ पंचे अपने-आप काहीं इजराइली समझत हैं, त हमहूँ इजराइली आहने, अउर अगर ऊँ पंचे समझत हैं, कि हम पंचे अब्राहम के सन्तान आहने, त हमहूँ अब्राहम के सन्तान आहने।<sup>23</sup> अगर ऊँ पंचे खुद काहीं मसीह के सेबक समझत हैं, त हमहूँ पागल कि नाई इआ कहित हएन, कि हम उनसे बढ़िके हएन। चाह उआ मेहनत करैइ माहीं होय, चाह उआ बेर-बेर जेल जाँइ माहीं होय, चाह उआ च्याबुक से मार खाँइ माहीं होय। चाह उआ बेर-बेर मउत के मुँहे म जाँइ माहीं होय।<sup>24</sup> अउर हम पाँच बेरकी यहूदी लोगन के हाँथे से ओनतालिस-ओनतालिस च्याबुक मार खायन हँय।<sup>25</sup> तीन बेरकी हम लाठिन † से मार खायन हँय; अउर एक बेरकी हमरे ऊपर पथरहाव घलाय कीन ग रहा हय, अउर तीन बेरकी हम जउने-जउने जिहाज माहीं चढ़े रहेन हय, ऊँ टूट गें तय, अउर एक दिन अउर एक रात हम समुंद्र के गहिल पानी माहीं बितायन हय।<sup>26</sup> अउर जब हम बेर-बेर यात्रा करत रहेन हय, त कइअक बेरकी हमहीं खतरन के सामना करैइ परा, जइसन-नदियन के खतरा, अउर डँकुअन के खतरा; अपने जाति बालेन के खतरा, अउर गैरयहूदी मनइन के खतरा; अउर सहरन के खतरा; अउर जंगल के खतरा; समुंद्र के खतरा; कपटी भाइन के खतरा।<sup>27</sup> अउर हम कड़ी मेहनत करैइ माहीं, बेर-बेर रातभर जागत रहँइ माहीं; भूँख पिआस सहँइ माहीं; कइअक बेरकी बिना खाना खाए रहँइ माहीं, जाइ सहँइ माहीं, उँघार रहँइ माहीं।<sup>28</sup> अउर ई बातन के अलाबा, हमहीं सगली मसीही मन्डलिन के चिन्ता हरेक दिन सताबत रहत ही।<sup>29</sup> अउर जब कोऊ निबल होत हय, त का हमहूँ निबल नहीं होई? अउर जब कोऊ पाप माहीं फँसि जात हय, त का हमार जिव दुखी नहीं होय?

<sup>30</sup> अगर घमन्ड करब जरूरी हय, त हम अपने निबलता के बातन के ऊपर घमन्ड करब।<sup>31</sup> अउर प्रभू यीसु के पिता परमातिमा जउन हमेसा बड़ाई के काबिल हैं, ऊँ जानत हैं, कि हम झूठ नहीं बोली।<sup>32</sup> अउर जब हम दमिस्क सहर माहीं रहेन हय, तब राजा अरितास के राजपाल के तरफ से, हमहीं बंदी बनामँई के खातिर पहरा लगबाबा ग रहा हय।<sup>33</sup> पय हमहीं कुछ जने टोपरा माहीं बइठाइके, सहर के चारिव कइती जउन भीती रही हय, ओखे खिड़की से बहिरे उतार दिहिन तय। अउर इआमेर से हम राजपाल के हाँथे से बचिके निकरि आएन तय।



### पवलुस काहीं दरसन मिलब

12 जबकि घमन्ड करे से कउनव फायदा नहीं होय, तऊ हमहीं घमन्ड करँइ पर रहा हय, एसे जउन दरसन अउर प्रकासन प्रभू हमहीं दिहिन हीं, हम उनखर चरचा करब।<sup>2</sup> अउर हम मसीह के ऊपर बिसुआस करँइ बाले एकठे मनई काहीं निकहा से जानित हएन, जउने काहीं चउदा बरिस पहिले तिसरे स्वरग तक उठाय लीनगा रहा हय, हम इआ नहीं जानी, कि उआ देह सहित उठाय लीनगा रहा हय, इआ कि बिना देह के। इआ बात काहीं त केबल परमातिमय जानत हैं।<sup>3</sup> अउर हम उआ मनई काहीं निकहा से जानित हएन, पय इआ नहीं जानी, कि उआ देह सहित उठाय लीनगा रहा हय, इआ कि बिना देह के। इआ बात काहीं त केबल परमातिमय जानत हैं।<sup>4</sup> उआ मनई जउन स्वरग लोक माहीं उठाय लीनगा रहा हय, उआ अइसन बातन काहीं सुनिस, कि जिनहीं बताबा नहीं जाय सकय; अउर जिनहीं बतामँइ के अनुमति मनई काहीं नहीं आय।<sup>5</sup> उआ मनई के ऊपर त हम घमन्ड करब, पय हम अपने निबलता काहीं छोड़िके, अउर कउनव बात माहीं अपने ऊपर घमन्ड न करब।<sup>6</sup> एसे अगर हम अपने ऊपर घमन्ड करँइ चाही, तऊ मूरुख न कहाउब। काहेकि हम सहिन सही बोलब; तऊ हम रुक जइत हएन, कि कहँव अइसा न होय, कि जइसन हमहीं कोऊ समझत हय, इआ कि हमसे सुनत हय, त ओसे बढ़िके हमहीं समझँय लागय।<sup>7</sup> अउर इहव बात ही, कि जउन हमहीं एतने भारी प्रकासन मिले हँय, त हम उनखे कारन घमन्ड से फूल न जई। एसे हमरे देह माहीं एकठे काँटा छेदा ग हय, अरथात सइतान के एकठे दूत हमहीं कस्ट देत रहत हय, जउने हम घमन्ड से फूल न जई।<sup>8</sup> अउर इआ काँटा के बारे माहीं हम प्रभू से तीन बेरकी बिनती किहेन, कि इआ हमरे जीबन से दूर होइ जाय।<sup>9</sup> पय प्रभू हमसे कहिन, कि “हमार किरपय तौहरे खातिर खुब ही; काहेकि निबलता माहीं हमार सक्ती पूरी तरह से काम करत ही।” एसे हम अपने निबलता के ऊपर बड़े खुसी के साथ घमन्ड करित हएन, कि जउने मसीह के सक्ती हमरे भीतर रहय।<sup>10</sup> इहय कारन से हम मसीह के खातिर अपने कमजोरिन माहीं, अपमान सहँइ माहीं, अउर गरीबी माहीं, अउर अपने ऊपर हॉइ बाले अत्याचारन माहीं, अउर दुख-मुसीबतन माहीं, खुसी रहित हएन। काहेकि जब हम निबल होइत हएन, तबहिन हमहीं बल मिलत हय।

### कुरिन्थुस सहर के बिसुआसी लोगन के खातिर पवलुस के चिन्ता

11 हम मूरुख त बनेन, पय तुहिन पंचे हमहीं अइसन करँइ के खातिर मजबूर किहा तय, तौहई पंचन काहीं त हमार बड़ाई करँइ चाही, जबकि हम अपने-आप काहीं कुछ नहीं मानी, तऊ इआ जानिल्या, कि हम उन बड़े से बड़े यीसु मसीह के खास चलन से कउनव बात माहीं कम नहीं आहने।<sup>12</sup> अउर जब हम तौहरे पंचन के बीच माहीं रहेन हय, त यीसु मसीह के खास चेला हॉइ के सबूत देखायन तय, जइसन कि हरेकमेर के धीरज के साथ चिन्हन काहीं देखाउब, अउर अचरज के कामन काहीं करब, अउर सामर्थ के कामन काहीं घलाय कइके देखाउब।<sup>13</sup> अउर तूँ पंचे कउनव बात माहीं दुसरे मसीही मन्डलिन से कम नहीं रहे आह्या। केबल इआ बात माहीं, कि हम तौहरे पंचन के ऊपर आपन बोझ नहीं डारेन, कि तूँ पंचे हमार खरचा उठाबा; हमरे इआ गलती काहीं माफ करा।<sup>14</sup> देखा, अब हम तिसराय तौहरे पंचन के लघे आमँइ के खातिर तइआर हएन। पय हम तौहरे ऊपर कउनव मेर से बोझ न बनब। काहेकि हमहीं तौहरे धन-सम्पत के कउनव जरूरत नहीं आय, बलकिन तौहार जरूरत ही। एसे कि लड़िका-बच्चा अपने महतारी-बाप के खातिर धन नहीं जोरय, बलकिन महतारी-बाप लड़िकन-बच्चन के खातिर धन जोरत हैं।<sup>15</sup> हमरे लघे जउन कुछ हय, त ओही हम तौहरे खातिर खुसी के साथ खरचा करब, इहाँ तक कि अपने-आप काहीं घलाय तौहरे खातिर खरचा कइ डारब। जब हम तौहसे एतना प्रेम करित हएन, त का तौहऊँ काहीं हमसे ओतनय प्रेम न करँइ चाही? <sup>16</sup> का तूँ पंचे अइसा सोचते हया? कि हम तौहरे ऊपर कउनव

बोझ नहीं डारेन। पय चलाँकी से धोखा दइके, तौहई पंचन काहीं फँसाय लिहेन हय।<sup>17</sup> अउर तूँ पंचे इआ बताबा, कि जिनहीं हम तौहरे लघे पठएन तय, त का उनमा से कउनव के द्वारा तौहई पंचन काहीं धोखा दइके कुछ लिहेन हय? <sup>18</sup> अउर हम तीतुस काहीं समझाइके, तौहरे लघे पठएन तय, अउर उनखे साथ एकठे भाई काहीं घलाय पठएन तय, त इआ बताबा, कि का तीतुस तौहई पंचन काहीं धोखा दइके तौहसे कुछ लिहिन तय? का हम पंचे एकय आत्मा से नहीं चली? अउर का एकय गइल माहीं नहीं चली?

<sup>19</sup> तूँ पंचे अबय तक इहय सोचते होइहा, कि हम पंचे अपने बारे माहीं सफाई दइ रहेन हय। नहीं, पय हम पंचे त परमातिमा काहीं हाजिर जानिके, मसीह के सेबक के रूप माहीं बोलि रहेन हय। अउर हे पियार भाई-बहिनिव, ई सगली बातँय, हम पंचे, तौहई आत्मिक रूप से मजबूत बनामँइ के खातिर कहि रहेन हय।<sup>20</sup> काहेकि हमहीं इआ बात के डेर हय, कि कहँव अइसा न होय, कि जब हम तौहरे लघे अई, त जइसन तौहई पंचन काहीं हम पामँइ चाहित हएन, त उआमेर न पाई, अउर तुहँ पंचे घलाय हमहीं जइसन पामँइ चहते हया, त उआमेर न पाबा। अउर हम इआ नहीं चाही, कि तौहरे बीच माहीं, लड़ाई-झगड़ा होय, डाह होय, क्रोध होय, बिरोध होय, जलन होय, चुगली करब होय, घमन्ड होय, कउनव बात के बखेड़ा होय।<sup>21</sup> अउर हमहीं इहव बात के डेर हय, कि जब हम तौहसे मिलँइ के खातिर अई। त तौहरेन आँगे, हमार परमातिमा हमहीं लज्जित न करँइ; अउर हमहीं उनखे खातिर दुखी होंय परय, जउन पहिले पाप किहिन तय, अउर घिनहे-घिनहे काम किहिन तय, अउर ब्यभिचार किहिन तय, अउर भोग-बिलास के काम किहिन तय, पय उनखे खातिर पस्चाताप नहीं किहिन आय।

### इआ चिट्ठी माहीं पवलुस के आखिरी चेतउनी

13 अब हम तिसराय तौहरे पंचन के लघे आय रहेन हँय। अउर जइसन पबित्र सास्त्र माहीं लिखा हय, उहयमेर “हरेक बात दुइ इआ कि तीन गबाहन के गबाही के द्वारा सही इआ कि गलत साबित कीन जई †।”<sup>2</sup> अउर जब हम दुसराय तौहरे साथ माहीं रहेन हँय, त तौहई पंचन काहीं चेतायन तय। उहयमेर अब जब हम तौहसे दूर हएन, तऊ जे कोऊ पाप किहिन हीं, उनहीं अउर बाँकी सगले मनइन काहीं घलाय पहिलेन से चेताए देइत हएन, कि जब हम पुनि तौहरे लघे अउब, त उनहीं कइसव न छोड़ब।<sup>3</sup> इआमेर हम एसे कहित हएन, कि तूँ पंचे इआ बात के सबूत चहते हया, कि मसीह हमरे द्वारा बोलत हैं, कि नहीं, पय तूँ पंचे इआ जानिल्या, कि मसीह तौहरे खातिर निबल नहीं आहीं, बलकिन तौहरे पंचन के बीच माहीं सामरथी हैं।<sup>4</sup> इआ बात सही आय, कि जब मसीह काहीं क्रूस माहीं चढ़ाबा ग रहा हय, त ऊँ निबल देखात रहे हँय, पय अब परमातिमा के सक्ती से जिन्दा हैं। एसे हमहूँ पंचे घलाय मसीह माहीं निबल देखइत हएन, पय परमातिमा के सक्ती से हमहूँ पंचे मसीह के साथ जिअत रहब। जउने तौहार पंचन के सेवा करत रही।<sup>5</sup> अउर अपने-आप काहीं तूँ पंचे जाँचा-परखा, कि बिसुआस माहीं बने हया, कि नहीं, अउर इहव जाँच करा कि मसीह तौहरे पंचन के जीबन माहीं हैं, कि नहीं। नहीं त तूँ पंचे परमातिमा के नजर माहीं निकम्मा ठहरिहा।<sup>6</sup> पय हम इहय आसा करित हएन, कि तूँ पंचे जान लेइहा, कि हम पंचे निकम्मा नहीं आहने।<sup>7</sup> अउर हम पंचे अपने परमातिमा से इहय प्राथना करित हएन, कि तूँ पंचे कउनव बुरे काम न करा; हम पंचे इआ प्राथना एसे नहीं करी, कि हम पंचे सही देखाई परी, पय एसे करित हएन, कि तूँ पंचे भलाई के काम करा, चाह हम पंचे भले इआ परिच्छा माहीं असफल ठहरी।<sup>8</sup> काहेकि हम पंचे सत्य के बिरोध माहीं, कुछ नहीं कइ सकी, पय सत्य के खातिर सब कुछ कइ सकित हएन।<sup>9</sup> अउर जब हम पंचे निबल हएन, अउर तूँ पंचे बलमान हया, त हम पंचे आनन्द से भर जइत हएन, अउर इआ प्राथना घलाय करित हएन, कि तूँ पंचे पूरी तरह से बिसुआस माहीं मजबूत बन जा।<sup>10</sup> जबकि अबे हम तौहसे दूरी हएन, तऊ ई बातन काहीं तौहरे खातिर लिख रहेन हय, कि जब हम तौहरे बीच माहीं

अउब त, जउन अधिकार हमहीं प्रभू दिहिन हीं, त उआ तोंहरे फायदय के खातिर दिहिन हीं, हानि के खातिर न होय, त तूँ पंचे इआ ध्यान रख्या, कि हमहीं ओखर उपयोग कड़ाई से न करँइ परय।

#### पवलुस के नबस्कार

<sup>11</sup> हे भाई-बहिनिव, हम अपने बातन काहीं खतम करित हएन, अउर आखिर माहीं हम तोंहई पंचन काहीं इआ लिखित हएन, कि तूँ पंचे

आनन्दित रहा, बिसुआस माहीं मजबूत बनत जा, ढाढ़स रक्खा; अउर आपस माहीं एक मन रहा; एक दुसरे से मिल जुलिके रहा, अउर प्रेम अउर सान्ती देंइ बाले परमातिमा हमेसा तोंहरे पंचन के साथ रइहँय। <sup>12</sup> अउर बड़े खुसी के साथ एक दुसरे से गले मिलिके नबस्कार करा। <sup>13</sup> अउर इहाँ के सगले बिसुआसी भाई-बहिनी, तोंहई पंचन काहीं नबस्कार करत हैं। <sup>14</sup> अउर प्रभू यीसु मसीह के किरपा, परमातिमा के प्रेम अउर पबित्र आत्मा के सहभागिता तोंहरे पंचन के साथ हमेसा होत रहय।

# गलातियन

## इआ चिट्ठी के परिचय

जब यीसु के खुसी के खबर के प्रचार-प्रसार गैरयहूदी लोगन के बीच माहीं होंइ लाग, तब इआ सबाल उठा, कि एक सच्चा मसीही होंइ के खातिर मनई काहीं मूसा के बिधान काहीं पालन करब जरूरी हय, कि नहीं। पवलुस इआ तरक पेस करत हैं, कि इआ जरूरी नहीं आय। ऊँ कहत हैं कि वास्तव माहीं मसीही जीवन के एक मात्र ठोस अधार हय, उआ हय बिसुआस। ओहिन के व्दारा सगले मनइन के परमातिमा के साथ सम्बन्ध सुधरत हय। पय एसिया माइनर माहीं स्थित रोम देस माहीं, गलातिया प्रदेश के मसीही मन्डली के कुछ मनई पवलुस के बिरोध किहिन, अउर इआ दाबा किहिन कि परमातिमा के साथ सही सम्बन्ध के खातिर, मनई काहीं मूसा के बिधान के पालन करब घलाय जरूरी हय। गलातियन के खातिर यीसु मसीह के खास चेला पवलुस के चिट्ठी एसे लिखी गे रही हय, कि ऊँ पंचे जउन इआ गलत सिच्छा से बहक गे रहे हय, उनहीं पंचन काहीं सच्चे बिसुआस अउर बेउहार माहीं लउटाय लाबा जाय। पवलुस इआ चिट्ठी के सुरुआत यीसु मसीह के खास चेला होंय के अपने अधिकार के समर्थन के साथ करत हैं। ऊँ इआ बात के ऊपर जोर देत हैं, कि यीसु मसीह के खास चेला होंइ के खातिर ओखर बोलाबा जाब परमातिमा के तरफ से होत हय, न कि कउनव मनइन के अधिकार से; अउर इआ कि ओखर उद्देश्य खास करके गैरयहूदी लोगन के बीच माहीं खुसी के खबर के प्रचार करब रहा हय। पुनि ऊँ इआ तरक पेस करत हैं, कि केबल बिसुआस के व्दारा मनइन के सम्बन्ध परमातिमा के साथ सुधरत हय। अन्त के पाठन माहीं पवलुस इआ बताबत हैं, कि मसीह माहीं बिसुआस किहे के कारन उत्पन्न प्रेम के व्दाराय, मसीही चाल-चलन सोभाबिक रूप से देखाई देत हय।

रूप-रेखा :

भूमिका

यीसु मसीह के खास चेला के रूप माहीं पवलुस के अधिकार

परमातिमा के किरपा के खुसी के खबर

मसीही अजादी अउर जबाबदारी

उपसंहार

## पवलुस के अभिवादन

1 हम यीसु मसीह के खास चेला पवलुस आहैन, अउर इआ चिट्ठी काहीं लिख रहेन हय, अउर हमहीं यीसु मसीह के खास चेला होंय के अधिकार न मनइन के तरफ से मिला आय। अउर न कउनव मनई के व्दारा, बलकिन यीसु मसीह के खास चेला होंय के अधिकार, हमहीं यीसु मसीह अउर पिता परमातिमा के व्दारा मिला हय, जउन यीसु मसीह काहीं मरेन म से जिआइन रहा हय। 2 अउर हमरे अउर सगले भाइन के तरफ से जउन हमरे साथ माहीं हैं, इआ चिट्ठी गलातिया प्रदेश के मसीही मन्डली काहीं मिलय।

3 हम पंचे प्राथना करित हएन, कि हमरे पंचन के पिता परमातिमा अउर प्रभू यीसु मसीह के तरफ से तोंहई पंचन काहीं किरपा, अउर सान्ती मिलत रहय। 4 यीसु मसीह हमरे पंचन के पापन के खातिर खुद काहीं बलिदान कइ दिहिन, जउने पिता परमातिमा के इच्छा के मुताबिक, हमहीं पंचन काहीं इआ बुरे संसार से छोड़ामँइ। 5 अउर परमातिमा के बड़ाई जुग-जुग तक होत रहय। आमीन!

## सच्ची खुसी के खबर एकयठे हय

6 हमहीं बड़ा अचरज होत हय, कि तूँ पंचे ऊँ परमातिमा काहीं जउन मसीह के किरपा अउर मदत से तोंहई पंचन काहीं चुनिन रहा हय, उनहीं एतना हरबी छोंडिके, जउन खुसी के खबर मसीह के न होय, ओही अपनामँइ लागे हय। 7 अउर तूँ पंचे इआ जानिल्या, कि मसीह के खुसी के खबर के अलाबा, कउनव दूसर खुसी के खबर हइअय नहीं आय: पय बात

इआ आय, कि कुछ मनई अइसन हैं, जउन मसीह के खुसी के खबर काहीं गलत तरीका से बताइके, तोंहई पंचन काहीं घबराय देत हैं। 8 पय तूँ पंचे इआ जानिल्या, कि मसीह के खुसी के खबर जउन हम पंचे तोंहई पंचन काहीं सुनायन हय, ओही छोंडिके, अगर कोऊ कउनव दूसर मेर के खुसी के खबर सुनाई, त उआ परमातिमा से जरूर सजा पाई, चाह उआ हम पंचे होई चाह कउनव स्वरगदूत। 9 जइसा हम पंचे पहिलेन एक बेरकी तोंहसे कहि चुकेन हय, उहयमेर अब हम पुनि कहित हएन, कि मसीह के खुसी के खबर काहीं छोंडिके, जउने काहीं तूँ पंचे अपनाया हय, अगर कोऊ ओखे अलाबा, दूसर मेर के खुसी के खबर सुनाबत हय, त उआ परमातिमा से जरूर सजा पाई।

10 का एसे तोंहई पंचन काहीं अइसन लागत हय, कि हम मनइन काहीं प्रसन्न करँइ चाहित हएन? कि परमातिमा काहीं प्रसन्न करँइ चाहित हएन? पय तूँ पंचे इआ जानिल्या, कि अगर हम अबे तक मनइन काहीं प्रसन्न करत रहित, त मसीह के सेबक न होइत।

## पवलुस कइसन यीसु मसीह के खास चेला बने

11 हे भाई-बहिनिव, हम तोंहई पंचन काहीं जताए देइत हएन, कि जउने खुसी के खबर काहीं हम तोंहई सुनायन हय, उआ कउनव मनई के बिचार के मुताबिक न होय। 12 काहेकि इआ खुसी के खबर हमहीं प्रभू यीसु मसीह के प्रगत करँइ के व्दारा मिली हय, उआ हमरे बाप-दादन के बताई न होय, अउर न कउनव गुरू के सिखाइन आय। 13 अउर यहूदी धरम के मुताबिक जउन पहिले हमार चाल-चलन रहा हय, ओही त तूँ पंचे जनतेन हया; कि पहिले हम परमातिमा के मसीही मन्डली के मनइन काहीं सताबत रहेन हय,

इहाँ तक कि नास करँइ के कोसिस करत रहेन हय।<sup>14</sup> अउर यहूदी धरम काहीं पालन करँइ माहीं अपने जाति के अपने बराबरी बाले मनइन माहीं, हम सगलेन से बढ़िके रहेन हय, अउर अपने बाप-दादन के परम्परन काहीं बड़े उत्साह से मानत रहे हएन।<sup>15</sup> पय परमातिमा हमहीं हमरे महतारी के पेटेन से चुनि लिहिन रहा हय, एसे अपने किरपा से हमहीं बोलाय लिहिन।<sup>16</sup> अउर परमातिमा के इआ इच्छा भय, कि हमहीं अपने लड़िका के बारे माहीं ग्यान करामँय, कि जउने हम उनखे खुसी के खबर काहीं, गैरयहूदी लोगन के बीच माहीं सुनाई; त हम कउनव मनई से सलाह नहीं लिहेन।<sup>17</sup> अउर न सलाह लेई यरूसलेम सहर माहीं उनखे लघे गएन, जउन हमसे पहिले यीसु के खास चेला रहे हँय, बलकिन हरबिन अरब देस काहीं चले गएन। अउर ओखे बाद उहाँ से दमिस्क सहर माहीं लउटि आएन।<sup>18</sup> अउर तीन साल उहाँ रहे के बाद, कैफा से मिलँय के खातिर हम यरूसलेम सहर माहीं गएन, अउर पन्द्रा दिन तक उनखे लघे रहेन।<sup>19</sup> पय उहाँ प्रभू यीसु के भाई याकूब के अलाबा, यीसु के खास चलन म से अउर कोहू से नहीं मिलेन।<sup>20</sup> अउर जउन बातँय हम तोहई पंचन काहीं लिख रहेन हय, ऊँ सही हई, परमातिमा जानत हें, कि हम झूठ नहीं बोलि रहेन आय।<sup>21</sup> अउर ओखे बाद हम सीरिया अउर किलिकिया प्रदेसन माहीं गएन।<sup>22</sup> पय यहूदिया प्रदेस के मसीही मन्डलिन के मनई जउन यीसु मसीह काहीं मानत रहे हँय, ऊँ पंचे हमहीं कबहूँ नहीं देखिन तय।<sup>23</sup> पय ऊँ पंचे इआ सुनत रहे हँय, कि जउन मनई हमहीं पंचन काहीं सताबत रहा हय, अब उआ मसीह के खुसी के खबर सुनाबत हय, जउने काहीं पहिले नास करँइ के कोसिस करत रहा हय।<sup>24</sup> अउर ऊँ पंचे हमरे बारे माहीं इआ सुनिके परमातिमा के बड़ाई करत रहे हँय।

### पवलुस काहीं दूसर खास चेला लोग सोइकार किहिन

2 चउदा बरिस के बाद हम बरनबास के साथ यरूसलेम सहर माहीं गएन, अउर तीतुस काहीं घलाय अपने साथय लइ गएन तय।<sup>2</sup> अउर उहाँ जाँइ के खातिर परमातिमा हमहीं दरसन दिहिन एसे हम उहाँ गएन, अउर जउने खुसी के खबर के प्रचार हम गैरयहूदी लोगन के बीच माहीं करित हएन, उहय खुसी के खबर काहीं हम उनहिन काहीं अलग लइ जाइके सुनायन, जउन मसीही मन्डली के मुखिया माने जात रहे हँय, जउने, जउन काम हम पहिले किहेन तय, अउर अबे कइ रहेन हय, ऊँ बेकार न ठहरँय।<sup>3</sup> अउर तीतुस घलाय जउन गैरयहूदी आहीं; हमरे साथ माहीं रहे हँय, तऊ उनहीं खतना करामँय के खातिर मजबूर नहीं कीन ग।<sup>4</sup> पय इआ, ऊँ झूठे बिसुआसी लोगन के कारन भ, जउन सच्चे बिसुआसी लोगन के बीच माहीं भेद लेई के खातिर घुसि आएँ तय, कि उआ अजादी काहीं जउन हमहीं पंचन काहीं मसीह यीसु के व्दारा मिली हय, हमार पंचन के भेद लइके पुनि हमहीं पंचन काहीं गुलाम बनामँइ।<sup>5</sup> पय हम पंचे उनखे बातन काहीं एकवक नहीं मानेन, कि जउने यीसु मसीह के खुसी के खबर के सच्चाई, तौहरे जीबन माहीं पूरी तरह से बनी रहय।

<sup>6</sup> अउर ओखे बाद जउन मसीही मन्डली के मुखिया माने जात रहे हँय, उनसे हमहीं कउनव मदत नहीं मिली, (ऊँ पंचे चाह केतनव लाटसाहब रहे होंय, हमहीं पंचन काहीं एखर कउनव चिन्ता नहिँ आय, काहेकि परमातिमा कोहू के साथ भेदभाव नहीं करँय)<sup>7</sup> पय एखे बिपरीत जब ऊँ पंचे इआ समझिन कि, परमातिमा जइसन यहूदी लोगन काहीं खुसी के खबर सुनामँइ के काम पतरस काहीं सँउपिन तय, उहयमेर गैरयहूदी लोगन काहीं खुसी के खबर सुनामँइ के जबाबदारी हमहीं सँउपिन हीं।<sup>8</sup> (काहेकि जइसन परमातिमा पतरस काहीं यहूदी लोगन के बीच माहीं यीसु के खास चेला के रूप माहीं, काम करँइ के सक्ती दिहिन हीं, उहयमेर परमातिमा हमहूँ काहीं यीसु के खास चेला के रूप माहीं, गैरयहूदी लोगन के बीच माहीं काम करँइ के सक्ती दिहिन हीं।)<sup>9</sup> अउर जब ऊँ पंचे परमातिमा के उआ किरपा काहीं जान लिहिन, जउन हमहीं मिली रही हय, तब याकूब, पतरस अउर यहूना

जउन मसीही मन्डली के मुखिया माने जात रहे हँय, हमसे अउर बरनबास से हाँथ मिलाइके अपने साथ सामिल कइ लिहिन, कि हम पंचे खुसी के खबर सुनामँइ के खातिर, गैरयहूदी लोगन के बीच माहीं जई, अउर ऊँ पंचे यहूदी लोगन के लघे जाँय।<sup>10</sup> ऊँ पंचे, केबल हमसे पंचन से एतना कहिन, कि तूँ पंचे कंगालन के ख्याल किहा, अउर हम पंचे खुदय इहय काम करँइ के खातिर खुब इच्छुक रहेन हय।

### पवलुस के पतरस काहीं डॉटब

<sup>11</sup> पय जब पतरस अन्ताकिया सहर माहीं आएँ, तब हम उनखे आँगे खुलिके बताय दिहेन, कि "तूँ गलती कइ रहे हय।"<sup>12</sup> काहेकि याकूब के पठए यहूदी लोगन के आमँइ से पहिले ऊँ पंचे गैरयहूदी लोगन के बीच माहीं खात-पिअत रहे हँय, पय ऊँ यहूदी लोगन के डेरन के मारे, जउन खतना करामँइ के ऊपर जोर देत रहे हँय, गैरयहूदी बिसुआसी लोगन के बीच से अलग होइगें, अउर उनसे दूरी रहँइ लागें।<sup>13</sup> अउर पतरस के ढोंग के कारन यहूदी बिसुआसी लोग पतरस के ढोंग माहीं सामिल होइगें, इहाँ तक कि बरनबास घलाय उनखे साथ भटकिया।<sup>14</sup> पय जब हम देखेन कि ऊँ पंचे खुसी के खबर के सच्चाई के मुताबिक सही चाल नहीं चलँय, तब हम सगलेन के आँगे पतरस से कहेन, कि जब तूँ यहूदी होइके यहूदी लोगन कि नाई नहीं, पय गैरयहूदी लोगन कि नाई चलते हया, त पुनि गैरयहूदी लोगन के ऊपर, यहूदी लोगन के रीति-रिबाज के मुताबिक चलँय के खातिर, काहे दबाव डरते हया?

### केबल बिसुआस के व्दारा मुक्ती पाउब

<sup>15</sup> हम पंचे त जन्मय से यहूदी आहेन, अउर मूसा के बिधान के पालन करत आएन हय, हम पंचे ऊँ गैरयहूदी लोगन म से न होहेंन, जिनहीं यहूदी लोग पापी समझत हें।<sup>16</sup> यहूदी लोग इआ मानत रहे हँय, कि मनई मूसा के बिधान के पालन करे से परमातिमा के नजर माहीं निरदोस ठहरत हें। पय अब हम इआ जानित हएन, कि केबल यीसु मसीह के ऊपर बिसुआस करँइ के कारन मनई निरदोस ठहरत हें। एहिन से हमहूँ पंचे घलाय मसीह यीसु के ऊपर बिसुआस किहेन हय, जउने हम मसीह के ऊपर बिसुआस किहे के कारन निरदोस ठहरी। पय मूसा के बिधान के पालन करँय के कारन नहीं, काहेकि कउनव मनई मूसा के बिधान के पालन करँय के कारन, परमातिमा के नजर माहीं निरदोस न ठहराबा जई।<sup>17</sup> पय अगर हम पंचे जउन मसीह के ऊपर बिसुआस किहे के कारन परमातिमा के नजर माहीं निरदोस ठहरँय चाहित हएन, अउर हम पंचे खुदय पाप करँय बाले निकरी, त का मसीह पाप करँय बालेन काहीं बढ़ाबा देत हें? बेलकुल नहीं<sup>18</sup> काहेकि हम मूसा के बिधान के जउने नेमन काहीं मानब छोंडि दिहेन हय, अगर हम उनहिन काहीं पुनि अपनाइत हएन, त हम खुद काहीं अपराधी ठहराइत हएन।<sup>19</sup> जब हम मूसा के बिधान काहीं पालन करँइ के कोसिस किहेन तय, त परमातिमा के नजर माहीं दोसी ठहराए गएन। एसे हम मूसा के बिधान काहीं पालन करब छोंडि दिहेन, कि जउने हम परमातिमा के खातिर जि सकी। इआ कारन मूसा के पुरान बिधान के खातिर मर गएन हय, कि जउने परमातिमा के खातिर जीबन जी।<sup>20</sup> अउर हम मसीह के साथ क्रूस माहीं चढ़ाए गए हएन, अउर हम अब से जिन्दा नहीं रहि गएन, बलकिन मसीह हमरे भीतर जिन्दा हें। अउर अब हम देह माहीं जउन जिन्दा हएन, उआ केबल परमातिमा के लड़िका के ऊपर बिसुआस किहे के कारन जिन्दा हएन, जउन हमसे एतना प्रेम किहिन, कि खुद काहीं हमरे खातिर बलिदान कइ दिहिन हीं।<sup>21</sup> एसे हम परमातिमा के किरपा काहीं बेकार नहीं ठहराई, काहेकि अगर मूसा के बिधान के पालन करँय के व्दारा, मनई परमातिमा के नजर माहीं निरदोस ठहरत, त मसीह फालतू माहीं आपन प्रान काहे क देतें?

### मूसा के बिधान के बन्धन से अजादी

3 हे गलातिया बाले निरबुद्धी बिसुआसी मनइव, यीसु मसीह कइसन कूस माहीं चढ़ाए गे रहे हँय, एखे बारे माहीं पूर जानकारी तौहरे सगलेन के आँगे हम दिहेन तय। पय तौहरे पंचन के ऊपर को जादू कइ दिहिस ही? 2 हम तौहसे पंचन से केबल एतना जानँय चाहित हएन, कि तूँ पंचे पबित्र आत्मा काहीं मूसा के बिधान के पालन करँय से पाया हय, कि खुसी के खबर काहीं सुनिके, बिसुआस किहे से पाया हय? 3 का तूँ पंचे एतना मूरख होइ गया हय, कि जउने मसीही जीवन काहीं, तूँ पंचे पबित्र आत्मा के मुताबिक चलब सुरू किहा तय, त का अब ओही खुद के मेहनत से चलिके पूर करँइ के कोसिस करते हया? 4 का तूँ पंचे एतना दुख बेकार माहीं सहे हया? बेलकुल नहीं। 5 हम पुनि पूँछित हएन कि, परमातिमा जउन तौहई पंचन काहीं पबित्र आत्मा के दान दिहिन हीं, अउर तौहरे पंचन के जीवन से सामर्थ के काम करत हें, त तूँ पंचे इआ बताबा, कि परमातिमा इआ काम काहीं मूसा के बिधान के पालन करँइ से करत हें, इआ कि खुसी के खबर काहीं सुनिके बिसुआस किहे के कारन?

6 देखा, अब्राहम परमातिमा के ऊपर बिसुआस किहिन रहा हय, एहिन से ऊँ परमातिमा के नजर माहीं निरदोस ठहराए गे रहे हँय। 7 त तूँ पंचे इआ जानिल्या, कि जे कोऊ परमातिमा के ऊपर बिसुआस करँइ बाले हें, उँइन अब्राहम के सच्चे सन्तान आहीं। 8 एसे पबित्र सास्त्र माहीं पहिलेन से लिखा रहा हय, कि “परमातिमा गैरयहूदी लोगन काहीं उनखे ऊपर किहे बिसुआस के कारन निरदोस ठहरइहँय।” एहिन से परमातिमा अब्राहम काहीं इआ खुसी के खबर पहिलेन से बताय दिहिन तय, कि संसार के सगली जाति के मनई तौहरेन कारन आसिरबाद पड़हँय। 9 एसे अब्राहम बिसुआस के कारन जउन आसिरबाद पाइन रहा हय, उहय आसिरबाद मसीह के ऊपर बिसुआस करँइ बाले सगले जने पाबत हें।

10 पय जेतने मनई मूसा के बिधान के पालन करँइ माहीं भरोसा करत हें, उँ सगले परमातिमा से सजा पड़हँय, काहेकि पबित्र सास्त्र माहीं इआ लिखा हय, “कि जे कोऊ मूसा के बिधान के किताब माहीं लिखी सगली बातन काहीं पालन नहीं करय, उआ परमातिमा से सजा पाई।” 11 अब इआ बात स्पस्ट होइगे ही, कि मूसा के बिधान के पालन करँइ के व्दारा कउनव मनई परमातिमा के आँगे निरदोस न ठहरी, काहेकि पबित्र सास्त्र माहीं लिखा हय, “परमातिमा के नजर माहीं निरदोस मनई बिसुआस के कारन जिअत रही।” 12 पय मूसा के बिधान काहीं पालन कइके चलँइ माहीं, अउर बिसुआस से चलँइ माहीं, कउनव सम्बन्ध नहिँ आय पय पबित्र सास्त्र माहीं इआ लिखा हय, “जे मूसा के बिधान माहीं लिखी पूरी बातन काहीं मानी, उआ उनहिन के कारन जिअत रही।” 13 पय मसीह जउन हमरे पंचन के खातिर स्थापित बने हें, हमहीं मोल लइके मूसा के बिधान के सराप से छोड़ाइन हीं। जब मसीह कूस माहीं लटकाए गे, ऊँ हमरे पाप के सराप काहीं अपने ऊपर लइ लिहिन, काहेकि पबित्र सास्त्र माहीं इआ लिखा हय, कि “जे कोऊ कठबा माहीं लटकाबा जात हय, उआ स्थापित हय।” 14 मसीह हमहीं पंचन काहीं मूसा के बिधान के सराप से एसे छोड़ाइन, कि जउने अब्राहम के आसीस यीसु मसीह के व्दारा गैरयहूदी लोगन के लघे तक पहुँचय, अउर हम पंचे बिसुआस के व्दारा उआ पबित्र आत्मा काहीं पाई, जउने काहीं दँइ के वादा परमातिमा किहिन हीं।

### मूसा के बिधान अउर करार

15 हे भाई-बहिनिव, हम मनई के रीत माहीं कहित हएन, कि मनइन के करार घलाय जउन पक्की होइ जात ही, त न ओही कोऊ टारिन सकय न बदलिन सकय। 16 मतलब इआ आय कि वादा त अब्राहम से, अउर उनखे बंस से कीन ग रहा हय; पय पबित्र सास्त्र माहीं इआ नहीं लिखा आय, कि उनखे बंसन से, जइसन कि बहुतन के खातिर माना जाय, पय ओमा एकय के बारे माहीं लिखा हय, तौहरे बंस से, अउर उआ बंस यीसु मसीह आहीं।

17 पय हम इआ कहित हएन, कि जउन करार परमातिमा पहिलेन से अब्राहम के साथ पक्की किहिन रहा हय, उआ करार काहीं मूसा के बिधान चार सव तीस बरिस के बाद आइके नहीं बदल सकय, अउर न परमातिमा के वादा काहीं रद्द कइ सकय। 18 काहेकि अगर परमातिमा के राज के बारिसदार होंइ के अधिकार मूसा के बिधान से मिला हय, त वादा के द्वारा नहीं मिला आय, पय उआ अधिकार परमातिमा अब्राहम काहीं वादा के व्दारा दिहिन तय।

### मूसा के बिधान के मकसद

19 त पुनि परमातिमा मूसा के बिधान काहीं पहिले कउने उद्देश्य से दिहिन रहा हय? उआ त हुकुम के उलंघन करँइ के अपराध के कारन बाद माहीं दीन ग रहा हय। अउर जउने बंस अरथात मसीह के बारे माहीं परमातिमा वादा किहिन रहा हय, उनखे आमँइ तक मूसा के बिधान चलत रहा हय, अउर परमातिमा उआ मूसा के बिधान काहीं स्वरगदूतन के द्वारा मूसा काहीं दिहिन रहा हय, अउर ई मूसा परमातिमा अउर मनइन के बीच माहीं बिचबई रहे हँय 20 अउर बिचबई के जरूरत दुइ जने के बीच माहीं होत ही, पय परमातिमा बिना बिचबई के खुद अब्राहम से वादा किहिन।

21 त का मूसा के बिधान परमातिमा के वादा के बिरोध माहीं हय? बेलकुल नहीं? काहेकि अगर अइसन मूसा के बिधान दीन जात जउन जीवन दइ सकत, त सचमुच मूसा के बिधान के पालन करे से मनई परमातिमा के नजर माहीं निरदोस होइ जातें। 22 पय पबित्र सास्त्र माहीं घलाय इआ लिखा हय, कि सगला संसार पाप के कब्जे माहीं हय, इआ कारन केबल यीसु मसीह के ऊपर बिसुआस करँइ के द्वारा, बिसुआस करँइ बाले मनई परमातिमा के वादा पाय सकत हें। 23 पय प्रभू यीसु मसीह के ऊपर बिसुआस किहे से मिलँइ बाली मुक्ती के खबर आमँइ से पहिले, हम पंचे मूसा के बिधान के बन्धन माहीं बँधे रहेन हय, अउर परमातिमा के द्वारा प्रगट कीन जाँय बाली बिसुआस के खबर के आमँइ तक, ओहिन के कब्जे माहीं रहेन हय। 24 एसे मूसा के बिधान मसीह तक पहुँचामँइ माहीं हमार पंचन के गुरू रहा हय, कि जउने हम पंचे बिसुआस से धरमी ठहरी। 25 पय जब यीसु मसीह के ऊपर बिसुआस करँइ के खबर प्रगट होइ चुकी हय, त हम पंचे अब उआ गुरू के अधीन नहीं रहि गएन। 26 काहेकि तूँ पंचे सगले जन मसीह यीसु के ऊपर, बिसुआस किहे के कारन परमातिमा के सन्तान भया हय। 27 अउर तौहरे पंचन म से जेतने जन मसीह यीसु के ऊपर बिसुआस कइके बपतिस्मा लिहिन हीं, ऊँ पंचे सगले जन मसीह के सगले सुभाव काहीं अपनाय लिहिन हीं, जइसन मनई नबा ओन्हा पहिरत हें, 28 अब उनमा से न कोऊ यहूदी रहिगा, अउर न गैरयहूदी, न कोऊ नोकर रहिगा, न अजाद; न कोऊ मंसेरुआ रहिगा, न मेहेरिआ; काहेकि तूँ पंचे सगले जन मसीह यीसु माहीं एक होइ गया हय। 29 अउर अगर तूँ पंचे मसीह के आह्वा, त अब्राहम के बंस अउर परमातिमा के वादा के मुताबिक बारिसदार घलाय आह्वा।

4 हम तौहई पंचन काहीं इआ बताइत हएन, कि जब तक बारिसदार नाबालिक रहत हय, त चाह सगले सम्पत के मालिक उहय होय, तउ ओमाहीं अउर सेबक माहीं कउनव अन्तर नहीं होय। 2 पय बाप के ठहराबा समय तक उआ रच्छा करँइ बालेन, अउर भन्डार के देख-भाल करँइ बालेन के देख-रेख माहीं रहत हय। 3 उहयमेर हमहूँ पंचे जब तक खुसी के खबर के बारे माहीं अनजान रहेन हय, त संसार के सुरुआत के सिच्छन के काबू माहीं रहिके, उनखर दास बने रहेन हँय। 4 पय जब परमातिमा के द्वारा निश्चित कीन समय पूर होइगा, तब ऊँ अपने लड़िका काहीं पठइन, जउन मेहेरिआ से पइदा भें, अउर मूसा के बिधान के अधीन रहिके ओखर पालन करत रहे हँय। 5 जउने मूसा के बिधान काहीं मानँइ बालेन काहीं ओखे अधीनता से छोड़ाय लेंय, अउर हमहीं पंचन काहीं बारिसदार होंइ के पूर हक्क मिलय। 6 अउर तूँ पंचे परमातिमा के लड़िका बन गया हय, एसे परमातिमा अपने लड़िका के आत्मा काहीं हमरे पंचन के हिन्दैय माहीं पठइन हीं, जउन हे अब्बा, हे पिता कहिके परमातिमा काहीं गोहराबत हय। 7 एसे तूँ पंचे अब

नोकर नहीं रहि गया, बलकिन लड़िका बन गया हय। अउर तूँ पंचे जब अब लड़िका आह्या, त परमातिमा तोहई अपने राज के बारिसदार घलाय बनाइन हीं।

### बिसुआसी लोगन के बारे माहीं पवलुस के चिन्ता

8 पहिले तूँ पंचे जब परमातिमा काहीं नहीं जानत रहे आह्या, त देबी देउतन काहीं परमातिमा मानिके उनखर दास बने रहे हया, जउन वास्तव माहीं परमातिमा न होंही। 9 पय अब त तूँ पंचे परमातिमा काहीं पहिचान लिहा हय, इआ कि इआमेर कही, कि परमातिमा तौहई पंचन काहीं पहिचानिन हीं, त पुनि तूँ पंचे उन निबल अउर निकम्मी मूसा के बिधान के सिच्छा के बातन काहीं काहे मनते हया, अउर पुनि उनखर दास काहे होंइ चहते हया? 10 तूँ पंचे त कउनव खास दिनन, महीनन, रितुअन अउर सालन काहीं मनते हया। 11 तौहरे पंचन के बारे माहीं हमहीं डेर लागत ही, कि कहँव अइसा न होय, कि जउन मेहनत हम तौहरे खातिर किहेन हय, उआ बेकार होइ जाय।

12 हे भाई-बहिनिव, हम तौहसे बिनती करित हएन, कि तूँ पंचे हमरे कि नाई होइजा, काहेकि हमहूँ तौहरे पंचन कि नाई होइ गएन हय; तूँ पंचे हमार कुछ बिगाड़े नहिं आह्या। 13 पय तूँ पंचे त इआ जनतेन हया, कि हम देह से निबल रहेन हय, तऊ पहिलय पहिल तौहइन पंचन काहीं खुसी के खबर सुनायन तय। 14 अउर चाह हम तौहरे खातिर बोझय रहे होई, तऊ तूँ पंचे हमरे देह के निबल दसा के कारन हमार तिरस्कार नहीं किहा, बलकिन तूँ पंचे हमार अइसन स्वागत किहा, जइसन कि हम परमातिमा के दूत इआ, कि खुद मसीह यीसु रहे होई। 15 अउर हम एखर गबाह हएन, कि अगर होइ सकत, त तूँ पंचे आपन आँखी घलाय निकारिके हमहीं दइ देत्या, पय अब उआ तौहार पंचन के आनन्द मनाउब कहँ चला ग? 16 त तूँ पंचे इआ बताबा, कि तौहसे सही बोलँय के कारन, का हम तौहार पंचन के बडरी बन गएन हय?

17 ऊँ गलत सिच्छा देंइ बाले तौहई पंचन काहीं अपने पच्छ माही करँइ के कोसिस करत हें, पय उनखर उदेस निकहा नहिं आय। ऊँ पंचे इआ चाहत हें, कि तूँ पंचे हमसे अलग होइजा, जउने तुहँ पंचे उनखे पीछे चलँइ बाले बनि जा। 18 निकहे उदेस्य से अपने पच्छ माहीं करब उचित हय, अउर इआ हरेक समय होंइ क चाही, पय इआ नहीं, कि जब तक हम तौहरे पंचन के साथ माहीं हएन। 19 हे पियार लड़िकव, जब तक तूँ पंचे पूरी तरह से मसीह कि नाई नहीं बन जाते आह्या, तब तक हम तौहरे पंचन के खातिर उहयमेर दुखन काहीं सहित हएन, जइसन लड़िका होंइ के समय मेहेरिअन के पीरा होत ही। 20 अउर हमार त एतनी बड़ी इच्छा ही, कि हम अबहिनय तौहरे पंचन के लघे आइके सान्ती से बात करी, काहेकि तौहरे बारे माहीं हमहीं खुब चिन्ता होइ रही हय।

### सारा अउर हाजिरा के उदाहरन

21 तूँ पंचे जउन मूसा के बिधान के अधीन होंइ चहते हया, त हमसे बताबा, का तूँ पंचे पबित्र सास्त्र माहीं लिखी बातन काहीं नहीं सुने आह्या? 22 कि अब्राहम के दुइठे लड़िका भें, एकठे उनखे मेहेरिआ से, अउर एकठे दासी से। 23 पय जउन लड़िका दासी से पइदा भ, उआ साधारन रीत से मनई के इच्छा से पइदा भ, अउर जउन लड़िका उनखे मेहेरिआ से पइदा भ, उआ परमातिमा के दीन वादा के मुताबिक पइदा भ। 24 ई बातन के एकठे अउर मतलब इआ हय, कि ई दुइठे मेहेरिआ मानो दुइठे करार के प्रतीक आहीं, एकठे त सीने पहार माहीं कीन गे करार आय, जउने से केबल दासय पइदा होत हें; अउर हाजिरा उआ करार के प्रतीक आय। 25 यहूदी लोगन के व्दारा मूसा के बिधान काहीं पालन करँइ के कारन, इआ समय के यरूसलेम गुलामी माहीं हय, अउर हाजिरा अरब के सीने पहार माहीं कीन गे करार के प्रतीक आय। 26 पय उआ दूसर मेहेरिआ सारा, जउन हमार पंचन के

महतारी आय, स्वरग माहीं स्थित यरूसलेम सहर के प्रतीक आय, अउर उआ अजाद हय। 27 काहेकि पबित्र सास्त्र माहीं लिखा हय, कि

“हे बाँझ मेहेरिआ तौहरे कबहूँ लड़िका नहीं भ, त अब उराव मनाबा, तूँ लड़िका होंय के पीरा के अनुभव कबहूँ नहीं किहा, त खुसी के गाना गाबा, काहेकि छोंड़ी गे मेहेरिआ के सन्तान, बिआही मेहेरिआ के सन्तान से जादा होइहँय।”

28 हे भाई-बहिनिव, तूँ पंचे इसहाक कि नाई हया, जउन परमातिमा के दीन वादा के मुताबिक पइदा भ। 29 अउर जइसन उआ समय माहीं होत रहा हय, कि देह के इच्छा के मुताबिक पइदा भ लड़िका, पबित्र आत्मा के सक्ती से पइदा भए लड़िका काहीं सताबत रहा हय, उहयमेर अबहिनव घलाय होत हय। 30 पय पबित्र सास्त्र माहीं लिखा हय, “दासी अउर ओखे लड़िका काहीं निकारि द्या, काहेकि दासी के लड़िका बिआही मेहेरिआ के लड़िका के साथ बारिसदार होंइ के हक्क कबहूँ न पाई।” 31 एसे हे भाई-बहिनिव, हम पंचे दासी के सन्तान न होंहेन, बलकिन बिआही मेहेरिआ के सन्तान आहेन।

### अजादी काहीं सुरच्छित रक्खा

5 मसीह, हमहीं पंचन काहीं मूसा के बिधान के गुलामी से अजाद किहिन हीं, एसे एहिन माहीं स्थिर बने रहा, अउर पुनि मूसा के बिधान के गुलामी माहीं न फँसा।

2 देखा, हम पवलुस तौहसे से कहित हएन, कि अगर तूँ पंचे खतना करइहा, त मसीह जउन कुछ तौहरे खातिर किहिन हीं, ओसे तौहई कुछ फायदा न होई। 3 फेरव आपन खतना करामँइ बाले हरेक जन काहीं हम जताए देइत हएन, कि ओही मूसा के बिधान के सगली बातन काहीं मानँय परी। 4 तूँ पंचे जउन मूसा के बिधान के बातन काहीं मानिके धरमी ठहरँय चहते हया, त तूँ पंचे मसीह से अलग, अउर परमातिमा के किरपासे दूर होइ गया हय। 5 काहेकि हम पंचे यीसु मसीह के ऊपर बिसुआस किहे के व्दारा, परमातिमा के आँगे धरमी ठहरँय के आसा रक्खित हएन, अउर पबित्र आत्मा के मदत से हम पंचे ओखर राह देखि रहेन हय। 6 काहेकि अगर हम पंचे यीसु मसीह के ऊपर बिसुआस करित हएन, त खतना करबाउब इआ कि खतना न करबाउब, एसे कउनव फायदा नहिं आय, बलकिन केबल यीसु मसीह के ऊपर बिसुआस रक्खिके, दुसरे मनइन से प्रेम करब खास बात आय। 7 तूँ पंचे त निकहा से मसीही जीवन जिअत रहे हया, अब तौहई को बहकाय दिहिस, कि सत्य काहीं न माना। 8 अइसन सलाह तौहई बोलामँइ बाले परमातिमा के तरफ से त नहीं मिली आय। 9 अउर इआ गलत सिच्छा थोर क खमीर कि नाई हय, जइसन थोर क खमीर सगले माड़े पिसान काहीं आमिल कइ देत हय। 10 अउर हम प्रभू के ऊपर तौहरे पंचन के बारे माहीं भरोसा रक्खित हएन, कि तौहार पंचन के उआ गलत सिच्छा काहीं मानँइ के बिचार न होई; पय जे कोऊ तौहई बहकामँइ के कोसिस करत हय, चाह उआ कोहू होई, परमातिमा से सजा पाई। 11 पय हे भाई-बहिनिव, अगर हम अबे तक खतना के प्रचार करित हएन, त अबे तक हम काहे सताए जइत हएन; अउर हम क्रूस माहीं चढ़े मसीह के जउन प्रचार करित हएन, उआ यहूदी लोगन के खातिर ठोकर के कारन न बनत? 12 जउन तौहई पंचन काहीं बहकाबत हें, उनखे खातिर इहय भला होत, कि ऊँ पंचे आपन अंग काट डरतें!

13 हे भाई-बहिनिव, परमातिमा तोहई पंचन काहीं अजाद होंइ के खातिर बोलाइन हीं, पय अइसा न होंइ चाही, कि तूँ पंचे इआ अजादी काहीं देह के इच्छन काहीं पूर करँइ के खातिर साधन बनाबा? बलकिन प्रेम से एक दुसरे के सेवा करँइ बाले बना। 14 काहेकि सगला बिधान इआ एकयठे हुकुम माहीं पूर होइ जात हय, कि “तूँ अपने परोसी से अपने कि नाई प्रेम रक्खा।”

15 पय अगर तूँ पंचे एक दुसरे काहीं जंगली जानबर कि नाई नुकसान पहुँचाबत रहते हया, अउर मार डारँइ के कोसिस करत रहते हया, त सचेत रहा, कि कहँव तुहिन पंचे एक दुसरे काहीं नास न कइ डारा।

### पबित्र आत्मा के मुताबिक चलब

16 एसे हम तौहसे कहित हएन, कि अगर तूँ पंचे पबित्र आत्मा के मुताबिक चलिहा, त दँह के बुरी इच्छन काहीं कउनव मेर से पूर न करिहा। 17 काहेकि दँह के बुरी इच्छा, पबित्र आत्मा के इच्छा के बिरोध माहीं होती हई, अउर पबित्र आत्मा के इच्छा दँह के बुरी इच्छन के बिरोध माहीं होत ही, अउर ई एक दुसरे के बिरोधी आहीं; एहिन से जउन तूँ पंचे करँय चहते हया, उआ नहीं कए पउते आह्या। 18 अउर अगर तूँ पंचे पबित्र आत्मा के मुताबिक जीवन बितउते हया, त मूसा के बिधान के अधीन नहीं आह्या। 19 काहेकि दँह के काम त देखाई देत हैं, जइसन ब्यभिचार करब, बुरे काम करब, लुचई करब, 20 मूरत के पूजा करब, टोना मारब, इरखा करब, झगड़ा करब, जलन रक्खब, क्रोध करब, स्वार्थी होब, फूट डारब, गुटबन्दी करब, 21 डाह करब, नसा कइके मतबार होब, भोग-बिलास करब, अउर इनखे कि नाई अउरव खुब पाप हैं, इनखे बारे माहीं हम तौहई पहिलेन से बताए देइत हएन, जइसन तौहई पहिलेव बताय चुके हएन, कि इआमेर के काम करँइ बाले, परमातिमा के राज के बारिसदार न होइहँय। 22 अउर पबित्र आत्मा के फर इआमेर से हँय जइसन, प्रेम करब, आनन्दित रहब, मिल-जुलिके रहब, धीरज धरब, 23 अउर किरपा करब, भलाई करब, बिसुआस के काबिल होब, नम्र होब, अउर संयम रक्खब, ई बातन के बिरोध माहीं कउनव नेम नहीं आय। 24 अउर जे कोऊ यीसु मसीह काहीं अपने जीवन माहीं अपनाय लिहिन हीं, ऊँ पंचे अपने दँह के बुरी इच्छन अउर अभिलासन काहीं क्रूस के ऊपर चढ़ाय दिहिन हीं।

25 अउर अगर हम पंचे पबित्र आत्मा के व्दारा जिन्दा हएन, त पबित्र आत्मय के मुताबिक चलबव करी। 26 अउर हम पंचे घमन्दी होइके, न एक दुसरे काहीं खिसबाई, अउर न एक दुसरे से जलन रक्खी।

### एक दुसरे के मदत करा

6 हे भाई-बहिनिव, अगर तौहरे पंचन म से कोऊ कउनव अपराध माहीं पकड़ा जाय, त जउन तूँ पंचे आत्मा के मुताबिक चलते हया, नम्रता के साथ, सही गइल म आमँय माहीं ओखर मदत करा, अउर तुहूँ पंचे सतरक रहा, जउने कउनव परिच्छा माहीं न परा। 2 अउर तूँ पंचे एक दुसरे के कमी-घटी काहीं पूर करा, अउर इआमेर से मसीह के बिधान काहीं पूर करा। 3 काहेकि अगर कउनव मनई काबिल नहीं आय, तऊ अपने-आप काहीं काबिल समझत हय, त उआ अपने-आप काहीं धोखा देत हय। 4 एसे तौहरे पंचन म से हरेक जन, अपने-अपने कामन के जाँच-परताल कइ लेय, अउर जब अपने कामन के जाँच कइ लेई, तब ओही दुसरेन के बारे माहीं नहीं,

बलकिन अपनेन निकहे कामन के बारे माहीं घमन्ड करँइ के मोका मिली।

5 काहेकि हरेक जन काहीं आपन-आपन जिम्मेबारी खुदय उठामँइ परी।

6 जेही परमातिमा के बचन सुनाबा ग हय, ओही चाही कि ओखे लघे जउन निकही चीजँय होंय, उनमा से अपने बचन सुनामँइ बाले काहीं कुछ दइके मदत करँय। 7 तूँ पंचे धोखा न खा, परमातिमा के मजाक नहीं उड़ाबा जाय, काहेकि मनई जउन बोबत हय, उहय काटत हय। 8 काहेकि जे कोऊ अपने बुरे बिचार के बीज बोबत हय, त उआ अपने बुरे बिचार के व्दारा बिनास रूपी फसल काटी, अउर जे कोऊ आत्मा के खातिर बीज बोबत हय, उआ आत्मा के व्दारा अनन्त जीवन रूपी फसल काटी। 9 एसे हम पंचे निकहे कामन काहीं करँइ माही साहस न छोड़ी, काहेकि अगर हम पंचे भलाई के काम करतय रहब, त सही समय आमँय पर हमहीं पंचन काहीं ओखर प्रतिफल जरूर मिली। 10 एसे जहाँ तक होइ सकय, हमहीं पंचन काहीं सगले मनइन के साथ भलाई करँइ चाही; खास करके बिसुआसी भाई-बहिनिन के साथ।

### पवलुस के अन्तिम चेतउनी अउर अभिबादन

11 तूँ पंचे ध्यान से देखा, कि कइसन बड़े-बड़े अच्छरन माहीं, ई बातन काहीं हम अपने हाँथ से तौहरे पंचन के खातिर लिखेन हय। 12 एसे जेतने मनई सारीरिक रूप से देखाबा करँय चाहत हैं, ऊँ पंचे तौहरे ऊपर खतना करामँइ के दबाव डारत हैं, कि जउने मसीह के क्रूस माहीं बलिदान के द्वारा मुक्ती मिली, इआ बिसुआस किहे के कारन ऊँ पंचे सताए न जाँय।

13 काहेकि खतना करामँइ बाले खुदय मूसा के बिधान के मुताबिक नहीं चलँय, पय तौहार पंचन के खतना एसे करामँइ चाहत हैं, कि जउने तौहरे पंचन के सारीरिक दसा काहीं देखिके घमन्ड करँय। 14 पय हम पंचे केबल प्रभू यीसु मसीह के क्रूस के बलिदान माहीं घमन्ड करी, कउनव दुसरे बात माहीं नहीं, जउने के व्दारा हम संसार के खातिर मर गएन हय, अउर संसार हमरे खातिर। 15 एसे कोहू के खतना भ होय, चाह न भ होय एखर कउनव महत्व नहीं आय, महत्व केबल इआ बात के हय, कि हम पंचे पूरी तरह से नई सस्टी बन जई। 16 अउर जेतने मनई इआ नेम के मुताबिक चलिहँय उनखे ऊपर, अउर परमातिमा के इजराइल के ऊपर सान्ति अउर दया होत रहय।

17 चिट्ठी के आखिर माहीं, हम तौहसे बिनती करित हएन, कि अब कउनव मनई ई बातन के बारे माहीं हमहीं अउर दुख न देय, काहेकि हम यीसु मसीह के दास आहें, एसे उनखे घावन काहीं अपने दँह माहीं लए चलि रहेन हँय।

18 हे भाई-बहिनिव, हम प्राथना करित हएन, कि हमरे पंचन के प्रभू यीसु मसीह के दया तौहरे पंचन के आत्मा के साथ बनी रहय। आमीन!

# इफीसियन

## इआ चिट्ठी के परिचय

इफिससुस सहर के मसीही मन्डली के बिसुआसी भाई-बहिनिन के नाम लिखी, यीसु मसीह के खास चेला पवलुस के चिट्ठी माहीं सबसे पहिले परमातिमा के योजना के बारे माहीं बताबा ग हय, कि "जउन कुछ् स्वरग माहीं हय, अउर जउन कुछ् धरती माहीं हय, उनीं सगलेन काहीं एकट्ठा करँय, अउर मसीह उनखे ऊपर राज करँय।" (इफी 1:10) अउर इआ चिट्ठी माहीं परमातिमा के चुने पबित्र मनइन से इआ अनुरोध घलाय कीन ग हय, कि यीसु मसीह माहीं एक मन होइके, सगले मनइन के एकता के खातिर, ऊँ पंचे इआ महान योजना के मुताबिक जीवन बितामँइ।

इआ चिट्ठी के पहिल भाग माहीं पवलुस एकता के बारे माहीं बताबत हें, अउर उआ गइल के बारे माहीं बताबत, जउने के द्वारा पिता परमातिमा अपने लोगन काहीं चुनिन हीं, कि कइसन उनखे लड़िका यीसु मसीह के द्वारा ऊँ पंचे अपने पापन से माफी पाइन हीं, अउर कइसन पबित्र आत्मा के द्वारा परमातिमा के महान वादा पूर होई। इआ चिट्ठी के दुसरे भाग माहीं, पवलुस पढ़इ बालेन से अइसन जीवन जिअँइ के अनुरोध करत हें, कि मसीह माहीं उनखर एकता उनखे सामूहिक जीवन के सच्चाई बन जाय।

मसीह के ऊपर बिसुआस करँइ बाले परमातिमा के मनइन के एकता काहीं देखामँइ के खातिर, इआ चिट्ठी माहीं पवलुस कइयकठे उदाहरन के उपयोग करत हें: जइसन- मसीही मन्डली एकठे देंह कि नाई हय, जेखर सिर मसीह आहीं, अउर इआ एकठे घर कि नाई हय, जेखे कोनमा के पथरा मसीह आहीं, अउर इआ एकठे दुलहिन कि नाई हय, जेखर दुलहा मसीह आहीं। मसीह के ऊपर बिसुआस करे से परमातिमा के बड़ी दया मिलत ही, अउर पवलुस के इआ बात से प्रभावित होई के कारन, इआ चिट्ठी बखान के महान उँचाइन काहीं छुड़ लेत ही। हरेक बात काहीं एमाहीं मसीह के प्रेम, बलिदान, माफी, बड़ी दया अउर सिद्धता के रूप माहीं देखा ग हय।

रूप-रेखा :

भूमिका

मसीह अउर मसीही मन्डली

मसीह माहीं नबा जीवन

उपसंहार

## पवलुस के अभिवादन

1 हम पवलुस जउन परमातिमा के मरजी के मुताबिक यीसु मसीह के खास चेला आहें, हम इआ चिट्ठी काहीं इफिससुस सहर माहीं रहँइ बाले, ऊँ पबित्र मनइन काहीं लिखित हएन, जउन मसीह यीसु के ऊपर बिसुआस करत हें। 2 हमरे पंचन के पिता परमातिमा अउर प्रभू यीसु मसीह के तरफ से, तौहँई पंचन काहीं किरपा अउर सान्ति मिलत रहय।

## मसीह के द्वारा आत्मिक असीसँय

3 हमरे पंचन के प्रभू यीसु मसीह के पिता परमातिमा के धन्यवाद होय, कि ऊँ हमहीं पंचन काहीं मसीह के ऊपर बिसुआस करँइ के कारन, स्वरग के हरेकमेर के आत्मिक आसिरवाद दिहिन हीं। 4 संसार काहीं बनामँइ के पहिलेन से परमातिमा, यीसु मसीह के द्वारा हमहीं पंचन काहीं चुनि लिहिन तय, कि जउने हम पंचे उनखे नजर माहीं, उनखे प्रेम के कारन पबित्र अउर निरदोस ठहरी। 5 अउर परमातिमा अपने मरजी अउर निकहे बिचार के मुताबिक हमहीं पंचन काहीं पहिलेन से ठहराइन रहा हय, कि यीसु मसीह के ऊपर बिसुआस करँइ के द्वारा हम पंचे उनखर गोद लीन सन्तान कहाई। 6 उनखे उआ किरपा के महिमा के बड़ाई होय, जउने काहीं ऊँ हमहीं पंचन काहीं, जेतने उनखे पियार लड़िका यीसु मसीह माहीं बिसुआस करित हएन, सेंट-मेंत माहीं दिहिन हीं। 7 अउर हमहीं पंचन काहीं जेतने यीसु मसीह माहीं बिसुआस करित हएन, यीसु मसीह के खून के द्वारा अपने पापन से मुक्ती अरथात माफी मिली हय, काहेकि परमातिमा हमरे पंचन के ऊपर बड़ी दया

किहिन। 8 जउने काहीं परमातिमा अपने पूरे ग्यान अउर समझ सहित हमहीं पंचन काहीं बहुतायत से दिहिन हीं। 9 अउर परमातिमा अपने इच्छा के भेद काहीं अपने निकहे बिचार के मुताबिक हमहीं पंचन काहीं बताइन हीं, जउने काहीं ऊँ मसीह के द्वारा हमहीं पंचन काहीं देखामँइ चाहत रहे हँय। 10 अउर परमातिमा अइसन योजना बनाइन, कि अपने निश्चित समय माहीं जउन कुछ् स्वरग माहीं हय, अउर जउन कुछ् धरती माहीं हय, उनीं सगलेन काहीं एकट्ठा करँय अउर मसीह उनखे ऊपर राज करँय।

11 परमातिमा बहुत साल पहिले, अपने योजना के मुताबिक, मसीह के ऊपर बिसुआस कइके उनखर बारिसदार बनँइ के खातिर हमहीं पंचन काहीं चुनिन हीं। काहेकि परमातिमा अपने उद्देश्य अउर मरजी के मुताबिक सब कुछ् करत हें। 12 कि हम पंचे जेतने यहूदी लोग पहिलेन से मसीह के ऊपर आसा रक्खे रहेन हय, हम पंचे उनखे दया के कारन उनखर धन्यवाद करी। 13 जब तूँ पंचे उआ सत्य के बचन काहीं सुने रह्या हय, जउन तौहँई पंचन काहीं मुक्ती देंइ के खुसी के खबर रहा हय, अउर जउने मसीह के ऊपर तूँ पंचे बिसुआस किहा तय, त जउने पबित्र आत्मा काहीं देंइ के वादा परमातिमा किहिन तय, उँइन मसीह के द्वारा पबित्र आत्मा के अदभुत चिन्हारी तौहरे पंचन के ऊपर घलाय लगाई गे ही। 14 उआ पबित्र आत्मा हमरे पंचन के बारिसदार होंय के बयाना के रूप माहीं, उआ समय तक के खातिर हमहीं पंचन काहीं दीनगा हय, जब तक कि ऊँ हमहीं पंचन काहीं, जउन उनखर मोल लीन आहें, पूरी तरह से छुटकारा नहीं दइ देंय, इआ कारन सगले मनई उनखे महानता के स्तुति करिहँय।



### पवलुस के प्रार्थना

15 ऐसे जब से हम सुनेन हय, कि तूँ पंचे प्रभू यीसु के ऊपर बिसुआस करते हया, अउर सगले पबित्र मनइन से प्रेम करते हया। 16 तब से हम तौहरे पंचन के खातिर परमातिमा काहीं हमेसा धन्यवाद देइत हएन, अउर अपने प्राथनन माहीं हमेसा तौहई सुध करित हएन। 17 हम प्राथना करा करित हएन, कि हमार पंचन के प्रभू यीसु मसीह के परमातिमा, तौहई समझय के अउर दिव्य दरसन के अइसन आत्मा के सक्ती देंय, कि जउने तूँ पंचे ऊँ महिमावान परमपिता काहीं पहिचान सका। 18 अउर हमार बिनती इहव हय, कि तौहरे पंचन के मन के आँखी खुल जाँय, अउर तूँ पंचे उआ प्रकास के दरसन कइ सका, जउने तौहई पंचन काहीं इआ मालुम होइ जाय, कि उआ आसा का आय, जउने के खातिर ऊँ तौहई पंचन काहीं बोलाइन हीं। अउर अपने चुने सगले मनइन काहीं जउन बारिसदार होंय के हक्क ऊँ देइहँय, उआ केतना अदभुत अउर महान हय। 19 हम बिसुआसी लोगन के खातिर उनखर सक्ती एतनी महान ही, जउने के तुलना नहीं कीन जाय सकय, परमातिमा अपने महान सक्ती के प्रभाव के मुताबिक, हमरे पंचन के खातिर काम करत हैं। 20 जउन ऊँ मसीह के बारे माहीं किहिन हीं, कि उनहीं मरेन म से जिआइके स्वरग के जघन माहीं अपने दहिने कइती बइठाय लिहिन हीं, 21 अउर सगलेन के ऊपर प्रधान, अउर अधिकारी, अउर सामर्थ दइके प्रभुता करँइ के अधिकार दिहिन हीं, अउर हरेक नाम के ऊपर अइसन नाम दिहिन हीं, जउन न केबल इआ लोक माहीं, बलकिन आमँइ बाले लोक माहीं घलाय लीन जई। 22 अउर परमातिमा सब कुछ यीसु मसीह के गोड़े के नीचे कइ दिहिन हीं, अरथात सब कुछ उनखे बस माहीं कइ दिहिन हीं, अउर उँइन मसीह काहीं मसीही मन्डली के सिरोमनि बनाइन हीं। 23 अउर मसीही मन्डली, मसीह के देह आय, अउर उनहिन के भरपूरी आय, अउर उँइन सब माहीं सब कुछ पूर करत हैं।

### यीसु मसीह के द्वारा अनन्त जीवन

2 एक समय रहा हय, जब तूँ पंचे यीसु मसीह के ऊपर बिसुआस नहीं करत रहे आह्या, तब तूँ पंचे खुब पाप करत रहे हया, अउर मरे मनई कि नाई रहे हया, पय अब परमातिमा तौहई पंचन काहीं जिआइन हीं। 2 अउर तूँ पंचे उन दिनन माहीं, इआ संसार के गलत रास्तन माहीं चलत, अउर उआ आत्मा के मुताबिक जीवन बिताबत रहे हया, जउन इआ धरती के ऊपर के बुरी आत्मिक सक्तिन के स्वामी हय, उहय आत्मा अबहिनव उन मनइन के ऊपर काम करत हय, जउन परमातिमा के हुकुम काहीं नहीं मानँय। 3 इहइमेर पहिले हमहूँ पंचे सगले जन अपने देह के बुरी इच्छन के मुताबिक दिन बिताबत रहेन हय, अउर अपने देह अउर मन के बुरी इच्छन काहीं पूर करत रहे हएन, अउर अपने सुभाबय के कारन दुसरे मनइन कि नाई परमातिमा से दन्ड पामँइ के काबिल रहे हएन। 4 पय परमातिमा जउन खुब दयालू हैं; ऊँ अपने बड़े प्रेम के कारन, हमसे पंचन से प्रेम किहिन हीं। 5 अउर जब हम पंचे अपने अपराधन के कारन मरे रहेन हँय, तब परमातिमा जइसन यीसु मसीह काहीं मरेन म से जिआइन, उहयमेर हमहूँ पंचन काहीं जिआइन हीं; (परमातिमा के किरपय से हमहीं पंचन काहीं मुक्ती मिली हय) 6 काहेकि हम पंचे यीसु मसीह के ऊपर बिसुआस किहेन हँय, एसे परमातिमा हमहीं पंचन काहीं मसीह के साथ पुनि जिआइन हीं, अरथात परमातिमा हमहीं पंचन काहीं नबा जीवन दिहिन हीं, अउर यीसु मसीह के साथ स्वरग के जघन माहीं बइठाइके, राज करँइ के अधिकार दिहिन हीं। 7 जउने आमँइ बाले समयन माहीं परमातिमा अपने दया के असीमित धन देखाँइ, जउन यीसु मसीह के ऊपर बिसुआस करँइ के द्वारा हमहीं पंचन काहीं मिला हय। 8 काहेकि परमातिमा के बड़ी किरपा से हम पंचे यीसु मसीह के ऊपर जउन बिसुआस किहे हएन, ओखे द्वारा हमहीं पंचन काहीं मुक्ती मिली हय, अउर इआ हमहीं पंचन काहीं हमरे कइती से नहीं मिली, बलकिन इआ परमातिमा के दान आय। 9 अउर इआ मुक्ती हमरे भले कामन

के द्वारा नहीं मिली आय, कहेँव अइसा न होय कि कोऊ घमन्ड करय।

10 काहेकि हम पंचे परमातिमा के बनए आहेन; अउर ऊँ यीसु मसीह के द्वारा हमहीं पंचन काहीं एसे बनाइन हीं, कि हम पंचे निकहे कामन काहीं करी, जिनहीं परमातिमा पहिलेन से तइआर किहिन हीं, कि जउने हम पंचे उँइन कामन काहीं करत आपन जीवन बिताई।

### यीसु मसीह सब काहीं एक किहिन हीं

11 इआ कारन से सुध करा, कि तूँ पंचे जनम से यहूदी जाति के न होह्या, (अउर जउन मनई देह माहीं अपने हाँथ के कीन खतना से खतना बाले कहाबत हैं, ऊँ पंचे तौहई पंचन काहीं बिना खतना बाले कहत हैं।) 12 अउर तूँ पंचे उआ समय मसीह से अलग रहे हया, अउर इजराइल देस के प्रजा के पद से अलग रहे हया, अउर परमातिमा अपने भक्त्न काहीं जउन बचन दिहिन रहा हय, उनखे ऊपर आधारित करार के भागीदार नहीं रहे आह्या, अउर इआ संसार माहीं बिना परमातिमा के रहे हया। 13 पय अब यीसु मसीह के ऊपर बिसुआस किहे के कारन, तूँ पंचे जउन पहिले परमातिमा से दूरी रहे हया, मसीह के खून के द्वारा उनखे लघे आय गए हया। 14 उँइन यहूदी लोगन अउर गैरयहूदी लोगन के बीच माहीं मेल-मिलाप कराय दिहिन हीं, काहेकि यहूदी लोग अउर गैरयहूदी आपस माहीं एक दुसरे से नफरत करत रहे हँय, अउर अलग होइगे रहे हँय। ठीक अइसन जइसन उनखे बीच माहीं कउनव दिवाल ठाढ़ होइगे होय, पय मसीह खुद अपने देह के बलिदान दइके, नफरत के उआ दिवाल काहीं गिराय दिहिन। 15 अउर खुद काहीं क्रूस माहीं बलिदान करँइ के द्वारा जउन पहिले मुक्ती पामँइ के खातिर, यहूदी नेमन अउर मूसा के बिधान के पालन करँइ परत रहा हय, उन सगले नेमन अउर मूसा के बिधान के बिधिअन काहीं मिटाय दिहिन, कि ऊँ दोनव काहीं एक कइके उनमा नबा मनई के सुभाव पइदा कइके मेल कराय देंय। 16 अउर क्रूस माहीं बलिदान के द्वारा उनखे बीच माहीं जउन दुसमनी रही हय, ओही नास कइ दिहिन हीं, जउने दोनव काहीं एकय देह बनाइके परमातिमा से मिलामँय। 17 अउर ऊँ आइके तौहई पंचन काहीं जउन परमातिमा से दूरी रहे हया, अउर जे कोऊ उनखर करीबी रहे हँय, दोनव काहीं मेल-मिलाप करँइ के खातिर खुसी के खबर सुनाइन। 18 काहेकि उनहिन के द्वारा एकय आत्मा से, परमपिता के लघे तक हमार दोनव के पहुँच भे ही। 19 एसे तूँ पंचे अब बिदेसी मुसाफिर नहीं रहि गया, बलकिन पबित्र लोगन के साथी अउर उनखे देस माहीं रहँइ बाले परमातिमा के घराना के होइ गया हय। 20 अउर तूँ पंचे एकठे अइसा घर बन गया हय, जउन यीसु के खास चलन अउर नबिअन के नेव के ऊपर खड़ा हय, अउर खुद यीसु मसीह जेखे कोनमा के पथरा हैं। 21 यीसु मसीह के ऊपर किहे बिसुआस के द्वारा, तूँ पंचे एकठे रचना के रूप माहीं एकय साथ मिलिके, प्रभू के खातिर एकठे पबित्र मन्दिर बनत जाते हया। 22 जउने माहीं पबित्र आत्मा के द्वारा, परमातिमा के निबास करँइ के खातिर एक साथ बनाए जाय रहे हया।

### गैरयहूदी लोगन के बीच माहीं पवलुस के सेवा

3 तूँ पंचे जउन गैरयहूदी आह्या, तौहरे बीच माहीं हम मसीह यीसु के सेवा करित हएन, एसे हमहीं जेल माहीं डार दीन ग हय। 2 परमातिमा हमरे ऊपर बड़ी दया कइके हमहीं नियुक्त किहिन हीं, कि तूँ पंचे जउन गैरयहूदी आह्या, हम आइके परमातिमा के खुसी के खबर सुनाई। एखे बारे माहीं तूँ पंचे जरूर सुने होइहा। 3 अरथात इआ भेद हमहीं दरसन के द्वारा मिला हय, जइसन कि एखे बारे माहीं हम पहिलेन संछेप माहीं लिख चुके हएन। 4 अगर तूँ पंचे एही पढ़िहा, त इआ जान सकते हया, कि मसीह के बारे माहीं जउन सँदेस पहिले कोऊ नहीं जानत रहा आय, ओखे बारे माहीं हम समझ गएन हय। 5 इआ भेद पुरान पीढ़ी के मनइन काहीं इआमेर नहीं बताबा ग रहा आय, जइसन कि अब परमातिमा अपने पबित्र खास चलन अउर नबिअन काहीं पबित्र आत्मा के द्वारा बताइन हीं। 6 उआ भेद इआ आय, कि खुसी के खबर के द्वारा गैरयहूदी यीसु मसीह के ऊपर बिसुआस

किहिन हीं, इआ कारन से यहूदी लोगन के साथ एक्य देह कि नाई एक होइगे ह्यै, अउर बारिसदार बनई माहीं साझीदार होइगे ह्यै, अउर परमातिमा के वादा के भागीदार घलाय होइगे ह्यै।

7 अउर परमातिमा बड़ी दया कइके जउन बरदान हमहीं दिहिन हीं, ओहिन के सामर्थ के प्रभाव के मुताबिक, हम खुसी के खबर काहीं सुनामँड के सेबक बने हएन। 8 अउर हम जउन सगले पबित्र मनइन म से सगलेन से छोट आहैन, तऊ हमरे ऊपर बड़ी दया भे ही, कि गैरयहूदी लोगन काहीं मसीह के अपार दया के खुसी के खबर सुनाई, जउने ऊँ पंचे घलाय खुब आत्मिक आसीस पामँय। 9 अउर सगले मनइन काहीं इआ बात बताई, कि उआ भेद के योजना का ही, जउने काहीं सगले संसार काहीं बनामँड बाले परमातिमा, खुब बरिस पहिले से छिपाइके रक्खिन रहा हय। 10 अउर परमातिमा के उद्देश्य अब इआ हय, कि मसीही मन्डली के द्वारा परमातिमा के अनेकव प्रकार के ग्यान, स्वरग के जघन माहीं रहँड बाले प्रधानन अउर अधिकारिन काहीं बताबा जाय। 11 परमातिमा अनन्तकाल से जउन इच्छा अपने मन माहीं कए रहे ह्यै, ओही ऊँ हमरे पंचन के प्रभू यीसु मसीह के द्वारा पूर किहिन हीं। 12 हम पंचे यीसु मसीह के ऊपर बिसुआस करित हएन, इआ कारन से हमहीं पंचन काहीं, पूरे बिसुआस के साथ निधडक होइके परमातिमा के लघे आमँड के अधिकार हय। 13 एसे हम तौहसे इआ बिनती करित हएन, कि जउन दुख-मुसीबत तौहरे खातिर हम उठाय रहैन हय, उनखे कारन हिम्मत न हारा, काहेकि उनहिन माहीं तौहार पंचन के भलाई हय।

### इफिसुस के बिसुआसी लोगन के खातिर पवलुस के प्राथना

14 इहय कारन से हम परमपिता के आँगे गोड़न गिरित हएन, 15 काहेकि उनहिन के द्वारा स्वरग अउर धरती के ऊपर, हरेक घरानन के मनइन के नाम धराबा जात हय। 16 हम प्राथना करित हएन, कि परमातिमा अपने महिमा के धन के मुताबिक, तौहई पंचन काहीं इआ बरदान देंय, कि तूँ पंचे उनखे पबित्र आत्मा से सामर्थ पाइके, अपने अन्दर के सुभाव माहीं मजबूत होत जा। 17 अउर बिसुआस के द्वारा मसीह तौहरे हिरदँय माहीं निवास करँय, जउने तूँ पंचे मसीह के प्रेम माहीं नेव के समान सुरुआत कइके, जड़ कि नाई प्रेम माहीं मजबूत होइजा। 18 जउने तूँ पंचे सगले पबित्र मनइन के साथ निकहा से इआ समझँड के सक्ती पाबा; कि मसीह के प्रेम के लम्बाई, चउँडाई, उँचाई, अउर गहराई केतनी हय। 19 अउर मसीह के उआ प्रेम काहीं जान सका, जउन मनइन के हरेकमेर के ग्यान से नहीं जाना जाय सकय, जउने तूँ पंचे परमातिमा के सगली भरपूरी से भरपूर होइजा।

20 अब परमातिमा जउन सर्वसक्तिमान हँ, उनसे जेतना हम पंचे माँग सकित हएन, इआ कि जहाँ तक सोच सकित हएन, ओहू से जादा ऊँ काम कइ सकत हँ, अउर उहय सामर्थ से हमरे जीवन माहीं काम करत हँ। 21 परमातिमा के बड़ाई मसीही मन्डली माहीं, अउर मसीह यीसु माहीं, अनन्त पीढ़िन तक जुग-जुग होत रहय। आमीन।

### मसीह के देह माहीं एकता

4 हम पवलुस प्रभू के सेबक होंड के कारन जउन बन्दी बने हएन, तौहसे बिनती करित हएन, कि जउने उद्देश्य से परमातिमा तौहई बोलाइन हीं, ओहिन के काबिल तौहार चाल-चलन होय। 2 अरथात हमेसा दीनता अउर नम्रता के साथ जीवन जिआ, अउर प्रेम के साथ धीरज धइके एक दुसरे के गलतिन काहीं सहि ल्या। 3 पबित्र आत्मा के सहायता से एक दुसरे से मेल-मिलाप कइके एकता बनाए रहँय के कोसिस करत रहा। 4 काहेकि मसीह के एकयठे देह ही, अउर एकयठे पबित्र आत्मा हय; उहयमेर तूँ पंचे जेतने जने बोलाए गया तय, सगलेन के खातिर एकयठे आसा ही। 5 अउर सगलेन के एकयठे प्रभू हँ, अउर एकयठे बिसुआस हय, अउर एकयठे बपतिस्मा हय। 6 अउर सगले मनइन के एकयठे परमातिमा हँ, जउन सबके पिता आहीं, जउन सगलेन के ऊपर हँ, अउर सगले मनइन के

बीच माहीं रहत हँ, अउर सगले मनइन के भीतर निवास करत हँ। 7 पय हमरे पंचन म से हरेक जन काहीं, मसीह अपने मरजी से उदारता के साथ आत्मिक बरदान दिहिन हीं। 8 एसे पबित्र सास्त्र माहीं इआ लिखा हय कि, “मसीह † ऊँचे माहीं चढ़े, अउर बंदियन काहीं बाँधि लइगे, अउर मनइन काहीं दान दिहिन।”

9 (ऊँ “ऊपर चढ़े” अरथात स्वरग माहीं, एखर मतलब इआ हय, कि मसीह धरती के नीचे के जघन माहीं घलाय उतरे रहे ह्यै। 10 अउर जउन मसीह स्वरग से उतरिके धरती माहीं आएँ, उँइन मसीह ऊपर स्वरग माहीं चढ़िगे, कि जउने ऊँ अपने सक्ती काहीं सगले संसार माहीं देखा मँड।) 11 अउर उँइन मसीह, कुछ जनेन काहीं आपन खास चेला होंड के बरदान दइके, अउर कुछ जनेन काहीं परमातिमा के सँदस बता मँड के बरदान दइके, अउर कुछ जनेन काहीं खुसी के खबर सुनामँड के बरदान दइके, अउर कुछ जनेन काहीं रखबारी करँड के बरदान दइके, अउर कुछ जनेन काहीं उपदेस देँड के बरदान दइके, मसीही मन्डली माहीं दइ दिहिन। 12 जउने सगले पबित्र मनई ग्यान माहीं सिद्ध होइ जाँय, अउर सेबा के काम निकहा से करँय, जउने मसीह के देह अरथात मसीही मन्डली के उन्नति होय। 13 अउर जब तक कि हम पंचे सगले जने बिसुआस माहीं, अउर परमातिमा के लड़िका के ग्यान माहीं एक न होइ जई, अउर मसीह के सगले गुनन काहीं अपने जीवन माहीं अपनाय के सिद्ध मनई न बन जई। 14 जउने हम पंचे चुने बुदे लड़िका कि नाई न रही, जउन ठग बिद्या अउर चतुराई के बातन माहीं, अउर दुसरेन के भ्रम माहीं डारँड बाली बातन माहीं, अउर गलत उपदेसन माहीं परि जात हँ, अउर जउनी कइती नहीं जाँय चाहँय ओहिन कइती भटक जात हँ। 15 बलकिन हम पंचे प्रेम के साथ सच्चाई माहीं चलत, सगली बातन माहीं मसीह कि नाई बनई के खातिर बढ़त जई, जउन सगली बातन माहीं सिर अरथात मुखिया आहीं। 16 जउने माहीं सगली देह निरभर रहत ही, इआ देह सिर से जुड़ी हरेक नसन से एकट्ठा होत ही, अउर जब एखर हरेक अंग जउन ओही काम करँड चाही, उआ पूर करत हय, त प्रेम के साथ सगले देह के उन्नति होत ही, अउर सगली देह मजबूत होत ही।

### मसीह माहीं नबा जीवन

17 एसे हम प्रभू के तरफ से अधिकार पाइके तौहई पंचन काहीं जताए देइत हएन, कि जइसन संसारिक मनई जउन मुक्ती नहीं पाए आहीं, ऊँ पंचे अपने मन के बुरी इच्छन के मुताबिक आपन जीवन बिताबत हँ, पय तूँ पंचे अब से पुनि कबहूँ उनखे कि नाई चाल-चलन न अपनाया। 18 काहेकि उनखर बुद्धी आँधिआर से भरी हय, अउर अपने अग्यानता के कारन, अउर अपने मन के कठोरता के कारन, परमातिमा से मिलँय बाले अनन्त जीवन से ऊँ पंचे दूर हँ। 19 अउर ऊँ पंचे नीक-नागा पहिचानँय के सक्ती काहीं गमाइके, लुचपन के कामन माहीं लगिगे हँय, कि हरेकमेर के बुरे काम अपने बुरी इच्छा से करा करँय। 20 पय तूँ पंचे मसीह के बारे माहीं जउन जाने हया, ओमाहीं अइसन सिच्छा नहीं दीनगे आय। 21 बलकिन तूँ पंचे सचमुच माहीं उनहिन के सुने हया, अउर जइसन यीसु माहीं सत्य हय, ओहिन के मुताबिक सिखाए घलाय गए हया। 22 कि तूँ पंचे पिछले चाल-चलन के पुरान सुभाव काहीं छोंडि द्या, नहीं त उआ भरमामँड बाली बुरी इच्छन माहीं फँसाइके जीवन काहीं भ्रस्ट कइ देत हय। 23 अउर तूँ पंचे अपने मन के आत्मिक सुभाव माहीं नबा बनत जा। 24 अउर तूँ पंचे उआ नबा सुभाव काहीं अपनाय ल्या, जउन परमातिमा कि नाई सच्ची धारमिकता, अउर पबित्रता माहीं रचा ग हय।

25 एसे तूँ पंचे सगले जन लबरी बोलब छोंडि द्या, अउर एक दुसरे से सही-सही बोला, काहेकि हम पंचे एक्य देह के अंग आहैन। 26 एसे तूँ पंचे क्रोध माहीं आइके पाप न कर बइठा, अउर सुरिज बूँडँ से पहिले अपने क्रोध काहीं सान्त कइल्या। 27 अउर सइतान काहीं मौका न द्या। 28 अउर जे कोऊ चोरी करत आय रहा हय, उआ पुनि चोरी न करय; बलकिन अपने हाँथन से

मेहनत मजूरी कइके, निकहे-निकहे काम करय; एसे कि तौहरे पंचन म से जेही कुछ जरूरत होय, त ओही देंड के खातिर ओखे लघे कुछ रहय।<sup>29</sup> कउनव बुरी बात तौहरे मुँहे से न निकरय, बलकिन जरूरत के मुताबिक उहय बात निकरय, जउन दुसरे के उन्नति के खातिर लाभदायक होय, जउने उआ बात काहीं सुनय बालेन के भला होय।<sup>30</sup> अउर परमातिमा के पबित्र आत्मा काहीं दुखी न करा, काहेकि परमातिमा पबित्र आत्मा काहीं, तौहरे पंचन के ऊपर छुटकारा देंड बाले दिन के खातिर चिन्हारी के रूप माहीं दिहिन हीं।<sup>31</sup> एसे तूँ पंचे हरेकमेर के करुअई, अउर प्रकोप, अउर क्रोध, अउर लड़ाई-झगड़ा, अउर दुसरे के बुराई करब, अउर हरेकमेर के बैर-भाव समेत सगली बातन काहीं अपने जीवन से दूर कइ द्या।<sup>32</sup> अउर एखे बदले माहीं एक दुसरे के ऊपर करुना अउर दया करा, अउर जइसन परमातिमा मसीह के व्दारा तौहरे अपराधन काहीं माफ किहिन हीं, उहयमेर तुहूँ पंचे आपस माहीं एक दुसरे के अपराधन काहीं माफ करा।

### हमहीं पंचन काहीं पबित्र जीवन जिअँड चाही

5 तूँ पंचे परमातिमा के पियार लड़िका आह्या, एसे उनहिन कि नाई पबित्र जीवन बिताबा।<sup>2</sup> अउर जइसन मसीह घलाय हमसे पंचन से प्रेम किहिन हीं, उहयमेर तुहूँ पंचे एक दुसरे से प्रेम करा। अउर प्रेमय के कारन हमहीं पंचन काहीं मुक्ती देंड के खातिर, ऊँ परमातिमा काहीं प्रसन्न करँड बाले सुगन्धित बलिदान के रूप माहीं, उनखे आँगे खुद काहीं बलिदान कइ दिहिन।<sup>3</sup> अउर जइसन परमातिमा के पबित्र मनइन काहीं उचित हय, उनहिन कि नाई तौहरे बीच माहीं ब्यभिचार के बारे माहीं, अउर कउनव मेर के असुद्ध कामन के बारे माहीं, इआ कि लालच के बारे माहीं चरचव तक न होंड चाही।<sup>4</sup> अउर निरलज्जता के बातँय, मूरखँड बाली बातँय, अउर हँसी मजाक के बातँय, तौहरे बीच माहीं कबहूँ न होंड चाही, काहेकि पबित्र मनइन काहीं इआ सोभा नहीं देय, बलकिन तौहरे बीच माहीं हमेसा परमातिमा काहीं धन्यवाद देंड बाली बातँय सुनाई देंड चाही।<sup>5</sup> काहेकि तूँ पंचे खुदय इआ जनते हया, कि ब्यभिचार करँड बाला, इआ कि असुद्ध मनई, इआ कि लालच करँड बाला मनई, (काहेकि लालच करब मूरत के पूजा करँड के बराबर हय) इआ मेर के मनई मसीह अउर परमातिमा के राज के कबहूँ बारिसदार न बनिहँय।<sup>6</sup> सचेत रहा, कि तौहई पंचन काहीं कउनव मनई बेफालतू के बातन से धोखा न देंड पाबय; काहेकि ईन बेफालतू के बातन के कारन परमातिमा के दन्द उनहीं मिलत हय, जे उनखे हुकुम काहीं नहीं मानँय।<sup>7</sup> एसे तूँ पंचे उनखे साथ सामिल न होया।<sup>8</sup> काहेकि तूँ पंचे पहिले आँधिआर से भरे रहे हया, पय अब प्रभू के ऊपर बिसुआस कइके उँजिआर से भर गया हय, एसे तूँ पंचे अब उँजिआर अरथात जोति के सन्तान कि नाई जीवन जिआ।<sup>9</sup> (काहेकि जोति के फल हरेकमेर के भलाई, अउर धारमिकता अउर सत्य हय।)<sup>10</sup> अउर तूँ पंचे हरेक समय इआ जानँय के कोसिस करा, कि “प्रभू कउने बात से प्रसन्न होत हें?”<sup>11</sup> अउर तूँ पंचे आँधिआर के बुरे कामन माहीं सामिल न होया, बलकिन उनखे बारे माहीं मनइन काहीं उलउना द्या।<sup>12</sup> काहेकि जउन काम ऊँ पंचे लुकिके किहिन हीं, उनखर चरचव तक करब बड़े सरम के बात ही।<sup>13</sup> अउर जेतने आँधिआर माहीं कीन बुरे कामन के बिरोध कीन जात हय, ऊँ सगले उँजिआर माहीं प्रगट कीन जइहँय, काहेकि उँजिआर सगले कामन काहीं प्रगट कइ देत हय।<sup>14</sup> एहिन से पबित्र सास्त्र माहीं इआ लिखा हय, “हे सोमँड बाले अरथात पाप माहीं जीवन बितामँड बाले मनई, मुरदन म से जि उठ, अरथात अपने बुरे कामन काहीं छोंडिके सत्य काहीं अपनाव; तबहिन मसीह के उँजिआर तोरे ऊपर चमकी।”

<sup>15</sup> एसे तूँ पंचे सतरक रहिके अपने जीवन काहीं जाँचा, कि तौहार पंचन के चाल-चलन कइसन हय; तौहार पंचन के चाल-चलन निरबुद्धी मनइन कि नाई न होय, बलकिन बुद्धिमान मनइन कि नाई होंड चाही।<sup>16</sup> अउर तौहई पंचन काहीं अपने जीवन काहीं सुधारँय के खातिर, जउन खुब कीमती समय मिला हय, ओखर पूर-पूर उपयोग करा, काहेकि बहुत बुरा समय चल रहा

हय।<sup>17</sup> एसे निरबुद्धी मनई कि नाई न बना, बलकिन प्रभू के इच्छा तौहरे पंचन के जीवन माहीं का ही? ओही बड़े ध्यान से समझँय के कोसिस करा।<sup>18</sup> अउर पबित्र आत्मा से भरपूर होत जा, इआ नहीं, कि तूँ पंचे मदिरा पिके मतबार बना, जउने से लुचपन के काम होत हय।<sup>19</sup> बलकिन आपस माहीं परमातिमा के भजन, स्तुति के गाना, अउर आत्मिक गाना गाबत रहा, अउर अपने-अपने मनन माहीं प्रभू के हाजिरी माहीं स्तुति करत रहा।<sup>20</sup> अउर हमेसा सगली बातन के खातिर, हमरे पंचन के प्रभू यीसु मसीह के नाम से पिता परमातिमा के धन्यवाद करत रहा।<sup>21</sup> अपने जीवन माहीं मसीह के भय माना, अउर आपस माहीं एक दुसरे के सम्मान करा।

### मंसेरुआ अउर मेहेरिआ काहीं कइसा जीवन जिअँड चाही

<sup>22</sup> हे मेहेरिअव, अपने-अपने मंसेरुअन के अइसन अधीन रहा, जइसन तूँ पंचे प्रभू के अधीन रहते हया।<sup>23</sup> काहेकि अपने मेहेरिआ के ऊपर ओखर मंसेरुअय सिर अरथात मुखिया होत हय, उहयमेर जइसन मसीही मन्डली के सिर अरथात मुखिया मसीह हें। काहेकि मसीही मन्डली, मसीह के देंड आय, अउर मसीहय ओखर मुक्तीदाता आहीं।<sup>24</sup> एसे जइसन मसीही मन्डली, मसीह के अधीन ही, उहयमेर मेहेरिअव घलाय हरेक बात माहीं अपने-अपने मंसेरुअन के अधीन रहँय।<sup>25</sup> अउर हे मंसेरुअव, अपने-अपने मेहेरिअन से प्रेम करा, जइसन मसीह घलाय मसीही मन्डली से प्रेम कइके, अपने-आप काहीं ओखे खातिर बलिदान कइ दिहिन हीं।<sup>26</sup> कि ओही अपने बचन रूपी पानी से नहबाइके सुद्ध करँय, अउर ओही पबित्र बनाय देंय।<sup>27</sup> अउर ओही अइसन महिमावान मसीही मन्डली बनाइके अपने आँगे ठाढ़ करँय, जउने माहीं कउनव कलंक न होय, न कउनव दाग धब्बा होय, अउर न ओमाहीं कउनव कमी होय, बलकिन उआ पबित्र अउर निरदोस होय।<sup>28</sup> इहइमेर उचित हय, कि मंसेरुआ अपने-अपने मेहेरिअन से अपने देंड कि नाई प्रेम करँय, अउर जे कोऊ अपने मेहेरिआ से प्रेम करत हय, उआ अपने-आप से प्रेम करत हय।<sup>29</sup> काहेकि कोऊ अपने देंड से कबहूँ दुसमनी नहीं रक्खय, बलकिन निकहा से ओही पालत-पोसत हय, जइसन कि मसीह घलाय मसीही मन्डली के पालन-पोसन करत हें।<sup>30</sup> एसे कि हम पंचे मसीह के देंड, अरथात मसीही मन्डली के अंग आहैन।

<sup>31</sup> अउर पबित्र सास्त्र माहीं इआ लिखा हय, कि “मनई अपने महतारी-बाप काहीं छोंडिके अपने मेहेरिआ के साथ माहीं रही, अउर ऊँ दोनव एक तन होइ जइहँय।”

<sup>32</sup> अउर हम पंचे जानित हएन, कि इआ भेद खुब बड़ा हय; पय हम मसीह, अउर मसीही मन्डली के बारे माहीं कहित हएन।<sup>33</sup> पय तौहरे पंचन म से हरेक जन अपने मेहेरिआ से अपने देंड कि नाई प्रेम करय, अउर मेहेरिआ घलाय अपने मंसेरुआ के मान-सम्मान करँय।

### महतारी-बाप अउर लड़िकन काहीं कइसा रहँड चाही

6 हे लड़िका बिटिअव, तूँ पंचे प्रभू के ऊपर बिसुआस करते हया, एसे अपने महतारी-बाप के हुकुमन काहीं पालन करँड बाले बना, काहेकि इआ उचितव हय।<sup>2</sup> अपने महतारी-बाप के मान-सम्मान करा, इआ परमातिमा के पहिल हुकुम आय, जउने के साथ वादा घलाय हय,<sup>3</sup> कि तौहार भला होई, अउर तूँ पंचे धरती माहीं खुब दिन तक जिअत रइहा।<sup>4</sup> अउर हे महतारी-बापव, अपने लड़िकन काहीं रिस न देबाबा, बलकिन प्रभू के सिच्छा द्या, अउर गलती करँय त चेतउनी द्या, अउर उनखर निकहा से पालन-पोसन करत रहा।

### मालिक अउर सेबक काहीं कइसन रहँड चाही

<sup>5</sup> हे दासव, जउन तौहार संसारिक मालिक हें, अपने पूरे मन से डेरात अउर काँपत-काँपत उनखे हुकुमन काहीं माना, जइसन मसीह के हुकुमन काहीं मनते हया।<sup>6</sup> अउर मनइन काहीं खुस करँड बालेन कि नाई देखाला के

खातिर सेबा न करा, बलकिन मसीह के सेबकन कि नाई, जउन पूरे मन से परमातिमा के इच्छा के मुताबिक चलत हैं, उहयमेर तुहूँ पंचे अपने मालिकन के पूरे मन से सेबा करा।<sup>7</sup> अउर अपने मालिकन के सेबा अपने पूर मन से करा, अउर उनखे सेबा काहीं मनइन के नहीं, बलकिन प्रभू के सेबा समझिके करा।<sup>8</sup> काहेकि तूँ पंचे खुदय जनते हया, कि जे कोऊ जेतना निकहा काम करी, उआ ओतनय निकहा प्रभू से प्रतिफल पाई, चाह उआ मालिक होय, चाह सेबक।<sup>9</sup> अउर हे मालिकव, तुहूँ पंचे घलाय धमकी देब छोड़िके, उनखे साथ निकहा बेउहार करा, काहेकि तूँ पंचे खुदव जनते हया कि उनखर अउर तौहार दोनव जनेन के मालिक एकय आहीं, जउन स्वरग माहीं हैं, अउर ऊँ कोहू के साथ पच्छपात नहीं करँय।

### आत्मिक लड़ाई के हँथिआर

<sup>10</sup> मतलब इआ, कि तूँ पंचे प्रभू के ऊपर पूरा भरोसा रक्खे रहा, जउने उनखर सक्ती पाइके मजबूत बन जा।<sup>11</sup> परमातिमा के दीन सगले आत्मिक हँथिआरन काहीं अपने देह माहीं बाँधि ल्या; जउने सइतान के बुरी योजनन के सामना कइ सका।<sup>12</sup> काहेकि हमार पंचन के लड़ाई खून अउर माँस अरथात कउनव मनई से नहिं आय, बलकिन हमार पंचन के लड़ाई सइतान अउर ओखे बुरी आत्मन से हय, जउन इआ संसार माहीं राज करत हय, अउर हम पंचे अकास माहीं रहँइ बाली बुरी आत्मन के सक्तिन के साथ लड़ि रहेन हय।<sup>13</sup> एसे परमातिमा के दीन सगले आत्मिक हँथिआरन काहीं बाँधि ल्या, कि जउने तूँ पंचे बुरे दिनन माहीं ओखर सामना कइ सका, अउर सगली लड़ाई पूर कइके, बिसुआस माहीं अटल रहि सका।<sup>14</sup> एसे सत्य से आपन करिहा कस के, अउर धारमिकता के कबच अरथात झिलम पहिरिके,<sup>15</sup> अउर गोडेन माहीं मेल-मिलाप के खुसी के खबर काहीं सुनामँइ के

तइआरी के पनहीं पहिरिके,<sup>16</sup> अउर उन सगलेन के साथय बिसुआस रूपी ढाल लइके अटल रहा, जउने उआ दुस्ट सइतान के सगले बरत तीरन काहीं बुझाय सका।<sup>17</sup> अउर मुक्ती रूपी टोप, अउर आत्मा के तलबार जउन परमातिमा के बचन हय, ओही लइ ल्या।<sup>18</sup> अउर तूँ पंचे हमेसा पूरे मन से पबित्र आत्मा के मदत से बिनती, प्राथना करत रहा, अउर एहिन से सचेत रहा, कि जउने सगले पबित्र मनइन के खातिर लगीतार परमातिमा से बिनती करत रहा।<sup>19</sup> अउर तूँ पंचे हमरेव खातिर प्राथना करत रहा, कि हमहीं बोलत के समय परमातिमा अइसन सामरथी बचन देंय, कि हम बड़े साहस के साथ खुसी के खबर के भेद काहीं बताय सकी, जउने के खातिर हम जंजीर से बाँधे राजदूत कि नाई हएन।<sup>20</sup> अउर इहव प्राथना करा, कि हम खुसी के खबर के बारे माहीं जइसन हमहीं बोलँय चाही, उहयमेर साहस के साथ बोलि सकी।

### पवलुस के अन्तिम अभिबादन

<sup>21</sup> अउर तुखिकुस जउन पियार भाई अउर प्रभू यीसु के बिसुआस के काबिल सेबक आहीं, तौहई पंचन काहीं हमरे बारे माहीं सगली बातँय बतइहँय, कि जउने तूँ पंचे इआ जाना, कि हम कउने हाल माहीं रहित हएन।<sup>22</sup> अउर उनहीं हम तौहरे लघे एहिन से पठएन हय, कि जउने तूँ पंचे हमरे हाल के बारे माहीं जाना, अउर एहू के खातिर कि ऊँ तौहरे मनन काहीं सान्ति देंय।

<sup>23</sup> अउर हम प्राथना करित हएन, कि पिता परमातिमा अउर प्रभू यीसु मसीह के तरफ से भाई-बहिनिन काहीं सान्ति अउर बिसुआस समेत प्रेम मिलय।<sup>24</sup> अउर जे कोऊ हमरे पंचन के प्रभू यीसु मसीह से सच्चा प्रेम करत हैं, उन सगलेन के ऊपर परमातिमा के किरपा होत रहय।

# फिलिप्पियन

## इआ चिट्ठी के परिचय

फिलिप्पी सहर के रहँइ बाले बिसुआसी लोगन के खातिर लिखी, यीसु मसीह के खास चेला पवलुस के चिट्ठी यूरोप देस के धरती माहीं स्थित, पहिल मसीही मन्डली के खातिर लिखी गे रही हय, जेखर स्थापना पवलुस किहिन रहा हय। अउर उआ रोम देस के मकिदुनिया प्रदेस माहीं स्थित रही ही। इआ चिट्ठी उआ समय लिखी गे रही हय, जब पवलुस जेल माहीं रहे हँय, अउर जब ऊँ दुसरे मसीही कार-करतन के व्दारा अपने बिरोध के कारन परेसान, अउर फिलिप्पी सहर के मसीही मन्डली माहीं चल रही गलत सिच्छन से दुखी रहे हँय। ओखे बादव इआ चिट्ठी आनन्द अउर साहस के बारे माहीं बताबत ही, जउने काहीं केबल यीसु मसीह के ऊपर पवलुस के मजबूत बिसुआसय के व्दारा समझाबा जाय सकत हय।

इआ चिट्ठी लिखँइ के उआ समय के कारन इआ रहा हय, फिलिप्पी सहर के मसीही भाई-बहिनिन काहीं धन्यबाद देब, अउर उआ भेंट के खातिर जउन ऊँ पंचे पवलुस के जरूरत के समय उनहीं पठइन तय। ऊँ इआ मोका के उपयोग उनहीं पंचन काहीं आस्वासन देंइ के खातिर करत हँ, कि जउने ऊँ उनखर अउर साथ-साथ खुदय अपने जीवन माहीं कठिनाइन के बादव साहस अउर भरोसा रक्खँय। ऊँ उनसे निबेदन करत हँ, कि ऊँ पंचे सोरथ के अभिलासन अउर घमन्ड के बदले, यीसु के नम्र सुभाव काहीं अपनायँय। अउर ऊँ उनहीं पंचन काहीं इहव सुध देबाबत हँ, कि मसीह के ऊपर बिसुआस माहीं उनखर जीवन परमातिमा के किरपा के एकठे दान आय, जउने काहीं ऊँ पंचे परमातिमा के ऊपर बिसुआस के व्दारा पाइन हीं, न कि यहूदी जाति के बिधान के नेमन काहीं मानँइ के व्दारा। पवलुस उआ आनन्द अउर सान्ति के बारे माहीं लिखत हँ, जेही परमातिमा उन मनइन काहीं देत हँ, जउन मसीह के साथ एकता के जीवन जिअत हँ।

मसीही बिसुआस अउर जीवन माहीं आनन्द, निश्चय, एकता अउर मजबूती के ऊपर जोर देब, इआ चिट्ठी के खूबी आय। इआ चिट्ठी फिलिप्पी सहर के मसीही मन्डली के मनइन के खातिर पवलुस के मजबूत प्रेम के बारे माहीं बताबत ही।

रूप-रेखा :

भूमिका

पवलुस के निजी परिस्थितियाँ

मसीह माहीं जीवन

तीमुथियुस अउर इपफ्रुदीतुस के खातिर योजना

दुसमनन अउर खतरन के बिरोध माहीं चेतउनी

पवलुस अउर उनखर फिलिप्पी सहर के साथी

उपसंहार

## पवलुस के अभिबादन

1 प्रभू यीसु मसीह के सेबक पवलुस अउर तीमुथियुस के तरफ से इआ चिट्ठी, फिलिप्पी सहर माहीं रहँइ बाले मसीह यीसु के ऊपर बिसुआस करँइ बाले भाई-बहिनिन, अउर मसीही मन्डली के अँगुअन अउर सेबकन काहीं मिलय।

2 हम पंचे इआ प्राथना करित हएन, कि हमरे पंचन के पिता परमातिमा अउर प्रभू यीसु मसीह के तरफ से तौहँई पंचन काहीं किरपा अउर सान्ति मिलत रहय।

## पवलुस के प्राथना अउर धन्यबाद

3 हम जब-जब तौहँई पंचन काहीं सुध करित हएन, तब-तब अपने परमातिमा काहीं धन्यबाद देइत हएन। 4 अउर जब-जब हम प्राथना करित हएन, त तौहरे खातिर बड़े आनन्द के साथ प्राथना करित हएन। 5 काहेकि तूँ पंचे जब से खुसी के खबर सुने हया, तब से लइके आज तक खुसी के खबर के प्रचार करँइ माहीं हमरे साथ सामिल रहे हया। 6 अउर हमहीं इआ बात के पूर बिसुआस हय, कि परमातिमा जउन तौहरे पंचन के जीवन माहीं निकहा काम सुरू किहिन हीं, उँइन ओही मसीह यीसु के दिन तक पूर करिहँय।

7 तौहरे बारे माहीं हमहीं अइसा सोचब उचित हय, काहेकि तूँ पंचे हमरे हिरदँय माहीं बसे हया। अउर हम जेल माहीं हएन, तऊ खुसी के खबर के खातिर मनइन काहीं जबाब देंइ माहीं, अउर अपने जीवन के व्दारा गबाही देंइ माहीं, परमातिमा हमरे ऊपर बड़ी दया कइके हमार मदत किहिन हीं, अउर ऊँ सगले कामन काहीं करँइ माहीं तूँ पंचे हमरे साथ सामिल हया।

8 इआ बात माहीं परमातिमा हमार गबाह हँ, कि हम तौहसे मसीह यीसु कि नाई प्रेम करित हएन, अउर हम तौहसे मिलँय के खातिर ब्याकुल रहित हएन। 9 अउर हम हमेसा इहय प्राथना करत रहित हएन, कि तौहार पंचन के प्रेम, ग्यान अउर हरेकमेर के सोचँय-समझँय के छमता अउर बाढ़त जाय।

10 इहाँ तक कि तूँ पंचे मसीह के उत्तम से उत्तम बातन काहीं पियार जाना, अउर मसीह के दिन तक सच्चे बने रहा; अउर बिसुआस से भटकँय न पाबा।

11 अउर जउन काम परमातिमा के नजर माहीं निकहे हँय, उनहीं तूँ पंचे करत रहा, जउने परमातिमा के बड़ाई अउर अराधना होत रहय, काहेकि यीसु मसीह के द्वारा परमातिमा अपने नजर माहीं तौहँई धरमी बनाइन हीं।

## जेल माहीं पवलुस के जाँय से खुसी के खबर के बढ़ोत्तरी

12 हे बिसुआसी भाई-बहिनिव, हम चाहित हएन, कि तूँ पंचे इआ जानिल्या, कि जउन हमरे ऊपर बीता हय, ओसे खुसी के खबर के

बढ़ोत्तरिन भे ही।<sup>13</sup> इहाँ तक कि कैसर के राज के सगली सेना, अउर उनखे अलाबा सगले मनई इआ जानिगें हँय, कि हम मसीह के ऊपर बिसुआस किहे के कारन जेल माहीं हएन।<sup>14</sup> अउर प्रभू के ऊपर बिसुआस करई बाले जउन भाई हँ, उनमा से जादा से जादा हमरे जेल माहीं होइ के कारन, साहस के साथ, परमातिमा के बचन अउर निधड़क होइके सुनामँइ के हिम्मत करत हँ।

<sup>15</sup> अउर कुछ मनई त हमसे डाह अउर दुसमनी के कारन मसीह के प्रचार करत हँ, अउर कुछ जने निकहे मन से मसीह के प्रचार करत हँ।<sup>16</sup> अउर ई पंचे इआ जानिके, कि परमातिमा हमहीं खुसी के खबर के बारे माहीं मनइन काहीं सही जबाब देई के खातिर चुनिन हीं, एसे ऊँ पंचे बड़े प्रेम के साथ खुसी के खबर के प्रचार करत हँ।<sup>17</sup> पय अउर कुछ जने त सच्चाई के साथ नहीं, बलकिन अपने सोरथ के खातिर मसीह के प्रचार करत हँ, काहेकि ऊँ पंचे इआ सोचत हँ, कि इआमेर कइके हमरे खातिर जेल माहीं कस्ट पड़दा कइ सकत हँ।<sup>18</sup> त एसे का भ? कि हम जेल माहीं हएन, इआ जानिके, कि चाह हमरे बिरोध माहीं, चाह सच्चाई से, मसीह के कथा त सुनाई जात ही, एसे हम आनन्दित हएन, अउर हमेसा आनन्दित रहबव करब।

### मसीह के खातिर जिन्दा रहब

<sup>19</sup> काहेकि हम जानित हएन, कि तौहरे पंचन के प्राथना से, अउर यीसु मसीह के दीन पबित्र आत्मा के दान के व्दारा, हमहीं एखर प्रतिफल जरूर मिली, अउर हम जेल से छूटि जाब।<sup>20</sup> हम हिरदँय से इहय आसा अउर बिसुआस रक्खित हएन, कि हम कउनव बात माहीं लज्जित न होई, बलकिन हमरे बड़े साहस के कारन मसीह के बड़ाई होय, जइसन हमरे देह के व्दारा हमेसा होत रही हय, उहयमेर अबहिनव होय, चाह हम जिन्दा रही, चाह मर जई।<sup>21</sup> काहेकि हमरे खातिर जिन्दा रहब मसीह हय, अउर मरिव जाँइ से फायदय हय।<sup>22</sup> पय अगर इआ देह माहीं हमार जिन्दा रहब, हमरे काम के खातिर फायदेमन्द हय, त हम नहिं जाने पाई, कि हम केही चुनी।<sup>23</sup> काहेकि हम दोनव के बीच माहीं अधबीचे माहीं लटके हएन; एक मन त लागत हय, कि इआ दुनिया से कूँच कइके मसीह के लघे चले जई, काहेकि इआ हमरे जीवन के खातिर खुब निकहा हय।<sup>24</sup> पय तौहरे पंचन के खातिर, इआ देह माहीं हमार जिन्दा रहब बहुतय जरूरी हय।<sup>25</sup> अउर इआ बात जानित हएन, कि हम जिन्दा रहब, काहेकि हमहीं प्रभू के ऊपर बिसुआस हय, एसे कि हम तौहरे पंचन के साथय माहीं रहब, जउने तूँ पंचे बिसुआस माहीं मजबूत होइजा, अउर प्रभू माहीं आनन्दित रहा।<sup>26</sup> अउर प्रभू के ऊपर हमरे मजबूत बिसुआस के कारन, तूँ पंचे हमरे बारे माहीं घमन्ड करते हया, उआ तौहरे पंचन के लघे हमरे पुनि आमँइ से, मसीह यीसु माहीं अउर जादा बढ़ि जाय।

<sup>27</sup> अउर हम तौहरे लघे अई, चाह न अई, तूँ पंचे केबल एतना करा, कि तौहार चाल-चलन मसीह के खुसी के खबर के काबिल होय, अउर हम तौहरे पंचन के बारे माहीं इहय सुनी, कि तूँ पंचे एक मन होइके, खुसी के खबर के ऊपर बिसुआस काहीं मजबूत करई के खातिर मेहनत करत रहते हया।<sup>28</sup> अउर कउनव बात माहीं अपने बिरोधिन से नहीं डेराते आह्या, इआ उनखे खातिर नास होइ के स्पस्ट चिन्हारी होई, पय तौहरे खातिर मुक्ती पामँइ के, अउर इआ परमातिमा के तरफ से होई।<sup>29</sup> काहेकि तौहरे ऊपर परमातिमा के इआ बड़ी दया मसीह के कारन भे ही, कि न केबल तूँ पंचे उनखे ऊपर बिसुआस करा, बलकिन उनहिन के खातिर दुखव उठाबा।<sup>30</sup> अउर खुसी के खबर के खातिर जइसन मेहनत करत हमहीं तूँ पंचे देखे हया, उहयमेर तुहूँ पंचे करा, अउर अबहिनव तूँ पंचे सुनते हया, कि हम उहयमेर मेहनत करित हएन।

### मसीह के दीनता अउर महानता

2 अगर तौहरे पंचन के जीवन माहीं मसीह माहीं कउनव उराव हय, प्रेम से पड़दा भे हिम्मत ही, अउर अगर पबित्र आत्मा माहीं कउनव

भागीदारी हय, अउर करुना के कउनव भावना ही, इआ कि दया ही।<sup>2</sup> त हमार इआ आनन्द पूर करा, कि सब कोऊ एक मन रहा, अउर एक प्रेम माहीं बँधे रहा, अउर एक चित्त रहा, अउर एकय बिचार रक्खा।<sup>3</sup> आपस माहीं बिरोध इआ कि झूठी बड़ाई पामँइ के खातिर कुछू न करा, पय नम्रता के साथ एक दुसरे काहीं अपने से निकहा समझा।<sup>4</sup> तौहरे पंचन म से सगले जनेन काहीं इआ चाही, कि ऊँ केबल अपनय भर नहीं, बलकिन दुसरेव के हित के घलाय ध्यान रक्खँय।<sup>5</sup> अउर जइसन मसीह यीसु के सुभाव रहा हय, उहयमेर तौहरव पंचन के सुभाव होय।<sup>6</sup> जइसन

यीसु मसीह परमातिमा के स्वरूप माहीं होय के बादव, परमातिमा के बराबर होइ काहीं अपने बस माहीं रक्खँय के चीज नहीं समझिन।

<sup>7</sup> बलकिन अपने-आप काहीं अइसन सून्य कइ दिहिन, अउर सेबक के रूप धारन कइके मनई के समानता माहीं होइगें।

<sup>8</sup> अउर मनई के रूप माहीं पड़दा होइके अपने-आप काहीं दीन किहिन, अउर इहाँ तक परमातिमा के हुकुमन काहीं मानिन, कि मउत काहीं अरथात क्रूस के मउत काहीं घलाय सहि लिहिन।

<sup>9</sup> इहय कारन से परमातिमा उनीं सगलेन से ऊँच जघा माहीं उठाइन, अउर उनीं उआ नाम दिहिन, जउन सगले नामन से बढ़िके हय।

<sup>10</sup> जउने ऊँ सगले जने यीसु के नाम के आँगे गोड़न गिरँय, अउर उनखर अराधना करँय, चाह ऊँ स्वर्ग के होय, चाह ऊँ धरती के होय, अउर चाह ऊँ धरती के नीचे के होय।

<sup>11</sup> अउर पिता परमातिमा के महिमा के खातिर, हरेक मनई इआ सोइकार कइ लेय, कि यीसु मसीहय प्रभू आहीं।

### संसार माहीं उँजिआर कि नाई चमका

<sup>12</sup> एसे हे हमार पियार साथिव, जब हम तौहरे साथ माहीं रहेन हय, त तूँ पंचे हमेसा हमरे हुकुमन काहीं मानत रहे हया, उहयमेर अबहिनव निकहा से माना, भले हम तौहरे लघे नहिं आहेन, तऊ परमातिमा के भय मानत, अउर उनखर सम्मान करत, जउन मुक्ती तौहई पंचन काहीं मिली हय, ओहिन के मुताबिक काम करा।<sup>13</sup> काहेकि उआ काम करई के इच्छा, अउर ओही पूर करई के काम, उँइ दोनव बातन काहीं परमातिमा अपने भली इच्छा से तौहरे मनन माहीं डारिन हीं।

<sup>14</sup> एसे बिना सिकाइत किहे, अउर बिना बाद-बिबाद किहे, सगले कामन काहीं करत रहा।<sup>15</sup> जउने तूँ पंचे निरदोस अउर भोले-भाले बनिके बुरी चाल चलई बाले, अउर हठी मनइन के बीच माहीं, परमातिमा के निरदोस सन्तान बने रहा, एसे कि तूँ पंचे उनखे बीच माहीं, परमातिमा के अनन्त जीवन देई बाले बचन काहीं, अपने जीवन माहीं अपनाए, संसार माहीं जलत दियन कि नाई देखाई देते हया।<sup>16</sup> अउर मसीह के दुसराय आमँइ के दिन काहीं हमार छाती चउड़ी होइ जई, इआ देखिके, कि तूँ पंचे परमातिमा के अनन्त जीवन देई बाले बचन काहीं, अपने जीवन माहीं अपनाए हया, अउर हमरे जीवन के भाग-दउड़ अउर हमार मेहनत बेकार नहीं गो।<sup>17</sup> अउर अगर तौहरे बिसुआस रूपी बलिदान, अउर सेबा के साथ हमहीं आपन खून बहामँइ क परय, तऊ हम आनन्दित रहब, काहेकि तौहरे पंचन के आनन्दय माहीं हमार आनन्द हय।<sup>18</sup> जइसन हम आनन्दित हएन, उहयमेर हमरे साथ तुहूँ पंचे आनन्द मनाबा।

### तीमुथियुस अउर इपफ्रुदीतुस

<sup>19</sup> अगर प्रभू यीसु के मरजी होई, त हम तीमुथियुस काहीं तौहरे पंचन के लघे हरबिन पठउब, जउने ऊँ तौहार हाल चाल लइके हमहीं आइके बतामँइ, अउर तौहरे बारे माहीं जानिके हमरे मन काहीं सान्ति मिलय।<sup>20</sup> काहेकि हमरे लघे इनखे सुभाव कि नाई अउर कउनव मनई नहिं आय, जउन तौहरे भलाई के खातिर सच्चे मन से चिन्ता करत होय।<sup>21</sup> काहेकि सगले मनई अपने-अपने सोरथ के कामन काहीं ढूँढ़ई माहीं लगे रहत हँ, अउर यीसु मसीह के कामन काहीं नहीं करँय।<sup>22</sup> पय तूँ पंचे, तीमुथियुस काहीं

अजमाइके जानिव लिहा हय, कि जइसन लड़िका अपने बाप के साथ मेहनत करत हय, उहयमेर खुसी के खबर के प्रचार करैय माहीं ऊँ हमरे साथ मेहनत किहिन हीं।<sup>23</sup> एसे हमहीं आसा ही, कि जइसय हमहीं इआ जान परी, कि हमार का हाल होंइ बाला हय, हम हरबिन अगर प्रभू के इच्छा होई, त उनहीं तोंहरे लघे पठय देब।<sup>24</sup> अउर हमहीं पूर बिसुआस हय, कि प्रभू के मदत से, हमहूँ घलाय तोंहरे पंचन के लगे हरबिन अउब।

<sup>25</sup> अउर हम इआ जरूरी समझेन, कि इपफुदीतुस काहीं तोंहरे पंचन के लघे पठई, जउन हमार बिसुआसी भाई आहीं, अउर हमरे साथ काम करई बाले, अउर कामन माहीं सिपाही कि नाई मदत करई बाले, अउर तोंहई पंचन काहीं सँदेस देई बाले आहीं, अउर जरूरत परे माहीं हमार सेबा-सहाई करई बाले आहीं।<sup>26</sup> एसे हम उनहीं तोंहरे लघे पठयन हय, काहेकि उनखर मन तोंहरे ऊपर लगा रहत रहा हय, अउर ऊँ ब्याकुल रहत रहे हँय, कि तू पंचे उनखे बारे माहीं सुने हया, कि ऊँ बिमार हें।<sup>27</sup> अउर जरूर ऊँ बिमार होइगें तय, अउर लागत रहा हय, कि मर जइहँय, पय परमातिमा उनखे ऊपर दया किहिन, त ऊँ नीक होइगें, अउर उनखेन ऊपर भर नहीं, बलकिन हमरेव ऊपर घलाय दया किहिन हीं, कि जउने हमरे ऊपर दुख म दुख न परय।<sup>28</sup> अउर हम एहिन से उनहीं तोंहरे लघे पठमँइ के अउरव कोसिस किहेन, कि उनसे पुनि तू पंचे मिलिके आनन्दित होइजा, अउर हमरव दुख कुछ कम होइ जाय।<sup>29</sup> एसे तू पंचे प्रभू माहीं, उनखर बड़े आनन्द के साथ स्वागत किहा, अउर इआमेर के मनइन के आदर किहा करा।<sup>30</sup> काहेकि उँइन मसीह के काम के खातिर अपने प्रान के बाजी लगाइन रहा हय, एसे उनखर इआ हालत होइगे रही हय, कि लागत रहा हय, कि ऊँ मर जइहँय, जउन तोंहरे पंचन के तरफ से हमरे सेबा माहीं कमी रहिगे तय, ओही ऊँ पूर करिहँय।

### सच्ची धारमिकता

**3** एसे हे हमार भाई-बहिनिव, प्रभू माहीं आनन्दित रहा, अउर तोंहरे कुसलता के खातिर उँइन बातन काहीं बेर-बेर लिखई माहीं, हमहीं कउनव कस्ट नहीं होय।<sup>2</sup> कुकुरन कि नाई नुकसान पहुँचामँइ बाले मनइन से सचेत रहा, अउर उन बुरे कामन काहीं करई बालेन से, अउर खतना करामँइ बालेन से सचेत रहा।<sup>3</sup> काहेकि खतना बाले त हमहिन पंचे आहेन, जउन पबित्र आत्मा के अँगुआई से परमातिमा के अराधना करित हएन, अउर मसीह यीसु के ऊपर घमन्ड करित हएन, अउर देह से जुडी बातन के ऊपर भरोसा नहीं रक्खी।<sup>4</sup> पय हम त अपने देह के ऊपर घलाय भरोसा रख सकित हएन, अउर अगर कउनव मनई काहीं अपने देह के ऊपर भरोसा रक्खई के बिचार होय, त हम ओहू से घलाय बढ़िके भरोसा रख सकित हएन।<sup>5</sup> अउर हम इजराइल के बंस माहीं बिन्यामीन के घराना माहीं पइदा भएन हय, अउर पइदा होए के अठएँ दिन हमार खतना भ रहा हय; एसे हम इब्रानी लोगन के खातिर इब्रानी आहेन; अउर मूसा के बिधान के बारे माहीं अगर कहा, त हम फरीसी आहेन।<sup>6</sup> अउर अगर उत्साह के बारे माहीं कहा, त मसीही मन्डली के मनइन काहीं सतामँइ बाले आहेन; अउर मूसा के बिधान के धारमिकता के बारे माहीं कहा, त हम एखे बादव निरदोस रहेन हय।<sup>7</sup> पय जउन-जउन बातँय हमरे फायदा के रही हँय, उनहीं मसीह के ऊपर बिसुआस किहे के कारन, तुच्छ समझित हएन।<sup>8</sup> बलकिन हम अपने प्रभू मसीह यीसु के उत्तम बातन काहीं पहिचान लिहेन हय, इआ कारन से मूसा के बिधान के सगली बातन काहीं तुच्छ समझित हएन; अउर सगली चीजन काहीं कूरा-कचरा समझिके छोडि दिहेन हय, जउने मसीह काहीं अपनाय सकी।<sup>9</sup> अउर उनहिन के ऊपर बिसुआस माहीं बने रही; पय उआ धारमिकता माहीं नहीं, जउन मूसा के बिधान से मिलत ही, बलकिन उआ धारमिकता माहीं बने रही जउन मसीह के ऊपर बिसुआस किहे से मिलत ही, अउर इआ धारमिकता मसीह के ऊपर बिसुआस किहे से परमातिमा के व्दारा मिलत ही।<sup>10</sup> अउर हम मसीह काहीं निकहा से जानई चाहित हएन, अउर उनखे सामर्थ के अनुभव करई चाहित हएन, जउने के व्दारा उँ मरेन म

से जि उठे रहे हँय, अउर उनखे उआ दुख माहीं सामिल होंइ चाहित हएन, अउर उहय रूप काहीं पामँइ चाहित हएन, जउने काहीं ऊँ अपने मउत के व्दारा पाइन रहा हय।<sup>11</sup> इआ आसा के साथ, कि हमहूँ कउनव मेर से मरेन म से जि उठैय के पद तक पहुँच सकी।

### लच्छ के तरफ दउडब

<sup>12</sup> एखर मतलब इआ नहीं, कि उआ पद काहीं हम पाय चुकेन, इआ कि हम पूर सिद्ध बन चुकेन हय; बलकिन उआ पद काहीं पामँइ के खातिर हम लगीतार कोसिस कइ रहेन हँय, जउने के खातिर मसीह यीसु हमहीं पकड़िन रहा हय।<sup>13</sup> हे भाई-बहिनिव, हम इआ भावना नहीं रक्खी, कि हम कहाँ से पकड़ गएन, बलकिन हम केबल इहय एकठे काम करित हएन, कि जउन बुरी बातँय हमरे जीवन माहीं पहिले रही हँय, उनहीं बिसराइके जउन हमरे आँगे लच्छ हय, ओही पामँइ के खातिर आँगे बढ़त जइत हएन।<sup>14</sup> अउर हम उआ लच्छ काहीं पामँइ के खातिर, हमेसा कोसिस करत रहित हएन, जउने हम उआ इनाम पाई, जउने काहीं पामँइ के खातिर परमातिमा हमहीं मसीह यीसु के व्दारा ऊपर, अरथात स्वर्ग माहीं बोलाइन हीं।<sup>15</sup> एसे हमरे पंचन म से जेतने जने परमातिमा के ग्यान माहीं मजबूत बनिगे हँय, ऊँ पंचे इहइमेर के सोच-बिचार रक्खँय, पय अगर कउनव बात माहीं तोंहार दूसर मेर के सोच-बिचार हय, त ओहू काहीं परमातिमा तोंहई स्पस्ट रूप से बताय देइहँय।<sup>16</sup> एसे जउने सत्य तक हम पंचे पहुँच चुकेन हय, ओहिन के मुताबिक चलत रही।

<sup>17</sup> अउर हे भाई-बहिनिव, तू पंचे सगले जन हमरे कि नाई जीवन जिआ, अउर उनहीं पहिचान लेबा करा, जउन हमरिन कि नाई जीवन जिअत हें, जेखर उदाहरन तू पंचे हमरे जीवन माहीं पउते हया।<sup>18</sup> अउर हम तोंहई एसे बताइत हएन, कि खुब जने अइसन हें, जिनखर चाल-चलन निकहा नहिँ आय, इआमेर के मनइन के चरचा हम तोंहसे कइअक बेरकी कइ चुके हएन, अउर अबहिनिव बड़े दुख के साथ बताइत हएन, कि ऊँ पंचे अपने बुरे चाल-चलन के व्दारा, मसीह के क्रूस माहीं बलिदान से इरखा रक्खत हें।<sup>19</sup> अउर अपने देह के इच्छन काहीं पूर करब परमातिमा से बढ़िके मानत हें, अउर अपने सरम बाली बातन के ऊपर घमन्ड करत हें, अउर धरती के बुरी चीजन माहीं आपन पूर मन लगाए रहत हें, अइसन करई बालेन के अन्त बिनास अरथात नरक हय।<sup>20</sup> पय हमार पंचन के जनम भूमि त स्वर्ग माहीं हय; जहाँ हमहीं पंचन काहीं मुक्ती देई बाले प्रभू यीसु मसीह रहत हें, अउर उहाँ से उनखे पुनि आमँइ के हम पंचे बड़ी आसा लगाए इन्तजार कइ रहेन हँय।<sup>21</sup> ऊँ अपने उआ सक्ती से जउने से संसार के सगली चीजन काहीं, अपने काबू माहीं कइ सकत हें, उहय सक्ती से हमरे पंचन के निबल देह के रूप बदलिके, अपने महिमामय देह कि नाई बनाय देइहँय।

### प्रभू माहीं आनन्दित रहब

**4** हे हमार पियार भाई-बहिनिव, तोंहरेन माहीं हमार जिव लगा रहत हय, काहेकि तुहिन हमार आनन्द अउर मुकुट आह्या, हे पियार भाई-बहिनिव, हम तोंहई जइसन प्रभू के बारे माहीं बताएन हय, ओहिन माहीं अटल बने रहा।<sup>2</sup> एसे हम यूआदिया काहीं अउर सुन्तुखे काहीं घलाय समझाइत हएन, कि प्रभू माहीं एकय मन से रहा।<sup>3</sup> अउर हे हमार सच्चे सहकर्मी हम तोंहऊँ से अनुरोध करित हएन, कि तू उन मेहेरिन के मदत किहा, काहेकि ऊँ पंचे क्लेमेंस अउर हमरे साथ माहीं काम करई बालेन के साथय, खुसी के खबर के प्रचार करई माहीं बड़ी मेहनत किहिन हीं, इनखर नाम जीवन के किताब माहीं लिख लीनगे हँय।

<sup>4</sup> तू पंचे प्रभू माहीं हमेसा आनन्दित रहा; इहय बात काहीं हम पुनि कहित हएन, प्रभू माहीं आनन्दित रहा।<sup>5</sup> तोंहार पंचन के सहनशीलता सगले मनइन काहीं पता चलय, जउने ऊँ प्रभू कइती आमँय, काहेकि प्रभू हरबिन आमँइ बाले हें।<sup>6</sup> कउनव बात के चिन्ता न करा, बलकिन हरेक परिस्थित माहीं तोंहार पंचन के बिनती, प्राथना धन्यवाद के साथ परमातिमा के आँगे हाजिर

कीन जाँय।<sup>7</sup> तब परमातिमा के तरफ से मिलेँ बाली सान्ति, जउन हमरे पंचन के समझ से बाहर ही, तौहरे पंचन के हिरदँय अउर बिचारन काहीं मसीह यीसु माहीं सुरच्छित बनाए रखी।<sup>8</sup> एसे हे भाई-बहिनिव, जउन-जउन बातँय सत्य हई, अउर जउन-जउन बातँय आदर के काबिल हई, अउर जउन-जउन बातँय उचित हई, अउर जउन-जउन बातँय पबित्र हई, अउर जउन-जउन बातँय निकही हई, अउर जउन-जउन बातँय मन काहीं नीक लागेँ बाली हई, मतलब इआ, कि जउन-जउन बातँय जीवन माहीं निकहे बिचार पड़दा करती हई, अउर जउन सराहनीय बातँय हई, उनहिन के ऊपर आपन ध्यान रखवा।<sup>9</sup> अउर जउन बातँय तूँ पंचे हमसे सिखे हया, अउर उनहीं अपने जीवन माहीं अपनाए हया, अउर जउन बातँय हमसे सुने हया, इआ कि हमहीं करत देखे हया, उनहिन के मुताबिक चला, तबहिन सान्ति के दाता परमातिमा तौहरे पंचन के साथ माहीं रइहँय।

### दान के खातिर धन्यवाद

<sup>10</sup> हम प्रभू माहीं खुब आनन्दित हएन, कि अब एतने दिना के बाद तौहार पंचन के हमरे बारे माहीं मदत करेँ के बिचार पुनि आबा हय; अउर हम जानित हएन, कि तौहार पंचन के इआ बिचार सुरुआतय से रहा हय, पय तौहई पंचन काहीं एखर मोकय नहीं मिला।<sup>11</sup> इआ बात हम अपने कमी-घटी के कारन न होय कहित हएन, काहेकि हम इआ सिख लिहेन हय, कि जउने हाल माहीं हम रही, ओहिन माहीं सन्तोस करी।<sup>12</sup> अउर गरीबी माहीं कइसा रहा जात हय, अउर अमीरी माहीं कइसा रहा जात हय, हम जान गएन हय, हर हाल माहीं चाह पेट भरा होय, चाह भूँखा होय, चाह हमरे लघे हर चीज भरपूर होय, चाह एक्कव न होय, उन सगली बातन माहीं खुस रहँ के भेद हम जान लिहेन हय।<sup>13</sup> जउन हमहीं सामर्थ देत हैं, उआ सामर्थ से हम सब कुछ कइ सकित हएन।

<sup>14</sup> तऊ तूँ पंचे निकहा किहा हय, जउन हमरे दुख माहीं हमार मदत किहा हय।<sup>15</sup> अउर हे फिलिप्पी सहर के मसीही मन्डली के बिसुआसी भाई-बहिनिव, तूँ पंचे खुदय जनते हया, कि जब हम खुसी के खबर के प्रचार करब सुरू किहेन तय, अउर मकिदुनिया सहर से चल दिहेन तय, तब तौहई पंचन काहीं छोंड़के, अउर कउनव मसीही मन्डली के मनई लेन-देन के बारे माहीं हमार मदत नहीं किहिन तय।<sup>16</sup> इहइमेर जब हम थिस्सलुनीके सहर माहीं रहेन हय, तबहिनव तूँ पंचे हमरे कमी-घटी काहीं पूर करेँ के खातिर, दुइ बेरकी कुछ न कुछ पठए रहे हया।<sup>17</sup> इआ नहीं, कि हम तौहसे दान चाहित हएन, बलकिन अइसन फल चाहित हएन, कि जउन तौहरे पंचन के फायदा के खातिर बाढ़त जाय।<sup>18</sup> अउर जउन चीजँय तूँ पंचे इपफुदीतुस के हाँथ से पठए रहे हया, उनहीं पाइके हमार हर जरूरत पूर होइगे ही, बलकिन हमरे लघे जरूरत से जादा चीजँय होइ गई हँय। जउन भेंट तूँ पंचे हमरे लघे पठए हया, उआ सुगन्धित अउर सोइकार करेँ के काबिल बलिदान हय, जउने से परमातिमा प्रसन्न होत हैं।<sup>19</sup> अउर हमार परमातिमा घलाय अपने उआ धन के मुताबिक, जउन मसीह यीसु माहीं महिमा समेत हय, तौहरे हरेक कमी-घटी काहीं पूर करिहँय।<sup>20</sup> हमरे पंचन के पिता परमातिमा के बड़ाई जुग-जुग तक होत रहय। आमीन!

### अन्तिम नबस्कार

<sup>21</sup> अउर हरेक ऊँ पबित्र मनइन काहीं, जउन मसीह यीसु के ऊपर बिसुआस करत हैं, हमार पंचन के नबस्कार कह्या, अउर जउन भाई हमरे साथ माहीं हैं, ऊँ पंचे घलाय तौहई नबस्कार कहत हैं।<sup>22</sup> अउर सगले पबित्र मनई खास करके जउन महाराजा कैसर के घराना के हैं, तौहई पंचन काहीं नबस्कार कहत हैं।

<sup>23</sup> अउर हम पंचे प्राथना करित हएन, कि हमरे पंचन के प्रभू यीसु मसीह के किरपा, तौहरे पंचन के आत्मा के साथ बनी रहय। आमीन!



# कुलुस्सियन

## इआ चिट्टी के परिचय

कुलुस्से सहर माहीं रहँइ बाले मनइन के नाम, यीसु मसीह के खास चेला पवलुस के लिखी चिट्टी एसिया माइनर के कुलुस्से सहर के मसीही मन्डली काहीं लिखी गे रही हय, जउन इफिसुस सहर के पूरुब कइती रहा हय। इआ मसीही मन्डली के स्थापना पवलुस नहीं किहिन रहा आय, पय इआ उआ इलाका माहीं रही हय, जेखर जबाबदारी पवलुस अपने ऊपर महसूस करत रहे हँय, जइसन कि हम पवलुस काहीं रोमी सम्राज के एकठे प्रदेश अखाया के राजधानी, इफिसुस से मसीही सेबकन काहीं पठबत पाइत हएन। पवलुस काहीं जब इआ पता चला रहा हय, कि कुलुस्से सहर के मसीही मन्डली माहीं कुछ गलत सिच्छा देँइ बाले हँ, जउन इआ बात माहीं जोर देत रहे हँय, कि परमातिमा काहीं जानँइ, अउर पूरी तरह से मुक्ती पामँइ के खातिर कउनव मनई काहीं कुछ बिसेस “आत्मिक मुखिन अउर अधिकारिन के” उपासना करब जरूरी हय। एखे साथ-साथ ई गलत सिच्छा देँइ बाले मनई कहत रहे हँय, कि कउनव मनई काहीं कुछ बिसेस धरम बिधिअन, जइसन खतना काहीं मानब, अउर खाना अउर दुसरे बातन से सम्बन्धित कठिन नेमन काहीं पालन करब जरूरी हय।

पवलुस ई गलत सिच्छा देँइ बालेन के बिरोध करँइ के खातिर, सही-सही मसीही सँदेस के साथ इआ चिट्टी काहीं लिखत हँ। एखे जबाब के मतलब इआ आय, कि यीसु मसीह पूरी तरह से मुक्ती देँइ माहीं समरथी हँ, अउर इआ कि ई दूसर बिसुआस अउर बिधी वास्तव माहीं मनई काहीं मसीह से दूरी कइ देती हई। मसीह के द्वारा परमातिमा इआ संसार के रचना किहिन हीं, अउर उनहिन के द्वारा ऊँ एही अपने लघे वापिस लइआइ रहे हँय। केबल मसीहय के द्वारा मुक्ती पामँइ के गइल ही। पवलुस तब बिसुआसी लोगन के जीवन के खातिर इआ महान सिच्छा के मतलब बताबत हँ।

इआ बात ध्यान देँइ के काबिल ही, कि तुखिकुस, जउन पवलुस के इआ चिट्टी काहीं कुलुस्से सहर लइगे रहे हँय, अउर उनखे साथ उनेसिमस घलाय रहे हँय। उआ बँधुआ दास जेखे पच्छ माहीं पवलुस फिलेमोन के चिट्टी काहीं लिखिन तय।

रूप-रेखा :

भूमिका

मसीह के सुभाव अउर काम

मसीह माहीं नबा जीवन

उपसंहार

## पवलुस के अभिवादन

1 हम पवलुस इआ चिट्टी काहीं लिख रहेन हय, जउन परमातिमा के इच्छा से यीसु मसीह के खास चेला आहैन, हमरे तरफ से अउर भाई तीमुथियुस के तरफ से, 2 इआ चिट्टी कुलुस्से सहर के भाइन काहीं मिलय, जउन पबित्रता के साथ यीसु मसीह के ऊपर बिसुआस करत हँ, अउर हम पंचे इआ प्राथना करित हएन, कि पिता परमातिमा के तरफ से तौहई पंचन काहीं किरपा अउर सान्ति मिलत रहय।

## धन्यवाद अउर प्राथना

3 हम पंचे अपने प्रभू यीसु मसीह के पिता परमातिमा काहीं धन्यवाद देइत हएन, अउर रोज तौहरे पंचन के खातिर प्राथना करित हएन। 4 काहेकि हम पंचे तौहरे बारे माहीं इआ सुने हएन, कि तूँ पंचे यीसु मसीह के ऊपर बिसुआस करते हया, अउर सगले पबित्र बिसुआसी भाई-बहिनिन से प्रेम रखते हया। 5 इआ सब उआ आसा के कारन भ हय, जउन तौहरे खातिर स्वर्ग माहीं सुरच्छित ही, अउर एखे बारे माहीं तूँ पंचे पहिलेन सत्य बचन, अरथात खुसी के खबर के द्वारा सुन चुके हया। 6 अउर खुसी के खबर सगले संसार माहीं सफल होइके फइल रही हय, इआ उहयमेर होइ रहा हय, जइसन तौहरे बीच माहीं इआ उहय समय से सफल होइ लाग रहा हय, जउने दिना तूँ पंचे परमातिमा के किरपा के बारे माहीं सुने रह्या हय, अउर सचमुच माहीं समझ गया तय। 7 तूँ पंचे खुसी के खबर के सिच्छा, हमरे साथ

माहीं काम करँइ बाले पियार साथी इपफ्रास से पाए हया, जउन हमरे खातिर मसीह के बिसुआस के काबिल सेबक हँ। 8 उँइन हमहीं इआ बताइन हीं, कि तूँ पंचे कइसन आत्मा से एक दुसरे से प्रेम करते हया।

9 एसे जउने दिना से हम तौहरे बारे माहीं इआ सुने हएन, त हमहूँ घलाय रोज तौहरे खातिर इआ प्राथना करित हएन, कि तूँ पंचे आत्मिक ग्यान अउर समझ पायजा, अउर परमातिमा के इच्छा तौहरे बारे माहीं का ही, इआ निकहा से जान जा। 10 जउने तौहार चाल-चलन प्रभू के काबिल होय, अउर तूँ पंचे हरेकमेर से प्रभू काहीं प्रसन्न करँइ बाला जीवन जिअा, अउर तूँ पंचे हरेकमेर के भलाई के कामन काहीं करँइ माहीं लगे रहा, अउर परमातिमा के ग्यान माहीं लगीतार बढ़त जा। 11 अउर परमातिमा के महिमामय सक्ती के मुताबिक हरेकमेर के सामर्थ से मजबूत होइजा, जउने दुख-मुसीबत के समय आनन्द के साथ हरेकमेर से धीरज अउर सहनशीलता देखाय सका। 12 अउर पिता परमातिमा के धन्यवाद करत रहा, जउन हमहीं पंचन काहीं एखे काबिल बनाइन हीं, कि उनखे पबित्र मनइन के साथ जउन जोति माहीं जीवन जिअत हँ, हमहूँ पंचे उनखे साथय बारिसदार बनय माहीं सामिल होइ जई। 13 उँइन हमहीं पंचन काहीं अँधिआर के सक्ती अरथात सइतान से मुक्ती दइके, अपने पियार लड़िका के राज माहीं प्रबेस कराइन हीं। 14 उनखे लड़िकय के द्वारा हमहीं पंचन काहीं मुक्ती मिली हय, अरथात हमहीं पंचन काहीं अपने पापन के माफी मिली हय।

### मसीह के महानता

15 ऊँ त देखाई न देंड बाले परमातिमा के रूप आहीं, अउर सगले संसार माहीं पहिलउठा आहीं। 16 काहेकि जउन कुछ स्वरग माहीं हँय, अउर धरती माहीं हँय, उनहिन के सक्ती के द्वारा उत्पन्न भे हँय, सब कुछ जउन देखाई देत हँ, अउर जउन देखाई नहिन देंय, चाह सिंहासन होंय, चाह राज होंय, चाह कउनव सासन करँड बाले होंय, अउर चाह कउनव अधिकारी होंय, सब कुछ उनहिन के द्वारा बनाए गे हँय, अउर उनहिन के खातिर बनाए गे हँय। 17 अउर उँइन सगली चीजन काहीं बनामँड से पहिले रहे हँय, अउर उँइन सगली चीजन काहीं स्थिर करत हँ। 18 अउर उँइन मसीही मन्डली के सिर आहीं; जउन उनखर देंह आय, उँइन संसार काहीं बनामँड से पहिले रहे हँय, अउर मरेन म से जिन्दा होंड बालेन माहीं पहिलउठा उँइन आहीं, अउर हर बात माहीं उँइन मुखिया हँ। 19 काहेकि पिता परमातिमा के प्रसन्नता एहिन माहीं हय, कि उनहिन माहीं सगली भरपूरी निवास करय। 20 अउर उनहिन के क्रूस माहीं बहे खून के द्वारा, परमातिमा सगली चीजन से मेल-मिलाप किहिन हीं, चाह उआ धरती के होय, चाह स्वरग के होय।

21 अउर पहिले जउन तूँ पंचे अपने बुरे कामन के कारन उनखर बइरी, अउर उनखे महिमा से दूरी रहे हया, अब परमातिमा मसीह के सारीरिक मउत के द्वारा, तोंहँ पंचन से घलाय मेल-मिलाप कइ लिहिन हीं। 22 ऊँ अब अपने संसारिक देंह माहीं मउत के द्वारा तोंहार पंचन के घलाय मेल-मिलाप कइ लिहिन हीं, जउने तोंहँ पंचन काहीं अपने आँगे पबित्र, अउर निस्कलंक अउर बेकसूर बनाइके हाजिर करँय।

### पवलुस के मसीही सेबा

23 इआ तबहिन होइ सकत हय, जब तूँ पंचे मसीह के ऊपर बिसुआस माहीं मजबूती के साथ अटल रहा, अउर जउने आसा काहीं तूँ पंचे खुसी के खबर के द्वारा सुने हया, उआ आसा काहीं न छोंडा, उहय खुसी के खबर के प्रचार अकास के नीचे सगले संसार माहीं कीन ग हय; अउर उहय खुसी के खबर काहीं सुनामँड के खातिर, हम पवलुस सेबक बने हएन। 24 अउर जउन दुख-मुसीबत हम तोंहरे पंचन के खातिर उठाइत हएन, उनखे कारन हम आनन्दित होइत हएन, अउर मसीह के देंह अरथात मसीही मन्डली के खातिर मसीह के यातनन माहीं जउन कुछ कमी रहिगे तय, ओही हम अपने देंह माहीं पूर कए देइत हएन। 25 परमातिमा तोंहरे पंचन के फायदा के खातिर, हमहीं जउन हुकुम दिहिन रहा हय, ओहिन के मुताबिक, हम उनखर एकठे सेबक ठहराए गएन हय, जउने हम परमातिमा के बचन के पूरी तरह से प्रचार करी। (परमातिमा के जउन योजना रही हय, ओखे मुताबिक हम उनखर एकठे सेबक बने हएन, अउर जउन जबाबदारी परमातिमा हमहीं दिहिन हीं, कि उनखर बचन तोंहँ पंचन काहीं सुनाई, एहिन से परमातिमा के बचन काहीं तोंहरे बीच माहीं पूरी तरह प्रचार कइ रहे हएन।) 26 अरथात उआ भेद के बात काहीं, जउन खुब समय से अरथात कइअक पीढ़िन से छिपी रही हय, पय अब उआ भेद के बात काहीं, परमातिमा अपने चुने पबित्र मनइन के ऊपर प्रगट किहिन हीं। 27 अउर इआ बात काहीं परमातिमा उनखे ऊपर एसे प्रगट किहिन हीं, कि जउने उनहीं मालुम होय, कि गैरयहूदी लोगन माहीं उआ भेद के महिमा के कीमत केतनी बड़ी ही? अउर उआ इआ आय, कि मसीह जउन महिमा के आसा आहीं, तोंहरे जीवन माहीं निवास करत हँ। 28 जिनखर प्रचार कइके हम हरेक मनइन काहीं जताए देइत हएन, अउर अपने सगले ग्यान से हरेक मनइन काहीं सिखाइत हएन, कि जउने हम हरेक मनइन काहीं मसीह के सिच्छा माहीं, सिद्ध बनाइके परमातिमा के आँगे हाजिर करी। 29 अउर एहिन के खातिर हम मसीह के दीन, उआ सक्ती से, जउन हमरे जीवन माहीं सामर्थ के साथ काम करत ही, तन मन लगाइके मेहनत घलाय करित हएन।

2 हम पवलुस इआ चाहित हएन, कि तोंहँ पंचन काहीं इआ पता चलय, कि हम, तोंहरे खातिर, अउर लौदीकिया सहर के रहँड बालेन

के खातिर, अउर उन सगले मनइन के खातिर, जउन हमहीं कबहूँ नहीं देखिन, उनहूँ के खातिर, हम केतनी कठिन मेहनत करित हएन। 2 जउने उनखे मनन काहीं उत्साह मिलय, अउर ऊँ पंचे आपस म एक दुसरे से प्रेम माहीं बाँध जाँय, अउर बिसुआस के उआ सगला धन जउन सच्चे ग्यान से मिलत हय, उनहीं पंचन काहीं मिल जाय, जउने पिता परमातिमा के भेद काहीं, अरथात मसीह काहीं पहिचान लेंय। 3 काहेकि उनहिन माहीं बुद्धी अउर ग्यान के सगला भन्डार छिपा हय।

### गलत सिच्छा देंड बाले मनइन के बिरोध माहीं चेतउनी

4 इआ हम एसे कहित हएन, कि कउनव मनई मीठ-मीठ बातन माहीं फँसाइके, तोंहँ पंचन काहीं धोखा न दइ सकय। 5 काहेकि हम त तोंहसे दूरी हएन, तऊ आत्मिक रूप से हमार मन तोंहरे ऊपर लगा रहत हय, अउर हम तोंहरे जीवन माहीं अनुसासन अउर मसीह के ऊपर तोंहरे मजबूत बिसुआस काहीं देखिके प्रसन्न हएन।

6 एसे जइसन तूँ पंचे मसीह यीसु काहीं, प्रभू मानिके सोइकार कइ लिहा हय, त उहयमेर उनखे बचन के मुताबिक चलत रहा। 7 अउर मसीह माहीं जइ कि नाई मजबूती के साथ आँगे बढ़त जा, अउर जइसन तोंहँ पंचन काहीं सिखाबा ग रहा हय, उहयमेर बिसुआस माहीं मजबूत होत चले जा, अउर परमातिमा काहीं जादा से जादा धन्यवाद देत रहा।

8 अउर सचेत रहा, कि कोऊ तोंहँ संसार के लबरी ग्यान से धोखा दइके, बिसुआस से भटकाय न देय, काहेकि इआ मनइन के पुरान परम्परन के बिचारन, अउर पुरान समय से चली आय रही संसारिक सिच्छन के लबरी ग्यान आय, एखर मसीह के बचन से कउनव लेन-देन नहीं आय। 9 काहेकि परमातिमा अपने सगली भरपूरी के साथ मसीह माहीं निवास करत हँ।

10 अउर उँइन सगले सासन करँड बालेन, अउर अधिकारिन के ऊपर अधिकार रक्खँड बाले आहीं, अउर तूँ पंचे उनहिन के द्वारा भरपूर होइ गया हय। 11 मसीह के ऊपर बिसुआस किहे के कारन तोंहार पंचन के अइसन आत्मिक खतना भ हय, जउन मनइन के हॉथन से नहीं होइ सकय, अरथात तोंहँ पंचन काहीं पापन के सुभाव से मुक्ती दइ दीनगे ही, अउर इआ खतना मसीह के व्दारा भ हय। 12 अउर तूँ पंचे बपतिस्मा लेत माहीं उनहिन के साथ गाड़े गया, अउर परमातिमा के सक्ती के ऊपर बिसुआस किहा, कि ऊँ मसीह काहीं मरेन म से जिआइन हीं, त उनखे साथय तुहूँ पंचे घलाय आत्मिक रूप से जिन्दा होइ गया हय। 13 अउर तूँ पंचे अपने पापन के कारन अउर बिना खतना के देंह के कारन आत्मिक रूप से मरे रहे हया, पय परमातिमा तोंहँ पंचन काहीं मसीह के साथय-साथ अनन्त जीवन दिहिन हीं, अउर हमरे पंचन के सगले पापन काहीं हमेसा के खातिर माफ कइ दिहिन हीं। 14 अउर परमातिमा उआ अभिलेख काहीं, जउन हमरे पंचन के बिरोध माहीं रहा हय, हमरे पंचन के बीच से हटाय दिहिन हीं, अउर ओही क्रूस के ऊपर खीलन से ठोंकिके नस्त कइ दिहिन हीं। 15 अउर परमातिमा क्रूस माहीं मसीह के बलिदान के व्दारा, संसार माहीं राज करँड बाली सइतान के सक्ती के, सगले अधिकारन काहीं नास कइ दिहिन, अउर ओही कमजोर कइके सगलेन के आँगे लज्जित कइ दिहिन हीं, अउर उनखे बिजयी होंड के कारन जय-जयकार के बोल सुनाई दिहिस।

16 एसे खॉय-पिअँड के चीजन के बारे माहीं इआ कि तेउहार मनामँड के बारे माहीं, इआ नबा चॉद नाम के तेउहार मनामँड के बारे माहीं, इआ पबित्र दिन के बारे माहीं कोहू काहीं फँडसला न करँय दिहा। 17 काहेकि ई सगली बातँय आमँड बाली बातन के छाया आहीं, एसे कि सगली चीजँय मसीह के आहीं। 18 अउर अइसा मनई, जउन अपने-आप काहीं कस्त दइके स्वरगदूतन के पूजा-पाठ माहीं लगा रहत हय, अइसन मनई से सचेत रहा, कहँव उआ तोंहँ पंचन काहीं बिसुआस से भटकाइके, मिलँड बाले इनाम से बँचित न कइ देय, अइसन मनई दिब्य दरसन माहीं देखी बातन माहीं लगा रहत हय, अउर अपने झूँठ ग्यान के बेकार घमन्ड करत हय। 19 अउर अइसन मनई अपने-आप काहीं मसीह के अधीन नहीं रक्खय जउन

सिरोमनि आहीं, उँइन जोड़न अउर नसन से सगले देह के पालन-पोसन करत हैं, अउर सगले देह के अंगन काहीं एक साथ जोड़िके, परमातिमा कइती बढ़ाबत जात हैं।

### मसीह के साथ जिअब अउर मरब

20 काहेकि तूँ पंचे मसीह के साथ, संसार के पुरान सिच्छन के खातिर मर चुके हया, त पुनि जउन मनई संसार के सिच्छन के मुताबिक जीवन बिताबत हैं, त तूँ पंचे उनखे कि नाई काहे जीवन जीते हया, काहेकि इआ मनइन के सिच्छन अउर हुकुमन के मुताबिक हय, जइसन, 21 एही न छुया, ओही न खया, अउर ओही हाँथ न लगाया, इआमेर के बिधिअन काहीं तूँ पंचे काहे मनते हया? 22 (काहेकि ई सगली चीजेंय काम माहीं लइआबत-लइआबत नास होइ जइहँय।) काहेकि ई मनइन के हुकुमन अउर सिच्छन के मुताबिक आहीं। 23 ई बिधिअन माहीं अपने मरजी के मुताबिक बनाई भक्ती करँइ के नेम, जइसन अपने देह काहीं कस्ट देब, अउर देह माहीं योगा-अभ्यास करँय माहीं ग्यान के नाम त हय, पय देह के बुरी लालसन काहीं रोकँइ माहीं, इनसे कुछ फायदा नहीं होय।

### मसीह माही नबा जीवन

3 काहेकि तौहई पंचन काहीं मसीह के साथ जिआबा ग हय, एसे तूँ पंचे उन चीजन काहीं ढूँढई माहीं लगे रहा, जउन स्वरग माहीं हई, जहाँ बर्तमान समय माहीं यीसु मसीह घलाय हैं, जउन परमातिमा के दहिने कइती बइठ हैं। 2 एसे तूँ पंचे स्वरग के चीजन के बारे माहीं सोचत रहा, अउर धरती के चीजन माहीं मन न लगाबा। 3 काहेकि तूँ पंचे पुरान पापी सुभाव के खातिर मर गया हय, अउर तौहार पंचन के नबा जीवन मसीह के साथ परमातिमा के लघे सुरच्छित हय। 4 अउर मसीह जउन हमार पंचन के जीवनदाता आहीं, जब ऊँ दुसराय प्रगट होइहँय, तब तुहूँ पंचे उनखे साथ महिमा समेत प्रगट कीन जइहा।

### पुरान जीवन अउर नबा जीवन

5 एसे तौहरे पंचन माहीं जउन संसारिक बातेंय हई, उनहीं छोँडि द्या, अरथात ब्यभिचार, असुद्धता, कामवासना, बुरी इच्छा, अउर लोभ जउन मूरत पूजेंय के बराबर हय। 6 ईन कामन के कारन परमातिमा के क्रोध उनखे ऊपर रहत हय, जउन मनई उनखे हुकुमन के पालन नहीं करँय। 7 अउर तुहूँ पंचे प्रभू यीसु मसीह के ऊपर बिसुआस करँइ से पहिले, ईन बुराइन काहीं करत जीवन बिताबत रहे हया। 8 पय अब तौहऊँ पंचन काहीं ई सगली बातन काहीं छोँडि देँइ चाही, जइसन क्रोध करब, गुस्सा करब, बैर-भाव, दुसरे के बुराई करब, अउर मुँहे से गारी देब। 9 एखे अलाबव एक दुसरे से लबरी न बोला, बेलकुल सही-सही बोला, काहेकि तूँ पंचे अपने पुरान सुभाव काहीं बुरे कामन समेत छोँडि दिहे हया। 10 अउर नबा सुभाव काहीं अपनाय लिहे हया, जउन अपने बनामँइ बाले के स्वरूप के मुताबिक, परमातिमा के ग्यान काहीं पामँइ के खातिर नबा बनत जात हय। 11 नबा सुभाव पाए के बाद, यहूदी लोगन अउर गैरयहूदी लोगन माहीं कउनव अन्तर नहीं रहिगा, अउर इहइमेर न खतना कराए मनइन माहीं अउर न बिना खतना कराए मनइन माहीं कउनव अन्तर रहिगा आय, अउर न असभ्य मनइन माहीं, अउर न सभ्य मनइन माहीं, कउनव अन्तर रहिगा आय, अउर न दासन अउर न मालिकन माहीं, कउनव अन्तर रहिगा आय, काहेकि मसीह माहीं सब कुछ एक समान होइ जात हय, अउर उँइन सगलेन के भीतर निबास करत हैं।

12 काहेकि तूँ पंचे परमातिमा के चुने पबित्र अउर पियार आह्या, एसे करुना, भलाई, दीनता, कोमलता अउर सहनशीलता काहीं अपनाबा।

13 अउर अगर तौहरे बीच म से कोऊ गलती किहिस होय, त एक दुसरे के गलतिन काहीं सहि ल्या, अउर एक दुसरे के अपराधन काहीं माफ कइ द्या, जइसन परमातिमा तौहरे अपराधन काहीं माफ किहिन हीं, उहयमेर तुहूँ पंचे घलाय करा। 14 ई सगली बातन से बढिके प्रेम काहीं अपनाय ल्या, जउन

एक दुसरे काहीं आपस माहीं जोड़िके, प्रेम माहीं भरपूर करत हय। 15 अउर यीसु मसीह के दीन सान्ति काहीं अपने जीवन माहीं अपनाय ल्या, जउने तौहरे हिरदँय माहीं राज करय, एहिन के खातिर परमातिमा तौहई एकठे देह कि नाई, एक होंड के खातिर चुनिन हीं, एसे परमातिमा काहीं हमेसा धन्यबाद देत रहा। 16 अउर मसीह के बचन काहीं जादा से जादा अपने हिरदँय माहीं बसाबा, जउने परमातिमा के ग्यान से भरपूर होइके एक दुसरे काहीं सिखाबा, अउर गलती करँइ त चेताबा, अउर परमातिमा के इआ किरपा के कारन उनखे खातिर अपने-अपने मनन माहीं भजन, स्तुति के गाना, अउर आत्मिक गाना गाबत रहा। 17 अउर तूँ पंचे जउन कुछ काम करा, इआ कि बचन सुनाबा, सगले काम प्रभू यीसु मसीह के नाम से करा, अउर उनहिन के द्दारा पिता परमातिमा के धन्यबाद करत रहा।

### घर-परिवार सम्बन्धित नयतिक सिच्छा

18 हे मेहेरिअव, अपने-अपने मंसेरुअन के उआ मेर से अधीन रहा, जइसन मसीह के ऊपर बिसुआस करँइ बाली मेहेरिअन काहीं उचित हय। 19 हे मंसेरुअव, अपने-अपने मेहेरिअन से प्रेम करा, अउर उनसे कठोरता के बरताव न करा। 20 हे लडिकव, सगली बातन माहीं अपने-अपने महतारी-बाप के हुकुमन काहीं माना, काहेकि प्रभू एसे प्रसन्न होत हैं। 21 हे बाप-महतारिव, अपने-अपने लडिकन काहीं तंग न करा, अइसन न होय, कि उनखर साहस टूट जाय, अउर ऊँ पंचे उल्टहाव देँइ लागँय। 22 हे सेबकव, अपने संसारिक मालिकन के सगली बातन माहीं, उनखे हुकुमन काहीं माना, अउर ऊँ सेबकन कि नाई नहीं, जउन मनइन काहीं प्रसन्न करँइ के खातिर देखाला क त सेबा करत हैं, पय बाद माहीं नहीं करँय, पय तूँ पंचे, परमातिमा के भय मानत उनखर निकही सेबा करा। 23 अउर जउन काम तूँ पंचे करते हया, त ओही पूरे मन से करा, इआ समझिके कि जउन काम करित हएन, उआ मनइन के खातिर नहीं, बलकिन प्रभू के खातिर करित हएन। 24 काहेकि तूँ पंचे खुदय जनते हया, कि हम पंचे मसीह के सेबा करित हएन, एसे एखे बदले माहीं तौहई प्रभू से बारिसदार होंइ के हक्क मिली। 25 काहेकि जे कोऊ बुरे काम करत हय, उआ अपने बुरे कामन के प्रतिफल पाई; काहेकि परमातिमा के आँगे कोहू के साथ पच्छपात नहीं होय।

4 हे मालिकव, तूँ पंचे इआ सुध रक्खा, कि तौहरव पंचन के स्वरग माहीं एकठे मालिक हैं, एसे अपने-अपने सेबकन के साथ निकहा बेउहार करा, अउर जउन उनखर हक्क होय उनहीं द्या।

### मसीही भाई-बहिनिन काहीं सलाह

2 एसे तूँ पंचे सतरक रहा, अउर परमातिमा के धन्यबाद करत प्राथना माहीं हमेसा लगे रहा। 3 अउर एखे साथय-साथ हमरे पंचन के खातिर घलाय इआ प्राथना करत रहा, कि परमातिमा हमहीं पंचन काहीं बचन सुनामँइ के मोका देंय, कि हम पंचे मसीह के उआ भेद काहीं बताय सकी, जेखे कारन हम जेल माहीं हएन। 4 अउर उआ भेद काहीं जइसन हम चाहित हएन, उहयमेर सही ढँग से बताय सकी।

5 अउर जउन मनई प्रभू के ऊपर बिसुआस नहीं करँय, त जब उनहीं बचन सुनामँइ के कीमती मोका मिलय, त ओखर सही ढँग से उपयोग करा।

6 अउर जब तूँ पंचे उनसे बात करा, त तौहार पंचन के बचन किरपा से भरा कोमल होय, अउर तौहई पंचन काहीं हरेक मनइन काहीं सही ढँग से जबाब देब आमँइ चाही।

### पवलुस के सलाह अउर अन्तिम अभिबादन

7 पियार भाई तुखिकुस जउन बिसुआस के काबिल सेबक हैं, अउर प्रभू के सेबा माहीं हमार साथ देँइ बाले साथी आहीं, उँइन हमरे बारे माहीं सगली बातन काहीं तौहई बतइहँय। 8 उनहीं तौहरे लघे एसे पठएन हय, कि जउने तौहई हमरे हाल के बारे माहीं मालुम होइ जाय, अउर उनखे द्दारा हमरे बारे

माहीं जानिके तोंहरे हिरदँय काहीं सान्ति मिलय।<sup>9</sup> अउर उनहिन के साथ उनेसिमुस काहीं घलाय पठएन हय, जउन तोंहरेन पंचन के बीच म से बिसुआस के काबिल अउर पियार भाई आँय, ऊँ तोंहई पंचन काहीं हमरे इहाँ के सगली बातन काहीं बतइहँय।

<sup>10</sup> अरिस्तरखुस जउन हमरे साथ जेल माहीं हें, अउर मरकुस जउन बरनबास के भाई लागत हें। (जिनखे बारे माहीं हम तोंहई पंचन काहीं बताए रहे हएन, कि अगर ऊँ तोंहरे पंचन के लघे आमँय, त उनखे साथ निकहा बेउहार किहा।) <sup>11</sup> अउर यीसु जिनखर नाम यूस्तुस घलाय हय, तोंहई पंचन काहीं नबस्कार कहत हें, अउर परमातिमा के राज के खातिर काम करँइ माहीं केबल ईन भर यहूदी जाति के बिसुआसिन म से हमरे साथ हें, अउर इनहिन के कारन हमहीं अराम मिलत हय। <sup>12</sup> अउर इपफ्रास जउन तोंहरे बीच म से मसीह यीसु के दास आहीं, तोंहई पंचन काहीं नबस्कार कहत हें, अउर तोंहरे खातिर हमेसा इआ प्राथना करत हें, कि तूँ पंचे आत्मिक रूप से मजबूत होइजा, अउर पूरे बिसुआस के साथ परमातिमा के इच्छा काहीं जानिके ओमाहीं स्थिर रहा। <sup>13</sup> अउर तोंहरे पंचन के खातिर अउर लौदीकिया

सहर के अउर हियरापुलिस सहर के रहँइ बाले बिसुआसी भाइन के खातिर, ऊँ बड़ी मेहनत करत हें, एखर हम पवलुस गबाह हएन। <sup>14</sup> पियार बैद लूका अउर देमास तोंहई पंचन काहीं नबस्कार कहत हें। <sup>15</sup> अउर लौदीकिया सहर के बिसुआसी भाई-बहिनिन काहीं, अउर नुमफास अउर उनखे घर के मसीही मन्डली के बिसुआसी भाई-बहिनिन काहीं, हमरे पंचन के तरफ से नबस्कार कहि दिहा। <sup>16</sup> अउर जब इआ चिट्ठी तोंहरे मसीही मन्डली माहीं पढ़ लीन जाय, त अइसन किहा, कि ओही लौदीकिया के मसीही मन्डली माहीं पठबाय दिहा, जउने उहँव पढ़ी जाय, अउर उआ चिट्ठी जउन लौदीकिया के मसीही मन्डली से आबय, ओही तुहूँ पंचे पढ़ लिहा। <sup>17</sup> ओखे बाद अरखिप्पुस काहीं बताय दिहा, कि प्रभू माहीं जउन सेबा उनहीं सँउपी गे ही, ओही सचेत होइके जरूर पूर करिहँय।

<sup>18</sup> हम पवलुस अपने हाँथ से तोंहई पंचन काहीं नबस्कार लिखित हएन, हम जेल माहीं हएन, एही तूँ पंचे सुध रख्या; हम प्राथना करित हएन, कि तोंहरे पंचन के ऊपर परमातिमा के किरपा होत रहय। आमीन!

# 1 थिस्सलुनीकियन

## इआ चिट्टी के परिचय

रोमी सम्राज माहीं कइयकठे प्रदेस रहे हँय, उनमा से मकिदुनिअव एकठे प्रदेस रहा हय, अउर ओखर राजधानी थिस्सलुनीकी सहर रही हय। फिलिप्पी सहर से आए के बाद पवलुस इहाँ एकठे मसीही मन्डली बनाइन रहा हय। इहाँ घलाय, हरबिन उँइन यहूदी बिरोध करब सुरू कइ दिहिन, काहेकि ऊँ पंचे गैरयहूदी लोगन के बीच माहीं पवलुस के मसीही सँदेस के प्रचार के सफलता काहीं देखिके जलत रहे हँय, काहेकि ई गैरयहूदी लोग, यहूदी धरम काहीं मानँइ माहीं रुचि रक्खत रहे हँय। एसे पवलुस काहीं थिस्सलुनीकी सहर छोड़ँइ परा, अउर ऊँ बिरिया सहर चलेगें। बाद माहीं जब ऊँ कुरिन्थुस सहर पहुँचे, तब पवलुस काहीं उनखे साथ माहीं काम करँइ बाले साथी तीमुथियुस के द्वारा थिस्सलुनीकी सहर के मसीही मन्डली के दसा के बारे माहीं सगली खबर मिली।

इआ खबर पाए के बाद थिस्सलुनीकियन के नाम पवलुस के पहिल चिट्टी, उहाँ रहँइ बाले मसीहियन काहीं उत्साहित करँय, अउर दुसराय स्थिर करँइ के खातिर लिखी गे ही। ऊँ उनखे बिसुआस अउर प्रेम के बारे माहीं खबर पाइके उनहीं धन्यवाद दिहिन। ऊँ उनहीं अपने जीवन के सुध देबाबत हँ, जउन ऊँ उनखे साथ माहीं रहिके बितायन रहा हय। तब ऊँ मसीह के दुसराय आमँइ के बारे माहीं प्रस्नन के जबाब देत हँ, जउन प्रस्न उआ मसीही मन्डली माहीं उठे रहे हँय। उँइ प्रस्न इआमेर के हँय, कउनव बिसुआसी जउन मसीह के दुसराय आमँइ से पहिलेन मर जात हय, का उआ, उआ जीवन काहीं पाई, जउन मसीह के दुसराय आमँइ से मिलँइ बाला हय? मसीह दुबारा कबय अइहँय? पवलुस इआ मोके माहीं उनहीं इआ बताबत हँ, कि उआ दसा माहीं जबकि तूँ पंचे मसीह के दुसराय आमँइ के आसा से इन्तजार करते हया, चुप्पय अपने काम माहीं लगे रहा।

रूप-रेखा :

भूमिका

धन्यवाद अउर स्तुति

मसीही चाल-चलन के बारे माहीं उपदेस

मसीह के दुसराय आमँइ के बारे माहीं सिच्छा

अन्तिम उपदेस

उपसंहार

## पवलुस के अभिवादन

1 पवलुस, सीलास, अउर तीमुथियुस के तरफ से थिस्सलुनीकी सहर के मसीही मन्डली के नाम चिट्टी, जउन पिता परमातिमा अउर प्रभू यीसु मसीह काहीं मानत हँ, उनहीं किरपा अउर सान्ती मिलत रहय।

## थिस्लुनीकियन के बिसुआस

2 हम पंचे अपने प्राथना माहीं तौहई सुध करित हएन, अउर तौहरे बारे माहीं हमेसा परमातिमा काहीं धन्यवाद देइत हएन। 3 अउर अपने पिता परमातिमा के आँगे तौहरे बिसुआस के काम, अउर प्रेम के मेहनत, अउर हमरे प्रभू यीसु मसीह माहीं आसा के धीरज काहीं लगीतार सुध करित हएन। 4 अउर हे परमातिमा के पियार भाई-बहिनिव, हम पंचे जानित हएन, कि तूँ पंचे परमातिमा के चुने आह्या। 5 काहेकि हमरे द्वारा खुसी के खबर तौहरे लघे केबल बचनय भर से नहीं, बलकिन सामर्थ अउर पबित्र आत्मा, अउर बड़े निस्चय के साथ पहुँची हय। तूँ पंचे जनते हया, कि जब हम पंचे तौहरे साथ रहे हएन, तब तौहरे फायदा के खातिर कउनमेर जीवन जिअत रहेन हँय। 6 अउर तूँ पंचे भारी दुख माहीं पबित्र आत्मा के आनन्द के साथ, बचन काहीं मानिके हमरे पंचन के, अउर प्रभू कि नाई चाल चलँइ लागे हया। 7 इहाँ तक कि मकिदुनिया अउर अखाया प्रदेस के सगले बिसुआसी लोगन के खातिर, तूँ पंचे नमूना बन गया हय। 8 काहेकि तौहरे इहाँ से न केबल मकिदुनिया अउर अखाया प्रदेस माहीं प्रभू के बचन सुनाबा ग, बलकिन

तौहरे बिसुआस के चरचा जउन परमातिमा के ऊपर हय, हरेक जघा अइसन फइलगे ही, कि हमहीं पंचन काहीं कुछ कहँइ के जरूरत नहीं आय।

9 काहेकि ऊँ पंचे खुदय हमरे बारे माहीं बताबत हँ, कि तौहरे लघे हमार पंचन के आउब कउनमेर भ रहा हय; अउर तूँ पंचे कइसन मूरतिन काहीं पूजब छोड़िके, परमातिमा के बचन काहीं मानँइ लागे हया। अउर तूँ पंचे जिअत अउर सच्चे परमातिमा के सेबक बन गया। 10 अउर परमातिमा के लड़िका यीसु के स्वरग से आमँइ के इन्तजार करत रहा, जिनहीं परमातिमा मरेन म से जिआइन रहा हय, उँइन हमहीं पंचन काहीं परमातिमा के आमँइ बाले क्रोध से बचाबत हँ।

## थिस्सलुनीकी सहर माहीं पवलुस के प्रचार

2 हे बिसुआसी भाई-बहिनिव, तूँ पंचे त खुदय जनते हया, कि हमार पंचन के तौहरे लघे आउब बेकार नहीं भ, 2 बलकिन तूँ पंचे त खुदय जनते हया, कि पहिले फिलिप्पी सहर माहीं दुख उठाँइ अउर उपद्रव सहे के बादव, हमार परमातिमा हमहीं पंचन काहीं अइसन हिम्मत दिहिन, कि हम पंचे परमातिमा के खुसी के खबर भारी बिरोध के बादव तौहई सुनाई। 3 काहेकि हमार पंचन के उपदेस न त भ्रम माहीं डारँइ बाला आय, अउर न असुद्धय आय, अउर न ओमा छलय कपट आय। 4 पय जइसन परमातिमा हमहीं पंचन काहीं काबिल ठहराइके खुसी के खबर सँउपिन ही, हम पंचे उहयमेर बखान करित हएन; अउर एमाहीं मनइन काहीं नहीं, बलकिन परमातिमा काहीं, जउन हमरे पंचन के मनन काहीं जाँचत हँ, प्रसन्न करित

हएन।<sup>5</sup> काहेकि तूँ पंचे त जनतेन हया, कि हम पंचे न त कबहूँ चापलूसी के बातेंय किहेन, अउर न लालच के खातिर बहानय बनायन, एखर परमातिमा गबाह हें; <sup>6</sup> अउर हम पंचे मसीह के खास चेला होंइ के कारन तोंहरे ऊपर बोझ डार सकत रहेन हय, तऊ हम पंचे मनइन से आदर नहीं चाहत रहेन आय, अउर न तोंहसे अउर न कोहू से। <sup>7</sup> पय जउनमेर महतारी अपने लड़िकन काहीं पालत-पोसत ही, उहयमेर हमहूँ पंचे घलाय तोंहरे बीच माहीं रहिके नम्रता देखायन हय। <sup>8</sup> अउर उहयमेर हम पंचे तोंहरे से ममता के कारन, न केबल परमातिमा के खुसी के खबर के खातिर, बलकिन तोंहरेव खातिर, आपन-आपन प्रान देई के खातिर तइआर रहे हएन, एसे कि तूँ पंचे हमहीं पंचन काहीं खुब पियार होइ गया तय।

<sup>9</sup> काहेकि, हे भाई-बहिनिव, तूँ पंचे हमरे पंचन के कठिन मेहनत अउर दुख काहीं सुध रखते हया, हम पंचे एहिन से दिन-रात काम धन्धा कइ-कइके तोंहरे बीच माहीं, परमातिमा के खुसी के खबर के प्रचार किहेन, कि तोंहरे ऊपर बोझ न होय। <sup>10</sup> तूँ पंचे एखर खुदय गबाह हया, अउर परमातिमा घलाय गबाह हें, कि तोंहरे सगले बिसुआसी लोगन के बीच माहीं, हमार पंचन के बरताव कइसन पबित्र, धारमिक, अउर निरदोस रहा हय। <sup>11</sup> तूँ पंचे जनते हया, कि जइसन बाप अपने लड़िकन के साथ बरताव करत हय, उहयमेर हम पंचे घलाय तोंहरे पंचन म से हरेक जन काहीं, उपदेस सुनाबत, अउर सान्ति देत, अउर समझाबत रहे हएन। <sup>12</sup> जउने तोंहार पंचन के चाल-चलन परमातिमा के काबिल होय, जउन तोंहई पंचन काहीं अपने राज अउर महिमा माहीं बोलाबत हें। <sup>13</sup> एहिन से हमहूँ पंचे परमातिमा के धन्यवाद हमेसा करित हएन; कि जब हमरे पंचन के व्दारा परमातिमा के खुसी के खबर के बचन काहीं तूँ पंचे सुने रहे हया, त तूँ पंचे ओही मनइन के नहीं, बलकिन परमातिमा के बचन मानिके (इआ बचन परमातिमा के सहिन आय) अपनाय लिहा तय। अउर उआ बचन तोंहरे पंचन म से जउन बिसुआस करत हें, उनखे ऊपर प्रभाव डारत हय। <sup>14</sup> एसे हे भाई-बहिनिव, तूँ पंचे परमातिमा के उन मसीही मन्डलिन के चाल-चलन काहीं अपनाय लिहा हय, जउन यहूदिया प्रदेस माहीं प्रभू मसीह यीसु माहीं हई, काहेकि तुहूँ पंचे घलाय अपने लोगन से उहयमेर दुख पाए हया, जइसन ऊँ पंचे यहूदी लोगन से पाइन रहा हय। <sup>15</sup> जउन यहूदी लोग प्रभू यीसु मसीह काहीं, अउर परमातिमा के सँदेस बतामँइ बालेन काहीं घलाय मारि डारिन तय, अउर हमहूँ पंचन काहीं सताइन रहा हय, एसे परमातिमा उनसे खुस नहीं आहीं; अउर उँइन सगले मनइन के बिरोध करत हें, <sup>16</sup> अउर ऊँ पंचे, गैरयहूदी लोगन से, उनखे मुक्ती के खातिर बचन सुनामँइ से हमहीं पंचन काहीं बरजत हें, इआ कारन से ऊँ पंचे हमेसा अपने पाप के घड़ा भरत रहत हें; अउर अब परमातिमा के भयानक क्रोध उनखे ऊपर आय परा हय।

### थिस्सलुनीकी मसीही मन्डली के मनइन से मिलँइ के पवलुस के इच्छा

<sup>17</sup> हे भाई-बहिनिव, जब हम पंचे कुछ दिनन के खातिर, मन से त नहीं, पय देह के रूप माहीं तोंहसे पंचन से अलग होइ गएन तय, त हम पंचे, तोंहई देखँइ के खातिर खुब उपाय किहेन, काहेकि तोंहसे मिलँइ के हमार पंचन के बड़ी इच्छा रही ही। <sup>18</sup> एसे हम पंचे तोंहसे मिलँइ के खुब कोसिस किहेन (खास करके हम पवलुस कइअक बेरकी कोसिस किहेन) पय सइतान एक न एक अरचन डारेन रहिगा। <sup>19</sup> जब हम पंचे अपने प्रभू यीसु मसीह के दुसराय आमँइ के समय उनखे आँगे ठाढ़ होब, त तोंहई पंचन काहीं छोंइ, हमार पंचन के आसा, आनन्द, अउर बड़ाई के मुकुट अउर का होइ सकत हय? <sup>20</sup> काहेकि हमार पंचन के आनन्द अउर बड़ाई के मुकुट तुहिन पंचे आह्या।

### थिस्सलुनीकी सहर माहीं तीमुथियुस काहीं पठउब

**3** एसे जब हमसे पंचन से अउर रहाई नहीं परी, तब हम पंचे इआ निरनय किहेन, कि एथेंस सहर माहीं अकेले रहि जई। <sup>2</sup> अउर हम तीमुथियुस काहीं जउन मसीह के खुसी के खबर के प्रचार करँइ माहीं हमार

सहयोगी भाई, अउर परमातिमा के सेबक आहीं, उनहीं एसे पठएन हय, कि ऊँ तोंहई समझाइके बिसुआस माहीं मजबूत बनामँइ, <sup>3</sup> जउने कोऊ इन दुख बिपत्तिन के कारन बिसुआस माहीं कमजोर न परय; काहेकि तूँ पंचे त खुदय जनते हया, कि हम पंचे एहिन के खातिर ठहराए गएन हय। <sup>4</sup> काहेकि पहिलेव, जब हम पंचे तोंहरे लघे रहेन हय, त तोंहसे कहा करत रहेन हय, कि हमहीं पंचन काहीं दुख-मुसीबत सहँय क परी, अउर अइसनय भाबय भ, अउर तूँ पंचे जनते घलाय हया। <sup>5</sup> इआ कारन से जब हमसे अउर न रहा ग, त तोंहरे बिसुआस के हाल चाल जानँइ के खातिर तीमुथियुस काहीं पठएन, कि कहँव अइसा न होय, कि परिच्छा करँइ बाला सइतान तोंहार परिच्छा किहिस होय, अउर हमार पंचन के सगली मेहनत पानी माहीं चली गे होय।

### तीमुथियुस के व्दारा खबर मिलब

<sup>6</sup> पय अबहिनय तीमुथियुस, जउन तोंहरे लघे से हमरे लघे आइके, तोंहरे बिसुआस, अउर प्रेम के निकही खबर सुनाइन ही, अउर इआ बात काहीं घलाय बताइन ही, कि तूँ पंचे हमेसा प्रेम के साथ हमहीं पंचन काहीं सुध करते हया, अउर हमहीं पंचन काहीं देखँइ के इच्छा करते हया, जइसा हमहूँ पंचे, तोंहई देखँइ के इच्छा करित हएन। <sup>7</sup> एसे हे भाई-बहिनिव, हम पंचे अपने सगले दुख-मुसीबत अउर कस्ट माहीं तोंहरे बिसुआस काहीं जानिके, तोंहरे बारे माहीं सान्ति पाएन हय। <sup>8</sup> काहेकि तूँ पंचे प्रभू के बचन माहीं स्थिर हया, इआ जानिके हम पंचे खुसी के साथ जीत हएन। <sup>9</sup> अउर जइसन आनन्द हमहीं पंचन काहीं तोंहरे कारन मिला हय, ओखे बदले तोंहरे बारे माहीं हम पंचे परमातिमा काहीं खुब धन्यवाद देइत हएन। <sup>10</sup> हम पंचे दिन-रात खुब प्राथना करत रहित हएन, कि तोंहई कबय देखी, अउर आइके तोंहरे बिसुआस के कमी-घटी काहीं पूर करी।

<sup>11</sup> अब हमार पिता परमातिमा अउर प्रभू यीसु मसीह, तोंहरे लघे आमँइ के खातिर हमार पंचन के अँगुआई करँय, <sup>12</sup> अउर प्रभू अइसन करँय, कि जइसन प्रेम हम पंचे तोंहसे रक्खित हएन; उहयमेर तोंहरव प्रेम आपस माहीं एक दुसरे के साथ, अउर सगले मनइन के साथ बढ़य, अउर मजबूत होत जाय। <sup>13</sup> जउने ऊँ तोंहरे हिरदँय काहीं अइसन स्थिर करँय, कि जब हमार पंचन के प्रभू यीसु अपने सगले पबित्र लोगन के साथ आमँय, त तूँ पंचे पिता परमातिमा के आँगे पबित्र अउर बेकसूर ठहरा।

### परमातिमा काहीं प्रसन्न करँइ बाला जीबन

**4** हे भाई-बहिनिव, हम पंचे तोंहसे बिनती करित हएन, अउर तोंहई प्रभू यीसु के नाम से समझाइत हएन, कि जइसन तूँ पंचे हमसे पंचन से निकहा चाल-चलन चलब, अउर परमातिमा काहीं प्रसन्न करब सिखे हया, अउर उहयमेर चलते घलाय हया, त इहइमेर अउर आँगे बढ़त चले जा। <sup>2</sup> अउर हम पंचे प्रभू यीसु के तरफ से जउन-जउन हुकुम तोंहई बताए रहेन हय, उनहीं त तूँ पंचे जनतेन हया? <sup>3</sup> काहेकि परमातिमा के इआ इच्छा ही, कि तूँ पंचे पबित्र बना, मतलब ब्यभिचार से बचे रहा। <sup>4</sup> अउर तोंहरे पंचन म से हरेक जन अपने देह के बासनन काहीं काबू म करब सिखा, काहेकि इआ पबित्र अउर आदर के काबिल हय। <sup>5</sup> अउर इआ काम बुरी इच्छा से न किहा, जउनमेर ऊँ जातिअन के मनई करत हें, जउन परमातिमा काहीं नहीं जानँय। <sup>6</sup> अउर परमातिमा के इहव इच्छा ही, कि इआ बात माहीं कोऊ अपने बिसुआसी भाई-बहिनिन काहीं धोखा न देय, अउर न उनखर अनुचित फायदय उठाबय, काहेकि प्रभू ई सगली बातन के बदला लेंइ बाले हें; इआ बात काहीं हम पंचे पहिलेन तोंहई बताय चुके हएन, अउर सावधान किहेन रहा हय। <sup>7</sup> काहेकि परमातिमा हमहीं पंचन काहीं असुद्ध होंइ के खातिर नहीं, बलकिन पबित्र बनँइ के खातिर बोलाइन हीं। <sup>8</sup> इआ कारन से जे कोऊ ई बातन काहीं तुच्छ जानत हय, उआ सिच्छा देई बाले मनई काहीं नहीं, बलकिन परमातिमा काहीं तुच्छ जानत हय, जउन आपन पबित्र आत्मा तोंहई देत हें। <sup>9</sup> पय आपस के भाईचारा के प्रेम के बारे माहीं, तोंहई हमहीं अउर कुछ लिखँइ के जरूरत नहीं आय? काहेकि आपस माहीं प्रेम करब तूँ

पंचे खुदय परमातिमा से सिखे हया।<sup>10</sup> अउर पूरे मकिदुनिया प्रदेस के सगले बिसुआसी भाई-बहिनिन के साथ, अइसन प्रेम करते घलाय हया, पय हे भाई-बहिनिव, हम पंचे तौहई समझाइत हएन, कि इहइमेर प्रेम अउर जादा से जादा करत चले जा।<sup>11</sup> अउर जइसन हम पंचे तौहई हुकुम दिहेन हय, उहयमेर सान्ति के साथ रह्या, अउर आपन-आपन काम धंथा करई के, अउर अपने-अपने हाँथन से कमाँय के कोसिस करा।<sup>12</sup> जउने तौहई कउनव चीज के कमी न होय, अउर मसीही मन्डली के बाहर बालेन के साथ निकहा बरताव किहा।

### प्रभू के दुसराय आउब

<sup>13</sup> हे भाई-बहिनिव, हम पंचे इआ नहीं चाहित आहेन, कि तूँ पंचे उनखे बारे माहीं जउन प्रभू के ऊपर बिसुआस कइके मरिगें हँय, अनजान रहा; कहँव अइसन न होय, कि तूँ पंचे अबिसुआसी लोगन कि नाई सोक करा, जिनहीं कउनव आसा नहीं आय।<sup>14</sup> काहेकि अगर हम पंचे बिसुआस करित हएन, कि यीसु मरिगें, अउर पुनि जिन्दा होइगें, उहयमेर परमातिमा उनहूँ काहीं, जउन यीसु के ऊपर बिसुआस करत-करत आपन प्रान दइ दिहिन हीं, यीसु के साथ लइ अइहँय।<sup>15</sup> काहेकि हम पंचे प्रभू के बचन के मुताबिक तौहसे इआ कहित हएन, कि हम पंचे जेतने जिन्दा हएन, प्रभू के दुसराय आमँइ तक बचे रहब, तऊ जउन प्रभू के ऊपर बिसुआस कइके मरिगें हँय, उनसे आँगे कबहूँ न होए पाउब।<sup>16</sup> काहेकि प्रभू खुदय स्वरग से उतरिके अइहँय; उआ समय ललकार, अउर प्रधान स्वरगदूत के बोल सुनाई देई, अउर परमातिमा के तुरही फूँकी जई, तब जउन मसीह के ऊपर बिसुआस कइके मरिगें हँय, ऊँ पंचे पहिले जि उठिहँय।<sup>17</sup> ओखे बाद हमरे पंचन म से जेतने जिन्दा बचे रहब, उनहिन के साथ बदरिन माहीं उठाय लीन जाब, कि प्रभू से अकास माहीं मिली, अउर इआमेर से हम पंचे हमेसा प्रभू के साथ रहब।<sup>18</sup> एसे तूँ पंचे ई बातन से एक दुसरे काहीं सान्ति द्या करा।

### प्रभू दुसराय आमँइ बाले हँ तूँ पंचे तइआर रह्या

**5** हे भाई-बहिनिव, समय अउर दिन तारीख के बारे माहीं तौहई पंचन काहीं लिखँइ के कउनव जरूरत नहीं आय।<sup>2</sup> काहेकि तूँ पंचे त खुदय निकहा से जनते हया, कि जइसन रात माहीं चोर अचानक आबत हय, उहयमेर प्रभू के आमँइ के दिन आमँइ बाला हय।<sup>3</sup> जब लोग-बाग इआ कहत होइहँय, कि सब कुसल-मंगल हय, अउर कुछ डेर नहीं आय, तबहिनीय उनखे ऊपर एकय एक घोर संकट आय परी, जइसन लइकहाई मेहेरिआ के पीरा; अउर ऊँ कउनव मेर से न बचि हँय।<sup>4</sup> पय हे भाई-बहिनिव, तूँ पंचे त पाप रूपी अँधिआर माहीं नहीं आह्या, कि उआ दिन तौहरे ऊपर चोर कि नाई अचानक आय परय।<sup>5</sup> काहेकि तूँ पंचे सगले जने त जोति अउर दिन के सन्तान आह्या, हम पंचे न रातय के आहेन, न अँधिआरय के।<sup>6</sup> एसे हम पंचे अबिसुआसी लोगन कि नाई सोबत न रही, बलकिन सचेत अउर अपने ऊपर काबू रखँइ चाही।<sup>7</sup> काहेकि जउन सोबत

हँ, त ऊँ रातयके सोबत हँ, अउर जउन मतबार होत हँ, ऊँ रातयके मतबार होत हँ।<sup>8</sup> पय हम पंचे त दिन के आहेन, बिसुआस अउर प्रेम के झिलम पहरिके अउर मुक्ती के आसा के टोप पहरिके सचेत रही।<sup>9</sup> काहेकि परमातिमा हमहीं पंचन काहीं क्रोध के खातिर नहीं, बलकिन एसे ठहराइन हीं, कि हम पंचे अपने प्रभू यीसु मसीह के व्दारा मुक्ती पाई।<sup>10</sup> प्रभू यीसु मसीह हमरे पंचन के खातिर एसे मरे, कि हम पंचे चाह जिअत रही, चाह मर जई, जब ऊँ दुसराय अइहँय, सब जन मिलिके उनहिन के साथ जिअत रहब।<sup>11</sup> इआ कारन एक दुसरे काहीं सान्ति द्या, अउर एक दुसरे काहीं आत्मिक रूप से बढ़ामँय के खातिर मदत करा, जइसन तूँ पंचे करतेव हया।

### मसीही मन्डली के खातिर उपदेस

<sup>12</sup> हे भाई-बहिनिव, हम पंचे तौहसे बिनती करित हएन, कि जउन तौहरे बीच माहीं मेहनत करत हँ, अउर प्रभू माहीं तौहार अँगुआई करत हँ, अउर तौहई सिच्छा देत हँ, उनखर सम्मान करा।<sup>13</sup> अउर उनखे इआ काम के कारन, उनहीं बड़े प्रेम से आदर के काबिल समझा, अउर आपस माहीं मिल-जुलिके रहा।<sup>14</sup> अउर हे भाई-बहिनिव, हम पंचे तौहई समझाइत हएन, जिनखर चाल-चलन निकहा नहीं आय, उनहीं समझाबा, डरपोकन काहीं ढाढ़स द्या, कमजोरन काहीं सम्हारा, अउर सगलेन के साथ सहनसीलता देखाबा।<sup>15</sup> अउर सचेत रहा कोऊ, कोहू के साथ बुराई के बदले बुराई न करा, बलकिन हमेसा भलाई करई के खातिर तइआर रहा, अपसय माहीं भर नहीं, बलकिन सगले मनइन के साथ भलाई करई के कोसिस करा।<sup>16</sup> हमेसा आनन्दित रहा।<sup>17</sup> हमेसा प्राथना करई माहीं लगे रहा।<sup>18</sup> हरेक बात माहीं धन्यवाद करा; काहेकि जेतने जने मसीह यीसु माहीं हया, तौहरे खातिर परमातिमा के इहय इच्छा ही।<sup>19</sup> पबित्र आत्मा के काम काहीं न दबाबा।<sup>20</sup> परमातिमा के सँदेस बतामँइ बालेन के बातन काहीं तुच्छ न जाना।<sup>21</sup> सगली बातन काहीं पहिले जाँचा-परखा जउन निकही होंय, उनहीं अपनाबा।<sup>22</sup> अउर हरेकमेर के बुराइन से बचे रहा।

### आसिरबाद

<sup>23</sup> सान्ति देंइ बाले परमातिमा खुदय तौहई पूरी तरह से पबित्र करँय; अउर तौहार आत्मा, प्रान अउर देह हमरे पंचन के प्रभू यीसु मसीह के आमँइ तक, पूर-पूर निरदोस अउर सुरच्छित रहय।<sup>24</sup> काहेकि परमातिमा जउन तौहई बोलाइन हीं, सच्चे हँय, अउर ऊँ अइसनय करिहँय।<sup>25</sup> हे भाई-बहिनिव हमरे पंचन के खातिर प्राथना करत रहा।<sup>26</sup> सगले बिसुआसी भाई-बहिनिव, आपस माहीं मसीही प्रेम के साथ नबस्कार करा।<sup>27</sup> हम तौहई प्रभू के किरिआ धराइके कहित हएन, कि इआ चिट्ठी सगले भाई-बहिनिन काहीं पढ़िके सुनाई जाय।<sup>28</sup> प्रभू यीसु मसीह के किरपा तौहरे ऊपर होत रहय। आमीन!

† झिलम- पुराने जमाने माहीं जब राजा लड़ाई माहीं जात रहे हँय त सुरच्छा के खातिर छाती माहीं पहिरत रहे हँय।

## 2 थिस्सलुनीकियन

### इआ चिट्टी के परिचय

प्रभू यीसु मसीह के दुसराय आमँइ से सम्बन्धित उलझन होंइ के कारन, थिस्सलुनीकियन के मसीही मन्डली माहीं गड़बड़ी के स्थित बनिगे रही हय। थिस्सलुनीकियन के नाम यीसु मसीह के खास चेला पवलुस के दूसर चिट्टी इआ बिचार-धारा पर, कि प्रभू के आमँइ के दिन पहिलेन आय चुका हय, इआ सोच-बिचार करँइ के खातिर लिखी गे ही। पवलुस इआ बात काहीं बताबत, इआ बिचार धारा काहीं सुधार करत हें, कि मसीह के आमँइ से पहिले दुस्तता अउर बुराई अपने चरम सीमा माहीं होई। इआ एकठे रहस्यमयी सासन करँइ बाले के अधीनता माहीं होई, जेही “पाप के पुरुस अरथात बिनास के लड़िका” कहा ग हय, जउन कि मसीह के बिरोध करी।

खास चेला पवलुस इहाँ इआ जरूरत पर जोर देत हें, कि सगले दुख-मुसीबत अउर कस्टन के बावजूदव ओखे पढ़ँइ बालेन काहीं अपने बिसुआस माहीं मजबूत बने रहँइ चाही, अपने खाँइ जिअँइ के खातिर काम करत रहँइ चाही, जइसन पवलुस अउर उनखर साथी करत रहे हँय, अउर भलाई करँइ माहीं लगे रहँय चाही।

रूप-रेखा :

भूमिका

स्तुति अउर प्रसंसा

मसीह के दुसराय आमँइ के बारे माहीं सिच्छा

मसीही चाल-चलन अउर बेउहार सम्बन्धित उपदेस

उपसंहार

### पवलुस के अभिबादन

1 पवलुस अउर सीलास अउर तीमुथियुस के तरफ से थिस्सलुनीकी सहर के मसीही मन्डली के नाम चिट्टी, जउन पिता परमातिमा अउर प्रभू यीसु मसीह के ऊपर बिसुआस माहीं स्थिर ही। 2 हमरे पंचन के पिता परमातिमा अउर प्रभू यीसु मसीह के तरफ से तोंहई पंचन काहीं किरपा अउर सान्ती मिलत रहय।

### न्याय के दिन

3 हे भाई-बहिनिव, तोंहरे बारे माहीं हमहीं पंचन काहीं, हर समय परमातिमा काहीं धन्यवाद देत रहँइ चाही, अउर इआ उचितव हय, एसे कि तोंहार बिसुआस खुब बाढ़त जात हय, अउर तोंहार सगलेन के प्रेम घलाय आपस माहीं खुब बाढ़त जात हय। 4 इहाँ तक, कि हम पंचे खुदय परमातिमा के मसीही मन्डली माहीं तोंहरे बारे माहीं घमन्ड करित हएन, कि जेतने उपद्रव अउर दुख-मुसीबत तूँ पंचे सहते हया, उन सगलेन माहीं तोंहार धीरज अउर बिसुआस प्रगट होत हय। 5 इआ परमातिमा के सही न्याय के बेलकुल सही सबूत हय; कि तूँ पंचे परमातिमा के राज के काबिल ठहरा, जउने के खातिर तूँ पंचे दुख-मुसीबत सहते हया। 6 काहेकि परमातिमा के लघे सही न्याय होत हय, जउन तोंहई दुख देत हें, उनहूँ काहीं परमातिमा बदले माहीं दुख देंय। 7 अउर तोंहई जउन दुख पउते हया, हमरे पंचन के साथ अराम देंय; उआ समय माहीं जब प्रभू यीसु अपने समरथी स्वरगदूतन के साथ, धँधकत आगी माहीं प्रगट होइहँय, 8 तब जउन मनई परमातिमा काहीं नहीं पहिचानँय, अउर हमरे पंचन के प्रभू यीसु के खुसी के खबर काहीं नहीं मानँय, उनसे बदला लेइहँय। 9 ऊँ प्रभू के सामर्थ के तेज के आँगे से दूरी हटाइके, नास होंइ के खातिर नरक माहीं डार दीन जइहँय। 10 इआ उहय दिन होई, जब प्रभू यीसु अपने पबित्र लोगन माहीं महिमा पामँइ के खातिर,

अउर सगले जउन उनखे ऊपर बिसुआस करत हें, उनखे बीच माहीं अचरज के कारन होंइ के खातिर अइहँय; ओमाहीं तूँ पंचे सामिल होइहा, काहेकि तूँ पंचे हमरे गबाही के बिसुआस किहा हय। 11 एसे हम पंचे, हमेसा तोंहरे खातिर प्राथना घलाय करित हएन, कि हमार पंचन के परमातिमा, तोंहई उआ जीवन के काबिल समझँय, जउने काहीं जिअँइ के खातिर बोलाइन रहा हय, अउर तोंहरे भलाई के हरेक इच्छा, अउर बिसुआस के हरेक कामन काहीं सामर्थ सहित पूर करँय। 12 इआमेर से हमरे पंचन के प्रभू यीसु मसीह के नाम, तोंहरे जीवन के द्वारा आदर पाबय, अउर तूँ पंचे उनखे द्वारा, इआ सब कुछ परमातिमा अउर प्रभू यीसु के किरपा से होई।

### प्रभू के आमँइ से पहिले दुरघटना होइहँय

2 हे भाई-बहिनिव, हम पंचे अपने प्रभू यीसु मसीह के दुसराय आमँय, अउर उनखे लघे एकट्ठा होंइ के बारे माहीं तोंहसे बिनती करित हएन। 2 कि तूँ पंचे कउनव मेर के भबिस्यबानी, उपदेस इआ कि चिट्टी के द्वारा मिली बात काहीं, इआ समझिके, कि हमरे पंचन के तरफ से भेजी आय, प्रभू के आमँय के दिन आय पहुँचा हय, तोंहार मन ब्याकुल न होय, अउर न तूँ पंचे घबरया, 3 अउर कउनव मेर से कोहू के झाँसे माहीं न अया, काहेकि जब तक धरम के त्याग न होइ जई, तब तक उआ दिन न अई, अउर अधरम के पुरुस मतलब बिनास के लड़िका प्रगट न होइ जई। 4 उआ अपने काहीं हरेक चीजन से बढ़िके मानी, अउर उनखर बिरोध करी, अउर अइसन चीजन के जउन परमातिमा के आहीं, इआ कि जउन पूजँय के काबिल हई। इहाँ तक कि उआ परमातिमा के मन्दिर माहीं बइठिके, इआ दाबा करी, कि हम परमातिमा आहें। 5 काहे तोंहई सुध नहीं आय, कि जब हम तोंहरे इहाँ रहें हय, त तोंहसे ई बातन काहीं बताबत रहें हय? 6 अउर तूँ पंचे उआ रहस्समई सक्ती काहीं जनते हया, जउन ओही आमँइ से रोंके ही, कि उआ अपने निअत समय माहीं प्रगट होय। 7 काहेकि अधरम के रहस्समई सक्ती



अबहिनव काम करत रहत ही, पय ओही अबहिनव एकठे रोकँइ बाला हय, अउर जब तक उआ रोकँइ बाला हटाय न दीन जई, तब तक उआ रोकँइ रही।<sup>8</sup> तब उआ अधरमी प्रगट होई, जउने काहीं प्रभू यीसु अपने मुँहे के फूँक से मारि डरिहँय, अउर अपने आमँइ के तेज से भसम करिहँय।<sup>9</sup> उआ अधरमी के आउब सडतान के सक्ती से होई, अउर उआ हरेकमेर के झूठी सामर्थ, अउर चिन्ह, अउर अदभुत काम के साथ,<sup>10</sup> अउर नास होई बाले मनइन काहीं, उआ हरेकमेर के अधरम माहीं डारत हय, काहेकि ऊँ सत्य से प्रेम नहीं किहिन, जउने से उनहीं मुक्ती मिलत।<sup>11</sup> इहय कारन से परमातिमा उनमा एकठे भटकामँइ बाली सामर्थ काहीं पठइहँय, जउने ऊँ झूठ के बिसुआस करँय,<sup>12</sup> अउर जेतने मनई सत्य के बिसुआस नहीं करँय, बलकिन अधरम से खुसी होत हैं, ऊँ सगले सजा पामँय।

### अटल बने रहा

<sup>13</sup> पय हे प्रभू के पियार भाई-बहिनव, चाही कि हम पंचे तौहरे बारे माहीं हमेसा परमातिमा काहीं धन्यवाद देत रही, काहेकि परमातिमा तौहई आदि से चुनि लिहिन हीं; कि पबित्र आत्मा के द्वारा पबित्र बनिके, अउर सत्य के बिसुआस कइके मुक्ती पाबा,<sup>14</sup> इहय मुक्ती काहीं पामँइ के खातिर परमातिमा के जउन खुसी के खबर हम पंचे तौहई बताएन तय, ओहिन के व्दारा परमातिमा तौहई बोलाइन हीं, कि तूँ पंचे हमरे प्रभू यीसु मसीह के महिमा काहीं पाबा।<sup>15</sup> एसे हे भाई-बहिनव, बिसुआस माहीं अटल रहा; अउर जउन-जउन बातन काहीं, तूँ पंचे चाह बचन से, इआ कि चिट्ठी के व्दारा हमसे पंचन से सिखे हया, उनहीं थामँ रहा।<sup>16</sup> हमार पंचन के प्रभू यीसु मसीह खुदय, अउर हमार पिता परमातिमा जउन हमसे पंचन से प्रेम किहिन हीं, अउर अपने किरपा से कबहूँ न खतम होई बाली सान्ती अउर उत्तम आसा दिहिन हीं,<sup>17</sup> तौहरे हिरदँय माहीं सान्ती देंय, अउर तौहई हरेक निकहे कामन, अउर बचन माहीं स्थिर करँय।

### प्राथना करँइ के निबेदन

**3** हे भाई-बहिनव, हमरे पंचन के खातिर प्राथना करत रहा, कि प्रभू के बचन सगले हार हरबी फइलय, अउर सब मनई ओखर आदर-सम्मान कइके अपनामँइ, जइसन तौहरे बीच माहीं भ रहा हय,<sup>2</sup> अउर इहव प्राथना करा, कि हम पंचे खराब अउर दुस्त मनइन से बचे रही, काहेकि अइसन मनई प्रभू के ऊपर बिसुआस करँइ बाले नहीं होँय।<sup>3</sup> पय प्रभू बिसुआस के काबिल हैं; ऊँ तौहई मजबूती से स्थिर करिहँय, अउर उआ दुस्त से बचाइके सुरच्छित रखिहँय।<sup>4</sup> अउर तूँ पंचे प्रभू के ऊपर बिसुआस करते हया, एसे

हमहीं पंचन काहीं तौहरे ऊपर पूर भरोसा हय, कि जउन-जउन हुकुम हम पंचे तौहई दिहेन रहा हय, उनहीं तूँ पंचे मनते हया, अउर मनतव रइहा।<sup>5</sup> अउर परमातिमा के प्रेम अउर मसीह के धीरज कइती बढँइ के खातिर, प्रभू तौहार अँगुआई करँय।

### काम करँइ के जबाबदारी

<sup>6</sup> हे भाई-बहिनव, हम पंचे, तौहई अपने प्रभू यीसु मसीह के नाम से हुकुम देइत हएन; कि तूँ पंचे सगले जन अइसन भाई-बहिनव से अलग रहा, जिनखर चाल-चलन निकहा नहीं आय, काहेकि जउन सिच्छा ऊँ पंचे हमसे पाइन रहा हय, ओखे मुताबिक नहीं चलँय।<sup>7</sup> काहेकि तूँ पंचे त खुदय जनते हया, कि तौहई कउनमेर से हमरे कि नाई चाल चलँइ चाही; काहेकि तौहरे पंचन के बीच माहीं हमार चाल-चलन गलत नहीं रहा।<sup>8</sup> अउर हम पंचे सेंट-मेंत माहीं कोहू के रोटी नहीं खायन, बलकिन दिन-रात बड़े मेहनत से कस्त सहिके काम धंधा करत रहेन हय, जउने तौहरे पंचन म से कोहू के ऊपर भार न परय।<sup>9</sup> अइसा नहीं आय कि हमहीं पंचन काहीं तौहसे खॉय-पिअँइ के हक्क नहीं आय, हक्क हय, तऊ हम पंचे एसे कठिन मेहनत करत रहेन हय, कि जउने तुहूँ पंचे इहइमेर करा।<sup>10</sup> अउर हम पंचे जब तौहरे इहाँ रहेन हय, तबहिनव इआ हुकुम तौहई देत रहेन हय, कि “अगर जे कोऊ काम न करँइ चाहय, त उआ खॉइव क न पाबय।”<sup>11</sup> हमहीं पंचन काहीं इआ सुनँय क मिलत हय, कि कुछ जने तौहरे बीच माहीं अनुचित चाल चलत हैं; अउर खुद कुछ काम नहीं करँय, अउर जे करतव हैं, उनहूँ के काम माहीं टाँग अड़ाबत हैं।<sup>12</sup> इआमेर के मनइन काहीं हम पंचे प्रभू यीसु मसीह के नाम से इआ हुकुम देइत, अउर समझाइत हएन, कि ऊँ पंचे चुपचाप काम धन्धा कइके अपनेन कमाई के रोटी खाबा करँय।<sup>13</sup> अउर हे भाई-बहिनव, तूँ पंचे भलाई करँइ माहीं हिम्मत न छोड्या, हमेसा लगे रहा।<sup>14</sup> अगर कोऊ हमरे इआ चिट्ठी के बात काहीं नहीं मानय, त ओखे ऊपर नजर रक्खा; अउर ओखर संगत न करा, जउने उआ लज्जित होय।<sup>15</sup> तऊ ओही दुसमन न समझा, बलकिन भाई जानिके ओही चेतउनी ह्या।

### अन्तिम नबस्कार

<sup>16</sup> अउर प्रभू जउन सान्ति के दाता हैं, खुदय तौहई हरेकमेर से सान्ति देंइ। प्रभू तौहरे पंचन के साथ रहँय।<sup>17</sup> हम पवलुस अपने हाँथे के लिखाबट से नबस्कार लिखित हएन; हमरे हरेक चिट्ठिन के इहय चिन्हारी आय; हम इहइमेर से लिखित हएन।<sup>18</sup> हमरे पंचन के प्रभू यीसु मसीह के किरपा तौहरे पंचन के ऊपर होत रहय।

# 1 तीमुथियुस

## इआ चिट्ठी के परिचय

तीमुथियुस एकठे जमान मसीही रहे हँय, जउन एसिया माइनर सहर के निवासी आहीं, अउर उनखर महतारी यहूदी जाति के अउर बाप यूनानी जाति के रहे हँय। ऊँ पवलुस के प्रचार के काम माहीं उनखर साथी अउर सहयोगी बनिगे रहे हँय। तीमुथियुस के नाम से लिखी यीसु मसीह के खास चेला पवलुस के पहिल चिट्ठी, मुख्य रूप से तीनठे बातन माहीं बिचार करँइ के खातिर लिखी गे रही हय।

सबसे पहिले इआ चिट्ठी मसीही मन्डली माहीं झूठ सिच्छा के बिरोध माहीं चेतउनी देत ही। जउन कि यहूदी लोगन अउर गैरयहूदी लोगन के बिचारन के मिली-जुली सिच्छा रही हय, इआ सिच्छा इआ बिचार धारा के ऊपर आधारित रही हय, कि सगला संसारय बुरा हय, अउर कउनव मनई खास गुप्त ग्यान, अउर कुछ रीति-रिवाजन, जइसन कुछ खाँइ बाली चीजन काहीं न खाय, अउर न काज-बिआह करय, ई सगली बातन के पालन कइके मुक्ती पाय सकत हय। इआ चिट्ठी माहीं मसीही मन्डली के इन्तजाम करब, अउर अराधना से सम्बन्धित निरदेस घलाय हें, अउर साथय-साथ उआ चरित्र के बखान घलाय हय, जउन मसीही मन्डली के अँगुअन अउर सहयोगिन के खातिर जरूरी हय। अउर अन्त माहीं, तीमुथियुस काहीं इआ सलाह दीन गे ही, कि ऊँ कइसन यीसु मसीह के निकहा सेबक बन सकत हें, अउर अलग-अलग उमिर के बिसुआसी समूहन के खातिर उनखर का-का जबाबदारी हई।

रूप-रेखा :

भूमिका

मसीही मन्डली अउर अँगुअन से सम्बन्धित निरदेस  
तीमुथियुस काहीं उनखे काम के बारे माहीं निरदेस

## पवलुस के अभिबादन

1 हम पवलुस आहेन, हे तीमुथियुस इआ चिट्ठी हम तोंहई लिख रहेन हँय, जउन हमहीं मुक्ती देंइ बाले परमातिमा अउर हमरे आसा के आधार मसीह यीसु के हुकुम से मसीह यीसु के खास चेला आहेन, 2 काहेकि तूँ हमरे व्दारा बचन सुनाए से यीसु मसीह के ऊपर बिसुआस किहे हया, इआ बिचार से हे तीमुथियुस, तूँ हमरे सग लड़िका कि नाई हया।

हम प्राथना करित हएन, कि पिता परमातिमा अउर हमरे पंचन के प्रभू यीसु मसीह के तरफ से तोहई किरपा, दया, अउर सान्ति मिलत रहय।

## गलत सिच्छा देंइ बालेन के बिरोध माहीं चेतउनी

3 हे तीमुथियुस, जइसन हम तोहई मकिदुनिया प्रदेस काहीं जाँइ के समय समझायन रहा हय, कि तूँ इफिसुस सहर माहीं रहिके, उन लोगन काहीं जउन गलत सिच्छा देत हें, हुकुम द्या, कि ऊँ दुसरे बिसुआसिन काहीं गलत सिच्छा न देंय। 4 अउर तूँ उहाँ के बिसुआसिन काहीं समझाबा, कि ऊँ अइसन किस्सा-कहानिन से अउर अनन्त बंसाबलियन से दूरी रहँय, जउने से लड़ाई-झगड़ा होत हें, काहेकि जउन मुक्ती पाँइ के प्रबन्ध परमातिमा किहिन हीं, उआ केबल प्रभू यीसु मसीह के ऊपर बिसुआस करे से मिलत हीं, उनसे इनखर कउनव लेन-देन नहिं आय। उहय बात काहीं पुनि कहित हएन। 5 हमरे समझाँइ के मतलब इआ आय, कि सुद्ध मन से अउर अच्छे सोच-बिचार से, अउर निस्कपट बिसुआस से प्रेम उत्पन्न होत हय। 6 कुछ जने इन बातन काहीं छोड़िके फालतू के बातन माहीं फँसिगें हँय। 7 अउर ऊँ यहूदी नेमन काहीं सिखाँइ बाले बनँइ त चाहत हें, पय जउने बातन काहीं खुब जोर दइके बोलत हें, उनहीं खुदय नहीं समझँय। 8 पय हम पंचे जानित हएन, कि अगर कोऊ मूसा के बिधान के नेमन काहीं, सही रीति से काम माहीं उपयोग करत हय, त उआ निकहा हय। 9 इआ जानिके कि परमातिमा के दीन मूसा के बिधान के नेम सही काम करँइ बालेन काहीं

सुधारँय के खातिर नहीं, बलकिन अधरमिन, बिद्रोहिन, अउर जउन परमातिमा के अराधना नहीं करँय, पापिन, अउर जउन पबित्र जीवन नहीं जिअँइ, असुद्ध मनइन, अउर महतारी-बाप के कतल करँइ बाले, कतलिन, 10 अउर ब्यभिचारिन, जउन मंसेरुअय, मंसेरुअय एक दुसरे के साथ गलत सम्बन्ध बनाबत हें, अउर मनइन काहीं बेचँय बालेन, अउर झूठ बोलँइ बालेन, अउर झूठ किरिआ करँइ बालेन, अउर इनखे अलाबव सत्य उपदेस के सगले बिरोधिन के खातिर ठहराए गे हँय। 11 इआ सिच्छा परम धन्य परमातिमा के महिमा के उआ खुसी के खबर के मुताबिक हीं, जउने के प्रचार करँइ के जिम्मेबारी हमहीं सँउपी गे हीं।

## किरपा के खातिर धन्यबाद

12 अउर हम अपने प्रभू मसीह यीसु काहीं, जउन हमहीं सामर्थ दिहिन हीं, धन्यबाद देइत हएन, ऊँ हमहीं बिसुआस के काबिल समझिके, अपने सेबा के खातिर ठहराइन हीं। 13 हम त पहिले यीसु मसीह के अपमान करँइ बाले रहेन हय, अउर बिसुआसी लोगन काहीं सतामँइ बाले, अउर उनखे ऊपर अत्याचार करँइ बाले रहेन हय; तऊ प्रभू हमरे ऊपर दया किहिन, काहेकि जब हम प्रभू के ऊपर बिसुआस नहीं करत रहेन, उआ दसा माहीं बिना समझे बूझे ई काम किहेन रहा हय। 14 अउर प्रभू के किरपा हमहीं बहुतायत से मिली, अउर साथय-साथ उआ बिसुआस अउर प्रेम जउन मसीह यीसु के ऊपर बिसुआस किहे से मिलत हय, उहव हमहीं मिला। 15 इआ बात बेलकुल सही हय, अउर हरेकमेर से मानँइ के काबिल हीं, कि मसीह यीसु पापिन काहीं मुक्ती देंइ के खातिर, इआ संसार माहीं आए हँय, जउनेन म से सगलेन से बड़े पापी हम आहेन। 16 पय हमरे ऊपर एसे दया भे, कि हम सगलेन से बड़े पापी के ऊपर, यीसु मसीह आपन पूरी सहनशीलता देखाँइ, कि जउन मनई अनन्त जीवन पाँइ के खातिर, उनखे ऊपर बिसुआस करिहँय, उनखे खातिर हम आदर्स बनीं। 17 अब हमेसा राज करँइ

बाले राजा, अरथात अबिनासी, जिनहीं कोऊ कबहूँ नहीं देखिस, एकलउते परमातिमा के आदर अउर बड़ाई जुग-जुग होत रहय। आमीन।

18 हे बेता तीमुथियुस, उन परमातिमा के सँदेस बतामँइ बालेन के बातन के मुताबिक, जउन बात पहिलेन तौहरे बारे माहीं बताई गई रही हँय, हम इआ हुकुम देइत हएन, कि तूँ उनहिन कि नाई उनखर बिरोध करा, जउन अनुचित सिच्छा सिखाबत हँ, अउर सत्य बचन के सिच्छा देत रहा। जइसन सिपाही युद्ध माहीं जीतैय के खातिर निकही लड़ाई लड़त हय। 19 अउर हमेसा यीसु मसीह के ऊपर बिसुआस रक्खा, अउर आपन सोच-बिचार निकहा रक्खा, काहेकि इनहीं छोंड़े के कारन केतनेव के परमातिमा के ऊपर कीन बिसुआस नास होइगा हय, जइसन पानी माहीं बूडिके जिहाज नास होइ जात हय। 20 उनहिन म से हुमिनयुस अउर सिकन्दर आहीं, जउनेन काहीं हम बिसुआसिन से अलग कइ दिहेन हँय, कि ऊँ बुराई करब न सिखँय।

### अराधना करँइ के बारे माहीं निरदेस

2 अब हम सबसे पहिले तौहई इआ निरदेस देइत हएन, कि सगले मनइन के खातिर परमातिमा से धन्यवाद के साथ बिनती, प्राथना, अउर निबेदन किहा करा। 2 अउर प्रसासन चलामँइ बालेन, अउर ऊँच पद बाले अधिकारिन के खातिर घलाय प्राथना किहा, एसे कि जउने हम पंचे सान्ति के साथ निडर होइके, परमातिमा के भक्ती करत गम्भीरता से जीवन बिताय सकी। 3 अउर हमहीं पंचन काहीं मुक्ती देइ बाले परमातिमा काहीं, इआ निकहा लागत हय, अउर ऊँ एसे प्रसन्न होत हँ। 4 अउर परमातिमा इआ चाहत हँ, कि सगले मनई मुक्ती पाँय; अउर ऊँ सत्य काहीं निकहा से जान लेंय 5 काहेकि सगले संसार के एकयठे परमातिमा हँ; अउर परमातिमा के अउर मनइन के मेल-मिलाप करामँइ बाले एकयठे बिचबई हँ, मसीह यीसु, जउन मनई के देह लइके इआ संसार माहीं आए हँय। 6 जउन खुद काहीं सगले मनइन काहीं मुक्ती देइ के खातिर, क्रूस माहीं बलिदान कइके कीमत चुकाइन हीं; इआ काम परमातिमा के ठहराए सही समय माहीं प्रभू यीसु मसीह पूर कइके गबाही दिहिन हीं। 7 हम बेलकुल सही कहित हएन, लबरी नहीं बोली, हम इहय खुसी के खबर सुनामँइ के खातिर, यीसु मसीह के पठए खास चेला आहेन, अउर गैरयहूदी लोगन काहीं, परमातिमा के ऊपर बिसुआस करँइ के सत्य बचन के उपदेस सुनामँइ के खातिर, हम चुने गएन हँय।

8 एसे हम चाहित हएन, कि हरेक मसीही मन्डलिन माहीं मंसेरुआ बिना गुस्सा, अउर झगड़ा किहे, खुद काहीं पबित्र रखिके अपने हाँथन काहीं ऊपर उठाइके परमातिमा से प्राथना करँय। 9 इहइमेर सगली मेहेरिआ घलाय, सकुच के साथ खुद पर नियन्त्रण रखिके, उचित ओन्हन से खुद काहीं सजामँय, इआ नहीं कि बार गुहँय, अउर सोन-चाँदी, अउर मोतिन, अउर महग ओन्हन से, बलकिन निकहे-निकहे कामन से सजामँय, 10 काहेकि जउन मेहेरिआ खुद काहीं परमातिमा के भक्ती करँइ बाली मनती हई, उनखे खातिर इआ उचितव हय। 11 अउर मेहेरिआन काहीं मसीही मन्डली माहीं सान्त बइठिके, बिना कुछू बोले-चाले बचन सुनामँइ बालेन के सिच्छा काहीं सिखँय चाही। 12 अउर हम इहव कहित हएन, कि मसीही मन्डली माहीं मेहेरिआ उपदेस न देंय, अउर न मंसेरुआन के ऊपर हुकुमय चलामँय, बलकिन सान्त बइठँय। 13 काहेकि परमातिमा पहिले मंसेरुआ काहीं बनाइन, जिनखर नाम आदम परा, अउर ओखे बाद मेहेरिआ काहीं बनाइन, जिनखर नाम हब्बा परा। 14 अउर आदम काहीं सइतान नहीं बहकाए पाइस, पय मेहेरिआ सइतान के बहकाए माहीं परिके, परमातिमा के हुकुम के उलंघन कइके अपराधिन बनिगे। 15 एखे बादव मेहेरिआ बच्चा पइदा किहे के कारन मुक्ती पइहँय, अगर खुद पर काबू रखिके, परमातिमा के ऊपर बिसुआस, प्रेम, अउर पबित्रता माहीं अटल रहँय।

### मसीही मन्डली माहीं अँगुआ के योग्यता

3 अगर कोऊ अँगुआ बनय चाहत हय, त उआ निकहे काम करँइ के इच्छा करत हय। इआ बात त सत्य आय। 2 एसे अँगुआ काहीं अइसा जीवन जिअँइ चाही, कि ओही कोऊ बुरा न कहे पाबय, अउर ओखे केबल एकयठे मेहेरिआ होय, अउर उआ खुद काहीं काबू माही रक्खँइ बाला होय, अउर सगले मनइन के साथ निकहा बेउहार करँइ बाला होय, अउर सभ्य, अउर महिमानन के स्वागत-सत्कार करँइ बाला होय, अउर उआ सिच्छा देइ माही निपुन होय। 3 उआ पिआगी अउर मार पीट करँइ बाला न होय; अउर उआ सरल सुभाव के होय, लड़ाई-झगड़ा करँइ बाला न होय, अउर न धन-सम्पत्ती के लालचिन होय। 4 बलकिन अपने घर-परिवार के निकहा से प्रबन्ध करँइ बाला होय, अउर ओखर लड़िका-बच्चा ओखर कहा-बतान मानत हँय, अउर सम्मान करत हँय। 5 अगर कउनव मनई अपने घरय परिवार के निकहा से प्रबन्ध करँइ नहीं जानय, त उआ परमातिमा के मसीही मन्डली के प्रबन्ध कइसा कए पाई? 6 फेर इहव बात ही, कि नबा-नबा बिसुआसी अँगुआ न बनय, कहँव अइसा न होय, कि उआ पद के घमन्ड कइके सइतान कि नाई सजा पाबय। 7 अउर मसीही मन्डली के अलाबव, गाँव समाज के मनइव ओखर मान-सम्मान करत हँय, अइसन न होय कि उआ निन्दित होइके, जइसा पंछी सिकारी के जाल माहीं फँसि जात हय, उहइमेर उहव सइतान के जाल माहीं फँसि जाय।

### मसीही मन्डली माहीं सेबा करँइ बाले (डीकन) के योग्यता

8 उहयमेर मसीही मन्डली माहीं सेबा करँइ बालेन काहीं होंइ चाही, जिनखर लोग सम्मान करँय, उनहीं ढोंगी, पियक्कड़ अउर गलत कामन से पइसा कमाँय के बिचार रक्खँइ बाले न होंइ चाही। 9 बलकिन बिसुआस के बारे माहीं जउन खुसी के खबर परमातिमा प्रगट किहिन हीं, ओही पूरे पबित्र मन से उनहीं पकड़े रहँइ चाही। 10 अउर इनखर पहिले जाँच-परताल कीन जाय, अउर जब ई बेकसूर पाए जाँय, तबहिनय ई मसीही मन्डली माहीं सेबक के काम करँय।

11 इहइमेर से मसीही मन्डली माहीं सेबा करँइ बाली मेहेरिआन काहीं घलाय होंइ चाही, जिनखर सगले मनई सम्मान करँय, ऊँ दुसरेन के ऊपर दोस लगामँइ बाली न होंय, बलकिन सचेत अउर सगली बातन माहीं बिसुआस के काबिल होंय।

12 सगले सेबकन के केबल एकय-एकयठे मेहेरिआ होंय, अउर अपने-अपने लड़िकन-बच्चन के, अउर अपने घर-परिवार के निकहा से प्रबन्ध करँइ बाले होंय। 13 काहेकि जउन सेबक, मसीही मन्डली के सेबा माहीं मदत कइके निकही सेबा करत हँ, सगले मनई उनखर मान-सम्मान करत हँ, अउर मसीह यीसु के ऊपर जउन बिसुआस ऊँ किहिन हीं, उआ बिसुआस काहीं दुसरे मनइन काहीं बतामँइ के खातिर, उनहीं बड़ी हिम्मत मिलत ही।

### महान भेद

14 हम पवलुस तौहरे लघे हरबी आमँइ के आसा कए हएन, तऊ ई बातन काहीं एसे इआ चिट्ठी माहीं लिखित हएन। 15 कि अगर हमरे आमँइ माहीं समय लग जाय, त तूँ जान लिहा, कि परमातिमा के घराना माहीं, जउन जिन्दा परमातिमा के मसीही मन्डली आय, अउर मसीही मन्डलिन, सत्य के नेव अउर खम्भा आय, ओमाहीं मनइन के आचरन कइसन होंइ चाही, इआ जानिल्या। 16 हम पंचे जउन भक्ती करित हएन, ओखर रहस्य खुब महान हय, एमाहीं कउनव सन्देह नहीं आय, उआ भेद इआमेर से हय,

मसीह मनई के देह लइके जनम लिहिन, अउर पबित्र आत्मा उनहीं धरमी ठहराइन, अउर ऊँ स्वरगदूतन काहीं देखाई दिहिन, अउर सगले जातिअन माहीं उनखे बारे माहीं प्रचार कीन ग, अउर संसार के सगले मनई उनखे ऊपर बिसुआस किहिन, अउर परमातिमा बड़े आदर के साथ उनहीं स्वरग माहीं जिन्दय ऊपर उठाय लिहिन।

### झूठ सिच्छा देंड बालेन से सचेत रहा

4 पय पबित्र आत्मा बेलकुल सही बताबत हय, कि मसीह के दुबारा आमँड से पहिले अन्तिम दिनन माहीं, कुछ जने लबरी सिच्छा देंड बालेन के बातन माहीं फँसिके, अउर बुरी आत्मन के सिच्छन माहीं बिसुआस कइके, परमातिमा के ऊपर किहे बिसुआस से भटक जइहँय। 2 इआ उन लबरी सिच्छा देंड बाले मनइन के कपट के कारन होई, जिनखर बुद्धी भ्रस्त होइगे ही। 3 जउन काज-बिआह करँड से रोकि हँय, अउर खाँड बाली कुछ चीजन माहीं न खाँड चाही, इआ काहिके उनसे दूरी रहँड के हुकुम देइहँय; जिनहीं परमातिमा एसे बनाइन हीं, कि बिसुआसी अउर सत्य माहीं जानँड बाले, परमातिमा माहीं धन्यवाद दइके उनहीं खाँय। 4 काहेकि परमातिमा जउन मनइन के खाँय के खातिर, हरेक चीजन माहीं बनाइन हीं, ऊँ सगली निकही हई, अउर कउनव अइसा चीज नहिं आय, जिनहीं खाबा न जाय सकय; पय इआ कि परमातिमा से प्राथना अउर धन्यवाद कइके खाबा जाय। 5 काहेकि परमातिमा के बचन अउर प्राथना के द्वारा सगली चीज सुद्ध होइ जाती हँय।

### यीसु मसीह के निकहा सेबक

6 हे तीमुथियुस, अगर तूँ ई सगली बातन माहीं सगले बिसुआसी भाई-बहिनिन माहीं सुध देबाबत रइहा, त तूँ मसीह यीसु के निकहे सेबक कहइहा, जिनखर आत्मिक लालन-पालन, परमातिमा के ऊपर बिसुआस, अउर उहय सत्य सिच्छा के व्दारा होत हय, जेही तूँ अपनाए हया। 7 पय तूँ बुद्धान मनइन के व्दारा सुनाई जाँय बाली उन मनगदंत किस्सा-कहानिन से दूरी रहा, जिनखर परमातिमा के बचन से कउनव लेन-देन नहिं आय, अउर परमातिमा के सत्य सिच्छा मनइन माहीं सिखामँड माहीं लगे रहा। 8 काहेकि कसरत कइके देंड माहीं मजबूत बनामँड से खुब फायदा नहिं आय, पय परमातिमा के सत्य सिच्छा बताउब सगली बातन के खातिर फायदे मन्द ही, काहेकि इहव समय माहीं फायदा हय, अउर अनन्त जीवन देंड के करार, एहिन खातिर कीन गे ही। 9 अउर इआ बात बेलकुल सही आय, अउर हरेकमेर से मानँड के काबिल ही। 10 काहेकि हम पंचे मेहनत अउर उपाय एहिन खातिर करित हएन, कि हमार पंचन के अनन्त जीवन पामँड के आसा जिन्दा परमातिमा के ऊपर ही; जउन सगले मनइन माहीं, खास करके बिसुआसिन माहीं मुक्ती देंड बाले आहीं। 11 ई बातन माहीं मानँड के हुकुम द्या करा, अउर सगले बिसुआसिन माहीं सिखाबत रहा। 12 हे तीमुथियुस, तूँ अबे जमान हया, इआ कारन से कोऊ तौहार निरादर न करँय पाबय, बलकिन तूँ अपने बात-चीत म अउर चाल-चलन म, अउर प्रेम करँड म, अउर परमातिमा के ऊपर बिसुआस करँय, अउर अपने पबित्र जीवन से सगले बिसुआसिन के खातिर आदर्स बन जा। 13 जब तक हम तौहरे लघे न अई, तब तक मसीही मन्डली माहीं सगले जनेन के आँगे पबित्र सास्त्र के बचन पढ़ँड, अउर उपदेस के बातन माहीं सिखामँड माहीं लगे रहा। 14 हे बेटा तीमुथियुस, परमातिमा के उन सँदेस बतामँड बालेन के बातन के मुताबिक, बुजुर्ग बिसुआसी के तौहरे ऊपर हाँथ धइके प्राथना किहे से, जउन बरदान तोहई मिला रहा हय, ओखर उपयोग करा, 15 ई सगली बातन के ऊपर पूर ध्यान लगाए रहा, अउर इनहिन माहीं पूरी तरह से लीन रहा, जउने तौहरे उन्नति माहीं सगले मनई देखँय। 16 अउर खुद के जीवन, अउर जउन उपदेस देते हया ओखर चउकसी करा, अउर ई बातन माहीं हमेसा करत रहा, जइसन हम तौहई बतायन हय, काहेकि अगर तूँ इहइमेर करत रइहा, त तूँ अपने अउर सुनँड बालेन के खातिर घलाय मुक्ती पामँड के कारन बनिहा।

### बिसुआसी बिधबन के खातिर निरदेस

5 हे तीमुथियुस, मसीही मन्डली माहीं जउन तौहसे उमिर माहीं बडे हँय उनहीं न डाँट्या; बलकिन उनहीं बाप कि नाई जानिके समझाय दिहा, अउर जमानन माहीं भाई जानिके; 2 अउर अपने से उमिर माहीं बड़ी

मेहेरिन काहीं, महतारी कि नाई समझिके, अउर जमान मेहेरिन काहीं अपने मन माहीं बिना बुरे बिचार किहे, पूरी पबित्रता के साथ बहिनी जानिके समझाय दिहा।

3 ऊँ बिधबन के जउन सही माहीं मदत के काबिल हई, उनखर मदत करँड के ध्यान द्या। 4 पय अगर कउनव बिधबा के लड़िका-बच्चा अउर नाती-पंती होंय, त ऊँ पहिले अपने धरम के पालन करत अपने घर-परिवार के देखभाल करँय, अउर ऊँ अपने महतारी-बाप अउर दाई-बाबा के सेबा-सहाई कइके उनखर हक्क पूर करँय, इआ उचितव हय, काहेकि एसे परमातिमा घलाय प्रसन्न होत हैं। 5 जउन बिधबा सही माहीं मदत के काबिल ही, अउर ओखर कोऊ मदत करँड बाला नहिं आय; उआ परमातिमा से मदत पामँड के खातिर दिन-रात प्राथना करँड माहीं लगी रहत ही, 6 पय जउन बिधबा भोग-बिलास के खातिर जिअत ही, उआ सारीरिक रूप से त जिअत ही, पय आत्मिक रूप से मरी हय। 7 ई बातन के घलाय हुकुम देत रहा, जउने उँड पंचे निरदोस रहँय। 8 पय अगर कोऊ अपने नात-रिस्तेदारन, अउर खासकर अपने घर-परिवार के मनइन के मदत नहिं करय, त उआ प्रभू के बिसुआस से भटकिया हय, अउर उआ, जउन मनई प्रभू के ऊपर बिसुआस नहिं करँय उनहूँ से अधिक बुरा बनिगा हय।

9 उहय बिधबा के नाम मसीही मन्डली के मदत सूची माहीं लिखा जाय, जउने के उमिर साठ बरिस से कम न होय, अउर एकयठे मंसेरुआ के मेहेरिन रही होय, 10 अउर भलाई के कामन माहीं करँड माहीं ओखर नाम आँगे रहा होय, अपने लड़िकन-बच्चन माहीं निकहा से पालिस-पोसिस होय; अउर महिमानन के सेबा किहिस होय, अउर उआ बिसुआसिन के गोड़ धोइस होय, अउर दीन-दुखिन के मदत किहिस होय, अउर भलाई के कामन माहीं मन लगाइके किहिस होय। 11 पय जमान बिधबन के नाम मसीही मन्डली के मदत सूची माहीं न लिख्या, काहेकि जब ऊँ मसीह के बचन माहीं मानब छौँडिके, भोग-बिलास माहीं परि जाती हँय, त ऊँ बिआह करँय चहती हई। 12 ऊँ परमातिमा के नजर माहीं दोसी ठहरती हई, काहेकि ऊँ मसीह के साथ कीन अपने वादा माहीं छौँडि दिहिन हीं। 13 एखे साथय-साथ ऊँ घरन-घरन बागत फिरती हई, अउर काम धंधा करब छौँडिके आलसी बन जाती हई, अउर केबल आलसी भर नहिं, बलकिन बेफालतू के बात करत रहती हई, अउर दुसरे के कामन माहीं टाँग अँडउती हई, अउर अनुचित बातँय बोलती हई। 14 एसे हम पवलुस इआ चाहित हएन, कि जमान बिधबा काज-बिआह कइलेंय, अउर लड़िका-बच्चा पइदा करँय, अउर आपन घर-गिरिस्ती सम्हारँय, अउर मसीह बिरोधी मनइन माहीं बदनाम करँड के मोका न देंय। 15 हम एसे बताइत हएन, काहेकि कइयकठे बिधबा परमातिमा के हुकुम माहीं मानब छौँडिके, सइतान के इच्छा के मुताबिक जीवन बितामँड लागी हई। 16 अगर कउनव बिसुआसिन के घर माहीं बिधबा होंय, त उँडन पंचे ओखर मदत करँय, जउने उआ बिधबा के मसीही मन्डली के ऊपर बोझ न परय, जउने मसीही मन्डली ऊँ बिधबन के मदत कइ सकय, जउन वास्तव माहीं मदत के काबिल हई।

17 जउन पुरान बिसुआसी मसीही मन्डली के सगला प्रबन्ध निकहा से करत हैं, खास करके उँड जउन बचन सुनामँड अउर सिखामँड माहीं मेहनत करत हैं, उँड दुगुने मान-सम्मान के काबिल समझे जाँय। 18 काहेकि पबित्र सास्त्र माहीं इआ लिखा हय, कि "फसल के गहाई करत माहीं बरधा के मुसका न लगाया", काहेकि "काम करँड बाले मजूर माहीं मजूरी जरूर मिलँड चाही।" 19 अगर कउनव पुरान बिसुआसी के ऊपर दोस लगाबा जाय, त ओही न मान्या, जब तक दुइ, इआ कि तीनठे गबाही न होंय। 20 पाप करँड बाले पुरान बिसुआसिन माहीं सगले बिसुआसिन के आँगे डाँट-समझाय द्या, जउने बाँकी सगले जन के खातिर चेतउनी होइ जाय।

21 परमातिमा, अउर मसीह यीसु अउर जउने स्वरगदूतन माहीं परमातिमा चुनिन हीं, उनहीं गबाह मानिके, हम तोहई चेतउनी देइत हएन, कि तूँ पूरे मन से ई लिखी बातन माहीं माना किहा, अउर कउनव काम पच्छपात के साथ न किहा। 22 बिना जाँचे-परखे कोहू माहीं मसीही मन्डली के अँगुआ

बनामँड के खातिर, जल्दबाजी माहीं हाँथ न रख्या, दुसरेन के पापन माहीं भागीदार न होया, बलकिन खुद काहीं पबित्र बनाए रह्या।

<sup>23</sup> भबिस्य माहीं केबल पानिन भर पिअँड बाले न रहा, बलकिन अपने पेटे के रोग से बेर-बेर बिमार होइ के कारन, थोरी-थोरी अंगूर के रस पिआ करा।

<sup>24</sup> कुछ मनइन के पाप परमातिमा के न्याय करँड से पहिलेन कुछ लोगन काहीं मालुम होइ जात हैं, कि ऊँ पापी हैं, पय कुछ मनई आपन पाप छिपाइके रक्खत हैं, अउर न्याय के दिन तक कोहू काहीं मालुम परे नहीं पाबय। <sup>25</sup> उहयमेर भलाई के काम घलाय, सब मनइन काहीं मालुम परि जात हैं, पय जउन मालुम नहीं होए पामँय, ऊँ घलाय छुप नहीं सकँय।

### दासन के बारे माहीं निरदेस

**6** जेतने सेबक अपने मालिकन के अधीनता माहीं हैं, जइसन जुँआ के नीचे बरधा रहत हैं, ऊँ अपने-अपने मालिकन के खुब मान-सम्मान करँय। जउने परमातिमा के नाम, अउर जउन बचन हम पंचे सिखाइत हएन, उनखर हँसी न होय। <sup>2</sup> अउर जउने सेबकन के मालिक, प्रभू यीसु मसीह के ऊपर बिसुआस करँड बाले हैं, उनहीं बिसुआसी भाई होइ के कारन, ऊँ सेबक कम मान-सम्मान न करँय; बलकिन उनखर अउर जादा सेवा करँय, काहेकि उनखे सेवा के फायदा लेइ बाले परमातिमा के ऊपर बिसुआस करँड बाले आहीं, अउर ऊँ जिनसे प्रेम करत हैं, तूँ ई बातन के उपदेस द्या करा, अउर सगले मसीही मन्डली के मनइन काहीं समझाबत रहा।

### गलत सिच्छा अउर धन के लालच

<sup>3</sup> अगर कोऊ यीसु मसीह के उपदेस काहीं छोंडिके, दूसर मेर के उपदेस देत हय; अउर सही बातन काहीं, मतलब हमरे पंचन के प्रभू यीसु मसीह के बातन काहीं, अउर उआ उपदेस काहीं, जउन मनइन काहीं परमातिमा के इच्छा के मुताबिक जीवन जिअँड माहीं मदत करत हय, उआ नहीं मानय। <sup>4</sup> त उआ घमन्डी होइगा हय, अउर प्रभू के बचन अउर उपदेस के बारे माहीं कुछ नहीं जानय, बलकिन ओही बाद-बिबाद करँय, अउर बचन के कुछ सब्दन काहीं लइके, बहँस करँड के बुरी आदत ही, जउने से जलन, अउर लड़ाई-झगड़ा, अउर बुराई के बातँय, अउर दुसरेन के ऊपर बुरी-बुरी संका करब पइदा होत हय। <sup>5</sup> अउर ऊँ मनइन माहीं फालतू के लड़ाई-झगड़ा पइदा होइ जात हैं, अउर आपन नीक-नागा सोचँड के उनखे अकिल नहीं आय। अउर ऊँ सत्य काहीं छोंडि दिहिन हीं, अउर इआ सोचत हैं, कि परमातिमा के बचन सुनाउब पइसा कमाय के एकठे जरिया आय। <sup>6</sup> जेतना जेही मिला हय, उआ ओतनेन माहीं सन्तोस मानिके, परमातिमा के भक्ती करत हय, त उहय ओखर सबसे बड़ी कमाई आय। <sup>7</sup> काहेकि हम पंचे इआ संसार माहीं छूँछय हाँथ आएन हय, अउर एक दिन छूँछय हाँथ चले जाब, न कुछ लइके आएन आय, अउर न कुछ लइके जाबय करब। <sup>8</sup> पय अगर हमरे पंचन के लघे खाँय के खातिर खाना, अउर पहिनँय के खातिर ओन्हा हय, त एतनेन माहीं सन्तोस करँय चाही। <sup>9</sup> पय जउन धनमान बनँड चाहत हैं, ऊँ अइसन

परिच्छा, अउर जाल माहीं, अउर अनेकव फालतू, अउर खुद काहीं नुकसान पहुँचामँड बाली इच्छन माहीं फँसि जात हैं, जउन मनइन काहीं बिगाडिके बिनास के खाई माहीं गिराय देती हई। <sup>10</sup> काहेकि रुपिआ-पइसा के लालच सगली बुराई के जर आय, एही पामँड के कोसिस करत-करत पता नहीं, केतने मनई यीसु मसीह के ऊपर बिसुआस करब छोंडिके, खुद काहीं अनेकव प्रकार के दुखन से बरबाद कइ लिहिन हीं।

### तीमुथियुस काहीं पवलुस के निरदेस

<sup>11</sup> पय हे परमातिमा के भक्त, तीमुथियुस, तूँ त ई बातन से दूरिन रहा; अउर धारमिक बनँड के पूर कोसिस करा, अउर हमेसा परमातिमा के भक्ती करा, अउर यीसु मसीह के ऊपर बिसुआस रक्खा, अउर सगलेन से प्रेम करा, अउर धीरज रक्खा, अउर नम्र बने रहा। <sup>12</sup> जउन बिसुआस तूँ प्रभू यीसु मसीह के ऊपर रखते हया, ओसे पीछे हटामँड के खातिर खुब मुसीबत अइहँय, पय तूँ डँट रह्या, जउने काहीं तूँ खुब गबाहन के आँगे अपनाया रहा हय, उआ अनन्त जीवन काहीं गमाय न दिहा, जउने काहीं पामँड के खातिर परमातिमा तोहई चुनिन हीं। <sup>13</sup> हम तोहई परमातिमा के जउन सगलेन काहीं जिन्दा रक्खत हैं, अउर मसीह यीसु जउन पुन्तियुस पिलातुस के आँगे अपने बारे माहीं निकही गबाही दिहिन तय, उनहीं गबाह मानिके, इआ हुकुम देइत हएन, <sup>14</sup> कि तूँ प्रभू यीसु मसीह के दुसराय आमँड तक, सगले हुकुमन काहीं बिना गलती किहे, निकहा से मानत रह्या। <sup>15</sup> परमातिमा, प्रभू यीसु मसीह काहीं सही समय माहीं प्रगट करिहँय, जउन परम धन्य अउर एकलउते अधिपति, राजन के राजा अउर प्रभुअन के प्रभू आहीं, <sup>16</sup> केबल परमातिमा अमर हैं, अउर ऊँ अगम्य जोति माहीं रहत हैं, जिनखे लघे कोऊ नहीं जाय सकय, अउर न आज तक कउनव मनई उनहीं देखिस आय, न कबहूँ देखेन पाई, उनखर मान-सम्मान अउर राज जुग-जुग बना रही। आमीन।

<sup>17</sup> इआ संसार माहीं जउन अपने काहीं धनी मानत हैं, उनहीं इआ हुकुम द्या, कि ऊँ घमन्डी न होंय, अउर उआ धन से जउन हरबी चला जात हय; ओमाहीं बिसुआस न रक्खँय, बलकिन परमातिमा के ऊपर भरोसा रक्खँय, जउन हमरे पंचन के जीवन के सुख के खातिर, सब कुछ भरपूर देत हैं। <sup>18</sup> अउर ऊँ भलाई करँड अउर भलाई के कामन काहीं करँड माहीं धनी बनय, अउर ओदार, अउर अपने धन से दुसरेन के मदत करँड के खातिर हमेसा तइआर रहँय। <sup>19</sup> अपने ईन कामन से स्वरग माहीं धन एकट्ठा करिहँय, जउन भबिस्य के खातिर मजबूत नेव के समान होई, अउर असली जीवन पामँड के हकदार बन जइहँय।

<sup>20</sup> हे तीमुथियुस, हम तोहई जउन सत्य बचन सउँपेन हँय, उनहीं सगले मनइन काहीं सिखाबत रहा, अउर जउन सिच्छा परमातिमा के बिरोध माहीं हय, उआ सिच्छा के फालतू बातन से तूँ दूरी रहा, <sup>21</sup> कुछ मनई गलती से इआ सिच्छा के बातन काहीं ग्यान कहत हैं। अउर इनहीं अपनाइके परमातिमा के बिसुआस से भटकिये हँय। हम प्राथना करित हएन, कि परमातिमा के किरपा तोहरे ऊपर हमेसा होत रहय।

## 2 तीमुथियुस

### इआ चिट्ठी के परिचय

तीमुथियुस के नाम लिखी यीसु मसीह के खास चेला पवलुस के दूसर चिट्ठी माहीं, पवलुस अपने एकठे जबान साथी, अउर सहायक के रूप माहीं काम करई बाले तीमुथियुस काहीं निजी सलाह देत हैं। अउर इआ चिट्ठी माहीं धीरज के बारे माहीं बताबा ग हय। अउर तीमुथियुस काहीं सलाह अउर उत्साहित कीन ग हय, कि सताव अउर बिरोध के बावजूदव ऊँ इमानदारी के साथ यीसु मसीह के बारे माहीं लोगन काहीं बताबत रहँय, खुसी के खबर अउर पबित्र सास्त्र के पुरान नेम के सही सिच्छन माहीं अटल बने रहँय, अउर सिच्छा देई अउर प्रचारक के रूप माहीं आपन करतब्य निभाबत रहँय। तीमुथियुस काहीं खास करके “मूरखँइ के फालतू बाद-बिबादन से” जिनसे मुसीबत पड़दा होती है, उनखे खतरन के बारे माहीं चेतउनी दीनगे ही। काहेकि एसे कुछ फायदा नहीं होय, बलकिन इआ सुनँय बालेन के खातिर बिसुआस से भटकँय के कारन होत हय। ई सगलेन से, तीमुथियुस काहीं खुद के अउर लेखक के खुद के जीवन के बारे माहीं, अउर उनखे उदेस्य के बारे माहीं अउर उनखे बिसुआस, सहनसीलता, प्रेम, धीरज, अउर सताव के समय माहीं दुख सहँइ के उदाहरन काहीं सुधि देबाबा ग हय।

रूप-रेखा :

भूमिका  
प्रसंसा अउर उपदेस  
सलाह अउर चेतउनी  
पवलुस के खुद के दसा  
उपसंहार

### पवलुस के अभिबादन

1 हम पवलुस आहैन, हे तीमुथियुस इआ चिट्ठी हम तोंहई लिख रहेन हय, जउन तूँ हमरे पियार लड़िका कि नाई हया, जउन अनन्त जीवन देई के वादा परमातिमा किहिन रहा हय, ओखे मुताबिक जेतने जने प्रभू यीसु मसीह के ऊपर बिसुआस करत हैं, उनहीं बतामँइ के खातिर, परमातिमा के इच्छा से, हम यीसु मसीह के खास चेला आहैन।<sup>2</sup> हम प्राथना करित हएन, कि पिता परमातिमा अउर हमरे पंचन के प्रभू मसीह यीसु के तरफ से तोंहई किरपा, दया, अउर सान्ति मिलत रहय।

### धन्यवाद अउर उत्साहित करब

<sup>3</sup> जउन मेर परमातिमा के सेबा हमार पुरखा करत रहे हँय, उहयमेर हमहूँ सुद्ध मन से करित हएन, परमातिमा के धन्यवाद होय कि हम तोंहरे खातिर हमेसा प्राथना करित हएन।<sup>4</sup> अउर हमरे खातिर तूँ जउन आँसू बहाया हय, उनहीं सुधि कइके हम तोंहसे मिलेई के खातिर दिन-रात इच्छा करित हएन, कि कबय मिली, अउर तोंहसे मिलिके आनन्दित होइ जई।<sup>5</sup> हमहीं यीसु मसीह के ऊपर किहे तोंहरे निस्कपट बिसुआस के सुधि आबत ही, जउन मेर पहिले तोंहार नानी लोइस अउर महतारी यूनीके करत रही हँय, अउर हमहीं इआ पूर बिसुआस हय, कि तूँ उहयमेर निस्कपट बिसुआस अबहिनव करते हया।<sup>6</sup> इहय कारन से हम तोंहई सुध देबाइत हएन, कि तूँ परमातिमा के उआ बरदान काहीं, जउन हमरे हाँथ धइके प्राथना किहे के वदारा तोहई मिला रहा हय, ओखर निकहा से उपयोग करत रहा।<sup>7</sup> काहेकि परमातिमा हमहीं पंचन काहीं डेरोंइ बाली आत्मा नहीं दिहिन, कि हम पंचे डेरई, बलकिन सामर्थ के अउर प्रेम करई बाली खुद काहीं काबू माहीं रक्खँइ बाली आत्मा दिहिन हीं।<sup>8</sup> एसे तूँ प्रभू के बारे माहीं दुसरेन काहीं बतामँइ माहीं न लजा, अउर न हमहिन से लजा, जउन खुसी के खबर सुनामँइ के कारन जेल

माहीं बंद हएन, पय परमातिमा के दिहे सामर्थ के मुताबिक खुसी के खबर काहीं सुनामँइ के खातिर, हमरे कि नाई दुख उठाबा,<sup>9</sup> परमातिमा हमहीं पंचन काहीं मुक्ती दिहिन हीं, अउर पबित्र जीवन जिअँइ के खातिर बोलाइन हीं, एसे नहीं कि हम पंचे निकहे काम किहेन हय, बलकिन परमातिमा अपने उदेस्य काहीं पूर करई के खातिर, हमहीं पंचन काहीं बोलाइन हीं, काहेकि परमातिमा संसार के बनामँइ से पहिलेन, अपने किरपा से मसीह यीसु के वदारा, मुक्ती देई के योजना बनाइन रहा हय।<sup>10</sup> पय अब हमहीं पंचन काहीं मुक्ती देई बाले यीसु मसीह, संसार माहीं आइके उआ किरपा काहीं प्रगत किहिन, अउर जँइन मउत के सक्ती काहीं खतम कइ दिहिन, अउर जउन परमातिमा के साथ हमेसा जीवन बितामँइ के मोका देत ही, उआ खुसी के खबर के प्रचार किहिन।<sup>11</sup> इहय खुसी के खबर काहीं फइलामँइ अउर उपदेस देई के खातिर, हम यीसु मसीह के खास चेला ठहरेन हय।<sup>12</sup> इहय कारन हम ई दुखन काहीं सहित हएन, पय लजई नहीं, काहेकि जिनखे ऊपर हम बिसुआस किहेन हय, उनहीं हम जानित हएन; अउर हमहीं पूर बिसुआस हय, कि जउन खुसी के खबर परमातिमा हमहीं सउँपिन हीं, ओखर रखबारी ऊँ अन्त समय तक कइ सकत हैं।<sup>13</sup> जउने सत्य बातन काहीं हम तोहई सिखायन हय, उनहीं तूँ उआ बिसुआस अउर प्रेम के साथ, जउन मसीह यीसु माहीं मिले हँय, उनहीं आपन आदर्स बनाइके रखा।<sup>14</sup> अउर पबित्र आत्मा के वदारा, जउन हमरे पंचन के जीवन माहीं रहत हय, जउन तोंहई सउँपा ग हय, इआ निकही थाती के रखबारी करा।

<sup>15</sup> तूँ जनते हया, कि आसिया प्रदेस के सगले बिसुआसी हमहीं छोंडिके चलेगें हैं, उन माहीं फूगिलुस अउर हिरमुगिनेस घलाय हैं।<sup>16</sup> उनेसिफुरूस के घराना के ऊपर प्रभू दया करँय, काहेकि ऊँ कइअक बेरकी हमसे मिलँय आए रहे हँय, हम जेल माहीं बंद रहेन हय, तऊ मिलँय से नहीं लजानें, एसे हमहीं बड़ी सान्ति मिली।<sup>17</sup> पय जब ऊँ रोम देस माहीं आएँ, तब बड़ी मेहनत से ढूँढिके हमसे मुलाखात किहिन।<sup>18</sup> प्रभू करई कि न्याय के दिन,

उनखे ऊपर प्रभू के दया होय, अउर जउन-जउन सेबा ऊँ इफिसुस सहर माहीं किहिन हीं, उनहीं तूँ निकहा से जनते हया।

### यीसु मसीह के सच्चा सिपाही

2 एसे हे बेटा तीमुथियुस, मसीह यीसु से जउन किरपा तोहई मिली हय, ओसे तूँ आत्मिक जीवन माहीं मजबूत होइजा, 2 अउर परमातिमा के जउने बातन काहीं खुब मनइन के आँगे हम तोहई बतायन तय, उन बातन काहीं अइसन काबिल मनइन काहीं सउँपि द्या; जउन दुसरे काहीं सिखामँड के काबिल होंय। 3 अउर यीसु मसीह के सच्चे सिपाही कि नाई, हमरे साथ दुख उठाबा। 4 जब कउनव सिपाही लड़ाई माहीं जात हय, त उआ इआ कोसिस करत हय, कि अपने अधिकारी काहीं खुस करय, अउर खुद काहीं लड़ाई के काम के अलाबा, संसार के दुसरे कामन माहीं मन नहीं लगाबय। 5 अगर कउनव लड़ाई लड़ई बाला नेम के मुताबिक नहीं लड़य, त उआ मुकुट † नहीं पाबय। 6 जउन किसान खेती करई माहीं मेहनत करत हय, फसल के फायदा पहिले ओहिन काहीं मिलँय चाही। 7 जउन हम कहित हएन, ओखे ऊपर ध्यान द्या, अउर प्रभू तोहई सगली बातन काहीं समझँड के बुद्धी देइहँय। 8 अउर यीसु मसीह काहीं सुधि रक्खा, जउन दाऊद के कुल माहीं जनम लिहिन, अउर मरिजे जिन्दा होइगें; इहय खुसी के खबर आय, जेखर हम प्रचार करित हएन। 9 खुसी के खबर के खातिर हम अपराधी कि नाई दुख उठाइत हएन, इहाँ तक कि हम जेल माहीं घलाय बंद हएन; पय तूँ इआ जानिल्या, कि परमातिमा के बचन काहीं फइलँय से कोऊ नहीं रोक सकय। 10 इहय कारन से हम परमातिमा के चुने लोगन के खातिर, हरेक दुख-मुसीबत काहीं उठाबत रहित हएन, जउने ऊँ पंचे घलाय मसीह यीसु के ऊपर बिसुआस करे से जउन मुक्ती मिलत ही, ओही अनन्त महिमा समेत पामँय। 11 इआ बात बेलकुल सही आय, कि

अगर हम पंचे यीसु मसीह के साथ मर गएन हय, (मतलब अपने पापी सुभाव के खातिर) त उनहिन के साथ जिऊ अउब।

12 अगर हम पंचे यीसु के खातिर दुख-मुसीबत सहत रहब, त यीसु मसीह के साथ राजव करब, अगर हम पंचे यीसु काहीं इनकार करब, त ऊँ हमहीं पंचन काहीं अपना मँड से इनकार करिहँय।

13 अगर हम पंचे बिसुआस के काबिल न रही, तऊ परमातिमा बिसुआस के काबिल बने रहत हैं, काहेकि परमातिमा जउन वादा करत हैं, ओही जरूर पूर करत हैं, ऊँ कबहूँ नहीं बदलँय।

### निकही सिच्छा देंड के निरदेस

14 जउने बातन काहीं हम तोहई बताएन हय, उनहीं बिसुआसी मनइन काहीं सुध देबाबा, अउर प्रभू काहीं गबाह मानिके उनहीं चेटाय द्या, कि बचन के सबदन काहीं लइके फालतू बहँस न करँय, काहेकि इनसे कउनव फायदा नहीं होय; बलकिन सुनँड बाले बिसुआस से भटक जात हैं। 15 तूँ अइसन काम करँड बाले बनँय के कोसिस करा, जउने परमातिमा के आँगे लजाँय न परय, बलकिन परमातिमा तोहई अपने काम के काबिल समझँय, अउर तूँ परमातिमा के सत्य बचन काहीं निकहा से लोगन काहीं सिखामँड बाले ठहरा। 16 जउन मनई परमातिमा के बिरोध माहीं बात कहत हैं, उनसे तूँ बचे रहा, काहेकि इआमेर के मनई, अउरव अभक्ती माहीं बढ़त जइहँय। 17 अउर इआमेर के लोगन के सिच्छा सड़े-घाव कि नाई फइलत जात ही, हुमिनयुस अउर फिलेतुस उँइन गलत सिच्छा देंड बालेन म से आहीं। 18 जउन इआ कहत हैं, कि जउन बिसुआसी मरिगें तय, उनखर मर के जि उठब होइ चुका हय, ऊँ सत्य से भटकिगें हँय, अउर कुछ मनइन के बिसुआस काहीं नास कइ देत हैं। 19 तऊ परमातिमा जिनहीं चुनिन हीं, ऊँ बिसुआस माहीं पक्की नेव कि नाई मजबूत बने रइहँय, काहेकि उनखे ऊपर बचन रूपी छाप लगी हय, “कि प्रभू अपने चुने मनइन काहीं पहिचानत हैं।”

अउर “जे कोऊ प्रभू के नाम के ऊपर बिसुआस करत हय, उआ बुरे कामन से बचा रहय।”

20 कउनव बेउहर के घर माहीं, केबल सोन-चाँदिन भर के नहीं, बलकिन लकड़ी अउर माटिव के बरतन घलाय होत हैं; पय कुछ बरतन निकहे कामन माहीं, अउर कुछ साधारन कामन माहीं उपयोग कीन जात हैं। 21 एसे अगर कउनव मनई खुद काहीं बुराइन से सुद्ध करी, त उआ निकहे कामन माहीं काम आमँड बाले बरतन कि नाई पबित्र ठहरी, अउर अपने मालिक के काम अई, अउर हरेक निकहे कामन के खातिर तइआर रही। 22 एसे हे तीमुथियुस, तूँ जबानी के बुरी इच्छन से दूरी रहा, अउर जउन सुद्ध मन से प्रभू के नाम लेथें, उनखे साथ पूरी धारमिकता, अउर बिसुआस के साथ, बड़े प्रेम से मिल-जुलिके रहा। 23 पय फालतू बहँस करँड, अउर बाद-बिबाद से अलग रहा; काहेकि तूँ जनतेन हया, कि इनसे झगड़ा होत हय। 24 अउर प्रभू के सेबक काहीं झगड़ालू न होइ चाही, बलकिन सगले मनइन के साथ कोमलता के बेउहार करँड, अउर परमातिमा के बचन काहीं निकहा से सिखामँड बाला होइ चाही, अउर हरेक बातन काहीं सहँड बाला होइ चाही। 25 अउर उआ अपने बिरोधिन काहीं नम्रता से समझाबय, का पता परमातिमा उनहीं मुक्ती पामँड के मन देंड, अउर ऊँ सत्य काहीं पहिचान लेंड। 26 अउर एखे व्दारा सचेत होइके परमातिमा के इच्छा पूरी करँड के खातिर, सइतान के चंगुल से अजाद होइ जाँय।

### आखिरी दिनन माहीं आमँड बाला अधरम

3 हे तीमुथियुस, तूँ जानिल्या, मसीह के दुबारा आमँड से पहिले, आखिरी दिनन माहीं खुब बुरा समय अई। 2 काहेकि मनई स्वार्थी, जादा धन कमाय के लालची, खुद के कामन के बड़ाई करँड बाले, खुद काहीं दुसरे से बड़ा मानँड बाले, दुसरे के बुराई करँड बाले, महतारी-बाप के कहा-बतान न मानँड बाले, जउन उनखर मदत करी, ओखर उपकार न मानँड बाले, बुरे काम कइके परमातिमा के ऊपर बिसुआस न करँड बाले, 3 कोहू के ऊपर दया न करँड बाले, कोहू के गलती माफ न करँड बाले, दुसरेन के ऊपर दोस लगामँड बाले, खुद काहीं काबू माहीं न रक्खँड बाले, दुसरेन काहीं नुकसान पहुँचामँड बाले, जे परमातिमा के ऊपर बिसुआस करत हैं उनखर बडरी, 4 बिसुआस घात करँड बाले, ठिँठाई के काम करँड बाले, खुद पर घमन्ड करँड बाले, अउर परमातिमा के बचन काहीं न मानिके, बलकिन खुद के खुसहाल जिन्दगी काहीं चाहँय बाले होइहँय। 5 ऊँ पंचे अइसन ढोंग करिहँय, कि परमातिमा के सगलेन से बड़े भक्त उँइन आहीं, पय परमातिमा के सामर्थ काहीं न मनि हँय, अइसन मनइन से तूँ दूरिन रह्या। 6 इनहिन म से कुछ लोग अइसन हैं, जउन लोगन काहीं धोखा दइके चुप्पय से उनखे घरन माहीं घुसि जात हैं, अउर चंचल मेहेरिन काहीं अपने गलत सिच्छा माहीं फँसाइके, अपने बस माहीं कइ लेत हैं, जउन पाप के बोझ से दबी अउर हरेकमेर के बुरी इच्छन से भरी रहती हई। 7 ऊँ हमेसा सिखत त रहती हई, पय परमातिमा के सत्य सिच्छा के ग्यान काहीं नहीं जाने पउतीं। 8 अउर यन्नेस अउर यन्नेस जइसन मूसा नबी के बिरोध किहिन रहा हय, उहयमेर इऊँ पंचे घलाय परमातिमा के सत्य बचन के बिरोध करत हैं, ई त अइसन मनई आहीं, जिनखर बुद्धी भ्रस्ट होइगे ही, अउर ऊँ परमातिमा के सत्य बचन के बिसुआस करँड माहीं निकम्मा हैं। 9 पय ऊँ गलत सिच्छा देंड बाले लोगन काहीं जादा समय तक धोखा न दए पइहँय, काहेकि जइसन यन्नेस अउर यन्नेस के मूर्खता सगले मनइन काहीं मालुम परिगे तय, उहयमेर इनहूँ के मालुम होइ जई।

### तीमुथियुस काहीं खास निरदेस

10 चाह कुछू होय, पय तूँ हमरे सिच्छा के पालन किहा हय, हमरे चाल-चलन, हमरे जीवन के लच्छ, मनइन काहीं परमातिमा के बचन सुनाउब रहा हय, हमार मसीह के ऊपर बिसुआस, हरेक मेर के बातन काहीं सहँड के हमार छमता, कइसन हम सगले लोगन के साथ धीरज अउर प्रेम से रहेन,

अउर तूँ हमरे सताए जाँय, अउर दुख-मुसीबत माहीं हमार मदत किहा हय।  
 11 अउर जब हम अन्ताकिया सहर, इकुनियुम अउर लुस्त्रा सहरन माहीं रहेन हय, तब उहाँ के मनई हमहीं खुब मारिन-पीटिन रहा हय, इहाँ तक कि मारि डारँइ चाहत रहे हँय, उनखे अलाबव दुख-मुसीबत परे हँय, जिनहीं हम सहेन रहा हय, पय प्रभू हमार उन सगलेन से रच्छा किहिन हीं।<sup>12</sup> पय जेतने मनई मसीह यीसु के ऊपर बिसुआस कइके, उनखे बचन के मुताबिक जीवन बितामँइ चाहत हँ, ऊँ सगले सताए जइहँय।<sup>13</sup> पय गलत सिच्छा देंइ बाले, अउर दुसरेन काहीं मसीह के बिसुआस से भटकामँइ बाले, दुसरेन काहीं धोखा देत, अउर खुद धोखा खात, मसीह के बचन से दूर होत चले जइहँय।  
 14 पय हे तीमुथियुस, जउने बातन काहीं तूँ सिखे हया, अउर बिसुआस किहा हय, इआ जानिके उनहिन माहीं मजबूत बने रहा, तूँ ई बातन काहीं हमसे पंचन से सिखे हया।<sup>15</sup> अउर लड़िकइन से पबित्र सास्त्र तोंहार जाना हय, जउन तोहई मसीह यीसु के ऊपर बिसुआस किहे से, मुक्ती पामँइ के खातिर बुद्धिमान बनाय सकत हय।<sup>16</sup> सगला पबित्र सास्त्र परमातिमा के अँगुआई से लिखा ग हय, जउन उपदेस देंइ, अउर समझामँइ, अउर जीवन काहीं सुधारँय, अउर सत्य के सिच्छा के खातिर लाभदायक हय।<sup>17</sup> जउने परमातिमा के ऊपर बिसुआस करँइ बाले, बिसुआस माहीं मजबूत बनिके, हरेक भलाई के कामन के खातिर उपयोगी बन जाँय।

### प्रचार करँइ के हुकुम

4 हे तीमुथियुस, परमातिमा अउर मसीह यीसु काहीं गबाह मानिके, जउन जिअत अउर मरे मनइन के न्याय करिहँय, यीसु मसीह जउन सगले मनइन के ऊपर राज करँइ के खातिर अइहँय, उनखर सुध देबाइके तोहई हुकुम देइत हएन।<sup>2</sup> कि तूँ खुसी के खबर के प्रचार करा; चाह तोहई सुबिधा होय, चाह असुबिधा, आपन करतब्य करँइ के खातिर हर समय तइआर रहा, हरेक मेर के बातन काहीं सहिके, अउर निकही सिच्छा द्या, जउन बुरा काम करत हँ, उनहीं चेताय द्या, अउर उनहीं डाँटा, समझाबा।<sup>3</sup> हम इआ एसे बताइत हएन, कि एक समय अइसा अई, कि जब मनई उत्तम उपदेस काहीं सुनँय तक न चइहँय, ऊँ अपने मन के मुताबिक अपने खातिर उपदेस देंइ बालेन काहीं एकट्ठा कइ लेइहँय। ऊँ उहय उपदेस सुनइहँय, जउन ऊँ पंचे सुनँय चाहत हँ।<sup>4</sup> ऊँ सत्य उपदेस काहीं न सुनिके कथा-कहानिन काहीं सुनँय माहीं मन लगइहँय।<sup>5</sup> पय तूँ ई सगली बातन से सचेत रहा, दुख-मुसीबत सहा, अउर खुसी के खबर के प्रचार के काम करा, अउर जउन सेबा तोहई सउँपी गे ही, ओही पूर करा।

### पवलुस के अन्तिम गबाही

6 अब हमरे जीवन काहीं परमातिमा के खातिर बलिदान करँइ के समय आइगा हय, अउर हमार इआ दुनिया से जाँइ के समय आइगा हय।  
 7 जइसन एकठे पहिलमान नेम से कुस्ती लड़िके जीतके इनाम पाबत हय,

उहयमेर जउन काम परमातिमा हमहीं दिहिन रहा हय, ओही हम निकहा से पूर कइ चुकेन हय, अउर हम उआ काम काहीं पूरे बिसुआस के साथ किहेन हय।<sup>8</sup> भबिस्य माहीं हमरे खातिर धरम के उआ मुकुट धरा हय, जउन धरमी मनइन काहीं दीन जात हय, जउने काहीं प्रभू, जउन धरमी अउर न्यायी हँ, हमहीं अउर उन सगलेन काहीं घलाय, जउन उनखे आमँइ के इन्तजार काहीं पियार जानत हँ, न्याय के दिन देइहँय।

### पवलुस के निजी सँदेस

9 हे तीमुथियुस, हमरे लघे हरबी आमँइ के कोसिस करा।<sup>10</sup> काहेकि देमास इआ संसार के बातन काहीं पियार जानिके हमहीं छोंड़ि दिहिस ही, अउर थिस्सलुनीके सहर काहीं चला ग हय। क्रेसकेंस गलातिया प्रदेस काहीं अउर तीतुस दलमतिया प्रदेस काहीं चला ग हय।<sup>11</sup> अउर केबल लूका हमरे लघे हँ। अउर तूँ मरकुस काहीं साथ माहीं लइके चले आबा; काहेकि उआ हमरे सेबा के खातिर खुब काम के हय।<sup>12</sup> तुखिकुस काहीं हम इफिसुस सहर काहीं पठय दिहेन हय।<sup>13</sup> जउन कोट हम त्रोआस सहर माहीं करपुस के इहाँ छोंड़ि आएन हय, जब तूँ अया, त ओही अउर किताबन काहीं खास करके चर्म-पत्रन (खास करके गाड़ के चमड़ा से बनी किताबन) काहीं लेत अया।<sup>14</sup> सिकन्दर तमेर हमहीं खुब नुकसान पहुँचाइस ही; प्रभू ओही ओखे काम के मुताबिक बदला देइहँय।<sup>15</sup> तुहूँ ओसे सचेत रह्या, काहेकि उआ हमरे उपदेस के घोर बिरोध करत रहा हय।<sup>16</sup> सुरू माहीं जब हम आपन बचाव करँइ के खातिर, सबूत देंइ लागेन, तब हमरे पच्छ माहीं बोलँइ के खातिर कोऊ आँगे नहीं आबा, बलकिन ऊँ पंचे हमहीं अकेले छोंड़ि दिहिन तय। हम प्राथना करित हएन, कि परमातिमा उनखे इआ गलती काहीं माफ करँय।<sup>17</sup> पय प्रभू हमरे साथ माहीं रहे हँय, अउर हमहीं सामर्थ दिहिन, जउने हमरे व्दारा खुसी के खबर के भरपूर प्रचार होइ सकय, जउने सगले गैरयहूदी लोग सुन लेंय; अउर परमातिमा हमहीं त सेर के मुँहे से छोड़ाइन हीं।<sup>18</sup> अउर प्रभू हमहीं हरेक बुरे कामन से बचइहँय, अउर मुक्ती कइके अपने स्वरगराज माहीं सुरच्छित पहुँचइ हँय, उनहिन के बड़ाई जुग-जुग होत रहय। आमीन।

### आखिरी अभिबादन

19 प्रिस्का अउर अक्विला काहीं, अउर उनेसिफूरुस के परिवार काहीं नबस्कार।<sup>20</sup> इरास्तुस कुरिन्थुस सहर माहीं रहिगा हय, अउर त्रुफिमस बिमार रहा हय, त ओही हम मिलेतुस सहर माहीं छोंड़ि आए हएन।<sup>21</sup> जाड़े के रित से पहिले आमँइ के कोसिस किहा। यूबूलुस, अउर पूदेस, अउर लीनुस अउर क्लौदिया, अउर सगले भाइन के तोहई नबस्कार।<sup>22</sup> हम प्राथना करित हएन, कि प्रभू तोंहरे साथ रहँय, अउर तोंहरे पंचन के ऊपर प्रभू के किरपा होत रहय। आमीन!



# तीतुस

## इआ चिट्ठी के परिचय

तीतुस एकठे गैरयहूदी जाति के मसीही रहे हँय, जउन पवलुस के प्रचार के काम माहीं उनखर साथी अउर मदत करँइ बाले बनिगें तय। तीतुस के नाम यीसु मसीह के खास चेला पवलुस के चिट्ठी, क्रेते दीप माहीं रहँइ बाले पवलुस के इहय जबान सहायक काहीं सम्बोधित कीन गे ही, जेही उहाँ मसीही मन्डली के काम के निगरानी करँइ के खातिर छोड़ा ग रहा हय। इआ चिट्ठी तीनठे खास बिसयन के बखान करत ही।

पहिल, तीतुस काहीं सुधि देबाबा ग हय, कि मसीही मन्डली के अँगुअन के चरित्र कउनमेर के होंय चाही, खास करके बहुत से क्रेते दीप माहीं रहँइ बालेन के खराब चरित्र काहीं देखिके, इआ कहा ग हय। दूसर, तीतुस काहीं इआ सलाह दीन गे ही, कि मसीही मन्डली माहीं उपस्थित बिभिन्न समूहन काहीं कउनमेर सिच्छा दीन जाय, अरथात, बुढ़ान मंसेरुअन काहीं, बुढ़ान मेहेरिअन काहीं (जउन क्रम के मुताबिक, जबान मेहेरिअन काहीं सिच्छा देंइ) जबान मंसेरुअन काहीं अउर सेबकन काहीं घलाय। तीसर, लेखक तीतुस काहीं मसीही आचरन से सम्बन्धित सलाह देत हें, खास करके सान्ती के साथ अउर साथी कि नाई बनँइ के खातिर; अउर नफरत, बाद-बिबाद अउर मसीही मन्डली माहीं गुटबन्दी से बचँइ के खातिर घलाय सलाह देत हें।

रूप-रेखा :

भूमिका

मसीही मन्डली के अँगुआ

मसीही मन्डली माहीं हरेक समूहन के करतब्य

उपदेस अउर चेतउनी

उपसंहार

## पवलुस के अभिबादन

1 हम पवलुस आहेन, हे तीतुस, इआ चिट्ठी हम तोंहई लिख रहेन हँय, जउन परमातिमा के सेबक आहेन, अउर यीसु मसीह के चुने खास चेला आहेन, परमातिमा जिनहीं चुनिन हीं, ऊँ लोगन काहीं बिसुआस के बारे माहीं, अउर जउन सत्य बचन उनहीं भक्ती के मुताबिक, जीवन जिअँइ के खातिर मदत करत हय, उआ सिखामँइ के खातिर हमहीं पठबा ग हय।

2 हम उआ अनन्त जीवन मिलँइ के आसा कए हएन, जउने काहीं देंइ के वादा परमातिमा, जउन कबहूँ लबरी नहीं बोलँइ, दुनिया के बनामँइ से पहिले किहिन हीं।

3 अउर अपने नियुक्त समय माहीं अनन्त जीवन देंइ के बारे माहीं, अपने बचन काहीं बतामँइ के काम, हमहीं मुक्ती देंइ बाले परमातिमा हुकुम दइके सँउपिन हीं।

4 इआ चिट्ठी तीतुस तोंहई मिलय, काहेकि तूँ हमरे व्दारा बचन सुनाए से यीसु मसीह के ऊपर बिसुआस किहे हया, इआ बिचार से हे तीतुस, तूँ हमरे सग लड़िका कि नाई हया।

हम प्राथना करित हएन, कि पिता परमातिमा अउर हमहीं पंचन काहीं मुक्ती देंइ बाले मसीह यीसु के तरफ से, तोहई किरपा अउर सान्ति मिलत रहय।

## क्रेते दीप माहीं तीतुस के काम

5 हम एखे खातिर तोहई क्रेते टापू माहीं छोड़िके आएन रहा हय, कि जउन काम अधूरा रहिगा तय, तूँ ओही पूर करा, अउर हमरे हुकुमय के मुताबिक हरेक सहरन के मसीही मन्डलिन माहीं, अँगुअन काहीं नियुक्त करा। 6 तोंहरे व्दारा नियुक्त उआ अँगुआ बेकसूर होय, अउर ओखे एकयठे मेहेरिआ होय, अउर ओखर लड़िका-बच्चा यीसु के ऊपर बिसुआस करँइ बाले होंय, अउर

उँइ लुच्चई करँइ बाले न होंय, अउर उनखे ऊपर बात न मानँय के आरोप न होंइ चाही। 7 मसीही मन्डली के अद्यच्छ काहीं, जेही परमातिमा मसीही मन्डली के लोगन के देख-रेख करँइ के काम सँउपिन हीं, एसे उनहीं बेकसूर होंइ क चाही; अउर ऊँ अड्डी न होंय, अउर न गुस्सइल होंय, अउर न झगड़लुअय होंय, अउर न दारुअय पिअँइ बाले होंय, अउर गलत काम कइके पइसा कमाँय बाले न होंय। 8 पय ऊँ महिमानन के सेवा सत्कार करँइ बाले, अउर भलाई के चाहँय बाले, संयमी अउर न्यायी पबित्र अउर अपने ऊपर काबू रक्खँइ बाले होंय; 9 अउर जउन बिसुआस के काबिल परमातिमा के बचन हय, जउने काहीं हम तोंहई सिखायन हय, ओहिन के मुताबिक ऊँ बिसुआस माहीं अटल रहँय, जउने ऊँ लोगन काहीं खरी सिच्छा से उपदेस दइ सकँय, अउर जउन लोग खरी सिच्छा के उपदेस के बिरोध करत हें, उनहीं गलत साबित कइके उनखर मुँह बंद कइ सकँय।

10 काहेकि बहुत से अइसन लोग हें, जउन खरी सिच्छा के बिरोध करत हें, अउर फालतू बातँय बोलिके खुब लोगन काहीं धोखा देत हें; खास करके यहूदी लोगन म से जउन बिसुआसी हें, ऊँ पंचे खतना के ऊपर जादा जोर देत हें, कि सगलेन के खतना होंइ चाही। 11 इआमेर के मनइन काहीं गलत साबित कइके उनखर मुँह बंद करँइ चाही, काहेकि ई लोग जादा पइसा कमाँय के खातिर, लोगन काहीं गलत सिच्छा दइके, पूरे घर के लोगन काहीं बिगाड़ देत हें। 12 उनहिन के बीच म से एक जने, जउन उनहिन के बुद्धिमान मुखिया आहीं, इआ बात कहिन हीं, “क्रेते नाम के दीप के मनई हमेसा झूठ बोलँइ बाले हें, ऊँ दुस्त पसुअन कि नाई होत हें, अउर आलसी पेटू घलाय होत हें।” 13 हे तीतुस, हम तोंहसे कहित हएन, कि क्रेते दीप के लोगन के बारे माहीं जउन गबाही दीन गे ही। सही हय, एसे हे तीतुस, उहाँ के बिसुआसिन काहीं कड़ाई से चेतउनी घा करा, कि ऊँ गलत सिच्छा से दूर रहिके, बिसुआस माहीं मजबूत होइ जाँय, 14 अउर यहूदी लोगन के मनगढ़ंत कथा-कहानिन, अउर ऊँ मनइन के हुकुमन माहीं मन न लगाया, जउन

परमातिमा के सत्य बचन से भटक जात हैं।<sup>15</sup> जउन मनइन के हिरदय सुद्ध हैं, उनखे खातिर परमातिमा के बनाई सगली चीज सुद्ध हई, पय जिनखर हिरदय असुद्ध हैं, अउर परमातिमा के बचन के बिसुआस नहीं मानैय, उनखे खातिर कुछ सुद्ध नहीं आय, बलकिन उनखर बुद्धी अउर सोच-बिचार दोनव असुद्ध होत हैं।<sup>16</sup> अउर असुद्ध मनई कहत हैं, कि हम पंचे परमातिमा काहीं जानित हएन, पय ऊँ पंचे परमातिमा के बचन के खिलाफ काम कइके, उआ बात काहीं इनकार करत हैं; काहेकि ऊँ पंचे घिनहे काम करत हैं, अउर परमातिमा के हुकुम काहीं नहीं मानैय, अउर ऊँ कउनव निकहे काम करई के काबिल नहीं होय।

### चाल-चलन के खातिर सही सिच्छा

2 पय तूँ अइसन बात कहा करा, जउन खरे उपदेस के काबिल होय।<sup>2</sup> जउने बुढ़ान मनई हुसिआर, अउर गम्भीर, अउर नीक-नागा पहिचानैय बाले होइ जाँय, अउर ऊँ बिसुआस रक्खैय माहीं, अउर प्रेम रक्खैय माहीं, अउर धीरज धरैय माहीं, मजबूत होइ जाँय।<sup>3</sup> इहइमेर बुढ़ान मेहेरिअन काहीं सिखाबा, कि उनखर चाल-चलन पबित्र चाल चलैय बाले मनइन कि नाई होय; ऊँ दुसरेन के ऊपर दोस लगामँइ बाली न होय, अउर दारू पिअँइ बाली न बनैय, बलकिन निकही बात सिखामँइ बाली बनैय।<sup>4</sup> जउने ऊँ जमान मेहेरिअन काहीं समझाबत रहैय, कि ऊँ अपने-अपने मंसेरुअन अउर लडिकन-बच्चन से प्रेम रक्खैय;<sup>5</sup> अउर नीक-नागा पहिचानैय, अउर पतिब्रता, एखे साथय-साथ घर-दुआर के जबाबदारी, अउर आपन करतब्य निकहा से निभामँइ बाली बनैय, अउर अपने मंसेरुअन के कहा-बतान मानँइ बाली बनैय, जउने परमातिमा के बचन के बुराई न होइ पाबय।

<sup>6</sup> इहइमेर तूँ जमान मनइन काहीं घलाय समझाबा करा, कि ऊँ अपने ऊपर काबू रक्खैय बाले बनैय।<sup>7</sup> तूँ जउन कुछ काम करा ऊँ निकहे होय, जउने ई सब कामन काहीं देखिके, जमान लोग उहयमेर जीवन जिअँइ। अउर तूँ जउन सिखाबा उआ निस्कपट होइ चाही, जउने काहीं सुनिके लोग-बाग अपनाय सकैय।<sup>8</sup> अउर जउन सही हय, उहय तूँ, लोगन काहीं सिखाबत रह्या, जउने कोऊ ओही गलत न कहँइ पामँय, अउर जउन हमार बिरोध करत हैं, उनहीं कउनव गलती न मिलय जउने ऊँ सरमिन्दा होय।

<sup>9</sup> तूँ उन मसीही सेबकन काहीं समझाबा, कि ऊँ अपने-अपने मालिकन के सगली बातन काहीं मानैय, अउर उनखे सगली बातन काहीं मानिके, उनहीं खुसी रक्खैय, अउर उनखे बातन के उल्टहाव न देय।<sup>10</sup> ऊँ बेइमानी कइके कुछ न लइ जाँय, बलकिन जउन कुछ करैय इमानदारी से करैय, जउने हर बात माहीं उनहीं दूसर मनई देखिके, हमहीं पंचन काहीं मुक्ती देई बाले परमातिमा के बचन कइती खिंचे चले आमँय।

<sup>11</sup> काहेकि सगले मनइन काहीं छुटकारा देई के खातिर परमातिमा आपन दया देखाइन हीं।<sup>12</sup> परमातिमा अपने दया के व्दारा चेतउनी दइके, इआ सिखाबत हैं, कि हम पंचे जउन परमातिमा के भक्ती नहीं करी, ओही, अउर संसार के बुरे लोभ लालच काहीं छोड़ि देई, अउर इआ संसार माहीं अपने ऊपर काबू रखिके, धारमिक अउर परमातिमा के भक्ती माहीं जीवन बिताई; <sup>13</sup> अउर उआ आनन्द मिलँइ के आसा रखिके, अपने महान परमातिमा, अउर पाप करई से छुटकारा देई बाले यीसु मसीह काहीं, महिमा के साथ धरती माहीं आमँइ के इन्तजार करत रही।<sup>14</sup> यीसु मसीह अपने इच्छा से हमरे पंचन खातिर मउत काहीं अपनाइन हीं, कि जउने हमहीं पंचन काहीं हरेकमेर के अधरम से छोड़ाय लेंय, अउर सुद्ध कइके अपने खातिर अइसन प्रजा बनाय लेंय, जउन निकहे-निकहे कामन काहीं करई के खातिर हरेक समय तइआर रहैय।

<sup>15</sup> बेटा, तूँ पूरे हक्क के साथ, ई सगली बातन काहीं लोगन काहीं बताइके समझाबा, अउर सिखाबत रहा, इआ सब सिखामँइ के तौहई अधिकार हय, जउने कोऊ तौहार अनादर न करैय पाबय।

### मसीही चाल-चलन

3 मसीही लोगन काहीं सुधि देबाबत रहा, कि ऊँ हाकिम अफसरन के सम्मान करैय, अउर उनखे हुकुमन काहीं मानैय, अउर हरेक निकहे कामन काहीं करई के खातिर तइआर रहैय।<sup>2</sup> अउर कोहू काहीं बदनाम न करैय, लड़ाई-झगड़ा करई बाले न बनैय; बलकिन कोमल सुभाव के होय, अउर सगले मनइन के साथ नम्र बेउहार करैय।<sup>3</sup> काहेकि हमहूँ पंचे बिसुआसी बनई से पहिले, नासमझ अउर परमातिमा के हुकुम न मानँइ बाले रहे हएन, अउर भ्रम माहीं परिके अनेकव प्रकार के बुरी इच्छा, अउर सुख-बिलास माहीं फँसे रहे हएन, अउर एक दुसरे से दुसमनी, अउर इरसा के जिन्दगी बिताबत रहे हएन, अउर एक दुसरे से नफरत कइके दुसमनी रक्खत रहे हएन।<sup>4</sup> पय जब हमहीं पंचन काहीं मुक्ती देई बाले परमातिमा के किरपा भे, अउर सगले मनइन के ऊपर ऊँ आपन प्रेम देखाइन।<sup>5</sup> अउर हमहीं पंचन काहीं मुक्ती दिहिन; इआ हमरे पंचन के धारमिकता के कामन के मुताबिक नहीं भ, जउन हम पंचे किहेन रहा हय, बलकिन परमातिमा हमरे पंचन के ऊपर दया कइके। पबित्र आत्मा से हमरे पापन काहीं धोय दिहिन, अउर हमहीं पंचन काहीं नबा जनम, अउर नबा जीवन दिहिन हीं।<sup>6</sup> अउर परमातिमा हमहीं पंचन काहीं पाप करई से मुक्ती देई बाले, यीसु मसीह के व्दारा, हमहीं पंचन काहीं पबित्र आत्मा बहुतायत से दिहिन हीं।<sup>7</sup> जउने हम पंचे परमातिमा के बड़ी दया के कारन धरमी ठहरिके, अउर जउन अनन्त जीवन पामँइ के आसा हम पंचे करित हएन, ओखर बारिसदार घलाय बनी।

<sup>8</sup> अउर ई सगली बात सही हई, अउर सगले मनइन के खातिर लाभदायक हई, एसे हम चाहित हएन, कि तूँ ई सगली बातन के बारे माहीं जोर दइके लोगन काहीं बताबा, एसे कि जउन लोग परमातिमा के ऊपर बिसुआस करत हैं, ऊँ भले-भले कामन काहीं करई माहीं ध्यान देय।<sup>9</sup> पय मूर्खता के जउने बातन से बिबाद होत हैं, अउर बंसाबलिअन के बिबाद से, अउर मूसा के बिधान के बातन से सम्बन्धित बिबादन से बँचे रहा, काहेकि ई सगली बातन से कउनव फायदा नहीं होय, बलकिन नुकसानय होत हय।<sup>10</sup> अगर कउनव पाखन्डी मनई मसीही मन्डली माहीं फूट डारत हय, त ओही एक दुइ बेर समझाबा, ओखे बादव अगर उआ नहीं सुधरय, त ओसे अलग रहा।<sup>11</sup> इआ जानिके कि इआमेर करई बाला मनई, बिसुआस से भटकिया हय, अउर उआ पाप कइके अपने काहीं खुदय दोसी ठहराबत हय।

### पवलुस के निजी निरदेस अउर अभिबादन

<sup>12</sup> जब हम तौहरे लघे अरतिमास इआ कि तुखिकुस काहीं पठउब, तब तूँ हमरे लघे निकुपुलिस सहर माहीं आमँइ के कोसिस किहा, काहेकि हम उहँय पूरे जाड़े के सीजन माहीं रहँइ के निरनय किहेन हँय।<sup>13</sup> जेनास मूसा के बिधान सिखामँइ बाले काहीं, अउर अपुल्लोस काहीं, कोसिस कइके पहिले पठय घा, अउर इआ ध्यान दिहा, कि उनहीं गइल माहीं कउनव चीज के कमी न होय पाबय।<sup>14</sup> हे तीतुस, तूँ सगले मसीही भाइन काहीं सिखाबा, कि ऊँ निकहे काम करत रहैय, जउने एक दुसरे के जरूरत काहीं पूर कइ सकैय, अउर उनखे कामन के व्दारा दुसरे लोगन काहीं फायदा मिलय।

<sup>15</sup> हमरे साथ माहीं रहँइ बाले सगले बिसुआसी भाई, तौहई नबस्कार बोलिन हीं। अउर जउन उहाँ के बिसुआसी भाई हमसे प्रेम रक्खत हैं, उनहीं हमार नबस्कार।

हम प्राथना करित हएन, कि तौहरे पंचन के ऊपर परमातिमा के दया होत रहय। आमीन।

# फिलेमोन

## इआ चिट्ठी के परिचय

फिलेमोन एकठे खास मसीही रहे हँय, जिनहीं माना जात हय, कि ऊँ कुलुस्से सहर के मसीही मन्डली के सदस्य रहे हँय, अउर उनखे उनेसिमुस नाम के एकठे दास रहा हय। अउर उआ उनखे घर से भागिगा तय, एखे बाद उआ कउनव मेर से पवलुस के समपरक माहीं आबा, अउर पवलुस उआ समय जेल माहीं रहे हँय। पवलुस के द्वारा उनेसिमुस मसीही बनिगा। फिलेमोन के नाम यीसु मसीह के खास चेला पवलुस के चिट्ठी माहीं, पवलुस, फिलेमोन से इआ आग्रह करत हें, कि ऊँ अपने दास से पुनि मेल-जोल कइ लेंय, जउने काहीं ऊँ दुसराय उनखे लघे पठबत रहे हँय, अउर पवलुस चाहत रहे हँय, कि फिलेमोन न केबल एकठे माफ कीन दास के रूप भर माहीं ओही सोइकार करँय, बलकिन एकठे मसीही भाई के रूप माहीं ओखर स्वागत करँय।

रूप-रेखा :

भूमिका  
फिलेमोन के बड़ाई  
उनेसिमुस के खातिर निबेदन  
उपसंहार

### पवलुस के अभिबादन

1 हम पवलुस आहैन, अउर इआ चिट्ठी काहीं लिख रहेन हँय, जउन मसीह यीसु के कारन जेल माहीं हएन, हमरे तरफ से अउर भाई तीमुथियुस के तरफ से, इआ चिट्ठी हमरे पंचन के साथ माहीं काम करँइ बाले पियार फिलेमोन, 2 अउर बहिनी अप्फिया, अउर हमरे पंचन के साथ माहीं सिपाही कि नाई काम करँइ बाले भाई अरखिप्पुस, अउर फिलेमोन के घर माहीं लागँइ बाली मसीही मन्डली के मनइन काहीं मिलय। 3 हमरे पंचन के पिता परमातिमा, अउर प्रभू यीसु मसीह के तरफ से तौहई पंचन काहीं किरपा अउर सान्ति मिलत रहय।

### फिलेमोन के प्रेम अउर बिसुआस

4 अउर जब-जब हम प्राथना करित हएन, तब-तब तौहई सुध करित हएन, अउर हमेसा परमातिमा काहीं धन्यवाद देइत हएन। 5 काहेकि तूँ जउन यीसु मसीह के ऊपर बिसुआस करते हया, अउर सगले बिसुआसी भाई-बहिनिन से प्रेम करते हया, एखर हम चरचा सुनत रहित हएन। 6 हम इआ प्राथना करित हएन, कि बिसुआस माहीं तौहार भागीदार होब, प्रभावसाली होय, अउर मसीह के द्वारा जउन आसिरबाद तौहई मिला हय, ओही पहिचान ल्या। 7 हे भाई, तौहरे द्वारा बिसुआसी भाई-बहिनिन के मन खुब आनन्द से भरिगें हँय, एसे तौहरे इआ प्रेम काहीं देखिके, हमहीं खुब आनन्द अउर सान्ति मिली हय।

### उनेसिमुस के खातिर पवलुस के निबेदन

8 एसे जबकि मसीह माहीं तौहई पंचन काहीं कइसन करतब्य करँइ चाही, एखे बारे माहीं तौहई हुकुम देँइ के हमहीं अधिकार हय। 9 तऊ हम पवलुस जउन बुढ़ाय गएन हय, अउर अब मसीह यीसु के खातिर जेल माहीं डारे गएन हय, हमहीं इआ नीक जान परा, कि हम प्रेम से तौहसे बिनती करी। 10 अउर जब हम जेल माहीं रहेन हय, तब उनेसिमुस हमरे द्वारा बिसुआसी बना हय, एसे उआ हमरे लड़िका कि नाई हय, ओखे खातिर हम तौहसे

बिनती करित हएन। 11 एक समय अइसा रहा हय, कि जब उआ तौहरे कउनव काम के नहीं रहा आय, पय अब उआ केबल तौहरेन भर खातिर नहीं, बलकिन उआ हमरेव खातिर घलाय बड़े काम के हय। 12 हम ओही पुनि तौहरे लघे पठइत हएन, जउन हमरे जिगर के टुकड़ा आय। 13 हम जउन खुसी के खबर के प्रचार करँइ के कारन, जेल माहीं डारे गएन हय, एसे ओही हम अपनेन लघे रक्खँइ चाहत रहे हएन, कि उआ तौहरे तरफ से हमार सेबा करत। 14 पय हम तौहरे मरजी काहीं बिना जाने, कुछू नहीं करँइ चाहेन, कि जउने हमरे ऊपर तौहार इआ दया, कउनव दबाव से नहीं, बलकिन बड़े खुसी के साथ होय। 15 होइ सकत हय, कि उआ इहय कारन तौहसे कुछ दिनन के खातिर अलग भ रहा होय, कि जउने उआ हमेसा के खातिर तौहरे लघे रहि सकय। 16 पय अब तूँ ओसे एकठे सेबक कि नाई नहीं, बलकिन सेबक से बढ़िके बिसुआसी भाई कि नाई बेउहार किहा, काहेकि उआ हमहीं त खुब पियार हइअय हय, एसे तूँ एकठे साधारन मनई कि नाई नहीं, बलकिन बिसुआसी भाई कि नाई ओसे प्रेम किहा। 17 एसे अगर तूँ हमहीं प्रभू के काम माहीं आपन साझीदार मनते हया, त ओहू काहीं हमरे कि नाई समझिके सोइकार करा। 18 अउर अगर उआ तौहार कुछू नुकसान किहिस होय, इआ कि ओखे ऊपर तौहार कुछू करजय होय, त ओही हमरे नाम माहीं लिख लिहा। 19 हम पवलुस खुदय अपने हाँथ से इआ लिख रहेन हय, कि हम तौहार करजा खुदय पटाय देब; हमहीं इआ बतामँइ के जरूरत नहीं आय, कि तूँ अपने जीवन भर, हमार रिनी रइहा। 20 अउर हे भाई, तूँ ओही सोइकार कइल्या, जउने इआ आनन्द हमहीं प्रभू माहीं तौहरे तरफ से मिलय, अउर मसीह माहीं हमरे जिव काहीं हरा-भरा कइ द्या। 21 हम तौहरे ऊपर बिसुआस करित हएन, कि तूँ हमरे हुकुम काहीं जरूर मनिहा, एसे हम तौहई इआ चिट्ठी लिख रहेन हय, अउर हम इहव जानित हएन, कि जउन हम तौहई कहित हएन, ओही तूँ ओहू से बढ़िके करिहा। 22 हम तौहसे एकठे बात अउर कहित हएन, कि हमरे रँइ के खातिर जघा के प्रबन्ध कइ राख्या; हमहीं इआ पूर आसा ही, कि परमातिमा, तौहरे पंचन के प्राथनन काहीं सुनिके, हमहीं जेल से छोड़ाइके तौहरे लघे पुनि पठय देइहँय।

**अन्तिम अभिवादन**

<sup>23</sup> इपफ्रास जउन हमरे साथ मसीह यीसु के कारन जेल माहीं बंद हैं।  
<sup>24</sup> अउर मरकुस अउर अरिस्तरखुस अउर देमास, अउर लूका जउन हमरे

साथ माहीं काम करँइ बाले आहीं, इनहूँ के तरफ से घलाय तोंहई नबस्कार पहुँचय। <sup>25</sup> अउर हम पंचे इआ प्राथना करित हएन, कि हमरे प्रभू यीसु मसीह के किरपा तोंहरे पंचन के आत्मा के साथ बनी रहय। आमीन!

# इब्रानियन

## इआ चिट्टी के परिचय

इआ चिट्टी इब्रानी मसीही लोगन के खातिर लिखी गे रही हय, जउन सताव के कारन अपने मसीही बिसुआस काहीं छोंड़ के कगार माहीं रहे हँय। लेखक उनहीं पंचन काहीं अपने बिसुआस माहीं बने रहँइ के खातिर उत्साहित करत हँ, इआ चिट्टी माहीं लेखक खास करके इआ बताबत हँ, कि केबल यीसु मसीह परमातिमा के बास्तबिक अउर अन्तिम प्रकासन आहीं, इआ बात काहीं बतामँइ के खातिर ऊँ तीन सच्चाइन माहीं जोर देत हँ। (1) यीसुअय परमातिमा के बास्तबिक लड़िका आहीं, जउन दुख उठाय-उठाइके पिता के हुकुमन काहीं पालन किहिन। परमातिमा के लड़िका के रूप माहीं यीसु पुरान नेम के नबिअन, स्वरगदूतन, अउर मूसा से घलाय महान हँ। (2) यीसु परमातिमा के द्वारा अनन्तकाल के खातिर महायाजक साबित कइ दीनगे हँय, अउर ऊँ पुरान नेम के महायाजकन से महान हँ। (3) यीसु के द्वारा बिसुआसी पाप, डेर, अउर मउत से बचाय लीनगे हँय; अउर यीसु महायाजक के रूप माहीं सच्ची मुक्ती देत हँ, यहूदी धरम के धारमिक बिधिअन, अउर पसुअन के बलियन के द्वारा जिनखर केबल पहिले से अभास मिलत रहा हय। लेखक चिट्टी के अन्तिम पाठन माहीं इजराइल के कुछ महान मनइन के बिसुआस के बारे माहीं बखान कइके, अपने पढ़ँइ बालेन काहीं बिसुआस माहीं बने रहँइ के निबेदन करत हँ, कि ऊँ पंचे सताव अउर दुख-मुसीबत काहीं सहत अन्त तक बिसुआस माहीं बने रहँय, अउर आपन ध्यान यीसु मसीह के ऊपर लगाए रहँय।

हम बिनती करित हएन, कि इआ चिट्टी काहीं अपना पंचे जरूर पढ़ी, अउर यीसु मसीह के ऊपर किहे बिसुआस माहीं मजबूत बनी।

रूप-रेखा :

भूमिका : मसीह, परमातिमा के पूर प्रकासन आहीं  
मसीह, स्वरगदूतन से घलाय महान हँ  
मसीह, मूसा अउर यहोसू से घलाय महान हँ  
मसीह के याजक पद के महानता  
मसीह के करार के महानता  
मसीह के बलिदान के महानता  
बिसुआस के महानता  
आखिरी उपदेस अउर उपसंहार

### परमातिमा के बचन उनखे लड़िका के व्दारा

1 पहिले के समय माहीं परमातिमा, बाप-दादन से थोरी-थोरी कइके, अउर कइयकमेर से अपने सँदेस बतामँइ बालेन के द्वारा बातँय किहिन, 2 पय ई आखिरी दिनन माहीं अपने लड़िका के द्वारा हमसे पंचन से बातँय किहिन हीं, अउर उनहिन काहीं ऊँ सगले चीजन के बारिसदार ठहराइन हीं, अउर उनहिन के द्वारा ऊँ सगले संसार काहीं बनाइन हीं। 3 अउर ऊँ परमातिमा के महिमा के उँजिआर, अउर उनखे हरेक सुभाव के साछात तसबीर आहीं, अउर उँइन सगली चीजन काहीं अपने सामरथी बचन से सम्हारत हँ। अउर उँइन मनइन के पापन काहीं धोइके, सगलेन से ऊँच जघा अरथात स्वरग माहीं, सबसे महान परमातिमा के दहिने कइती जाइके बइठिगें हँय। 4 अउर उनखर पद स्वरगदूतन से बढ़िके हय, काहेकि जउन नाम उनहीं बारिसदार के रूप माहीं मिला हय, उआ नाम उनखे नामन से खुब महान हय।

### परमातिमा के लड़िका के महानता

5 काहेकि स्वरगदूतन म से परमातिमा कबहूँ कोहू से इआ नहीं कहिन, कि

“तूँ † हमार लड़िका आह्या, अउर तूँ आजय हमसे पइदा भया हय।” अउर इहव नहीं कहिन, कि “हम उनखर बाप होब, अउर ऊँ हमार लड़िका †† होइहँय।”

6 अउर जब ऊँ अपने पहिलउठा लड़िका काहीं संसार माहीं पठबत हँ, त कहत हँ, कि “परमातिमा के सगले स्वरगदूत उनखे गोइन गिरँय †।”

7 अउर ऊँ स्वरगदूतन के बारे माहीं इआ कहत हँ, कि “ऊँ अपने दूतन काहीं हबा कि नाई, अउर अपने सेबकन काहीं धँधकत आगी कि नाई बनाबत हँ †।”

8 पय अपने लड़िका के बारे माहीं परमातिमा इआ कहत हँ, कि “हे परमातिमा तोंहार सिंहासन हमेसा बना रही, अउर तूँ अपने राज माहीं न्याय के साथ सासन †† करिहा।

9 अउर तूँ धरम से प्रेम अउर अधरम से इरखा किहा हय; इहय कारन से परमातिमा अरथात तोंहार परमातिमा तोंहरे साथिन से बढ़िके तोंहार आनन्द रूपी तेल से अभिसेक ††† किहिन हीं।” 10 अउर परमातिमा इहव कहत हँ, कि

“हे प्रभू, सुरुआत माहीं अपना धरती के नेव डारेन हय, अउर स्वरग अपना के हाँथे के कारीगरी ††† आय।

† 1:5 भज 2:7 †† 1:5 2 समू 7:14; 1 इति 17:13 † 1:6 व्यब 32:43

†† 1:7 भज 104:4 †† 1:8 भज 45:6 ††† 1:9 भज 45:7 ††† 1:10 भज 102:25

11 पय ऊँ सगले ओन्हा कि नाई पुरान होइ जइहँय, अउर ऊँ नास होइ जइहँय; पय अपना हमेसा † बने रहब।

12 अउर अपना उनहीं पिछउरी कि नाई लपेटब, अउर ऊँ पुरान ओन्हा कि नाई बदल जइहँय, पय अपना उहयमेर सही-सलामत रहब, अउर अपना के जीवन के अन्त †† कबहूँ न होई।”

13 अउर परमातिमा कबहूँ कउनव स्वरगदूतन से इआमेर नहीं कहिन, कि “तूँ हमरे दहिने कइती बइठा, जब तक हम तौहरे बइरिन काहीं तौहरे गोड़े के नीचे धरँय बाली चउकी † न बनाय देई।”

14 काहेकि ऊँ सगले स्वरगदूत सेबा करँइ बाली आत्मा आहीं, जउन मुक्ती पामँइ बाले मनइन के सेबा के खातिर पठई जाती †† हँय।

### महान मुक्ती

2 इआ कारन से हमहीं पंचन काहीं चाही, कि हम पंचे जउने बातन काहीं सुने हएन, उनमा अउर जादा मन लगाई, कहँव अइसा न होय, कि हम पंचे भटकिके ऊँ बातन से दूर चले जई। 2 काहेकि जउन बचन स्वरगदूतन के द्वारा कहा ग रहा हय। जब उआ नहीं बदला, अउर हरेक अपराध अउर हुकुम न मानँइ के ठीक-ठीक बदला मिला, 3 त हम पंचे एतनी महान मुक्ती देई बाले बचन के तिरस्कार कइके, कइसन सजा से बँच सकित हएन? अरथात नहीं बँच सकी। जेखे बारे माहीं सबसे पहिले प्रभू बताइन तय, अउर सुनँय बालेन के द्वारा हमहीं पंचन काहीं पूर बिसुआस भ। 4 अउर साथय-साथ परमातिमा घलाय अपने मरजी के मुताबिक चिन्हन, अउर अचरज के कामन, अउर अनेकव प्रकार के सामर्थ के कामन, अउर पबित्र आत्मा के बरदानन काहीं बाँटँइ के द्वारा, एखर गबाही देत रहिगें।

### मुक्ती देई बाले यीसु मसीह के मनई के रूप धारन करब

5 उआ आमँइ बाले संसार काहीं जेखे बारे माहीं हम पंचे चरचा कइ रहे हएन, ओही परमातिमा स्वरगदूतन के अधिकार माहीं नहीं किहिन आय। 6 बलकिन पबित्र सास्त्र माहीं कउनव मनई परमातिमा से इआ कहिन हीं, कि

“मनई के कउनव अउकात नहिं आय, तऊ अपना ओखर ख्याल रक्खित हएन।” अउर “मनई के कउनव अउकात नहिं आय, तऊ अपना ओखर चिन्ता करित हएन।”

7 “अपना उनखे पद काहीं स्वरगदूतन से थोरिन काहीं कम किहेन हय; अपना उनखे ऊपर महिमा अउर मान-सम्मान के मुकुट धरेन हय, अउर उनहीं अपने हौंथेन के कामन के ऊपर अधिकार दिहेन हय। अउर अपना सब कुछ उनखे अधीन †† कइ दिहेन हय।”

8 एसे जब परमातिमा सब कुछ उनखे अधीन कइ दिहिन हीं, अउर अइसन कुछू नहीं बचाइन जउन उनखे अधीन न भ होय। पय हम पंचे अबय तक सब कुछ उनखे अधीन नहीं देखी।

9 पय हम पंचे यीसु काहीं जिनखर पद, कुछ समय के खातिर स्वरगदूतन से थोरिन काहीं कम कीन ग रहा हय, मउत के दुख भोगँइ के कारन, महिमा अउर मान-सम्मान के मुकुट पहिरे देखित हएन; कि जउने ऊँ परमातिमा के किरपा से सगले मनइन के खातिर मउत के स्वाद चखँय। 10 काहेकि परमातिमय सब कुछ बनाइन हीं, अउर सब कुछ उनहिन के आय, अउर उनहीं इआ निकहा लाग, कि जब ऊँ खुब लड़िकन काहीं अपने महिमा माहीं पहुँचामँइ, त उनहीं पंचन काहीं मुक्ती देई बाले यीसु काहीं दुख भोगँइ के द्वारा सिद्ध करँय। 11 काहेकि पबित्र करँइ बाले यीसु अउर जउन मनई पबित्र कीन जात हैं, ऊँ सगले जन एकय पिता के सन्तान आहीं, इहय कारन से यीसु उनहीं पंचन काहीं भाई-बहिनी कहँइ से नहीं लजाँय। 12 अउर पबित्र सास्त्र माहीं घलाय लिखा हय, कि ऊँ कहत हैं, कि

“हम अपना के नाम अपने भाई-बहिनिन काहीं बताउब, अउर मसीही मन्डली के बीच माहीं अपना के भजन गाउब।”

13 अउर इहव घलाय कहिन हीं, कि हम उनखे ऊपर बिसुआस रक्खब। अउर इहव कहिन, कि “देखा, हम ऊँ लड़िकन समेत जिनहीं परमातिमा हमहीं दिहिन हीं।”

14 काहेकि जब लड़िका माँस अउर खून से बने हँय, त यीसु घलाय उनहिन कि नाई मनई के रूप माहीं पइदा होइके, खून अउर माँस माहीं भागीदार होइगें। कि जउने अपने मउत के द्वारा ऊँ ओही, अरथात सइतान के सक्ती काहीं नास कइ देई, जउने काहीं मउत के ऊपर सक्ती मिली रही हय। 15 अउर जेतने मनई मउत के डेर से जीवन भर ओखे बन्धन माहीं परे रहे हँय, यीसु उनहीं मउत के डेर से मुक्ती देँय। 16 काहेकि इआ निश्चित हय, कि यीसु स्वरगदूतन के नहीं, बलकिन अब्राहम के सन्तानन के मदत करत हैं। 17 इआ कारन से उनखे खातिर इआ जरूरी रहा हय, कि ऊँ हरेक बातन माहीं, अपने भाई-बहिनिन कि नाई बनँय, जउने ऊँ, परमातिमा से सम्बन्धित हरेक बातन माहीं, दयालू अउर बिसुआस के काबिल महायाजक बनँय। अउर मनइन के पापन के माफी के खातिर, खुद काहीं बलिदान करँय। 18 काहेकि यीसु जब परिच्छा माहीं परे रहे हँय, त खुब दुख उठाइन तय, एसे ऊँ उनहूँ के घलाय मदत कइ सकत हैं, जिनखर परिच्छा होत ही।

### यीसु मूसा नबी से महान हैं

3 एसे हे पबित्र भाई-बहिनिव, तूँ पंचे जउन स्वरग माहीं रहँइ बाले परमातिमा के द्वारा बोलाए जाँइ माहीं भागीदार हया, परमातिमा के पठए ऊँ प्रतिनिधि अउर महायाजक यीसु के ऊपर ध्यान करा, जिनहीं हम पंचे सोइकार किहेन हँय। 2 जउन अपने नियुक्त करँइ बाले परमातिमा के खातिर, बिसुआस के काबिल रहे हँय, जइसन मूसा नबी घलाय, उनखे सगले घराना माहीं बिसुआस के काबिल रहे हँय। 3 काहेकि जइसन घर काहीं बनामँइ बाला, घर से अधिक मान-सम्मान पाबत हय, उहयमेर यीसु घलाय, मूसा नबी से बढिके मान-सम्मान पामँइ के काबिल माने गे हँय। 4 काहेकि हरेक घर काहीं बनामँइ बाला कोऊ न कोऊ होत हय, पय हरेक चीजन काहीं बनामँइ बाले परमातिमय आहीं। 5 अउर मूसा त उनखे सगले घराना माहीं सेबक कि नाई बिसुआस के काबिल रहे हँय, कि जउने बातन के बखान होंइ बाला रहा हय, ओखर गबाही देँय। 6 पय मसीह लड़िका कि नाई, उनखे घर के अधिकारी आहीं, अउर उनखर घर हम पंचे आहेन, अगर हम पंचे साहस माहीं, अउर अपने आसा के घमन्ड माहीं, अन्त तक मजबूती के साथ बने रही।

### अबिसुआस के बारे माहीं चेतउनी

7-8 एसे जइसन पबित्र आत्मा कहत हैं, कि “अगर आज तूँ पंचे परमातिमा के बोल सुना, त अपने मन काहीं कठोर न करा, जइसन कि क्रोध देबामँइ के समय अउर परिच्छा के दिन इजराइली लोग जंगल माहीं किहिन तय।

9 जहाँ तौहार पंचन के बाप-दादा हमहीं जाँचिन-परखिन, अउर चालिस बरिस तक हमरे कीन कामन काहीं देखिन।

10 इहय कारन से हम उआ समय के मनइन से क्रोधित रहेन हय, अउर कहेन, कि ‘इनखर मन हमेसा भटकतय रहत हैं, अउर ई पंचे हमरे बताए गइलन माहीं नहीं चलँय।’

11 तब हम क्रोधित होइके इआ कसम खायन, कि ‘ई पंचे हमरे अराम के जघा माहीं कबहूँ न जाए पइहँय।’ †††”

12 एसे हे भाई-बहिनिव, सचेत रहा, कि तौहरे पंचन के भीतर अइसन पापी अउर अबिसुआसी मन न होय, जउन तौहई पंचन काहीं भटकाइके जिन्दा परमातिमा से दूर लइ जाय। 13 बलकिन जउने दिना तक आज के दिन कहा जात हय, हरेक दिन एक दुसरे काहीं उत्साहित करत रहा, कहँव

† 1:11 भज 102:26 †† 1:12 भज 102:27 † 1:13 भज 110:1 †† 1:14 भज 34:7 †† 2:7 भज 8:4-6

††† 3:11 भज 95:7-11

अइसा न होय, कि तौहरे पंचन के बीच म से कोऊ पाप के जाल माहीं फँसिके कठोर बन जाय।<sup>14</sup> काहेकि हम पंचे मसीह के साथ भागीदार बन गएन हय, अगर हम पंचे यीसु मसीह के ऊपर किहे पहिल बिसुआस माहीं अन्त तक मजबूती के साथ बने रही।<sup>15</sup> जइसन पबित्र सास्त्र माहीं घलाय लिखा हय, कि

“अगर आज तू पंचे उनखर बोल सुना, त अपने मनन काहीं कठोर न करा, जइसन इजराइली लोगन के बाप-दादा, परमातिमा के बात न मानिके उनखे बिरुद्ध काम किहिन।”

<sup>16</sup> अउर इआ बताबा, कि “ऊँ पंचे को आहीं जउन परमातिमा के बोल सुनिके उनखे बिरुद्ध काम किहिन तय?” का ऊँ पंचे, उँइन न होंहीं, जिनहीं मूसा नबी मिस्र देस से निकारिके लइ आएँ तय? <sup>17</sup> अउर चालिस बरिस तक परमातिमा कउने मनइन से क्रोधित रहे हँय? का उनहिन से नहीं, जउन पाप किहिन तय, अउर उनखर लोथँय जंगल माहीं परी रही हँय? <sup>18</sup> अउर ऊँ कउने मनइन से कसम खाइन तय, कि तू पंचे हमरे अराम के जघा माहीं न जाए पइहा? का केबल ऊँ पंचन से नहीं, जउन उनखर हुकुम नहीं मानिन तय? <sup>19</sup> एसे हम पंचे इआ देखित हएन, कि ऊँ पंचे बिसुआस न किहे के कारन, उआ अराम के जघा माहीं नहीं जाए पाइन।

### परमातिमा के भक्तन के अराम के जघा माही जाब

**4** एसे जब अराम के जघा माहीं उनखे जाँइ के वादा अबे तक हय, त हमहीं पंचन काहीं डेराँइ चाही; कहँव अइसा न होय, कि तौहरे पंचन म से कोऊ उहाँ जाँइ से बंचित रहि जाय।<sup>2</sup> काहेकि जइसन खुसी के खबर उनहीं पंचन काहीं सुनाई गे रही हय, उहयमेर हमहूँ पंचन काहीं घलाय सुनाई गे ही, पय उनहीं पंचन काहीं सुने बचन से कउनव फायदा नहीं भ, काहेकि ऊँ पंचे बचन काहीं सुनिके अपने जीवन माहीं बिसुआस के साथ लागू नहीं किहिन तय।<sup>3</sup> पय हम पंचे जेतने जन उनखे बचन काहीं सुनिके अपने जीवन माहीं बिसुआस के साथ लागू किहेन हय, उनखे अराम के जघा माहीं जाए पाउब; पय जे बिसुआस नहीं किहिन उनसे ऊँ कहिन हीं, कि

“हम अपने क्रोध माहीं कसम खायन हय, कि ऊँ पंचे हमरे अराम के जघा माहीं कबहूँ न जाए पइहँय।”

एसे कि जब ऊँ संसार काहीं बनाइन तय, तबहिन उनखर सगले काम पूर होइगे रहे हँय।<sup>4</sup> काहेकि सतएँ दिन के बारे माहीं पबित्र सास्त्र माहीं इआमेर लिखा हय, कि “परमातिमा सतएँ दिना अपने सगले कामन काहीं पूर कइके अराम किहिन †।”<sup>5</sup> अउर पबित्र सास्त्र माहीं इहव लिखा हय, कि “ऊँ पंचे हमरे अराम के जघा माहीं कबहूँ न जाए पइहँय।”<sup>6</sup> जिनहीं पहिले खुसी के खबर सुनाई गे रही हय, ऊँ पंचे परमातिमा के हुकुम काहीं न मानँइ के कारन, उनखे अराम के जघा माहीं नहीं जाए पाइन, पय उनखे ऊपर बिसुआस करँइ बाले मनइन के खातिर, अबहिनव उनखे अराम के जघा के दुआरा खुला हय।<sup>7</sup> एसे परमातिमा पुनि एकठे खास दिन काहीं निश्चित किहिन, अउर ओही नाम दिहिन “आज” अउर कुछ बरिस के बाद ऊँ पुनि राजा दाऊद के किताब माहीं इआ कहत हँ, कि

“अगर आज तू पंचे उनखर बोल सुना, त अपने मनन काहीं कठोर न करा।”

<sup>8</sup> अउर अगर यहोसू उनहीं पंचन काहीं अराम के जघा माहीं लइ जाए पउतेँ, त ओखे बाद दुसरे दिन के चरचय न होत।<sup>9</sup> एसे इआ जानिल्या, कि परमातिमा के ऊपर बिसुआस करँइ बाले मनइन के खातिर, अबहिनव पबित्र दिन के अराम बाँकी हय।<sup>10</sup> काहेकि अबे तक जे कोऊ परमातिमा के अराम के जघा माहीं ग हय, उआ परमातिमा कि नाई अपने सगले कामन काहीं पूर कइके अराम किहिस ही।<sup>11</sup> एसे हम पंचे उआ अराम के जघा माहीं जाँइ के खातिर पूर कोसिस करी, कहँव अइसा न होय, कि हमरे पंचन म से कोऊ, इजराइलिन कि नाई बन जाय, जउन परमातिमा के हुकुम काहीं न मानिके, अराम के जघा माहीं नहीं जाए पाइन तय।<sup>12</sup> काहेकि

† 4:4 उत्प 2:2

परमातिमा के बचन जिन्दा हय, सक्तिसाली हय, अउर सगली दुइ धार वाली तलबारन से खुब जादा चोख हय, अउर उआ प्रान, अउर आत्मा काहीं, अउर देह के सगली हड्डिन अउर माँस काहीं, अलग कइके आर-पार छेदत हय। अउर उआ बचन मनइन के मन के इच्छन, अउर सोच-बिचार के जाँच-परताल घलाय करत हय।<sup>13</sup> अउर संसार के कउनव चीज परमातिमा के नजर से छिपी नहीं आय, बलकिन ऊँ घलाय जउन हमरे पंचन के काम के हई, काहेकि संसार के सगली चीजँय, उनखे नजर माहीं खुली हई अउर देखाई देती हई।

### सगलेन से महान महायाजक

<sup>14</sup> एसे जब हमार पंचन के अइसन महान महायाजक हँ, जउन स्वरग माहीं परमातिमा के लघे गे हँय, ऊँ परमातिमा के लड़िका यीसु आहीं; त हम पंचे उनखे ऊपर जउन बिसुआस किहेन तय, ओही मजबूती के साथ थामँ रही।<sup>15</sup> काहेकि हमार पंचन के महायाजक अइसन नहीं आहीं, जउन हमरे पंचन के कमजोरिन माहीं, हमरे पंचन के साथ दुखी होइके मदत न कइ सकँय, काहेकि ऊँ सगली बातन माहीं हमरे पंचन कि नाई जाँचे-परखे गें, तऊ उनखे जीवन माहीं कउनव पाप नहीं मिला।<sup>16</sup> एसे आबा हम पंचे हिम्मत बाँधिके किरपा पामँइ के खातिर परमातिमा के सिंहासन के लघे चली, कि जउने हमरे पंचन के ऊपर उनखर दया होय, अउर उआ किरपा पाई, जउन जरूरत परे माहीं हमार पंचन के मदत करय।

**5** हरेक महायाजक मनइन म से लीन जात हय, अउर उआ परमातिमा से सम्बन्धित बातन माहीं, मनइन के अँगुआई करँइ के खातिर ठहराबा जात हय। जउने उआ भेंट अउर मनइन के पापन के माफी के खातिर बली चढ़ाबा करय।<sup>2</sup> अउर उआ, जउन मनई परमातिमा के मरजी काहीं नहीं जानँय, अउर उनहूँ के साथ जउन परमातिमा के गइल से भटकँगें हँय, नरमी से बेउहार कइ सकत हय, एसे कि उआ खुदय कमजोरिन से घिरा रहत हय।<sup>3</sup> अउर एहिन से ओही चाही कि जइसन दुसरे मनइन के खातिर पापबली चढ़ाबत हय, उहयमेर अपने खातिर घलाय पापबली † चढ़ाबा करय।<sup>4</sup> अउर मान-सम्मान के इआ पद, कोऊ अपने से नहीं लइ सकय, काहेकि हरेक महायाजक हारून कि नाई ‡ परमातिमय के तरफ से चुना जात हय।

<sup>5</sup> अउर उहयमेर मसीह घलाय उआ मान-सम्मान पामँइ बाला महायाजक के पद, खुदय नहीं लिहिन, बलकिन उआ पद उनहीं परमातिमय दिहिन हीं, जउन कहिन रहा हय, कि

“तू हमार लड़िका आह्या, अउर आजय हम तौहई पइदा किहेन हय †।”

<sup>6</sup> अउर ऊँ पबित्र सास्त्र माहीं दुसरेव जघा माहीं घलाय कहत हँ, कि “तू मलिकिसिदक कि रीति पर हमेसा के खातिर याजक आह्या †।”

<sup>7</sup> यीसु मनई के रूप माहीं जब धरती माहीं रहे हँय, त खुब चन्डे गोहराय-गोहरायके, अउर आँसू बहाय-बहाइके, परमातिमा से बिनती-प्राथना किहिन, जउन उनहीं मउत से बचाय सकत रहे हँय। अउर उनखे भक्ती अउर समरपन के कारन उनखर प्राथना सुनी गे।<sup>8</sup> अउर परमातिमा के लड़िका होए के बादव, ऊँ दुख उठाय-उठाइके उनखर हुकुम मानब सिखिन।<sup>9</sup> अउर सिद्ध बनिके, अपने सगले हुकुम मानँइ बालेन के खातिर, हमेसा के खातिर मुक्ती पामँइ के माध्यम बनिके।<sup>10</sup> अउर उनहीं परमातिमा के तरफ से, मलिकिसिदक कि रीति पर महायाजक के पद मिला हय।

### बिसुआस से भटक जाँइ के नतीजा

<sup>11</sup> एखे बारे माहीं हमहीं पंचन काहीं, तौहई खुब बातँय बतामँइ काहीं हय, पय उनहीं समझाउब बड़ा मुसकिल हय। काहेकि तौहार पंचन के सोचँय-समझँय के सक्ती कम ही।<sup>12</sup> बास्तव माही समय के हिंसाब से, अबे तक तौहई पंचन काहीं, दुसरे मनइन काहीं बचन के सिच्छा देंइ बाले बन जाँइ चाही। पय तू पंचे खुदय इआ चहते हया, कि “हमहीं पंचन काहीं कोऊ

†† 5:3 लैब्य 9:7 ‡ 5:4 निरग 28:1 †† 5:5 भज 2:7 †† 5:6 भज 110:4

परमातिमा के बचन के बारे माहीं, जउन सुरुआत माहीं सिखाबा ग रहा हय, उँइन बातन काहीं पुनि सिखाबय।" एसे कि तूँ पंचे छोट लड़िकन कि नाई बन गया हय, अउर अबे तक तौँहई पंचन काहीं अनाज के जघा माहीं दूधय चाही।<sup>13</sup> काहेकि दूध पिअँइ बाले लड़िका काहीं धारमिकता के बचन के पहिचान नहीं होय, काहेकि उआ लड़िका अबे छोट हय।<sup>14</sup> पय तूँ पंचे इआ जानिल्या, कि अनाज सयानन के खातिर आय, जिनहीं एतना अनुभव होत हय, कि नीक-नागा का आय, एखे बारे माहीं ऊँ पंचे निकहा से जानत हैं।

**6** एसे आबा हम पंचे मसीह के सिच्छा के सुरुआत के बातन से आँगे बढ़िके, परिपूर्ण बनँइ के खातिर आँगे बढ़त चली, अउर अपने बुरे कामन से मन फिराँइ, अउर परमातिमा के ऊपर बिसुआस कँय, <sup>2</sup> अउर बपतिस्मन, अउर हाँथ धरँइ, अउर मरे के बाद पुनि जिन्दा होंइ, अउर अन्तिम न्याय के सिच्छा रूपी नेव पुनि न डारी।<sup>3</sup> अउर अगर परमातिमा के मरजी होई, त हम पंचे बिसुआस माहीं परिपूर्ण बनँइ के खातिर आँगे बढ़त जाब।<sup>4</sup> काहेकि जेतने जन एक बेरकी जोति पाय चुके हँय, अउर स्वरग के बरदान के अनुभव कइ चुके हँय, अउर पबित्र आत्मा पाय चुके हँय, <sup>5</sup> अउर परमातिमा के उत्तम बचन के, अउर आमँइ बाले जुग के सक्ती के अनुभव कइ चुके हँय, <sup>6</sup> अगर ऊँ पंचे बिसुआस से भटक जाँय; त उनखे मनन काहीं बदलिके पुनि बिसुआस माहीं लइ आउब असम्भव हय; काहेकि ऊँ पंचे परमातिमा के लड़िका काहीं, अपने खातिर पुनि क्रूस के ऊपर चढ़ाबत हैं, अउर खुले आम उनखे ऊपर कलंक लगाबत हैं।<sup>7</sup> काहेकि जउन धरती बरसा के पानी से बेर-बेर सिंचरिके, अपने जोतँय बोमँइ बालेन के खातिर निकही फसल देत ही, उआ परमातिमा से आसीस पाबत ही।<sup>8</sup> पय अगर उआ धरती बरसा के पानी से बेर-बेर सिंचरे के बादव, जरबा अउर उटकटार जमाबत ही, त उआ निकम्मी अउर सापित होंइ बाली हय, अउर उआ अन्त माहीं जराय दीन जई।

<sup>9</sup> पय हे पियार साथिव, हम पंचे इआमेर कहित त जरूर हएन, तऊ तौँहरे बारे माहीं हम पंचे इनसे निकही, अउर मुक्ती देंइ बाली बातन माहीं भरोसा करित हएन।<sup>10</sup> काहेकि परमातिमा अन्यायी नहीं आहीं, कि तौँहरे काम, अउर उआ प्रेम काहीं बिसरि जाँय, जउन तूँ पंचे उनखे नाम के खातिर पबित्र मनइन के सेवा किहा हय, अउर अबे तक कइव रहे हया।<sup>11</sup> अउर हम पंचे खुब चाहित हएन, कि तौँहरे म से हरेक जन अपने जीवन भर इहइमेर कठिन मेहनत करत रहय। अउर अगर तूँ पंचे अइसय करत रइहा, त ओही जरूर पाय जइहा, जेखर तूँ पंचे आसा करते हया।<sup>12</sup> अउर हम पंचे इआ नहीं चाही, कि तूँ पंचे आलसी बना, बलकिन तूँ पंचे उनखे कि नाई जीवन बिताबा, जउन बिसुआस अउर धीरज के द्वारा परमातिमा के वादन के बारिसदार बन जात हैं।

### परमातिमा के कबहूँ न बदलँय बाला वादा

<sup>13</sup> जब परमातिमा अब्राहम से वादा किहिन तय, तब कसम खाँय के खातिर, उनहीं अपने से बड़ा कोऊ नहीं मिला, एसे ऊँ अपनय कसम खाइके कहिन, <sup>14</sup> कि "हम तौँहई निश्चित रूप से खुब आसीस देब, अउर तौँहरे सन्तान काहीं घलाय बढ़ाबत जाब।"<sup>15</sup> अउर इआमेर से अब्राहम धीरज धइके, परमातिमा के द्वारा कीन वादा के बात काहीं पाइन।<sup>16</sup> अउर मनई जब कउनव कसम खात हैं, त अपने से बड़े के कसम खात हैं। अउर अपने हरेक बिबादन के फँइसला काहीं, कसम के द्वारा पक्का करत हैं।<sup>17</sup> एसे परमातिमा, अपने वादा के बारे माहीं, ऊँ मनइन काहीं साफ-साफ बतामँइ चाहत रहे हँय, जउन उनखे वादा के बारिसदार रहे हँय। अउर ऊँ अपने इआ बात काहीं बतामँइ के खातिर, कि उनखर वादा कबहूँ नहीं बदल सकय, अपने अउर उनखे बीच माहीं कसम काहीं लइ आपँ।<sup>18</sup> अउर परमातिमा के कबहूँ न बदलँइ बाली ऊँ दुइठे बातँय, अरथात "कसम" अउर "वादा" के द्वारा हमहीं पंचन काहीं इआ पता चलत हय, कि "परमातिमा कबहूँ झूँठ साबित होइन नहीं सकँय।" एसे हमार पंचन के साहस अउर मजबूत होइ

† 6:14 उत्प 22:16,17

जात हय, अउर हम पंचे जउन उनखे सरन माहीं दउड़े चले आएन हँय, कि उआ आसा काहीं पाई, जउन आँगे धरी हय।<sup>19</sup> अउर जइसन लंगर पानी माहीं जिहाज काहीं स्थिर रक्खत हय, उहयमेर आसा घलाय हमरे पंचन के प्रान काहीं स्थिर रक्खत ही, अउर उहय हमहीं पंचन काहीं परदा के भीतर तक अरथात परमातिमा के लघे तक पहुँचाबत ही।<sup>20</sup> जहाँ यीसु मलिकिसिदक के रीति पर, हमेसा के खातिर महायाजक बनिके, हमरे पंचन के खातिर अँगुआ के रूप माहीं पहुँच चुके हँय।

### याजक मलिकिसिदक के बारे माहीं बखान

**7** ई मलिकिसिदक सालेम सहर के राजा, अउर परमप्रधान परमातिमा के याजक आहीं, जउन हमेसा याजक बने रइहँय; जब अब्राहम राजन काहीं हराइके लउटत रहे हँय, तब ईन उनसे गइल माहीं मिलें तय, अउर अब्राहम काहीं आसिरबाद दिहिन तय।<sup>2</sup> इनहिन काहीं अब्राहम अपने सगली चीजन के दसमा भाग घलाय दिहिन तय, अउर इनखे मलिकिसिदक नाम के मतलब हय "धरम के राजा"। अउर सालेम के मतलब हय "सान्ती के राजा।"<sup>3</sup> अउर इनखे महतारी-बाप के बारे माहीं पबित्र सास्त्र माहीं कउनव लेख नहीं मिलय, अउर न इनखर कउनव बंसाबली आय, अउर न इनखे जनम अउर मउत के बारे माहीं कउनव पता चलय; बलकिन ई परमातिमा के लड़िका कि नाई ठहरिके, हमेसा के खातिर याजक बने रइहँय।<sup>4</sup> अउर अब तूँ पंचे इआ बात माहीं ध्यान द्या, कि ऊँ केतना महान रहे हँय, जिनहीं सगले कुलन के मुखिया अब्राहम, अपने लूट के निकही से निकही चीजन के दसमा भाग दिहिन तय।<sup>5</sup> अउर मूसा के बिधान के मुताबिक लेबी के बंस के मनइन काहीं याजक के पद मिलत रहा हय, अउर उनहीं इआ हुकुम दीनगे रही हय, कि ऊँ अपने इजराइली भाइन से दसमा भाग लेंय, चाह ऊँ अब्राहम के बंस माहीं काहे न पइदा भे होंय।<sup>6</sup> पय मलिकिसिदक जउन लेबी के बंसाबली के न होंहीं, तऊ अब्राहम से दसमा भाग लिहिन तय, जिनहीं परमातिमा घलाय आसिरबाद देंइ के वादा किहिन तय, उनहीं आसिरबाद दिहिन, <sup>7</sup> अउर इआ बात माहीं कउनव सन्देह नहीं आय। काहेकि छोट हमेसा बड़े से आसिरबाद पाबत हय।<sup>8</sup> अउर इहाँ लेबी बंस के जउन मनई दसमा भाग लेत हैं, ऊँ त मर जइहँय, पय मलिकिसिदक के बारे माहीं, जउन हम पंचे बताइत हएन, ऊँ हमेसा जिन्दा रइहँय।<sup>9</sup> त पुनि हम पंचे इहव कहि सकित हएन, कि लेबी घलाय जउन दसमा भाग लेत हैं, अब्राहम के द्वारा मलिकिसिदक काहीं दसमा भाग दिहिन हीं।<sup>10</sup> काहेकि जउने समय मलिकिसिदक उनखे कुल पिता अब्राहम से मिलें तय, उआ समय लेबी अब्राहम के देंह माहीं रहे हँय, पय पइदा नहीं भे रहे आहीं।

### यीसु मलिकिसिदक कि नाई हैं

<sup>11</sup> अउर अगर लेबी के बंस के बनँइ बाले याजकन के द्वारा परिपूर्णता मिल जात, (काहेकि इनहिन के व्दारा मनइन काहीं मूसा के बिधान मिला रहा हय।) त फेर एखर कउनव जरूरत न परत, कि कउनव दूसर याजक हारून कि रीति पर नहीं, बलकिन मलिकिसिदक कि रीति पर याजक बनय।

<sup>12</sup> काहेकि जब याजक के पद बदला जात हय, त बिधान काहीं घलाय बदला जाब जरूरी हय।<sup>13</sup> काहेकि जउने याजक के बारे माहीं ई बातँय कीन जाय रही हँय, ऊँ लेबी के बंस के न होंहीं, बलकिन दुसरे कुल के आहीं, जउने माहीं आज तक कोऊ याजक बनिके बेदी माहीं बलिदान नहीं चढ़ाइन।<sup>14</sup> एसे इआ बात त साफ ही, कि हमार पंचन के प्रभू यीसु यहूदा के कुल माहीं पइदा भे हँय, अउर यहूदा के कुल के बारे माहीं याजक बनँइ के खातिर, मूसा नबी कउनव चरचा नहीं किहिन।

<sup>15</sup> अउर जउन कुछू हम पंचे कहेन हय, उआ अउर साफ होइ जात हय, जब मलिकिसिदक कि नाई एकठे अउर याजक बन जात हैं।<sup>16</sup> जउन अपने बंसाबली के नेम मुताबिक नहीं, बलकिन अबिनासी जीवन के सक्ती के मुताबिक याजक बने हँय।<sup>17</sup> अउर पबित्र सास्त्र माहीं इनखे बारे माहीं इआ गवाही दीनगे ही, कि



“तू मलिकिसिदक कि रीति पर हमेसा के खातिर याजक बने रहहा †।”

18 इआमेर से पहिल हुकुम कमजोर; अउर बेकार होंइ के कारन खतम होइगे। (काहेकि मूसा के बिधान कउनव मनई काहीं परिपूर्ण नहीं बनाइस।)

19 अउर ओखे जघा माहीं एकठे अइसन उत्तम आसा दीनगे ही, जेखे द्वारा हम पंचे परमातिमा के लघे पहुँच सकित हएन। 20 अउर इआ बात घलाय खास ही, कि परमातिमा, यीसु काहीं कसम के द्वारा याजक बनाइन रहा हय। 21 जबकि दुसरेन काहीं बिना कसम के याजक बनाबा ग रहा हय। पय यीसु काहीं कसम के द्वारा परमातिमा के तरफ से याजक बनाबा ग हय, अउर यीसु के बारे माहीं पबित्र सास्त्र माहीं घलाय इआ लिखा हय, कि “प्रभू कसम के द्वारा यीसु काहीं हमेसा के खातिर याजक बनाइन ही, अउर इआ बात से ऊँ कबहूँ न पचितइहँय †।”

22 काहेकि इआ कसम के कारन यीसु एकठे उत्तम करार के जमानतदार बनिगें।

23 पुरान समय से खुब याजक बनत चले आए हँय, पय ऊँ पंचे अपने पद माहीं स्थिर नहीं रहे पाइन, काहेकि ऊँ पंचे मर जात रहे हँय। 24 पय यीसु हमेसा जिन्दा रहँय; इआ कारन से उनखर याजक पद हमेसा बना रही। 25 एसे जेतने जन यीसु के द्वारा परमातिमा के लघे आबत हँ, यीसु उन्हीं पूर-पूर मुक्ती दइ सकत हँ, काहेकि ऊँ बिचबई बनिके उनखे खातिर बिनती करँइ के खातिर हमेसा जिन्दा हँ। 26 अउर हमहीं पंचन काहीं इहइमेर के महायाजक के जरूरत रही हय, जउन पबित्र, निस्कपट, सुद्ध, अउर बिना पाप के, अउर स्वरग से घलाय ऊँच कीन गे होंय। 27 अउर पहिले के महायाजकन कि नाई, उन्हीं एखर जरूरत नहीं रही, कि ऊँ रोज पहिले अपने पापन के माफी के खातिर, अउर बाद माहीं दुसरे मनइन के पापन के माफी के खातिर बलिदान चढ़ामँइ; काहेकि ऊँ खुद काहीं बलिदान चढ़ाइके, ओही एक बेरकिन माहीं पूर कइ दिहिन हीं। 28 काहेकि मूसा के बिधान त कमजोर मनइन काहीं महायाजक बनाबत हय, पय मूसा के उआ बिधान के बाद, परमातिमा कसम खाइके अपने लड़िका काहीं महायाजक बनाइन हीं। अउर उँइन लड़िका काहीं हमेसा के खातिर परिपूर्ण बनाइन हीं।

### नई करार के महायाजक

8 अब जउन बातँय हम पंचे बताय रहेन हय, उनमा से सगलेन से खास बात त इआ हय, कि हमार पंचन के अइसन महायाजक हँ, जउन स्वरग माहीं सबसे महान परमातिमा के सिंहासन के दहिने कइती जाइके बइठिगें हँय। 2 अउर ऊँ पबित्र जघा, अउर उआ सच्चे तम्बू के सेबक बनिगे हँय, जउने काहीं कउनव मनई नहीं, बलकिन परमातिमा बनाइन हीं। 3 काहेकि हरेक महायाजक भेंट अउर बलिदान चढ़ामँइ के खातिर बनाबा जात हय। इआ कारन से इआ जरूरी हय, कि इऊँ महायाजक के लघे भेंट चढ़ामँइ के खातिर कुछ होंइ चाही। 4 अउर अगर यीसु धरती माहीं होतें, त कबहूँ याजक न बने पउतें, काहेकि मूसा के बिधान के मुताबिक, भेंट चढ़ामँइ बाले लेबी बंस के मनई रहे हँय। 5 जउन स्वरग के चीजन के साछात तसबीर अउर परछाई के सेबा करत हँ। अउर जइसन मूसा नबी जब तम्बू बनामँइ बाले रहे हँय, त उन्हीं परमातिमा इआ चेतउनी दिहिन तय, कि “देखा, जउन नमूना हम तौहई पहार के ऊपर देखायन हय, ओहिन के मुताबिक सब कुछ बनाया †।” 6 पय जउन सेबा के काम मसीह यीसु काहीं मिला हय, उआ पहिले के महायाजकन के सेबा के काम से बढ़िके हय, काहेकि यीसु जउने नई करार के बिचबई बने हँय, उआ पुरान करार से उत्तम ही, काहेकि उआ उत्तम चीजन के करार के ऊपर आधारित ही। 7 काहेकि अगर उआ पहिल करार निरदोस होत, त दुसरे करार के खातिर मोका न ढूँढा जात।

8 पय परमातिमा उनखे ऊपर दोस पाइन, एसे ऊँ इआ कहत हँ, कि “देखा, ऊँ दिन आमँइ बाले हँ, कि जब हम इजराइल के घराना के साथ, अउर यहूदा के घराना के साथ नई करार लागू करब।”

9 इआ नई करार उआ पुरान करार कि नाई न होई, जउन हम उनखे बाप-दादन के साथ उआ समय बाँधेन तय, जब हम उन्हीं मिस्र देस से उनखर हाँथ पकड़िके निकार लायन तय, काहेकि ऊँ पंचे हमरे करार के मुताबिक नहीं चलें, एसे हम उनखर कउनव देख-रेख नहीं किहेन।

10 अउर परमातिमा पुनि इआ बात कहत हँ, कि “जउन करार हम उन दिनन के बाद इजराइल के घराना के साथ बाँधब, उआ इआ होई, कि हम अपने बिधान काहीं उनखे मनन माहीं डारब, अउर उनखे हिरदँय माहीं लिखब, अउर हम उनखर परमातिमा कहाउब, अउर ऊँ हमार सन्तान कहइहँय।

11 अउर ओखे बाद उनमा से कोऊ अपने परोसिअन काहीं, अउर अपने भाई-बन्धुअन काहीं इआ सिच्छा न देई, कि प्रभू काहीं पहिचाना, काहेकि छोट से लइके बड़न तक सगले जन हमहीं जान लेइहँय।

12 काहेकि हम उनखे अधरमन काहीं माफ करब, अउर हम उनखे पापन काहीं हमेसा के खातिर बिसराय देब।”

13 एसे नई करार लागू होंइ के कारन परमातिमा, पहिल करार काहीं पुरान साबित कइ दिहिन हीं; काहेकि जउन चीज पुरान होइके कउनव काम के नहीं रहि जाय, त उआ जरूर नास होइ जात ही।

### धरती के तम्बू माहीं अराधना

9 उआ पहिल करार माहीं घलाय अराधना के नेम रहे हँय, अउर अइसन पबित्र जघा जउन इआ संसार माहीं रही हय। 2 काहेकि इआ धरती माहीं एकठे तम्बू बनाबा ग रहा हय, जउने के पहिल भाग माहीं दिया धरँय के स्टेन्ड, अउर मेज, अउर भेंट के रोटी रही हँय, अउर उआ भाग पबित्र जघा कहाबत रही हय। 3 अउर दुसरे परदा के पीछे तम्बू के उआ भाग रहा हय, जउन महापबित्र जघा कहाबत रही हय। 4 अउर उआ महापबित्र जघा माहीं धूप जलामँइ बाली सोने के बेदी, अउर चारिव कइती से सोने से मढ़ी करार के सन्दूख रही हय, अउर ओखे भीतर मन्ना से भरा सोने के एकठे बरतन, अउर हारून के लाठी जउने माहीं पत्ती फुटुकि आई तय, अउर करार के पटिया घलाय रही हँय। 5 अउर उआ सन्दूख के ऊपर दुइठे तेजोमँय करूब † रहे हँय, जउन पस्चाताप के देवकन काहीं अपने पखनन से मूँदे रहे हँय, इनखे बारे माहीं एक-एक कइके बखान करँइ के मोका अबे नहिं आय।

6 अउर जब ऊँ सगली चीजँय ब्यबस्थित रूप से तइआर होइ गई, तब याजक तम्बू के पहिल भाग माहीं जाइके सेबा के काम करँइ लागें। काहेकि याजक उहाँ हर समय सेबा के काम करँय जाइ सकत रहे हँय। 7 पय तम्बू के दुसरे भाग माहीं अरथात महापबित्र जघा माहीं, केबल महायाजक साल भरे माहीं एक बेरकिन जात रहे हँय। पय ऊँ बिना जानबरन के खून लए नहीं जात रहे आँय। जउने काहीं ऊँ अपने, अउर दुसरे मनइन के भूल चूक के खातिर बलिदान चढ़ाबत रहे हँय। 8 एसे पबित्र आत्मा इहय बतामँइ चाहत हँ, कि जब तक इआ पहिल तम्बू ठाढ़ हय, तब तक महापबित्र जघा माहीं जाँइ के खातिर, गइल देखाई नहीं दइ रही आय। 9 अउर इआ तम्बू बर्तमान समय के खातिर एकठे उदाहरन आय; जउने माहीं अइसन भेंट अउर बलिदान चढ़ाए जात हँ, जउनेन से परमातिमा के अराधना करँइ बाले मनइन के बिबेक परिपूर्ण नहीं होइ सकय। 10 काहेकि ऊँ भेंट अउर बलिदानन माहीं, खॉय-पिअँइ के चीजँय, अउर अनेकव प्रकार के नहाय-धोमँय के बिधी-बिधान होत रहे हँय, जउन केबल देहन काहीं सुद्ध करँइ के नेम आहीं। अउर जउन नए बिधान के समय तक के खातिर लागू कीन गे रहे हँय।

### मसीह के खून के सक्ती

11 पय जब मसीह आमँइ बाली निकही-निकही चीजन के महायाजक बनिके आएँ, त ऊँ अउर महान अउर परिपूर्ण तम्बू से होइके आएँ हँय, जउन मनइन के हाँथ के बनाबा न होय, अरथात उआ तम्बू इआ संसार के न होय।

† 7:17 भज 110:4 †† 7:21 भज 110:4 ‡ 8:5 निरग 25:40

‡† करूब- परमातिमा के खास दूत आहीं

12 अउर ऊँ बोकनरन अउर बछबन के खून काहीं लइके नहीं, बलकिन एक बेरकिन माहीं हमेसा के खातिर भेंट के रूप माहीं अपनेन खून काहीं लइके महापबित्र जघा माहीं चलेगें, अउर हमरे पंचन के खातिर पापन से मुक्ती पाउब निश्चित कइ दिहिन ही।<sup>13</sup> काहेकि जब बोकनरन अउर बरधन के खून, अउर कलोरी बछिया के राख, अपबित्र मनइन के ऊपर छिड़के जात हैं, त ऊँ उनखे देह के बाहिरी रूप काहीं सुद्ध कइके पबित्र करत हैं।<sup>14</sup> त मसीह जउन खुद काहीं सनातन आत्मा के द्वारा, परमातिमा के आँगे निरदोस बली के रूप माहीं चढ़ाइन हीं, त ऊँ अपने खून के द्वारा तोंहरे पंचन के सोच-बिचारन काहीं, मउत कइती लइ जाँइ बाले बुरे कामन से जरूर सुद्ध करिहँय, जउने तूँ पंचे जिन्दा परमातिमा के सेबा कइ सका।

<sup>15</sup> अउर इहय कारन से यीसु नई करार के बिचबई भे हँय, जउने उनखे मउत के द्वारा, जउन पहिल करार के समय के अपराध रहे हँय, उनसे छुटकारा मिलय, अउर परमातिमा के चुने मनई, करार के मुताबिक हमेसा के खातिर बारिसदार बन जाँय।<sup>16</sup> काहेकि जहाँ तक बसीअत नामा के सबाल हय, त ओखे खातिर जे कोऊ ओही लिखत हय, ओखे मउत के सबूत देखाउब जरूरी होत हय।<sup>17</sup> काहेकि कउनव बसीयतनामा, तबहिन काम करत हय, जब ओही लिखँइ बाला मर जात हय। जब तक ओही लिखँइ बाला जिन्दा रहत हय, त उआ कउनव काम के नहीं होय।<sup>18</sup> एहिन से पहिल करार खून † के द्वारा कीन गे रही हय।<sup>19</sup> काहेकि जब मूसा नबी सगले इजराइली लोगन काहीं, बिधान के सगले हुकुम सुनाय चुकें। तब ऊँ बछबन अउर बोकनरन के खून लइके, पानी अउर लाल ऊन, अउर जूफा नाम के बिरबा के डेरइआ के साथ, बिधान के किताब के ऊपर छिड़किन, अउर ओखे बाद सगले मनइन के ऊपर घलाय छिड़िक दिहिन।<sup>20</sup> अउर कहिन, कि “इआ, उआ करार के खून आय, जेखर हुकुम परमातिमा तोंहरे पंचन के खातिर दिहिन हीं।”<sup>21</sup> अउर इहडमेर से ऊँ, तम्बू अउर सेबा के काम माहीं आमँइ बाले, सगली चीजन के ऊपर घलाय खून छिड़िक दिहिन।<sup>22</sup> अउर इआ बात बेलकुल सही ही, कि बिधान के मुताबिक हमेसा, सगली चीजँय खून के द्वारा सुद्ध कीन जाती हई; अउर बिना खून बहाए पापन के माफी नहीं मिलय।

### मसीह के बलिदान के द्वारा पापन के माफी

<sup>23</sup> एसे इआ जरूरी हय, कि स्वरग के चीजन के साछात तसबीर के रूप माहीं बनी सगली चीजँय, ईन बलिदानन के द्वारा सुद्ध कीन जाँय, काहेकि स्वरग के सगली चीजँय खुदय इनसे उत्तम बलिदानन के द्वारा सुद्ध कीन जाती हँय।<sup>24</sup> काहेकि मसीह, हाँथ के बनाए उआ महापबित्र जघा माहीं नहीं गें, जउन सच्चे महापबित्र जघा के नमूना के मुताबिक बनाई गे रही हय। बलकिन सीधे स्वरग माहीं चलेगें। जउने हमरे पंचन के खातिर स्वरग माहीं परमातिमा के आँगे हमेसा देखाई देय।<sup>25</sup> अउर अब उनहीं खुद काहीं बेर-बेर बली चढ़ामँइ के जरूरत नहीं आय, जइसन महायाजक हर साल खुद के खून नहीं, बलकिन बली के खून लइके, महापबित्र जघा माहीं जात रहे हँय।<sup>26</sup> नहीं त उनहीं संसार के सुरुआत से लइके अबे तक बेर-बेर दुख उठामँइ परत, पय अब जुग के आखिरी समय माहीं, ऊँ एक बेरकिन आएँ हँय, कि जउने अपने बलिदान के द्वारा पाप काहीं दूर कइ देय।<sup>27</sup> अउर जइसन मनइन के खातिर एक बेरकी मरब, अउर ओखे बाद न्याय के होब निश्चित हय।<sup>28</sup> उहयमेर मसीह घलाय, सगले मनइन के पापन काहीं उठामँइ के खातिर एक बेरकिन बलिदान भें। अउर जउन मनई उनखे दुसराय आमँइ के इन्तजार कइ रहे हँय, ऊँ उनखे पापन काहीं उठामँइ के खातिर नहीं, बलकिन उनहीं मुक्ती देई के खातिर दुसराय अइहँय।

### परिपूर्ण बलिदान

**10** मूसा के बिधान त आमँइ बाली निकही चीजन के केबल साछात तसबीर देखाबत हय, पय उनखर असली रूप नहीं देखाबय, एसे

† 9:18 उत्प 15:9-11,17,18

कि ऊँ एकयमेर के बलिदान जउन हर साल बिना चूके चढ़ाए जात हैं, अराधना के खातिर आमँइ बालेन काहीं कबहूँ परिपूर्ण नहीं बनाय सकँय।<sup>2</sup> नहीं त उनखर चढ़ाउब बन्द होइ जात। एसे अगर अराधना करँइ बाले एक बेरकिन के बलिदान के द्वारा सुद्ध होइ जातें, त पुनि उनखर बिबेक उनहीं पंचन काहीं पापी न ठहराबत।<sup>3</sup> पय ऊँ बलियन के द्वारा हरेक साल पापन काहीं सुधि कीन जात रहा हय।<sup>4</sup> काहेकि बरधन अउर बोकनरन के खून के द्वारा पापन काहीं दूर करब असम्भव हय।

<sup>5</sup> इहय कारन से मसीह संसार माहीं आमँइ के समय इआ बात कहत हैं, कि “भेंट अउर बलिदान अपना नहीं चाही, एहिन से हमरे खातिर एकठे देह तइआर किहेन हय।

<sup>6</sup> होमबलिअन अउर पाप-बलिअन से अपना खुसी नहीं भएन।

<sup>7</sup> तब हम कहेन, कि ‘देखी, हम आय गएन हय, (अउर पबित्र सास्त्र माहीं घलाय हमरे बारे माहीं इआ लिखा हय।) जउने हे परमातिमा हम अपना के मरजी पूर करी’ †।”

<sup>8</sup> अउर पहिले त ऊँ इआ कहत हैं, कि “न त अपना भेंट अउर बलिदान चाही, अउर न त होमबलिअन अउर पाप-बलियन काहीं चाही, अउर न त उनसे खुसिन होई।” जबकि ई बलिदान त मूसा के बिधान के मुताबिक चढ़ाए जात हैं।<sup>9</sup> एखे बाद ऊँ इहव कहत हैं, कि “देखी, हम आय गएन हय, जउने अपना के मरजी पूर करी।” एसे ऊँ पहिल बिधान काहीं हटाय देत हैं, जउने दुसरे काहीं लागू करँय।<sup>10</sup> एसे परमातिमा के मरजिन से यीसु मसीह के देह काहीं, एक बेरकिन बलिदान के रूप माहीं चढ़ाए जाँइ के द्वारा, हम पंचे पबित्र कीन गएन हय।

<sup>11</sup> अउर हरेक याजक त तम्बू माहीं, ठाढ़ेन-ठाढ़े रोज सेबा के काम करत हय, अउर एकयमेर के बलिदान काहीं बेर-बेर चढ़ाबत हय, जउन पापन काहीं कबहूँ दूर नहीं कइ सकँय।<sup>12</sup> पय याजक के रूप माहीं मसीह त पापन के बदले माहीं, एकयठे बलिदान हमेसा के खातिर चढ़ाइके, परमातिमा के दहिने कइती जाइके बइठिगें।<sup>13</sup> अउर उहय समय से इआ इन्तजार कइ रहे हँय, कि उनखर बइरी उनखे गोडेन के नीचे धरँय बाली चउकी बनय †।<sup>14</sup> काहेकि मसीह एकयठे बलिदान के द्वारा, उनहीं जउन पबित्र कीन जात हैं, हमेसा के खातिर परिपूर्ण कइ दिहिन हीं।<sup>15</sup> अउर पबित्र आत्मा घलाय इहय गबाही देत हैं; काहेकि परमातिमा पहिले कहिन तय, कि

<sup>16</sup> “जउन करार हम उन दिनन के बाद, उनसे बाँधब, उआ, इआ होई, कि हम अपने बिधान काहीं, उनखे हिरदँय माहीं लिखब, अउर उनखे मन माहीं डारब †।”

<sup>17</sup> ओखे बाद ऊँ पुनि कहत हैं, कि “हम उनखे पापन काहीं अउर उनखे अधरम के कामन काहीं पुनि कबहूँ सुध न करब †।”

<sup>18</sup> अउर जब उनखर पाप माफ कइ दीनगें हँय, त पापन के माफी के खातिर पुनि बलिदान के जरूरत नहीं रहिगे।

### परमातिमा के लघे आउब

<sup>19</sup> एसे हे भाई-बहिनिव, जब हमहीं पंचन काहीं यीसु के खून के द्वारा, नई अउर सच्ची गइल से महापबित्र जघा माहीं जाँइ के खातिर, साहस मिलिगा हय।<sup>20</sup> अउर उआ नई अउर सच्ची गइल काहीं, यीसु उआ परदा के अरथात अपने देह के बलिदान के द्वारा, हमरे पंचन के खातिर हमेसा के खातिर खोल दिहिन हीं।<sup>21</sup> काहेकि हमरे पंचन के लघे अइसन महान याजक हैं, जउन परमातिमा के घर के अधिकारी आहीं।<sup>22</sup> एसे आबा; हम पंचे सच्चे मन से, अउर पूरे बिसुआस के साथ, अउर अपने बिबेक के दोस काहीं दूर करँइ के खातिर, अपने हिरदँय माहीं मसीह के खून काहीं छिड़िकबाइके, अउर देह काहीं सुद्ध पानी से धोबाइके परमातिमा के लघे चली।<sup>23</sup> अउर आबा, हम पंचे जउने आसा काहीं सोइकार किहेन हय, ओहिन माहीं मजबूती के साथ बने रही; काहेकि जे वादा किहेन हीं, ऊँ बिसुआस के

† 10:7 भज 40:6-8 † 10:13 भज 110:1 † 10:16 यिर्म 31:33 † 10:17 यिर्म 31:34

काबिल हैं।<sup>24</sup> ऐसे आबा, प्रेम करँड के खातिर, अउर भलाई के कामन काहीं करँड के खातिर, एक दुसरे काहीं उत्साहित करी।<sup>25</sup> अउर हम पंचे अराधना माहीं जाब न छोड़ी, अउर उनखे कि नाई न बनी, जउन ई बातन काहीं छोड़ि दिहिन हीं; बलकिन एक दुसरे काहीं समझाबत रही, अउर जइसय- जइसय प्रभू के दुसराय आमँड के दिन लघे आय रहा हय, त हम पंचे ई कामन काहीं अउर जादा करी।

### बिसुआस से भटक जाँड के परिनाम

<sup>26</sup> काहेकि सच्चाई काहीं जाने के बादव, अगर हम पंचे जान बूझिके पाप करित हएन, त पापन के माफी के खातिर, पुनि कउनव बलिदान बाँकी नहिं आय।<sup>27</sup> बलकिन परमातिमा के आमँड बाली भयानक सजा के इन्तजार करब, अउर उनखे क्रोध रूपी आगी के ज्वाला बाँकी हय, जउन उनखे बिरोधिन काहीं भसम कइ देई †।<sup>28</sup> अउर इआ बताबा, जब मूसा के बिधान के पालन न करँड बाला दुइ, इआ कि तीन जनेन के गबाही के द्वारा, बिना दया किहे मारि डारा जात हय †।<sup>29</sup> त तूँ पंचे इआ जानिल्या, कि ओही बहुत भारी सजा मिली, जउन परमातिमा के लड़िका के अपमान करत हय, अउर करार के खून काहीं अपबित्र ठहराबत हय, जउने से उआ पबित्र कीन ग रहा हय। अउर उआ किरपा करँड बाली पबित्र आत्मा के घलाय अपमान करत हय।<sup>30</sup> काहेकि हम पंचे परमातिमा काहीं जानित हएन, अउर उँडन इआ कहिन हीं, कि “बदला लेब हमार काम आय, अउर हमहिन बदला लेब”, अउर पुनि इहव कहत हैं, कि “प्रभू अपने लोगन के न्याय करिहँय †।”<sup>31</sup> अउर जिन्दा परमातिमा के हाँथे से सजा पाउब बड़ी भयानक बात आय।

### बिसुआस माहीं बने रहब

<sup>32</sup> पय तूँ पंचे उँ दिनन काहीं सुधि करा, जब तूँ पंचे मसीह के ऊपर बिसुआस किहा तय, अउर दुख- बिपत्तिन माहीं घलाय बिसुआस माहीं मजबूती के साथ अटल रहे हया।<sup>33</sup> अउर कबहूँ-कबहूँ तूँ पंचे अपमान अउर दुख के समय तमासव बने हया, अउर कबहूँ-कबहूँ त जउने मनइन के दुरदसा कीन जात रही हय, उनखर मदत घलाय किहा हय।<sup>34</sup> काहेकि तूँ पंचे जेल माहीं परे मनइन के दुखन माहीं भागीदार बने हया, अउर अपने धन-सम्पत्ती काहीं खुसी के साथ, इआ जानिके लुट जाँड दिहा हय। कि हमरे पंचन के लघे ओहू से उत्तम अउर कबहूँ न खतम होँड बाली धन-सम्पत्ती ही।<sup>35</sup> ऐसे तूँ पंचे हिम्मत न हारा, बिसुआस माहीं बने रहा, काहेकि तौहई पंचन काहीं एखर भरपूर प्रतिफल मिली।<sup>36</sup> काहेकि तौहई पंचन काहीं धीरज धरब खुब जरूरी हय, जउने तूँ पंचे परमातिमा के मरजी काहीं पूर कइके, उनखे द्वारा कीन वादा के प्रतिफल पाबा।

<sup>37</sup> “काहेकि अब थोरिन समय बचा हय, अउर आमँड बाले हरबिन अइहँय, उँ देर न करिहँय।

<sup>38</sup> पय परमातिमा के नजर माहीं निरदोस मनई बिसुआस के कारन जिअत रही, अउर अगर उआ बिसुआस से भटक जई, त हमार मन ओसे खुसी न रही †।”

<sup>39</sup> पय हम पंचे बिसुआस से पीछे हटँय बाले न होँहेन, कि भटकिके नास होइ जई, बलकिन हम पंचे बिसुआस करँड बाले आहेन, कि जउने अपने-अपने प्रान काहीं नास होँड से बचाई।

### बिसुआस के उदाहरन

**11** बिसुआस के मतलब हय, जउने चीजन के हम पंचे आसा करित हएन, उँ जरूर हई, अउर जउने चीजन काहीं हम पंचे नहीं देखे आहेन, उँ हई, बिसुआस उनखर पक्का सबूत देत हय।<sup>2</sup> काहेकि इहय बिसुआस के बारे माहीं, परमातिमा, बाप-दादन के बारे माहीं निकही गबाही दिहिन हीं।<sup>3</sup> हम पंचे परमातिमा के ऊपर बिसुआस करित हएन, एहिन से

इआ बात काहीं जाने पाएन हय, कि परमातिमा अपने बचन के द्वारा संसार काहीं बनाइन हीं †। पय जउन कुछ हम पंचे देखित हएन, उनहीं परमातिमा देखौँड बाली चीजन से नहीं बनाइन आय।

<sup>4</sup> हाबिल काहीं परमातिमा के ऊपर पूर बिसुआस रहा हय, एहिन से उँ परमातिमा के खातिर अपने भाई कैन से उत्तम बलिदान चढ़ाइन। अउर बिसुआस के कारन उनखे बारे माहीं, परमातिमा के नजर माहीं निरदोस होँड के गबाही दीनगे ही। काहेकि परमातिमा घलाय उनखे भेंट के बारे माहीं गबाही दिहिन हीं, अउर मरे के बादव, हाबिल उहय बिसुआस के द्वारा हमसे पंचन से अबय तक बातँय करत हैं †।<sup>5</sup> अउर हनोक काहीं परमातिमा के ऊपर पूर बिसुआस रहा हय, एहिन से उँ धरती से जिन्दय उठाय लीन गें तय, जउने उँ न मरँय, अउर ओखे बाद उँ पुनि धरती माहीं देखाई नहीं दिहिन। काहेकि परमातिमा उनहीं स्वरग माहीं उठाय लिहिन रहा हय, अउर जब तक उँ उठाए नहीं गे रहे आहीं, त उनखे बारे माहीं इआ गबाही दीनगे रही हय, कि उँ परमातिमा काहीं खुसी किहिन †।<sup>6</sup> अउर बिसुआस के बिना परमातिमा काहीं खुसी करब असम्भव हय, काहेकि परमातिमा के लघे आमँड बाले काहीं, इआ बिसुआस होँड चाही, कि बास्तव माहीं परमातिमा हैं; अउर अपने खोजँड बालेन काहीं ओखर प्रतिफल जरूर देत हैं।<sup>7</sup> अउर नूह काहीं परमातिमा के ऊपर पूर बिसुआस रहा हय, एहिन से उँ उन बातन के बारे माहीं बिसुआस किहिन, जउन उआ समय देखाई नहीं देत रही आहीं, अउर परमातिमा से चेतउनी पाइके, भक्ती के साथ अपने परिवार काहीं बचामँड के खातिर जिहाज बनाइन, अउर उआ बिसुआस के द्वारा संसार के मनइन काहीं दोसी ठहराइन, अउर उआ धारमिकता के श्बारिसदार बनिगें, जउन बिसुआस से मिलत ही।

<sup>8</sup> अउर अब्राहम काहीं परमातिमा के ऊपर पूर बिसुआस रहा हय, एहिन से जब परमातिमा उनहीं कहिन, कि इआ देस से निकरिके चले जा, जहाँ हम तौहई बताउब, त उँ परमातिमा के हुकुम काहीं मानिके, उआ जघा काहीं चल दिहिन, जउने काहीं उँ बारिसदारी माहीं पामँड बाले रहे हँय, पय इआ नहीं जानत रहे आहीं, कि कउने कइती जाँड क हय। तऊ अपने देस से निकरिके चलेगें †।<sup>9</sup> अउर उनहीं परमातिमा के ऊपर पूर बिसुआस रहा हय, एहिन से परमातिमा द्वारा देँड बाले वादा के देस माहीं, परदेसी कि नाई रहिके, अपने लड़िका-नाती अरथात इसहाक अउर याकूब † के साथ, जउन उनखे साथ वादा के बारिसदार रहे हँय, तम्बू बनाइके उहाँ निबास किहिन।<sup>10</sup> काहेकि अब्राहम उआ स्थाई नेव बाले सहर के इन्तजार करत रहे हँय, जउने के रचना करँड बाले अउर बनामँड बाले परमातिमा आहीं।

<sup>11</sup> अउर सारा काहीं परमातिमा के ऊपर पूर बिसुआस रहा हय, एहिन से उँ भले बाँझ रही हँय, तऊ लड़कहाई होँड के सक्ती पाइन; काहेकि परमातिमा उनसे जउन वादा किहिन तय, कि उनखे जरूर लड़िका होई, इआ बात काहीं उँ सही मानिके पूर बिसुआस किहिन तय †।<sup>12</sup> अउर बिसुआस के कारन एक जने से अरथात अब्राहम से जउन बेलकुल बुढ़ाईगें तय, तऊ उनसे अकास के तरइअन अउर समुंद्र के किनारे के, बारू कि नाई अनगिनत बंस पइदा भें †।<sup>13</sup> उँ पंचे वादा के चीजन काहीं भले नहीं पाइन, तऊ बिसुआस माहीं बने रहिगें, अउर मरँय से पहिले वादा के चीजन काहीं दूरिन से देखिके खुब खुसी भें, अउर इआ मान लिहिन तय, कि हम पंचे इआ धरती माहीं परदेसी अउर बाहिरी मनइन कि नाई हएन, अउर ओखे बाद परमातिमा के ऊपर बिसुआस करत उँ पंचे मरिगें।<sup>14</sup> अउर जे कोऊ इआमेर बातँय करत हैं, उँ पंचे इआ बतामँड चाहत हैं, कि हम पंचे अपने देस के खोज माहीं लगे हएन।<sup>15</sup> अउर अगर उँ पंचे अपने देस के सुधि करतें, जहाँ से उँ पंचे निकरिके आए रहे हँय, त उनहीं उहाँ लउटि जाँड के मोका रहत, पय उँ पंचे ओखर सुधय नहीं किहिन।<sup>16</sup> बलकिन उँ पंचे एकठे उत्तम देस, अरथात स्वरग के देस काहीं पामँड चाहत रहे हँय, एहिन

† 11:3 उत्प 1:1 †† 11:4 उत्प 4:3-10 ††† 11:5 उत्प 5:21,24 § 11:7 उत्प 6:13-22 §† 11:8 उत्प 12:1-5 §†† 11:9 उत्प 35:27 §† 11:11 उत्प 18:11-14; 21:2; 15:5 §†† 11:12 उत्प 15:5; 22:7; 32:12 §† 11:13 उत्प 23:4

† 10:27 यसा 26:11; सप 1:18 †† 10:28 ब्यब 17:6 † 10:30 ब्यब 32:35 †† 10:38 हब 2:3-4

से परमातिमा, उनखर परमातिमा कहाँमँई माहीं नहीं लजाँय। काहेकि परमातिमा उनखे खातिर स्वरग माहीं एकठे सहर तइआर किहिन हीं।  
 17 अउर अब्राहम काहीं परमातिमा के ऊपर पूर बिसुआस रहा हय, एहिन से अपने परिच्छा होइ के समय इसहाक काहीं बलिदान के रूप माहीं चढ़ाइन, अउर ऊँ परमातिमा के वादा काहीं सही मानिन तय †, 18 जउन उनसे इआ कहिन तय, कि “इसहाक से तौहार बंस चली।” अउर अब्राहम अपने एकलउता लड़िका काहीं बली के रूप माहीं चढ़ामँई लागें तय ††। 19 काहेकि अब्राहम इआ मान लिहिन तय, कि परमातिमा सामरथी हैं, जउन इसहाक काहीं मरे के बादव जिन्दा कइ देइहँय, एहिन से उदाहरन के रूप माहीं इसहाक उनहीं पुनि जिन्दा मिलिगें। 20 अउर इसहाक काहीं परमातिमा के ऊपर पूर बिसुआस रहा हय, एहिन से ऊँ अपने दोनव लड़िकन काहीं, अरथात याकूब अउर एसाव काहीं, भबिस्य माहीं आमँई बाली बातन के बारे माहीं आसिरबाद दिहिन †। 21 अउर याकूब काहीं परमातिमा के ऊपर पूर बिसुआस रहा हय, एहिन से ऊँ मरत समय अपने दोनव नतिअन काहीं, अरथात यूसुफ के दोनव लड़िकन काहीं आसिरबाद दिहिन, अउर लाठी के सहारे उठिके परमातिमा के अराधना किहिन ††। 22 अउर यूसुफ काहीं परमातिमा के ऊपर पूर बिसुआस रहा हय, एहिन से ऊँ मरत समय, इजराइल के सन्तान काहीं, मिस्र देस से निकर जाँइ के बारे माहीं चरचा किहिन, अउर इहव हुकुम दिहिन तय, कि जब तूँ पंचे जया, त हमरे हड़िन काहीं इहाँ से लए जया ††।

23 अउर मूसा के महतारी-बाप काहीं, परमातिमा के ऊपर पूर बिसुआस रहा हय, एहिन से, जब मूसा पइदा भें, त ऊँ पंचे देखिन, कि लड़िका खुब सुन्दर हय; त ओही तीन महीना तक मिस्र के राजा से लुकाए रहिगें, अउर राजा के हुकुम से नहीं डेरानें †††। 24 अउर मूसा काहीं, परमातिमा के ऊपर पूर बिसुआस रहा हय, एहिन से जब ऊँ बड़े भें, त मिस्र के राजा फिरौन के बिटिया के लड़िका कहाँमँई से इनकार कइ दिहिन †††। 25 एसे कि ऊँ पाप माहीं थोरे दिन सुख भोगँइ से, परमातिमा के चुने लोगन के साथ दुख भोगब जादा नीक समझिन। 26 अउर मूसा मसीह के खातिर अपमान सहब मिस्र देस के भन्दार से जादा कीमती धन समझिन, काहेकि उनखर नजर परमातिमा से प्रतिफल पामँई माहीं लगी रही हय। 27 अउर मूसा काहीं परमातिमा के ऊपर पूर बिसुआस रहा हय, एहिन से ऊँ मिस्र के राजा के क्रोध से नहीं डेरानें, अउर मिस्र देस काहीं छोंड़िके चलेगें, अउर अइसन जान परत रहा हय, कि ऊँ न देखाँइ बाले परमातिमा काहीं देखत हैं, अउर बिसुआस माहीं अटल रहिगें। 28 अउर मूसा काहीं परमातिमा के ऊपर पूर बिसुआस रहा हय, एहिन से ऊँ फसह के तेउहार अउर खून छिड़िकँय के बिधी काहीं मानिन, कि जउने परमातिमा के दूत मिस्री लोगन के पहिलउठन काहीं नास करत समय, इजराइली लोगन के पहिलउठन काहीं न मारय §।

29 अउर परमातिमा के ऊपर बिसुआसय के कारन इजराइली लोग, लाल समुंद्र के बीच से निकरिके, उआ पार अइसन चलेगें, जइसन ऊँ झुरान भूँइ से गे होय। अउर जब मिस्री लोग उहयमेर समुंद्र के बीच से जाँइ लागें, त ऊँ सगले बूड़िके मरिगें ††। 30 अउर परमातिमा के ऊपर बिसुआसय के कारन इजराइली लोग, यरीहो सहर के सुरच्छा करँइ बाली भीती के चारिव कइती, सात दिना तक जब चक्कर लगाय चुकें, तब उआ भीती अपनेन से गिरिगय †††। 31 अउर राहाब बेस्या काहीं, परमातिमा के ऊपर पूर बिसुआस रहा हय, एहिन से उआ परमातिमा के हुकुम न मानँइ बाले मनइन के साथ नास नहीं भे; काहेकि उआ भेद लेंइ बाले दूतन काहीं बचाइस रहा हय।

32 अउर जादा हम अब तौहसे पंचन से का कही? काहेकि एसे जादा बतामँई के समय अबय नहिं आय, कि गिदोन के बारे माहीं, बाराक के बारे माहीं, अउर सिमसोन के बारे माहीं, अउर यिफतह के बारे माहीं, राजा दाऊद के बारे माहीं, अउर समूएल के बारे माहीं, अउर परमातिमा के दुसरेव

सँदेस बतामँई बालेन के बारे माहीं, हम तौहई पंचन काहीं अउर बिस्तार से बताई ††। 33 ई पंचे परमातिमा के ऊपर किहे बिसुआसय के कारन, कइयकठे राज जीतिन; धरम के काम किहिन; वादा कीन चीजन काहीं पाइन, सेरन के मुँह बन्द किहिन, 34 आगी के लपट काहीं ठंड किहिन; तलबार के धार से बचिके निकरिगें, निबलता माहीं सक्ती पाइन; लड़ाई माहीं बहादुर निकरें; अउर बिदेसी सेनन काहीं मारिके भगाइन †††। 35 अउर कुछ मेहेरिआ अपने मरे लड़िकन काहीं जिन्दा पाइन; अउर कुछ जने त मार खातय खात मरिगें; अउर ओसे छुटकारा नहीं पामँई चाहिन; कि जउने ऊँ पंचे मरेन म से जि उठँय माहीं सामिल होइ जाँय ††। 36 अउर कइअक जने हँसी उड़ाए जाँइ के द्वारा; अउर चाबुक खायँ के द्वारा; बाँधे जाँइ के द्वारा, अउर जेल जाँइ के द्वारा जाँचे-परखे गें। 37 अउर कुछ जनेन के ऊपर पथरहाव कीन ग; अउर कुछ जने आरा से चीरे गें, अउर कुछ जने तलबार से मारे गे; अउर कुछ जने गरीबी, अउर अत्याचार माहीं दुख भोगत, गाड़र अउर बोकरिन के खलरी काहीं ओढ़े, एँकई-ओँकई मारे-मारे फिरें। 38 अउर जंगलन माहीं, अउर पहारन माहीं, अउर गुफन माहीं, अउर धरती माहीं बने गड़ून माहीं भटकत रहिगें। काहेकि संसार उनखे काबिल नहीं रहा आय। 39 अउर बिसुआसय के कारन ई सगलेन के बारे माहीं निकही गबाही दीनगे ही, तऊ इनहीं पंचन काहीं वादा के चीजँय नहीं मिलीं। 40 काहेकि परमातिमा हमरे पंचन के खातिर, पहिलेन से एकठे उत्तम बात निश्चित किहिन तय, कि जउने ऊँ पंचे, हमरे पंचन के बिना परिपूर्णता काहीं न पामँय।

#### पिता परमातिमा द्वारा सुधार के खातिर डॉट-फटकार

12 जब परमातिमा के ऊपर बिसुआस करँइ बाले खुब मनइन के गबाही, हमरे पंचन के चारिव कइती मवजूद ही, इआ कारन से आबा, हमहूँ पंचे हरेक रोकँइ बाली चीजन काहीं, अउर हरेक उलझामँय बाले पापन काहीं, अपने जीवन से दूर करी, जउन परमातिमा से दूरी लइ जात हैं, अउर जउने मसीही दउड़ माहीं, हमहीं पंचन काहीं दउड़ई काहीं हय, ओही बड़े धीरज के साथ दउड़ी। 2 अउर बिसुआस के सुरुआत करँइ बाले, अउर ओही परिपूर्ण करँइ बाले, यीसु के ऊपर हम पंचे ध्यान लगाए रही; जे उआ खुसी के खातिर जउन उनखे आँगे धरी रही हय, सरम के कउनव परबाह नहीं किहिन, अउर क्रूस के सजा काहीं सहि लिहिन, अउर जाइके परमातिमा के दहिने कइती सिंहासन माहीं बइठिगें हँय। 3 एसे तूँ पंचे आपन ध्यान यीसु के ऊपर लगाए रहा, जे अपने बिरोध माहीं पापी मनइन के द्वारा दीनगे, घोर कस्ट काहीं सहि लिहिन हीं, कि जउने तूँ पंचे सताव के समय निरास होइके हिम्मत न हारा। 4 अउर तूँ पंचे पाप के बिरोध माहीं अइसन लड़ाई नहीं लड़े आह्या, कि तौहई पंचन काहीं आपन खून बहामँई परा होय। 5 अउर तूँ पंचे उआ उपदेस काहीं बिसराय दिहा हय, जउन तौहई पंचन काहीं लड़िकन कि नाई दीन ग रहा हय, कि

“हे बेटा, प्रभू के डॉट-फटकार काहीं तुच्छ न जान्या, अउर जब ऊँ तौहई डॉटँइ त बुरा न मान्या।

6 काहेकि प्रभू, जेसे प्रेम करत हैं, त ओही डँटतिव हैं; अउर जेही आपन लड़िका बनाय लेत हैं, ओही सुधारँय के खातिर सड़ाका घलाय मारत हैं ††।”

7 तूँ पंचे दुख काहीं परमातिमा से मिलँइ बाली डॉट समझिके सहि ल्या। काहेकि परमातिमा तौहई पंचन काहीं आपन लड़िका समझिके इआमेर बरताव कइ रहे हँय, अउर इआ बताबा कउन अइसन लड़िका हय, जेखर बाप ओही नहीं डॉटय? 8 अउर अगर उआ डॉट तोहई पंचन काहीं नहीं मिली आय, जइसन सब काहीं मिलत ही, त तूँ पंचे उनखर लड़िका न कहइहा, बलकिन ब्यभिचार के सन्तान कहइहा। 9 अउर जब हमार पंचन के संसारिक बाप घलाय, हमार पंचन के डॉट-फटकार करत हैं, तऊ उनखर मान-सम्मान करित हएन, त हमहीं पंचन काहीं आत्मिक बाप, अरथात परमातिमा के

† 11:17 उत्प 22:14 †† 11:18 उत्प 21:12 † 11:20 उत्प 27:27-29,39,40  
 †† 11:21 उत्प 47:31; 48:20 †† 11:22 उत्प 50:24,25; निरग 13:19  
 ††† 11:23 निरग 2:2; 1:22 ††† 11:24 निरग 2:10-12 § 11:28 निरग 12:21-30 †† 11:29 निरग 14:21-31 ††† 11:30 यही 6:12-21

§ 11:32 न्या 6:11; 8:2 ††† 11:34 दानि 3:1-30 †† 11:35 1 राजा 17:17-24; 2 राजा 4:25-37 †† 12:6 नीति 3:11,12

अधीनता माहीं अउर जादा रहँइ चाही, जउने हम पंचे हमेसा जिअत रही।  
 10 हमार पंचन के संसारिक बाप, त अपने-अपने समझ के मुताबिक थोरन दिन के खातिर डॉट-फटकार करत रहे हँय, पय परमातिमा त हमरे पंचन के फायदा के खातिर अइसन करत हँ, कि जउने हम पंचे उनहिन कि नाई पबित्र बन जई।  
 11 पय जउने समय डॉट-फटकार कीन जात ही, उआ समय डॉट-फटकार नीक नहीं लागय, बलकिन ओसे खुब दुख लागत हय, तऊ जे कोऊ उआ डॉट-फटकार काहीं सहत-सहत मजबूत होइ जात हँ, ओखे बाद उनहीं पंचन काहीं सान्ती के साथ निकहे कामन के प्रतिफल मिलत हय।  
 12 एसे अपने ढील हाँथन काहीं, अउर निबल टिहुनिन काहीं मजबूत करा।  
 13 अउर तूँ पंचे परमातिमा के बताए गइल माहीं सीधे चलत रहा, जउने ऊँ पंचे जउन बिसुआस माहीं लाँगइ कि नाई कमजोर हँ, भटक न जाँय, बलकिन बिसुआस माहीं मजबूत होइ जाँय।

14 अउर तूँ पंचे सबसे मेल-मिलाप रक्खा, अउर पबित्र बनँइ के हरेकमेर से कोसिस करत रहा; काहेकि पबित्र बने बिना, कउनव मनई प्रभू के दरसन कबहूँ न करे पाई।  
 15 अउर तूँ पंचे इआ बात के ध्यान रक्खा, कि कउनव मनई परमातिमा के किरपा से बंचित न रहि जाय, अउर इहव बात के ध्यान रक्खा, कि तौहरे पंचन के बीच माहीं अइसन कउनव झगडा के जइ न फूट निकरय, कि तौहऊँ पंचन काहीं कस्ट होय, अउर खुब मनई बिसुआस से भटक जाँय।  
 16 अउर इहव बात के ध्यान रक्खा, कि तौहरे पंचन के बीच म से कोऊ ब्यभिचार न करय, अउर न एसाव कि नाई अधरमी बनय, जउन एक बेरकी के खाना के खातिर, आपन पहिलउठा होइ के अधिकार बँच डारिस तय।  
 17 अउर तूँ पंचे इआ बात काहीं निकहा से जनतेन हया, कि जब एसाव अपने बाप से आसिरबाद पामँइ के खातिर गँ, त ऊँ काबिल नहीं निकरे, जबकि रोइ-रोइके आसिरबाद पामँइ के कोसिस किहिन, तऊ ऊँ अपने कीन गलती के पश्चाताप नहीं कए पाइन।

18 तूँ पंचे त आगी से जरत उआ पहार के लघे नहीं आया, जेही छुआ जाय सकत रहा हय, अउर न करिआ बदरी, अउर न अँधिआर, अउर न आँधी के लघे आया,  
 19 अउर न तुरही के तेज अबाज के लघे आया, अउर न परमातिमा के अइसन बोल के लघे आया, जउने काहीं सुनिके इजराइली लोग इआ बिनती किहिन, कि “अब हमसे अउर बातँय न कीन जाय †।”  
 20 काहेकि ऊँ पंचे उआ हुकुम काहीं नहीं सहे पाइन तय, कि “अगर कउनव पसू घलाय उआ पहार काहीं छुअय, त ओखे ऊपर पथरहाव कीन जाय ††।”  
 21 अउर उआ दरसन एतना भयानक रहा हय, कि मूसा घलाय इआ कहिन, कि “हम डेरन के मारे थर-थर काँपित हएन †।”

22 पय अब तूँ पंचे सिय्योन के पहार के लघे, अउर जिन्दा परमातिमा के सहर अरथात स्वरग के यरूसलेम सहर के लघे, अउर लाखन स्वरगदूतन के लघे,  
 23 अउर उन पहिलउठिन के साधारन सभा, अरथात मसीही मन्डली के लघे आय गया हय, जिनखर नाम स्वरग माहीं लिखे हँय, अउर सबके न्याय करँइ बाले परमातिमा के लघे, अउर परिपूर्ण कीन गई पबित्र मनइन के आत्मन के लघे आय गया हय।  
 24 अउर नई करार के बिचबई यीसु, अउर छिड़काव के उआ खून के लघे आया हय, जउन हाबिल के खून से उत्तम बातँय कहत हय †।

25 अउर तूँ पंचे सचेत रहा, अउर परमातिमा के बातन काहीं सुनिके मान्या, काहेकि ऊँ पंचे जब धरती माहीं चेतउनी दँइ बाले के बातन काहीं, न मानिके बच नहीं सकँ, त हम पंचे स्वरग से चेतउनी दँइ बाले परमातिमा, के बातन काहीं न मानिके, कइसन बाँचि सकित हएन †? 26 उआ समय त उनखर बोल धरती काहीं हलाय दिहिस तय, पय अब ऊँ इआ वादा किहिन हीं, कि “हम एक बेरकी पुनि केबल धरतिन भर काहीं नहीं, बलकिन अकास काहीं घलाय हलाय देब ††।”  
 27 अउर इआ बात “एक बेरकी पुनि” इआ बताबत ही, कि जउन चीजँय हलाई जाती हई, ऊँ सब रचना कीन चीजँय होइ के कारन नस्ट होइ जइहँय, कि जउने, जउन चीजँय हलाई नहीं जातीं, ऊँ अटल बनी रहँय।  
 28 अउर जब हमहीं पंचन काहीं अइसन राज मिलँइ बाला

हय, जउन हलाबा न जई, त हम पंचे परमातिमा के अभारी बनी, अउर आदरसहित भक्ती के साथ परमातिमा के अइसन अराधना करी, जउने से ऊँ खुसी होत हँ।  
 29 काहेकि हमार पंचन के परमातिमा भसम कइ डारँइ बाली आगी आहीं ††।

### मसीही जीवन जिअँइ के निरदेस

13 एसे आबा हम पंचे आपस माहीं एक दुसरे से, अपने भाई-बहिनिन कि नाई प्रेम करत रही।  
 2 अउर तूँ पंचे महिमानन के स्वागत-सत्कार करब कबहूँ न बिसराया, काहेकि एहिन के द्वारा कुछ मनई अनजाने माहीं स्वरगदूतन के स्वागत-सतकार किहिन हीं §।  
 3 अउर तौहरे बीच माहीं प्रभू काहीं मानँइ के कारन जउन मनई जेल माहीं हँ, उनखर इआ समझिके मदत करा, कि जइसन हमहिन जेल माहीं हएन, अउर जउने मनइन के साथ प्रभू काहीं मानँइ के कारन, बुरा बरताव कीन जात हय, उनहूँ के इआ समझिके मदत करा, कि कबहूँ उआ बुरा बरताव हमरेव साथ कीन जाय सकत हय।  
 4 अउर काज-बिआह सबके बीच माहीं मान-सम्मान के बात समझी जाय, अउर उनखर बिछउना निस्कलंक होइ चाही, अरथात जिनखर बिआह होत हय, उनहीं पबित्र होइ चाही, काहेकि परमातिमा ब्यभिचारिन, अउर दुसरे के मेहेरिआ के साथ नजायज सम्बन्ध बनामँइ बालेन के न्याय करिहँय।  
 5 अउर तौहार पंचन के सुभाव लालची न होइ चाही, बलकिन जउन तौहरे पंचन के लघे होय, ओहिन माहीं सन्तोस करा; काहेकि परमातिमा इआ खुदय कहिन हीं, कि “हम तौहई पंचन काहीं कबहूँ न छोड़ब, हमेसा तौहरे साथय माहीं रहब §।”  
 6 एसे हम पंचे निडर होइके कहित हएन, कि “प्रभू हमार सहायता करँइ बाले आहीं; एसे हम पंचे कोहू से न डेराब; मनई हमार पंचन के कुछ नहीं बिगाड़ सकँय ††।”

7 जउन तौहार पंचन के अँगुआ हँ, अउर तौहई परमातिमा के बचन सुनाइन हीं, उनहीं हमेसा सुध रक्खा; अउर बडे ध्यान से उनखे चाल-चलन के नतीजा काहीं देखिके, उनखर जइसन बिसुआस रहा हय, ओहिन के मुताबिक तूहूँ पंचे बिसुआस करा।  
 8 काहेकि यीसु मसीह जइसन पहिले रहे हँय, उहयमेर आजव हँ, अउर ऊँ हमेसा उहयमेर रहँहँय।  
 9 एसे तूँ पंचे हरेकमेर के बाहिरी उपदेसन के बातन माहीं न परा, जउन बिसुआस से भटकाय देती हई। बलकिन अपने मन काहीं परमातिमा के किरपा से बिसुआस माहीं मजबूत करा, इआ नहीं कि तूँ पंचे खॉय-पिअँइ के नेमन माहीं परि जा, काहेकि जे कोऊ ई खॉय-पिअँइ के नेमन काहीं मानत हँ, उनहीं आत्मिक जीवन के खातिर कउनव फायदा नहीं भ आय।  
 10 अउर हमरे पंचन के लघे एकठे अइसन बेदी ही, जउने माहीं चढ़ाए बलिदान काहीं खॉय के अधिकार ऊँ मनइन काहीं नहिँ आय, जउन तम्बू माहीं सेबा करत हँ।  
 11 काहेकि महायाजक जउने पसुअन के खून, पापबली के रूप माहीं महापबित्र जघा माहीं लइ जात हँ, उन पसुअन के दँह, जहाँ ऊँ पंचे डेरा डारिके रहत रहे हँय, ओसे दूरी जराई जात ही।  
 12 इहय कारन यीसु घलाय, अपनेन खून के द्वारा मनइन काहीं पबित्र करँइ के खातिर, यरूसलेम सहर के फाटक के बहिरे क्रूस के दुख सहिन हीं।  
 13 एसे आबा हमहूँ पंचे घलाय, उहय अपमान काहीं सहत, जउने काहीं यीसु सहिन तय, अपने डेरन से बहिरे निकरिके यीसु के लघे चली।  
 14 काहेकि इहाँ हमार पंचन के कउनव स्थाई सहर नहिँ आय, बलकिन हम पंचे उआ सहर के तलास माहीं हएन, जउन आमँइ बाला हय।  
 15 एसे आबा हम पंचे जउने ओँठन से इआ सोइकार करित हएन, कि यीसु प्रभू आहीं, उँइन ओँठन से यीसु के द्वारा परमातिमा काहीं स्तुति रूपी बलिदान हमेसा चढ़ाबत रही।  
 16 अउर तूँ पंचे भलाई करब, अउर दान देब न बिसराया; काहेकि परमातिमा इहइमेर के बलिदानन से खुसी होत हँ।

17 अउर तूँ पंचे अपने आत्मिक अँगुअन के हुकुमन काहीं माना, अउर उनखे अधीनता माहीं रहा, काहेकि ऊँ पंचे तौहरे आत्मिक बढ़ोत्तरी के

† 12:19 निरग 19:16-22; 20:18-21 †† 12:20 निरग 19:12,13 † 12:21 ब्यब 9:19 †† 12:24 उत्प 4:10 †† 12:25 निरग 20:22 ††† 12:26 हाम्मै 2:6

‡‡‡ 12:29 ब्यब 4:24 § 13:2 उत्प 18:1-8; 19:1-3 †† 13:5 ब्यब 31:6,8; यहो 1:5 ††† 13:6 भज 118:6

खातिर, हमेसा खुसी से काम करत रहत हें, अउर उन्हीं अपने ई कामन के हिंसाब परमातिमा काहीं देइ परी। पय तूँ पंचे उन्हीं इआ मोकान न दिहा, कि ऊँ इआ काम काहीं खुसी से नहीं, बलकिन बड़े दुख के साथ करँय, त इआ दसा माहीं तौहई पंचन काहीं कउनव फायदा न होई।<sup>18</sup> अउर हमहीं पंचन काहीं इआ पूर भरोसा हय, कि हमार पंचन के बिबेक सुद्ध हय; अउर हम पंचे हर हाल माहीं नीक काम करँइ चाहित हएन, एसे तूँ पंचे हमरे पंचन के खातिर प्राथना करत रहा।<sup>19</sup> अउर हम बिसेस रूप से इआ बिनती करित हएन, कि तूँ पंचे हमरे खातिर प्राथना करा, जउने हम हरबिन तौहरे पंचन के लघे आय सकी।

<sup>20</sup> अउर सान्ती देइ बाले परमातिमा, हमरे पंचन के प्रभू यीसु मसीह काहीं मरेन म से जिन्दा कइ दिहिन हीं, जउन गइरन के महान चरबाहा आहीं, अउर उनहिन के खून से हमरे पंचन के साथ सनातन के खातिर करार बाँधिन हीं।<sup>21</sup> अउर उँइन परमातिमा तौहई पंचन काहीं, हरेक निकही बातन

माहीं परिपूर्ण करँय, जउने तूँ पंचे उनखे मरजी काहीं पूर करा, अउर उन्हीं जउन कुछ नीक लागत हय, ओही ऊँ यीसु मसीह के द्वारा हमरे पंचन के भीतर पइदा करँय, अउर उनहिन के बड़ाई जुग-जुग होत रहय। आमीन।

<sup>22</sup> हे भाई-बहिनिव, हम तौहसे इआ बिनती करित हएन, कि इआ उपदेस के बातन काहीं सोइकार कइल्या; काहेकि हम तौहरे खातिर ई बातन काहीं संछेप माहीं लिखेन हँय।<sup>23</sup> अउर तूँ पंचे इआ जानिल्या, कि हमार पंचन के बिसुआसी भाई तीमुथियुस जेल से छूटिगे हँय, अउर अगर ऊँ हरबिन हमरे लघे आय जइहँय, त हम उनखे साथय तौहसे मिलँय के खातिर अउब।<sup>24</sup> अउर तूँ पंचे अपने सगले अँगुअन काहीं, अउर सगले बिसुआसी भाई-बहिनिन काहीं, हमार पंचन के नबस्कार कहि दिहा। अउर इटली देस के रहँइ बाले घलाय, तौहई पंचन काहीं नबस्कार कहत हें।<sup>25</sup> अउर तौहरे ऊपर परमातिमा के किरपा हमेसा बनी रहय। आमीन।

# याकूब

## इआ चिट्ठी के परिचय

याकूब के चिट्ठी बेउहारिक निरदेसन के सार आय, जउन सगले संसार माहीं तितर-बितर होइके रहँइ बाले, परमातिमा के लोगन के खातिर लिखी गे ही। लिखँइ बाले, मसीही आचरन, अउर बेउहार, अउर चाल-चलन के खातिर बेउहारिक ग्यान, अउर मार्ग दरसन से सम्बन्धित निरदेसन काहीं बतामँइ के खातिर, कइअकठे जिन्दा चीजन के उदाहरन दइके उपमा देत हैं। ऊँ अनेकव बिसयन माहीं मसीही नजरिया से बिचार करत हैं, जइसन अमीरी अउर गरीबी, परिच्छा, निकहा चाल-चलन, पच्छपात, बिसुआस अउर काम, जीभ के उपयोग, बुद्धिमानी, लड़ाई-झगड़ा, घमन्ड अउर दीनता, दुसरे के ऊपर दोस लगाउब, बड़ाई करब, धीरज धरब, अउर प्राथना करब।

इआ चिट्ठी मसीही आचरन के पालन करँइ माहीं बिसुआस के साथ-साथ, कर्म करँइ के महत्व के ऊपर घलाय जोर देत ही।

रूप-रेखा :

भूमिका  
बिसुआस अउर बुद्धिमानी  
गरीबी अउर धन-दउलत  
परख अउर प्रलोभन  
सुनब अउर करब  
पच्छपात के खिलाफ चेतउनी  
बिसुआस अउर कर्म  
मसीही अउर ओखर जीभ  
मसीही अउर संसार  
कइअक मेर के निरदेस

### याकूब के अभिबादन

1 परमातिमा के अउर प्रभू यीसु मसीह के दास याकूब के तरफ से, उन बरहँव कुलन काहीं, जउन सगले संसार माहीं तितर-बितर होइके रहत हैं, नबस्कार पहुँचय।

### बिसुआस अउर बुद्धिमानी

2 हे हमार भाई-बहिनिव, जब तूँ पंचे अनेकव मेर के परिच्छन माहीं परा, त ओही पूरे आनन्द के बात समझा, 3 इआ जानिके कि तौहरे बिसुआस के परखे जाँय से धीरज पड़दा होत हय। 4 पय धीरज काहीं आपन पूर काम करँइ द्या, जउने तूँ पंचे पूर अउर सिद्ध होइजा, अउर तौहरे जीबन माहीं कउनव बात के कमी न रहय।

5 पय अगर तौहरे पंचन म से कोहू काहीं बुद्धी के कमी होय, त उआ परमातिमा से माँगय, जउन बिना उलउना दिहे सगलेन काहीं उदारता से देत हैं; ओहू काहीं देइहँय। 6 पय बिसुआस कइके माँगय, अउर कुछू संका न करय; काहेकि संका करँइ बाला समुंद्र के लहर कि नाई होत हय, जउन हबा से बहत अउर उछलत ही। 7 संका करँइ बाला मनई इआ न समझय, कि हमहीं प्रभू से कुछू मिली। 8 उआ मनई दुइचित्ता हय, अउर अपने सगली बातन माहीं चंचल हय।

### अमीरी अउर गरीबी

9 सहज दसा बाले भाई काहीं घमन्ड करँइ चाही, कि ओही परमातिमा आत्मिक धन दिहिन हीं। 10 अउर धनी अपने नीच दसा माहीं घमन्ड करय, काहेकि ओही चारा माहीं फूलँइ बाले फूल कि नाई झरि जाँइ काहीं हय। 11 काहेकि सुरिज के ऊतय निकहा कड़ा घाम होत हय, अउर चारन काहीं झुराय डारत हय, उनखर फूल पत्ती झर जाती हई, अउर उनखर सुन्दरता खतम होइ जात ही। इहइमेर से धनी मनई घलाय, अपने भाग-दउड़ के साथ खतम होइ जात हय।

### परख अउर प्रलोभन

12 उआ मनई धन्य हय, जउन परिच्छा माहीं अटल रहत हय, काहेकि परिच्छा माहीं खरा उतरे के बाद, उआ जीवन के मुकुट पाई, जउने काहीं परमातिमा अपने प्रेम करँइ बालेन काहीं, देइ के बचन दिहिन हीं। 13 परिच्छा के घरी माहीं कोहू काहीं इआ न कहँय चाही, कि “परमातिमा हमार परिच्छा लइ रहे हँय”, काहेकि बुरी बातन से परमातिमा के कउनव लेन-देन नहिं आय, ऊँ कोहू के परिच्छा नहीं लेंय। 14 पय हरेक मनई अपनेन बुरी इच्छन माहीं आकरसित होइके, अउर फँसिके परिच्छा माहीं परत हय। 15 फेर उआ बुरी इच्छा बढ़त-बढ़त पाप काहीं पड़दा करत ही, अउर पाप बढ़िके मउत काहीं जनम देत हय। 16 एसे हे हमार पियार भाई- बहिनिव धोखा न खा। 17 काहेकि हरेक निकहा बरदान, अउर हरेक उत्तम दान, परमातिमा से मिलत हय, जउन जोतियन के परमपिता आहीं, जउने माहीं न त कउनव

बदलाव होइ सकय, अउर न नछत्रन के गति-बिधिअन से पइदा भे छाया से उआ बदल सकय।

### सुनिके ओखे मुताबिक चलब

18 सत्य के बचन के व्दारा आपन सन्तान बनामँइ के खातिर, परमातिमा हमहीं पंचन काहीं चुनिन हीं, जउने हम पंचे सगले जन, सगले प्रानिन के बीच माहीं, उनखे फसल के पहिल फर साबित होई। 19 हे हमार पियार भाई-बहिनिव, इआ बात त तूँ पंचे जनतेन हया, एसे हरेक मनई सुनँय के खातिर तत्पर रहय, अउर बोलँइ माही धीरज रक्खय, अउर क्रोध करँइ माहीं धीम होय। 20 काहेकि मनई के क्रोध, परमातिमा के धरम के पालन नहीं कइ सकय। 21 एसे बुरे कामन, अउर चारिव कइती फइली दुस्टता से दूरी रह्या, बलकिन उआ बचन काहीं नम्रता से अपनाय ल्या, जउन तौहरे हिरदँय माहीं बोबा ग हय, उहय तौहरे प्रान के मुक्ती कइ सकत हय, 22 एसे तूँ पंचे, परमातिमा के बचन के मुताबिक चलँइ बाले बना, अउर केबल सुनँइ बाले भर नहीं, जउन खुद अपनेन काहीं धोखा देत हैं। 23 काहेकि जे कोऊ, परमातिमा के बचन काहीं सुनत त हय, पय ओखे मुताबिक चलय नहीं, त उआ, उआ मनई कि नाई होत हय, जउन आपन मुँह अइना माहीं देखत हय, 24 अउर उआ अपने-आप काहीं अइना माहीं देखिके चला जात हय, अउर हरबिन बिसरि जात हय, कि हम कइसन रहेन हय। 25 पय जउन मनई परमातिमा के उआ सगले बिधान काहीं निकहा से मानत हय, जउने से छुटकारा मिलत हय, उआ अपने काम माहीं एसे आसीस पाई, कि उआ सुनिके भूलय नहीं, बलकिन उहयमेर काम करत हय। 26 अगर कोऊ अपने-आप काहीं भक्त समझय, अउर अपने जीभ माहीं लगाम न रक्खय, अउर अपने हिरदँय काहीं धोखा देय, त ओखर भक्ती बेकार ही। 27 हमरे पिता परमातिमा के लघे सुद्ध अउर निरमल भक्ती इआ आय, कि अनाथन अउर बिधबन के दुख माहीं, हम पंचे उनखर मदत करी, अउर अपने-आप काहीं संसार के बुरे कामन से निस्कलंक रखी।

### पच्छपात के खिलाफ चेतउनी

2 हे हमार भाई-बहिनिव, हमरे महिमावान प्रभू यीसु मसीह माहीं जउन तौहार बिसुआस हय, उआ बिना पच्छपात के होय। 2 काहेकि अगर एकठे मनई सोने के अँगूठी अउर निकहा ओन्हा पहिरे तौहरे बइठक माहीं आबय, अउर एकठे कंगाल घलाय घिनहे ओन्हा पहिरे आबय। 3 अउर तूँ पंचे उआ निकहा ओन्हा पहिरे बाले के मुँह देखिके कहा, कि तूँ उहाँ निकही जघा माहीं बइठा; अउर उआ कंगाल से कहा, कि तूँ इहाँ ठाढ़ रहा, इआ कि हमरे गोड़े के लघे बइठ जा। 4 त का तूँ पंचे आपस माहीं भेदभाव नहीं किहा, अउर गलत बिचार से न्याय करँइ बाले न ठहरिहा? 5 हे हमार पियार भाई-बहिनिव, सुना; काहे परमातिमा इआ संसार के कंगालन काहीं नहीं चुनिन, कि बिसुआस माहीं धरमी, अउर उआ राज के अधिकारी होंय, जउने के वादा परमातिमा उनसे किहिन हीं, जउन उनसे प्रेम रक्खत हैं? 6 पय तूँ पंचे उआ कंगाल के अपमान किहा हय; काहे धनी मनई तौहरे ऊपर अत्याचार नहीं करँय, अउर काहे उँइन तौहई कचेहरिन माहीं जबरई खसेल-खसेल नहीं लइ जाँय? 7 काहे उँइन मसीह के उआ उत्तम नाम के बुराई नहीं करँय, जउन तौहई दीन ग हय? 8 तऊ अगर तूँ पंचे पबित्र सास्त्र के इआ बचन के मुताबिक, कि "तूँ अपने परोसी से उहयमेर प्रेम करा, जउनमेर तूँ अपने-आप से करते हया" त सही-सही उआ राज के बिधान काहीं पूर करते हया, त निकहय करते हया। 9 पय अगर तूँ पंचे पच्छपात करते हया, त पाप करते हया; अउर बिधान तौहई अपराधी ठहराबत हय। 10 काहेकि जे कोऊ सगले बिधान के पालन करत हय, पय एकय बात माहीं चूक जाय, त उआ सगली बातन माहीं दोसी ठहरी। 11 एसे कि जउन इआ कहिन हीं, कि तूँ कउनव मेहेरिआ से अनुचित सम्बन्ध न बनाया, उँइन इहव कहिन हीं, कि तूँ कतल न किहा, एसे अगर तूँ कउनव मेहेरिआ से अनुचित सम्बन्ध नहीं बनाया, पय कतल किहा, तऊ तूँ बिधान के पालन न करँइ बाले ठहरिहा। 12 तूँ पंचे उँइ

मनइन कि नाई बचन बोला, अउर काम घलाय करा, जिनखर न्याय उआ बिधान के मुताबिक होई, जउने से छुटकारा मिलत हय। 13 काहेकि जउन मनई दुसरे के ऊपर दया नहीं किहिस, ओखर न्याय बिना दया के होई, दया न्याय के ऊपर बिजयी होत ही।

### बिसुआस अउर काम

14 हे हमार भाई-बहिनिव, अगर कोऊ कहय, कि हमहीं बिसुआस हय, पय उआ बिसुआस के मुताबिक काम न करत होय, त ओसे कउनव फायदा न होई, का इआमेर के बिसुआस कबहूँ ओखर छुटकारा कइ सकत हय?

15 अगर कउनव भाई इआ कि बहिनी बिना ओन्हा पहिरे होंय, अउर उनहीं रोज खॉय के कमी होय। 16 अउर तौहरे पंचन म से कोऊ उनसे कहय, कुसल से चले जा, तूँ गरम रहा, अउर अघान रहा; पय जउन चीज देह के खातिर जरूरी हई, उआ ओही न देय, त कउन फायदा? 17 उहयमेर बिसुआस घलाय, अगर कर्म समेत न होय, त अपने सुभाव माहीं मरे कि नाई हय।

18 पय कोऊ इआ कहि सकत हय, कि तौहई बिसुआस हय, अउर हम काम करित हएन; तूँ आपन बिसुआस हमहीं बिना काम के त देखाबा; अउर हम आपन बिसुआस अपने निकहे कामन के द्वारा तौहई देखाउब। 19 तौहई बिसुआस हय, कि एकयठे परमातिमा हैं; तूँ निकहा करते हया; बुरी आत्मा घलाय बिसुआस रखती हई, कि एकयठे परमातिमा हैं, अउर ऊँ थर-थरात रहती हई। 20 पय हे मूरुख मनई, काहे तँय इहव नहीं जनते, कि बिना कर्म के बिसुआस बेकार हय? 21 जब हमार कुल पिता अब्राहम अपने लड़िका इसहाक काहीं बेदी के ऊपर चढ़ाइन, त काहे उँइ कर्म से धरमी नहीं कहाइन रहा। 22 एसे तूँ इआ देख लिहा हय, कि बिसुआस उनखे कामन के साथ मिलिके, कइसन प्रभाव डारिस ही, कि उनखे कामन से बिसुआस सिद्ध भ। 23 अउर पबित्र सास्त्र के इआ बचन पूर भ, कि अब्राहम परमातिमा के ऊपर बिसुआस किहिन रहा हय, एहिन से ऊँ परमातिमा के नजर माहीं निरदोस ठहराए गे रहे हँय, अउर ऊँ परमातिमा के साथी कहाए। 24 एसे तूँ पंचे देख लिहा हय, कि मनई केबल बिसुआस भर से नहीं, बलकिन कामन से घलाय धरमी ठहरत हय। 25 उहयमेर राहाब बेस्या घलाय, जब उआ दूतन काहीं अपने घर माहीं उतारिस, अउर दुसरे गइल से बिदा किहिस, त का उआ कर्मन से धरमी न ठहरी? 26 एखर सार इआ हय, कि जइसन देह आत्मा के बिना मरी हय, उहयमेर बिसुआस घलाय कर्म बिना मरा हय।

### जीभ काहीं काबू माहीं करब

3 हे हमार भाई-बहिनिव, तौहरे पंचन म से खुब जने उपदेसक न बनँय, काहेकि तूँ पंचे त जनतेन हया, कि हम पंचे जउन उपदेस देँइ बाले हएन, त हमार पंचन के न्याय अधिक कइई के साथ कीन जई। 2 एसे कि हम सगले जने कइएक बेरकी अपने बातन माहीं चूक जइत हएन, जे कोऊ अपने बातन माहीं नहीं चूकय, उहय त सिद्ध मनई आय; अउर उहय अपने सगले देँह माही लगाम लगाय सकत हय। 3 जब हम पंचे अपने काबू माहीं करँइ के खातिर, घोड़न के मुँहे माहीं करिआरी लगाइत हएन, त हम उनखे सगले देँह काहीं घुमाय सकित हएन। 4 देखा, जल जिहाज घलाय, केतने बड़े भारी होत हैं, अउर तेज आँधी माहीं चलाए जात हैं; तऊ चलामँइ बाला एकठे छोट काहीं पतबार के व्दारा, अपने मन के मुताबिक ओही घुमाय देत हय। 5 उहयमेर जीभ घलाय एकठे छोट काहीं देँह के अंग आय, अउर बड़ी-बड़ी बड़ाई मारत ही, देखा थोड़ी क आगी से बड़े-बड़े जंगलन माहीं आगी लग जात ही। 6 जीभव आगिन कि नाई होथी, इआ जीभ हमरे पंचन के देँह माहीं अधरम से भरा एकठे अंग आय, अउर इहय सगले देँह माहीं कलंक लगाबत ही, अउर सगले जीवन काहीं बरबाध कइ देत ही। इआ जीभ नरक के आगी कि नाई धँधकत रहत ही। 7 काहेकि बन माहीं रहँइ बाले हरेकमेर के जानबर, पंछी, अउर रेंगँइ बाले जीव-जन्तु, पानी माहीं रहँइ बाले सगले जीव-जन्तु त मनई के काबू माहीं होइ सकत हैं, अउर होऊ गे हँय। 8 पय



जीभ काहीं कउनव मनई अपने काबू माहीं नहीं कइ सकय; उआ एकठे अइसन बलाय ही, जउन कबहूँ रुकिन नहीं सकय; उआ प्रान काहीं नास करई बाले बिस से भरी ही।<sup>9</sup> एहिन से हम पंचे प्रभू अउर पिता परमातिमा के अराधना करित हएन; अउर एहिन से मनइन काहीं जउन परमातिमा के स्वरूप माहीं पइदा भे हँय, सराप देइत हएन।<sup>10</sup> एकय मुँहे से सराप अउर धन्यवाद दोनव निकरत हँ, हे हमार भाई-बहिनिव, तौहई इआमेर से न होंइ चाही।<sup>11</sup> का पानी के एकय झिन्ना से, मीठ अउर खारा दोनव मेर के पानी निकर सकत हय? <sup>12</sup> हे हमार भाई-बहिनिव, का अंजीर के बिरबा माहीं जैतून, इआ कि अंगूर के बिरबा से अंजीर के फर लग सकत हय? उहयमेर खारा पानी के झिन्ना से मीठ पानी नहीं निकर सकय।<sup>13</sup> तौहरे पंचन म से ग्यानी अउर हुसिआर को हय? जे कोऊ इआमेर होय, उआ अपने कामन काहीं निकहा चाल-चलन से नग्नता समेत देखाबय, जउन ग्यान से पइदा होत हय।<sup>14</sup> पय अगर तूँ पंचे अपने मन माहीं बड़ी इरसा अउर बिरोध रखते हया, त सत्य के बिरोध माहीं घमन्ड न किहा, अउर न त झूठय बोल्या।<sup>15</sup> इआ परमातिमा के तरफ से आमँइ बाला ग्यान न होय, बलकिन इआ त संसारिक आय, आत्मिक न होय, बलकिन सइतान के आय।<sup>16</sup> एसे कि जहाँ इरसा अउर बिरोध होत हय, उहाँ लड़ाई-झगड़ा अउर हरेकमेर के गलत काम घलाय होत हँ।<sup>17</sup> पय जउन ग्यान परमातिमा के तरफ से आबत हय, उआ पहिले त पबित्र होत हय, अउर मिलनसार, कोमल अउर मीठ बोलँइ बाला अउर दयालू, अउर निकहे फर से लदा, अउर बिना पच्छपात के, अउर बिना कपट के होत हय।<sup>18</sup> अउर मेल-मिलाप करामँइ बालेन के खातिर, धारमिकता के फल मेल-मिलाप के साथ बोबा जात हय।

#### परमातिमा के अधीन रहा

**4** तौहरे बीच माहीं लड़ाई-झगड़ा काहे होत हँ? तूँ पंचे आपस माहीं लड़ाई-झगड़ा काहे करते हया? तौहरे मन माहीं जउन सुख-बिलास के इच्छा रहती हई, उनहिन के कारन इआ सगला होत हय।<sup>2</sup> तूँ पंचे चहते त हया, पय तौहई मिल नहीं पाबय, काहेकि तौहरे मन माहीं इरसा हय, अउर तूँ पंचे दुसरे के कतल करते हया, तऊ जउन चहते हया, उआ तौहई मिल नहीं पाबय, एहिन से लड़ाई-झगड़ा करते हया, अउर अपने मनचाही चीजन काहीं पउते नहिँ आह्या, काहेकि तूँ पंचे उनीं परमातिमा से नहीं मगते आह्या? <sup>3</sup> तूँ पंचे मगते त हया, अउर पउते नहिँ आह्या, एसे कि बुरी इच्छा से मगते हया, जउने अपने भोग-बिलास माहीं उड़ाय द्या। <sup>4</sup> हे ब्यभिचार करँइ बालिव! काहे तूँ पंचे नहीं जनते आह्या, कि संसार से दोस्ती करब, परमातिमा से दुसमनी करब आय? एसे जे कोऊ संसार के दोस्त होंइ चाहत हय, उआ अपने-आप काहीं परमातिमा के बडरी बनाबत हय। <sup>5</sup> का तूँ पंचे पबित्र सास्त्र के बातन काहीं बेकार समझते हया, जउने आत्मा काहीं उँइ हमरे पंचन के भीतर बसाइन हीं, का उआ अइसन इच्छा करत हय, जउने के प्रतिफल इरसा होय? <sup>6</sup> उँइ त अउरव किरपा करत हँ; इआ कारन से पबित्र सास्त्र माहीं इआ लिखा हय, कि परमातिमा घमन्ड करँइ बालेन के बिरोध करत हँ, पय जे कउनव बात के घमन्ड नहीं करँय, उनखे ऊपर किरपा करत हँ। <sup>7</sup> एसे परमातिमा के आधीन होइजा; अउर सइतान के सामना करा, त उआ तौहरे लघे से भाग जई। <sup>8</sup> परमातिमा के लघे आबा, त उँइ तौहरे लघे अइहँय, हे पाप करँइ बाले मनइव, आपन-आपन चाल-चलन सुधारा; अउर हे दुइचित्त रखँइ बाले मनइव, अपने हिरदँय काहीं पबित्र करा। <sup>9</sup> तूँ पंचे हँसा न, सोक करा, बिलाप करा, अउर दुखी होइके रोबा, काहेकि तूँ पंचे परमातिमा के नजर माहीं खुब पाप किहा हय। <sup>10</sup> प्रभू के आँगे दीन बना, त उँ तौहई सिरोमनि बनइहँय।

#### दुसरेन के ऊपर दोस न लगाबा

<sup>11</sup> हे भाई-बहिनिव, एक दुसरे के बदनामी न करा, जे कोऊ बिसुआसिनन के बदनामी करत हय, इआ बिसुआसिनन के ऊपर दोस लगाबत हय, उआ परमातिमा के बिधान के बदनामी करत हय, अउर बिधान के ऊपर दोस

लगाबत हय, त तूँ बिधान के मुताबिक चलँइ बाले नहीं, बलकिन ओखर हाकिम ठहरिहा।<sup>12</sup> बिधान देंइ बाले, अउर ओखर न्याय करँइ बाले, त एकयठे हँय, जिनीं बचामँय, अउर नास करँय के अधिकार हय; त पुनि अपने साथी के न्याय करँइ बाले, तूँ को होते हया?

#### घमन्ड के बिरोध माहीं चेतउनी

<sup>13</sup> तूँ पंचे जउन इआ कहते हया, कि आज इआ कि काल्ह, हम पंचे कउनव दुसरे सहर माहीं जाइके, उहाँ एक बरिस बिताउब, अउर धंधा कइके फायदा कमाब।<sup>14</sup> अउर इआ नहीं जनते आह्या, कि काल्ह का होई: सुन त ल्या, तौहार जीबन हइअय का आय? तूँ पंचे त मानो भाफ कि नाई हया, जउन थोरी देर त देखाई देत ही, अउर पुनि हेराय जात ही।<sup>15</sup> एखर उल्टा तौहई, इआ कहँइ चाही, कि अगर प्रभू चइहँय, त हम पंचे जिअत रहब, अउर इआ काम, कि उआ काम घलाय करब।<sup>16</sup> पय अपना पंचे अपने कउनव मेर के बातन के ऊपर घमन्ड न करी; इआमेर के सगला घमन्ड बुरा होत हय।<sup>17</sup> एसे जे कोऊ भलाई करँय जानत हय, अउर नहीं करय, त इआ पाप आय।

#### धनमानन काहीं चेतउनी

**5** हे धनमानव सुना, जउन बिपती तौहरे ऊपर आमँइ बाली हई, उनखे खातिर गोहार मार-मारके रोबा।<sup>2</sup> तौहार धन सइ चुका हय, अउर तौहरे ओन्हन काहीं किरबा खाय चुके हँय।<sup>3</sup> तौहरे सोन-चाँदी माहीं काई लगिगे ही; अउर उआ काई तौहरे बिरोध माहीं गबाही देई, अउर आगी कि नाई तौहार माँस खाय जई, तूँ पंचे जउन इआ अन्तिम समय माहीं धन सम्पत्ती एकट्टा किहा हय।<sup>4</sup> देखा, जउन मजूर तौहार खेत काटिन हीं, उनखर उआ मजूरी, जउन तूँ पंचे धोखा दइके धइ लिहा हय, उआ चिल्लाय रही हय, अउर खेत माहीं काम करँइ बालेन के दोहाई, सेनन के प्रभू के कानन तक पहुँचिगे ही।<sup>5</sup> तूँ पंचे धरती माहीं भोग-बिलास के जीवन जिआ हय, अउर अपने-आप काहीं भोग-बिलास माहीं बोरे रह्या हय। इआमेर से परमातिमा के न्याय करँइ के दिन के खातिर खुद काहीं तइआर किहा हय।<sup>6</sup> तूँ पंचे धरमी काहीं दोसी बनाइके मारि डारे हया; काहेकि उँ तौहार सामना नहीं किहिन।

#### दुख माहीं धीरज धरब

<sup>7</sup> एसे हे भाई-बहिनिव, प्रभू के दुसराय आमँइ तक धीरज धरा, उआ किसान के सुध करा, जउन अपने खेत के कीमती फसल के आसा रखिके, पहिल अउर अन्तिम बरसा होंइ तक धीरज धरत हय।<sup>8</sup> तुहँ पंचे धीरज धरा, अउर अपने हिरदँय काहीं मजबूत करा, काहेकि प्रभू के दुसराय आउब लघेन हय।<sup>9</sup> हे भाई-बहिनिव, एक दुसरे के ऊपर दोस न लगाबा जउने तुहँ पंचे दोसी न ठहरा, देखा न्याय करँइ बाले दुआ माहीं ठाढ़ हँ।<sup>10</sup> हे भाई-बहिनिव, जउन परमातिमा के सँदेस बतामँइ बाले, प्रभू के नाम से बात किहिन, उनीं दुख उठामँइ अउर धीरज धरँय माहीं आदर्स माना।<sup>11</sup> देखा, हम पंचे धीरज धरँइ बालेन काहीं धन्य कहित हएन; तूँ पंचे अय्यूब के धीरज के बारे माहीं सुनबय भए होइहा, अउर प्रभू उनीं धीरज के बदले माहीं जउन आसीस दिहिन तय, ओहू काहीं जनते होइहा, कि प्रभू केतने दयालू अउर करुनामय हँ।

<sup>12</sup> पय हे हमार भाई-बहिनिव, सगलेन से बड़ी बात इआ हय, कि कसम न खया; न त स्वरग के, न धरती के, न कउनव चीज के, पय तौहार बातचीत हाँ के हाँ, अउर नहीं के नहीं होय, जउने तूँ पंचे दन्ड पामँइ बाले न ठहरा।

#### प्राथना के सक्ती

<sup>13</sup> अगर तौहरे पंचन म से कोऊ दुखी होय, त उआ प्राथना करय, अउर खुसी होय, त उआ अराधना के भजन गाबय।<sup>14</sup> अगर तौहरे पंचन म से कोऊ बिमार होय, त मसीही मन्डली के अँगुअन काहीं बोलाबय, अउर उँइ

प्रभू के नाम से ओखे तेल लगाइके प्राथना करँय।<sup>15</sup> अउर बिसुआस के प्राथना से रोगी बच जई, अउर प्रभू ओही नीक कइ देइहँय; अउर अगर उआ पापव किहिस होई, त ऊँ घलाय माफ होइ जइहँय।<sup>16</sup> एसे तूँ पंचे आपस माहीं एक दुसरे के आँगे, अपने-अपने पापन काहीं सोइकार कइल्या; अउर एक दुसरे के खातिर प्राथना करा, जउने नीक-सूख होइजा; धरमी मनइन के प्राथना सक्तिसाली, अउर प्रभावसाली होत ही, जैसे बहुत कुछ होइ सकत हय।<sup>17</sup> एलिय्याह नबी हमरेन पंचन कि नाई दुख-सुख भोगँइ बाले मनई रहे हँय; अउर ऊँ गिड़गिड़ाइके प्राथना किहिन, कि बारिस न होय; त साढ़े तीन

बरिस तक भुँइ माहीं पानी नहीं बरसा।<sup>18</sup> पुनि ऊँ प्राथना किहिन, त अकास से बरसा भे, अउर भुँइ माहीं फसल पइदा भे।

<sup>19</sup> हे हमार भाई-बहिनिव, अगर तौहरे पंचन म से कोऊ सत्य के गइल से भटक जाय, अउर कोऊ ओही लउटाय लाबय।<sup>20</sup> त उआ जान लेय, कि जे कोऊ कउनव भटके पापी मनई काहीं लउटाइके ले अई, त उआ एकठे प्रान काहीं मउत से बचाई, अउर ओखे अनेकव पापन के माफ करे जाँय के कारन बनी।

# 1 पतरस

## इआ चिट्ठी के परिचय

पतरस के इआ पहिल चिट्ठी, यीसु मसीह के ऊपर बिसुआस करँइ बाले भाई-बहिनिन के खातिर लिखी गे रही हय, जिनहीं इआ चिट्ठी माहीं “परमातिमा के चुने मनई” कहा ग हय। जउन एसिया माइनर प्रदेश के उत्तर के सगले छेत्र माहीं, तितर-बितर होइके रहत रहे हँय। इआ चिट्ठी के खास उद्देश पढ़ँइ बालेन काहीं मसीही जीवन माहीं आँगे बढँइ के खातिर उत्साहित करब हय, जउन यीसु मसीह के ऊपर बिसुआस किहे के कारन दुख अउर सताव के सामना करत रहे हँय। लेखक इआ चिट्ठी पढ़ँइ बालेन काहीं, यीसु मसीह के खुसी के खबर के सुध देबाइके अइसा करत हँ। काहेकि यीसु के मउत, अउर यीसु के मरेन म से जि उठब, अउर पुनि आमँइ के वादा उनहीं नई आसा देत हय। इआ कारन उनहीं अपने दुखन काहीं सोइकार कइके सहब जरूरी रहा हय, इआ बिसुआस के साथ, कि इआ उनखे बिसुआस के सच्चाई के परख होइ रही हय, अउर इआ कि “मसीह यीसु के दुसराय आमँइ के दिन” उनहीं पंचन काहीं एखर प्रतिफल जरूर मिली।

सताव के समय माहीं साहस बढ़ामँय के साथ-साथ लेखक इहव निबेदन करत हँ, कि इआ चिट्ठी काहीं पढ़ँइ बाले मसीह के सेबकन कि नाई जीवन जिअँइ।

हे भाई-बहिनिव हम अपना पंचन से बिनती करित हएन, कि जब अपना पंचे दुख अउर सताव के कारन निरास होइ जई, त इआ चिट्ठी काहीं जरूर पढ़ी। एसे अपना पंचन काहीं बड़ी हिम्मत मिली, अउर यीसु मसीह के ऊपर अपना पंचन के बिसुआस अउर मजबूत होइ जई।

रूप-रेखा:

किताब के परिचय

परमातिमा के मुक्ती काहीं सुधि देबाउब

पबित्र जीवन जिअँइ के खातिर उपदेस

दुखन के समय मसीही के जिम्मेबारी

मसीही के दीनता अउर सेबा

उपसंहार

### पतरस के अभिबादन

1 हम पतरस आहैन, अउर इआ चिट्ठी काहीं लिख रहेन हय, जउन यीसु मसीह के खास चेला आहैन, हम इआ चिट्ठी परमातिमा के चुने उन मनइन काहीं लिख रहेन हय, जउन पुन्तुस, अउर गलातिया, अउर कप्पदूकिया, अउर आसिया, अउर बिथुनिया प्रदेशन माहीं तितर-बितर होइके रहत हँ। 2 तूँ पंचे पिता परमातिमा के भबिस्य ग्यान के मुताबिक, पबित्र आत्मा से पबित्र कीन जाँय के व्दारा, यीसु मसीह के हुकुम काहीं पालन करँइ के खातिर, अउर उनखे खून से छिनके जाँइ के खातिर चुने गए हय, तौहई पंचन काहीं परमातिमा के किरपा, अउर सान्ति बहुतायत से मिलत रहय।

### जिअत आसा के खातिर परमातिमा काहीं धन्यबाद

3 हमरे पंचन के प्रभू यीसु मसीह के पिता परमातिमा के धन्यबाद होय, जउन यीसु मसीह काहीं मरेन म से जिआइके, अपने बड़ी दया से हमहीं पंचन काहीं अनन्त जीवन पामँइ के खातिर, जउन जिअत आसा ही, ओखे खातिर नबा जनम दिहिन हीं। 4 कि जउने हम पंचे बारिसदार होइ के उआ हक्क पाय जई, जउन हमरे खातिर स्वरग माहीं सुरच्छित हय, काहेकि उआ हक्क कबहूँ न नास होई, न कबहूँ खतमय होई, बलकिन उआ निरमल रही। 5 अउर तौहार पंचन के रक्छा परमातिमा के सक्ती के द्वारा, बिसुआस से उआ मुक्ती पामँइ के खातिर कीन जात ही, जउन अन्तिम न्याय के दिन माहीं प्रगट होइ बाली हय। 6 अउर इहय कारन से तूँ पंचे खुब आनन्दित होते हय।

जबकि इआ बात जरूर हय, कि तूँ पंचे अबे कुछ दिना तक अनेकव प्रकार के परिच्छन माहीं परँइ के कारन, दुखी हय। 7 अउर इआ एसे होत हय, कि तौहार पंचन के बिसुआस, परिच्छा के द्वारा खरा निकरय, अउर तौहार पंचन के जाँचा-परखा बिसुआस, आगी माहीं ताबा ग, नास होइ बाले सोन से जादा कीमती हय, जब यीसु मसीह दुसराय अइहँय, त बिसुआस माहीं बने रहँइ के कारन, तौहई पंचन काहीं परमातिमा से बड़ाई, महिमा, अउर मान-सम्मान मिली। 8 काहेकि तूँ पंचे यीसु काहीं नहीं देखे आह्या, तउ उनसे प्रेम करते हय, अउर अब त उनहीं बिना देखेन, उनखे ऊपर बिसुआस कइके अइसन आनन्दित अउर मगन होते हय, जउन बखान से बाहर अउर महिमा से भरा हय। 9 अउर तूँ पंचे अपने बिसुआस के कारन अपने आत्मा काहीं मुक्ती देबाय रहे हय।

### परमातिमा के सँदेस बतामँइ बालेन के गबाही

10 अउर इहय मुक्ती के बारे माहीं, अउर तौहई पंचन काहीं परमातिमा से मिलँइ बाली किरपा के बारे माहीं, परमातिमा के सँदेस बतामँइ बाले, बड़ी सावधानी के साथ, इआ खोजबीन कइके भबिस्यबानी किहिन रहा हय। 11 अउर उनखे भीतर जउन मसीह के आत्मा रहा हय, उआ पहिलेन से इआ बताबत रहा हय, कि मसीह के ऊपर कइसन दुख अइहँय, अउर ओखे बाद कइसन उनखर महिमा होई। अउर मसीह के आत्मा उनहीं पंचन काहीं इहव बताबत रहा हय, कि ई बातँय कउने समय, अउर कउने दसा माहीं होइहँय, अउर ओखे बाद इआ संसार के का होई। 12 अउर उनहीं पंचन काहीं इआ बताबा ग रहा हय, कि ऊँ पंचे ई बातन काहीं बताइके आपन नहीं, बलकिन

तोंहार पंचन के सेबा करत हैं। अउर जउन खुसी के खबर अब तोंहई पंचन काहीं, ऊँ मनइन के द्वारा मिली हय, जिनहीं स्वरग से पबित्र आत्मा मिला रहा हय, अउर ऊँ पंचे ओहिन के बताए से, तोंहई पंचन काहीं खुसी के खबर सुनाइन रहा हय, अउर स्वरगदूत घलाय ई बातन काहीं देखई के बड़ी लालसा करत हैं।

### पबित्र जीवन जिअँइ के खातिर बोलाहट

13 एसे तूँ पंचे मानसिक रूप से सचेत रहा, अउर खुद काहीं काबू माही रखिके, उआ किरपा के खातिर पूरी आसा रक्खा, जउन तोंहई पंचन काहीं यीसु मसीह के दुसराय आमँइ के समय मिलँइ बाली हय। 14 एसे तूँ पंचे हुकुमन काहीं मानँइ बाले लड़िकन कि नाई बना, इआ नहीं कि जइसन तूँ पंचे पहिले, जब मसीह के ऊपर बिसुआस नहीं करत रहे आह्या, त बुरी इच्छन के मुताबिक जीवन जिअत रहे हया, त अब पहिले कि नाई पुनि न बना। 15 बलकिन जइसन तोंहई पंचन काहीं बोलामँइ बाले परमातिमा पबित्र हैं, उहयमेर तूँ पंचे अपने सगले चाल-चलन माहीं पबित्र बना। 16 काहेकि पबित्र सास्त्र माहीं घलाय इआ लिखा हय, कि परमातिमा कहत हैं, “पबित्र बना, काहेकि हम पबित्र हएन।” 17 अउर परमातिमा जउन बिना पच्छपात किहे, सगले मनइन के उनखे कामन के मुताबिक न्याय करत हैं, उनसे तूँ पंचे हे पिता, कहिके प्राथना करते हया, त अपने-आप काहीं परदेसी समझिके, परमातिमा काहीं सम्मान देत आपन जीवन बिताबा। 18 काहेकि तूँ पंचे खुदय जनते हया, कि तोंहार पंचन के निकम्मा चाल-चलन, जउन तोंहरे बाप-दादन से चला आय रहा हय, ओसे, तोंहई पंचन काहीं मुक्ती, नास होंइ बाले सोन-चाँदी से नहीं मिली आय। 19 बलकिन उआ मुक्ती तोंहई पंचन काहीं, निरदोस अउर निस्कलंक मेम्ना, अरथात मसीह के अनमोल खून के द्वारा मिली हय। 20 अउर मुक्ती देंइ के खातिर यीसु मसीह काहीं, संसार काहीं बनामँइ से पहिलेन चुनि लीन ग रहा हय, पय अब इआ अन्तिम जुग माहीं तोंहरे खातिर उनहीं प्रगट कीन ग हय। 21 अउर तूँ पंचे उँइन यीसु मसीह के कारन, परमातिमा के ऊपर बिसुआस करते हया, जउन यीसु मसीह काहीं मरेन म से पुनि जिआइके, उनहीं महिमा दिहिन, कि जउन तोंहार पंचन के आसा अउर बिसुआस परमातिमा के ऊपर होय।

22 एसे जब तूँ पंचे, भाईचारा के प्रेम के खातिर, सत्य के पालन कइके, अपने-अपने आत्मन काहीं पबित्र किहा हय, त तन- मन लगाइके आपस माहीं एक दुसरे से प्रेम करा। 23 काहेकि तूँ पंचे नास होंइ बाले बीज से नहीं, बलकिन कबहूँ न नास होंइ बाले बीज से, अरथात परमातिमा के जिन्दा अउर हमेसा ठहरँय बाले बचन से नबा जनम पाए हया। 24 अउर पबित्र सास्त्र माहीं लिखा हय, कि

“हरेक प्राणी चारा कि नाई होत हय, अउर ओखर सगली सुन्दरता, चारा के फूल कि नाई होत ही, अउर उआ चारा कि नाई झुराय जात हय, अउर फूल कि नाई झर जात हय।”

25 “पय प्रभू के बचन जुगन-जुगन तक अटल बना रही।

अउर इहय खुसी के खबर के बचन आय, जउन तोंहई पंचन काहीं सुनाबा ग रहा हय †।”

2 एसे तूँ पंचे अपने जीवन से हरेकमेर के बैर-भाव, छल-कपट, इरसा अउर बदनामी काहीं दूर कइके, 2 नबा पइदा भे बच्चन कि नाई सुद्ध आत्मिक दूध पामँइ के लालसा करा, जउने ओखे द्वारा मुक्ती पामँइ के खातिर आँगे बढ़त जा। 3 देखा, प्रभू केतना दयालू हैं, अब तूँ पंचे इआ जान लिहे हया।

### अनमोल जिअत पथरा अउर चुने प्रजा

4 उनखे लघे आबा, जिनहीं संसारिक मनई त बिना काम के ठहराइन हीं, पय ऊँ परमातिमा के द्वारा चुने अउर अनमोल जिअत पथरा आहीं। 5 अउर तूँ पंचे खुदय जिअत पथरा कि नाई, आत्मिक घर बनाए जाय रहे हया,

जउने याजकन के पबित्र समाज बनिके, अइसन आत्मिक बलिदान चढ़ाबा, जउन यीसु मसीह के द्वारा परमातिमा काहीं सोइकार होय। 6 अउर पबित्र सास्त्र माहीं घलाय इआ लिखा हय, कि परमातिमा कहिन हीं,

“देखा, हम सिष्योन पहार माहीं एकठे कोनमा के पथरा धरित हएन, जउन हमार चुना आय, अउर उआ अनमोल हय, एसे जे कोऊ ओखे ऊपर बिसुआस करी, उआ कउनव मेर से लज्जित न होई।”

7 एसे तूँ पंचे जउन उआ पथरा के ऊपर बिसुआस करते हया, उआ तोंहरे पंचन के खातिर अनमोल हय, पय जे कोऊ ओखे ऊपर बिसुआस नहीं करँय, उनखे खातिर

“जउने पथरा काहीं राजा के कारीगर लोग बिना काम के ठहराइन रहा हय, उहय कोने के खास पथरा बनिया †।” 8 अउर

“उआ अइसन पथरा बनिया जैसे मनइन काहीं ठेस लागत ही, अउर अइसन बड़ी चट्टान बनिया जउने से मनइन काहीं ठोकर लागत ही †।”

काहेकि ऊँ पंचे परमातिमा के बचन काहीं न मानिके ठोकर खात हैं, अउर ऊँ पंचे एहिन के खातिर ठहराए घलाय गे रहे हँय। 9 पय तूँ पंचे परमातिमा के चुने बंस आह्या, अउर राज पदधारी याजकन के समाज आह्या, अउर पबित्र मनई, अउर परमातिमा के खास प्रजा आह्या, अउर उँइन तोंहई पंचन काहीं, आँधिआर से निकारिके, अपने अदभुत जोति माहीं बोलाइन हीं, कि उनखे महिमा काहीं अपने जीवन से देखाबा। 10 एक समय अइसन रहा हय, जब तूँ पंचे परमातिमा के प्रजा नहीं रहे आह्या, पय अब तूँ पंचे परमातिमा के प्रजा बन गया हय, पहिले तोंहरे पंचन के ऊपर परमातिमा के दया नहीं भे रही आय, पय अब तोंहरे पंचन के ऊपर परमातिमा के दया भे ही।

### मसीही जबाबदारी

11 हे पियार भाई-बहिनिव, हम तोंहसे बिनती करित हएन, कि तूँ पंचे अपने-आप काहीं परदेसी, अउर यात्री जानिके, इआ संसार के उन बुरी अभिलासन से बचे रहा, जउन तोंहरे आत्मा से युद्ध करती हई। 12 गैर मसीही मनइन के बीच माहीं, तोंहार चाल-चलन निकहा होंइ चाही; एसे कि जउने-जउने बातन माहीं, ऊँ पंचे तोंहई कुकर्मी जानिके बदनाम करत हैं, ऊँ पंचे तोंहरे निकहे कामन काहीं देखिके; ईन निकहे कामन के कारन परमातिमा के न्याय करँइ बाले दिन काहीं, परमातिमा के बड़ाई करँय।

### परमातिमा के लोगन के फर्ज

13 अउर तूँ पंचे प्रभू के खातिर मनइन के ठहराए, हरेक अधिकारन के अधीन रहा, अउर राजा के अधीन एसे रहा, काहेकि ऊँ सगले मनइन के ऊपर प्रधान आहीं। 14 अउर हाकिमन के अधीन एसे रहा, काहेकि उनहीं कुकर्मीन काहीं सजा देंइ के खातिर, अउर सही काम करँइ बाले मनइन के बड़ाई करँइ के खातिर पठबा ग हय। 15 काहेकि परमातिमा के इहय मरजी ही, कि तूँ पंचे निकहे कामन काहीं करा, अउर निरबुद्धी मनइन के अग्यानता के बातन काहीं बन्द कइ द्या। 16 अउर तूँ पंचे अजाद मनई कि नाई जीवन जिआ, पय अपने अजादी काहीं बुराई करँइ के आड़ न बनाया, बलकिन परमातिमा के सेबकन कि नाई जीवन जिआ। 17 सगले मनइन के सम्मान करा, अपने बिसुआसी भाई-बहिनिन से प्रेम रक्खा, परमातिमा के भय माना, अउर राजा के सम्मान करा।

### मसीह हमार पंचन के आदर्स आहीं

18 हे दासव, हरेकमेर से भय के साथ, अपने मालिकन के अधीन रहा, निकहे अउर नम्र मालिकन भर के नहीं, बलकिन कठोर मालिकन के घलाय अधीन रहा। 19 काहेकि अगर कोऊ परमातिमा के बचन के मुताबिक जीवन जिअत, अन्याय से दुख अउर कस्ट सहत हय, त परमातिमा द्वारा ओखर बड़ाई होई। 20 पय अगर तूँ पंचे अपराध कइके मार खा, अउर धीरज धरा, त ओमा कउनव बड़ाई के बात नहीं आय, पय अगर तूँ पंचे निकहा काम कइके

† 1:25 यसा 40:6-8

†† 2:7 भज 118:22 † 2:8 यसा 8:14

दुख सहते हया, अउर धीरज धरते हया, त परमातिमा तोंहार बड़ाई करिहँय।<sup>21</sup> अउर तूँ पंचे एहिन के खातिर परमातिमा के द्वारा बोलाए गया हय, काहेकि मसीह घलाय तोंहरे खातिर दुख सहिके, तोंहई नमूना देखाइगे हँय, कि जउने तुहूँ पंचे उनहिन के पद चिन्हन माहीं चला।<sup>22</sup> अउर मसीह के बारे माहीं पबित्र सास्त्र माहीं लिखा हय, कि “न त ऊँ कउनव पापय किहिन, अउर न उनखे मुँहे से कउनव छल-कपट के बातँय निकरीं।<sup>23</sup> अउर न त ऊँ गारी सुनिके कबहूँ गारिन दिहिन, अउर दुख काहीं सहिके ऊँ कोहू काहीं धमकी नहीं देत रहे आँय, बलकिन अपने-आप काहीं सही न्याय करँइ बाले परमातिमा के हाँथ माहीं सउँपि देत रहे हँय।”<sup>24</sup> ऊँ खुदय हमरे पंचन के पापन काहीं अपने देह के ऊपर लए कूस माहीं चढिगें, जउने हम पंचे पाप के सम्बन्ध से पूरी तरह से मुक्त होइके, परमातिमा के नजर माहीं जउन निकहा हय, उहय करी; अउर उनहिन के मार खाँइ से तूँ पंचे चंगे भया हय।<sup>25</sup> काहेकि तूँ पंचे पहिले भटकी गड़न कि नाई रहे हया, पय अब अपने प्रान के रखबारी करँइ बाले, अउर मुखिया, अरथात परमातिमा के लघे पुनि आय गए हया।

### मेहेरिआ-मंसेरुआ के बारे माहीं पतरस के सिच्छा

3 हे मेहेरिअव, तुहूँ पंचे अपने-अपने मंसेरुआ के अधीन रहा, एसे अगर उनमा से कउनव अइसन होंय, जउन परमातिमा के बचन काहीं न मानत होंय,<sup>2</sup> तऊ ऊँ पंचे तोंहरे मान-सम्मान समेत, पबित्र चाल-चलन काहीं देखिके, अपने-अपने मेहेरिआ के चाल-चलन के द्वारा परमातिमा के तरफ खिंचे चले आमँय। उनहीं पंचन काहीं प्रभू के बारे माहीं बेर-बेर बतामँइ के जरूरत न परी।<sup>3</sup> अउर तोंहार पंचन के सिंगार देखाला के खातिर न होय, जइसन कि बार गुहब, अउर सोन-चाँदी के गहना पहिरब, इआ कि मेर-मेर के ओन्हा पहिरब।<sup>4</sup> बलकिन तोंहार पंचन के सिंगार त मन के भीतर छिपा निकहा सुभाव होंइ चाही, जइसन नम्रता, अउर मन के दीनता के कबहूँ न नास होंइ बाली सजाबट, से सजे रहब, काहेकि परमातिमा के नजर माहीं एखर बड़ी कीमत ही।<sup>5</sup> अउर पुरान समय माहीं घलाय, जउन मेहेरिआ पबित्र रही हई, ऊँ पंचे परमातिमा के ऊपर पूर आसा रक्खत रही हँय, अउर अपने-आप काहीं इहइमेर सजाबत रही हँय, अउर अपने-अपने मंसेरुआ के अधीन रहत रही हँय।<sup>6</sup> जइसन सारा अपने मंसेरुआ अब्राहम के हुकुम मानत रही हँय, अउर उनहीं स्वामी कहत रही हँय। इहइमेर अगर तुहूँ पंचे घलाय, बिना डेराने भलाई के निकहे काम करिहा, त उनखर बिटिया कहइहा।<sup>7</sup> उहयमेर हे मंसेरुअव, तुहूँ पंचे घलाय अपने-अपने मेहेरिआ के साथ समझदारी से जीवन निरबाह करा। अउर उनहीं कमजोर जानिके, उनखर सम्मान करा। इआ समझिके, कि हम पंचे दोनव जने अनन्त जीवन के बरदान के बारिसदार आहैन। जउने तोंहार पंचन के प्राथना परमातिमा के लघे तक पहुँचय से न रुकय।

### भलाई करँइ के कारन सताव

8 एसे सगले जन एक मन रहा, अउर एक दुसरे के ऊपर किरपा करत रहा, अउर आपस माहीं भाईचारा के प्रेम बनाए रहा, अउर दयालू, अउर नम्र बना।<sup>9</sup> अउर बुराई के बदले माहीं बुराई न किहा, अउर गारी के बदले माहीं गारिव न दिहा, बलकिन गारी के बदले माहीं आसिरबाद दिहा। काहेकि तूँ पंचे एहिन खातिर बोलाए गए हया, जउने परमातिमा के आसिरबाद पामँइ के बारिसदार बन जा।<sup>10</sup> काहेकि

“जे कोऊ अनन्त जीवन पामँइ चाहत हय, अउर परमातिमा के निकहे दिन देखँइ चाहत हय, त उआ अपने जीभ काहीं बुराई करँइ से, अउर अपने मुँहे काहीं छल-कपट के बातँय करँय से रोंके रहय।

<sup>11</sup> अउर उआ बुराई के साथ छोंडिके, भलाई करय; अउर उआ मेल-मिलाप करँइ के कोसिस माहीं लगा रहय †।”

<sup>12</sup> काहेकि “प्रभू के आँखी, परमातिमा के नजर माहीं निकहा काम करँइ बाले मनइन के ऊपर लगी रहती हई, अउर उनखर कान, उनखे पंचन के बिनती काहीं बड़े ध्यान से सुनत हैं। पय प्रभू, बुराई करँइ बाले मनइन के बिरोध माहीं रहत हैं।”

<sup>13</sup> एसे अगर तूँ पंचे हमेसा भलाई करँइ माहीं लगे रइहा, त तोंहार पंचन के बुराई कोऊ नहीं कइ सकय।<sup>14</sup> अउर अगर तूँ पंचे भलाई के काम करँइ के कारन दुखव उठउते हया, त धन्य हया। पय मनइन के डेरबाए से न डेरया, अउर न घबरया।<sup>15</sup> बलकिन मसीह काहीं आपन प्रभू मानिके, अपने-अपने मन काहीं पबित्र रख्या, अउर जे कोऊ तोंहरे आसा के बारे माहीं पूँछँय, त तूँ पंचे नम्रता अउर परमातिमा के भय के साथ, जबाब देइ के खातिर हमेसा तइआर रख्या।<sup>16</sup> अउर तूँ पंचे अपने सोच-बिचार काहीं सुद्ध रख्या, एसे कि जउने बातन के बारे माहीं तोंहार बदनामी होत ही। ओखे बारे माहीं, जउन तोंहरे मसीही चाल-चलन के अपमान करत हैं, ऊँ लज्जित होइ जाँय।

<sup>17</sup> काहेकि अगर परमातिमा के इहय मरजी हय, कि तूँ पंचे दुख उठाबा, त बुराई के कारन दुख उठामँइ से निकहा हय, कि तूँ पंचे भलाई करँइ के कारन दुख उठाबा।<sup>18</sup> काहेकि मसीह घलाय हमरे पंचन के पापन के बदले माहीं, दुख उठाइन हीं, अरथात ऊँ निरदोस रहे हँय, तऊ हम पंचे जउन पापी रहेन हँय, हमरे खातिर एक बेरकी मरिगें, कि जउने हमहीं पंचन काहीं परमातिमा के लघे लइ आमँय। मसीह सारीरिक रूप से त मारे गें, पय आत्मिक रूप से जिआय दीनगें।<sup>19</sup> अउर आत्म्य के रूप माहीं, यीसु जाइके ऊँ आत्मन काहीं घलाय प्रचार किहिन, जउन बन्धन माहीं परी रही हँय।<sup>20</sup> अउर नूह के समय माहीं घलाय, जे कोऊ परमातिमा के हुकुम काहीं नहीं मानिन तय। त परमातिमा नूह के जिहाज बनत तक धीरज धरे, रुके रहे हँय। ओखे बाद जल-प्रलय के कारन, जिहाज माहीं चढिके केबल आठ जने, अरथात नूह के परिवार भर बचे रहे हँय, बाँकी पानी माहीं बूडिके मरिगें तँय।<sup>21</sup> अउर इआ पानी बपतिस्मा के निसानी आय, जउने से अब तोंहई पंचन काहीं मुक्ती मिलत ही। बपतिस्मा के मतलब देह के मइल धोउब न होय, बलकिन बपतिस्मा के द्वारा सुद्ध हिरदँय से, खुद काहीं परमातिमा के खातिर समरपित करब आय। इआ बपतिस्मा, यीसु मसीह के मरेन म से पुनि जि उठँय के द्वारा, हमहीं पंचन काहीं मुक्ती देत हय।<sup>22</sup> अउर यीसु मसीह स्वर्ग माहीं ऊपर जाइके, परमातिमा के दहिने कइती बइठिगें हँय; अउर स्वर्ग के दूत, अउर सगले अधिकारी, अउर सगली सक्ती, सब उनखे अधीन कइ दीनगें हँय।

### बदले जीवन के बारे माहीं सिच्छा

4 एसे जब मसीह अपने देह माहीं दुख उठाइन हीं, त तुहूँ पंचे घलाय उनहिन कि नाई सोच-बिचार काहीं अपनाय ल्या। काहेकि जे कोऊ अपने देह माहीं दुख उठाबत हय, त उआ पाप के सम्बन्ध से मुक्ती पाय चुका हय।<sup>2</sup> एसे तूँ पंचे संसार के बाँकी आपन जीवन, मनइन के बुरी अभिलासन के मुताबिक नहीं, बलकिन परमातिमा के मरजी के मुताबिक बिताबा।<sup>3</sup> काहेकि तूँ पंचे, अबे तक जउन मनई परमातिमा काहीं नहीं जानँय, उनखे कि नाई, आपन जीवन बिताबत रहे हया, जइसन लुचपन के बुरी अभिलासन माहीं, मतबालापन माहीं, भोग-बिलास माहीं, खुब दारू पिअँइ माहीं, मूरतिन के पूजा माहीं, जउने से परमातिमा नफरत करत हैं। ई कामन माहीं तूँ पंचे पहिलेन खुब समय गमाय चुके हया, उहय खुब होइगा।<sup>4</sup> अउर अब तूँ पंचे उनखे लुचपन के भारी कामन माहीं, उनखर साथ नहीं देते आह्या, एसे ऊँ पंचे अचरज मानत हैं, अउर तोहई पंचन काहीं भला-बुरा कहत हैं।<sup>5</sup> पय उनहीं पंचन काहीं अपने ई बुरे कामन के हिंसाब, परमातिमा काहीं देइ परी, जउन जिन्दा अउर मरे दोनव के न्याय करँइ काहीं तइआर हैं।<sup>6</sup> एहिन से ऊँ बिसुआसी भाई-बहिनिन काहीं जउन मर चुके हँय, खुसी के खबर सुनाई गे रही हय, कि जउने देह माहीं त उनखर न्याय मनइन के मुताबिक होय, पय आत्मिक रूप माहीं, ऊँ पंचे परमातिमा के मुताबिक जिअत रहँय।

### परमातिमा के निकहा भन्दारी

7 सगले संसार के अन्त लघेन आइगा हय, एसे तूँ पंचे संयमी अउर समझदार बना, कि जउने प्रार्थना कइ सका। 8 अउर सबसे बड़ी बात त इआ हय, कि एक दुसरे से जादा से जादा प्रेम करा; काहेकि प्रेम अनगिनत पापन काहीं मुँद देत हय। 9 अउर बिना कुड़-कुड़ाए, एक दुसरे के निकहा स्वागत-सत्कार करा। 10 अउर परमातिमा से जेही जउन बरदान मिला हय, ओही परमातिमा के अनेकव प्रकार के किरपा माहीं, निकहे भन्दारिन कि नाई एक दुसरे के सेवा माहीं लगामँड चाही। 11 अउर अगर कोऊ बोलत हय, त अइसन बोलय मानो परमातिमा के बचन आय; अगर कोऊ सेवा करय; त उआ सक्ती से करय जउन परमातिमा ओही देत हैं; जउने हरेक बातन माहीं यीसु मसीह के द्वारा परमातिमा के बड़ाई होय, काहेकि बड़ाई अउर अधिकार जुग-जुग तक उनहिन के आय। आमीन।

### मसीह के दुखन माहीं भागीदार होब

12 हे पियार साथिव, तौहई पंचन काहीं जाँचय-परखँय के खातिर, जउन दुख रूपी आगी तौहरे पंचन के बीच माहीं भड़क उठी हय, त इआ समझिके अचरज न माना, कि कउनव अनहोनी आय घट रही हय। 13 पय जइसय-जइसय तूँ पंचे मसीह के दुखन माहीं भागीदार होते हया, त आनन्द मनाबा, जउने जब मसीह के महिमा प्रगट होय, त तूँ पंचे खुब आनन्दित अउर मगन होइ सका। 14 अउर अगर मसीह के नाम के खातिर, मनई तौहार पंचन के अपमान करत हैं, त तूँ पंचे धन्य हया; काहेकि महिमा के आत्मा जउन परमातिमा के आत्मा आय, तौहरे भीतर निवास करत हय। 15 पय तूँ पंचे इआ ध्यान रख्या, कि तौहरे पंचन के बीच म से कउनव मनई, मसीह के नाम के अलाबा, कतल करँड के कारन, इआ कि चोरी करँड के कारन, इआ कि कुकर्मी होइ के कारन, इआ कि दुसरे के काम माहीं टाँग अडामँड के कारन दुख न पाबय। 16 पय अगर मसीह के ऊपर बिसुआस किहे के कारन, दुख पाबत हय, त उआ लज्जित न होय, बलकिन इआ बात के खातिर परमातिमा के बड़ाई करय। 17 काहेकि उआ समय आइगा हय, कि पहिले परमातिमा के ऊपर बिसुआस करँड बाले मनइन के न्याय कीन जाय। अउर जब न्याय के सुरुआत, हमहिन पंचन से होई। त उनखर अन्त माहीं का हाल होई, जउन परमातिमा के खुसी के खबर काहीं नहीं मानँय? 18 अउर “अगर धरमी † मनई बड़े मुसकिल से मुक्ती पाई, त पापी अउर भक्तिहीन मनई के त कउनव ठिकानय न होई।”

19 एसे जे कोऊ परमातिमा के मरजी के मुताबिक दुख उठाबत हैं, ऊँ पंचे भलाई के काम करत, अपने-अपने प्रान काहीं बिसुआस के काबिल संसार के रचइता परमातिमा के हाँथे माहीं सउँपि देंय।

मसीही मन्डली के अँगुअन अउर नए बिसुआसिन काहीं पवलुस के सँदेस

5 तौहरे पंचन के बीच माहीं जउन मसीही मन्डली के अँगुआ हैं, हमहूँ उनहिन कि नाई अँगुआ हएन, अउर मसीह जउन दुख सहिन हीं, हम

† 4:18 नीति 11:31

ओखर गबाह हएन, अउर प्रगट होइ बाली महिमा माहीं भागीदार होइके, उनहीं पंचन काहीं इआ समझाइत हएन। 2 कि परमातिमा के उआ झुन्ड के रखबारी करा, जउन तौहई पंचन काहीं सउँपा ग हय, अउर इआ काम कउनव दबाव से नहीं, बलकिन परमातिमा के मरजी के मुताबिक, बड़े खुसी के साथ पूरे मन से किहा। अउर इआ काम नीच कमाई के खातिर न किहा। 3 अउर जउन झुन्ड तौहई पंचन काहीं रखबारी के खातिर सउँपा ग हय, उनखे ऊपर आपन अधिकार न जताबा, बलकिन झुन्ड के खातिर आदर्स बना। 4 अउर जब संसार के रखबारी करँड बाले परमप्रधान अइहँय, त तौहई पंचन काहीं महिमा के मुकुट दीन जई, जउन कबहूँ न मुरझाई। 5 इहइमेर से हे नवजमानव, तूँ पंचे घलाय अपने मसीही मन्डली के अँगुअन के अधीन रहा, अउर तूँ पंचे सगले जन नम्रता के साथ एक दुसरे के सेवा के खातिर, हमेसा तइआर रहा, काहेकि “परमातिमा † घमन्ड करँड बालेन के बिरोध करत हैं, पय जे कउनव बात के घमन्ड नहीं करँय, उनखे ऊपर किरपा करत हैं।” 6 एसे तूँ पंचे परमातिमा के बलमान हाँथ के नीचे नम्रता के साथ रहा, जउने ऊँ तौहई उचित समय माहीं बढ़ामँय। 7 अउर आपन सगली चिन्ता उनहिन के ऊपर डार द्या, काहेकि उनहीं हमेसा तौहार पंचन के ख्याल रहत हय। 8 अउर तूँ पंचे सचेत होइके, हमेसा परमातिमा के बचन माहीं बने रहा, काहेकि तौहार बड़री सइतान, गरजँय बाले सेर कि नाई, हमेसा इआ खोज माहीं रहत हय, कि केही परमातिमा के बचन से भटकाय देई। 9 अउर तूँ पंचे बिसुआस माहीं मजबूत होइके, ओखर सामना करा, काहेकि तूँ पंचे जनते हया, कि सगले संसार के तौहार मसीही भाई-बहिनी घलाय, इआमेर के दुख भोग रहे हँय। 10 अउर अब परमातिमा जउन अनन्त किरपा के सोता आहीं। उँडन तौहई मसीह के द्वारा अपने अनन्त महिमा माहीं बोलाइन हीं, तौहई थोरी देर तक दुख भोगे के बाद, खुदय तौहई बिसुआस माहीं मजबूत, स्थिर, अउर बलमान कइ देइहँय। 11 उनखर अधिकार जुग-जुग तक बना रहय। आमीन।

### पतरस के आखिरी नबस्कार

12 हम आपन इआ चिट्ठी सिलबानुस के हाँथे से पठइत हएन, जिनहीं हम बिसुआस के काबिल आपन भाई मानित हएन, अउर अपने इआ चिट्ठी माहीं संछेप माहीं लिखिके, तौहई पंचन काहीं इआ समझामँड के कोसिस किहेन हय, अउर इआ गबाही दिहेन हय, कि परमातिमा के सच्ची किरपा इहय आय, कि तूँ पंचे उनखे ऊपर बिसुआस माहीं स्थिर रहा। 13 अउर बेबीलोन प्रदेस माहीं जउन तौहरेन पंचन कि नाई परमातिमा के चुने बिसुआसी भाई-बहिनी हैं, ऊँ पंचे, अउर मसीह के ऊपर बिसुआस करँड के कारन, मरकुस जउन हमरे लड़िका कि नाई हैं, तौहई नबस्कार करत हैं। 14 अउर तूँ पंचे बड़े प्रेम के साथ खुसी से एक दुसरे से गले मिलिके नबस्कार करा। अउर तूँ पंचे जेतने जन मसीह के ऊपर बिसुआस करते हया, मसीह के सान्ती तौहई पंचन काहीं मिलत रहय।

†† 5:5 नीति 3:34

## 2 पतरस

### इआ चिट्ठी के परिचय

पतरस के इआ चिट्ठी सुरुआत माहीं यीसु मसीह के ऊपर बिसुआस करँइ बाले, खुब बड़े एकठे समुदाय के खातिर लिखी गे रही हय। इआ चिट्ठी के मुख्य चिन्ता के बात, लबरी सिच्छा देँइ बाले सिच्छकन के काम, अउर उनखे सिच्छा से उत्पन्न बुराई के बिरोध माहीं संघर्स करब हय। ई समस्यन के जबाब परमातिमा अउर प्रभू यीसु मसीह के सच्चे ग्यान माहीं बने रहँइ से मिलत हय, उआ ग्यान जउन ऊँ लोगन के द्वारा पहुँचाबा ग हय, जउन खुदय मसीह काहीं देखिन हीं, अउर उनखे सिच्छन काहीं सुनिन हीं। लेखक खास करके ऊँ मनइन के सिच्छन से चिन्तित हैं, जउन दाबा करत हैं, कि मसीह पुनि वापिस न अइहँय। लेखक कहत हैं, कि अइसन मालुम होत हय, कि यीसु मसीह के पुनि आमँइ माहीं देरी होइ रही हय, पय बास्तव माहीं अइसा एसे होइ रहा हय, कि “परमातिमा नहीं चाहँय कि कउनव मनई नास होंय, बलकिन सब काहीं अपने जीवन काहीं बदलँइ के मोका मिलय।”

रूप-रेखा :

किताब के परिचय  
मसीही बोलाहट  
लबरे सिच्छकन के बारे माहीं  
मसीह के दुसराय आउब

### पतरस के अभिबादन

1 हम समौन पतरस इआ चिट्ठी काहीं लिख रहेन हय, जउन यीसु मसीह के दास अउर खास चेला आहैन। हम इआ चिट्ठी ऊँ मनइन काहीं लिख रहेन हय, जउन हमरे पंचन के परमातिमा, अउर मुक्ती देँइ बाले यीसु मसीह जउन हमहीं पंचन काहीं, परमातिमा के नजर माहीं निरदोस बनाइन हीं, उनहिन के द्वारा हमरे पंचन कि नाई, ऊँ पंचे घलाय खुब कीमती बिसुआस पाइन हीं।

<sup>2</sup> तूँ पंचे परमातिमा, अउर हमरे पंचन के प्रभू यीसु काहीं जान चुके हया, एसे तौहँई परमातिमा के किरपा अउर सान्ती जादा से जादा मिलत रहय।

### परमातिमा के बोलाहट काहीं निकहा से समझा

3 परमातिमा अपने सक्ती से भक्तिमय जीवन जिअँइ के खातिर, अउर उनखे सेबा के खातिर, जउन कुछ हमहीं पंचन काहीं चाही, उआ सब कुछ दिहिन हीं। अउर हमहीं पंचन काहीं अपने ग्यान काहीं पामँइ के काबिल बनाइन हीं, अउर ऊँ हमहीं पंचन काहीं अपने महिमा अउर प्रताप के मुताबिक बोलाइन हीं।<sup>4</sup> जिनखे द्वारा ऊँ हमसे पंचन से खुब कीमती, अउर खुब बड़े वादन काहीं किहिन हीं, जउने तूँ पंचे ई वादन के द्वारा, संसार के बुरी अभिलासन से होइ बाली सड़ाहट से छूटिजा, अउर परमातिमा के सुभाव कि नाई तौहरव सुभाव होइ जाय।<sup>5</sup> अउर इहय कारन तूँ पंचे हरेकमेर से कोसिस कइके, अपने बिसुआस माहीं उत्तम गुनन काहीं, अउर उत्तम गुनन माहीं ग्यान काहीं,<sup>6</sup> अउर ग्यान माहीं आत्मसंयम काहीं, अउर आत्मसंयम माहीं धीरज काहीं, अउर धीरज माहीं परमातिमा के भक्ती काहीं,<sup>7</sup> अउर भक्ती माहीं भाईचारा के दया, अउर भाईचारा के दया माहीं प्रेम काहीं बढ़ाबत चला।<sup>8</sup> काहेकि अगर ई सगली बातें तौहरे पंचन के जीवन माहीं बनी रहँय, अउर बढ़त जइहँय, त तोहँई पंचन काहीं, हमरे पंचन के प्रभू यीसु मसीह काहीं पहिचानय माहीं निस्फल, अउर निकम्मा न होइ देइहँय।<sup>9</sup> एसे जउने मनई के जीवन माहीं ई बातें नहिं आहीं, त उआ आत्मिक रूप से आँधर हय, अउर ओही धुंधुरुक देखात हय, काहेकि उआ

अपने पहिले के पापन से धोबरिके सुद्ध होइ काहीं, बिसरि ग हय।<sup>10</sup> एसे हे भाई-बहिनिव, इआ साबित करँइ के खातिर, अउर जादा कोसिस करा, कि तौहँई पंचन काहीं, बास्तव माहीं परमातिमा के द्वारा बोलाबा ग हय, अउर चुना ग हय, काहेकि अगर तूँ पंचे ई बातन काहीं करत रइहा, त न कबहूँ ठोकरय खइहा, अउर न त कबहूँ बिसुआस से भटकबय करिहा।<sup>11</sup> बलकिन इआमेर से तौहार पंचन के, हमरे पंचन के प्रभू अउर मुक्ती देँइ बाले यीसु मसीह के अनन्त राज माहीं, बड़े आदर के साथ स्वागत कीन जई।

### मसीह के महिमा काहीं अपने आँखिन से देखँइ बाले गबाह

<sup>12</sup> जबकि तूँ पंचे, ई सगली बातन काहीं जनते हया, अउर जउने सत्य काहीं तूँ पंचे पाय गया हय, ओमाहीं बने रहते हया, तऊ हम ई बातन के सुध तौहँई पंचन काहीं देबाबत रहब।<sup>13</sup> अउर हम इआ बात काहीं अपने खातिर उचित समझित हएन, कि जब तक हम इआ देह रूपी डेरा माहीं हएन, तब तक तौहँई पंचन काहीं सुध देबाइके उत्साहित करत रही।<sup>14</sup> काहेकि हम इआ जानित हएन, कि हमरे देह रूपी डेरा के गिराए जाँइ के समय हरबिन आमँइ बाला हय। जइसन कि हमार पंचन के प्रभू यीसु मसीह हमहीं स्पष्ट रूप से बताइन हीं।<sup>15</sup> एसे हम इआ कोसिस करब, कि हमरे मरे के बादव, तूँ पंचे ई सगली बातन काहीं हमेसा सुध कइ सका।

<sup>16</sup> काहेकि जब हम पंचे, तौहँई अपने प्रभू यीसु मसीह के सामर्थ के, अउर उनखे आमँइ के खबर बतायन तय, त उआ कहानी अपने हुसिआरी से गढ़िके न होय बतायन तय, बलकिन जउन हम पंचे अपने आँखिन से उनखे महिमा काहीं देखन तय, उहय बतायन हय।<sup>17</sup> काहेकि जब ऊँ पिता परमातिमा से आदर अउर महिमा पाइन, अउर परमातिमा के उआ महिमा म से इआ बोल सुनान, कि “ई हमार पियार लड़िका आहीं, हम इनसे प्रसन्न हएन।”<sup>18</sup> अउर जब हम पंचे उनखे साथ, पबित्र पहार माहीं रहेन हय, तबहिनव हम खुदय स्वरग से इहय बानी आबत सुनेन तय।<sup>19</sup> अउर हमरे पंचन के लघे, जउन परमातिमा के सँदेस बतामँइ बालेन के बचन हय, उआ इआ घटना से अउर मजबूत होइगा हय। अउर तूँ पंचे इआ निकहा करते हया, जउन इआ समझिके ओखे ऊपर ध्यान करते हया, कि उआ एकठे

दिया आय, जउन अँधिआर जघा माहीं, तब तक उँजिआर करत रहत हय, जब तक भिनसार नहीं होइ जाय, अउर भिनसारे के तरइया तौहरे पंचन के हिरदँय माहीं चमक न उठय।<sup>20</sup> पय पहिले इआ जानिल्या, कि पबित्र सास्त्र के कउनव भबिस्यबानी, कउनव परमातिमा के सँदेस बतामँइ बालेन के निजी बिचार-धारन के मुताबिक नहीं होय।<sup>21</sup> काहेकि कउनव भबिस्यबानी मनई के मरजी से कबहूँ नहीं होय, बलकिन भक्त जन पबित्र आत्मा के द्वारा उभारे जाँय से परमातिमा के तरफ से बोलत रहे हँय।

### लबरी सिच्छा देंइ बाले मनइन के बारे माहीं

2 जउन मेर से इजराइली लोगन के बीच माहीं, कुछ मनई रहे हँय, जउन कहत रहे हँय, कि हम पंचे परमातिमा के सँदेस बतामँइ बाले आहने, पय बास्तव माहीं, उँ पंचे लबरी बोलँइ बाले रहे हँय। उहयमेर से तौहरेव पंचन के बीच माहीं, लबरी सिच्छा देंइ बाले उपदेसक होइहँय, जउन नास करँइ बाली लबरी सिच्छा के सुरुआत, लुक छिपिके करिहँय, अउर उँ पंचे प्रभू काहीं अपनामँइ से इनकार करिहँय, जउन उन्हीं मुक्ती दिहिन हीं। अउर खुद काहीं हरबिन बिनास होइ के काबिल बनाय लेइहँय।<sup>2</sup> अउर खुब मनई उनहिन कि नाई लुच्चई करत फिरिहँय, अउर इनहिन के कारन सत्य के गइल के बदनामी होई।<sup>3</sup> अउर उँ पंचे लालच के कारन, अपने बनावटी बातन से तौहसे पंचन से धन कर्मँइ हँय, उनखे इआ काम के सजा परमातिमा के द्वारा पहिलेन से निश्चित कीन जाय चुकी हय। अउर उनखर बिनास तइआर हय, अउर उनखर इन्तजार कइ रहा हय।

<sup>4</sup> काहेकि परमातिमा, पाप करँइ बाले स्वरगदूतन काहीं घलाय, जब माफ नहीं किहिन, बलकिन उन्हीं नरक माहीं पठइके अँधिआरे कुन्डन माहीं डार दिहिन हीं, जउने परमातिमा के न्याय करँइ के दिन तक कइदी रहँय।<sup>5</sup> अउर उँ पुरान संसार काहीं घलाय नहीं बचाइन, बलकिन परमातिमा के बचन काहीं न मानँइ बाले संसार काहीं, पानी के महाप्रलय द्वारा नास कइ दिहिन, पय परमातिमा के सँदेस के प्रचार करँइ बाले नूह, अउर उनखे साथ सातठे अउर मनइन काहीं घलाय बचाय लिहिन।<sup>6</sup> अउर पाप से भरे सदोम अउर अमोरा सहरन काहीं, बिनास के अइसन सजा दिहिन, कि उन्हीं भसम कइके राख माहीं मिलाय दिहिन, जउने आमँइ बाले समय माहीं, परमातिमा के बचन काहीं न मानँइ बाले, मनइन के सिच्छा के खातिर एकठे उदाहरन बनय।<sup>7</sup> अउर उनमा से परमातिमा के हुकुम काहीं मानिके चलँइ बाले लूत काहीं, जउन परमातिमा के हुकुमन काहीं न मानँइ बाले मनइन के असुद्ध चाल-चलन से, खुब दुखी रहत रहे हँय, उन्हीं मुक्ती दिहिन।<sup>8</sup> (काहेकि उँ परमातिमा के हुकुम काहीं मानँइ बाले रहे हँय, अउर उनखे बीच माहीं रहत, अउर उनखे अधरम के कामन काहीं देख देखिके, अउर सुन सुनिके, उँ अधरम के कामन के कारन हरेक दिन अपने सच्चे मन काहीं दुखी करत रहे हँय।)<sup>9</sup> इआमेर से प्रभू, अपने भक्तन काहीं परिच्छा म से निकारब, अउर अपने हुकुम न मानँइ बालेन काहीं, अपने न्याय करँइ के दिन तक, सजा के दसा माहीं रक्खब घलाय जानत हैं।<sup>10</sup> खास करके उन्हीं जउन असुद्ध अभिलासन के पीछे, अउर अपने मन के बुरी इच्छन के मुताबिक चलत हैं, अउर प्रभू के अधिकार काहीं तुच्छ जानत हैं, उँ पंचे एतने घमन्डी हँय, कि महिमामय स्वरगदूतन के अपमान करँइ से घलाय नहीं डेरॉय।

<sup>11</sup> पय स्वरगदूत जउन सक्ती अउर सामर्थ्य माहीं उनसे बड़े हँय, तऊ प्रभू के आँगे उन्हीं भला-बुरा कहिके, उनखे ऊपर दोस नहीं लगामँय।<sup>12</sup> पय उँ पंचे निरबुद्धी पसुअन कि नाई हैं, जउन पकड़े जाँइ अउर नास होइ के खातिर पइदा भें हँय; अउर जउने बातन काहीं जनतय नहिं आहीं, उनहिन के बारे माहीं दुसरे मनइन काहीं भला-बुरा कहत हैं, उँ पंचे अपने बुरे कामन के कारन खुदय नास होइ जइहँय।<sup>13</sup> दुसरे मनइन के बुरा करँइ के बदले माहीं, उन्हीं सजा मिली; काहेकि उन्हीं सगला दिन भोग-बिलास करब निकहा लागत हय; उँ पंचे कलंकित हैं, अउर बुराई से भरे हँय। जब उँ पंचे तौहरे साथ खात-पिअत हैं, त उँ पंचे अपनी कइती से प्रेम-भोज कइके, अउर छल-कपट के बात कइके आनन्द लेत हैं।<sup>14</sup> काहेकि उनखे आँखिन

माहीं ब्यभिचार बसा हय, अउर उँ पंचे पाप किहे बिना रुकिन नहीं सकँय; उँ पंचे चंचल मन बालेन काहीं, लहाय-फुसलाय लेत हैं; उनखे मनन काहीं लोभ करँइ के आदत होइगे ही, अउर उँ पंचे परमातिमा के तरफ से सापित हैं।<sup>15</sup> उँ पंचे सीध गइल काहीं छोड़िके भटकियों हँय, अउर बओर के लड़िका बिलाम के बताए गइल माहीं चलँइ लागें हँय; जउन खुब समय पहिले अधरम के मजूरी काहीं पियार जानिस रहा हय।<sup>16</sup> पय ओखे अपराध के बारे माहीं उलाहना दीनगे, इहाँ तक कि न बोलँइ बाली गदही तक मनइन कि नाई बोलिके, परमातिमा के सँदेस बतामँइ बाले काहीं, ओखे पागलपन से ओही रोकिस।<sup>17</sup> उँ पंचे अँधिआर कुँआ कि नाई बिना काम के हँय, अउर आँधी के उड़ाए बदरी कि नाई हँय, उनखे खातिर अनन्तकाल के अँधिआर के सजा ठहराई गे ही।<sup>18</sup> अउर उँ पंचे बेकार के घमन्ड बाली बातँय कइके, अउर अपने लुचपन के कामन के द्वारा, उन्हीं अपने मन के बुरी इच्छन माहीं फसाय लेत हैं, जउन भटकेन म से अबहिनय बिसुआस माहीं लउटि रहे हँय।<sup>19</sup> उँ पंचे उन्हीं अजाद करँइ के वादा त करत हैं, पय खुदय मन के बुरी इच्छन के गुलामी माहीं फँसे हँय, काहेकि जउन मनई जेखे अधीन होइ जात हय, त उआ ओहिन के दास बन जात हय।<sup>20</sup> एसे कि जब उँ पंचे हमरे पंचन के प्रभू अउर मुक्ती देंइ बाले, यीसु मसीह के ऊपर बिसुआस किहे के द्वारा संसार के अनेकव प्रकार के बुराइन से बच निकरें तय, अउर पुनि ओहिन माहीं फँसिके हार गे हँय, त उनखर दसा पहिले से अउर जादा खराब होइगे ही।<sup>21</sup> काहेकि परमातिमा के सच्चाई काहीं न जानब, उनखे खातिर एसे निकहा होत, कि ओही जानिके, उआ पबित्र हुकुम काहीं न मनते, जउन उन्हीं दीनगे रही हय। एसे उनखे ऊपर इआ कहाबत ठीक बइठत ही,<sup>22</sup> कि “कुकुर अपने उलटी कइती, अउर नहबाई सुमरी काँदव माहीं लोटँय के खातिर पुनि चली जात ही।”

### प्रभू के दुसराय आमँइ के दिन

3 हे पियार साथिव, अब हमार इआ दूसर चिट्ठी आय, जउन तौहरे खातिर लिख रहेन हय, अउर अपने दोनव चिट्ठिन माहीं तौहई पंचन काहीं सुधि देबाइके, तौहरे सुद्ध मन काहीं जगामँय के कोसिस किहेन हय।<sup>2</sup> जउने तूँ पंचे परमातिमा के सँदेस बतामँइ बाले पबित्र लोगन के द्वारा, पहिलेन से कही, उँ बातन काहीं सुधि करा, अउर हमही पंचन काहीं मुक्ती देंइ बाले प्रभू के हुकुमन काहीं, जउन तौहरे बीच माहीं सेबा करँइ बाले, यीसु मसीह के खास चलन के द्वारा तौहई बताबा ग रहा हय, उन्हीं सुधि रक्खा।<sup>3</sup> अउर तूँ पंचे इहव जानिल्या, कि अन्त के दिनन माहीं, हँसी मजाक करँइ बाले अइहँय, जउन अपनेन मन के बुरी इच्छन के मुताबिक चलिहँय।<sup>4</sup> अउर कइहँय, कि प्रभू के दुसराय आमँइ के वादा कहाँ चला ग? काहेकि जब से सगले बाप-दादा इआ दुनिया से चलेंगे, तब से अबे तक सब कुछ उहयमेर हय, जइसन इआ संसार के सुरुआत से रहा हय? <sup>5</sup> काहेकि उँ पंचे जान बूझिके इआमेर कहत हैं, अउर इआ बिसरिगें हँय, कि परमातिमा के बचन के द्वारा अकास पुरान समय से लइके अबे तक बना हय, अउर धरती घलाय पानी से बनी हय, अउर पानिन माहीं स्थिर ही।<sup>6</sup> अउर इहय कारन से उआ जुग के संसार पानी के महाप्रलय से, पानी माहीं बूडिके नास होइगा रहा हय।<sup>7</sup> पय इआ बर्तमान समय के अकास अउर धरती, परमातिमा के उहय बचन के द्वारा एहिन खातिर बचे हँय, कि उँ जराए जाँय; अउर इआ संसार परमातिमा के ऊपर बिसुआस न करँइ बाले, मनइन के न्याय अउर नास होइ के दिन तक इहइमेर बचा रही।

<sup>8</sup> हे पियार साथिव, तूँ पंचे इआ बात काहीं निकहा से जानिल्या, कि प्रभू के खातिर एक दिन, हजार बरिस के बराबर हय, अउर हजार बरिस, एक दिन के बराबर हय।<sup>9</sup> अउर इआ जानिल्या, कि प्रभू अपने वादा काहीं पूर करँइ के बारे माहीं, कबहूँ देरी नहीं करँय, जइसन देरी कुछ मनई समझत हैं। पय परमातिमा तौहरे बारे माहीं धीरज धरत हैं, अउर उँ नहीं चाहँय, कि कउनव मनई नास होंय; बलकिन उँ इआ चाहत हैं, कि सगले मनइन काहीं अपने पापन से पस्चाताप कइके, प्रभू के लचे आमँइ के मोका मिलय।



<sup>10</sup> पय प्रभू के दुसराय आमँड के दिन, चोर कि नाई अचानक आय जई, अउर उआ दिन भयंकर गरजन के साथ अकास हेराय जई, अउर अकास के सगली चीजँय, आगी माहीं जरिके नास होइ जइहँय। अउर इआ धरती, अउर एखे ऊपर के सगले काम जरि जइहँय। <sup>11</sup> त इआ बताबा, जब ई सगली चीजँय, इआमेर से पिघलँय बाली हई, त तौहई पंचन काहीं पबित्र चाल-चलन के साथ, परमातिमा के भक्ती करत, पबित्र जीवन जिअँइ चाही। <sup>12</sup> अउर तौहई पंचन काहीं परमातिमा के उआ दिन के इन्तजार करँइ चाही, अउर प्रभू के काम करत, उआ दिन काहीं हरबी लइ आमँड के खातिर कोसिस करँइ चाही। काहेकि उआ दिन के अउतय अकास, आगी के लपटन माहीं जरि जई, अउर अकास के तरइया ओखे आँच से पिघल जइहँय। <sup>13</sup> पय हम पंचे परमातिमा के वादा के मुताबिक, एकठे नबा अकास, अउर नई धरती के पूर आसा लगाए हएन, जहाँ परमातिमा के सच्चे मनई निबास करिहँय।

### बिसुआस माहीं मजबूत बने रहा

<sup>14</sup> एसे हे पियार साथिव, जब तूँ पंचे ई सगली बातन के आस लगाए हया, त इआ कोसिस करा, कि सान्ती के साथ प्रभू के आँगे निस्कलंक अउर

निरदोस ठहरा। <sup>15</sup> अउर हमरे पंचन के प्रभू के धीरज काहीं मुक्ती समझा, इहइमेर हमार पंचन के पियार भाई पवलुस घलाय, परमातिमा के द्वारा जउन ग्यान उनहीं मिला रहा हय, ओखे मुताबिक तोहई पंचन काहीं लिखिन हीं। <sup>16</sup> इहइमेर ऊँ अपने सगली चिट्टिन माहीं, ई बातन के चरचा किहिन हीं, जउने माहीं कुछ अइसन बात हई, जिनहीं समझ पाउब खुब कठिन हय, अउर ऊँ बातन काहीं मूरुख अउर चंचल मनई, उनखे मतलबन काहीं घलाय पबित्र सास्त्र के दुसरे बातन कि नाई, गलत मतलब निकारिके, अपने नास होंइ के कारन बनाबत हैं। <sup>17</sup> एसे हे पियार साथिव, तूँ पंचे पहिलेन से ई सगली बातन काहीं जानिके चउकस रहा, जउने अधरमिन के बुराई माहीं फँसिके, अपने बिसुआस के स्थिरता काहीं अपने हाँथ से गमाय न द्या। <sup>18</sup> बलकिन हमरे पंचन के प्रभू, अउर मुक्ती देइ बाले यीसु मसीह के किरपा, अउर पहिचान माहीं आँगे बढ़त जा। उनहिन के महिमा अबहिनव होय, अउर जुगन-जुगन तक होत रहय। आमीन।

# 1 यूहन्ना

## इआ चिट्ठी के परिचय

यूहन्ना के लिखी पहिल चिट्ठी के मुख्य दुइठे उद्देश्य हैं: (1) अपने पढ़ई बालेन काहीं परमातिमा अउर उनखे लड़िका, यीसु मसीह, के सहभागिता माहीं जीवन जिअँइ के खातिर उत्साहित करब, अउर (2) लबरी सिच्छा के पालन करँय, जउने से सहभागिता नास होइ जात ही, एखे बिरोध माहीं चेतउनी देब। इआ झूँठ सिच्छा इआ सोच माहीं चलत रही ही, कि बुराई भवतिक संसार के सम्परक माहीं आमँइ के कारन होत ही, अउर एसे यीसु, परमातिमा के लड़िका, असलिअत माहीं एकठे मनई होइन नहीं सकँय। ई सिच्छा देंइ बालेन के दाबा रहा हय, कि मुक्ती पामँइ के खातिर मनई काहीं, इआ संसार के जीवन से सम्बन्धित बातन से मुक्त होइ परी; अउर ऊँ पंचे इहव सिखाबत रहे हँय, कि नयतिकता इआ कि अपने भाई से प्रेम रक्खँय जइसन बातन के मुक्ती से कउनव सम्बन्ध नहीं आय।

इआ सिच्छा के बिरोध माहीं लेखक साफ-साफ इआ बताबत हैं, कि यीसु मसीह बास्तव माहीं एकठे मनई रहे हँय, अउर ऊँ इआ बात माहीं जोर देत हैं, कि ऊँ पंचे जउन यीसु मसीह माहीं बिसुआस करत हैं, अउर परमातिमा से प्रेम रक्खत हैं, ऊँ पंचे जरूर आपस माहीं घलाय एक दुसरे से प्रेम रक्खँय।

रूप-रेखा :

भूमिका

जोति अउर अँधिआर

परमातिमा के सन्तान अउर सइतान के सन्तान

सत्य अउर झूँठ

प्रेम के करतब्य

बिजई बिसुआस

### मनइन काहीं जीवन देंइ बाला बचन

1 इआ चिट्ठी माहीं हम, जीवन देंइ बाले उआ बचन के बारे माहीं लिखित हएन, जउन इआ संसार के बनामँइ से पहिलेव रहा हय, जउने काहीं हम पंचे सुनेन हय, अउर जिनहीं हम पंचे अपने आँखिन से देखेन हय, बलकिन जिनहीं हम पंचे बड़े ध्यान से देखेन, अउर हाँथन से छुएन हय।<sup>2</sup> ऊँ अनन्त जीवन देंइ बाले आहीं, उनहीं परमातिमा सगले मनइन के खातिर प्रगट किहिन हीं। हम पंचे उनहीं देखेन हय, अउर उनखे बारे माहीं जउन खुसी के खबर ही, ओही हम पंचे तौहई बताइत हएन, कि ऊँ तौहऊँ काहीं अनन्त जीवन देंइ बाले आहीं, ऊँ पिता परमातिमा के साथ माहीं रहे हँय, अउर पिता परमातिमा उनहीं हमरे ऊपर प्रगट किहिन हीं।<sup>3</sup> जउन कुलू हम पंचे उनखे बारे माहीं देखेन, अउर सुनेन हय, ओहिन के खबर तौहई पंचन काहीं देइत हएन, कि जउने तुहूँ पंचे हमरे पंचन के साथ सहभागी होइजा; अउर हमार पंचन के इआ सहभागिता, पिता परमातिमा के साथ। अउर उनखे लड़िका यीसु मसीह के साथ ही।<sup>4</sup> अउर ई बातँय हम पंचे एसे लिखेन हय, कि हमार पंचन के आनन्द पूर होइ जाय।

### उँजिआरे माहीं चलब

<sup>5</sup> जउन खुसी के खबर हम पंचे उनसे सुनेन हय, उहय तौहई सुनाइत हएन, उआ इआ आय, कि परमातिमा जोति आहीं; अउर उनमा एक्कव अँधिआर नहीं आय।<sup>6</sup> अगर हम पंचे कही, कि हमार उनखे साथ सहभागिता ही, अउर पुनि पाप के अँधिआर माहीं जीवन जिअत रही, त हम पंचे झूँठ बोलित हएन, अउर सत्य के मुताबिक जीवन नहीं जी।<sup>7</sup> पय जइसन ऊँ उँजिआर माहीं चलत हैं, उहयमेर अगर हमहूँ पंचे उँजिआर माहीं चली, त एक दुसरे के साथ हमार पंचन के सहभागिता ही; अउर परमातिमा

के लड़िका यीसु के खून, हमहीं पंचन काहीं सगले पापन से सुद्ध करत हय।<sup>8</sup> अगर हम पंचे इआ कही, कि हमरे जीवन माहीं कउनव पाप नहीं आय, त खुद काहीं धोखा देइत हएन, अउर हमरे पंचन के जीवन माहीं सत्य नहीं आय।<sup>9</sup> पय अगर हम पंचे अपने पापन काहीं सोइकार कइ लेई, त परमातिमा हमरे पापन काहीं माफ करँय, अउर सगले अधरमन से सुद्ध करँइ माहीं, बिसुआस के काबिल अउर धरमी हैं।<sup>10</sup> अगर कही, कि हम पंचे कउनव पाप नहीं किहेन आय, त हम पंचे परमातिमा काहीं झूँठ ठहराइत हएन, अउर उनखर बचन हमरे पंचन के जीवन माहीं नहीं आय।

### यीसु हमार पंचन के सहायता करँइ बाले आहीं

2 हे हमार पियार लड़िकव, हम ई बातन काहीं एसे लिखित हएन, कि तूँ पंचे पाप न करा, अउर अगर कोऊ पाप करत हय, त पिता परमातिमा के आँगे हमरे पंचन के पापन के दन्द से रक्खा करँइ बाले एक जने बिचबई हैं, अउर ऊँ धरमी यीसु मसीह आहीं।<sup>2</sup> ऊँ केबल हमरे पंचन के पापन के माफी के खातिर भर नहीं, बलकिन सगले संसार के पापन के माफी के खातिर घलाय बलिदान भें।<sup>3</sup> अगर हम पंचे उनखे हुकुमन काहीं मानब, त ओसे हम पंचे जान लेब, कि हम पंचे उनहीं जान लिहेन हय।<sup>4</sup> जे कोऊ इआ कहत हय, कि हम उनहीं जान गएन हय, अउर उनखे हुकुमन काहीं नहीं मानय, त उआ लबरा हय; अउर ओखे जीवन माहीं सत्य नहीं आय।<sup>5</sup> पय जे कोऊ उनखे बचन के मुताबिक चलत हय, त ओखे जीवन माहीं सचमुच परमातिमा के प्रेम पूरी तरह से बना हय, एहिन से मालुम होत हय, कि हम पंचे उनखे बचन माहीं बने हएन।<sup>6</sup> जे कोऊ इआ कहत हय, कि हम परमातिमा के बचन माहीं बने हएन, ओही यीसु कि नाई जीवन जिअँइ चाही।

### नबा हुकुम

7 हे पियार साथिव, हम तौहई कउनव नबा हुकुम नहीं लिखी, बलकिन उहय पुरान हुकुम जउन सुरुआतय से तौहई मिला हय; इआ पुरान हुकुम उआ खुसी के खबर आय, जउने काहीं तूँ पंचे सुने हया। 8 पुनि हम तौहई नबा हुकुम लिखित हएन; इआ आसा से कि सत्य, मसीह के अउर तौहरे जीवन माहीं उजागर भ हय, काहेकि आँधिआर खतम होइ रहा हय, अउर सत्य के जोति चमकई लाग ही। 9 जे कोऊ इआ कहत हय, कि हम जोति माहीं हएन; अउर अपने भाई से दुसमनी रक्खत हय, त उआ अबहिनव आँधिआर माहीं हय। 10 जे कोऊ अपने भाई से प्रेम रक्खत हय, उआ जोति माहीं बना रहत हय, अउर कउनव अइसा कारन नहीं आय कि ओही ठोकर लागय। 11 पय जे कोऊ अपने भाई से दुसमनी रक्खत हय, उआ आँधिआर माही हय, अउर आँधिआर माहीं चलत हय; अउर नहीं जानय, कि कहाँ जात हय, काहेकि आँधिआर ओखर आँखी बन्द कइ दिहिस ही।

12 हे पियार लड़िकव, हम तौहई एसे लिखित हएन, कि यीसु मसीह के कारन तौहार पंचन के पाप माफ कीन गेँ हँय। 13 हे हमरे बाप कि नाई मनइव, हम तौहई एसे लिखित हएन, कि जउन संसार के सुरुआत से हँय, तूँ पंचे उनहीं जनते हया, हे जमानव, हम तौहई एसे लिखित हएन, कि तूँ पंचे उआ दुस्ट के ऊपर जीत पाय गया हय; हे पियार लड़िकव हम तौहई एसे लिखित हएन, कि तूँ पंचे पिता परमातिमा काहीं जान गया हय। 14 हे पितरव, हम तौहई एसे लिखेन हय, कि जउन संसार के सुरुआतय से हय, तूँ पंचे ओही जान गया हय; हे नवजमानव, हम तौहई एसे लिखेन हय, कि बलमान होइजा, अउर परमातिमा के बचन तौहरे जीवन माहीं बना रहय, अउर तूँ पंचे उआ दुस्ट के ऊपर जीत पाय गया हय।

### संसार से प्रेम न करा

15 तूँ पंचे न त संसार से, अउर न संसार के चीजन से प्रेम रक्खा; अगर कोऊ संसार से प्रेम रक्खत हय, त ओखे जीवन माहीं पिता परमातिमा के प्रेम नहीं आय। 16 काहेकि जउन कुछू संसार माहीं हय, मतलब देह के अभिलासा, अउर आँखिन के अभिलासा, अउर अपने कमाई के घमन्ड, उआ पिता परमातिमा कइती से नहीं, बलकिन संसार के तरफ से हय। 17 अउर इआ संसार, अउर संसार के सगली अभिलासा, दोनव मिट जात हँ, पय जउन मनई परमातिमा के इच्छा के मुताबिक चलत हय, उआ हमेसा बना रहत हय।

### मसीह के बिरोधी

18 हे पियार लड़िकव, इआ अन्तिम समय हय, अउर जउनमेर तूँ पंचे सुने हया, कि मसीह के बिरोधी आमँड बाला हय, ओखे मुताबिक अबहिनव खुब मसीह के बिरोधी तइआर होइगे हँय; एसे हम पंचे जानित हएन, कि इआ अन्तिम समय हय। 19 मसीह के बिरोधी हमरे पंचन के बीचय म से निकरे हँय, पय सही माहीं ऊँ हमार पंचन के साथी न होंहीं; काहेकि अगर ऊँ पंचे हमरे पंचन म से होतें, त ऊँ पंचे हमरे साथय माहीं रहतें, पय ऊँ हमहीं पंचन काहीं छोंड़िके एसे चलेगें हँ, कि ऊँ पंचे इआ देखाय सकँय, कि उन म से कोऊ सही माहीं हमार पंचन के कोऊ न होंहीं। 20 पय तौहार पंचन के त ऊँ परम पबित्र परमातिमा, आत्मा के व्दारा अभिसेक किहिन हीं। एसे तूँ पंचे सगले जन सत्य काहीं जनते हया। 21 हम तौहई एसे नहीं लिखेन, कि तूँ पंचे सत्य काहीं नहीं जनते आह्ला? बलकिन तूँ पंचे त ओही जनते हया, अउर एसे कि सत्य से कउनव झूठ नहीं निकरय। 22 पय जे इआ कहत हय, कि यीसु, मसीह न होंहीं, उआ लबरा हय, अइसन मनई मसीह के बिरोधी होत हय, उआ पिता परमातिमा अउर लड़िका यीसु मसीह दोनव काहीं सोइकार नहीं करय। 23 जे कोऊ लड़िका यीसु काहीं सोइकार नहीं करय, ओखे लघे पिता परमातिमव नहीं आहीं; पय जे कोऊ लड़िका यीसु काहीं अपनाय लेत हय, ओखे लघे पिता परमातिमा घलाय हँ। 24 जउन कुछू तूँ पंचे सुरुआत से

सुने हया, उहय तौहरे जीवन माहीं बना रहय, जउन तूँ पंचे सुरुआत से सुने हया, अगर उआ तौहरे जीवन माहीं बना रहय, त तुहूँ पंचे लड़िका यीसु माहीं, अउर पिता परमातिमा दोनव माहीं स्थिर बने रइहा। 25 अउर परमातिमा हमहीं पंचन काहीं अनन्त जीवन देइ के बचन दिहिन हीं।

26 हम ई बातन काहीं तौहई उनखे बारे माहीं लिखेन हय, जउन तौहई पंचन काहीं भरमाय देत हँ। 27 अउर तौहार पंचन के उआ अभिसेक, जउन परमातिमा के तरफ से कीन ग हय, तौहरे जीवन माहीं बना रहत हय; अउर तौहई एखर जरूरत नहीं आय, कि तौहई कोऊ सिखाबय, बलकिन तौहई, त उआ आत्मा, जेसे पबित्र पिता तौहार अभिसेक किहिन हीं, तौहई सगली बात सिखाबत हय। उहय सच्चा हय, झूठ नहीं आय, आत्मा जइसन तौहई सिखाबत हय, उहयमेर तूँ पंचे मसीह माहीं बने रहा।

### परमातिमा के सन्तान

28 एसे हे पियार लड़िकव, मसीह माहीं बने रहा; कि जब ऊँ प्रगट होंय, त हमहीं पंचन काहीं साहस होय, अउर जब यीसु मसीह दुसराय आमँय, त उनखे आँगे हमहीं पंचन काहीं सरमिन्दा न होंय परय। 29 अगर तूँ पंचे जनते हया, कि ऊँ धरमी हँ, त इहव जनते हया, कि जे कोऊ धरम के काम करत हय, उआ परमातिमा के सन्तान आय।

3 देखा, पिता परमातिमा हमसे पंचन से केतना प्रेम किहिन हीं, कि हम पंचे परमातिमा के सन्तान कहाई, अउर हम पंचे हइअव आहैन; इआ कारन से संसार के मनई, हमहीं पंचन काहीं नहीं जानँय, काहेकि ऊँ पंचे पिता परमातिमव काहीं नहीं जाने पाइन। 2 हे पियार साथिव, हम पंचे परमातिमा के सन्तान आहैन, अउर अबे तक इआ प्रगट नहीं भ, कि हम पंचे का कुछ होब! पय एतना जानित हएन, कि जब यीसु मसीह दुसराय अइहँय, त हमहूँ पंचे उनहिन कि नाई होइ जाब, काहेकि उनहीं ओहिन मेर देखब, जइसन ऊँ हँ। 3 अउर जे कोऊ उनखे ऊपर इआ आसा रक्खत हय, उआ अपने काहीं उहयमेर पबित्र रक्खत हय, जइसन मसीह पबित्र हँ।

4 जे कोऊ पाप करत हय, उआ परमातिमा के नेम काहीं टोरत हय, काहेकि नेम काहीं टोरबय पाप आय। 5 अउर तूँ पंचे त जनतय हया, कि यीसु मसीह हमरे पंचन के पापन काहीं हरँय के खातिर प्रगट भँ, अउर इहव, कि उनखे जीवन माहीं कउनव पाप नहीं आय। 6 जे कोऊ मसीह माहीं बना रहत हय, उआ पाप नहीं करत रहय, जे कोऊ पाप करत रहत हय, उआ न त उनखर दरसन किहिस आय, अउर न उनहीं कबहूँ जनबय भ आय। 7 हे पियार लड़िकव, कोहू के भरमाए माहीं न अया; उआ जउन धरम के साथ आचरन करत रहत हय, उहय परमातिमा के नजर माहीं निरदोस हय, ठीक उहयमेर जइसन मसीह हँ। 8 जे कोऊ पाप करत रहत हय, उआ सइतान के सन्तान आय, काहेकि सइतान सुरुआतय से पाप करत चला आबा हय, एहिन से परमातिमा के लड़िका प्रगट भे हँय, कि सइतान के कामन काहीं नास कइ देंय। 9 जे कोऊ परमातिमा के सन्तान बनिगा हय, उआ पाप नहीं करत रहय, काहेकि परमातिमा के बीज ओखे जीवन माहीं बना रहत हय, अउर उआ पाप नहीं करत रहय, काहेकि उआ परमातिमा के सन्तान बन चुका हय। 10 परमातिमा के सन्तान को आय? अउर सइतान के सन्तान को आय? तूँ पंचे इआमेर से उनहीं जान सकते हया, हरेक उआ मनई जउन परमातिमा के नजर माहीं निकहा काम नहीं करय, अउर अपने भाई से प्रेम नहीं करय, उआ परमातिमा के सन्तान न होय।

### एक दुसरे से प्रेम करा

11 काहेकि जउन उपदेस तूँ पंचे सुरुआत से सुने हया, उआ इआ आय, कि हम पंचे एक दुसरे से प्रेम रखी। 12 अउर हमहीं पंचन काहीं कैन कि नाई न बनय क चाही, जउन दुस्तात्मा के काबू माहीं रहा हय, अउर अपने भाई के कतल किहिस रहा हय, उआ अपने भाई काहीं एसे मारि डारिस तय, कि ओखर काम बुरे रहे हँय। अउर ओखे भाई के काम धारमिकता के रहे हँय।

13 हे भाई-बहिनिव, अगर संसार के मनई तौहसे इरखा करत हैं, त अचम्भा न किहा। 14 हम पंचे जानित हएन, कि मउत के बन्धन से पार होइके अनन्त जीवन पाएन हय; काहेकि हम पंचे अपने भाई-बहिनिन से प्रेम रक्खित हएन, जे कोऊ प्रेम नहीं रक्खय, उआ मउत के दसा माहीं रहत हय। 15 जे कोऊ अपने भाई-बहिनी से इरखा करत हय, उआ कतली हय, अउर तू पंचे जनतेन हया, कि कउनव कतली माहीं अनन्त जीवन नहीं रहय। 16 यीसु मसीह हमरे पंचन के खातिर आपन प्रान दइ दिहिन हीं, एहिन से हम पंचे जानित हएन, कि प्रेम का आय? हमहीं पंचन काहीं घलाय अपने भाई-बहिनिन के खातिर, आपन प्रान नेउछाबर कइ देइ चाही। 17 पय जेखे लघे संसार के सम्पत होय, अउर अपने भाई-बहिनी काहीं कंगाल देखिके, ओखे ऊपर तरस खाइके ओखर मदत न करय, त ओखे जीवन म परमातिमा के प्रेम हय, इआ कइसा कहा जाय सकत हय? 18 हे पियार लड़िकव, हमार पंचन के प्रेम बातन भर माहीं नहीं, बलकिन कामन के साथ अउर सच्चा होंइ चाही।

### परमातिमा के आँगे साहस

19 एहिन से हम पंचे जानब, कि हम पंचे सत्य के आहैन; अउर जउने बात माहीं हमार पंचन के मन हमहीं दोस देई, ओहिन के बारे माहीं हम पंचे परमातिमा के आँगे, अपने-अपने मन काहीं ढाढ़स दइ सकब। 20 काहेकि परमातिमा हमरे पंचन के मन से बड़े हँय; अउर सब कुछ जानत हैं। 21 हे पियार साथिव, अगर हमार मन हमहीं दोसी न ठहराबय, त हमहीं पंचन काहीं परमातिमा के आँगे साहस मिली। 22 अउर जउन कुछू हम पंचे मागित हएन, उआ परमातिमा से मिल जात हय; काहेकि हम पंचे परमातिमा के हुकुमन काहीं मानित हएन; अउर जउन उनहीं निकहा लागत हय, उहय करित हएन। 23 अउर उनखर हुकुम इआ हय, कि हम पंचे उनखे लड़िका यीसु मसीह के नाम के ऊपर बिसुआस करी, अउर जइसन ऊँ हमहीं पंचन काहीं हुकुम दिहिन हीं, ओहिन के मुताबिक आपस माहीं प्रेम रखी। 24 अउर जउन उनखे हुकुमन काहीं मानत हय, उआ परमातिमा माहीं, अउर परमातिमा ओखे जीवन माहीं बने रहत हैं। अउर एहिन से, अरथात पबित्र आत्मा से जउने काहीं ऊँ हमही पंचन काहीं दिहिन हीं, हम पंचे जानित हएन, कि परमातिमा हमरे जीवन माहीं बने रहत हैं।

### आत्मन काहीं जाँचा-परखा

4 हे पियार साथिव, हरेक आत्मा के बिसुआस न माना, बलकिन हमेसा उनहीं जाँच परखिके देखा, कि का ऊँ परमातिमा के तरफ से आहीं कि नहीं? इआ बात हम तौहसे एसे कहि रहेन हय, काहेकि झूठ बोलै बाले खुब नबी संसार माहीं तइआर होइगे हँय। 2 परमातिमा के आत्मा काहीं तू पंचे इआमेर से पहिचान सकते हया, हरेक उआ आत्मा, जउन इआ मानत ही, कि “यीसु मसीह मनई के रूप माहीं धरती माहीं आए हँय।” उआ परमातिमा के तरफ से हय। 3 अउर जउन आत्मा यीसु काहीं नहीं मानय, उआ परमातिमा के तरफ से न होय; अउर उहय त मसीह के बिरोधी के आत्मा आय; जेखर चरचा तू पंचे सुन चुके हया, कि उआ आम्ई बाला हय, अउर उआ अबहिनव संसार माहीं हय। 4 हे पियार लड़िकव, तू पंचे परमातिमा के आह्या, अउर तू पंचे ओखे ऊपर बिजय पाए हया; काहेकि ऊँ परमातिमा जउन तौहरे जीवन माहीं बसे हँय, ऊँ संसार माहीं रहँइ बाले सइतान से बड़े हँय। 5 ऊँ मसीह के बिरोधी मनई संसारिक जीवन जिअत हैं, इआ कारन से ऊँ पंचे संसारिक बात बोलत हैं, अउर संसार के मनई उनखर बात सुनत हैं। 6 हम पंचे परमातिमा के आहैन, जउन मनई परमातिमा काहीं जानत हय, उआ हमार पंचन के बात सुनत हय; जउन मनई परमातिमा काहीं नहीं जानय, उआ हमार पंचन के बात नहीं सुनय; इआ मेर से हम पंचे सत्य के आत्मा, अउर भटकामँइ बाली आत्मा, काहीं पहिचान सकित हएन।

### परमातिमा प्रेम आहीं

7 हे पियार साथिव, हम पंचे आपस माहीं एक दुसरे से प्रेम करी; काहेकि प्रेम परमातिमा से मिलत हय, अउर जउन मनई प्रेम करत हय, उआ परमातिमा के सन्तान बनिगा हय, अउर उआ परमातिमा काहीं जानत हय। 8 अउर जउन मनई प्रेम नहीं करय, उआ परमातिमा काहीं नहीं जानय, काहेकि परमातिमा प्रेम आहीं। 9 जउन प्रेम परमातिमा हमसे पंचन से करत हैं, इआमेर से देखाइन हीं, कि ऊँ अपने एकलउता लड़िका काहीं इआ संसार माहीं पठइन हीं, कि जउने हम पंचे उनखे द्वारा अनन्त जीवन पाई। 10 प्रेम एमाहीं नहीं आय, कि हम पंचे परमातिमा से प्रेम किहिन हय; बलकिन एमाहीं हय, कि परमातिमा हमसे पंचन से प्रेम किहिन हीं; अउर हमरे पापन के माफी के खातिर, अपने लड़िका काहीं पठइन हीं। 11 हे पियार साथिव, जब परमातिमा हमरे पंचन के ऊपर एतना प्रेम देखाइन हीं, त हमहूँ पंचन काहीं आपस माहीं एक दुसरे से प्रेम करँय चाही। 12 परमातिमा काहीं कबहूँ कोहू नहीं देखिस, अगर हम पंचे आपस माहीं प्रेम करित हएन, त परमातिमा हमरे पंचन के जीवन माहीं बास करत हैं; अउर उनखर प्रेम हमरे जीवन माहीं सिद्ध होइगा हय।

13 इआमेर से हम पंचे जान सकित हएन, कि हम पंचे परमातिमा माहीं बने रहित हएन, अउर परमातिमा हमरे भीतर निबास करत हैं; काहेकि ऊँ अपने आत्मा काहीं हमहीं पंचन काहीं दिहिन हीं। 14 अउर हम पंचे देखिव लिहेन हय, अउर गबाही देइत हएन, कि परमातिमा अपने लड़िका काहीं, संसार के मनइन काहीं मुक्ती देइ के खातिर पठइन हीं। 15 जे कोऊ इआ मान लेत हय, कि यीसु परमातिमा के लड़िका आहीं, परमातिमा ओखे जीवन माहीं बास करत हैं, अउर उआ परमातिमा माहीं बना रहत हय। 16 अउर जउन प्रेम परमातिमा हमसे पंचन से किहिन हीं, ओही हम पंचे जान गएन हय, अउर हमहीं पंचन काहीं बिसुआस हय, कि परमातिमा प्रेम आहीं। जउन मनई प्रेम माहीं बना रहत हय, उआ परमातिमा माहीं बना रहत हय; अउर परमातिमा ओखे जीवन माहीं बने रहत हैं। 17 हमरे पंचन के बारे माहीं प्रेम इहय रूप माहीं सिद्ध भ हय, जउने न्याय के दिन हमार पंचन के बिसुआस बना रहय, हमार पंचन के बिसुआस एसे बना हय, कि हम पंचे जउन जीवन संसार माहीं जीत हएन, उआ मसीह के जीवन कि नाई हय। 18 अउर प्रेम माहीं कउनव डेर नहीं होय, बलकिन सिद्ध प्रेम डेर काहीं भगाय देत हय, काहेकि डेर के सम्बन्ध दन्ड से होत हय, अउर जे कोऊ डेरात हय, ओखर प्रेम सिद्ध नहीं भ। 19 हम पंचे एसे प्रेम करित हएन, काहेकि पहिले परमातिमा हमसे पंचन से प्रेम किहिन हीं। 20 अगर कोऊ कहय, हम परमातिमा से प्रेम करित हएन; अउर अपने भाई-बहिनी से इरखा रक्खय; त उआ लबरा हय, काहेकि जउन मनई अपने भाई-बहिनी से, जउने काहीं उआ देखत हय, प्रेम नहीं करय, त परमातिमा से जिनहीं उआ देखबय नहीं भ, प्रेम नहीं कइ सकय। 21 मसीह से हमहीं पंचन काहीं इआ हुकुम मिला हय, कि जे कोऊ अपने परमातिमा से प्रेम करत हय, ओही अपने भाइव से प्रेम करँय चाही।

### परमातिमा के सन्तान संसार के ऊपर जीत पाबत हय

5 जे कोऊ इआ बिसुआस करत हय, कि यीसुअय मसीह आहीं, त उआ परमातिमा के सन्तान बन जात हय, अउर जे कोऊ पिता परमातिमा से प्रेम करत हय, त उआ उनखे सन्तानन से घलाय प्रेम करत हय। 2 इआमेर से जब हम पंचे परमातिमा से प्रेम करित हएन, अउर उनखे हुकुमन के पालन करित हएन, त एहिन से हम पंचे जान लेइत हएन, कि हम पंचे परमातिमा के सन्तानन से प्रेम करित हएन। 3 उनखे हुकुमन काहीं पालन कइके, हम पंचे इआ देखाइत हएन, कि हम पंचे परमातिमा से प्रेम करित हएन, अउर उनखे हुकुमन के पालन करब जादा कठिन नहीं आय। 4 काहेकि जे कोऊ परमातिमा के सन्तान बन जात हय, उआ संसार के ऊपर जीत पाय लेत हय, अउर संसार के ऊपर जउने से हमहीं पंचन काहीं जीत

मिलत ही, उआ आय हमार पंचन के बिसुआस।<sup>5</sup> जे कोऊ इआ बिसुआस करत हय, कि यीसु परमातिमा के लड़िका आहीं, उहय संसार के ऊपर जीत पाबत हय।

### यीसु मसीह के बारे माहीं गबाही

<sup>6</sup> ऊँ यीसु मसीह आहीं जउन हमरे पंचन के लघे पानी अउर खून के व्दारा आए हँय, मतलब यीसु मसीह न केबल पानी के व्दारा, बलकिन पानी अउर खून दोनव के व्दारा आए रहे हँय।<sup>7</sup> अउर एखर गबाही देंड बाला पबित्र आत्मा हय, काहेकि पबित्र आत्मा सत्य हय।<sup>8</sup> अउर गबाही देंड बाले तीनठे हँ; पबित्र आत्मा, अउर पानी, अउर खून; अउर तीनव एकय बात माहीं सहमत हँ।<sup>9</sup> जब हम पंचे मनइन के दीन गबाही काहीं मान लेइत हएन, त परमातिमा के गबाही, त उनसे बढ़िके ही, अउर परमातिमा के गबाही इआ ही, कि ऊँ अपने लड़िका के बारे माहीं गबाही दिहिन हीं।<sup>10</sup> जे कोऊ परमातिमा के लड़िका के ऊपर बिसुआस करत हय, उआ अपने भीतर उनखर गबाही रक्खत हय; जे कोऊ परमातिमा के कही बात के बिसुआस नहीं करय, उआ परमातिमा काहीं झूँठ ठहराबत हय; काहेकि उआ उनखे दीन गबाही के बिसुआस नहीं किहिस, जउन गबाही परमातिमा अपने लड़िका के बारे माहीं दिहिन हीं।<sup>11</sup> अउर उआ गबाही इआ आय, कि परमातिमा हमहीं पंचन काहीं अनन्त जीवन दिहिन हीं, अउर इआ जीवन उनखे लड़िका माहीं हय।<sup>12</sup> जेखे लघे लड़िका हय, ओखे लघे अनन्त जीवन हय; अउर जेखे लघे परमातिमा के लड़िका नहिं आय, ओखे लघे अनन्त जिवनव नहिं आय।

### अनन्त जीवन

<sup>13</sup> हम तोंहई पंचन काहीं, जउन परमातिमा के लड़िका के नाम माहीं बिसुआस करते हया, एसे लिखेन हय; कि तूँ पंचे जाना, कि अनन्त जीवन

तोंहार आय।<sup>14</sup> अउर हमहीं पंचन काहीं परमातिमा के आँगे जउन साहस होत हय, उआ इआ आय; कि अगर हम पंचे उनखे इच्छा के मुताबिक कुछ मागित हएन, त ऊँ हमरे बिनती काहीं सुनत हँ।<sup>15</sup> अउर जब हम पंचे इआ जानित हएन, कि जउन कुछ हम पंचे मागित हएन, ऊँ हमार पंचन के सुनत हँ, त इहव जानित हएन, कि जउन कुछ हम पंचे उनसे माँगन हय, उआ पाएन हय।

<sup>16</sup> अगर कोऊ अपने भाई-बहिनिन काहीं अइसन पाप करत देखय, जेखर परिनाम परमातिमा से अलगाव न होय, त उआ अपने भाई-बहिनिन के खातिर प्राथना करय, त परमातिमा उनहीं अनन्त जीवन देइहँय। हम उनखे जीवन के बारे माहीं बात करित हएन, जे कोऊ अइसन पाप माहीं लगे हँय, जउन उनहीं परमातिमा के संगति से अलग नहीं करय। पय कुछ पाप अइसव होत हँ, जेखर परिनाम परमातिमा से अलगाव होत हय; हम अइसन पापन के खातिर प्राथना करँइ काहीं नहीं कही।<sup>17</sup> हरेकमेर के अधरम त पाप हय, पय कुछ पाप अइसव होत हँ, जेखर परिनाम परमातिमा से अलगाव नहीं होय।

<sup>18</sup> हम पंचे जानित हएन, कि जे कोऊ परमातिमा के सन्तान बन जात हय, उआ पाप नहीं करत रहय; पय परमातिमा के लड़िका, ओही बचाइके रक्खत हँ, अउर उआ दुस्त ओही छुए नहीं पाबय।

<sup>19</sup> हम पंचे जानित हएन, कि हम पंचे परमातिमा के सन्तान आहें, अउर सगला संसार दुस्त सइतान के काबू माहीं हय।

<sup>20</sup> अउर हम पंचे इहव जानित हएन, कि परमातिमा के लड़िका आय चुके हँय, अउर ऊँ हमहीं पंचन काहीं समझ दिहिन हीं, कि हम पंचे ऊँ सच्चे परमातिमा काहीं पहिचानी, अउर हम पंचे जउन उनमा सत्य हय, मतलब उनखे लड़िका यीसु मसीह माहीं बने रहित हएन; सच्चे परमातिमा, अउर अनन्त जीवन ईन आहीं।<sup>21</sup> हे पियार लड़िकव, अपने-आप काहीं मूरतिन से बचाए रक्खा।

## 2 यूहन्ना

### इआ चिट्ठी के परिचय

यूहन्ना के लिखी इआ दूसर चिट्ठी, मसीही मन्डली के लोगन के खातिर लिखी गे रही हय, संछेप माहीं इआ चिट्ठी के सँदेस हय, एक दुसरे से प्रेम रक्खँइ के निबेदन, अउर लबरी सँदेस बतामँइ बालेन से अउर उनखे बताई सिच्छन के बिरोध माहीं चेतउनी।

रूप-रेखा :

भूमिका

प्रेम के प्रमुखता

धरम के झूठ सिद्धान्तन के बिरोध माहीं चेतउनी

उपसंहार

### यूहन्ना के अभिबादन

1 हम मसीही मन्डली के अँगुआ आहेन, हमरे तरफ से परमातिमा के द्वारा चुनी उआ बहिनी, अउर ओखे लड़िका बिटिअन के नाम, जिनसे हम सच्चा प्रेम रक्खित हएन, अउर केबल हमहिन भर नहीं, बलकिन ऊँ सगले जने तौहसे प्रेम रक्खत हैं, जउन सत्य काहीं जानत हैं; 2 उआ सत्य जउन हमरे पंचन के जीवन माहीं स्थिर रहत हय, अउर सब दिन हमरे पंचन के साथ बना रही; 3 पिता परमातिमा, अउर उनखे लड़िका यीसु मसीह के तरफ से किरपा, दया, अउर सान्ति, सत्य अउर प्रेम समेत हमरे पंचन के साथ रहय।

### सत्य अउर प्रेम

4 हम खुब खुसी भएन, कि हम तौहरे कुछ लड़िका बिटिअन काहीं उआ हुकुम के मुताबिक, जउन हमहीं पंचन काहीं पिता परमातिमा के तरफ से मिला रहा हय, सत्य माहीं चलत पाएन हय। 5 अब हे बहिनी, हम तौहई कउनव नबा हुकुम नहीं, बलकिन उहय जउन सुरुआतय से हमरे पंचन के लघे हय, लिखित हएन; अउर तौहसे बिनती करित हएन, कि हम पंचे एक दुसरे से प्रेम रक्खी। 6 अउर प्रेम इआ आय, कि हम पंचे उनखे हुकुमन के मुताबिक चली, इआ उहय हुकुम आय, जउन तूँ पंचे सुरुआत से सुने हया, अउर तौहई पंचन काहीं प्रेम सहित जीवन जिअँइ चाही। 7 काहेकि बहुत से

गुमराह करँइ बाले संसार माहीं तइआर होइगे हँय, जउन इआ नहीं मानँय, कि यीसु मसीह मनई के अउतार लइके आए हँय, उआ गुमराह करँय बाला, अउर मसीह के बिरोधी इहय आय। 8 अपने बारे माहीं चउकस रहा; कि जउन मेहनत हम पंचे किहेन हय, ओही तूँ पंचे न बिगाड़ा, बलकिन ओखर पूर प्रतिफल पाबा। 9 जे कोऊ मसीह के सिच्छा से अँगे बढ़ि जात हय, अउर ओखर पालन नहीं करय, ओखे लघे परमातिमा नहीं रहँय; अउर जे कोऊ मसीह के सिच्छा माहीं बना रहत हय, ओखे लघे पिता परमातिमा, अउर उनखर लड़िका यीसु मसीह घलाय रहत हैं। 10 अगर कोऊ तौहरे पंचन के लघे आबय, अउर मसीह के इहय सिच्छा काहीं न देय, त ओही अपने घर माहीं न घुसँय दिहा, अउर न ओसे नबस्कार किहा। 11 काहेकि जे कोऊ अइसन मनई काहीं नबस्कार करत हय, त उआ ओखे बुरे कामन माहीं भागीदार बन जात हय।

### अन्तिम अभिबादन

12 तौहई पंचन काहीं लिखँइ के खातिर हमरे लघे खुब बातँय हई; पय कागज अउर स्याही से लिखँय नहीं चाही; पय हमहीं आसा ही, कि हम तौहरे लघे अउब, अउर आमने-सामने बइठिके बात करब, जउने तौहार पंचन के आनन्द पूर होइ जाय।

13 तौहरे चुनी बहिनी के सगले लड़िका बिटिअन के तरफ से, तौहई नबस्कार पहुँचय।

## 3 यूहन्ना

### इआ चिट्ठी के परिचय

यूहन्ना के लिखी तीसर चिट्ठी मसीही मन्डली के एकठे अँगुआ, गयुस काहीं लिखी गे रही ही। लिखँय बाले गयुस के बड़ाई एसे करत हें, काहेकि ऊँ दुसरे मसीही भाई-बहिनिन के बड़ी मदत करत रहे हँय। साथय-साथ दियुत्रिफेस नाम के एकठे मनई से सचेत रहँय के चेतउनिव देत हें।

रूप-रेखा :

भूमिका  
गयुस के बड़ाई  
दियुत्रिफेस के बुराई  
दिमेत्रियुस के सराहना  
उपसंहार

#### यूहन्ना के अभिबादन

1 हम मसीही मन्डली के अँगुआ आहेन, हमरे तरफ से पियार गयुस के नाम, जेसे हम सच्चा प्रेम करित हएन।<sup>2</sup> हे पियार साथी, हमार इआ बिनती ही, कि जउनमेर तूँ आत्मिक उन्नति कइ रहे हया, उहयमेर सगली बातन माहीं उन्नति करा, अउर नीक-सूख रहा।<sup>3</sup> काहेकि जब हमार कुछ बिसुआसी भाई हमरे लघे आइके, तौहरे उआ सत्य के गबाही दिहिन, जउने माहीं तूँ सचमुच चल रहे हया, त हम खुब आनन्दित भएन।<sup>4</sup> हमहीं एसे बढ़िके अउर कउनव आनन्द नहिं आय, कि हम इआ सुनी, कि हमार लड़िका-बिटिया सत्य के गइल माहीं चलत हें।

#### गयुस के बड़ाई

<sup>5</sup> हे पियार साथी, जउन कुछ तूँ, ऊँ भाइन के साथ करते हया, उआ बिसुआस के साथ करते हया, जबकि ऊँ पंचे तौहरे खातिर अनजान हें।<sup>6</sup> ऊँ पंचे मसीही मन्डली माहीं तौहरे प्रेम के गबाही दिहिन हीं। अगर तूँ उनहीं उआमेर बिदा करा, जउनमेर परमातिमा के लोगन के खातिर उचित हय, त निकहा करिहा।<sup>7</sup> काहेकि ऊँ पंचे मसीह के सेबा के खातिर निकर परे हँय, अउर जउन मनई यीसु मसीह के ऊपर बिसुआस नहीं करँय, उनसे ऊँ पंचे कउनव मदत नहीं लेंय।<sup>8</sup> एसे अइसन मनइन के मदत करँइ चाही, जउने हम पंचे सत्य के पच्छ माहीं उनखर सहायता करँइ बाले होइ जई।

#### दियुत्रिफेस अउर दिमेत्रियुस

<sup>9</sup> एकठे चिट्ठी हम मसीही मन्डली काहीं लिखेन रहा हय, पय दियुत्रिफेस जउन उन माहीं अँगुआ बनँइ चाहत हय, त जउन कुछ हम पंचे कहित हएन, ओही उआ सोइकार नहीं करय।<sup>10</sup> एसे जब हम अउब, त ओखे कामन काहीं जउन उआ कइ रहा हय, सुधि देबाउब, कि उआ हमरे बारे माहीं बुरी-बुरी बात कहत हय; अउर एखे बादव ओही सन्तोस नहीं मिलय, अउर खुदय बिसुआसी भाइन काहीं सोइकार नहीं करय, अउर उनहीं जउन हमरे बातन काहीं अपनाँइ चाहत हें, बरज देत हय, अउर मसीही मन्डली से निकार देत हय।

<sup>11</sup> हे पियार साथी, बुराई काहीं नहीं, बलकिन भलाई काहीं अपनाँइ बाले बना, जे कोऊ भलाई करत हय, उआ परमातिमा कइत से हय; पय जे कोऊ बुराई करत हय, उआ परमातिमा काहीं नहीं देखिस आय।<sup>12</sup> दिमेत्रियुस के बारे माहीं सबय कोऊ सराहत हें, बलकिन सत्य घलाय खुदय गबाह हय, अउर हमहूँ पंचे घलाय सराहित हएन, अउर तूँ त जनतेन हया, कि हमार पंचन के गबाही सही हय।

#### अन्तिम अभिबादन

<sup>13</sup> तौहई लिखँइ के खातिर हमरे लघे खुब बातँय हई, पय उनहीं स्याही अउर कलम से लिखँइ नहीं चाही।<sup>14</sup> पय हमहीं आसा ही, कि हम तौहसे हरबिन मिलब, तब हम तौहसे आमने-सामने बातचीत करब।

<sup>15</sup> तौहई सान्ति मिलत रहय। इहाँ के सगले साथी तौहई नबस्कार कहत हें। उहाँ के साथिन से नाम लइ-लइके नबस्कार कहि दिहा।

## यहूदा

### इआ चिट्ठी के परिचय

यहूदा के इआ चिट्ठी गलत सिच्छा देंइ बालेन के बारे माहीं, अउर उनहीं मिलँइ बाले दन्ड के बारे माहीं, अउर बिसुआसी भाई-बहिनिन काहीं उनसे सचेत रहँइ के बारे माहीं लिखी गे ही। इआ छोट काहीं चिट्ठी के उद्देश्य पतरस के लिखी दूसर चिट्ठी कि नाई हय। इआ चिट्ठी माहीं, इआ चिट्ठी काहीं लिखँइ बाला अपने पढ़ँइ बालेन के उत्साह काहीं बढ़ाबत हय, कि उआ बिसुआस काहीं बनाए रहँइ के खातिर पूरी कोसिस करत रहा, जउने काहीं परमातिमा अपने चुने पबित्र मनइन काहीं, एक बेरकिन माहीं हमेसा के खातिर सउँपि दिहिन हीं।

हम अपना पंचन से इआ बिनती करित हएन, कि इआ चिट्ठी काहीं बड़े ध्यान से पढ़ी, अउर मसीही मन्डलिन माहीं गलत सिच्छा देंइ बालेन से सतरक रही, अउर जउन मनई पाप माहीं जिअत नरक माहीं जाँइ बाले हैं, त खुसी के खबर सुनाइके उनहीं पंचन काहीं बचाई। अउर परमातिमा अपना पंचन काहीं घलाय पाप माहीं गिरँय से बचइहँय।

रूप-रेखा :

इआ चिट्ठी के परिचय

गलत सिच्छा देंइ बालेन के चरित्र अउर सिच्छा अउर उनखर अन्त

बिसुआस माहीं बने रहँइ के बारे माहीं चेतउनी

आसिरबाद के बचन

### यहूदा के अभिबादन

1 हम यहूदा आहने, अउर इआ चिट्ठी काहीं लिख रहेन हय, जउन यीसु मसीह के दास अउर याकूब के भाई आहने, इआ चिट्ठी हम उनखे खातिर लिख रहेन हय, जिनहीं पिता परमातिमा बोलाइन हीं, अउर जिनसे प्रेम करत हैं, अउर उनखर यीसु मसीह के खातिर रखबारी करत हैं। 2 तौहई पंचन काहीं परमातिमा के दया, सान्ति अउर प्रेम बहुतायत से मिलत रहय।

#### गलत सिच्छा देंइ बालेन के पाप अउर उनहीं सजा के मिलब

3 हे पियार साथिव, हम पंचे जउने मुक्ती माहीं भागीदार हएन, हम ओखे बारे माहीं बड़े मेहनत के साथ, तौहई पंचन काहीं लिखँइ के पूरी कोसिस करत रहे हएन, पय हमहीं अब इआ जान परा, कि इआ चिट्ठी के द्वारा तौहसे पंचन से इआ बिनती करी, कि तूँ पंचे उआ बिसुआस के खातिर संघर्ष करा, जउन हमेसा के खातिर संतन काहीं सउँपा ग हय। 4 हम इआ बात तौहई पंचन काहीं एसे बताइत हएन, काहेकि तौहरे बीच माहीं, चुप्पय से कुछ अइसन मनई घुसि आए हँय, जिनखे सजा के बारे माहीं, पहिलेन से पबित्र सास्त्र माहीं लिखा हय, कि "ई पंचे परमातिमा के बचन काहीं मानँइ बाले न हौंही, अउर हमरे पंचन के परमातिमा के दया काहीं, भोग-बिलास करँइ के बहाना बनाय डारिन हीं, अउर हमरे पंचन के एकलउते मालिक, अउर प्रभू यीसु मसीह काहीं अपनाँइ से इनकार करत हैं।" 5 अउर हम तौहई पंचन काहीं इआ सुध देबामँइ के खातिर लिख रहेन हय, (काहेकि तूँ पंचे ई सगली बातन काहीं खुदय जनते हया) कि प्रभू पहिले कइसन अपने चुने मनइन काहीं मिस्र देस के धरती से निकार लाएँ तय, अउर बाद माहीं जेतने जन उनखे ऊपर बिसुआस नहीं किहिन, त उनहीं नास कइ दिहिन तय। 6 अउर हम तौहई पंचन काहीं इहव सुध देबामँइ चाहित हएन, कि जउन स्वरगदूत, अपने पद काहीं निकहा से नहीं सम्हारे पाइन रहा आय, अउर अपने खुद के रहँइ के जघा काहीं छोड़ि दिहिन रहा हय, प्रभू उनहूँ पंचन काहीं, उआ भयंकर न्याय के दिन के खातिर, सँकरिन माहीं बाँधिके,

कबहूँ न खतम हौइ बाले अँधिआर माहीं रक्खे हैं। 7 अउर इहइमेर से हम तौहई पंचन काहीं इहव बताँइ चाहित हएन, कि कउनमेर से सदोम अउर अमोरा सहरन के अउर उनखे आस-पास के सहरन के मनई, ईन स्वरगदूतन कि नाई ब्यभिचार करँइ बाले होइगे रहे हँय, अउर बुरी बासनन के पीछे भागत रहे हँय, त प्रभू उनहीं कबहूँ न बुझँय बाली आगी माहीं डारिके नास कइ दिहिन रहा हय, जउन हमरे पंचन के खातिर उदाहरन बनिगें हँय।

8 अउर ठीक इहइमेर से ई पंचे, सपन देखँइ बाले घलाय, अपने-अपने देहन काहीं असुद्ध करत हैं, अउर प्रभू के सक्ती काहीं तुच्छ जानत हैं। अउर ऊँचे पद बाले अधिकारिन काहीं भला-बुरा कहत हैं। 9 पय इहाँ तक, कि प्रधान स्वरगदूत मीकाईल घलाय, जब सइतान से मूसा नबी के लहास के बारे माहीं बहँस करत रहे हँय, तब ऊँ सइतान काहीं भला-बुरा कहिके, ओखे ऊपर दोस लगाँइ के हिम्मत नहीं किहिन; बलकिन एतनय कहिन, कि "प्रभू तोही डाँटँय।" 10 पय ई पंचे, जउने बातन काहीं समझतय नहिं आहीं, उनखे बारे माहीं भला-बुरा कहत हैं; अउर निरबुद्धी पसुअन कि नाई जउन बातँय उनखे मन माहीं अउती हई, उनहिन के मुताबिक करत हैं, एसे उँइन बातँय उनखे बिनास के कारन बन जाती हँय। 11 अउर इनहीं पंचन काहीं परमातिमा से खुब सजा मिली, काहेकि ई पंचे कैन कि नाई बुरी चाल-चलन काहीं अपनाइन हीं, अउर मजूरी के खातिर बिलाम नबी कि नाई, बिना सोच बिचार किहे गलती कर बइठे हँय: एसे ई पंचे घलाय नास होइ जइहँय, जइसन कोरह के साथ मिलिके प्रभू के बिरोध करँइ बाले नास कइ दीनगे रहे हँय। 12 ई पंचे तौहरे प्रेम-भोज के खातिर कलंक कि नाई हैं, जउन तौहरे साथ खात-पिअत हैं। ई पंचे समुद्र माहीं छिपी पथरा के बड़ी चट्टान कि नाई हैं, जउन खतरनाक होती हई, अउर ई पंचे निडर होइके, तौहरे पंचन के साथ माहीं खात-पिअत त हैं, पय इनहीं केबल अपनय सोरथ पूर करँइ के चिन्ता रहत ही। ई पंचे पानी न बरसँय बाली बदरी कि नाई होत हैं, जिनहीं हबा उड़ाय लइ जात ही। अउर ई पंचे पतझड़ के अइसन बिरबन कि नाई होत हैं, जउनेन माहीं कबहूँ फर नहीं लागँय, अउर जउन दुइ बेरी मर चुके हँय, अउर जइ समेत उँखइगे हँय। 13 ई पंचे समुद्र माहीं उँठय बाली, अइसन



भयंकर लहरन कि नाई हैं, जउन अपने निरलज्जता के कामन के फेन उछालत रहती हई। अउर ई पंचे ँकई-ओकई भटकई बाली अइसन तरइअन कि नाई हैं, जिनखे खातिर अनन्तकाल के घोर अँधिआर रक्खा ग हय।<sup>14</sup> अउर आदम के सतएँ पीढ़ी म पइदा भें, हनोक घलाय, इनखे बारे माहीं भबिस्यबानी किहिन रहा हय, <sup>15</sup> कि “देखा, प्रभू अपने लाखन पबित्र स्वरगदूतन के साथ, सगले मनइन के न्याय करई के खातिर आए हँय, कि जउने, जउन मनई बुरे काम किहिन हीं, उनखे ई कामन के खातिर, अउर जउन मनई परमातिमा के बिरोध माहीं बात कहिन हीं, उनहूँ पंचन काहीं घलाय, एखे खातिर सजा दें। <sup>16</sup> काहेकि ई पंचे कुड़कुड़ाँय बाले आहीं, अउर दुसरेन के दोस ढूँढ़ई माहीं लगे रहत हैं। अउर ई पंचे अपने मन मरजी के मुताबिक चलत हैं; अउर अपने मुँहे से घमन्ड के बातँय बोलत हैं; अउर अपने फायदा के खातिर दुसरे मनइन के मुँह देखी बड़ाई करत हैं।”

#### चेतनी अउर उपदेस

<sup>17</sup> पय हे पियार साथिव, तूँ पंचे ऊँ बातन काहीं हमेसा सुथ रक्खा; जउने बातन काहीं हमरे पंचन के प्रभू यीसु मसीह के चुने, खास चलन के द्वारा पहिलेन से बताबा जाय चुका हय। <sup>18</sup> ऊँ पंचे, तौहसे कहा करत रहे हँय, कि “अन्त के दिनन माहीं अइसन मनई अइहँय, जउन परमातिमा के बचन के हँसी उड़इहँय, अउर अपने बुरी इच्छन के मुताबिक चलिहँय। <sup>19</sup> ई पंचे

मनइन के बीच माहीं फूट डरबामँइ बाले आहीं; काहेकि ई पंचे पबित्र आत्मा के मुताबिक नहीं, बलकिन देह के बुरी इच्छन के मुताबिक जीवन जिअत हैं। <sup>20</sup> पय हे पियार साथिव, तूँ पंचे अपने अति पबित्र बिसुआस माहीं अउर मजबूत होत जा, अउर पबित्र आत्मा के सक्ती से प्राथना करत रहा, <sup>21</sup> अउर तूँ पंचे परमातिमा के प्रेम माहीं मजबूत बने रहा, अउर उआ दिन के इन्तजार करा, जब हमरे पंचन के प्रभू यीसु मसीह के दया, तोहई पंचन काहीं अनन्त जीवन देई। <sup>22</sup> अउर तौहरे पंचन म से, जउन मनई बिसुआस माहीं कमजोर हैं, उनखे ऊपर दया करा। <sup>23</sup> अउर परमातिमा न्याय के समय मनइन काहीं, अनन्त आगी माहीं डारँइ के जउन सजा देंइ बाले हैं, दउड़िके ओसे मनइन काहीं बचाबा, अउर परमातिमा के भय मानत दुसरे मनइन के ऊपर दया करा; पय दया करत समय उनखे पापन माहीं बेलकुल भागीदार न होया।”

#### आसिरबाद के बचन

<sup>24</sup> अब तौहई पंचन काहीं, जे पाप माहीं गिरँय से बचाय सकत हैं, अउर अपने महिमा के भरपूरी के आँगे आनन्दित, अउर निरदोस कइके ठाढ़ कइ सकत हैं। <sup>25</sup> अउर हमहीं पंचन काहीं मुक्ती देंइ बाले, एकलउते परमातिमा के महिमा, अउर बैभव अउर सक्ती, अउर अधिकार, हमरे पंचन के प्रभू यीसु मसीह के द्वारा, जइसन सनातन काल से हय, अबहिनव होय, अउर आमँइ बाले जुगन-जुगन तक होत रहय। आमीन!

## दरसनन के बातँय

### इआ किताब के परिचय

यूहन्ना काहीं मिले दरसनन के बातँय, अइसन समय माहीं लिखी गे रही हँय, जब मसीहियन काहीं उनखे बिसुआस के कारन सतावा जात रहा हय। काहेकि ऊँ पंचे यीसु मसीह के ऊपर प्रभू अउर मालिक के रूप माहीं बिसुआस करत रहे हँय। इआ कारन से लेखक के चिन्ता के खास बिसय, अपने पढ़े बालेन माहीं आसा अउर उत्साह के संचार करब रहा हय। एसे ऊँ उनसे इआ निबेदन करत हँ, कि ऊँ पंचे इआ दुख अउर सताव के समय माहीं बिसुआस के काबिल बने रहँय।

इआ किताब के अधिकतर हिस्सा प्रकासनन अउर दरसनन के कतारन के रूप माहीं हय। जिनहीं संकेतिक भाँसा के रूप माहीं लिखा ग हय। अइसा माना जात हय, कि उआ समय के मसीहियन काहीं इआ समझ म आइगा रहा हय। पय दुसरे मनइन के खातिर रहस्य बना रहिगा। जइसन संगीत माहीं एकठे धुन होत ही, उहयमेर इआ किताब के बिसय- बस्तु बेर-बेर अनेकव तरीकन से, अलग-अलग दर्सनन के कतारन के द्वारा दोहराई जात ही। पय इआ किताब के बिस्तार से ब्याख्या के सम्बन्ध माहीं मतभेद हय, फेरव खास बिसय साफ-साफ हय। परमातिमा प्रभू यीसु मसीह के द्वारा अपने सगले बइरिन काहीं, जउने माहीं सइतान घलाय सामिल हय, हमेसा के खातिर पूरी तरह से हराय देइहँय। अउर जब इआ जीत पूर होइ जई, तब परमातिमा अपने बिसुआस के काबिल मनइन काहीं, नबा अकास अउर नई धरती काहीं उनहीं आसीस के रूप माहीं देइहँय।

हे भाई-बहिनिव अपना पंचे दुख अउर सताव के समय माहीं, बिसुआस माहीं मजबूत बने रही, काहेकि प्रभू यीसु मसीह हरबिन आमँइ बाले हँ, हम पंचे जउन उनखे नाम के खातिर दुख अउर सताव सहित हएन, त परमातिमा ओखर इनाम हमहीं पंचन काहीं जरूर देइहँय।

रूप-रेखा :

इआ किताब के परिचय

सुरुआत के दरसन अउर सातव मसीही मन्डलिन काहीं चिट्टी

सात मुहरन से बन्द चरमपत्र

सातठे तुरही

अजिगर अउर दुइठे जानबर

इनखे अलाबा दूसर दरसन

परमातिमा के कोप के सातठे खोरबा

बेबीलोन के बिनास, जानबर, परमातिमा के सँदेस बतामँइ बाले लबरे मनई, अउर सइतान के हार

अन्तिम न्याय

नबा अकास, नई धरती, अउर नबा यरूसलेम

उपसंहार

1 परमातिमा आपन प्रकासन यीसु मसीह काहीं एसे दिहिन, कि ऊँ अपने दासन काहीं ऊँ बातँय देखामँय, जिनखर हरबिन होब जरूरी हय, अउर ऊँ अपने स्वरगदूत काहीं पठइके उनखे द्वारा अपने दास यूहन्ना काहीं बताइन, 2 जउन परमातिमा के बचन अउर यीसु मसीह के गबाही, अरथात जउन कुछ ऊँ देखिन रहा हय, ओखर गबाही दिहिन। 3 धन्य हय उआ मनई, जउन इआ भबिस्यबानी के बचन काहीं पढ़त हय, अउर धन्य हँ ऊँ पंचे जउन सुनत हँ, अउर एमाहीं लिखी बातन काहीं मानत हँ, काहेकि समय नजदीक आइगा हय।

### सातँव मसीही मन्डलिन काहीं नबस्कार

4 यूहन्ना के तरफ से आसिया प्रदेश के सातव मसीही मन्डली के नाम। अउर उनखे तरफ से जउन हँ, अउर जउन रहे हँय, अउर जउन आमँइ बाले हँ; अउर उन सातँव आत्मन के तरफ से, जउन उनखे सिंहासन के आँगे हई, 5 अउर यीसु मसीह के तरफ से, जउन बिसुआस के काबिल गबाह, अउर मरेन म से जि उठँय बालेन माहीं पहिलउठा, अउर धरती के राजन के ऊपर घलाय सासन करँइ बाले आहीं, तौहई पंचन काहीं किरपा अउर सान्ती

मिलत रहय। ऊँ हमसे पंचन से प्रेम करत हँ, अउर उँइन अपने खून के द्वारा हमहीं पंचन काहीं पापन से छोड़ाइन हीं। 6 अउर हमहीं पंचन काहीं एकठे राज, अउर अपने पिता परमातिमा के खातिर याजक घलाय बनाय दिहिन हीं; उनहिन के महिमा अउर सामर्थ जुगन-जुगन तक रहय। आमीन। 7 देखा, ऊँ बदरिन के साथ आमँइ बाले हँ; अउर हरेक आँखी उनहीं देखी, इहाँ तक कि जउन उनहीं बेधिन रहा हय, ऊँ पंचे घलाय उनहीं देखिहँय, अउर धरती के सगले कुल उनखे कारन छाती पिटिहँय। इआ जरूर होई। आमीन। 8 प्रभू परमातिमा, जउन हँ, अउर जउन रहे हँय, अउर जउन आमँइ बाले हँ, जउन सबसे सक्तिसाली हँ, इआ कहत हँ, “हमहिन अल्फा अउर ओमेगा आहैन †।”

### यूहन्ना काहीं मसीह के दरसन मिलब

9 हम यूहन्ना, जउन तौहार पंचन के भाई, अउर यीसु के कस्ट, अउर राज, अउर धीरज माहीं, तौहार पंचन के सहभागी आहैन, परमातिमा के बचन, अउर यीसु के गबाही के कारन, पतमुस नाम के टापू माहीं रहेन हय। 10 हम

† आदि अउर अन्त

प्रभू के दिन आत्मा माहीं आय गएन, अउर अपने पीछे तुरही कि नाई बड़ा बोल इआ कहत सुनेन, <sup>11</sup> कि “जउन कुछू तू देखते हया, ओही किताब माहीं लिखिके, सातव मसीही मन्डलिन के लघे पठय घा, अरथात इफिसुस अउर इसमुरना, अउर पिरगमुन, अउर थुआतीरा, अउर सरदीस, अउर फिलदिलफिया, अउर लौदीकिया काहीं।”

<sup>12</sup> तब हम उनहीं देखँइ के खातिर जउन हमसे बोलत रहे हँय; आपन मुँह फेरन; अउर पीछे फिरिके हम सोने के सातठे दीबटन † काहीं देखन।

<sup>13</sup> अउर उन दीबटन के बीच माहीं मनई के लड़िका कि नाई एकठे मंसेरुआ काहीं देखेन, जउन गोडेन तक के ओन्हा पहिरे, अउर छाती माहीं सोने के पट्टा बाँधे रहे हँय। <sup>14</sup> उनखर मूँड अउर बार उजर ऊन अउर पाला कि नाई उजर रहे हँय; अउर उनखर आँखी आगी के लपट कि नाई रही हँय। <sup>15</sup> अउर उनखर गोड़ उत्तम पीतल कि नाई रहे हँय, जउन मानो भट्टी माहीं तपाए गे हँय; अउर उनखर बोल, खुब पानी के बोल कि नाई रहा हया। <sup>16</sup> अउर ऊँ अपने दहिने हाँथ माहीं सातठे तरइया लए रहे हँय, अउर उनखे मुँहे से दुइ धार बाली चोख तलबार निकरत रही हया; अउर उनखर मुँह अइसन चमकत रहा हया, जइसन सुरिज तेज घाम के समय चमकत हया। <sup>17</sup> जब हम उनहीं देखेन, त उनखे गोडेन माहीं लहास कि नाई गिर परेन, अउर उँइ हमरे ऊपर आपन दहिना हाँथ धइके, इआ कहिन, कि “डेरा न; हम पहिल अउर अन्तिम अउर जिन्दा आहेन। <sup>18</sup> हम मर गएन तय, अउर अब देखा; हम जुगन-जुगन तक जिन्दा रहब; अउर मउत अउर अधोलोक के उघन्नी हमरेन लघे हई। <sup>19</sup> एसे जउन बातँय तू देखे हया, अउर जउन बातँय होइ रही हँय; अउर जउन बाद माहीं होइ बाली हई, ऊँ सगलिन काहीं लिख ल्या। <sup>20</sup> अउर ऊँ सातव तरइअन के भेद, जिनहीं तू हमरे दहिने हाँथ माहीं देख रहे हया, अउर ऊँ सातव सोने के दीबटन के भेद, ऊँ सातठे तरइया, सातव मसीही मन्डलिन के दूत आहीं, अउर ऊँ सातव दीबट, सातठे मसीही मन्डली आहीं।”

### इफिसुस सहर के मसीही मन्डली काहीं मसीह के सँदेस

**2** इफिसुस के मसीही मन्डली के दूत काहीं इआ लिखा, कि “जउन सातँव तरइया अपने दहिने हाँथ माहीं लए हँ, अउर सोने के सातँव दीबटन के बीच माहीं चलत फिरत हँ, ऊँ इआ कहत हँ, कि <sup>2</sup> हम तौहरे काम, अउर मेहनत, अउर तौहरे धीरज काहीं जानित हएन; अउर इहव घलाय, कि तू बुरे मनइन काहीं बरदास नहीं कइ सकते आह्या, अउर जउन अपने-आप काहीं यीसु मसीह के खास चेला कहत हँ, अउर आहीं न, उनहीं पंचन काहीं घलाय तू जाँच परखिके लबरा पाया हया। <sup>3</sup> अउर तू धीरज धरते हया, अउर हमरे नाम के खातिर दुख उठाबत-उठाबत थके नहीं आह्या। <sup>4</sup> पय हमहीं तौहरे बिरोध माहीं इआ कहँइ क हय, कि तू आपन पहिले कि नाई प्रेम करब छोड़ दिहा हया। <sup>5</sup> तू हमसे पहिले केतना प्रेम करत रहे हया, अउर अब केतना प्रेम करते हया, ओही सुध कइके, पस्चाताप करा, अउर पहिले कि नाई काम करा; अउर अगर तू पस्चाताप न करिहा, त हम तौहरे लघे आइके, तौहरे दीबट काहीं उआ जघा से हटाय देब। <sup>6</sup> पय हाँ, तौहरे माहीं इआ बात त हय, कि तू गलत सिच्छा देँइ बाले नीकुलाई दल के कामन से नफरत करते हया, जिनसे हमहूँ नफरत करित हएन। <sup>7</sup> जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय, जउन बिजय पाई, ओही हम उआ जीवन के बिरबा म से, जउन परमातिमा के स्वरगराज माहीं हय, फर खाँइ काहीं देब।”

### इसमुरना सहर के मसीही मन्डली काहीं मसीह के सँदेस

<sup>8</sup> इसमुरना के मसीही मन्डली के दूत काहीं इआ लिखा, कि “जउन पहिल अउर अन्तिम आहीं; जउन मरिगें तय अउर अब जिन्दा होइगे हँय, ऊँ इआ कहत हँ, कि <sup>9</sup> हम तौहरे कस्त अउर गरीबी काहीं जानित हएन; (पय तू धनी हया) अउर जउन मनई अपने-आप काहीं यहूदी कहत हँ, अउर आहीं न,

† दिया रक्खँइ के स्टैन्ड

बलकिन सइतान के सभा आहीं, उनखे बुराई काहीं घलाय जानित हएन। <sup>10</sup> जउन कस्त तौहई उठामँइ परी उनसे डेरा न। काहेकि देखा, सइतान तौहरे पंचन म से कइअक जनेन काहीं जेल माहीं डारँइ बाला हय, जउने तू पंचे जाँचे-परखे जा; अउर तौहई पंचन काहीं दस दिन तक कस्त उठामँइ परी, प्रान देँइ तक बिसुआसी रहा; त हम तौहई जीवन के मुकुट देब। <sup>11</sup> जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय, जउन बिजय पाई, ओही दूसर मउत से हानि न पहुँची।”

### पिरगमुन सहर के मसीही मन्डली काहीं मसीह के सँदेस

<sup>12</sup> पिरगमुन के मसीही मन्डली के दूत काहीं इआ लिखा, कि “जिनखे लघे दुइ धार बाली निकही चोख तलबार ही, ऊँ इआ कहत हँ, कि <sup>13</sup> हम इआ त जानित हएन, कि तू उहाँ रहते हया, जहाँ सइतान के सिंहासन हय; अउर तू हमरे नाम माहीं बने रहते हया; अउर हमरे ऊपर बिसुआस करँइ से, उन दिनन माहीं पीछे नहीं हट्या, जउने माहीं हमार बिसुआस के काबिल गबाह अन्तिपास, तौहरे पंचन के बीच माहीं, उआ जघा माहीं मार डारा ग, जहाँ सइतान रहत हय। <sup>14</sup> पय हमहीं तौहरे बिरोध माहीं कुछ बातँय कहँइ क हय, काहेकि तौहरे इहाँ कुछ अइसन हँ, जउन बिलाम के सिच्छा काहीं मानत हँ, जउन बालाक राजा काहीं, इजराइलिन के आँगे ठोकर के कारन रक्खँय सिखाइस, कि ऊँ पंचे मूरतिन के ऊपर चढ़ाई चीजन काहीं खाँय, अउर ब्यभिचार करँय †। <sup>15</sup> उहयमेर तौहरे इहाँ कुछ त अइसन हँ, जउन गलत सिच्छा देँइ बाले नीकुलाई दल के सिच्छा काहीं मानत हँ। <sup>16</sup> एसे मन फिराबा, नहीं त हम तौहरे लघे हरबिन आइके, अपने मुँहे के तलबार से उनखे साथ लइब। <sup>17</sup> अउर जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय; जे बिजय पाई, ओही हम, न देखँइ बाले मन्ना म से देब; अउर ओही एकठे उजर पथरा घलाय देब; अउर उआ पथरा माहीं एकठे नाम घलाय लिखा होई, जेही ओही पामँइ बाले के अलाबा, अउर कोऊ न जानी।”

### थुआतीरा सहर के मसीही मन्डली काहीं मसीह के सँदेस

<sup>18</sup> थुआतीरा के मसीही मन्डली के दूत काहीं इआ लिखा, “परमातिमा के लड़िका जिनखर आँखी आगी के लपट कि नाई हई, अउर जिनखर गोड़ उत्तम पीतल कि नाई हँ, ऊँ इआ कहत हँ, कि <sup>19</sup> हम तौहरे कामन, अउर प्रेम, अउर बिसुआस, अउर सेबा, अउर धीरज काहीं जानित हएन, अउर इहव जानित हएन, कि तौहार पिछले काम, पहिल कामन से बढ़िके हँ। <sup>20</sup> पय हमहीं तौहरे बिरोध माहीं इआ कहँइ क हय, कि तू उआ मेहेरिआ इजेबेल काहीं रहँइ देते हया, जउन अपने-आप काहीं परमातिमा के सँदेस बतामँइ बाली कहत ही, उआ अपने सिच्छा से, हमरे सेबकन काहीं ब्यभिचार करँय, अउर मूरतिन के आँगे चढ़ाई चीजन काहीं खाँय के खातिर बहकाबत ही। <sup>21</sup> हम ओही मन फिरामँय के खातिर मोका दिहेन, पय उआ अपने ब्यभिचार से मन नहीं फिरामँय चाहय। <sup>22</sup> देखा, हम ओही घोर कस्त माहीं डारित हएन, अउर जे ओखे साथ ब्यभिचार करत हँ, अगर ऊँ पंचे ओखी कि नाई कामन से अपने मन काहीं न बदलिहँय, त हम उनहूँ काहीं घोर कस्त माहीं डारब। <sup>23</sup> हम ओखे लड़िका बिटिन काहीं मारि डारब; अउर तब सगली मसीही मन्डली जान लेइहँय, कि हिरदँय अउर मन काहीं जाँचय-परखँय बाले हमहिन आहेन, अउर हम तौहरे पंचन म से हरेक काहीं, उनखे कामन के मुताबिक बदला देब। <sup>24</sup> पय तू पंचे थुआतीरा के बाँकी मनइन से, जेतने इआ सिच्छा काहीं नहीं मानँय, अउर ऊँ बातन काहीं जिनहीं सइतान के गहिल बातँय कहत हँ, नहीं जनते आह्या, इआ कहित हएन, कि हम तौहरे पंचन के ऊपर अउर बोझ न डारब। <sup>25</sup> पय हाँ, जउन तौहरे पंचन के लघे हय, ओही हमरे आमँय तक थामँ रहा। <sup>26</sup> जे बिजय पाई, अउर हमरे कामन के मुताबिक अन्त तक करत रही, ओही हम जाति-जाति के मनइन के ऊपर अधिकार देब। <sup>27</sup> अउर उआ लोहे के राजदन्ड लए,

†† 2:14 गिन 22:2-41; 31:16

उनखे ऊपर राज करी, जउनमेर कुम्हार के माटी के बरतन चकनाचूर होइ जात हैं। हमहूँ घलाय अइसय अधिकार अपने पिता से पाएन हँय।<sup>28</sup> अउर हम ओही भिनसारे के तरइया देब।<sup>29</sup> जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय।”

### सरदीस सहर के मसीही मन्डली काहीं मसीह के सँदेस

3 सरदीस के मसीही मन्डली के दूत काहीं इआ लिखा, “जिनखे लघे परमातिमा के सातठे आत्मा, अउर सातठे तरइया हई, ऊँ इआ कहत हैं, कि हम तौहरे कामन काहीं जानित हएन, कि तूँ जिन्दा त कहउते हया, पय हया मरे।<sup>2</sup> जागत रहा, अउर उन चीजन काहीं जउन बाँकी रहि गई हँय, अउर जउन मिटँय बाली हई, उनहीं मजबूत करा; काहेकि हम तौहरे कउनव काम काहीं, अपने परमातिमा के नजर माहीं, पूर नहीं पाएन।<sup>3</sup> एसे सुधि करा, कि तूँ कइसन सिच्छा पाया तय, अउर सुने रहे हया, ओहिन माहीं बने रहा, अउर पस्चाताप करा, अगर तूँ जागत न रहहा, त हम चोर कि नाई आय जाब, अउर तूँ बेलकुल न जाने पइहा, कि हम कउने घरी, तौहरे ऊपर आय परब।<sup>4</sup> पय हों, सरदीस माहीं तौहरे इहाँ कुछ अइसन मनई हैं, जउन अपने-अपने ओन्हन काहीं असुद्ध नहीं किहिन, ऊँ पंचे उजर ओन्हा पहिरे हमरे साथ घुमिहँय, काहेकि ऊँ पंचे एखे काबिल हैं।<sup>5</sup> जे बिजय पाई, ओही इहइमेर उजर ओन्हा पहिराबा जई, अउर हम ओखर नाम जीवन के किताब म से कउनव मेर से न काटब, पय ओखर नाम अपने पिता, अउर उनखे स्वरगदूतन के आँगे मान लेब।<sup>6</sup> जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय।”

### फिलदिलफिया सहर के मसीही मन्डली काहीं मसीह के सँदेस

7 अउर फिलदिलफिया के मसीही मन्डली के दूत काहीं इआ लिखा, कि “जउन पबित्र अउर सच्चे हैं, अउर जेखे लघे राजा दाऊद के उघन्नी हय, जेखे खोले काहीं कोऊ बन्द नहीं कइ सकय, अउर बन्द कीन काहीं कोऊ खोल नहीं सकय, ऊँ इआ कहत हैं, कि<sup>8</sup> हम तौहरे कामन काहीं जानित हएन; देखा, हम तौहरे आँगे एकठे दुअरा खोलिके रखे हएन, जउने काहीं कोऊ बन्द नहीं कइ सकय; तौहार सक्ती थोरिन काहीं त हय, तऊ तूँ हमरे बचन काहीं पालन किहे हया, अउर हमरे नाम काहीं इनकार नहीं किहे आह्या।<sup>9</sup> देखा, हम उन सइतान के पीछे चलँइ बालेन काहीं, तौहरे काबू माहीं कइ देब, जउन खुद काहीं यहूदी कहत हैं, पय आहीं न, बलकिन ऊँ झूठ बोलँइ बाले आहीं, देखा, हम अइसन करब, कि ऊँ तौहरे गोड़न गिरि हँय, अउर इआ जान लेइहँय, कि हम तौहसे प्रेम करित हएन।<sup>10</sup> हम तौहई धीरज धरँय के खातिर कहने तय, त तूँ धीरज धरे हया, एसे हमहूँ तौहई परिच्छा के उआ समय बचाइके रक्खब, जउन धरती माहीं रहँइ बालेन के जाँचय-परखँय के खातिर, सगले संसार माहीं आमँइ बाली हय।<sup>11</sup> हम हरबिन आमँइ बाले हएन; जउन कुछ तौहरे लघे हय, ओही थामहें रहा, कि जउने कोऊ तौहार मुकुट छड़ाय न पाबय।<sup>12</sup> जे बिजय पाई, ओही हम परमातिमा के मन्दिर माहीं एकठे खम्भा बनाउब; अउर उआ पुनि कबहूँ बहिरे न निकरी; अउर हम अपने परमातिमा के नाम, अउर अपने परमातिमा के सहर, अरथात नबा यरूसलेम सहर के नाम, जउन हमरे परमातिमा के लघे से, अरथात स्वरग से उतरँय बाला हय, अउर आपन नबा नाम ओखे ऊपर लिखब।<sup>13</sup> जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय।”

### लौदीकिया सहर के मसीही मन्डली काहीं मसीह के सँदेस

14 अउर लौदीकिया के मसीही मन्डली के दूत काहीं इआ लिखा, कि “जउन आमीन, अउर बिसुआस के काबिल, अउर सच्चे गबाह हैं, अउर परमातिमा के सस्टी के मूल कारन आहीं, ऊँ इआ कहत हैं, कि<sup>15</sup> हम तौहरे कामन काहीं जानित हएन, कि तूँ न त ठंड हया, अउर न गरम, इआ भला होत, कि तूँ ठंड इआ कि गरम होत्या।<sup>16</sup> एसे कि तूँ कुनकुन हया, अउर न

ठंड आह्या, अउर न गरमय, हम तौहई अपने मुँहे से उगिलँइ बाले हएन।<sup>17</sup> तूँ जउन इआ कहते हया, कि हम धनी हएन, अउर धनमान होइ गएन हय, अउर हमहीं कउनव चीज के कमी नहीं आय, अउर इआ नहीं जनते आह्या, कि तूँ अभागा, अउर तुच्छ, अउर कंगाल, अउर आँधर, अउर नंगा हया।<sup>18</sup> एहिन से हम तौहई इआ सलाह देइत हएन, कि आगी माहीं तपाबा सोन हमसे मोल लइ ल्या, कि धनी होइजा; अउर उजर ओन्हा लइ ल्या, कि ओही पहिरिके तौहई अपने नंगापन के लज्जा न होय, अउर अपने आँखिन माहीं लगाँइ के खातिर सुरमा लइ ल्या, कि तूँ देखँइ लागा।<sup>19</sup> अउर हम जेसे-जेसे प्रेम करित हएन, ऊँ सगलेन काहीं डॉट-फटकार लगाइत हएन, एसे उत्साही बना, अउर मन फिराबा।<sup>20</sup> देखा, हम दुअरा माहीं ठाढ़े खट-खटाइत हएन; अगर कोऊ हमार बोल सुनिके दुअरा खोली, त हम ओखे भीतर आइके ओखे साथ खाना खाब, अउर उआ हमरे साथ।<sup>21</sup> जे बिजय पाई, ओही हम अपने साथ अपने सिंहासन माहीं बइठाउब, जइसन हमहूँ घलाय बिजय पाइके, अपने पिता के साथ उनखे सिंहासन माहीं बइठि गएन हय।<sup>22</sup> ‘जेखर सुनँय के मन होय, उआ सुन लेय, कि पबित्र आत्मा मसीही मन्डलिन से का कहत हय’।”

### स्वरग माहीं अराधना

4 ई बातन के बाद, जब हम नजर उठाइके देखेन, त का देखित हएन, कि स्वरग माहीं एकठे दुअरा खुला हय; अउर जेही हम पहिले तुरही कि नाई अबाज से, अपने साथ बातँय करत सुने रहेन हय, उँइन कहत हैं, कि “इहाँ ऊपर आय जा, अउर हम ऊँ बातँय तौहई देखाउब, जिनखर ई बातन के बाद पूर होब जरूरी हय।”<sup>2</sup> अउर तुरन्तय हम पबित्र आत्मा से भर गएन; अउर का देखित हएन, कि एकठे सिंहासन स्वरग माहीं धरा हय, अउर उआ सिंहासन के ऊपर कोऊ बइठ हैं।<sup>3</sup> अउर जउन ओखे ऊपर बइठ हैं, उनखर सोभा यसब अउर गोमेद रतन कि नाई देखाई देत ही, अउर उआ सिंहासन के चारिव कइती मरकत रतन कि नाई एकठे मेघधनुस देखाई देत हय।<sup>4</sup> अउर उआ सिंहासन के चारिव कइती चउबिस सिंहासन हैं; अउर ई सिंहासनन के ऊपर चउबिस अँगुआ उजर ओन्हा पहिरे बइठ हैं, अउर उनखे मूँडेन माहीं सोने के मुकुट हैं।<sup>5</sup> अउर उआ सिंहासन म से बिजुली अउर गरजब निकरत हैं, अउर सिंहासन के आँगे आगी के सातठे दिया जल रहे हँय, ऊँ परमातिमा के सातठे आत्मा आहीं।<sup>6</sup> अउर उआ सिंहासन के आस-पास सीसा कि नाई चमकदार पारदर्सी समुद्र हय, अउर बीच माहीं सिंहासन के आस-पास चारठे जिन्दा प्रानी हैं, जिनखे आँगे पीछे आँखिन-आँखी हई।<sup>7</sup> पहिल प्रानी सेर कि नाई हय, अउर दूसर प्रानी बरधा कि नाई हय, अउर तिसरे प्रानी के मुँह मनई कि नाई हय, अउर चउथ प्रानी उडत चील्ह कि नाई हय।<sup>8</sup> अउर चरहूँ प्रानिन के छय-छयठे पखना हैं, अउर चारिव कइती, अउर भीतर आँखिन आँखी हई; अउर ऊँ पंचे रातव दिना बिना अराम किहे, इआ कहत रहत हैं, कि

“पबित्र, पबित्र, पबित्र प्रभू परमातिमा, सर्वसक्तिमान, जउन रहे हँय, अउर जउन हैं, अउर जउन आमँइ बाले हैं।”

<sup>9</sup> अउर जब ऊँ प्रानी उनखर जउन सिंहासन माहीं बइठ हैं, अउर जउन जुगन-जुगन से जिन्दा हैं, महिमा अउर मान-सम्मान अउर धन्यवाद करिहँय।<sup>10</sup> तब चउबीसव अँगुआ सिंहासन माहीं बइठँय बाले के आँगे गिर परिहँय, अउर उनहीं, जउन जुगन-जुगन से जिन्दा हैं, प्रनाम करिहँय; अउर आपन-आपन मुकुट सिंहासन के आँगे इआ कहत धइ देइहँय, कि

<sup>11</sup> “हे हमार पंचन के प्रभू, अउर परमातिमा, अपनय महिमा, अउर मान-सम्मान, अउर सामर्थ के काबिल हएन; काहेकि अपनय सगली चीजन काहीं बनाएन हय, अउर ऊँ अपनय के मरजी से बनाई गे रही हँय, अउर बनाई गई हँय।”

### मुहरबन्द किताब अउर मेम्ना

5 अउर जउन सिंहासन माहीं बइठ रहे हँय, हम उनखे दहिने हाँथ माहीं एकठे किताब देखेन, जउन भीतर अउर बाहर लिखी रही हय, अउर उआ सात मुहर लगाइके बन्द कीन गे रही हय।<sup>2</sup> फेर हम एकठे बलमान स्वरगदूत काहीं देखेन, जउन तेज अबाज से इआ प्रचार करत रहे हँय, कि “इआ किताब काहीं खोलैय अउर एखर मुहर टोरेँइ के काबिल को हय?”<sup>3</sup> अउर न स्वरग माहीं, न धरती माहीं, न धरती के नीचे, कोऊ उआ किताब काहीं खोलैय, अउर ओखे ऊपर नजर डारैय के काबिल निकरा।<sup>4</sup> तब हम फूट-फूटिके रोमँइ लागेन, काहेकि उआ किताब काहीं खोलैय, इआ कि ओखे ऊपर नजर डारैय के काबिल कोहू नहीं मिला।<sup>5</sup> तब ऊँ अँगुअन म से एक जने हमसे कहिन, “न रोबा; देखा, यहूदा के कुल के उआ सेर, जउन राजा दाऊद के बंसज आहीं, उआ किताब काहीं खोलैय, अउर ओखर सातव मोहर टोरेँइ के खातिर बिजयी भे हँय।”<sup>6</sup> अउर हम उआ सिंहासन, अउर चारिव जिन्दा प्रानिन, अउर ऊँ अँगुअन के बीच माहीं, मानो एकठे बध कीन मेम्ना ठाढ़ देखेन; ओखे सातठे सींग अउर सातठे आँखी रही हँय; ई परमातिमा के सातव आत्मा आहीं, जिनहीं परमातिमा सगली धरती के ऊपर पठइन हीं।<sup>7</sup> ऊँ आइके उनखे दहिने हाँथ से जउन सिंहासन के ऊपर बइठ रहे हँय, उआ किताब लइ लिहिन,<sup>8</sup> अउर जब ऊँ किताब लइ लिहिन, त ऊँ चारिव जिन्दा प्रानी, अउर चउबीसव अँगुआ, उआ मेम्ना के आँगे गिर परे; अउर हरेक के हाँथ माहीं बीना अउर महकँइ बाली चीजन से भरे, सोने के खोरबा रहे हँय, ई त पबित्र लोगन के प्राथना आहीं।<sup>9</sup> अउर ऊँ पंचे इआ नबा गाना गामँइ लागे, कि

“अपनय इआ किताब काहीं लेंइ, अउर एखर मुहरँय खोलैय के काबिल हएन; काहेकि अपना बध होइके अपने खून से हरेक कुल, अउर भाँसा, अउर लोग, अउर जाति म से परमातिमा के खातिर लोगन काहीं मोल लिहेन हँय।

<sup>10</sup> अउर उनहीं, हमरे पंचन के परमातिमा के खातिर एकठे राज, अउर याजक बनाएन हय; अउर ऊँ पंचे धरती के ऊपर राज करत हैं।”

<sup>11</sup> अउर जब हम देखेन, त उआ सिंहासन, अउर उन प्रानिन, अउर ऊँ अँगुअन के चारिव कइती खुब स्वरगदूतन के बोल सुनेन, जिनखर गिनती लाखन, करोड़न के रही हय।<sup>12</sup> अउर ऊँ जोर-जोर से कहत रहे हँय, कि “बध कीन मेम्नय सामर्थ, अउर धन, अउर ग्यान, अउर सक्ती, अउर मान-सम्मान, अउर महिमा, अउर बड़ाई के काबिल हैं।”<sup>13</sup> तब हम स्वरग माहीं, अउर धरती के ऊपर, अउर धरती के नीचे, अउर समुंद्र के बनाई सगली चीजन काहीं, अउर सब कुछ काहीं जउन उन माहीं हँय, इआ कहत सुनेन, कि जउन सिंहासन के ऊपर बइठ हैं, उनखर, अउर मेम्ना के धन्यवाद, अउर मान-सम्मान, अउर महिमा अउर राज, जुगन-जुगन तक रहय।<sup>14</sup> अउर चारिव जिन्दा प्रानी आमीन कहिन, अउर अँगुआ लोग मुँह के बल गिरिके गोड़न गिरे।

### सातव मोहरन के खोला जाब

6 पुनि हम देखेन, कि मेम्ना ऊँ सातव मुहरन म से एकठे काहीं खोलिन; अउर ऊँ चारिव प्रानिन म से एकठे के गरजँय कि नाई बोल सुनान, कि “आबा!”<sup>2</sup> अउर हमहीं एकठे उजर घोड़ा देखाई दिहिस, अउर ओखर सबार धनुस लए हय, अउर ओही एकठे मुकुट दीन ग, अउर उआ बिजई कि नाई, बिजय यात्रा के खातिर निकर परा।

<sup>3</sup> अउर जब मेम्ना दूसर मुहर खोलिन, त हम दुसरे प्रानी काहीं इआ कहत सुनेन, कि “आबा!”<sup>4</sup> ओखे बाद एकठे अउर घोड़ा निकरा, जउन लाल रंग के रहा हय; ओखे सबार काहीं इआ अधिकार दीन ग, कि धरती के ऊपर से मेल-जोल काहीं उठाय लेय, जउने मनई एक दुसरे के कतल करँय; अउर ओही एकठे बड़ी तलबार दीन गे।<sup>5</sup> अउर जब मेम्ना तीसर मुहर खोलिन, त हम तिसरे प्रानी काहीं इआ कहत सुनेन, कि “आबा!” अउर हमहीं एकठे

करिआ घोड़ा देखान, अउर ओखे सबार के हाँथे माहीं एकठे तउलना रहा हय;<sup>6</sup> अउर हम उन चारिव प्रानिन के बीच म से एकठे बोल इआ कहत सुनेन, कि “एक दिनार के सेर भर गोहूँ, अउर एक दिनार के तीन सेर जबा, पय जयतून के तेल अउर अंगूर के रस के नुकसान न किहा।”

<sup>7</sup> अउर जब मेम्ना चउथ मोहर खोलिन, त हम चउथ प्रानी के बोल इआ कहत सुनेन, कि “आबा!”<sup>8</sup> अउर हमहीं एकठे पिअर घोड़ा देखान; अउर ओखे सबार के नाम मउत हय, अउर अधोलोक ओखे पीछे-पीछे हय, अउर उनहीं धरती के एक चउथाई भाग के ऊपर इआ अधिकार दीन ग, कि तलबार, अउर अकाल, अउर महामारी, अउर धरती के बन पसुअन के द्वारा मनइन काहीं मारि डारँय।<sup>9</sup> अउर जब मेम्ना पचमी मुहर खोलिन, त हम स्वरग के बेदी के नीचे उनखे प्रानन काहीं देखेन, जउन परमातिमा के बचन के कारन, अउर उआ गबाही के कारन, जउन ऊँ पंचे दिहिन रहा हय, बध कीन गे रहे हँय।<sup>10</sup> ऊँ पंचे खुब चन्डे गोहराइके कहिन, “हे मालिक, हे पबित्र, अउर सत्य; अपना कब तक न्याय न करब? अउर धरती के रहँइ बालेन से, हमरे खून के बदला कब तक न लेब?”<sup>11</sup> अउर उनमा से हरेक जन काहीं, उजर ओन्हा दीन ग, अउर उनसे कहा ग, कि अउर थोरी देर तक अराम करा, जब तक तौहार पंचन के साथी सेबक लोग, अउर भाई लोग, जउन तौहरिन कि नाई बध होइ बाले हैं, उनहूँ के घलाय गिनती पूर न होइ जाय।<sup>12</sup> अउर जब मेम्ना छठमी मुहर खोलिन, त हम देखेन, कि एकठे बड़ा भुँइडोल भ; अउर सुरिज कम्बल कि नाई करिआ, अउर पूरी जौंधइआ खून कि नाई होइगो।<sup>13</sup> अउर अकास के तरइयों धरती के ऊपर अइसन गिर परीं, जइसन तेज आँधी से हालिके अंजीर के बिरबा म से कच्चे फर झरत हैं।<sup>14</sup> अउर अकास अइसन सरकि ग, जइसन चिट्ठी लपेटे से सरकि जात ही; अउर हरेक पहार, अउर टापू, अपने जघा से टरिगे।<sup>15</sup> अउर धरती के राजा, अउर प्रधान, अउर मुखिया, अउर धनमान, अउर समरथी लोग, अउर हरेक दास, अउर हरेक अजाद, पहारन के खोहन माहीं, अउर चट्टानन माहीं जाइके लुकिगें।<sup>16</sup> अउर पहारन, अउर चट्टानन से कहँइ लागे, “हमरे ऊपर गिर परा; अउर हमहीं पंचन काहीं उनखे मुँहे से जउन सिंहासन के ऊपर बइठ हैं, अउर मेम्ना के कोप से लुकाय ल्या।<sup>17</sup> काहेकि उनखे कोप के भयानक दिन आय पहुँचा हय, अब को ठहर सकत हय?”

### इजराइल के एक लाख चवालिस हजार लोग

7 एखे बाद हम धरती के चरहूँ कोनमा माहीं, चारठे स्वरगदूतन काहीं ठाढ़ देखेन, ऊँ पंचे धरती के चरहूँ हबा काहीं रोंके रहे हँय, जउने धरती, इआ कि समुंद्र, इआ कि कउनव बिरबन के ऊपर हबा न चलय।<sup>2</sup> फेर हम एकठे अउर स्वरगदूत काहीं, जिन्दा परमातिमा के मुहर लए पूरुब से ऊपर कइती आबत देखेन; ऊँ उन चरहूँ स्वरगदूतन से जिनहीं धरती अउर समुंद्र के नुकसान करँइ के अधिकार दीन ग तय, खुब चन्डे गोहराइके कहिन।<sup>3</sup> “जब तक हम अपने परमातिमा के सेबकन के लिलारे माहीं, मुहर न लगाय देई, तब तक धरती, अउर समुंद्र, अउर बिरबन काहीं नुकसान न पहुँचाया।”<sup>4</sup> अउर जिनखे ऊपर मुहर लगाई गे रही हय, हम उनखर गिनती सुनेन, अरथात इजराइल के सन्तानन के सगले कुलन म से, एक लाख चवालिस हजार मनइन के ऊपर मुहर लगाई गे।<sup>5</sup> यहूदा के कुल म से बारा हजार के ऊपर मुहर लगाई गे, अउर रूबेन के कुल म से बारा हजार के ऊपर; अउर गाद के कुल म से बारा हजार के ऊपर।<sup>6</sup> अउर आसेर के कुल म से बारा हजार के ऊपर; अउर नप्ताली के कुल म से बारा हजार के ऊपर; अउर मनस्सिह के कुल म से बारा हजार के ऊपर,<sup>7</sup> समौन के कुल म से बारा हजार के ऊपर; लेबी के कुल म से बारा हजार के ऊपर; इस्साकार के कुल म से बारा हजार के ऊपर,<sup>8</sup> जबूलून के कुल म से बारा हजार के ऊपर, यूसुफ के कुल म से बारा हजार के ऊपर, अउर बिन्यामीन के कुल म से बारा हजार के ऊपर मुहर लगाई गे।

### बड़ी भारी भीड़

9 एखे बाद हम देखेन, कि हरेक जाति, अउर कुल, अउर लोग अउर भाँसा म से एकठे अइसन बड़ी भीड़, जउने काहीं कोऊ गिन नहीं सकत रहा आय, उजर ओन्हा पहिरे, अउर अपने हाँथेन माहीं खजूर के डेरइअन काहीं लए, सिंहासन के आँगे, अउर मेम्ना के आँगे ठाढ़ रही ही। 10 अउर खुब चन्डे चिल्लाइके कहत ही, कि मुक्ती के खातिर हमरे पंचन के परमातिमा के, जउन सिंहासन के ऊपर बइठ हें, अउर मेम्ना के जय-जयकार होय। 11 अउर सगले स्वरगदूत, उआ सिंहासन अउर अँगुअन, अउर चरहूँ जिन्दा प्रानिन के चारिव कइती ठाढ़ हें, फेर ऊँ पंचे सिंहासन के आँगे मुँह के बल गिर परें; अउर परमातिमा के गोड़न गिरिके कहिन, 12 “आमीन! हमरे पंचन के परमातिमा के बड़ाई, अउर महिमा, अउर ग्यान, अउर धन्यवाद, अउर मान-सम्मान, अउर सामर्थ, अउर सक्ती जुगन-जुगन तक बनी रहय। आमीन!”

13 तब अँगुअन म से एक जने हमसे कहिन; “ई उजर ओन्हा पहिरे को आहीं? अउर कहाँ से आए हँय?” 14 हम उनसे कहेन; “हे, मालिक, अपनय जानित हएन।” तब ऊँ हमसे कहिन; “ई ऊँ पंचे आहीं, जउन उआ महाकस्त से निकरिके आए हँय; ई पंचे अपने-अपने ओन्हन काहीं मेम्ना के खून से धोइके उजर किहिन हीं।

15 इहय कारन से ऊँ पंचे परमातिमा के सिंहासन के आँगे हें, अउर उनखे मन्दिर माहीं दिन-रात उनखर सेवा करत हें, अउर जउन सिंहासन माहीं बइठ हें, ऊँ उनखे ऊपर आपन तम्बू ठाढ़ करिहँय।

16 अउर पुनि ऊँ पंचे भूँखे पिआसे न होइहँय, अउर न उनखे ऊपर घाम, न कउनव तपन परी †।”

17 काहेकि मेम्ना जउन सिंहासन के बीच माहीं हें, उनखर देखभाल करिहँय; अउर उनहीं पंचन काहीं जीबन रूपी पानी के झिन्नन के लघे लइ जाबा करिहँय, अउर परमातिमा उनखे आँखिन से सगले आँसू पोछि डरिहँय ††।

### सतमी मुहर अउर सोने के धूपदान

8 अउर जब मेम्ना सतमी मुहर खोलिन, त स्वरग माहीं आधा घन्टा तक सन्नाटा छाइगा। 2 तब हम ऊँ सतहूँ स्वरगदूतन काहीं देखेन, जउन परमातिमा के आँगे ठाढ़ रहत हें, अउर उनहीं सातठे तुरही दीन गई।

3 ओखे बाद एकठे अउर स्वरगदूत सोने के धूपदानी लए आएँ, अउर बेदी के लघे ठाढ़ भें; अउर उनहीं खुब काहीं धूप दीन ग, कि सगले पबित्र मनइन के प्राथनन के साथ सोने के उआ बेदी माहीं, जउन सिंहासन के आँगे हय चढामय। 4 अउर उआ धूप के धुँआ, पबित्र मनइन के प्राथनन समेत स्वरगदूत के हाँथ से परमातिमा के आँगे पहुँचिगा। 5 तब स्वरगदूत धूपदानी लइके, ओमाहीं बेदी के आगी भरिन, अउर धरती माहीं डार दिहिन; एसे गरजब, अउर भारी बोल, अउर बिजुली चमकई लागीं, अउर भुँडोल हॉइ लागीं।

### सतहूँ स्वरगदूतन के तुरही फूँकब

6 तब ऊँ सतहूँ स्वरगदूत जिनखे लघे सातठे तुरही रही हँय, उनहीं फूँकई के खातिर तइआर भें। 7 पहिल स्वरगदूत तुरही फूँकिन, तब खून से मिले ओला अउर आगी उत्पन्न भे अउर धरती माहीं डारी गे; अउर धरती के एक तिहाई हिस्सा जरिगा, अउर एक तिहाई बिरबा जरिगे, अउर सगला हरिअर चारा घलाय जरिगा।

8 दूसर स्वरगदूत तुरही फूँकिन, त मानो आगी कि नाई जरत एकठे बड़ा भारी पहार समुंद्र माहीं डारा ग; अउर समुंद्र के एक तिहाई हिस्सा खून होइगा। 9 अउर समुंद्र के एक तिहाई जीव-जन्तु मरिगे, अउर एक तिहाई जिहाज नास होइगीं।

10 तीसर स्वरगदूत तुरही फूँकिन, अउर एकठे बड़ी भारी तरइया, जउन मसाल कि नाई जरत रही हय, स्वरग से टूट, अउर नदिअन के एक तिहाई हिस्सा माहीं, अउर पानी के झिन्नन माहीं आय गिरी। 11 उआ तरइया के नाम नागदवना हय; अउर पानी के एक तिहाई हिस्सा नागदवना बिरबा कि नाई करू होइगा, अउर खुब मनई पानी के करू होइ जाँइ से मरिगे।

12 चउथ स्वरगदूत तुरही फूँकिन, अउर सुरिज के एक तिहाई हिस्सा, अउर जाँधइआ के एक तिहाई हिस्सा, अउर तरइअन के एक तिहाई हिस्सा माहीं बिपत्ती आइगे, इहाँ तक कि उनखर एक तिहाई हिस्सा माहीं अँधिआर होइगा, अउर दिन अउर रात के एक तिहाई हिस्सा माहीं घलाय अँधिआर होइगा। 13 अउर जब हम पुनि देखेन, त अकास के बीच माहीं एकठे चील्ह काहीं उड़त, अउर खुब चन्डे इआ कहत सुनेन, “ऊँ तिनहूँ स्वरगदूतन के तुरहिन के बोल के कारन, जिनखर फूँकब अबे बाँकी हय, धरती माहीं रहँइ बालेन के ऊपर घोर बिपत्ती आमँइ बाली ही।”

9 जब पचमाँ स्वरगदूत तुरही फूँकिन, त हम स्वरग से धरती के ऊपर एकठे तरइया गिरत देखेन, अउर उनहीं अथाह कुन्ड के उघन्नी दीन गे। 2 अउर ऊँ अथाह कुन्ड काहीं खोलिन, अउर कुन्ड म से बड़ी भट्टी कि नाई धुँआ उठा, अउर कुन्ड के धुँआ से सुरिज अउर हबा माहीं भारी अँधिआर होइगा। 3 अउर उआ धुँआ म से धरती माहीं टिड्डी निकरीं, अउर उनहीं बीछिन कि नाई सक्ती दीन गय। 4 अउर उनसे कहा ग, कि न धरती के चारा काहीं, न कउनव हरियरी काहीं, न कउनव बिरबा काहीं नुकसान पहुँचामय, केबल उन मनइन काहीं नुकसान पहुँचामय, जिनखे लिलारे माहीं परमातिमा के मुहर नहीं लगी आय। 5 अउर ऊँ टिड्ढिन काहीं मनइन काहीं मारि डारँइ के त नहीं, पय मनइन काहीं पाँच महीना तक पीरा देँइ के अनुमति दीन गय, अउर उनखर पीरा अइसन रही हय, जइसन बीछी के ऊरा मारे से मनइन काहीं होत ही। 6 ऊँ दिनन माहीं मनई मउत काहीं ढुँढ़िहँय, अउर न पइहँय; अउर मरँय के इच्छा करिहँय, अउर मउत उनसे दूरी भागी।

7 अउर ऊँ चिड्डन के अकार, लड़ाई के खातिर तइआर घोड़न कि नाई रहा हय, अउर उनखे मूँडे माहीं मानो सोने के मुकुट रहे हँय; अउर उनखर मुँह मनइन कि नाई रहे हँय। 8 अउर उनखर बार मेहेरिअन के बार कि नाई, अउर दाँत सेरन कि नाई रहे हँय। 9 अउर ऊँ पंचे लोहे कि नाई झिलम पहिरे रहे हँय, अउर उनखे पखनन के अबाज अइसन रही हय, जइसन रथन अउर खुब घोड़न के, जउन लड़ाई माहीं दउड़त होंय। 10 अउर उनखर पूँछ बीछिन कि नाई रही हँय, अउर उनमा ऊरा रहे हँय, अउर उनहीं पाँच महीना तक मनइन काहीं दुख पहुँचामँइ के जउन सक्ती मिली रही हय, उआ उनखे पूँछन माहीं रही हय। 11 अथाह कुन्ड के दूत उनखे ऊपर राजा रहा हय, ओखर नाम इब्रानी भाँसा माहीं अबदोन, अउर यूनानी भाँसा माहीं अपुल्लयोन हय। 12 पहिल बिपत्ती बीत चुकी, देखा, अब इनखे बाद दुइठे बिपत्ती अउर आमँइ बाली हई।

13 जब छठमाँ स्वरगदूत तुरही फूँकिन, त जउन सोने के बेदी परमातिमा के आँगे हय, ओखे सींगन म से हम अइसन बोल सुनेन। 14 मानो छठएँ स्वरगदूत से, जिनखे लघे तुरही रही हय, कोऊ कहि रहे हँय, कि “ऊँ चारिव स्वरगदूतन काहीं, जउन बड़ी नदिया फरात के लघे बाँधे हँय, खोल देय।” 15 अउर ऊँ चारिव दूत खोल दीनगें, जउन उआ घरी, अउर दिन, अउर महीना, अउर बरिस के खातिर तइआर कीन गे रहे हँय, कि मनइन के एक तिहाई हिस्सा काहीं मारि डारँय। 16 “उनखे फउज के सबारन के गिनती बीस करोड़ रही हय।” इआ बात काहीं हम सुनेन, 17 अउर हमहीं इआ दरसन माहीं, घोड़ा, अउर उनखर अइसन सबार देखाई दिहिन, जिनखर झिलम आगी कि नाई लाल, अउर धूम्रकान्त कि नाई नीली, अउर गन्धक कि नाई पिअर रही हँय, अउर ऊँ घोड़न के मूँड, सेरन के मूँडन कि नाई रहे हँय, अउर उनखे मुँहे से आगी, अउर धुँआ, अउर गन्धक निकरत रहे हँय। 18 ई तीनव महामारिन; अरथात आगी, अउर धुँआ, अउर गन्धक से, जउन उनखे मुँहे से निकरत रहे हँय, एक तिहाई मनई मारि डारे गें। 19 काहेकि ऊँ घोड़न के सक्ती उनखे मुँहे, अउर उनखे पूँछन माहीं रही ही; एसे कि उनखर पूँछ साँपन कि नाई रही हँय, अउर उनखे पूँछन माहीं मूँड घलाय रहे हँय, अउर

उनहिन से ऊँ पंचे पीरा पहुँचाबत रहे हँय।<sup>20</sup> अउर बाँकी मनई जउन ऊँ महामारिन से नहीं मरे रहे आहीं, अपने हाँथन के कामन से मन नहीं फिराइन, ऊँ पंचे बुरी आत्मन के पूजा करत रहिगें, अउर सोन-चाँदी, अउर पीतल अउर पथरा, अउर लकड़ी, के मूरतिन के पूजा करब घलाय नहीं छोंड़िन, जउन न देख सकती आहीं, न सुन सकती आहीं, न चल सकती आहीं।<sup>21</sup> अउर जउन हत्या, अउर टोना, अउर ब्यभिचार, अउर चोरी, ऊँ पंचे किहिन रहा हय, उनसे मन नहीं फिराइन।

### स्वरगदूत अउर छोट किताब

**10** हम पुनि एकठे अउर सक्तिसाली स्वरगदूत काहीं बदरी ओढ़े, स्वरग से उतरत देखेन। अउर उनखे मूँडे माहीं इन्द्रधनुस रहा हय, अउर उनखर मुँह सुरिज कि नाई, अउर उनखर गोड़ आगी के खम्भा कि नाई रहे हँय।<sup>2</sup> उनखे हाँथ माहीं एकठे छोट क खुली किताब रही हय; ऊँ आपन दहिना गोड़ समुंद्र माहीं, अउर बामा धरती माहीं धरिन।<sup>3</sup> अउर अइसन चन्डे चिल्लाने, जइसन सेर गरजत होय; अउर जब ऊँ चिल्लाने, त गरजँय के सातठे बोल सुनाई दिहिन।<sup>4</sup> जब गरजँय के सतहूँ बोल सुनाई दइ चुके, त हम लिखँइ बाले रहेन हय, अउर हम स्वरग से इआ बोल सुनेन, कि जउन बातें गरजँय के ऊँ सातठे बोलन से सुने हया, उनहीं गुप्त रक्खा, अउर न लिखा।<sup>5</sup> अउर जउने स्वरगदूत काहीं हम समुंद्र अउर धरती माहीं ठाढ़ देखन रहा हय; ऊँ आपन दहिना हाँथ स्वरग कइती उठाइन।<sup>6</sup> अउर परमातिमा जउन जुगन-जुगन तक जिन्दा रहत हें, जउन स्वरग अउर जउन कुछ ओमाहीं हय, अउर धरती काहीं, अउर जउन कुछ ओखे ऊपर हय, अउर समुंद्र काहीं, अउर जउन कुछ ओमाहीं हय, बनाइन हीं, उनहिन के कसम खाइके कहिन, “अब त अउर देरी न होई।<sup>7</sup> जउने दिन सतएँ स्वरगदूत के तुरही के बोल सुनाई देई, उहय दिन परमातिमा के गुप्त भेद पूर होइ जई, जइसन ऊँ अपने सेबकन, अउर सँदेस बतामँइ बालेन के द्वारा बताइन रहा हय।”<sup>8</sup> अउर जउने बोल काहीं हम स्वरग से बोलत सुनेन तय, ऊँ पुनि हमसे बात करँइ लागें; कि “जा, जउन स्वरगदूत समुंद्र अउर धरती माहीं ठाढ़ हें, उनखे हाँथे के खुली किताब काहीं लइ ल्या।”<sup>9</sup> अउर हम स्वरगदूत के लघे जाइके कहें, “इआ छोट किताब काहीं हमहीं दइ द्या।” ऊँ हमसे कहिन, “ल्या एही खाय ल्या; इआ तोंहार पेट करू त करी, पय तोंहरे मुँहे माहीं महिपर कि नाई मीठ लागी।”<sup>10</sup> एसे हम उआ छोट किताब काहीं, ऊँ स्वरगदूत के हाँथे से लइके खाय लिहें, उआ हमरे मुँहे माहीं महिपर कि नाई मीठ त लाग, पय जब हम ओही खाय लिहें, त हमार पेट करू होइगा †।<sup>11</sup> तब हमसे इआ कहा ग, “तोहई, खुब मनइन, अउर जातिअन, अउर भाँसन, अउर राजन के बारे माहीं पुनि भबिस्वबानी करँय परी।”

### दुइठे गबाह

**11** ओखे बाद हमहीं नापँय के खातिर एकठे सरकन्डा दीन ग, अउर कोऊ कहिस, “उठा, परमातिमा के मन्दिर, अउर बेदी काहीं नाप ल्या, अउर ओमाहीं अराधना करँइ बालेन के गिनती करा।<sup>2</sup> पय मन्दिर के बहिरे के अँगना छोंड़ द्या; ओही न नापा, काहेकि उआ गैरयहूदी लोगन काहीं दीन ग हय, अउर ऊँ पंचे पबित्र सहर काहीं बयालिस महीना तक रउँदिहँय।<sup>3</sup> अउर हम अपने दुइठे गबाहन काहीं इआ अधिकार देब, कि टाट ओढ़े, एक हजार दुइ सव साठ दिन तक भबिस्वबानी करँय।”<sup>4</sup> ई गबाह उँइन जयतून के दुइठे बिरबा, अउर दुइठे दीबट आहीं, जउन धरती काहीं बनामँइ बाले प्रभू के आँगे ठाढ़ रहत हें।<sup>5</sup> अउर अगर कोऊ उनहीं नुकसान पहुँचामँइ चाहत हय, त उनखे मुँहे से आगी निकरिके उनखे बइरिन काहीं भसम कइ देत ही, अउर अगर कोऊ उनहीं नुकसान पहुँचामँइ चाही, त जरूर इहइमेर से मार डारा जई।<sup>6</sup> उनहीं अधिकार हय, कि अकास काहीं बन्द करँय, कि जउने उनखे भबिस्वबानी के दिनन माहीं, बदरी न बरसय, अउर उनहीं सगले पानी के ऊपर अधिकार हय, कि ओही खून

† 10:10 यहें 2:8—3:3

बनामँइ, अउर जब-जब चाहँय तब-तब धरती के ऊपर हरेकमेर के बिपत्ती लइ आमँय।<sup>7</sup> अउर जब ऊँ पंचे आपन गबाही दइ चुकिहँय, तब उआ खतरनाक जानबर जउन अथाह कुन्ड म से निकरी, उनसे लइके उनहीं हराय देई, अउर उनहीं मारि डारी।<sup>8</sup> उनखर लहासँय उआ बड़े सहर के चउराहा माहीं परी रइहँय, जउन आत्मिक रीति से सदोम अउर मिस कहाबत हय, जहाँ उनखर प्रभू घलाय क्रूस माहीं चढ़ाए गे रहे हँय।<sup>9</sup> अउर सगले मनइन, अउर कुलन, अउर भाँसन, अउर जातिअन म से मनई उनखे लहासन काहीं साढ़े तीन दिना तक देखत रइहँय, अउर उनखे लहासन काहीं कब्र माहीं धरँय न देइहँय।<sup>10</sup> धरती के रइइ बाले, उनखे मउत से आनन्दित अउर मगन होइहँय, अउर एक दुसरे के लघे भेंट पठबइहँय, काहेकि ई दोनव परमातिमा के सँदेस बतामँइ बाले, धरती के रइइ बालेन काहीं सताइन रहा हय।<sup>11</sup> पय साढ़े तीन दिना के बाद, परमातिमा के तरफ से जीवन के साँस उन माहीं समाइगे, अउर ऊँ पंचे अपने गोड़े के बल ठाढ़ होइगें, अउर उनहीं देखँइ बालेन के ऊपर बड़ा भय छाइगा।<sup>12</sup> तब उनहीं स्वरग से एकठे बड़ा बोल सुनाई दिहिस, “इहाँ ऊपर आबा!” इआ सुनिके ऊँ पंचे बदरी के ऊपर सवार होइके, अपने बइरिन के देखत-देखत स्वरग माहीं चढ़िगें।<sup>13</sup> फेर उहय समय एकठे बड़ा भुँइडोल भ, अउर सहर के दसमा हिस्सा गिर परा; अउर उआ भुँइडोल से सात हजार मनई मरिगें, अउर बाँकी डेराइगें, अउर स्वरग के परमातिमा के बड़ाई किहिन।

<sup>14</sup> दूसर बिपत्ती बीत चुकी, देखा, तीसर बिपत्ती हरबिन आमँइ बाली ही।

### सतमी तुरही के फूँका जाब

<sup>15</sup> अउर जब सतमा दूत तुरही फूँकिन, त स्वरग माहीं एखे बारे माहीं बड़े-बड़े बोल होइ लागें, कि “संसार के राज हमरे पंचन के प्रभू के, अउर उनखे मसीह के होइ ग हय, अउर ऊँ जुगन-जुगन तक राज करिहँय।”<sup>16</sup> तब चउबीसव अँगुआ जउन परमातिमा के आँगे अपने-अपने सिंहासन माहीं बइठ रहे हँय, मुँह के बल गिरिके परमातिमा के गोड़न गिरिके,<sup>17</sup> इआ कहँइ लागें,

“हे सर्वसक्तिमान प्रभू परमातिमा, जउन हएन, अउर जउन रहे हएन, हम पंचे अपना के धन्यवाद करित हएन, कि अपना अपने बड़ी सामर्थ काहीं काम म लइआइके राज किहें हय।

<sup>18</sup> अउर गैरयहूदी लोग क्रोध किहिन, अउर अपना के कोप आय पहुँचा हय, अउर उआ समय आइगा हय, कि मरे मनइन के न्याय कीन जाय, अउर अपना के सँदेस बतामँइ बाले सेबकन अउर पबित्र मनइन काहीं, अउर उन छोट-बडेन काहीं जउन अपना के नाम से डेरत हें, बदला दीन जाय, अउर धरती के बिगाइँइ बाले नास कीन जाँय।”

<sup>19</sup> तब परमातिमा के जउन मन्दिर स्वरग माहीं हय, उआ खोला ग, अउर उनखे मन्दिर माहीं, उनखे करार के सन्दूख देखाई दिहिस, अउर बिजुली अउर बोल अउर गरजब अउर भुँइडोल भें, अउर बड़े-बड़े ओला गिरें।

### मेहेरिआ अउर अजिगर

**12** ओखे बाद स्वरग माहीं एकठे बड़ा चिन्ह देखाई दिहिस, अरथात एकठे मेहेरिआ, जउन सुरिज ओढ़े रही हय, अउर जोंधइआ ओखे गोड़े के नीचे रही हय, अउर ओखे मूँडे माहीं बारा तरइअन के मुकुट रहा हय।<sup>2</sup> उआ लइकहाई भे, अउर चिल्लात रही हय; काहेकि उआ लइका होंय के पीरा माहीं परे कराहत रही हय।<sup>3</sup> एकठे अउर चिन्ह स्वरग माहीं देखाई दिहिस; अउर देखा, एकठे बड़ा भारी लाल अजिगर रहा हय, जेखे सातठे मूँड अउर दसठे सींग रहे हँय, अउर ओखे मूँडेन माहीं सातठे राजमुकुट रहे हँय।<sup>4</sup> अउर ओखर पूँछ अकास के तरइअन के एक तिहाई हिस्सा काहीं, खींचिके धरती माहीं गिराय दिहिस। उआ अजिगर उआ मेहेरिआ के आँगे जउन लइकहाई रही हय ठाढ़ भ, कि जब उआ लइका पइदा करय, त ओखे लइका काहीं लील लेय।<sup>5</sup> अउर उआ मेहेरिआ के लइका भ, जउन लोहे के राजदन्ड लए, सगले जातिअन के ऊपर राज करँइ

बाला रहा हय, अउर उआ लड़िका एकाएक परमातिमा के लघे, अउर उनखे सिंहासन के लघे उठाइके पहुँचाय दीन ग।<sup>6</sup> अउर उआ मेहेरिआ उआ जंगल माहीं भागिगे, जहाँ परमातिमा के तरफ से, ओखे खातिर एकठे जघा तइआर कीन गे रही हय, कि उहाँ उआ एक हजार दुइ सव साठ दिना तक पाली पोसी जाय।

<sup>7</sup> ओखे बाद स्वरग माहीं लड़ाई भे, मीकाईल अउर उनखर स्वरगदूत अजिगर से लड़ई काहीं निकरें, अउर अजिगर अउर ओखर दूत उनसे लड़ें।<sup>8</sup> पय जीत नहीं पाएँ, अउर स्वरग माहीं उनखे खातिर पुनि जघा नहीं रहिगे।<sup>9</sup> तब उआ बड़ा भारी अजिगर, अरथात उहय पुरान साँप, जउन इबलीस अउर सइतान कहाबत हय, अउर सगले संसार काहीं भरमामँड बाला, धरती माहीं गिराय दीन ग; अउर ओखर दूत घलाय ओखे साथ गिराय दीनगें।<sup>10</sup> ओखे बाद हम स्वरग से इआ बड़ा बोल आबत सुनेन, कि अब हमरे पंचन के परमातिमा के मुक्ती, अउर सामर्थ, अउर राज, अउर उनखे मसीह के अधिकार प्रगट भ हय; काहेकि हमरे पंचन के भाई-बहिनिन के ऊपर दोस लगामँड बाला, जउन रात-दिना हमरे पंचन के परमातिमा के आँगे, उनखे ऊपर दोस लगाबा करत रहा हय, गिराय दीन ग।<sup>11</sup> अउर ऊँ पंचे मेम्ना के खून के कारन, अउर अपने गबाही के बचन के कारन, सइतान के ऊपर बिजयी भे हँय, अउर ऊँ पंचे अपने प्रानन काहीं पियार नहीं जानिन, इहाँ तक कि मउत घलाय सहि लिहिन।<sup>12</sup> इआ कारन, हे स्वरगव, अउर उनमा रहँड बाल्या, आनन्द मनाबा; पय हे धरती, अउर समुंद्र तोंहरे ऊपर बड़ी भारी बिपत्ती आमँड बाली हय! काहेकि सइतान बड़े क्रोध के साथ तोंहरे लघे उतरि आबा हय; काहेकि उआ जानत हय, कि ओखर थोरिन काहीं समय अउर बचा हय।

<sup>13</sup> अउर जब अजिगर देखिस, कि हम धरती माहीं गिराय दीन गएन हय, त उआ मेहेरिआ काहीं जउन लड़िका पइदा किहिस तय, सतामँड के खातिर पीछा करँड लाग।<sup>14</sup> पय उआ मेहेरिआ काहीं, बड़े चील्ह के दुइठे पखना दीनगें, कि उआ साँप के आँगे से उड़िके जंगल माहीं, उआ जघा माहीं पहुँच जाय, जहाँ साढ़े तीन बरिस तक पाली पोसी जाय।<sup>15</sup> अउर साँप उआ मेहेरिआ के पीछे अपने मुँह से नदी कि नाई पानी बहाइस, कि ओही इआ नदी माहीं बहाय देय।<sup>16</sup> पय धरती उआ मेहेरिआ के मदत किहिस, अउर आपन मुँह खोलिके उआ नदी काहीं जउन अजिगर अपने मुँह से बहाइस रहा हय, पि लिहिस।<sup>17</sup> तब अजिगर उआ मेहेरिआ के ऊपर क्रोधित भ, अउर ओखे बची सन्तान से, जउन परमातिमा के हुकुमन काहीं मानत रहे हँय, अउर यीसु के गबाही देई माहीं स्थिर रहे हँय, उनसे लड़ैय काहीं ग।<sup>18</sup> अउर समुंद्र के बारू के ऊपर जाइके ठाढ़ भ।

### दुइठे खतरनाक जानबर

**13** तब हम एकठे खतरनाक जानबर काहीं समुंद्र से निकरत देखेन, ओखे दसठे सींग अउर सातठे मूँड रहे हँय; ओखे सींगन माहीं दसठे राजमुकुट अउर ओखे मूँडेन के ऊपर परमातिमा के निन्दा के नाम लिखे रहे हँय।<sup>2</sup> जउन खतरनाक जानबर हम देखेन, उआ चीता कि नाई रहा हय; अउर ओखर गोड़ भालू कि नाई रहे हँय, अउर ओखर मुँह सेर कि नाई रहा हय; अउर उआ अजिगर आपन सक्ती, अउर सिंहासन, अउर बड़ा अधिकार, ओही दइ दिहिस।<sup>3</sup> अउर हम ओखे मूँडेन म से, एकठे के ऊपर अइसन भयानक घाव लगा देखेन, त अइसन लागत रहा हय, कि उआ मरइन बाला हय; ओखे बाद ओखर जानलेबा घाव निकहा होइगा, अउर सगले धरती के मनई उआ खतरनाक जानबर के पीछे-पीछे अचरज मानत चलें।<sup>4</sup> अउर ऊँ पंचे अजिगर के अराधना किहिन, काहेकि उआ खतरनाक जानबर काहीं आपन अधिकार दइ दिहिस रहा हय, अउर इआ कहिके अराधना किहिन, कि “इआ खतरनाक जानबर के समान को हय? एसे को लड़ि सकत हय?”<sup>5</sup> बड़े बोल बोलँड अउर परमातिमा के बुराई करँड के खातिर, ओही एकठे मुँह दीन ग, अउर ओही बयालिस महीना तक काम करँड के अधिकार दीन ग।<sup>6</sup> एसे उआ परमातिमा के बुराई करँड के खातिर मुँह खोलिस, कि उनखे

नाम अउर उनखे तम्बू, अरथात स्वरग माहीं रहँड बालेन के बुराई करय।<sup>7</sup> अउर उआ खतरनाक जानबर काहीं इआ अधिकार दीन ग, कि पबित्र मनइन से लड़य, अउर उनसे जीत जाय, अउर ओही हरेक कुल, अउर लोग, अउर भाँसा, अउर जाति के ऊपर अधिकार दीन ग।<sup>8</sup> अउर धरती के सगले रहँड बाले, उआ खतरनाक जानबर के अराधना करिहँय। जिनखर नाम बध कीन मेम्ना के जीवन के किताब माहीं, संसार के सुरुआत से लिखे नहीं आहीं।<sup>9</sup> जेखर सुनैय के मन होय, उआ सुन लेय।

<sup>10</sup> जेही जेल माहीं बन्द होइ क हय, उआ जेल माहीं बन्द होई; जे कोऊ तलबार से मारी, उआ जरूर तलबार से मारा जई, अब पबित्र मनइन काहीं धीरज धरँय, अउर सताव काहीं सहत बिसुआस माहीं बने रहँय के समय हय।

<sup>11</sup> ओखे बाद हम एकठे दूसर खतरनाक जानबर काहीं, धरती म से निकरत देखेन, ओखे मेम्ना कि नाई दुइठे सींग रही हँय; अउर उआ अजिगर कि नाई बोलत रहा हय।<sup>12</sup> इआ दूसर खतरनाक जानबर, उआ पहिल खतरनाक जानबर के सगला अधिकार ओखे आँगे काम माहीं लाबत रहा हय, अउर धरती अउर ओमाहीं रहँड बालेन से, उआ पहिल खतरनाक जानबर के जेखर जानलेबा घाव निकहा होइगा रहा हय, अराधना कराबत रहा हय।<sup>13</sup> उआ दूसर खतरनाक जानबर बड़े-बड़े चमत्कार देखाबत रहा हय, इहाँ तक कि मनइन के आँगे, स्वरग से धरती माहीं आगी बरसाय देत रहा हय।<sup>14</sup> ऊँ चमत्कार के कामन के कारन, जिनहीं पहिल खतरनाक जानबर के आँगे देखा मँड के अधिकार ओही दीन ग रहा हय; उआ धरती के रहँड बालेन काहीं, इआमेर भरमाबत रहा हय, अउर उनसे इआ कहत रहा हय, कि जउने खतरनाक जानबर के तलबार लगी रही हय, उआ जिन्दा होइगा हय, ओखर मूरत बनाबा।<sup>15</sup> अउर उआ दूसर खतरनाक जानबर काहीं, उआ खतरनाक जानबर के मूरत माहीं प्रान डारँड के अधिकार दीन ग, कि खतरनाक जानबर के मूरत बोलँड लागय; अउर जेतने मनई उआ खतरनाक जानबर के मूरत के अराधना न करिहँय, उनहीं मरबाय डारय।<sup>16</sup> अउर उआ दूसर खतरनाक जानबर सगले मनइन काहीं, चाह उआ छोट होय, इआ बड़ा, धनी होय, इआ गरीब, अजाद होय, इआ दास, सगलेन काहीं दहिने हाँथ इआ कि, लिलारे माहीं छाप लगबामँड के खातिर बिबस किहिस।<sup>17</sup> जेखे ऊपर छाप अरथात उआ खतरनाक जानबर के नाम, इआ कि ओखे नाम के संख्या न होई, उआ लेन-देन नहीं कइ सकय।<sup>18</sup> ग्यान एहिन माहीं हय, जेखे बुद्धी होय, उआ इआ खतरनाक जानबर के नाम के संख्या जोड़ लेय, काहेकि उआ संख्या मनई के नाम से सम्बन्धित ही, अउर ओखर संख्या छय सव छेछठ ही।

### मेम्ना अउर उनखर चुने लोग

**14** एखे बाद हम देखेन, कि मेम्ना सिथ्योन पहार के ऊपर ठाढ़ हें, अउर उनखे साथ एक लाख चवालिस हजार मनई हें, जिनखे लिलारे माहीं उनखर, अउर उनखे बाप के नाम लिखा हय।<sup>2</sup> अउर स्वरग से हमहीं एकठे अइसन बोल सुनाई दिहिस, जउन पानी के खुब धारन कि नाई, अउर बड़े गरजन कि नाई रहा हय, अउर जउन बोल हम सुनेन, उआ अइसा रहा हय, जइसन बीना बजामँड बाले बीना बजाय रहे होंय।<sup>3</sup> अउर ऊँ पंचे सिंहासन के आँगे, अउर चारिव प्रानिन अउर अँगुअन के आँगे, एकठे नबा गाना गाबत रहे हँय। अउर ऊँ एक लाख चवालिस हजार मनइन के अलाबा, जउन धरती के ऊपर से मोल लीन गे रहे हँय, कोऊ उआ गाना काहीं नहीं सिख सकत रहे आहीं।<sup>4</sup> ई ऊँ पंचे आहीं, जउन मेहेरिअन के साथ असुद्ध नहीं भे रहे आहीं, बलकिन कुमार हें; ई उँडन पंचे आहीं, जउन जहाँ कहँव मेम्ना जात रहे हँय, ई पंचे उनखे पीछे-पीछे चल देत रहे हँय, ई पंचे त परमातिमा अउर मेम्ना के खातिर, पहिल फल होइ के खातिर, मनइन म से मोल लीन गे हँय।<sup>5</sup> इनखे मुँह से कबहूँ लबरी बातें नहीं निकरीं तय, ई पंचे निरदोस हें।



### तीनठे स्वरगदूत

6 पुनि हम एकठे अउर स्वरगदूत काहीं, अकास के बीच माहीं उड़त देखेन, जिनखे लघे धरती के ऊपर रहँइ बालेन के हरेक जाति, अउर कुल, अउर भाँसा, अउर लोगन काहीं सुनामँइ के खातिर सनातन खुसी के खबर रही हय। 7 अउर ऊँ खुब चन्डे कहिन, “परमातिमा से डेरा, अउर उनखर बड़ाई करा, काहेकि उनखर न्याय करँइ के समय आय पहुँचा हय; अउर उनखर भजन करा, उँइन स्वरग, अउर धरती अउर समुंद्र अउर पानी के झिन्नन काहीं बनाइन हीं।”

8 एखे बाद पुनि एकठे अउर, दूसर स्वरगदूत इआ कहत आएँ, “गिर परा, उआ बड़ा बेबीलोन सहर गिर परा, जउन अपने अपने ब्यभिचार के क्रोध भरी मदिरा, सगली जातिअन काहीं पिआइस ही।”

9 पुनि इनखे बाद एकठे अउर, तीसर स्वरगदूत खुब चन्डे से इआ कहत आएँ, “जे कोऊ उआ खतरनाक जानबर अउर ओखे मूरत के अराधना करी, अउर अपने लिलारे माहीं, इआ कि अपने हाँथे माहीं ओखर छाप लगाई, 10 त उआ परमातिमा के क्रोध के निछला मदिरा, जउन उनखे क्रोध के खोरबा माहीं डारी गे ही, ओही पी, अउर पबित्र स्वरगदूतन के आँगे, अउर मेम्ना के आँगे, आगी अउर गन्धक के पीरा माहीं परी। 11 ओखे पीरा के धुँआ जुगन-जुगन तक उठत रही, पय जे उआ खतरनाक जानबर अउर ओखे मूरत के अराधना करत हें, अउर जउन ओखे नाम के छाप लगबाबत हें, उनहीं पंचन काहीं रातव-दिन चयन न मिली।”

12 इआ पबित्र मनइन के धीरज धरँय के समय हय, जउन परमातिमा के हुकुमन काहीं मानत हें, अउर यीसु के ऊपर बिसुआस करत हें।

13 पुनि हम स्वरग से इआ बोल सुनेन, “लिखा, जउन मनई प्रभू के ऊपर बिसुआस कइके मरत हें, ऊँ पंचे अब से धन्य हें।” अउर पबित्र आत्मा कहत हें, “हाँ, अब से ऊँ पंचे अपने सगले मेहनत से अराम पड़हँय, काहेकि उनखर काम उनखे साथ होइ लेत हें।”

### कटाई के समय आइगा हय

14 हम नजर उठाइके देखेन, अउर देखा, एकठे उजर बदरी हय, अउर उआ बदरी के ऊपर मनई के लडिका कि नाई कोऊ बइठ हें, जिनखे मूँडे माहीं सोने के मुकुट, अउर हाँथे माहीं खुब चोंख हँसिया ही। 15 पुनि एकठे अउर स्वरगदूत मन्दिर म से निकरिके, उनसे जउन बदरी माहीं बइठ रहे हँय, खुब चन्डे गोहराइके कहिन, “आपन हँसिया लगाइके कटाई करा, काहेकि कटाई करँइ के समय आइगा हय, एसे कि धरती के खेती पकि चुकी हय।” 16 एसे जउन बदरी माहीं बइठ रहे हँय, ऊँ धरती माहीं आपन हँसिया लगाइन, अउर धरती के खेती के कटाई कीन गे।

17 एखे बाद एकठे अउर स्वरगदूत उआ मन्दिर म से निकरें, जउन स्वरग माहीं हय, अउर उनहूँ के लघे चोंख हँसिया रही हय। 18 ओखे बाद एकठे अउर स्वरगदूत, जिनहीं आगी के ऊपर अधिकार रहा हय, बेदी म से निकरें, अउर जिनखे लघे चोंख हँसिया रही हय, उनसे खुब चन्डे कहिन, “आपन चोंख हँसिया लगाइके, धरती के अंगूर के गुच्छन काहीं काटि ल्या, काहेकि उनखर अंगूर पकि चुके हँय।” 19 तब ऊँ स्वरगदूत धरती माहीं आपन हँसिया लगाइके, धरती के अंगूर के गुच्छन काहीं काटिके, अपने परमातिमा के क्रोध रूपी बड़े रसकुन्ड माहीं डार दिहिन; 20 अउर सहर के बाहर उआ रसकुन्ड माहीं अंगूर रउँडे गें, अउर रसकुन्ड म से एतना खून निकरा, कि घोड़न के करिआरी तक पहुँचिगा, अउर तीन सव किलोमीटर तक बहिगा।

### सात बिपत्तिन के साथ सातठे स्वरगदूत

15 पुनि हम स्वरग माहीं एकठे अउर बड़ी, अउर अदभुत चिन्हारी देखेन, अरथात सातठे स्वरगदूत, जिनखे लघे सतहूँ आखिरी बिपत्ती रही हँय, काहेकि उनखे खतम होइ जाँय के बादय, परमातिमा के कोप पूर होइ जई।

2 अउर हम आगी से मिले सीसा कि नाई, एकठे समुंद्र देखेन; अउर जउन मनई उआ खतरनाक जानबर के ऊपर, अउर ओखे मूरत के ऊपर, अउर ओखे संख्या के ऊपर बिजयी भे रहे हँय, उनहीं पंचन काहीं उआ सीसा के समुंद्र के लघे, परमातिमा के बीना काहीं लए ठाढ़ देखेन। 3 ऊँ पंचे परमातिमा के दास मूसा के गीत, अउर मेम्ना के गीत गाय, गाइके कहत रहे हँय,

“हे सर्वसक्तिमान प्रभू परमातिमा, अपना के काम महान अउर अचरज के हें; हे जाति-जाति के राजा, अपना के चाल ठीक अउर सच्ची हय।”

4 “हे प्रभू, अइसा कउन हय, जउन अपना से न डेरई, अउर अपना के नाम के बड़ाई न करी? काहेकि केबल अपनय पबित्र हएन। अउर सगले जातिअन के मनई आइके अपना के आँगे गोड़न गिरि हँय, काहेकि अपना के न्याय के काम प्रगट होइगे हँय।”

5 एखे बाद हम देखेन, कि स्वरग माहीं करार के तम्बू के मन्दिर खोला ग। 6 अउर ऊँ सतहूँ स्वरगदूत, जिनखे लघे ऊँ सतहूँ बिपत्ती रही हँय, मखमल के सुद्ध अउर चमकँइ बाले ओन्हा पहिरे, अउर छाती के ऊपर सोने के पट्टिन काहीं बाँधे मन्दिर से निकरें। 7 तब ऊँ चारिब प्राणिन म से, एक जने, ऊँ सतहूँ स्वरगदूतन काहीं, परमातिमा, जउन जुगन-जुगन तक जिन्दा रइहँय, उनखे कोप से भरे सोने के सातठे खोरबा दिहिन। 8 अउर परमातिमा के महिमा अउर सक्ती के कारन मन्दिर धुँआ से भरिगा, अउर जब तक ऊँ सतहूँ स्वरगदूतन के, सतहूँ बिपत्ती खतम नहीं होइ गई, तब तक मन्दिर माहीं कोऊ नहीं जाय सका।

### परमातिमा के कोप के सातठे खोरबा

16 पुनि हम मन्दिर माहीं कोहू काहीं खुब चन्डे, उन सतहूँ स्वरगदूतन से इआ कहत सुनेन, “जा, परमातिमा के कोप के सतहूँ खोरबन काहीं धरती माहीं उड़ेल धा।”

2 एसे पहिल स्वरगदूत जाइके, आपन खोरबा धरती माहीं उड़ेल दिहिन। तब ऊँ मनइन के, जिनखे ऊपर उआ खतरनाक जानबर के छाप रही हय, अउर जउन ओखे मूरत के अराधना करत रहे हँय, उनखे देह माहीं बड़े घिनहे अउर दुखदाई फोड़ा निकरें।

3 अउर दूसर स्वरगदूत आपन खोरबा समुंद्र के ऊपर उड़ेल दिहिन, अउर उआ मरेन के खून कि नाई बनिगा, अउर समुंद्र के सगले जीव-जन्तु मरिगें।

4 अउर तीसर स्वरगदूत आपन खोरबा नदिअन, अउर पानी के झिन्नन माहीं उड़ेल दिहिन, अउर ऊँ खून बनिगें। 5 तब हम ऊँ स्वरगदूत काहीं जउन पानी के मालिक रहे हँय, इआ कहत सुनेन,

“हे पबित्र, जउन हएन, अउर जउन रहे हएन, अपना न्यायी हएन, अउर अपना इआ न्याय किहिन हय।

6 काहेकि ऊँ पंचे पबित्र लोगन के, अउर अपना के सँदेस बतामँइ बालेन के खून बहाइन रहा हय, अउर अपना उनहीं खून पिआएन हय, काहेकि ऊँ पंचे एहिन के काबिल हें।”

7 ओखे बाद हम बेदी से इआ बोल सुनेन, “हाँ, हे सर्वसक्तिमान प्रभू परमातिमा, अपना के निरनय ठीक अउर सच्चे हें।”

8 अउर चउथ स्वरगदूत आपन खोरबा, सुरिज के ऊपर उड़ेल दिहिन, अउर सुरिज काहीं मनइन काहीं आगी कि नाई घाम से जराय देँइ के अधिकार दीन ग। 9 अउर मनई बड़ी लपट से जरिगें, अउर बिपत्तिन के ऊपर अधिकार रक्खँइ बाले परमातिमा के नाम के बुराई किहिन, पय उनखर बड़ाई करँइ के खातिर आपन मन नहीं फिराइन।

10 ओखे बाद पचमाँ स्वरगदूत आपन खोरबा, उआ खतरनाक जानबर के सिंहासन माहीं उड़ेल दिहिन, अउर ओखे राज माहीं अँधिआर छाइगा। मनई पीरा के मारे आपन-आपन जीभ चबामँइ लागें, 11 अउर अपने पीरन अउर फोड़न के कारन स्वरग माहीं रहँइ बाले परमातिमा के बुराई किहिन; पय अपने-अपने बुरे कामन से आपन मन नहीं फिराइन।

12 ओखे बाद छठमाँ स्वरगदूत, अपने खोरबा काहीं फरात महानदी के ऊपर उड़ेल दिहिन, अउर ओखर पानी झुराड़गा, कि जउने पूरुब दिसा के राजन के खातिर गडल तड़आर होइ जाय। 13 अउर हम उआ अजिगर के मुँहे से, अउर उआ खतरनाक जानबर के मुँहे से, अउर परमातिमा के लबरी सँदिस बतामँड बाले के मुँहे से, तीनठे असुद्ध आत्मन काहीं गुलरन के रूप माहीं निकरत देखेन। 14 ई चमत्कार देखा मँड बाली बुरी आत्मा आहीं, जउन सगले संसार के राजन के लघे निकरि के एसे जाती हई, कि उनीं पंचन काहीं, सर्वसक्तिमान परमातिमा के, उआ बड़े दिन के लड़ाई के खातिर एकट्टा करँय। 15 “देखा, हम चोर कि नाई अइत हएन; धन्य हय उआ मनई जउन जागत रहत हय, अउर अपने ओन्हन के रखबारी करत हय, कि जउने नंगा न फिरय, अउर मनई ओखे नंगापन काहीं देखे न पामँय।” 16 अउर ऊँ पंचे उनीं उआ जघा माहीं एकट्टा किहिन, जउन इब्रानी भाँसा माहीं हर-मगिदोन कहाबत हय।

17 ओखे बाद सतमा स्वरगदूत आपन खोरबा हबा के ऊपर उड़ेल दिहिन, अउर मन्दिर के सिंहासन से इआ बड़ा बोल सुनान, “होइ चुका!” 18 ओखे बाद बिजुली चमकी, अउर बोल अउर गरजन भ, अउर एकठे अइसन भुँडोल भ, कि जब से मनइन के पड़दाइस धरती के ऊपर भे ही, तब से अइसन भुँडोल कबहूँ नहीं भ तय। 19 एसे उआ बड़े सहर के तीन भाग होइगें, अउर हरेक जातिअन के सहर गिर परें; अउर बड़े बेबीलोन के स्मरन परमातिमा के इहाँ भ, कि ऊँ अपने क्रोध के जलजलाहट के मदिरा ओही पिआमँड। 20 अउर हरेक टापू अपने-अपने जघा से टरिगें, अउर पहारन के पतय नहीं चला। 21 अउर अकास से मनइन के ऊपर, चालिस-चालिस किलो के बड़े-बड़े ओला गिरें, अउर एसे कि इआ बिपत्ती खुब भारी रही हय, अउर सगले मनई ओलन के बिपत्ती के कारन परमातिमा के बुराई किहिन।

### बड़ी बेस्या

17 अउर जउने सातठे स्वरगदूतन के लघे ऊँ सातठे खोरबा रहे हँय, उनमा से एक जने आइके हमसे इआ कहिन, “इहाँ आबा, हम तौहई उआ बड़ी बेस्या के सजा देखाई, जउन खुब पानी माहीं बइठ ही, 2 जेखे साथ धरती के राजा लोग ब्यभिचार किहिन; अउर धरती के रहँड बाले ओखे ब्यभिचार के मदिरा से मतबार होइगे रहे हँय।” 3 त ऊँ हमहीं पबित्र आत्मा माहीं, सुनसान जघा माहीं लड़गें, अउर हम लाल रंग के खतरनाक जानबर के ऊपर, जउन परमातिमा के बुराई के सब्दन से भरा रहा हय, अउर जेखे सातठे मूँड अउर दसठे सींग रही हँय, एकठे मेहेरिआ काहीं बइठे देखेन। 4 उआ मेहेरिआ बैगनी अउर लाल रंग के ओन्हा पहिरे रही हय, अउर सोने अउर खुब कीमती रतनन, अउर मोतिअन से सजी रही हय, अउर ओखे हाँथे माहीं एकठे सोने के खोरबा रहा हय, जउन घिनही चीजन से, अउर ओखे ब्यभिचार के असुद्ध चीजन से भरा रहा हय। 5 अउर ओखे लिलारे माहीं इआ नाम लिखा रहा हय, “भेद-बड़ा बेबीलोन, धरती के बेस्यन, अउर घिनही चीजन के महतारी।” 6 अउर हम उआ मेहेरिआ काहीं, पबित्र लोगन के खून, अउर यीसु के गबाहन के खून पिए से मतबार देखेन; अउर ओही देखिके हम चउआय गएन।

7 तब ऊँ स्वरगदूत हमसे कहिन, “तूँ काहे चउआन हया? हम इआ मेहेरिआ, अउर उआ खतरनाक जानबर के, जेखे ऊपर उआ बइठ ही, अउर जेखे सातठे मूँड अउर दसठे सींग हई, तौहई ओखर भेद बताइत हएन। 8 जउने खतरनाक जानबर काहीं तूँ देखे हया, उआ पहिले त रहा हय, पय अब नहिँ आय, अउर उआ अथाह कुन्ड से निकरि के बिनास माहीं परी; अउर धरती के रहँड बाले, जिनखर नाम, संसार के सुरुआत से जीवन के किताब माहीं नहीं लिखे गें, इआ खतरनाक जानबर के इआ दसा काहीं देखिके, कि पहिले रहा हय, अब नहिँ आय, अउर पुनि आय जई, अचरज मनि हँय। 9 इआ समझँई के खातिर बड़ी बुद्धी के जरूरत ही, ऊँ सतहूँ मूँड सातठे पहार आहीं, जउनेन के ऊपर उआ मेहेरिआ बइठ ही। 10 ऊँ सातठे राजा घलाय आहीं, उनमा से पाँच जनेन के बिनास होइ चुका हय, अउर एकठे

अबे हय, अउर एकठे अबे तक आबा नहीं, अउर जब अई त कुछ समय तक ओखर रहब घलाय जरूरी हय। 11 जउन खतरनाक जानबर पहिले रहा हय, अउर अब नहिँ आय, उआ खुदय अठमाँ आय, अउर उआ ऊँ सतहूँ म से पड़दा भ हय, अउर बिनास माहीं परी। 12 अउर जउन दसठे सींग तूँ देखे हया, ऊँ दसठे राजा आहीं, जउन अबे तक राज नहीं पाइन, पय उआ खतरनाक जानबर के साथ, एक घन्टा के खातिर राजन कि नाई अधिकार पड़हँय। 13 ई पंचे सब एकय मन होइहँय, अउर ऊँ पंचे आपन-आपन सक्ती अउर अधिकार उआ खतरनाक जानबर काहीं देइहँय। 14 अउर ऊँ पंचे मेम्ना से लड़िहँय, अउर मेम्ना उनखे ऊपर बिजय पड़हँय, काहेकि ऊँ प्रभुअन के प्रभू, अउर राजन के राजा आहीं, अउर जउन बोलाए अउर चुने अउर बिसुआसी हें, ऊँ पंचे उनखे साथ रइहँय; अउर ऊँ पंचे घलाय बिजय पड़हँय।”

15 पुनि ऊँ स्वरगदूत हमसे कहिन, “जउन पानी तूँ देखे हया, जेखे ऊपर बेस्या बइठ ही, ऊँ पंचे त मनई, अउर भीड़, अउर सगली जाति, अउर सगली भाँसा आहीं। 16 जउन दसठे सींग तूँ देखे हया, ऊँ पंचे, अउर खतरनाक जानबर, उआ बेस्या से दुसमनी रखिहँय, अउर ओही लाचार अउर नंगी कइ देइहँय, अउर ओखर माँस खाय जइहँय, अउर ओही आगी माहीं जराय देइहँय। 17 काहेकि परमातिमा, उनखे मन माहीं इआ बिचार डरिहँय, कि ऊँ पंचे उनखे मरजी काहीं पूर करँय, अउर जब तक परमातिमा के बचन पूर न होइ जाय, तब तक एक मन होइके आपन-आपन राज, उआ खतरनाक जानबर काहीं दइ देया। 18 उआ मेहेरिआ, जउने काहीं तूँ देखे हया, उआ बड़ा सहर आय, जउन धरती के राजन के ऊपर राज करत हय।”

### बेबीलोन सहर के बिनास

18 एखे बाद हम एकठे अउर स्वरगदूत काहीं, स्वरग से उतरत देखेन, जिनहीं बड़ा अधिकार मिला रहा हय; अउर धरती उनखे तेज से चमक उठी। 2 ऊँ खुब चन्डे गोहराइके कहिन,

“गिरिगा, बड़ा बेबीलोन सहर गिरिगा हय, बुरी आत्मन के निबास, अउर हरेक असुद्ध आत्मन के अड्डा, अउर हरेक असुद्ध अउर घिनहे पछिन के अड्डा होइगा हय।

3 काहेकि ओखे ब्यभिचार के भयानक मदिरा के कारन, सगली जाति गिर गई हँय, अउर धरती के सगले राजा ओखे साथ ब्यभिचार किहिन ही, अउर धरती के बड़पारी ओखे सुख-बिलास के बहुतायत के कारन धनमान भे हँय।”

4 एखे बाद हम स्वरग से एकठे अउर बोल सुनेन, “हे हमार चुने मनइव, ओमा से निकर आबा, कि जउने तूँ पंचे ओखे पापन माहीं भागीदार न बना, अउर ओखे बिपत्तिन म से, कउनव तौहरे ऊपर न आय परय।

5 काहेकि ओखे पापन के ढेर, स्वरग तक पहुँचिगा हय, अउर ओखर अधरम परमातिमा काहीं याद आइगे हँय।

6 अउर जइसा उआ किहिस ही, तूहूँ पंचे ओखे साथ उहयमेर बरताव करा, अउर ओखे कुकर्मन के बदला चुकाबा; अउर जइसन खोरबा उआ दुसरेन के खातिर भरिस रहा हय, ओमाहीं ओखे खातिर दुगुना भर द्या।

7 जेतनी उआ आपन बड़ाई किहिस ही, अउर सुख-बिलास किहिस ही, ओतनय ओही कस्ट अउर दुख द्या; काहेकि उआ अपने मन माहीं कहत ही, ‘हम रानी बनिके बइठ हएन, बिधबा नहीं, अउर हम सोक माहीं कबहूँ न परब।’

8 इआ कारन से एकय दिन माहीं ओखे ऊपर खुब बिपत्ती आय परिहँय, अरथात मउत, अउर सोक, अउर अकाल; अउर उआ आगी माहीं भसम कइ दीन जई, काहेकि ओखर न्याय करँई बाले प्रभू परमातिमा सर्वसक्तिमान हें।

9 अउर धरती के राजा जउन ओखे साथ ब्यभिचार, अउर सुख-बिलास किहिन ही, जब ओखे जरँय के धुँआ देखिहँय, त ओखे खातिर रोइहँय, अउर छाती पिटिहँय। 10 ओखे पीरा के डेरन के मारे ऊँ पंचे खुब दूरी ठाढ़ होइके कइहँय,

‘हे बड़े सहर, बेबीलोन! हे सक्तिसाली सहर, हाय! हाय! घरी भर माहीं तोही सजा मिलिगे ही’।

11 अउर धरती के बड़पारी ओखे खातिर रोइहँय, अउर कल्पिहँय, काहेकि अब कोऊ उनखर माल न खरीदी; 12 अरथात सोन-चाँदी, रतन, मोती, अउर मखमल, अउर बैगनी, रेसमी, अउर लाल रंग के ओन्हा, अउर हरेकमेर के महकँइ बाली लकड़ी, अउर हाँथी के दाँत से बनी हरेकमेर के चीजँय, अउर खुब कीमती लकड़ी, अउर पीतल, अउर लोहे, अउर संगमरमर के हरेकमेर के चीजँय, 13 अउर दालचीनी, मसाला, धूप, अँतर, लोभान, मदिरा, जयतून के तेल, मड़दा, गोहूँ, गड़आ-बरधा, गाड़र-बोकरी, घोड़, रथ, अउर दास, अउर मनइन के प्रान। 14 अब तोरे मन काहीं लोभामँय बाले फल, तोरे लघे से जाय रहे हँय, अउर स्वादिस्ट अउर भड़कीली चीजँय तोसे दूर होइ गई हँय, अउर ऊँ पुनि कबहूँ न मिलिहँय। 15 ई चीजन के बड़पारी जउन बेबीलोन सहर के धन-सम्पत से धनी होइगें तय, ओखे पीरा के डेरन के मारे दूरी ठाढ़ होइहँय, अउर रोबत अउर कलपत कइहँय,

16 हाय! हाय! इआ बड़ा सहर जउन मखमल अउर बैगनी अउर लाल रंग के ओन्हा पहिरे रहा हय, अउर सोन अउर रतनन अउर मोतिअन से सजा रहा हय;

17 घरी भर माहीं ओखर अइसन भारी धन नास होइगा।

हरेक माझी अउर यात्री, अउर मल्लाह, अउर जेतने समुद्र से कमात रहे हँय, सगले दूरी ठाढ़े, 18 ओखे जरँय के धुँआ देखत गोहराइके कइहँय, ‘कउन सहर इआ बड़े सहर कि नाई हय?’

19 अउर अपने-अपने मूँडेन के ऊपर धूधुर डरिहँय, अउर रोबत अउर कलपत, चिल्लाय-चिल्लाइके कइहँय, ‘हाय! हाय! इआ बड़ा सहर, जेखे धन-सम्पत्ती के द्वारा समुंद्र के सगले जिहाज बाले धनी होइगे रहे हँय, घरी भर माहीं उजरिगा!’

20 हे स्वरग, अउर हे सगले पबित्र मनइव, अउर यीसु के खास चेलव, अउर परमातिमा के सँदेस बतामँइ बालेव, ओखे ऊपर आनन्द करा, काहेकि परमातिमा न्याय कइके, ओसे तौहार पंचन के बदला लिहिन हीं।”

21 ओखे बाद एकठे बलमान स्वरगदूत बड़ी चक्की के जतबा कि नाई एकठे पथरा उठाइन, अउर इआ कहिके समुंद्र माहीं फेंक दिहिन, “बड़ा सहर बेबीलोन इहइमेर बड़े बल से गिराबा जई, अउर पुनि ओखर कबहूँ पता न चली।

22 अउर बीना बजामँइ बालेन, अउर गायकन, अउर बंसी बजामँइ बालेन, अउर तुरही फूँकँइ बालेन के बोल, पुनि कबहूँ तोरे भीतर सुनाई न देई; अउर कउनव चीजन के कारीगर घलाय पुनि कबहूँ तोरे भीतर न मिली; अउर चक्की के चलँइ के अबाज पुनि कबहूँ तोरे भीतर सुनाई न देई।

23 अउर दिया के उँजिआर पुनि कबहूँ तोरे भीतर न चमकी, अउर दुलहा अउर दुलहिन के बोल पुनि कबहूँ तोरे भीतर सुनाई न देई; काहेकि तोर बड़पारी धरती के प्रधान रहे हँय, अउर तोरे जादू से सगली जाति भरमाई गई तय।

24 अउर परमातिमा के सँदेस बतामँइ बालेन, अउर पबित्र मनइन, अउर धरती के ऊपर सगले कतल कीन गें, मनइन के खून बेबीलोन माहीं पाबा गा।”

**19** एखे बाद हम स्वरग माहीं एकठे बड़ी भीड़ कि नाई खुब चन्डे बोल से, इआ कहत सुनेन,

“हालेलूय्याह! मुक्ती अउर महिमा अउर सामर्थ, हमरे पंचन के परमातिमय के आय।

2 काहेकि उनखर निरनय सच्चे अउर न्यायपूर्ण हें। अउर ऊँ उआ बड़ी बेस्या काहीं, जउन अपने ब्यभिचार से धरती काहीं भ्रस्ट करत रही हय, सजा दिहिन हीं, अउर ओसे अपने दासन के खून के बदला लिहिन हीं।”

3 पुनि ऊँ पंचे दुसराय कहिन, “हालेलूय्याह! ओखे जरँय के धुँआ जुगन-जुगन तक उठत रही।”

4 तब चउबीसव अँगुआ, अउर चरहूँ प्रानी, परमातिमा के गोड़न गिरें, जउन सिंहासन माहीं बइठ रहे हँय, अउर कहिन, “आमीन! हालेलूय्याह!”

## मेन्ना के बिआह

5 अउर सिंहासन म से एकठे अबाज निकरी, “हे हमरे पंचन के परमातिमा से, डेरॉइ बाले छोट-बड़े; सगले दासव, तूँ पंचे उनखर स्तुति करा।”

6 ओखे बाद हम बड़ी भीड़ कि नाई, अउर खुब पानी कि नाई, अउर गरजँय कि नाई, बड़ी तेज अबाज सुनेन;

“हालेलूय्याह! काहेकि प्रभू हमार पंचन के परमातिमा सर्वसक्तिमान राज करत हें।

7 आबा, हम पंचे आनन्दित अउर मगन होई, अउर उनखर स्तुति करी, काहेकि मेन्ना के बिआह के समय आय ग हय, अउर उनखर दुलहिन खुद काहीं तइआर कइ लिहिन हीं।”

8 अउर ओही सुद्ध अउर चमकँइ बाला मखमल पहिरँय काहीं दीन ग, (उआ सुद्ध मखमल के मतलब पबित्र लोगन के धरम के काम आहीं।)

9 तब स्वरगदूत हमसे कहिन, “इआ लिखा, कि ऊँ पंचे धन्य हें, जउन मेन्ना के बिआह-भोज माहीं बोलाए गे हँय।” पुनि ऊँ हमसे कहिन, “ई बचन परमातिमा के सत्य बचन आहीं।” 10 तब हम उनखे गोड़न गिरँय के खातिर, उनखे गोड़े माहीं गिर परेन। तब ऊँ हमसे कहिन, “देखा, अइसा न करा, हमहूँ तोहरेन कि नाई, अउर तोहरे भाइन कि नाई, जउन यीसु के गबाही देंइ के खातिर स्थिर हें, मसीह के दास आहें, तूँ पंचे परमातिमय के गोड़न गिरा; काहेकि जे कोऊ यीसु के बारे माहीं गबाही देत हें, उनहीं पंचन काहीं परमातिमा के सँदेस बतामँइ बालेन कि नाई, परमातिमा से प्रेरना मिलत ही।”

## उजर घोड़ा के सबार

11 ओखे बाद हम स्वरग काहीं खुला देखेन, अउर देखित हएन, कि एकठे उजर घोड़ा हय; अउर ओमाहीं एक जने सबार हें, जउन बिसुआस के काबिल अउर सत्य कहाबत हें; अउर ऊँ धरम के साथ न्याय, अउर युद्ध करत हें। 12 अउर उनखर आँखी आगी कि नाई धँधकती हई, अउर उनखे मूँडे माहीं खुब राजमुकुट हें। अउर उनखे ऊपर एकठे नाम लिखा हय, जउने काहीं उनहीं छोड़, अउर कोऊ नहीं जानय। 13 ऊँ खून छिनका ओन्हा पहिरे हें, अउर उनखर नाम परमातिमा के बचन हय। 14 स्वरग के सेना, उजर घोड़न के ऊपर सबार होइके; अउर उजर अउर सुद्ध मखमल पहिरे, उनखे पीछे-पीछे हई। 15 अउर जाति-जाति काहीं मारँइ के खातिर उनखे मुँहे से एकठे चोंख तलबार निकरत ही, ऊँ लोहे के राजदन्ड लए, उनखे ऊपर राज करिहँय, अउर ऊँ सर्वसक्तिमान परमातिमा के, भयानक कोप के जलजलाहट के मदिरा के कुन्ड माहीं अंगूर रँदिहँय। 16 उनखे ओन्हा अउर जाँघ के ऊपर, इआ नाम लिखा हय, “राजन के राजा अउर प्रभुअन के प्रभू।”

17 एखे बाद हम एकठे स्वरगदूत काहीं सुरिज के ऊपर ठाढ़ देखेन, ऊँ खुब चन्डे गोहराइके अकास के बीच माहीं उडँइ बाले पंछिन से कहिन, “आबा परमातिमा के बड़े भोज के खातिर एकट्टा होइजा, 18 जउने तूँ पंचे राजन के माँस, अउर मुखिअन के माँस, अउर सूरबीर मंसेरुअन के माँस, अउर घोड़न के अउर उनखे सबारन के माँस, अउर का अजाद, का दास, का छोट, का बड़े, सगले जनेन के माँस खा।”

19 पुनि हम उआ खतरनाक जानबर, अउर धरती के राजन, अउर उनखे सेनन काहीं, उआ घोड़ा के सबार, अउर उनखे सेना से लडँइ के खातिर एकट्टा देखेन। 20 उआ खतरनाक जानबर, अउर ओखे साथ उआ लबरा नबी, पकड़ा ग, जउन उनखे आँगे अइसन चिन्ह देखाइस रहा हय, जिनखे द्वारा उआ उनहीं पंचन काहीं भरमाइस तय, जिनखे ऊपर उआ खतरनाक जानबर के छाप रही हय, अउर जउन ओखे मूरत के अराधना करत रहे हँय। ई पंचे दोनव जने जिन्दय, उआ आगी के झील माहीं, जउन गन्धक से जरत रहत ही, डारे गें। 21 अउर बाँकी मनई उआ घोड़ा के सबार के तलबार से,

जउन ओखे मुँहे से निकरत रही हय, मार डारे गें, अउर सगले पंछी उनखे माँस से संतुस्त होइगें।

### हजार बरिस के राज

20 पुनि हम एकठे स्वरगदूत काहीं स्वरग से उतरत देखेन, जिनखे हाँथे माहीं अथाह कुन्ड के उघन्नी, अउर एकठे बड़ी जंजीर रही हय।<sup>2</sup> अउर ऊँ उआ अजिगर, अरथात पुरान साँप काहीं, जउन इबलीस अउर सइतान आय, पकड़िके हजार बरिस के खातिर बाँध दिहिन,<sup>3</sup> अउर ओही अथाह कुन्ड माहीं बन्द कइ दिहिन, अउर ओमाहीं मुहर लगाय दिहिन, कि उआ हजार बरिस के पूर होइ तक, जाति-जाति के लोगन काहीं पुनि न भरमाबय। एखे बाद जरूरी हय, कि उआ थोरी देर के खातिर पुनि खोला जाय।<sup>4</sup> ओखे बाद हम सिंहासनन काहीं देखेन, अउर उनमा लोग बइठिगें, अउर उनहीं न्याय करँइ के अधिकार दीनगा। हम उनखे आत्मन काहीं घलाय देखेन, जिनखर मूँइ यीसु के गबाही देंइ, अउर परमातिमा के बचन के कारन काटे गे रहे हँय, अउर ऊँ पंचे न उआ खतरनाक जानबर के, अउर न ओखे मूरत के पूजा किहिन तय, अउर न ओखर छाप, अपने लिलारे अउर हाँथन के ऊपर लिहिन तय। ऊँ पंचे जिन्दा होइके मसीह के साथ हजार बरिस तक राज करत रहिगें।<sup>5</sup> जब तक ई हजार बरिस पूर नहीं होइगें, तब तक ऊँ पंचे जउन इनखे अलाबा मरे तय, जिन्दा नहीं भें। इआ त पहिल मरेन म से जि उठब आय।<sup>6</sup> धन्य अउर पबित्र ऊँ हें, जउन इआ पहिल मरिके जि उठब माहीं सामिल भे हँय। अइसन मनइन के ऊपर दूसर मउत के कउनव अधिकार नहीं आय, बलकिन ऊँ पंचे परमातिमा अउर मसीह के याजक होइहँय, अउर हजार बरिस तक उनखे साथ राज करिहँय।

### सइतान के बिनास

<sup>7</sup> जब हजार बरिस पूर होइ चुकिहँय, त सइतान कैद से छोड़, दीन जई।<sup>8</sup> अउर उआ, ऊँ जातिअन काहीं जउन धरती के चारिव कइती होइ हँय, अरथात गोग अउर मागोग काहीं, जिनखर गिनती समुंद्र के बारू के बराबर होई, उनहीं भरमाइके लड़ाई के खातिर एकट्ठा करँइ काहीं निकरी।<sup>9</sup> ऊँ पंचे सगली धरती माहीं फइलिके, पबित्र लोगन के छावनी अउर पियार सहर काहीं घेर लेइहँय; पय आगी स्वरग से उतरिके उनहीं पंचन काहीं भसम करी।<sup>10</sup> अउर उनखर भरमाइ बाला सइतान आगी अउर गन्धक के उआ झील माहीं, जउने माहीं उआ खतरनाक जानबर, अउर लबरा नबी घलाय होई, डार दीन जई। अउर ऊँ पंचे रात-दिना जुगन-जुगन तक पीरा माहीं तड़पत रइहँय।

### एकठे बड़ा उजर सिंहासन अउर आखिरी न्याय

<sup>11</sup> ओखे बाद हम एकठे बड़ा उजर सिंहासन, अउर उनहीं, जउन ओखे ऊपर बइठ रहे हँय, देखेन; उनखे आँगे से धरती अउर अकास भागिगें, अउर उनखे खातिर जघा नहीं मिली।<sup>12</sup> अउर हम छोट-बड़े सब मरे मनइन काहीं सिंहासन के आँगे ठाढ़ देखेन, अउर किताबँय खोली गई; अउर पुनि एकठे अउर किताब खोली गे, अरथात जीवन के किताब; अउर जइसन ऊँ किताबन माहीं लिखा रहा हय, उहयमेर उनखे कामन के मुताबिक, मरे मनइन के न्याय कीन ग।<sup>13</sup> ओखे बाद समुंद्र, ऊँ मरे मनइन काहीं जउन ओमा रहे हँय, दइ दिहिस, अउर मउत अउर अधोलोक, ऊँ मरे मनइन काहीं जउन उन माहीं रहे हँय, दइ दिहिन; अउर उनमा से हरेक के कामन के मुताबिक न्याय कीन ग।<sup>14</sup> मउत अउर अधोलोक आगी के झील माहीं डारे गें। इआ आगी के झील दूसर मउत आय।<sup>15</sup> अउर जेखर-जेखर नाम जीवन के किताब माहीं लिखा नहीं मिला, ऊँ सगले, आगी के झील माहीं डार दीनगें।

### नबा अकास अउर नई धरती

21 ओखे बाद हम नबा अकास अउर नई धरती काहीं देखेन, काहेकि पहिल अकास अउर पहिल धरती खतम होइगे तँय, अउर समुंद्र घलाय नहीं रहिगा तय।<sup>2</sup> ओखे बाद हम पबित्र सहर, नबा यरूसलेम काहीं स्वरग से परमातिमा के लघे से उतरत देखेन, जउन उआ दुलहिन कि नाई रहा हय, जउन अपने मंसेरुआ के खातिर सिंगार कए होय।<sup>3</sup> अउर हम सिंहासन म से, कोहू काहीं खुब चन्डे इआ कहत सुनेन, “देखा, परमातिमा के डेरा, मनइन के बीच माहीं हय, ऊँ उनखे साथ निबास करिहँय, अउर ऊँ पंचे उनखर लोग होइहँय, अउर परमातिमा खुद उनखे बीच माहीं रइहँय, अउर उनखर परमातिमा होइहँय।<sup>4</sup> ऊँ उनखे आँखिन से सगले आँसू पोछि डरिहँय; अउर एखे बाद मउत न रही, अउर न सोक, अउर न बिलाप, न पीरा रही; पहिल बातें खतम होइ जइहँय।”<sup>5</sup> जउन सिंहासन के ऊपर बइठ रहे हँय, ऊँ कहिन, “देखा, हम सब कुछ नबा कए देइत हएन।” ओखे बाद ऊँ पुनि कहिन, “लिख ल्या, काहेकि ई बचन बिसुआस के काबिल अउर सत्य हें।”<sup>6</sup> अउर पुनि ऊँ हमसे कहिन, “ई बातें पूर होइ गई हँय। हम अल्फा अउर ओमेगा, आदि अउर अन्त आहैन। हम पिआसे काहीं, जीवन के पानी के झिन्ना म से सेंट-मेंत माहीं पिआउब।<sup>7</sup> जे बिजय पाई, उहय ई चीजन के बारिसदार होई, अउर हम ओखर परमातिमा होब, अउर उआ हमार लड़िका होई।<sup>8</sup> पय डरपोकन, अउर अबिसुआसी लोगन, अउर बुरे काम करँइ बालेन, अउर कतलिन, अउर ब्यभिचारिन, अउर टोना मारँइ बालेन, अउर मूरतिन के पूजा करँइ बालेन, अउर सब लबरन के भाग, उआ झील माहीं मिली, जउन आगी अउर गन्धक से जलत रहत ही, इआ दूसर मउत आय।”

### नबा यरूसलेम

<sup>9</sup> ओखे बाद जिन सातठे स्वरगदूतन के लघे, सातठे अन्तिम बिपत्तिन से भरे खोरबा रहे हँय, उनमा से एक जने हमरे लघे आएँ, अउर हमसे बातें कइके कहँइ लागे, “एँकई आबा, हम तौहई दुलहिन, अरथात मेम्ना के मेहेरिआ देखाउब।”<sup>10</sup> तब ऊँ हमहीं पबित्र आत्मा माहीं, एकठे बड़े अउर ऊँच पहार के ऊपर लइगें, अउर पबित्र सहर यरूसलेम काहीं, स्वरग से परमातिमा के लघे से उतरत देखाइन।<sup>11</sup> परमातिमा के महिमा ओमाहीं रही हय, अउर ओखर जोति, यसब नाम के खुब कीमती निरमल रतन कि नाई चमकत रही हय।<sup>12</sup> ओखर सहरपनाह खुब ऊँच रही हय, अउर ओमाहीं बारा फाटक रहे हँय, अउर हरेक फाटकन माहीं एक-एकठे स्वरगदूत रहे हँय; अउर ऊँ फाटकन के ऊपर इजराइलिन के बरहूँ कुलन के नाम लिखे रहे हँय।<sup>13</sup> पूरुब कइती तीनठे फाटक, उत्तर कइती तीनठे फाटक, दक्खिन कइती तीनठे फाटक, अउर पच्छिम कइती तीनठे फाटक रहे हँय।<sup>14</sup> सहर के सहरपनाह के बाराठे नेव रही हँय, अउर उनखे ऊपर मेम्ना के बरहूँ खास चेलन के बरहूँ नाम लिखे रहे हँय।<sup>15</sup> जउन हमसे बात करत रहे हँय, उनखे लघे सहर अउर ओखे फाटकन, अउर ओखे सहरपनाह काहीं नापँय के खातिर, एकठे सोने के गज रहा हय।<sup>16</sup> उआ सहर बरगाकार बसा रहा हय, अउर ओखर लम्बाई- चउँड़ाई बराबर रही हय; अउर ऊँ, उआ गज से सहर काहीं नापिन, त उआ साढ़े सात सव कोस निकरा। ओखर लम्बाई, चउँड़ाई अउर उँचाई बराबर रही हय।<sup>17</sup> अउर स्वरगदूत ओखे सहरपनाह काहीं नापिन, त मनइन माहीं जउन नापँय के तरीका रहा हय, ओहिन के मुताबिक नापिन, त एक सव चवालिस हाँथ निकरी।<sup>18</sup> ओखर सहरपनाह यसब के बनी रही हय, अउर सहर अइसन सुद्ध सोने के रहा हय, जइसन स्वच्छ सीसा कि नाई होय।<sup>19</sup> उआ सहर के नेव हरेकमेर के खुब कीमती पथरन से बनी रही हय; पहिल नेव यसब के, दूसर नीलमनि के, तीसर लालडी के, चउथ मरकत के,<sup>20</sup> पचमी गोमेदक के, छठमी मानिक्य के, सतमी पीतमनि के, अठमी पेरोज के, नवमी पुखराज के, दसमी लहसुनिया के, गेरहमी धूम्रकान्त के, अउर बरहमी याकूत के रही हय।<sup>21</sup> अउर बरहूँ फाटक बारा

मोतिन के रहे हँय; एक-एक फाटक एक-एक मोती के बना रहा हय। सहर के सड़क स्वच्छ सीसा कि नाई सुद्ध सोने के रही हय।

22 हम ओमाहीं कउनव मन्दिर नहीं देखेन, काहेकि सर्वसक्तिमान प्रभू परमातिमा, अउर मेम्ना ओखर मन्दिर आहीं। 23 उआ सहर माहीं सुरिज अउर जोंधइआ के उँजिआर के जरूरत नहिं आय, काहेकि परमातिमा के तेज से, ओमाहीं उँजिआर होइ रहा हय, अउर मेम्ना ओखर दीपक आहीं। 24 जाति-जाति के मनई उनखे जोति माहीं चलिहँय-फिरिहँय, अउर धरती के राजा आपन-आपन धन-सम्पत ओमाहीं लइ अइहँय। 25 ओखर फाटक दिन माहीं कबहूँ बन्द न होइहँय, अउर रात उहाँ न होई। 26 अउर जाति-जाति के मनई धन-सम्पत, अउर महिमा ओमाहीं लइ अइहँय। 27 पय ओमाहीं कउनव अपबित्र चीजँय, इआ कि बुरे काम करँइ बाले, इआ कि लबरी बोलँइ बाले, कउनव मेर से न जाए पइहँय, पय केबल उँउन पंचे जइहँय, जिनखर नाम मेम्ना के जीवन के किताब माहीं लिखे हँय।

22 ओखे बाद उँ हमहीं सीसा कि नाई झलकत, जीवन के पानी के नदी देखाइन, जउन परमातिमा, अउर मेम्ना के सिंहासन से निकरिके, 2 उआ सहर के सड़क के बीचव बीच बहत रही हय। नदी के इआ पार, अउर उआ पार, जीवन के बिरबा रहा हय; ओमाहीं बारा मेर के फर लागत रहे हँय, अउर उआ हरेक महीना फरत रहा हय; अउर उआ बिरबा के पत्तन से जाति-जाति के मनई नीक होइ जात रहे हँय। 3 पुनि सराप न होई, अउर परमातिमा अउर मेम्ना के सिंहासन, उआ सहर माहीं होई, अउर उनखर दास उनखर अराधना करिहँय। 4 उँ पंचे उनखर मुँह देखिहँय, अउर उनखर नाम उनखे लिलारे के ऊपर लिखा रही। 5 पुनि रात न होई, अउर उनीं पंचन काहीं, दिया अउर सुरिज के उँजिआर के जरूरत न होई, काहेकि प्रभू परमातिमा, उनीं पंचन काहीं उँजिआर देइहँय, अउर उँ पंचे जुगन-जुगन तक राज करिहँय।

### यीसु के दुसराय आउब

6 पुनि स्वरगदूत हमसे कहिन, “ई बातें बिसुआस के काबिल, अउर सत्य हई, प्रभू, जउन परमातिमा के सँदेस बतामँइ बालेन के आत्मन के, परमातिमा आहीं, अपने स्वरगदूत काहीं एसे पठइन हीं, कि अपने दासन काहीं उँ बातें, जिनखर हरबिन पूर होब जरूरी हय, देखायँय।”

7 “देखा, हम हरबिन आमँइ बाले हएन! धन्य हय उआ, जउन इआ किताब के भबिस्यबानी के बातन काहीं मानत हय।”

8 हम उहय यूहन्ना आहैन, जउन ई बातें सुनत अउर देखत रहे हएन। जब हम सुनेन अउर देखेन, त जउन स्वरगदूत हमहीं ई बातें देखाबत रहे हँय, हम उनखे गोड़न माहीं गोड़न गिरँय के खातिर गिर परेन। 9 पय उँ हमसे कहिन, “देखा, अइसा न करा, काहेकि हम तोंहार, अउर तोंहरे भाई

परमातिमा के सँदेस बतामँइ बालेन के, अउर इआ किताब के बातन काहीं मानँइ बालेन के संगी दास आहैन। तूँ केबल परमातिमय भर के गोड़न गिरा।”

10 पुनि उँ हमसे कहिन, “इआ किताब के भबिस्यबानी के बातन काहीं बन्द न करा; काहेकि समय नेरेन हय। 11 जे अन्याय करत हय, उआ अन्याय करत रहय; जे पापी हय, उआ पाप करत रहय; जे कोऊ परमातिमा के नजर माहीं निरदोस हय, उआ निरदोस बना रहय; अउर जे पबित्र हय, उआ पबित्र बना रहय।”

12 “देखा, हम हरबिन आमँइ बाले हएन; अउर हरेक के कामन के मुताबिक बदला देइ के खातिर प्रतिफल हमरे लघे हय। 13 हम अल्फा, अउर ओमेगा, पहिल अउर आखिरी, आदि अउर अन्त आहैन।”

14 “उँ पंचे धन्य हँ, जउन आपन ओन्हा धोय लेत हँ, काहेकि उनीं जीवन के बिरबा के लघे, आमँइ के अधिकार मिली, अउर उँ पंचे फाटक से होइके सहर माहीं जइहँय। 15 पय कुकुरन, अउर जादू-टोना करँइ बाले, अउर ब्यभिचारी, अउर कतली, अउर मूरतिन के पूजा करँइ बाले, अउर हरेक लबरी काम करँइ बाले, अउर लबरी बोलँइ के इच्छा रक्खँइ बाले, बहिरेन रइहँय।”

16 “हम यीसु, अपने स्वरगदूत काहीं एसे पठएन हय, कि उँ तोंहरे पंचन के आँगे मसीही मन्डलिन के बारे माहीं, ई बातन के गबाही देंय। हम दाऊद के मूल अउर बंस, अउर भिनसारे के चमकत तरइया आहैन।”

17 पबित्र आत्मा अउर दुलहिन दोनव कहत हँ, “आबा!” अउर सुनँय बाला घलाय कहय, “आबा!” जे पियासा होय उआ आबय, अउर जे कोऊ चाहय, उआ जीवन के पानी सेंट-मेंत लेय।

### उपसंहार

18 हम हरेक काहीं, जे इआ किताब के भबिस्यबानी के बातन काहीं सुनत हय, गबाही देइत हएन, अगर कउनव मनई, ई बातन म कुछू बढाई, त परमातिमा उँ बिपत्तिन काहीं, जउन इआ किताब माहीं लिखी हई, ओखे ऊपर बढइहँय। 19 अगर कोऊ इआ किताब के भबिस्यबानी के बातन म से कुछू निकार डारी, त परमातिमा, जीवन के बिरबा अउर पबित्र सहर म से, जेखर बखान इआ किताब माहीं हय, ओखर भाग निकार देइहँय।

20 जे ई बातन के गबाही देत हँ, उँ इआ कहत हँ, “हाँ, हम हरबिन आमँइ बाले हएन।” आमीन। हे प्रभू यीसु अई!

21 प्रभू यीसु के किरपा, पबित्र लोगन † के ऊपर बनी रहय। आमीन।

† कुछ बाइबल माहीं “सब लोगन” के ऊपर लिखा हय